


El Nuevo Testamento
en mixe de Coatlán



New Testament in Mixe, Coatlán (MX:mco:Mixe, Coatlán)

El Nuevo Testamento en mixe de Coatlán

New Testament in Mixe, Coatlán (MX:mco:Mixe, Coatlán)

copyright © 1976 Wycliffe Bible Translators, Inc.

Language: Coatlán Mixe (Mixe, Coatlán)

Translation by: Wycliffe Bible Translators, Inc.

Mixe, Coatlán [mco], Mexico

Copyright Information

© 1976, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Coatlán

© 1976, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 11 Nov 2022 from source files dated 29 Jan 2022
4190de74-18ab-52cf-ba4e-5f99ab05892f

Contents

SAN MATEO	1
SAN MARCOS	43
SAN LUCAS	73
SAN JUAN	115
HECHOS	153
ROMANOS	191
1 CORINTIOS	212
2 CORINTIOS	232
GÁLATAS	246
EFESIOS	254
FILIPENSES	262
COLOSENSES	267
1 TESALONICENSES	272
2 TESALONICENSES	277
1 TIMOTEO	280
2 TIMOTEO	285
TITO	289
FILEMÓN	292
HEBREOS	293
SANTIAGO	307
1 PEDRO	312
2 PEDRO	318
1 JUAN	322
2 JUAN	328
3 JUAN	329
JUDAS	330
APOCALIPSIS	332

SAN MATEO Jaayhu:'my Jadu'n Nej Jesucristo Ytun Yjajti

Je Jesucristo ymij'ap ymijteedy

¹ Cham ngapxa'ñ nmäydağa'ñich pin Jesucristo y'ap'ajt yteedy'ajt jadu'n nej yhu:'my jaybety. Jesucristo je' oy ap'adyii teedy'adyii David etz Abraham.

² Abraham oy ung'adyii Isaac. Isaac oy ung'adyii Jacob. Jacob oy ung'adyii Judá etz y'ajchytijc y'uchytijc. ³ Judá etz Tamar oy ung'adyii Fares etz Zara. Fares oy ung'adyii Esrom. Esrom oy ung'adyii Aram. ⁴ Aram oy ung'adyii Aminadab. Aminadab oy ung'adyii Naasón. Naasón oy ung'adyii Salmón. ⁵ Salmón etz Rahab oy ung'adyii Booz. Booz etz Rut oy ung'adyii Obed. Obed oy ung'adyii Isaí. ⁶ Isaí oy ung'adyii rey David. Je rey David je' oy ytöxyijc'adyii huidi anajty Urias ytöxyijc'ajtpy. E je' ajcxy y'ung'ajti Salomón.

⁷ Salomón oy ung'adyii Roboam. Roboam oy ung'adyii Abías. Abías oy ung'adyii Asa. ⁸ Asa oy ung'adyii Josafat. Josafat oy ung'adyii Joram. Joram oy ung'adyii Uzías. ⁹ Uzías oy ung'adyii Jotam. Jotam oy ung'adyii Acáz. Acáz oy ung'adyii Ezequías. ¹⁰ Ezequías oy ung'adyii Manasés. Manasés oy ung'adyii Amón. Amón oy ung'adyii Josías. ¹¹ Josías oy ung'adyii Jeconías müd y'ajchytijc y'uchytijc. Huin'it Babilonia jäy oy mach je israelitas jäy. Chi minicxy jim Babilonia y'it.

¹² Jim ma je Babilonia y'it, jim Jeconías oy ung'adyii Salatiel. Salatiel oy ung'adyii Zorobabel. ¹³ Zorobabel oy ung'adyii Abiud. Abiud oy ung'adyii Eliaquim. Eliaquim oy ung'adyii Azor. ¹⁴ Azor oy ung'adyii Sadoc. Sadoc oy ung'adyii Aquim. Aquim oy ung'adyii Eliud. ¹⁵ Eliud oy ung'adyii Eleazar. Eleazar oy ung'adyii Matán. Matán oy ung'adyii Jacob. ¹⁶ Jacob oy ung'adyii José huidi oy ñäy'adyii María. E je María oy ung'adyii Jesús huidi yxii Cristo.

¹⁷ Jadu'n oy ñicxy majmactz najtzquëxi' Abraham ixti David. Ma je David jamajmactz najtzquëxi' chi je israelitas jäy yajtzim yajmajch ma Babilonia y'it, e nañ jamajmactz najtzquëxi' chiini oy ymiñ yja'ty je Cristo.

Jesucristo yma'xung'ajtin

¹⁸ Jadayab capxy ayuc jadu'n nej ymiñ yja'ty je Jesucristo. Jesús ytaj, huidi anajty yxii María, yi' ti anajty ycapxytungixy co ypigaangixy müd José; e ma anajty ca'ni ñaybudigüygixy, chi María oy y'ungdzimigü müd yi Dios yjihui'ñ ymic'ajt. ¹⁹ José, yi' ñäy, hue' anajty yi' yajpaty janch tudäy. Ca' anajty xihua'ñ María mayjäyjoy. Hue' janchtyi yhuinma'ñybaty co ixmadza'ñ ayüch ameech ca' pin yajnejhuihua'ñ. ²⁰ Huin'it ma jadu'n anajty nihuinmayi, chi Huindzin Dios tüg y'ängel ñayquëxici cumäyjoy ma José, chi ñimaayi:

—José, David y'ap y'oc, ca' mijcjee mdzachhuinmay nej m'octöxyijc'adiyb María, com yi' y'ung huidibi yajma'xung'adamy hue' müd Dios yjihui'ñ ymic'ajt ycixpi. ²¹ Yi' ypadamy tüg y'ung e mximöhuipy Jesús. Jadu'n yi' xii'adiyb com jëgix co yi' yajpocyñlhuädzam ñaax ycajp.

²² Tüg'óciy jada ytundaayi yja'taayi ycijxy yca'pxy jadu'n nej je Dios anajty ti nimäy je profeta, je jäy huidi Dios y'ayuc najtzcapxyip ma anajty jadu'n yjaybetyity:

²³ Je töxyjäy huidibi ca' yëydijc müddzinäy hue' je' ung tzmícp. Chi ypadamyb tüg je y'ung hue' je' yxii'adaanip Emanuel.

Emanuel hue' yhuimbizimü Dios müd ich ajt.

²⁴ Co José ymäyhuijy, chi cuyduñ jadu'n nej anajty Dios y'ängel ti nimäy, chi huoy María jadu'n nej jihuiy töxyijc'adyii. ²⁵ Per ni ca' ajcxy jadu'n chinaay jadu'n nej jäy ypic ychinäy ixti cooni oy María y'ung yajma'xung'aty. Chi yximoy Jesús.

2

Madza' ni'ixpigüyb oy co'ixüygixy pi'c'ung

¹ Jesús yma'xung'ajty ma tüg cajp huidi yxii Belén, jim ma Judea ñaaxjot, huin'it co anajty Herodes grey'aty ma yi jimbi naaxjot. Chi huin'it yja'ty ma Jerusalén cajp nijëjity yëydijctijc huidibi anajty ti choñ ma xii ypidzimy, yi huidibi anajty ajcxy xii madza' ti ni'ixpigüygixy. ² Chi ajcxy yajtiy:

—¿Ma je judiojy grey tiibi yma'xung'aty? Ti ich ajcxy ni'ixi yi' ymadza' jim ma xii ypidzimy, e yi' ich ajcxy ya miñ nhuindzigihuaangixy.

³ Co je rey Herodes jadu'n midooy, chi ooy ytiigü tajpi maybi müd tüg'óciy cajpjäy jim Jerusalén. ⁴ Huin'it je rey huomujctay tüg'óciy teedytijc huindzindijc huidibi anajty yaj'ixpijcp yi Dios yley, chi yajtiy ma anajty yma'xung'ada'ñ yi Cristo. ⁵ Chi ajcxy y'adzooy:

—Jim Belén ma Judea ñaaxjot, com Dios y'ayucnajtzcaxxiybi jadu'n je' cojaay:

⁶ E miich Belén, mabi Judea ñaaxjot, mij'ajtp mgix'ajtp ca'ydi jac huidi naax jac huidi cajp, com ma miich chona'ñ tüg Huindzin huidi ane' mam yi' israeljy.

⁷ Huin'it Herodes oy yajhuoyii ameech huidibi anajty ti ijxcixy yi madza'. Chi tiybijcy yajxon mina anajty oga'n ti ijxcixy je madza'. ⁸ E huin'it ajcxy quejxy jim Belén. Chi jadu'n nimay:

—Nixcix jim e ocnidiu ocyajtiugixy je pi'c'anäg; e co anajty ti mbatcixy, miñ miich ajcxy xyajnimäygyixyich jaydëbi iich nicxy nañ jadu'n nhuindzigiyich.

⁹ Co jadu'n rey najtzcaxxiyday, chi ajcxy choñ. E je madza' tiibi anajty ijxcixy ma xii ypidzimy, chi ajcxy ijxy jayijp je' anajty ñicxy ma je' ajcxy, ixti coní oy je madza' yhuäcxipy ma anajty je pi'c'anäg yajpaady. ¹⁰ Co je rey ixpicytjic jadu'n ijxy yi madza', chi ajcxy oy janch jotcuic ñajjihuiyii. ¹¹ Co ajcxy ytjctigiiy, chi ajcxy ijxy je pi'c'anäg müd ytaj je Maria. Chi jada' ajcxy ñaygojxtinaydaaci huindzigiiy ojadjaty ajcxy je pi'c'anäg. Chi ajcxy yaj'ahuach yxuumy aguejtucy abijctucy, chi ajcxy yajpidzimy oori, poom, etz tüg tzooy huidi yxii mirra. Chi ajcxy moy je pi'c'anäg. ¹² Chi cumäjoty ajcxy nimaayi co ca' huaad yhuimbijtcixy ma Herodes, chi ajcxy ñicxni ma ycajp, jüyöyñaxy ajcxy je Herodes, huingbi tü'aa ajcxy ycuynicx.

Co José etz María yqueegyñicxcixy Egipto

¹³ Co je rey ixpicytjic ajcxy yhuimbijttaayñi, chi cumäjoty José ijxy tüg Dios y'áangel, chi ñimaayi:

—Pidig, nicx jim Egipto ñaaxjot müd yi pi'c'anäg etz müd yi' ytaj, e jim mhui'mipy ixti cooni iich miich nimähuipy. Com yi Herodes y'ixtähuamy yi' yi pi'c'anäg e yaj'öga'ñ yi'.

¹⁴ Chi huin'it José ypidigü müd tzoof coodz je pi'c'anäg müd ytaj, chi ajcxy ñicxy jim Egipto. ¹⁵ Jim ajcxy y'ijty ixti cooni oy y'ögy je Herodes. Jada je' jadu'n yajcuydun jadu'n nej Dios anajty ti yminañ ma yi' y'ayucnajtzcaxxiybi: "Jim Egipto iich n'ung ti nhuoy."

Herodes pidacy y'ane'min co huen pi'c'anäg yaj'öctäyii ajcxy

¹⁶ Co Herodes oy huinma'ñ yajyöy co ti anajty ooy yhuin'ñiiyii je rey ixpicytjic ajcxy co ca' anajty ti ñihuimbidiy, chi ooy yjot'ambijcy, chi ni'ane'mdiy co huen nicxy jim Belén etz majaty cajp mihuingon Belén, yaj'öctaaygixy tüg'öciy yi pi'c'anäg huidibi mejtz jimijt etz huidibi ca'ni nigooty mejtz jimijt. ¹⁷ E jadu'n jada yajcuyduñ jadu'n nej anajty Dios y'ayucnajtzcaxxiybi, je Jeremias, anajty ti cojaay:

¹⁸ Jim Ramá yajmidoy co anajty chachjiy chachyaxy jäy ajcxy; yi Raquel tzachjiyib tzachyaaxp müd y'ung ajcxy ycixpi, ca' ajcxy anajty yjotcuic'aty müd co anajty y'ung ti y'öctäy.

¹⁹ Co oy y'öcni Herodes huin'it jim Egipto, Dios tüg y'áangel ñayguëxi cumäjoty ma José. Chi ñimay:

²⁰ —Pidig, müdnicx yi pi'c'anäg etz yi' ytaj jim ma yi' Israel ñaaxjot jadügtecy com ti y'öctaayñi yi huidibi anajty yaj'ögam yi pi'c'anäg.

²¹ Huin'it José ypidigü, müd nicxy yi pi'c'anäg etz yi' ytaj jim ma Israel ñaaxjot. ²² Per co José nejhuuy co je Arquelao yi' anajty jim ane'mb jadu'n nej anajty je yteedy Herodes, ooy chigiiy nej ñicxip jim. E co jadu'n anajty ti ycumäy co ca' jim ñicxip, chi ajcxy ñicxy jim Galilea ñaaxjot. ²³ Co jim yjäty, chi jim chinaydacpijcy ma je cajp huidi yxii Nazaret. Jadayaabi je' jadu'n tun jajt jadu'n nej anajty ycojaayty ma Dios y'ayucnajtzcaxxiybi ñeey co Jesús xii'adiiyb Nazareno.

3

Juan el Bautista y'ayuc capxhuäcxy ma tidz naax it

¹ Huin'it tiempo nañ jadu'n Juan je Bautista (huidibi jäy yajniibejtpi) ymiñ tüg tigidum ma Judea ñaaxjot capxhuäcx Dios y'ayuc, ² yminañ:

—Jothuimbijtcix ma Dios com yi Dios y'ane'min huingonñi yi'.

³ Jada Juan yi' je' huidibi je profeta Isaias nigapxy yminañ: Jim mijiigidum yajmidoy tüg ayuc mina'ñ: "Ni'ixiiygixy yi mHuindzin ytü'aa, ni'ixiiygixy tüg tü'aa tiybi."

⁴ Je Juan hue' anajty yhuitt'ajtpy iyujc nibijc (huidibi jäy ytijpy camello) e hue' anajty yhuinip iyujc ac, e yi' anajty yjicxy'ajtpy mu' etz tijaty iyujc päg jim tüg tigiduum. ⁵ Chi choof jim Jerusalén jäy etz tüg'öciy huidijaty tzinaayb ma Judea ñaaxjot, nañ jadu'n huidijaty tzinaayb ma Jordán mijniiba', ñicx ajcxy ma Juan amido'ijtiy yi' y'ayuc. ⁶ Co anajty ajcxy nigapxtaaygixy yi ypocy huidi anajty ti tundigooygixy, huin'it anajty ajcxy Juan yajniibedyii ma Jordán mij ni.

7 Per yi Juan y'ix co may fariseo jäy etz saduceo jäy miñ anajty ajcxy nübejtcixy, chi ajcxy nimay:

—[Miich ajcxy, m'ajuugy m'amigüg ahua'n iyujc! ¿Pin ti xyajni'ixiigixy nej jëbi huaad mgögueccixy yi ayo'n huidibi huingomb? 8 Yajxon jäy'ajtcix tiydudägy huen niguëxigy co ti mjothuimbijtcixy. 9 Ca' jadu'n mdzachmînaangixy co Abraham xy'ap'adyii xy'oc'adyii. Hich miich ajcxy yam ndimnîmaayb co Dios ixti jëbi yi' yaj'ap'adyii yaj'oc'adyii Abraham jada tzaajot ca'ydî miich ajcxy. 10 Yi jach ni'ixî yi' y'ijtnî ma quipy y'ijx, tûg'óciy quipy huidi ca' oy ytim'aty yajpuxp yi', e chi jada' yajnôgy jünjoty. 11 Hich, janch yajniibejtpich müid nîi, yi' yi' jadu'n nej tûg ixpejt co ti mjothuimbijtcixy; per jacminamb tzojc huidi ajcxy xyajniibejtpy müid Dios yjihui'ñ etz müid jün. Je' ymüid mic'ajtn etz cõtujcîn, nîgi ca'ydî iich, ni xycapaadyich nicxy ycîg nyajtecyjendügyich. 12 Ymüid mic'ajtn pijc-huäcxamy yi jäy jadu'n nej jäy huimbojy moc, abicy pîdäga'ñ actz, abicy moc pajc. Yujcpîga'ñ moc pajc ma tze'x ninöghua'ñ yi moc actz moc jaam jünjoty ma je jün huidibi nicamînaaxî ycapîch.

Co Jesús nübejty

13 Huin'it Jesús chooñ ma Galilea ñaaxjot, chi ñicxy ma Jordán mij nîi ma anajty Juan yjäyayniibety, nübedam anajty yi' nañ jadu'n. 14 Juan ca'jadim'a'ixîy, chi nimay Jesús:

—Hich miich ixipy xyajniibejtpich, ¿e miich mimb ma iichi?

15 Chi Jesús y'adzooy:

—Jadachambi oc'a'ixî jadu'n, com ooy yi' ycopityity co nguydundayim tûg'óciy tiibi Dios xyaj'ane'mim.

Huin'it Juan a'ixîy chi yajniibejty Jesús. 16 Co Jesús nübejttay, chi Jesús ijxy Dios yjihui'ñ ñigîdägyii jadu'n nej tûg pi'cmuuxy. 17 E huin'it yajmîday tzejpcixy tûg ayuc ymîna'ñ:

—Jada je' iich n'ung'ajtypich huidibi ooy ndzocyich huidibi ooy müid jotcujc nayjihuiyijich.

4

Je mujcu' tuñ ixta'ni Jesús

1 Chi Dios yjihui'ñ yajnicxy Jesús mîjtigîduum jaydëbi je ca'oybi yjot'ixiïyb yhuinma'ñ'ixiïyb. 2 Jim y'ijty jaygay huixchigui'px xîi huixchigui'px tzuum, e huin'itni ooy yiböccodyii. 3 Chi je ca'oybi nimîjhuägy Jesús ocjot'ixa'ñ oc-huinma'ñ'ixa'ñ, chi nimay:

4—Pen Dios miich xy'ung'ajtp, nîma' jada tzaa huen naygojyîi tzejcaagy.

Chi Jesús y'adzooy:

—Jaybety jadu'n ymîñ ma Dios ñecy: “Ca'p jäy tzejcaagyti'ajty nitzinähuiipy, nañ jadu'n nitzinähuiipy tûg'óciy yi ayuc huidibi Dios ycapxp.”

5 Chi je ca'oybi müidnicxy Jesús jim Jerusalén, chi ymüidpejty tzejptijc cöduum. 6 Chi nimay:

—Pen janch co miich Dios xy'ung'adyîi, cödîjpnax jîiby naaxcîxy, ca' yi' nej mjadîpy com jaybety jadu'n ymîñ co jadu'n ymîna'ñ:

Dios yquexyp yi' y'áñgles jigix xycuend'adîpy xyhuidîzîpy müid yci', ca'ydî ninej mgönepy ma tzaagop.

7 Chi Jesús y'adzooy:

—Nañ jadu'n ymîñ jaybety: “Ca' mjet'ixipy mhuinma'ñ'ixipy yi mhuindzin Dios.”

8 Jadüg'oc je ca'oybi ymüidajty Jesús ma tûg copnîcx janch cijxpi, e jim yajni'ixiïyday tûg'óciy naax cajp co ooy müidity oy'ajtn etz mic'ajt. 9 E chi nimay:

—Hich jada miich nmoydähuiipy tûg'óciy, pen miich cojxtina' xyhuindzigîgyich xy'ojadatyich.

10 Huin'it Jesús y'adzooy:

—Huinhüactucich miich mujcu', com jadu'n yjaybetyity: “Tûgpajc yi mHuindzin Dios yi' mhuindzigîhuiipy m'ojadadîpy.”

11 Huin'it je ca'oybi huinhüactucy Jesús, chi Jesús ñimiîni áñgles ycuend'ajti.

Jesús ytung yajtzondacy jim Galilea

12 Co Jesús nejhuiy co Juan ti anajty yajpidägy pujxtigoty, chi yhuimbijtni jadüg'oc jim Galilea. 13 E ni ca' yhui'miïy jim Nazaret, chi ñicxy jim Capernaum, jim ma Zabulón etz Neftalí y'it. 14 Jada je' jadu'n tuni jajtî jadu'n nej Dios y'ayucnajtzcäpxiïyb Isaias anajty ti cojaay:

15 Zabulón etz Neftalí ñaaxjot. Je tü'aa huidibi mejypa' huidibi a'oy'amy ma Jordán mij nîi. Jim Galileajäy chinäy huidibi ca' yjudiojâyity.

16 Yi jäy ajcxy huidibi jim tzînaayb agootztuuby iïxpaty ajcxy tûg tiicxin jajin. Je huidijaty anajty ajcxy tzînaayb ma je jibîcpi y'anîciy, chi ajcxy ycodîcxiy tûgi tiicxin jajin.

17 Ixti huin'it Jesús ytigîy ayuccäpxhuäcxp ymîna'ñ:

—Jothuimbijtcix, yajmingix yajmejtzcix mjet mhuinma'n ma Dios, com y'i Dios y'ane'min huingonip y'i'.

Jesús nimay nimidaax je acxmajtzpi: "Pajamgich"

¹⁸ Jesús tūyōyb anajty ma Galilea mejypa', co iɣxpaty metz yēydjɛ ac tūg quēxpɪ, hue' anajty y'i' je' je' Simón, huidibi nañ jadu'n yxii Pedro, e je jadūgpi hue' je' anajty Andrés. Acxmadzi anajty ajcxy y'i' ytung'ajty e jim anajty ajcxy y'i' tzachnūgōhuich y'acxmadzi'n. ¹⁹ Chi Jesús nimay ajcxy:

—Pajamgich, iɛh miich ajcxy nyajni'ixihuipy nej jāy myaj'ixpigipy je Dios ytiy'ajt.

²⁰ Huin'it je' ajcxy ixmajtztay tūg'óciy y'i' y'acxtaay, chi ajcxy panicxy Jesús.

²¹ Hueeni jac'amijci'm Jesús iɣxy janimetz Zebedeo ajcxy ymang, je Jacobo etz Juan. Jim anajty y'i' ajcxy ma tūg barco mūd yteedy, y'i' anajty ajcxy y'i' jim chach'adagūyb y'i' huidibi m'acxmajtzcixy. Chi ajcxy Jesús yhuoohui. ²² E huin'it ajcxy ixmajtztay je barco etz y'i' yteedy, chi ajcxy panicxy Jesús.

Jesús yaj'ixpicy mayjāy

²³ Huidijttay Jesús ma tūg'óciy Galilea ñaaxjot, yaj'ixpicy jāy majaty je naymujctac cajp cajp. Capxhuācxy y'i' Dios ytiy'ajt etz nañ jadu'n pa'mjāy yajtzocy huen ytimyhuidipá'mity anajty ajcxy ymūd. ²⁴ Chi Jesús oy yajnejhuūyñi ma tūg'óciy y'i' Siria ñaaxjot, e chi ajcxy mūdmiñ ma Jesús tūg'óciy huidijaty anajty ajcxy ca'oybi mūd, etz huidijaty anajty ajcxy cixuxy tecyuxy, chi Jesús yajtzoocy. ²⁵ Huin'it Jesús ypanicxi mayjāy huidijaty anajty ajcxy tzinaayb ma Galilea ñaaxjot etz y'i' Decapolis jāy, nañ jadu'n Jerusalén jāy etz huidijaty tzinaayb ma Judea ñaaxjot, nañ jadu'n huidijaty anajty ajcxy tzinaayb a'oy'amy ma Jordán mij nii.

5

Je tiy'ajt huidibi Jesús ycapx ma tūg cōgop

¹ Co Jesús iɣxy tūg'óciy je mayjāy, chi nicxy ma tūg copnīcx, e chi jim y'ixtacy. E huin'it je' y'ixpijcpidjɛ ajcxy yjūbigūy. ² Chi Jesús ytiy'aj yaj'ixpijcp ymīnañ jadu'n:

Je pinjaty ajcxy jotcūjɛp

³ —Janch jotcujɛ je jāy ajcxy huidibi nejhuūyb co yajmayjajtpy Dios y'oy'ajt, y'i' ajcxy paatip Dios y'ane'min.

⁴ Janch jotcujɛ je jāy ajcxy huidi yajpatp taj may, y'i' ajcxy yajmōhuam jotcujɛ'ajtin.

⁵ Janch jotcujɛ je jāy ajcxy huidibi yung naxpy jāy'ajtp, y'i' ajcxy padaamb tūg'óciy je huidi Dios ti yaj'ahuanīyū.

⁶ Janch jotcujɛ je jāy ajcxy huidibi cuydunamb huidibi Dios chojɛpy, Dios y'i' ajcxy pubedūb.

⁷ Janch jotcujɛ je jāy ajcxy huidibi pa'ayoob huenyimpinājyity, Dios nañ jadu'n ajcxy pa'ayohuūb.

⁸ Janch jotcujɛ je jāy ajcxy huidibi huādz yjot yhuinma'n, y'i' ajcxy y'ixipy y'i' Dios.

⁹ Janch jotcujɛ je jāy ajcxy huidibi ca' ti tzip tzojccixy, com y'i' ajcxy Dios ung'adiūb.

¹⁰ Janch jotcujɛ je jāy ajcxy huidibi yajnixiicp yajnigapxp mūd je Dios ytiy'ajt yciɣpi. Y'i' ajcxy idamb ma Dios y'ane'min.

¹¹ Janch jotcujɛ miich ajcxy co jāy jibic xytungixy co nigoob xyñīhuambejtcixy etz capxcixy huidijaty ca' ytiy'ajty mūd iɛh yciɣpi. ¹² Xondaaccix jotcuj'ajtcix co mbadaangixy tūg oy'ajtin jibiy tzajpjoty. Nañ jadu'n ajcxy ixhuidijty pahuidijty je Dios y'ayucnajtzcaxūyb jecy'ajty.

Miich ajcxy je tudāgyjāy ya naaxhuñ

¹³ Jadu'n nej caan ca' yajpūch je tzūch jūcxy tim jadu'n miich ajcxy myajpaady ya naaxhuñ. Pen je caan ca' mūd ti xūcx'ajtin, ŗnej jēbi nyajtuunim? Ca' y'oc'oyyajtunity, chi yajnajtzcixiūyñi, chi yhuani tembejt hua'cpejt.

¹⁴ Oc'ix tūg je cajp jim copcix, ca' jēbi mhuijtyūdzm mgoyūdzm. ¹⁵ Co tūg jūn nyajtoyicim, ca' huaad tu'tz ngōujpim. Hue janchtiy co nyajtiicxim cix, huin'it jēbi xycodicxtaayim jadu'n nej ajt nyajpaatim ma tijc. ¹⁶ Nañ jadu'n miich ajcxy mdzinaaygixy tudāgy ma ajcxy je mayjāy jaydēbi ajcxy ixipy je oybi huidi miich ajcxy mdumy. Huin'it ajcxy ojadadipy je mDios teedy huidibi jibiy tzajpjoty.

Jesús yaj'ixpicy nej y'i' y'i' Dios ycōtūjɛn

¹⁷ Ca' mhuinmay co iɛh ti nmiñich ya co nbīgaanich je Dios y'ayuc je' huidibi anajty ti jaay Moisés etz je profetiɣ. Ca' iɛh nyajmijaagixa'n je cōtūjɛn, iɛh ti nmiñich co nguyduna'ñich jadu'n nej ymiñ jaaybety. ¹⁸ Janch tiy'ajt jadu'n nej nīmaaygixy, je huidibi mimb jaaybety jadu'n tundāhuam jajtāhuam. Ni tūg letra oy mabaad ymūdzy nicxy ycayajcuyduñ. ¹⁹ Je jāy

huidibi ca' nimidooy je Dios ytiy'ajt oy yjadim mutzjaty etz yaj'ixpicy jay jadu'n, je' ajcxy padamb je mutzpi tigiydac ma Dios y'ane'min. Paady je jay huidibi yaj'ixpijcp jadu'n nej tiy'ajt ymina'n, e paduñ jadu'n nej yaj'ixpicy, je' ajcxy padamb tüg je mijpi tigiydac ma Dios y'ane'min. ²⁰ Hich miich ajcxy nimaayb, pen ca' miich ajcxy jac'oy mdungixy ca'ydi fariseos etz escribas ajcxy, ca' nimina mdigihuipy ma Dios y'ane'min.

Jesús yaj'ixpicy co ca'p huaad pin yjotmädy

²¹ Miich ajcxy mnejhuüyigixy jadu'n nej yi m'ap mdeedy ajcxy ayuc yajhui'my: "Ca' jay myaj'ögip; e pin anajty jay yaj'öcp ypaadip je tzaachypi." ²² Hich miich ajcxy jadu'n nimaayb pinjaty ymigügtijc mijotma'tp, je' Dios tiydunaanipy; e pin ymigüg xüdiijp tzuudijp, yajtiydunipy je' ma Dios tiydundac; e pin ymigüg tzuudijp locidijp ayo'ndumb, je' y'ity co ñicxip ayoodactuuby.

²³ Pen myajnicxpy miich mhuindzigi'n ma Dios ytiyc, e pen jim jäymetzgodyi co mmigüg ti xyhuin'innaxy ti xyhuincapxynaxy yinjaty hueenjaty, ²⁴ jim myajhui'm je huindzigi'n ma je altar yhuinduu, e nicx jayijp nayyaj'oyihuñ müd je migüg, huin'it mhuimbedip e chimgiyecy je mhuindzigi'n.

²⁵ Tzoc naygapxjotcidägi müd je midzip, pen yam müd tüyöy nñ'am tü'am, ca' jecyity co je midzip xyciyegip ma juez, e je juez xyciyegip ma je policia, e je' nicxxy xypidägy pujxtigoty. ²⁶ Janch tiy'ajt hich miich nimäy co ca' jilby mbidzimipy ixti cooni mgüejtähuipy je meefñ.

Jesús yaj'ixpicy co ca'p ndundigóoyimipy müd huingbi töxyjäy

²⁷ Miich ajcxy mnejhuüyib co jecyip tiy'ajt ymina'n: "Ca' mmidundigoyipy huingbi töxyjäy." ²⁸ Hich miich ajcxy nimaayb, pen ji pin huindicxy tüg töxyjäy, e jot'adüyb nejaty, ti je' anajty ñitundigooyñi ma yjot yhuinma'n.

²⁹ Pen yi mhuin a'oy amybi xyajtundigoyamb tim yajpidzim; jac'oy co tüg'idu'mbi mhuin ytigoyipy ca'ydi co cixyca'px mnicxipy jijnjoty. ³⁰ E pen yi mgi' a'oy amybi xyajtundigoyamb tim ixpux etz najtzjibibi' jiguem; jac'oy co tüg mgi' ytigoyipy ca'ydi co mminicxipy metz mgi' jijnjoty.

Jesús yaj'ixpicy co jay ca'p huaad ytöxyijc ixmach mañ'ajtingixy

³¹ Nañ jadu'n ymiñ jaaybety: "Pin ixmajtzp ytöxyijc, huen möhuipy tüg necy ti ycixpi co ñay'ixmájtzigixy." ³² Hich miich ajcxy nimaayb, pen ji pin ixmach ytöxyijc, e ca' anajty ti ytundigooy müd huingbi yëydijc, je yëydijc anajty nigiydeyüyb ytöxyijc co anajty ytundigooy müd huingbi yëydijc; pin yëydijc pijcp müd je töxyjäy huidibi anajty ti yaj'ixmach, pocy-tumyb je' anajty.

Jesús yaj'ixpicy nej nguyduunim tübi n'ahuanüym ma Dios yhuinduu

³³ Miich ajcxy mnejhuüyib nej jecy'ajty m'aptijc mdeedytjic ajcxy yajnimay: "Ca' nigo ti m'ahuanihuipy, mguyduunipy jadu'n nej anajty ti mmina'n." ³⁴⁻³⁶ Per hich miich ajcxy nimaayb: ni mgi'übaadip ni mgacapxpaadip; ni mgamina'nip; "y'ijxpy tzajpjotypi," com yi' Dios chinaydac. E ni mgamina'nip, "y'ijxpy naaxhuiñybi," com Dios yajpatp oy ytimymaajty. E ni mgamina'nip; "y'ijxpy Jerusalén," com jim je' Dios chajptijc; ni mgi'übaadip ni mgacapxpaadip mgohuajc, com ca' mjayty myaj'ahuimbity poob o tzixy tüg cöhuay. ³⁷ Hue' janchtiy, tiydudägy minaangixy: "oy" o "ca'." E pen miich ajcxy anaxy jaccapxp jadu'n mujcu' y'ayuc je' anajty ajcxy mgapxpy.

Jesús yaj'ixpicy co ca'p huaad jibic nayjahuimbijtim

³⁸ Miich ajcxy mnejhuüyib co jecy'ajty yajminañ: "Pen ji jay mhuin xyajpidzimi, nañ tim jadu'n yhuin myajpidzimipy; pen ji migüg mdüzt xyajpidzimi, nañ jadu'n myaj'ahuimbidity." ³⁹ Per hich miich ajcxy nimaayb: Ca' myaj'ahuimbidity jibicpi ma migügtijc; pen ji pin xycoxy ma mhuñyijp tüg adu'mbi, jac tim mo' jadüg adu'm'amybi. ⁴⁰ Pen ji pin xyxiy e xypigaani yi mñjen, najtz'ixi', huen xyajnicxi nañ jadu'n mjocx huit. ⁴¹ Pen ji pin adzip tizmy xyajminicxa'n tüg kilómetro jiguemiy, yajnicx jac tim jadüg kilómetro. ⁴² Pen tijaty xypijctzoohui, mo'. E pen ji pin xyminuucxa'n, yajnuucx.

Co ndzojcm nmidzip

⁴³ Jadu'n ymiñ jaaybety nej jecyip Moisés yjay: "Migüg'adii yi' huidibi xymigüg'ajtp, e midzip'adii yi' huidibi xymidzip'ajtp." ⁴⁴ Hich miich ajcxy nimaayb: Tzoc yi' huidibi ajcxy xymidzip'ajtp, etz mibijctzoohui ma Dios huen y'oy'ajtin paady yi' huidibi xyñigapx xyni'ojüyb, e nañ m'oyjäy'at yi' huidibi xyca'ixamb. ⁴⁵ Huin'it miich ajcxy xy'ung'adii yi' Dios tzajpjotypi huidibi yxi' yajtiicxp yajjajp ma oyjäydijc etz ma jibicjäydijc, nañ jadu'n yajtiy ma jibicjäydijc etz ma oyjäydijc. ⁴⁶ Pen miich ajcxy ndzojcpy je huidibi xychojcp, çti jaygidaacin yi' m'ocpadamyb? Nañ jadu'n yi' ajcxy yja'idüztzp yi' pocyjäydijc etz yi' yajcogüejtpidijc. ⁴⁷ Pen miich ajcxy mgapxpocxyp yi' mjugymigüg, çti oybi yi'? Nañ jadu'n

ajcxy yí' yja'idíitp yí huidibi ajcxy ca' Dios nejhuiygixy. ⁴⁸ Jáy' ajtcix tudágy jadu'n nej ajcxy yí mdeedy tzajpjoty yí tudágy.

6

Jesús yaj'ixpicy co nduunim oy yjá'yajin

¹ Ca' mdungixy je oybi ma jáy y'ixy yhuindicxy müd co mdzachyajhuindicxaangixy co mdungixy oybi. Pen jadu'n m'idíitcixy mDios Teedy huidi jibby tzajpjoty tzinaayb, ca' ajcxy xymöhua'ñ je oy'ajin. ² Paady co mbubedipy mmigüg, je ayooobi jáy huidi yajmayajtpy tijaty, ca' huaad mnigapxy mnimiädgy o mnaygömayii co anajty ti mmöy tijaty. Yí' jadu'n idíitp je jáy huidi mij cix nayjihuiyip huidi anidaacp co huen jáy y'ixyii mijpidägyii co anajty jadu'n y'idich. Janch ich müich ajcxy jadu'n nimaaygix co yí' ti patcixy je oy'ajin. ³ Co müich mmöhuiipy mmigüg tijaty yajmayajtpy, hue' janchtiy mdunipy ca' myajnejhuihuipy huidi müd mnaymigüg'adyii. ⁴ E co müich amof m'idipy, mDios Teedy huidi ijxp co amof tijaty mduñ, je' xymöhuamb tüg oy'ajin mayjäyduum.

Jesús yaj'ixpicy nej Dios mbijctzoohuim

⁵ Co müich ajcxy Dios mbijctzoy, ca' jadu'n m'idíitcixy jadu'n nej je jáy huidibi capxtacp ma Dios huin aguy ahuac aguy. Yí' ajcxy capxtacp ma Dios huäctina' jibby tzajptigoty jaydëbi jáy y'ixiib etz ymijpidägyib. Ich jëyi jadu'n nimaayb, co jadu'n oy'ajin'adiyb. ⁶ E co müich Dios mbijctzoy, nixx tigoty etz m'agihuipy je mdijc aguu. Huin'it Dios mbijctzou. E je Dios y'ijxpy ymidooyb co jadu'n mbijctzoy, e je' je m'oy'ajin xymöhuiipy mayjäyduum.

⁷ Com Dios mbijctzoy, ca' m'agapxiyo'cip je huidi anajty ti m'occapxi, jadu'n nej ajcxy y'idíitcixy huidi ca' nejhuiygixy Dios ytiy'ajt. Yí' ajcxy huinma'ñypidägy co müd ajcxy ymay'ayuc huin'it ajcxy ymidoohuiyb. ⁸ Ca' jadu'n m'idíitcixy jadu'n nej je' ajcxy; mDios ñejhuiyb ti müich ajcxy myajmayajtpy ma anajty ca'ni mbijctzooyñi. ⁹ E jadu'n müich ajcxy Dios mbijctzohuipy, jadu'n mina'nip:

Dios Teedy, müich huidibi tzajpjoty tzinaayb; huindzigiy müich mxii y'ity.

¹⁰ Huen miñ ya müich yí m'ane'min. Huen mdzojcin yajcuyduñ ma je jáy yjot yhuinma'ñ jadu'n nej yajcuyduñ jibby tzajpjoty.

¹¹ Mooygich ajcxy ngaayin n'uucin jabom jabom.

¹² Mëexibich ajcxy nbocy ngaydey huidibi ich ajcxy ndundigooyb, jadu'n nej ich ajcxy meecxyich huidibi ajcxy xymidundigooybich.

¹³ Ca' m'a'ixiy co ich ajcxy nhuinma'ñ tigoyipich. Yajñihuatzcich ajcxy ma yí jibicpi. Co müich yí' mje' je cötujcin, je mic'ajin etz je oy'ajin huinixii huinitiempo. Amén.

¹⁴ Pen müich ajcxy mhuinmeecxyp je huidibi xymidundigooygixp, je mDios Teedy huidibi tzajpjoty je' nañ jadu'n xyhuinmeecxip müich ajcxy mbocy. ¹⁵ E pen müich ajcxy ca' pín jáy mhuinmeecxy je xymidundigooygixy, nañ jadu'n mDios ca' xyhuinmeecxip ajcxy ma ti mdundigooygixy.

Jesús yaj'ixpicy nej huaad n'ijim jaygaay

¹⁶ Com ajcxy m'ida'nip jaygaay jay'ügy (mina Dios mbijctzoogixy), ca' mnaybidäaccigixy tajy may, jadu'n nej ajcxy idíitcixy yí' huidibi ajcxy minamb co Dios mbijccixy e ca' yjanchity. Yí' ajcxy yajtigajchpy yhuifijip jigix jáy ajcxy oc'ixiib co jaygaay jay'ügy y'ijtcixy; jëyi jadu'n oy'ajt'adiyb. ¹⁷ Müich ajcxy co m'idipy jaygaay jay'ügy jotcujc naybidägi, caax mgohuajc etz puj mhuin mijp. ¹⁸ Ca' ydi myajnigüexig mayjäyoty co m'ity jaygaay jay'ügy, hue' janchtiy myajnigüexig ma je mDeedy huidibi ca' yaj'ijxy; e je mDeedy huidibi ijxp huidibi müich ajcxy ca' mduñ ijxna' quëxna' yí' xymöhuiipy oy'ajin mayjäyduum.

Je jugy'ajin tzajpjoty

¹⁹ Ca' nigi m'adzocy huidibi ya naaxhuiñ, je' co ya huindigooyb oy ytimtijity huidibi yí huech yajhuindigooyb, huidibi tougaayip etz ma je meetzpi ajcxy meetzcixy pigiccixy tijaty. ²⁰ Je' müich nijot'ajtcixy je' oy'ajt huidibi müich ajcxy Dios xymöhuamb jibby tzajpjoty ma ca' huech yajhuindigooy ni ti, e nañ ni ycatougaayii ni ti, etz ma je meetzpi ca' ajcxy meetzcixy pigiccixy tijaty. ²¹ Ma müich ajcxy müidity je oy'ajt nañ jibby ajcxy mjet mhuinma'ñ pidäg.

Yí mhuin jadu'n yí' nej tüg tiicxin

²² Yí mhuin yí' yí' jadu'nip nej tüg tiicxin jain ma mnñicx, e paady pen ca' müich yí mhuin xyajtundigoy, tüg'óciy mjet mhuinma'ñ huädz yí'. ²³ Pen müich mhuin xyajtundigoyb nañ jadu'n mjet mhuinma'ñ huidi müich müd ca' y'oyity, jadu'n yí' nej coodzpi ijac tim nigi ca' y'oyity ca' ydi je coodzpi!

Dios etz je comeñ'ajin

²⁴ Ni tög pin ca' huaad müd tuñ metz huindzin com mijotma'ti tög je', e jadügpí chogipy; o ixtijipy tög e jadüg ymügü'adiyb. Nañ jadu'n ca' huaad müch ajcxy metz m'ojadajcixy, Dios etz je meefi.

Dios ycuend'ajtpy yi' yjāy

²⁵ Paady iich müch ajcxy nimaaygixy: Ca' mdzachhuinmaaygixy ti ajcxy mnitzināhuipy, ti ajcxy mgayipy m'ügipy o ti ajcxy mhuit'adiyb mducxy'adiyb. MDios yi' ti xymooygixy je mjugy'ajtin, e paady ycixpi yi' nejhuüyb ti ajcxy myajmayajtpy. ²⁶ Oc'ix müch ajcxy yi' joon huidi queec-huidijtp. Yi' ajcxy ycaniipcixy ycatungixy, nañ ni ca' yi' ajcxy yujpjcixy ma tze'x. Müch ajcxy mDios Teedy huidi tzajpjoty tzinaayb, je' moydaayb huidi ajcxy yi' yjücxyp. E müch ajcxy mjactzoobatp ca'ydi yi' joon. ²⁷ ¿Pin ji ma müch ajcxy, ooy mij jahuinmay, jēbi tög nuux yjacyeegy?

²⁸ ¿E na'amy co müch ajcxy mdzachnidajy mdzachnimay müd je mhuit mducxy ycixpi? Oc'ix müch ajcxy nej yoñ tög je pijy huidi yajpatp tun nīgap. Ni yi' ycatuñ ni piidy. ²⁹ Per janch tiy'ajt jadu'n nej nimaaygixy, ni je comeefiyjāy huidi yxi rey Solomón, ni ycaquipxiy je' yxojxin müd je pijy. ³⁰ E pen mDios xojpxy jadu'n je aay ujtz cham etz tzojcy ytiütztāy ñicxtāy, jac nīgi müch ajcxy Dios xymōhua'ñ huidibi myajmayajtpy, müch ajcxy huidibi hueeni mmibijcin. ³¹ Paady ca' nigoobi mdzachhuinmaaygixy ma ajcxy mbaadip ti mgayipy m'ügipy o ti mhuit'adiyb mducxy'adiyb. ³² Yi' jāy ajcxy huidibi ca' mibicy yi' Dios oy tzach nijot'ajtcixy jadayaabi, per müch mDeedy huidibi tzajpjoty je' ñejhuüyb ti müch ajcxy myajmayajtpy. ³³ E pen müch ajcxy mbidacpy Dios jayijp ma mjet mhuinma'ñ etz mguydun ajcxy yi' y'ane'min, huin'it müch ajcxy Dios xymōhuipy tijaty myajmayajtpy. ³⁴ Paady ca' mhuinmaaygixy cham müd je jabom cixpi, je' co je jabombi ymimñ je tajin mayin. Tzoc mijotcuic'ajtim je tajin mayin huidi cham mminajx nyajnajxim.

7

Ca' mbocy icy yi' mmigüg

¹ Ca' m'ix'ixpxy mba'ixpxy ti mmigügtijc ytundigooyb, jigix ca' Dios xytiydunipy chaachytunipy. ² Pen müch m'ix'ixpxy mba'ixpxy mmigügtijc ti ytundigooyb, nañ jadu'n müch Dios xytiydunipy xychaachytunipy, e yi' quipxi'ñ huidibi müch mhuamyb quipxi'ñ, nañ yi' Dios yajtunamyb ma müch. ³ ¿Nej co müch m'ixy huidibi mmigüg ytumyb e hueeni ytundigooyb, e ca' mnay'ixyii huidibi müch jac mij mdundigooybi? ⁴ ¿Nej jēbi mmigüg m'ocnīmāy: "Nbubedambych müch ca'ydi mjacpocytuñ", e müch yam m'ocmüdpī jac mij pocy? ⁵ Müch ci'm mnayhuin'ññyii. Nicx jayijp mbocy mgaydey ocyajhuadz, huin'it jēbi mbubety je mmigüg.

⁶ Ca' mmōy yi' jibicjāydijc huidibi Dios yjē'ajty co nicx camij'ixx camijpidaaccixy; ni mgayegipy Dios y'ayuc ytiy'ajt ma yi' jāy ajcxy huidibi ca' tzojccixy Dios y'ayuc ytiy'ajt.

Nbijctzoohuim n'amidoohuim Dios

⁷ Mibijctzougix yi' Dios e yi' xymōhuipy ajcxy; ixtaaygix, huin'it mbáatcixipy; cogapxixgix e ahuaadz ajcxy mdijc agu. ⁸ Com pin tijaty pijctzoob ypaatp yi'; e pin tijaty ixtaayb ypaatp yi'; e pin cogapxixy ma tijc agu, yaj'ahuaatzip ytiy' agu.

⁹ ¿Nej ji jada' müch ajcxy nidügti co m'ung pijctzoohuipy tzajcaagy nej mmōhuipy tög tzaaj? ¹⁰ ¿O pen ypijctzooby tög acx nej mmōhuipy tög tza'ñ? ¹¹ Müch ajcxy oy mibicjāyity e mjaipaj ajcxy nej m'ung m'anāg mmōhuipy je oybi. ¡Nīgi Dios Teedy tzajpjototy mōhua'ñ je oybi pinjaty pijctzoob!

¹² Tzinaaygix tiydudāgy müd je mmigügtijc, pen müch ajcxy mdzojcpy co je mmigügtijc chināhuipy tudāgy müd müch ajcxy; com jadu'n y'ane'my Moisés yley etz yi' Dios y'ayuc najtzcapxixy ajcxy ñecy.

Je xützpi tü'aa

¹³ Tigüygix ma yi' tigiyiyydac xützpi: yi' tigiyiyydac etz yi' tü'aa huidibi ja'tp ca'oydactuuby mij huin yi', e may jāy ajcxy oy ji ytiyiygixy. ¹⁴ E janch je tigiyiyydac etz yi' tü'aa huidibi ja'tp ma je jugy'ajtin huinixiibi, xüdze' etz tzip naxiyyñ; janch tim hueeni jāy huidibi ji nicxiyb.

Yi' jāy yhuinma'ñ müd ñiguexigy pen oyjāy o pen ca'

¹⁵ Nayguend'ajtigix müd yi' jāy anijatapy huidibi ajcxy minamb co Dios ytiy'ajt yaj'ixpijcp, huidibi ajcxy huidijtp janch yung janch naxy ñaybidaaccixy nejihuüy ooy oy huinma'ñ müdity; nigoobi ajcxy jadu'n ñaybidāgyi, ymüch ajcxy jibic-huinma'ñ. ¹⁶ Müch ajcxy jēbi m'ijxcapy nejaty ajcxy müdity chinaayin yjugy'ajtin; ca' pin caamuxy cha'm tucy ma apy quipy, e nañ jadu'n ca' pin higo tim tucy ma jaam'apy quipy. ¹⁷ Je quipy huidibi ooy y'oyity, oy yi' ytiim'aty. Je quipy huidibi ca' y'oyity, ca' yi' oy ytiim'aty. ¹⁸ E je oybi quipy ca' huaad ytiim'aty jibic. E je quipy huidibi ca' y'oyity ca' ytiim'aty oy. ¹⁹ Tüg'óciy je quipy huidi ca' oy

ytim'aty, cixy yajpujxp je'. Chi jada' yajnögy. ²⁰ Nañ jadu'n miich ajcxy jëbi mnejhuïy jadu'n nej jây yjây'aty co m'ixipy nej chinây.

Ca' nidüg'óciy jây ajcxy ytiğihuipy ma Dios

²¹ Ca' nminaanim nidüg'óciy jây ajcxy ytiğihuipy jiihy tzejpjoty huidibi xyñimaaybich: "Huindzin, Huindzin", jëda'ajty ajcxy tiğihuamb huidibi ycapxymidooyb je Dios chojcin y'ane'min. ²² Mayjây oy minana'n huin'it xii huin'it tiempo: "Huindzin, Huindzin", ti iich ajcxy ngapxhuäcxy miich m'ayuc, e müid miich mxii ti iich ajcxy nyajpidzimy je ca'oybi; etz müid miich mxii ti nduñ iich ajcxy mij huinma'n. ²³ Huin'it nimähuipy: "Caminaabi miich ajcxy ti nga'ixy'adyii; huinhuäctutcich miich jibic tumbidijc ajcxy."

Je mejtznajxpi je tiy'ajt cop

²⁴ Nidüg'óciy pinjây huidibi xymibijcpich etz midooyb jadu'n nej iich n'ane'myich yi' ajcxy quipxyjaty müid je jây huidibi cohunma'n huidibi ytijc ycojp ma yhuingixity. ²⁵ Co ymicpojtüy etz ycomy je mij nii, ca' ypadyii nügom je tijc, je' co anajty cixy je' ycojyity. ²⁶ Per yi' ajcxy huidibi midoob e ca' cuyduñ huidibi ngapxpich, je' jadu'nip nej tüg jây huidi janch loci huidi ytijcoj ma pu' jot. ²⁷ Co ymiñ je mic poj tuu, chi ycomy je mij nii. Chi yciday je ytijc; mij ayo'n oy yjajti.

²⁸ Co Jesús ycapxtay ymyidactay, chi je jây ooy huinmay jadu'n nej anajty ti yaj'ixpicy. ²⁹ Com je' co Jesús anajty yaj'ixpicy nej tüg huidibi cötujcin müid, ca' yjadu'nity nej je escribas ajcxy.

8

Jesús yajtzögy tüg jibic nibützpa'mmüidpi

¹ Co Jesús oy chooni ma je cögop, chi ypagidaci mayjây. ² Huin'it ñimiini tüg jây jibic pützpa'mmüidpi. Chi ycojxtinay'ahuüy ma Jesús yhuinduu. Chi minañ:

—Huindzin, pen m'a'ixiyy jëbi xyajtzögyich.

³ Huin'it Jesús nidooñ je jây. Chi nimay:

—Ndzojcpyich, jëbi mdzögy.

Co Jesús jadu'n nimay je pa'mjây huin'ityi je ypützpa'm oy ytiğooy. ⁴ Chi Jesús nimay:

—Ca' pin myajnimây; nicx janchtiy ma je teedy. Minicx tüg huindzig'iñ huidi Moisés y'ane'my. Huin'it jëbi yi jây ajcxy ixipy co ti m'agidägy.

Jesús yajtzögy tüg capitán romano ymang

⁵ Co Jesús yja'ty jim Capernaum huin'it tüg capitán ñimiini e ycohuaniiy. ⁶ Chi ñimaayi:

—Huindzin, jim iich tüg ndumbi ma iich ndijc huidi tim cöcnaayñip, ca' y'ocyücxni.

⁷ Chi Jesús minañ:

—Iich nicxy nyajtzögy.

⁸ Chi je capitán y'adzooy:

—Huindzin, ca'p iich n'oyjâyity, ca' yhuaadity mdigihuipy ma iich ndijc, jëyi miich nigoo capxy e ti anajty iich ndumbi chögy. ⁹ Iich nañ jadu'n ane'my n'ityich, e nañ nmüidich soldadtjic ci'am. Co iich nimây: "Nicx", nicxp; e co iich nimây: "Min", mimb; e co n'ane'myich je nbödumbich huen tijaty tun, ytumyb.

¹⁰ Co Jesús jadu'n midooy, chi nigoobi ycijxy ycuejty. Chi ajcxy nimay huidi pahuidijtip:

—Janch tiy'ajt jadu'n nej nimaaygixy, ma Israeljây ymiñ, ca' jadu'n ti nbaadyich huidi oy mibicy jadu'n nej jadaayaabi yëdyjic. ¹¹ Iich jadu'n nimaayb co mayjây oy miinaangixy xiipidzimy'amy xiicidägy'amy, chi ixtäga'n quipxyi müid Abraham, Isaac etz Jacob jiihy ma Dios y'ane'min. ¹² Je judiojây huidibi ixipy ajcxy jëbi yjatzinây jiihy tzejpjoty, je' ajcxy nicxamb agoottzuuby, jiihy ajcxy yjihuipy yäxipy etz y tiitzmúcxiy ytiitzqueedipy.

¹³ Huin'it Jesús nimay je capitán:

—Nicx ma mdijc. Jadu'n nej miich xymibicyich, ti iich yam nguyduñ.

Chi je tumbi oy chögy tim huin'it hora.

Jesús yajtzögy Pedro ymüd töxyjâybi

¹⁴ Chi Jesús ñicxy ma Pedro ytijc. Chi ijxy je Pedro ymüd co jim cijx'am ycöcnây müid je toyba'm. ¹⁵ Co Jesús çinixajy huin'it je toyba'm ñajxy. Chi pidigy. Chi mic'amy ni'ixiyy je caayin uucin.

Jesús yajtzögy mayba'mjây

¹⁶ Co oy chu'iiyñi ycoodzyñi huin'it yajmimiñ ma Jesús may je huidi ca'oybi müid. E müid yi' y'ayuc yjëda'ajty ypidzimday je ca'oybi, e huin'it tüg'óciy je pa'mjây choocay. ¹⁷ Jadayaabi je' ytuni yjajti jigix yajcuyduñ jadu'n nej je profeta Isaías minañ: "Yi' ci'm ajt nyuu nba'm ti xyajtzootaayim etz yi pijcin ixin ti yajnicxtây."

Je pinjaty anajty panicxam Jesús

¹⁸ Co Jesús ijxy janch mayjäy anajty ti yjübigÿyii, chi nimay co huen náxcixy jim'amy mejy nínaxy. ¹⁹ Huin'it ñimiini tüg escriba. Chi nimay:

—Huindzin, nbanicxamybich miich oy janch tim ma'amy ma anajty mnícxy.

²⁰ Chi Jesús y'adzooy:

—Je huaax ymiid je' ajcxy yjut, e je joon ymiid je' ajcxy ype'ñ. Per ich, je jäy huidibi tzoon jiiby tzajpjoty, ca' nmüdidyich ma nmähuibich ma nbóxcibich.

²¹ E jadügpí ydiscípulo yminañ:

—Huindzin, nicx jayijp ndeedyich n'ocyajnaaxtigÿyich huin'it nbanicxip.

²² Huin'it Jesús y'adzooy:

—Pamiingich, ixmajtzcix yí öcpi huen ymií'öcpi yajnaaxtigÿyii.

Jesús jipcogapxäy je micpoj etz je mejy co anajty ooy ypidigy

²³ Huin'it Jesús oy ybarcotigÿyñi. Chi ypadzooni je ydiscípulos ajcxy. ²⁴ E jim anajty ytüöy mejyhuingixy, huin'it mic poj ñaymibidzimi. Janch mic y'ocpidicni je mejy jigo jigo je barco cayajnidigoy, pero Jesús anajty chachmaab. ²⁵ Huin'it oy ymigapxyii yajmäybidigyii je' ydiscípulos ajcxy. Chi ñimaayi:

—¡Huindzin, ocyajtzoogich ajcxy! ¡Cheeby ich ajt n'ocquiniñ!

²⁶ Huin'it Jesús y'adzooy:

—¿Na'amy co mdzachtzigÿygixni? ¡Miich ajcxy hueeni müdity mibijcin!

Huin'it Jesús ypidigy. Chi migapxy je poj etz je mejy. Huin'it je mejy etz je poj yhua'cxijptay. ²⁷ E je' ydiscípulos ajcxy nigoobi y'occix y'occuejtni chachmāangixy:

—¿Pin yëydijc jada jada', co je mejy je poj ti ycapxymidoyii?

Je Gadara jäy ajcxy huidibi anajty ca'oybi müd

²⁸ Co Jesús yja'ty ma yí ñiiba' ma yí Gadara ñaax ycajp, chi metz yëydijc, huidi anajty ca'oybi müd oy yjiopcyöyÿyii anajty ajcxy, ti choofi ma je öcpi jut. Yí jäy ajcxy ooy janch ahua'n, e ca' anajty huaad jim ni pin ñaxy ma je tü'aa. ²⁹ E co anajty Jesús jim ñaxy huin'it janch ahua'n ymigapxqueeci:

—¿Ti müch mdunamyb müd ich ajcxy, Jesús, miich Dios y'ung? ¿Nej ti mmiñ jayijp co xychaachytungixich ma ca'ni xii tiempo paady?

³⁰ Jiguem ma anajty ajcxy je' yajpaady jim anajty may'idzim y'oiccixy. ³¹ Chi je ca'oybi yminañ:

—Pen müch xyajpidzim ich ajcxy, xyaj'adigÿygixy xyajjottigÿygixy yí may'idzim.

³² Chi Jesús ñimay yí' ajcxy:

—Nicxcix.

Huin'it ñihuaatzi je yëydijc je ca'oybi. Chi oy ytigÿygixy je ca'oybi ma je idzim. Huin'it je idzim oy ñügöboyictäy. Jiiby ajcxy yjicxtäy.

³³ E je jäy ajcxy huidibi anajty idzim ycuend'ajtp, huin'it ajcxy yqueegy müd je tzig'ñ. Chi co ajcxy yja'ty cajpjoty, huin'it ajcxy ytigÿy miydaacpi jadu'n nej anajty ti ytuñyii ti yjadyii.

³⁴ E huin'it chonday je mayjäy ma je cajp. Chi ajcxy ninícxy je Jesús. E co ajcxy ijxpaty, huin'it ajcxy cohuanÿy co huen pidzimni ma je naax je cajp.

9

Jesús yajtzögy tüg jäy cümätpi tecymätpi

¹ Chi Jesús ybarcitigÿy. Chi ñicxy jim'amy mejyñaxy. Chi oyjäty ma yci'mgajp. ² E jim yajmimiñ tüg yëydijc huidibi anajty cümät tecymät. Yajciy ymiñ ma'ndzaayjoty. E co Jesús ijxy co ymiid je mibijcin, chi nimay je pa'mjäy:

—Jotcugi' miich, ti je mbocy nhuinmeecxyich.

³ Huin'it nijëjity je escribas ajcxy, je ley yhuindzin, jot'ajti: “Jadayaabi yëydijc capxtigooyb yí' ma Dios co jadu'n yminañ.” ⁴ Com Jesús ñejhuñy jadu'n nej anajty ajcxy je jäy tzachjot'ajtigixy, chi ajcxy nimay:

—¿Nej co ajcxy jibic mdzachtjot'ajtigixy jotjoty huinma'ñyoty? ⁵ ¿Huidibi ca' chipity, co nminá'ñibich: “Ti yí mbocy nhuinmeecxich”, o co nminá'ñibich: “Pidig etz tüyöy”? ⁶ Ich ndzojpyich co müch ajcxy mhuinjihuñy co ich ti ndzooñich tzajpjoty e paady nmüdich je cötujcin ya naaxhuñ e jëbi nhuinméecxibich pocyjäy ajcxy.

Huin'it Jesús nimay je cümätpi tecymätpi:

—Pidig, huijtzig yí mdögy etz nicxni ma mdijc.

⁷ Chi je cümätpi tecymätpi ypidigy. Chi ñicxy ma ytijc. ⁸ E co je mayjäy jadu'n ijxy, huin'it ajcxy ooy jihuñy huinmay. Chi ajcxy ooy ojadaty yí Dios co anajty ti yecy je mic'ajtin ma mayjäy.

Jesús nimay Mateo: “Pajamgich”

⁹ Co Jesús oy chooni jim, huin'it ijxy tüg yëydijc, yxii Mateo, huidibi anajty iñaayb ma yajcogüejttac. Chi nimay:

—Pajamgich.

Huin'it Mateo ytinayïgy. Chi panicxy Jesús.

¹⁰ Jadu'n ytuni yjaty co Jesús jim ycaj ma Mateo ytiyc, e may nañ jadu'n ymiñ yajcogüejtpidijc etz pocyjäydijc. Chi ajcxy jim tü'ciy y'ixtactay müd Jesús etz müd yi' ydiscípulos.

¹¹ Co je fariseos jadu'n ijxy ajcxy, chi nimay ajcxy je' ydiscípulos:

—¿Na'amy co yi mHuindzin ycaymucy müd je yajcogüejtpidijc je pocyjäydijc?

¹² Co Jesús jadu'n midooy huin'it nimay ajcxy:

—Ca' yajmayjaty tzozdumbi huidi ca' ajcxy ypigyii, jëyi huidi ajcxy pijcip. ¹³ Nicx ixpijccixy nej ymiñ jaaybety ma Dios ñecy: “ñich ndzojpcyich co müch ajcxy müd'adipy je pa'ayo'n, ca'ydí co myajhuindzigïy tijaty iyujc.” Ca' ñich ti nmiññich ma je jäy ajcxy huidibi ca' pocy müdity. ñich ti nmiññich müd yi pocyjäy ycixpi co huen jothuimbijttaaygixy ma Dios.

Amidoogixy Jesús müd je' ycixpi co jaygay y'ijtixy

¹⁴ Huin'it ajcxy ymiñ Juan ydiscípulos ma Jesús. Chi je ajcxy nimay Jesús:

—¿Na'amy co ñich ajcxy etz fariseo ajcxy ayuu'ijtixy, e yi' ajcxy huidibi xymüdhuidijtp ca' ajcxy ayuu'ijtixy?

¹⁵ Huin'it Jesús y'adzooy:

—¿Nej jëbi yaj'ayuu'aty jäy ajcxy huidi yajpaatpi ma je pijcpi yajnixiñduñyi, pen quipxyi yam yajpaady müd je huidibi pijcp? Minamb je xii je tiempo mina je pijcpi yajtizonñyb, huin'it janchtiy ajcxy jëbi y'ayuu'ajtcixy.

¹⁶ Ni pin tuc huit ca' agiyiïy müd tüg pedas jemyhuit, com nïgi je tuc huit ñajtzciñdzïy, chi nïgi o'ctiy yjajtni. ¹⁷ Ca' pin pidägy vino nï ma tucpi cochac, yciñdzip je', e tüg'öciy anajty ti y'ayoodäy je vino nï müd ñigochac. Pidägyipy ajcxy jemy vino ma jemy cochac, chi jadu'n ca' ayoohuipy je vino, ni huindigoyipy je cochac.

Je Jairo ñux, etz je töxyjäy huidibi Jesús yhuít nïdoni

¹⁸ Ma anajty Jesús jim ycapxy ymiydägy huin'it ymiñ tüg mijjäy. Chi ñaygojxtinay'ahuïy ma Jesús yhuinduu. Chi ymiññ:

—Nñuxich ti y'ögy. Nicx ma ñich ndijc etz mñiñajapy, jugypigipy ya.

¹⁹ Huin'it Jesús ypidigy. Chi ñicxy müd je ydiscípulos ajcxy. ²⁰ Ma anajty ajcxy jim ytüyöy huin'it ymiñ jixci'py'amy tüg töxyjäy huidi yxii ybo' ti m'ijtiyñi majmetz jimiñt. Chi nïdoni Jesús yhuít'pa'. Huin'it ñajxy je' ypa'm. ²¹⁻²² Jadu'n anajty ti yjot'adyii: “Oy Jesús jëda'ajty yhuít'pa' nñiñonibich, ti ñich anajty n'agidäygich.” Huin'it Jesús yhuäc-huimbijty. Chi huindicxpejty je töxyjäy. Chi nimay:

—Jotcuyc'at miich, ti m'agidägy jigix co xymibicyich.

E tim huin'it hora oychögy je pa'mjäy. ²³ Chi Jesús oy yjaty ma je mijjäy ytiyc. Chi ijxy je xuuxpidijc müd je ymügügtijc ajcxy huidi chachyaaxcixy co anajty ti y'ögy je töxy'anäg.

²⁴ Huin'it Jesús nimay ajcxy:

—Queccix ya, yi pi'töxy'anäg ca' yi' ti y'ögy. Hue' yi' maab.

Huin'it ajcxy nigo nixiicy yajxiicy Jesús. ²⁵ Co anajty je jäy ti ixquejxtäy, chi Jesús ytiçtigïy ma anajty je töxy'anäg huijtnäy. Chi majch ma yci'. Chi ypidigy. ²⁶ Chi je jäy oy yajnejhuïydaayñi ma je jimbi naax cajp nej anajty ti ytuñyi ti yjadyii.

Jesús yajtzögy metz jäy huintzpi

²⁷ Ma anajty jim ti choñ huin'it metz jäy huintzpi ypamiini. Chachñimäyii jadu'n:

—iPa'ayoogich ajcxy, müch David y'ap y'oc!

²⁸ Chi Jesús yajpajäty ma anajty ti yjättägy. Co ytiçiy tigoty, chi Jesús yajtiïy:

—¿Nej mmibijcpi müch ajcxy co jëbi nyajhuindicxñicixy?

Huin'it je' ajcxy y'adzooy:

—Mibijcy ñich ajcxy, Huindzin.

²⁹ Huin'it Jesús nïdoñ je jäy ajcxy huintzpi ma yhuin. Chi nimay ajcxy:

—Jadu'n nej müch ajcxy mmibicy, jadu'n ytuniib yjadiib.

³⁰ Chi je' ajcxy y'ijxïgy. Huin'it Jesús y'ane'min pidacy:

—Ca' huaad pin myajnejhuïygyixy.

³¹ Co je' ajcxy ñicxni, chi ajcxy ooy nigapxy nimidyacy co Jesús anajty ti yaj'ijxicigixy.

Jesús yajtzögy tüg jäy uumbi

³² Co anajty je' jim ti chongixy, huin'it ajcxy mimiñ ma Jesús tüg yëydijc huidibi uum huidibi anajty ca'oybi müd. ³³ E co Jesús yajpidzimy je ca'oybi, chi je mayjäy ooy yciçiy ycuejty ajcxy. Chi ajcxy minaangixy:

—Ni camina jadu'n ycajay'ixy ya ma jada Israel naax cajp.

³⁴ Per je fariseos jadu'n ymīnaangixy co Jesús je' mīd je ca'oybi ymīc'ajt yajpidzimy ca'oybi ma jāy.

Jesús ymīd pa'ayo'n ma mayjāy

³⁵ Jesús jadu'n yhudijty cājp cājp yaj'ixpijcy majaty tzajptijc. Yajhuīngapxīy je jāy Dios y'ayuc. Etz nañ jadu'n yaj'agidacy huen ytim huidi yuu huen ytim huidi pa'mity. ³⁶ Co Jesús jadu'n iixy je mayjāy, chi oy pa'ayooni co yī' ajcxy ca' mīdity ni pin huidibi jēbi ñajtcāpxīy Dios y'ane'mīn. Yī' ajcxy jadu'n yajpatp nej cōbixy huidi ca mīdity cuend'ajtpi. Ca' nejhuiyigixy pin y'ane'mip e pin ypanicxip. ³⁷ Huin'it Jesús nimay yī' ydiscipulos ajcxy:

—Tiy'ajt yī', janch mij je tung e hueeni je tumbidijc. ³⁸ Paady pijctzou mīich ajcxy ma Dios co huen quexy tumbidijc ma yī' ytung.

10

Jesús huin'ixy je majmetz ydiscipulos

¹ Huin'it Jesús huoy je nimajmetz discipulos. Chi moy ajcxy cōtujcin jēbi huaad yajnihuāch je huidi ca'oybi mīd. Etz nañ jadu'n yaj'agidāgip huen ytim huidi yuu huen ytim huidi pa'mity.

² Jada je' je nimajmetzp yxii: Simón, huidi nañ jadu'n yajtijp Pedro, etz ymiguēx Andrés; Jacobo etz y'uch Juan, Zebedeo ymang; ³ Felipe, Bartolomé, Tomás, Mateo, je yajcogūejtpi; Jacobo, Alfeo ymang; Lebeo, huidi nañ jadu'n yajtijp Tadeo; ⁴ Simón, je cananista; e Judas Iscariote, je huidi yciyejc Jesús agojix.

Jesús quejxy je' ydiscipulos ajcxy ayuccāpxhuācxpi

⁵ Chi Jesús quejxy yī' nimajmetzpi, e jadu'n najtcāpxīy ajcxy:

—Ca' ajcxy mīnicxipy ma je naax cājp ma ajcxy je jāy chināy huidibi ca' ajcxy Israeljāyity. Ni mgatigīhuipy ajcxy ma Samaria naax cājp. ⁶ Nīgi jac'oy co ajcxy mīnicxipy ma je Israeljāy huidibi ca' nejhuiy huidibi ca' paduñ Dios ytiy'ajtin. ⁷ Nicx mīich ajcxy capxhuācx Dios y'ayuc co ti yhuīgoni Dios y'ane'mīn. ⁸ Yaj'agidaaccixy yuujāy pa'mjāy huidijaty pūtzpa'm ymīd. Myajjugyijccixy tiibi ōgy. Myajnihuādzip huidi ca'oybi ymīd. Ninigoobi mīich jada cōtujcin ti myajmooyigixy, nañ ninigoobi yejccixy.

⁹ Ca' ni ti meēñ mīmicxcixy. ¹⁰ Ca' mbijty mīmicxcixy tū'amgixpi. Mīmicxcixy jēda'ajty yī' mhuit huidi mīd ma mīnīcix. Ni mgaminicxip huingbi mgīg etz mdajc; com ycopicity co je cājpjāy xyajcāyigixipy xyaj'ūuccixipy mīich ajcxy.

¹¹ Co anajty mjāty mīich ajcxy ma tūg cājp nīdiu yajtiū pinjāy jim tudācyip. Jim ajcxy mhui'mipy ma je' ytiyc ixti cooni ajcxy mdzoonip. ¹² Co anajty mīich ajcxy mdigīy tigoty huin'it mgāpxpōccixipy je codijc jadu'n nej tzocy. ¹³ E pen je codijc ymīhuaad'ajtpy, yejccixy jim iibocxin capxpoocxin. E pen je jāy ca' ytudāgyity, ñaadij'adip huidi anajty ti mgāpxcixy. ¹⁴ E pen ca' pin xycōbigaangixy, e ni pin xycamidohuaani ajcxy m'ayuc, pidzīgix jim ma je tījc o ma je cājp. Chi ajcxy mdicy huīnebiy, je' je' je tiy'ajt co ca' mīich ajcxy ti pocy mīdity. ¹⁵ Janch tiy'ajt jadu'n nej nīmaaygixy co anajty je xii tiempo paady ma anajty yajtiyduna'ñ je naaxhuīñjāy, jac nīgi yajtzaachytuna'ñ yī' ajcxy ca'ydi yī' jāy ajcxy huidibi tzīnaayb ma Sodoma cājp etz ma Gomorra cājp.

Ixhuidijtin pahuidijtin

¹⁶ ¡Ocmīdoogix! Ich yam mīich ajcxy nguejxyp majaty yī' jāy huidi jibic-huinma'ñ mīd. Jadu'n nīpaady nej iich ngueyxich cōbixy ma je lobi. Huijy cujc ajcxy mīaypidāgīb jadu'n nej tza'ñ, per yung naxy jadu'n nej muuxy. ¹⁷ Mīayguend'adiib ajcxy je' co yī' jāy ajcxy xycīyegaangixy ma ajcxy mījtungmīdipi etz myajhuobaangixy ma je judiōjāy ajcxy ñaymujctac, ¹⁸ ixti xyajnicxaangixy ajcxy ma je gobernador etz je reydiyc ajcxy mīd iich ycipi; e jim iich mīich ajcxy xyñigāpxipy ma je jāy ajcxy yhuīnduū, e nañ jadu'n majaty anajty je jāy ajcxy huidibi ca' yjudiōjāyity. ¹⁹ Co anajty ajcxy xyajcīdigīy je mījtungmīdipi, ca' ajcxy oy mhuiñmaayipy nej m'ocnīmāhuipy. Co anajty paady je tiempo, huin'it iich mīich ajcxy myajnimāhuipy nej ajcxy mgāpxipy. ²⁰ E je ayuc huidibi mīich anajty ajcxy mgāpxpy, ca' mīich anajty je' ajcxy m'ayuc'ajtigixy, je Dios Teedy anajty yjihui'ñ, je Espīritu Santo, xyajcāpx mīich ajcxy.

²¹ Huin'it yī' jāy ajcxy ñaygīyegānīgixy mīñ xyipy tūg quēxtijc co huen yaj'ōgyii. E je ungedeedy cīyega'ñ y'ung; je ung'anāg mībidīga'ñ je ytaj yteedy etz yaj'ōcip ajcxy. ²² Tūg'ōciy je jāy ajcxy ca' ajcxy xy'ix'anipy xychoga' nipy mīd iich nxii ycipi. E pin xymībījcpīch amumdūgiot ixti mabaad y'ōgy, yī' ajcxy y'alma tzōgipy. ²³ E co anajty mīich ajcxy jāy xy'ixhuidity xypahuidity ma tūg cājp, nīcxix ma huingbi cājp. Janch tiy'ajt jadu'n nej nīmaaygixy co ca'ni anajty mgāpxhuācxtāy ayuc tiy'ajt ma tūg'ōciy je Israelcājp co nhuimbīdīpīyich, iich, je jāy huidibi tzoōn tzajpjoty.

²⁴ Tüg yaj'ixpijcpj jac nīgi mij'ajtin müdity ca'ydi je huidi ixpijcp, e tüg huindzin jac nīgi mij'ajtin müdity ca'ydi je' ytumbi. ²⁵ Jëb jotcuje idipy je discipulo co jadu'n yajpaadipy jadu'n nej yhuindzin, e je tumbi jotcuje idipy nej yhuindzin. Pen jây minamb co ïch nmüdich ca'oybi, jac nīgi ymina'na'ñ co müich ajcxy müdity.

Pin jëbi yajtzigiy

²⁶ Ca' ajcxy mdzigiy yi jây ajcxy. Ca' ji ni ti yüch ity nicx ycaniguëxigy; nañ ni ti ji ycajaytün ayüch ameech nicx ycajaynejhuüy. ²⁷ Huidi ïch müich ajcxy ayüch nyajnamaayb, capxpizimgix müich yi' mayjäyoty, e huidi ajcxy midooyb ameech, capxpizimgix müich yi' mic ma tüg cögo. ²⁸ Ca' ajcxy mdzigihuip je jây huidib ninïcx yaj'öcp etz ca' huaad yi' ajcxy yaj'ögy je alma. Yi' müich ajcxy mdzigiygixy je Dios huidib pidacp je alma etz je ninïcx mijjiinjoty.

²⁹ ¿Nej ca' jây ajcxy toogy metz pi'cjoon müd tügpi pi'cmeefi? Per ca' ni tüg huaad ycây naaxhuñ, pen ca' tzocy je mDios Teedy huidi jiihy tzajpjoty. ³⁰ Müich ajcxy mgöhuay ac michoy yi'. ³¹ Paady müich ajcxy ca' mdzigihuipy, jac nīgi müich ajcxy mdzoubaady ca'ydi je joon.

Pinjaty ca'p midzöydu'ñ Jesucristo mayjäyoty

³² Yi jây ajcxy huidi xymibijcpich etz xyñidiy'ajtyich ma jây yhuinduu, nañ jadu'n ïch yi' nidiy'ajtyich ma ïch nDeedy huidibi jiihy tzajpjoty. ³³ Per je jây ajcxy huidi ïch xycoyützpic ma mayjäy ajcxy yhuinduu, nañ jadu'n yi' ngoyützic ma ïch nDeedy yhuinduu huidibi jiihy tzajpjoty.

Müid Jesús ycxipi yjiijity naymidzip'adi

³⁴ Ca' müich ajcxy mhuinnmay co ïch ya ti nmiñich müd co nmöhuaangixy jotcuje'ajtin ya naaxhuñ. ³⁵ ïch ti nmiñich co nyajtziptunipyich jây müd yteedy; töxyjây müd ytat etz xecy müd yxecy. ³⁶ E jadu'n müich ajcxy mdzip'adiyb mgi'mjuugy mgi'mmigüg.

³⁷ Yi jây ajcxy huidibi tzojcp ytat yteedy jac nīgi ca'ydi ïch, ca' yi' ypaadyi co njây'adiybich; e pin ymang o ñix tzojcp nigi ca'ydi ïch, ca' ypaadyi co njây'adiybich; ³⁸ e pin ca' yci'mdzojcin y'ijxmajtztây etz ca' ñaybidägyi ycxijot huinijot ma ïch, ca' mihuaadity nicx njây'adiybich. ³⁹ Pin yjugy'ajtin najtztzögyib, yajtigoyipy yi'; e pin yjugy'ajtin tigooyb müd ïch ycxipi, ypaadipy jugy'ajtin huinixi tzajpjoty.

Premio nganar'ajtim

⁴⁰ Pin müich ajcxy xycöbijcp, ïch yi' anajty xycöbijcp; e pin ïch anajty xycöbijcp, nañ ycöbijcp anajty je huidibi ïch ti xyquejxyich ya naaxhuñ. ⁴¹ Je huidibi cöbijcp je jây huidibi Dios y'ayuc capxhuacxip, je' co yi' ymiñ müd Dios ycxipi, yi' jadu'mbi je oy'ajtin ypaadipy. Nañ jadu'n je huidi cöbijcp je oybi jây müd co oy yjäyity, yi' jadu'mbi oy'ajtin ypaadipy. ⁴² Je huidi yaj'ucp tüg vaso nü ma huenyimpinjây müd co xymibicyich, janch ïch müich nimaaygixy, ypaadipy oy'ajtin.

11

Juan je Bautista yquexyöybi

¹ E co Jesús anajty ti najtzcaxpydây je tiyy'ajt ma je nimajmetzpi ydiscipulos ajcxy, chi Jesús ñicxy yaj'ixpijcp etz ayuccapxhuacxp majaty cajp huinduy agonbi.

² E Juan je Bautista hue' je' anajty yajpaady pujxtigoty. E co nejhuüy tijaty mijhuinma'ñ anajty Jesús ytumy, chi quejxy metz je' ydiscipulos ajcxy ma Jesús yajpaady. ³ Chi Juan ydiscipulos ajcxy y'amidooy Jesús:

—¿Nej müich je' je Cristo huidibi anajty minamb o jëbi ïch ajcxy huingbi n'ahuixcixy?

⁴ Chi Jesús y'adzooy:

—Nïxcix müich ajcxy nimaaygix yi Juan, je Bautista, tijaty müich ajcxy m'ixjpy mmidooyb co ndumybich. ⁵ Müich ajcxy yajmüdmidyäg je Juan, jadu'n nej je huintzpi nyajhuindicxigyich; je cïmät tecymät nyajtzoocypich; je huidibi jibic nïbütpa'm ymüid nyajtzoocypich; je' ajcxy huidibi cönat nyajmidohuicpyich; je öcpi ajcxy nyajjugypijcpich; etz je ayoobtijc, je huidibi yung naxy yjothuinma'ñ nyajmüdmidyacypich Dios y'ayuc. ⁶ Jotcuje yi' ajcxy pinjaty xymibijcpich amumdügot etz ca' ni nej yjotmetzci' müd ïch.

⁷ Co Juan je Bautista ydiscipulos ajcxy ñicxni, chi Jesús ytigiy nimidyaccoty Juan je Bautista ytung ma je mayjäy, chi yminañ:

—¿Ti müich ajcxy oy m'ixy jim mijtigüduum? ¿Tüg nãhuaax huidibi poj xijpi? ⁸ ¿Ti ajcxy oy m'ixy? ¿Ti oy m'ixy, tüg jây huidibi ooy y'oyxöxyity? ⁹ ¿Ti müich ajcxy oy m'ixy? ¿Nej ti m'ixy tüg Dios y'ayucnajtzcaxpybi? Janch co ti m'ixcixy tüg jây jac mij ca'ydi tüg Dios y'ayucnajtzcaxpybi. ¹⁰ Je' jada je jây huidibi Dios nigapxy ma ñecy co Dios jadu'n yminañ: Cham nguexyich ïch nguexyöyp jayijp ma müich. Je' yaj'oyihuip je jây yjot yhuinma'ñ müd ïch ycxipi, tim jadu'n nipaady nej jihuüy jây tü'aa yaj'oyiy co rey ymiina'ñ.

¹¹ Co yi jāy ajcxy huidibi ti chinaaygixy ixti chambaad ni pin ti ca' yajpaady mij jadu'n nej Juan je Bautista; per pinjaty iich xymibijcp, yi' jac mij naxam ma Dios y'ane'my ca'ydi Juan.

¹² Maabi Juan je Bautista ytundigiy, ixti chamni janch mayjāy amumdūgʹot ñejhuñhuañ Dios y'ayuc, je' co ajcxy ytiñhuañ ma Dios y'ane'my. ¹³ Tūg'óciy ajcxy je Dios y'ayucnajtzcaxxiybi etz Moisés y'cōtujcin ñigapxy ajcxy je ané'min ixti cooni Juan oy ymiñ. ¹⁴ Pen miich ajcxy mibijcxy Moisés y'cōtujcin etz Dios y'ayucnajtzcaxxiybi ajcxy, Juan je Bautista je' je' je Elías huidibi anajty miinamb. ¹⁵ Pinjaty mido'n mūd huen mido'mbigipy iich n'ayuc.

¹⁶ Jesús yjacminañ:

—¿Pin mūd n'ocayjtūg'ihuibyich yi jāy huidi ajcxy cham tzinaayb? Tim jadu'n yi' ajcxy nej pi'ctijc huidibi ajcxy iyūyib ma mayjāy yjuygixy ytooccixy, miyaaxcixy midinaaygixy ymīgūgtijc: ¹⁷ “Ti njayajxūxyich flauta e ni ca' ti m'ejtzcixy; ti iich ajcxy ócpi njahuinyāxich, e miich ajcxy ca' ti myāxy.” ¹⁸ Chi Juan, je Bautista, anajty miiñ, e je' ca' y'ayuc y'ūgy. E miich ajcxy minaaangixy co Juan ca'oybi ymūdity. Jada pi'c'anāctijc nipaady nej miich ajcxy. ¹⁹ Chi iich je' je jāy huidibi tzoon tzajpjoty nmiiñich, e caaybich uucpich, e miich ajcxy minaaangixy: “Ijxcix, cha tūg yēydijc, janch cax janch vino'ucp huidibi migūg'ajtpy yajcuetpidijc etz pocyjāydijc.” Je Dios tiy'ajt ji je' ñigūēxigiy.

Je cajp huidibi ca' ycapxymidoogixy

²⁰ Chi Jesús ojoty je maygajpāy ma anajty may mijhuinmañ ti tuñ, com je mayjāy ca' anajty yjothuimbidaangixy ma Dios. Chi Jesús yminañ:

²¹ —¡Ay miich ayoob ajcxy huidibi tzinaayb jim Corazín! ¡Ay miich ayoob ajcxy huidibi tzinaayb jim Betsaida! Co ixypiy iich ti nduñich jecy'ajty je mijhuinmañ mijtzōg'ajtin ma je Tiro etz Sidón cajp, jadu'n nej iich ti nduñich ma miich ajcxy, ti ixypiy je Tiro jāy etz Sidón jāy nijothuimbijtcixy etz iñaaaygixy sacco ñijen ñicuyjam ixucuyjam, je' je tiy'ajt co ooy ytaicixy ymaygixy mūd ypocy ycxipi. ²² Paady miich ajcxy yam nimaaygixy. Co anajty Dios tiydunañ je naaxhuñiybi jāy, huin'it miich ajcxy Dios xychaachytunañ jac ñigi, ca'ydi je jāy ajcxy huidibi jecy'ajty tzinay jim Tiro etz Sidón.

²³ Miich ajcxy, Capernaum jāy, mñaybiáacigixy jadu'n nej jihuñy mdigihuaangixy jiiiby tzajpjoty. Per ca' yjadu'nity. Mdigihuaam miich ajcxy ayoodactuuby. Ayo'n tzaachypī mbadaangixy. Co ixypiy iich ti nduñich jecy'ajty je mijhuinmañ mij tzōg'ajtin ma Sodoma cajp, jadu'n nej ti nduñich ma miich ajcxy mgajp, chambaad ixypiy ity yi jadu'mbi cajp, ca' ixypiy Dios cayajtgooy. ²⁴ Paady iich miich yam nimaaygixy. Co anajty Dios tiydunañ je naaxhuñiyjāy, huin'it miich ajcxy myajtzaachytunañ jac ñigi, ca'ydi je jāy huidibi jecy'ajty tzinay ma Sodoma ñaaxjot.

Mingixy ma iich e mbóocxcixipy

²⁵ Chi Jesús ytiñiy Dios mibijtczooyb, yminañ:

—Dios Teedy, iich miich n'ibaatpich ngapxpaatpich. Miich mūd je mij cōtujcin jiiiby tzajpjoty etz ya naaxhuñi. Com miich ti mnajtzcapxy yi m'ixpijcin ma je ayooctijc huidibi tzinaayb jotxeemy, e ti myūch yi m'ixpijcin ma yi ixpicytijc cohuinmañydijc. ²⁶ Jadu'n, Tat, ti mduñ, com jadu'n miich ti mdzocy ti mjāygidāgy.

²⁷ Jesús yjacminañ:

—iich nDeedy ti xyajcīdigiydāyich tūg'óciy mic'ajt oy'ajt. Ni pin ca' ijxcapy pin je' y'ung, jēyi nDeedyich tūgpajc. Ni pin ca' ijxcapy pin je' nDeedy'ajtpyich, jēyi iich, je Dios y'ung tūgpajc, etz jacjadyii huidibi iich, je Dios y'ung, nyajniñgūēxigamyich. ²⁸ Min ma iich nidūg'óciy miich ajcxy huidijaty taj mayb myajpatp ma mjot mhuinmañ, iich miich ajcxy nmōhuamyb jotcujc'ajtin. ²⁹ Cōbic miich ajcxy iich n'ane'min iich ngōtujcin, jadu'n nej huaj yuub ajcxy cōbic y'cōgi. Ijxpīc ajcxy iich ndiy'ajt etz cuydun iich n'ayuc, com iich nmūdich mexctujcin etz ca' iich amij agix nayjihuñiyijich. ³⁰ Ca' iich n'ane'min ymicity, e iich ndung ca' nimjaajty.

12

Je discipulos ajcxy moc cojc yajmuicp pocxxiuduum

¹ Chi tūg xii Jesús yhuidity mūd ymīgūgtijc ma tūg camjot. E hue' anajty sábado xii, je poocxin xii. Chi Jesús ydiscipulos ajcxy oy anajty yubōgyii. Chi ajcxy ytiñiy trigo tim nixajtzutp etz yjūcxy ajcxy je ypajc. ² E co je fariseos ajcxy ijxy nej Jesús ydiscipulos ajcxy y'idūtzcixy, chi ajcxy nīmay Jesús:

—Oc'ix nej miich mdiscipulos ajcxy y'idīch. Hue' ajcxy tumyb huidibi ca' huaad ma sábado xii yajtuñ.

³ Per Jesús minañ:

—¿Nej ca' miich ajcxy mgapxyñi ma Dios ñecy, jadu'n nej David etz ymīgūgtijc ajcxy idīch jecy'ajty co yubōccoti? ⁴ Pues yi' ajcxy tigiñy ma Dios ytiñ. Chi cay ajcxy je tzaicaagy huidibi

anajty jãj ajcxy ti yajhuindzigÿy Dios. Je' je tzejcaagy huidibi teedy ajcxy anajty paatip cayipy. ⁵ ¿Nej ca' miich ajcxy ti mgapxyñi Moisés ycötujcin necy co je teedy ajcxy jëbi ytuñ ma Dios ytijc sábadó xii, e ca' nan tundigooyb je' ajcxy?

⁶ Ich miich ajcxy nimaagyixyp, jac nigi mij cötujcin nmüdidyich, ca'ydí je cötujcin huidibi je teedy ajcxy yajtuñ ma Dios ytijc. ⁷ Pen miich ajcxy ti mhuinjihuÿ nej yhuimbizimý jada Dios y'ayuc, co Dios jadu'n yminañ: "Ich ndzojpcy co miich ajcxy müid'idipy pa'ayo'n ca'ydí co ajcxy myegipy huindzig'iñ." Pen miich ajcxy ti mhuinjihuÿ jada ayuc, ca' ixypý mbocy'ixy ma ich nmigügtijc huidibi ca' ma ti ytundigooy. ⁸ Ich, je jãj huidibi tzoon tzajpjoty, nmüdich ane'min, jaydëbi nimäyich je jãj ajcxy ti jëbi tungixy sábadó xii.

Je yëdjic huidibi anajty ycütidzip

⁹ Chi Jesús choñ jím, ñicxy ma je judíoñy ñaymujctac. ¹⁰ E jiiy ma je naymujctac anajty tüg yëdjic huidibi ycütiz. Je fariseo ajcxy xihuamyb Jesús, paady ajcxy y'amidooy, yminañ:

—¿Nej jëbi tüg pa'mjãj chögy sábadó xii?

¹¹ Chi Jesús y'adzooy:

—Pen ya ma miich ajcxy ji tüg jãj huidibi cöbixy yjutcögäy sábadó xii, ¿nej ca' je' ñicxy yajpidzimý mic'amy? ¹² Nigi tzoobaat tüg yëdjic ca'ydí tüg cöbixy, paady Moisés ycötujcin ca' capx'aducy co tüg oy'ajtin nduunim sábadó xii, je pöocxin xii.

¹³ Chi Jesús nimay je yëdjic:

—Xajtiu yi mgi'.

¹⁴ Co xajtiy yci', chi choocy, e hui'my quipxyjaty müid je yci' oybi. Chi je fariseos ajcxy yjotmätoty, yhuinma'ñ ixtaagyixy ajcxy nej huaad Jesús ocyaj'o'ccixy.

Tüg ayucnajtzcaxiñyin müid Jesús ycixpi

¹⁵ E co Jesús nejhuÿ nej yi' ajcxy yhuinma'ñ müidity, chi jím choñ. E ooy mayjãj ypanicxi Jesús, Jesús yajtzoocpy anajty tüg'ócý pinjaty pa'm müid. ¹⁶ Jesús ane'my je pa'mjãj ajcxy co ca' huaad nigapxy nimäyägý co yi' je' je Cristo. ¹⁷ Jadu'n Jesús ane'my je pa'mjãj jigix ycixipy yca'pxipy je ayuc huidibi je profeta Isaías yjaay jecy'ajty, co Dios jadu'n yminañ:

¹⁸ Jada je' ich ndumbi huidi ti nhuin'ixyich. Yi' ich ooy ndzocyich njihuÿich etz ooy njotcujcich müid yi'. Ich yi' nmöhuamybich ich njihu'ñ mic'ajt. Yi' capxhuäcxip ich n'ayuc jadu'n nej ndzaachytuna'ñich naaxhuñjãj ajcxy müid ajcxy ypocy ycixpi.

¹⁹ Yi' ni ymigügtijc ca' oja'ñ, ni ycaýäxa'ñ, ni ycatinähua'ñ, ni pin ca' midoohuipy ma cãjpcujc.

²⁰ Ca' yi' tzaachytuna'ñ ayoobitijc etz huidibi ayo'ndumb ijt. Etz nañ ni ca' yajtigoya'ñ huidibi ayoobitijc yco'ögy'ungdjic yjijp'ixpy. Jadu'n nej jãj cayajhuindigoy tzajcapy huidi huiidipy etz ni cayajpich je mecha huidibi uuxy uuxy tücxp. Ixti mabaad anajty yajcopicy y'ane'min tudägyi.

²¹ E yi' mayjãj ooy yjijp'ixa'ñyi.

Xigixy Jesús co müidity mujcu'ymic'ajt

²² Chi müid müñ ajcxy ma Jesús tüg jãj huidibi huintzip etz uum. Je' anajty müid ca'oybi. Chi Jesús yajtzoogy, e chi y'ixigý etz ycapxigý. ²³ Co Jesús jadu'n tuñ, chi je mayjãj ytigüy huinmay'ahuidijt, chi ajcxy yminañ:

—¿Nej jada je', je David y'ap y'oc huidibi rey'adam?

²⁴ Per co je fariseos ajcxy nejhuÿ nej je jãj huinmay, chi ajcxy yminañ:

—Jadaabi yëdjic yajpidzimý ca'oybi müid je mujcu' huindzin ymic'ajt (ca' yi' yjëjty je Cristo).

²⁵ Per Jesús ñejhuÿy anajty ti je fariseos ajcxy yhuinmaayb, chi yminañ:

—Pen tügpicy tungmüdpí ixypý ñaybijc-huäcxigixy, etz ñaymidziptzoonigixy ixypý ac jëyi, pues cixipy yi' ajcxy y'ane'min. Pen tüg cãjpc o tügpicy jugymigüg ixypý ñaybijc-huäcxigixy, pues ca' ajcxy y'idaangixy tügmucy. ²⁶ Pen Satanás, je ca'oybi huindzin, yajpidzimý ixypý ca'oybi ma je jãj ajcxy, chi ci'm ixypý je ca'oybi ti ñaybijc-huäcxigixy, e je Satanás ymic'ajt ca' y'ida'ñ. ²⁷ Miich ajcxy minamb co ich nyajpidzimýich ca'oybi müid je ca'oybi huindzin, je Beelzebú ymic'ajt. Pen tiy'ajt jadu'n nej miich ajcxy mina'ñ, je jãj ajcxy huidibi xymijnicxpejt miich ajcxy, ¿nej yi' ajcxy paady mic'ajt ma je mujcu' co ajcxy yajpidzimý ca'oybi ma je pa'm jãj? Pues ca', paady yi' ajcxy tiy'ajt yejpc co miich ajcxy ti mgapxtigoy co yminaangixy co ich nyajpidzimýich ca'oybi müid Satanás ymic'ajt. ²⁸ Per ich nyajpidzimýich ca'oybi ma pa'mjãj müid Dios yjihui'ñ ymic'ajt. Paady miich ajcxy nejhuÿy co ti ymiiñ yjãty je Dios y'ane'min ma miich ajcxy.

²⁹ (Dios ycötujcin jac mic ca'ydí je ca'oybi ycötujcin, paady jëbi nyajpidzimýich ca'oybi.) ¿Nej jëbi tüg jãj ytigüy ma tüg micpi jãj ytijc etz pigaani tijaty yi' ymüid, pen ca' jayijp yci' ytecy xojtzity? Pues ca'. Cooni jayijp yci' ytecy xojtzity, huin'it jëb pijcip tijaty ymüid. ³⁰ Pinjaty ca' xymijnicxpetyich, xymidzipich yi'. Pinjaty ca' tuñ müid ich co jãj nya'ixpicyich, hue' je' ajcxy jãj yajhuinma'ñyidgooyb.

³¹ Janch ñich miich ajcxy nimäy co Dios jëbi huinmecxip tüg'óciy pocy huidibi jáy ytungixp etz tüg'óciy jibicpi huidibi jáy ycapxcixp. Jëyi janchtiy co pinjaty capxtigooyb müid je Espiritu Santo, je Dios yjihui'ñ ymic'ajt, ca' Dios huinmecxip nimina. ³² Pinjaty jibic xyñigapxpix xyñimiydacpich, je' huinmecxam. Per je huidibi jibic ñigapxpy je Espiritu Santo, je' ca' huinmecxa'ñ ni jadachambi tiempo, etz ni camina xii.

Yi quippy yi' ytiim yi' müid yaj'ijxcapy

³³ Pen miich ajcxy mnejhuihuamy je quippy pen oy quippy, o pen ca', jëbi mnejhuihuipy co je quippy nicxy ytiim'aty. Pen oy je ytiim, miich min'a'nip co oy je quippy. E pen ca' oy ytiim'aty, huin'it miich ajcxy min'a'nip co ca' y'oyity je quippy. ³⁴ Jibic jáy miich ajcxy, jadu'n nipaady nej jihuüy ahua'n iyujc xy'ung'ajtp. Pen miich ajcxy jibic jáy'ajtp, ñej jëbi miich ajcxy oybi ayuc mgapxpy? Jadu'n nej jáy ajcxy yjot yhuinma'ñ müidity, ac tim jadu'n ajcxy ycapxy. ³⁵ Je jáy huidibi oy ayuc ycapxpy, ymüid oyjot oyhuinma'ñ paady oy ayuc capxy. Je jáy huidibi jibic ayuc capxp, ymüid jibic jot jibic huinma'ñ, paady jibic ayuc capxy. ³⁶ Hich miich ajcxy nimay co anajty paady je xii je tiempo min'a Dios tyduna'ñ je naaxhuiñjáy, huin'it ajcxy y'adzohuipy müid huen tim huidibi ayuc huidibi anajty ajcxy ti mgapxy. ³⁷ Com nejaty miich anajty ajcxy ti mgapxy je m'ayuc jadu'n miich ajcxy Dios xytidyunip. Com müid yi mgi'm ayuc yi' müid m'oybidzimipy mhuätzpidzimipy. E nañ jadu'n müid yi mgi'm ayuc yi' müid mbocycähuipy.

Jibicjädijc ajcxy pijctzoogixy tüg ijxpejt mijhuinma'ñybi

³⁸ Chi nijëjity fariseos ajcxy etz escribas ajcxy Jesús nimayi:

—Huindzin, n'ixamy ñich ajcxy miich tüg m'ijxpejt.

³⁹ Chi Jesús y'adzooy:

—Yi jibic jädijc ajcxy etz ajcxy huidibi ca' mibiga'ñ Dios ypijctzooyb tüg ijxpejt huidibi tzomb tzajpjoty. Per Dios ca' yega'ñ jadüg ijxpejt. Ti Dios yecy tüg ijxpejt ma Jonás. ⁴⁰ Com jadu'n nej Jonás jecy'ajty ijxpejt yecy co y'ijty tugüg xii tugüg tzuu meyjoty ma acx ymoxac, nañ tim jadu'n ñich, je jáy huidibi tzoön tzajpjoty, nyegamy ijxpejt jadachambi tiempo co n'idipich tugüg xii etz tugüg tzuu naaxjoty. ⁴¹ Je mayjáy huidibi anajty tzinaayb ma Nínive cajp, ti jothuimbijtcixy etz ti ixmach ajcxy huidijaty jibicpi ajcxy ytumyb co Jonás capxhuäcxy Dios y'ayuc ma yi' ajcxy. Cha ñich ngapxhuäcxyich Dios y'ayuc ma miich ajcxy, etz jac ñigi cötujcin nmüiditych, ca'ydí Jonás; e ca' miich ajcxy mjothuimbity. Paady co anajty Dios tyduna'ñ je naaxhuiñjáy, je Nínive jáy miich ajcxy xyajpocycähuam. ⁴² Nañ jadu'n je töxyjáy reina huidibi tzinay jecy'ajty ma madza'cruud ypidzimy, yi' je' xidähuam je jáy ajcxy huidibi tzinaayb jadachambi tiempo, etz yajpocycähuuüib ajcxy. Je reina tzoön jigüegy nicxy co amido'ida'ñ je rey Salomón ma capxhuäcxi Dios y'ayuc. Ji naaxhuiñ jadachambi tüg Dios ytiy'ajtmüidpi jac ñigi ymijity, ca'ydí Salomón anajty, e ca' je jáy ajcxy mijpidäga'ñ.

Je jibic espíritu co jadüg'oc yhuimbity

⁴³⁻⁴⁴ Yi jáy ajcxy huidibi cham tzinaayb, quipxyjaty ajcxy müid je ca'oybi. Co je ca'oybi ypidzimy ma je jáy, chi je' ñicxy jim mjiñtigi'duum y'ijxtacy. Co ca' paty ypacxtac, huin'it ymina'ñ: "Huimbidaambich ma je jáy yjot yhuinma'ñ ma ñich ti n'octzombi." Co je ca'oybi yjaty ma anajty ti chinäy, chi paty je jáy yjot yhuinma'ñ ooy yhuätzity etz yajxon ypedigity oy oyduñ. ⁴⁵ Chi je ca'oybi ñicxy oy yajtzoön jahuixtucj ca'oybi jac jibicpi ca'ydí je'. Chi ajcxy ytiigiy ma je jáy yjot yhuinma'ñ, e chinay ajcxy jiihy. Huin'it je jáy jac'öctiy oy yjajtni, ca'ydí jadu'n nej anajty jayijp'aty.

Jesús ytaj etz y'uch miguëx ajcxy

⁴⁶ Jesús yaj'ixpijcy anajty je mayjáy, co oy yajty je' ytaj etz y'uch miguëx ajcxy. Hue' ajcxy yhuim'í tibia'y. Je' ajcxy anajty ymigapxamy Jesús. ⁴⁷ Chi jáy yajnimay Jesús:

—Yi mdaj etz m'uch miguëx ajcxy, chiihy ajcxy tibia'y, miich xyjamigapxamb.

⁴⁸ Jesús y'adzooy, nimay je jáy huidibi ytaj y'ayuc yajnajxi ma yi':

—ÇPin jáy miich ajcxy mdijy co ñich ndaj'adyii etz ñich n'uch'adyii nmigüg'adyii?

⁴⁹ Huin'it Jesús nitziihuüy je' ydiscípulos ajcxy e yminañ:

—Jada ñich ndiscípulos ajcxy jadu'n nipaady nej ñich ndaj etz ñich n'uch nmiguëx. ⁵⁰ Huen ytimpinity huidibi ytumyb ñich nDeedy chojcin, huidibi jiihy tzajpjoty, pues jadu'n yi' ajcxy nipaady nej ñich ndaj etz ñich n'uch miguëx.

13

Je ayuccapxhuäcxi y'ijxpejt (niipi ijxpejt)

¹ Je huin'it xii Jesús choñ ma je tijc. Chi ñicxy ma je mejypa' jim oy y'ñay'ihuüy. ² E co mayjáy ooy ñaymujci jim ma anajty Jesús ñay, chi Jesús ytiigiy barcojoty. Per tüg'óciy je mayjáy yhuim'nday ma mejypa'. ³ Jesús ytiigiy jáy yaj'ixpijcp müid jihuimbit ayuc, yminañ:

—Tüg jây chooñ trigotüm huijy. ⁴ E ma anajty jim ytiimhuijy, huiñ'it je ytiim oy naagity ycây ma tü'aa. Chi jada' je joon ajcxy oy ymiñ etz ypiihuijy je tiim. ⁵ Nijëjity ytiim ycây ma tzaanïc x ma anajty hueenî naax. Jada tiim tzojy ymujxy. ⁶ Com hueenî anajty je naax ma je tzaanïc x, chi co oy xii'an ypadyi, chi ytiitztay, com ca' anajty je ytiitzy yegity. ⁷ Nijëjity tiim oy ycây ma ujtz'aayjot ma apyot, e ujtz'öctay je trigo mang. ⁸ Per je tiim huidibi ca'u ma oy ñaax, je' yon yajxon e tiim'ajt may'amy; tüg ypi'cpajc iipxmajc oy yco'ity, jadüg pi'cpajc tugipx oy yco'ity, jadüg pi'cpajc migo'px oy yco'ity. ⁹ Pinjaty mido'n miid huen mido'mbicy jada ayuc.

Ti yci xpi je i xpejt

¹⁰ Chi je' ydiscipulos ajcxy nimijhua'cy Jesús, chi ajcxy yajtyäy:

—¿Na'amy co myajtuñ jihuimbit ayuc co myaj'ixpijy je mayjây?

¹¹ Chi Jesús y'adzooy, ymiñañ:

—Miich ajcxy jaydëb mnejhuñhuijy huidibi Dios ñigapxyp ñimi ydacpy coyüch'amy ma y'ane'min. Jacjadyi jây ca' ajcxy huinjihuñhuijy. ¹² Pinjaty ymiid yajmöhuijy nigi, pinjaty hueen miid yajpigipy nigi, oy ixypiy hueen jadim miidity. ¹³ Paady jihuimbit'amy nyajnimayich; jaydëbi pinjaty i jxcixy, ñipaty nejihuñy ca' ti i jxcixy; etz co ajcxy midoogixy, ca' ajcxy huinjihuñy, ñipaty nejihuñy ca' ti midoogixy. ¹⁴ Jadayaabi ytyuny yjadyi jadu'n nej je profeta Isaias jaaybejty yajhui'my ma jadu'n ymiñañ:

Miich ajcxy midohuamy, per ca' mhuinjihuñhuangixy. Miich ajcxy m'ixamy, nañ ca' mhuinjihuñhuangixy huidibi ti m'ijxcixy.

¹⁵ Com jadayaabi jây ooy ajcxy yjot yhuinmañ ti y'ahuimbity juuñ. Nej ajcxy yjamido y, ca' ajcxy ymidohui'mgixy. Nej ajcxy ja'ixy, ca' y'ijxhui'mgixy. Nej ajcxy yjahuinjihuñyigixy, per ca' yhuinjihuñy ma yjot yhuinmañ. Yi' ajcxy ca' yjothuimbidaangixy ma iich, jaydëb nyajniidzögibich ajcxy.

¹⁶ Per jotcuyc miich ajcxy, co miich ajcxy i jxhui'my miid mhuin huidibi ndumyibich, e mmido'mbicy ajcxy iich n'ayuc. ¹⁷ Janch tiy'ajt jadu'n nej iich miich nimaayigixy. Janch tiy'ajt co may profetas ajcxy etz tudägy jây ajcxy huidibi tzinaayb jecy'ajty, ooy ajcxy ja'ixañ huidibi miich ajcxy m'ixyp cham, per ca' ajcxy ixy. E ooy ajcxy jamidohuañ je ayuc huidibi miich ajcxy midooyb cham, per ca' ajcxy midoy.

Jesús najtzcapxiy je i xpejt ma je niipi

¹⁸ Amido'it miich ajcxy, jadu'n nej yhuimbizimy jada jihuimbit ayuc maabi je tiim huijpi. ¹⁹ Je jây ajcxy huidibi amido'ijtp Dios y'ayuc, e mic'amy je ca'oybi yajpidzimy Dios y'ayuc ma ajcxy yjot yhuinmañ, jadu'n ajcxy nipaady nej trigo tiim huidibi cáb tügüc, e je joon ajcxy mic'amy ypiimujctay. ²⁰⁻²¹ Je jây ajcxy huidibi amido'ijtp Dios y'ayuc janch jotcuyc, per co agapxiy y paady, co tzaachyp minaxy yajnaxy miid Dios y'ayuc yci xpi, chi mic'amy ajcxy ixmajtzn Dios y'ayuc, jadu'n ajcxy nej je trigotüm huidibi ti ycây ma tzaanïc x, huidibi ca' oy ytiitzy miidity. ²² Je jây ajcxy huidibi amido'ijtp Dios y'ayuc, e co ñicxni, chi jaydigooyñ Dios y'ayuc miid jotcuyc'ajtin tzinaayin, comeen'ajtin etz adzojcin. Jadu'n ajcxy nipaady nej trigotüm huidibi ti ycây ujtzyjoty, e ca' ytiim'aty miid co oy y'ujtz'ögy. ²³ Je jây ajcxy huidibi amido'ijtp etz cöbijep yajxon Dios y'ayuc amumdüjot etz Dios y'ayuc ytumyib ma ajcxy yjot yhuinmañ, jadu'n ajcxy nipaady nej je tiim huidibi ti ycây ma oy ñaax etz ti ytiim'aty may'amy. Tüg pi'cpajc iipx majc oy yco'ity, etz jadüg pi'cpajc tugipx oy yco'ity, etz jadüg pi'cpajc migo'px oy yco'ity.

Je i xpejt co je jibic ujtzy ymuxy ma je trigo cam

²⁴ Chi Jesús yaj'ixpijy jadüg jihuimbit ayuc, ymiñañ:

—Je Dios y'ane'min jadu'n nipaady nej tüg yëydijc huidibi trigo tiim huijy ma je' ycam.

²⁵ Per co ajcxy yma'öctay nidüg'öcy je cogam, chi ytiigiy tüg ymidzip ma je ycamjot. Chi je midzip jibic ujtzy tiim oy huijy ma je trigo cam. Chi ñicxni. ²⁶ E co je trigo oy yooñ, chi ypijy. Nañ jadu'n je jibic ujtzy oy yooñ. ²⁷ Chi je ytumbidijc oy yhuindzin yajnimay: “Huindzin, ¿nej ca' ti mnipy ac trigotüm? ¿Nej co jim nañ jadu'n jibic ujtzy yajpaady?” ²⁸ Chi je cogam ymiñañ: “Huen jada' nmidzipich jadu'n ti y'idich.” Chi je tumbidijc y'amidoohui: “¿Nej mdzojcp co iich ajcxy nhuijxigibich je jibic ujtzy?” ²⁹ Chi je cogam ymiñañ: “Ca'. Pen miich ajcxy mhuixixpi je jibic ujtzy, ca' jecyity co m'ahuixxmugipy nañ jadu'n je trigo. ³⁰ Ixmatz, huen je jibic ujtzy yegy tügmucy miid je trigo, ixti cooni anajty ypidijc je cosecha. Co cosecha paty, huiñ'it nguexa'ñich je ndumbidijc co huen jayijp pujxigy je jibic ujtzy etz axotzipy etz nögipy. E co yajpidictay je jibic ujtzy, chi yajpidigipy je trigo e pidägiy ma je tze'x.”

Je i xpejt ma je mostazapajc

³¹⁻³² Nañ jadu'n Jesús yaj'ixpijy jadüg jihuimbit ayuc, ymiñañ:

—Je Dios y'ane'min jadu'n nipaady nej tüg mostazapajc huidibi tüg jây ñiip ma je' ycam. E je mostaza ytiim je' jac tim mutz ca'ydî ni huidibi ujtzy tiim. Per co je mostaza ytiim ymujx

etz yoñ, chi y'ahuimbijty jac mij ca'ydi jacjadyi utz. E hue' nicxy yjaty janch mij, ixti joon ajcxy oy yqueec miñ yqueec xijpy jim, pidägy je ype'n ma je mostaza y'aacx.

Je i'xpejt ma je levadura huidibi ca'y'oyity

³³ Nañ jadu'n Jesús yaj'ixpijc jadüg jihuimbit ayuc, yminañ:

—Je Dios y'ane'min jadu'n nipaady nej levadura huidibi tüg töxyjäy ypidacpy müd je harina, jigix je harina oy ypidigy.

Nej anajty Jesús yajtuñ je i'xpejt

³⁴ Tüg'óciy Jesús yaj'ixpijc je mayjäy, jihuimbit'amy yaj'ixpijc, e ni ti ca' jäy yaj'ixpijcy cayajnimäy jihuimbit ayuc. ³⁵ Jadu'n Jesús ytuuñ, jigix yajcuyduñ je ayuc huidibi je profeta Isaías yjaayhui'm jecy'ajty, co jadu'n yminañ:

—Ich ngapxamyich ac tim jihuimbit ayuc. Ich nigapxamybich tijaty huidibi ca' pin nehuüy, mabaad Dios oga'n yajcojy je naaxhuiñybi.

Jesús capxticxni nej yhuimbizimy je jibic utz ma je trigo cam

³⁶ Chi Jesús capxycijxy müd je mayjäy, chi ñicxy ma tüg tjc. Chi ytigiy tigoty müd je ydiscipulos ajcxy. Chi Jesús ydiscipulos ajcxy nimijhua'cy Jesús, yminañ ajcxy:

—Tun may'ajt ich ajcxy xyajhuinjihuüy je jihuimbit ayuc co ti mnigapxy je jibic utz ma je trigo cam.

³⁷ Chi Jesús yajnimay:

—Ich, je jäy huidibi tzoön tzajpjoty, jadu'n ich nipaady nej je jäy huidibi niip je oybi tim ma je ycam. ³⁸ Je cam jadu'n nipaady nej tüg'óciy naaxhuiñyjäy. Je oybi tim jadu'n nipaady nej je jäy ajcxy huidibi cöbijcp Dios y'ane'min. Je jibic utz jadu'n nipaady nej je jäy ajcxy huidibi cöbijcy ajcxy je mujcu' y'ane'min. ³⁹ Je jäy huidibi niipy je jibic utz, jadu'n yi' nipaady nej je ca'oybi. Je jibic utz cosecha, jadu'n nipaady nej je tiempo co anajty je naaxhuiñ ycixy ytigoy. Je ajcxy huidibi yajpidic je cosecha, nipaady nej je ángeles ajcxy. ⁴⁰ Jadu'n nej je jibic utz oy yajpujxigy etz yajpidacy jijnjoty, nañ tim jadu'n nicxy yjaty müd je jäy ajcxy huidibi cöbijcp je mujcu' y'ane'min co anajty je naaxhuiñ cixy ytigoy. ⁴¹ Co anajty je naaxhuiñ ycixy ytigoy, chi ich, je jäy huidibi tzoön tzajpjoty, nguexamyich n'ángeles huen yajmujctäy je jäy huidibi je ymügüg yajtundigooyb, etz yi huidibi ajcxy jibic-huinma'n tumb. ⁴² Co yajmujctähuipe je jibicjäydijc, chi ajcxy yajpidägyipy mijjijnjoty, jiihy ajcxy yäxa'n etz ytiitzmucxy ytiitzqueecy müd je ayo'n ycixpi. ⁴³ Per je jäy ajcxy huidibi cuydumb Dios chojcin, idam ajcxy müd Dios Teedy jiihy tzajpjoty. Ymii'idamy ajcxy tüg oy'ajti, jadu'n nipaadip nej je xii ytiicxin yjajin. Pen müich ajcxy mido'n müd, mido'mbijc ajcxy ich n'ayuc.

Je y'ixpejt je meen huidii yüchip

⁴⁴ Je Dios y'ane'min jadu'n nipaady nej meen huidibi yüch ijtp ma tüg cam. Per co tüg jäy paady je meen, chi mic'amy jadüg'oc yüd zigach. Chi ooy yxondägy. Chi ñicxy etz tooctäy tüg'óciy huidibi ymüd etz juy je naax.

Je y'ixpejt je perla huidibi tzoohuip

⁴⁵ Nañ jadu'n Dios y'ane'min jadu'n nipaady nej tüg ajjuuyb adoocpi huidibi ijxtaayb tüg oybi perla huidibi tzoobatp. ⁴⁶ E co anajty paady tüg perla huidibi janch tzou, chi ñicxy tooctigoydäy tüg'óciy huidibi ymüd etz juy je perla.

Je acxmadzi'n y'ixpejt

⁴⁷ E nañ jadu'n Dios y'ane'min jadu'n nipaady nej tüg acxmadzi'n huidibi jäy müd ycojibiib meyjyoty. Chi jiihy ytigiy huen ytim huidibi acxity. ⁴⁸ E co anajty je acxmadzi'n y'uch müd je acx, chi je jäy ajcxy yajpidzimy ma mejypa'ay. Chi ñay ajcxy jim mejypa'ay etz huin'ixy ajcxy je oyjatyipi acx etz pidaaccixy ma ycach. Je acx huidijaty ca' y'oyity, je' ajcxy y'ixjibijp. ⁴⁹ Tim jadu'n nej ti yjaty müd je acx, nañ jadu'n jada'n, co anajty ycixy ytigoy je naaxhuiñ. Huin'it je ángeles ajcxy ñicxa'n huindu'my naaxhuiñ huin'ixa'n je jibic jäydijc e pidäga'n ajcxy abicy, nañ jadu'n huin'ixa'n je oy jäydijc, e pidäga'n ajcxy nañ jadu'n abicy. ⁵⁰ Chi je ángeles ajcxy pidäga'n je jibicjäydijc mij jijnjoty. Jiihy jijnjoty ajcxy yäxa'n ytinähua'n etz ytiitzmucxaangixy ytiitzqueedaangixy müd je ayo'n müd je tzaachyp yixpi.

Je jäy huidibi jajtp nej oybi etz nej jibicpi yajpidzimity

⁵¹ Chi Jesús y'amidooy ajcxy:

—Nej mhuinjihuüybi müich ajcxy tüg'óciy huidibi ich ti ngapxich?

Chi ajcxy y'adzooy:

—Huindzin, ti nhuinjihuüy ich ajcxy.

⁵² Chi Jesús ajcxy nimay:

—Nidüg nidüg escriba co ti ixpiçytäy tüg'óciy Dios ytiy'ajt y'ane'min huidibi tzajpjoty tzoön, hue' jadu'n nipaady nej tüg codijc comeefybi huidijaty ymüd yjaty nej yajpidzimipy jemybi etz tucpi.

Jesús yajpaady jim Nazaret

⁵³ Co Jesús yaj'ixpijctay jada jihuimbit ayuc, chi chooñ jim. ⁵⁴ Co Jesús chooñ jim, chi ñicxy ma yci'mnaax yci'mgajp. Chi Jesús ytigüy ma je judio ñaymujctac, e ytigüy yaj'ixpijcp. Chi je mayjäy jilby ooy jihuuy huinmay nej yi' yaj'ixpicy, yminañ ajcxy:

—¿Ma jada' jada yëdyjc ti paady jada ixpijcin? ¿Ma mic'ajt paady co ooy mijhuinma'ñ tzachtuñ? ⁵⁵ Jadayaabi yëdyjc hue' yteedy'ajtpy je tzejtzpi, etz ytaj'ajtpy María. E iich ajcxy n'ix'ajtpyich je y'uch ajcxy; Jacobo, José, Simón, etz Judas. ⁵⁶ Nañ jadu'n ya chinay ma iich ajt je' y'uch ajcxy töxyjäy. ¿Ma oy ti paady jada ixpijcin jada mic'ajtin?

⁵⁷ Paady je maycogajpi ajcxy ca' ytunicuend. Paady Jesús ajcxy nimay:

—Huen ma'amyyity tüg'óciy je mayjäy ajcxy ooy yajmij'aty yi jäy ajcxy huidibi najtzcapxüyb Dios y'ayuc, ca'ydi huidibi y'ayucnajtzcapxüyb ma yci'mnaax yci'mgajp yci'mjün yci'mdjic.

⁵⁸ Ma yci'mnaax yci'mgajp Jesús ca' jaty nej mijhuinma'ñ tunip anajty, müd co je jäy ajcxy ca' mijpidägyii.

14*Juan el Bautista co y'ögy*

¹ Je huin'it tiempo Herodes huidibi anajty ane'mb jim Galilea tiy'ajt paty nej Jesús ytuñ. ² E yi' nimay je ymidungmiüdpidjic:

—Yijibi jäy huidibi tzachtumb mijhuinma'ñ, yi' je' je Juan, je Bautista. Juan ti jugypicy jadüg'oc ma anajty ti y'ögy, paady mic'ajt müd jaydëb mijhuinma'ñ tuñ.

³ Herodes ti anajty ni'ane'mdy co Juan huen yajmach, e yajpidägyipy pujxtigoty. Jadu'n Herodes tuñ müd Herodias ycixpi. Je Herodias je' anajty müd jayijp'aty ti ypicy Felipe, je Herodes y'ajch, chi ti ixmajch Felipe, chi ypijcy müd Herodes. ⁴ Juan ti anajty nimäy Herodes co ti ytundigooy co ti picy müd Herodias.

⁵ Je rey Herodes ooy anajty jayaj'öga'ñ yi Juan, per tzigüyb anajty müd je mayjäy. Com je mayjäy ti anajty mibicy ajcxy co Juan hue' anajty tügi Dios tiy'ajt müdpi, tüg profeta. ⁶ Co Herodes yjimijtpetty, chi anajty ñayñixiduñyüi, e chi Herodias ñix ñicxy ejtzp ma Herodes yhuinduu. Je rey ooy jäygidacy nej anajty Herodias ñix y'eich. Paady Herodes Herodias ñix nimay:

⁷ —Dios iich yam ngapxpatpy co nmöhuamyb ti mdimypijctzooyb.

⁸ Chi Herodias nimay je' ñix co huen pijctzoohui je Juan, je Bautista, ycohuajc ma tüg texty. Chi Herodias ñix je rey nimay:

—Ndzojcypich co miich xymöhuip Juan, je Bautista, ycohuajc ma tüg texty.

⁹⁻¹⁰ Co jadu'n midooy je rey, chi ytigüy tajp maybi mij cajee. Per co ti anajty Dios capxpaatni, yminaani mayjäy yhuinduu co ymöhuamyb tijaty ypijctzooyb. Paady ane'my tüg soldado co huen nicxy yajtzoñyüi Juan ycohuajc, e möhuipy Herodias ñix. ¹¹ Huin'it je soldado oy je Juan ycohuajc yajminajci jilby pujxtigoty. Chi moy je töxy'anäg, e je töxy'anäg yejcnajxni ma ytaj.

¹² Huin'it xii je Juan ydiscipulos ajcxy yja'ty. Chi ajcxy oy yajnaaxtigüy je Juan ñinüx. Chi ajcxy oy Jesús yajnimäy.

Jesús yajcay migoox mil jäy

¹³ Co Jesús nejhuuy ti anajty ti ytuñyüi ti yjadyüi müd Juan, chi ytigüy ma tüg barco naydüg, e nicxni ma tüg it ma ca' pin chinäy. Co je mayjäy nejhuuy co Jesús ti ñicxy, chi ajcxy chonday canaag agajp, nicxy ajcxy ma Jesús yajpaady, hue' tecygi'm ajcxy nicxy. ¹⁴ Co Jesús ypidizimy barcojoty, chi ijxy mayjäy. Jesús ooy pa'ayoy je mayjäy, e yajtzoocy je pa'mjäy huidibi anajty ajcxy jim ymüid miñ. ¹⁵ Com ti anajty chuu'ññi, paady je' ydiscipulos ajcxy nimijhua'cy Jesús, e nimay ajcxy:

—Ti chuu'ññi, e ca' ya pin china'y, paady capxcüxy müd jada mayjäy ajcxy, jaydëb ajcxy nicxy ixtäy ycaayin y'uucin ma yi mutz cajp ajcxy huingtonbi.

¹⁶ Chi Jesús yminañ:

—Ca' ycopicyty co ajcxy nicxy jicxy ixtäy. Miich ajcxy möhuip caayin uucin.

¹⁷ Chi je' ajcxy yminañ:

—Per iich ajcxy jëyi yeeby nmüidity migoox tzajcaagy etz metz acx.

¹⁸ Chi Jesús yminañ:

—Mimiingix yam'amy.

¹⁹ Chi Jesús nimay je mayjäy co huen iñay'ihuüydaaygüxy ma pi'cmüy'ung nix. Huin'it Jesús je migooxpi tzajcaagy conügy etz je metzpi acx. Chi ypa't'ijxy jilby tzajpcüxy, e yajnaxxy Dioscojuyipy. Chi tujc-huäcxy je tzajcaagy etz moy je' ydiscipulos ajcxy, co huen yajhuäcxcyxy ma je mayjäy. ²⁰ Nidüg'óciy je mayjäy ajcxy ycaay cüxyi. Co je mayjäy ycaayday, chi je discipulos ajcxy yajmujcy je cayduc jicxtuc, e yaj'ujch ajcxy majmetz cach. ²¹ Migoox

mil anajty ajcxy je yëdijctijc huidibi cay uuc. E ca' ajcxy michoy je töxyjäydijc ajcxy etz je y'ung y'anäg ajcxy.

Jesús yöy nühuingíxy

²² Chi Jesús ane'my yi' ydiscípulos ajcxy co huen barco tigiüygixy mic'amy, jigix ñicxipy ajcxy jim meyy nínaxy. Nami yi' ydiscípulos ajcxy choñ barcojoty, Jesús ycapxycíxy miid je mayjäy huen nixcixni. ²³ Co anajty Jesús ti ycapxycíxy miid je mayjäy, chi ñicxy naydüg ma tüg cögor Dios mibijctzoobi. Co ycoodziñ Jesús naydüg anajty yajpaady. ²⁴ Co ycoodziñ, meyy cujc anajty je barco cujc nicxy. E je nii ooy anajty ymijjêtzpety ma je barco, je' co ooy anajty mic yjanchpojoy. ²⁵ E co oy ymoñy, huin'it Jesús ymijhua'cy ma je' ydiscípulos ajcxy, ñicxy adüyöyb mejyhuingíxy. ²⁶ E co je discípulos ajcxy ijxy co Jesús anajty ymiñ mejyhuingíxy, chi ajcxy ooy ñay'adzigiüi. Ooy ajcxy yaaxqueecy yminañ ajcxy:

—Hue' ñich ajt iixmanñiyim.

²⁷ Chi Jesús mic'amy ymigapxy ajcxy etz nimay:

—Huñmic jotmic naybidáacigixy, ñich yi'. Ca' mdzigüygixy.

²⁸ Chi oy Pedro Jesús ymigapxyii, nimaayi:

—Huindzin, pen janch miichity, ane'ngich co huen ñich miich ninicxip adüyöyip mejyhuingíxy.

²⁹ Chi Jesús Pedro nimay:

—Min.

Huin'it Pedro yminajcy ma je barco etz ñicx ma Jesús adüyöyip mejyhuingíxy. ³⁰ Per co Pedro jihui'ñybijcy jadu'n nej anajty ooy mic yjanchpojoy, chi ooy chigiy, chi oy oga'n ytigüyñi quimbi, chi yaaxqueecy, yminañ:

—Huindzin, ñich yajtzóocigich!

³¹ Huin'it Jesús oy yci' mimajtzi, chi nimay:

—Miich, janch hueeni mmibijcin. ¿Nej co ca' yajxon xymibicyich?

³² Co Pedro etz Jesús ytigüy barcojoty, huin'it je mic poj ñajxy. ³³ Huin'it je' ajcxy jiiyb barcojoty ycojxtinay'ihuiydaay ma Jesús yhuinduu. Chi yminañ ajcxy:

—Janch tiy'ajt co miich Dios xy'ung'adyii.

Jesús yajtzooctay je pa'mjäy ajcxy jim Genesaret

³⁴ Co ajcxy ymejyñajtxay, chi ajcxy oy ja'ty ma je Genesaret naaxjot. ³⁵ E co je jäy ajcxy nejhuiy co Jesús ti yjaty ma yi' ajcxy naaxjot, chi ajcxy tiy'ajt quejxy ma tüg'óciy cajn etz rancho huinduy agonbi co Jesús yjimity. Chi je mayjäy miid miñ tüg'óciy je pa'mjäy ma Jesús. ³⁶ Chi ajcxy cohuanñy Jesús, pen jëb je pa'mjäy ñidoñyii je yhuít. E tüg'óciy je huidijaty ñidonip je y'huít, je' ajcxy chooctay y'agidactay.

15

Huidi jäy yaj'ahuimbijty janch jibic

¹ Chi ymiñ ma Jesús nijëjity fariseo jäy ajcxy, je huindzindijc huidibi tzachpadumb judío ycostumbre. Nañ jadu'n miñ nijëjity escribas, je huindzindijc huidibi ajcxy nijaydulp anajty Dios ñecy. Je fariseos etz escribas ajcxy ti choongixy anajty jim Jerusalén, chi ajcxy y'amidooy Jesús:

² —¿Na'amy co miich mdiscípulos ajcxy ca' cuydungixy judío ñi'ap costumbre? Yi' ajcxy ycaaygixy y'uuccixy, e ca' jayijp ycibujcixy, ca' ixpujcixy ixjêtzcixy ypocy.

³ Chi Jesús y'adzooy, yajtiy:

—¿Na'amy co miich ajcxy mgapxycömidodägy Dios? Mdzachcuydungixy mgi'mgostumbre ma yjapadyii mguydungixy ixpiy Dios ycötújin. ⁴ Com Dios ti y'ane'my ma ycötújin: “Yajmij'at mdaj mdeedy, e pinjaty jibic nigapxy ni'ojiiyb ytaj yteedy, ögipy yi'.” ⁵ Per miich ajcxy minamb co tüg je yëdijc jëbi nimäy ytaj yteedy: “Ca' ñich miich ajcxy nbubeda'ñ, com ti n'ahuaniyich ma Dios tüg'óciy tijaty nmidich.” ⁶ Chi huen ytimpinity jadu'n minamb, ca' ocpubedaanip ytaj yteedy, e jadu'n miich ajcxy myajtigoy Dios y'ane'min com tzachtunaangixy mgi'mgostumbre. ⁷ Miich ajcxy naybidaacip jadu'n nej jihuüy tudägy jäy, e ca' yjanchity. Janch tiy'ajt jadu'n nej jecyip Isaias jaaybejty yajhui'my co Dios jadu'n yminañ:

⁸ Jadayaabi jäy xyajmij'ajtpich ahuac aguy, per ca' ajcxy xyajmij'atyich cixyot huinijot.

⁹ Naadigi' co ajcxy xyhuin'üyigixyich xyhuinyáaxcixyich. Mnayyaj'ixpijicixy ayuc tiy'ajt huidibi jäy ajcxy ti cojy ti maacxy.

¹⁰ Huin'it Jesús huomujctay je mayjäy, yminañ:

—Amidoo'ijtcixy ñich n'ayuc etz mhuinjihuüygixip. ¹¹ Ca' ji ni ti jüxcxy huidi jäy ypidacpy ma y'ahuac nıxcxy yajpocycäy. Yi' janchtiy je jibic ayuc huidibi pidzim ma jäy ajcxy y'ahuac, yi' ajcxy yajpocycähuib.

¹² Chi ymiin ma Jesús je' ydiscipulos ajcxy, chi ajcxy ñimaayi:

—¿Nej miich mnejhuüyb co je fariseos ajcxy ñijotma'tpy co ajcxy midoy je ayuc jadu'n nej miich minañ?

¹³ Chi Jesús y'adzooy, yminañ:

—Huen tim huidibi ane'min huidibi ca' Dios ti pidäy, Dios yajtigoyam, tim jadu'n nej jäy ajcxy huijxıgy ujtz huidibi ca' y'oy'ujtzity. ¹⁴ Ixmajtcıx yi fariseos etz escribas ajcxy. Ca' ajcxy huijihuüy Dios yti'y'ajt. Jadu'n ajcxy nipaady nej jäy huintzpi, e co tüg huintzpi huijtzhuidity jadüg huintzpi, chi nimetz nıxcxy yjutcögäxıgy.

¹⁵ Huin'it Pedro nimay Jesús:

—Yajhuinjihuüyg ñich ajcxy jada jihuimbit ayuc.

¹⁶ Chi Jesús yminañ:

—¿Nej miich ajcxy nañ jadu'n ca' mhuinjihuüy jada jihuimbit ayuc? ¹⁷ ¿Nej ca' miich ajcxy mnejhuüy co tüg'óciy huidibi tigüyb ma miich ajcxy m'ahuac, je' nıcxp ma miich ajcxy mjot etz ypidzımy ma ajcxy mninıcx? ¹⁸ Per je jäy huidibi jibic capxp, capxp je' je jibic ayuc huidibi ymiid ma yjot yhuinma'ñ. Jada jibic ayuc yajpocychimıcp je jäy. ¹⁹ Yi jibicpi huidibi tzomb ma jäy ajcxy yjot yhuinma'ñ, yi' je' jäyyaj'ögü huinma'ñ, je töxyjäy migapxtigoyi huinma'ñ, meedzi huinma'ñ, je indägi huinma'ñ, je piitz capx huinma'ñ. ²⁰ Yijadu'mbi jibic-huinma'ñ yajpocycäb jäy ajcxy ma Dios. Per co jäy ajcxy ycaay y'ügy, ma ca'ni ajcxy pocy ixpujıxıy jayıjp, ca' je' ypocycäy ajcxy ma Dios.

Tüg töxyjäy huidibi ca' judiojäy mibıjc Jesús

²¹ Chi Jesús jim choon, nıxcxy ma je Tiro etz Sidón naaxjot. ²² Jim anajty tüg töxyjäy chinäy. Jada töxyjäy hue' anajty cananeajäy, canan judiojäy. Chi yi' nimiiñ Jesús, chi nimay:

—Huindzin, David y'ap y'oc, pa'ayoogich. ñich nmıidich tüg nıx huidibi ymiid ca'oybi etz oy tzaachypi paady.

²³ Per ca' ni nej Jesús y'adzoohui. Huin'it je' ydiscipulos ajcxy miiñ ma Jesús, e ycohuanıy, minañ ajcxy:

—Capxıxıx miid jada töxyjäy, com nigo xypayaax xypadınaayım.

²⁴ Chi Jesús yminañ:

—Dios ñich ti xyquexıych jëda'ajty ma je israelitasjäy huidibi y'alma tigoyam.

²⁵ Chi je töxyjäy ymıjhua'ci ma Jesús, e ycojxtınay'ihuıy ma je yhuinduu, chi yminañ:

—Huindzin, tun may'ajt pubejtcıch.

²⁶ Chi Jesús yminañ:

—Ca' jadu'n y'oyity co n'ixmadzipich je israelitasjäy (Dios yjäy), e nbubedıpıch miich ajcxy. Co jadu'n ndunıpıch, jadu'n nıpaadip nej jäy ajcxy y'ıdıch co ajcxy piıci je ajcxy y'ung ycaagy, e möy je uc.

²⁷ Huin'it je töxyjäy y'adzooy:

—Janch tiy'ajt jadu'n nej miich minañ, per ixti ycaayb je uc je tzaıcaagy y'abu'x huidibi cäb ma yhuindzin mesa.

²⁸ Chi Jesús je töxyjäy nimay:

—Janch mij mmıbıjcin. ñich ndunaamybıch jadu'n nej miich mdzocy.

Huin'it hori je töxyjäy ñıx choocy.

Jesús yajtzögy mayba'mjäy

²⁹ Chi Jesús jim choon. Chi ñajxy ma Galilea mejypa'. Chi ypejty ma tüg cögop, jim ñıay'ihuıy. ³⁰ E huin'it oy mayjäy mıdmıiñ pa'mjäy huidibi huintz, uum, cımcıy tecımcıy, etz huen tim huidibi pa'mjäy. Pidacy ajcxy je pa'mjäy ma Jesús yhuinduu, e yi' yajtzooctay.

³¹ E je mayjäy ooy tzachıhuıy tzachhuinmaay ajcxy co anajty je uumbi ti capxıgy, je huintzpi ti y'ıjıgy, je cımcıy tecımcıpy ti yöygy. Chi je mayjäy ytiıgy ñbaady capxpaady Dios, je Dios huidibi je Israel jäy ymıjpidacpy.

Jesús yajcay mıdaax mil jäy

³² Chi Jesús mıjhuoy je' ydiscipulos ajcxy, nimay:

—Ooy nba'ayooıych jadayaab jäy ajcxy. Com cuıc mıdugıg xıı ijtcıxy ya miid ñich etz ca' ajcxy mıidity ti ycaayıpy. Ca' nguexhuimbıda'ñıch ajcxy ayuu ma ytiıc, ca' yjetyıty yajpa'mgoıjp ajcxy tü'am.

³³ Chi je' ydiscipulos ajcxy minañ:

—¿Per ma n'ocpatım ti jada jäy ajcxy ycaayıpy yjııcxıpy ya ma jada abac it ma ca' pin chinäy? Co ooy mayjäyity.

³⁴ Chi Jesús yajtiy:

—¿Naag jilbi tzajcaagy miich ajcxy mjamcuidity?

Chi ajcxy y'adzooy:

—Jëyi huixtujc tzajcaagy etz hueen acx.

³⁵ Chi Jesús nimay je mayjäy co huen iñay'ihuiydaagyixy naaxcixy. ³⁶ Chi Jesús conigy je huixtujcpi tzajcaagy etz je hueenip acx, e yajnajx Dioscojuyip ma Dios. Chi tujc-hua'cx etz moy je' ydiscipulos ajcxy. E yi' ajcxy yajhua'cx je jicxy picy ma je mayjäy. ³⁷ Chi je mayjäy nidüg'öciy ycaay cüxi. Jesús ydiscipulos ajcxy yajpidigy huixtujc cach cayduc uuctuc tiibi anajty yconaxy. ³⁸ E je huidibi ajcxy cay hue' anajty naybáatigixy nimidaax mil, abicy je töxyjäydijc etz pi'ctijc ajcxy. ³⁹ Chi Jesús ycapxycixy müd je mayjäy huen ajcxy nixcixyñi ma ytijc. Chi Jesús ytigiy barcojoty etz ñicxni ma Magdala naax jot.

16

Je fariseos etz je saduceos ajcxy pijctzoogixy tüg ijppejt mijhuinma'ñybi

¹ Chi je fariseos etz saduceos y'oy ajcxy ixy Jesús. Yi' ajcxy iixta'n octunaangixy müd Jesús, paady ajcxy pijctzoy co Jesús huen yaj'ixyñi ajcxy tüg ijppejt huidibi tzomb tzajpjoty. ² Chi Jesús y'adzooy je' ajcxy:

—Co miich ajcxy m'ixy tzuu yi tzajp tzaptz, chi miich ajcxy mina'ñ com jabom oy tiempo yajpada'ñ. ³ Per co miich ajcxy m'ixy jopy je tzajp tzaptz etz huimbicy, chi ajcxy mina'ñ co ca' y'oyity yi tiempo. Miich ajcxy ooy mnaybidägyi nejhuiy ooy m'ixpicyity ma Dios ytiy'ajt, e ca' yjanchity. Miich ajcxy jëbi yi tzajp myajcapxy, per ca' mnejhuiygyixy nej yhuimbizimy yi mijhuinma'ñ ijppejt huidibi Dios ytumyb ma jadachambi xii tiempo. ⁴ Yi jäy ajcxy huidibi cham tzinaayb, ooy yjibicjyity ajcxy, ca' ajcxy capxymidooy Dios. Yi' ajcxy chojcpy co nyaj'ixipyich tüg ijppejt mijhuinma'ñ huidibi tzomb tzajpjoty. Ca' Dios yaj'ixa'ñ ajcxy jadüg mijhuinma'ñ, com müd miich ajcxy jaybetyity je mijhuinma'ñ ijppejt huidibi Dios ytuun müd Jonás jecy'ajty.

Chi Jesús ixmajch je fariseos etz saduceos ajcxy, chi ñicxni.

Fariseos jäy ajcxy y'ixpijcin

⁵ Co Jesús etz ydiscipulos ajcxy yja'ty ma jadüg nüba', chi je' ajcxy yjäydigoy je tzajcaagy. ⁶ Chi Jesús ymina'ñ:

—Naygüend'ajtigix müd yi fariseos etz saduceos ajcxy, ca' mijpidaaci yi' ajcxy y'ayuc ytiy'ajt, com jadu'n yi' nipaady nej levadura.

⁷ Chi Jesús ydiscipulos ñayñimáayigixy miñ xyipy:

—Paady jadu'n ymina'ñ, je' co ti ich ajt je tzajcaagy njäydigooym.

⁸ Jesús nejhuuy nej ajcxy nayñimáayigixy miñ xyipy, chi nimay ajcxy:

—¿Na'amy co miich ajcxy mnaangixy co ca' ajcxy tzajcaagy müidity? Janch hueeni miich ajcxy mmibijcin. ⁹ ¿Nej ca'ni miich ajcxy mhuinjihuuyi? ¿Nej ca' mjäymechyii co ich migoox tzajcaagy nyajhuäcxy etz ni migoox mil je yëydijctijc anajty huidibi ajcxy cay? ¿E ni mga'ajihuuyi ajcxy naag cach cayduc uuctuc ti myajpidigy? ¹⁰ ¿E ni mga'ajihuuyi ajcxy co huixtujc tzajcaagy nyajhuäcxyich ma nimidaax mil yëydijc ajcxy huidibi caay etz naag cach cayduc uuctuc myajpidigy ajcxy? ¹¹ ¿Nej co ca' miich ajcxy mhuinjihuuyi, co ca' ich yam nigapxy yi tzajcaagy huidibi miich ajcxy ti mjäydigoy, co ti nyajnimaaigyixy je levadura huidibi je fariseos etz saduceos ajcxy ymüd?

¹² Huin'it Jesús ydiscipulos ajcxy huinjihuuyi co Jesús ca' anajty je' ti yajnimäyii ajcxy co huen naygüend'ajtigixy müd tzajcaagy levadura. Hue' janchtiy Jesús yajnimay ajcxy co huen naygüend'ajtigixy müd je fariseos etz saduceos ajcxy y'ixpijcin.

Pedro nidiy'aty co Jesús yi' je' je Cristo

¹³ Co Jesús yja'ty ma Cesarea Filipo naaxjot, chi Jesús y'amidooy je' ydiscipulos ajcxy:

—¿Nej jäy ajcxy ymina'ñ, pínic ich?

¹⁴ Chi ajcxy ymina'ñ:

—Nijëjity jäy ymina'ñ co miich je' Juan je Bautista. Nijëjity jäy ymina'ñ co miich je' Elías, e nijëjity ymina'ñ co miich je' Jeremías o jadüg profeta (huidibi tzinay jecy'ajty).

¹⁵ Chi Jesús ymina'ñ:

—¿E miich ajcxy nej mnaangixy, pin ich?

¹⁶ Huin'it Simón Pedro y'adzooy:

—Miich je' je Cristo, je Dios y'ung.

¹⁷ Chi Jesús y'adzooy:

—Jotcujc miich Simón, Jonás y'ung, je' co ni pin xycayajnimäy jada tiy'ajt, tügpajc je Dios Teedy nDeedyich huidibi jilby tzajpjoty, yi' ti xyajnejhuuyi jada tiy'ajt. ¹⁸ Ich miich nimaayb co miich mxii'adiyb Pedro, e hue' yhuimbizimy tzaa (hue' je', je tzaa tija'ñ je ayuc huidibi Simón ycapxy co je Cristo hue' je' anajty Dios), e ma jada tzaa ji ngoja'ñich

ich ndzajptijc (hue' yhuimbizim, ma ich n'ane'min chondäga'n), e ni ca' oybi ymic'ajt ycamimadäpipy. ¹⁹ Ich miich nmöhuamyb je cötuicjin jadu'n nipaady nej tög ahuast huidibi müd myaj'ahuädzipy Dios y'ayuc ytiy'ajt. Tög'öciy huidibi miich mgapx'aducpipy ya naaxhuiñ, Dios nañ jadu'n capx'aducpipy jüby tzajpjoty, e huidibi miich ya naaxhuiñ ca' capx'aducy, Dios nañ ca' capx'aducpipy jüby tzajpjoty.

²⁰ Huin'it Jesús nimay je' ydiscipulos ajcxy, co ca' huaad ni pin nimäy co yi' je' je' Cristo.

Jesús nigapxy je' y'öcin

²¹ Ixti huin'itni Jesús ytiyüy yajnimay je' ydiscipulos ajcxy co nicxamb jim Jerusalén etz co jim ooy y'ayoohua'n. Jim Jerusalén je judío mijjäydijc, je teedytjic huidibi tungmüdp, etz yi escribas ajcxy ooy chaachytuna'ñiyi etz yaj'öga'ñiyi. Per codugüg xii huin'it yjugypiga'n jadüg'oc. ²² Huin'it Pedro müdnicy Jesús ahuingujc, e oy oy, yminañ:

—Huindzin, ca' Dios zocy nicx jadu'n mjury. Müd miich ca' jëbi jadu'n mjadipy.

²³ Per Jesús yhuäc-huimbijty, chi nimay Pedro:

—Huinhuäctuticich Pedro, je mujcu' miich jadu'n xyajcapxp. Ca' nigoo xy'adzipyich. Ca' miich mhuinma'ñybidägy nej Dios zocy. Yi' janchtiy miich mhuinma'ñ'ajtpy nej jäy ajcxy zocy.

²⁴ Huin'it Jesús je' ydiscipulos ajcxy nimay:

—Pen je pinjaty xypamina'ñich, huen yci'mdzojcin ixmajtztäy etz huen yhuinma'ñybidägy co ayoohuipy müd ich ycixpi, ixti mabaad y'ögy. ²⁵ Huen pinjäy huidibi ca' ayoohua'n müd ich ycixpi, hue' je' yajtigoyamy yi' yjugy'ajtin. Per pinjaty xyanicxpich oy nej ytimyjadipy, hue' je' ypadamyb yjugy'ajtin huidibi ca' ycixipy ytigoyipy nimina. ²⁶ ¿Ti jäygidaacin yi' co tög jäy y'ocnayyapadiyb yi meen etz mic'ajtin huindu'my ñaaxhuiñybi, e yjugy'ajtin cixipy tigoyipy tücci'y? ¿Jadu'ñiyi jëbi jäy y'alma yjugy'ajtin occojuyi? Nigi choohuity jäy ajcxy y'alma yjugy'ajtin, ca'ydi jac ni ti. ²⁷ Ich, je jäy huidibi tzoön tzajpjoty, miinaambich jadüg'oc ya naaxhuiñ müd je ängeles ajcxy etz müd nDeedyich y'oy'ajtin. Huin'it micuejtähua'n tög'öciy je jäy nej anajty ti ytuungixy, pen oy, o ca' y'oyity. ²⁸ Janch tiy'ajt jadu'n nej nimaagyixy co ji ya naagity huidibi ca' y'öga'n ixti cooni xy'ixipyich jadüg'oc co ich anajty nmiñ ane'mbi.

17

Co Jesús ñinix yajtigach

¹ Codudujc xii huin'it Jesús müdnicy Pedro, Jacobo, etz y'uch Juan ma tög mijcop, ma tög cop huidibi ooy ycixity. ² E jim copcixy Jesús ñinix ñaygojtigajtzi ma Pedro, Jacobo etz Juan ajcxy yhuinduu. Jesús yhuñijjip ytiyüy adicxp nej je xii yticxin. E Jesús yhuñt'ahuimbijty janch poob jadu'n nej tög tiicxin. ³ E timetiini oy ijxcixy Moisés etz Elías ycapxy miydägy anajty müd Jesús. ⁴ Chi Pedro nimay Jesús:

—Huindzin, oy y'oyity co ich ajt ya. Pen miich mdzojcpy jëbi ich ajcxy nyaj'oyiy tugüg tijcquemy. Tög miich mje', tög Moisés yje', etz tög Elías yje'.

⁵ Pedro capxp anajty, tim huin'itiy tög joc yajnädigoyday je' ajcxy huidibi ooy adicxp anajty. E ma je joc yajmidoy tög ayuc huidibi yminañ:

—Jadayaabi yëydijc ich je' n'ung'ajtpy huidibi ooy ndzocy njihuñyich etz yi' ich müd njotcujcity. Amidoo'it miich ajcxy yi' y'ayuc.

⁶ Co Pedro, Jacobo, etz Juan jadu'n midooy je ayuc choon jocoty, chi ajcxy ooy chigüy etz ñayñitziitcidaaci ajcxy.

⁷ Huin'it ajcxy Jesús ñimiini etz nidoñ ajcxy, e yminañ:

—Pidiccix, ca' mdzigüygixy.

⁸ E co ajcxy y'ijxigy, ca' anajty jim Elías etz Moisés. Naydügpajc Jesús yjac-hui'my müd je' ajcxy. ⁹ E co ajcxy yminajcy ma je cop, chi ajcxy Jesús nimay:

—Ca' ni pin miich ajcxy nyajnimähüpy jadu'n nej ti m'ijxcixy cham, ixti cooni ich anajty ti njugypicyich jadüg'oc ma anajty ti n'ögich.

¹⁰ Huin'it je' ydiscipulos ajcxy yajtiy Jesús:

—¿Nej co yi' escribas, yi' ajcxy huidibi njaydutp etz yajnügejp Dios y'ayuc, yminaangixy co Elías yi' miinaam jayjip etz axam je Cristo?

¹¹ Chi Jesús y'adzooy:

—Janch tiy'ajt co Elías ymiina'ñ etz yaj'oyiydähuamy tög'öciy müd Dios ycixpi. ¹² Per ich miich ajcxy nimaayb co Elías ti y'oy. E je jäy ajcxy ca' nejhuñ pin yi', e ooy jibic tuuñ ajcxy, nej tim tzojccixy. E nañ jadu'n ich, je jäy huidibi tzoön tzajpjoty ayoohuaambich ma yi' ajcxy.

¹³ Huin'it je' ydiscipulos ajcxy huñjihuñy co Jesús hue' anajty ñigapxyp je Juan, el Bautista.

Jesús yajtzögy tög jäy mo'tpa'mmüdp

¹⁴ Co Jesús, Pedro, Jacobo etz Juan yjätý jim ma je mayjäy ajcxy, chi ñimiini tüg jäy. Chi je jäy ycoxtinay ihuiy ma Jesús yhuinduu, chi yminañ:

¹⁵—Huindzin, ich nmang pa'ayoohuic. Je' co ymüid mo'tpa'm etz oy yaj'iyoooyi. Canaag'oc ti ycäy jinjoty ñijoty. ¹⁶ Paady ich ti nmüidmiñich ma müich mdiscípulos ajcxy, per ca' ajcxy ymadacy yajtzögipy.

¹⁷ Chi Jesús y'adzooy:

—Müich ajcxy huidibi jugy'ajtp jadachambi xü tiempo, ca' müich ajcxy mmibiga'ñ Dios, ca' müich ajcxy mgapxymidoohua'ñ Dios. ¿Naag xü naag tiempo ich müich ajcxy njacmíecxtugipy? Yajmiingix yi yeeg'anäg.

¹⁸ Co je yeeg'anäg yajmüidja'ty ma Jesús, huin'it Jesús ane'my je ca'oybi co huen pidzim ma je yeeg'anäg. E mic'amy je' chögý.

¹⁹ Jac co hueeñi, je' ydiscípulos ajcxy müidmiydac Jesús ahuingujc, chi ajcxy yajtiy ma Jesús:

—¿Nej co ich ajcxy ca' ti nmadägy nicx nyajpidzimgixyich je ca'oybi ma je yeeg'anäg?

²⁰ Chi Jesús yminañ:

—Je' co müich ajcxy hueeni mmibijcin. Janch tiy'ajt jadu'n nej nnímaaygixy, co ixypiy müich ajcxy xy'ocmibicyich, ooy ixypiy jéda'ajty jadu'n nej je jac mutzpi ujtz tñm, huin'it jébi ixypiy mnimäy jadayaabi cop co huen jihuäcy ya etz huen nicxy huingduum, chi ñicxip je cop. Ni ti ji ycatzipity pen janch müich ajcxy müidty mibijcin. ²¹ Jadayaabi picy ca'oybi pidzimipy co Dios nmüibjctzoohuim mictägy etz ayuu'ijt, ca' jac ti huinma'ñ.

Jesús nigapxy jadüg'oc y'öcin

²²⁻²³ Co anajty ajcxy yhuidity tügmucy jim ma Galilea y'it, chi Jesús nimay je' ydiscípulos ajcxy:

—Ich, je jäy huidibi tzoön tzajpjoty, yajcýegipyich ma jäy. E yi' ajcxy xyaj'ögibich etz codugüg xü njugypigipyich jadüg'oc. Co je' ydiscípulos ajcxy jadu'n midooy, chi ajcxy ooy yjotmaybaty.

Je cogüeitin ma je tzajptjc

²⁴ Co Jesús yja'ty müid je' ydiscípulos ajcxy jim ma je Capernaum cajp, chi huidi anajty ajcxy meeñ yajmujcp müid tzajptjc ycixpi, oy ajcxy ijxcixy je Pedro, chi ajcxy y'amidooy:

—¿Nej müich mhuindzin ycuejcpý meeñ müid tzajptjc ycixpi?

²⁵ Chi Pedro y'adzooy:

—Cuejtpy.

E huin'it hora co anajty Pedro ytigý tigoty, chi Jesús jayijp ymigapxy, ñimay:

—Simón, ¿nej mmína'ñ? ¿Pin je rey ajcxy yajcuejcpý? ¿Yi' yjäy o huingjäy?

²⁶ Chi Pedro y'adzooy:

—Ma huingjäy huidibi ane'my ijtp.

Chi Jesús y'adzooy:

—Ah, ca'tz yi' yjäy huaad ti cuejtcixy. ²⁷ Per ca' ndzocyich co je cogüeitpi nyajcapx-mayiyim, nicx müich ma yi mij laguun e cohuidzi' jüby mxu'ñ, e je acx huidibi anajty jayijp huoomb, je' myajpidzimipy, e ma y'ahuac jüby mbaadipy tüg meeñ, yajpidzim je meeñ e nicx cuet müid ich ycixpi etz müid müich ycixpi.

18

¿Pin je' jac nigi mijip?

¹ Je huin'it hora je' ydiscípulos ajcxy ymíhuäctay Jesús etz yajtiy:

—¿Pinjäy je' jac níg ymüid je müj'ajtin ma Dios y'ane'my jüby tzajpjoty?

² Chi Jesús mihuoy tüg je pi'c'anäg. Chi pidacy je pi'c'anäg cuje'amy ma yi' ajcxy. ³ Chi Jesús yminañ:

—Janch tiy'ajt ich müich ajcxy nimäy, pen ca' müich ajcxy jothuimbijtcixy etz naybidaaccixy mhuinma'ñ jadu'n nej jada pi'c'anäg huinma'ñ müid, pues ca' mdigíhuipy ma Dios Teedy y'ane'my jüby tzajpjoty. ⁴ Paady, pinjaty müid yhuinma'ñ yung nax jadu'n nej jadayaabi pi'c'anäg müid yhuinma'ñ yung nax, je' je' je huidiib jac nigi müj'ajtin ymüid jüby ma Dios y'ane'my. ⁵ Hueñypinity huidibi müid ich ycixpi cóbigipy etz tzogipy tüg pi'c'anäg, jadu'n nej jada pi'c'anäg ti ndzocyich ti ngóbicyich, hue' jadu'n nipaady nej jihuüy ti xycóbicyich ti xychocyich.

Je huidibi ooy ycojotmayity co nbocycähuim

⁶ Hueñypinity huidibi jibic-huinma'ñ ymibidzimy, e yajpocycäy yi jadu'mbi pi'ctijc huidibi ajcxy xymjñicxpejtcich, jac'oy ixypiy co yi jadu'mbi jäy ytimyñayöcxodziyi tüg paandzaa etz ñayñajtzjibihuipy mejyoty. ⁷ Ooy ayo'ñity ooy jibicity co ji naaxhuñybi yajpaady tijaty huidibi yajtundigooby jäy ajcxy. Ni mina xü ca' tigoy y'idipy tijaty huidi yajtundigoy je

jäy ajcxy. Per mij ayo'n pada'n müd yi Dios pinjaty cojp tundigooyi. ⁸ Pen miich mgi' o miich mdecy xyajtundigooyb, jac'oy ixyipy co mdim'ixpuxy etz ixjibipy jiguem. Nigi oy co mdigihuiipy ciduc tecytuc jibby tzajpjoty etz ca'ydí co mdigihuiipy müd metz mgi' etz metz mdecy mijjijnjoty huidibi nimina ycapich. ⁹ E pen yi mhuiin tug xyajpocycāhuamb, tim yajpidzim etz ixcātz jiguem. Com jac'oy mdigihuiipy müd tūg mhuiin ma jugy'ajtín huinixibi, ca'ydí co mdigihuiipy müd metz mhuiin ma yi jin huidibi camina xii ycapich.

Je y'ixpejt, je cōbixy huidibi tigooy

¹⁰ Ca' m'ixtijcixy ni tūg pi'c'anāg huidibi xymibijcpich. Yi' ajcxy je' y'āngeles tim ijtīb jibby tzajpjoty ma Dios Teedy, iich nDeedy yhuinduu. ¹¹ Ich je jāy huidibi tzoon tzajpjoty, ti nmiinich ya naaxhuiñ, je' co nyajnitzōga'ñich je jāy ajcxy y'alma huidibi tigoyam. ¹² ¿Nej miich ajcxy minañ? Pen tūg jāy ymūd migo'px cōbixy, etz pen yōydigooyb nidūgti cōbixy, ¿nej ca' jēbi ixmach je nimida'px majmocx midaax cōbixy etz nicxy ixtāy je jadūgpi huidibi yōydigooy? ¹³ E pen ypatpy je tūgpi huidibi yōydigooyb, chi ooy xondāgy müd co anajty ti paady huidibi anajty ti ytigooy, ca' jadu'n yxondāgy müd je nimida'px majmocx midaax huidibi ca' anajty ti yōytigooygixy. ¹⁴ Tim jadu'n nipaady müd Dios Teedy jibby tzajpjoty, ca' tzocy co ni tūg jāy y'alma tigoyipy.

Nej huaad tūg mmigūg nhuinmeecxim

¹⁵ Pen miich mmigūg xytuñ jibic, müdmīydac ahuinguic e yajhuinjihui' ma ti ytundigooy, pen xy'ayuchuinjihuiyb ti anajty mminaymigūgpiyūi je mmigūg. ¹⁶ Pen ca' xy'ayuc-huinjihuiy, chi huominipy tūg o metz mmigūg huidibi jēbi nidiy'ajt'adipy miich m'ayuc. ¹⁷ E pen nañ ca' je' ajcxy ayuc-huinjihuihua'ñ, müdnicxip ma mibijcpidijc yōymujctac e jim ajcxy myajnaxipy jadu'n nej tūg huidibi ca' Dios mibicy etz jadu'n nej tūg yajcogūejtpi huidibi ooy pocymidity. ¹⁸ Janch tiy'ajt iich miich ajcxy nimāy, tūg'ōciy huidibi miich ajcxy mgapx'adujcipy ya naaxhuiñ, Dios nañ jadu'n capx'adugipy jibby tzajpjoty, e huidibi miich ajcxy ya naaxhuiñ ca' capx'aducy, Dios nañ ca' capx'adugipy jibby tzajpjoty. ¹⁹ E nañ jadu'n iich miich ajcxy nimāy, pen ya naaxhuiñ miich ajcxy nimetz mnaygāpxigixy co tijaty mmibijctzohuaangixy ma Dios, Dios, iich nDeedy huidibi jibby tzajpjoty, xymōhuiipy huidibi ajcxy mbijctzooyb. ²⁰ Com ma miich ajcxy nimetz o nidugūg naymūjcigixy, jim iich n'ity cujc'amy ma miich ajcxy.

²¹ Chi Pedro y'amidooy Jesús yminañ:

—Huindzin, ¿naag'loc huaad nhuinmeecxyich yi' ajcxy huidibi xymidundigooybich? ¿Nej nmēecxibich ixti cooni huixtuc'oci?

²² Chi Jesús y'adzooy:

—Ca' yhuixtuc'ōcity, hue' meecxipy midaax migo'px jamida'px majmocx midaax'oc.

Je tumbi y'ixpejt huidibi ca'p ymigūg huinmeecxy

²³ Dios y'ane'min jibby tzajpjoty jadu'n nipaady nej tūg rey huidibi huijtz'oyi'yb müd je ytumbidijc jajadu'ñi ajcxy yjacminucxy'adyi. ²⁴ Je rey ytimyhuijtz'oyi'y chondacyñi anajty cuentas, co oy yjādy tūg ytumbi huidibi anajty minucxy'ajtpi canaag millón. ²⁵ Com je' ytumbi ca' anajty midity ti müd migüediib je' yhuindzin. Huin'it je huindzin ane'my co huen je' ytumbi yajtoocnax quipxyi müd y'ungdōxyijc etz tūg'ōciy tijaty ymūd, jaydēb ñuucxy y'adujctāhuipy. ²⁶ Huin'it ytumbi ycoxtinay'ihuiy ma yhuindzin yhuinduu etz nimay: “Huindzin, pa'ayoogich, etz iich miich nmigūejtāhuipy.” ²⁷ Chi je tumbi yhuindzin yajtuñ pa'ayo'n, chi huinmeecxip je nuucxy, e yajpidzimy pujxtigoty. ²⁸ E mic'amy co je' ypidzimy pujxtigoty, chi yminaybati tūg ymigūg huidibi anajty müd quipxyi ti ytuñ. Je' anajty minucx'ajtpi tim hueeni, chi je' yōcmimadziy je' ymigūg huidibi müd ytuñ, chi nimay: “Cuet huidibi mnuucx'ajtpy ma iich.” ²⁹ Huin'it ymigūg ycojxtinay'ihuiy ma je' yhuinduu. Chi minucx'taacy nimay: “Pa'ayoogich. Ich miich nmigūejtāhuipy.” ³⁰ Chi je jadūgpi ca' mecxtujcin yajtuñ. Chi oy ymigūg pidāgy pujxtigoty, ixti cooni anajty micuedyūi. ³¹ Co je jacjadyi ymidumbidijc oy ixy jadu'n nej ti yajtuñ je' ymigūg, chi ooy ajcxy jihuiy. Chi ajcxy nicx ma je yhuindzin etz yajnimayday tūg'ōciy nejaty anajty ti ixcixy. ³² Huin'it je' ajcxy yhuindzin oy yajhuoyi je huidibi minucx'ajtpi canaag millón. Chi nimay: “Miich ooy mdzachjibicjāyity. Ti iich miich nhuinmeecxi tūg'ōciy je mnuucxy, müd co miich pa'ayoohuin mbijctzooy ma iich. ³³ E miich nañ jadu'n ixyipy ti mba'ayoy je migūg huidibi müd mmiduñ, huidibi xymīnuucxy'ajtpi, jadu'n nej iich miich ti nba'ayooy.” ³⁴ Chi je huindzin ooy chachjotma'ty, chi pidacy ane'min co huen yajtzaachytuñ je' ytumbi mabaad cuejtāy tūg'ōciy huidibi ñuucxy'ajtpy. ³⁵ Chi Jesús ycapxycijxni, minañ:

—Tim jadu'n nej jada rey ti tuñ müd je ytumbi, nañ tim jadu'n Dios tunipy müd miich ajcxy, pen ca' nidūg nidūgti miich ajcxy ca' mhuinmeecxy je mmigūgtijc amumdūgtot.

19

Jesús yaj'ixpicy müd co jäy ytöxyijc ixmach

¹ E co Jesús capxtay jada ayuc, chi choñ Galilea, chi oy yjädý ma Judea it jim Jordán mij nüñ nínaxý. ² Chi ooy mayjáy ypanicxi, e jim yajtzoocy huidijaty anajty yuu müd pa'm müd.

³ Huin'it nijējity je fariseos ajcxy nimiiñ Jesús co yajmachcāhuaangixy anajty. Chi ajcxy y'amidooy:

—¿Nej janch co Dios ti xymooyim cōtujcin co jēbi tūg yēydijc ixmadzip ytöxyijc müd tim hueeni ti capxy ti ayuc?

⁴ Chi Jesús y'adzooy:

—¿Nej ca'ni miich ajcxy m'ixy mgapxy ma ymiññ jaybety ma Dios ñecy co je naaxhuiñybi chondacy, co Dios oga'ñ yajcojy tūg'óciy tijaty huidibi ji'ajtp co “Dios yajcojy tūg yēydijc etz tūg tōxyjáy”? ⁵ Nañ jadu'n Dios yminañ: “Je yēydijc y'ixmadzip ytaj yteedy etz pudigihuipy je' ytöxyijc. E je yēydijc etz ytöxyijc tú'ciy idaangixy.” ⁶ Paady ca' ñimetzyty ajcxy, com je yēydijc etz ytöxyijc tūgmucy y'idaangixy. Com Dios ti huijtmucy je yēydijc müd je tōxyjáy, paady ca' huaadity co jäy ajcxy huijtzhuācxyp tiibi Dios huijtmucy.

⁷ Huin'it je fariseos ajcxy y'amidooy Jesús:

—¿Na'amy co Moisés cōtujcin ti yejcy jecy'ajty co tūg yēydijc jēbi huaad ixmach ytöxyijc, e mōhuipy ñinecy ñidiy'ajt e jadu'n jēbi ixmach?

⁸ Chi Jesús yminañ:

—Moisés jada cōtujcin ti xymooygixy co jēbi m'ixmajtzcixy mdöxyijc müd co miich ajcxy mdzachcōjuuñity, ca' mgapxymidohuaangixy Dios. Per co je naaxhuiñybi chondacy ca' anajty jadu'nity. ⁹ Janch tiy'ajt jadu'n nej iich miich ajcxy nimaaygixy co je yēydijc huidibi yajjayhuācxp müd je ytöxyjáy, e je ytöxyjáy ca' anajty ti ytundigooyb müd huingbi yēydijc, hue' je yēydijc ytundigooy co ixmach ytöxyijc etz ypijctigach huingbi. Nañ tim jadu'n pen tūg yēydijc ypicy müd tūg tōxyjáy huidibi ñäy ti y'ixmachyii, hue' tundigooyb anajty je yēydijc.

¹⁰ Co Jesús ydiscipulos ajcxy midooy jada ayuc, chi ajcxy yminañ:

—Pen jadu'n jēdu'n je tiy'ajt co je yēydijc ca' huaad ixmadzip ytöxyjáy, jac'oy co ca' nbjicim.

¹¹ Chi Jesús yminañ:

—Ca' tūg'óciy je jäy huinjiñybi jadayaabi tiy'ajt. Jēyi ajcxy huinjiñybi pin ajcxy Dios pidaaci co huinjiñybi. ¹² Ji canaagnax je ayuc je huinma'ñ nej ca' yjēbity ypijipy je yēydijc. Naagity pi'ctijc yma'xung'aty e ca' yca'pxity ñinixy, paady ca' picy ajcxy. E nijējity je yēydijc ca' huaad ypicy, müd jēgixpi co anajty je' ti ymijaapigiyi. E nijējity yēydijc hui'my jaybicy müd jēgixp co ajcxy ytuñ ma Dios ytung, je Dios huidibi ane'myb tzajpjoty. Pinjaty cōbigamy iich n'ayuc huen cōbicy.

Jesús conucxy maybi'ctijc

¹³ Chi naagity je jäy müdnicy y'ung y'anäg ma Jesús jaydēb yajcñixajipy etz Dios miñictzoy müd yi' ajcxy yciñpi. Chi Jesús ydiscipulos ajcxy oiy je jäy ajcxy huidibi anajty müd miimb je y'ung y'anäg, nimaaygixy co ca' jadu'n y'oyity. ¹⁴ Per Jesús yminañ:

—Huen müd miññ ajcxy pi'c'anäg ma iich, ca' mijjpcogapxiygixy. Com pinjaty ymibijcp iich ngapxy n'ayuc, jadu'n nej jadayaabi pi'c'anäg ajcxy ymibicy, je' ajcxy tigihuam ma Dios y'ane'my jiiiby tzajpjoty.

¹⁵ Chi Jesús cñixajy je pi'c'anäg ajcxy. Chi ñicxni.

Tūg yeeg'anägnip comeñybi müdmädy Jesús

¹⁶ Chi tūg yēydijc oy icy Jesús. Chi y'amidooy:

—Huindzin, ¿ti jada' co oy iich ndunipyich jaydēb nbaadibich jugy'ajtin huidibi ca' yciñipy ytigoyipy?

¹⁷ Chi Jesús y'adzooy:

—¿Na'amy co xyñimäyich co oy huindzin iich? Dios tūgpajc oyip, ca' jac pin. Pen miich mdzocjpy co mbada'ñ jugy'ajtin huidibi ca' yciñipy ytigoyipy nimina mguydunipy je Dios cōtujcin huidibi Moisés ycojaay jecy'ajty.

¹⁸ Chi je yeeg'anäg yajtiñhuimbijty:

—¿Huidibi cōtujcin miich mdijp?

Chi Jesús yminañ:

—Ca' migüg myaj'ögipy. Ca' migüg ytöxyijc migapxtigooyipy. Ca' mmeedzip. Ca' mmigüg mhuin'ñip. ¹⁹ Yajmij'at mdaj mdeedy. Mdzogipy mijihuñybi müch mmigügtijc, tim jadu'n nej miich ci'm mnaychogyii.

²⁰ Chi je yeeg'anäg Jesús nimaayi:

—Ti nguydündäyich jadayaabi cōtujcin ajcxy maabi iich nbi'c'atyich. ¿Ti jada njacyajtigoy'ijtpyich?

²¹ Chi Jesús jadüg'oc y'adzooy:

—Pen miich m'idam tudägy, nicx tootigoyda' huidijaty miich müid, etz mo' je meen' je jäy ajcxy huidijaty ayooob. Co jadu'n mdunipy, chi mbaadipy oy'ajtin jiiiby tzejppjoty. Co jadu'n mdooctähuipy tijaty miich müid, chi miinip jadüg'oc ma iich nyajpaadyich, e pajamgich.

²² Co je yeeg'anäg jadu'n midooy, chi nicxni taj may com ooy anajty chachcomeeñity.

²³ Huin'it Jesús nimay je' ydiscipulos ajcxy:

—Janch tiy'ajt jadu'n nej nimaaygixy co ooy ymijhuinma'ñity co tüg comeeñijäy ytigihuipy ma Dios y'ane'my jiiiby tzejppjoty. ²⁴ Jadüg'oc nmına'ñich co ooy chipity co tüg comeeñijäy tigihiipy ma Dios y'ane'my, nīgi ca' chipity co tüg camello ñaxipy ma tüg xu'ñ'ijx yxutity.

²⁵ Co Jesús ydiscipulos ajcxy jadu'n midoy, chi ajcxy ooy jihuiy huinmay. Chi ajcxy ñay'amidoohui miñ xyipy:

—¿Pin jēbi paady je' y'alma nīdzoocin?

²⁶ Chi Jesús ajcxy huindicxpejty etz nimay:

—Je huidibi jāy ajcxy chipjihuiy, müid Dios ca' ni ti chipity.

²⁷ Huin'it Pedro ymina'ñ:

—Huindzin, iich ajcxy ti n'ixmajtztäyich tüg'óciy huidijaty anajty iich ajcxy nmüid etz nbanicx iich ajcxy miich. ¿E ti jada' iich ajcxy nbaadaamybich?

²⁸ Chi Jesús y'adzooy:

—Janch tiy'ajt nmına'ñich co anajty je xii je tiempo paady mina Dios yajtigajtztähuipy je tzej etz naaxhuiñybi, co anajty iich, je jäy huidibi tzoob tzejppjoty, n'ityich ma ngötojctacich oybi jiiiby tzejppjoty, chi miich ajcxy huidi ti xypahuidityich, miich ajcxy mbadamy majmetz cötujctac, e miich ajcxy mdiydunipy je majmetz picypı Israeljäy ajcxy. ²⁹ E tüg'óciy jäy ajcxy huidibi ti ixmajtztäy yjiin ytiyc, y'uch ymügü, y'ung ytöxyijc, y'ung y'anäg, ytaj yteedy, o ycam ytu' müid iich ycixpi, yi' ajcxy ypadamyb migo'px'oc, ca'ydı huidibi ti ixmach. E ypadamy je jugy'ajtin huidibi ca' ycixipy ytigoyipy ni mina. ³⁰ Mayjäy ajcxy huidibi cham ymüid mij'ajtin cötujcin, tzejppjoty ca' ajcxy müid'ada'ñ mij'ajtin cötujcin. E mayjäy huidibi cham ca' müidity ajcxy mij'ajtin cötujcin, tzejppjoty ymüid'adamy ajcxy mij'ajtin cötujcin.

20

Je naymiduniptijc y'ijxpejt

¹ Jadu'n Jesús ymina'ñ:

—Je Dios y'ane'min jiiiby tzejppjoty jadu'n nipaady nej tüg cogambi huidibi ooy mij cam müidity. Chi je cogam jopyñi choñ ma oy nicxy ixtäy tumbidijc ajcxy huidibi yajpidigipy yi uva cosecha. ² Chi ycapxytuñ müid nidüg nidüg ytumbi co mujuya'ñ tüg denario meen' tüg xiibi. Chi quejxy nidüg nidüg ytumbi ma je uva cam. ³ Chi petyxi je cogam nicxy jadüg'oc tumbi ixtaayb. Chi paty cajp cujc nijējity tumbi huidibi ca' ti tung müidity. ⁴ Chi je cogam je tumbi ajcxy nimay: “Nicx miich ajcxy tuñ ma iich ngosecha. Cham nmujuyipy jadu'n nej ytiy'ajtity.” Chi nicxy ajcxy midumbi. ⁵ Chi je cogam nicxy jadüg'oc cujcxı tumbi iixtaayb. Nañ jadu'n nicxy jadüg'oc minacyxi. ⁶ Nañ tim jadu'n tzuu jadüg'oc je cogam nicxy tumbi iixtaayb, chi paty nijējity cajpcujc huidibi ca' ti tung müidity ajcxy, chi ajcxy nimay: “¿Na'amy co miich ajcxy myaajity? ¿Nej co ca' mnicxy mdungixy?” ⁷ Chi je' ajcxy y'adzooy: “Je' co ca' iich ajcxy pin ti xycapxytuñ.” Chi je cogam ajcxy nimay: “Nicx miich ajcxy tun ma iich nnaaxjot. Cham iya nmujuyipy jadu'n nej ypaadyii.” ⁸ Co oy ycodziyñi, chi je huindzin nimay je huidibi nigop'ajtp je tung: “Nicx mijhuoodäy je tumbidijc etz mujuyipy. Mujuy jayjip huidibi ti ymiñ axam tumbi etz jim nicxy myajcogixiy ma huidibi anajty ti miñ jayjip tumbi.” ⁹ Chi ajcxy jayjip yajmujuy je tumbi ajcxy huidibi anajty ti ytiğiy tumbi axam. Chi yajmujuy ajcxy jadu'n nej anajty jäy ñaymujuyii je tüg xiibi. ¹⁰ Co miñ je tumbi ajcxy je huidibi ajcxy jayjip tigiuy tumb. Chi ajcxy jot'ajti co jac'anaxy yajmujuya'ñ. Per quipxyjaty ajcxy paty tüg meen' nidüg'óciy je tumbidijc. ¹¹ E co ajcxy quipxyjaty yajmujuy, chi ajcxy ytiğiy jotma'tpi. ¹² Chi ajcxy nimay je cam huindzin: “¿Na'amy co quipxyjaty iich ajcxy ti xymujuyich müid je huidibi ti miñ axam tumbi? Yi' ajcxy tüg jaxığı ti ytuñ, e iich ajcxy tüg xiı je anbı ti ngöbicych.” ¹³ Chi je cam huindzin y'adzooy, nimay nidügi je' ajcxy: “Miich, iich nmügü, ca' iich jibic ti nduñich müid miich. ¿Nej ca' iich ajt ngapxytuunim co jadu'n nmujuya'ñ tüg denario meen'?” ¹⁴ Con yi mmeen', e nicxni. Jadu'n ndzocyich co quipxyjaty nmujuya'ñich miich müid huidibi ti ymiñ axam ma je tung. ¹⁵ ¿Nej ca' huaad iich nduñich müid iich mmeen' nej ndzócyichi? ¿O co xyajca'oy'ixyich, co iich ooy n'oyjäyity?” ¹⁶ E huidibi ajcxy jaccogixiyb, yi' ajcxy jayjip'adam. E huidibi ajcxy jayjip'ajtp cham, yi' ajcxy yjaccogixihuamb. May ooy yajayahuomiñ e hueeni huidi huin'ijxipy.

Jesús capxpidzimy jadüg'oc co y'öga'ñ

¹⁷ E co Jesús anajty ñicxy ma Jerusalén tü'aa, chi müd nicxy ahuingujc je nimajmetzpi ydiscipulos. Chi ajcxy nimay:

¹⁸ —Jadu'n nej miich ajcxy m'ijxy mnejhuüy cham ich ajt nba'ttigüym jim Jerusalén. Jim Jerusalén ich, je jäy huidibi tzoön tzajpjoty, xyajciyegaamich je teedy mijtungmüdpí etz escribas ajcxy. Nyajtyduna'ñich etz pidäga'ñ ajcxy ané'mín co n'ögibich. ¹⁹ E yí' ajcxy xyciyega'ñich ma je huidibi ca' yjudiojäyity, jigix xyñixigibich xyajxigibich, xycoxipich, etz xyajcruutzpedipich ajcxy. E co n'ögibich, chi njugypigipyich codugüg xii.

Huidibi Jacobo etz Juan ytajypijctzoy

²⁰ Chi je Zebedeo ytöxyijc nimüñ Jesús müd metz je ymang; Jacobo etz Juan. Huin'it je ungday huingojxtinay'ihuüy Jesús, pijctzoy may'ajt. ²¹ Chi yajtiy Jesús:

—¿Ti mdzojcpy?

Chi je ungday y'adzooy:

—Tun may'ajt möhuipy ich metzpi yí nmang yí jacmijtung ma miich m'ane'mín, jaydëb iñahuipy ma müch mmijc, tüg a'oy'amy etz jadüg anajty'amy.

²² Chi Jesús y'adzooy:

—Miich ajcxy ca' mhuinjihuüy ti ajcxy mbijctzooyb. ¿Nej mminaxa'ñ myajnaxa'ñ miich ajcxy je tzaachypi huidibi ich nminaxamy nyajnaxamyich? Jadu'n nej jihuüy m'üga'ñ ajcxy je ta'm nü huidibi ich n'ügamy e mbaada'ñ je nibejtin huidibi ich nbadamyb.

Chi je' ajcxy y'adzooy:

—Jëbi.

²³ Chi Jesús ymina'ñ:

—Janch tiy'ajt nej miich ajcxy mina'ñ co mminajxcixipy myajnajxcixipy je tzaachypi huidibi nnaxa'ñich. Per ca' ich cötujcin nmüdidyich co ich miich ajcxy nbidägiy mijtungmüdpí, co yajpaadip tüg ma ich nmijc a'oy'amy e jadüg anajty'amy. Hue' janchtiy Dios Teedy ymüñ n'ixi' pinjaty ti huin'ixy jaydëb yajnicxip je mijtung ma ich n'ane'mdac.

²⁴ Co je nimajcpi ydiscipulos ajcxy nejhuüy jadu'n nej Jacobo etz Juan pijctzooy may'ajt ma Jesús, chi ajcxy ooy mijotma'ty Jacobo etz Juan.

²⁵ Huin'it Jesús mijcapxy je' ydiscipulos ajcxy, chi nimay jadu'n:

—Miich ajcxy mnejhuüy co yí jäy ajcxy huidibi mijtungmüdpí ma je maybi naax cajn, mic ajcxy ane'my je naax cajn. Nañ jadu'n yí' ajcxy huidibi mic'ajt müd ma je maybi naax cajn, mic ajcxy ane'my je jäy ajcxy. ²⁶ Per miich ajcxy ca' mjadu'nity nej je mijtungmüdpí ma je maybi naax cajn. Pinjaty miich ajcxy je mij tung yajnicxip, copicy ñaybidägiyb nej tüg tumbi. ²⁷ Pen ji miich ajcxy nidüg nigohuajc'ada'ñ, copicy ñaybidägiyb nej tüg tumbi. ²⁸ Com ich nañ jadu'n, je jäy huidibi tzoön tzajpjoty, ti nmüñich ya naaxhuñ jaydëbi nbubedipyich yí mayjäy ajcxy. E canan yí' ajcxy xypubedipich. Ngüyegaamyich njugy'ajtin ma yí o'cin müd je mayjäy ycixpi, jaydëbi ngohua'nich jäy ajcxy y'alma huidibi tigoyam.

Jesús yajtzoocy metz jay huintzpi

²⁹ E co Jesús etz ydiscipulos ajcxy ycajppidzimy jim Jericó, chi ypanicxi ajcxy mayjäy. ³⁰ E jim anajty iñaa nymetz huintzpi tüba'áy. E co ajcxy nejhuüy co jim anajty ñaxy Jesús, chi ajcxy yaaxpi jojcpi:

—Huindzin, David y'ap y'oc, tun may'ajt ich pa'ayoog.

³¹ Chi je mayjäy ajcxy ojcooty je metzpi jäy huintzpi, nimay ajcxy co huen amon. Per je huintzpi nigi minan'idich:

—Huindzin, David y'ap y'oc, tun may'ajt ich pa'ayoog.

³² Huin'it Jesús ytinayxijp, e ymina'ñ:

—Ocmin miich ajcxy ya.

Huin'it yajtiy:

—¿Ti mdzojcpy ndunipyich müd miich?

³³ Chi ajcxy ñimaayi:

—Huindzin, ndzojcpyich co xyajhuindicxigibich.

³⁴ Huin'it Jesús pa'ayoogoty ajcxy. Chi ajcxy nidoni ma je' yhuin, e mic'amy je huintzpi ajcxy y'ixigü. Chi Jesús ajcxy panicxy.

21

Jesús ytigüy jim Jerusalén

¹ E co anajty Jesús etz je mayjäy ajcxy ti mihuingoni Jerusalén, chi yja'ty ma Betfagé cajn mihuingon je Olivos cögop. E jim Jesús quejxy nymetz ydiscipulos ajcxy. ² Chi ajcxy nimay:

—Nixcix ma je cajn huidibi jim'amy. E jim tüg burro ycoxochity müd y'ung. Coguejttüdpí ajcxy je burro e yajmiingix ya ma ich. ³ E pen jim pin nej xyñimäy, nima' co je Huindzin yajtunam, e yajhuimbida'ñ mic'amy.

⁴ Jadayaabi oy jadu'n ytuñyii yjadyii ycixy yca'pxy jadu'n nej je profeta jecyip jaay, co jadu'n yminañ:

⁵ Yajñima' je jāy ajcxy huidibi tẏnaayb jīm Sión (Jerusalén), oc'ijxcix, chi miiñ ajcxy je mrey, yung nax yjot yhuinma'ñ müdity je mrey, etz burrocixy miiñ. Ma tũg burro mang huidibi ytaj tẏzimy yajyõyp.

⁶ Chi je metz ydiscipulos ajcxy cuyduñ nej anajty Jesús ti y'ane'myii. ⁷ Yajja'ty ajcxy je burro müd ymang. Chi Jesús ydiscipulos ajcxy jiibe'ñ je metzpi burro müd ajcxy yjocxhuit, chi Jesús yaj'iñay je burro mang. ⁸ E je mayjāy ooy yajhuinyēbiy ajcxy je tũ'aa müd yhuit, chi ajcxy oy ypuxy quipy y'aacx. Chi ajcxy pidacy ma je tũ'aa. ⁹ E jīm ñajxy je burro, e je mayjāy huidibi nicxp jayijp, e nañ jadu'n huidibi anajty mimb axam, ooy ajcxy ytigiiy huambi jihuuiyb, chach minangixy:

—¡Hosana! ¡Gloria a Dios! ¡Ooy ycõmayity Dios! Huen capxpaady idipy jada yēydijc huidibi mimb ma yi nHuindzin Dios yxii etz müd ymic'ajt. ¡Gloria a Dios!

¹⁰ Co Jesús ytigiiy jīm Jerusalén, chi tũg'õciy je mayjāy huinmay'ahuidijty, chi ñay'amidõohuigixy miñ xyipy:

—¿Pin y'i' yijibi jāy?

¹¹ Chi mayjāy y'adzooy:

—Yi' je' je profeta Jesús huidibi tẏzon ma Nazaret cajp ma Galilea it.

¹² Huin'it Jesús ytigiiy ma Dios ytijc. Chi ixquejxtay tũg'õciy je ajuybi adoocpi huidibi anajty yajpatp jiiby. Chi tijhuimbijttay tũg'õciy je mesa ma anajty jāy jīm ymeefiyhuingogongixy, etz nañ jadu'n tijhuimbijttay je muuxytoocpi iñaybejt. ¹³ Chi jadu'n ñimay ajcxy:

—Jaaybety jadu'n ymiñ ma Dios ñecy: “ñich ndijc je' yi' ma jāy ajcxy Dios mibijctzoy”, per miich ajcxy hue' yi' mhua'ñ meetzpi tijc.

¹⁴ E co anajty jiiby tzajtigtoty Jesús, chi jiiby ñimiini huidijaty anajty huitntz, huidijaty anajty cima'ty tecyma'ty, chi Jesús yajtzoocstay. ¹⁵ Per je teedy ajcxy huidibi mijtungmüd etz je escribas ajcxy ooy mijotma'ty Jesús co ajcxy ijxy nejhuuiy jadu'n nej Jesús anajty tuñ mijhuinma'ñ. Etz nañ jadu'n ajcxy ijxy co je pi'c'anāg anajty ajcxy yhuaangixy yjihuiyigixy jiiby tzajtigtoty, yminaangixy: “¡Huen cõmay'idipy je rey David y'ap y'oc!” ¹⁶ Chi je teedy etz escribas ajcxy Jesús ñimay:

—¿Nej ca' miich mmidooy nej je pi'c'anāg chach minangixy?

Chi Jesús y'adzooy:

—Nmidooybich. ¿Nej ca' miich ajcxy mgapxyñi Dios ñecy ma ymiñ jaaybety co jadu'n ymina'ñiyi?:

Ti myaj'ixpicy iiy ma je pi'ctijc ma'xungdijc jaydēbi ajcxy iibaadip capxpaadip Dios.

¹⁷ Chi Jesús ycapxycijxy müd je teedy etz escribas ajcxy etz chooñ jiiby tzajtigtoty. Chi ñicxy ma Betania cajp, e jīm yajnaxxy je tzumbi.

Jesús capxpojcy je higueri ca'p anajty ytiim'aty

¹⁸ E co yximiyy ytiicxigy, chi Jesús yhuimbijty Jerusalén. E ma anajty tim ytüyõy, jīm yuubõccooti. ¹⁹ E jīm ijxy ma tũba' tũg cop je higueri quipy. Chi ninicxy. Chi pāt'ijxy, per ca' anajty ni tũg ytiim, jēda'ajty je' y'aay. Chi Jesús ñimay je higueri quipy:

—¡Ni ca' minaa xii mdiim'adipy!

E mic'iciyi je higueri quipy ytich. ²⁰ E co je' ydiscipulos ajcxy jadu'n ijxy, chi ajcxy ooy huinmay. Chi ajcxy y'amidooy Jesús:

—¿Na'amy co yi higueri quipy mic'amy ti ytich?

²¹ Chi Jesús y'adzooy:

—Janch tiy'ajt jadu'n nej nnimaaygixy. Pen miich ajcxy müd je mibijcin, etz ca' ajcxy mmibicy aametz jotmetz, jēbi mijhuinma'n mdungixy nej ñich ti nduñich. E nañ jadu'n jēbi jac mijpi mijhuinma'ñ mdunipy ajcxy. Jēbi ajcxy tun cop mnimāy: “Quēg ya, tigi' mejjyoty” e xycapxymidohuipy ajcxy je tun je cop. ²² E tũg'õciy tijaty miich ajcxy mbijctzooyb huen ytimytijty, pen mmibijcp ajcxy, mbaadip ajcxy.

Jesús ycõtũjcin

²³ Co Jesús yja'ty Jerusalén, chi ytigiiy jadũg'oc ma Dios ytijc. E jiiby anajty yaj'ixpicy je mayjāy, chi ñimiini je teedy mijtungmüdp etz judío mijjāydijc ajcxy. Chi ajcxy y'amidoohui:

—¿Ma cõtũjcin ti mbaady co jadu'n mduñ tzajtigtoty? ¿Pin jada cõtũjcin ti xymõy?

²⁴ Chi Jesús y'adzooy:

—Nañ jadu'n ñich miich ajcxy nyaj'amidoohuamy tũg ayuc. Pen m'adzooyb ajcxy jada ayuc, huin'it ñich miich ajcxy nyajnimāhuipy ti cõtũjcin ñich müd nduñ huidijaty. ²⁵ ¿Pin quejxy je Juan, je Bautista, yajñibejtpi, Dios o jāy ajcxy?

Chi ajcxy ñayñimāyigixy miñ xyipy:

—Co ixyipy ajt n'adzoohuim co Dios Juan quejx, huin'it xy'adzoohuim: “¿Na'amy co miich ajcxy ca' mmibjcy Juan?” ²⁶ Per nañ jadu'n ca' huaad nminaanim co jây ajcxy yajnibjcy Juan, com nejhuuym co yi mayjây mibijccixy co je' anajty Dios tûg y'ayucnajtzcaxiibi.

²⁷ E paady ajcxy jadu'n adzooy Jesús:

—Ca' iich ajcxy nejhuuigixy.

Huin'it Jesús yminañ:

—Nañ jadu'n iich ca' nigapxa'ñich pin je' ycötujcin müd nduñich huidijaty.

Je metzpi ung iixpejt

²⁸ Chi Jesús yminañ:

—¿Nej m'oc'ixy m'ocjaygugi' jadayaabi ixpejt? Tûg je yëdyjc ymüd anajty metz je' ymang. Chi nimay je mijpi: “Nícx cham m'octuñ ma iich n'uva cam.” ²⁹ Huin'it je' ymang y'adzoohui: “¿Ca' nnicxa'ñich!” Chi jaccohuefñy je' ymang yhuinmaydigajch, chi ñicxy tumbi. ³⁰ Chi je ungdeedy oy ixy je ymang mutzpi. Chi nañ jadu'n nimaay co huen nícxy tuñ. Chi je' ymang mutzpi y'adzooy: “Oy, cham nícxibich.” Per ca' ñicxy. ³¹ ¿Huidi je' nidügti ycuymuñ nej anajty yteedy tzocy?

Chi ajcxy yminañ:

—Je' ymang mijpi huidibi jayijp nimay.

Huin'it Jesús nimay ajcxy:

—Janch tiy'ajt jadu'n nej nimaaygixy co je huidibi ajcxy yajcogüejtpi etz je töxyjây ajcxy huidibi tundigooyb müd yëdyjc, je' ajcxy tigihuamb jayijp ma Dios y'ane'my jüby tzejpjoty, ca'ydí miich ajcxy. ³² Paady ycixpi oy ymüñ je Juan huidibi jây ajcxy yajnibejt, Juan yajni'ixiigixy je mayjây nej ajcxy jëbi yjothuimbidiy ma Dios. E miich ajcxy ca' mibijcy jadu'n nej Juan yminañ. Per je' ajcxy huidibi yajcogüejtpi etz je töxyjâydyjc huidibi tundigooyb müd yëdyjctijc, ymibijc je' ajcxy Juan. Oy miich ajcxy mja'ixy, per ca' mjothuimbidaangixy etz ca' mibigaangixy.

Je naymiduuniptijc jibicjâybi ajcxy y'ixpejt

³³ Chi Jesús yminañ:

—Oc'amidoo'ijtcix jadayaabi iixpejt. Ji anajty tûg je huidibi nihuindzin'ajtpi mijpi je tundac. Chi je cogam uvas cojy ma je ytundac etz jûgajy. Chi yaj'oyiyy ma anajty jëbi je uvas ñi yajnigidagaani. Nañ jadu'n cojy tûg tzaaboch cixpi, jigix jëbi cuend'aty ycam. Co yaj'oyiyday, chi je cogam yejcy pijctzoy je ycam ma je jây ajcxy huidibi naymidunaanip. Chi oy chooni je cogam nícxy viaje tumbi. ³⁴ Je huin'it tiempo co yhuaad'ajtni je cosecha, chi je cogam quejxy nijëjty ytumbi jim ma huidibi anajty ti yajpijctzoy je ñaax co huen möyii je huidibi yi' paadaanip. ³⁵ Per je jây huidibi anajty ti naax pijctzoy, chi ajcxy majch je tumbi. Chi ajcxy ooy huinhuoopy jiphuoopy tûg. Chi ajcxy huingäch jipcäch jadûg. Chi ajcxy je midugügpí yaj'o'cy. ³⁶ Chi je conaax cogam huingbi ytumbidiyc quejxy. E nañ jadu'n ajcxy oy tungixy jadu'n nej anajty ti tungixy je jayijp'atypi. ³⁷ Chi yci'm'ung oy quejx cogixiñi. Hue' jot'ajti co yajmij'adiyb je' y'ung. ³⁸ Per co ajcxy je tumbidiyc iixpaty je cogam je' y'ung, chi ajcxy ñaygapxi: “Tzoc ajt yaj'o'cim je cogam ymang, com yi' je' mihuimamb je' yteedy je yjugy'ajtin je ypidägy. E co ajt nyaj'o'cim, chi iich ajt nmihui'mim je cam.” ³⁹ Chi ajcxy majch je cogam ymang. Chi ajcxy huijtzpidzimy ma je tundac. Chi oy yaj'öccixy.

⁴⁰ Huin'it Jesús yminañ:

—Co anajty ti müñ je conaax je cogam, ¿ti jada' y'octunipy müd je tumbidiyc ajcxy?

⁴¹ Chi je teedytjic etz mijjâydyjc y'adzooy:

—Je cogam yaj'ögipy yijübi jibicjâydyjc, ca' ajcxy pa'ayoohuipy, etz yegipy je uvas cam pijctzoy ma je huingbi jây huidibi yegipy je pidägy huidibi cogam paatip.

⁴² Chi Jesús yminañ:

—¿Nej ca'ni miich ajcxy mgapxy ma müñ jaaybety ma Dios ñeciy? Jadu'n yminañ: Je yëdyjc huidibi je jây ajcxy ca' anajty tzocy, Dios ti pidägy mij'ane'mbi. Tim jadu'n nipaady nej tûg tzaa oybi huidibi je pojtzpidijc ca' ajcxy yajtuna'ñ, e je' je' oy ti yhui'mni ma anajty yjaccopicyty. Je Huindzin Dios jada tung ti tuñ, e ooy oy n'ixim yi' ytung.

⁴³ E paady jadu'n iich miich ajcxy nimäy co miich ajcxy myajpiga'ñ yi m'it mlugar jüby tzejpjoty ma Dios y'ane'my etz yajmöhua'ñ je huingbi jây je huidibi amuumdügöt naygiyeycip ma Dios. ⁴⁴ Pinjaty ca' cöbiga'ñ jada mij'ane'mbi, ayo'n ypadaamb, ytimnipatp nej jihuüy jim ycixciday ma je tzaa nícx, tijhuüz yjajtähuipy. O pen je mij'ane'mbi midziptzoñ je jây, chi ytigoydähuipy ajcxy, tim jadu'n nej jihuüy je tzaa ñigidaagoodyii ajcxy, e janch jaam pûx nícxy yjaty.

⁴⁵ Co ajcxy midooy, chi je teedytjic etz je fariseostijc huinjihuüy co yi' ajcxy yajnigapxyp.

⁴⁶ Chi Jesús ajcxy jamadzaañ. Per tzigüyb anajty ajcxy müd je mayjây, je' co je mayjây anajty mibijccixy co Jesús najtzcaxiib Dios ytiy'ajt.

22

Je iixpejt ma jāy anajty piȳcpidjic nix#duuñ

¹ Chi Jesús jadüg'oc ytiȳiȳ capxp müd iixpejt, ymínañ jadu'n:

² —Je Dios y'ane'min jadu'n nipaady nej je rey ymang ocnix#duuñ co ti ypicy. ³ Chi je rey quejxhuáxctay je ytumbi co huen nicxy huoomujtaaygixy je huidijaty anajty ti yaj'nímaaygixy co míngixipy ma ytuna'ñyii yjada'ñyii je piȳcin. Per ca' je' ajcxy ymína'ñ ma je piȳcin nix#duuñ. ⁴ Chi quejxñip huingbi ytumbi, nímay ajcxy: “Nímaaygix je tiibi oy jayijp'aty mnímaaygix jadu'n co huen mmiingixy ma yam je caayin uucin ni'ixi' y'ity. Ti je huaȳ nícxpi nyaj'ögyich. E ni'ixi' iȳttaayñi, huen miiñ ajcxy ma je piȳcin ytuna'ñyii yjada'ñyii.” ⁵ E je' ajcxy tiibi anajty yaj'nímaaygixy, ca' ajcxy je' ytimy tuñ cuendi. Nijëjity ajcxy ñicxy ma ytundac. Nijëjity ajcxy ñicxy tooȳp yeȳcp; ⁶ e nijëjity ajcxy majch je rey yquejxyöbyi ajcxy, chi ajcxy oy chaachytuñ, chi yaj'o'cy. ⁷ Chi je rey ooy chachjotma'ty. Chi je soldados ajcxy quejxy co huen nicxy yaj'öctäyii je jāyyaj'öcp ajcxy etz ytoydähuip je ycajp. ⁸ Chi je rey nímay je ytumbi ajcxy: “Ni'ixi' iȳttäy ma jadayaabi je piȳcin yajnix#duna'ñ. Per je huidibi ajcxy ti yajnimäy ca' ajcxy mihuaadity co ymíngixipy. ⁹ Nicx müich ajcxy majaty jāy yȳin ytiȳc. Nímaaygixy tüg'öciȳ piȳjaty ajcxy mbaty, co huen miiingixy ma je piȳcpi.” ¹⁰ Chi ñicxy je rey ytumbi ajcxy. Chi ajcxy müdmüinday je mayjäy, je oyjäybi etz je jibicjäybi. Chi y'ujtztay je rey ytiȳc müd je mayjäy. ¹¹ Huin'it je rey ytiȳiȳ mayjäyjoty, ixa'ñ anajty huidijaty ti yajhuomiñ. E jiiȳy tüg yëydjic ti iȳxpaty huidibi ca' anajty ti ñayxoxyii, jadu'n nej jāy nayxöjigixy co ajcxy nicxy ma tüg piȳcin. ¹² Huin'it je rey mínañ: “Migüg, ¿nej ya ti mdigiy tigoty, e ca' mxojx müdity nej ypaadyii?” E je yëydjic amoñyi je' yhui'my. ¹³ Chi je rey nímay huidibi anajty jím pubeȳtp: “Cixotz teczotz jada yëydjic etz piȳäg agoottztuuby. E jiiȳy yȳihuipy yäxipy, jiiȳy ytiȳtzt huinqueedip müd jotmay.” ¹⁴ Com may je jāy ajcxy huidibi ti yajhuooy, e hueeni ajcxy huidibi ti yajhuin'ixy.

Je cogüejtin ñimidyägy

¹⁵ Je huin'it tiempo je fariseos ajcxy tuuñ quipxycapxy co anajty xihuaangixy nihuambedaangixy Jesús. ¹⁶ E jadu'n ajcxy quejxy ma Jesús yajpaady naagity huidibi minicxpejt je fariseos ajcxy ytiȳ'ajt etz naagity huidibi mĩjnicxpejt je Herodes ytiȳ'ajt. Chi ajcxy Jesús nímay:

—Huindzin, nejhuuȳibich iȳch ajcxy co müich mgapxy je tiȳ'ajt. Tudägy myaj'ixpicy jāy ajcxy jadu'n nej huaad ajcxy cuychinaaygixy Dios ytiȳ'ajt. E ca' mgüendituñ nej jāy ajcxy ymínaangixy. Tú'ciȳ müich mduñ müd comeeñyjäy etz müd ayoobtiȳc, ca' huin'ixpety myaj'ixpicy. ¹⁷ Nejhuuhamy iȳch ajcxy nej müich mína'ñ pen tiȳ'ajt jadu'n: ¿Nej ndundigooyim ma Dios ycötüȳcin, co ngüejtim ma César, je romano mij'ane'mbi?

¹⁸ Per Jesús ñejhuuȳib anajty ajcxy yȳibic-huinma'ñ, e chi ajcxy nímay:

—Ooy müich ajcxy naybidaäcigixy nej jihuȳiȳ ooy mdudägyity, e ca' yjanchity. ¿Na'amy co ajcxy yxchachjot'ixy yxchachhuinma'ñ'ixyich? ¹⁹ Yaj'ijxcich tüg meeñ huidi müd migüëjigixy César.

Chi ajcxy mĩmiiñ tüg meeñ. ²⁰ Chi co Jesús y'ijxy je meeñ, chi yajtiȳiȳ:

—¿Pĩn y'ahuinax e pĩn yxii cixjaay ma jada meeñ?

²¹ Chi ajcxy y'adzooy:

—Je romano mij'ane'mbi y'ahuinax etz yi' yxii.

Huin'it Jesús je' ajcxy nímay:

—Mo' je César huidibi yi' yjë'ajtpy, etz mo' Dios huidibi Dios yjë'ajtpy.

²² E co ajcxy jadu'n midooy, chi ajcxy ooy jihuȳiȳ huinmay. Chi ajcxy ixmajch Jesús, e ñicxni ajcxy.

Yaj'amidooy ajcxy je jugypĩcin co pĩn ti y'ögy

²³ Je huin'it xii je saduceos ajcxy oy ixy Jesús. Yi' ajcxy ymína'ñ co ca' yjugypiga'ñ je öcpi ajcxy. E jadu'n ajcxy huinma'ñ piȳäg, e ymínaangixy:

²⁴ —Huindzin, jadu'n miiñ ma Moisés ycötüȳcin co je yëydjic huidibi yȳiȳcuychinaayb müd ytöxyijc, e pen öcp je yëydjic, e ca' ni tüg y'ung yajhui'my, copicy co co'öcytöxyjäy yȳiȳctigadzipy müd je yëydjic ymiguëx. ²⁵ Pues jii ma iȳch ajcxy anajty tüg quëx je yëydjic nihuixtujc. Je unggoob yȳiȳc, e chi ix'ögy ytöxyijc, e ca' ni tüg y'ung yajhui'my. Chi je migüëx yȳiȳctigajch müd je töxyjäy. ²⁶ Nañ jadu'n je mĩmetzpi yëydjic ix'o'cy ytöxyijc. Nañ jadu'n je midugüȳpi yëydjic ix'o'cy ytöxyijc. E jadu'n oytuñyii yjadyii müd je töxyjäy co ti anajty müddzinay'abidzimdäy je nihuixtujcpi yëydjic tüg quëxpi. E je nihuixtujcpi ajcxy ix'o'cy je töxyjäy, e ca' ni tüg y'ung ajcxy yajhui'my. ²⁷ Chi nañ jadu'n oy y'öcni je töxyjäy. ²⁸ E co anajty xii tiempo paty, co anajty Dios yajjugypicy yi tiibi ajcxy y'ögy, ¿huidibi jada' ajcxy nidügti je yëydjic töxyijc'adaanip je töxyjäy? Com ti ajcxy jadu'n nihuixtujcpi müddzinay'abidzimigixy.

²⁹ Chi Jesús je' ajcxy y'adzooy:

—Miich ajcxy ca' mhuinjihuŷy je tiy'ajt, com ca' mnejhuŷygyx Dios y'ayuc ytiy'ajt, e com ni ca' mnejhuŷygyx je mic'ajt huidibi Dios ymüd. ³⁰ Pues co anajty yjugypijccixy je jây tiibi y'öccixy, chi ca' ajcxy ypigañ, e nañ jadu'n ni ca' ajcxy ñaymöhuiy y'ung huen pijccixy. Hue' ajcxy yjugy'adaangixy chinähuaangixy jiiby tzajpjoty, tim jadu'n nej je ángeles ajcxy chinaangixy jugy'ajtcixy. ³¹ Per je tiy'ajt co jây ajcxy tiibi y'öccixy yjugypigaangixy jadüg'oc, jëbi mbaatcixy jada tiy'ajt ma Dios ñecy. Dios ci'm jadu'n minañ: ³² “Fich je' je Dios huidibi Abraham, Isaac etz Jacob yDios'ajtpy.” Com yi Dios ca' yi' yDios'aty ma yi öcpi ajcxy. Yi Dios Dios'ajtp yi' ma yi juugypi ajcxy.

³³ E co je mayjây jadu'n midooy, chi ajcxy ooy tzachjihuiy tzachhuinmaay je Jesús y'ixpijcin.

Je ane'min huidibi ooyycopicity

³⁴ E co je fariseos ajcxy nejhuŷy co Jesús anajty ti yaj'amoñyii je saduceos ajcxy, chi ajcxy ñayyöymujctaayi. ³⁵ E jim anajty tüg leyhuindzin huidibi Jesús anajty jot'ijxyp huinma'ñ'ijxyp, chi y'amidooy:

³⁶ —Huindzin, ¿ma yi maybi Dios ycötujcin, huidibi yi' jaccopicityp?

³⁷ Chi Jesús y'adzooy:

—Tzoc jihui' etz yajmij'at nHuindzin'ajtim Dios müd tüg'öciy m'aa mjot, etz müd tüg'öciy m'alma, etz müd tüg'öciy mhuinma'ñ. ³⁸ Jada je' jadu'n je Dios ycötujcin huidibi jaccopicityp, etz huidibi tim jayijpip. ³⁹ Je mimetzpi Dios ycötujcin jahueengi tú'ciy ñaybadyii müd je jayijpi, yi' huidibi jadu'n minamb: “Tzojccix jihuiygyx yi mmigügtijc, tim jadu'n nej mnaychogyii nayjihuiyii ci'm.” ⁴⁰ Jada Dios metzpi ycötujcin jaccopicity jacmic'ajt müd ca' jac huidibi cötujcin huidibi Moisés etz je profetas ajcxy yejc.

¿Pin je' y'ung je Cristo?

⁴¹ E ma anajty jim tüg mucy yjac'ijtcixy je fariseos, huin'it Jesús yajtiy:

⁴² —¿Nej miich ajcxy huinmay müd Cristo? ¿Pin je' y'apmang?

Chi ajcxy y'adzooy:

—Je David je' y'apmang.

⁴³ Chi Jesús ajcxy nimay:

—¿Na'amy co David anajty ti ymina'ñ co Cristo hue' je' yi' yhuindzin? Jadu'n ti capxy David anajty müd je Dios yjihui'ñ ymic'ajt, ymina'ñ:

⁴⁴ Je Huindzin Dios nimay iich nHuindzin: “Ña' ma iich n'a'oy'amy, ixti cooni iich miich nyajmimadäp ma je mmidzip ajcxy.”

⁴⁵ ¿Nej jëbi David ymij'ap'adyii je Cristo? Com David ci'm ymina'ñ co Cristo yi' je' yhuindzin.

⁴⁶ E nitüg'aa ajcxy yca'adzohuimbijty. E jadu'n nej je xii tiempo yjacnicx anajty ca' ni pin ocjacyajtiyñi huidijaty ayuc.

23

Jesús xiy ajcxy je fariseos etz escribas

¹ Chi Jesús nimay je mayjây etz yi' ydiscípulos ajcxy:

² —Je escribas etz je fariseos ajcxy chachnaygömáayigixy co yi' ajcxy jajtp nej capxti'cxipy je cötujcin huidibi Moisés yjaay jecy'ajty. ³ Oy co ajcxy mguydunipy jadu'n nej yi' ajcxy xya'ixpijccixy Dios y'ayuc, capxymidoogixx nej xñimaayigixy per ca' mdungixy huidibi yi' ajcxy ytumb, com yi' ajcxy oy ycapxcixy e ca' ajcxy cuydungixy. ⁴ Yi' ajcxy nigo yajcojciy canaag costumbre huidi je jây ajcxy ca' mimadäga'ñ, e ca' ajcxy pa'ayoy je jây, tim jadu'n nipaady nej jihuiy tüg tziy ti mooygixy jemxyp huidibi ca' je jây ajcxy mimadäga'ñ, e yi' escribas etz fariseos ajcxy ni ca' ycihuax yajpaadaangixy je tziy. ⁵ Tüg'öciy huidi yi' ajcxy ytumb, je' ajcxy ytumb co huen jây ajcxy ixyl, jaydëbi yajcömay ajcxy. Yi' ajcxy yajhuimboc-huiniyigixy etz ñayyajcihuiniyigixy Dios y'ayuc. Nayxojcixy müd huit yooñjatyp co chachcömayaangixy. ⁶ Ooy ajcxy tzocy iñaybejt ma je' iñay je ane'mbi ma jây ajcxy yxiiduñ. Ooy ajcxy tzocy yi' cödumbi iñaybejt ma je naymujctac. ⁷ Yi' escribas etz fariseos ajcxy oy tzojccixy co ajcxy yajcapxpooocxp huindzigi'ñ'amy mayjâyduum. Etz nañ jadu'n ajcxy tzocy co jây ajcxy yajmij'adiyb nej huindzindijc ixpiyitijc. ⁸ Miich ajcxy ca' jadu'n m'a'ixihuipy co ajcxy xytijipy huindzin com nidüg'öciy miich ajcxy mnaymigüg'ajtigixy, etz tügpajc je' huidibi miich ajcxy mhuindzin'ajtpy yi' je' Cristo. ⁹ E nañ jadu'n miich ajcxy ya naaxhuiñ, ca' oy ni pin mdeedy'adiyb co müd miich ajcxy tügpajc je mDeedy, huidibi jiiby tzajpjoty. ¹⁰ E nañ ni mganaydijiyb ajcxy mij ane'mbi, com yi' Cristo je' tügpajc miich ajcxy mmij'ane'mbi. ¹¹ Je pin jaccapxymidoob ymigügtijc, je' je' mij'ajtin müd ma miich ajcxy. ¹² Pinjaty huidibi ci'm naygömayip, tzöydu'nbaadip je', e pinjaty naybidaacip nicy xeemy, je' je' capxpaady y'idipy.

¹³ ¡Ay miich ayoob ajcxy fariseos etz escribas ajcxy! Miich ajcxy mnaybidaacigixy nej jihuüy ooy mdudägyäy, e ca' yjanchity. Miich ajcxy mgoyüchpy je Dios ytiy'ajtn nej huaad jäy ajcxy ytiy'ajtn jibby tzajpjoty ma Dios y'ane'my. Ni miich ajcxy mgatigiygixy, e nañ ni mga'a'ixiyyigixy co huingbi ytiy'ajtn.

¹⁴ ¡Ay miich ayoob ajcxy fariseos etz escribas ajcxy! ¡Miich ajcxy m'aanidacp! Miich ajcxy myajcixtaayi yi co'ögy ytöxyjäy ypidägy müd ajcxy m'adzojcn, e mdungixy ooy jecy tzajpcapxycapxi, jigix capxpaady mbidzimipy. Dios nigi chaachytunip miich ajcxy müd mbocy ycixpi, ca'ydi jac pin jäy.

¹⁵ ¡Ay miich ayoob ajcxy fariseos etz escribas, miich ajcxy naybidaacigixy tudägy, e ca' yjanchity! Mhuinyöy'abidzimyb miich ajcxy je naaxhuifnybi, co mgapxhuäcxa'ñ je m'ixpijcn ma je tügpi jäy. E co ajcxy je' myajmbicy, huin'it mejtz jadu'ñy je pocy anajty müdity je jäy, ca'ydi miich ajcxy.

¹⁶ ¡Ay miich ayoob ajcxy huidibi jadu'n idütpz nej tügi huintzpi huinhuoy! Miich ajcxy minamb co pen tüg jäy tuñ yhuandaacin, e ibaati capxpaati Dios ytiy, chi ca' cuyduñ je huandaacin. Per pen ibatpy capxpatpy je oori huidibi jibby ma Dios ytiy, huin'it janchity cuyduñ je huandaacin. ¹⁷ Tzuudijc locidijc huidibi ca' huinjihuüy je tiy'ajt. ¿Huidibi jaccopicyip: je oori o je Dios ytiy ma je oori yoxy ity?

¹⁸ Nañ jadu'n miich ajcxy mina'ñ: "Pen tüg jäy huandaacin tuñ, e capxpaady je altar ma Dios yajhuindzigiy, chi ca' cuyduñ je huandaacin. Per pen capxpaady je huindzigiy'ñ tzüch ma je altar ma Dios yajhuindzigiy, chi cuyduñ yhuandaacin." ¹⁹ ¡Tzuudijc locidijc huidibi ca' huinjihuüy je tiy'ajt! ¿Huidibi jacmij'ajtn ymüd je huidibi ti yajyoxo o je altar? ²⁰ Pinjaty capxpatp je Dios ytiy ma Dios yajhuindzigiy y'agapxmuctaayb anajty huidijaty jibby yajpaatp ma Dios yajhuindzigiy. ²¹ Pinjaty capxpatp je Dios ytiy, ca' anajty jeyi capxpaady Dios ytiy, nañ ycapxpatp anajty Dios huidibi jibby tzinaayb. ²² Pinjaty capxpatp je tzajp, nañ capxpatp anajty Dios y'ane'mdac quipxy müd Dios huidi tzinaayb jibby.

²³ ¡Ay miich ayoob ajcxy fariseos etz escribas ajcxy, huidi naybidaacip tudägy, e ca' yjanchity! Miich ajcxy mooby Dios je tügpiy je majcpi huidibi je' paatip, lxti yi tzajnimang, yi ruda etz je pi'c'ujtz'ay ung. Per ca' ajcxy mduñcuenti je cötujcn huidibi jaccopicyity. Miich ajcxy ca' mdzinäy tydudägy müd je migütiy. Miich ajcxy ca' mmüdity pa'ayo'n müd je' ajcxy huidibi ayoob jottigooyb, etz ca' mmibijccixy Dios. Jada ixypiy ajcxy mbaadumyb, e mooygy Dios je tügpiy je majcpi. ²⁴ ¡Tzuudijc locitijc! Miich ajcxy ti m'anajxyp je uux, e mgojinnaaxcixy je camello, je mijpi iyujc.

²⁵ ¡Ay miich ayoob ajcxy fariseos etz escribas ajcxy, miich ajcxy naybidaacip nej tudägy jäy, e ca' yjanchity! Jibby jototy huinma'ñyoty miich ajcxy müdity jibicpi. Miich ajcxy müd je ca'oy'ixii etz je adzojcn. Tim jadu'n nipaady nej jihuüy myajhuächpy ajcxy yi tasi ninicx yi texy ninicx, e chi myajhui'my jibicpi ma tasijot ma texyot. ²⁶ ¡Tzuudijc miich ajcxy! Jayijp yajhuädz jibby jototy texy tasi, huin'it hui'm nañ jadu'n huädz nügix'amy.

²⁷ ¡Ay miich ayoob ajcxy fariseos etz escribas ajcxy, miich ajcxy naybidaacip nej tudägy jäy, e ca' yjanchity! Jadu'n miich ajcxy nipaady nej öcpi jut. Je öcpi jut nügix janch oy yquëxgy, per jibby jutoty ujtz jibby müd je öcpi pajc etz müd jibicpi. ²⁸ Jadu'n ajcxy mguëxgy mayjäyduum nej jihuüy ooy m'oyjäyity, per jibby jototy müd jibic-huinma'ñ.

²⁹ ¡Ay miich ayoob ajcxy fariseos etz escribas ajcxy, miich ajcxy naybidaacip nej tudägy jäy, e ca' yjanchity! Miich ajcxy mgo'abojtcixy yajxon je öcpi jut ma profeta ajcxy ñaaxtigiy, etz mxoxy ajcxy müd je pijy ma ñaaxtigiy je tudägy jäy ajcxy, ³⁰ e miich ajcxy nayñimaayigixy miñ xyipy: "Co ixypiy anajty n'octzinaayim jecy'ajty ca' ngapubejtm co ajt nmij'ap nmijteedy yaj'ögy je profetas ajcxy etz je tudägy jäy ajcxy." ³¹ Müd jada ycixpi miich ajcxy nejhuüyb co miich ajcxy m'ap'adyi mdeedy'adyi je jibicjäydc ajcxy huidibi yaj'öc je profetas. ³² ¡Miich ajcxy yajcixcixy je jibicpi huidibi ajcxy mmij'ap mmijteedy yajtzondac!

³³ ¡Jadu'n miich ajcxy nipaady nej mayxoox! Ca' miich ajcxy madägyipy cöguëgipy je tzaachypy jibby ayoodactuuby. ³⁴ E paady nguexaamybich ma miich ajcxy profetas etz huidibi ixpicyp ma Dios y'ayuc, etz huidibi xyaj'ixpigamb ajcxy yi Dios ñecy. Per miich ajcxy myaj'ögamyb myajcrutzpedamyb nijëjity, etz nijëjity mgoxamyb mhuobamyb ajcxy jibby tzajtigoty etz m'ixhuidida'ñ mbahuidida'ñ ajcxy cajp cajp. ³⁵ Je mijpocy xyñigidaccoda'ñ miich ajcxy, jadu'n nej je oyjäy ñi'py temy yojcy jecy'ajty, oga'ñ chondacy müd je oyjäy Abel etz ycogixiy müd Zacarias, je Berequías y'ung huidibi miich ajcxy mmij'ap mmijteedy myaj'o'c jibby tzajtigoty ma altar. ³⁶ Janch tiy'ajt jadu'n nej nimaaygixy co je mijpocy ñigidaccoda'ñ je jäy ajcxy huidibi tzinaayb jadachambi tiempo.

Jesús yäxy müd Jerusalén cajp ycixpi

³⁷ ¡Miich ajcxy Jerusalén jäy! ¡Miich ajcxy Jerusalén jäy! Jerusalén jäy huidibi jecy'ajty yaj'ögy je profetitijc etz ycögächpy ajcxy je Dios ycogapxy. Canaag'oc ti njaya-tügmujtähua'ñich miich ajcxy, jadu'n nej tzeydaj yajtügmujtäy je' y'ung ma yqueec päť,

per miich ca' m'a'ixi'ygixy. ³⁸ Oc'ix miich ajcxy nej mdijc abac yhu'i' maangixy. ³⁹ Janch tiy'ajt jadu'n nej nimaaygixy co camina miich ajcxy xy'ixipyich jadüg'oc, ixti cooni paadipy je xii je tiempo co jäy ajcxy ym'ina'n'ipy: "Cömay yi huidibi miimb müd nhuindzin Dios yxii etz ymic'ajt."

24

Jesús ym'ina'n co Dios ytiyc yhuindigoyipy

¹ Ma anajty Jesús ti ypidzimni ma Dios ytiyc, nicxp anajty, huin'it Jesús ydiscipulos ajcxy ñimijhuäci. Yi' ajcxy anajty ya'ixiydähuamyb je Dios ytiyc, com ooy anajty chachmijtiycity.

² Chi Jesús ym'ina'n:

—Huindicx miich ajcxy jada maybi mijjaty ytiyc. Miinipy xii tiempo mina tüg'óciy jada tiyc nicxy yhu'i'my taj xit, ca' ma tzaamacxy. Huindigoydähuipy tüg'óciy.

Je tiy'ajt ma ca'ni naaxhuiñybi ycixa'ñiyi ytigoya'ñiyi

³ Chi oy ñicxni ajcxy ma Olivos cögor. E co anajty jim, Jesús y'iñäy, chi ñimaayi ameech je' ydiscipulos ajcxy:

—Hich ajcxy nejhuñhuamyb mina jëdu'n ytuna'ñiyi yjada'ñiyi. ¿Ti je' quëxigamb co anajty miich mhuimbida'ñi ya naaxhuiñ, e co anajty je naaxhuiñybi ytigoya'ñi?

⁴ Chi Jesús nimay ajcxy:

—Mnaygüend'adib ajcxy, ca'ydi pin xyhuin'ingixy. ⁵ Ooy mayjäy ñaybiidägaangixy müd ñich nxii, naybiidägaangixy co je' ajcxy je Cristo, ym'ina'na'ñ ajcxy: "Hich je' je Cristo." ⁶ Co miich ajcxy ayuc midohuipy co jäy ajcxy chachtziptungixy ñayñibidigixy xi ya, chi ca' ajcxy mdzig'iygixip, com ooy ycopicity co jadu'n jayijp ytun'iyb yjadiyib. Ca' nan hue' je' anajty tim cijxp tim tigooyb je xii je tiempo. ⁷ Nayñibidig'ib naax cajp müd huingbi naax huingbi cajp, e gobierno müd huingbi gobierno. E miinip mic'ujx canaag'it etz mij yuu etz mij pa'm xi ya. ⁸ Jada tzaachyp i ayo'n oga'ni anajty chondägy huidibi nminaxaanim nyajnaaanim. ⁹ Huin'it xii huin'it tiempo miich ajcxy myajciyegipy, jigix yxchaachytungixipy e xyaj'ögixipy. E tüg'óciy je maynaaxhuiñyäj yxa'ixäangixipy, müd ñich nxii ycixpi. ¹⁰ Je huin'it tiempo may je jäy ajcxy yajtigoya'ñ ymibijcin. E nañ jadu'n ñayca'oy'ixäangixy etz ñayñigapxäangixy ñi'ojihuäangixy miñ xyipy. ¹¹ Ooy may quëxigaangixy aaniidaacpidijc mina'naangixy co Dios y'ayuc ytiy' ajt nimyidaci, e mayjäy oy huin'inaangixy. ¹² E je' co ajcxy xii jimijt ñajtnicixiyñi jac tim nigi jibicpi tunaangixy, ca' ajcxy y'ocnaychöjcinipy miñ xyipy. ¹³ Per pinjaty tiydudägy panicxp je mibijcin, je' ajcxy ypaadip y'alma nidzocin. ¹⁴ Copicy co jayijp yajcapxhuäcxa'ñ huindu'ñybi naaxhuiñybi Dios y'ayuc ytiy'ajt jemybi, jaydëbi jäy ajcxy nidüg'ociy nejhuñy Dios ytiy'ajt. Huin'it je naaxhuiñybi yciñxni ytoogyñi.

¹⁵⁻¹⁶ Je profeta Daniel jaay jecy'ajty jada ayuc (miich ajcxy pinjaty capx jada necy huin'ijhuñyigixy) ma m'ina'n: Miich ajcxy co m'ixy pinjaty jibic-huinma'ñ tumb nej ca' ypadyii ma Dios ytiyc, huidibi ooy ycodzig'ity, chi miich ajcxy huidibi tzinaayb jim Judea, co jadu'n m'ijxcixy, chi nicx mgueectzöocixipy mic'amy ma tungop. ¹⁷ Pinjaty huidibi yajpatp ma ytiñicx ca' nicxy tijaty yajpidzimy ma ytiyc. ¹⁸ Yi jäy ajcxy huidibi yajpatp camjoty, ca' ajcxy huimbidity co yajpidzimipy tijaty ma ytiyc. ¹⁹ Huin'it tiempo ayo'n ypadamy je töxyjäy ajcxy huidibi anajty y'ungdzim'ijt, e nañ jadu'n je' ajcxy huidibi müd y'ungma'xung. ²⁰ May'ajt ajcxy mbijctzoohuipy yi Dios co jada jadu'mbi ayo'n ca' ytun'iyb yjadiyib ma anajty ytiichtiempojoty, etz ma anajty pocxinxiijoty. ²¹ Huin'it oy ayo'n jotmay ytuna'ñiyi yjada'ñiyi huidibi nicamina ycatuñiyi ycajadyiini mabi naaxhuiñybi chondägy e nicamina jadu'n ycajactun'iyb ycajacyadiy. ²² Pen ca' Dios capx'aduga'ñ yjiilbi ayo'n xii ayo'n tiempo, ni pin ca' chögipy. Per Dios ycapx'adugamy yjiilbi ayo'n tiempo müd je mibijcpidijc ycixpi huidibi Dios ti huin'ixy. ²³ Co yi jadu'mbi xii tiempo anajty ymiñ, ca' mmibijccixipy, pen ji pinjaty xyñimaaygixy: "Ijxcix, cha yajpaady je Cristo", o "Jim'amy yajpaady je Cristo." Ca' mmibijccixipy. ²⁴ Pues miinip jäy ajcxy huidibi huin'inaangixy ymügütiyc. Ci'm ñayajnaäangixy jadu'n nej jihuñy je' yCristity, e ym'inaangixy co capxhuäcxy ajcxy Dios y'ayuc, e ca' yjanchity. Ytunip ajcxy mijhuinma'ñ etz mijpi ijxpejt, ixti jëbi jahuin'ingixip je mayjäy huidibi Dios ti yhuin'ixy. Per ca' Dios a'ixihuipy co yhuin'iniybi y'i yjäy. ²⁵ Ti ñich yi' jayijpni nigapxich. ²⁶ E co pinjaty ajcxy xyñimähuipy: "Chim je' je Cristo mijtigidumb", ca' ajcxy mminicixy. O co pinjaty ajcxy xyñimähuipy: "Chiiby je' tigoty yhuingoyüch", ca' ajcxy mmibigipy. ²⁷ Hich je' je jäy huidibi tzoön tzajpjoty, nhuimbidaambich ya naaxhuiñ müd je tiicxin je jájin, jadu'n nej je huidzuc huidi tiicxp xiibidzimyb ixti xiigidägy. ²⁸ Ma je öcp ninicx yajpaady jim ñimujctähua'ñ je luud ajcxy.

Nej jada' je' Dios y'ung ymiinipy

²⁹ Co anajty ti ñaxy je ayo'n xii ayo'n tiempo, huin'it je xii ycoodziygidäga'ñ, je po' ca' ytiicxa'ñ, je madza' ycadähua'ñ etz janch mic je tzajp yücxa'ñ. ³⁰ Co yi jadu'mbi ytun'iyb

yjadihyb, chi quëxga'n tzejpjoty je ijppejt co ñch, je jay huidibi tzoon tzejpjoty, nhuimbida'ñich ya naaxhuiñ. E chi tüg'óciy je mayjáy tájip máyip yjihuihuipy yáxipy, chi ajcxy ixipy je jay huidi tzoon tzejpjoty miñ anajty jocjoty müd ymic'ajt y'oy'ajt. ³¹ Chi nguexipyich ángeles ajcxy co huen mic yajxúxy ajcxy ytrompeta, jigix yóymujctáhuipy tüg'óciy pinjaty huin'ixyp xi ya ma ajcxy yajpaady ya naaxhuiñ; ma xii pidzimyb, ma xii cidágy, ma jünboj pidzimyb, ma tichpoj pidzimyb.

³² Jim miich ajcxy ijppejt mbigipy ma je higuery quipy jadu'n nej je xii tiempo ymiñ cidágy. Co je higuery quipy jadüg'oc pidágipy je' y'aay'ung, huin'it miich ajcxy nejhuihuipy co yhuingoni mina ypottigiyñi. ³³ Tim jadu'n nej tiy'ajt mbijccixy ma je higuery quipy co jada ajcxy jadu'n ixipy nejhuihuipy co yhuingoni anajty je xii je tiempo jün'aguy tijc'aguy. ³⁴ Janch tiy'ajt jadu'n nej nimaaygixy co tüg'óciy ytuna'ñyii yjada'ñyii ma ca'ni anajty je jay y'öctáy huidibi anajty jactzinaayb huin'it tiempo. ³⁵ Je tzejp etz je naaxhuiñybi cixam tigoyam yi', per ñch n'ayuc ca' ycixa'ñ ytigoya'ñ nimina.

³⁶ Ca' ni pin nejhuíy je xii je hora mina nhuimbida'ñich ya naaxhuiñybi. Ni je ángeles ajcxy canejhuíy, ni je Dios y'ung canejhuíy. Tügpajc je Dios Teedy nejhuíy.

³⁷ Com jadu'n nej yjajty ya naaxhuiñ jecy'ajty, co je Noé chinay, nañ tim jadu'n yjadipy co anajty nhuimbityich, yi jay huidibi tzoon tzejpjoty, ya naaxhuiñ. ³⁸ Jecy'ajty co anajty ca'ni je ayo'nduu ymiñ ya naaxhuiñybi, hue' je' mayjáy ajcxy chinay agujc jetcujc, ycaaygixy y'uuccixy etz yajpijccixy je y'ung y'anág, ixti cooni paty je xii tzuu co ytigiy Noé barcojoty. ³⁹ Je mayjáy ajcxy ca' ajcxy cuenttuñ co ayo'n miina'ñ anajty, ixti cooni je ayo'nduu miin e öctay ajcxy je jay nijoty. Jadu'n nej yjajty jecy'ajty müd je mayjáy huidibi tziinaayb anajty quipxy müd Noé, nañ tim jadu'n yjada'ñ müd je jay ajcxy huidibi tziñahup jac jiini co ñch anajty nhuimbityich ya naaxhuiñ jadüg'oc. ⁴⁰ Je huin'it tiempo co nhuimbidityich jadüg'oc ya naaxhuiñ, chi metz yëydijc yajpaadipy ma ytundac, tüg je' yajminicxa'ñ, e tüg je' yhui'ma'ñ. ⁴¹ E mejtz töxyjáy yajpaadip anajty yjich, tüg je' yajminicxa'ñ, e tüg je' yhui'ma'ñ.

⁴² E paady miich ajcxy ni'ixi ijtcix, xyjijp'ixipyich com ca' mnejhuíyigixy mina miich ajcxy je mHuindzin ymiina'ñ. ⁴³ Mnejhuíyigixy miich jada co ixipy je ungeedey nejhuíy ti hora je meetzpi miina'ñ, ca'p je' ymáhuipy, e ca'p a'i'xihuipy co je meetzpi ytigihuipy tigoty. ⁴⁴ Nañ tim jadu'n miich ajcxy ni'ixi ijtcix, je' co ñch, je jay huidibi tzoon tzejpjoty, nhuimbida'ñich ma ca' ni pin anajty nejhuíy.

Je tumbi tudägyti etz je huidibi ca'p ytuädgyity

⁴⁵ ¿Huidibi tumbi je' ya huidibi tumb müd yhuindzin janch cixyot huinijot huidibi müd ixpijcin, huidibi je' yhuindzin mooyipy ane'min ma ytijc, huidibi yajnidagihuipy ma ymügügtijc caayin uucin mina ypadyii? ⁴⁶ Janch jetcujc je tumbi co yhuimbidity je' yhuindzin, e je' cuyduñ jadu'n nej je' yhuindzin ti ñimáyii. ⁴⁷ Janch tiy'ajt jadu'n nej nimaaygixy co je' huiindzin ytumbi yajnihoguhajc'adyii tüg'óciy huidibi ymiid. ⁴⁸ Pen je tumbi jibicjáybi mina'ñ jotjoty huinma'ñjoty: "Huäcxijpni ñch je yhuindzin." ⁴⁹ E chi ñimajtztagip ymügügtijc, e ytigihuip caaybi uucpi müd amügyjáydjic; ⁵⁰ chi je tumbi yhuindzin minipy ma ytijc huidi xii mina je tumbi ca' anajty aa'ixy jijp'ixy e ni je hora anajty canejhuíy. ⁵¹ Chi huindzin tzaachtunip je' ytumbi, etz ypidágipy müd je jacadyyii jay ajcxy yajpaady huidibi naybidáacigixp nej tudägyjáyity e ca' yjanchity. Jiiby ayoodactuuby yjihua'ñ yäxa'ñ etz huinmucxa'ñ huingueeda'ñ ytütz müd jotmay.

25

Je ijppejt ma je majcpi töxy'anäg

¹ Co anajty nhuimbityich jadüg'oc ya naaxhuiñybi jadu'n nipaadip nej je nimajcpi töxy'anäg co ñicxy ajcxy ñayjijpcobadihuáanigixy müd je yëydijc huidi pigamb. Chi minicxy ajcxy aceite lámpara co yajticxaangixy. ²⁻⁴ Nimigoox je töxy'anäg huidi cohuinma'ñity etz ahuing minicxy jadüg quigij ujtz müd aceite. E nimigoox je töxy'anäg ca'pi ajcxy cohuinma'ñity, e ca' ajcxy ahuing minicxy jadüg quigij aceite. ⁵ E je yëydijc huidibi anajty pigamb huäcxijpni ooy, chi je töxy'anäg ajcxy ooy ytigiyñi má'uuybi. ⁶ E mijcutz ajcxy midoy co tüg jay mic mina'ñ: "Chi miñ je yëydijc huidibi pigamb, nicx jijpcobadiyigixy." ⁷ E huin'it je nimajcpi töxy'anäg ajcxy ypidictay. Chi ajcxy yjiin ni'ixiy nidüg nidüg. ⁸ Chi je nimigooxpi huidibi ca' ycohuinma'ñity nimay je nimigooxpi huidibi cohuinma'ñip: "Ñich ajcxy hueeni mooygich yi m'aceite, co pidzaanip ñch ajcxy njiin." ⁹ Chi y'adzooy je cohuinma'ñybi ajcxy: "Ca' nyega'ñich, je' co ca' ñch ajcxy nje' yhuaadñhua'ñ. Nicx miich ajcxy juy jim ma ytoogyii." ¹⁰ E ti anajty ajcxy ñicxy aceite juyyb je huidibi ajcxy ca' ycohuinma'ñity, co oy yjaty je yëydijc huidibi pigaanip. Chi je cohuinma'ñybi ajcxy müd tigiy tigoty je yëydijc huidibi pigaanip. Chi tijc yaj'agiiy. ¹¹ E com jecyñi oy yhuimbity ajcxy je huidibi ca' ycohuinma'ñity. Chi ajcxy yminañ: "¡Huindzin, Huindzin, ocyaj'ahuadz mdijc!" ¹² Chi je' y'adzooy: "Ca' ñch miich ajcxy n'ixy'adyii."

¹³ Chi Jesús yminañ:

—Nayñi'ixiñyigix, je' co ca' mnejhuñyigixy mina ñich nhuimbida'ñich jadüg'oc ya naaxhuiñ.

Je iixpejt ma je meeñ

¹⁴ Co ñich anajty nhuimbida'ñich jadüg'oc ya naaxhuiñybi, jadu'n nipaadip nej jadayaabi iixpejt, co anajty tüg comeeñjyá chona'ñ viajetumbi, chi je' ytumbi ajcxy mooy je meeñ co huen cuend'ajtcixy. ¹⁵ Je ymidügpi tumbi moy migoox mil meeñ. Je mmetzpi moy mejtz mil. E je ymidügpi moy tüg mil. E jadu'n ajcxy moy nije' nije' nej huaad cuend'ajtcixy. Chi choñ je huindzin viajetumbi. ¹⁶ Je tumbi huidibi cidigñyi migoox mil meeñ, ytiyiy ayuybi adoocpi. Chi je' ymeeñ y'ung'ajty jamigoox mil. ¹⁷ Nañ jadu'n huidibi cidigñyi mejtz mil, ytiyiy tumbi müd je meeñ. Chi je' ymeeñ y'ung'ajty ja mejtz mil. ¹⁸ Je huidibi cidigñyi tüg mil hue' oy pidägy je meeñ tützoty. Chi taji, e yützi je yhuindzin ymeeñ. ¹⁹ E com jecyñi oy yhuimbity je huindzin. Chi ytiyiy cuenta yaj'oyñyb müd je ytumbi ajcxy. ²⁰ Chi miñ jayñip je huidibi anajty ti cidigñyi migoox mil meeñ. Chi je tumbi yajcidigñyi je' yhuindzin majc mil meeñ. Chi yminañ: “Miich ti xymooyich migoox mil meeñ, e ñich ti nyaj'ung'atyich jamigoox mil.”

²¹ Chi je' yhuindzin minaañ: “Janch jotcuje ñich cham co jadu'n ti mduñ müd je hueenbi meeñ. Miich ooy mdudägy etz oy ti mduñ, e paady njacmöhuaryb jacmay. Tigi' ma ñich, e xondäg müd ñich.” ²² Chi ymiñ je huidibi anajty ti cidigñyi mejtz mil meeñ. Chi nimay je yhuindzin: “Miich xymooyich mejtz mil meeñ, e ti nyaj'ung'atyich jamejtz mil.” ²³ Huin'it je' yhuindzin ñimaayi: “Janch jotcuje ñich cham, co jadu'n oy ti mduñ müd ñich nmeeñ, e paady njacmöhuaryb jacmay. Tigi' xondäg müd ñich.”

²⁴ E co oy yja'ty je huidibi cidigñyb tüg mil meeñ, chi nimay je' yhuindzin: “Huindzin, hue' ndiyyich miich myëdyj'aty janch jibic jäy. Miich cosecha myajpidicpy ma ca' ti tnñpy etz miich mgosecha myajpidicpy ma ca' ti ti mhuñy. ²⁵ Paady ooy ndzigñyich co je meeñ ngayaj'ung'adipych. E co miich mhuimbida'ñ, mdzogamy je mmeeñ, e paady je mg'i'mmeeñ ti nyüchich, je' co ndzigñyich co ñicxy nyajtigooyich miich mmeeñ. Cha je meeñ huidibi ti xymooyich.”

²⁶ Chi je' yhuindzin ñimaayi: “Jibic tumbi miich, ooy mnuuxity. ¿Nej ti mnejhuñy miich co ñich cosecha nyajpidigñyich ma ca' ti ti tnñyich, etz cosecha nyajpidigñyich ma ca' ti ti nhuiyich? ²⁷ Oy co ixipy miich je ñich nmeeñ ti myejc'anuuxy, e jim ixipy y'ung'at. E cham co ti nhuimbityich cham ixipy je nmeeñich xycidigñyich müd nimeeñ'ung.”

²⁸ Chi je huindzin nimay je jacjadyi tumbidijc: “Pijci ajcxy yi meeñ huidi ymiid, e mooygix yi huidibi majc mil ymiid. ²⁹ Je huidibi oy tumb jacyajmöhuaryb je' anaxy, e ymiid'adamy je' conaxpi. Je' huidibi hueen müd yajpigamb je' huidi ymiid, je' co ca' oy ti ytuñ müd je hueenbi. ³⁰ Yi jibi tumbi huidibi ca' oy ytuñ, pidäg ajcxy agootztuuby ma yñihuipy yäxipy, ma ytñtz huinmuucx huingueedip müd jotmay.”

Co anajty naaxhuiñjyá ajcxy yajtyduñ

³¹ Co ñich, je jäy huidibi tzoon tzejpjoty, nhuimbity ñich anajty jadüg'oc ya naaxhuiñybi, huin'it n'ixtäg'añich ma ñich n'ane'mdac etz ane'ma'ñich müd ñich nmij'ajtñ etz n'oy'ajtñ.

³² Chi tüg'öciy je naaxhuiñjyá yajtügmuñtähua'ñ ma ñich. Nhuäcñamybich jadüg jadüg jadu'n nej jäy ajcxy huäcxy je cöbixy etz je chiibo ajcxy. ³³ Nbidägaamybich a'oy'amy je jäy ajcxy huidibi oy ti ytungixy müd ñich. E yi' ajcxy jadu'n nipaadip nej cöbixy. Nbidägaamybich anajty'amy yi jäy ajcxy huidibi jibic ti ytungixy müd ñich. E yi' ajcxy jadu'n nipaadip nej chiibi.

³⁴ Chi nmimähuiybich yi jäy ajcxy huidibi a'oy'amy: “Miingix miich ajcxy huidibi Dios Teedy ti xyconuuxy ajcxy. Je'ajtñgix ane'mdac huidibi jtp n'ixi müd miich ajcxy ycixpi maabi naaxhuiñybi chondägy. ³⁵ Ma anajty ñich nyuubögyi miich ajcxy ti xyajcaayich; ma anajty ñich ndidziyi, miich ajcxy ti xyajñi'ügyich; ma anajty ñich nihuidityich, miich ajcxy jättac ti xymöyich; ³⁶ ma anajty ñich je nhuit ti nyajmayjatyich, miich ajcxy ti xymöyich je huit; ma anajty ñich nbigyijich, miich ajcxy ti xycuend'atyich; etz co anajty ñich pujxtigoty nyajpaady, miich ajcxy ti xycogapñyich.”

³⁷ Huin'it ymina'nañ je jäy ajcxy huidibi oy ti ytungixy müd ñich: “Huindzin, ¿mina ñich miich ajcxy ti n'ixy ayuu, e ti nyajcay? O ¿mina ñich miich ajcxy ti n'ixy co mdidziyi, e ti nyajñi'ügy? ³⁸ ¿Mina ñich miich ajcxy ti n'ixy co miich mñihuidity, e ti nmöy jättac? O ¿mina mhuit ti myajmayjaty, e ti nmöy je mhuit? ³⁹ ¿Mina ñich miich ajcxy ti n'ixy, co miich mbigyii, e oy ti ngüend'aty? etz ¿mina ñich miich ajcxy ti n'ixy co pujxtigoty myajpaady, e oy ti ngogapñy?” ⁴⁰ ñich, je mij'ane'mbi, n'adzohuimbiditych: “Janch tiy'ajt jadu'n nej nmimaaygixy co yi jäy ajcxy huidibi oy ti ytungixy müd pinjaty huidibi xymijñicxpejtpich, nañ jadu'n oy ti ytungixy müd ñich. Ca' ñéjity co jäy ajcxy yminañ co ca' ypñity je jäy huidibi xymijñicxpejtpich.”

⁴¹ Chi ñich, je mij'ane'mbi, nimähuibich je jäy ajcxy huidibi yajpatp: "Huinhuaäctutcich miich ajcxy jibicñädijc. Nicxy miich ajcxy mijñijoty, huidibi ijtp ni'ixi müd je mujcu' ycixpi etz müd je' y'ängeles ajcxy ycixpi. ⁴² Ma anajty ñich nyuubögyii, ca' miich ajcxy xyajcaayich; ma anajty ñich ndidziyii, ca' miich ajcxy xyajñi'ucyich; ⁴³ ma anajty nnihuidityich, ca' miich ajcxy xyajjättägyich; ma anajty ñich nhuit xytigoy'itigich, ca' miich ajcxy huit xymooyich; etz ma anajty ñich nbigyii e nyajpaadyich pujxtigoty, ca' miich ajcxy xycogapxiyich." ⁴⁴ E chi je' ajcxy ymina'nañ: "Huindzin, ¿mina ñich ajcxy miich ti n'ijxcixy co anajty miich yubögyii tidziyii, o co anajty mnihuidity? ¿Mina ti n'ijxcixy co ca' mhuit müdity, o co mbigyii, o co anajty pujxtigoty myajpaady, e ca' ñich ajcxy miich nbubejty?"

⁴⁵ Chi ñich, je mij'ane'mbi, n'adzohuañich: "Janch tiy'ajt jadu'n nej nnimaaygixy. Huen tim pinity huidibi ca' müdity pa'ayo'n müd je' ajcxy huidibi xymijnicxypejtpich, oy jäy yjaminañ co ca' ypinity, ñich miich ajcxy anajty jadu'n ti xytuñich." ⁴⁶ E jada ajcxy nicxip huinixi ayoodactuuby, e yi tudägyi ajcxy nicxip ma yi jugy'ajtin huinixibi.

26

Je huinmañ nej anajty Jesús madzaangixy

¹ Co Jesús nigapxtay tüg'óciy jadayaabi ayuc, chi nimay yi' ydiscipulos ajcxy:

² —Miich ajcxy mnejhuiyb co huixtic je amayxi, je pascua xi. Pascua xiijoty ñich, je jäy huidibi tzoön tzajpjoty, nyajcýegañich ma nmidzipich etz xyajcruutzpedañich, xyaj'ögañich ajcxy.

³ Je huin'it xi je teedy huidibi tungmüd ajcxy, je escribas, etz je mijjäydijc ajcxy ñayyöymujctayi ma je' ytiba' je teedy huidi jacmijtungmüd huidi anajty yxi Caifás. ⁴ E jim ma Caifás ytiba' jim ajcxy huinmañy'ixtay nej jebi yajmachycägixy Jesús müd anii etz yaj'ögaangixy. ⁵ Chi ajcxy ñayñimaayi miñ xyipy:

—Ca' y'oyity co xiijoty nmajtzim Jesús. Ca' jecyity co je mayjäy xymijotma'ttayim etz ytiñhuip ajcxy huambi jihuuybi.

Tüg töxyjäy pidacy aceite ma Jesús ycohuajc

⁶ Jesús anajty yajpaady Betania ma Simón ytiyc, je Simón huidibi anajty ymüd je jibic nibüdz pa'm. ⁷ E ma anajty Jesús ycaay, huin'it ymiñ tüg töxyjäy müd tüg quig ujtz müd perfume huidibi ooy oy yxuugy, jada perfume ooy anajty choohuity. Chi je töxyjäy yaj'ahuäch je quig, e yajcöyogiy Jesús je perfume huidibi ooy oy yxuugy. ⁸ Co Jesús ydiscipulos ajcxy jadu'n ijxy, chi ajcxy mijotma'ty je töxyjäy. Chi ajcxy ñayñimaayi miñ xyipy:

—¿Ti co jada perfume huidibi ooy oy xuugy ayoy? ⁹ Tzou ixypy ooy jada yajtoocy, jaydëbi ixypy müd yajpubet je ayoobitijc.

¹⁰ E co Jesús nejhuiyb nej ajcxy yminañ, chi nimay:

—¿Na'amy co m'amayiy jadayaabi töxyjäy? Yi' huidibi ti tuñ, je' yi' tüg oybi. ¹¹ Je ayoobitijc ca' ytigoy'idañ ma miich ajcxy nimina. Huen huidibi xi huen huidibi tiempo jëbi miich ajcxy mbubedipy ayoobitijc. Hich ca' n'idañich jecy ya müd miich ajcxy. ¹² Jada töxyjäy ti pidägy ma ñich nninixc perfume huidibi ooy oy xuugy, jayijp ca'ni nnaaxtigiyich. Jadu'n je' jip'ixpy mina nnaaxtigihuañich. ¹³ E huentimma'amyity je Dios y'ayuc anajty yajcapxhuäcxy huindu'my naaxhuin jim yajnigapxañ jadu'n nej je töxyjäy ti tuñ cham müd ñich, e jadu'n je mayjäy jäymedzipy jada töxyjäy.

Judas cýecy yi Jesús ma ymidzip agojux

¹⁴ Chi nidüg je' ydiscipulos huidibi yxi Judas Iscariote oy nimäy je teedy mijtungmüdp, ¹⁵ nimay ajcxy:

—¿Ti ajcxy xymöhuibich co ngýegipyich Jesús?

Chi ajcxy moy iipxmajc plata meñ. ¹⁶ Co ajcxy meñ ymooy, chi mic'amy Judas yhuinmañ'ixtay nej jëbi cýecy Jesús ma ymidzip.

Jesús y'adzuy'ajty pascua xiijoty

¹⁷ Je ymidügpi xi, je amayxi, je pascua xi ma anajty yajcay je tzaajcaagy huidi ca' levadura müdity, huin'it je' ydiscipulos ajcxy nimiñ Jesús. Chi ajcxy yajtiy:

—¿Ma mdzocy co ñich ajcxy ni'ixihuip huidi mgayamy je pascua xi cixpi?

¹⁸ Chi Jesús y'adzooy:

—Nicx miich ajcxy jim Jerusalen ma tüg jäy ytiyc, e mnimähuip: "Hich nHuindzin jadu'n minamb co yhuingoñ je' yxi yhora, e paady ma miich mdijc yi' tunañ je pascua xi adzu'ajtin müd ydiscipulos ajcxy."

¹⁹ Huin'it Jesús ydiscipulos ajcxy cuyduñ jadu'n nej Jesús anajty ti ñimäyii. Chi ni'ixiy ajcxy je pascua adzuu'ibi.

²⁰ E co chu'iy, chi Jesús y'ixtacy ma je mesa müd je nimajmetzpi ydiscipulos. ²¹ E ma anajty ycaaygixy, huin'it nimay je nimajmetzpi:

—Nidügti miich ajcxy huidibi xyciyegaambich ma nmidzipich.

²² Huin'it ajcxy yjajtay taj may. Chi ajcxy yajtiy:

—Huindzin, ¿nej ich jada'ji?

²³ Chi Jesús y'adzooy:

—Yi huidi müd ndocxmucyich, yi' je' jadu'n xyciyegaambich ma nmidzipich. ²⁴ Janch tiy'ajt co ich n'öga'ñich, jadu'n nej je profeta jaay jecy'ajty. ¡Ay ayoob je yëdyjc huidi xyciyegaambich! Jac'oy co ca' ycama'xung'aty je huidibi xyciyegaambich.

²⁵ Chi Judas yminañ:

—Huindzin, ¿nej ich jada'ji?

Chi Jesús y'adzooy:

—Miich jadu'n minamb.

²⁶ E ma anajty ajcxy ycay, huin'it Jesús tzajcaagy congy. Chi yajnajxy Dioscojuyip. E chi jada' tujchuacy je tzajcaagy. Chi moy je nimajmetzpi ajcxy je tzajcaagy, e yminañ:

—Cay miich ajcxy jadayaabi tzajcaagy, yi' je' ich je nnin'cixich.

²⁷ Huin'it Jesús ciygy je y'ügy. Chi yajnajxy Dioscojuyip. E huin'it moy je ügy je nimajmetzpi ajcxy, e yminañ:

—Üc miich ajcxy jadayaabi ügy, ²⁸ yi' je' ich je nni'pyich. Yi' ñigapxy co Dios ti yaj'aducy je jemybi ayuc. E ich nni'py ytema'ñ yoga'ñ müd je mayjäy ycixpi, jaydëbi ajcxy paadip je huinmeecxin müd je ypocy ycixpi. ²⁹ Janch tiy'ajt jadu'n nej nnimaaygixy, co ca' n'oc'ügaanich jadüg'oc je pascua xii ügy, ixti cooni je xii tiempo paadip co ich ajt n'uucim huinjemybi je pascua xii ügy ma ich nDeedy y'ane'min.

Jesús nigapxy co Pedro ycoyütza'ñyii

³⁰ E co ti y'iidäy, chi ajcxy choon'ñicxy ma Olivos cögor. ³¹ Chi Jesús je' ydiscipulos ajcxy nimay:

—Nidüg'öciy miich ajcxy xy'ixmajtztähua'ñich cham coodz. Je' co jaaybejty jadu'n müñ ma je Dios ñecy: “Ögip je cuend'ajtpi, huin'it je cöbixy yöyhuäcxtähua'ñ.” ³² E co anajty ich njugypicyich jadüg'oc ma anajty ti n'ögyich, chi jayijpni nnicxa'ñich ma Galilea, e jim naybaatim nidüg'öciy.

³³ Chi Pedro yminañ:

—Oy yi jacyadyiibi migügtijcich xyjadim'ixmajtztäy, per ni camina xii ich miich n'ixmadzipy.

³⁴ Chi Jesús Pedro nimay:

—Janch tiy'ajt jadu'n nimäyich, cham coodz ca'ni anajty je tzey yaxigy, miich tugüg'oc mina'nip co ca' xy'ixy'adyiijich.

³⁵ Chi Pedro yminañ:

—Oy ich ndim'ögip müd miich, ni camina ngaminá'ñibich co ca' miich n'ix'adyii. E nidüg'öciy je' ydiscipulos ac tim jadu'n yminañ.

Jesús mibijctzoy Dios jim Getsemaní

³⁶ Chi Jesús ñicxy müd je' ydiscipulos ajcxy, oy yja'tcixy jim Getsemaní. Chi jim Jesús nimay je ydiscipulos ajcxy:

—Ya miich ajcxy oc'ña', miin ich n'ocnicxyich jim'amy Dios mibijctzoobi.

³⁷ E chi Jesús ñicxy müd Pedro etz nañ jadu'n müd je Zebedeo ymang nimetzpi. E jim Jesús ñayjihuiyi janch tajy may mij cajee. ³⁸ E chi jim yajnajxy je nidugigpi discipulos:

—Nayjihuiybich taj may ma njot nhuinma'ñ, ixti mabaad anajty n'ögich müd tájin máyin. Hui'm miich ajcxy ya müd ich etz ca' mmaagixy.

³⁹ Huin'it Jesús ñajtzöyiy mijci'm jahui'. Chi jim ñaygojxtinaydaci naaxcixy, e ytigüy Dios mibijctzoobi, yminañ:

—Dios Teedy, ich nDios, pen jëbi jadu'n, mduñ may'ajt píjcigich jadayaabi tzaachypí ayo'n, per ca' yjadu'nity nej ich ndzojcin mdunipy, jadu'n mdunipy janchtiy nej müch mdzojcin.

⁴⁰ Huin'it Jesús yhuimbijty jim ma anajty ti yajhui'my je nidugigpi. E oy paady ac tim maab anajty ajcxy. Chi nimay je Pedro:

—¿Nej ca' madäga'ñ müch ajcxy co m'idipy juugy tüg hora müd ich ycixpi? ⁴¹ Hui'mi' ya, juugy m'idipy etz mibijctzoo Dios, jaydëb ca' je ca'oybi xymimadägip. Janch tiy'ajt co jotjoty ooy mnijot'ajtcixy co tunaangixy yi oybi. Per yi mnin'cix ca' ymadäga'ñ nicxy tuñ oybi.

⁴² Chi mimetz'oc Jesús ñicxy oy Dios mibijctzoy, yminañ:

—Dios Teedy, pen copicy co ich nbaadibich je ayo'n, huen jadu'n yjadüyb müd ich nej müch mdzojcin.

⁴³ Chi jadüg'oc Jesús huimbijty ma je nidugigpi discipulos, e oy pátnibi maab ajcxy, je' co ca' anajty ajcxy mimadägy máhuü. ⁴⁴ Chi yajhui'my ajcxy, e midugig'oc ñicxy Dios mibijctzoobi.

E nañ tim jadu'n oy minaanip jadu'n nej anajty ti y'ocminamb. ⁴⁵ Chi jadüg'oc huimbijtni jim ma je nidugügpi, chi nimay ajcxy:

—¿Máagixni? Pócxix jadachambi. Ti je tiempo yhuaad'ajtni mina iich, je jáy huidibi tzoön tzajpjoty, nyajcýyega'ñich ma yi jibicjáydijc ajcxy. ⁴⁶ Pidíccix, tzoc jámim, chi ymiiñ je huidibi xycýyegaambich ma nmidzipich.

Tzумы mach ajcxy Jesús yajnicxy

⁴⁷ Jesús capxni anajty jim co yjáty je Judas. Judas hue' je' nidügti je majmetzpi discípulos huidibi Jesús yhuin'ijx. E je Judas müd ja'ty mayjäy, je huidibi anajty ti quexy je judío teedy mǝjtungmüdpǝ etz je mijjáydijc. E je mayjäy hue' anajty ajcxy müd ypujx etz quipy. ⁴⁸ Judas, je huidibi anajty cýejcp Jesús, ti anajty jayijp yecy tüg ijxpejt huidibi müd jébi ajcxy ijxcapy Jesús. Jadu'n jayijp Judas ycapxtuñ müd je' ajcxy, e yminañ:

—Je jáy huidibi anajty ndzücxypich, yi' je' Jesús. Májtzcix.

⁴⁹ Huin'it Judas nimijhuägy Jesús co capxpocxa'ñ, chi yminañ:

—¡Huindzin!

Chi tzücx.

⁵⁰ Chi Jesús ñimay:

—Migüg, ¿na'amy co xyñimijhuägyich?

E co jadu'n nimay, chi mic'amy yi' ajcxy majch Jesús. Chi ajcxy yajnicxy tzумы mach.

⁵¹ E huin'it nidüg je Jesús ymügü, juudy je ypujx. Chi tatzpujxtucy je teedy mǝjtungmüdpǝ y'tumbi. ⁵² Chi Jesús nimay je' ydiscípulo:

—Pidäg yi mbujx ma ytijc. Com pinjaty tziptumb müd pujx, nañ jadu'n y'ögipy müd pujx. ⁵³ ¿Nej ca' mnejhuüy co iich jébi nbijctzooyich cham adzu'x may ángeles, je huidibi xyñihuá'ñibich ma nmidzipich? ⁵⁴ ¿Per nej ycixipy yca'pxipy nej müñ jaaybety, jadu'n nej cham ytuñyii yjadyii müd iich ycixpi?

⁵⁵ Chi Jesús nimay je mayjäy:

—Miich ajcxy ti xyñidzonýich müd je pujx müd je quipy. ¿Nej mdijy iich meetzpi o jáy yaj'öcpich? ñich jabom jabom anajty iñäyich nyaj'ixpicyich miich ajcxy jiiby ma Dios ytijc. E ca' miich ajcxy xymajchich. ⁵⁶ Huin'ihui' miich ajcxy co tüg'öciy yam ytuñyii yjadyii ca'px tim jadu'n nej je profeta ajcxy cojaay jecy'ajty.

Huin'it nidüg'öciy je' ydiscípulos ajcxy yqueectay. Chi Jesús yhui'my naydügpajc.

Jesús ma naymujcpidijc yhuinduu

⁵⁷ Je' ajcxy huidibi anajty ti mach Jesús, yajnicx ajcxy jim ma Caifás ytijc. E jim ma Caifás ytijc ma anajty ti ñayöymujctáayigixy je escribas etz je mijjáydijc ajcxy. ⁵⁸ E je Pedro anajty axam nicxy jigügy jihuüy, ixti cooni yajja'ty ma Caifás ytiba'. Chi jim ytigiy. Chi ixtacy müd je cuend'ajtpi ajcxy, je' co oc'ixa'ñ ocnejhuñhua'ñ nej Jesús yjada'ñ.

⁵⁹ Je teedy ajcxy mǝjtungmüdpǝ etz tüg'öciy je judíojäy mǝjtungmüdpǝ ajcxy huinma'ñ ixtaaygixy nej jébi Jesús yajpocycägixy müd ajcxy xihuin, e jadu'n jébi mooygixy yi o'cin. ⁶⁰ Mayjäy nihuambejty Jesús müd anii, per ni pin anajty ca' müdity tiy'ajt co Jesús anajty ti ytundigooy müd judíojäy ajcxy ycötuñcin. Jac com jecy müñ metz testigos müd aanii. ⁶¹ Je' ajcxy yminañ:

—Jadayaabi yéydijc minañ co jébi nyajhuindigooyich Dios ymijtzajptijc, e codugüg xii ti anajty nyaj'oyiyich jadüg'oc.

⁶² Huin'it je teedy mǝjtungmüdpǝ ytinayígy, e nimay Jesús:

—¿Nej co ca' m'adzooy? ¿Nej janch tiy'ajt nej jadayaabi metzpi testigo ymina'ñ?

⁶³ Per Jesús ca' y'adzooy. E huin'it je teedy mǝjtungmüdpǝ ñimaayi:

—Nimaayg iich ajcxy Dios ycixpi, pen janch miich je' je Cristo je Dios y'ung.

⁶⁴ Chi Jesús yminañ:

—Miich jadu'n minamb. Nañ jadu'n iich miich ajcxy nimäy, co iich je jáy huidibi tzoön tzajpjoty, miich ajcxy xy'ixipyich tzajpjoty ma Dios ymüjc a'oy'amy. Nañ jadu'n miich ajcxy xy'ixipyich jöcjoty co anajty nhuimbityich jadüg'oc ya naaxhuñ.

⁶⁵ Chi je teedy jacmǝjtungmüdpǝ oy yhuít huindzeczy huinma'ch, chi yminañ:

—Jadayaabi yéydijc ti capxtigooy Dios. ¿Ti testigo njac-huaanim? Miich ajcxy ci'm ti mmidoogixy co yi' ti ycapxytigooy ma Dios, e minañ: ⁶⁶ ¿Nej miich ajcxy minangixy?

Chi ajcxy yminañ:

—Ti ycapxytigooy, copicy co y'ögipy.

⁶⁷ Chi ajcxy huindzuji jipptzujy etz cojxy ajcxy. Chi jacjadyii huingojxy jippcojxy. ⁶⁸ E chi ajcxy nimay:

—Pen janch co miich je' je Cristo octiygapx pin ti xycoxy.

Pedro ymina'ñ co ca'p Jesús ix'yadyii

⁶⁹ Je huin'it moñi Pedro anajty iñay tibägujc. Chi ñimiini tüg töxy'anäg tumbi, chi ñimaayi:

—Miich nañ jadu'n ti mhuidity müd Jesús je Galilea jäy.

⁷⁰ Chi Pedro yminañ mayjäyoty:

—Ca' nhuinjihuñich ti mgapxpy.

⁷¹ Pedro hue' anajty pidzimnip co ñimiini huingbi töxy'anäg. Chi je töxy'anäg ñimay je' ymügügtijc:

—Jadayaabi yëydijc ti yhuidity nañ jadu'n müd Jesús je Nazaretpi.

⁷² Chi Pedro jadüg'oc coyüch je Jesús cixyot huinijot yminañ:

—Ca' n'ixy'adyiijich yijibi yëydijc.

⁷³ Jac co hueeni, je jäy huidibi anajty ajcxy jimip ñimay ajcxy je Pedro:

—Janch co miich nañ jadu'n anajty müd mhuidity yi Jesús, com yi m'ayuc yi' xya-
jniquëxicp.

⁷⁴ Chi Pedro tigiiy capxpi janch oy ñinej mīnañ huinijot:

—Ca' n'ix'adyiijich yi yëydijc.

E tim huin'itiiy je tzey yaxigy. ⁷⁵ Chi Pedro jäymejtzcody jadu'n nej anajty Jesús ti ñimäyii: “Ma ca'ni anajty tzey yaxigy cham coodz, miich tugii'oc xycoyützibich.” Chi Pedro pidzimy tiba', e jilby oy yäxy mibaad yjotcidägy.

27

Chi Jesús yajçieyey ma Pilato

¹ E co oy yxiimiy yticxiy, chi je teedy mįjtungmüdpī etz je mijjäydijc ajcxy quipxycapxy co yaj'ögaangixy Jesús. ² Chi ajcxy yajnicxy cıxoch oy ajcxy çıyey ma Poncio Pilato je gobernador.

Judas ñayyöctiiyi

³ Co je Judas je huidibi anajty ti çıyey Jesús, co ijxy co yaj'ögaanip Jesús, chi oy yjotmay-baatni. Chi conhuimbijty je iipxmajcpi plata meen ma je teedy mįjtungmüdpī etz mijjäydijc ajcxy. ⁴ Chi Judas ñimay je teedy mįjtungmüdpī etz je mijjäydijc ajcxy:

—İich ti ndundigooyich co ti ngıyeyıch yi tudägyjäy ma miich ajcxy.

Chi je' ajcxy y'adzooy:

—Ti iich ajcxy n'occuent. Miich yi' mñigixp tiibi mduñ.

⁵ Huin'it Judas cohuijty je meen jilby tzajtigoty. Chi ñıxcy. Chi ñayyöctiiyi.

⁶ Huin'it je teedy mįjtungmüdpī yajpidıgy je meen. Chi ajcxy ñayñimaayı miñ xyıpy:

—Jadayaabi meen ca' yjēbıty co nbidaacim ma ofrenda ñigidägy. Je' co yi' yjējıty je huidi ni'py ti tzoo'adyii.

⁷ Huin'it je teedy ajcxy tuñ je quipxycapxy co juyaangixy müd je meen tüg naax huidibi jäy ytiip, tütznaax it, ma ajcxy yajnaxtigihuıpy pinjaty ca' ycogajpıty jim Jerusalén. ⁸ İxti chambaad jadu'n xii'adyii jejimbı it: Ni'py naax. ⁹ E jadu'n yciyx yca'px nej je profeta Jeremias yminañ: “E jadu'n ajcxy je' yajpidıgy meen iipx majcpi plata meen (je' choou nej anajty ajcxy Israeljäy ti yajniğöduğıy), ¹⁰ e müd je meen ajcxy juy je tütznaax it, jadu'n nej anajty ti xy'ane'myich Dios.”

Pilato y'amidooy Jesús

¹¹ Jesús yajpaady jim anajty ytinäy ma je gobernador Poncio Pilato yhuinduu, chi y'amidoohui:

—İNej miich je' judıos jäy xyrey'ajtp?

Chi Jesús y'adzooy:

—Miich jadu'n minamb.

¹² Je judıo teedy ajcxy huidibi mįjtungmüdpī etz je mijjäydijc tzachxıgıxy Jesús ma je gobernador. Ni jadu'ñıy Jesús ca' y'adzooy. ¹³ Chi je Pilato ñimay Jesús:

—İNej ca' mmidooy nej yi' ajcxy yxııy?

¹⁴ Per Jesús ni jadu'ñıy ca' y'adzooy. E paady je gobernador oy mij huinmay, ni ca' ocnejhuııñı ti ycapxıpy.

Jesús ycödujcy y'o'cin

¹⁵ Je gobernador jadu'n anajty ycostumbre müdity co jimıjt jimıjt najtzmazdıy tüg machyäj pascua xııjoty, je huidibi je mayjäy ti ytimychojcpy. ¹⁶ E jim anajty tüg je machjäy huidibi anajty ajcxy ixı'ajttaayb, e yxııjoty Barrabás. ¹⁷ E co anajty jim ti ytügmuıjtaaygıxy, chi Pilato ajcxy y'amidooy:

—İPin miich ajcxy mdzojcpy co iich nnajtzmazdııhuıbıchı? İNajtzmazdııyıch Barrabás o Jesús huidibi jäy ajcxy ytiıpy je Cristo? ¹⁸ Pilato ñejhuııyb anajty co mañ'ajtingıx anajty ti çıyejccıxy Jesús.

¹⁹ Jimni anajty iñäy Pilato me je ycötujctac co je ytöxyijc tiy'ajt quejxy ma yi', yminañ: "Ca' huaad mayjtzaachytuñ yi tudägyjäy. Je' co ich amygoodz ti ngumäyich janch jibic müd yi' ycixpi."

²⁰ Per je teedy ajcxy etz je mijjädjic ti anajty capxyjotcidaaccixy je mayjäy co huen yajnajtzmazdiy Barrabás etz huen yaj'öccixy Jesús. ²¹ Paady co jadüg'oc je gobernador y'amidooy je mayjäy:

—¿Huidibi machyjäy mdzojpcy co nnajtzmazdihuibich?

Chi je mayjäy y'adzooy:

—Najtzmazdi' Barrabás.

²² Chi Pilato y'amidooy je mayjäy:

—¿E nej ndunipyich yi Jesús, huidibi jäy ytiipy Cristo?

Huin'it ajcxy nidüg'öciy y'adzoday:

—¡Yajcruutzpet yi Jesús!

²³ Chi Pilato yminañ:

—Pues, ¿nej ti ytundigooy?

Per je mayjäy nigoob y'adzoday:

—¡Yajcruutzpet! ¡Yajcruutzpet!

²⁴ Pilato yjapubedaan Jesús, per co ijxy nejhuuy co je mayjäy ca' ni nej niducy. Hue' ajcxy oy ytiigy huambi jihuiybi, chach ñayñajtztijyigixy müd jot'an. Huin'it Pilato capxyñiguejxy je huadz nü. Chi ytiigy cibujp ma je mayjäy yhuinduu, e yminañ:

—Ca' ich ngo'adzohuipyich jadaaabi tudägyyëdjic y'o'cin. Miich ajcxy yi' mgo'adzoohuipy.

²⁵ Chi je mayjäy y'adzoday:

—Ich ajcxy ngo'adzohuipyich yi' y'o'cin müd n'ung anäg etz n'ap n'oc.

²⁶ Chi Pilato najtzmazdiy je Barrabás. Per Pilato ane'my co huen Jesús yajhuojp. E co yajhuojptay, chi ciyejcy, co huen yajcruutzpedyii. ²⁷ Chi Pilato ysoldados ajcxy yajnicxy Jesús ma aguctjic. E jibiy tüg'öciy soldadtjic ñayyömujiy ma Jesús. ²⁸ Chi je soldado ajcxy je' yhuít yajñijenducy. Chi ajcxy yajñijeny je tzapx huit huidibi je rey ajcxy yajtuumyb. ²⁹ Chi ajcxy tacy tüg corona müd apy. Chi ajcxy yajcöjeniy ma Jesús. E huin'it ajcxy a'oy'amy yajcigabiy tüg je paxy. Chi ajcxy huingojxtinay'ahuuy. Chi ajcxy nixiicy yajxiicy, e yminaangixy:

—¡Ooy ymijity yjanchity, je judíos ajcxy yrey!

³⁰ Chi ajcxy huindzujy jiptzujy. Chi ajcxy yajcigajptucy je paxy, e yajcöhuojpigy ajcxy. ³¹ E co ajcxy nixiictay yajxiictay, chi yajñijenducy je rey yhuít etz yajñijeny je yci'm huit. Chi ajcxy yajnicxy ma yajcruutzpedaangixy.

Co Jesús yajcruutzpejti

³² E jim ma anajty hueeni ti ytüyöy, jim ti paty tüg Cirene yëydjic anajty yxiijity Simón. Chi ajcxy adzip nimay Simón co huen jaccapi Jesús ycrudz.

³³ E co ajcxy yja'ty ma tüg je it yxiijip Gólgota, jadu'n yhuimbizim Öcpi Cohuajc Cögop. ³⁴ E jim ajcxy Jesús jayaj'üga'ñ vino temhuidity müd tzooy, jigix ca' jihuihuip je tzaachypi. Per co uucmajch, chi jihui'ñybijc co ca' y'oy'uucnity.

³⁵ E co anajty ajcxy yajcruutzpety Jesús, chi je soldadtjic suerte ijxy, pin jëbi ocjè'adyii Jesús yhuít, chi yciyxy yca'pxy jadu'n nej je profeta cojaay jecy'ajty: "Yajhuäcxipy ajcxy ich nhuit e müd ich nhuit ycixpi ixipy ajcxy suerte." ³⁶ E jim anajty ajcxy iñaygixy cuend'ajtcixy. ³⁷ Je xihuín ayuc huidibi ajcxy yjaay ma Jesús ycöduu jadu'n yminañ: "Jadayaabi je' Jesús, je judíos ajcxy je yrey."

³⁸ Quipxy müd Jesús ajcxy yajcruutzpejty metz meetzpi. Tüg a'oy'amy, e jadüg anajty'amy. ³⁹ Je mayjäy huidibi ajcxy naxiyyb anajty ma Jesús, ooy anajty oy ycöjigiñ, nixiigy yajxiigy ajcxy Jesús, ⁴⁰ ymina'ñ ajcxy:

—Bah, miich huidibi Dios ytiyc jidaanip, e codugüg xii huingbi myajpidiga'ñ. Miich ci'm cham naygohuäni, e minac cruudzcixy, pen janch miich Dios xy'ung'adyii.

⁴¹ Nañ jadu'n je teedy ajcxy huidibi mijtungmüdp, etz je escribas, etz je fariseos ajcxy etz je mijjädjic nixiicy yajxiicy ajcxy Jesús, ñayñimáayigixy miñ xyipy:

⁴² —Huingbi ti cohua'ñ, e ca' jaty nej ci'm ñaygohua'ñiyb. Pen janch co yi' jëjity je Cristo je Israel jäy rey, huen minacy jadachambi ma cruudz, huin'it nmibijcin. ⁴³ Yi' ti pidägy ymbijcin ma Dios; huen jadachambi je Dios yajnizögyii, pen janch Dios chogyii; yi' ti ymina'ñ co Dios y'ung'adyii.

⁴⁴ Nañ jadu'n je metzpi meetzpi ajcxy huidibi cruudzpejt quipxy müd Jesús nixiicy yajxiicy ajcxy ooy Jesús.

Jesús y'ögy cruudzcixy

⁴⁵ Co ycuycxñijy, chi ycoodziydäy tüg'óciy naaxhuiñybi. E jadu'n je naaxhuiñybi y'ijty coodz, ixti minacy yxi. ⁴⁶ Huin'itiy Jesús ycapxyqueecy janch mic yminañ:

—Elí, Elí, ¿lama sabactani? —yi jadu'mbi ayuc hue' yhuimbídzimy: Dios Teedy, Dios Teedy, ¿ti co ti xy'ixmachich?

⁴⁷ Nijéjity jáy huidibi anajty jim yajpatp huingon ma Jesús co jadu'n midoogixy Jesús y'ayuc, chi ajcxy yminañ:

—Jadayaabi yéydijc cham yaaxtaayb je profeta Elías.

⁴⁸ Huin'it nidüg jáy ñicxy janch poyígy etz oy yajtzoón je pixy. Chi je pixy yajxoogy müd je xun vino. Chi pidacy je pixy ma je paxyjiip. Chi yujctijy ma Jesús y'ahuac co huen ügy.

⁴⁹ Huin'it nijéjity ajcxy yminañ:

—Ixmatz, tzoc ajt oc'ijxim, pen nimiñip Elías, pen janch yajnídzoögyi.

⁵⁰ Jadüg'oc Jesús yaaxqueegy janch mic. Chi oy y'o'cni. ⁵¹ Co Jesús y'o'cy, tim huin'itiy jim ma Dios ytijc je mapxy yhuít yciítzhua'cxy tiná'amy. E nañ jadu'n je naaxhuiñybi ooy chuyuy müd ujx micpi etz je mijjatychaa oy jiltzhua'cxy. ⁵² May öcpi jut y'ahuach etz yjugypijcy mayjáy tiibi anajty y'o'ccixy tiibi anajty miñicxixy Dios. ⁵³ Co Jesús yjugypijcy, chi je may'öcpi tiibi anajty jugypijccixy etz tiibi anajty pidzimixy ma öcpi jut, chi ajcxy ytiigiy ma je Dios ycajp, je Jerusalén. E mayjáy ajcxy ijxy. ⁵⁴ Co je mic ujx oy ñaxy etz jac tijaty anajty ti ytuñyí ti yjadyí, chi je capitán etz müd jadyí ymígütiyc huidibi anajty cuend'ajtp Jesús ooy ajcxy chigiy yjihuy, e minangixy:

—Janch tiy'ajt co yjiibi yéydijc Dios yi' anajty y'ung.

⁵⁵ May anajty nañ jadu'n töxyjdydijc ymij'ixcixy jiguem huidibi anajty ajcxy Jesús ti müddzoón jim Galilea. Yi' anajty ajcxy Jesús ypubejtp. ⁵⁶ E ma je' ajcxy jim anajty chooníty, María Magdalena, María huidibi Jacobo etz José yta'ajtpy, etz je huidibi Zebedeo y'ung yta'ajtpy.

Jesús yajnaaxtigíy

⁵⁷ Co oy chuu'iyñi ycoodziyñi, huin'it choón ma Arimatea tüg comeñiyjáy huidibi yxi José. E je' ymijnicxpejty anajty Jesús. ⁵⁸ Chi José ninicxy Pilato oy pijctzou Jesús ñinícx. Huin'it Pilato pidacy y'ane'min co huen möyí. ⁵⁹ Chi José ycidigíy Jesús ñinícx. Chi huinmojch müd tüg poob sábana. ⁶⁰ Chi yajnaaxtigiy ma je yci'm jut jemybi huidibi anajty ti yajtejtztüty ti yajpádyty ma tüg tzaहुingueetz. Chi adiguejctujcy je öcpi jut müd tüg tzaa. ⁶¹ Chi José ñicxni. E jim yhui'my María Magdalena etz je jadügpí María, y'íñäy ajcxy ymihuñgon öcpi jut.

Je cuend'ajtpi ajcxy ma Jesús ñaaxtigíy

⁶² E com jabom ma anajty Jesús ixíybi ti y'ögy, ma anajty ti ni'ixiydáy müd je sábado xii ycxipi, chi je teedy ajcxy huidibi tungmüd etz je fariseos ajcxy ñayöymujci ma je Pilato. ⁶³ Chi ajcxy yminañ:

—Huindzin, yi' ñich ajcxy njäymejchpyich co je anídadapi yminañ ma anajty yjuugyity co codugíy xii jugypiga'ñ jadüg'oc co anajty ti y'ögy. ⁶⁴ E paady tunmay'ajt quexipy soldados ajcxy ma Jesús ti ñaaxtigíy huen cuend'ajtcixy ixti cooni tugiñ xíbi paadipy. Ca' yjegyity co ñimíñib adzuom agoodz je' ajcxy huidibi mijnicxpejtp etz tzingüéjipy ajcxy Jesús ñinícx. E chi nicxy jáy yminañ: “Ti yjugypicy je öcpi.” Chi anajty jac'anaxy je aní ti yjajtni ca'ydí je jayijpi.

⁶⁵ Chi Pilato ajcxy nimay:

—Miich ajcxy müd tüg picy soldados huidib cuend'ajtp ma miich ajcxy. Níxcxix miich ajcxy yaj'adujccixy je öcpi jut, jadu'n nej m'a'ixíygyxy.

⁶⁶ Chi ajcxy choní ma je Pilato. Chi ajcxy quejxy je tüg picypí soldados ma je öcpi jut. Chi ajcxy pidacy ijxhui'min ma je tzaa huidibi ajcxy je jut yaj'adiguejctujcy.

28

Co Jesús yjugypijcy

¹ E com jabom co yximíy yticxígy je domingo xii, huin'it ñicxy María Magdalena etz je jadügpí María ma Jesús ñaaxtigíy. ² Chi tüg mij ujx ñajxy. Huin'it ycidacy Dios tüg y'ángel huidibi tzomb tzajpjoty. Chi jidigejcy je tzaa ma je öcpi jut aguú. Chi y'ixtacy ma tzaa nícx. ³ Janch adícxp je ángel anajty yhuñijp jadu'n nej huidzuc, e je yhuít janch poob'ögy. ⁴ E co je soldados ajcxy ijxpaty je ángel, chi ajcxy ooy chuyuygooty. Chi ajcxy yhui'my jahuengi ögy. ⁵ Huin'it je ángel y'adzooy je metz töxyjáy:

—Ca' miich ajcxy mdzigíy. ñich nejhuñyich co miich ajcxy m'ixtáy Jesús je huidibi ajcxy yajcruudzpejty. ⁶ Per ca' je' cham ya. Ti je' yjugypicy, jadu'n nej yminañ. Min miich ajcxy oc'ix ma ñaaxtigíy. ⁷ Nícx miich ajcxy jottigooyb ma je' ydiscípulos ajcxy e nima': “Ti Jesús

yjugypicy jadüg'oc, e yi' ñicxip jim Galilea e jim ajcxy mmüdnybadüyb." Hich miich ajcxy yam nmimaaygixy.

⁸ Huin'it je töxyjäy ajcxy choon janch poyigy ma anajty ti ñaaxtigy Jesús. Chi ajcxy ñicxy müd tzig'iñ, per agujc jotcujc. Poyigy ajcxy oy tiy'ajt yecy ma je discípulos ajcxy. ⁹ E jim anajty je metzpi töxyjäy ytüyöy, timentini Jesús ñayguëxici ma je' ajcxy yhuinduu. Chi Jesús ajcxy capxpocxy. Chi je' ajcxy mihuingoñ Jesús etz mineeni je' ytecy. Chi ajcxy huindzigüygixy. ¹⁰ Jesús minañ:

—Ca' mdzigüygixy. Nicx miich ajcxy nima' je nmigügtijcich co huen ajcxy nicxy jim Galilea, e jim naybadüybich müd yi' ajcxy.

Huidibi ajcxy je soldadotijc ñigapx

¹¹ E tüyöybñi anajty je töxyjäy nimetzpi co nijējity je soldados ajcxy choon ma Jesús ñaaxtigüy ñicxy jim Jerusalén, müdmüydäga'n je teedy huidibi tungmüdpı nej anajty ti ytuñyii ti yjadyii ma Jesús ñaaxtigüy. ¹² E huin'it je teedy ajcxy ñayyöymujctayi müd je mijjädıjc, tunaangixy quipxy capxy. Huin'it je teedy ajcxy etz je mijjädıjc moy ajcxy je soldados may meen. ¹³ Chi ajcxy nimay:

—Miich ajcxy minañp co maab anajty miich ajcxy mijcoodz co ymiñ Jesús ydiscípulos ajcxy etz tzingueeci Jesús ñinıcx. ¹⁴ Etz pen ymıdooyb anajty yi gobernador, ich ajcxy ngapxjotcidägich, jigix ca' nej xytungixıpy.

¹⁵ E huin'it ajcxy je soldados ycidigüyi je meen. Chi ajcxy ñicxy cuyduñ jadu'n nej anajty ajcxy ti ñimäyii. E ıxti chambaad jadu'n judıojäy capx je ayuc.

Huidibi Jesús yajnıbjıc ydiscípulos ajcxy

¹⁶ E jadu'n ajcxy ñicxy je nimajctügpı Jesús ydiscípulos ajcxy jim Galilea. Chi ajcxy ñicxy ma je cögop jadu'n nej anajty Jesús ti ñimäyigixy. ¹⁷ E co ajcxy ıjxpaty Jesús, chi ajcxy oy huindzigüy. Per jim nijējity huidibi ca' mıbjıcy co anajty yjējity. ¹⁸ Huin'it Jesús ymıjhua'cy ma yi' ajcxy, e nimay:

—Hich ti nyajmöyich je cötujcın jıiby tzajpjoty etz ya naaxhuiñ. Hich ti nyajmöyich je mij cötujcın, jaydēbi n'ane'myich jıiby tzajpjoty etz ya naaxhuiñ. ¹⁹ E paady nicx miich ajcxy huindu'my naaxhuiñ capxhuäcxıx je ayuc, jaydēbi jäy ajcxy xymıbigıpyıch. Tüg'ócıy jäy ajcxy huidibi xymıbjıcpıch myajnıbedıpy ajcxy müd Dios yxıı, Dios y'ung yxıı, etz müd je Espíritu Santo yxıı. ²⁰ Miich ajcxy myaj'ıxpıgıpy je mayjäy co copıcy cuydunıpy ajcxy ich ngötujcın tüg'ócıy jadu'n nej ti n'ane'myich miich ajcxy. E miich ajcxy mnejhuıyb co nmüd'ıtyıch miich ajcxy huinıxıı huinıtiempo, ıxti mabaad naaxhuiñybi anajty ycıxpı ytıgooy. Jıbaad ycıxy. Amén.

SAN MARCOS Jaayhui'my Jadu'n Nej Jesucristo Ytun Yjajti

¹ Jadu'n oga'n chondacy je oybi ayuc tiy'ajt jadun nej Jesucristo, je Dios y'ung ytun etz yjajti.

² Je Dios y'ayucnajtzcaxi'ybi je Isaías jecy'ajty jayhui'my jadun nej Dios nimay je Cristo: Nguexaamyich #ch ngogapxy jayijp ma nidüg nidüg cajp ma miich mnicxa'n jac'axam, jigix jëb je cogapxy nimähuipy je jây ajcxy co huen nayñi'ixi'yigixy ma yjot yhuinma'n miid miich ycixpi, jadun nipaady nej jihuüy jây ajcxy ni'ixiy tü'aa co tüg rey yjāda'n.

³ Nañ jadun jadüg it Isaías jayhui'my jada ayuc ma jadun yminañ:

Jim mjitigüduum jây ajcxy midoy co tüg jây y'ayuccapxhuäcxy, jadun yminañ: "Nayñi'ixi'yigix ma mjot mhuinma'n ajcxy jaydëb naybaatim miid ajt nHuindzin Dios. Ixmájtzcixy yi mjibicjot mjibic-huinma'n. Jadun nipaady nej jây ajcxy yajtiy tü'aa huidibi ooy y'adijy y'a'och."

⁴ Jim mjitigüduum anajty Juan je Bautista miñ e ytiği'y mayjây yajniibejtpi. Chi Juan capxhuäcxy Dios y'ayuc ma je mayjây ajcxy huidibi anajty mimb nüibejtp. Juan ayuc capxhuäc co copicy co jây ajcxy huen jothuimbijtcixy etz ixmájtzcixy ajcxy je yjibichuinma'n, etz nüibejtcixy, jigix jëbi Dios yhuinmecxiib ajcxy ypocy. ⁵ Tüg'öciy je mayjây ajcxy huidibi anajty tzinaayb jim Judea ñaaxjot etz jim Jerusalén mimb anajty ajcxy ma Juan, e y'amidoo'ijty anajty ajcxy je'y'ayuc. Co je jây ajcxy capxpidiizim nej anajty ypocytungixy, chi Juan yajniibejty ajcxy ma je Jordán mijni.

⁶ Juan hue' anajty yhuut'ajtpy camello nübijc, e nañ jëyim anajty miid ñayhuiñiyii, e hue' anajty yjicx'ajtpy mu' etz uxpäg. ⁷ Juan ycapxhuäcxy anajty Dios y'ayuc ma je mayjây, e yminañ:

—Hich jayijp ti nmiñich ngapxhuäcxy Dios y'ayuc. Jac'axam minipy tüg jây huidibi jacnëgi mic'ajt mädity ca'ydi #ch, ca' xypaadyich nicxy nguejyich yi' ycighuin. ⁸ Hich ti nayjñibetyich miich ajcxy miid nüi. Per je jây huidibi yjacmiid Dios ymic'ajt, ca'ydi #ch. Yi' xya'adigihuip xyajjotigihuip Dios yjihui'n ymic'ajt, jadun nipaadip nej jihuüy xyajniibejtp miid Dios yjihui'n ymic'ajt.

Co Jesús nüibejty

⁹ Je huin'it xii huin'it tiempo Jesús choon ma je cajp huidibi yxii Nazaret, jim Galilea ñaaxjot, e ymiñ ma Juan el Bautista anajty yajpaady. Huin'it xii Juan yajniibejty Jesús ma je Jordán mijni. ¹⁰ Pidzimb anajty Jesús ma je mijni, e tim huin'ityi Jesús iix co je tzajp anajty y'ahuäch, e iix je Espíritu Santo choon tzajpjoty, e ycidägy ma yi'. Jadun je Espíritu Santo yquëxigü anajty nej tüg muuxy. ¹¹ Chi Jesús midooy capxy ayuc choñ tzajpjoty, nimäyii:

—Hich miich n'ung'ajtpy. Ooy #ch miich ndzocy njihuüy. Ooy jotcujc nayjihuiñijich miid miich.

Je mujcu' tuñ ixta'ni ma Jesús

¹² Huin'it mic'amy je Espíritu Santo yajnicxy Jesús mjitigüduum. ¹³ E hue' Jesús yhui'miy jim mjitigüduum huixchigulpx xii ahua'n iyujc agujc. Huin'it je mujcu' jot'ijxy yhuinma'n'ijxy je Jesús. Chi je ángeles ajcxy miñ ypubejty ypuedigiy je Jesús.

Jesús ytung yajtzondägy jim Galilea

¹⁴ Ti anajty Juan yajpidägy pujxtigoty, jac'axam Jesús ñicxy jim Galilea. Jim Galilea Jesús capxhuäcxy Dios y'ayuc etz yi Dios y'ané'min. ¹⁵ Jesús yminañ:

—Ti je xii je tiempo yhuaad'ajtni. Ti nigoody je xii je tiempo mina Dios pidäga'n yi' y'ané'min ya naaxhuiñ. Jothuimbijtcix ajcxy, etz ixmájtzcix ajcxy mjibicjot mjibic-huinma'n. Mibijccix Dios y'ayuc jadun nej jëb ajcxy m'alma ñndzögipy.

Jesús huodzoon midaax jây huidibi anajty acxmajtzp

¹⁶ Jesús huidijtp anajty ma je mejypa' huidib yxii Galilea mejy, co oy'ixpaady Simón etz y'uch Andrés. Simón etz Andrés acxmadzii anajty ytung'ajtpy, ytimpidacpy anajty y'acxmazdi'n mejyjoty co ajcxy Jesús iixpaty. ¹⁷ Chi Jesús nimay Simón etz Andrés:

—Min miid #ch. Hich miich ajcxy huingbi tung nmöhuipy. Jadun mdung nipaadip nej jihuiñ mjäymájtzcixipy.

¹⁸ Mic'amy Simón etz Andrés ajcxy ixmajch y'acxmazdi'n, e ñicxy ajcxy miid Jesús.

¹⁹ Chi Jesús yjacyöy anajty hueen, e iixpaty Jacobo etz y'uch Juan, je Zebedeo ajcxy ymang. Je Jacobo etz Juan tumb anajty barcojoty. Hue' anajty ajcxy yaj'oyi'yb je' y'acxmazdi'n.

²⁰ Chi Jesús mijhuooy ajcxy Jacobo etz Juan, e nimay co huen nicxy miid yi'. Mic'amy je' ajcxy ixmajch yteedy, je Zebedeo, barcojoty miid ytumbi, chi ajcxy ñicxy miid Jesús.

Tüg jây huidibi anajty jibic espíritu müd

²¹ Huin'it Jesús müd ymügütiyc jya'ty jim Capernaum. Je huin'it sábado, je poocxin xii, Jesús ytiğiıy ma je judíoıyâj ajcxy ñaymujctac jim Capernaum, chi yjâyyaj'ixpijctzondacy. ²² Je mayjây ooy ajcxy jihuiy huinmay je ayuc huidibi Jesús anajty ajcxy yaj'ixpijci. Com Jesús hue' anajty yaj'ixpijci jadu'n nej jihuiy yci'm'ané'min müdity. Ca' Jesús anajty yaj'ixpijci jadu'n nej je jây ajcxy huidibi yaj'ixpijcp anajty Moisés ycötüjcin je jécıyıp. ²³ E ma je naymujctac tüg yëydıjç huidibi müd anajty ca'oybi. Chi je ca'oybi ooy mic ycapxcoody, e yminañ:

²⁴ —ÇTi co xy'amayııy içh ajcxy, Jesús huidibi tzomb jim Nazaret? ÇNej ti mmiñ co xyajhuindıgoyáangıxyıchı? İch n'ıjıxcayıp müich, e nejhuiıybıch co müich je' je Huätzpi Dios.

²⁵ Chi Jesús ix'ojy je ca'oybi, e nimay:

—Amon müich, e pidzimb ma jada yëydıjç.

²⁶ Huin'it je ca'oybi yajyajch yajquıdy je yëydıjç, e mic yaaxqueegy, e ypidzimy ma je yëydıjç. ²⁷ Tüg'óciy je mayjây jııby ma je naymujctac ooy ajcxy ñay'adzıgıyı, e ñayñımaayı ajcxy müñ xyıpy:

—ÇTi jada' yi? Jada yëydıjç ymüd jemybi ixpijcin. Yi' müd mic'ajt etz ane'm'ajt, paady ycıxpi yi' ane'my yi ca'oybi, e ycapxmıdoohuip.

²⁸ Mic'amy je mayjây ajcxy huidıjaty tzinaayb ma tüg tüg cajp jim Galilea nejhuiy ajcxy nej Jesús ytuñ, e cömaaygıxy Jesús.

Jesús yajtzögy Simón Pedro ymüd töxyjâybi

²⁹ Tim huin'itıy Jesús ypidzimy ma je naymujctac, chi ñıxcy müd Jacobo etz Juan jim ma Simón etz Andrés ytiç. ³⁰ Simón ymüd töxyjâybi pijci anajty. Cıjx'am anajty y'ity, e mic anajty ooy ytoyıı. Tim huin'itıy Jesús ñımaayı co Simón ymüd ooy mic ypiğyıı. ³¹ Chi Jesús nimijhuägy je pa'mjäy. Chi majtzi yci', e huijtzıgy. Tim huin'itıy yi toyıı y'ıxmajtzi, e chi yajcay yaj'uucy Jesús etz ymügütiyc.

Jesús yajtzögy may pa'mjäy

³² Co xii oy ycıdacni, e chuıııyñı, chi je mayjây müd müñ ajcxy ma Jesús tüg'óciy pa'mjäydıjç, etz huidıjaty ajcxy ca'oybi ymüd. ³³ Tüg'óciy je mayjây ajcxy ma je jımbı mıj cajp nimujcy je tiyc ma Jesús anajty ti yjättägy. ³⁴ Jesús yajtzöotay tüg'óciy je may pa'mjäy huenytımytiıbá'mity, etz yajpidzimy may ca'oybi majaty jây ajcxy. Per Jesús ca' anajty a'ıxıy nicxy je ca'oybi ñıgapxyıı, com y'ıxy'ajttaayb anajty ajcxy Jesús.

Jesús y'ayuc tiy'ajt capxhuäcxy jim Galilea

³⁵ Tim mooñı Jesús ymaybıdıgy, ca' anajty yxııııyñı, e ypidzimy ma je cajp. Chi ñıxcy ma tüg müjtıgıduum Dios mıbjıctzoobi. ³⁶ Huin'it je Simón etz je ymügütiyc ooy ajcxy ja'ıjxtây Jesús. ³⁷ Co ajcxy paty je Jesús, chi ajcxy nimay:

—Tüg'óciy je mayjây xyjadım'ıxtây.

³⁸ Chi Jesús nimay Simón etz je ymügütiyc ajcxy:

—Tzoc ajt jámım ma yi jacjadyıı cajp huınduy agonbi, jaydëb ngapxhuäcxbıch Dios y'ayuc nañ jadu'n ma yi jây ajcxy jim. Paady ycıxpi ndzooñıch tzajpjoty, jigix jëbi ngapxhuäcxbıch Dios y'ayuc.

³⁹ Jesús nicxp anajty ma nidüg nidüg cajp jim Galilea ycapxhuäcx anajty Dios y'ayuc ma nidüg nidüg judíoıyâj ñaymujctac, e yajpidzimy anajty ca'oybi majaty jây.

Jesús yajtzögy tüg jây nibützpa'mmüdpı

⁴⁰ Tüg jây huidibi ymüd anajty jibic pützpa'm, je micpi, chi nimijhuägy Jesús, e ycojtinay'ahuiy ma Jesús yhuınduu, yminañ:

—Pen müich jadu'n tzojcpy, jëb xyajtzögıch.

⁴¹ Chi Jesús pa'ayoy je pa'mjäy, e pidacy yci' ma je pa'mjäy ñınicx, e yminañ:

—Ndzojcpyıch, cham nyajtzögy.

⁴² Co Jesús jadu'n yminañ, chi mic'amy je jây huidibi anajty müd je jibic püdç chögy.

⁴³⁻⁴⁴ Mic'amy Jesús ycapxcıjxy müd je jây huidibi anajty ti chögy, e nimay:

—İx pin myajnimäy co ti mdzögy. Nicx jayıjp jııby ma Dios ytiyc ma je judío teedy ajcxy, e mo' Dios yhuındzıgı'ñ jadu'n nej Moisés ycötüjcin ane'my, jigix jëbi huädç mbıdzıııpy ma Dios ycötüjcin. Cuydun müich huidibi Moisés ñajtz'ane'mııy jecy'ajty, jigix jëbi je mayjây ajcxy nejhuihuip co ti mdzögy.

⁴⁵ Per je yëydıjç ca' capxymıdoıy Jesús. Co ñıxcy, chi ytiğiıy capxy yajyöybi jadu'n nej anajty ti yajtzögyıı. Com je mayjây nejhuiıyb huidibi anajty Jesús ti tuñ, paady ycıxpi Jesús ca' anajty ocıajtnı nej ytiğıhuıpy ıjxna' jigue'xna' majaty cajp. Hue' anajty huidity ma ca' pin chinäy. Per müñ anajty y'oy'ıxyıı huenytımypinjäyity, chooñ ma nidüg'óciy cajp huınduy agonbi.

2

Jesús yajtzögy tüg jây cîma'tpi tecyma'tpi

¹ Ti anajty xîi tiempo ñajtzînicxiyîi co Jesús yhuimbijty jadüg'oc jim Capernaum. Je mayjây ñejhuiyb anajty co Jesús yajpaady ma tüg tijc. ² Chi mic'amy mayjây ñayöymujci ma anajty Jesús yajpaady, e ca' anajty tigiydac ma je tijc, müd co tzach mayjây anajty ti miingixy. Y'adujtaayb anajty ajcxy je tijc'aguu. E Jesús ycapxhua'xyp anajty Dios y'ayuc. ³ Huin'it xîi, midaax yêdijc ciymiñ cijx'am ma Jesús yajpaady tüg pa'mjây huidibi yci' ytecy ti yxujtây anajty. ⁴ E com ca' anajty ni nej y'oyîy nej yajjâdip ajcxy ma Jesús je pa'mjây, je' co anajty chach ûjtzy je tijc müd je mayjây, chi ajcxy yajcôhuaach hueeni je tijcnîcx ma anajty Jesús yajpaady. Chi ajcxy cödiyñajxy je pa'mjây cijx'am. ⁵ Co Jesús ijxy je jây ajcxy ymibîjcin, chi nimay je pa'mjây:

—Migûgich, yi mbocy ti yajhuinmecxtây.

⁶ Per nijêjity huindzindijc huidibi ajcxy nijaydutp anajty Dios ñecy co ajcxy midoy nej Jesús ymîna'ñ, chi ajcxy ymîna'ñ jotjoty huinma'ñjoty: ⁷ “¿Nej co jada jây jadu'n ymîna'ñ co ti yajhuinmecxy jada pa'mjây ypocy? Capxtigooyb yi' müd Dios. Com ca' nipinjây jêb ypocyhuinmecxy. Tügpaic Dios yi' huidibi jêb ypocyhuinmecxy.” ⁸ Per Jesús ñejhuiyb anajty nej je' ajcxy chachmîna'ñ jotjoty huinma'ñjoty, paady mic'amy ymîna'ñ:

—¿Na'amy co mdzachhuinmaaygixy? ⁹ ¿Huidibi jada jac'ooy co nnimâyich yi pa'mjây: “Ti mbocy yajhuinmecxytây.” O jac'ooy co nnimâhuibich: “Pidîg, e yajpidîg yi mdögy, e tûyöy?” Tû'ciy yi'.

¹⁰ Chi Jesús yjacmîna'ñ:

—Jadachambi janchtiy nyajquêxîga'ñich co ñich, je jây huidib tzoön tzajpjoty, e huidibi cham yajpaady ya naaxhuîñ, nmîdich mic'ajt jaydêb nhuinmecxyich jây ypocy.

Co Jesús jadu'n ymîna'ñ, chi nimay je pa'mjây huidibi yci' ytecy anajty xuxy:

¹¹ —Ñich miich yam jadu'n nimây: “Tinayîg, yajpidîg yi mmabejt e nicx ma mdjic.”

¹² E mic'amy je pa'mjây ypidîgy, e yajpidîgy ymabejt, chi ytüyöychoñ jîlby ma je mayjây ajcxy anajty y'ixy yhuindicxy. Paady yciyîp tüg'ócîy je mayjây ooy jîhuîy huinmay etz jâymejch ojadajty ajcxy Dios, ymînaangixy:

—Nimînaabi ajt jadu'n nga'îjxim mîjhuinma'ñ jadu'n nej cham ti n'îjxim.

Jesús nimay je Levî: “Pajamgich”

¹³ Chi jadüg'oc Jesús ycajppidzimy, ñicxy jim ma mejypa'. E co mayjây ñayöymujcy jim ma Jesús anajty yajpaady, chi Jesús yaj'ixpijc je mayjây. ¹⁴ Co Jesús yjactüyöy anajty, chi ijxpaady Levî je Alfeo ymang. E Levî îñaayb anajty ma je yajcogüeittac jây yajcogüeipt anajty. Chi Jesús nimay Levî:

—Pajamgich.

Tim huin'itîy Levî ytînayîgy, ixmajch ytung, e panicxy Jesús.

¹⁵ Jadu'n yjajti co tüg xîi Jesús caayb anajty me Levî ytîjc. Mayjây huidibi ytung'ajtpy anajty yajcogüediî, etz jacyadyîi jây huidibi anajty tundigooyb müd judio jây ycostumbre y'îñaaygixy ma je caydac quipxy müd Jesús etz je' ydiscîpulos ajcxy. Com may jây anajty ooy Jesús tzach müd huidijtcixy. ¹⁶ Jim anajty ma Levî ytîjc nijêjity fariseojây, je huindzindijc huidibi tzach padumb judiojây ycostumbre. E co je' ajcxy ijxy co Jesús caayb uucp anajty tûgmucy müd tüg'ócîy je mayjây ajcxy huidibi tundigooyb müd judiojây ytîi'ajt ycötûjcin, etz yajcogüeiptidijc, chi ajcxy migapxy Jesús ydiscîpulos, je' ajcxy huidibi mîjnicxpejtp anajty Jesús, nimay ajcxy:

—¿Nej co Jesús miich ajcxy mHuindzin ycaymucy y'ucmucy müd yi yajcogüeiptidijc ajcxy, etz jacyadyîi jây ajcxy huidibi tundigooyb müd judiojây ycötûjcin?

¹⁷ Co Jesús jadu'n midoy nej je fariseo jây nigapxyîi, chi ajcxy nimay:

—Ca' tzocy tzozydumbi yi jây ajcxy huidibi mic'ajtp oy'ajtp. Yi' janchtiy yi huidibi ajcxy yuuba'm ymîd chojcpay ajcxy tzozydumbi. Nañ tim jadu'n yi jây ajcxy huidibi ca' ypocymîdity, ca' ajcxy tzocy pocyhuinmeecxin. ñich ti nmîñich co nyajjothuimbidipyich pocyjâydiyc. ñich ca' ti nmîñich co nyajjothuimbidipyich ooyjâydiyc tudâgyjâydiyc.

Jesús yaj'amidoogixy nej co jây y'ity jaygay

¹⁸ Jadu'n yjajti tüg tiempo ayuu'ijtp anajty je jây ajcxy huidibi mîjnicxpejtp anajty Juan je Bautista. Nañ jadu'n ayuu'ajtp anajty je fariseojây ajcxy. Chi nijêjity ajcxy ymîñ ma Jesús e amîdoy:

—¿Nej co yi jây ajcxy huidibi mîjnicxpejtp ajcxy Juan etz nañ jadu'n yi fariseojây ajcxy ayuu'ajtp ajcxy, e je jây ajcxy huidib miich xymîjnicxpejtp, ca' y'ayuu'ajtcixy?

¹⁹ Chi Jesús y'adzooy:

—Co ya nyajpaadyich ya naaxhuîñ, ca' ycopicity co ñich ndiscîpulos ajcxy y'ayuu'adip. Jadu'n nipaady nej jây ajcxy huidibi pîjcin nixîdumy ca' ajcxy y'ayuu'aty ma yam yi pîjcin

majmetz ajcxy huiidibi ymiid'idamy, e huiidibi yquexamy y'ayuccapxhuäcxp. ¹⁵ Jesús moy je majmetzpi discipulos ajcxy huiidibi anajty ti yhuin'ixy mic'ajt jaydëb yajtzögip pa'mjäy ajcxy, e ymoy ajcxy ymic'ajt jaydëb ca'oybi yajpidzimy ma jäy ajcxy. ¹⁶⁻¹⁷ Jada je nimajmetzpi discipulos ajcxy yxi nidüg nidüg: Simón, je huiidibi Jesús yximoy Pedro; Jacobo miid y'uch Juan, yi Zebedeo y'ung y'anäg, je huiidibi ajcxy Jesús yximoy Boanerges (je ayuc Boanerges jadu'n yhuimbizimy: "Enee ymang"). ¹⁸ E jacjadyii huiidib Jesús ti anajty huin'ixy: Andrés; Felipe; Bartolomé; Mateo; Tomás; Jacobo je huiidibi Alfeo ymang'ajtpy; Tadeo; e je jadügpi Simón, je cananista. ¹⁹ Nañ jadu'n Jesús huin'ijxy Judas Iscariote, je huiidibi agojiix ciyejc Jesús ma ymidzip.

Yajniibjccixy Jesús co müidity mujcu' ymic'ajt

(Co jadu'n huin'ijxtaay je majmetzpi discipulos ajcxy), Jesús ytiigiy ma tügtijc müid yi' ajcxy. ²⁰ Huin'itiy tzach mayjäy ñayyöymüjcgixy ma je tijc ma Jesús y'ity, ixti Jesús etz ymügügtijc ca' y'oyiy nej jëb ycaaygixy y'uuccixy. ²¹ Co Jesús y'amügügtijc jadu'n nejhuüy, chi ajcxy nimiñ Jesús yajnicxaangixy anajty mach, com hue' anajty tjicixy co Jesús ylociib.

²² Nijëjity escribas ajcxy, je huindzindijc huiidibi nijaydutp anajty Dios ñecy, miin ma Jesús co choñ ajcxy Jesusalén, yminaangixy:

—Jada Jesús ymiid Beelzebú, je ca'oybi yhuindzin, ma y'aa yjot. E yi' yajpidzimy je ca'oybi ajcxy ma jäy ajcxy yjothuinma'ñ müid Beelzebú ymic'ajt.

²³ Chi Jesús huoomiñ ma yi' je escribas ajcxy, e yajmüdmüydacy ajcxy tüg jihuimbit ayuc. Chi Jesús yminañ:

—¿Nej tiy'ajt jada nej miich ajcxy mina'ñ co Satanás jëb ci'm ñayyajpidzimyii ma jäy ajcxy y'aa yjot? Ca' tiy'ajt nej miich ajcxy mina'ñ. ²⁴ Pen tügpicy tungmüdpí ixyipy ñaybiç-hua'cxigixy, etz ñaymidziptzoonigixy ixyipy ac jëyi. Pues cixip yi' ajcxy y'ané'min. ²⁵ Nañ jadu'n pen tügpicy tüg juugy tüg migüg ixyipy ñaybiç-hua'cxigixy, ca' ajcxy y'idaangixy tügmucy. ²⁶ Nañ jadu'n pen Satanás ixyipy ti ñaybiç-huäcxyii, e ci'm ixyipy ti nayñibidigyii, ca' ixyipy yi' ymic'ajt ida'ñ. Hue' janchtiy Satanás cixipy tigoyipy. (Paady ca'tiy'ajtity nej miich ajcxy yminañ.) ²⁷ Ca' ni pin jëb huaad ytiğiuiip ma tüg micpi jäy ytijc etz meedzipy tijaty ymiid, pen ca' jayijp cixoch tecyoch je jäy micpi. Pen ti cixoch tecyoch ixyipy je micjäy, huin'it janchtiy mimadägiy, e pijcip tijaty ymiid.

²⁸ Janch iich miich ajcxy nimäy co Dios jëb huinmeecxip tüg'óciy pocy huiidibi jäy ytüngixp etz tüg'óciy jibicpi huiidibi jäy ycapxp. ²⁹ Jëyi janchtiy co pinjaty capxtigooyb müid je Espíritu Santo, je Dios yjihui'ñ ymic'ajt, ca' Dios huinmecxi nimina. Huinixi y'ida'ñ pocymüid.

³⁰ Müid co jäy ajcxy chach yminaangixy co Jesús anajty müidity ca'oybi, paady Jesús jadu'n yminañ.

Jesús ytaj etz y'uch migüëxy ajcxy

³¹ Jesús ytaj etz y'uch ajcxy oy yja'ty ma anajty Jesús yajpaady. Chi Jesús ytaj etz y'uch ajcxy anajty ytinaaygixy tiba'y, e chi ajcxy capxñügejxy Jesús. ³² Je mayjäy huiidibi anajty ajcxy iñaayb jühuiditi ma Jesús, yminañ ajcxy:

—Miich mdaj etz m'uch cheeby ajcxy tiba'y miich ixtaayb.

³³ Chi Jesús yminañ:

—¿Pinjäy miich ajcxy mdijy co iich ndaj'adyii etz iich n'uch'adyii?

³⁴ Huin'it Jesús huindicxpejty je jäy ajcxy huiidibi anajty iñaayb ajcxy jühuidity ma je', e yminañ:

—Tüg'óciy jada jäy ya jadu'n ajcxy nipaady nej iich ndaj etz iich n'uch. ³⁵ Huenyitimypinity huiidibi ajcxy cuydumb yi Dios chócin, yi' je' jadu'n nipaady nej iich n'uch, iich n'ajch, iich ndzi' etz iich ndaj.

4

Je niipi y'ijxpejt

¹ Jadüg'oc Jesús ytiigiy yaj'ixpijcpí ma mejypa'. E ooy mayjäy ymujcpejty ma anajty Jesús yajpaady. Müid co ooy anajty chachmayjäyity, paady Jesús ytiigiy ma tüg barco jahuengi mejyjoty. Jesús iñaayb anajty barcojoty, e je mayjäy iñaayb anajty ajcxy ma mejypa'. ² Huin'it Jesús yaj'ixpijcy je mayjäy müid canaag jihuimbit ayuc. Co yaj'ixpijcy, chi yminañ:

³ —Amidoo'ijtcix miich ajcxy iich jada n'ayuc. Tüg jäy choon niipi. ⁴ Co je niipi yhuijpy anajty trigo tñm, chi je trigo tñm nijëjity oy ycäy tñm tügujc. Chi je joon ajcxy ymiñ jicxy je trigo tñm huiidibi tügujc ti ycäy. ⁵⁻⁶ E nijëjity trigo tñm oycäy ma tzaanícx, ma nihueen oyñaax yajpaady. E je trigo tñm ca' tzip mujx je', je'co ca'anajty ooy naax mápxity. E co je xii ypidzimy, chi no'cy je trigo mang, com ca' anajty ytictz müidity naaxjoty, chi ytñch. ⁷ E nijëjity trigo tñm oycäy ma apyjot. Co jada trigo tñm ymujxy, chi y'ujtz'ögtäy je trigo mang, e

ca' ytiim'ajty. ⁸ Per jacjadyii trigo tiim oycäy ma oyñaax, chi ymujxy, e ytiim'ajt may'amy: tüg pi'c pajc iipxmajc oyco'ity, jadüg pi'c pajc tugi'px oyco'ity, jadüg pi'c pajc migo'px oyco'ity.

⁹ Co Jesús je miydägi yajmay, chi yminañ:

—Pinjaty müd ytätzac, pin midohuamy, huen mido'mbicy jada ayuc.

Ti yi' ñigapxyp yi iixpejt

¹⁰ Co je mayjäy ñicxni, e Jesús yhui'my naydüg, chi je nimajmetzpi ydiscípulos ajcxy etz jacjadyii huidib mijnicxpejt Jesús ñimijhua'cy, e amidoy nej yhuimbizimy je jihuimbit ayuc. ¹¹ E Jesús yminañ:

—Miich ajcxy jaydëb mnejhuñhuipy huidibi Dios ñigapxyp ñimiydacpy coyüch'amy ma y'ané'min ycötüjcin. Jacjadyii jäy ajcxy jihuimbit'amy nyajmüdmaydaacych. ¹² Jadu'n jihuimbit'amy nyaj'ixpijpyich je mayjäy, jaydëb co pinjaty iixp, ca' ajcxy ixipy; etz pinjaty midoob, ca' ajcxy mido'mbigipy. E jadu'n ca' ajcxy yjothuimbidi, e nañ ni ycajaymeecxipy ajcxy ypyoc.

Jesús najtzcapxiy nej yhuimbizimy je niipi y'ijxpejt

¹³ Chi Jesús yjacminañ:

—¿Nej ca' miich ajcxy mhuinjihuñy jada jihuimbit ayuc? Pen ca' miich ajcxy mhuinjihuñy jada jihuimbit ayuc, ca' miich ajcxy mhuinjihuñy yi jacjadyii jihuimbit ayuc. ¹⁴ Je huidibi capxhuäcxp Dios y'ayuc, jadun yi' nipaady nej je huidibi niip trigo tiim. ¹⁵ Je jäy ajcxy huidibi amidoo'ijtp Dios y'ayuc, e mic'amy je ca'oybi yajpidzimy Dios y'ayuc ma ajcxy yjot yhuinma'ñ, jadun ajcxy nipaady nej trigo tiim huidibi cäb tüguj, e je joon ajcxy mic'amy piimujctay. ¹⁶⁻¹⁷ Je jäy ajcxy huidibi amidoo'ijtp Dios y'ayuc janch jotujc, e mibijccixy tzojccix, chi ajcxy ixmajtzi Dios y'ayuc co agapxiyb paady, e co tzaachyp minaxy yajnaxy müd Dios y'ayuc ycxpi. Jadu'n ajcxy nipaady nej je trigo tiim huidibi ti ycäy ma tzaanicx. ¹⁸⁻¹⁹ Je jäy ajcxy huidibi amidoo'ijtp Dios y'ayuc, e co ñicxni, chi jäy digooyni Dios y'ayuc müd jotujc'ajtin tzinaayin, etz comeen'ajtin etz adzójcin. Jadu'n ajcxy nipaady nej trigo tiim huidibi ti ycäy ujtjoty, e ca' ytiim'aty müd co oy y'ujtz'ögy. ²⁰ Je jäy ajcxy huidibi amidoo'ijtp etz cöbijcp Dios y'ayuc amumdüjot etz Dios y'ayuc tumb ma ajcxy yjot yhuinma'ñ, jadun ajcxy nipaady nej je trigo tiim huidibi ti cäb ma oyñaax etz ytiim'aty may'amy: tüg pi'cpajc iipxmajc, etz jadüg pi'cpajc tugi'px, etz jadüg pi'cpajc migo'px.

Je lámpara ñi'ijxpejt

²¹ Chi Jesús yjacminañ:

—Co jäy ajcxy jindicxi'ñ nöctzoy, chi canan ajcxy cöjuppy müd tu'tz, ni ca' ajcxy pidacy cijxpa'tci'py, hue' janchtiy pidaacixy ma jindicxpejt jaydëb mij ytiicxy. ²² E nañ ni ca' ni pin ni ti jëb ameech tunipy, e nicxy ycajaynejhuñy. E ca' ni pin ni ti ayüch tunipy, e nicxy ycajaynejhuñy. ²³ Pinjaty ytätzac ymüd, pin midoohuamb, huen mido'mbijccixy ñich n'ayuc.

²⁴ Nañ jadun Jesús yminañ:

—Cuendtúngx jada ayuc huidibi miich ajcxy yam mmidooyb. Yi quipxi'ñ huidibi ajcxy myajquipxiyb, nañ jadun yi' müd Dios ajcxy xyquipxyhuimbidi, e ixti jacyajmöhüip ajcxy huidiatty midoob ñich n'ayuc. ²⁵ Pinjaty ymüd, yajmöhüip nigi, pinjaty hueen müd, yajpigipy nigi (oy ixipy hueen jadim müdity).

Je tiim huidibi yeecp ñi'ijxpejt

²⁶ Nañ jadun Jesús yminañ:

—Yi Dios y'ané'min jadun yi' nej co tüg jäy nicxy ñipy ma ycamjot. ²⁷ Chi jada' co ñiipxay ñicxni ma ytiic e ymi'o'cni ymāybidigni com jabom, e jadun yajnaxy canaag xii tzuu. E je moc pajc mujxp je' etz yomb. Per je cogam ni ca' nejhuñy nej je moc yoñ, ma mic'ajt paady. ²⁸ Je' co yi naax ci'm mic'ajt müdity jaydëb yajyoñ je moc. Jayjip ypidzimy je moc ung, jac'axam ypidzimy yi moc pijy, e chi jada' ytiim'ajtni. ²⁹ Co je moc ymajaani, chi je jäy ajcxy nicxy moc tzijcp, com ti yhuindiy je moc.

Iixpejt ma je mostazi pajc

³⁰ Nañ jadun Jesús yminañ:

—¿Nej m'oc'a'ixiigixy yi Dios y'ané'min? ¿Ti müd n'ocyajquipxyñhuibich? ³¹ Jadun Dios y'ané'min nipaady nej mostaza pajc huidibi tüg jäy nicxy niipy ma ycam. Yi mostaza pajc jacñigi ymützity ca'ydí jacjadyii ujtzpajc huidibi yajpatp ya naaxhuñ. ³² E co yajnipy je mostaza pajc, chi yoñ, e chi yeegy ooy janch mij, ca'ydí jacjadyii ujtz. E janch mij yeegy tüg'óciy yci' y'aacx, ixti joon ajcxy pe'mb ma je yci'y'aacx y'aniciy.

Nej anajty Jesús yecy je tiy'ajt müd je iixpejt ycxpi

³³ Jadun anajty Jesús yaj'ixpicy je mayjäy ajcxy Dios ytiy'ajt müd canaag jihuimbit ayuc, ixti mibaad ajcxy jëb huinjihuñy. ³⁴ Ac jihuimbit ayuc Jesús yajnimay je mayjäy. Per müd yi'ydiscípulos Jesús ycapxticxtaayb anajty je jihuimbit ayuc.

Jesús capxticx nej huimbizimiy je ijpexjt

³⁵ Je huin'it xii co ycoodziy, chi Jesús nimay yi ydiscipulos ajcxy:

—Tzoc ajt jámim jim'amy ahuin ma yi jadügpi mejypa'.

³⁶ Huin'it Jesús ydiscipulos ajcxy ixmajztay je mayjáy, e müd tzoón Jesús barcojoty. Nañ jadu'n jacjadyii barco ajcxy choñ quipxy müd Jesús ydiscipulos ajcxy ybarco. ³⁷ Je huin'it coodz tüg poj müñ janch mic. E je mejy nigoo anajty y'ocpidigni. Janch tighiyb anajty nü barcojoty, jagoo jagoo yca'ujztay je barco müd nü. ³⁸ Jesús maab anajty ma je barco iix ma tüg mabejt. Chi yajmáybidiği, e nimay ajcxy:

—Huindzin, ¿nej ca'mduñcuend co ich ajt yam nguinaanim?

³⁹ Huin'it Jesús ymáybidiği, e ijpcogapxiy je poj. Etz nimay je mejy:

—¡Amon! ¡Huäcxip!

Chi mic'amy je poj ymongidactay yhuäcxijptay jadu'ñyi. ⁴⁰ Huin'it Jesús ymínañ:

—¿Na'amy co mdzachtzigüygixy ajcxy? ¿Nej ca' mmibijccixy co nmüidich Dios ymic'ajt?

⁴¹ Jesús ydiscipulos ajcxy ooy chigüy, e ñayñimaayi ajcxy müñ xyipy:

—¿Pin jáy jada' jada Jesús? Ooy chachmijhuinma'ñ co yi poj etz je mejy ycapxymidoyii.

5*Je Gadarajáy huidibi anajty ca'oybi müd*

¹ Chi Jesús müd ydiscipulos ajcxy oyja'tcixy ma je mejypa' ma je Gadara jáy ñaaxjot. ² Tim mic'amy co Jesús ybarcobizimiy, chi nímüñ tüg jáy huidibi ca'oybi müd anajty. Hue' anajty choón ma öcpi jut. ³ Je yëydijc, ca'oybimüdpí, tzinaayb anajty ma öcpi jut. E ni pin anajty ycamimadägyii. Ni pin camimadacy nicx cíxoch tecyxoch jada je ca'oybimüdpí, e ni ca' ajcxy mimadacy müd cadena. ⁴ Canaag'oc ajcxy jacíxoch jatecyxoch müd cadena, e ypojtaayb anajty je cadena. Ni pin camihuinma'ñybaady nej jëb ocmimadaaccixy je ca'oybimüdpí. ⁵ Je ca'oybimüdpí xim tzuum anajty yhuidity tüg yuugjot etz ma öcpi it, janch mic anajty yäxytinäy. E chachnayyajtzaachüyii anajty müd tzaa.

⁶ Jigüëgy anajty je ca'oybimüdpí ymüñ, co iixpaty Jesús, chi poyígy ninicxy Jesús, e ycojxtinay'ahuuy ma Jesús yhuinduu. ⁷ Je ca'oybimüdpí mic migapxcooty Jesús, e nimay:

—Jesús, je mijpi Dios y'ung, ¿na'amy co xymidziptzoönich? May'ajt nbijctzooybich ma Dios co ca' ich jëb huaad xychaachyтуñich. ⁸ Je ca'oybi jadu'n ymínañ, com Jesús ti anajty nimáy:

—Ca'oybi, pidzimb ma jada yëydijc.

⁹ Jesús y'amidooy je ca'oybi:

—¿Ti mxii?

Chi je ca'oybi y'adzooy:

—Ich nxii hue' je' “ni may”, com ni may ich ajcxy huidibi yajpatp ma jada yëydijc.

¹⁰ Huin'it je may ca'oybi may'ajt pijctzoy ma Jesús co ca' ajcxy jëb huaad ixquexyii ma huingbi it lugar. ¹¹ Huingon anajty je cop ma anajty may idzim yjüxcxixy. ¹² Chi je ca'oybi ajcxy may'ajt pijctzoy, e nimay ajcxy:

—Najtzquexüyg ma yi may idzim, jigix jëbi n'adigüyich njottigüyich yi may idzim.

¹³ Chi Jesús jadu'n a'ixiy co jëbi adigüygixy jotigüygixy je may idzim. Chi je ca'oybi ypidzimday ma je yëydijc, e yajtigüyday je may idzim ajcxy. Jim anajty yajpaady jahuengi mejtz mil idzim. Chi je idzim ylociydaay, e ycögánaxtaay ajcxy ma tüg tzajijp, e oy ycádaaygixy nijoty, e chi ajcxy ñi'ögtagy.

¹⁴ Je idzim cuend'ajtp ajcxy ooy ajcxy ñay'adzigiüy, e nicxtay ajcxy povígy ma ytijc. E oy nímíydaaccixy cajpjoty etz majaty tundac nej anajty ajcxy y'idzim y'öctaaygixy. Mayjáy ajcxy choñ mic'amy oy iixcixy nej anajty ti ytunyii ti yjadyii. ¹⁵ Co je mayjáy ajcxy yja'ty ma Jesús yajpaady, chi ajcxy iixy je yëydijc huidibi anajty mayca'oybi ymüd. Iixy ajcxy co iñäy huit müd etz huijcuyc, ti anajty y'oyiy. E huin'it ooy ajcxy je mayjáy ñay'adzigiüy. ¹⁶ Je jáy ajcxy huidibi anajty huindixp co anajty je ca'oybimüdpí ti y'oyiy, etz iixcixy nej ti ytunyii ti yjadyii müd je may idzim, chi yajmiydactay je maycajpij jadu'n nej anajty ti iixcixy. ¹⁷ Huin'it ajcxy pijctzoy may'ajt ma je Jesús, co huen tzoón ma ajcxy je ñaaxjot.

¹⁸ Co Jesús ytigüy jadüg'oc ma je barco, chi je yëydijc huidibi anajty ca'oybi ti ñibizimiyii ti ycöbizimiyii, pijctzoy may'ajt ma Jesús co huen a'ixiy möhuip co huen müd'idüy Jesús. ¹⁹ Per Jesús ca' a'ixiy co ymüd'idüy, chi nimay:

—Huimbit ma mdjic etz mjugymigüg, e yajmüdmüydäg jada mijpi tung mijpi huinma'ñ huidibi je Huindzin Dios ti tuñ müd müch. Müdmüydägyipy jadu'n nej je Huindzin Dios ti xypa'ayoy.

²⁰ Chi je yëydijc yhuimbijtni, e huidijtp anajty cajp cajp jim Decápolis ñaaxjot, e nimíydactay tüg'öciy jadu'n nej Jesús ti yajtzögyii, e tüg'öciy je mayjáy ooy jihuuy huinmay.

Je Jairo ñüx etz je töxyjäy huidibi Jesús yhuut nïdoni

²¹ Co Jesús huimbijty barcojoty ma je mejpa' ma anajty ti chooñ, chi mayjā ymiñ ma Jesús yajpaady, chi Jesús yhuācxijpy ma je mejpa'. ²² Huin'it Jesús ñija'ti tūg mǝjtungmǝdǝpi ma yi judǝjāy ajcxy ñaymujctac. Je yēydǝjc hue' anajty xǝjity Jairo. Co Jairo iǝxpaty Jesús, chi ñayhuijotac ma Jesús yhuinduu. ²³ Jairo may'ajt pǝjctzoy, yminañ:

—Huindzin, ōgaanǝp ñch nnǝx. Tun may'ajt nicxy ma ñch ndǝjc, e mǝñtǝxǝjip ma ñch nnǝx, jǝgǝx jēbi mayǝtǝzōgǝp, e yǝactzinǝhuip.

²⁴ E Jesús nicxp anajty mǝid Jairo, e mayjāy panicy anajty Jesús. E je mayjāy ooy anajty tzach'adijy' y tzach'agodi'y Jesús. ²⁵ E ma je mayjāy ymiñ anajty tūg tōxyjāy pa'm mǝid, jēcyñ anajty ymǝjtacni. Majmetz jimǝjt yxǝi ybo' anajty cujc payōy, ca' anajty y'oc-huācxǝjǝpni je ni'py. ²⁶ Jada tōxyjāy ti anajty yajtzoyduñ mǝid may tzoymǝmbi, ti anajty ymēēñ yajtundāy ma je tzoymǝmbi ajcxy. E je'ni anajty ypa'm'ity. Ni ti pubējtǝn ti capaady, iǝti ñǝgi anajty ypa'm mǝjhua'ñ.

²⁷ Jada tōxyjāy ti anajty ayuc mǝdoy nej Jesús anajty pa'mjāy yajtzōgy, paady nimǝiñ etz nimǝjhuāgy jǝxcǝi'py'amy, chi nǝdooni Jesús yhuitpa'. ²⁸ Jada tōxyjāy nayñmaayǝ jǝtjoty huinma'ñjoty: “Co nnǝidōnǝbich Jesús yhuitpa', mǝid tim yǝ'i ndzōgibich.” ²⁹ Co je tōxyjāy nǝdōñ Jesús yhuitpa', tim huin'itǝy mǝc'amy yhuācxǝjip je ni'py. Huin'it je tōxyjāy jǝhuiy co anajty ti chōgy.

³⁰ E Jesús jǝhuiy co anajty ti yajtzōgy tūg jāy mǝid ymǝc'ajt, paady ni'ǝjxhuimbijty je mayjāy huidibi anajty pamǝinip, y'amǝdooy ajcxy:

—ǝPin ñch nhuit ti xyñǝdōni?

³¹ Huin'it Jesús ñmaayǝ ajcxy ydiscǝipulos:

—Miich m'ǝjxpy co yi mayjāy xychach'adijāy xychach'agodi'y, e miich mǝina'ñ: “ǝPin ti xyñǝdōñch?”

³² Per Jesús huindicxypejty je mayjāy jǝhuidity ma yǝi, oc'ixa'ñ ocnejhuihua'ñ pin anajty ti ñǝdōnyǝi. ³³ Huin'it je tōxyjāy, com ñejhuiyb anajty jadu'n nej Jesús ti yajtzōgyǝi, paady nimǝjhua'cy Jesús janch tziyuyb mǝid tziǝ'i'ñ ñayhuijotaci ma yǝi yhuinduu. ³⁴ Jesús yminañ:

—Tōxyjāy huidibi ooy ndzōcyǝch, ti mdzōgy mǝid co ti xymǝbǝcyǝch. Nicx agujc jǝtcujc, ti mba'm ñaxy.

³⁵ Capxp mǝydaap anajty Jesús mǝid je tōxyjāy co nǝjējity jāy ñimiini, choñ ma je judǝo jāy ñaymujctac mǝjtungmǝdǝpi ytiyc, e nǝmay je tōxy'anāg yteedy:

—Yǝi mnǝx ti je y'ōgy. Ca' huaad mǝjac'amayǝy ñǝg yǝi Huindzin Jesús.

³⁶ Per Jesús ca' tuñcuend jadu'n nej ajcxy yjamina'ñ, chi nǝmay je naymujctac huindzin:

—Ca' mdzǝgiy, mǝbic nigoda'ajty.

³⁷ E ni ca' jac'a'ǝxiy nicxy yjacmǝidnicxyǝi jǝcpǝnjaty. Jēda'ajty mǝidnicxy je Pedro, Jacobo etz Juan, je Jacobo y'uch. ³⁸ E co Jesús ytiǝctǝgiy ma yǝi naymujctac huindzin ytiyc, chi ǝjxy jadu'n nej jāy jǝiby chachne'mgixy chachjǝygixy chachyaaxcixy. ³⁹ Co Jesús tiǝctǝgiy, chi nǝmay je jāy ajcxy:

—ǝNej co nigoo ajcxy mdzachne'mni, e mdzachyāaxcǝni? Yǝi pǝi'c tōxy'anāg ca' yǝi' ti y'ōgy, maab yǝi'.

⁴⁰ Per nigoob ajcxy Jesús nǝxiicy co jadu'n ymina'ñ. Huin'it Jesús yǝǝpidzimday tūg'ōciy pǝnjaty anajty jǝiby tǝgoty, e mǝid tiǝc tǝgiy jēda'ajty je ungdeedy etz ungdaǝ, e nañ je tūgǝgǝpi ydiscǝipulos huidibi anajty ti mǝid mǝiñ. Chi ajcxy ytiǝgiy jǝiby ma anajty je tōxy'anāg yajpaady.

⁴¹ Chi Jesús mǝjtzǝy yǝi tōxy'anāg yci', e chi nǝmay:

—Talita, cumni —jadayaab ayuc hue' yǝi' yhuimbǝdzǝmy: Tōxy'anāg, ñch miich yam nǝmaayb, pǝdǝg.

⁴² Huin'itǝy je tōxy'anāg, je huidibi anajty majmetz yǝmǝjt, yǝpǝdǝgy e ytiyōychoñ. E tūg'ōciy yǝi mayjāy ooy ajcxy jǝhuiy huinmay. ⁴³ Huin'it Jesús najtzcapxǝy co ca' huaad pǝn yǝjnimay jadu'n nej je tōxy'anāg ti chōgy, nañ jadu'n ni'ane'mdiy co huen ajcxy yajcay je pǝi'c tōxy'anāg.

6

Jesús yajpaady jim Nazaret

¹ Huin'it Jesús chooñ ma je jimǝi it lugar, e yhuimbijty ma yci'mgajp. E mǝid ñicxy yǝi' ydiscǝipulos ajcxy. ² Sǝbado xǝjoty Jesús ytiǝgiy yǝj'ǝpǝjcp ma je mayjāy huidibi yōymǝjccǝp ma je judǝo jāy ñaymujctac. E je mayjāy huidibi amǝdoo'ǝjtp anajty ooy jǝhuiy huinmay ajcxy, e ñayñmaayǝ ajcxy mǝiñ xyǝpy:

—ǝMa jada' jadayaab jāy ti ni'ǝpǝgiy jadayaab ǝpǝjcin? ǝMa ti paady jada huijy'ajt cujc'ajt huidibi ymǝid? ǝMa jada' ti paady yǝi mǝc'ajt huidibi mǝid mǝjhuma'ñ tumyb? ³ Je' jada je tzejtpǝi, yǝi Marǝa y'ung. Yǝi y'uch ymǝgūg, yǝi Jacobo, yǝi Josē, yǝi Judas, etz yǝi Simón. Nañ jadu'n yǝi y'uch tōxyjāybǝi cha ajcxy chināy quipxy mǝid ñch ajt.

E je mayjāy ca'ajcxy anajty ǝxa'ñ cōbiga'ñ Jesús. ⁴ Huin'it Jesús nǝmay je mayjāy ajcxy:

—Huenma'ámyity tüg'óciy je mayjáy ooy yajmij'aty je jáy ajcxy huidibi najtzcaxpiyb Dios y'ayuc. Jëyi janchtiy, ma yci'm naax ma yci'mgajp ca' je jáy ajcxy yajmij'adyii, etz nañ ytim jadu'n yi' y'amigütiyc etz ymijün ymidijc.

⁵ Ma yci'm naax yci'm gajp Jesús ca' jaty nej mijhuinma'n tunipy müd co ca' ajcxy mijpidägyii. Jëyi yci'pidacy ma nijëtiy pa'mjáy etz yajtzoocy. ⁶ Jesús ooy jihuuy huinmay nej je jáy ajcxy ca' ymijpidägyii ma yci'm naax yci'm gajp. Chi Jesús choon jim ñicxy ma jacjadyii cajp huinduy agonbi, e yaj'ixpijcy anajty je mayjáy ajcxy.

Jesús quexy ydiscípulos ayuccapxhuäcxp

⁷ Huin'it Jesús mijhuoy je majmetz ydiscípulos ajcxy, e chi quejxhuäcxy nimetz nimetz ma canaag cajp. E chi mooy mic'ajt, jigix jëb yajpidzimy ajcxy ca'oybi ma jáy ajcxy. ⁸ Nañ jadu'n y'ane'my Jesús je' ydiscípulos ajcxy co ca' huaad ti minicxcixy tü'amgixpi, jëyi jëb minicxcixy tüg tajc nidüg nidügi. Ca' huaad minicxcixy ymorral, e ca' huaad minicxcixy ycaagy, e ca' huaad minicxcixy ymeefi. ⁹ Jëyi je yci'g etz je yhuut huidibi anajty ajcxy ymüd huen minicxcixy. ¹⁰ Chi Jesús yminañ:

—Co anajty ajcxy mjättaccixy ma tüg tiyc, jim ajcxy mhuí'mipy ixti coon mdzoonip ma yijimbi cajp. ¹¹ Pen mdigüygixp ma tüg cajp, e je jáy ajcxy ca' ajcxy xycöbiga'n, ca' ajcxy amido'ida'n müich m'ayuc, mbidzimgix ma je cajp, chi mhuinhuöjpcixipy mgig. Jada je' je tiy'ajt co ca' ajcxy mjotcücity. Janch ich müich ajcxy nimäy co Dios anajty ytiyduñ jada naaxhuin jáy, jacnigi tzaachypa paada'n yi jáy ajcxy huidibi ajcxy anajty ca' xycöbjccixy, ca'ydí je' ajcxy huidibi tzinaay jecy'aty ma Sodoma etz Gomorra cajp.

¹² Chi je nimajmetzpi ajcxy chon Dios y'ayuccapxhuäcxy co huen jáy ajcxy jothuimbijtcixy, huen ixmajtzaaygixy yi pocytunü. ¹³ Nañ jadu'n ajcxy yajpidzimy ca'oybi majaty jáy, e pidaaccixy aceite majaty pa'mjáy, e yajtzoöccixy anajty.

Co Juan je Bautista y'ögy

¹⁴ Huin'it je rey Herodes nejhuuy co Jesús canaag mijhuinma'n tzachytuñ anajty, com tüg'óciy je mayjáy anajty nimiyaaccixy Jesús. Herodes yminañ co Juan je Bautista ti yjugypicy jadüg'oc ma anajty ti y'ögy, paady mic'ajt müdity jaydëb mijhuinma'n tüñ.

¹⁵ Nijëtiy jáy yminaangixy:

—Jesús yi' je' Elías.

E naagity jáy yminángixy:

—Yi' je' tüg Dios tiy'ajtmüdpí huidibi quipxyiiby müd je Dios ytiy'ajtmüdpí huidibi tzinaay jecy'aty.

¹⁶ Co Herodes nejhuuy nej je mayjáy nimiyaaccixy Jesús, chi yminañ:

—Janch jada co Juan ti yjugypicy, je huidibi nni'ane'mdüyich co huen yajminagyyi ycohuajc.

¹⁷ Müd Herodías, Herodes ytöxytiyc ycixpi, Herodes n'ane'mdüy co Juan yajmach, e pidägyii pujxtigoty. Jada Herodías jayip ypijcy müd je rey Herodes y'ajch Felipe, per ti anajty ixmach Felipe, e ypijctigajch müd je ycapy Herodes. ¹⁸ Hue' anajty Juan ti nimay Herodes:

—Ca' jadu'n paadyii co yi m'ajch Felipe ytöxytiyc müich müddzinaayi.

¹⁹ Paady ycixpi Herodías mijotma'ty Juan, e ytimy yaj'ögamy anajty. Per ca' mic'amy yhuinma'nybaty nej ocyaj'ögip; ²⁰ com je rey Herodes nejhuuyb co tudägy jáy huadz jáy anajty je Juan, e tzigüyb anajty müd Juan. Paady ycixpi anajty je rey Herodes Juan müdity cuend'aty pujxtigoty. Naag'oc naag'oc anajty Herodes nicxy amido'ity Juan y'ayuc, ooy anajty huinmay nej yhuimbizimy, per jotcuyc anajty amido'ity.

²¹ Huin'it Herodías ypat huinma'n nej jëb yaj'ögy Juan je huin'it xü co je rey Herodes anajty ñayñixiüduñy. Hue' yajcay yaj'uucy je gobierno ytumbi ajcxy, je soldado huindzin ajcxy, etz tüg'óciy yi mic'jädijc huidibi ajcxy tzinaayb naag naag cajp jim Galilea. ²² Xiüduñyoty anajty co Herodías ñix oy y'ech ma je rey anajty yajpaady müd je may jáy huidibi anajty yajcaayb yaj'uucy. E jadu'n nej je Herodías ñix y'eich, ooy je rey jadu'n jáygidacy, etz tüg'óciy je jáy je huidijcy anajty müd ajcxy ycaaygixy y'uuccixy. Chi je rey nimay je töxy'anäg:

—Pijctzoöhuigich ti mdimdzojpcy, ich müich nmöhuipy.

²³ Je rey ñigi capxcödujcy janch cixyot huinijot co möhua'n ti ytimy ypijctzooyb, ixti jëb jamóy cujhuäcxy yi' y'ané'min, mibaad anajty ane'my je naaxjot. ²⁴ Chi je töxy'anäg ñicxy ma ytaj oy amidoy, nimay:

—¿Ti nbijctzohuípich?

Chi je' ytaj y'adzooy:

—Pijctzoohui yi Juan je Bautista ycohuajc.

²⁵ Mic'amy je Herodías ñix nihuimbity je rey e yminañ:

—Ndzojcy pich co xymöhuibich mic'amy je Juan je Bautista ycohuajc ma tüg texy.

²⁶ Co jadu'n midoy je rey, chi ytigüy tajp mayb janch mijcajee. Per ti y'octunipy. Com ti anajty jadu'n capxcöduy, ti anajty mayjäy midoy ti anajty ti yaj'ahuaníy je töxy'anäg, ca' y'ayuc yajxiicy. ²⁷ Paady ycixpi je rey mic'amy ane'my tüg soldado, co huen nicxy yajtzoni Juan ycohuajc. ²⁸ Chi je soldado ñicxy ma pujxtijc, e yöcpujxtuuty Juan. Chi je soldado mimiñ Juan ycohuajc ma tüg texty, e yajcídigi y je töxy'anäg, e je töxy'anäg yajcídigi ytaj.

²⁹ Co je jäy ajcxy huidibi anajty mijnicxpejtp Juan ñejhuíy ajcxy co je rey ti yaj'ögy Juan, chi ajcxy y'oy e yajpidíci Juan ñiníxc, e yajnaaxtigüy ajcxy.

Jesús yajcaay migoox mil yéydijc

³⁰ Co je majmetzpi apóstoles ajcxy yhuimbijty huidibi anajty Jesús ti quexy y'ayuccapxhuäcxpi ma canaag cajp, chi ajcxy yajmüdmíydacy Jesús tüg'óciy tijaty anajty ti túngixy, etz tüg'óciy ayuc huidijaty ti yaj'ixpíccixy. ³¹ Huin'it Jesús nimay je nimajmetzpi huidibi anajty ti quexy y'ayuccapxhuäcxpi:

—Tzoc jámim ma tüg it ma ca' pin, jaydéb nbócxim tüg xii metz xii.

Paady ycixpi Jesús jadu'n yminañ, com tzach mayjäy ja'ttiib tzondiib ma Jesús yajpaady, e ca' ajcxy tiempo anajty müdity mina ycaaygixipy y'uuccixipy müd je mayjäy ycixpi. ³² E Jesús müd ydiscipulos ajcxy ñicxy barcojoty ma ca' pin. Ac jëyi ajcxy nicxy ca' jac pin jäy müd nicxy. ³³ E mayjäy ijxy co Jesús ajcxy choñ, e nañ ijxcajpy pin anajty tzoñ barcojoty. Paady mayjäy choñ ma canaag cajp tegy'm, ñicxcixy yöygy anajty ma Jesús ñicxa'ñ. Mayjäy oy yja'ty jayijp ca'ydi Jesús ajcxy, e jim ajcxy yöymujctay. ³⁴ Co Jesús ybarcopídzimy, chi ixj janch mayjäy, e Jesús ooy pa'ayoy je mayjäy, com jadu'n anajty ajcxy nej maycöbixy huidibi ca' müdity ycuend'ajtpi. Chi Jesús ytigüy yaj'ixpíjcp, canaag nax ixpíjcin anajty yecy. ³⁵⁻³⁶ Co anajty ti chu'íyñi, chi Jesús ydiscipulos ajcxy ñimaayi:

—Ca' ni pin chinäy ma jadaayaabi it lugar, e ti chu'íyñi. Capxycix müd jada mayjäy ajcxy, jaydéb ñicxcixyñi ma yi cajp huinduy agonbi, huen nicxy júygixipy ycaayin y'uucin.

³⁷ Huin'it Jesús y'adzooy yi' ydiscipulos ajcxy:

—Miich ajcxy móoygix jada mayjäy caayin uucin.

Chi ajcxy Jesús y'adzooy:

—¿Huaad iich ajcxy nicxy njuy mejtz migo'px denario tzajcaagy, jigix ycaayipy y'ügipy jada mayjäy?

³⁸ Chi Jesús y'amidooy ydiscipulos ajcxy:

—¿Naag tzajcaagy miich ajcxy müdity ya? Ñicx íjxcix.

Co ajcxy tiy'ajt paty, chi ajcxy Jesús nimay:

—Ích ajcxy nmüd migoox tzajcaagy etz metz acx.

³⁹ Chi Jesús ni'ane'mdíy co je mayjäy huen ixtaaccixy naaxcixy tügpijaty. ⁴⁰ Chi je mayjäy y'ixtactay canaagpicy. Canaagpicy migo'px jatypi, e canaagpicy huixchigüipxmajjatypi.

⁴¹ Chi Jesús conígy je migooxpi tzajcaagy etz je metzpi acx, e ypa't'ijxy tzajpcixy, e yajnaxjy Dios cojuyip ma Dios müd je tzajcaagy etz je acx ycixpi. Huin'it Jesús tujc-huäcx je migooxpi tzajcaagy, e yajcídigi y je' ydiscipulos ajcxy, jaydéb ajcxy yajhuäcxip ma je mayjäy. Nañ jadu'n Jesús yajcídigi y je metzpi acx je' ydiscipulos ajcxy, jaydéb yajhuäcxip ma je mayjäy.

⁴² Nidüg'óciy je mayjäy ajcxy ycaay y'uucy cüxyi. ⁴³ Co je mayjäy ycaayday, chi je discipulos ajcxy yajmujcy je cayduc tüzützc, e yaj'ujch ajcxy majmetz cach. ⁴⁴ Migoox mil anajty ajcxy je yéydijctijc huidibi cay uuc.

Jesús yöy ñihuingíxy

⁴⁵ Huin'it Jesús ane'my je' ydiscipulos ajcxy co huen barcotigüygixy mic'amy. Huen nicxcixy jayijp jim Betsaida jim mejy ñinajxy. Co yi discipulos ajcxy ybarcotigüyday, chi Jesús ycapxycijxy müd je mayjäy. ⁴⁶ Co anajty Jesús ti ycapxycixy müd je mayjäy, chi ñicxy ma tüg cögy Dios mijibjctzoob. ⁴⁷ Co ycoodziyñi je discipulos ajcxy anajty yajpaady mejyoty ma je barco. Jesús naydüg anajty yajpaady mejypa'. ⁴⁸ Jesús y'ijx co je'ydiscipulos ajcxy anajty ti y'anucxiygixy müd mejycabi, je' co je barco anajty chachijpcoboñy. E co oy moñy, chi Jesús ymijhuägy ma je barco. Jesús yöyp anajty mejyhuingíxy, e hue' anajty jüyöñaxamy je discipulos ajcxy. ⁴⁹ Co ajcxy ijxpaty Jesús yöyp anajty mejyhuingíxy, chi ajcxy ooy yaxqueegy, com hue' anajty ajcxy tijy co nigo y'ijxmañiygixy. ⁵⁰ Com tüg'óciy yi discipulos ajcxy anajty ti íjxcixy Jesús, e ooy ajcxy chigüy, paady mic'amy Jesús migapxy je' ydiscipulos ajcxy, e nimay:

—Jotmic naybidáacigixy, ca' mdzigüygixy. Ích yi'.

⁵¹ Huin'it Jesús ybarcotigüy, e mic'amy je poj yxeemy, e je discipulos ajcxy ooy jihuíy huinmay. ⁵² Ooy ajcxy jihuíygixy huinmaaygixy, com ca' ajcxy huinjihuíygixy anajty nej

Jesús je mayjāy yajcay miid je migooxpi tzejcaagy. Com je'ni anajty ajcxy ooy yjotjuuñity ycojuuñity.

Jesús yajtzōgy pa'mjāy ajcxy jim Genesaret

⁵³ Chi ajcxy ymejch ma je mejypa' ma je Genesaret ñaaxjot. E coxoich ajcxy je barco ma mejypa'. ⁵⁴ Co ajcxy ybarcopidzimy, chi mic'amy je mayjāy ajcxy jim iixcaypy Jesús. ⁵⁵ Poyigy je jāy ajcxy choon, e yajyōyñajtxay je cajn ajcxy huinduy agonbi, capxhuāccixy co Jesús anajty ti yjādy jim. E jāy ajcxy yajmiindzondacy may pa'mjāy cijx'am jim ma anajty Jesús yajpaady. ⁵⁶ E hueñytim ma'amyity anajty Jesús ñicxy majaty mij cajn, mutz cajn, o majaty jāy y'ujtzināy, ooy anajty ajcxy pidāccixy pa'mjāy majaty majaty yi mij tūba', e cohuanñygixy Jesús co huen nidoñyii yi yhuip'a', e tūg'ōciy huidijaty anajty ajcxy nīdomb, najxp ajcxy anajty je' ypa'm.

7

Huidi jāy yaj'ahuimbij pocyjāyity

¹ Huin'it ymiñ ma Jesús nijējity fariseojāy ajcxy, je huindzindijc huidibi tzachpadumb judio ycostumbre. Nañ jadu'n miid miñ nijējity escribas, je huindzindijc huidibi ajcxy nijaydutp anajty Dios ñecy. Hue' je fariseos etz escribas ajcxy anajty ti choongixy Jerusalén. ² Je fariseos etz escribas ajcxy iixy co Jesús ydiscipulos ajcxy ytigūy caaybi uucpi jaygibujy, ca' anajty cuydūngixy judiojāy ycostumbre. ³ (Com yi fariseojāy etz jacjadyii judiojāy ajcxy cuydumbay anajty ajcxy ñi'ap costumbre, e ixpocypūjixy jayijp ma ca'ni ytigūyigixy caaybi uucpi. Com yi judiojāy ajcxy co ajcxy ñicxy mayjāyoty etz yhuimbijcixy jadūg'oc ma ytič, ca' ajcxy ycaay ixti cooni jayijp ajcxy yčibūjixy canaag'oc. ⁴ Yi judiojāy ymiid canaagnax costumbre huidibi cuydūngixyp jadu'n nej ajcxy yajhuaatzcixy ajcxy ytaasi ytexy ytūtz etz ypujxtexy.) ⁵ Chi je fariseos etz escribas ajcxy y'amidooy Jesús, nimaayi:

—¿Na'amy co miich mdiscipulos ajcxy ca' cuydūngixy judiojāy ñi'ap costumbre? ¿Na'amy co ajcxy ycaaygixy y'ūccixy, e ca' jayijp ixpūjixy yi' ypocyi?

⁶ Chi Jesús y'adzooy:

—Janch tiy'ajt jadu'n nej je Dios ytiy'ajtmīdipi Isaías jayhui'my jecy'ajty miid miich ajcxy ycipxi. Miich ajcxy huidibi naybidaacip jadu'n nej jihuñy ajcxy tudāgyjāy, e ca' yjānchity. Com jadu'n Isaías jaybejty co Dios jadu'n ymīnañ: Jada jāy jadu'n ajcxy ycapxcixy ymiydaaccixy jadu'n nej jihuñy xyajmij'atyich. Per ca' ajcxy xyajmij'atyich cixyot huinijot.

⁷ Naadigi co ajcxy xyhuin'igixich xyhuinyāaxcixich. Ñayaj'ixpūjicixy ayuc tiy'ajt huidibi jāy ajcxy ti cojy ti maxcy.

⁸ Chi Jesús ymīnañ:

—Miich ajcxy ti m'ixmājtzcixy Dios ycotūjcin, e myajmij'ajtcixy ayuc huinma'ñ huidibi jāy ci'm ti cojy ti maxcy. ⁹ Miich ajcxy ca' mguēndtūngixy Dios ycotūjcin Dios ytiy'ajt jigix jēbi cuydūngixy mgi'm costumbre. ¹⁰ Com Moisés je cotūjcin ypidac jecy'ajty: “Yajmij'at mdaj mdeedy”, e “Pinjaty jibic nigapx ni'oñyib ytaj yteedy, copicy y'ōgip.” ¹¹ E miich ajcxy mīnañ co tūg jāy nimāhuip ytaj yteedy co ca' pubeda'ñ ajcxy jadu'n nej padyii, miid co tūg'ōciy tijaty yi' ymiid huidibi ytaj yteedy jē'adānip, hue' ti ahuanñy nigoo ma Dios. ¹² E pen jadu'n mīnañ, chi miich ajcxy mīnaangixy co ca' copicyity mbubējtcixipy mdaj mdeedy. ¹³ Miich ajcxy midundigooyb Dios ycotūjcin miid mgostumbre huidibi myajnaxyp myajtigūyib, etz jacjadyii jibic-huinma'ñ myaj'ixpūjicixy.

¹⁴ Jadūg'oc Jesús mijhuoy yi mayjāy ajcxy, e chi nīmay:

—Mido'mbājccix miich ajcxy iich n'ayuc, e mhuinjihuñy ajcxy. ¹⁵ Ca' yi' yajpocycāhuñy huidibi jāy ajcxy ypidacy ma yhuin y'ahuac. Yi' janchtiy huidibi pidzim ma jāy ajcxy yjot yhuinma'ñ, yi' yi' yajpocycāhuñb. ¹⁶ Miich ajcxy mmiid mdātzac, mido'mbājccix iich n'ayuc.

¹⁷ Co Jesús ixmajch je mayjāy, e ytičtigūy, chi je discipulos ajcxy yaj'amidoohui nej yhuimbizimy jada ayuc. ¹⁸ Chi Jesús ydiscipulos ajcxy nīmay:

—¿Nej nañ jadu'n miich ajcxy ca' mhuinjihuñy jada ayuc? ¿Nej ca' mhuinjihuñygixy co huidibi tigūy ma yi jāy y'ahuac (yi caayin uucin), ca' yi' yajpocycāy yi jāy? ¹⁹ Yi caayin uucin hue' yi jāy ypidāgy ma y'aa ymoox ca' nan ma yjot yhuinma'ñ, e co ñax ma y'aa ymox, chi ypidzimni.

Co Jesús jadu'n ymīna'ñ, chi nejhuñyim co Dios ca' capx'aducy ni ti caayin ni ti uucin. ²⁰ E Jesús yjacmīnañ:

—Dios yajpocycāhuip jāy ajcxy miid huidibi pidzim ma ajcxy yhuinma'ñ. ²¹⁻²² Ma yi jāy ajcxy yhuinma'ñ jibiy choon jibic-huinma'ñ; jibiy choon migapxtigoyi tōxyjāy yhuinma'ñ; jibiy choon je tundigooyi yēdyjc miid tōxyjāy etz tōxyjāy miid yēdyjc huinma'ñ; jibiy choon jāyay'ōgi huinma'ñ; jibiy choon meedzi huinma'ñ; jibiy choon mūgi huidi huinma'ñ;

jiiby chooñ jibic-huinma'ñ; jiiby chooñ je huin'ññi huinma'ñ; jiiby choñ nayca'oy'ixi huinma'ñ; jiiby chooñ je piitzcapxi huinma'ñ; jiiby chooñ je amij agix huinma'ñ; jiiby chooñ je tzuu huinma'ñ je loci huinma'ñ. ²³ Yi jadu'mbi jibicpi jiiby chooñ ma jāy ajcxy yjot yhuinma'ñ, paady jibicpi jāy ajcxy tūngixy, e ypcycāy ajcxy ma Dios.

Tūg tōxyjāy huidi ca' yjudiojāyity mibijc Jesús

²⁴ Chooñ Jesús ma yijimbi it, e ñicxy jim ma Tiro etz Sidón ñaaxjot. Jesús ytigiy ma tūg jāy ytiyc, e ca' anajty tzocy co je mayjāy ñejhuñhuiyb ma y'ity. Per ca' jajty nicx yhuingoyūch. ²⁵ Mic'amy tūg tōxyjāy ñejhuñhuiyb ma Jesús anajty yajpaady. Hue' je tōxyjāy ypi'cnix ymiid anajty ca'oybi. Je tōxyjāy ymiñ ma Jesús, e ycojtinay'ahuñy ma y' yhuinduu. ²⁶ Je tōxyjāy hue' anajty ycojgāpity Sirofenicia (e hue' anajty griegojāy). Yi tōxyjāy may'ajt pijtzooy ma Jesús co huen yajpidzimy je ca'oybi ma ypi'cnix yjot yhuinma'ñ. ²⁷ Chi Jesús je tōxyjāy ñimay:

—Ooy ycopicyity co nbubedipyich jayijp Dios yjāy (yi judiojāy). Jadu'n nipaady nej tūg ungedeedy. Tim copicy co je ungedeedy yajcayipy jayijp yci'm ung, e ca' mōhuip uc je huidibi y'ung yajjicxaamy.

²⁸ Chi je tōxyjāy y'adzooy:

—Huindzin, tiy'ajt nej miich mmīna'ñ, per nañ jadu'n yi uc ajcxy yjicxyp je caagy abu'x huidi cāb naaxcixy ma mesipa't ma je jāy y'ung ajcxy ycaay.

²⁹ Chi Jesús je tōxyjāy ñimay:

—Tiy'ajt jadu'n nej iich miich ti xy'adzooy, paady ycixpi jēb mhuimbidity ma mdijc jotcujc, je ca'oybi ti ypidzimy ma mñix yjot yhuinma'ñ.

³⁰ Co je tōxyjāy huimbity ma ytiyc, chi paty ypi'cnix cijx'am, ti anajty je ca'oybi ñibidzimy yicōbidzimy.

Jesús yajtzōgy tūg jāy huidibi cōnat etz ahui'mb

³¹ Chi Jesús jim tzocji chooni Tiro ñaaxjot. Chi chooñ jim ñicxy anajty Galilea, e nicxy ma je tū'aa huidibi najxp Sidón etz je cajp huidibi yajpatp jim Decápolis ñaaxjot, chi yja'ty ma Galilea mij laguunba'. ³² Jim ajcxy miid miñ tūg jāy huidibi cōnatip etz aahui'mb. Chi ajcxy may'ajt pijtzooy ma Jesús huen cñixajy je pa'mjāy. ³³ Chi Jesús miidnicxy je pa'mjāy ahuingujc ma ca' mayjāy, e pidacy ycihua'x ma je pa'mjāy ytātzac. Chi chuyc, e huin'it nidoni je ytoodz. ³⁴ Chi Jesús ypa'tijxy tzajpcix, e ymicxejy, e chi yminañ Aramaico'amy:

—Efata —jada ayuc hue' yhuimbidity: Ahuādz.

³⁵ E mic'amy je jāy cōnatpi ytātzac y'ahuaach etz ytoodz yungiy etz ycapxni yajxon. ³⁶ Chi Jesús ane'my je pa'mjāy etz ymigūgtijc co ca' huaad ni pin yajmiidmiydāgipy jadu'n nej anajty ti chōgy. Co Jesús jadu'n mictāy ane'my co ca' huaad ni pin yajmiidmiydāgipy je mijhuinma'ñ huidibi ytumyib, chi ñgi je pa'mjāy etz ymigūgtijc miidmiydaaccixy hueñypinity. ³⁷ Je mayjāy ooy tzachjihuiy huinmay ajcxy, ñayñimaay ajcxy miñ xyipy:

—Jada Jesús ooy oy chachtuñ. Ymimadactaayb yi'huenyitimytijity, itxi yajmidohuicpy yi' yi cōnatpi etz yajcapxgy yi uumbi.

8

Jesús yajcay midax mil yēdjic

¹ Je huin'it xi je huin'it tiempo mayjāy anajty ti ñaymūjcigixy ma Jesús yajpaady, e ca' anajty je mayjāy ajcxy miidity ti ycaaygixipy y'uccixipy. Jesús capxyñiguejy je' ydiscipulos ajcxy, co huen miingixy ma y' yajpaady. Co ajcxy ymiñ, chi ñimay:

² —Ooy nba'ayooyich yi mayjāy. Yi' co cham midugig xi maabi ya miid y'ityich je mayjāy, e ni ca' ajcxy miidity ti ycaipy. ³ Co ixipy nguexhuimbityich ajcxy ma ytiyc ayuu, ca' yjēcyity yajpa'mgōjipy ajcxy tū'am, com nijēity ajcxy jigūēgy ti choongixy.

⁴ Chi je discipulos ajcxy Jesús adzooy:

—¿Ma iich ajt nbaatim je caayin uucin huidibi jēb miid nyajcaayim nyaj'ūcum jada mayjāy? Com migtigiduum ya nyajpaatim ma ca' pin chināy.

⁵ Chi Jesús y'amidooy je' ydiscipulos ajcxy:

—¿Naag tzajcaagy miich ajcxy miidity?

Chi je' ajcxy y'adzooy:

—Huixtujc tzajcaagy.

⁶ Chi Jesús ane'my je mayjāy, co huen iñay'ahuñyigixy naaxcixy. Huin'it Jesús congy je huixtujc tzajcaagy, e yajnaxy Dioscojuyip ma Dios miid tzajcaagy ycixpi. Chi tujc-huācxy je tzajcaagy, e moy je' ydiscipulos ajcxy, e je' ydiscipulos ajcxy yajhuācxy je tzajcaagy ma je mayjāy. ⁷ Je Jesús ydiscipulos ajcxy ymiid anajty nijēity pi'c acx. Chi Jesús yajnaxy Dioscojuyip ma Dios miid je pi'c acx ycixpi, e moy je' ydiscipulos ajcxy huen yajhuācxtaygixy ma je mayjāy. ⁸ Chi je mayjāy nidūg'ōciy ycaay cūxyi, e co ajcxy ycaayday, chi je Jesús

ydiscípulos ajcxy yajpidígy huixtujc cach cayduc jicxtuc tübi anajty yconaxy. ⁹ Jahueeni anajty ycamidaaxmility je jáy huidibi ajcxy cay uuc cüxyi. Chi Jesús ycapxy yciyxy müd je mayjáy, e nimay ajcxy co huen nicxcixy ma ytiyc. ¹⁰ E mic'amy Jesús ybarcotigiy müd ydiscípulos ajcxy, e chi ñicxy ajcxy jim Dalmanuta ñaaxjot.

Yi fariseos ajcxy tüg iixpejt pijctzoob mijhuinma'ñybi

¹¹ Nijëjity fariseos ajcxy, je huindzindijc huidibi padumb judío ycostumbre, ymiñ ajcxy ma Jesús yajpaady, e ytiy ajcxy iixquixcixy y'ixpijcin müd Jesús. Pijctzoogixy co Jesús huen yaj'ixyüi ajcxy tüg iixpejt huidibi tzomb tzajpjoty. Ijxta'n octunaangixy müd Jesús. ¹² Chi Jesús tajy may ñayjihuiyüi jotjoty huinma'ñyoty, chi ymicxejy, e ymiñañ:

—¿Na'amy co jada jáy ajcxy huidibi jugy'ajtp cham, pijctzoogixy iixpejt huidibi tzomb tzajpjoty? Janch iich müch nimaaygixy co ca' nyaj'ixaangixy iixpejt huidibi tzomb tzajpjoty.

¹³ E Jesús ytimycapxycixy müd je fariseos ajcxy, e chi puyöyduuty ajcxy. Chi Jesús ybarcotigiy, e ñicxy müd ydiscípulos ajcxy ma mij laguun ññaxy.

Fariseojáy ajcxy yaj'ixpijcin

¹⁴ Je' ydiscípulos ajcxy ti anajty jaydigoygixy je jicxy picy co ajcxy ybarcotigiy. Jëyi ajcxy mimiñ tüg pi'c tzajcaagy. ¹⁵ Chi Jesús ane'myb je' ydiscípulos ajcxy, e ymiñañ:

—Ca' mmijpidaaccixy yi fariseojáy ajcxy y'ayuc ytiy'ajt etz ni rey Herodes y'ayuc ytiy'ajt, com jadu'n ajcxy y'ayuc nipaady nej levadura huidibi ca' y'öyity.

¹⁶ E je Jesús ydiscípulos ajcxy nimiydaaccixy Jesús y'ayuc ñayñimaayigixy ajcxy miñ xyipy: —Je' co ca' iich ajt mmimiñim caayin uucin.

¹⁷ E Jesús ñejhuiyb anajty nej je' ydiscípulos ajcxy ñayñimaayüi miñ xyipy, paady ymiñañ: —¿Na'amy co mdzachnimiydaaccixy je caayin uucin huidibi ti mjäydigooygixy? ¿Nej ca' mhuinjihuiyigixy e ca' mguenditongixy iich n'ayuc? ¿Nej co ajcxy mdzachcöjuiñity?

¹⁸ Miich ajcxy müd mhuin: ¿Nej co ca' m'ijxcixy huidibi ndumybich? Miich ajcxy müd mdädzac: ¿Nej co ca' mmido'mbijcixy iich n'ayuc? ¿Nej co ca' mjäyméjtcixy ti ti nduñich? ¹⁹ Jayhuin co ndujc-huäcxyich je migooxpi tzajcaagy e nyajcaayich migoox mil jáy: ¿Naag cach cayduc jicxtuc ti ajcxy myajpidigy?

Chi ajcxy y'adzooy:

—Hue' iich ajcxy nyajpidigyich majmetz cach cayduc jicxtuc.

²⁰ Chi Jesús ymiñañ:

—E jayhuin co ndujc-huäcxyich je huixtujcpi tzajcaagy, e nyajcaayich mdaax mil jáy: ¿Naag cach cayduc ti ajcxy myajpidigy?

Chi ajcxy y'adzooy:

—Hue' iich ajcxy nyajpidigyich huixtujc cach cayduc jicxtuc.

²¹ Chi Jesús ymiñañ:

—¿Nej chambaad miich ajcxy ca' mhuinjihuiy?

Jesús yajtzögy tüg jáy huintzpi jim Betsaida

²² Jesús etz ydiscípulos ajcxy oy yjá'tcixy jim Betsaida. Jim Betsaida nijëjity jáy müd miiñ ma Jesús tüg huintzpi, e pijctzoy ajcxy may'ajt co huen nidoñ jigix je huintzpi y'ijxigipy. ²³ Huin'it Jesús huijtztzooñ je huintzpi ma yci', chi müd cajppidizimy. E chi Jesús yajjaaxy yi chujyñi je huintzpi yhuin, etz cinixajy, e chi amidoy pen y'ijxpy anajty tigati yinjaty huenjaty. ²⁴ Chi je huintzpi huindicxpejty Jesús, e nimay:

—N'ijxypich yëydijctijc, e jadu'n ajcxy yquëxigü nej quipy, per yöpp ajcxy.

²⁵ E jadüg'oc Jesús yci' pidacy ma je huintzpi yhuin, e chi je huintzpi yhuindicxpejtpy anajty, e chi yhuin y'oyüi yajxon, huin'it oy huädz y'ijxy. ²⁶ E Jesús ycapxycijxy müd je', e quejxhuimbijty ma ytiyc. Chi ymiñañ:

—Ca' mdigihuij cajpjoty, e ni pin jada mgayajmüdmüdyägy.

Pedro capxypidizimy co Jesús yi' je' je Cristo

²⁷ Chi Jesús ñicxy müd ydiscípulos ajcxy jim ma nijëjity mutz cajp mihuingon je mij cajp Cesarea Filipo. E tü'am Jesús amidoy ajcxy ydiscípulos, nimay:

—¿Nej jáy ymiñaangixy pin iich?

²⁸ Chi ajcxy je' ydiscípulos y'adzooy:

—Nijëjity jáy ymiñaangixy co miich je' je Juan, je Bautista. E nijëjity ymiñaangixy co miich je' je Elías. E jacadyüi ymiñaangixy co miich je' tüg Dios y'ayucnajtzcaxüybi huidibi tügiyib müd nijëjity Dios ytiy'ajtmüdp: huidibi tzinaay jecy'ajty.

²⁹ Jesús y'amidooy je' ydiscípulos ajcxy:

—Miich ajcxy, ¿nej miich ymiñaangixy pin iich?

Chi Pedro y'adzooy:

—Miich je' je Cristo.

³⁰ Chi Jesús ñimay je' ydiscipulos ajcxy co ca' huaad ni pin ñimaaygixy, co yi' je' je Cristo.

Jesús capxypidzimy co y'ōga'ñ

³¹ Chi Jesús jacyaj'ixpijcy je' ydiscipulos ajcxy, e yminañ:

—Copicy co ñich, je jāy huidi tzoon tzajpjoty, nyajnaixipiyich mij tzaachpyi etz mij ayo'n. Yi mijjādjic ajcxy, yi judío teedy mǝitungmǝidpi, etz yi escribas, je huindzindijc huidibi ñijayduutcixyp Dios necy, ca' ajcxy xy'ixa'ñich, e xyaj'ōga'ñ ajcxy, e codugüg xii njugypigipiyich jadüg'oc co ñich anajty ti n'ōgy. ³² Co Jesús jadu'n ñigapxy ñimiydacy huādz huādz nej yjada'ñiyi anajty, chi Pedro huobibzimy Jesús ahuingujc, chi ooy ojy. ³³ Chi Jesús ñi'ixxhuimbijty ydiscipulos ajcxy, e ojy je Pedro, ñimay:

—Huinhuaäctuticich, miich Satanás. Com miich ca' mhuinma'ñ mbidägy nej Dios tzocy. Yi' janchtiy miich mhuinma'ñ ajtpy nej jāy ajcxy tzocy.

³⁴ Huin'it Jesús huoomiñ yi' ydiscipulos ajcxy etz yi mayjāy, e chi ñimay:

—Pen ji pinjaty xypanicxa'ñich, huen jāydigoydäy yci'mdzócin etz huen xypanicxich jabom jabom. Oy nej ytimyjadipy ytimy'ayoohuipy. Jadu'n nipaady nej jihuüy ajcxy anajty mgruudz mgabiccixy, etz naygǝyégigixy ma yi ó'cin huen ytimyñejity müd ñich ycixpi. ³⁵ Huenpinjāy huidibi ca' yega'ñ yi yjugy'ajtín ma yi ó'cin müd ñich ycixpi, hue' je' yajtigoyamy yi'yjugy'ajtín. E huenpinjāy huidibi yegamy yjugy'ajtín ma yi ó'cin müd ñich ycixpi etz ñich y'ayuc oybi ycixpi, hue' je' ypadamyb yi jugy'ajtín huidibi ca' cixipy tigoyipy ni minaa. ³⁶ ¿Ti oy'ajtín yi' co tüg jāy y'ocnayajpadüyb yi meen etz mic'ajtín (huidi yajpaatp ya ñaaxhuiñybi) e y'alma yjugy'ajtín cixipy tigoyipy tügciy? ³⁷ ¿Jadu'ñiyi jēb jāy y'alma yjugy'ajtín occojuyi? Nigi tzoohuin müdity jāy ajcxy y'alma yjugy'ajtín, ca' jac ti. ³⁸ Huentimpínity yi huidibi xymidzo'ydünibich yi n'ayucich ndiy'ajtích ma yi pocyjāydijc yhuinduu huidibi tzinaayb cham ma jada naaxhuiñybi. Pues nañ jadu'n ñich, je jāy huidibi tzoon tzajpjoty, nmidzo'ydünibich yi jadu'mbi jāy co ñich anajty nhuimbity ya naaxhuiñybi müd ñich nDeedy, je Dios Teedy, ymic'ajt y'oy'ajt etz müd tüg'óciy yi may'áñeles ajcxy tudägypi.

9

¹ Jadu'n Jesús yjacminañ:

—Janch tiy'ajt jadu'n nej ñich miich ajcxy cham ñimāy, co ñijējity miich ajcxy huidibi cham ma ñich nhuinduu, ca' m'ōgaangixy, ixti cooni ajcxy jayijp m'ixipy je Dios y'ané'min etz ymic'ajt.

Co Jesús ñinǝcx yajtigajch

² Co tuctujc xii naxy, chi Jesús müd tzoon Pedro, Santiago etz Juan, e müdpa'ttigüy ma tüg mijcop ma tüg it ooy ycixity. E jim copcixy Jesús ñinǝcx naygojtigajtzní ma Pedro ajcxy yhuinduu. ³ Chi Jesús yhuít oy y'ahuimbity janch poob, e janch adicxp. E ni pin jadu'n yhuít cayajhuäch janch poob jadu'n nej je' anajty yhuít müdity. ⁴ E chi oy nayguēxigüyíi ma ajcxy yhuinduu Elías etz Moisés. Elías etz Moisés miydacp anajty ajcxy müd Jesús. ⁵ Huin'it Pedro ñimay Jesús:

—Huindzin, janch oy jadu'n co ñich nyáajity. N'occojyich ajcxy tugüg tijcquemy: tüg miich mje'; tüg Moisés yje'; etz tüg Elías yje'.

⁶ Com Pedro, Jacobo etz Juan ooy anajty chigüygixy, paady Pedro ca' anajty nejhuüy ti ycapxyp. ⁷ Tim huin'itiy tüg joc yajñidigoy je' ajcxy, e midooy ajcxy ayuc jocjoty, e je ayuc yminañ:

—Jada je' ñich n'ung, huidibi ooy ndzocyich. Mido'mbic miich ajcxy Jesús y'ayuc.

⁸ E tim huin'itiy Pedro, Jacobo etz Juan ajcxy yujc'ijxy, e yja'ixxhuuidijty ajcxy, e ca' ni pin ma ocjac'ixxni, jēda'ajty Jesús naydügajc.

⁹⁻¹⁰ Ti anajty choongixy copcixy, e cidacp anajty ajcxy, co Jesús ñimay Pedro, Jacobo etz Juan, co ca' huaad yajmüdmidydaaccixy pinjaty huidibi ajcxy anajty ti iǝxcixy, ixti cooni ñich, je jāy huidibi tzoon tzajpjoty, n'ōgibich etz njugypigipiyich jadüg'oc. Pedro, Jacobo, etz Juan ca' yjacmiydägy müd jacinjaty huidibi anajty ti iǝxcixy. Per ooy ajcxy huinmay etz naymüdmidydaaccixy miñ xyjpy ti Jesús ytiijamy co yminañ: “N'ōgibich etz njugypigipiyich jadüg'oc.” ¹¹ Huin'it ajcxy Jesús y'amidooy:

—¿Na'amy co yi escribas ymina'ñ co yi Elías huidibi chinay jecy'ajty jayijp miina'ñ ca'ydi je Cristo?

¹² Chi Jesús y'adzooy:

—Tiy'ajt jadu'n co miñ jaybety ma Dios ñecy jecy'ajty co Elías yhuimbidity jacyajijp ca'ydi je Cristo, e yaj'oyiydähuipy huinjemybi tüg'óciy müd Dios ycixpi. E nañ tiy'ajt jadu'n co jaybety ymiñ ma Dios ñecy co je Cristo, je jāy huidib tzoon tzajpjoty, yajnaxa'ñ ayo'n etz tzaachpyi etz mayjāy ca' y'ixa'ñibiy. ¹³ ñich miich ajcxy ñimaayb co je Elías ti je' yhuimbity

ya naaxhuiñ, e je mayjäy ti túngixy müd Elías nej anajty tím tzójcixy. E cuyduñ ajcxy nej jaybety müñ ma Dios ñecy müd Elías ycíxpi.

Jesús yajtzögy tüg mutz'anäg huidibi ca'oybi müd

¹⁴ Co Jesús, Pedro, Jacobo etz Juan yhuimbity ma je jacjadyii Jesús ydiscípulos ajcxy anajty ti yhuim'ny, chi ajcxy ijxy mayjäy jühuidity ma Jesús ydiscípulos ajcxy. Etz ijxy ajcxy nijëjty escribas huidibi ayuc tzachyajtzibüyb müd Jesús ydiscípulos ajcxy. ¹⁵ E co je mayjäy ijxcixy nejhuiyigixy co Jesús ti yhuimbity anajty, chi mic'amy ajcxy ninicxy Jesús poyigy, e capxpooxcixy, e may je' ajcxy ooy jihuuy huinmay. ¹⁶ Chi Jesús y'amidooy je mayjäy, ñimay:

—¿Ti ayuc müch ajcxy mdzachyajyomyb müd ñich ndiscípulos ajcxy?

¹⁷ Chi nidüg je jäy ajcxy y'adzooy:

—Huindzin, ti nmüdmüñ ñich nmang huidibi ymüd ca'oybi, e je ca'oybi ti yaj'umäy. ¹⁸ E janam jadzojc je ca'oybi yajyachyüi yajquidyüi ñich nmang, e oy cäy naaxcixy, e ooy y'aa'opy ypidzimy, e nañ jadu'n oy ytütz queety etz ñinicx janch ögy yhuim'ny. Ti nbijctzoyich may'ajt müd müch mdiscípulos ajcxy co huen yajpidzimigixy je ca'oybi ma ñich nmang, e ca' ajcxy ymadacy nicxy yajpidzimigixy.

¹⁹ Jesús ñimay je mayjäy:

—Müch ajcxy huidibi jugy'ajtp jadachambi xü tiempo huidibi ca' mijpidägy Dios y'ayuc, ¿naag xü naag po' ñich njac-huim'ny müch müch ajcxy? ¿Naag xü naag po' n'ocmíecxtuguyich müch ajcxy? Müdmiñ yi nmang ya ma ñich nhuinduu.

²⁰ Chi ajcxy müdmiñ je pa'mjäy ma Jesús yhuinduu. E co je ca'oybi ijxpaady Jesús, chi mic'amy yajyajch yajquidy je pa'mjäy, e chi oy ciday naaxcixy, e ooy yajch yquidy, yajpidzimy ooy y'aa'opy ma y'ahuac. ²¹⁻²² Jesús y'amidooy je pa'mjäy yteedy:

—¿Minaag jimijt cujc yöy maabi nmang ypa'mbety?

Chi je ungdeedy y'adzooy:

—Ma'xung anajty co pa'mbedyüi. Canaag'oc je ca'oybi yajyachyüi yajquidyüi ñich nmang, ixti ti oy ycgodahuüy jinioty etz nijoty. Je ca'oybi canaag'oc jayaj'ögy ñich nmang. Pen müch müd tzöc'ajt mic'ajt jaydëb xypubedipyich, tun may'ajt pa'ayoogich etz pubejtcich.

²³ Chi Jesús y'adzooy ñimay je pa'mjäy yteedy:

—Pen müch mibijcpi, ca' ti chipity ma pin mibijcp.

²⁴ Mic'amy je pa'mjäy yteedy mic ycapxy yminañ:

—Nmibijcyich, pubéjtcich nej huaad jacmij nmibijcyich.

²⁵ E co Jesús ijxy co ñigi mayjäy chach ymiñ poyigy ma yi', chi ix'oy je ca'oybi, e yminañ:

—Müch ca'oybi huidibi ti yajhuim'ny jada pi'c'anäg uum etz nat, ñich müch yam n'ane'myb: “Pidzim ma yi pa'mjäy, e ca' mjectigihuipy ma yi' yjot yhuinma'ñ jadüg'oc.”

²⁶ Jayijp je ca'oybi yaaxqueecy janch mic, yajyajch yajquidy je pa'mjäy. Co jadu'n tuñ, chi ypidzimy. Je pa'mjäy oy ñinicx yhuim'ny nej jihuüy ti y'o'cni. Je mayjäy huidibi anajty ajcxy jim huindicxp yminaangixy:

—Ti ayooob y'ögy.

²⁷ Chi Jesús majtz je pa'mjäy yci', e yajpidägy e huin'it je pa'mjäy ytinayigy mic oy.

²⁸ Co Jesús ytiigüy ma tüg tijc, chi je' ydiscípulos ajcxy y'amidou ameech, minañ ajcxy:

—¿Na'amy co ñich ajcxy ca' ti nmadägyich nej nyajpidzimip ñich ajcxy yi ca'oybi?

²⁹ Chi Jesús y'adzooy:

—Yijüibi ca'oybi ca' yi' huaad ypidzimy jadu'ñyi. Hue' janchtiy copicy mibijctzou Dios mictägy, e huin'it ypidzimipy je ca'oybi ma je pa'mjäy. Ca' jac ni nej huaad ypidzimy yi jadu'mbi ca'oybi, jëyi co Dios nmibijctzoohuim n'ijtim ayuu.

Jesús capxpídzimnip jadüg'oc co y'öga'ñ

³⁰ Chi Jesús müd yi' ydiscípulos ajcxy choñ ma je jimbi it, e yajyöyñajxtay ajcxy Galilea naaxjot. Jesús ca' anajty tzozy co je mayjäy ñejhuim'ny ma yi' ñicxy. ³¹ Com Jesús hue' anajty yaj'ixpicy yi' ydiscípulos ajcxy, co ooy ycopícyity co yi' jäy huidibi tzoon tzajpjoty, yajciyegipy ma yi ymidzip, etz yaj'ögiy, e co anajty ti y'ögy codugüig xü jadüg'oc yjugypigipy. ³² Jesús ydiscípulos ajcxy ca' huinjihuüy anajty Jesús y'ayuc, e nañ jadu'n tzigüyb anajty ajcxy co Jesús yaj'öjip, paady ca' ajcxy amidoy nej huimbizimy yijüibi ayuc.

¿Pin je' ñigi jacmijip?

³³ E Jesús müd ydiscípulos ajcxy oyjäty jim Capernaum. Co ajcxy ytijctigüy, chi Jesús yaj'amidou ydiscípulos ajcxy, ñimay:

—¿Ti ayuc müch ajcxy naymüdmíydäacigixy jim ma anajty mdüyöygixy?

³⁴ Per amonday ajcxy, com jëgixpi co anajty ajcxy ooy ti ñaymüdmíydäacigixy tüyöyjoty co pin jada' ajcxy nidügti ocjaccopícyip. ³⁵ Huin'it Jesús y'ixtacy, e chi mijhuoy je nimajmetzpi ydiscípulos ajcxy, chi ajcxy ñimay:

—Pin naysajnaanaanip mij, huen ity nej jihuŷy ca' ytiijity e huen capxmidooy ymīgūtjic.

³⁶ Chi Jesús tzenīgý түг pi'c'anäg, e chi pidacy cujc'amy ma yi' ydiscipulos ajcxy. Chi tzenīgý jadüg'oc, e nimay ajcxy:

³⁷ —Pin cöbije tügpajc pi'c'anäg jadu'n nej jada pi'c'anäg müd iich nxii ycixpi, iich yi' anajty ti xycöbicyich, e pin iich xycöbijejich, ca nan iich anajty naydügpajc ti xycöbijejich, nañ jadu'n anajty ti cöbicy huidi ti xyquejich.

Pin iich ajt xycamidzip'ájtín, iich ajt je' müd y'ity

³⁸ Juan Jesús nimay:

—Huindzin, ti iich ajcxy n'ijxpaady түг jäy co ca'oybi yajpidzimy müd müich mxii, e ti ngapx'aducyich müd co ca' yi' iich ajt xypahuidjtim.

³⁹ Per Jesús yminañ:

—Ca' mgapx'adugipy yi jadu'mbi jäy, com huenpínity huidibi mijhuinma'ñ tumb müd iich nxii, ca' yi' jibic xynigapxich. ⁴⁰ Com yi huidibi ajt ca' xymidzip'ájtín, yi' yi' müd iich ajt nbidzimim. ⁴¹ Janch janch iich müich ajcxy jadu'n nimäy co huenpinjäy huidibi ixypiy müich ajcxy xyajniñ'uucp түг vazo nñ müd co müich ajcxy ti mmijnicxpety je Cristo, yi jadu'mbi jäy ypadamy yi' y'oy'ájtín ma Dios.

Je huidibi ooy ycojotmáity co nicxy nbocycähuim

⁴² Huenpínity huidibi jibic-huinma'ñ mibidzimb, e yajpocycäy yi jadu'mbi pi'ctijc huidibi ajcxy xymijnicxpejtich, jac'oy ixypiy co yi jadu'mbi jäy ytimyñayajyöcxodziyii түг paandzaa etz ñayñajtzjibibihuiyb mejyoty. ⁴³ Pen müich mgi' xyajtundigoyamb jac'oy co mdim'ixpuxipy, com jac'oy co mdigihuipy ma yi jugy'ájtín huinixiibi ciduc, ca'ydí co Dios xypidägp müd metz mgi' jibiy jünjoty ca'oydactuuby, ma yi jün ni camina ycapich. ⁴⁴ Jibiy ca'oydactuuby yi ucxyting ca' y'ögy etz ni jün ycapich nicaminaaxii. ⁴⁵ E pen müich yi mdecy xyajpocycähuamb, ixpux, com jac'oy co mdigihuip ma yi jugy'ájtín huinixiibi tectyuc ca'ydí co mdigihuip müd metz mdecy jibiy ca'oydactuuby, ma yi jün ni camina ycapich. ⁴⁶ Jibiy ca'oydactuuby yi ucxyting ca' y'ögy etz ni jün ycapich ni caminaxii. ⁴⁷ E pen yi mhuiin түг xyajpocycähuamb, tim yajpidzim, jac'oy yi' co mdigihuip ma yi Dios y'ane'mdac müd tügpajc mhuiin, ca'ydí co mdigihuip ca'oydactuuby müd metz mhuiin. ⁴⁸ Ma yi ucxyting ni caminaxii yca'ögy etz yi jün ni caminaxii ycapich, ⁴⁹ e ma nidüg'öciy ñi'cägooda'ñ jün xut jün ye'n tim jadu'n nej jäy tzüch caan xiducy. ⁵⁰ Yi caan ooy yi' y'öyity, pen ymüd xücx'ájtín. Co je caan ytigoy yxücx'ájtín, ca' ji ni ti huidibi jeb müd nyajxücxüim. Müd'ájtix iich n'ayuc ma mjot mhuiinma'ñ, jadu'n iich n'ayuc nipaady nej caan, e tzina' müich ajcxy jotcuje müd mmigügtjic nidüg nidüg.

10

Jesús yaj'ixpicy müd co jäy ytöxyijc ixmach

¹ Chi Jesús choon jim Capernaum, nicxy jim Judea ñaaxjot ma je it lugar Jordán mijñii ninaxy xii ypidzimy'amy. E mayjäy ooy ñayyöymujci ma Jesús anajty yajpaady. E Jesús yaj'ixpicy je mayjäy jadu'n nej anajty yaj'ixpicy'adyii. ² Chi nijējity fariseos ajcxy ñicxy ma Jesús anajty yajpaady. Hue' ajcxy yhuinma'ñ pidaaccxy co anajty Jesús tzu'ixaangixy. Chi ajcxy y'amidooy, pen huaad түг yēdyjc ixmach ytöxyijc. ³ Chi Jesús y'adzooy, yminañ:

—¿Nej Moisés ymina'ñ ma yi' ycötújin ñecy?

⁴ Chi je fariseos ajcxy Jesús y'adzooy:

—Moisés cötújin yecy co түг yēdyjc jeb huaad ixmach ytöxyijc, e möhuipy ñinecy ñidiy'ajt co nej ñay'ixmájtzigixy, e jadu'n anajty ti y'oyiy nej jeb yi' ytöxyijc ixmach.

⁵ Chi Jesús yminañ:

—Moisés cojaay jada ycötújin müd müich ajcxy ycixpi, co ooy müich ajcxy mdzach-capxycömidodaaccxy ca' mgapxymidohuaangixy Dios. ⁶ Per co je naaxhuiñybi chondacy, co Dios oga'n yajcojy түг'öciy tijaty huidi ji'ajtp, chi Dios yajcojy yēdyjc etz töxyjäy. ⁷ E je yēdyjc ixmadzipy ytaj yteedy etz pudigihuipy yi ytöxyijc. ⁸ E je yēdyjc etz ytöxyijc tü'ciy idaangixy. Paady je yēdyjc tügmucy yajpaady müd ytöxyijc. ⁹ Com yi huidibi Dios ti huijtmucy, ca' ni pin huaad huijtzhuägy.

¹⁰ Co Jesús müd ydiscipulos ajcxy yhuimbijt ma anajty ti yjättáccxy, chi Jesús ydiscipulos ajcxy yajtihuimbjtcxy je ayuc huidibi anajty ti yaj'ixpicy ma je pijcin. ¹¹ Chi Jesús yminañ:

—Je yēdyjc huidibi ti ixmach yi ytöxyijc, e picy müd huingbi, hue' yi' anajty ymidundigooyb yi ytöxyijc huidibi müd jayijp ypijcy. ¹² Nañ tim jadu'n co түг töxyjäy ixmach je yēdyjc huidibi müd ti ypicj jayijp, e ypijctigach müd huingbi yēdyjc, hue' ymidundigooyb je yēdyjc huidibi müd ti ypicj jayijp.

Jesús conucxy pi'ctijc

¹³ Je huin'it tiempo jāy ajcxy müd miñ pi'ctijc ma Jesús, jaydëb cñixajy etz conuucxip. Co Jesús ydiscipulos ajcxy jadu'n ixy co jāy ajcxy nimijhuägy Jesús müd ajcxy ypi'c'ung, chi je' ydiscipulos ajcxy ix'o'y je jāy ajcxy. ¹⁴ Co Jesús jadu'n ixy nejhuüy nej yi' ydiscipulos ajcxy y'idich, chi o'y ajcxy, yminañ:

—Ooy y'óyity co je pi'ctijc ajcxy xyñimijhuägyich, ca' miich ajcxy mgapx'aducy. Com yi jāy ajcxy huidibi yajpatp ma Dios y'ané'min, jadu'n ajcxy nipaady nej pi'ctijc. ¹⁵ Janch iich miich ajcxy nimäy co pinjaty huidibi ca' cöbiga'n Dios y'ané'min, jadu'n nej pi'ctijc cöbójccixy Dios y'ané'min, hue' yi jadu'mbi jāy ajcxy ca' ytigihua'n ma yi Dios y'it lugar.

¹⁶ Chi Jesús aminenmujctay je pi'ctijc ajcxy, e chi cñixajy etz conuucxcixy.

Tüg mutz'anäg comeefñybi ymüydügy müd Jesús

¹⁷ Co Jesús chooñ jadüg'oc, chi ñimiñi poyigy tüg yëydijc, ycojxtinay'ahuüy ma Jesús yhuinduu, e yminañ:

—Miich, oybi Huindzin, çti huaad ndunipyich jigix jëbi nbadiipyich jugy'ájtin huidibi ca' ycixipy ytigoyipy?

¹⁸ Chi Jesús yminañ:

—çNa'amy co xyñimäyich co oy huindzin iich? Dios tügpajc óyip, ca' jac ni pin. ¹⁹ Miich mnejhuüy Dios ycötújcín huidibi jadu'n minaam: “Ca' mmigapxtigoyip töxyjäydijc; ca' mjäyyaj'ögipy; ca' mmeedzip; ca' m'undaacip; ca' pin mhuin'ünip; etz myajmjadip mdaj mdeedy.”

²⁰ Chi je jāy Jesús nimay:

—Huindzin, ti nguyndundäyich jadayaab cötújcín ajcxy maabi iich nbi'c'atyich.

²¹ Chi Jesús huindixpejty je yëydijc müd tzójcín jihuüyin, e chi nimay:

—Per jactigoy'ijtni jadügnax. Nicx toog tüg'óciy huidijaty miich mmüd, etz mo' yi ayoohtijc. Co jadu'n mdunipy, chi mbaadipy oy'ájtin jüby tzajpjoty. Co jadu'n mdooctahuipy tijaty miich müd, chi minip jadüg'oc ma nyaajpaadyich, e xypanícxibich, e mnaybidägüib cixiyot huinjot oy nej mdimyjadipy müd iich ycixpi.

²² Co jadu'n je yëydijc midoy nej anajty Jesús ti ñimäyii, chi yhu'i'my taj may e co ñicxni, chi ooy ytajy ymay, com hue' je' anajty ooy ycomeefñity.

²³ Co Jesús jadu'n ixy co je comeefñybi taj may yhuimbijtni, chi huindixpejty je' ydiscipulos ajcxy huidibi tinaayb jühuidity ma yi', e yminañ:

—Ooy chachtzipity co tüg comeefñybi ytigihuiipy ma Dios y'it lugar.

²⁴ Jesús ydiscipulos ajcxy ooy tzachhuinmay'ahuidity müd jada ayuc nej Jesús anajty ti yminañ. Paady Jesús yjacminañ jadüg'oc:

—Miich ajcxy migügtijc huidibi ooy ndzocyich, ooy chachtzipity co ytigihuiip ma Dios y'ané'mdac tüg comeefñybi huidibi tzachnijot'ajt ycomeefñ'adii. ²⁵ Nigi chipity co tüg comeefñ ytigihuiip ma Dios y'ané'my, ca'ydi co tüg camello ñaxipy ma tüg xu'n'ijx yxútity.

²⁶ Co jadu'n ajcxy midoy nej Jesús yminañ, chi ooy ajcxy yhuinmay'ahuidijty, e nayñimäyigixy miñ xyipy:

—Pen janch tiy'ajt jadu'n, çpinjäy jada' huaad jëb y'alma ñdzögipy?

²⁷ Je huidibi jāy ajcxy ca' ni minaxii huaad ca' yaj'oyi, Dios yi' yaj'oyihuiip, com müd Dios ca' yi' ni ti chipity.

²⁸ Chi Pedro yminañ:

—Huindzin, occuendun, iich ajcxy ti n'ixmajtzätäyich tüg'óciy tijaty anajty nmüdich, e iich ajcxy nbanicxpich miich.

²⁹⁻³⁰ Chi Jesús y'adzooy, minañ:

—Janch tiy'ajt nej iich miich ajcxy nimäy co huenpínity huidibi müd iich ycixpi ti ixmach ytiyc, ti ixmach y'uch ymügü ajcxy etz ytaj yteedy, etz ytöxyijc, etz y'ung ajcxy, etz nañ jadu'n ti ixmach ycam iich ycixpi, etz iich n'ayucich etz müd Dios ytiy'ajt ycixpi, yi' ypadamy nigi oy'ájtin ya naaxhuiñ, ixti ypadamy migo'px jadu'ñyi ytiyc ajcxy, y'uch ajcxy, ytaj ajcxy, y'ung ajcxy, etz ypadamy nigi ymij cam, müd tzaachypí müd ayo'n müd iich n'ayuc ycixpi. Etz nañ jadu'n ma je xii tiempo huidibi mimb cidacpi ypadamy jugy'ájtin huidibi ca' ycixipy ytigoyipy. ³¹ Ji yajpaady ya naaxhuiñ nijëjity jāy huidibi cömay ijtp, e co yjaty ajcxy tzajpjoty, chi ca' ajcxy cömay ida'ñ. Nañ jadu'n ji yajpaady ya naaxhuiñ nijëjity huidibi ca' cömay y'ity, e co ajcxy yjadipy tzajpjoty, chi jüby ajcxy cömay y'idipy.

Jadüg'oc Jesús capxpídzimnip co y'öga'n

³² Jesús müd ydiscipulos tüyöyp anajty ajcxy, hue' anajty ypättigüygixy jim Jerusalén. Jesús jayijp anajty ñicxy, e je' ydiscipulos ajcxy etz nañ jadu'n mayjäy panicxy anajty ajcxy Jesús. Je Jesús ydiscipulos ajcxy ooy chachhuinmay'ahuidijtcixy, e jacjadyii jāy huidibi anajty ypanicxy Jesús ooy ajcxy chigüygixy. Chi Jesús huodzooñ abicy je majmetzpi ajcxy, e

yajmüdmıydaçay je' ajcxy jadu'n nej ytuna'ñıy jıada'ñıy jım Jerusalén co anajty ajcxy jım yja'tcixy. ³³ Jesús je nımaımetzpi nımay:

—Miich ajcxy m'ıjıpy mnejhuıyb co nńıcxım cham jım Jerusalén. E jım Jerusalén, ııch je jáy hıdıbı tzoön tzejptoty, nyajcýyega'ńıch mach ma yı Teedy mıjtungmıdpi, etz ma yı escribas ajcxy. E chí ajcxy ane'mın pıdága'ńı co huen xyaj'ócıxıch. Nań jadu'n xycýyegaangıxıch mach ma yı' ajcxy hıdıbı ca' yjudiojáyıtı. ³⁴ Yı' ajcxy xyńıxıgıpy xyajxıgıbyıch, xyhuobıpyıch ajcxy mıd coochac, xyhuındzuj xyjıptzújıbıch ajcxy, e xyaj'ögıbıch ajcxy. Codugıg xıı maabı anajty xyaj'öccıxıyıch, chí njugypıgıpyıch jadüg'oc.

Jacobo etz Juan pijctzóogıxy tüg may'ajt

³⁵ Huın'ıt Jacobo etz Juan, yı Zebedeo ajcxy ymang, nımiıhuägıy Jesús, nımay:

—Huındzın, ndzocpyıch ajcxy co mdunıpy may'ajt jadu'n nej yam nımaaygıxy.

³⁶ E Jesús ymınań:

—¿Tı mdzocpy co ndunıpıch mıd miich ajcxy ycıxpi?

³⁷ Chí ajcxy ymınań:

—Tun may'ajt co anajty mbaady yı m'ané'mın etz m'oy'ájtın, xymöhuıbıch yı mıj tung ma m'ané'mın jaydéb n'ıñáhuıbıch ma miich mmıjc. Nıdúgtı ııch ajcxy n'ıñáhuıpy a'oy'amy ma miich etz jadüg anajty'amy.

³⁸ Chí Jesús nımay Jacobo etz Juan:

—Ca' miich ajcxy mnejhuıy tı tı mbıjctzóogıxy. ¿Nej myajıaxamyb miich ajcxy je tzaachypı ayo'n hıdıbı nyajıaxaamybıch, jadu'n nej jıhuıy m'üga'ńı ajcxy ııch n'ügy e mbaada'ńı ajcxy ııch nńıbétın?

³⁹ Jacobo etz Juan y'adzooy:

—ııch ajcxy nımıadágıbıch mıaxıpyıch nyajıaxıpyıch ajcxy yı tzaachypı hıdıbı mınıaxamyb myajıaxamyb.

Chı Jesús ymınań:

—Janch tıy'ajt jadu'n nej miich ajcxy mına'ńı co mınıaxaangıxy myajıaxaangıxy yı tzaachypı jadu'n nej ııch nımıaxaamyıch nyajıaxaamyıch yı tzaachypı, tım jadu'n nej jıhuıy m'ügaangıxy ııch n'ügy, e mbadaangıxy ııch nńıbétın. ⁴⁰ Per ca' ııch cötújın nımıdıyıch co ııch miich ajcxy nıdágıpy tungmıd, co myajpaadıp tüg ma ııch nımıc a'oy'amy, e jadüg anajty'amy. Hue' janchtıy Dios Teedy ymıd nı'ıxı' pınjaty tı huın'ıxy jaydéb yajńıcxpı je mıjtung ma ııch n'ané'mın.

⁴¹ Co je jacjadyıı Jesús ydıscıpus ajcxy nejhuıy jadu'n nej Jacobo etz Juan may'ajt pijctzoy ma Jesús, chí ajcxy ooy mıjotmáty Jacobo etz Juan. ⁴² Per Jesús huomıń yı jacjadyıı ydıscıpus ajcxy, e ymınań:

—Jadu'n nej miich ajcxy mnejhuıygıxy, yı jáy ajcxy hıdıbı mıjtungmıd ma je maybı naax cajp, mıc ajcxy ane'mıy je naax cajp. Nań jadu'n yı' ajcxy hıdıbı mıc'ajt mıd ma je maybı naax cajp, mıc ajcxy ane'mıy je jáy ajcxy. ⁴³ Per miich ajcxy ca' mıjadú'ńıty nej mıjtungmıdpi ma je maybı naax cajp. Pınjaty ma miich ajcxy mıjtung yajńıcxamb, copıcy ńaybıdágıyb nej tüg tumbı. ⁴⁴ Pınjaty miich ajcxy hıdıbı ńıgoıuajc'ajtp, copıcy ńaybıdágıyb nej tüg tumbı. ⁴⁵ Com ııch nań jadu'n, je jáy hıdıbı tzoön tzejptoty, tı nımııńıch ya naaxıhuıń jaydéb nbubedıpyıch yı mayjáy ajcxy, e ca' nan yı mayjáy ııch xypubedıpy. Tı nımııńıch jaydéb nyegıpyıch njugı'ájtın ma yı o'cın. E co jadu'n nyegıpyıch njugı'ájtın ma yı o'cın, chí ńıgoıua'na'ńıch yı jáy ajcxy y'alma.

Jesús yajtzögy Bartımeo hıdı anajty huıntzıp

⁴⁶ Chí oy játy Jesús mıd ydıscıpus ajcxy jım Jericó. E co Jesús tzoön Jericó ytúbıjcy jadüg'oc, chí yı' ydıscıpus ajcxy etz janch mayjáy ńıcxıxy anajty mıd Jesús. Co ajcxy ycajp padzımy, chí túbı'ay anajty yajpaady tüg huıntzıpı hıdıbı lımosna anajty ypijctzooyb jabom jabom. Hue' anajty yxıı Bartımeo, e Tımeo anajty xıjıty yı' yteedy. ⁴⁷ Co Bartımeo nejhuıy co Jesús je Nazaretpı najxp anajty ma je tü'aa, chí mıc yaaxqueegy ymınań:

—Jesús, David y'ap y'oc, tun may'ajt ııch pa'ayoog.

⁴⁸ Chí je mayjáy ajcxy ojy je huıntzıpı, nımay ajcxy co huen amoń. Per je huıntzıpı ńıgı ymınan'ıdıch:

—Miich, David y'ap y'oc, tun may'ajt ııch pa'ayoog.

⁴⁹ Chí Jesús ytinayxıpy, e ymınań:

—Huomııngıx yı huıntzıpı.

Chı je jáy ajcxy oy yajtzoogıxy je huıntzıpı, nımaaygıxy:

—Jotcugı', e pıdıg, com Jesús xyaxtzoob.

⁵⁰ Chí mıc'amy je huıntzıpı, najtz'oxıy je ńıbe'ńı, chí ypıdıgy, e nıńıcxıy Jesús. ⁵¹ Chí Jesús je huıntzıpı y'amıdooy:

—¿Tı mdzocpy ndunıpyıch mıd miich ycıxpi?

Chi je huintzpi yminañ:

—Huindzin, ndzójcypich co xyajhuindicxigibich.

⁵² Chi Jesús je huintzpi nimay:

—Jëb mñicxy ma mdijc. Com ti xymibicyich, paady ti mhuindicxigy.

Tim huin'it je huintzpi yhuin'oyi, e yhuindicxigy, e panicxy Jesús co ytübijcy jadüg'oc.

11

Jesús ytigy jim Jerusalén

¹ Co Jesús etz je mayjäy oyjá'tcixy huington ma je Jerusalén cajp ma yajpaady mejtz mutz cajp huidi xiijipy Betfagé etz Betania, huington ma je cop huidibi xiijip Olivos, chi Jesús quejxy metz ydiscípulos huen ñicxy jayijp. ² Jesús nimay je metzpi ydiscípulos:

—Ñicx miich ajcxy ma yijimbi cajp huingtonbi. Co jim mjädipy, chi mic'amy mbaadip tüg burro ycoxóchity huidibi ca' pin yaj'iñayñi chambaad. Coguejtuutcix je burro e yajmiingix ya ma iich. ³ Pen jim pinjaty xy'amidoogixy: “¿Na'amy co mmidzonaangixy yi burro?” Chi miich ajcxy mñimähuipy: “Je Huindzin (Jesús) yajtunamyb tzojc, e yajhuimbidady mic'amy.”

⁴ Chi je metzpi ydiscípulos ñicxy ma je cajp huingtonbi, e oypaatcixy tüg burro ycoxóchity huington ma tüg tijc'aguu. Chi ajcxy coguejtuuty je burro.

⁵ Ycoguejtuutyp anajty ajcxy je burro co nijëjity jäy jim huington yminañ:

—¿Ti mdungixyp? ¿Na'amy co mgoguejtuutcixy yi burro?

⁶ Chi je metzpi Jesús ydiscípulos je jäy ajcxy yajmüdmidacy Jesús y'ayuc nej anajty ti ñimäy. Je jäy ajcxy yminaangixy co jëb yajñicxcixy je burro. ⁷ Mic'amy ajcxy mija'ty je burro ma Jesús yajpaady. Je Jesús ydiscípulos ajcxy jübe'ñ je burro ajcxy müd yjocxhuit, chi Jesús yaj'iñay je burro. ⁸ Mayjäy ajcxy ooy yëby yhuut tüguc ma Jesús anajty ñaxa'ñ, e jacjadyi jäy pujxy ajcxy quipy'aacx, e pidaaccixy tüguc.

⁹ Je mayjäy huidibi anajty ajcxy ñicxp jayijp etz axam ma Jesús, chi ajcxy ytigy capxp mic, yminaangixy:

—¡Hosana! ¡Gloria a Dios, ooy ycömáyity Dios! Huen capxpaady y'idipy jada yëydijc huidibi mimb müd yi nHuindzin Dios yxi etz ymic'ajt. ¹⁰ Huen capxpaady y'idipy je ané'min huidibi jada Jesús yajtzondacp cham. Jada je' je ané'min huidibi nmij'ap nmijteedy David anajty ymüd. Hosana, huen je tzajpjoty tzinaayb ajcxy iibaatcixy capxpaatcixy jada mij'ane'mbi.

¹¹ E jadu'ñyi Jesús ycajptigiy jim Jerusalén, e ytigy tigoty ma Dios ytiyc. Co huindicxay tüg'óciy tijaty jüby tzajtigoty, chi choon jüby, e ñicxy jim ma je cajp huidibi yxi Betania. Chi Jesús je majmetz ydiscípulos ajcxy müdnicxy.

Jesús capxpocy je higuery ca'pi anajty ytiim

¹² Je com jabom co ajcxy choon jim Betania, chi Jesús yuböccooti. ¹³ Chi Jesús iixpaty jigüey tüg higuery ooy anajty yco'aayity. Chi Jesús ñicxy ma je higuery yajpaady, ixa'ñ pen ymüd ytiim. Co Jesús ymech ma je higuery, chi iixy co je higuery ca' anajty ytiim müdity, jëyi müdity anajty y'aay, com ca' anajty ni tiempity mina higo ytiim'aty. ¹⁴ Chi Jesús migapxy je higuery nimay:

—Jadu'n nej tiempo yjacnicxni, ni pin cajacpaadipy higo tiim ma miich.

Chi Jesús ydiscípulos ajcxy midoy nej Jesús nimay je higuery.

Jesús quejxpidzimday ajuybi adoocpi ma Dios ytiyc

¹⁵ Co ajcxy oy yjädy jim Jerusalén, co Jesús ytigy jadüg'oc jüby ma Dios ytiyc, chi Jesús yajpidzimday je ajuybi adoocpi ajcxy jüby tzajptigoty. Chi Jesús tijhuimbijty je mesa ajcxy me je meen yajhuacxpi ytuñ ajcxy. Nañ jadu'n tijhuimbijty je jäy ajcxy iñaybejt huidibi muuxy toocp. ¹⁶ Jesús ca' anajty tzocy co pinjaty midigihuipy juydoogy ma Dios ytiyc. ¹⁷ Jesús yaj'ixpijcpy anajty je mayjäy, e yminañ:

—Ma Dios y'ayuc necy Dios jadu'n yminañ: “Íich ndijc hue' je' tzajpcapxcapxtac ma tüg'óciy jäy ajcxy choon ma nidüg'óciy naax cajp ymiingixy Dios ojadaajt”, per miich ajcxy hue' yi' mhua'ñ meetzpitijc.

¹⁸ Co ajcxy je teedy mijtungmüdpí etz je escribas nejhuñ nej anajty Jesús ti y'idích jüby ma Dios ytiyc, chi ajcxy ooy iixtaaygixy nej ajcxy jëb yaj'ögipy Jesús. Per ca' ajcxy yhuinma'ñybaady mic'amy nej yaj'ögipy, tzigüyb ajcxy müd je mayjäy com je mayjäy ooy tzachjhuñy huinmay jadu'n nej Jesús yaj'ixpijcgixy. ¹⁹ Co oycoodziñi, chi Jesús ycajppidzimy.

Je higuery ytiitzni

²⁰ Je com jabom Jesús müd ydiscípulos ajcxy najxp anajty tim jopyñi ma je higuery anajty ytinäy. E je higuery ti anajty ytiitztay mabaad ytiictz. ²¹ Huin'it Pedro jäymejtcooty nej Jesús nimay je higuery, chi Pedro Jesús nimay:

—Huindzin, ix jada higuere huidibi ixixy mgapxpoj, ti yi' y'tich.

²² Chi Jesús Pedro nimay:

—Mibic yi Dios. ²³ Janch ich miich ajcxy nimäy, co ixixy pin migapxy jada huingonbi cop, e nimäy ixixy: “Miich cop pidig, e nicx cidäg mejjyoty”, pen ca' ti mijotmetzcüy, e mibicy co jadaanip nej yi' ti ane'my je cop, chi jadu'n ytuniyb yjadiyb. ²⁴ Paady ich miich ajcxy nimäy co tüg'öciy tijaty miich ajcxy mbijctzooyb ma Dios, chi Dios xymöhuipy ajcxy huidibi ti mbijctzoogixy. Pen janch miich ajcxy mibicy co Dios ti xymoogixy ajcxy je huidibi ti mbijctzooyb. ²⁵ Co miich ajcxy mgapxtaaccixy, pen ca' oy m'ity ajcxy müd tüg jäy, huinméccix yi mmidzip tim jayijp, jigix jëbi Dios Teedy huidib jibiy tzajpjoty xyhuinmeecixp miich ajcxy ma ti mdundigoogixy. ²⁶ Pen ca' miich ajcxy mhuinmecxy yi mmidzip huidibi ti xymidundigoogixy, ca' miich ajcxy xyhuinmecxa'n Dios Teedy huidibi yajpatp tzajpjoty.

Jesús je' y'cötújin

²⁷⁻²⁸ Je huin'it tiempo Jesús müd je' ydiscípulos ajcxy yhuimbijty jim Jerusalén. E co Jesús anajty yhuidity tzajtigoty, chi nijëty huindzindijc huidibi nigohuajc'ajtp anajty je teedytjic etz escribas ajcxy huidibi nijayduutpi Dios ñecy, nimiñ ajcxy Jesús, e yminañ ajcxy:

—¿Pin cötújin ti xymöy huidibi ti mduñ ya tzajtigoty? ¿Ma cötújin ti mbaady co jëb m'ane'my ya tzajtigoty?

²⁹⁻³⁰ Chi Jesús yminañ:

—Ich miich ajcxy nañ jadu'n nyaj'amidohuamyb tüg ayuc. E pen mni'adzooyb ajcxy, huin'it ajcxy nyajnimähuipy ma ich ti nbaady yi mic'ajt etz yi cötújin, co jadu'n nduñich jibiy tigoty ma Dios ytjic. ¿Pin yajniñic Juan, je Bautista, co huen jäy yajniñibety? ¿Dios, o naaxhuñijäy? Adzoogich ajcxy.

³¹ Chi ajcxy ytiñiy huinmay'ahuidijtpi, ñayñimáayigixy miñ xyipy:

—Pen minaanim co Dios tzajpjotyti ti yajniñicy Juan, chi Jesús xyñimáayimipy: “¿Nej co ca' miich ajcxy mibijcy Juan y'ayuc?” ³² Nañ ni ca' jëbi ich ajt nminaanim co jäy ajcxy ti quejxy Juan.

Com chigüyb anajty jäy com ñejhuüy anajty ajcxy co Juan je Bautista Dios anajty yti'ajt ymüid. ³³ Chi ajcxy Jesús nimay:

—Ca' ich ajcxy nejhuüy pin ti yajniñicy Juan.

Chi Jesús yminañ:

—Ich nañ jadu'n ca' nnigapxa'ñich pin ti xycötujcmöyich co jëb nduñich huidibi ndumybich.

12

Je naymidúniptjic jibicjäybi ajcxy y'ijxpejt

¹ Je huin'it xii Jesús jacmigapxy je mayjäy müd jihuimbic ayuc, yminañ:

—Ji yajpaady tüg yëydijc huidibi camuuxy ti cojy ma ycam, e ti co'aguemy je camuuxy cam, e yaj'oyiib tugi tang ma huinmicxa'ñ je camuuxy. Nañ jadu'n je yëydijc tüg poch yajpidigy ma ycamuuxy yaj'ixihua'ñ co cuent'aty. Co anajty ti ni'ixidäy ti a'ixidäy, chi ycamuuxy cam yeycy ajuyducy ma nijëty tumbidijc. Chi choon viaje tumbi jigüey it. ² Je huin'it tiempo co yhuad'ajtni je cosechi, chi je cogam quejxy tüg ytumbi jim ma je' ycam yajpaady, co huen je tumbidijc yéccixy je cosechi, jadu'n nej anajty ti ycapxytuñ müd je' ajcxy. ³ Chi je cam tumbidijc ajcxy majch je cogam yquexyöyp, chi huinhuoipy jiphuoopy ajcxy. Chi ajcxy quejxhuimbijty jadu'ñyi, ni ti ajcxy camoy. ⁴ Chi je cogam quejxy jadüg ytumbi ma je ycam yajpaady. Chi tumbidijc ajcxy tzaagäch je mimetzpi quexyöyp etz yajtzachiy ajcxy ma ycohujc, chi ajcxy ooy oiy oyñinej. ⁵ Chi je cogam jacquejxy jadüg ytumbi e ajcxy tumbidijc yaj'o'cy je midugigpi quexyöpy. Chi je cogam jac tim quejxy jadyi ytumbi. Chi je tumbidijc ajcxy je cogam ytumbi huinhuoipy jiphuoopy nijëty, e nijëty ajcxy yaj'o'cy.

⁶ Je cogam ymüid anajty tügpaic ymang huidibi anajty ooy tzocy jihuiy. Je' oy quejxcogixiy ma je ycam yajpaady. Je cogam huinmay jadu'n co je tumbidijc ajcxy yajmij'adiyb je' ymang. ⁷ Chi je tumbidijc ajcxy ñayñimaayi miñ xyipy: “Jada yëydijc je cogam jada ymang huidibi jë'adaanip je yteedy ypidägy. Tzoc yaj'o'cim, e jadu'n je cam një'ajtim.” ⁸ E jadu'n ajcxy majch je cogam ymang yaj'ögy ajcxy. Chi ajcxy yajpidzimy camjoty, e jibijptacy agajjixci'py.

⁹ Co Jesús jadu'n miydactay je jihuimbic ayuc, chi yminañ:

—¿Ti ytunamyb je cogam müd je tumbidijc ajcxy? Hue' min ci'm ma je' ycam, e yaj'öctähuipy je tumbidijc ajcxy huidibi tundigoy. E yegipy pijctzoy je' ycam müd huingbi jäy ajcxy.

¹⁰ ¿Nej ca'ni miich ajcxy mgapxy yi Dios ñecy ma jadu'n yminañ?

Je yëdyjic huidibi je jāy ajcxy ca' anajty tzocy, Dios ti pidāgy mij'ane'mbi. Tim jadu'n nipaady nej tzaa oyjatypī huidibi je pojtzpidijc ca' ajcxy yajtuna'ñ, e je' oy ti yhui'mni ma anajty yjaccopīcyty.

¹¹ Jada tung je Huindzin Dios ti tuñ, e ooy oy n'ixim njāygidacim.

¹² E huin'it je judiojāy ajcxy ytungmūdipi ooy jamadzaañ anajty Jesús, com ñejhuiyb anajty ajcxy co Jesús ñgapxyii yī' ajcxy. Com tzigūyb anajty ajcxy mūd je mayjāy, chi ajcxy tim huinyōdyucy, chi ñicxcixni.

Yajnidūygixy pen jēbi cogūējtin yajyecy o pen ca'

¹³ Jac'axam je judiojāy ajcxy ytungmūdipi quejy ajcxy ma Jesús yajpaady mejtzpīcy ixpīcytīj. Tūgpīcy anajty ñaygomājtzīgixy mūd yī fariseos ajcxy, etz jadūgpīcy ma je rey Herodes. Hue' anajty ajcxy huinma'ñ itxaayb nej ajcxy ocxñhuiy Jesús. ¹⁴ Jada mejtzpīcypī ixpīcytījc ñicxy ajcxy ma Jesús, e yminañ ajcxy:

—Huindzin, ñich ajcxy ñejhuiyb co myaj'ixpījcy je tiy'ajt, ca' jāy mdzīgīy, com ca' huin'ixpety myaj'ixpīcy. Tú'ciy mūich mduñ mūd mic jāy, mūd comeēñjāy, etz mūd ayoob jāy. Tudāgy jāy ajcxy myaj'ixpīcy jadu'n nej huaad ajcxy cuychinaaygixy Dios ytiy'ajt. Ñejhuihuaamybich ajcxy nej mūich yaj'ixpījcy je mayjāy. ¿Nej tundigooyim mūd yī Dios ycōtūjcin co nmīgūējtīm César, je romano jāy mij'ane'mbi, o ca'ji? ¿Nej jēb nmīgūējtīm, o ca'ji?

¹⁵ Per Jesús ñejhuiyb anajty ajcxy yjibic-huinma'ñ, e chi ajcxy nimay:

—¿Na'amy co mūich ajcxy xyjot'ixy xyhuinma'ñ'ixyich? Yajmiingix tūg meeñ jigix n'oc'ixpīyich.

¹⁶ Chi ajcxy mīmūiñ tūg meeñ e co Jesús ixxy je meeñ, chi yminañ:

—¿Pīn y'ahuanax etz pīn yxūi ijtp ma jada meeñ?

Chi ajcxy y'adzooy:

—Hue' yī' César.

¹⁷ Chi Jesús yminañ:

—Mo' je César huidibi yī' yjē'ajtpy, e mo' Dios huidibi Dios yjē'ajtpy.

Chi ajcxy ooy jihuīy huinmay jadu'n nej anajty Jesús ti y'adzooy.

Yajnidūygixy pen je tūbi öccixy jugypīgīpy jadūg'oc

¹⁸ Je huin'it tiempo nijējity saduceos ajcxy ymūiñ ma Jesús. Yī saduceos ajcxy yminaangixy co ca' pīn yjugypīgā'ñ tūbi y'o'ccixy. ¹⁹ Chi je saduceos ajcxy Jesús nimay:

—Huindzin, Moisés jayhui'my je cōtūjcin co tūg yëdyjic y'ōgy, e co'ōgy yhui'my je y'tōxyijc e ca' ni y'tōxyijc ung'ixy. Pues copīcy je co'ōgy y'tōxyjāy ypigīpy mūd ña'y y'uch yëdyjīcpi jigix jēbi je tōxyjāy y'ung'ixīpy huidibi hui'mūhuip jadu'n nej codījic cobidāgy ma je yteedy y'ajch ypidāgy. ²⁰ Pues jim ma tūg cajp anajty chināy huixtūjic yëdyjic tūg que'x. Je ungoob ypijcy, e chi ix'o'cy y'tōxyijc, e ca' ni tūg y'ung yajhui'my. ²¹ Je mīmetzpi yëdyjic ypijcy mūd je co'ōgytōxyjāy, e nañ jadu'n ix'o'cy y'tōxyijc e ca' ni tūg ung yajhui'my. E nañ jadu'n je mīdugūgpī mūd ypijcy je tōxyjāy, e nañ jadu'n ix'o'cy je y'tōxyijc, e ca' ni tūg y'ung yajhui'my. ²² E jadu'n oytūñyīi yjadyīi mūd je tōxyjāy co ti anajty mūdzzīnay'abīdzīmdāy je nihiuixtūjīcpi yëdyjic tūg que'xpi. E je nihiuixtūjīcpi ix'o'cy ajcxy je tōxyjāy, e ca' ni tūg y'ung ajcxy yajhui'my. E chi je tōxyjāy oy y'ōcni. ²³ E co anajty xūi tiempo paaty, co anajty Dios yajjugypīcy yī tūbi ajcxy y'ōgy, ¿huidibi jada' ajcxy nidūcti je yëdyjic tōxyijc'adaanīp je tōxyjāy? Com ti ajcxy jadu'n nihiuixtūjīcpi mūd tznay'abīdzīmgixy.

²⁴ Chi Jesús je saduceos ajcxy nimay:

—Mūich ajcxy ca' mhuinjihuīy je tiy'ajt, com ca' mhuinjihuīygixy Dios y'ayuc ytiy'ajt, e com ni ca' mnejhuiygixy je mic'ajt huidibi Dios ymūd. ²⁵ Pues co anajty yjugypīccixy je jāy tūbi y'ō'ccixy, chi ca' ajcxy ypigā'ñ, e nañ jadu'n ni ca' ajcxy ñaymōhuiyb y'ung huen pījccixy. Hue' ajcxy yjugy'adaangixy chināhuaangixy jībby tzajpjoty, tim jadu'n nej je ángel ajcxy chinaaygixy yjugy'ajtcixy. ²⁶ Per je tiy'ajt co jāy ajcxy tūbi y'o'ccixy yjugypīgāangixy, ¿nej ca'ni mgapxyni Moisés ytiy'ajt ma anajty Dios ymīgapxyii co je aay ujtz anajty chachtoy? Chi yminañ: “Ích je' je Dios huidib Abraham, Isaac etz Jacob yDios'ajtpy.” ²⁷ Com yī Dios ca' yī' yDios'aty ma yī ōcpi ajcxy huidibi y'alma ti yicyy ti ytigoy. Yī Dios Dios'ajtp yī' ma yī juugypī ajcxy. Paady mūich ajcxy ooy mij mdundigooygixy co ca' mhuinjihuīygixy Dios ytiy'ajt.

Je ané'min huidibi ooy nūgi ycopīcyty

²⁸ Nañ jadu'n je huin'it tiempo nīmūiñ Jesús tūg escriba. E yī' anajty y'amīdo'ijtpy co Jesús adzooy je jāy huidibi ca' mībīcy co yī ōcpi yjugypīgīpy ajcxy jadūg'oc. Jada escriba ñejhuiyb co Jesús ooy oy ti y'adzooy je saduceos ajcxy, paady yī' Jesús amīdooyi:

—¿Huidibi je' Dios y'ané'min jacmījpi?

²⁹ Chi Jesús y'adzooy:

—Yi Dios ycötújcin huidibi jaccopicyip, yi' je' huidibi minamb: “Midoogix Israel jáy, je Huindzin Dios huidibi nDios'ájtím, yi' je' ajt nHuindzin Dios tūgpajcpi. ³⁰ Tzoc jihu'i' etz yajmij'at mHuindzin Dios müid tūg'óciy m'aa mjet etz müid tūg'óciy m'alma, etz müid tūg'óciy mhuinma'n, etz müid tūg'óciy nmic'ajt.” Jada je' je jaccopicyip ané'mín. ³¹ Je mímetzpi Dios ycötújcin jahueengi tū'ciy ñaybadyii müid je jayijpi, yi' huidibi jadu'n minamb: “Tzójccix jihuuyigix yi mmigügtijc tím jadu'n nej mnaychogyii mnayjihuiyii ci'm.” Jada metz Dios ycötújcin jaccopicy jacmic'ajt müid ca'ydí jac huidibi cötújcin.

³² Chi je escriba yminañ:

—Ooy oy ti m'adzooy. Janch tiy'ajt jadu'n nej miich mīna'n, co ji yajpaady tūgpajcpi Dios, e ca' ji jadūg Dios mic'ajt müidpi. ³³ E janch tiy'ajt co copicy nmijpidaacim nyajmij'ájtím Dios cixyot huinijot müid tūg'óciy ajt nhuinma'n, müid tūg'óciy ajt n'alma, etz müid tūg'óciy ajt nmic'ajt. E copicy ndzójcim njihuuyim nmigügtijc tím jadu'n nej naychójcim nayjihuiyim ci'm. Jactzoobatp jada ca'ydí co tūg'óciy yi huindzigi'n huidibi anajty yajno'cpi müid Dios ycixpi.

³⁴ Co Jesús ixxy jadu'n nej je escriba tiydudāgy anajty ti y'adzoyii, chi yminañ:

—Jahuenjaty miich mmibíjcin ytigoy'ityñi jaydēb mdigihuipy ma Dios y'ane'my.

Co Jesús anajty jadu'n ti y'adzooy je escriba, chi ca' jac pin ti ayuc yjacyaj'amidoohui.

¿Pin je y'ung je Cristo?

³⁵ Jesús yaj'ixpijcpy anajty je mayjāy jiiy ma Dios ytiyc, e yminañ:

—¿Na'amy co yi escribas ajcxy yminaangixy co Cristo hue' je' David y'ap y'oc? ³⁶ Com je Espíritu Santo ymoy David jada ayuc huidibi jaybety ma je Salmo necy ma jadu'n yminañ: Yi Huindzin Dios nimay iich nHuindzin: “Hña' ya a'oy'amy ma iich nmijc, ixti cooní anajty miich mmidzip ti nmimadactāyich, jadu'n nipaadipy nej jihu'y ti nbidāgyich miich mmidzip jadu'n nej tūg tinaybejt.”

³⁷ ¿Per nej co yjadu'nity co jāy ajcxy yminaangixy co je Cristo David je' y'ap y'oc? ¿E David ci'm yminañ co je Cristo yi' yHuindzin'ajtpy?

Jotcuyc anajty je mayjāy amidoo'ijti Jesús y'ayuc.

Jesús ca'p jāygidaci leyhuindzin ajcxy yhuinma'n

³⁸ Jesús yaj'ixpijcpy anajty je mayjāy, e yminañ:

—Naycuend'ájtigix müid yi escribas ajcxy. Com yi escribas ajcxy ooy jotcuyc co nayxójxigixy müid yhuít oyjatypi yoñjatypi. Ooy ajcxy tzocy co yajcapxpóxcixipy huindzigi'n'amy mayjāyduum. ³⁹ Yi escribas ooy ajcxy tzójccixy yi cōdumbi iñaybejt ma je naymujctac, etz ooy ajcxy tzójccixy iñaybejt ma yi cōmaybi jāy iñay ma jāy ajcxy yxīduñ.

⁴⁰ Yi escribas ajcxy yajcixjtaayipy yi co'ōgy ytoxyjāy ypidāgy müid ajcxy y'adzójcin. Yi' ajcxy ooy tūngixy jecy tzejcapxycapxii jigix ajcxy capxpaady idipy. Dios nīgi tzaachytunipy yi escribas ajcxy müid ypocy ycixpi, ca'ydí jac ni pin.

Je ayoobi tōxyjāy y'ofrendi

⁴¹ Tūg xii anajty Jesús iñay jiiy tigtoty ma Dios ytiyc. Hñaayb anajty ma je limosna caja huinduu. Jesús yhuindixcyp anajty je jāy ajcxy huidibi meēñ pidaaccixp ma je ofrenda caja. E maycomeēñjāy ooy ymeēñ pidaaccixy janch may. ⁴² Tim huin'itii yja'ty tūg co'ōgy tōxyjāy janch ayoob pidacy metz pi'c meēñyhuācxy, huidibi ca' ooy choobaady. ⁴³ Chi Jesús huoomujcy je' ydiscípulos, e nimay ajcxy:

—Janch tiy'ajt jadu'n nimaaygixy co jada co'ōgy ytoxyjāy ayoob jac'anaxy jada ti pidāgy ofrenda, ca'ydí jac ni pin. ⁴⁴ Tūg'óciy comeēñdijc ajcxy ypidacpy ma y'ofrenda yi meēñ huidibi yajconajxyp. Jadayaabi co'ōgytōxyjāy ti pidacy tūg'óciy huidibi anajty ymūd, je meēñ tūg'óciy huidibi anajty ñigayamy yi' ymooyb Dios.

Jesús yminañ co Dios ytiyc yhuindigooyipy

13

¹ Co Jesús ypidzimy ma Dios ytiyc, chi nidūgti ydiscípulos ñimay:

—Huindzin, ix jada maychaa mijjatypi etz jada maybi tijc ooy y'oy'oydūñity.

² Per Jesús y'adzooy, yminañ:

—Huindix miich ajcxy jada maybi mijjaty ytiyc. Minip tiempo mīna tūg'óciy jada tijc nicxy yhu'i'my taj xit, ca' ma tzaa macxy. Huindigoydāhuip tūg'óciy.

Je tiy'ajt ma ca'ni naaxhuñybi ycixa'ñi ytigoya'ñi

³ Jesús müid ydiscípulos ajcxy ñicxy ma je cop huidibi xiiijp Olivos. Jim ajcxy co'ixnaxy je Dios ytiyc. Hñaayb anajty Jesús jim copcixy co Pedro, Jacob, Juan etz Andrés ameech migapxy Jesús, yminaangixy:

4—Tun may'ajt ich ajcxy yajnamaayg mina jada ytuna'ñyii yjada'ñyii co huindigoydāhuip Jerusalén cajp. ¿Ti iixpejt'adam co anajty jadayaabi jadu'n ytuna'ñyii yjada'ñyii?

5 Chi Jesús y'adzooy ajcxy je' ydiscípulos yminañ:

—Ix pinjaty xyhuin'ingixy. 6 Ooy jāy may ymiinañ müd ich nxii. Ñaydijāanigixy co je' ajcxy je' je Cristo, ymina'nañ ajcxy: “Ich je' je Cristo.” E ooy jāy may huin'inaangixy.

7 Co müich ajcxy ayuc mmidohuipy co jāy chachchiptungixy xii ya, ca' mdzigüygixy, com ooy ycopicity co jada jadu'n jayijp ytunüyb yjadiyb. Ca' nan hue' je' anajty tim cijxp tim tigooyb je xii je tiempo. 8 Nayñibidigüib tüg naax cajp müd huingbi naax cajp, e gobierno müd huingbi gobierno. E minipy mic ujx canaag'it etz mij yuu mijpa'm xii ya. E jāy ajcxy ooy yhuānipy yjihuihuipy ycanaymijotucj'ajtigixipy. Jada tzaachypí ayo'n tzonacni yi' anajty.

9 Chi Jesús yjacminañ:

—Nayguend'ájtigix müich ajcxy, com yi mmidzip ajcxy xymájtzcixip, e xyciýéjccixip ma tungmüdpidjic, e xychachtungixip xyhuójcixip ma yi judíoñy ñaymujctac ajcxy. Xyajnicxcixip mach ma rey etz ma gobernador ajcxy yhuinduu müd ich ycixpi com müich ajcxy xymibicyich. E müich ajcxy tiy'ajt myegipy müd ich ycixpi, ixti ma rey ajcxy etz ma gobernador ajcxy yhuinduu. 10 Ca' anajty xii tiempo paady mina ycixa'ñ naaxhuñybi, chi ajcxy capxhuáctāhuipy ich n'ayuc huindu'myb ñaaxhuñi ma tüg'óciy naax cajp. 11 Co jāy ajcxy xyajnicxcip mach ma codungdjic co xytiyduñgixipy, chi ca' ni nej mjet'adiyb, ni ca' mhuinmayipy nej m'adzógixipy. Mgápxcixipy je ayuc huidibi Dios xymóoygixipy, com je ayuc huidibi mgápxcixip, ca' nan müich je' anajty ajcxy m'ayuc. Hue' je' je Espíritu Santo xymóoygixipy capxy ayuc. 12 Yéydjic ajcxy yciyegamyb ma tungmüdpí yci'm y'uch ajcxy co huen yaj'ógyi. E nañ jadu'n je ungdeedy yciyegamy yci'm y'ung ajcxy ma tungmüdpí. Nañ jadu'n yi' y'ung ajcxy ciyegipy yci'mdeedy co huen yaj'ógyi. 13 May naaxhuñjāy ca' xychogipy xyjihuihuipy müich ajcxy müd ich ycixpi. Pen müich ajcxy mmictinaayb ma mmibijcin, ypaadip müich ajcxy m'alma nüdzoocin.

14 Chi Jesús yjacminañ:

—Co anajty m'íxcixy je huidibi Daniel ñimiydac jecy'ajty, co pinjaty jibic-huinma'ñ tumb ma ca' ypadyyi ma Dios ytiñc, huidibi ooy ycodzigüity. Müich ajcxy huidibi tzinaayb jim Judea, co jadu'n m'íxcixipy, chi nicx mgueectzoocix ma tungop. 15 Yi jāy ajcxy huidibi yajpatp ma ytiñcixy ca' ñicxity tigoty ma ytiñc. E ni ti jüily cayajpidzimipy. 16 Yi jāy ajcxy huidibi yajpatp camjoty, ca' ajcxy nihuimbidity je' yjocxy huit huidibi ymüd. 17 Huin'it xii huin'it tiempo ayo'n pada'ñ je töxyjāy huidibi anajty ti y'ungtzimigy, e nañ jadu'n yi' ajcxy huidib müd y'ung ma'xung yajtzitp. 18 May'ajt ajcxy mbijctzoohuipy ma Dios, co jada jadu'mbi ayo'n ca' ytunüyb yjadiyb ma anajty ytiñc. 19 Yi jadu'mbi xii tiempo jāy ajcxy ayo'n tzaachypí minaxipy yajnaxipy. Ni caminaaxii jāy jadu'n tzaachypí mijcajee ti minaxy ti yajnaxy maabi Dios cojy naaxhuñybi oga'n, ixti chambaad. E caminaaxii jadüg'oc ycajadiyb jadu'n. 20 Pen ca' Dios capx'aduga'ñ yjüibi ayo'n xii ayo'n tiempo, ca' ni pin chögipy. Per Dios ycapx'adugamyb yjüibi ayo'n tiempo müd je mbijcpidjic ycixpi huidibi Dios ti huin'ixy.

21 Co yi jadu'mbi xii tiempo anajty ymiñ, ca' mmibigipy, pen ji pinjaty xyñimaaygixy: “Ijxcix, cha yajpaady je Cristo”, o “jim'amy yajpaady je Cristo.” Ca' mmibijccixipy jāy y'ayuc. 22 Minip jāy ajcxy huidibi ñayyajnañanigixy nej Cristo, e ymināangixipy co capxhuácky ajcxy Dios y'ayuc, e ca' yjānchity. Ytunipy ajcxy mij huinma'ñ etz mijpi iixpejt, ixti jahuin'inañ je mayjāy ajcxy huidibi Dios ti yhuin'ixy. 23 Nayquend'ájtigix müd yi jadu'mbi jāy ajcxy, com jayijp ich müich ajcxy yi' ti nyajmüdmüydägy.

Nej jada' je Dios y'ung yminipy jadüg'oc

24 Chi Jesús yjacminañ:

—Co anajty yi jadu'mbi ayo'n tiempo ti ñaxy, ycoodzhua'ñ etz je po' ca' y'anañ. 25 Maymadza' ycāhuip, e nañ yücxip huidijaty mic'ajt müd tzajpjoty. 26 Je huin'it xii je huin'it tiempo co jadu'n anajty ytunyii yjadiyi, huin'it ajcxy m'ixipy, ich je jāy huidibi tsoon tzajpjoty, co ich anajty nmiñich jocjoty müd tüg'óciy nmic'ajt n'oy'ajtic. 27 Co jadu'n anajty nmiñich, chi mic'amy nguexipyich ich n'áñeles ajcxy ma xii ypidzimy, ma xii ycidägy, ma jümböy ypidzimy etz ma tichpoj ypidzimy. N'áñeles ajcxy yajmuga'ñ tüg'óciy ich njāy, huidibi ti nhuin'ixyich, xim yam ma ajcxy yajpaady ya naaxhuñi, etz jüily tzajpjoty.

28 Chi Jesús yjacminañ:

—Jéb müich ajcxy tiy'ajt mbigipy ma yi higuery jadu'n nej je xii je tiempo mimb cidaacni. Co je higuery jadüg'oc ñihuamüy, chi müich ajcxy mnejhuñy co ti yhuingoni mina ypottigüñi. 29 Nañ tim jadu'n co m'ixipy tunüyb yjadiyb tüg'óciy iixpejt nej ti nnimaaygixy, chi mnejhuñhuip co ti yhuingoni je tiempo mina nhuimbiditych jadüg'oc ya naaxhuñybi. 30 Janch ich müich ajcxy nimāy co jada huidibi ti nnimiydacyich tunüib jadiñ ca'ni anajty y'óctay je jāy

ajcxý huidibi jacjuyg'ajtp jadachambi xii jadachambi tiempo. ³¹ Je tzejp etz je naaxhuiñybi cixipy tigoyipy. Ich n'ayuc huidibi ngapxyich, ca' ycixipy ytigoyipy ni caminaxii. ³² Ca' ni pin nejhuüy je xii je tiempo mina ytuna'ñyii yjada'ñyii jadu'n nej ti ich miich ajcxý nnimaagyixy. Ni je ángeles ajcxý jüby tzajpjoty ca' nejhuüyigixy, nañ ni ich, Dios y'ung', ca' nejhuüyich. Jëyi Dios Teedy tügpajc nejhuüy.

³³ Ni'ixi' ahuijcxix. Mibijctzoogix Dios jabom jabom, com ca' mnejhuüyigixy mina anajty ytuna'ñyii yjada'ñyii yi huidibi ti nyajnimaaagyixy. ³⁴ Yi xii yi tiempo huidibi minip jadu'n nipaady nej tüg comeñyñy huidibi ñicxa'ñ ma tüg it lugar huidibi jigüegy yajpatp. Jayijp ca'ni anajty chooñ, chi yajñibjcy je ytumbi ajcxý nidüg nidüg je' ytung. E nimay je' ytumbi huidibi cuend'ajtp je tijc'aguu co huen ni'ixi' y'idipy ma tijc'aguu. ³⁵ Ni'ixi' m'idipy miich ajcxý. Com ca' mnejhuüyigixy mina je codijc yhuimbida'ñ ma ytiyc, pen namgodziy, o mij coodz, o moñi, o ma anajty ti yxiimüñi. ³⁶ Ca' jécyity co yjadipy timetiini, e xyajjöybéjtcixipy anajty mdzachmaagyixy. ³⁷ Yi huidibi ich miich ajcxý ti nyajnimaaagyixy, nañ jadu'n nimäyich tüg'öciy jay co huen ajcxý nidüg'öciy ahuijcxixip ni'ixi' je xii je tiempo mina nhuimbidiñich jadüg'oc ya naaxhuiñ.

14

Xicmujccixy capxmujccixy co Jesús madzaangixy

¹ Tigoy'ijtni anajty mejtz xii co judíoñy ajcxý nixiiduna'ñ je pascua xii, mina ajcxý tzajcaagy cay huidibi ca' levadura müidity. Je judío teedy ajcxý huidibi jacmijtungmüid etz je escribas ajcxý huinma'ñ'ixtaagyixy nej jëb ameech májtcixipy Jesús, e yaj'ögaangixy, ca' ydi je mayjñy nejhuüy. ² Chi ajcxý ñayñimayi miñ xyipy:

—Ca' y'óyity co nmájtzm Jesús xiioty. Com ca' yjécyity co je mayjñy yjotmätcöttähuipy, e ytigihuiip huambi jihuiyb ajcxý.

Tüg töxyjñy pidacy aceite ma Jesús ycohuaic

³ E Jesús jim anajty yajpaady jim Betania. Hue' Jesús anajty yajpaady ma Simón ytijc, je Simón huidibi anajty ymiid nibüdz pa'm. Jesús iñaayb anajty ma caydac co ymiñ tüg töxyjñy müid tüg tzaadüdz quiiq ujtz müid perfume huidibi ooy oy yxuugy. Jada perfume ooy anajty chóohuuty. Chi je töxyjñy yaj'ahuäch je quiiq, e yajcöyogiy Jesús je perfume huidibi ooy oy yxuugy. ⁴ E nijëjity jñy ajcxý huidibi anajty jim, ca' anajty ajcxý yjotcücicy müid huidibi je töxyjñy ti tuñ, e ñayñimayi ajcxý miñ xyipy:

—¿Nej jada co ocyaj'ayooni yi perfume huidibi ooy oy yxuugy? ⁵ Jac'oy co ixipy yajtoogy yi perfume tugüq migo'px peexy, jigix yajpubedipy ayoohtijc.

E ca' jadu'n ajcxý tim jaygidacy nej je töxyjñy ytuuñ müid Jesús, chi ix'oy ajcxý je töxyjñy ayooñ.

⁶ Chi Jesús yminañ:

—Ixmajtcix jada töxyjñy. ¿Nej co m'amayigixy? Yi huidibi ti tuñ müid ich, ooy yi' y'óyity. ⁷ Je ayoohtijc ca' ytigoy'idipy ma miich ajcxý nimina. Huen huidibi xii huen huidibi tiempo jëb mbubedip ajcxý ayoohtijc. Per ich ca' n'ida'ñich ya jecy müid miich ajcxý. ⁸ Jada töxyjñy ti tuñ müid ich jadu'n nej ti ymadägy. Yi' ti pidägy ma ich nninïc perfume huidibi ooy oy yxuugy. Yi' jip'ixpy mina naaxtigihua'ñich. ⁹ Janch ich miich ajcxý nimaagyixy co huen yma'amyity ya naaxhuiñ ma anajty yaj'ihuächy yajcapxhuächy jada ayuc jada tiy'ajt huidibi nidzoocin müid, yajnimydägyipy huidi jada töxyjñy ti tuñ, jigix capxpaady y'idipy.

Judas cýecy yi Jesús ma ymidzip

¹⁰ Huin'it tiempo je Judas Iscariote, nidüg je nimajmetzpi huidibi Jesús anajty ti huin'ixy, oy müid ñaygapxyii je teedy mijtungmüidpi nej jëb cýejcy Jesús ma yi teedy ajcxý. ¹¹ Co je teedy mijtungmüidpi ajcxý jadu'n midoy, co je Judas cýega'ñ Jesús ma yi' ajcxý, chi ajcxý ooy yjotcugüy. Chi ajcxý Judas meñ yajhuinhuaniiy. Chi Judas yhuinma'ñ'ixtay nej jëb occýecy Jesús ma yi' ajcxý.

Co Jesús y'adzu'ajty pascua xiioty

¹² Chi paty je mij xii mina je xii'ajtpidijc tzajcaagy cay huidibi ca' levadura müidity, e yaj'öccixy je cöbixy huidibi ajcxý yajhuindzigüyb anajty Dios. Chi ydiscípulos ajcxý y'amidooy Jesús:

—¿Ma'amy mdzocy co ni'ixiyim je pascua xii adzu'ajtn?

¹³ Chi Jesús quejxy metz ydiscípulos ajcxý cajpjoty, chi nimay:

—Jim müid mnaybadiyb tüg yëydijc huidibi nü tzimnicxp ma tüg majt. Miich ajcxý mbanicxiyb je yëydijc. ¹⁴ Mbanicxiy ajcxý je yëydijc, ixti coon mbajädipy ma ytijc. E miich ajcxý mnimähuipy je codijc: “Je Huindzin Jesús ñejhuñhuam ma miich müidity tüg cuarto ma je Huindzin Jesús müid ydiscípulos ajcxý jëb caagyixy yi pascua xii adzu'ajtn.” ¹⁵ Je codijc

ci'm xyajni'ixi'ygixy'ip t'ug cuarto mijpi ma je mimetz piso hui'dibi ti yajni'ixi'y. Ma yijimbi cuarto miich ajcxy mni'ixihuipy yi pascua xii adzu'ajt'in.

¹⁶ Chi je metz Jesús ydiscipulos ajcxy t'uyöychoof. Co ajcxy yja'ty cajpjoty, chi ajcxy paty je cuarto, tim jadu'n nej Jesús jayijp yminañ. E jim ajcxy ni'ixi'y je pascua xii adzu'ibi.

¹⁷ Nam coodzi'ñi anajty co Jesús yja'ty ma je cuarto müd jacjadyii ydiscipulos ajcxy. ¹⁸ Co anajty jim ycaaygixy ma je caydac, chi Jesús yminañ:

—Janch iich miich ajcxy nimay co nidüg miich ajcxy hui'dibi cham caayb müd iich, xyciyegaambich ma nmidzipich.

¹⁹ Co je Jesús ydiscipulos jadu'n midooy, chi ooy ytigüy tajpi maybi ajcxy, e ñay'amidóohuigixy miñ xyipy, e t'ug yminañ:

—¿Nej iich jada'ji?

E jadüg yminañ:

—¿Nej iich jada'ji?

²⁰ Chi Jesús yminañ:

—Yi' yi' nidügi yi nimajmetzp hui'dibi tocxmujcp müd iich ma t'ugpi texy. ²¹ Pues janch iich je', je jay hui'dibi t'zoon t'zajpjoty, nbadaamybich t'zaachypí ayo'n jadu'n nej yjaybétyity ma yi Dios ñecy. Per mij ayo'n pada'ñ je jay hui'dibi xyciyegaamich ma iich nmidzip. Jac'oy co ca' ycadimma'xung'ajty jada yëdyjc.

²² Caayb ajcxy anajty, co Jesús conigy t'ug t'zajcaagy, e jayijp yajnax Dioscojuyip ma Dios, e chi tujc-huäcxy je t'zajcaagy, moy je' ydiscipulos ajcxy. E co Jesús jadu'n tuñ, chi yminañ:

—Caaygix jada t'zajcaagy. Jada t'zajcaagy iich jada nninix.

²³ Chi Jesús conigy je ügy vaso, e co Dioscojuyip yajnaxy, chi moyday ajcxy je ügy, e nidüg'óciy ajcxy uucy je ügy. ²⁴ Chi Jesús yminañ:

—Jada ügy iich nni'py'ajtpy hui'dibi temamb yogamb. Je' jada jemybi Dios ycótújcín hui'dibi Dios yejc müd jay ajcxy ycixpi. ²⁵ Janch tiy'ajt jadu'n nej iich miich ajcxy nimaaygixy, co ca' jadüg'oc n'üga'ñich vino niñ, ixti cooni anajty njädyich t'zajpjoty ma yi Dios y'ane'my.

Jesús capxpizimy co Pedro ymina'na'ñ co ca' y'ixy'adyii

²⁶ E co Jesús etz ydiscipulos ajcxy i'y t'ug himno, chi ñicxy ajcxy ma je cop hui'dibi xiijip Olivos. ²⁷ Chi Jesús yminañ:

—Cham coodz xycöguëgaambich miich ajcxy, com jaybety jadu'n ma Dios ñecy ma jadu'n yminañ: “Nyaj'ögaamybich je cöbixy cuend'ajtpi, e huin'it je cöbixy queeg-huäcxtähuip.”

²⁸ Per co iich anajty njugypicyich jadüg'oc, co iich anajty ti n'ögyich, nicxibich jim Galilea jacjayijp, ca'ydi miich ajcxy.

²⁹ Chi Pedro Jesús nimaayi:

—Oy ixipy yi jacjadyii miich mdiscipulos ajcxy xycöguetäy, per iich ca' miich ngöguëga'ñ.

³⁰ Per Jesús nimay Pedro:

—Janch tiy'ajt jadu'n nej yam nimäy, jadachambi coodz ma ca'ni anajty tzeyyaxigý mejt'oc miich xycoyüda'ñich tugig'oc, mina'na'ñ co miich ca' xy'ixy'adyiijich.

³¹ E Pedro ca' anajty cöbiga'ñ nej Jesús yminañ, chi mictägy minañ:

—Ca' iich miich ngoyüda'ñ, oy ixipy ndim'o'cich quipxy müd miich.

E nañ actim jadu'n jacjadyii Jesús ydiscipulos ajcxy yminañ nej Pedro ti yminañ.

Jesús mibijctzoy Dios jim Getsemaní

³² Jesús müd ydiscipulos ajcxy oyja'ty ma t'ug it hui'dibi xiijip Getsemaní, chi Jesús je ydiscipulos ajcxy nimay:

—ña' miich ajcxy ya, nani n'ocnicxyich jim'amy Dios mibijctzoob.

³³ Chi Jesús müd nicxy jëda'ajty Pedro, Jacobo etz Juan ma t'ug it ahuinguic. Chi Jesús ytigüy tajpi maybi jihuiy jotmay. ³⁴ Chi Jesús yminañ:

—Njihuiybich t'ug jotmay nej n'öga'ñich. Hui'mgix miich ajcxy ya etz juugy m'ijtcixipy, ca' mmäagixipy.

³⁵ Chi Jesús ñicxy jac'amijci'm, Dios mibijctzoy, e may'ajt pijctzoy co ixipy ca' minaxy yajnaxy je t'zaachypí hui'di anajty ypadamy je huin'it hora. ³⁶ E Jesús anajty Dios mibijctzoy ymina'ñ:

—Dios, müd miich ca' ni ti chípity. Píjcigich jadayaabi t'zaachypí ayo'n, per ca' yjadú'nity nej iich ndzójcín, huen tuñyii jadu'n nej miich mdzójcín.

³⁷ Co Jesús nihuimbijty Pedro, Juan, etz Jacobo, chi oy ajcxy paady ti anajty ymi'ó'ccixy. Chi Jesús Pedro nimay:

—Simón, ¿nej ti mmi'ögy? ¿Nej ca' mmadäga'ñ m'idipy juugy t'ug hora? ³⁸ Jugy'ijtcix, e mibijctzoogix Dios ca'ydi jibictuuyb mdigüygixy. Janch tiy'ajt co jotjoty ooy mnijot'ajtcixy mdunaangixy yi oybi. Per yi mninix oy amaayity.

³⁹ Chi Jesús jadüg'oc huinhuäctuuty je' ydiscipulos ajcxy, e jadüg'oc ñicxy Dios mibijctzoob. May'ajt pijctzoy tim jadu'n nej je jayijp'atypi anajty ti ymina'ñ. ⁴⁰ Chi Jesús yhuimbijty ma anajty ajcxy ydiscipulos yajpaady, e jadüg'oc oy pátcixy ti anajty ymi'öccixy, com ca' ajcxy mimadägy mähuui, e ni ca' ajcxy jayty nej adzohuipy Jesús. ⁴¹ Midugüg'oc Jesús ñicxy ma je' ydiscipulos ajcxy, e yminañ:

—¿Nej ya mjacmäägixp mjacpooxcixp? Maagix pooxcix jadachambi. Ti müd jadu'ñyi. Ti je tiempo huaad'ájni mina ñich, je jáy huidibi tzoön tzajpjoty, xyciyegipy ajcxy ma yí jibic jáydijc. ⁴² Maybidígicx, tzoc jámim. Chi ymiñ je jáy huidibi xyciyegaambich ma nmidzípich.

Mach ajcxy Jesús yajñicxixy

⁴³ Capxp anajty Jesús, co Judas oyjáty ma Jesús yajpaady. Judas hue' je' nidügti je majmetzpi huidibi Jesús yhuin'ijx. Judas müd miñ mayjáy huidibi ajcxy müd pujx etz quipy. Je teedy mijtungmüdpí, je escribas ajcxy, etz je mijjáydic ajcxy ti anajty quexy je mayjáy huidibi anajty madzamb Jesús. ⁴⁴ Judas, je huidibi anajty ciyegamb Jesús, hue' anajty jayijp ti moy je mayjáy tüg iixpejt huidibi müd jéb ajcxy ixcabip Jesús. Jadu'n jayijp Judas ycapxytuñ müd yí' ajcxy, e yminañ:

—Je jáy huidibi anajty ndüzcxypich, yí' je' anajty Jesús. Madzipy ajcxy, e myajñicxip miich ajcxy yajxon cuend'aty.

⁴⁵ Mic'amy co Judas oyjáty ma Jesús yajpaady, chi nimijhua'cy, e nimay:

—Huindzin, Huindzin.

E co jadu'n yminañ, chi Judas Jesús tzücxý. ⁴⁶ Chi mic'amy je mayjáy Jesús mach, e yajnicxy ajcxy mach.

⁴⁷ Per nidügti Jesús ydiscipulos juudy ypujxy ma ytijc, chi je teedy mijtungmüdpí tüg ytumbi yajtzaachiyi, quejtzpujxi tüg ytátzac. ⁴⁸ Chi Jesús je mayjáy nimay:

—¿Ti co miich ajcxy xyñimiñich müd pujx etz quipy, jadu'n nej jihuüy ñich tüg meetzpi?

⁴⁹ Jabom jabom nyaj'ixpijyich jáy jibby ma Dios ytijc ma miich ajcxy myajpaady, e ni ca' miich ajcxy xymajchich. Paady jadu'n ytunyí yjadyí jígix yí' yajcuydumb nej ity jaybety ma Dios ñecy.

⁵⁰ Chi je' ydiscipulos ajcxy yajhui'my Jesús naydügpajc. Chi je' ajcxy yqueegy.

Je jáy mutz'anägnip huidibi quectzög

⁵¹ Per tüg yujcyeg anäg huidibi anajty payöy Jesús nimóchity anajty müd tüg sámana. Chi Jesús ymidzip ajcxy majch je yujcyegpi. ⁵² Chi je yujcyegpi ciqueegtuty je mayjáy, yajhui'my ysábana, e yquectzögy nihuädz ixhuädz.

Jesús mij juntijoty

⁵³ Chi ajcxy yajnicxy Jesús mach ma je teedy mijtungmüdpí yajpaady. Chi mic'amy ñaymujci tüg'óciy teedy ajcxy huidibi mijtungmüdpí, e tüg'óciy mijjáydic, etz tüg'óciy escribas ajcxy. ⁵⁴ Chi Pedro jigüeg anajty panicy je mayjáy ajcxy ixti oy yajty ma je teedy mijtungmüdpí ytiba'. E jim ixtacy quipxy müd policia ajcxy agujc, yxaangixy anajty ma jünba'.

⁵⁵ Je teedy ajcxy mijtungmüdpí etz tüg'óciy je judíoáy ytungmüdpí ajcxy yhuinma'ñ'ixtaagyixy nej ajcxy jéb Jesús yajpocyca' müd ajcxy yxihuin, e jadu'n jéb mooygixy yí öcin. Per ca' ajcxy paady huinma'ñ. ⁵⁶ Mayjáy nihuambejty Jesús müd aní, e ca' ajcxy y'ayuc ytügy. ⁵⁷ Nijjéjty jáy ytinayígy juntajoty, e nihuambety ajcxy Jesús, yminaangixy:

⁵⁸ —Ích ajcxy amido'íjt Jesús y'ayuc tüg tecz, co jadu'n yminañ: “Njidaamybich jada Dios ytijc huidibi jáy ti cócixy, e codugüg xii gojtigadzípich huingbi huidibi ca' jáy cojy.”

⁵⁹ Per ni ca' ytügüy ajcxy y'ayuc nej ajcxy Jesús nihuambejty, ac tigachjaty nidüg nidüg yminañ ajcxy.

⁶⁰ Chi je teedy huidibi je jacmijtungmüdpí ytinayígy juntajoty, chi y'amidooy Jesús e nimay:

—Jesús, ¿ca' nej m'adzohua'ñyi? ¿Ca' mmidooy nej xychachxigixy?

⁶¹ Per Jesús amofi y'ijty. Ca' ti ayuc adzohuimbijty. Chi je teedy jadüg'oc migapxy Jesús nimay:

—¿Nej miich je' je Cristo, je Dios y'ung?

⁶² Chi Jesús yminañ:

—Janch jadu'n, ñich je' je Cristo, je jáy huidibi tzoön tzajpjoty, e miich ajcxy xy'ixipich ññayich ma je mijpi Dios ymijc a'oy'amy. Nañ jadu'n xy'ixipyich miich ajcxy jocjoty co anajty nhuimbityich jadüg'oc ya naaxhuíñ.

⁶³ Chi je teedy huindzech huinhuocy yci'm yhuít, je' je' tiy'átip co ca' anajty yjotcúcity müd Jesús y'ayuc, chi yminañ:

—¿Ti testigo njac-huaanim? ⁶⁴ Miich ajcxy ci'm ti mmidoogixy yí' y'ayuc, jadu'n nej ycapxtigoy müd Dios. ¿Nej miich ajcxy minaangixy?

Chi nidüg'óciy ajcxy ymínañ co janch jadu'n Jesús mij oy ti ycapxtigoy müd Dios ytiy'ajt, paady huaad mooygixy yi o'cin.

⁶⁵ Chi nijëjity jây yhuindzujëgy Jesús. Chi ajcxy huingoxodziy, cójxcixy, e chi ajcxy nimay: —Octiygapx. ¿Pin ti xycójxy?

E je policiatije ajcxy cójxy Jesús ma yhuifjijip.

Pedro ycoyüch Jesús

⁶⁶ Pedro tibây anajty y'ahuixy. Chi ñimijhuäci tüg tumbi töxyjäybí huidibí anajty tumb ma je teedy ytijc. ⁶⁷ Co je töxyjäy ijxpaty Pedro iñây anajty jünba'ây, yxaamb anajty. Chi huindicxpejty Pedro, e nimay:

—Miich nañ müdhuidijtpy anajty je Jesús yi Nazaretpi.

⁶⁸ Per Pedro ca' cöbijcy je töxyjäy y'ayuc, e ymínañ:

—Ca' n'ixy'adyijich jada Jesús. Ni ca' nhuinjihuüyich ti miich nimiydacpy.

E mic'amy Pedro ypidzimy jüby, e tim huin'itiy tüg tzeyñi'aa oy yaaxigy. ⁶⁹ Chi jadüg'oc je tumbi töxyjäybí huindicxpejty Pedro, e nimay je jây ajcxy huidibí jim yajpatp huingon, e ymínañ:

—Jada je' nidügti huidi anajty müd huidity Jesús.

⁷⁰ Chi Pedro jadüg'oc ymínañ co ca' ix'adyi. Co hueefi, je jây ajcxy jadüg'oc Pedro nimay:

—Janch co miich je' nidügti ma Jesús yjây miñ, Galileo jây miich, com nmidooybich miich m'ayuc nej Galileo jây ycápxcixy.

⁷¹ Co ajcxy jadu'n ymínañ, chi Pedro mictägy ñaygogapxi co ca' yi' müdhuidity Jesús, ymínañ:

—Dios y'ijxpy ñejhuüyb co tiy'ajt ngapxyich, co ca' n'ixy'adyijich yi Jesús huidibí miich ajcxy mnigapxyp.

⁷² Co Pedro ycapxymaayi tim huin'itiy tüg tzeyñi'aa yaaxigy mimejtz'ocpi. Huin'it Pedro jâymetzcoody nej Jesús ñimäyii: “Cham coodz jayijp ca'ni anajty tzeyñi'aa yaaxigy metz'oc, ti anajty miich mína'ñ tugüg'oc co ca' xy'ix'adyijich.” Co Pedro jadu'n jâymetzcoody Jesús y'ayuc, chi tajy may ñayjihuiyi, e ytigüy yaaxpi.

15

Jesús ma Pilato yhuinduu

¹ Co yximüy, chi je teedy ajcxy huidibí mij tung müd, je mijjäydjc, je escribas ajcxy, etz tüg'óciy judíoäy huidibí mij tung müd yöymujctay ajcxy. Chi nidüg'óciy ajcxy yajñcxcixy Jesús cixoch ma Pilato, je gobernador. ² Pilato Jesús y'amidooy, nimay:

—¿Nej miich rey'ajtp ma yi judíoäy ajcxy?

Chi Jesús ymínañ:

—Miich jadu'n minamb.

³ Je judío teedy ajcxy huidibí mijtungmüdpí mictägy tzachxigixy Jesús müd canaagnax xihuin. ⁴ Chi Pilato jadüg'oc Jesús y'amidooy, nimay:

—¿Ca' nej m'adzohua'ñi? Ix nej yi mmidzip ajcxy ychachxigixy.

⁵ Chi Jesús ca' ni nej y'adzooy. E Pilato ooy chachhuinmay'ahuidijty.

Jesús yajmoy ysentencia co y'ögipy

⁶ Com xijoty anajty, je gobernador Pilato najtzmazdiy tüg machyjäy, je huidibí je mayjäy anajty ypijctzoogixyp. ⁷ Pujxtijc iñayb anajty jim Jerusalén tüg machyjäy huidibí anajty yxi Barrabás. Barrabás pujxtijc iñayb anajty quipxy müd jacjadyi jây huidibí anajty ti midziptzoon je gobierno romano, e ti anajty yjâyaj'ó'ccixy. ⁸⁻⁹ Co anajty je may yxi'ajtpidijc may'ajt pijctzoogixy ma Pilato co najtzmazdihuiip tüg machyjäy, chi Pilato ymínañ:

—¿Nej mdzocjcxyp co nnajtzmazdihuibich je judíoäy ajcxy yrey?

¹⁰ Pilato ñejhuüyb anajty co mañ'ajtingixy anajty ajcxy je teedy mijtungmüdpí ti çiyejccixy Jesús. ¹¹ Per co Pilato jadu'n ymínañ, chi je teedy ajcxy mijtungmüdpí ooy ajcxy yajhuamgoty yajjihuygoty je mayjäy co huen je Pilato najtzmazdiy je Barrabás. ¹² Chi Pilato y'amidooy je mayjäy jadüg'oc:

—¿Nej miich ajcxy mdzocy ndunipyich müd jada yëydjc huidibí jây ajcxy ytijpy co yrey'aty ma yi judíoäy ajcxy?

¹³ Chi je mayjäy mic yminangottay:

—Yajcruutzpet.

¹⁴ Chi Pilato ymínañ:

—Per çti yi' ti tundigoy?

Huin'it je mayjäy nügi mic ymínañ:

—¡Yajcruutzpet!

¹⁵ Co jadu'n je mayjäy ajcxy mictägy yminanday, chi Pilato anajty yajjotcuje'adaangixy je mayjäy, chi najtzmazdiy je Barrabás. E co yajc'ajttay yi Jesús, chi cýejcni co huen yajcruutzpedyíi.

¹⁶ Chi je soldados ajcxy yajnicxy Jesús ma je agujctijc t'iba', e jim ñaymujci tüg'óciy soldados ajcxy huidibi yajpatp anajty jim Jerusalén. ¹⁷ Chi ajcxy yajñijeniý je Jesús tüg rey yhuít, color ucypí e yajcojeniý ajcxy apy corona. ¹⁸ Chi je soldados ajcxy yminañ:

—¡Viva jada judío rey!

¹⁹ Chi je soldados ajcxy huojpy Jesús ma ycohuaic miid paxy, e huindzuj jiptzujcixy ooy, e huingojxtinay'ahuiyigixy janch ypaad nej jihuíy ooy huindzigiigixy. ²⁰ Co je soldados ajcxy nixiictay yajxiictay Jesús, chi ajcxy jeeni je yreyhuít color ucypí, e yajñijeniý ajcxy yci'm yhuít jadüg'oc. Chi ajcxy Jesús miidcajppidiziny co anajty yajcruutzpedaangixy.

Co Jesús yajcruutzpejti

²¹ Tú'am ajcxy tüg jäy miidnaybati, hue' anajty yxií, Simón, ycgájpyty jim Cirene, Alejandro etz Rufo je' anajty yteedy. Hue' anajty choñ camjoty. Chi ajcxy adzip nimay Simón co huen jaccajpi Jesús ycrudz.

²² Chi ajcxy yajnicxy Jesús ma tüg it lugar huidibi yxií Gólgota, je ayuc Gólgota jadu'n yhuimbiziny o'cpi cohuaic. ²³ Chi ajcxy moy Jesús vino huen ügy tem huidity miid mirra tzoy. Per ca' Jesús cóbijcy je vino nñi. ²⁴ Chi ajcxy yajcruutzpejty Jesús. E huin'it je soldados ajcxy suerte ijxy, co anajty ajcxy Jesús yhuít yajhuäcxaani, oc'ixaangixy pin anajty ocjé'ájtíp.

²⁵ Petyxií anajty co ajcxy yajcruutzpejty Jesús. ²⁶ Je ayuc huidibi ajcxy yjaay ma Jesús cruudz, jadu'n yminañ:

—Je judíoäy ajcxy yRey. ²⁷ Quipxy miid Jesús ajcxy yajcruutzpejty metz meetzpi. Tüg meetzpi ajcxy yajcruutzpejty a'oy'amy ma Jesús ymijc, e jadüg anajty'amy. ²⁸ Yajcuyduñ nej anajty jaybety miñ ma Dios ñecy, ma jadu'n yminañ: "Yaj'amichoomujc je Cristo miid je pocyjäy ajcxy."

²⁹⁻³⁰ Je mayjäy huidibi ajcxy naxiýb anajty ma Jesús yajpaady cruutzcíxy, ooy anajty ajcxy ycojigüñ, nixiicy yajxiicy ajcxy Jesús, yminañ ajcxy:

—Bah, miich huidibi Dios ytjc mjidaanip, e codugüg xii huingbi myajpidiga'ñ, miich ci'm cham naygohuaani, e minac cruutzcíxy.

³¹⁻³² Nañ jadu'n je teedy ajcxy mijtungmiidpi etz je escribas ajcxy nixiicy yajxiicy ajcxy Jesús ñayñimayí miñ xyipy:

—Jada Jesús ti cohua'ñ jacyadyi jäy, e ca' jaty nej ci'm ñaygohua'ñiýb. Pen janch, co jada Jesús yjéjity je Cristo huidibi rey'adamb ma yi judíoäy ajcxy, ymiid ixipy mic'ajt jaydéb ci'm yminagipy cruutzcíxy. Co jadu'n ixipy n'íxim co ci'm ti yminacy cruutzcíxy, huin'it mibíjicim co janch jada jéjity je Cristo huidibi rey'ajtp ma yi Israel jäy.

Nañ jadu'n je metz meetzpi ajcxy huidibi cruutzpejt quipxy miid Jesús nixiicy yajxiicy ajcxy je Jesús.

Co Jesús y'ögy

³³ Co yucjcxijíy, chi ycoodzyigiday tüg'óciy naaxhuíñ. E jadu'n je naaxhuíñ y'ijty coodz ixti minacyxií. ³⁴ Minacyxií Jesús mic yminañ miid aramaico ayuc:

—Eloi, Eloi, ¿lama sabactani? —yi jadu'mbi ayuc hue' yhuimbiziny: Tat Dios. Tat Dios. ¿Na'amy co ti xy'ix'ixyich?

³⁵ Nijéjity jäy huidibi anajty jim yajpatp huingon ma Jesús, co midoo jadu'n ajcxy Jesús y'ayuc, chi ajcxy yminañ:

—Midooigix, Elías yi' yaaxtaayb.

³⁶ Chi nidügti ajcxy ninicxy Jesús poyígy, ti anajty yajxoogy pixy miid vinoní ta'mbi, e yajjijpxodziy je pixy ma tüg paxy, e jadu'n yajja'ty je vino nñi ta'mbi ma Jesús y'ahuac, huen muucip je vino nñi ta'mbi. Co jadu'n tuñ, chi yminañ:

—Tzoc oc'ahujxim pen mimb Elías, e miñ yajminagyí ma yi cruudz.

³⁷ Chi Jesús mic ycapxqueegy, chi y'o'cy. ³⁸ Co Jesús y'o'cy, chi je mapxhuit yciitzhua'cxy tinä'amy huidibi anajty miid y'adiyádytyty je Dios ycuarto ma je teedy mijtungmiidpi ytiigü tüg tecypajc jimijt jimijt. ³⁹ Je soldado huindzin huidibi anajty tinaayb ma Jesús yhuinduu, co jadu'n midoy nej Jesús mic yaaxqueegy, e ijxy nej y'ögy, chi yminañ:

—Janch co jadayaabi yédyijc anajty Dios ung'adyií.

⁴⁰ Nañ jim anajty nijéjity tóxyjádijc ymij'íxcixy jiguégy. Jim anajty yajpaady María Magdalena, etz je jadügpi María, Jacobo je mutz'anägnip ytaj, etz José ytaj. Nañ jim anajty yajpaady Salomé. ⁴¹ Jadayaabi tóxyjäy ajcxy miidhuidijt Jesús, e ti anajty pubéjtcixy taabi anajty Jesús yajpaady jim Galilea ñaaxjot. Nañ jadu'n anajty jim yajpaady jacnaagity tóxyjádijc ajcxy huidibi anajty ti ycoody jim Jerusalén quipxy miid Jesús.

Jesús yajnaaxtigíyíi

⁴²⁻⁴³ Paady co chu'ñyñi hue' anajty viernes mina judíoñy ñayyajpocynñi huátzigixy, jaydëb anajty amay'adaangixy je sábado xii je com jabom. Chi José huidibi anajty cogajp Arimatea yjotnictuñ, chi ytiñy ma je gobernador Pilato, pijctzooy may'ajt co yajnaaxtigihuaani Jesús ñinixc. E hue' je' José anajty tungmiid ma yi judíoñy ajcxy. José yijp'ijxpy anajty mina Dios pidäga'n yi' y'ané'min ya naaxhuiñ. ⁴⁴ Pilato ooy tzachhuinmay co Jesús tim mic'amy ti y'ögy anajty, paady huoodzooy je soldado huindzin, e tiy'ajt pijctzooy pen janch co Jesús ti anajty y'ögy. ⁴⁵ Co je soldado huindzin tiy'ajt yecy co Jesús ti anajty y'ögy, chi nimay José co huen yajnaaxtigihuipy Jesús. ⁴⁶ Chi José juy poob huit, e co yajminajcy Jesús ñinixc, chi mo'ñ miid je poob huit, e chi pidacy ma tüg tzaajut huidibi anajty ti yajtzejtztüdy ti yajpadüdy ma tüg tzaahuingueetz. E chi yaj'adujcy je öcpi jut miid tüg mij tzaa. ⁴⁷ E je metzpi töxyjy María Magdalena etz je jadügp María huidibi José ytaj'ajtpy huindücxp anajty ajcxy co Jesús ñaaxtigiiy.

16

Jesús yjugypicy jadü'oc

¹ Com jabom jopy, domingo, chi je tugüg töxyjy ajcxy María Magdalena, María Jacobo ytaj etz Salomé juy ajcxy tzoy huidibi ooy oy xuugy, pidägaangixy anajty ma Jesús ñinixc. ² Je tugügp töxyjy choon' domingo, semaan ixtigi', tim jopyñi. Ti anajty ypidzimni je xii co ajcxy oyjädj ma je öcpi jut. ³ Chi je tugügp töxyjy ajcxy nayñimaayi miñ xyipy:

—¿Pin xy'ocpubéjtim jigihuipy je mij tzaa huidibi miid agüyity je öcpi jut?

⁴ Per co ajcxy ijxy je öcpi jut, chi ajcxy ijxy ahuinguje je mij tzaa anajty ytiuejcnäy huidibi je öcpi jut anajty agüydujcp. ⁵ Chi ajcxy ytiñy jutjoty. E chi ajcxy ijxy tüg yeeg'anäg iñäy anajty a'oy'amy ma je' ajcxy. E je yeeg'anäg poob huit anajty ymiid. Co ajcxy jadu'n ijxy je yeeg'anäg jiihy jutjoty, chi je töxyjy ajcxy ooy chigüñy. ⁶ Chi je yeeg'anäg nimay je töxyjy ajcxy:

—Ca' ooy mdzigüygixy. Miich ajcxy je' m'ijxtaaygixp je Jesús huidibi cogajp Nazaret, je huidibi jay ajcxy yajcruutzpejt. Ti je' yjugypicy. Ca' je' ya. Oc'ijxcix ya ma ajcxy pidaacci.

⁷ Níxcixc, nimaaygix Pedro etz yi jacadyii Jesús ydiscípulos ajcxy co Jesús níxcip jayijp jim Galilea, e jim Galilea ñaybadüyb ajcxy miid Jesús, jadu'n nej ajcxy ñimaayi jayijp'aty.

⁸ Chi je töxyjy ajcxy jim yqueegy ma je öcpi jut, com ti anajty ooy chigüygixy. Ooy anajty ajcxy chiyuy miid tzigi'ñ. E ni ca' ajcxy nimay ni pin nej anajty ti ijxcixy, com ooy anajty chigüygixy.

Jesús ñaygue'xici ma María Magdalena

⁹ Je domingo, semana ixtigi', co Jesús yjugypicy, chi ñayguëxici jayijp ma María Magdalena, je' je' je töxyjy huidibi anajty Jesús ti yajpidzimi huixtuc ca'oybi ma yjot yhuinma'ñ. ¹⁰ Chi María Magdalena ñicxy ma Jesús ydiscípulos ajcxy huidibi miid yhuidiñy, e nimaaygixy nej anajty yi' ti ixy Jesús co ti yjugypicy jadü'oc. E Jesús ydiscípulos ajcxy ooy anajty ytajjxcixy ymáygixy etz yaaxcixy. ¹¹ E co ajcxy midoohui je María y'ayuc, co anajty ti ixy Jesús juugy, chi ca' ajcxy mijpidaaci y'ayuc.

Jesús nayguëxici ma metz ydiscípulos

¹² Co hueeñi, Jesús ñayguëxici nañ jadu'n ma metz je' ydiscípulos huidibi ñicxp anajty ajcxy camjoty. ¹³ Chi je metzpi discípulos ñicxy ajcxy mic'amy oy nimaaygixy je jacadyii discípulos ajcxy co ti ijxcixy Jesús. E je jacadyii discípulos ca' ajcxy mijpidaaci je metzpi discípulos y'ayuc.

Huidi Jesús ydiscípulos yajñibijc

¹⁴ Jac com jecy, Jesús ñayguëxici ma je majctügp discípulos ajcxy ma anajty y'ñaaygixy ma caydac. Chi Jesús ooy ajcxy co ca' ajcxy mibijccixy co ooy ajcxy yjot yjuuñity, ca' ajcxy mibijccixy jacadyii pin anajty ti y'ijxcixy Jesús. ¹⁵ Jesús je' ydiscípulos ajcxy nimay:

—Níxcixc miich ajcxy ma tüg'óciy naaxhuiñyñy, ma tüg'óciy naax cajn, e capxhuäxcixc ajcxy je oybi ayuc nej jay ajcxy jëb y'almanidzögipy. ¹⁶ Pinjaty mibijc etz ñiibejtcixy, ypaadip ajcxy y'almanidzocin. Per, pinjaty ca' mijpidägy tiy'ajt hue' ajcxy y'alma tigoyp miid ypocy ycixpi. ¹⁷ Yi jay ajcxy huidibi mibijcp, ooy ajcxy ijxpejt túngixipy. Miid iich nxii iich nmic'ajt yajpidzimipy ajcxy ca'oybi ma jay ajcxy yjot yhuinma'ñ. Nañ jadu'n ycäpxgixipy huingbi ayuc. ¹⁸ Ymadzipy ajcxy tza'ñ, e ca' nej yjajtcixipy. E co ajcxy veneno ügip, ca' ajcxy ypa'mdunib. E co ajcxy cinixájipy pa'mjäy, tzögip je pa'mjäy.

Jesús ypätigüñi tzejpjoty

¹⁹ E co je Huindzin Jesús ycapxy ycijxy miid je' ydiscípulos ajcxy, chi ypätigüñi tzejpjoty. Jiihy tzejpjoty Jesús yajpaady ma Dios ymijc a'oy'amy, miid mij'ane'min. ²⁰ Chi Jesús ydiscípulos ajcxy choon' ñíxcixy cajn cajn capxhuäcxpy ajcxy Jesús y'ayuc ma nidü'óciy

naax cəp. E je Huindzin Jesús ooy əjcxə ypubejti ypudigiiyi, miç'ajt moy je' əjcxə miið je
ijxpejt je mijhuinma'ñ huiðibi əjcxə tumyb. Jadu'ñyi jadu'n. Amén.

SAN LUCAS Jaayhui'my Jadu'n Nej Jesucristo Ytun Yjajti

¹ Mayjäy ti cojaay je ayuc je tiy'ajt huidi iich ajt nejhuuiyim co janch ytiy'ajtiy, tüg'óciy jadu'n nej Jesús chondacy yjugy'ajtin ya naaxhuiñ ixti mabaad ycocigixiy. ² Tüg'óciy je tiy'ajt jadu'n nej ajt xyñimaayim huidi ci'm iix midou nej chondacy ixti mabaad ycocigixiy, je' ajcxy huidibi capxhuacxy Jesús y'ayuc ytiy'ajt. ³ Iich nañ jadu'n ti nyajciyöyich ti nyajtecxyöyich yajxon je tiy'ajt nej Jesús chondacy je' chinaayin ya naaxhuiñ ixti mabaad ycocigixiy. Paady ycxipi iich nhuinma'n pidägy co iich miich nyajnijayihua'n tüg'óciy je tiy'ajt, miich oyjäybi, Teófilo. ⁴ Jigix miich nañ jadu'n mnejhuuihuipy yajxon je tiy'ajt, jadu'n nej miich ti m'ixpicy.

Tüg'angel nigapxy co Juan el Bautista ypi'c'adañ

⁵ Jadu'n ytuni yjajti co anajty Herodes yrey'aty ma Judea naax cajn, jim anajty tüg judío teedy hue' anajty yxii Zacarías. Je' anajty semandumb miid Abías y'ajugytic y'amigügtic. Je Zacarías ypijcy miid Aarón y'ocniix, hue' je' anajty yxii Elisabet. ⁶ Dios y'ixxpy ñejhuuiyb co je' anajty ajcxy ytuädgyjäyity nimetz. Je' ajcxy ycuudumyb tüg'óciy yi Huindzin Dios ycapxy y'ané'min. ⁷ Je' ca'p anajty ajcxy y'ung ni tüg, e jadu'n ajcxy ymijäyñ nimetz.

⁸ Chi tügtecy Zacarías miid y'ajugy y'amigüg yteedy'ajtcixy anajty ma Dios ytiyc. ⁹ Jadu'n nej teedy ajcxy ycostumbre miidity, chi ñigooti tung je Zacarías mina ypoomjogipy jiiby ma yi Huindzin Dios ytiyc. ¹⁰ Tüg'óciy je mayjäy ooy anajty Dios mibijctzoogixy tiba'y. Yam Zacarías tzajtigoty ypoomjocy, ¹¹ co ñayquëxici Huindzin Dios y'angel tüg ytinäy a'oy'amy ma je poomjocac. ¹² Co Zacarías iixy je angel, chi ooy chigiiy. ¹³ Chi je angel nimaay Zacarías:

—Ca' mdzigiy, ti Dios midooy yi mjuydácin mnucxtácin. Yi mdöxyijc Elisabet ypaadipy tüg ung yëdyijci, e mximöhuipy Juan. ¹⁴ Mjotcuyc'adip mxondägy miich etz mdöxyijc, nañ may yi jäy yjotcughuipy co anajty m'ung ti ypi'c'aty. ¹⁵ Chi yi m'ung ycomay'ida'n ma Dios. Ni ca' ügipy vino ni jocni. Ma ca'ni anajty yma'xung'aty ymiid'adipy yi Dios yjihui'n ymic'ajt. ¹⁶ Yi' yajjothuimbidip may Israel jäy ma yi' ajcxy yHuindzin Dios. ¹⁷ Je' nicxy ycocapxy'aty ma yi jäy ajcxy huinmic jotmic miid Dios yjihui'n ymic'ajt, tim jadu'n nej Elías jecy'ajty ycocapxy'ajty huinmic jotmic miid Dios yjihui'n ymic'ajt. Je' m'ung yajjothuimbidipy je ungdeedy ajcxy huidibi ca' y'ung ixaangixy, nañ yajjothuimbidipy je jäy ajcxy huidibi ca' capxycóbicy yi Dios, jigix ajcxy paadipy oyot oyhuinma'n. Nañ m'ung ñimähuipy je jäy ajcxy huen nayñ'i'ixiiyigixy miid yHuindzin Dios ycxipi.

¹⁸ Chi Zacarías nimay je angel:

—Ñej jada iich nejhuuihuipy peni janch huidibi xyajnimaaaybich? Ti nmijjäyñiich, cham ndöxyijcich nañ ti ymijjäyñi.

¹⁹ Chi je angel y'adzooy:

—Iich Gabriel, ma Dios yhuinduu ni'ixi' n'ityich. Dios ti xyquexyich cogapxy'ajtpi ma miich co nyajnimähuipy jada oybi ayuc. ²⁰ Jadachambi miich mhuimipy uum, ni ca' m'ocjátnip nej mgäpxipy, miid co ca' mmibicy jada iich n'ayuc huidibi yajcuydunip co anajty tiempo patni.

²¹ Yam je mayjäy ooy ja'ahuixcixy Zacarías, ooy anajty ajcxy tzachhuinmaaygixy ti co chachhuacxipy jiiby ma Dios ytiyc. ²² Co Zacarías ypidzimy, chi ca' anajty y'occapxni. Chi je jäy ajcxy huinjuhuiy co ti anajty ixy tijaty jiiby ma Dios ytiyc. Hue' je' yjacmüyacy a'ixiy'amy, e oyhuimiy uum.

²³ Co je semandung yajmay, chi Zacarías ñicxni ma ytiyc. ²⁴⁻²⁵ Co jadu'n yjajty, chi Elisabet jihuiy co ti anajty y'ung tzimigy ciy'gy. Chi yüch'ijty migoox po', e yminañ: "Jadu'n yi Huindzin Dios ti ytuñ miid iich jadachambi tiempo, ti xyjäymechich ti yajquëgy iich ndzöydu'n ma yi mayjäy ajcxy."

Tüg'angel nigapxy co Jesús ypi'c'adañ

²⁶ Co tudujc po' maabi Elisabet anajty y'ungtzimigy, chi Dios quejxy je' y'angel Gabriel jim Galilea naaxjot ma je cajn huidi anajty yxii Nazaret. ²⁷ Chi Dios quejxy Gabriel ma anajty tüg töxy'anäg y'ity huidibi anajty ca'ni midzinäy yëdyijc. Je töxy'anäg ti anajty co'adzooy co piga'n miid tüg yëdyijc huidi yxii José. José hue' anajty David y'ap y'oc. Je töxy'anäg hue' anajty yxiiyity Maria. ²⁸ Co je angel ytigiiy ma anajty Maria, chi nimay:

—Maria, Dios ti xy'ijxtiy, je Huindzin Dios y'oy'ajt miid miich. Miich je' cömay y'idip ma tüg'óciy töxyjäydyijc.

²⁹ Chi María co y'ixxy je angel, chi chigiiy miid je' y'ayuc, chi huinmay ooy miid jada copxpócxin nej co yjadu'ñity. ³⁰ Chi je angel yminañ:

—Maria, ca' mdzigiy, miich Dios ti xy'ijxtiy. ³¹ Jadachambi, m'ungdzimigip, myajpi'c'adipy tüg mang, huidibi mximöhuipy JESUS. ³² Je Jesús mij y'idipy, hue' je' yajtjipy Dios tzajpjotypi

y'ung. Chi je Huindzin Dios möhuiyb je ané'min huidi yi' ymij'ap ymijteedy David ymüid anajty. ³³ Je Jesús ané'mip huinixüi ma yi Jacob y'ap y'oc. Je' y'ané'min camina ycxipy.

³⁴ Chi María je ángel nimaay:

—¿Nej jada co yjadú'nity? Íich ca'ni nyëydijc müd tzinäy.

³⁵ Chi je ángel y'adzooy:

—Je Dios yjihui'ñ ymic'ajt minip ma miich, je Dios tzajpjotypi ymic'ájin xyajñidujttáhuip, je oyjáyi jáy huidi pi'c'adam, hue' yajtjipy Dios y'ung. ³⁶ E cham Elisabet miich m'amigüg nañ jadu'n yajpi'c'adamy tüg mang ma ti ymijjáyñi. Cham midudujc po'bi maabi y'ung tzimigy je huidibi jáy ytijpy ca' y'ung'ixaani, ³⁷ com müdi Dios ca'ni ti chipity.

³⁸ Chi María yminañ:

—Jotcuje nguydunipyich yi Huindzin Dios chójcin, huen jadu'n tuñyüi jadyüi ma íich jadu'n nej miich m'ayuc xymóyich.

Chi je ángel ñicxni.

María y'oy cogapxi Elisabet

³⁹ Huin'it xüi María choñ, ñicxy jottigoy ma yugjot, ma tüg cajp jim Judea naaxjot. ⁴⁰ Chi ytiigüi ma Zacarías ytiic, e capxocxy Elisabet. ⁴¹ Chi jadu'n yjajty co Elisabet midoohui María ycapxpócxin, ti íich n'ung yücxu ma íich njot co chachjotcúcity. ⁴² Jotcuje'adip pinjaty ti Dios yjihui'ñ ymic'ajt. ⁴³ Chi yminañ janch mic:

—Cömay miich ma tüg'óciy töxyjäydijc, e cömay y'ida'ñ m'ung huidibi pi'c'adamb. ⁴⁴ ¿Nej íich jada co jadu'n ti n'ahuägüi co nHuindzinich ytaj miñ ycyo'ixiyich? ⁴⁵ Co ti nmidooyich yi mgapxpócxin, ti íich n'ung yücxu ma íich njot co chachjotcúcity. ⁴⁶ Jotcuje'adip pinjaty ti ymibicy, co cuyduñ y'ida'ñ je ayuc müd je Huindzin Dios ycxipi. ⁴⁷ Chi María yminañ: Ooy mij n'ojadatyich yi Huindzin Dios.

⁴⁸ Ooy nxondägyich müd Dios ycxipi, íich nnihuambi nyajtzoocpi,

⁴⁹ co yi' ti xñüi'ijxcidägyich, co íich ayoobi xytumbi'adyíjich. Jadachambi etz jacñicxp xüi tiempo, tüg'óciy jáy ajcxy oy mina'nip co jotcuje'átpich.

⁵⁰ Yi Dios tügajc mijip, tübi tun müd íich, ooy yi' yxüi ymijity.

⁵¹ Dios ypa'ayooyb hueñypínity huidibi huindzigi'yip jadachambi etz jacñicxni xüi tiempo.

⁵² Dios ti ooy tuñ mijpi huinma'ñ, ti jibicy pinjaty amij agix nayjihui'yip ma yjot yhuinma'ñ.

⁵³ Dios ti yajpidzimy yi mijpi rey ma y'ane'my, ti mij'ajt möy ayoobidijc.

⁵⁴ Pinjaty ayuu'ijtp anajty ymooy ti müd yjotcuje'adip, etz yi comeñjyädijc ajcxy ti ixmach ca'ni ti.

⁵⁵ Dios ti pubety yi Israel jáy, yi' ajcxy ytumbi, müd co anajty ti pa'ayogoty je' ajcxy,

⁵⁶ jadu'n nej jecy'ajty Dios yajnimay je' n'ap ndeedy, je Abraham etz je' y'ap y'oc, co tunamb müd je' ajcxy huinixüi.

⁵⁷ Chi María tugiig po' jim y'ijty müd Elisabet, chi yhuimbijtni ma ytiic.

Juan el Bautista co ypi'c'ajty

⁵⁸ Co je Elisabet oy yajhuaad'ajtni xüi tiempo, chi yajpi'c'ajty tüg ymang. ⁵⁹ Chi ayuc midooy ajcxy je ymijün ymidijc etz y'ajugy y'amigüg jadu'n nej Dios may'ajt ti tuñ müd Elisabet. Chi ajcxy ooy yjotcugiy müd je' ycxipi. ⁶⁰ Chi jadu'n yjajty conductujc xüi je ymijün ymidijc etz y'ajugy y'amigüg miñ ma Zacarías ytiic co anajty tiy'ajtiñhuaangixy je pi'c'anäg. Chi ajcxy yajxüi'ada'ñyüi anajty jadu'n nej yteedy yxüi Zacarías. ⁶¹ Chi ytaj yminañ:

—Ca' xüi'adyb Zacarías, hue' yi' huen xüi'adyüi Juan.

⁶² Chi je' ymügütiic ajcxy yminañ:

—¿Na'amy? Ni tüg miich m'amigüg jadu'n ca' xüijity.

⁶³ Chi ajcxy y'amidoohui je' yteedy jadu'n a'ixiy'amy, nej yi' yajxüi'ada'ñyüi. ⁶⁴ Chi Zacarías pijctzoy tüg necy, e jaay jadu'n: “Juan huen xüi'adyüi.” Chi je ymügütiic ajcxy nidüg'óciy ooy jihui'y huinmaay. ⁶⁵ Chi mic'amy Zacarías y'ahuac ahua'cxy e ytoodz yungüi, chi oy ycapxiig e jáymejch cömay yi Dios. ⁶⁶ Chi tüg'óciy ymijün ymidijc ooy chigüi. Chi ajcxy nimiydactay nej Zacarías ti yjaty ma tüg'óciy jáy huidibi tzinaayb Judea yuugjotypi tzinaaydac. ⁶⁷ Tüg'óciy pinjaty anajty midoob je ayuc, chi jáymejtzhuim' ajcxy ma yjot yhuinma'ñ, chi ñayñimäyigixy:

—¿Ti jada' ytunamyb jada pi'c'anäg?

Com je Huindzin Dios je' müd y'ity.

Je Zacarías y'iy

⁶⁸ Chi je ungedeedy Zacarías müd je Dios yjihui'ñ ymic'ajt Dios y'ayuc najtzcapxiyi yminañ:

⁶⁹ Cömay yi Israel jáy yHuindzin Dios, co ti ni'ijxcidägy, ti cohua'ñ yi' ñaax ycajp,

⁷⁰ Dios ti quexy tüg mij nihuaambi yajtzoocpi, ma yi' ytumbi, David y'ap y'oc ajcxy.

⁷¹ Com Dios jadu'n yminañ jecy'ajty müd yi' y'ayuc najtzcapxiyb huidibi huätzjáyip;

- ⁷¹ je' xyñihuánaanim ma ñich ajt nmidzip, nañ xypubedaanim xypudigihuaanim ca'ydí xycígáhuuñim huidibi ca' xy'ixaanim xychogaanim.
- ⁷² Jaydēbi pa'ayoohuipy ñich ajt nmij'ap nmijteedy, etz jāymedziyib jadu'n nej ayuc ahuanñy mñid je' ajcxy.
- ⁷³ Jadu'n nej Dios janch huinjot y'ayuc ahuanñy mñid ñich ajt nmij'ap nmijteedy Abraham jecy'ajty huidi anajty xymōhuaanim.
- ⁷⁴ Co nihuātztuutim ma nmidzip, huin'it jaydēbi miyaaxim n'ojadajtim ca' ma tzig'iñ jihu'ñ,
- ⁷⁵ mñid huātzhuinma'ñ etz tudāgy huinma'ñ ma yi' yhuinduu jabom jabom ixti mibaad ndzinaayim.
- ⁷⁶ Miich ma'xung, jāy hue' myajtijip mijpi Dios y'ayucnajtzcaxñybi. Miich níczip cogapxy, nicx yajni'ixi jāy mñid Huindzin Dios ycixpi.
- ⁷⁷ Yajni'ixi' yi cajpjāy jadu'n nej huaad ajcxy y'alma paadipy nihuáanin yajnñdzoocin, etz jadu'n nej huaad ajcxy ypocy huinmecñybi.
- ⁷⁸ Jadu'n nej Dios ñich ajt ti xypa'ayoohuim co ti xyñi'ijxcidaacim etz xymooyim tüccxin jájin huidibi tzomb tzajpjoty,
- ⁷⁹ jaydēbi yajmōhuipy jāy ajcxy Dios yti'yajt huidibi ajcxy tzinaayb agootztuum etz o'c jip'am, jigix ajcxy xytūmooyim ma je tudāgyti tū'aa.
- ⁸⁰ Je pi'c'anāg yeeg yjodijy huinmic jotmic mñid yi Dios yjihu'ñ ymic'ajt. Chi chinaay adūgtuum ma ca' pin, ixti cooni xñi tiempo paty mina níczipy cogapxy ma Israeljāy ajcxy.

2

Jesús yma'xung'ajty

¹ Huin'it xñi Augusto César pidacy y'ané'min huen tūg'óciy jāy nicxy necypejttaaygixy. ² Je jayijp'atypi padrón hue' je'yaj'oyñy Cirenio huidibi anajty gobernador'ajtp jim Siria ñaaxjot. ³ Chi jāy ajcxy nidūg'óciy ñicxtay yajcojayñybi nidūg nidūg ma yci'mgajp. ⁴ Chi José chooñ jim Galilea naaxjot ma je cajp huidi yxiñ Nazaret, ñicxy ajcxy jim Judea naaxjot ma je David ycajp, huidi yxiñ Belén. Yi José ñicxy jim Belén com ymij'ap'ajtpy ymijteedy'ajtpy je David. ⁵ Chi José yajcojayñy padrónjoty mñid María, je tōxyjāy huidibi anajty ymñid capxytuñ, huidi anajty ung tzm'ijtp. ⁶ Chi jadu'n yajty co ajcxy anajty yjimity Belén, chi oyhuaad'aty co María paadipy y'ung. ⁷ Chi yma'xung'ajty je unggoob, e chi ñibe'ñ nīmūxy mñid ymotz, e chi agōgiy ma iyujc pēcx'iñ, co ca' anajty ti paady jāttac.

Je ángeles ajcxy etz je cōbixycuend'ajtpi ajcxy

⁸ Chi mihuignon je cajp anajty jāy ycōbixycuend'aty. Hue' anajty ajcxy yhuin'ñiayb huintzuumnajxyp je' ycōbixy ajcxy. ⁹ Chi Huindzin Dios tūg y'ángel ñigidaaci je' ajcxy, e yi Huindzin Dios y'oy'ajtin y'adixcoody jūhuidity ma je' anajty ajcxy ymijc, chi ajcxy ooy chigñy. ¹⁰ Huin'it je ángel ymñinañ:

—Ca' mdzigiñyixy, cham ñich miich nyajnimaaaygixy oybi ayuc huidibi yajjotcugñhuipy tūg'óciy naax cajp. ¹¹ Mñid miich ajcxy ycixpi ti ypi'c'aty cham ma je David ycajp tūg jāy huidibi miich ajcxy xyñihuánaam xychuánaam ma ajcxy mmidzip. Hue' je' je CRISTO, je Huindzin Dios. ¹² Yi' je' ijpéjtíp huidi mñid m'ijxcabipy. Mbáadipy ajcxy je ung ma'xung ñīmōchity mñid ymotz, ycōcnāy ma iyujc pēcx'iñ.

¹³ Chi janch mic'amy ñayguēxici mñid je ángel may yi tzajpjotychinaaybi, chach Dios ojadajtcixy ymñinaangixy:

¹⁴ ¡Ooy ycōmáiyty ooy ymijity yi Dios tzajpjotyti, ji naaxhuñi jotcuje'ajt mñid jāy ajcxy ycixpi huidibi Dios yjāygidacpy!

¹⁵ Jadu'n yajty co je ángel ajcxy ñicxtay tzajpjoty, chi je cōbixy cuend'ajtpi ajcxy ñayñimay:

—Tzoc jámim jim Belén, jaydēbi n'ijxim ti ti ytunyii ti yjadyii huidibi nHuindzin'ajtim Dios ti xyajnimáayim.

¹⁶ Chi ajcxy ñicxy jottigoy, chi oy pátcixy María, José etz je ung ma'xung y'agōgiyity ma je iyujc pēcx'iñ. ¹⁷ Co ajcxy ijxy je María etz je ung ma'xung, huin'it ajcxy nigapxtay nimiydactay jadu'n nej je ángel ajcxy ñimay mñid je pi'c'anāg ycixpi. ¹⁸ Tūg'óciy jāy huidi midou ooy jihuñ huinmay jadu'n nej je cōbixycuend'ajtpi ajcxy ymñinañ. ¹⁹ Chi María mido'mbijctay, e yajhu'my ma yjot yhuinma'ñ. ²⁰ Chi yhuimbijty je cōbixycuend'ajtpi ajcxy cōmay jāymech ajcxy yi Dios, etz ooy alabanza ajcxy ñy mñid Dios ycixpi mñid tūg'óciy jadu'n nej anajty ti ijxcixy ti midōogixy, etz jadu'n nej anajty ti ñimáayigixy.

Pi'c Jesús yajcapxquēxigy ma Dios ytiyc

²¹ Coductuyc xii maabi anajty yma'xung'aty, huin'it je' ajcxy tiy'ajttiy je ung ma'xung. Chi ajcxy yxiimoy JESUS, jadu'n nej je ángel anajty jayijp ti ymina'n ca'ni anajty chimígyii yciyígyii.

²² Co je xii oypaatni mina je María anajty yhuátzpídzimaamni, jadu'n nej Moisés ycóútjcin je jécyp ymina'n. Chi ajcxy m'idnícxy je ung ma'xung jim Jerusalén capxquëxigaangixy ma yi Huindzin Dios yhuinduu. ²³ Com jadu'n anajty yjaybétyity ma Huindzin Dios ñecy:

Tüg'óciy unggoob yëdijcpi huidi ma'xung'ajtp, abicy yhuí'mipy miid je Huindzin Dios yciixpi.

²⁴ José etz María oy yéccixy huindzigi'n jadu'n nej Huindzin Dios ñecy ymina'n co jëbi yecy metzc jam muuxy o pajctza'm muuxy.

²⁵ Jim Jerusalén anajty chinây tüg jây huidi anajty yxií Simeón, tudägyjây je', etz ooy Dios jâymech. Simeón y'ahuijxyp anajty mina Dios miñ yajjotcujc'ada'n Israeljây ajcxy, e miid je' anajty Dios yjihui'n ymic'ajt. ²⁶ Dios yjihui'n ymic'ajt ti anajty yajnejhuiyii co ca' chojc öga'n, jayijpni oc'ixipy je Huindzin Dios yCristo. ²⁷ Je Dios yjihui'n ymic'ajt yajmin yajmejtzi Simeón yhuinma'n huen nicxy ma Dios ytijc; huin'it Jesús ytaj yteedy ym'idnícxi ma Dios ytijc, cuyduñ ajcxy jadu'n nej Dios ñecy y'ane'my. ²⁸ Chi Simeón tzendzoy etz capxpaady je ung ma'xung, e chi Dios mibijctzoy miid je' yciixpi, chi ymina'n:

²⁹ Jadachambi capxcix jotcujc, Huindzin Dios, miid ich miich mdumbi, com ti mguyduñ jadu'n nej ti xyñimâyich co n'ixipyich je Cristo.

³⁰ Cham ti n'ixyich je nihuambi cohuambi,

³¹ huidibi ti mni'ixây ma tüg'óciy jây ajcxy yhuinduu.

³² Jada ung ma'xung ytiy'ajt yegip ma yi jây ajcxy huidi ca' yjudiojäyity. Jadu'n yi' nipaady nej tüg jîn huidi codiicxp je jây. Cömay y'idipy yi Israel jây miid yi' yciixpi.

³³ José etz Jesús ytaj ooy jihuüy huinmaay jadu'n nej Simeón ñigapxy je pi'c ma'xung.

³⁴⁻³⁵ Chi Simeón conuucx yi' ajcxy, e nimay María, Jesús ytaj:

—Jadayaabi pi'c'anäg hue' jada aminiy co may Israel jây yjothuinma'n yaj'oyíhuipy miid yi Dios etz nañ jadu'n may Israel jây yjothuinma'n ca' yaj'oyíhuipy miid yi Dios. Yi' je' tüg iixpejt co ca' jây y'ixa'nâyb choga'nüyb, e jadu'n tüg'óciy yajnejhuihuipy nej ajcxy nidüg nidüg yjothuinma'n miidity. E miich m'idipy jotmaymiid jadu'n nejihuüy tüg espada ti xyajtzaachiy.

³⁶⁻³⁷ Nañ jim Jerusalén anajty tüg töxyjây huidibi anajty yxií Ana, Dios je' anajty y'ayucnajtzcaxxiybi. Fanuel anajty yteedy'ajtpy, hue' je' Aser y'ap y'oc, mij jây anajty ooy. Janch mutz'anägni ypijcy e jëyi huixtuyc jimijt chinay miid yña'y, mada'px midaax jimijt anajty cujc co'ögy chinây, e ca' anajty ytigoy'ity ma Dios ytijc. Ana ytumb anajty tzajtigoty xiiim tzuum jopy ayuu anajty ycapxtägy. ³⁸ Chi Ana nimiñ José etz María jilby ma Dios ytijc, e quipxy miid ajcxy huingapxtacy je Huindzin Dios. Chi je Ana nimiydacy je pi'c Jesús miid tüg'óciy jây jim Jerusalén huidi anajty ajcxy jipp'ixp mina Dios cohua'na'n Jerusalén ma ymidzip.

Co ajcxy nicxni jim Nazaret

³⁹ Co oy yajcuydundây tüg'óciy jadu'n nej je Huindzin Dios ñecy ymina'n, chi José etz María ñícxcixni jim Galilea ma ajcxy yci'mgajp Nazaret. ⁴⁰ Je pi'c Jesús anajty yeegy mic ooy miid huijy'ajt cujc'ajt, etz ymiid je' Dios ymay'ájin y'oy'ájin.

Je pi'c Jesús yajpaady ma Dios ytijc

⁴¹ Jimijt jimijt yi ungday ungdeedy ñicxy anajty ajcxy jim Jerusalén co anajty je Pascua xii paady. ⁴² Co Jesús anajty ymajmetzjimijt'ajty, chi ajcxy ypättigiiy jim Jerusalén jadu'n anajty ajcxy costumbre miidity co xii paady. ⁴³ Co je xii ñaxtây, chi ajcxy huimbijtcixni, e Jesús yhui'müy je' jim Jerusalén. Ca' José etz ytaj nejhuüy ajcxy co ti anajty yhui'miy. ⁴⁴ Hue' ajcxy anajty tijy je' ymiñ axaam miid ymigügtijc. Co tüg xii yäyigixni, chi ajcxy ixtay je' y'ung ma y'amigügtijc ajcxy, etz huidi miid ñay'ixy'adyii ñaymigü'adyii. ⁴⁵ Co ca' ajcxy y'ung paady, chi yhuimbijtcixni jim Jerusalén ung ixtaaybi.

⁴⁶ Chi jadu'n yjaty codugiig xii oypaatcixy jim ma Dios ytijc, Jesús y'iñây anajty agujc'amy ma je huindzindijc. Yi' anajty y'amido'ijtyp yi huindzindijc y'ayuc, e nañ yaj'amidooy anajty tijaty. ⁴⁷ Tüg'óciy je huindzindijc huidibi midou Jesús y'ayuc, chi ooy ajcxy huinmay etz jihuüy jadu'n nej je Jesús huinjihuüyday etz jadu'n nej anajty tiydudägy y'adzooy. ⁴⁸ Co Jesús ytaj yteedy y'ijxpati, chi ooy ajcxy tzachjihuiy. Chi ungday ymina'n:

—Aay ung, ¿nej co miich jadu'n xytüngixyich? Yi mdeedy etz ich yam tzachjottigooyb nay'adzigíyijich n'ixtääygixich miich.

⁴⁹ Chi Jesús y'adzooy:

—¿Na'amy co miich xy'ixtääygixyich? ¿Ca' mnejhuüyigixy co copity n'ida'ñich ma nDéedyich ytung?

⁵⁰ Chi ajcxy ca' huinjihuuyi Jesús y'ayuc huidibi ycapxy.

⁵¹ Chi Jesús müd nicxy je' ajcxy jim Nazaret. Chi Jesús capxymidooy ytaj yteedy. Chi yi' ytaj yajhui'mday ma yjot yhuinma'n tüg'óciy nej ytunyii yjadyyi. ⁵² Chi Jesús lxpjic'adäitp anajty ooy, etz yeegy yjäygojy huijycujc. E yi' Dios etz jäy ajcxy ooy anajty jäygidaaccixy.

3

Juan el Bautista y'ayuccapxhuäcxy migtigiduun

¹ Ma anajty je Tiberio César yjimijjtoty, mimajmocx jimijt anajty maabi y'ane'mtigiy, chi je Poncio Pilato anajty gobernador'ajtp jim Judea, je Herodes anajty rey'ajtp jim Galilea, je' y'uch Felipe anajty rey'ajtp jim Iturea etz jim Traconite ñaaxjot. Chi Lisanias anajty rey'ajtp jim Abilina. ² Chi je Anás etz Caifás je' ajcxy anajty teedy migtungmüd ma Dios ytiç. Je huin'it tiempo Dios y'ayuc yja'ty ma je Juan, Zacarías ymang, huidibi anajty tzinaayb migtigiduun. ³ Chi Juan choñ ñicxy ma tüg'óciy cajp mihuigon je Jordán mijñi, capxhuiy je jäy ajcxy, co huen jothuimbijttaaygixy etz huen ñibejtcixy jigix ajcxy ypocy yajhuinmeecxip. ⁴ Jada jadu'n tuni jajt nej je ayucnajtzcapyi Isaias anajty ti cojaay: Jim migtigiduun yajmidooy tüg jäy mina'n: "Yaj'oyiigix yi' Dios ytü'aa, tim jadu'n nej jäy ajcxy yaj'oyiigixy yi' jibic tü'aa co tüg rey mina'n." Yajtiigixy yi' tü'aa huidibi ooy y'adijy y'a'och.

⁵ Tüg'óciy anii ahuoc huen joyiidyäy, tüg'óciy tungop huen nañ jadu'n joyiidyäy. Tüg'óciy nii'aa tü'aa huidibi tijmin tijijp huen tiidyäy. Yi' tü'aa huidibi ca' quipxyjatyty huen quipxyjaty tiidyäy.

⁶ Tüg'óciy yi' jäy ajcxy ixipy ñejhuñhipy nej Dios yega'n je nihuambi cohuambi.

⁷ Chi Juan oiy ajcxy je jäy pinjaty anajty miimb ñibejtpi, yminañ:

—Miich ajcxy tza'n ajcxy y'ajugy y'amigü! ¿Pin miich ajcxy ti xynimäy quëg ma yi' ayo'n huidibi Dios yquexaamy? ⁸ Tüngix oybi, jothuimbijtcix, ca' ajcxy minaangixy miñ xyipy: "Abraham iich ajcxy n'ap'ajtpy ndeedy'ajtpy". Iich miich ajcxy nimaayb co Dios ixti jëbi yi' yaj'ung'adyi yaj'anäg'adyi Abraham jada tzaa ca'yd miich ajcxy. ⁹ Dios ni'ixi y'ity jaydëbi yajcödigoipy jäy ajcxy y'alma huidibi jibic-huinma'n müd. Tim jadu'n nipaady nej jäy ni'ixi y'ity müd jacha co pujxiga'n tüg quipy huidi ca' oy ytiim'aty, etz yajnögtähua'n.

¹⁰ Chi je mayjäy ajcxy y'amidooy je Juan:

—¿Ti iich ajcxy jëbi nduñ?

¹¹ Chi je Juan y'adzooy, yminañ:

—Pinjaty yhuut müd metz, jaydëbi möy pin ca' müdity ni tüg. Etz pinjaty caagy müd nañ jadu'n möhuipy pinjaty ca' müdity.

¹² Chi miñ jadyi yajcogüejtpi co anajty ñibedaangixy, yminañ ajcxy:

—¿Ti huaad iich ajcxy nduñ (jigix Dios xymijotcujc'adipyich)?

¹³ Chi Juan y'adzooy:

—Ca' ñigi anaxy myajcogüety jadu'n nej je cötújin y'ane'my.

¹⁴ Chi soldado ajcxy yminañ:

—¿Ti iich ajcxy ndunipy (jigix Dios xymijotcujc'adipyich)?

Chi Juan y'adzooy:

—Ni pin ajcxy ti mgapjicipy, ni mganñhuambedipy ajcxy. Nañ jadu'n mijotcujc'ajtcixy nej myajmujuygixy.

¹⁵ Je mayjäy yjip'ijxyp anajty ajcxy ooy, etz ooy jihuuy huinmaay nejhuñhuaangixy pen yi' Juan je' anajty Cristo. ¹⁶ Chi Juan nimay ajcxy nidüg'óciy:

—Iich janch nyajñibétypich jäy müd ñi. Miimb je' axaam huidibi jacmij ca'yd iich, ca' huaad yi' ycighuin ngejich. Je' miich ajcxy xyajñibedipy müdi Dios yjihu'i'n ymic'ajt etz müdi jin. ¹⁷ Je Cristo ni'ixi y'ity co oybi möhua'n je jäy huidibi ajcxy oyhuinma'n müd, etz ymöhuaamy tzaachypy je jäy ajcxy huidibi jibic-huinma'n müd, tzaachypy huidibi nicamina ycixipy. Tim jadu'n nipaady nej tüg jäy ni'ixi y'ity co ymoc-huimboja'n, e chi je oybi mocpajc pidäga'n ma che'x, etz je mocjaam ninögihua'n, e caminaxi ycapidza'n je jin.

¹⁸ Je Juan ooy jäy capxhuijy, etz canaagnax oybi ayuc capxhuäcxy. ¹⁹ Chi yi' oiy je rey Herodes, co y'uch Felipe ytiixijc Herodías müd tzinaayi, etz jacjaydiiby jibic-huinma'n tiibi Herodes anajty tuñ. ²⁰ Chi je rey Herodes ñigi pocytuñ co Juan pidacy pujxtigoty.

Je Jesús ñibejtin

²¹⁻²² Chi jadu'n yjaty co jadu'n tüg'óciy jäy ñibejttay nañ jadu'n Jesús ñibejty. Yam anajty Jesús ycapxtägy co je tzap y'ahuaach, etz je Dios yjihu'i'n ymic'ajt yminajcy ma Jesús ycöduu müd ñinñc jadu'n nej muuxy ñinñc. Nañ jadu'n yajmidooy tüg ayuc choñ tzajpjoty yminañ: —Miich n'ung'ajtpy, ooy iich miich ndzooy ooy njihuuy, ooy njotcujcidyich müd miich.

Jesús ymij'ap ymijteedy

²³ Jesús hue' anajty yjimijit oy ni iipxmajc co ytungtigüy. Hue' je' anajty jadu'n jäy tijy José ymang, José yteedy hue' je' Elí, ²⁴ Elí yteedy hue' je' Matat, Matat yteedy hue' je' Levi, je Levi yteedy hue' je' Melqui, je Melqui yteedy hue' je' Jana, je Jana yteedy hue' je' José, ²⁵ Je José yteedy hue' je' Matatías, je Matatías yteedy hue' je' Amós, je Amós yteedy hue' je' Nahum, je Nahum yteedy hue' je' Esli, je Esli yteedy hue' je' Nagai, ²⁶ je Nagai yteedy hue' je' Maat, je Maat yteedy hue' je' Matatías, je Matatías yteedy hue' je' Semei, je Semei yteedy hue' je' José, je José yteedy hue' je' Judá, ²⁷ je Judá yteedy hue' je' Joana, je Joana yteedy hue' je' Resa, je Resa yteedy hue' je' Zorobabel, je Zorobabel yteedy hue' je' Salatiel, je Salatiel yteedy hue' je' Neri, ²⁸ je Neri yteedy hue' je' Melqui, je Melqui yteedy hue' je' Adi, je Adi yteedy hue' je' Cosam, je Cosam yteedy hue' je' Elmodam, je Elmodam yteedy hue' je' Er, ²⁹ je Er yteedy hue' je' Josué, je Josué yteedy hue' je' Eliezer, je Eliezer yteedy hue' je' Jorim, je Jorim yteedy hue' je' Matat, ³⁰ je Matat yteedy hue' je' Levi, je Levi yteedy hue' je' Simeón, je Simeón yteedy hue' je' Judá, je Judá yteedy hue' je' José, je José yteedy hue' je' Jonán, je Jonán yteedy hue' je' Eliaquim, ³¹ je Eliaquim yteedy hue' je' Melea, je Melea yteedy hue' je' Mainán, je Mainán yteedy hue' je' Matata, je Matata yteedy hue' je' Natán, ³² je Natán yteedy hue' je' David, je David yteedy hue' je' Isai, je Isai yteedy hue' je' Obed, je Obed yteedy hue' je' Booz, je Booz yteedy hue' je' Salmón, je Salmón yteedy hue' je' Naasón, ³³ je Naasón yteedy hue' je' Aminadab, je Aminadab yteedy hue' je' Aram, je Aram yteedy hue' je' Esrom, je Esrom yteedy hue' je' Fares, je Fares yteedy hue' je' Judá, ³⁴ je Judá yteedy hue' je' Jacob, je Jacob yteedy hue' je' Isaac, je Isaac yteedy hue' je' Abraham, je Abraham yteedy hue' je' Taré, je Taré yteedy hue' je' Nacor, ³⁵ je Nacor yteedy hue' je' Serug, je Serug yteedy hue' je' Ragau, je Ragau yteedy hue' je' Peleg, je Peleg yteedy hue' je' Heber, je Heber yteedy hue' je' Sala, ³⁶ je Sala yteedy hue' je' Cainán, je Cainán yteedy hue' je' Arfaxad, je Arfaxad yteedy hue' je' Sem, je Sem yteedy hue' je' Noé, je Noé yteedy hue' je' Lamec, ³⁷ je Lamec yteedy hue' je' Matusalén, je Matusalén yteedy hue' je' Enoc, je Enoc yteedy hue' je' Jared, je Jared yteedy hue' je' Mahalaleel, je Mahalaleel yteedy hue' je' Cainán, ³⁸ je Cainán yteedy hue' je' Enós, je Enós yteedy hue' je' Set, je Set yteedy hue' je' Adán, je Adán yteedy hue' je' Dios.

4

Je mujcu' tuñ ijxta'ni ma Jesús

¹ Jesús ymiid'ajtpy anajty je Dios yjihui'ñ ymic'ajt. Co Jesús jim choñ ma Jordán mij nñi, chi je Dios yjihui'ñ ymic'ajt yajnicxi migtigüduum. ² Jesús y'ijty huixchigui'px xii jim migtigüduum. Chi je mujcu' yjot'ijxi huinma'ñ'ijxi. Jaygay jim y'ijty, e co huixchigui'px xii ñajxni, chi oy yuuböccodyi. ³ Chi je mujcu' nimay:

—Peni janch miich Dios xy'ung'adyi, nimay jada tzaa huen ahuimbity tzajcaagy.

⁴ Chi Jesús y'adzooy:

—Jaybety ity ma Dios ñecy co ca'nan miid tzajcaagy ti'ajty jäy ajcxy yjugy'aty, nañ jadu'n tzocy tüg'óciy Dios y'ayuc.

⁵ Chi je mujcu' miidpejty Jesús ma tüg cop janch cixpi, chi tüg jaxigy yajni'ixüy tüg'óciy je naax cajp huidi jii naaxhuiñbi. ⁶ Chi je mujcu' yminañ:

—Hich miich möhuipy tüg'óciy mic'ajtin ané'min etz oy'ajtin, com iich ngi'am y'ity tüg'óciy, e nmöhuibich hueñyimpinity. ⁷ Pen xyhuingoxtinäaybich xy'ojadajtpich miich, ac miich jada mje' tüg'óciy.

⁸ Chi Jesús y'adzooy, yminañ:

—Huinhuağtuutcih miich mujcu', com jadu'n jaybéty y'ity: “Co yi Huindzin miich mDios mhuingoxtinähuipy m'ojadadipy, etz yi' je' tüg pajc myajmij'adipy.”

⁹ Chi je mujcu' miidnicxy Jesús jim Jerusalén, chi miid pejty ma Dios ytijc coduu, e nimay:

—Pen Dios miich xy'ung'ajtp cödiipnax naaxcixy, ¹⁰ com jaybéty jadu'n y'ity ma Dios ñecy co quexipy Dios yi' y'ángeles ajcxy e xycuend'adipy. ¹¹ Cigixy ajcxy xyhuidzipy, ca'ydi mdzaachiy ma tzaajot.

¹² Chi Jesús yminañ:

—Ji Dios y'ayuc huidi jadu'n minam co ca' m'jot'ixipy mhuinma'ñ'ixipy yi mHuindzin Dios.

¹³ Co je mujcu' yajcixy jadu'n nej anajty jot'ixa'ñ huinma'ñ'ixa'ñ Jesús, chi huinhuağtuuty tüg tiempo.

Jesús yajtzondägy je ytung jim Galilea

¹⁴ Chi Jesús nicxy jim Galilea, e Jesús miid'ajtpy je Dios yjihui'ñ ymic'ajt. Chi Jesús ooy cömay y'ijty ma tüg'óciy cajp huinduy agonbi. ¹⁵ Hue' Jesús anajty yaj'ixpicy majaty je' ajcxy naymujctac. Chi je jäy ajcxy tüg'óciy ooy cömay Jesús.

Jesús yajpaady jim Nazaret

¹⁶ Chi Jesús ymiñ Nazaret ma anajty ti yeegy. Chi Jesús ytigiy ma naymujctac, jadu'n nej costumbre anajty miidity pocxxiiduum. Chi ytnaay'ahuí, chi ytigüy necycapxpi. ¹⁷ Chi ajcxy mooy je necy huidibi je Dios y'ayucnajtzcaxpiybi Isaías yjaay. Chi ciyhuäcxy je necy, paty jiihy tüg it ma anajty yjabyety jadu'n:

¹⁸ Je Huindzin Dios yjihui'n ymic'ajt xymiid'ajtpich, co xyajniñbicyich co nyajnimähuibich ayooitijc je oybi ayuc. Ti xyquexyich co nyajjotcugihuibich je jäy ajcxy huidi jotmay ymiid, etz nhuinmécxibich huidibi ajcxy pujxtigótyip, nañ jadu'n ajcxy je huidibi huiintzip nyajhuindixcigibich, e nbidägibich ahuätzuum huidibi yajtzaachytumb.

¹⁹ Ti xyquexyich co ngapxhuäcxibich je tiempo mina Huindzin Dios may'ajt oy'ajt tunañ miid je jäy ajcxy ycixpi.

²⁰ Chi jada' Jesús abidijty je ñecy, yajcädigüy je tungmiidpi, huin'it y'ixtacy. Chi tüg'óciy mayjäy jiihy ma naymujctac ooy ajcxy huindicxy je Jesús. ²¹ Chi Jesús yminandacy:

—Cham yajcuydun je' huidi jaybety ma Dios ñecy jadu'n nej miich ajcxy cham ti mmidooy.

²² Chi nidüg'óciy ajcxy ooy jäygidacy nej Jesús minañ, etz huinmay ajcxy ooy je ayuc huidibi Jesús ycapxy, chi ñayñimäyigixy:

—¿Nej ca'y José jada jada' y'ung?

²³ Chi Jesús yminaañ:

—Ca' yjécyty miich ajcxy xyajnimähuibich jada ayuc: “Tzoydumbi naychoy'ihuñ ci'm. Tüg'óciy jadu'n nej iich ajcxy nmidooyich ti mduñ jim Capernaum, nañ jadu'n miich octun ma mgi'ngajp.”

²⁴ Chi Jesús yjacminaañ:

—Janch iich miich ajcxy nnimäy co ni tüg jäy huidibi Dios y'ayucnajtzcaxpiybi ca' jäy ajcxy cöbicy ma yci'ngajp. ²⁵ Janch iich miich ajcxy nimäy co ooy anajty may co'ögy ytöxyjäy ya Israel jecy'ajty co Elias chinaay, co je tzaip adujcy tugüg jimijt jatdujcy po', co oy yuu miñ ma tüg'óciy naax cajp. ²⁶ E Dios ca' quejxy je Elías ma yi Israeljäy co'ögy töxyjäy ajcxy. Hue' janch quejxy huinduum jim Sarepta ma Sidón naaxjot ma tüg co'ögy töxyjäy huidi jim. ²⁷ Nañ jadu'n anajty ooy mayjäy püdz pa'm miidity ya Israel jecy'ajty co je Dios y'ayucnajtzcaxpiybi Eliseo chinay. Chi ni tüg jäy huin'it catzoocy, jëy tügpajc choocy pa'mjäy huidibi anajty yxi Naamán huidi tzoon Siria naaxjot.

²⁸ Huin'it tüg'óciy jäy huidi anajty jiihy ma naymujctac ooy yjotma'tcoty co jadayaab ayuc ajcxy midooy. ²⁹ Chi je mayjäy ajcxy nibidigy Jesús etz yajpidzimy ma je cajp. Chi ajcxy yajnicxy jim ma je tzaahuingueetz, co je cajp copcixy anajty yajpaady, e jim anajty cödiijnaxaangixy. ³⁰ Chi Jesús ñajxy cujc'amy ma je' ajcxy, chi ñicxni.

Tüg yëdijc huidibi anajty miid jibic espíritu

³¹ Chi Jesús y'idacy jim Capernaum, tüg cajp jim Galilea naaxjot, chi Jesús jäy ajcxy yaj'ixpicxy pocxxiiduum. ³² Huinmay ooy ajcxy jadu'n nej je' yaj'ixpicxy. Ñayñimäyigixy co je Jesús yaj'ixpicxy nejihuñ mijtung mij'ané'min miidity.

³³ Jiihy ma je naymujctac jiihy anajty tüg yëdijc huidibi miid tüg ca'oybi, chi je ca'oybi mic yaaxqueecy yminañ:

³⁴ —Ixmajtzcich ajcxy, ¿ti mdunamy miid iich ajcxy Jesús je nazaretpi? ¿Nej ti mmiñ co xyajhuindigoyaanigixyich? Iich miich n'ijxcapy co miich je' je Huätzpi Dios.

³⁵ Chi Jesús je ca'oybi ojy, nimay:

—Amon, pidzim ma yi jäy.

Chi je ca'oybi najtztijy je yëdijc agujc'amy ma je jäy ajcxy, huin'it ypidzimy, e ca' ni nej jactuuñ. ³⁶ Tüg'óciy jäy jim ooy ajcxy ñay'adzigiñi miñ xyipy yjanayñimäyigixy:

—¿Ti ayuc jada' yi'? Co miid y'ané'min etz mic'ajt ane'my ca'oybi etz yajpidzimy ma jäy.

³⁷ Chi Jesús capxpaady y'ijty ma tüg'óciy cajp huidi huinduy agónip.

Jesús yajtzoocy Pedro ymiid töxyjäybi

³⁸ Chi Jesús ypidigy choñ ma naymujctac, ytigüy ma Simón ytiyc. Jadu'n anajty Simón ymiid töxyjäybi mic ytoyii. Chi ajcxy cohuanüy Jesús miid je' ycixpi. ³⁹ Chi Jesús yhuindacy ma je' yhuinduu, ix'ojy je toyii, e jadu'ñi ñajxy. Chi je' mic'amy ypidigy, yajcay yaj'uucy ajcxy.

Jesús yajtzoocy mayba'mjäy

⁴⁰ Tzuu tzuu anajty jäy ajcxy yajnicxy tüg'óciy jäy ajcxy pa'mmiidpi ma Jesús. Chi Jesús cñixajy nidüg nidüg, e jadu'n anajty ajcxy chögy. ⁴¹ Chi nañ jadu'n je' ca'oybi yajpidzimy ma mayjäy, mic je ca'oybi anajty yhua'ñ yjihuy, yminañ:

—Miich je' Jesús xy'ung'ajtp.

Chi Jesús ñgi ix'ojy, ca' anajty yajhuäcxipy nicxy yjaccapxy, com ti anajty nejhuñyigixy co yj' je' je Cristo.

Jesús y'ayuccapxhuäcxy jim Galilea

⁴² Co yxñmñy, chi chooñ Jesús, ñicxy mǵtǵiduum. Ooy jāy yja'ixtāyii, chi ajcxy oy paatcixy, yajhuācxijpy ajcxy ooy, ca' anajty oc'ixmadzáangixni. ⁴³ Chi Jesús yminañ:

—Ooy jada chachcopícyty co canaag agajp ñich jada ngapxhuācxibich je oybi ayuc jadu'n nej Dios y'ane'my. Paady Dios ti xyquexyich ya naaxhuiñ.

⁴⁴ Jadu'n anajty je' capxhuācxy majaty jāy ñaymujctac jim Galilea.

5

Je acxmajtzin mǵhuinma'ñybi

¹ Tǵtcey jadu'n yjajti, jim anajty Jesús ma je Genesaret mejypa', co jāy ñimiini janch ñay'adiñiy ñay'agodiñyigixy, tzach'amidohuaangixy Dios y'ayuc. ² Chi y' iǵxpaty mejtz barco jahueengi mejypa'áy. Je acxmajtzpidijc ti anajty ypidzǵmǵixy ma je barco, jim anajty y'acxxuomy pǵjccixy. ³ Chi Jesús yajtiǵyñy tǵ barco huidi Simón anajty je'ajtpy. Chi may'ajt pǵjctzoy co huen yajǵihuāgy hueeni y' barco mejypa'áy. Chi Jesús y'ixtacy barcojoty, e jadu'n yaj'ixpijcy je mayjāy ajcxy. ⁴ Co ycapxymaayí, chi Jesús Simón ñimay:

—Nícx pídāg m'acxmadzi'ñ mejyjoty, jaydēbi mǵjtcixijpy acx.

⁵ Chi Simón y'adzooy:

—Huindzin, ti ñich ajcxy ooy njatuñ tǵ tzuu, ni ti ti ngapáatcixyich. Per mǵid mǵich m'ayuc ycixpi yi acxmadzi'ñ nbidāgibich mejyjoty.

⁶ Co ajcxy pídacy je acxmadzi'ñ mejyjoty, chi yajco'adujcy ooy may acx, jahueeni acxmadzi'ñ ycacñich mǵid je may acx ycixpi. ⁷ Chi Pedro yemi ymǵǵtǵijc huidi anajty jim ma je jadǵǵpi barco, huen mǵñ ajcxy pubedyii. Chi ajcxy ymǵñ pubejty, yaj'ujch ajcxy metzpi barco mǵid may acx, jagoo jagoo ycaquiiñ je barco mǵid may acx ycixpi. ⁸ Co Simón Pedro ijxy jadu'n, chi ycojxtinaay'ahuñy ma Jesús yhuinduu, ñimay:

—Huinhuaēctǵutcih, Huindzin, com ñich pocyjāy ñich.

⁹ Com Pedro janch tǵǵyñy anajty, etz nañ tǵǵyñy tǵǵ'óciy huidi anajty mǵid ti ytuñ, co anajty ooy may acx tzachyajnibéjtcixy. ¹⁰ Nañ jadu'n tǵǵyñy anajty je Jacobo etz Juan je Zebedeo ymang ajcxy huidibi Simón anajty ti pubety. Chi Jesús ñimay Simón:

—Ca' mdzǵǵy, jadachambi etz jacinicni xii tiempo mdunipy jāymadziñ.

¹¹ Co je barco yajmejpǵdzimy, chi ajcxy y'ixmajch tǵǵ'óciy, chi ajcxy panícxxy Jesús.

Jesús yajtzōgy tǵg jāy nǵbǵtzpa'mmǵdpi

¹² Chi jadu'n yjajti co anajty Jesús yjǵmty ma tǵg cǵp, co ñimiini tǵg yēdjic ymǵid anajty pǵtzpa'm. Co je pa'mjāy ijxy Jesús, chi nihuindacy ma yhuinduu, minucxtacy, ñimay:

—Huindzin, pen mdzojcpy jēbi xyajtzōgibich.

¹³ Chi Jesús yci' najtzxajñy nǵdoñ, ñimay:

—Ndzojcpyich, hui'm huādz.

Chi mǵc'amy je jāy choocy. ¹⁴ Chi Jesús ane'my, ñimay:

—Ca' ni pin myajnimāhuipy, nícx janchtiy nayguēxǵiñb ma teedy, jaydēbi mǵhuipy Dios huindzǵi'ñ, jadu'n nej Moisés ycǵtǵjcin je jécyip y'ane'my, mǵid y' ycixpi co ti mhuātzpǵdzimy, jaydēbi jāy ajcxy nejhuñhuipy co ti mdzōgy.

¹⁵ Je capxy'ayuc nǵgi y'oc-huācx'aditziñ, e janch mayjāy y'ocnimǵjcin, jim pin ayuc midohuaam, e jim huidi tǵōgaam. ¹⁶ Jesús ycǵōgeecpy anajty je mayjāy, ñicxy anajty mǵjtgiduum Dios ojadajtpi.

Jesús yajtzōgy tǵg jāy cǵxuxypi tecxuxypi

¹⁷ Tǵg tcey yjajti, Jesús anajty yaj'ixpijcp, e jim anajty ajcxy ññāy ma Jesús yhuinduu fariseojāy ajcxy, etz huidi jāy yaj'ixpijcp Dios ñecy huidijaty anajty ti choongixy canaag agajp ma Galilea naaxjot Judea naaxjot, etz cham huidijaty anajty ti chooñ Jerusalén. E Jesús ymǵid anajty Huindzin Dios ymǵc'ajt co jāy yajtzōgipy. ¹⁸ Chi nijējity jāy yajja'ty cǵj'am tǵg pa'mjāy yēdjicpi huidi ca' anajty yci' ytecy yǵcxy. Chi ajcxy ixtaay ma yajtiǵtǵiñhuipy pídāga'ñ anajty ajcxy je pa'mjāy ma Jesús yhuinduu. ¹⁹ Com ca' anajty ni ma tǵǵyiydac mǵid co je tǵc anajty ooy y'ǵjtzity mǵid mayjāy. Chi ajcxy mǵidpejty tǵc nǵǵixy, chi ajcxy tǵc yajcǵhuach, e chi ajcxy cǵdiññajxy cǵj'am je pa'mjāy ma Jesús yhuinduu. ²⁰ Co Jesús ijxy jadu'n nej je' ajcxy ymǵibcy, chi ñimay:

—Yēdjic, yajmeecxp mbocy.

²¹ Chi je' ajcxy huidi yaj'ixpijcpy Dios ñecy etz je judío ixpicytǵc huidi naydǵǵǵixp fariseojāy huinmaygoty, ñayñimāyǵixy: “Jada Jesús ooy ycapxtǵgy mǵid Dios. Ni pin yēdjic huaad ca' ti pocymeecxy. Tǵgpajc nHuindzin'ajtm Dios huidi pocyhuinmecxp.”

²² Jesús ñejhuñy je' ajcxy yjot yhuinma'ñ, paady ajcxy ñimay:

—¿Ti mdzachhuinmaayb ajcxy ma mǵot mhuinma'ñ? ²³ ¿Ti jactzip co minaanim co ti mbocy yajmeecxy o minaanim: “Pídǵ etz nicxni”? ²⁴ Jaydēbi mǵich ajcxy mnejhuñhuipy co ñich je' je jāy huidi tzoon tzajpjoty, nmǵidich ané'min etz mǵc'ajt ya naaxhuiñ jēbi jāy

nbocyhuinmeecxyich, paady cham nnimäyich yi pa'mjäy: "Pidǵ etz yajpidǵ mmaabejt, nicx ma mdjc."

²⁵ Chi mic'amy je pa'mjäy ytinayǵy ma je jāy ajcxy yhuinduu, etz yajpidǵy je' ymaabejt ma anajty ycōgnāy. Chi ñicxni ma ytǵc, chi ooy cōmay jāymejch Dios. ²⁶ Huin'it nidǵ'ócǵy je mayjāy ooy ajcxy jihuīy, e chi ajcxy ooy cōmay etz jāymejch Dios. Chi ajcxy ooy chǵiǵyǵy, yminaangixy:

—Cham janchtiy n'ǵxim mijhuinma'ñ.

Jesús huodzoñ je Levi

²⁷ Co jadu'n ytuni yjajti, chi Jesús jim choñ, chi ǵxy tǵ yajcogǵejtpi huidi anajty yxii Levi. Levi jim anajty iñāy ma yajcogǵejttac. Chi Jesús nimay je Levi:

—Pajaamgich.

²⁸ Chi je Levi ixmajztay huidi anajty ytuumy etz padzoñ je Jesús.

²⁹ Chi Levi mayjāy yajcay yaj'uucy ma ytǵc, cham may yajcogǵejtpi ajcxy etz jacjadyii jāy huidi iñāay ma yi mesa müd Jesús etz yi' ydiscípulos ajcxy. ³⁰ Chi je' ajcxy huidibi yaj'ixpijcp Dios ñecy etz je ǵpicytǵc huidi naydǵǵixp fariseojāy tzachni'ameechycápcxicy ni'ojǵyǵy je Jesús ydiscípulos ajcxy, yminaangixy:

—¿Na'amy co mgaayǵy m'uuccixy müd yajcogǵejtpi etz müd pocyjāy ajcxy?

³¹ Chi Jesús yminañ:

—Ca' yajmayjaty tzoymdumbi huidibi ca' ajcxy ypǵyii, jēyi huidi ajcxy píjcp. ³² Ca' ñich ti nmiñich ma je jāy ajcxy huidibi ca' pocy müdity. ñich ti nmiñich müd yi pocyjāy ycxpi co huen jothuimbijttaayǵy ma Dios.

Yaj'amidooy ajcxy Jesús ti co jāy ajcxy y'ayunas'ǵtcixy

³³ Chi je mayjāy ajcxy Jesús nimay:

—Nej co yi' (Juan) ydiscípulos ajcxy janam jadzojc jaygay y'ǵtcixy etz ycapxtáccixy, nañ jadu'n je fariseojāy ydiscípulos ajcxy janam jadzojc jaygay y'ǵtcixy. Chi müch mdiscípulos ajcxy ca' ajcxy jaygay y'ǵtcixy, caaby uucp ajcxy jabom jabom.

³⁴ Chi Jesús yminañ:

—¿Nej jēbi yaj'ayuu'aty jāy ajcxy huidi yajpatpi ma je pijcpǵ yajnixiduñ, pen quipxyi yam yajpaady müd je huidibi pijcp? ³⁵ Minamb je xii je tiempo mina je pijcpǵ yajtzoniyb, huin'it janchtiy ajcxy jēbi y'ayuu'ǵtcixy.

³⁶ Nañ jadu'n ajcxy yajnimay tǵ jihuimbit ayuc:

—Ni pin ca' huaad agǵyǵy tuc-huit müd jemyhuit, canaan jēyi yčǵdzip yi jemybi, nañ jadu'n je tucpi ca' oy yhui'ma'ñ müd je jemyhuit agǵy'ñ. ³⁷ Ni pin ca' pidāgy jemy vino ma je tucpi cochac, pen janch jadu'n octuñ, je vino jemybi yčǵdzip je tucpi cochac, chi y'ixyojctāhuipy je vino etz je cochac ñitigoydāhuipy. ³⁸ Pidāgipy ajcxy jemy vino ma tǵ jemybi cochac, chi jadu'n ca' ytigoyipy je vino ni je cochac. ³⁹ Ca' ni pin tzocy vino jemybi, pen ti anajty ŷgy vino tiibi yjejcnǵ, co jadu'n ymina'ñ co jac oy je tiibi yjejcnǵ.

6

Je discípulos ajcxy yajmǵccixy trigo cojc pocxxiduum

¹ Chi jadu'n yjajti tǵ pocxxiduum co Jesús oy ñaxy ma tǵ trigo cam, e yi' ydiscípulos ajcxy oy anajty yajmināccixy trigo tiim, chi ajcxy nǵajztǵdy, e chi ajcxy jǵcxy. ² Chi nidǵti fariseojāy yminañ:

—¿Ti co ajcxy jadu'n mdundigooy co mdǵngixy huidi ca' ñigodǵyity ajcxy mdunipy pocxin xiduum?

³ Chi Jesús yminañ:

—¿Nej ca'ni müch ajcxy mgapxy Dios ñecy nijadu'ñyi? ¿Nej ca' mnejhuīyǵy ti David ytuun co anajty yuubǵyii etz nañ co ymǵǵtǵc anajty yuubǵyii? ⁴ David ytǵy ma Dios ytǵc, chi conǵy je tzajcaagy huidibi anajty jǵby ma Dios yhuinduu, chi caay, nañ jadu'n moy je ymǵǵtǵc ajcxy. Je' tzajcaagy ca' anajty ypadyyi nicxy je' ajcxy cay. Teedy je' anajty ajcxy paatip cáayǵixp.

⁵ Chi Jesús yjacminañ:

—ñich je' je jāy huidibi tzoön tzajpjoty, jēbi nnimäyich je jāy ajcxy ti jēbi huaad ytǵngixy sábad xii.

Je yēdjic huidibi anajty yci' tǵdzip

⁶ Chi jadǵtecy yjajti tǵ pocxxiduum, co Jesús ytǵy ma tǵ naymujctac, chi jāy yaj'ixpijcy. Jǵby anajty tǵ yēdjic huidi y'aoygi' anajty tǵdzip. ⁷ Chi huidi ajcxy yaj'ixpijcp Dios ñecy etz fariseojāy ajcxy ix'ǵxy pa'ǵxcixy Jesús nej pen jāy yajtzōgam pocxxiduum, e je' ajcxy anajty müd ycxpi xǵhua'ñ. ⁸ Jesús ñejhuīyb je' anajty ajcxy yjot yhuinma'ñ. Chi Jesús nimay je yēdjic huidibi anajty yci' tǵdzip:

—Pidīg, tinayīg mayjāy'agujc.

Chi je' y'tinaayīg. ⁹ Chi Jesús yminañ:

—Nyaj'amidohuaamybich miich ajcxy tüg ayuc. ¿Nej Dios ñecy yminañ, jëbi oybi nduunim pocxxi'duum o jëbi jibicpi nduunim, nyajtzoocim jây o nyajtigooyim jây yjugy'ajt?

¹⁰ Chi Jesús ajcxy huindicxpejtay nidüg'óciy, chi nimay je pa'mjây:

—Xajt'u mgi'.

Chi je' yci' xajtiy, huin'it je' yci' choocy. ¹¹ Chi je' ajcxy huidi yaj'ixpicp Dios ñecy etz je ixpicytijc huidi ajcxy mijpidacp judío ycostumbre ooy ajcxy yjot'ambijcy, ñayñimáayigixy miñ xyipy:

—¿Nej ajt n'octuunim jada Jesús?

Jesús huin'ixy je majmetzpi discípulos ajcxy

¹² Jadu'n yjajti huin'it xii Jesús ñicxy mjtig'iduun Dios ojadajtpi. Tüg tzuun ooy Dios mibijctzooy. ¹³ Co yxiimuy, chi Jesús huoomiñ y' ydiscipulos ajcxy. Chi huin'ixy je majmetzpi, etz yxiimoy ajcxy, apóstoles. ¹⁴⁻¹⁶ Chi Jesús yhuin'ixy je Simón huidi yxiimoy Pedro; je Andrés, Pedro y'uch; Jacobo etz Juan; Felipe etz Bartolomé; Mateo etz Tomás, Jacobo hue' je' Alfeo ymang; etz Simón huidi jây ytiijy Zelote; Judas, Jacobo y'uch; etz Judas Iscariote huidibi nañ jadu'n Jesús cijejc ma ymidzip.

Jesús yaj'ixpicy mayjây

¹⁷ Chi Jesús miid'idacy je discípulos ajcxy, chi oy yhuäcxipy ma tüg ajoy miid ydiscipulos ajcxy etz mayjây huidi anajty ti choongixy Judea naaxjot, etz Jerusalén, etz ma mejypa' jim Tiro etz Sidón. Ymiñ ajcxy je mayjây co amidoo'idáani Jesús y'ayuc etz nañ chōgaangixy je pa'm huidi ajcxy ymiid. ¹⁸ Cham je huidi anajty ayo'n tzachpaatp miid ca'oybi, nañ tzoocp je' anajty ajcxy. ¹⁹ Chi tüg'óciy je jây ajcxy janch ñidonamy anajty ajcxy je Jesús, co ymiid mic'ajt co jây tüg'óciy yajtzōg.

Je jotcuyc'ajt etz je cajotcuyc'ajt

²⁰ Chi Jesús huindicxpejtay je mayjây huidi ajcxy ixpigaam y' y'ayuc, e yminañ:

—Jotcuyc miich ajcxy ayoobtijc, com miich ajcxy cham xypaat Dios y'ané'min.

²¹ Jotcuyc miich ajcxy huidi cham yuubó'cip, co mgüxiib miich ajcxy. Jotcuyc miich ajcxy huidi cham jotmay miid, co ypáadip xii tiempo mina mxondáaccixipy.

²² Jotcuyc miich ajcxy mina anajty jây ca' xy'ixáangixy, co pin xy'ixtjicixipy, e co jây ajcxy jibic xyñigapxa'ñ xyñixiga'ñ miid iich ycixpi, je jây huidi tzoon tzajpjoty. ²³ Mxondäg miich ajcxy huin'it xii, etz mjetcug'iygixip, com ooy chachmijjity huidi ajcxy mbadaamy tzajpjoty. Com jadu'n anajty jecy'ajty miich mmij'ap mmijteedy ca' ixangixy je huidi anajty Dios y'ayucnajtzcaxxiipy.

²⁴ Miich ayoob ajcxy comeñjây, com ca' ti jotcuyc'ajtin mjacpadaangixy huin'it xii (co Dios tiydunip je naaxhuñjây).

²⁵ Miich ayoob ajcxy huidi cham oc'agujc'ajtp ocjotcuyc'ajtp, ayo'n jotmay ajcxy mbaadip, e myajmayjadipy miich ajcxy tijaty.

²⁶ Miich ayoob ajcxy co ajcxy myajniapxipy myajnimiydägipy, com jadu'n jecy'ajty miich ajcxy mmij'ap mmijteedy nimay je jây ajcxy co ooy y'oyjây huidi ajcxy anajty najtzcapxiyby ayuc huidibi ca' ytiy yjanchity.

Nej huaad nmigüg ndzójcim

²⁷ Chi Jesús yjacminañ:

—Miich ajcxy huidi cham amido'ijtp iich n'ayuc, iich miich ajcxy nimaayb: Tzójccix mmidzip, mi'oyjây'ajtcix huidijaty ca' xy'ixaangixy. ²⁸ Migapx je jây ajcxy miid oyjot oyhuinmañ huidi ajcxy jibic xyñigapxp xyñi'ojiiyb. Mibijctzoogixy y' Dios miid je' ajcxy ycixpi huidibi xyñigapxp xyñi'ojiiyb. ²⁹ Pen ji pin xycojxy ma y' mhuinjijp, mo' jadüg adu'm'amy ahuin hueñ coxy. Pen ji pin xypigaani y' mjocxhui, jactimmo' mñijen huen yajnicx. ³⁰ Pin xypijctzohuip tijaty, mo'. Pin xypijcip huidi miich mjé'ajtpy, ca' mbijctzohuipy jadüg'oc. ³¹ Nej mdzocy tunipy jây miid miich ajcxy, nañ jadu'n miich ajcxy mdunipy miid y' ajcxy.

³² Pen miich ajcxy jëyi mdzójccixpy pinjaty xychojccixp, ¿ti oyjây'ajtin jada' miich ajcxy m'ocpaadipy? Nañ jadu'n je pocyjây ajcxy chojcyp pinjaty y' ajcxy tzójcip. ³³ Pen mdumyb oybi huidijaty mmid ooy mnaymigüg'adyii. ¿Ti oyjây'ajtin jada' miich ajcxy m'ocpaadip? Nañ jadu'n je pocyjây ajcxy tuñ oybi miid ymigügtijc. ³⁴ Pen myejcpijctzou miid je jây huidibi miich ajcxy mijjp'ijxpy co nañ jadu'n xymôhuipy tigatii, ¿ti oyjây'ajtin miich ajcxy mdumyb? Nañ jadu'n y' jibic jâydiyc jayejcpi tijaty pijctzoy co nañ jadu'n jijp'ijxcixy co ymôhuipy tigatii. ³⁵ Miich ajcxy, tzójccix mmidzip, mi'oyjây'ajtcix mmidzip, yajpijctzoogix tijaty, e ca' ni ti mijjp'ijxcixipy co ajcxy jac mij mbaadip. Jadu'n miich ajcxy mij mbaadip oy'ajtin e mnaydiijiyb ajcxy je mijpi Dios y'ung. Com Dios pa'ayoodaayb tüg'óciy y' jây ajcxy

huidibi ca' ti jãygidãgy, etz huidi jibicjãy. ³⁶ Miich ajcxy pa'ayoo migũgtijc ajcxy, jadu'n nej mDios Teedy tzajpjotypi ypa'ayooy huenyimpĩny.

Ca' mmigũg ni ti myaj'ix'ixipy myajpa'ixipy

³⁷ Ca' mmigũg ni ti myaj'ix'ixipy myajpa'ixipy, huin 'it ca' pin xy'ix'ixipy xypa'ixipy. Ca' mmigũg mbocy'ixipy, e huin'it ca' pin xypocy'ixipy. Huinmecx mmigũg, e huin'it nañ jadu'n Dios myajhuinmeecxip. ³⁸ Mo' mmigũg etz huin'it miich ajcxy Dios xymõhuipy quipxy ooy tijtãch etz janch yajxon y'ũjtzy cõdinaayb. Com yi quipx'i'ñ tiibi myajquipxy, nañ yi' mĩd xyquipxhuimbidity.

³⁹ Chi Jesús yajnimay je mayjãy tũg jihuimbity ayuc:

—¿Nej jẽbi tũg jãy huintzpi ymigũg huintzpi huiztyõyñi? ¿Nej ca' mdijy nimetz yjutõgãgixipy? ⁴⁰ Ca' ji ni tũg xpijcpĩ huidi nĩgi xpijcyip ca'ydi yhuindzin, pen ji pin huãdz yjadim'ixpicy najtzpadĩhuipy yhuindzin.

⁴¹ ¿Na'amy co mic'amy mbocy'ixy mmigũg co hueeni ytundigoy, e miich jac mij ooy mdundigoy, e ca' mjihiu'ñybicy? Tĩm jadu'n nipaady nej jihuĩy ti m'ixy pi'cpũx ma mmigũg yhuin, e ma miich mgi'mhuin jac jĩlby mij quipy, e ca' m'ixy je quipy ma mgi'mhuin. ⁴² Ca' huaad mĩmãhuipy mmigũg: “Nayyegũ mĩñich pũx n'ocyajpidzim maabi mhuin”, e miich ca' m'ijxy mij quipy ma mgi'mhuin. Jibicjãy miich. Jayijp miich myajhuãdzp mjet mhuinma'ñ, huin'it jẽbi mmigũg m'ihuĩp mgapxhuĩp, jadu'n nipaady nej jihuĩy ti myajpidzimy je quipy maabi mhuin, jachuãdz m'ixĩgipy e chi jẽbi yi pi'cpũx myajpidzimipy maabi mmigũg yhuin.

Je quipy je ytiim, yi' mĩd ycixpi yaj'ixcapy

⁴³ Ca' yi' yoyjãyity huidi jibic tuumb, nañ jadu'n ca' jibicjãy huidi oy tuum, tĩm jadu'n nipaady nej tũg quipy. Ca' ji yi' oyguipy huidi jibic tiim'ajt, nañ jadu'n ni ca' yjibicquipyity huidi oy tiim'ajt. ⁴⁴ Com ni je' quipy yaj'ixcãp mĩd ytiim ycixpi. Ca' pin higuery tiim tucy ma quipy apymĩdpi. Nañ ni pin ca' uvas cha'm piy ma aadz apymĩdpi. ⁴⁵ Je jãy oyjãybi ma yjot yhuinma'ñ yajpidzimy oybi. Je jibicjãybi ma yjot yhuinma'ñ yajpidzimy jibicpi. Huidibi yhuinmaayb jotjoty huinma'ñjoty yi' ycapxyp.

Je mejtznajxpi poch'y'ix

⁴⁶ Chi Jesús yjacmĩnañ:

—¿Nej co nigo mĩnaangixy: “Huindzin, Huindzin”, ni ca' ajcxy mdũngixy huidi nyajnimaaigixpy? ⁴⁷ Tũg'õciy jãy huidi xñimimbich etz xymĩdoohi iich n'ayuc etz cuyduñ, iich nyajni'ixĩhuipy pin je' ymĩdũgnax. ⁴⁸ Quipxyiib tũg yẽydijc huidibi ytiiccoj ma tzaa nĩcxy, chi nĩdajy ooy cĩcy, chi pidãgy poch'ix tzaa nĩgixy, co mĩjni ycomy nĩmĩñ je tijc, mĩd tũg'õciy ymĩjaa yajajpidĩga'ñ je tijc, e ni ca' jadu'ñy yajyũcxy, com tzaagixy anajty ypojtztoõñty. ⁴⁹ Yi jãy huidi mĩdoob iich n'ayuc e ca' cuyduñ, mĩdquipxy jadu'n yi' nej tũg yẽydijc co ti ytiiccoj. Ni ca' poch cĩcy ypojtztoõñty, jẽy naaxhuingixy nĩdajy hueeni. Co je mĩjni ymĩ mĩd ymĩjaa, chi yajpidĩgy je tijc, chi oy yhuindigoydã.

7

Jesús yajtzõgy tũg mĩjtungmĩdpi Romano ytumbi

¹ Co Jesús ycapxtaay ymĩydactaay mĩd je mayjãy huidi anajty jim amĩd'ijtp, chi ytiigiy jim Capernaum. ² Jim anajty tũg Capitãn tũg ytumbi hue' anajty pijcip, janch tĩm õgaanip anajty, e je soldado huindzin ooy anajty tzocy je ytumbi. ³ Co je capitãn ayuc mĩdooy jadu'n nej Jesús ytuñ, chi quejxy judio mĩjãydijc, huen nĩcxy mĩnuucxtaaccixy Jesús co je' ymĩnipy ma ytiic yajtzõgiyb je' ytumbi. ⁴⁻⁵ Chi je mĩjãydijc ajcxy ymĩñ ma Jesús, chi ajcxy cohuanĩy ooy, pijctzou may'ajt, nimay:

—Jadayaabi capitãn ymĩhuaad co mbubedipy, com yajmij'ajtpy iich ajcxy ngajp, ti cojy iich ajt naymujctac.

⁶ Chi Jesús nĩcxy mĩd je' ajcxy. Co ajcxy mĩhuingooñ je tijc, chi je capitãn quejxy ymigũg huen nĩcxy jipcobadiy Jesús, nĩmãhuipy:

—Huindzin, ca' nej mĩnayjihuĩy, ca' iich mĩhuaadity co mdigĩhuipy ma iich ndijc. ⁷ E paady ca' iich njot ti mĩctuñ co iich mĩch ci'm nĩcx n'ixtãy. Jẽda'ajty mĩch nigoo capx, e ti anajty ndumbich chõgy. ⁸ Nañ jadu'n iich mĩmĩdich soldados ajcxy huidi ajcxy xycapxcõbĩcpich. Nĩmãych tũg: “Nĩcx”, e nĩcxp; nĩmãych jadũg: “Mĩn”, e mĩmb; nĩmãych ndumbi: “Tun jada”, e ytumyb.

⁹ Co Jesús mĩdoy nej je capitãn ymĩnañ, chi jihuĩy ooy, chi n'ixhuimbijty nimay ajcxy huidi pamiinip:

—Iich mĩch yim nĩmãaygixyp co ca' nbaadyich Israel jãy huidibi xymĩbĩcpich jadu'n nej jadayaab agatz jãy.

¹⁰ Co ajcxy je quexyöybi yhuimbjtcixni ma je tije, chi oy páatcixni je tumbi ti anajty y'agidägy.

Jesús yajjugypijcy tüg co'ögytöxyjäy y'ung tübi anajty y'ögy

¹¹ Chi jadu'n yjajty huin'it xii co Jesús anajty ñicxy ma tüg cajp huidi anajty yxii Naín. Miid anajty ñicxy jadyii ydiscipulos ajcxy etz mayjäy. ¹² Co yhuingooñ ma anajty ycajp tigihuaani, chi minaybaati jäy ajcxy, ñicxy anajty ajcxy tüg öcpi yajnaaxtigiygixy, huidi anajty ungday tügpajc y'ung'ajtpy. Hue' je' anajty co'ögy je töxyjäy, e miid anajty ñicxy maycajpjäy. ¹³ Co je Huindzin Jesús ijxy, chi pa'ayogoty je töxyjäy, chi nimay:

—Ca' myäxy.

¹⁴ Chi Jesús ymijhua'cy, nidoñ je öcpi cajón. Chi ajcxy ytinayxijpy je huidi anajty ajcxy öcpi ciyñicxp. Chi Jesús yminañ:

—Yëdyjc, ich miich yam nimaayb, pidig.

¹⁵ Chi je yëdyjc iñaygy huidi anajty ti y'ögy, e ytiigy miydaacp. Chi Jesús yajcädigiyñi je' ytaj. ¹⁶ Chi ajcxy nidüg'öciy ooy ñay'adzigiyyoty, e Dios jäymeich cōmay, yminaangixy:

—Tüg mijpi Dios tiy'ajtmütpi cham yajpatp ma ich ajt.

Nañ jadu'n ajcxy yminaangixy:

—Ti Dios ni'ijxcidägy yi yñaax ycajp.

¹⁷ Ooy Jesús yajcōmay ma tüg'öciy Judea naaxjot, etz ma tüg'öciy jac huinduy agonbi naax cajp.

Je Juan je Bautista yquexyöybi

¹⁸⁻¹⁹ Chi je jäy ajcxy huidi anajty Juan je Bautista yaj'ixpijpy nimiydactay jadu'n nej miid ytuni yjajti Jesús. Chi Juan huoooy metz yi' ydiscipulos ajcxy, e quejxy ma Jesús yajpaady. Chi Juan nimay co huen nicxy amidooigixy Jesús, pen yi' je' je Cristo huidi anajty miinaam, o pen n'ahuixpy ajcxy huingbi. ²⁰ Chi je Juan yquejxyöybi miin ma Jesús nimay:

—Yi Juan je Bautista ich ajcxy ti yquexyich ma miich amidohua'ñ pen miich je' je Cristo huidi miinaam, o ç'n'ahuixpyich ajcxy huingbi?

²¹ Tim huin'itiy Jesús ooy mayba'mjäy yajtzoocy. Yajtzoocy nañ jadu'n huidi anajty ajcxy ooy mij yuu mij pa'm yaj'ayoyi, etz nañ yajtzoocy pinjaty anajty ca'oybi miid ma yjot yhuinma'ñ. ²² Chi Jesús je Juan yquejxyöybi nimaayi:

—Nixc nimaaygix je Juan jadu'n nej ti m'ijxcixy ti mmidoogixy, co yi huintzpi ti yhuindicxgy, yi tecyma'tpi ti yöygy, yi nübützpa'mmiidpi ti chögy, je cōnatpi ti ymidohuicxixy, je öcpi ajcxy ti yjugypijcy, e ngapxhuacxixy oybi ayuc ma ayoohtijc. ²³ Jotcujc yi' ajcxy huidi ca' huinma'ñyigoogyixy miid ich ycixpi.

²⁴ Co je Juan yquexyöybi yhuimbjttay, chi Jesús nimiydaccoty je Juan ma je mayjäy ajcxy, yminañ:

—Co ajcxy ti m'oy mijtigiduum, çti ti m'ijxcixy? ÇNej ti m'ijxcixy tüg jäy ametz jotmetz, jadu'n nejhuüy tüg nahuax huidi pojmiimb pojxiyp? ²⁵ Chi jada', çti oy ti m'ijxcixy? ÇTüg yëdyjc huidi miid oy yhuut yxöxyity? Yi jäy ajcxy oy yxoixpyi huidi agujc jotcujc tzinaaygixp hue' ajcxy yajpaady ma yi rey ytije. ²⁶ ÇTi ajcxy ti m'ixy jim mijtigiduum? ÇTüg jäy huidi Dios ytiy'ajt miid? Janch ti m'ijxcixy tüg Dios ytiy'ajtmüdp, etz jancñi ymijity je' ca'ydí Dios y'ayucnajtzcaxiybi huidi jecy'ajty tzinay. ²⁷ Je' jada je jäy huidi Dios ñigapxyp ma ñecy ma Dios jadu'n yminañ:

Cham nguexyich ich nguexyöybi jayijp ma miich, je' yaj'oyihip je jäy ajcxy yjot yhuinma'ñ miid ich ycixp, tim jadu'n nipaady nej jihuüy jäy tü'aa yaj'oyiy co rey ymina'ñ yjada'ñ.

²⁸ Ich miich ajcxy yam nimaayb co huidijaty ajcxy töxyjäydic yajpi'c'ajtpy, ca' ji ni tüg Dios y'ayucnajtzcaxiybi huidibi jancñi ymí jity ca'ydí Juan, je Bautista. Chi jada' je jac mutzpi huidi jibby tzajpjoty yajpaatp ma Dios y'ane'my, jancmij je' ca'ydí Juan.

²⁹ Co ajcxy je mayjäy jadu'n midoy nañ jadu'n je yajcogüejtpidijc ajcxy huidi anajty nübéjtcixy ma Juan, chi ajcxy miinañ co Dios ytudägyity. ³⁰ E je fariseos ajcxy etz je escribas ajcxy huidi anajty ca' nübéjtcixy ma Juan, ca' ajcxy mijpidacy huidi anajty Dios ytunamy miid je' ajcxy ycixpi. ³¹ Chi je Huindzin Jesús yminañ:

—ÇTi miid nyajquixpñihibich jadayaabi jäy huidi tzinayb ma jadachambi tiempo? ÇHuidi miid nyajtügñihibich? ³² Jadu'n nej pi'ctijc huidi ajcxy iyñiyb ma jäy yjugyixy ytooccixy. Mijhuan mijjihuiygyixy ymigüjtijc: “Ti njayajxüxich flauta e ni ca' ti m'ejtcixy; ti nja'ñhui ajcxy iy jotmaymiidpi, e ca' ti myaaxcixy.” ³³ Chi Juan je Bautista ymiñ, e je' ca' anajty cay, ni ca' vino ügy, chi miich ajcxy minaangixy co Juan ymiid ca'oybi. ³⁴ Chi ich, je jäy huidi tzoön tzajpjoty, nmiñich, chi caaybich uucpich, e miich ajcxy minaangixy: “Ijxcix, cha tüg yëdyjc janch cax janch vino uucp, huidi migüg'ajtpy yajcujtpidijc etz pocyjäydic.” ³⁵ Je tiy'ajt ji je' ñigüexgy ma je pinjaty nigapxp nimiyaacp tiy'ajt.

Jesús ma Simón je fariseojäy ytiyc

³⁶ Chi tög fariseojäy may'ajt pijctzoy, co Jesús anajty müd ycaya'n. Chi Jesús ytigüy ma je fariseojäy ytiç, chi iñay'ahuüy ma mesa. ³⁷ Chi jim anajty tög töxyjäy huidibi anajty jibic tzinaayb jibic jugy'ajtp ma je jimbí cajp. Co je' nejhuüy jibiy Jesús ma fariseojäy ytiç iñay ma mesa, chi mimiñi tög quiig aceite huidibi ooy oy xuugy, chi midigüy tigoty. ³⁸ Chi ypiguetz'ahuüy ma Jesús ytecy ymijç, e chi yajxooci Jesús ytecy müd huinní e yajpöt müd yçohuay, chi yajjaaxy je aceite huidi ooy oy xuugy. ³⁹ Co jadu'n ijxy je fariseojäy, je' huidibi anajty ti huoy Jesús, chi jot'ajti yminañ:

—Co ixypiy jada Jesús y'ocjējity Dios ytiy'ajtmüdpí, y'ijxcapxy ixypiy pin jäy nejpy jäy yi töxyjäy huidibi nidoonip co yi' yjibictzinäy yjibicjugy'aty.

⁴⁰ Chi Jesús yminañ:

—Simón, cham iich tög ayuc nmüdidyich huidi nyajnimähuamy.

Chi je' y'adzooy:

—Yajnimaaýgich, Huindzin.

⁴¹ Chi Jesús yminañ:

—Tög comeefjāy ymüid anajty metz jäy huidi ti ñuucxy. Tög jäy anuucxy migoox migo'px denario meen, e je jadügpi anuucxy huixchigui'px majc. ⁴² Com je' ajcxy ca' anajty müdity ti müd cuedip, chi je comeefjāy huinmecxy nimetz. Miich ocnímaaygich, ¿je metzpi jäy huidi nuucxy, huidibi je' nēgi chojpy?

⁴³ Chi Simón y'adzooy:

—Hue' n'a'ixüyich je tiibi huinmecxy jac'anaxy.

Chi Jesús yminañ:

—Ti mdiygapxy.

⁴⁴ Chi Jesús ni'ijxhuimbijty je töxyjäy, e nimay Simón:

—¿Nej m'ijxyp jadayaabi töxyjäy? Co ndigüyich ma mdiç, ca' miich nñ xymooyich co ndecy nbüjibich. Jadayaabi töxyjäy iich ndecy ti xypüjp müd yhuinní, e ti xyméexyich ndecy müd yçohuay. ⁴⁵ Ca' iich miich ti xychüçxy. Jada töxyjäy jadu'n nej ti ytiç tigüy, xychüçtiyb iich ndecy. ⁴⁶ Iich miich ca' aceite mbidäy ma iich ngohuajc. Jada töxyjäy ti xyajjaaxi ndecyich aceite huidi ooy oy xuugy. ⁴⁷ Paady iich miich nyajnimäy co jada töxyjäy huinmecxy yi' ymaybocy, co tiibi oyhuinma'n yajtuñ cixyot huiniçot. Pinjaty hueeni ypocy yajhuinmecxi, hueeni yi' chójcin yajniquëxgy.

⁴⁸ Chi Jesús je töxyjäy nimay:

—Ti miich mbocy yajhuinmecxtäy.

⁴⁹ Pinjaty anajty iñayb ma je mesa ñayñimáayigixy miñ xyipy:

—¿Pin jäy jada jada' co nañ yhuinmeecxipy jäy ypocy?

⁵⁰ Chi Jesús nimay je töxyjäy:

—Ti m'alma ñidzögy co ti xymibicyich. Nicx jotcujc.

8

Töxyjäydijc huidibi anajty Jesús pubejtp

¹ Co jadu'n yajti, chi Jesús ñicxy ma tög'óciy je mij cajp etz mutz cajp, capxhuäçxy je oybi ayuc maabi Dios y'ané'min. Je nimajmetzpi ydiscípulos ajcxy müd ñicxy. ²⁻³ Etz nañ ymüidnicx nijējity töxyjäydijc huidi anajty Jesús ti yajtzögy huidi ca'oybi anajty ymüid etz jac tijaty pa'm. Hue' je' ajcxy anajty je María je töxyjäy huidi anajty xiijip Magdalena, je huidibi Jesús yajpidzimi huixtucy ca'oybi ma je'; etz Juana, je huidibi ñay anajty xiijip Chuza, e je Chuza hue' je' je rey Herodes ytungmüdpí; etz Susana, etz jacjadyi ajcxy huidi anajty ajcxy pubejt Jesús müd tijaty anajty ajcxy ymüid.

Je niipi y'ijxpejt

⁴ Co mayjäy ooy ñayyöymujc ma Jesús yhuinduu huidi tzoön ma tög tög cajp, chi Jesús nimay je mayjäy ajcxy:

⁵ —Cha tög ayuc nyajnimähuaangixy. Jadu'n jäy tög choñ niipi, ñicxy trigo tiim huijpi. Co je trigo tiim huijy, chi nijējity ypaic oy ycäy migtüguç, chi je jäy ajcxy yajhuägpejty, e huidi ca' yajhuägpejty, chi joon piihuigü. ⁶ Chi nijējity trigo pajc oycäy ma tzaa nicx. Co ymujxy chi je' ytiç, je' co anajty naax ca' yxoogity. ⁷ Chi nijējity trigo pajc oycäy ma apyot, chi ymujxy quipxy müd apy'ung, chi y'ujtz'o'ctay. ⁸ Chi nijējity trigo pajc oycäy ma je naax oybi huinnätzujc, chi ymujxy, chi yeectzooñ, ytiim'ajty oyjaty, tög trigo pajc migo'px oyco'ity.

Co Jesús je miydägi yajmay chi yjactimcapxcoty, yminañ:

—Pin midohuamb jada ayuc, huen midooy.

Nej yhuimbizimy je niipi y'ijxpejt

⁹ Chi je discípulos ajcxy y'amidooy:

—¿Nej jada jadu'mbi jihuimbit ayuc yhuimbizimy?

¹⁰ Chi Jesús yminañ:

—Miich ajcxy jaydëbi mnejhuñhuipy huidi Dios ñigapxpy ñimiydacpy coyüch'amy ma y'ané'min ycötüjcin. Jacjadyibi jây jhuimbit'amy nyajnimayich, jaydëbi pinjaty huidi ijpg ca' ajcxy y'ixipy, etz pinjaty midoob, ca' ajcxy mido'mbigipy.

Jesús capxticxy je ñiipi y'ijxpejt

¹¹ Jadu'n je jhuimbit ayuc yhuimbizimy: Je trigo pajc Dios je' y'ayuc. ¹² Je trigo pajc tübi tügujcy cäy, je' je' jadu'n nej jây huidi midoob Dios y'ayuc, chi mic'amy ñiminyii je ca'oybi, e piibidzimday je Dios y'ayuc ma yjot yhuinma'ñ, ca'ydi mibic etz ca'ydi y'alma yajnidzögyii. ¹³ Je trigopajc huidi cähu ma tzaajot, je' yi' ajcxy huidi je ayuc midoob, chi cöbicy jotcuje, chi je' ca' ytictztigiy, tzojccixy y'ocmibicy, co agapxiyb paaty chi ixmajtzn. ¹⁴ Je trigo pajc huidi ti cähu apy'agujc, je' je' ajcxy huidibi midoob, chi co ñicxni jâydiögyii Dios y'ayuc müd jotcuje'äjtin tzaaayin etz jugy'äjtin etz comeen'äjtin, e chi ca' Dios y'ayuc yhuim'y ma yjot yhuinma'ñ. ¹⁵ Je trigo pajc huidi cähu ma oyñaax huinnätzcuje, je' ajcxy huidi oy etz tudägy yjot yhuinma'ñ müdity. Chi je Dios y'ayuc midohui'my, e oñdägy'amy Dios y'ayuc ymayiy ma yjot yhuinma'ñ.

Je lámpara ñi'ijxpejt

¹⁶ Co jây ajcxy jündicxi'ñ nöctzoy, chi ca' ajcxy cöjupy müd tu'tz, nañ ca' huaad pidägy cijx päti'py, hue' janchtiy pidaaccixy ma jündicxpejt, co pin ytigiy jëbi icy je jün. ¹⁷ Ca' ni pin ayüch tunipy e nicxy ycayajnejhuñ, ca' ni pin ti tunipy ameech e nicxy ycaniquëxigy. ¹⁸ Paady miich ajcxy midoogix yajxon co pin tijaty müd, jacyajmöhup yi'. Pin ti camüd, yajpigipy je' huidi anajty yjamüd.

Jesús ytaj etz je jugymigüj

¹⁹ Chi Jesús ytaj etz y'uch ajcxy ñimiini, ca' ajcxy nimejch Jesús yajxon müd mayjây ycixpi.

²⁰ Chi Jesús yñimaayi:

—Cheeby mdaj etz m'uch ajcxy tiba'y, miich ajcxy xyjamigapxam.

²¹ Chi Jesús yminañ:

—Yi jây ajcxy huidibi Dios ayuc midoohuipy etz cuyduunip, yi' ich ndaj'ätypich etz n'uch'ätypich.

Jesús yajxemy je poj etz je nñ co anajty chachpidigy

²² Chi tüg teczy yjajti Jesús ytigüy ma tüg barco müd ydiscipulos ajcxy, chi Jesús yminañ:

—Tzoc jim'amy ñinaxy nájxim.

Chi ajcxy chooñ. ²³ Chi ñigujc anajty nícxcixy co Jesús ymi'ögy. Chi tüg mic poj miñ ma je mejy. Chi je barco ñi yajtigiyi, janch yinjaty jahueenjaty ycaquiñ. ²⁴ Chi ajcxy Jesús nimijhuägy, tijyüxy ajcxy nimaagyixy:

—¡Huindzin! ¡Huindzin! Cham ajt n'ocquiniñ.

Co Jesús oy ymähuijy, chi jipcogapxiy je poj etz je mejy co anajty chachmijjëtzpety ma barco. Chi je poj yhuäcxijtay, y'amunday. ²⁵ Chi Jesús yminañ:

—¿Ma miich ajcxy je mmibijcin?

Chi ajcxy yjanchchigygoty janch yhuinmay ajcxy ñayñimáayigixy miñ xyipy:

—Pin yëydjc jada jada' co je poj etz nñ jüguexy, etz yajhuäcxipy, etz ycapxycöbgyii.

Je Gadarajây huidibi anajty ca'oybi müd

²⁶ Chi ajcxy ymejch ma je gadarenos naaxjot, huidi hui'm jim'amy ñinaxy ma je Galilea mijlaguunba'. ²⁷ Co Jesús ñiibizimy, chi jipcobadiy tüg yëydjc huidi anajty ti choñ ma je Gadara cajp. Je' anajty ymüd ca'oybi, ti anajty yjejcni maabi ypadyii. Ca' je' anajty huit yajtuñ, nañ ni ca' anajty chinäy ma ytiyc, öcpijut anajty yajtznähuñyb. ²⁸ Co je' ixpaty Jesús, chi yaaxqueecy, e ycoxtinay'ahuñy ma Jesús yhuinduu, yminañ janch mic:

—¿Ti ich miich co yñimiñich, Jesús, tügpajc mijpi Dios y'ung? Tun may'ajt ca' nijot yxchachchaachytüñich.

²⁹ Jadu'n minañ com co anajty Jesús ixquexy je ca'oybi ma je jây, ti anajty yjejcni ma je ca'oybi anajty tzach'ane'my je jây. Coxoch anajty ymigügtic ymüd'adyii müd cadena. Janch ypojtpy cadena, chi ca'oybi anajty yajnicxyii mijtigüduum. ³⁰ Chi Jesús y'amüduy je locijây:

—¿Ti miich mxü?

Chi je ca'oybi yminañ:

—Ich nxü Legión (hue' yhuimbizimy nimay).

Jadu'n minañ com nimay anajty ca'oybi ti ytigüygixy ma je jây. ³¹ Chi je ca'oybi may'ajt pijctzoy ma Jesús co ca'ydi yquexyii ma ayoodactuuby. ³² Jim anajty tüg quepy idzim chachjüxcixy ma je ujtzjot. Chi je ca'oybi may'ajt pijctzoy co huen yajtigiyhuipy je' idzim. Chi Jesús ni'adzooy. ³³ Co je ca'oybi ypidizimy ma je jây, chi ytigüy ma je may'idzim. Huin'it je may'idzim ñayñajtzjibibiyaadyi ajcxy ma tüg ahuoc, chi oy ajcxy ycadäy nijoty, chi y'ögtay.

³⁴ Chi je idzim cuend'ajtpi ajcxy co ixy jadu'n nej ti yjadyii müd ajcxy y'idzim, chi ajcxy yqueecy, oy nimiydaaccixy cajpjoty etz majaty tundac. ³⁵ Chi mayjäy ajcxy chooñ oy ixcixy jadu'n nej anajty ti ytunyii ti jadyii, oyja'tcixy ma Jesús. Chi je mayjäy ajcxy paty je yëdyj, tiibi anajty ca'oybi ñibidzimyii ycöbidzimyii, iñäy ma Jesús yhuinduu, huit müd etz huijy quejy, chi ooy je jäy ajcxy chigüy. ³⁶ Chi pinjaty ajcxy iix müd miydacy jadu'n nej yi' choocy, je jäy huidi anajty ca'oybi müd. ³⁷ Huin'it tüg'óciy je mayjäy ma gadarenos naaxjot etz jadyii cajp huinduy agonbi, chi ajcxy may'ajt pijctzoy ma Jesús co huen jihuägy ma je' ajcxy, co anajty ooy chigüygixy. Chi Jesús ytigüyñi barcojoty yhuimbijtni. ³⁸ Chi je jäy tiibi anajty ca'oybi ñibidzimyii ycöbidzimyii pijctzoy may'ajt co müd'idan Jesús. Chi Jesús müd capxycijxy, nimay:

³⁹ —Ni huimbit mdijc, etz nimiydäg jada mijpi tung huidibi Dios ti tuñ müd miich ycixpi.

Chi je' ñicxy capxhuäcxy je tiy'ajt cajp cajp jadu'n nej anajty mijhuinma'ñ Jesús ti tuñ müd je' ycixpi.

Je Jairo ñix etz je töxyjäy huidibi Jesús yhuitpa' nïdoni

⁴⁰ Jadu'n yajti co Jesús yhuimbijty co chooñ Galilea, chi je jäy ajcxy cöbijcy Jesús janch agujc jotcujc, com nidüg'óciy anajty ooy jip'ijxcixy. ⁴¹ Chi tüg yëdyj huidi anajty yxi Jairo huidibi anajty mijtungmüd ma judiojäy ñaymujctac ymiiñ ma Jesús, chi minucxtacy Jesús pijctzoy may'ajt co huen nicxy ma je' ytiyc. ⁴² Jairo ymüd anajty tügpaic ñix, hue' anajty yjimijt majmetz, janch tim ögaanip anajty. Co Jesús ñicxy müd je', chi janch mayjäy anajty chach'adijyii chach'agodiyii.

⁴³ Chi tüg töxyjäy huidi anajty yxi ybo', ca' anajty y'oc-huäcxijpni, mimajmetz jimijt anajty cujc jadu'n mi'ijtni. Ti anajty ymeeñ yajtundäy ma je tzozdumbi ajcxy, etz ni pin anajty ycaajtzögyii. ⁴⁴ Chi je töxyjäy nimijhuägy je Jesús, chi nïdoni yhuitpä. Janch mic mic je yxi oy yhuäcxipy.

⁴⁵ Chi Jesús yminañ:

—¿Pin xyñidoñ iich nhuit?

Chi ajcxy y'adzooy co ca' pin. Chi Pedro etz tüg'óciy müd je' yminañ:

—Huindzin, jäy ti xy'adijy ti xy'abodiy etz miich mina'ñ: “¿Pin ti xyñidoñ iich?”

⁴⁶ Chi Jesús yminañ:

—Nidügti ti xyñidoñ iich. Nnejhuüybich co müd nmic'ájtich ti nyajtzögyich pinjaty.

⁴⁷ Co je töxyjäy jihuüy co ca' coyüch yhu'i'ma'ñ, chi nimiiñ janch tziyuuyb. Chi yhuindacy ma Jesús yhuinduu, chi capxpídzimay mayjäy'agujc ti ycixpi anajty co ti nïdooni Jesús yhuitpa', e co anajty mic'amy ti chögy. ⁴⁸ Chi Jesús nimay je töxyjäy:

—Töxyjäy, ti mdzögy co ti xymibicyich, nicx jotcujc.

⁴⁹ Yam Jesús anajty ycapxpy, co ymiiñ tüg jäy huidi anajty ti chooñ ma Jairo ytiyc; je Jairo ni huindzin'ajtp anajty je judiojäy naymujctac, chi nimaayi:

—Ti y'ögy miich mnix, ca' mjac'amayiy ñgi yi Huindzin Jesús.

⁵⁰ Co Jesús jadu'n midooy, chi yminañ:

—Ca' mdzigiy, mibijcich janchtiy, etz tzögip yi mnix.

⁵¹ Co Jesús ytigüy ma je tiyc, chi ca' a'ixiy nicxy ytigüy hueñypinity müd je'. Jëyi Pedro, Jacobo, Juan etz je töxy'anäg ytaj yteedy ytigüy müd Jesús. ⁵² Chi tüg'óciy je mayjäy ajcxy janch yaaxp, janch ñé'mgixy müd je töxy'anäg ycixpi. Chi Jesús yminañ:

—Ca' myaaxcixy, ca' yi' ögity, maab yi'.

⁵³ Chi nigoob ajcxy nixiicy com ti anajty nejhuüygixy co ti y'ögni. ⁵⁴ Chi Jesús majch je töxy'anäg ma yci', chi migapxy mic, yminañ:

—Töxy'anäg pidig.

⁵⁵ Chi je' yjugypijcy, e mic'amy ypidig. Chi Jesús yminañ co huen yajcaaygixy yaj'uuccixy.

⁵⁶ Chi ytaj yteedy ajcxy ooy chigüy yjihuüy. Chi Jesús nimay co ca' huaad pinjaty müdmíydägy jadu'n nej ti ytuñyii yjadyii.

9

Jesús quejxy ayuccapxhuäcxp je nimajmetzpi ydiscípulos ajcxy

¹ Co Jesús yajyöymujctay je ni majmetzpi ydiscípulos ajcxy, chi moy je mic'ajt jaydëbi yajtzögyi pa'mjäy, etz moy ajcxy nañ jadu'n cötújcin co ajcxy ixquexipy je ca'oybi. ² Chi quejxy je' ajcxy ñicxy capxhuäcxixy jadu'n nej Dios y'ane'my, etz yajtzoocixy pa'mjäy.

³ Chi Jesús yminañ:

—Ca' ni ti tü'amgixpi mminíxcixy; ni mgaminícxip mdajc, ni mmorral, ni mgaagy, ni meeñ, e ni mgaminíxcixipy ajcxy metz nhuit. ⁴ Huen tim huidi tiyc ma anajty mdigüygixy, jim ajcxy huí'mgixipy, e jim ajcxy nayyöyhuäcxiyb. ⁵ Hueñyma'amyity ma ca'

jäy xycöbjiicixy, co ajcxy mbidzimgixipy ma je' cajp mhuinnéjpcixipy mhuinjáaxcixipy je naaxjoc ma mdecy. Jada je' tiy'ájtij co Dios tzaachytunipy yi jadu'mbi jáy ajcxy.

⁶ Chi ajcxy ñayyöyhuäcxtaay, ñicxy ajcxy cajp cajp capxhuäcxcixy je oybi ayuc, etz yajtzoocixy pa'mjäy hueñytimma'ámyity.

Co Juan el Bautista y'ögy

⁷ Je rey Herodes co nejhuiy jadu'n nej Jesús anajty mijhuinma'ñ tuñ, chi ooy anajty tzachnejhuihua'ñ pin je' anajty. Com nijëjity jäy anajty yminaangixy co ti Juan jugypicy.

⁸ Chi jacnaagity yminaangixy co Elías ti ñayguëxigyii, e jacnaagity yminaangixy co tüg Dios y'ayucnajtzcaxxybi je' ti yjugypicy huidi jecy'ajty octzinaybi. ⁹ Chi Herodes yminañ:

—ñich yi' ni'ane'mdiy co huen ajcxy Juan ycohuajc yajminajci. ¿Pin jada jada' huidi ñich nmidooybich co tzachnimydaaccixy?

Herodes ooy anajty ja'ixa'ñ Jesús.

Jesús yajcay migoox mil jäy

¹⁰ Co je apóstoles ajcxy yhuimbijty, chi yajmüdmidyactay ajcxy Jesús tüg'óciy tiibi anajty túngixy. Chi ac jëyi ydiscípulos müd'ajty Jesús mijtigídium huingon ma tüg cajp huidi yxii Betsaida.

¹¹ Co je mayjäy ajcxy nejhuiy, chi ajcxy panicxy Jesús. Chi Jesús je mayjäy cöbjiectay etz yajmüdmidyacy ajcxy Dios y'ayuc ytiy'ajt nej ané'min cötújcín müdity. Jesús nañ yajtzoocy anajty huidijaty yajtzoýihuaam.

¹² Co oy chu'iyñi, chi ymijhuägy je nimajmetzpi ydiscípulos ajcxy ma Jesús, chi ajcxy nimay:

—Capxycixni müd jadayaabi mayjäy ajcxy, jaydëbi ajcxy ñicxipy ma yi cajp huidi huinduy agon yajpaatpi, huen nicxy ixtaaygixy jättac etz jim ajcxy paadipy caayin uucin. Com hue' jada it ma ñich ajt yam nyajpaatim mijtigídium.

¹³ Chi Jesús yminañ:

—Mooygix müich yi' ajcxy ycaayin y'uucin.

Chi je' ajcxy y'adzooy:

—Jëyi ñich ajcxy nmüdidyich migoox tzajcaagy e mejtz acx, nigo co ca' ñich ajcxy njuy caayin uucin müd jadayaab mayjäy.

¹⁴ Hue' anajty oy nimigoox mil je jäy. Chi Jesús nimay je discípulos:

—Yaj'ixtaaccix ajcxy yi mayjäy.

¹⁵ Chi ajcxy jadu'n cuyduun, yaj'ixtactay ajcxy je mayjäy. ¹⁶ Chi Jesús congy je migooxpi tzajcaagy, etz je metzpi acx, chi ypa't'ixy tzajpcixy conuucxy je tzajcaagy etz acx, huin'it tujc-huäcxy moy je' ydiscípulos ajcxy, huen yajhuäcxcixy ma tüg'óciy mayjäy. ¹⁷ Chi ajcxy ycaay cüxyi, huin'it ajcxy yajmucy je tzajcaagy yconaxy etz je acx yconaxy majmetz cach.

Pedro capxypidzimy co Jesús yi' je' je Cristo

¹⁸ Chi jadu'n yajti co Jesús anajty ycapxtägy ahuingujc müd je' ydiscípulos ajcxy, chi Jesús je' ajcxy y'amidoy:

—¿Pin ñich jäy xytijy?

¹⁹ Chi ajcxy y'adzooy:

—Nijëjity jäy xytijy co müich je Juan je Bautista; nijëjity yminaangixy co müich je' Dios y'ayucnajtzcaxxybi huidi jecy'ajty tzinay e ti yjugypicy.

²⁰ Chi Jesús yminañ:

—¿Müich ajcxy, pin ñich müich ajcxy xytjicixy?

Chi Pedro y'adzooy:

—Dios yCristo.

Jesús capxypidzimy co y'öga'ñ

²¹ Chi Jesús pidacy ané'min etz cötújcín co ca' ajcxy ni pin yajnimähuij co yi' je' Cristo. ²² Chi Jesús yminañ:

—Ooy ycopicyity co ñich, je jäy huidi tzoon tzajpjoty, canaag nax ayo'n nbáadibich, ca' xymijpidägibich je mijjäydijc, je teedy tungmüdpi, etz je' ajcxy huidi yaj'ixpicy Dios ñecy, e co n'ögip njugypigipyich codugüg xii.

²³ Chi Jesús nimay ajcxy nidüg'óciy:

—Pen ji pin xypanicxa'ñich, huen jäy digoydäy yci'm tzójcín etz huen xypanicxyich jabom jabom, oy nej ytimyjadipy ytimy'ayooohuiy, tim nipaady nej jihuüy ti cabigy mgruudz jabom jabom etz pajamgich. ²⁴ Huen pinjäy huidibi ca' yega'ñ yi yjugy'ájtín ma yi o'cín müd ñich ycipxi, hue' je' yajtigoyamy yi' yjugy'ájtín. E huen pinjäy huidibi yegamy yjugy'ájtín ma yi o'cín müd ñich ycipxi hue' je' ypadamy yi jugy'ájtín. ²⁵ ¿Ti tüg jäy ypatpy, pen ti paady tüg'óciy cohuir'ájtín comeen'ájtín ya naaxhuiñ e nayyajtigoyii, etz ca' y'alma yajnüdzygy? ²⁶ Yi jäy ajcxy pinjaty xymidzöydünibich n'ayuc, ñich je' je jäy huidi tzoon tzajpjoty, nañ nmidzöydunibich je' ajcxy co anajty nhuimbityich ya naaxhuiñ, müd ñich n'ané'min etz

nmic'ajlich etz nDēedyich y'ane'm'ajt, etz ymic'ajt, etz müd je ángeles ajcxy ymic'ajt huidibi huádz yjot yhuinma'ñ. ²⁷ Janch iich müich ajcxy nimäy co ji jäy ma müich ajcxy huidibi ixipy Dios y'ané'min jayijp ca'ni anajty y'ögy.

Jesús yajtigach je ñinix

²⁸ Chi miductujc xiibi maabi anajty jada ayuc jadu'n capxy, Jesús huodzooñ Pedro, Juan etz Jacobo, chi müd'ajtpy jim ma tüg copijp Dios mibijctzoob. ²⁹ Yam anajty Dios ooy mibijctzoy, co Jesús yhuñijijp oytigach, e je yhuít yajty janch poob janch adicxp. ³⁰ Chi metz jäy ñayguéxici, müdgapxy müdmídyägy Jesús, Moisés je' anajty etz Elías. ³¹ Huidi ajcxy naygéxici janch jühuidityi anajty ajcxy je tücxin jájin müdity, nigapxcixy nimíydaaccixy je o'cin huidi Jesús ypadamy jim Jerusalén. ³² Pedro, Jacobo etz Juan ooy anajty ajcxy chachmähuaní, chi ajcxy mi'ögtigooy. Co oy ymäyhuijixy, ijxy ajcxy Jesús y'adücxin y'ajajin, etz nañ jadu'n ijxy ajcxy je nimetzpi jäy ajcxy huidi anajty Jesús müdmídyäcxy. ³³ Jadu'n yajty co yi jäy ajcxy puyöyduutni Jesús. Chi Pedro Jesús nimay:

—Huindzin, jotcujc iich ajt ya. Tzoc tugüg tijc yaj'oyüym, tüg müich mjēdiib, jadüg Moisés jēdiib, etz jadüg yi Elías jēdiib.

Pedro ca' anajty nejhuiy ti ycapxy. ³⁴ Yam ñigi anajty ycapxy co joc ñaaxcidacy huidi yajñidigoy je' ajcxy. Chi ajcxy ooy chigüy co oy joc yajñidigoydáayigixy. ³⁵ Chi tüg ayuc yajmidooy ma je joc yminañ:

—Iich jada n'ung'ajtpy, ooy ndzocyich njihuiyich. Amido'ijti müich ajcxy yi' y'ayuc.

³⁶ Co je ayuc y'amoñ, chi ajcxy ijxy Jesús naydüg yhuim, chi ajcxy nañ jadu'n amoñ. Huin'it xii ni ca' ajcxy müdacy müd ni pin jadu'n nej anajty ti y'ijxcixy ti ymidoogixy.

Jesús yajtzögy tüg yeegy'anäg huidibi anajty ca'oybi müd

³⁷ Com jabom co Jesús, Pedro, Jacobo etz Juan ajcxy yminajcy ma je copijp, chi ooy mayjäy chooñ oyijpcobadiyü. ³⁸ Chi nidügti jäy ycapxy janch mic, yminañ:

—Huindzin tun may'ajt ix iich n'ung, yi' iich tügpaic n'ung'ajtpy. ³⁹ Huen mináajity ca'oybi ymachyüi, chi timetiini yaaxquēgy yajyachyüi yajquidyüi, etz yajpidzimy oy yhuin'opy y'aa'opy e adzaach y'ixmachyüi. ⁴⁰ Ti iich may'ajt nbijctzooyich ma yi mdiscípulos ajcxy, co huen yajpidzimy je ca'oybi, per ca' yi' ajcxy ti mimadägy.

⁴¹ Chi Jesús yminañ:

—[Müich jäy ajcxy huidibi ca' mibijcp ca' ajcxy mmijpidäga'ñ yi tiy'ajt! ¿Naag xii iich njac'idipy ma müich ajcxy nmimecxtüjccixipy? Mimin m'ung ya.

⁴² Co anajty yhuingoñ, chi je ca'oybi yajcidaay je yeeg'anäg, chi ooy yajyatzcooti. Chi Jesús ix'ojy je ca'oybi, e yajtzoocy je yeeg'anäg, chi yteedy yajcidiigüyñi. ⁴³ Chi tüg'óciy je mayjäy ajcxy ooy chigüy müd je mihuinma'ñ huidi Dios ytuun.

Jesús capxpídzimy jadüg'oc co y'öga'ñ

Jesús ydiscípulos ajcxy ooy jihuüygixy huinmaaygixy co Jesús jadu'n yminañ:

⁴⁴ —Müich ajcxy yajxon mido'mbijccix jada ayuc. Iich je' je jäy huidi tzoon tzajpjoty, hue' nyajciyega'ñich ma pocyjäydijc ajcxy yci'am.

⁴⁵ Je' ydiscípulos ajcxy ni ca' anajty huinjihuüygixy, tzigüyb anajty ajcxy, paady ca' ajcxy jaty nej yaj'amidogixipy.

¿Pin je' ñigi jacmijp?

⁴⁶ Chi Jesús ydiscípulos ajcxy ytigüy huinmay'ahuidijtp, nejhühuaangixy pin je' jacmij'idam. ⁴⁷ Jesús nejhuiy je' ajcxy yjot yhuinma'ñ huidi nayyajmüdmídyäacip ajcxy, chi tüg pi'c'anäg huijtzigy, ypidacy ma ymijc. ⁴⁸ Chi Jesús yminañ:

—Pinjaty xycöbicipich jadu'n nej jada pi'c'anäg xycöbicyich müd iich nxii ycixpi, iich yi' anajty ti xycöbicyich; je huidibi iich xycöbicipich, cöbigiib je huidi ti xyquexyich ya naaxhuñ. Yi' huidibi jacmützpin ma müich ajcxy, yi' je' jacmijpi.

Pin iich ajt ca'p xymijotma'tim, je' ajt xymijnicxpejtim

⁴⁹ Chi Juan yminañ:

—Huindzin, ti iich ajcxy n'ijxcixy co tüg jäy ti yajpidzimy ca'oybi müd müich mxii müich mmic'ajt. Ti iich ajcxy yi' nyaj'ojyich com ca' yi' iich ajt xypahuidijtim.

⁵⁰ Chi Jesús yminañ:

—Ca' myaj'ójcixy yi'; pinjaty ca' xymidzip'ajtim, iich ajt yi' nmüid.

Jesús jipcogapxy Jacobo etz Juan

⁵¹ Jadu'n yajty co tiempo yhuingoni mina Jesús ñicxip tzajpjoty, chi yhuinma'ñ pidacy co nicxa'ñ jim Jerusalén. ⁵² Chi Jesús quejxy cogapxy jayijp jättac pijctzoobi. Chi je cogapxy'ajtpi ñicxy ytigüy ma je samaritano jäy ajcxy ycajp, jättac pijctzoobi. ⁵³ Chi je' samaritano jäy ajcxy ca' yega'ñ jättac, com ñejhuüygixy co Jesús etz ymügügtijc ñicxy anajty

ajcxy jim Jerusalén. ⁵⁴ Co jadu'n Jesús ymígü ajcxy nejhuüy co je samaritano jäy ca' jättac yega'n, chi Jacobo etz Juan nimay Jesús:

—Huindzin, ¿nej m'a'ixüyb ich ajcxy n'ocni'ane'mdüyich huen jün cäy huidibi tzomb tzajpjoty, jigix yi samaritano jäy ajcxy ycijxtáhuipy jadu'n nej je profeta Elías ytuuñ jecy'ajty?

⁵⁵ Chi Jesús y'ijxhuimbijty, oiy Jacobo etz Juan, nimay:

—Miich ajcxy ca' mnejhuüygixy ti jot ti huinma'n miich ajcxy müd. ⁵⁶ Ich, je jäy huidi tsoon tzajpjoty, ca' ti nmiñich ya naaxhuiñ co jäy yjugy'ajt miñ nyajtigooyich, hue' janchtiy ti nmiñich co jäy yjugy'ajt nyajtzoogibich.

Chi ajcxy ñicxni huingbi cajn jättacp.

Je pinjaty anajty Jesús panicxam

⁵⁷ Jadu'n yjajti co anajty ñicxcixy ma tüg tü'aa, chi tüg jäy Jesús nimay:

—Huindzin, ich miich nbanicxaamy oy tim ma'amy miich mnicxy.

⁵⁸ Chi Jesús y'adzooy:

—Yi huaax ymiid yi' ajcxy yjut, etz yi joon ajcxy ymiid ajcxy ype'n, ich je jäy huidi tsoon tzajpjoty ca' nmüdidyich ma nmähuibich ma nbócxibich.

⁵⁹ Chi Jesús nimay jadüg jäy:

—Pajamgich.

Chi je jäy y'adzooy:

—Huindzin, jayijp ich ndeedy n'ocyajnaaxtigihuipy.

⁶⁰ Chi Jesús yminañ:

—Jëbi yajnaaxtigihuipy huidibi ca' xypanicxa'ñich. Nicx miich capxhuäcxi Dios y'ayuc y'ané'min.

⁶¹ Chi jadüg jäy yminañ:

—Huindzin, nbanicxamy yam. Tun may'ajt ocnaajtmadzüygich nicxy n'ocmüidcapxycixyich njuugy nmigügich huidi jim ma ich ndijc.

⁶² Chi Jesús yminañ:

—Pinjaty yhuinma'n ti pidägy co Dios ytung tunaani, ca' huaad ixmach je tung, tim jadu'n nipaady nejhuüy tüg jäy ti ytigü naaxjidziztpi müd arado, e ca' huaad y'ijxhuimbity com co huinduum arado nicxihuipy.

10

Jesús quejxhuäcxy je nidugi'pxmajcpi

¹ Huin'it co jada jadu'n ti ñaxy, chi je Huindzin Jesús huin'ijxy jatugi'pxmajc y'ixpijcpidijc, chi quejxgy cogapxy metz metz ma tüg tüg cajn majaty ñicxa'n. ² Chi Jesús nimay yi' ajcxy:

—Janch je cosecha ooy ti yhuindüy, yi midumbi janchtiy hueeni. Chojcpi co nbijctzóhuim ma nHuindzin Dios co huen quexy ytumbidijc ma yi cosecha. ³ Nicxcix, ich miich ajcxy nguejxpy jadu'n nej cöbixy y'ung yhuidity pa'uc agujc. ⁴ Ca' mminicxcixy mbijty, ni mxäcxuamy, ni mgig, e ni pin ca' mgapxpócxixipy tü'am. ⁵ Co ajcxy mdigihuipy huenyitimtiücity, jayijp ajcxy mináangixipy: “Ji jotcujc'ajtín ma jada tijc.” ⁶ Pen yung naxy je' ajcxy yajpaady, miich ajcxy je mgapxpooocxin jotcujc'ajt myegipy ma je' ajcxy; pen ca' ajcxy yjadu'nity, naadig'adip huidi anajty ti mgápcixy. ⁷ Nañ hui'mgix ma je tijc, chi ajcxy mgayipy m'ügipy huidi je jäy anajty ajcxy xymooyb, com je tumbi paatip je' je ymuju'n. Ca' ajcxy mhuididipy jayjün jaydijc. ⁸ Huenyitimyhuidi cájpity ma anajty mdigüygixy, pen je jäy ajcxy xycöbjc, caaygix uuccix huidi anajty jäy ajcxy xymooyb. ⁹ Yajtzóccix yuujäy pa'mjäy huidijaty jim ma je' ajcxy yajpaady, etz yajnamaaygix: “Je Dios y'ané'min huingóniñ yi' ma miich ajcxy.” ¹⁰⁻¹¹ Huenyitimyhuidicájpity ma anajty mdigüygixy, e ca' anajty jäy xycöbigaangixy, co ajcxy mdzonaanip, nimaaygix: “Yi mgajp naaxjoc huidi ti ypyty ma ich ndecy nhuinnebaamyich, yi' je' ijxpejt co Dios ajcxy xychaachtunipy. Chi nejhuüygix miich ajcxy jada co je Dios y'ané'min ti ymihuingoni.” ¹² Ich miich ajcxy nimayb co huin'it xii co anajty yajhuaad'aty, Dios nigi tzaachytunaangixy je jäy huidi ajcxy ca' miich ajcxy xycöbiga'n, ca'ydi Sodoma cajnjäy.

Je cajn huidijaty ca'p ycapxymidoy

¹³ Chi Jesús yjacminañ:

—¡Miich ayoob ajcxy Corozín jäy! ¡Miich ayoob ajcxy Betsaida jäy! Co jim ma je Tiro cajn etz Sidón cajn caytuni cayajti je Dios ymijhuinma'n huidi ti ytunyüi ti yjadyüi ma miich ajcxy, jécypixy ajcxy yjothuimbijti, etz ti yajniquëxcixy ixypiy müd je yhuüt iñaaagixy saci nijen ncuyjam ixuyjam (je' je tiy'ajt co ooy ytajcixy ymaygixy müd ypocy ycixpi). ¹⁴ Janch jadu'n yjadipy co anajty Dios yajniöögügy, nigi o'ctiy miich ajcxy ayo'n mbaadüyb ca'ydi

jadu'n nej Tiro jāy etz Sidón jāy. ¹⁵ E miich ajcxy Capernaum jāy ajcxy, *¿nej mmīnaangixy mājātcixipy tzejpjoty?* Hue' m'idaaccixpy miich ajcxy ma yī ayoodactuuby.

¹⁶ Je jāy ajcxy huīdi miich ajcxy m'ayuc xymidoohuip, nañ xymidoohuīb yī' ajcxy *īch* n'ayuc. Je jāy ajcxy huīdībī miich ajcxy ca' xy'ixa'ñ, nañ ca' je' ajcxy xy'ixa'ñich; e pinjaty ca' xy'ixa'ñich, nañ ni ca' yī' ixaangixy je Dios je huīdi ti xyquexyich ya naaxhuñ.

Chi ajcxy je nidugi'pxmajcpi yhuimbjātcixni

¹⁷ Chi je nidugi'pxmajcpi huīdi Jesús yquejx ayuccapxhuācxpi yhuimbjittay ajcxy janch jotcujc, ymīnaangixy:

—Ixti je ca'oybi ti *īch* ajcxy xycapxycōbīccixy mīid miich mxīi.

¹⁸ Chi Jesús ymīnañ:

—Ti n'ixyich nej je ca'oybi yhuindzin ti ycāy, jadu'n nej jihuiy ti ycāy ti ycōdigīy tzejpcīxy, jadu'n nej tūg huīdzuc. ¹⁹ *īch* miich ajcxy mic'ājtīn ti nmooygixy, jaydēbī ca'oybi ca' xymimadaaccixipy, tim jadu'n nipaady nej jihuiy tza'ñ etz ca'ty myajhuācpētcixy e ca' nej mājātcixy. ²⁰ Nīgī miich ajcxy jotcujc'ājtīx co ajcxy mxīi y'jātcixy cojay jīlby tzejpjoty, ca'ydi co ajcxy ca'oybi xycapxymidoogixy.

Chi ooy Jesús yjotcugīy

²¹ Huīn'it Jesús yjotcugīy mīid je Dios yjihui'ñ ymic'ajt, ymīnañ:

—Nyajnajxypich Dioscojuyip ma miich, Dios Teedy, tzejpjoty pī Huīndzin etz je naax-huiñybi Huīndzin, co ti myūch jada mījhuīnma'ñ ma yī cohuīnma'ñ jāydīc, etz ti myajne-jhuīy je jāy huīdi ca' y'ixpīcyty. Dios Teedy, jadu'n miich ti mduñ com jadu'n miich ti mājygidacy.

²² Ndēedyich ti xyajcīdigīyādyich tūg'ōcy tījaty mic'ajt oy'ajt. Ni pin ca' ijaxcāp pin je' Dios y'ung'ajtpy, jēyī ndēedyich tūgpajcī pin xy'ijxcājpīch. Ni pin ca' ijaxcāpy pin je' ndēedy'ājtpīch, jēyī je Dios ung tūgpajcī huīdi ijaxcāp, etz jacjadyī ma je ung yajnīgūēxīgā'ñ.

²³ Chi Jesús n'ijxhuimbijty yī' ydiscīpulos ajcxy, ahuingujc ajcxy nīmay:

—Jotcujc ajcxy je jāy ajcxy huīdi ijaxcīp jadu'n nej mīich ajcxy ti m'jāxcixy. ²⁴ *īch* miich ajcxy nīmayb co ooy may Dios y'ayucnajtzcāpxīyb etz rey ajcxy ja'ixa'ñ huīdībī miich ajcxy m'ijxpy, e nī ca' ajcxy ixy; etz jamīdoo'īda'ñ huīdi miich ajcxy mīdooyb, e nī ca' ajcxy mīdooy.

Ijxpejt ma tūg samaritano oyjāybi

²⁵ Chi tūg jāy huīdi yaj'ixpījcp Dios *ñecy* ytīnaay'ahuīy jot'ixy huīnma'ñ'ixy Jesús, chi y'amīdooy:

—Huīndzin, *¿ti huaad ndunīpīch co īch jugy'ajtin huīnīxībī nbāadībīch?*

²⁶ Chi Jesús y'adzooy:

—*¿Ti jāybētyip ma yī Dios ñecy? ¿Nej mhuīnjihuīy co mnēcycapxy?*

²⁷ Chi je ley huīndzīn y'adzooy:

—Mdzogīpy mījihuihuīpy mHuīndzīn Dios mīid tūg'ōcy m'aa mjot, mīid tūg'ōcy m'alma, mīid tūg'ōcy mmījaa, etz mīid tūg'ōcy mjot mhuīnma'ñ, e mdzogīpy yī mījīn mīdījc jadu'n nej mīich cī'm naychogyī.

²⁸ Chi Jesús y'adzooy:

—Ti ooy yajxon m'adzooy. Tun yī', e mdzīnāhuīp huīnīxīi.

²⁹ E je' nañ jadu'n tīm tīy ñejhuīhua'ñ, nīmay Jesús:

—*¿Pīn īch nmīdījc'ajtpy?*

³⁰ Chi Jesús y'adzooy:

—Tūg jāy choñ jīm Jerusalén ycidāgy anajty jīm Jericó, chi oy meetzpi mīnaybadyī. Chi ajcxy tūg'ōcy yhuīt e tījaty yī' anajty ymīd pījctaayī. Chi ajcxy ooy huīnhuoyjy jīphhuoyjy huīngojxy jījpcojxy, chi ajcxy ixmach jahueengī ōgy, chi ajcxy *ñicxni*. ³¹ Tūg judío teedy ymīnagīy ma je jīmībī tū'aa. Co y'ijxy je tzaachījāy, chi jūyōñajxy. ³² Nañ jadu'n ymīnagīy ma je jīmībī tū'aa tūg levīta jāy huīdi tuumb ma Dios ytīc, co jīm yjāty mīhuīngon je tzaachījāy, co oy ixy, nañ chi jūyōñajxy (ca' pa'ayooy). ³³ Chi tūg samaritano jāy anajty jīm naxīy, co mīhuīngoñ je tzaachījāy, co oy ixy, huīn'it ooy pa'ayogooty je tzaachījāy. ³⁴ Chi je' nīmījhuāgy, chi puji e xojtzi je chaachī'au, nañ tzozyīyī chaachī'au mīid aceīte etz vīno. Chi yaj'yūjcpety, e yajnicxy jīm ma yjāttac, e jīm cuend'ajty. ³⁵ Com jabom co anajty *ñicxaani*, chi yajpidzimy mejtz denario meeñ, moy je codījc nīmay: “Cuend'at jadayaabī tzaachījāy, jadu'n nej anajty mīacmeeñyajtuñ, co *īch* anajty nhuīmībītyīch huīn'it nmīgūēdīpy.” ³⁶ *¿Ma je nidugīgīpī jāy pin je oybi ti tuñ mīid je jāy huīdi anajty je meetzpi ti ymēechyī ti yajtzaachīyī?*

³⁷ Chi je jāy huīdi Dios *ñecy* yaj'ixpījcp Jesús y'adzooy:

—Je huīdi ti yajtuñ je pa'ayo'ñ.

Chi Jesús ymīnañ:

—*Nīcx mīich, e tun nañ jadu'n pa'ayo'n.*

Jesús yajpaady ma Marta etz María ytiyc

³⁸ Chi jadu'n yjajty co Jesús anajty ytiyöy, chi ytiyüy ma tüg mutz cajn. Jim anajty tüg töxyjäy huidi anajty yxii Marta, yi' yajjättaci ma ytiyc. ³⁹ Je Marta ymiid anajty tüg y'uch töxyjäybi huidi anajty yxii María, chi je' y'ixtacy ma Jesús ymiyc, amidoo'ijti je' y'ayuc. ⁴⁰ Chi je Marta ooy anajty jim chachjottigoy tuñ anajty tigatii ma ytiyc, chi nimijhua'cy je Jesús nimay:

—Huindzin, ¿ca' nej mnayjihuüiyiiji co ich naydüg yam tzach nayyajtuñyijichi? Nima' yi María co huen xypubétyich.

⁴¹ Chi Jesús yminañ:

—Marta, Marta, yi maytung miich mdzachmijottigooyb. ⁴² Tügpajc ji, huidibi ooy ycopícyip. Yi María ti yi' huin'ixy je oybi huidi ni pin ca' ypiñyib.

11*Jesús yaj'ixpijc nej jëbi mibijctzoohuim Dios*

¹ Jadu'n yjajti co Jesús anajty Dios mibijctzoy ma tüg it lugar, co yajmay, chi tüg discípulo ñimaay:

—Huindzin, yajni'ixiigich ajcxy tzajcapxycapxi, jadu'n nej Juan yajni'ixiüy yi' ydiscípulos ajcxy.

² Chi Jesús yminañ:

—Co ajcxy Dios mmibijctzohuipy, jadu'n mináangixipy:

Dios Teedy, miich huidi tzajpjoty tzinaayb, huindzigiy miich mxii y'ity. Huen miñ ya miich yi m'ané'min. Huen mdzójcin yajcuyduñ ma je jay yjot yhuinma'ñ jadu'n nej yajcuyduñ jiiby tzajpjoty.

³ Mooygich ajcxy ngaayin n'uucin jabom jabom.

⁴ Méecxibich ajcxy nbocy ngaydey huidibi ich ajcxy ndundigooyb, jadu'n nej ich ajcxy mneecxyich huidibi ajcxy xymidundigooybich. Ca' m'a'ixy co ich ajcxy huinma'ñ tigoyipich. Yajnihuaatzcich ajcxy ma yi jibicpi.

⁵ Chi Jesús yjacminañ:

—Pinjaty ji ma miich ajcxy huidi tüg ymigüg müd, co ninícxipy mijcoodz e mnimähuipy: “Migüg, tun may'ajt yajpijctzoogich tugüg mdzajcaagy. ⁶ Tüg ich nmigüg ti xyñimiñich huidi tüyöyp, etz ca' nmüdidyich ti nmöhuibich.” ⁷ Chi je jay y'adzooy jiiby tigoty, yminañ: “Ca' xy'amayiyich. Ti ich ndijc n'agiiñi, etz n'ungich yam nmüdich cijx'am; ca' njatyich nej nbidigibich etz nmöhuipy huidi mbijctzooyb.” ⁸ Ich miich nimaayb, oy ca' tzojc nipidiga'ñ ymöhuamy huidi pijctzou co migüg'adyii, hue' ymöhuamy jaydëbi ca'ydi yjac'amayiyii, chi yegipy tüg'óciy huidi yajmayajtpy. ⁹ Ich miich ajcxy nimaayb: Pijctzóogix, e myajmöhuiipy ajcxy. Ixtaaygix, e mbaadipy ajcxy; cogapxiygix, ahuädzip ajcxy mdijc'aguu. ¹⁰ Tüg'óciy je' pin pijctzoob tijaty ma Dios, cidigihuib; pin y'ixtaayb, ypaadipy; pin cogapxiyib, yaj'ahuatziib ytiyc'aguu.

¹¹ ¿Pin ungdeedy ji ma miich ajcxy pen y'ung ypijctzoob tzajcaagy, nej mmöhuipy tüg tzaaji? ¿E pin ypijctzooyb acx, nej jëbi mmöhuipy tüg tza'ñi? ¹² ¿Pen ypijctzooyb tzeydüty, nej jëbi mmöhuipy ca'ty? ¹³ Pen miich jibicjäy ajcxy mnejhuüyb nej oybi m'ung móoygixipy, ¿nej ca' mdijy yjáñchity co mDios Teedy tzajpjoty ymóoygixipy je Espíritu Santo, pen miich ajcxy mmibijctzohuipy?

Yajniñijccixy Jesús co müidity mujcu'ymic'ajt

¹⁴ Chi Jesús anajty yajpidzimy tüg ca'oybi ma tüg jay huidi anajty uumip. Jadu'n yjajty co je ca'oybi ypidzimy, chi je uum ycapxiy. Chi je mayjäy ooy jihuüy huinmay. ¹⁵ Nijëjity jay yminaangixy:

—Jesús mijhuinma'ñ ytumyb müd je Beelzebú ymic'ajt, je ca'oybi yhuindzin, paady ca'oybi yajpidzimäy.

¹⁶ Jacjaydiibi jay ajcxy co jot'ixaangixy huinma'ñ'ixaangixy Jesús, pijctzooy ajcxy Dios tüg ymijhuinma'ñ. ¹⁷ Co Jesús nejhuüy nej je' ajcxy jot'adyii huinma'ñ'adyii, chi nimay:

—Co tüg gobierno ñaybiyc-huäcxyii, chi ñaychiptünigixy miñ xyipy; ñayyajcixigixy ñayyajtigóoyigixy; co tüg quëx jay ñaybiyc-huäcxyii, nañ jadu'n je' ñayyajcixigixy ñayyajtigóoyigixy. ¹⁸ Pen je mujcu' ajcxy ñaybiyc-huäcxip, ¿nej jada je mujcu' y'ané'min yjac'idipy? Miich ajcxy minamb co ich müd ndüñich je Beelzebú ymic'ajt co ich ca'oybi nyajpidzimy. ¹⁹ Pen jadu'n yi', ¿pin je mic'ajt mooyb huidi miich ajcxy xypahuiditp co yajpidzimy je ca'oybi? Paady yi' ajcxy ci'm yajniquëxip co miich ajcxy mdundigooygixy mgapxtigooygixy. ²⁰ Pen ich müd Dios y'ané'min nyajpidzimyich ca'oybi, janch jada co Dios y'ané'min ti yjaty ma miich ajcxy.

²¹ Co tũg micjãybĩ mĩdĩtĩ maydujt, e ñaycuend'adyĩ yajxon, ca' je' ytigoyĩpĩ tijaty ymĩd.
²² Co yjãtĩ jadũg jã yjacmĩcĩ ca'ydi je', chĩ ymĩmadãgĩyĩ, e ypijctãyĩ tũg'ócĩy ytujt huidĩ anajty ooy jot'amĩj'adyĩ, e yajhuãcxĩpĩ tijaty anajty ymĩd.

²³ Pinjaty ca' xymĩjĩnĩcxpĩtĩyĩch, nmĩdĩzipĩch yĩ'. Pinjaty ca' ytuñ mĩd ñĩch co jã ynyaj'ĩxpĩcyĩch Dios yti'y'ajt, hue' je' ajcxy jã yajhuĩnma'ñyĩdĩgooyb.

Je ca'oybi co jadũg'oc yhuĩmbĩjty

²⁴ Co je ca'oybĩ ypidĩzĩmĩy ma je jã y, chĩ je' ñĩcxy jĩm tĩtznãax ijtãgĩy co ypocxã'ñ. Co ca' paty ypocxtac, huĩn'it ymĩnã'ñ: "Huĩmbĩdaambĩch ma je jã yjot yhuĩnma'ñ ma ñĩch tĩ n'octzombĩ." ²⁵ Co je ca'oybĩ yjã'ty ma anajty tĩ chinã y, chĩ paady je jã yhuĩnma'ñ janch yhuãdzĩty janch ooy jadu'n nej tũg tĩj huidĩ janch huãdz pedĩgĩty. ²⁶ Chĩ je ca'oybĩ ñĩcxy, e mĩd mĩñ jahuĩxtujc ca'oybĩ jacjĩbĩcĩpĩ ca'ydi je'; chĩ ajcxy ytigĩy ma je jã yjot yhuĩnma'ñ, e chinay ajcxy jĩlby; huĩn'it je jã yjac'o'ctiy oy yjajĩnĩ ca'ydi jadu'n nej anajty jayĩjĩp'aty.

Huidĩ ajcxy janch jotcũjĩcip

²⁷ Co Jesũs jadu'n anajty ymĩnã'ñ, chĩ tũg tũxyjã ymayjã yagujc mic ymĩnã'ñ:

—Jotcujc je tũxyjã huidĩ tĩ xyajpĩ'c'aty etz huidĩ xyajyeegĩy.

²⁸ Chĩ Jesũs ymĩnã'ñ:

—Je' jacjotcujc pinjaty Dios y'ayuc mĩdoohuĩp etz cuyduunĩp.

Jĩbĩcjãdyĩc pijctzoogĩxy tũg tĩy'ajt mĩjhuĩnma'ñyĩ

²⁹ Co je mayjã ajcxy jũbĩgĩy, chĩ Jesũs ymĩnandacy:

—Jadachambĩ jã yoy ajcxy yjĩbĩcjãyĩty, ypijctzooyb ajcxy mĩjhuĩnma'ñ iĩxpejt. Nĩ camĩna Dios ajcxy ycamũhuĩyĩb iĩxpejt, jẽyĩ tũgpajc Jonãs y'ĩxpejt yajmũhuĩp. ³⁰ Com jadu'n nej je Jonãs jecy'ajty iĩxpejt yejcy ma je Nĩnĩve jã y, nañ jadu'n ñĩch, je jã y huidĩ tzoon tzajpĩoty, nyegaamyĩch iĩxpejt jadachambĩ tĩempo mĩd jã ycxĩpĩ. ³¹ Je tũxyjã reĩna huidĩ tĩzĩnay jecy'ajty ma madzãcruudz ypidĩzĩmĩy, yĩ' je' xĩdãhuam jadachambĩ tĩempo jã y co anajty Dios tĩyduna'ñ mayjã, etz yajpocycãhuĩpĩ ajcxy. Ixtĩ ma naaxhuĩñyĩ ycgĩxĩy jĩm je reĩna chooñ co anajty amĩdo'idani je rey Salomũn ycapxy y'ayuc. Jĩ naaxhuĩñ jadachambĩ tũg Dios yti'y'ajtmĩdĩpĩ jacnĩgĩ ymĩjĩty ca'ydi Salomũn anajty. ³² Co anajty Dios tĩyduna'ñ yĩ may naaxhuĩñjã y, chĩ je jã y ajcxy huidĩbĩ anajty cogajpĩp jĩm Nĩnĩve pĩdĩgaangĩxy etz yajpocycãhuaangĩxy jadachambĩ naaxhuĩñjã y. Com je Nĩnĩve jã yjothuĩmbĩjĩt je' ajcxy co Jonãs Dios y'ayucnajtzcãpxĩyĩ. Jĩ jadachambĩ tũg Dios y'ayucnajtzcãpxĩyĩbĩ jacnĩgĩ ymĩjĩty ca'ydi jadu'n nej anajty je Jonãs.

Je tĩy'ajt huidĩbĩ nĩpaady nej lãmpara ma ajt nĩnĩcĩx

³³ Nĩ pĩn ca' yũch je jĩn huidĩ tĩ nõgpĩty, nĩ ca' pĩdãgĩy jĩlby cajũn pa'tcĩ'py, jẽyĩ janchtĩy pĩdãgĩy je jĩn ma jũĩndĩcxpejt, jaydĩbĩ co pĩnjaty ytigĩhuĩpĩ tĩgoty, codĩcxĩĩb je jĩn. ³⁴ Je jĩn ma mĩĩch ajcxy mĩnĩcĩx je' yĩ' mĩĩch ajcxy mhuĩĩn. Pen oy mĩĩch ajcxy mhuĩĩn, nañ jadu'n tũg'ócĩy mĩĩch ajcxy mĩnĩcĩx ymĩd yĩ' tũcĩxĩn. Pen ca' y'õyĩty mhuĩĩn, nañ jadu'n ajcxy yĩ' mĩnĩcĩx yajpaty agootztuũm. ³⁵ Cuend'ãjtcĩx yĩ' tĩy'ajt huidĩ mĩĩch ajcxy mĩd, ca' mgoyũtzĩcĩxy, com co jadu'n nĩcxy y'ahuĩmbĩty nej cootzĩpĩ. ³⁶ Pen mĩĩch mĩdy'ajt codĩcxĩy y'ĩty mĩd Dios yti'y'ajt, tũg'ócĩy quẽxĩgtãhua'ñ janch huãdz.

Jesũs ca'p jãygĩdaci je fariseos etz je escribas ajcxy yhuĩnma'ñ

³⁷ Co Jesũs ycapxtay, chĩ tũg fariseojã ymay'ajt pijctzoy huen nĩcxy mĩd cayĩĩ. Co Jesũs ytiĩgtĩgĩy, chĩ y'ixtacy ma je caybejt. ³⁸ Co je fariseojã yĩxy jadu'n nej Jesũs ytuñ, chĩ ooy huĩnmay nej co Jesũs ca' ñayyajpocyhuãchyĩ mĩd nĩ jayĩjĩpnĩ ma anajty ca'ni ycaayĩnĩ. ³⁹ Chĩ je Huĩndĩzn Jesũs ymĩnã'ñ:

—Mĩĩch ajcxy fariseojã y, ooy mĩnaybĩdaaccĩxy tudãgyjã y ma jã y ajcxy yhuĩnduũ e ca' yjãĩchĩty; chĩ jada' ma mĩjot mhuĩnma'ñ mĩĩch ajcxy ooy m'adzocy, etz mĩd ajcxy jĩbĩc-huĩnma'ñ; tĩm jadu'n nĩpaady nej myajhuãch ajcxy yĩ' tãsi nĩnĩcĩx, yĩ' tẽxyñĩnĩcĩx e chĩ ajcxy yajhuĩ'ngĩxy jĩbĩcĩpĩ je tãsiĩoty je tẽxyĩoty. ⁴⁰ Mĩĩch ajcxy ca' Dios y'ayuc huĩnjĩhuĩyĩbĩ! ¿Ca' mĩnejhuĩyĩgĩxy co yĩ' pĩn tĩ tẽxyñĩnĩcĩx yajcojy nañ tĩ yajcojy tẽxyĩoty? ⁴¹ Tun mĩĩch ajcxy oyjã'yãjĩn, huĩn'it janchtĩy anajty ajcxy mhuãdzĩty ma mĩjot mhuĩnma'ñ.

⁴² Jã y mĩĩch ayooĩ ajcxy fariseojã y! Com mĩbĩdaaccĩxy abĩcy tũg pĩcy je majcĩpĩ mĩd yĩ Dios ycxĩpĩ ixtĩ yĩ' tãzĩnĩmang, yĩ' ruda, etz tũg'ócĩy aay ujtz. Chĩ jada' ca' mĩduñ je oyjã'yãjĩn etz tĩy'ãjĩn jadu'n nej Dios tzozy. Hue' je' oy mĩduñ co tĩjaty abĩcy mĩbĩdãgy mĩd Dios ycxĩpĩ, nañ jadu'n copĩcy oyjã'yãjĩn mĩdunĩpy etz Dios yti'y'ajt mguydunĩpy.

⁴³ Jã y mĩĩch ayooĩ fariseojã ajcxy! Co ooy m'adzĩjĩcĩxy je ñaybejt huidĩ cõduũm ma naymũjctac, etz ooy m'adzĩjĩcĩxy co huen jã y ajcxy xycãpxpooxcĩxy oy huĩndĩzĩgĩy mayjã y agujc.

⁴⁴ ¡Ay miich ayoobi ajcxy huidi yaj'ixpijcp Dios yley etz miich fariseojäy ajcxy! Oy mjanaybidäacigixy oyjäy e ca' yjächity, ca' mguydungixy Dios ytiy'ajt, jadu'n nipaady miich ajcxy nej öcpi jut huidi ca' yquëxig, chi jäy yöy nigix, com co ca' ñiguëxig.

⁴⁵ Chi tüg jäy huidibi yaj'ixpijcp Dios y'ayuc yminañ:

—Huindzin, co jadu'n miich mina'ñ, nañ jadu'n ñich ajcxy ooy jibic nayjihuiyigixy.

⁴⁶ Chi Jesús yminañ:

—¡Ay ayoob miich ajcxy Dios y'ayuc huindzin! Miich ajcxy mgöcixyp canaag costumbre huidi je jäy ajcxy ca' mimadäga'ñ, e ca' ajcxy mba'ayoogixy, tim jadu'n nipaady nej jihuiy tüg tzimiy ti mmooygixy jemxypi huidi ca' je jäy ajcxy mimadäga'ñ, e miich ajcxy ni ca' mgihuax jëda'ajty mgayajpadaangixy je tzimiy.

⁴⁷ ¡Ay miich ayoob ajcxy! com myajcojxixy je ögpi jut ma je Dios ayucnajtzcaxiyybi naaxtigiy, je huidi m'ap mdeedy ajcxy yaj'o'c. ⁴⁸ Jadu'n yajhuinjihuïy nej jihuiy miich ajcxy ooy mjäygidägy jadu'n nej ajcxy m'ap mdeedy ytundigoy. Janch yi' ajcxy yaj'ögy Dios y'ayucnajtzcaxiyybi, e miich ajcxy myajcoj je öcpi jut ma ajcxy je' ñaaxtigiy.

⁴⁹ Paady yi Dios jadu'n huinmay, e minañ: Nyajñiguexipyich miich ajcxy profetas etz y'ayuccapxhuäcxpi, e miich ajcxy myaj'ögip nijëjity, etz jacnaagity mbahuidijttäccixipy. ⁵⁰ Dios yajcomidohuipy jadachambi tiempo jäy ajcxy je ypocy huidi y'ap yteedy ajcxy ytuñ, com maabi naaxhuiñ chondägy, yi' ajcxy yaj'ögy Dios ytiy'ajtmüdp. ⁵¹ Janch nimaaybich miich ajcxy co Dios yajcomidohuipy jadachambi tiempo jäy ajcxy je y'ap yteedy ypocy co ajcxy yaj'o'cy Dios ytiy'ajtmüdp chondägy ma Abel, ixti Zacarias huidi jäy yaj'o'c ma Dios ytiy tiba'guc.

⁵² ¡Ay miich ayoob ajcxy Dios y'ayuc huindzin! Ca' miich ajcxy m'ixpiga'ñ Dios ytiy'ajt, nañ ca' mdzocy co yi jäy ajcxy ixpijipy; tim jadu'n nipaady nejihuïy ti mbicy je tijc ahuaast e ca' miich ajcxy mdigihua'ñ, e ni mgatzojccixy co huingbi nicxy ytiyig.

⁵³ Co Jesús anajty jadayaab ayuc yajñimaaygixy, chi je Dios y'ayuc huindzin etz yi fariseojäy ajcxy jotmätcooty chi yaj'amidogoty ajcxy may ayuc. ⁵⁴ Ñayñimäayigixy miñ xyipy co huen amido'ijt Jesús y'ayuc, jigix jëb päatcixipy huidi jëb müd xigixipy.

12

Jesús yaj'ixpicy co ca' huaad pinjaty naybidaaci oyjäy pen ca' yjächity

¹ Chi je mayjäy ooy nimujcy Jesús, janch jadu'n ñay'adijy ñay'agodiyyigixy, chi Jesús nimaydacy je' ydiscipulos jayjip:

—Niüendi müd yi fariseojäy ajcxy nej ajcxy yjäyyaj'ixpijccixy. Yajxon yi' ajcxy ycapxy ymiydägy, chi ca' cuydungixy. ² Ca' ji ti huidi ijtp ayüch nicxy ycayajnejhuïy, nañ ni ca' ji ti huidi ijtp ameech nicxy ycaniguëxig. ³ Huen huidi ayuc miich ajcxy ameech mgapxy, yajnejhuïhuip yi'. Huen huidibi ayuc huidi ti mnayyajñimäayigixy ameech jiiby tigoty, mic yajcapxhuäcxip tijc nigixy.

Pin jëbi huaad ndzigüym

⁴ Chi Jesús yjacminañ:

—Miich ajcxy nmigütigtjc, ñich miich ajcxy nimaayb co ca' mdzigüygixy yi jäy ajcxy huidibi ninicx yaj'o'cp, com ca' jac ni ti ajcxy tunipy. ⁵ ñich miich ajcxy nyajni'ixihuipy pin huaad jëbi mdzigüygixy. Yi' janch mdzigüygixy yi Dios huidibi jugy'ajt pijcp, e huin'it müd je' ymic'ajt jëbi quexipy m'alma ma je mij jiin. Yi' janch mdzigüygixy yi'.

⁶ ¿Nej ca' jäy ajcxy ytoogyii migoox joon müd metz pi'cmeen? Dios ni tüg yi' ajcxy ca' jäy digooyity. ⁷ Ixti mgöhuay ajcxy ac michoy Dios müdity. Ca' mdzigüygixy, jactzou nigü miich ajcxy ma Dios ca'ydi pi'cjoon ajcxy.

Je pinjaty ca'p midzöyduñyi Jesús mayjäyjoty

⁸ ñich miich ajcxy nimaayb co pinjaty ma miich ajcxy huidi capxpizimp mayjäyjoty co xymbicicych xymijpidägyich, ñich, je jäy huidi tzoon tzajpjoty, ngapxpizimipyich co ti ngöbicych jadu'mbi jäy ma Dios y'áñeles ajcxy yhuinduu. ⁹ Pinjaty ca' xycöbicych mayjäy'aguic, nañ jadu'n ñich yi' ca' ngöbigipyich jiiby ma Dios y'áñeles ajcxy yhuinduu.

¹⁰ Tüg'öciy jäy huidi jadu'n ñich, je jäy huidi tzoon tzajpjoty, xyñigapxp xyñi'ojiiybich Dios huinmecxiib. Chi jada' pinjaty nigapxp ni'ojiiyb je' Dios yjihui'ñ (je Espíritu Santo), yi' janchtiy Dios ca' yhuinmecxiyb.

¹¹ Co mmidzip ajcxy xyajñicxip ma naymujctac, ma codungdijc, etz tungmüdp yhuinduu, ca' mdäjp mmäyip nej m'adzoogixipy, e ca' mhuinmayipy nej ajcxy m'adzohuipy. ¹² Com je Dios yjihui'ñ huin'itiy ajcxy xyajni'ixihuip nej huaad m'adzoogixy.

Naygüend'ajtigixy ca'p adzojccixy comeen' adii

¹³ Chi nidügti je mayjäy yminañ:

—Huindzin, nima' n'ajchich co huen yajhuäcxy müd ñich huidi ndaj ndeedyich ñidungiy.

¹⁴ Chi Jesús yminañ:

—Yëdyäc, ca' ñich ni pin ti xypidägyich ane'mbi ma miich ajcxy etz yajhuäcxpi.

¹⁵ Chi Jesús nimay je jäy ajcxy:

—Ijxcix naygüend'äjtigix, ca' m'adzojccixy comeen'adii, com je m'alma yjugy'äjtin ca' je' nidzoocin'adyii huidijaty miich ajcxy müd.

¹⁶ Chi ajcxy yajnimay tüg ayuc, yminañ:

—Jim anajty tüg comeen'yäy huidibi anajty ooy mij ypidägy yajpidigy. ¹⁷ Je comeen'yäy anajty ooy ci'm huinmay ma yjot yhuinma'ñ, yminañ: “¿Ti n'octunipich com ca' nmüdidyich ma nyajnügidägbich yi tiibi y'ity?” ¹⁸ Chi yminañ jotjoty huinma'ñjoty: “Nyajpidicnbich ndzëx, e ngöjibich jacmijpi, chi tüg'öciy jüby nbidactähuibich tiibi y'ity.” ¹⁹ Co jadu'n ndunipyich, chi jëbi jotcujc ndzinähuibich, com ooy anajty nmüdidyich pidägy yujcpicy, jëbi canaag jimijt nibooxcyich etz jëbi ngay n'ügyich jotcujc. ²⁰ Chi Dios nimay je comeen'yäy: “Ooy jibic-huinma'ñ miich müdity. Cham coodz ñich miich nibijctzohuihuaaniy yi m'alma (m'ögip), e co anajty ti m'ögy yi huidibi ti myujcpicy, ¿pin yi' je'adiib?” ²¹ Jadu'n yjaty yi' ajcxy huidibi ymeen'idi'ñ ci'm yujcpijcp, ca' yi' ajcxy jüby ycomeen'yity ma Dios yhuinduu.

Dios ycuend'ajtpy y'ung y'anäg

²² Chi Jesús nimay je y'ixpijcpidijc:

—Paady ajcxy nimaaygixy co ca' huaad mjottigooygixy ma yi mdzinäayin yi mjugy'äjtin, huidi mijcxcixipy mgäaygixipy, huidi müd mninixc mxöjxcixipy. ²³ Yi jugy'ajt jacnigi tzou yi', ca'ydí yi caayin uucin, etz je mninixc jacnigi choohuity ca'ydí huit. ²⁴ Ijxcix yi joogy ni ca' ñipy, ni ca' chijccixy, ni ca' müdity ytijc ni chëx, e Dios yi' ajcxy mooyipy huidi yjüxcxcixyp, ¿nej cayjacnigi miich ajcxy mdzoohuity ca'ydí joon ajcxy? ²⁵ Ca' ji ni pin ma miich ajcxy pin jadipy nej ñayijptzomihuijb jadüg cñuux. ²⁶ Pen ca' mjaajtcixy nej mdüngixipy huidi hueen huinma'ñ, ¿nej co mdzachmijottigooygixy yi tzinaayin yi comeen'äjtin?

²⁷ Ijxcix yi aaybijy nej xóxyity, ca' ytaaccixy ni ca' yxuuygixy. ñich miich ajcxy nimaayb, co ni je rey Salomón müd tüg'öciy ymeen' ca' ñayxojxi jadu'n nej jada aaybijy ujtzpijy. ²⁸ Pen jadu'n Dios xoxy yi aay yi ujtz huidibi cham jajtíp ma yi tungop, e com jabom ti anajty ñiicxni, Dios xypubedipy xypudigihuipy nigi miich ajcxy huidi hueen mibijcp. ²⁹ Ca' miich ajcxy mhuinmay'ahuidijtcixipy ajcxy ti mgäaygixipy m'üuccixipy. ³⁰ Yi naaxhuiñyäjy ajcxy ymijottigoyb anaxy tüg'öciy caayin uucin, huit etz tijaty. Miich ajcxy huidi mijpidacp Dios, Dios Teedy ñejhuiyb co copicy ajcxy müd'adipy caayin uucin etz huit tucxy. ³¹ Jayijp mijottigooygix Dios y'ayuc ytiy'ajt, chi jada' tüg'öciy huidi ajcxy myajmayjaty mbäatcixipy yi'.

Jugy'äjtin mijpi jüby tzajpjoty

³² Chi Jesús yjacminañ:

—Ca' miich ajcxy mdzigüygixy, miich ajcxy mnihueen'ity, per mDios Teedy yega'ñ ane'mdac tzajpjoty müd miich ajcxy ycixpi. ³³ Toocxix tijaty miich ajcxy müd, nimooygix ayoobitijc. Yaj'oyüygix meen'idi'ñ huidi ca' y'amijihuipy ni camina. Yaj'oyüygix tüg pidägy, janch mij e janch oy, jüby tzajpjoty huidi ca' ycixipy ytiogoyipy, ma ca' meetzpi huaad ytiigy, ni ucxyting ca' yajhuindigoyipy. ³⁴ Pen miich ajcxy müd mgomeen'äjtin ya naaxhuiñ, yaayi je mjet mhuinma'ñ ajcxy. Pen mdzojcpy ajcxy je oybi huidibi Dios yegamy, nañ müd'äjticy jim jabom jabom mjet mhuinma'ñ ajcxy ma Dios.

Tzoc jtim ni'ixi'

³⁵ Chi Jesús yjacminañ:

—Ni'ixüygix mjet mhuinma'ñ jadu'n nej jihuüy mhuit myujc'ameetcixy co mdunaangixy, etz jadu'n nej jihuüy lámpara mnögpjccixy co mdzumnaaxangixy m'ahuixaangixy je huindzin. ³⁶ Ni'ixi'ijtcix jadu'n nej jäy huidi yhuindzin ahuijxp, co anajty yhuimbity co anajty ti y'oy ma jäy ti ypicy, chi co anajty minipy ycogapxiy, mic'amy myaj'ahuädzity ytijc. ³⁷ Jotcujc ajcxy je tumbi co je yhuindzin anajty yjädy, e paady chumnajx juugy. Janch nimaaybich miich ajcxy co je tumbi ajcxy yhuindzin anajty yjädy, chi yhuít yujc'ameedipy, chi ajcxy yaj'ixtägipy ma caybejt, yajcayipy yaj'ügipy. ³⁸ Oy miinipy je huindzin mijcoodz o moñiy, e páadip je tumbidijc ajcxy jim chumnäjcixy juugy, jotcujc je' ajcxy je jadu'mbi tumbidijc. ³⁹ Nejhuüygix jada co je codijc ixipy nejhuihuipy ti hora ymina'ñ je meetzpi, chi juugy ixipy chuumnaxa'ñ, e ca' ciyegipy ytijc nicxy jäy tigoty ymeech. ⁴⁰ Miich ajcxy nañ jadu'n ijtcixy ni'ixi', mina anajty ca' ti mhuinmaaygixy, huin'it miina'ñich ñich, je jäy huidi tzoön tzajpjoty.

Je tumbi tudägyip etz je tumbi ca'pi ytudägyity

⁴¹ Chi Pedro Jesús nimay:

—¿Pin jada ti myajnimaayb jada ayuc huidi ti mgapxy, ñich ajcxy, o nidüg'öciy jäy?

⁴² Chi je Huindzin Jesús yminañ:

—Huidibi tumbi je' ya huidi tumb müd yhuindzin janch cixyot huinijot huidi müd yhuinij'ajt ycuic'ajt huidi je yhuindzin mooyip ané'min ma ytiñc, huidi yajnigidägyib tumbidijc nej ypaadyii. ⁴³ Jotcuic je tumbi co anajty je' yhuindzin yhuimbity e padüyb ti cuyduñ jadu'n nej anajty ti ñimäyii. ⁴⁴ Janch ñich miich ajcxy ñimäy co je tumbi huindzin yajmihui'mdähuipy jada ytumbi tüg'óciy pidägy huidi ymiid. ⁴⁵ Pen je tumbi yhuinmaayb jotjoty huinma'ñyoty co je yhuindzin yhuäcxijpni mina ymiina'ñ, chi midziptzooni jacjadyii tumbidijc ajcxy, huojpni, cojxni, nañ ytiñyñi caayb uucp anaxy etz ymügyii. ⁴⁶ Chi je tumbi yhuindzin miinipy ma je xii hora anajty ca' jijp'ixy e ni canejhuüy anajty, e huin'it ooy tzaachytunipy yi tumbi e chi pidägyip ma je huidi ajcxy ca' ytuädgyity.

⁴⁷ Je tumbi huidi nejhuüyb nej yhuindzin chójcin, e ca' cuyduñ, ni ca' ycapxymidoy, ni ca' ni'ixi' ity co yhuindzin anajty yhuimbity, je' je' ñigi yajtzaachytunip. ⁴⁸ Je tumbi huidi ca' yajxon huinjihuüy nejihuüy yhuindzin chójcin, hueeni je' yajtzaachytunipy. Huenpínity huidi may yajmooyb, may yi' yajmibijctzohuüy; etz huenpínity huidi ti mihui'my ooy, yajmibijctzohuüyb ñigi.

Jesús ycixpi ñaybijc-huäcxyii jäy

⁴⁹ Chi Jesús yjacmínañ:

—Ñich ti nmiññich ya naaxhuin co jün nbidägyibich. ¡Ooy njadzocyich ji ixypipy ñitooyñi! ⁵⁰ Nyajnaxipyich tüg tzaachypi, e ¡ooy ndajy nmayich ixti mabaad yajcuydundäy! ⁵¹ ¿Nej miich ajcxy mdijy co ti nmiññich ya naaxhuin co nyajcixipyich je tzipi? ñich miich ajcxy nimaayb co ca'. Hue' janchtiy nyajnybijc-huäcxñanibich jäy ajcxy. ⁵² Jadachambi etz yjacñicxni xii tiempo ji migoox tüg quëxjädijc huidibi ajcxy ñaybijc-huäcxñib, tugüg müd je metzpi, e metzpi müd je tugügpi. ⁵³ Je ungdeedy tziptunip müd ymang etz je mang müd yteedy. Nañ je ungday tziptunip müd yñix etz je ñix müd ytaj. Nañ jadu'n je xecy tziptunip müd yxecy.

Je xii tiempo yti'ajt

⁵⁴ Chi Jesús nimay je mayjäy ajcxy:

—Co ajcxy m'ixy je joc ypidägy ma xii ycidägy, chi minangixy co tühuaam, e janch jadu'n yjadyii. ⁵⁵ Co ymiññ je jünboj, chi miich ajcxy minangixy co ambigaamb, chi janch jadu'n yjadyii. ⁵⁶ ¡Miich jibic jäy ajcxy! Ooy mjaajtcixy nej myajcapxcixy yi xii tiempo huidi ajcxy m'ixpy tzajpcixy etz ya naaxhuin: ¿Nej co ca' mjaajtcixy nej myajcapxcixy xii tiempo ymiñ ycidägy?

Naym'oyihui müd midzip

⁵⁷ ¿Nej co miich ajcxy ca' ci'm mnaydiyduunigixy nej ytuädgyity je tiy'ajt? ⁵⁸ Co mnäcxipy ma yi codung müd yi mmidzip jac'oy co mnayyay'oyihuipy müd yi mmidzip tü'am, ca'yd müd mjädip ma yi codung, e chi je codung xyciyegipy ma je xueetz, e je xueetz xypidägyip pujxtigoty. ⁵⁹ ñich miich nimaayb co ca' jilby mbidzimipy, ixti cooni mgüejtähuiipy tüg'óciy.

13

Ooy copícyity nyajtigajtzim nhuinma'ñ

¹ Huin'it jäy müdmidyacy Jesús jadu'n nej je gobernador Pilato yaj'ögy nijëjity jäy jim Galilea, chi tem huidijti ajcxy ñi'py müd iyujc ñi'py huidi je' ajcxy müd huindzigi'ñ tuuñ.

² Chi Jesús y'adzooy nimay ajcxy:

—¿Nej mdijy, ñigi anajty ypcymüidity je galileojäy ajcxy huidi jadu'n ayo'n patp, ca'yd müd nüdüg'óciy galileojäy? ³ ñich miich ajcxy nimaayb co ca'. Pen miich ajcxy ca' mjothuimbijtcixy ma Dios etz nay'adzigüygixy ma Dios, nüdüg'óciy miich ajcxy mgijxtähuiip mdigoydähuiip. ⁴ E je' ajcxy je majmocxtugügpi huidi je mjiñc jim Siloé nigidaagootti, yaj'óci ajcxy. ¿Nej mdijy ñigi ajcxy ypcymüidity, ca'yd nüdüg'óciy je jäy huidi tzinayb jim Jerusalén? ⁵ ñich miich ajcxy nimaayb co ca'. Pen miich ajcxy ca' mjothuimbijtcixy, nañ mgijxtähuiip mdigoydähuiip miich ajcxy nüdüg'óciy, jadu'n nej je' ajcxy.

Ijxpejt ma je higuery ca'pi anajty ytiim'aty

⁶ Chi Jesús yajnimay ajcxy jada ayuc:

—Tüg jäy anajty müdity higuery cojy ma y'aguemy, chi ñicxy jilby ma y'aguemy higuery tiim ijxtaayb, ni ca' paty. ⁷ Chi nimay je' ytumbi: “Cham midugüg jimijt miiññich ya higuery tiim ijxtayb ma jada higuery cop, ni tüg ngapaadyich. Huen yajpujxciday jada higuery cop, nej co nigooñi ñaaxnihua'ñ.” ⁸ Chi je' ytumbi y'adzooy: “Huindzin, oc'ixmatz. Huen jadüg jimijt jëyi ocjactinäy, octajyich jayijp yi naax jühuidity, etz oc'abonijyich. ⁹ Pen tiim'ajt ca' nyajpuxipy, pen ca' ytiim'aty jëbi nbüjixipy.”

Jesús yajtzögy pocxñiduum tüg töxyjäy jigojopyi

¹⁰ Chi Jesús anajty yaj'ixpicy ma tüg naymujctac pocxxi'duum. ¹¹ Jim anajty tüg töxyjäy huidi anajty mimajmocxtugig jimijt cujc mi'itni yjii'bojpa'm, agojy anajty yöy, ni nej anajty yca'oyiy nej ytinaaygugihuipy. ¹² Co Jesús i'jxy, chi yaaxi, e nimay:

—Töxyjäy, ti mdzögy.

¹³ Chi yci' cijxxajy ma je töxyjäy yjüx, e chi je' yjüx ytiy, huin'it ytigüy Dios ojada-jtpi. ¹⁴ Huin'it je naymujctac huindzin ooy yjotmäty müid co anajty Jesús jäy ti tzozyi pocxxi'duum. Chi je naymujctac huindzin nimay ajcxy je mayjäy:

—Jëyi tudujc xii jäy huaad ytuñ, huen miñ semaanjoty pin yajtzoyihuam, ca' ypocxxi'duumity.

¹⁵ Chi je huindzin Jesús yminañ:

—¡Miich ajcxy naybidaacip nej tudägyjäy, e ca' yjanchity! ¿Nej ca'miich ajcxy mmiguejy mhuajyuubi, etz mburro ma ypëxtac pocxxi'duum, e myajnicxy ajcxy ni'ucpi? ¹⁶ E jada Abraham y'ap y'oc huidi Satanás ca' y'ixmachii majmocxtugig jimijt, ¿nej ca' ypadyi naytzögibich pocxxi'duum?

¹⁷ Co Jesús jadu'n y'adzoy, chi yajtzöyduuñ ymidzip. Chi tüg'óciy cajpjäy oy ajcxy yjotcugiygixy müid je oybi huidi Jesús ytuun.

Ijxpejt ma je mostaza pájc

¹⁸ Chi Jesús yminañ:

—¿Nej m'oc'a'ixi'ygixy yi Dios y'ané'min? ¿Huidi müid n'ocyajquipxi'huibich? ¹⁹ Jadu'n Dios y'ané'min nipaady nej mostaza pajc huidibi tüg jäy ñiip ma y'aguemy, chi ymujxy etz yeegy ooy janch mij, chi je joon ajcxy oy ype'n pidaaccixy ma je mostaza quipy aacxy.

Ijxpejt ma je levadura ca'p óyity

²⁰ Chi Jesús jadüg'oc yminañ:

—¿Huidibi müid n'ocyajquipxi'huibich yi Dios y'ané'min? ²¹ Jadu'n Dios y'ané'min ni paady nej levadura huidi tüg töxyjäy yti'jhuidijt müid tugig quipxi'n harina ixti cooni yajxunday je harina.

Je tü'aa xützpi

²² Co Jesús anajty ñicxy jim Jerusalén, chi yaj'ixpicy anajty Dios y'ayuc ytiy'ajt cajp cajp majaty ñaxy. ²³ Chi tüg jäy Jesús amidoy:

—Huindzin, ¿nej hueeni yi jäy ajcxy huidi y'alma nidzögip?

Chi Jesús y'adzoy:

²⁴ —Mijpidaaccix Dios ytiy'ajt amuumdügjet, jëbi ajcxy m'alma ñidzögipy, jadu'n nipaady nej jäy ajcxy ñaymic'ixigixy co yti'gihuaangixy ma je ti'jc aguu xützpi. Jadu'n i'ich miich nimaayb co mayjäy ooy ja'a'ixiy yti'gihuaangixy ma Dios y'ané'my e ca' ajcxy jadipy nej yti'gigixipy. ²⁵ Co je codijc ypidigipy etz agüyñip yti'jc, huin'it miich ajcxy pinjaty tibäy huim, chi jii'by tibäy miich ajcxy mminandägy: “Huindzin, yaj'ahuäd”, e chi je ti'jc huindzin miich ajcxy xy'adzohuipy: “Ca' i'ich miich ajcxy nejhuüyich ma miich ajcxy mdzoongixy.” ²⁶ Chi huin'it miich ajcxy minandägy: “Müid i'ich ajcxy miich ti nmüidgaaygixy ti nmüid'uuccixy, e miich ti myaj'ixpicy ma i'ich ajcxy ngajp.” ²⁷ Chi je Huindzin y'adzohuipy ajcxy: “I'ich miich ajcxy nimayb co ca' nnejhuüyich ma miich ajcxy mdzoongixy. Jihuäccix ma i'ich nhuinduu, miich ajcxy pocy ytumbi.” ²⁸ Chi miich ajcxy jim ooy mdäjcixipy mmäygixipy, myäaxcixipy mdüitzquéetxipy, co miich ajcxy m'ixipy Abraham, Isaac, Jacob etz tüg'óciy yi Dios y'ayucnajtzcaxi'iybi jii'by ma Dios y'ané'my, e miich ajcxy tibäy anajty ti mhuim'gixy. ²⁹ Minip yi jäy ajcxy huidibi tzoomb ma xii ypidizimy, ma xii ycidägy, ma jayhuixtuc ypidizimy, etz cham ma madzäcruudz ytinaay'ahuüy, chi y'ixtäaccixipy ma je caydac jii'by ma Dios y'ané'my. ³⁰ Paady ji jäy ajcxy huidi cham axam'ajtp, je' ajcxy jayijp'adip, etz ji jäy ajcxy huidibi cham jayijp'ajtp, etz je' ajcxy axam'adip.

Jesús taj may müid Jerusalénycixpi

³¹ Chi nijëjity fariseojäy nimay Jesús:

—Quëg ya com yi rey Herodes xyaj'ögaam.

³² Chi Jesús y'adzoy:

—Nicx nimaaygix yjii'bi huaax co nyajpidzimybich ca'oybi etz nyajtzocypich jäy cham etz jabom, codugig xii ti ndung mayñijich. ³³ Ooy ycopicyty co i'ich njactü'yöyibich cham, jabom etz huixtic. Com ypaadyi co Dios y'ayuccapxhuäcxpi y'ögip ajcxy jim Jerusalén.

Chi Jesús yjacminaañ:

³⁴ —¡Jerusalén jäy! ¡Jerusalén jäy! huidibi yaj'o'cp Dios y'ayucnajtzcaxi'iyb ajcxy, etz ycögädz ajcxy je jäy huidibi Dios ti xyajni'guéjx ajcxy. Janch canaag'oc i'ich miich ajcxy njahuijtzmuga'n jadu'n nej tzeydaj y'ung yajmucy queecpätcipy, chi ni ca' jadu'n ti m'a'ixi'ygixy. ³⁵ Chi jada' i'jxcix cuenditungix, com jadachambi mgajp yhui'my najtz'ixi'.

hich miich ajcxy nimayb co ca' xy'ixipyich jadügtecy, ixti cooni anajty tiempo paaty mina mminãangixipy: “Capxpaaty je' huidi miimb müd Huindzin'ájtín Dios ycxipy.”

14

Jesús yajtzögy tüg yëdyjc quixpa'mmiüdpí

¹ Chi jadu'n yjajti co tüg pocxxiduüm Jesús ytigiy ycaya'n anajty ma tüg fariseojäy ytiyc, hue' anajty judío tungmiüdpí. Chi yi judío ixpicytiyc ajcxy tzach'ix'ijtcixy Jesús, amído'o'ijtcixy Jesús y'ayuc. ² Huin'it tüg jáy huidibi ymiü anajty quixpa'm miün ma Jesús yhuinduu. ³ Chi Jesús ymigapxi je' ajcxy huidibi yaj'ixpijc Dios ñecy etz yi fariseojäy ajcxy, nimay:

—¿Nej je Dios ytiy'ajt yminañ? ¿Huaad o ca' huaad chögy jáy pocxxiduüm?

⁴ Chi ajcxy y'amonday. Huin'it Jesús cínixajiy je pa'm jáy, chi yajtzöocy. ⁵ Chi Jesús nimay je fariseos ajcxy:

—¿Nej miich ajcxy pen niijutcögäp ajcxy mhuajyuubi o mburro pocxxiduüm, nej ca' mic'amy nicxy yajpidzimigixy oy y pocxxiduümü?

⁶ Chi ca' ajcxy jajty nej y'adzohuimbijtcixipy.

Je pinjaty huodzoöñyí ma je pijcpi yajnixiüduñyi

⁷ Co Jesús ixy jadu'n nei yi' ajcxy jac'oybi iñaybejt huin'ijxcixy jim ma je caybejt, chi ajcxy tüg ayuc yajnimaa yi, je tiibi anajty yajhuomiingixy:

⁸ —Co miich myajhuoohuipy ma pijcpi yajnixiüduñ, ca' m'ixtägipy ma je iñaybejt cödumbi, ca' jécyity co yajhuoomiñ huidi je' iñaybejt ymihuaad. ⁹ Chi jada' xyñimähuipy je huidibi anajty ti xyhuoomiñ: “Mo' jada migüg jada iñaybejt cödumbi.” Chi miich tzöydu'n müd mnicxpy ma je' iñaybejt axambi. ¹⁰ Co jáy xyhuoohuipy ma je pijcin yajnixiüduñ, jim m'ixtägip ma je axambi iñaybejt, e co yminiipy je huidibi anajty ti xyhuomiñ, chi xyñimähuipy: “Migüg, nax ma yi iñaybejt cödumbi.” Huin'it capxpaady m'idipy ma je' ajcxy huidibi anajty iñayb ma caybejthuinduu müd miich. ¹¹ Pinjaty ci'm naygómáyip, tzöydu'nbaadip je'. Pinjaty naybidaacip nicy xeemy je' je' capxpaady y'idip.

¹² Chi Jesús nimay pinjaty huidi anajty ti yhuoomiñyi:

—Co miich mxiüduunipy ca' mhuoohuipy je jáy ajcxy huidibi ooy müd mnaymigüg'ájtigixy, ni mmiidügquëx, ni m'ajuugy m'amigüg, ni mmiidijc comeñybi, ca' jécyity co nañ jadu'n xyhuoohuipy, e chi anajty jac mij yejc-huimbijty. ¹³ Co mxiüduunipy, chi huooohuipy ayooobitijc, tzaachijäy ajcxy, tecymätpi ajcxy, etz jáy huiintzpi. ¹⁴ Huin'it miich mjetucujc'adipy co yi' ajcxy ca' jadipy nej yejc-huimbidity. Jiini Dios xymigüedipy co anajty yajjugypicy je tudägyi jáy ajcxy.

Je ijpexjt ma tüg adzuu'ájtín mijpi

¹⁵ Tüg jáy huidi anajty iñayb müd Jesús ma caybejt huinduu co midooy nej Jesús yminañ, chi nimay Jesús:

—Jotucujc je jáy ajcxy huidi cayip jilby ma Dios y'ane'my.

¹⁶ Chi Jesús y'adzooy:

—Tüg jáy may anajty jáy yaj'adzu'adañ, chi jayijpni oy mayjáy nimay co anajty yaj'adzuu'adañ. ¹⁷ Co je adzuu'ibi paty, chi quejxy tüg cogapxy huen nicxy huooogixy je tiibi anajty ajcxy yajnimäy, nimay ajcxy: “Jámgiç, ti jim yajni'ixy je caayin uucin.” ¹⁸ Chi ajcxy nidüg'öciy yminandacy: “Tun may'ajt meecxcich, ca' y'oyiy nej nyajnicxibich.” Chi je' jayijp jáy y'adzooy: “Ti njuuyich tüg rancho je' copicy jayijp nicxy n'ixyich, paady ca' nicxa'ñich; tun may'ajt meecxcich.” ¹⁹ Chi jadüg jáy yminañ: “Ti njuuyich migoox par huaj yuubi, nicxy n'oc'ijxmadza'ñich jayijp, paady ca' y'oyiy nej nicxibyich, tun may'ajt meecxcich.” ²⁰ Chi jadüg jáy yminañ: “Tim chamni nbicyich, paady ca' oyiy nej nicxibyich.” ²¹ Co je cogapxy yhuimbijty, chi yajnimay je' yhuindzin jadu'n nej je jáy ajcxy y'adzooy huidi anajty oy ti huoy. Huin'it je huindzin ooy yjotmätöty, chi nimay je ytumbi: “Nixc tzojcyi cajpjoty ma yi jáy ajcxy yöygixy ñajxcixy etz ma yi mij tü, e chi huomiinipy pin mdimypaaty ayooobitijc, yi tzaachijäy etz huiintzpi.” ²² Chi je' ytumbi yminañ: “Huindzin, ti nduñich jadu'n nej ti xyñimäyich, etz jac chiini iñaybejt.” ²³ Chi je huindzin nimay je' ytumbi: “Nixc ma yi mij nü mij tü yajmin je jáy ajcxy adzip, huen iich ndijc uch. ²⁴ Chi iich miich nimäy co ni tüg yi jáy ajcxy huidi jayijp yajnimay, ca' ajcxy y'adzuu'adipy müd iich.”

Nej ooy chipity co Cristo nbanicxim

²⁵ Chi may anajty jáy ñicxy müd Jesús, chi Jesús yhuac-huimbijty, nimay ajcxy:

²⁶ —Pen ji pin xypamiñich, e ooy nigi tzozy yi' ytaj yteedy, yi' ytöxyijc, yi' y'ung, y'ajch o chi', etz nañ ooy nigi tzozy yi' yjugy'ájtín, ca' iich yi' huaad ndiscipulo'adyijich. ²⁷ Yi jáy ajcxy huidi xypamiñich huidi iich ndiscipulo'adaañip, copicy yajnaxipy ajcxy

ayo'n, jadu'n nipaady nejjihuüy ycruudz ti cabiëccixy e nicxy yajcruudzpeda'ñiyi. ²⁸ Co miich ajcxy mmijitjc mgoja'n, chi miich ajcxy jayijp m'ixtaaccixy e m'a'ixiigixy jadu'ñiyi meeñydunaangixy, nej pen m'id ajcxy huidi jëbi m'id myajmaaygixy je mmijitjc, o peni ca'. ²⁹ Ca' yjëcyity co anajty je tijc ti yajpojtzigy, chi anajty ca' m'ocajitni nej myajmayipy, e pinjaty anajty ti xy'ixy, chi ooy xy'ixigixy xyajxigipy. ³⁰ Chi jây ajcxy ymina' nip: "Jadayaabi yëdyjc nigoo ti yajtzondägy tijc poch, e ca' ti ocayjmaayñi." ³¹ O huidi rey ji co chona'ñ tziptumbi m'id huingbi rey, ¿ca' jayijp huinmayipy pen jëbi chiptuñ m'id majc mil jây, pen je ymidzip miimb m'id iipx mil jây? ³² Ca' yjëcyity co je tûgpi rey jiguemni anajty miñ, chi quexipy tûg huingapxpi pijctzohuipy may'ajt ca'ydi yi tzip yjadyi. ³³ Hueñypinity ma miich ajcxy pen ca' m'ixmâjtcixy tûg'óciy tijaty miich ajcxy mm'id, ca' ñich yi' huaad ndiscípulo'adyi.

Co je caan ytamtz'ajt ytigooyñi

³⁴ Yi caan ooy yi' y'óyity pen ym'id ytamtz'áitin. Co je caan ytigoy ytamtz'áitin ca' ji ni ti xücx'áitin yegipy. ³⁵ Yi caan huidi ti ytigoy ytamtz'áitin ni ca' y'oybidägnity ma je naax, ni ma je pûx huidi aboon'ajtp. Hue' janchtiy yaj'ixjidejtp tibây. Pinjaty ñich n'ayuc xymidohuaanip huen mido'mbicy.

15

Ijxpejt ma je cöbixy huidibi tigooy

¹ Chi ajcxy je yajcuetjpidijc etz pocyjädijc nimijhuägtay ajcxy Jesús tzach'amidoo'idaani ajcxy je' y'ayuc. ² Chi ajcxy huidi ooy tzachmijpidägy judiöjây yti'ajt etz huidi ajcxy yaj'ixpijc Dios ñecy ameech nigapxcixy ni'ojiiygixy je Jesús, chi ajcxy ymina'ñ:

—Yi Jesús pocyjädijc ajcxy ymüg'ajtpy, e yi' m'id ycaaygixy.

³⁻⁴ Chi Jesús jadayaabi ayuc ajcxy yajnimay:

—Huidi jây ji ma miich ajcxy pen ym'id migo'px cöbixy co ytigoy nidügti, ¿nej ca' yajhu'mipy je mada'px majmoxc midaaxpi jim ma chinaaydac, chi nicxy ixtây huidi anajty ti ytigoy ixti cooni paadip? ⁵ Co paadip, chi mic'amy pidägip ma quejycop janch jotcuic. ⁶ Co yajjädip ma ytiç, chi huomucy ymüg'tijc etz ymijiin ymidijc, nimähuipy ajcxy: "Jotcugixy m'id ñich, ti ñich ngöbixy nbaady huidi anajty ti ytigooy." ⁷ ñich miich ajcxy nimaayb co nañ jadu'n tzaajpoty ooy jotcuic'áitin nigi m'id co tûg pocyjây yjothuimbity, ca'ydi m'id mada'px majmoxc madaax tudägypi jây huidi ca' ytundigoy.

Ijxpejt ma je meeñ huidibi tigooy

⁸ Chi Jesús yjacmina'ñ:

—¿Huidi töxyjây ji pen ym'id majc ymeeñ, co ytigooy tûg meeñ, nej ca' jiin nöctzohuipy, e ytiçhuipy pedigpi ixtähuipy ymeeñ oñydägy ixti cooni paadipy? ⁹ Co paady, chi huomucy ymüg'tijc etz ymijiin ymidijc, e chi nimähuipy: "Xondaaccix m'id ñich, ti ñich nmeeñ nbaty huidibi ñich anajty ti nyajtigoy." ¹⁰ Jadu'n ñich miich ajcxy nimây co nañ jadu'n Dios y'ángeles ajcxy ooy yjotcúçity co yjothuimbity tûg pocyjây.

Ijxpejt ma je ung huidibi ymeeñ yajtixctay

¹¹ Nañ jadu'n Jesús yjacmina'ñ:

—Tûg yëdyjc ym'id anajty metz ymang. ¹² Chi je jacmutzpi nimay yteedy: "Tat, mooygich yi pidägy huidi xypaatpich." Chi je' yteedy je pidägy yajhuäcxy. ¹³ Hueeni anajty xii tzuu cujc ñicxy, co je' ymang mutzpi yajmujctay tûg'óciy huidi yi yjë'ajtpy, chi chooñ ñicxy huingnaax huinggajp. Chi jim mic'amy yajtunday yajtigoyday tûg'óciy huidi anajty ym'id. ¹⁴ Co anajty ymeeñ tûg'óciy yajtundây, chi miñ tûg mij yuu ma je cajp. Chi ooy je mang mutzpi caayin uucin huit meeñ jayajmayajitni. ¹⁵ Chi je' ninicxy tûg jây ma je jimbi naaxjot ymiduna'ñ anajty. Chi yquejxi ma yrancho idzim cuend'ajtpi. ¹⁶ Ooy anajty janijot'aty ycüxa'ñiyi m'id je pëtzim huidi anajty idzim y'ojcyp. Chi ni pin anajty ni ti ycamöyii. ¹⁷ Co yhuinma'ñ yajmejch, chi ymina'ñ ma yjot yhuinma'ñ: "Jim janch maytumbi ma ñich ndeedy ytiç, ym'id ajcxy jicxy picy janch may'amy. ñich ya tzach'ayoob m'id yuu xii. ¹⁸ Tzonaambich ya, nicxa'ñich ma ñich ndeedy, nimähuibich: Tat, ti ndundigóyich m'id Dios tzaajpjtoty etz m'id miich. ¹⁹ Cham ca' ypadyii m'id minañ co ñich miich xy'ung'adyii." ²² Chi je ungdeedy nimay je' ytumbi: "Yajpidzim je huit oybi, mic'amy yajnjeniygix jada n'ungich, chi mooygix yi çijitj etz yçig. ²³ Nicx yajtzoongix yi huaj mang nicxpi, yaj'öccix, chi ngaayim n'uucim e nxiduunim. ²⁴ Jada n'ungich jadu'n nipaady nejjihuüy anajty ti y'ögy, e chi ti yjugypicy. Tigooy yi' anajty e ti yjädý." Chi ajcxy ooy yjotcugihy.

²⁵ Chi je ymang mijpi camjoty je' anajty. Co yja'ty mihuingon je ytiyc, chi midoy co jay ooy yxüxy etz y'ech. ²⁶ Chi yaaxi tüg ytumbi y'amidooy: "¿Ti yi' tünip játip?" ²⁷ Chi je tumbi y'adzooy: "Ti yjady m'uch, ti mdeedy yaj'ögy tüg huaj nixpi, co ymang ti huimbity juugy." ²⁸ Chi je ungoob ooy yjotmäty, ca' anajty ytigihua'n tigoty. Huin'it je yteedy ñibidzimi, ycohuanüyi co huen tigiy tigoty. ²⁹ Chi je y'adzooy, nimay yteedy: "Janch micanaag jimijit iich miich müd nduñ, ni ca' ngapxhuimbityich. Ca' chambad miich ni ycamooyich tüg pi'ccöbixy jaydeb njotcuyc'adipyich nxüidunipyich müd nmigügtijcich. ³⁰ Per co yi mmang ti yjady huidi oy ti yajtundäy yi ymeeñ müd jibic-huinma'n müd jibic töxyjäydijc ajcxy, chi ti myaj'ögy huaj mang nixpi müd yi' ycixpi." ³¹ Chi je ungdeedy nimay je' ymang: "Miich ung huinixi ya müd n'ity. Tüg'óciy huidi nmüidich miich yi' mje". ³² Ooy ycopicyity co nxüidunim etz njotcugüym, co yi m'uch jadu'n anajty nej ti y'ögni, e jadachambi ti yjugypicy, ti anajty ytigoy, e cham ti yajpaady."

16

Je iixpejt ma je mayordomo huidibi ca' yhuindzin miduñ tudägy

¹ Nañ jadu'n Jesús nimay yi' ydiscipulos:

—Jim anajty tügäy comeefybi, ymüid tüg ytumbi huidi yi' ypidägy cuend'ájtíp. Chi oy nimäyüi co tüg je ytumbi nigoo anajty tzachyajuñ je meeñ ma ycapaadyüi. ² Chi je huindzin oy yajhuoyüi je' ytumbi, chi nimay: "¿Nej jada co iich jadu'n nimäyüijich müd miich yxipi? Ya yi cuenti cimoydaagyich nej ti mduñ, etz ca' iich miich n'ocjactumbi'adaañin." ³ Chi je pidägy cuend'ajtpi jot'ajti: "¿Ti ndunipich? co yi' nhuindzin xyajpidzima'ñich ma yi ytung. Juttajü ca' njatyich, co limosna nbijctzohuipyich tzöydümbich. ⁴ Nejhuüyich ti ndunipich jaydeb jay ajcxy xycöbigipyich ma ajcxy ytiyc." ⁵ Chi tüg tüg huoy pin anajty minuucx'ajtp je' yhuindzin; chi y'amidooy je jayjipi: "¿Jadu'ñyi miich minuucx'yadyi iich nhuindzin?" ⁶ Chi je y'adzooy: "Migo'px garafón aceite." Chi nimay: "Matz mnecy, iña' mic'amy, e cojayi' huixchiguijpmajc." ⁷ Chi jadüg nimay: "¿Miich jadu'ñi mminuucx'yadyi?" Chi je y'adzooy: "Migo'px quipxi'n trigo." Chi nimay: "Matz mnecy, cojayi' mida'px." ⁸ Chi je pidägy huindzin capxpaaty je jibicjáybi huidi cuend'ajtp yi' ypidägy co oy yhuinma'ñybaady mij; co jadachambi naaxhuüñjáy huidi ca' mibicy Dios, nigi ajcxy ypégyity müd yhuinma'ñ, ca'ydi yi jáy ajcxy huidi huinjhuüyb Dios ytiy'ajtp.

⁹ Iich miich ajcxy yam nimaayb migü'ájtigixy yi jáy ajcxy müd yi meeñ huidibi ca' ytimyüijyity, jigix co je meeñ anajty myajmayjajtcixy ji pin miich ajcxy xycöbigip ma jugy'ajttac huinixiübi.

¹⁰ Je' jáy ajcxy huidibi yajxon cuydunam je ané'min huidi hueeni, nañ ycuydunamy je ané'min huidibi mijp. Je jáy ajcxy huidibi ca' cuydunaangixy je ané'min huidi hueeni, nañ ca' cuydunaangixy je mijpi ané'min. ¹¹ Pen ca' mjahtcixy nej mgüend'ájtixipy yi jugy'ájtín huidibi ya naaxhuüñ yajpatp, ¿pin miich ajcxy m'ocyajmihui'mamy je jugy'ájtín je riqueza oybi janchyüi? ¹² Pen ca' mjahtcixy nej mgüend'ájtixipy tiübi mihui'ngixy huidi huingjáy yje'ajtpy, ¿pin miich ajcxy xymöhuip huidibi ajcxy yje'ajtpy?

¹³ Ni tüg tumbi ca' jébi ytuñ müd metz yhuindzin; com tüg je' ixtijipy etz jadüg mijnicxpedipy; o tüg huidi ycapxycöbigipy, etz jadüg ca'. Miich ajcxy ca' huaad mijpidägyipy Dios etz nañ jadu'n mijpidägyipy yi comeef'ájtín.

¹⁴ Nañ jadu'n midooy jada ayuc yi fariseojáy ajcxy, com ooy anajty ajcxy meeñ adzóccixy. Chi ajcxy ooy nixiici yajxiici Jesús y'ayuc. ¹⁵ Chi Jesús ymíañ:

—Miich ajcxy fariseojáy jadu'n mnaybidáacigixy ma jáy ajcxy yhuinduu nejjiuüñ ajcxy ooy m'oyjáyity. Dios ñejhuüdaayb co miich ajcxy müd jibicpi ma mjot mhuinma'ñ. Tijaty huinma'ñ huidi jáy ya naaxhuüñ y'oy'ixyp, Dios ca' yi' oy'ixy.

Je Dios ycötüjcin etz je Dios y'ane'mdac

¹⁶ Chi Jesús yjacmíañ:

—Je taabi je Juan anajty yjiijity, jii'ajtp anajty Moisés ycötüjcin etz je y'ayucnajtzcaxpiybi ajcxy y'ixpijcin. Huin'it tiempo etz ixti jadachambi jadu'n yajnajtzcaxpiy je Dios y'ané'min, e mayjáy ooy ñaybidáacigixy co ytigihuaangixy ma Dios y'ane'my.

¹⁷ Ca'chipity co je tzaaj etz naaxhuüñyi ñajxtáhuipy, pero je Dios ycuydundáhuamy tüg'óciy jadu'n nej neçy ymíañ. Ni tügi letra oy mabaad ymüdzity nicxy ycayajcuyduñ.

Jesús capxticxy nej ypöcyity co jáy ytöxyijc ixmach

¹⁸ Chi Jesús yjacmíañ:

—Huenpinjáyity co ytöxyijc ixmach etz ypicxy müd huingbi töxyjáy, ooy anajty mij pocy tuñ. Nañ huenpinjáyity huidibi pijcp müd je töxyjáy huidi ñäy ti y'ixmachyüi, nañ mij anajty pocyutuñ.

Je comeefjáy etz je Lázaro

¹⁹ Chi Jesús yjacmínañ:

—Ji anajty tũg jãy comeefñybi ñayxoxyii anajty janch ooy mĩd oyjatypĩ huit, etz janch oy ycaay y'ũgy jabom jabom. ²⁰ Nañ ji anajty tũg ayoobi jãy huidi limosna pijctzoob, hue' anajty yxii Lázaro. Lázaro jabom jabom anajty ycõgnãy ma je comeefñyã ytiyc'aguu, janch nĩbuutzp anajty ooy. ²¹ Lázaro ooy anajty jan'i'xy caya'ñ je cayduc tzũztuc huidibi cãb ma je comeefñyã ycaaybejt. Oy uc anajty ymĩñ yhueyii je ñĩbũdz. ²² Chi jadu'n yjajti co oy y'o'cni je jãy huidi limosna pijctzoob, chi je ángeles ajcxy yajnicxy Lázaro ma je Abraham yajpaady. Chi je comeefñybi nañ jadu'n y'o'cni, e oy yajnaaxtigiyii. ²³ Chi je comeefñybi jĩibi ca'oydactuuby tzaachypĩ anajty jihuiy, chi mij'ijxy jiguẽgy je Abraham etz je Lázaro. ²⁴ Chi je comeefñybi ycapxy janch mic, ymĩnañ: “Apteedy Abraham, iich pa'ayoog. Tun may'ajt quex Lázaro, huen yi' ycĩhuãx yajxoogy mĩd nĩ etz xyajtĩtzibich ndootz, co iich ooy ayo'n nbaadyich ma jada mij jĩin.” ²⁵ Chi Abraham y'adzooy: “Oc'ungich, ajihuihũ co ti mdzinãy ti mjugy'aty mĩd mhuit mmeefñ agujc jotcujc, e yi Lázaro ooy ayo'n paty. Jadachambi Lázaro yjotcujc'aty, etz miich jĩiby mbatpy tzaachypĩ. ²⁶ E jadũgnax, ji tũg mij huoc ma iich ajcxy etz miich ajcxy. Pen iich jim'amy janaxam ma miich, ca' njadipyich, nañ jadu'n miich ajcxy ni pin ca' jadipy nej ñaxipy ma iich nyajpaadyich.” ²⁷ Chi je comeefñybi jacmĩmay Abraham: “Apteedy Abraham, tun may'ajt quex yi Lázaro ma iich ndeedy ytiyc. ²⁸ Jim ma iich ndeedy ytiyc jim migoox miguẽx nmĩdidyich, huen nicxy yajmĩdmĩydaaccixy, ca'ydĩ je' ajcxy nañ jadu'n ya minipy ma jada ayoodac.” ²⁹ Chi Abraham y'adzooy: “Yi' ajcxy ymĩd necy huidibi Moisés etz Dios y'ayucnajtzcaxĩybi ycojaay, huen cuydungixy.” ³⁰ Chi je comeefñybi ymĩnañ: “Janch jadu'n apteedy Abraham. Pen nidũg yi õgpi ñicxy ma je' ajcxy, jothuimbidiy yi ajcxy.” ³¹ Chi Abraham ymĩnañ: “Pen ca' je' ajcxy mijpidãgy Moisés y'ayuc je jecyip etz huidi ajcxy jecy'ajt Dios y'ayucnajtzcaxĩy, nañ ni ca' mibĩjccixipy pen nidũg õgpi yjugypicy.”

17

Huidibi ooy ycodzigĩjity co n'agãñxĩm ma pocy

¹ Chi Jesús nimay yi' ydiscĩpulos:

—Janch tiy'ajt jadu'n co ymĩnip jãy ajcxy huidi yajhuinma'ñydgoyip yi mayjãy ajcxy mĩd aanĩ. jãy yi' ayoob ajcxy! pinjaty jãy ajcxy yajhuinma'ñydgoyaaangixy. ² Nĩgi y'õyity co ixipy yajyo'cxodziyĩ tũg tzaa janch mijpi, e chi yajcõjibijpnaxipy mejjyoty, ca'ydĩ co yajhuinma'ñydgoyipy jada jãy ajcxy huidibi ixpĩjcin hueeni mĩd ma Dios ytiy'ajt. ³ Naygũend'ãjtigix miich ajcxy co ca' mgapxtigõogyixipy.

Co m'uch xymĩdũdĩgooyipy, e chi mgapxhuĩip, e pen jothuimbij, chi mbocymeeccipy. ⁴ Pen m'uch huixtuc'oc xymĩdũdĩgooy tũg xĩbi, nañ huixtuc'oc xyñimĩñ tũg xĩbi, e ymĩna'ñipy: “Ti njothuimbityich”, huinmeeccipy miich yi', chi jada' miich huixtuc'oc mbocymeeccipy.

Je mibĩjcin ymĩc'ajt

⁵ Chi je apõstoles ajcxy nimay je Huĩndzin Jesús:

—Yajyeeg iich ajcxy nmibĩjcin.

⁶ Chi je Huĩndzin Jesús y'adzooy:

—Co ixipy miich ajcxy mmibicy Dios jadu'n nej tũg pi'c mostaza pajc, e mĩnĩma' ixipy jada paadzĩm quipy: “Nayyajpidĩgi, nicx tĩna' mejjyoty, e xycapxymĩdohuip yi'.”

Ti huaad tuñ je pin yajcaayb yaj'uuc

⁷ Pen ji miich ajcxy nidũg pin ymĩd tũg ytumbi huidi tumb ñaaxjidzitzĩ o yhuaj cuend'aty, co yja'ty ma mdĩjc, ñej jebĩ nimay: “Tĩgi', ixtãg ma mesa etz adzu'at?” ⁸ Hue' janchty mĩmĩahuipy: “Yaj'õyĩyigich n'adzu'ĩbi, co'amedĩ' mhuit, e xymooygich ngaayĩn n'uucĩn. E huin'it miich mgayipy m'ũgipy.” ⁹ Ñej yajnaxipy je' Dioscojuyip mĩd co je' anajty ti tuñ huidibi yaj'ane'my? iich mĩnamb co ca'. ¹⁰ Nañ jadu'n miich ajcxy co ti mguydungixy tũg'õcy tĩbi Dios xyaj'ane'mgixy, chi mĩmĩnãangixipy: “Je' iich ajcxy je tumbi huidibi ca'p ycapxpaadyity, jeyi ti ndũngixich huidibi iich ajcxy huaad ndungixy.”

Jesús yajtzõgy majc jãy jibic pũtzpa'mmĩdpi

¹¹ Nicxp jim Jerusalẽn anajty Jesús, chi ñaxiy ma Samaria etz Galilea ñaymĩdzĩba'n'ãjtigixy. ¹² Co anajty mĩhuĩngoñ tũg cajp, chi jĩpcoyõyĩy majc jãy pũtzpa'mmĩdpi. Chi ajcxy yhuãcxipy jiguẽgyñi. ¹³ Chi ajcxy mic ycapxcoody ymĩnaangixy:

—Huĩndzin Jesús, pa'ayoog iich ajcxy.

¹⁴ Co Jesús je' ajcxy ijxy, chi nimay ajcxy:

—Nicx nayguẽxĩcĩgix ma yi teedy ajcxy.

Chi jadu'n yjajti, co ajcxy ñicxy, chi tüyöjyoty oy chooccixy. ¹⁵ Nidügti je' ajcxy co ñay'ixi co ti anajty chögy, chi nihuimbijty Jesús, ooy Dios jáymech cömay janch cixyot huinijot. ¹⁶ Chi je' ycojxtinay'ahuüy ma Jesús ytecymijc, chi pidacpy yhuinijijp naaxcixy yajnaaxy Dioscojuyipy. Samaritanojäy je' anajty. ¹⁷ Chi Jesús yminañ:

—¿Nej ca' nimajc miich ajcxy huidi ti mdzooccixy? ¿Ma ajcxy je' janidaxtucjpi? ¹⁸ ¿Nej ca' pin jac yhuimbijty miñ jäymedza'ñ cömaya'ñ Dios, jëyi tügpajc ti yhuimbity jada samaritanojäy?

¹⁹ Chi Jesús nimay je jay:

—Pidig, nicxni. Yi mmibíjcin ti xyajtögy.

Nej je' yminipy Dios y'ane'min

²⁰ Chi je fariseojäy ajcxy y'amidooy Jesús mina anajty yi Dios ya miñ ya naaxhuiñ y'ane'mañ. Chi Jesús y'adzooy:

—Je Dios y'ane'min ca' je' yminipy jadu'n nej ti yaj'ixy o yajmidoy. ²¹ Ni mgamináangixipy co cha je' o jim'amy je'. Dios y'ane'min ya je' cham ma miich ajcxy.

²² Chi Jesús nimay yi' ydiscípulos ajcxy:

—Miim je xii je tiempo ma miich ajcxy anajty ooy xyjamid'idáangixich tüg xii, e ca' iich miich ajcxy xy'ixipy, iich je jäy huidi tzoön tzajpjoty. ²³ Chi jäy ajcxy yminá'nip: “Chaa'amy je', je Cristo”, o “Chim'amy je'.” Ca' miich ajcxy yi' mminicxcixipy, e ni mgabanicxcixipy. ²⁴ Co anajty nmiñich jadügtecy ya naaxhuiñ, iich, je jäy huidi tzoön tzajpjoty, co iich anajty nmiñ n'ane'min, jadu'n je' yjadipy nej huidzuc co y'aa'an ma tüg tzajp'ijx e nañ jadu'n y'aa'an jadüg tzajp'ijx. ²⁵ Nañ ooy ycopicyity co jayijp ocpáadibich ayo'n, e chi jada xyca'ixa'nibich xycatzoga'nibich yi jäy ajcxy huidi tzinaayb jugy'ajtp jadachambi tiempo. ²⁶ Com jadu'n nej yjajti jecy'ajty, co je Noé chinaay, nañ jadu'n yjadipy co anajty iich, je jäy huidi tzoön tzajpjoty, co anajty nxii ndiempo paty mina anajty nmiñich ane'mbi. ²⁷ Janch caayb janch uucp anajty je jäy ajcxy agujc jotcujc co je Noé ytigüy ma ymijcajoon. Chi je ayo'nduu ymiñ huidi cijx yaj'ögtigoydäy je mayjäy. ²⁸ Nañ jadu'n yjajti jecy'ajty co Lot chinaay. Je jäy ajcxy jim Sodoma etz Gomorra ycaaygixy y'uuccixy yjuuygixy ytooccixy, etz ytijscojixy. ²⁹ Huin'it xii co Lot chooni jim Sodoma, chi ycäy tzajpjoty jin etz huidi jindzaa miid conhuidity ytoy, chi cajp ytigoyday. ³⁰ Jadu'n nej ayo'n yjajti taabi chinaay Noé etz Lot ya naaxhuiñ, nañ jadu'n yjadüyb ayo'n co anajty nmiñich jadüg'oc ya naaxhuiñ, iich je jäy huidi tzoön tzajpjoty.

³¹ Je huin'it xii huin'it tiempo pin anajty iñaayb ma ytijscoop, e ymiid anajty ypidägy jii by tigoty, ca' nimiragipy nicxy ti yajpidzimy, e huidi jäy anajty jim camjoty nañ ni ca' yhuimbidity ma ytijs. ³² Ajihuüygix jadu'n nej Lot ytoxyijc ayo'n paty. ³³ Tüg'öciy jäy ajcxy pinjaty yjugy'ajt tzögam, tigoyipy yjugy'ajt. Tüg'öciy jäy ajcxy pinjaty yjugy'ajt tigooyb (miid iich ycixpi), hue' je' yjugy'ajt ypaadipy chögipy.

³⁴ Iich miich ajcxy nimaayb co je huin'it coodz nimetz jäy anajty ajcxy ma cijx, tüg yajnicxiyb etz jadüg yajhui'miib. ³⁵ Nimetz töxyjäy anajty yjitzcixy, tüg yajnicxiyb, etz jadüg yajhui'miib. ³⁶ Nimetz yëdjic anajty ytungixy camjoty, tüg yajnicxiyb etz jadüg yajhui'miib.

³⁷ Chi je jäy ajcxy huidi ixpijcp Jesús y'ayuc yminañ ajcxy:

—¿Ma jadu'n yjadüyb nej miich ti mina'ñ, Huindzin?

Chi Jesús yminañ:

—Ma anajty je ögpi yajpaady, jim yi luud ajcxy ñimuga'ñ.

18

Je iixpejt ma je ayoobitöxyjäy etz je juez

¹ Chi Jesús yajnimay ajcxy tüg ayuc huidijaty ixpijcp ma yi' co ooy ycopicyity Dios nmibijctzoohuim jabom jabom, ni ca' nmidzijpim. ² Chi Jesús yminañ:

—Ji anajty tüg juez ma tüg cajp, ni Dios anajty ca' tzigüy, etz ni jäy ajcxy anajty ca' huindzigüy. ³ Nañ ma je cajp jim anajty tüg co'ögy ytoxyjäy. Je' anajty yminög janam jadzojc ma je juez, nimäy anajty: “Nihuaangich ma je nmidzipich.” ⁴⁻⁵ Chi je codung ca' co'adzoy ca' a'ixiy tzojc. Chi je juez jot'ajti, yminañ jotjoty huinma'ñyoty: “Oy Dios ca' ndzigüyich, ni jäy ca' nhuindzigüyich, per com jada co'ögytöxyjäy nigi xychach'amayüyich, miñ n'ocnihua'ñich, ca'ydi jadüg'oc ymiñ e xyajcijxich anajty nmecxtüjcin.”

⁶ Chi je Huindzin Jesús yminañ:

—Mido'mbic miich ajcxy nej je juez jibicjäybi ti nihañ je töxyjäy co anajty ti yajtzibiyi.

⁷ ¿Nej ca' Dios ñihuaanip yi huidibi ti huin'ixy, huidibi mibijctzoob xii tzuum? ¿Huäcxibip, nicx ca' tzojc adzooyi? ⁸ Iich miich ajcxy nimaayb co Dios ñihuaanamy mic'amy yi' yjäy. Co

anajty nhuimbity ya naaxhuiñ, ñich, je jāy huidi tzoön tzejpjoty, ¿nej nbáadibich mibíjcin ya naaxhuiñ?

Je iixpejt ma je fariseo etz ma je yajcogüejtpi

⁹ Jesús ñimiýdac je jāy ajcxy huidi ci'm ooy ñaygömayyii co ooy y'oyjäyity, etz pejxy yi jacydyiibi jāy ajcxy, chi yajnimay ajcxy tūg jihuimbity ayuc:

¹⁰ —Mejtz jāy ajcxy ytiñiy ma Dios ytiñ capxtacpi. Tūg hue' je' fariseojāy, e jadūg yajcogüejtpi. ¹¹ Chi je fariseojāy ytinay'ahuñiy ycapxtāgy, chachmīna'ñ jadu'n: “Dios Teedy, Dioscojuyip yajnajxpich com co ca' ñich nbocytuñich jadu'n nej jacydyiibi jāy ypocytūnngixy, ca' nmeechich, ca' njibicjāyidyich, ca' nmigapxich huingjāy ytoxyijc, ca' nbocytuñich jadu'n nej jada yajcogüejtpi. ¹² Mejtz xii n'ityich jaygay tūgpi semaan. Chi huen ytim ti nmīdich ngüejtpyich ma Dios majcjay.” ¹³ Per je yajcogüejtpi jiguem ytinay'ahuñiy, ni ycapāt'ixy tzejpcijx, jēyi ycaachtzachcoxy ymīna'ñ: “Dios Teedy, pa'ayooigich, ñich pocyjāyich.” ¹⁴ ñich mīich ajcxy nīmaayb co jada yajcogüejtpi y'idacy ma ytiñ ti anajty yajhuinmecxy ypocy, e je fariseojāy ca' yajpocyhuinmecxy. Huenpīnity huidi ci'm naygömayipy, Dios yajtzōyduñib; e pinjaty ca' ñaygömayyii ci'm, Dios ycōmayiib.

Jesús conucxy je pi'ctijc ajcxy

¹⁵ Chi jāy ajcxy mīdmiñ pi'c'anāg ma Jesús huen nīdōñiyii. Co je' ydiscípulos ajcxy iixy, chi ajcxy ooy undaj. ¹⁶ Chi Jesús yaaxi ymīgūgtijc nīmay ajcxy:

—Ixmatz, huen yi pi'ctijc xyñimīñich, ca' ajcxy mīijpcogapxiygixy, com yi jāy ajcxy huidibi yajpatp ma Dios y'ané'mīn, jadu'n ajcxy nīpaady nej pi'ctijc. ¹⁷ Janch ñich mīich ajcxy nīmāy co hueñypīnity huidi ca' cōbijci yi Dios y'ayuc yti'yajt jadu'n nej yi pi'ctijc ajcxy cōbijcy Dios y'ayuc yti'yajt, ca' yi' ajcxy ytiñihuipy ma Dios y'ané'mīn.

Tūg comeeñ'anāg ymīyāgy mīid Jesús

¹⁸ Chi tūg mīcjay y'amidooy Jesús, nīmay:

—Mīich oyjāybi Huindzin, ¿ti huaad nduñich co ñich n'alma nīdzoocin paadipy?

¹⁹ Chi Jesús y'adzooy:

—¿Nej co xytiñijc oyjāy? Ni pin ya yca'oyjäyity, je'yi Dios tūgpajc y'oyjäyity. ²⁰ Mīich mnejhuñiyb yi Dios ycōtūjcin. Ca' mmīgapxtigoyipy huingbi toxyjāy, ca' jāyyaj'ōgipy, ca' mmeedzip, ca' mmīgūg nīhuambedipy, yajmij'at mdaj mdeedy.

²¹ Chi je' y'adzooy:

—Ti tūg'ōciy nguyduñāyich jada cōtūjcin maabi nyeecpidzimyich.

²² Co Jesús jadu'n mīdooy, chi nīmay:

—Tigoy'ijtni ja tūg huidi ca' mduñi. Toocta' tūg'ōciy tijaty mīich mīid, e mo' je meeñ ayoohtijc, huin'it mgomeeñ'adipy jūby tzejpjoty; mīin, e pajangich.

²³ Co je comeeñybi jadu'n ayuc mīdooy, chi ooy yjottigoyoty com ooy anajty ycomeeñity.

²⁴ Co Jesús iixy co je comeeñybi anajty ti yjotmaybich, chi mīnañ:

—Ooy chachchīpity ytiñihuipy tūg comeeñyāy ma Dios y'ané'mīn. ²⁵ Jac ca' chīpity co ñaxipy tūg camello ma yi xu'ñ yxūtity, ca'ydi co tūg comeeñyāy ytiñihuipy ma Dios y'ané'mīn.

²⁶ Chi je jāy ajcxy anajty tiibi ajcxy mīdoogixy Jesús y'ayuc, ymīnaangixy:

—¿Pin jada' jēbi y'alma paadipy nīdzoocin?

²⁷ Chi Jesús y'adzooy:

—Huidibi naaxhuiñyāy ajcxy ca' jaty nej yaj'oyihuipy, Dios jēbi yaj'oyīy.

²⁸ Co Pedro ymīnañ:

—ñich ajcxy ti nbidāgy n'ixmajtztaaygixy, co nbanicxaangixy.

²⁹⁻³⁰ Chi Jesús y'adzooy:

—Janch ñich mīich ajcxy nīmaaygixy co yi jāy ajcxy huidi ytiñ ixmajtz etz ytaj yteedy, ymīgūēx, etz y'ung y'anāg mīid Dios y'ané'mīn ycixpi, ypāadipy ajcxy ya naaxhuiñ nīgi oy'ajtín, etz ypaadipy ajcxy tzejpjoty tzīnaayin huidi ca' ycixipy ytiñigoyipy nīmīna.

Jesús capxypidzimy jadūg'oc co y'ōga'ñ

³¹ Chi Jesús huodzon je nīmajmetzpi, nīmay ajcxy:

—Jadachambi tzoc jāmīm jīm Jerusalén. Nguydunaamyich tūg'ōciy jadu'n nej yi Dios y'ayucnajtzcaxiybi ajcxy jaybeyty jecy'ajty mīid ñich ycixpi, ñich, je jāy huidi tzoön tzejpjoty. ³² Chi nyajciyega'ñich ma je romano gobernador, xycamij'ixipy xycamijpidāgibich ajcxy. Xy'ōjibich xyhuindzūjibich xyjijptzūjibich ajcxy. ³³ Xychaachytunipyich ajcxy, xyaj'ōgibich ajcxy, e codugūg xii njugypigipyich jadūg'oc.

³⁴ Chi yi majmetzpi ajcxy ni jadu'ñyi ca' huinjihuñiy ajcxy nej yhuimbizimy Jesús y'ayuc. Yūch anajty jada ayuc mīid yi' ajcxy ycixpi, paady ca' huinjihuñiy nej anajty yajnīmaaygixy.

Jesús yajhuindicxigy tūg huintzpi jīm Jericó

³⁵ Chi jadu'n yjajty co Jesús mihuingoñ je cajp huidi yxii Jericó, chi tüg huintzpi anajty iñäy tüba'äy pijtzooy anajty limosna. ³⁶ Co midooy mayjäy ñaxy, chi je' yajtiy:

—¿Pín yi' ñajxp?

³⁷ Chi ajcxy nimay co Jesús nazareno najxp. ³⁸ Huin'it je huintzpi mic yminañ:

—Jesús, David y'ap y'oc, ich pa'ayoog.

³⁹ Je jäy ajcxy huidi anajty jayijp nicxp ooy ogy je huintzpi, nimay co huen amoñ. E je' ñigi mic yminan'idich:

—David y'ap y'oc, ich pa'ayoog.

⁴⁰ Chi Jesús ytinayxijpy oy yajhuoyii. Co je' jim ymejch, chi amidoy, nimay:

⁴¹ —¿Ti mdzocpy ndunipych miid miich?

Chi je' y'adzooy:

—Huindzin, yajhuindicxícich.

⁴² Chi Jesús minañ:

—Huindicxig, yi mmibíjcin ti xyajtzögy.

⁴³ Chi je huintzpi mic'amy yhuin y'ijxig, chi panicxy Jesús, chi ooy jäymejch cömay yi Dios. Cham tüg'óciy je cajp jäy co ajcxy jadu'n ijxy, nañ ycömay yjäymejtz yi ajcxy Dios.

19

Jesús miid Zaqueo

¹ Co Jesús ytigüy jim Jericó, ñajxy cajpcujc anajty. ² Chi jadu'n yjajty jim anajty tüg jäy hue' anajty yxii Zaqueo. Hue' je' anajty yajcogüejtpi huindzin, e comeen anajty. ³ Ooy yi' anajty tzach'ixa'ñ Jesús, nejhuihua'ñ pin jäy je', chi ca' jajty nej ixipy, je' co anajty ñaxity, etz co anajty ooy mayjäy jim. ⁴ Chi je' ñicxy poyigy jayijp, chi ypejty ma tüg sicómoro quipy, yco'ijxnaxa'ñ co anajty Jesús jim ñaxy. ⁵ Co Jesús jim ymejch, chi pát'ijxy je Zaqueo, e nimay:

—Zaqueo, tzojc minac, com copicy co nicxy njättäga'ñich ma mdijc.

⁶ Chi je' yminajty janch jottigoy, e jotcujc cöbijcy Jesús. ⁷ Co jadu'n ijxy, chi je mayjäy ajcxy nigapxy n'ojiiygixy Jesús, yminaangixy:

—Ti ñicxy jättacpi ma tüg pocyjäy ytiyc.

⁸ Chi Zaqueo ytinayigy, nimay Jesús:

—Huindzin Jesús, cha je' je njugy'ajtich huidi cup nbjic-huäcxaamyich nmöhua'ñich ayooibitjc. Pen ti ich nyajcuetnaxy, nyajhuimbiditych midaaax jadu'ñyi.

⁹ Chi Jesús yminañ:

—Jadachambi jada jäy ma jadayaabi tijc ti y'alma ñidzögy, com co yi' nañ jadu'n Abraham y'ap'adyii y'oc'adyii. ¹⁰ Ich, je jäy huidi tzoon tzejpjoty, ti nmüñich ya naaxhuiñ co n'ixtähuibich etz nyajñidzögibich tiibi anajty ytigooy.

Je ijpajt ma je majci meen

¹¹ Co je jäy ajcxy midooy jadu'n, chi Jesús jacyajnimay ajcxy tüg ayuc, com ytimymihuingónip anajty Jerusalén, etz je jäy ajcxy tzachhuinmaaygixy co Jesús mic'amy anajty pidäga'ñ y'ané'min. ¹² Chi Jesús yminañ:

—Tüg micjäy, comeenjäy anajty, ñicxy ma tüg naaxjot jiguembi, nicxy anajty ytungbicy co yrey'ada'ñ, e chi anajty yhuimbidaani. ¹³ Chi je micjäy mijhuooy nimajc ytumbi, chi moy ajcxy majc meen nidüg nidüg, chi ajcxy nimay: “Meeñ yaj'ung'ajtcix ji ixti cooni ich anajty nhuimbityich.” ¹⁴ Chi je ymigogajp ajcxy ca' anajty ixa'ñyii ajcxy je comeeniybi, chi ajcxy yajpaguejxy huingapxpi ma anajty je comeeniybi ñicxy, chi je huingapxpi yminañ: “Ca' ich ajcxy ndzocy co jada comeenjäy rey'adipy ma ich ajcxy.” ¹⁵ Chi jadu'n yjajty co je comeenjäy yhuimbityi ti anajty yreytigüy. Chi oy yajhuoyii je ytumbi ajcxy, je huidi anajty je meen ti yajmihui'mgixy, nejhuihua'ñ anajty jadu'ñi ti yaj'ung'ajtcixy je meen nidüg nidüg.

¹⁶ Chi tüg jayijp ymiñ yminañ: “Huindzin, yi meen majcadu'ñi ti nyaj'ung'atyich.” ¹⁷ Chi je rey y'adzooy: “Ooy miich oy mduñ. Jadu'n nej ti mgapxcöbicy miid huidi hueni, cham m'ané'mipy majc ciudad.” ¹⁸ Chi je mimetzpi ymiñ, yminañ: “Huindzin, yi mmeeñ migoox jadu'ñyi ti nyaj'ung'atyich.” ¹⁹ Chi je rey nimay je mimetzpi: “Cham m'ané'mipy migoox ciudad.” ²⁰⁻²¹ Chi je midugüjpi ymiñ, yminañ: “Huindzin, cha je mmeeñ huidi ti nmi'ityich,

ti nyujpcpicych ma tüg paayi. Ndzigüybich miich co miich mjäy'aty ahua'ñ, mayajpidgäy huidi ca' mjé'adyii, nañ mdzijcpi huidi ca' ti mnipy.” ²² Chi je rey yminañ: “Miich jibic ti mduñ, cham ndyiduna'ñ miid mgi'm'ayuc ycixpi. Miich mnejhuiyb co nyajpidigyich huidi ca' njé'adyijich, e ndzicyich huidi ca' ti nnibych.” ²³ ¿Nej co ca' ti mbidägy ich mmeeñ ma je banco, jigix co ixipy nhuimbityich, may meen ixipy xycidigüych miid meen'ung?” ²⁴ Chi je rey nimay huidi anajty ajcxy jimip: “Pijci ajcxy yi' ymeeñ, etz mooygixy yi' tiibi meen yaj'ung'aty majc jadu'ñyi.” ²⁵ Chi je jäy ajcxy y'adzooy: “Huindzin, ymiid yi' cham majc jadu'ñyi meen.” ²⁶ Chi je rey y'adzooy: “Ich minaaam co tüg'óciy pinjaty miid, jacyajmöhüip; e huidi ca' ti miidity, oy jamidity yajpijctähuip huidi ymiid. ²⁷ Nañ jadu'n ajcxy je nmidzipich

huidi ca' anajty tzojccixy co ñich nrey'adipyich ma yi' ajcxy, yajmiingix ya, yo'cpujxtutaaygix ma ñich nhuinduu."

Jesús ytigüy Jerusalén

²⁸ Co Jesús jadu'n yminanday, chi choñ jim, ñicxy Jerusalén. Jesús jayijp anajty ytüyöy ma je mayjäy. ²⁹⁻³⁰ Jadu'n yjaity co jim yja'ty mihuingon Betfagé etz Betania ma je cop huidi yxii Olivos, chi Jesús quejxy metz ydiscipulos, nimay ajcxy:

—Ñicxcix ma yijibi cajp huidi ji huingon. Co ajcxy mgajptugühuip mbáatcixipy tüg burro mang ycoxochity, huidi ca' ni pin yaj'ñaayñi. Mgoguejtútcixipy, etz mmimüingixipy. ³¹ Pen jim pin xy'amidoogixy, ¿nej co yi burro mgoguejtüdy? Chi ajcxy jadu'n m'adzohuipy: "Je nhuindzinich jim tzojcp."

³² Chi je' ajcxy ñicxy huidi Jesús yquejx. Chi ajcxy paty je burro jadu'n nej Jesús anajty ajcxy ti ñimäyil. ³³ Jim anajty ajcxy je burro mang coguejtútcixy, co ñihuindzin ñimaayil ajcxy:

—¿Nej co yi burro mang mgoguejtútcixy?

³⁴ Chi je' ajcxy y'adzooy:

—Je nhuindzinich jim tzojcp.

³⁵ Chi ajcxy huijtz miñ je burro ma Jesús. Chi ajcxy jibe'ñ müd yhuít, chi ajcxy Jesús yajburripejty. ³⁶ Co Jesús anajty ytüyöy, chi je mayjäy ajcxy yhuít yé'pcixy tügujx. ³⁷ Co ajcxy mihuingon je minac ma je cop huidi yxii Olivos, chi tüg'óciy je mayjäy yjotcugiyday, e ytigüy ajcxy ooy alabanza ñibi Dios ojadjatpi müd je mij huinma'ñ ycxipi co anajty ti ñjxcixy huidi anajty Jesús ti tuñ. ³⁸ Chachmínaangixy:

—¡Capxpaady je rey huidi mümb müd Huindzin Dios yxii ycxipi! ¡Jotcuje'ajt jiiybz tzaipjoty etz cömáyin ma Dios!

³⁹ Huin'it nijéjity fariseojäy huidi anajty ajcxy jiiybz jäy agujc nimay ajcxy je Jesús:

—Oj yi mjäy ajcxy.

⁴⁰ Chi Jesús y'adzooy:

—Ñich müch ajcxy ñimaayb pen yi' ajcxy amomb, yi tzaa tigühuip mic capxp.

⁴¹ Co Jesús yja'ty jim mihuingon Jerusalén cajp, e co ijxy, chi yaaxy müd je cajpjäy ycxipi.

⁴² Chi Jesús yminañ:

—¡Pen mhuinjihuüyb ixypiy müch ajcxy nej mbáatcixipy mjotcuje'ájtín jadachambi xii tiempo! Yüch jada tiy'ajt cham ity ma müch ajcxy, ca' huaad m'ñjxcixy. ⁴³ Minip je xii je tiempo ma müch ajcxy je mmidzip ajcxy xyajjüdugipy mgajp müd tzaamacxy, e tziptunipy ajcxy müd müch, yajxon xyajco'adugipy ajcxy jühuidity ma je mgajp. ⁴⁴ Xyñigidaagoodip mdzaaboch ni'ung ni'anäg, ni ca' yhuí'mip tzaagop tzaamacxy, jadu'n yjadipy com müch ajcxy ca' mnejhuüy je tiempo mina je Dios xyñigidägy.

Jesús yajpidzimy je jibicjäydjic ma Dios ytijc

⁴⁵ Chi Jesús ytigüy ma Dios ytijc yajpidzimday tüg'óciy jäy huidi anajty jiiybz ajuuuyb adoocp. ⁴⁶ Chi Jesús nimay je jäy ajcxy:

—Jadu'n minañ ma jaybétyty: "Ñich ndijci tzaajpcapxycapxtägi'ñ yi'." E müch ajcxy hue' mhuaangixy jadu'n nej meetzpi y'ang.

⁴⁷ Jesús anajty yaj'ixpijc jabom jabom ma Dios ytijc, chi je teedy tungmüdpí, etz huidi ajcxy yaj'ixpijc anajty Dios ñecy, etz mijjäydjic ajcxy nihuinmayiygixy co yaj'ögaangixy Jesús. ⁴⁸ Chi ajcxy ca' ni nej mihuinma'ñybaty nej yaj'öccixy, com tüg'óciy jäy anajty ooy tzach'amidoo'ijt Jesús y'ayuc.

20

Jesús ycötújcín

¹ Chi jadu'n yjaity tüg xii anajty Jesús yaj'ixpicy je cajpjäy ma Dios ytijc, capxhuäcxy anajty oybi ayuc. Chi ñimiini je teedy tungmüdpí ajcxy etz huidi ajcxy yaj'ixpijc Dios ñecy etz mijjäydjic ajcxy. ² Chi ajcxy migapxy Jesús nimay:

—Yajñimaaygich, ¿ma cötújcín ti mbaady co jäy myaj'ixpicy ya ma Dios ytijc? ¿Pin je' tiibi xycötujc möy?

³ Chi Jesús y'adzooy:

—Ñich nañ jadu'n nyaj'amidohuamy ñich müch ajcxy tüg ayuc, e m'adzóogixip. ⁴ Co Juan (je Bautista) jäy yajñibejty, ¿pin je' cötújcín moy, je Dios tzaipjotyti o jäy ajcxy?

⁵ Chi ajcxy ytigüy huinmay'ahuidijtpi ñayñimáayigixy miñ xyipy:

—Pen minaanim co tzaipjoty choñ je Juan ycötújcín, Jesús xyñimaayimip ya: "¿Nej co ca' müch ajcxy mijpidacy yi' y'ayuc?" ⁶ Pen minaanim ajt co jäy cötújcín moy je Juan, chi tüg'óciy cajpjäy tzojc xycögädzim, com ymibijcipy ajcxy co yi Juan, Dios yi' y'ayucnajtzcaxxiybi.

⁷ Chi ajcxy y'adzooy co ca' ajcxy nejhuñyigixy pin Juan ti quexyíi. ⁸ Chi Jesús nimay je' ajcxy:

—Íich nañ jadu'n ca' nigapxa'ñich pin ti xycötujcmöyich.

Je iixpejt ma je tumbidijc ajcxy jibicjáybi

⁹ Chi Jesús yminandacy yajnimay tüg'óciy je jáy ajcxy tüg ayuc, ymíñañ:

—Tüg jáy pidacy tüg camuuxy ycam, chi yajpijctzoy ytumbidijc, co anajty chona'ñ ñicxa'ñ jiguem jecy jecy. ¹⁰ Co cosecha paty, chi quejxy tüg ytumbi ma je ytumbidijc, huen cimöyíi huidibi je' anajty paatip. Chi je ytumbidijc huinhuojpy jiphuojpy je quejxyöybi yajhuimbijty ca' ni ti mooy. ¹¹ Chi huingbi ytumbi quejxy, nañ jadu'n ajcxy je' tuñ, huin'ojy jipj'ojy ajcxy, yajhuimbijty ajcxy, ca' ajcxy ni ti mooy. ¹² Chi midugügpi ytumbi quejxy, nañ jadu'n ajcxy je' yajtzaachüy etz yajhuimbijty ajcxy.

¹³ Huin'it je camuuxycam huindzin ymíñañ: “¿Ti ndunipyich? Ocquejxyich nmang huidibi ooy ndzocyich. Ca' jécyity co ajcxy ixipy nmangich, yajmij'adipy ajcxy.” ¹⁴ Chi je ytumbidijc co ajcxy iixy je' yhuindzin ymang, chi ajcxy huinmaygoty nayñimáayigixy miñ xyipy: “Ti ymiñ je cogam ymang, yí' je' jada cam jédaanip. Tzoc yaj'o'cim jigix íich ajt jada cam njé'ajtim.” ¹⁵ Chi ajcxy je cogam ymang yajpidzimi camjoty, chi ajcxy yaj'o'cy.

Chi Jesús y'amidooy:

—¿Ti jada' ytunipy je cam huindzin? ¹⁶ Minip je', miñ yajtigoydäy je ytumbidijc ajcxy, e chi je' je ycam yegipy müd huingbi tumbi.

Co je jáy ajcxy jadu'n midoy, chi ajcxy ymíñañ:

—Ni catzogipy Dios, nicxy jadu'n njajtim.

¹⁷ Chi Jesús huindixpejty je mayjäy nimay ajcxy:

—¿Ti tujamy huidi yjaybétyip ma Dios ñecy?

Jadu'n:

Je yéydijc huidi je jáy ajcxy ca' anajty tzocy, ti Dios pidacy mij'ane'mbi. Tim jadu'n nipaady nejhuñy je tzaa oyjatypí huidibi je pojtzpidijc ajcxy ca' yajtuna'ñ, je' oy ti yhuí'mni ma anajty yjacopícycity.

¹⁸ Pinjaty ca' cöbiga'ñ jada mij'ane'mbi, ayo'n ypadamy, tim jadu'n nipaady nej jihuñy jim yciñxciday ma je tzaa nicx e tijhuñtz yajtáhuipy; e pen je tzaa nügídagoty, je' ajcxy janch jaam püx nicxy yajtcixy.

Yajnidíyigixy pen jébi cogüéjtin yajyecy o pen ca'

¹⁹ Je teedy tungmüdpí etz huidi ajcxy yaj'ixpijc Dios ñecy ooy anajty nihuinmayíyigixy madzaangixy je Jesús mic'amy, co ajcxy huinjihuñy co Jesús nimiýdáacigixy müd je jihuimbit ayuc, e chigüyb anajty ajcxy je cajp jáy. ²⁰ Chi ajcxy chachhuinma'ñ'ixtaayigixy nej huaad xigixy Jesús, chi quejxy ajcxy iix'ijtpi ma Jesús yajpaady huidi naybidaacip janch ypaat tudägyjáy; chi amidoo'ijtcixy Jesús y'ayuc huidi müd xihuaangixy, chi ciyegaangixy ma je gobernador. ²¹ Chi je iix'ijtpi ajcxy y'amidooy Jesús nimay ajcxy:

—Huindzin, nejhuñyib íich ajcxy co miich m'ayuc ooy y'óyity, etz myaj'ixpicy yajxon, ca' huin'ixpety jáy myaj'ixpicy, etz myaj'ixpicy Dios ytiy'ajt nej jáy jébi huaad chinaayigixy.

²² ¿Nej copicy íich ajcxy migüedipy je César je romanojáy mij'ane'mbi, o ca'iji?

²³ Chi Jesús huinjihuñy yí' ajcxy yjibic-huinma'ñ, paady ajcxy nimay:

—¿Ti co miich ajcxy xyjot'ixy xyhuinma'ñ'ixyich? ²⁴ Yaj'ijxcich tüg meeñ. ¿Pin y'ahuinax etz pin yxíi mimb ma jada meeñ?

Chi ajcxy y'adzooy:

—Yí César.

²⁵ Chi Jesús nimay ajcxy:

—Cuet ma César huidi César paatip, e ma Dios huidi Dios paatip.

²⁶ Ca' mimadacy ajcxy nej tzu'ijxcixy ma mayjäy yhuinduu. Chi ajcxy ooy huinmaay jadu'n nej anajty Jesús ti y'adzóohuigixy, chi ajcxy amofñy.

Yajnidíyigixy je jugy'ájin ycixpi

²⁷ Chi ñíja'tti Jesús tüg saduceojáy, e yí saduceojáy ajcxy ymíñañ co jáy ögy ca' y'ocjuuyjcní. Chi je' yajty:

²⁸—Huindzin, Moisés jaybety ma yí' ñecy, je jécyip, co tüg yéydijc ytöxyijc yajhui'my ix'ögp, e ca' ymang ti paatcixy. Jébi je yéydijc y'uch müdtzináy je töxyjáy jaydëbi yaj'ung'ixip müd y'ajch ycixpi. ²⁹ Jadu'n anajty tügpicy jáy, nihuixtujc ajcxy ytügquëx'ájtccixy, ac yéydijc ajcxy. Je mijpi müdtzinay töxyjáy, chi ix'o'cy, e ca' ymang paty. ³⁰ Chi je mimetzpi ypijcy müd je töxyjáy, e ni ca' ajcxy ung paty. ³¹ Chi je midugügpi ypijcy müd je töxyjáy, e jadu'n je nihuixtujcpí müdtzinay ajcxy je töxyjáy, ix'o'cy ajcxy, ni ca' ajcxy ung paty. ³² Chi nañ jadu'n je töxyjáy y'ögni. ³³ Co anajty je nihuixtujcpí jugypijccixy, ¿huidi jada' octöxijc'adiyib je töxyjáy? Com nihuixtujc ajcxy ti töxyijc'ájtigixy.

³⁴ Chi Jesús y'adzooy:

—Jadachambi jáy píjccixp, ñaymooyigixy y'ung huen píjccixy. ³⁵ Je jáy ajcxy huidibi paatip anajty chináhuip ma je tiempo huidi mimb co ógpi yjugypíjccixipy, ni ca' ajcxy ypigipy, ni ca' ajcxy ñaymóoyigixipy y'ung huen píjccixy. ³⁶ Co jáy ajcxy yjugypicy, chi ca' huaad y'ógcixy jadüg'oc, quipxyjaty ajcxy müid je ángeles ajcxy, e Dios yí' ajcxy ung'adiib co yjugypigipy müid jemýbi jugy'ájtín. ³⁷ Janch co yí' ógpi yjugypigipy, jébi mbaadip je tiy'ajt ma Moisés ñecy ma jadu'n yjaybétyty, je taab anajty aay'ujtz ytoy, co je Huindzin Dios migapxy Moisés, nimay: “Íich Abraham yDios, Isaac yDios, Jacob yDios.” ³⁸ Je ógpi ca' müidity Dios. Je jáy ajcxy huidi juugyip janchtiy ajcxy ymüid Dios, com co müid Dios ycixpi tüg'óciy jáy ajcxy ymüid yjugy'ajt.

³⁹ Chi jáy ajcxy huidi yaj'ixpijcp Dios ñecy nimay Jesús:

—Oy ti m'adzoy, Huindzin.

⁴⁰ Ca' ajcxy ocjajtni nej jac nimáaygixipy.

Pin je' y'ung je Cristo

⁴¹ Chi Jesús je' ajcxy nimay:

—¿Nej co müich ajcxy mina'ñ co Cristo David y'ap y'oc? ⁴² David ci'm mina'ñ ma je Salmo necy:

Yi Huindzin Dios nimay íich nHuindzin: “Íña' ya a'oy'amy ma íich.

⁴³ Ixti cooni anajty müich mmidzip ti nmimadactäyich, jadu'n nej jihuüy ti nbidägyich yi mmidzip ma müich mdecypocxpejt.”

⁴⁴ Co David yxiimoy Cristo íich nHuindzin, ¿nejtz yi' co y'ap'adyii y'oc'adyii?

Jesús xiy je escribas ajcxy

⁴⁵ Chi tüg'óciy cajpjäy jim anajty y'amido'ijtcixy co Jesús nimay je' ydiscípulos ajcxy:

⁴⁶ —Naygüend'ájtigix müid yi' escribas ajcxy ydiscípulos, co ajcxy ooy tzojccixy yhuuidaangixy müid yhuit oyjatypi, ooy ajcxy tzojccixy co huen capxpcxyii ma jáy y'amugiy, e ooy ajcxy tzojccixy yi códumbi íñaybejt ma naymujctac, etz ooy ajcxy tzojccixy códumbi íñaybejt ma jáy ajcxy yxiidungixy. ⁴⁷ Chi ajcxy yajcixtayi yi co'ógytöxyjáy ypidägy, e tungixy ooy jecy tzajpcapxycapxi ma jáy yhuinduu. Yi jadu'mbi jáy ajcxy nígi ajcxy Dios chaachytuníyb müid ypocy ycixpi ca'ydí jacnipín.

21

Je ayoobitöxyjáy co'ógypi y'ofrenda

¹ Jiibý anajty Jesús ma Dios ytíjc co íjxy comeefñyjáy may'amy ofrenda pidaaccixy ma meefñygaax. ² E nañ íjxy co tüg co'ógytöxyjáy pidägy anajty metz pi'cmeefñ. ³ Chi Jesús yminañ:

—Janch íich müich ajcxy nimäy co jadayaabi co'ógytöxyjáy ayoob jac anaxy jada, ti pidägy ofrenda ca'ydí jacnipín. ⁴ Tüg'óciy comeefñdjic ajcxy ypidacyp ma ofrenda je meefñ huidi conajxp. Jadayaabi co'ógytöxyjáy ti pidägy huidi anajty ñugayamy.

Jesús yminañ co je Dios ytíjc yhuindigoya'ñ

⁵ Nijējity jáy co ytigíiy ma Dios ytíjc nimíydacy ajcxy co Dios ytíjc ooy chach'oy'oydúñity müid tzaa oyjatypi, e müid tiibi jiibý yojxcixy. Chi Jesús yminañ:

⁶ —Tüg'óciy jada huidi ajcxy m'íjxpy ma Dios ytíjc, miníp xii tiempo mina jada nicxy yhuí'my taj xit jada tzaa, ca' ma pochycop.

Je tiy'ajt ma ca'ni naaxhuiñybi ycixa'ñi ytigoya'ñi

⁷ Chi ajcxy y'amidooy Jesús:

—Huindzin, ¿mina jada jadu'n ytuníyb yjadiyib nej müich ti mminañ? ¿Ti tiy'ajt ji yaj'ixip co jada anajty jadu'n ytuna'ñyii yjada'ñyii?

⁸ Chi Jesús y'adzooy:

—Ix mgayajhuin'ingix. Ooy mayjáy ymina'ñ ñaybidägáanigixy co je' ajcxy je Cristo, ymina'ñ ajcxy: “Íich je' je Cristo; huingóniñ anajty je xii je tiempo mina je naaxhuiñybi ycixa'ñ ytigoya'ñ.” Ca' ajcxy axam mbanicixipy. ⁹ Co müich ajcxy ayuc midohuipy co jáy chachchiptungixy, e ñayñibidícigixy, ca' mdzigíygixipy, com ooy ycopícyty co jada jadu'n jayíjp ytuníyb yjadiyib, ca'nan hue' je' anajty tim cíjxp tim tigooyb (je naaxhuiñybi).

¹⁰ Chi Jesús yjacminañ:

—Nayñibidägíib naax cajp müid huingbi naax huingbi cajp. ¹¹ E miníp mic'ujx, etz mij yuu mij pa'm xii yaa. E jadiib mij'adzigi'ñ, etz ooy íjxpejt huidi qüexígip tzajpcíxy.

¹² Ma ca'ni anajty jadu'n jadyii, xypahuidíjtcootcixipy jáy, xymájtzcixipy, xycíyécixipy ma judíojáy ñaymujctac. Chi jáy ajcxy xypidägipy pujxtigoty, xayjnicxcixipy mach ma rey etz ma gobernador ajcxy yhuinduu. Jadu'n jáy ajcxy jibic xytunipy müid müich ajcxy com co anajty ti xymijpidáacciych. ¹³ Müich ajcxy tiy'ajt myegipy müid íich nxii ycixpi. ¹⁴ Co jáy

ajcxy yxihuiipy ma codungdijc, ca' ni nej ajcxy mjet'adhiyb, ni ca' ajcxy mhuinmayipy nej m'adzogixipy. ¹⁵ Nyegipyich ayuc etz tiy'ajt nej huaad mmidzip m'adzoogixy. Ca' mmidzip ajcxy jadyip nej xy'adzogixipy, e nej xyjacxigixipy. ¹⁶ Miich ajcxy mgi'mdeedy, mgi'm'uch, mgi'm'ajch, etz mgi'm'ajuugy amigüg xyciyéjicixipy ma cötujctac. Nijëjity miich ajcxy m'ögipy müid co anajty ti mmijpidaaccixy iich n'ayuc. ¹⁷ Mayjäy ajcxy ca' xy'ixaanipy xychogaanipy müid co anajty ti mmijpidaaccixy iich nxii. ¹⁸ Ni tüg miich ajcxy mgöhuay ca' ytigoyipy. ¹⁹ Pen ooy ajcxy mmecxtucy, chi m'alma ñidzögipy huinixii.

²⁰ Co ajcxy m'ixipy Jerusalén anajty ti ñaducy müid ymidzip, huin'it ajcxy mnejhuihuiipy co huingon je anajty ma yhuindigoyaani. ²¹ Huin'it tiempo je jäy ajcxy huidi jim Judea naaxjot yquécicixipy ñicxcixipy ajcxy yuugjoty, etz je jäy ajcxy huidi jim Jerusalén queegipy ajcxy, etz je jäy ajcxy huidi camjoty ca' huaad y'ocajptigiyiñi ma je Jerusalén cajp. ²² Je tiempo mina yjadhiyb ayo'n müid co anajty judío jäy ti ytundigoogixy, je' jada yajcuydundaayb jadu'n nej yjaaybétyity ma Dios ñecy. ²³ ¡Ayoob yi töxyjäy ajcxy huidi anajty ung tzim'ijtp huin'it xii, etz huidi anajty müid y'ungma'xung! Ooy jadiib mij ayo'n ya naaxhuin etz tzip éjin ma jada cajp. ²⁴ Nijëjity ajcxy y'ögipy tzipjoty, e nijëjity yajnicxip tzumy mach ma huingbi cajp huingbi naax. E Jerusalén naxmihuägiydähuib yi jäy huidi ca' yjudiojäyity, minipy je tiempo mina anajty Dios yajcixaani yajtigoyaani yi' ajcxy y'ané'min.

Nej jada' yminipy je Dios y'ung

²⁵ Huin'it xii huin'it tiempo quëxigip ijxpejt ma xii po' etz ma yi madza', ya naaxhuin ooy jäy ajcxy jotmay mi'i'idipy. Je jäy ajcxy ooy chigihuiipy yjihuihuipy yhuinmay'ahuididipy ajcxy ooy, müid je mejy ycixpi co anajty chachpidigy chachnögy chachmina'ñ. ²⁶ Yi jäy ajcxy anucxi'ñ yajcidahuib co anajty ajcxy icy nej yjadyii huindu'mybi naaxhuin; e huidijaty mic'ajt yajpatp jiihy tzajpjoty yüxtähuipy yi'. ²⁷ Huin'it miich ajcxy xy'ixipyich, iich je jäy huidi tooon tzajpjoty, nmiinich jocjoty müid je nmic'ajtich, nmiinich müid iich ngötüjcin etz iich n'oy'ajtin mijpi. ²⁸ Co je ayo'n tiempo jadu'n yjatzondägipy, chi mba't'ljxcixipy com huingoniñ anajty mina Dios xyñihuäängixipy xycohuäängixipy.

²⁹ Chi Jesús yajnimay ajcxy tüg ayuc, yminañ:

—Ijxcix yi higuéri etz tüg'öciy quipy, ³⁰ co yhuamigy huin'it miich ajcxy nejhuüy co ti yhuingoni' mina ypottigiyiñi. ³¹ Tim jadu'n nej miich ajcxy ijxpejt mbicy ma higuéri quipy co pottitempo ytigiyiñi, nañ jadu'n co miich ajcxy m'ixipy je ijxpejt tzajpcixy jadu'n nej yam nyajnimaaugixy, mnejhuihuiipy ajcxy co huingonip je tiempo mina Dios y'ane'ma'ñ ya naaxhuin.

³² Janch nimaaybich miich ajcxy co jadu'n yjadhiyb ytunhiyb jayijp, ca' anajty o'ctäy je jäy ajcxy huidibi tzinaayb jugy'ajtcixyp jadachambi xii tiempo. ³³ Yi tzajp etz naaxhuin'ibi naxip tigoyip yi'. Iich n'ayuc ca' ñaxipy ytigoyipy ni camina.

³⁴ Naygüend'ajtigix miich ajcxy ca' mnijot'ajtcixy yi jocni yi mügi, etz yi tzinaayin jugy'ajtin, jigix ca' ajcxy xyniminipy jotcömoñyi je ayo'n xii je ayo'n tiempo. ³⁵ Timetiini minipy je ayo'n tiempo müid jäy ajcxy ycixpi huidi ya tzinaayb ma tüg'öciy naaxhuin'ibi. Tim jadu'n nej tüg iyujc ayo'nbaady co timetiini yajtuxuuch. ³⁶ Ni'ixi' ijtcix, mibijctzoogix Dios, ca'ydí ayo'n ajcxy mbaatcixy huidi jadaanip, jigix jiihy myajpaatcixipy tzajpjoty ma iich nhuinduu, iich, je jäy huidi tooon tzajpjoty.

³⁷ Xim anajty Jesús yaj'ixpicy ma Dios ytiyc, e coodz anajty choon ñicxy jim ma cögop huidi yxii Olivos. ³⁸ Jabom jabom jopy jopy ñiminyii tüg'öciy cajpjäy jiihy ma Dios ytiyc tibäy co y'amidoo'idaani ajcxy Jesús y'ayuc.

22

Xiicyögyixy capxyögyixy nej huaad Jesús májtzcixy

¹ Huingon anajty je xii mina jäy tzajcaagy caaygixy huidi ca' ylevadura müidity, huidi jäy ytiypy pascua xii. ² Chi je teedy mijtungmüidpi etz je escribas yhuinma'ñ'ixtaaygixy nej ajcxy ocyajögipy Jesús. Chighiyb anajty ajcxy je cajpjäy.

³ Chi je mujcu' ytigüy ma Judas yjot yhuinma'ñ. Je Judas hue' anajty ymimetz xii Iscariote, je' nidügti je majmetzpi discípulos. ⁴ Chi Judas ñicxy oy migapxy je teedy mijtungmüidpi etz tzajptijc soldado huindzin, e ycapxytuñ müid je' ajcxy nej jëbi cüyecy Jesús. ⁵ Huin'it je Jesús ymidzip ooy ajcxy yxoondaccotay. Chi ajcxy ñaygapxi co meen möhuangixy je Judas. ⁶ Chi Judas cöbijcy je meen, chi yhuinma'ñ'ixtay nej jëbi cüyegipy Jesús ma ca'p mayjäy y'ixyii yhuindicxyii.

Je huindzin Dios y'adzu'ajtin

⁷ Chi paty je xii mina jäy cay je tzajcaagy huidi ca' ylevadura müidity com huin'it anajty ajcxy yaj'ögy cöbixy ymang pascua xiiigixp. ⁸ Chi Jesús quejxy Pedro etz Juan, nimay:

—Nixc miich ajcxy yaj'oyi' je pascua adzu'ibi, jaydëbi ajt ngaayim.

⁹ Chi ajcxy y'amidooy:

—¿Ma mdzocy co nyaj'oyihuibich ajcxy?

¹⁰ Chi Jesús yminañ:

—Co mdigihuiipy ajcxy cajpjoty, mbaadipy tüg yëydijc huidi yajnicxp tüg majt nii. Mbanicxyp ajcxy je yëydijc cooni yjadipy ma ytijc. ¹¹ Co miich ajcxy mjadipy ma je jây ytijc, chi ajcxy mniimähuiipy je codijc: “Nhuindzinich jadu'n minaam: ¿Ma yaj'ahuädz yajpaady ma ngayipyich je pascua adzu'ibi müd ich ndiscipulotijc?” ¹² Je codijc miich ajcxy xyajni'ixihuiip tüg cuarto ma mimejtzpi piso. Ni'ixi' jim je adzu'ibi. ¹³ Chi Pedro etz Juan ñicxy, chi paty jadu'n nej anajty ti ñimäyii, e jim ajcxy ni'ixi'y je pascua caayin uucin.

¹⁴ Co je hora paty, chi Jesús y'ixtacy ma je mesa müd je' ydiscipulos ajcxy. ¹⁵ Chi Jesús yminañ:

—Ti ooy nijot'atyich co nmüdgayaangixy jada pascua adzu'ibi ma ca'ni n'ögyñich. ¹⁶ Ich miich ajcxy jadu'n nimaayb co ich ni mina ca' njaccayipyich jadüg'oc je pascua adzu'ibi, ixti cooni yajcuydundähuiipy je pascua xi' ytiy'ajt ma Dios y'ané'min.

¹⁷ Chi Jesús conigy je ügy co Dioscojüyipy yajnaxy, huin'it yminañ:

—Uccix jada ügy, naymööyigixy miich ajcxy. ¹⁸ Cham ich miich ajcxy nimäy co jadu'n nej yjacnicxa'ñ xi' tiempo ca' vino nii üga'ñich ixti cooni Dios y'ané'min yminipy ya naaxhuin.

¹⁹ Nañ yconigy Jesús tüg tzajcaagy co mibijctzooy Dios, huin'it tujc-huäcxy moy discipulos ajcxy, e chi ajcxy nimay:

—Jada tzajcaagy ich nninix'ajtpyich huidi ngiyejcpyich ma yi o'cin müd miich ajcxy mbocy ycixpi. Jada iixpejt miich ajcxy mü'idipy oy jaymech müd ich ycixpi.

²⁰ Co anajty ti ycaйдаaygixy, chi Jesús conigy je ügy jadüg'oc, chi yminañ:

—Jada vino je' jada Dios y'ayuc ytiy'ajt jemybi jadu'n yi' nej ich nni'py huidi temam yogam müd miich ajcxy ycixpi.

²¹ Jadachambi yi jây huidi xyciyegaambich ma nmidzipich, ya je' cham müd'ifñäyich ma jada mesa. ²² Janch jadu'n njada'ñ n'ayoohua'ñich jadu'n nej ti nyajnigodugüyijich. ¡Ayo'n padamy je jây ayooob huidi xyciyegaamyich ma nmidzipich!

²³ Chi je nimajmetzpi ajcxy ñayñimaayi miñ xyipy:

—¿Pin jada' yi' ma ich ajt huidi jadu'n tundigoyam?

Yajcapxcójcxy pin jada' jacnigi ymijity

²⁴ Chi je nimajmetzpi huidi Jesús anajty ti huin'ixy ca' ajcxy ñay'ayuc-huinjihuiyi pin jada' jac miji oc'idipy. ²⁵ Chi Jesús nimay ajcxy:

—Yi reyes ajcxy y'ane'myb ajcxy naax cajp jadu'n nej tüg huindzin, yi' ajcxy huidibi ane'mb yajtijcixy co ooy oytuungixy. ²⁶ Müd miich ajcxy ca'ydi yjadu'nity. Hue' janchtiy je mijpi ma miich ajcxy huen ñaybidägyii nej jihuüy ymützity. E je huidi nigohuajc'ajtp huen ñaybidägyii nej jihuüy je' je' je tumbi. ²⁷ ¿Pin je' jacmijip? ¿Huidi ifñaybi ma mesa, o huidi ni'ixi'yb a'ixi'yb caayin uucin? Yi' je' jacmijip huidi ifñayb ma mesa. Per ich ijtpich müd miich ajcxy jadu'n nej huidi ni'ixi'yb aa'ixi'yb caayin uucin.

²⁸ Miich ajcxy ti m'ijtcixy müd ich ma anajty ayo'n ti nyajnaxyich. ²⁹ Paady ich miich ajcxy tüg ané'min nmooyb, jadu'n nej ich ndeedy ti xymöyich. ³⁰ Jaydëbi miich ajcxy mgäaygixipy m'uuccixipy ma ich nmesa jiiyby ma ich n'ané'min e m'ifñähuiipy ajcxy ma je ane'mdac, e mdiydungixipy m'ané'ngxipy je nimajmetz picy Israel ñaax ycajp.

Jesús capxpizimy co Pedro ymina'na'ñ co ca'p Jesús icy'adyii

³¹ Nañ jadu'n je huindzin Jesús yminañ:

—Simón, Simón, jadachambi je mujcu' xyjot'ixaangixy xyhuinma'ñ'ixaangixy jadu'n nej jây trigo huimbojy co jajhuätzaangixy. ³² Per ich Dios nmibijctzooyich müd miich ycixpi, jigix miich ca'ydi mmibijcin ytigoy'ity. Mina anajty miich ti mjothuimbity, jotmic migápxiyipy yi mmigügtijc ajcxy.

³³ Chi Pedro yminañ:

—Huindzin, jotcujc ich nnicxa'ñich müd miich oy pujxtigótyity, etz oy ndimy'ögibich müd miich.

³⁴ Huin'it Jesús nimay Pedro:

—Ich miich nimaayb co ca'ni anajty tzey yaxigy jabom jopy co miich miná'nip tugüg'oc co miich ca' xy'ix'adyijich.

Huigomb hori ma Jesús y'ocyaj'ijxmadza'ñ

³⁵ Chi Jesús nimay ydiscipulos ajcxy:

—Co ich miich ajcxy jayhuin nguejxy, ni mmoral, ni ca' mmeeñydijc, ni mgig ti mmi'oygixy, ¿nej myajtigoy'ijt ajcxy ti jatyi?

Chi ajcxy y'adzooy:

—Ni ti.

³⁶ Chi Jesús yminañ:

—Jadachambi pin ymeeñydijc etz ymorral müid, huen minicx; nañ pin ca' müidity y'espada, huen toogy yjocx huit, chi juyipy y'espada. ³⁷ Ich miich ajcxy nimaayb co copicy jada yajcuydunipy huidibi mimb jaybety müid ich ycixpi ma Dios ñecy ma jadu'n yminañ: "Yaj'anichomujc (je Cristo) müd yi' ajcxy huidi jibicjāyip." Tüg'óciy mimb jaybéty ma Dios ñecy müid ich ycixpi, yajcuydunipy yi'.

³⁸ Chi Jesús ydiscípulos ajcxy yminañ:

—Huindzin, cha metz espada.

Chi Jesús y'adzooy:

—Huen müd yi'yi.

Jesús Dios mibijctzoy jim Getsemaní

³⁹ Chi Jesús jim choñ ñicxy ma je cop huidi yxii Olivos, com jim anajty nicxy coodz coodz, chi je' ydiscípulos ajcxy ypanicxi. ⁴⁰ Co ajcxy yja'ty ma je cop, chi Jesús yminañ:

—Mibijctzoogix Dios huen xypubedipy xypudigihuiy ajcxy ca'ydi mdigihyixy jibic tuum.

⁴¹ Chi Jesús huinhuäctuty je discípulos ajcxy tüg tzaagäch yjigügyity, chi ycoxtinay'ahuüy ytigüy Dios mibijctzoob. ⁴² Chi Jesús yminañ:

—Dios Teedy, pen miich m'a'ixiyyb pijcigich jada tzaachypí, ca' ich huaad nyajnaxyich, per ca' ich huaad ngi'mdzócin nguyduñich, miich mdzócin huen myajcuyduñ.

⁴³ Chi ñayguëxici tüg ángel tzajpjoty choñ, jotmic migapxy je Jesús. ⁴⁴ Yam anajty Jesús ooy yta'y ymay, chi Dios mibijctzooyb jacmictägy. E je yxibitnü ypidizimy janch jadu'n yi' anajty nej n'py janch mijjaty y'ocnajtztä'cxüyñi.

⁴⁵ Co ypidigy ma anajty Dios mibijctzoy, chi nihuimbijty je' ydiscípulos ajcxy, chi oy paatcixy maab anajty ajcxy müd jotmay. ⁴⁶ Chi Jesús nimay ymigügtijc ajcxy:

—¿Ti co mdzachmaagixy? Pidicxix mibijctzoogix Dios, ca'ydi jibic tuum mdigihyixy.

Yajnicxixy mach je Jesús

⁴⁷ Jim Jesús anajty ymigügtijc ajcxy müdcapxy müdmíydgäy, co je mayjäy oy yjätty. Jayijp anajty ymiñ je huidi anajty xüijp Judas, yi' je'anajty nidügti ma je nimajmetzpi Jesús ydiscípulos ajcxy. Chi Judas mihuingoñ Jesús co anajty tzücxä'ñ. ⁴⁸ Chi Jesús yminañ:

—Judas, ¿nej müd tüg tzücxin mgyecy ma ymidzip, je jäy huidi tzoön tzajpjoty?

⁴⁹ E je' ajcxy huidi anajty Jesús ymiid, co ajcxy ijxy jadu'n nej ytuñyüi yjadyyi, chi ajcxy yminañ:

—Huindzin, ¿tzoc ajt mihuimbijtim?

⁵⁰ Chi nidüg je' ajcxy yajtzaachüyi je teedy mijtungmüidpi tüg ytumbi, quejtzpujxi tüg ytätz'ac a'oy'amybi. ⁵¹ Huin'it Jesús yminañ:

—Ixmajtzcix, huen jadu'ñyi.

Chi nidoni je jäy ytätz'ac, e jadu'n yajtzoocy. ⁵² Chi Jesús nimay ajcxy huidi nimiini, yi teedy tungmüidpi ajcxy, yi Dios ytijc policia huindzin etz mijjäydijc:

—¿Nej co xyñimlingixyich müd pujx etz mguipyjipxu'ñ jadu'n nej jihuüy ich tüg meetzpi?

⁵³ Jilby ich anajty jabom jabom ma Dios ytijc, e ca' miich ajcxy ti ti mduñ müd ich. Per cham jëdu'n je tiempo mina miich ajcxy xy'ane'myich etz je jibicpi xymimadägyich.

Pedro yminañ co ca' ix'y'adyii Jesús

⁵⁴ Chi ajcxy majch je Jesús, yajnicxy ajcxy, e pidacy ma teedy mijtungmüidpi ytijc. Je Pedro jigügyjihui' anajty ypanicxyii. ⁵⁵ Jim ajcxy jün yajmijiy tibägujc chi ajcxy y'ixtactay nidüg'óciy. Pedro y'ixtacy nañ jadu'n ma je jäy ajcxy. ⁵⁶ Huin'it tüg pödumbi ijxy Pedro ññäy ma jümba', chi huindixpejty nimay:

—Jada yëydijc nañ ymiid anajty Jesús.

⁵⁷ Chi Pedro ca' cöbijcy, yminañ:

—Töxyjäy, ca' ich yi' n'ixy'adyii.

⁵⁸ Nañ jahueengi huin'it jadüg jäy Pedro yhuindixpejti, ñimaayi:

—Miich, yi Jesús ajcxy anajty müd m'ity.

Chi Pedro yminañ:

—Ca' n'ichity.

⁵⁹ Ti anajty tüg hori nñaxni co oy huingbi yminandägy:

—Janch co jada yëydijc yi' anajty müd y'ity Jesús. Com nañ galileojäy yi'.

⁶⁰ Chi Pedro yminañ:

—Ca' ich nhuinjihuüy nej miich mmäna'ñ.

Capxni anajty je Pedro co tzey oy yaaxgy. ⁶¹ Chi je Huindzin Jesús ni'ijxhuimbijty je Pedro. Huin'it Pedro jäymetzcootti je' ayuc nej anajty yHuindzin Jesús ti ñimäyüi: "Ni ca'ni anajty tzey yaaxgy cham coodz co miich tugüg'oc xycoyüdzibiyich." ⁶² Chi Pedro ypidizimy tibäy, oy jilby yäxy müd tájin máyin.

Nixiiccixy yajxiiccixy yi Jesús

⁶³ Je jāy ajcxy huidi anajty Jesús cuend'ajtp, ooy ajcxy nixiicy niyaaxy, etz nañ ooy ajcxy huingojxy jipcojxy. ⁶⁴ Chi ajcxy huingoxodzy, e cojxy ajcxy ma yhuñyijp, nimaaygixy:

—Octiygapx, ¿pin ti xycoxy?

⁶⁵ E ooy anajty miid yjibic ayuc cixy cuety nimaaygixy.

Jesús mijuntajoty yajpaady

⁶⁶ Co yxiimiy, chi yōmujcy yi teedy miltungmīdipi ajcxy, yi mijjāydijc ajcxy, etz yi escribas ajcxy, chi ajcxy y'amidooy:

⁶⁷ —Nimaaygich ajcxy ¿nej miich je' je Cristo?

Chi Jesús y'adzooy:

—Co ixipy nniapxich, ca' miich ajcxy mibigipy. ⁶⁸ E pen iich miich ajcxy n'amidooyb, ca' miich ajcxy xy'adzohuipich, etz canan huin'it xyñajtmadzihuibich miich ajcxy. ⁶⁹ Jadachambi e ñicxa'ñi iich, je jāy huidi tzoon tzajpjoty, n'ixtāga'ñich a'oy'amy ma Dios mic'ajtmīdipi.

⁷⁰ Chi nidüg'óciy je' ajcxy y'amidooy:

—¿Nej janch co miich Dios xy'ung'adyii?

Chi Jesús y'adzooy:

—Miich ajcxy jadu'n minamb co iich njējity.

⁷¹ Chi ajcxy yminañ:

—¿Ti ajt njac-huānim testigo? Ti ajt yam ci'm nmidoohuim nej mina'ñ.

23

Jesús ma Pilato yhuinduu

¹ Chi tūg'óciy je mayjāy ajcxy ypidgy, chi yajnicxy ajcxy Jesús ma je gobernador Pilato. ² Chi ajcxy ytiigy xibi yminaangixy:

—Jada jāy naax cāp yaj'ixpijcp huidi ca' ytiy'ajtity. Yi' adujctāhuam co ca' huaad nmigüéjtim César, e ymina'ñ ci'm co yi' je' je Cristo huidi rey'ajtpi.

³ Chi Pilato y'amidooy Jesús:

—¿Nej miich je' judío jāy xyrey'ajtp?

Chi Jesús y'adzooy:

—Miich jadu'n minamb.

⁴ Chi Pilato nimay je teedy tungmīdipi ajcxy etz je mayjāy:

—Ca' iich ti pocy nbaadyich ma jadayaabi yēydijc.

⁵ Chi Jesús ymidzip nīgi anajty ajcxy yminan'adiitxcixy:

—Jada Jesús naax cāp tzachyajqueec-huācxtaayb je judío jāy miid yi' y'ayuc. Yajtzondacy Galilea, e jadachambi ya Judea jadu'n idích.

Jesús ma Herodes yhuinduu

⁶ Co Pilato midoy Jesús ymidzip ajcxy nigapxy Galilea, chi y'amidooy pen galileo jāy je Jesús anajty. ⁷ Chi mic'amy huinjihuīy co yi' jim anajty yajpaady ma Herodes y'ane'my, chi jim quejxy ma Herodes huidi nañ jadu'n anajty yajpatp jim Jerusalén huin'it xii. ⁸ Co Herodes ijxy Jesús, chi oy jotcugiy com tiyiy anajty ooy ja'ixa'ñ, ti anajty may ayuc midoohui, e ahuixy anajty co mijhuinma'ñ tunipy. ⁹ Janch may ayuc ooy jaya'amidooy, e Jesús ni tūg'aa ca' y'adzooy. ¹⁰ Jim anajty teedy miltungmīdipi etz je escribas ajcxy, tzachnigibéjtcixy mictāgy. ¹¹ Chi Herodes miid yjāy ooy nixiicy yajxiicy Jesús, ca' mij'ijxy mijpidacy. Chi xojxy miid oyhuīt etz quejxhuimbijty jim ma Pilato. ¹² Huin'it xii Herodes etz Pilato ajcxy ñaymigügpici, com naymijotma'tip anajty ajcxy huin'it tiempo.

Jesús yajmoy ysentencia co y'ögipy

¹³ Chi Pilato huomujcy yi teedy miltungmīdipi, yi cajptungmīdipi, etz yi naax cāp. ¹⁴ Chi ajcxy nimay:

—Ti miich ajcxy xyajnimingixyich jadayaabi yēydijc, jadu'n miich ajcxy minamb co ooy jāy yajqueec-huācxtay. Ti iich yi' jatiyduñich ma miich ajcxy mhuindu, ca' iich yi' ni ma ypocy ti nbaati, jadu'n nej miich ajcxy mxigixy. ¹⁵ Nañ ni ca' Herodes ti pocy ti paady ma jada jāy, com ti njayajniquexyich, ni ti pocy jada Jesús ca' ti tuñ huidi huaad nyajco'ögīyich. ¹⁶ Miñ n'octzaachytuñich, jaydēbi nñajtmadzihuibich.

¹⁷ Jadu'n je gobernador anajty costumbre mīdity co najtmadzīy tūg machy jāy mijxijoty.

¹⁸ Chi je mayjāy tūgmucy ajcxy yminaandacy:

—¡Yaj'ög jadayaab Jesús! ¡Najtmadzi' yi Barrabás!

¹⁹ Je Barrabás anajty pujxtigoty ti ypidāgyii co anajty ti nibidgy je gobierno, nañ ti anajty yjāyay'ögy. ²⁰ Chi Pilato nimay ajcxy jadüg'oc co najtmadzihua'ñ Jesús. ²¹ Chi je mayjāy janch mic yminañ:

—¡Yajcruudzpet miich yi'! ¡Yajcruudzpet miich yi'!

²² Chi Pilato yminañ je midugüig'ocpi:

—¿Ti Jesús ti tundigoy? Ca' yi' ma ypocy nbaatich. Miñ n'octzaachytuñich, e najtzmazhiuibich.

²³ Je jāy ajcxy nigi anajty yminañ adüitzcixy janch mic, co huen yajcruudzpejty. Chi ajcxy jadu'n mimadacy Jesús co chachne'ngixy je teedy tungmüdpí, etz je cajpājy ajcxy. ²⁴ Chi jada' Pilato cuyduñ jadu'n nej je jāy ajcxy anajty pijctzoy. ²⁵ Chi Pilato najtzmazdiy je Barrabás huidi anajty pujxtigótyip, co anajty chach jāy yajqueec-huācxy, etz yjāyay'ōgy, je' huidi yi jāy ajcxy ypijctzou. Chi Pilato cīyeycy Jesús ma yi' ajcxy huen tungixy nej tzojccixy.

Jesús yajcruudzpejti

²⁶ Chi je judiojāy ajcxy yajnicxy Jesús. Jim tü'am ajcxy minaybaati tūg jāy huidi anajty ti choon camjoty, huidi anajty yxi Simón, e ycogápiaty anajty Cirene. Chi adzip ajcxy Simón yajquejycabiyy Jesús ycruudz, e yajpanicxy ajcxy Jesús.

²⁷ Jac'axam anajty naax cajp panicxcixy, etz nañ may töxyjāydijc ajcxy chachyaaxcixy müd jotmay müd yi' ycixpi. ²⁸ Chi Jesús ni'ijxhuimbijty je töxyjāydijc ajcxy, chi nimay ajcxy: —Miich Jerusalén töxyjāydijc ajcxy, ca' xyñiyāaxcixich. Nayñiyaaxigix miich ajcxy ci'm etz m'ung ajcxy ycixpi. ²⁹ Chi ypaadipy tiempo co jāy ajcxy ymina'nipy: “Jotcujc je töxyjāy ajcxy huidi ca' y'ung ixy, huidi ca' ti y'ungtzimigy, etz huidi ca' ti y'ung yajtzitzcixy.” ³⁰ Chi je jāy ajcxy nimaydāgipy mijtn mijcop: “Nigidagótcich ajcxy”; etz je mutztun mutzcop: “Yajtigoogich ajcxy.” ³¹ Pen jāy ajcxy tzaachyipi ayo'n mooyb Dios y'ung, nigi ajcxy jacjiini ytundigoya'ñ müd Dios yjāy, tim jadu'n nipaady nej pin puxam tzuxy quipy nañ puxamy quipy titzpi.

³² Nañ jim anajty yajnicxcixy müd Jesús jametz pocyjāy. Tú'ciy müd Jesús anajty yaj'ōgaangixy. ³³ Co ajcxy oyjāty jim ma tūg it huidi jāy ytiipy ōgpi cohuaic, chi ajcxy jim Jesús yajcruudzpejty müd metz pocyjāy: tūg pocyjāy a'oy'amy, jadūg anajty'amy. ³⁴ Chi Jesús yminañ:

—Dios Teedy, mecxi ajcxy ypocy, com ca' nejhuñyigixy ti ytungixyp.

Co je soldados anajty ajcxy yajhuācxaani ac je'y Jesús yhuít, chi ajcxy ijxy suerte pin ocjēñib. ³⁵ Jim je cajpājy anajty yhuindicxcixy, yam je tungmüdpí nixigy yajxigy Jesús, yminañ ajcxy:

—Jada Jesús huingjāy ti yajtzōgy, huen cham ci'm nayyajtzōgyii, pen yi' je' je Cristo, je huidi Dios ti huin'ixyi.

³⁶ Nañ jadu'n je soldados ajcxy nixiiccixy yajxiiccixy Jesús, nimijhuāgy ajcxy möhuaangixy anajty vino ta'mbi. ³⁷ Chi je soldados ajcxy yminañ:

—Pen miich Rey'ajt ma yi judiojāy ajcxy, nayñihuāñ ci'm.

³⁸ Ma Jesús yōōdu jim anajty yjaayity griego'amy, latin'amy, etz hebreo'amy: JADA JE' YI JUDIOJĀY AJCXY YREY.

³⁹ Chi tūg pocyjāy huidi anajty cruudzēcixy ooy nixiicy yajxiicy Jesús yminañ:

—Pen miich je' je Cristo, naygohuāñ ci'm, e cohuaangich ich ajcxy nañ jadu'n.

⁴⁰ Chi je jadūgpi pocyjāy oy y'adzooy, ogy ymīgūg, nimay:

—¿Nej ca' miich Dios mdzigiy. Ca' m'ixy co tú'ciy ti nbōcāhuim? ⁴¹ Ich ajt janch paatip jadu'n, co jadu'n jada ngōbjicm tzaachyipi je tiibi ndundigooyim. Jadayaabi Jesús janch ni ti jibicpi jada ti catuñ.

⁴² Chi je pocyjāy nimay Jesús:

—Tun may'ajt xyjāymedzipich co anajty mjāty jiiby ma m'ane'mdac.

⁴³ Chi Jesús oy y'adzooy:

—Janch ich miich yam nimāy co cham ich miich müd'ijtnipy ma je oybi ti.

Jesús y'o'cni

⁴⁴ Co cujcxñibi paty, chi oy ycoodzīy tūg'ōciy naaxhuñ ixti minacyxiini. ⁴⁵ Chi xii ca' y'oc'ani. Chi je huit oy yciťzhuācxy huidi anajty adāydujcp je Dios y'it jiiby ma Dios ytiyc.

⁴⁶ Huin'it Jesús mic ypātcapxy yminañ:

—Dios Teedy, cham nyajcidigiy ich n'alma.

Co Jesús jadu'n yminañ chi y'ōgy.

⁴⁷ Co je soldado huindzin ijxy jadu'n nej anajty ti ytunyii ti yjadyii, chi ooy jāymejch yi Dios yminañ:

—Janch co jadayaabi yēydijc anajty tudāgy yjāyity.

⁴⁸ Chi je mayjāy tiibi anajty jim yōmūjccixy yhuindicxcixy, co ajcxy ijxy jadu'n nej ytuuni yjajti, chi ajcxy huimbijtaayñi cajpjoty yam ycaach tzachcōjccixy müd jotmay ycixpi.

⁴⁹ Cham tūg'ōciy Jesús ymīgūtijc ajcxy huidi anajty müd ñay'ixy'adyii, etz töxyjāydijc ajcxy huidi anajty Jesús ti ypadzonyii jim Galilea, jigüēgy je' anajty ajcxy yhuindicxcixy.

Yajnaaxtigíy ajcxy Jesús

⁵⁰ Jim anajty tũg yěydijc huidi anajty yxii José, hue' anajty ycgájpity Arimatea ma Judea naaxjot. Je' anajty judío mĩjtungmĩdpi, e je' ooy anajty chach'oyjáyity etz ytuđágyjáyity. ⁵¹ Je' nañ yjijp'ijxy anajty co yminipy je Dios y'ane'min, e ca' je' anajty jĩptigíyiy mĩd jacnaagity mĩjtungmĩdpi co ajcxy yaj'ogy Jesús. ⁵² Chi José ñicxy ma Pilato oy pĩjctzoohui Jesús ñinĩcx. ⁵³ Chi yajminajcy ma cruudz, e mo'ñ mĩd tũg sáana, chi pidacy ma ögpi jut, ma tũg tzaahuinguetzmijc ma ca'ni anajty ni tũg ögpi jĩby yajpidágy. ⁵⁴ Je' anajty ajcxy ni'ixiib a'ixiib je pascua xii e je' anajty tim tzondágan je pöcxin xii.

⁵⁵ Chi je' tőxyjáydjic huidi anajty ti ypadzoñyii Jesús jim Galilea, panicxy ajcxy je José axam. Chi ajcxy nañ jadu'n ixy je ögpi jut, etz je ninĩcx jadu'n nej jĩby yajpidacy. ⁵⁶ Chi ajcxy yhuimbijtay cajpjoty. Chi ajcxy yaj'oyiij ujtz xuucpi, tzoj, etz ungüento, chi amay'ajty je pocxinxi, jadu'n nej anajty cötũjcin y'ane'my.

24*Co Jesús y'ogy chi yjugypijcy*

¹ Co je seamaan y'ixtigíy janch tim ticxĩcp je tőxyjáydjic ajcxy ymiñ ma je o'cpi jut, chi mĩmĩñ ajcxy ujtz xuucpi, etz tzoj huidibi anajty ti yaj'oyiigyixy. Nañ jadu'n mĩdjadyii tőxyjáydjic mĩñ. ² Chi ajcxy paty je tzaa ti anajty yjidiguegyii ma je o'cpi jut'aguu. ³ Co ajcxy ytigíy jutjoty, chi ca' ajcxy paty je Huindzin Jesús ñinĩcx. ⁴ Chi jadu'n yjajty, jĩby anajty ajcxy jutjoty huinmaagyixy, co ñayguěxigi ma ajcxy ymijc metz yěydijc janch adĩcxp anajty yhuít. ⁵ Chi ajcxy ooy chigíy, chi ajcxy yhuindactay, chi je metzpi yěydijc ymĩnañ:

—¿Na'amy co m'ixtaagyixy yi jugypí ma yi tiibi y'ogy? ⁶⁻⁷ Ca' je' ya, ti je' yjugypicy. Jäyméjtcix jadu'n nej mĩna'ñ jim Galilea, co ymĩnañ:

—Ooy ycopícyty co iich, je jáy huidi tzoön tzejpjoty, nyajcĩyegipy pocyjáy cĩ'am. Yi' ajcxy xyajcruudzpedipyich, chi njugypigipyich codugíig xii.

⁸ Chi ajcxy oy jáymejtzcooty nej anajty Jesús ti ymĩna'ñ. ⁹ Chi je tőxyjáydjic ajcxy yhuimbijtay ma o'cpi jut. Chi ajcxy yajmĩdmiydactay jadu'n nej anajty ti jĩxcixy ti mĩdoogixy mĩd Jesús ydiscĩpulos ajcxy je nimajmetzpi etz jacjadyii jáy huidi yajpaatp ma je' ajcxy. ¹⁰ Je tőxyjáy ajcxy huidi ooy ma Jesús ñaaxtigíy, je' je' anajty ajcxy: María Magdalena, Juana, etz María Jacobo ytaj, e cham jacnaagity ymĩdöxyjáydjic. ¹¹ Chi Jesús ydiscĩpulos ca' ajcxy tim mĩjpidacy je tőxyjáydjic ajcxy ayuc, hue' ajcxy tijy nigo y'occapxcixy y'ocmĩdaaccix, paady ca' ajcxy mĩbijcy.

¹² Chi Pedro ypidígy ñicxy poyígyi ma anajty Jesús ti ñaaxtigíy. Chi Pedro yco'ixiij ma je o'cpi jut, chi ixy co ca' jĩby ni ti, jěyi Jesús yhuít abicy y'ooxnáy. Chi Pedro yhuimbijty ma ytiijc jĩhuiy ooy jadu'n nej ti ytuñyii yjadyii.

Ma Emaús tü'aa

¹³ Huin'it xii metz Jesús ydiscĩpulos ajcxy ñicxy ma tũg cajp mutzpi hue' anajty yxii je cajp Emaús, hue' yjiguemyity mĩd Jerusalén tugi'px estadios (majmetz kilómetro). ¹⁴ Chi amĩydaacip anajty ajcxy ñicxy. Nĩgapxcixy nĩmĩydaaccixy nej Jesús ti yjaty ti y'ayoy. ¹⁵ E jadu'n yjaty ma anajty ycapxcixy ymĩydaaccixy je nimetzpi, chi Jesús ci'm nĩmĩhua'cy je metzpi, chi mĩd ñicxy ajcxy yquĩpxy. ¹⁶ Oy anajty ja'ijxcixy, ca' ajcxy tuĩcuend pĩn je' anajty. ¹⁷ Chi Jesús y'amidooy je' ajcxy:

—¿Ti mĩich ajcxy mĩydacpy ma yam mdũyögyixy? ¿Nej co mdájcxixy mmáygyixy?

¹⁸ Chi tũg huidi anajty yxii Cleofas y'adzooy:

—Janch tũg'öciy mayjáy nejhuiydáy je ayo'n ti ytunyii ti yjadyii. ¿E mĩich naydũg jim jättac Jerusalén, e jadu'n tijy ca' mnejhuiy?

¹⁹ Chi Jesús je' ajcxy nĩmay:

—¿Ti ti ytuñyii ti yjadyii?

Chi je' ajcxy ymĩnañ:

—Jesús Nazaretpi, huidi Dios y'ayucnajtzcapxiyip, yi' anajty mij jánchip ma yi ayuc etz huinma'ñ ma Dios yhuinduuy, etz cham ma tũg'öciy naax cajp. ²⁰ Chi yi' ajcxy je teedy mĩjtungmĩdpi etz iich ajt ndungmĩdpi Jesús yajcidigíy je gobernador co huen yaj'ogyii. Chi ajcxy yajcruudzpejty. ²¹ Hue' iich ajcxy anajty ndzach'ahuijxyp co yi' je' huidi Israeljáy ajcxy cohuánaam ma ymĩdzip. Jadachambi jada' ymĩdugĩgxii ma jadu'n ti ytunyii ti yjadyii.

²² Cham iich ajcxy ndöxyjáydjic ajcxy ooy xy'adzĩgyigixyich. Ti y'oygixy janch ticxĩcp ma o'cpi jut. ²³ E com ca' ajcxy paaty je ñaaxnĩcx, chi ajcxy yhuimbijtni ymĩnaangixy co ti jĩxcixy yi ángeles ajcxy, hue' je ángeles ajcxy ymĩnañ co Jesús yjuugyity. ²⁴ Huin'it nĩjějity nmĩgũgtĩjch ooy ma o'cpi jut, paty ajcxy janch jadu'n nej tőxyjáydjic anajty ymĩnaangixy. Ca' je' ajcxy ixy Jesús.

²⁵ Chi Jesús ymĩnañ:

—iMiich jāy ajcxy ooy ajcxy m'aaajuuñity mjetjuuñity, ca' ajcxy ti mdzojcmibijccixy co ajcxy mjamibigá'nip huidibi y'ayuc najtzcapxiybi ajcxy ycapxy! ²⁶ ¿Nej ca' anajty ycopícity co je Cristo ayo'n paadip, e huin'it ytihiuip tzajpjoty ma yi' y'it oybi?

²⁷ Chi Jesús yajnamaay ajcxy Dios ytiy'ajt, chondägy ma Moisés ñecy, etz tüg'óciy jacjadyi necy huidi Dios y'ayucnajtzcapxiybi yjaay, yajxon ajcxy yajni'ixiyday jadu'n nej yjaybétyity müid je Cristo ycixpi.

²⁸ Chi ajcxy mihuingoñ je mutz cajp ma anajty ñíxcixy, je Jesús jadu'n ñaybidaaci jadu'n nej jihuýy jacjiguem ñíxcy. ²⁹ Huin'it ajcxy nimay adzip:

—Hui'm miich müid ñich ajcxy, ñigi jada chuu'iy'adich.

Chi Jesús ytihiy cajpjoty yhuí'my müid je' ajcxy. ³⁰ Chi jadu'n yjajty co anajty ti y'ixtaaccixy caaybi, chi Jesús tüg tzajcaagy conigy, e yajnajxy Dios cojuyp, huin'it tujc-huácxymoy ajcxy.

³¹ Huin'it ajcxy ijxcajpy Jesús. Chi Jesús mic mícíy yaj'ijxtigoy. ³² Chi ajcxy ñayñimaay:

—¿Nej ca' yjáncity co ñich ajt ooy njihuíym jotjoty huinma'ñjoty co anajty ajt jim xymídmíyadacim tü'am, etz co ajt xyñajtzcapxiym je huidi jaybety ma Dios ñecy?

³³ E tim huin'ity ajcxy tübjccixy, chi ajcxy ñíxcixni jim Jerusalén. Ni'amugi' ajcxy paty je majctüspi Jesús ydiscípuos ajcxy e jacjadyi jāy ajcxy. ³⁴ Chi ajcxy minangixy:

—Janch yi' co ti yjugypicy je Huindzin Jesús, com ti oy ñayguëxigiyi ma Simón.

³⁵ Chi Cleofas nímíydacy jadu'n nej tü'ay anajty ajcxy ti ñaybátigixy müid Jesús, etz jadu'n nej ajcxy Jesús ijxcajpy co tzajcaagy ti tujc-huácxym.

Jesús ñayguëxici ma je' ydiscípuos ajcxy

³⁶ Jiiby anajty ajcxy tzachnimíydaaccixy co Jesús oy ñayguëxigiyi ma je' ajcxy. Chi ytinay'ahuíy cujc'amy ma je' ajcxy, chi ymíñañ:

—Jotcugi' miich ajcxy.

³⁷ Chi je' ajcxy ooy ñay'adzigiyi ooy huinmaaygixy, hue' ajcxy tijy ijxmañiyb. ³⁸ Chi Jesús nimay je' ajcxy:

—¿Na'amy co mjet mhuinma'ñ ti ytiogydaaygixy? ¿Nej co m'aa'ájtigixy mjet'ájtigixy pin ñich? ³⁹ Ijxcix miich ajcxy ñich ngi' ñich ndecy, ñich jëni ñich. Nidongich etz ijxcich ajcxy. Tüg espíritu ca' müidity chüch ni ypajc, jadu'n nej m'ijxcixy ñich nmíidity.

⁴⁰ Co Jesús jadu'n ymíñañ, chi ajcxy yaj'ijxy yci' ytecy. ⁴¹ Per ca'ni ajcxy mibijcy müid co anajty ajcxy chachjotcúcity, chi Jesús ajcxy nimaay:

—¿Müid ajcxy ti ii mgayipy?

⁴² Chi ajcxy moy Jesús acxtzäy, etz tüg jüdy serpäg. ⁴³ Chi cöbijcy, chi ycaay y'uucy jim ma je' ajcxy yhuinduu. ⁴⁴ Huin'it Jesús ymíñañ:

—Huidi m'ijxyp cham je' je' huidi nyajnimay jayhuin, co ñich miich ajcxy anajty müid'ijtcixy, co copicy nguydundáhuibich jadu'n nej yjaybétyity ma je Moisés ñecy je jëcyip, etz jacjadyi Dios y'ayucnajtzcapxiybi ñecy, etz yi salmo necy.

⁴⁵ Huin'it je' ajcxy yjot yhuinma'ñ ymiñ ymejch, jaydëbi huinjihuíygixipy huidi jaybétyip. ⁴⁶ Chi Jesús yjacmíñañ:

—Jadu'n jaybety y'ity ma Dios ñecy co copicy co je Cristo paadip ayo'n e yjugypigipy codugiig xii, maabi anajty y'ögy. ⁴⁷ Huen ajcxy yajcapxhuácxym Dios ytiy'ajt huindu'my naaxhuíñ, chondägip Jerusalén, co ooy ycopícity huen jāy ajcxy jothuimbijtcix jaydëbi ajcxy paadip pocyhuinmeecxin. ⁴⁸ Miich ajcxy nidiy'ajt'adipy tüg'óciy jadu'n nej cham ti m'ijxcixy ti mnejhuíygixy. ⁴⁹ Jadachambi nguexipyich ma miich ajcxy je huidi nDeedyich ti xyaj'ahuaniygixy. Hui'mgix ya Jerusalén ixti cooni ajcxy xyñidigihuip xycödígihuip je Dios yjihui'ñ ymic'ajt huidi tzonam tzajpjoty.

Jesús ypa'ttigíyñ tzajpjoty

⁵⁰ Huin'it xii Jesús müid tzoñ je' ydiscípuos ajcxy, chi ajcxy ycajppidzimy, ñíxcy ajcxy mihuingoñ je Betania. Chi Jesús xajhuácxym yci' mibijctzoy Dios müid je ymigügtijc ajcxy ycixpi. ⁵¹ Chi jadu'n yjajty ma anajty Dios mibijctzoy müid yi' ajcxy ycixpi, chi abicy yajhuí'mni je' ajcxy e je' ypättigíyñi jiiby tzajpjoty. ⁵² Chi yi' ajcxy jim yjac-huácxijpy Dios ojadjatcixy. Chi ajcxy yhuimbijttaayñi jim Jerusalén janch jotcujc. ⁵³ Chi ajcxy jabom jabom anajty ñíxcixy ma Dios ytiyc chajpcapxycapxcixy, ojadjatcixy jāymejtzcixy yi Dios, janch jadu'n jada. Amén.

SAN JUAN

Jaayhu:my Jadu'n Nej Jesucristo Ytun Yjajt:

Dios y'ung huidibi y'oy ya naaxhuin yejci Dios y'ayuc tiy'ajt

¹ Co naaxhuinbi oga'n chondacy jiiyim anajty Dios y'ung, e yi' yajnejhu: yäy ajcxy Dios y'ayuc ytiy'ajt. Dios y'ung tú'ciy anajty yajpaady ma Dios. ² Je' tim oga'n'aty anajty yajpatp ma Dios. ³ Tüg'óciy huidijaty yaj'ixp yajpatp ya naaxhuin, yi' yaj'oyiyday yajcojta. Tüg'óciy huidijaty Dios yajcojy, tú'ciy ytuñ müd y'ung. ⁴ Dios y'ung yi' jugy'ajtyejctaa yb ma tüg'óciy naaxhuin'yäy. Müd co jugy'ajtyejctäy ma tüg'óciy naaxhuin'yäy, je' je' tiy'ajt co Dios y'ung ymüid Dios ymic'ajt. Jadu'n nipaady nej tüg'jün huidibi jäy codi:cxp. ⁵ Ya naaxhuin yajpaady anii. Yi anii jadun n'yi' nej coodzpi. Yi Dios y'ung ti mimiñ ya naaxhuin Dios y'ayuc ytiy'ajt. Jadu'n Dios y'ayuc ytiy'ajt ma jäy yjot yhuinma'n nej tüg'jün yti:cxp agoodztuuyb. Yi anii ca' ñaygodigiyi müd Dios ytiy'ajt.

⁶ Ma'xung'ajt tüg'yëdijc huidibi Dios anajty ti yajñibicy. Hue' anajty yxii Juan. ⁷ Yi' oga'n tiy'ajt yejc co Dios ymic'ajt etz ytiy'ajt yajpaady ma Dios y'ung, jigix tüg'óciy je jäy ajcxy camibijctähuipy je Dios y'ung. Dios y'ung jadun nipaady nej tüg'jün huidibi codi:cxp ma jäy ytiyöy. ⁸ Je Juan ca' je' anajty yjējity je Cristo, je huidibi capxhuäcxp Dios y'ayuc ytiy'ajt. Hue' janchtiy je Juan ñidiy'ajt'ajt je Cristo. ⁹ Je Dios y'ung hue' je' ma'xung'ajty ya naaxhuin. Je' je' anajty je Dios ymic'ajt etz ytiy'ajt ymüid, je janchyp, ma jēb tüg'óciy jäy ya naaxhuin patcixy Dios ytiy'ajt.

¹⁰ Je Dios y'ung ya anajty yhuidity naaxhuin'yäy. E jada naaxhuin yi' yaj'oyiyday. E may je naaxhuin'yäy ca' ajcxy ijxajpy. ¹¹ Je ymügütjic, je judiojāy, je' ajcxy nimiini, e may ajcxy je ymügütjic ca' ajcxy ycōbijci. ¹² Tüg'óciy je jäy ajcxy pinjaty mijpidac yi' yxii yi' ymic'ajt, yi' ajcxy yajmoy Dios ymic'ajt, e jadun nipaty nejjiuhy ajcxy Dios y'ung'adyi. ¹³ Canan hue' je' co naydijiyb Dios y'ung co ti yma'xung'aty jadun nej jäy ajcxy y'ocma'xung'aty. Nañ ni ca' yjadu'nity nej jäy tūy, nej jäy jip'ixy, ni canan jäy jadun ti huinmay. Hue' janchtiy Dios jadun ti huinmay.

¹⁴ Je Dios y'ung ya naaxhuin je' yma'xung'ajty müd ñiñcx etz chinay müd naaxhuin'yäy. E i:ch ajcxy n'ijxich yi' y'oy'ajt etz ymic'ajt, jadun nej Dios Teedy y'ung tūgpajc oy'ajt etz mic'ajt müidity. ¹⁵ Juan ñidiy'ajt'ajt je Dios y'ung, e chi capxypidzimy, e jadun yminañ:

—Jada je' je jäy huidibi i:ch jadun nimiyaacich ma müch ajcxy. Je huidibi müimb jac'axam ma i:ch, jac mic'ajt müd yi' ca'yd i:ch, com jacyajyp yi' jugy'ajt paty ca'yd i:ch.

¹⁶ Je Dios y'ung oy xychojcin xyjihuiyim mijcjee, paady je' tuuñ may'ajt oy'ajt mijcjee müd i:ch ajt ycxipi. ¹⁷ Com Dios y'ané'min ycōtujcin micpi hue' Dios yajñiguejx je Moisés. Co Dios quejxy Jesucristo ya naaxhuin, chi may'ajt oy'ajt tuñ müd je jäy ajcxy ycxipi, e nañ je' ytiy'ajt yajñiguejx je Jesucristo. ¹⁸ Je Dios ni caminaabi pin ca'ixyñi, je y'ung tūgpajci yajpatp ma Dios Teedy ity. Je Dios y'ung ti xyajnejhu: yim nej Dios yajpaady.

Juan el Bautista je' tiy'ajt yejc co Jesús je' anajty Dios y'ung

¹⁹ Jadaabi je' je tiy'ajt huidibi Juan yejc, co judío jäy ajcxy quejxy nijējity teedytjic etz tzejptjic tungmüidpi. Jim ajcxy choon Jerusalén nicxy ma anajty Juan yajpaady, chi ajcxy y'amidooy:

—¿Mbin müich? ¿Nej müich je' je Cristo huidibi Dios yquexamy?

²⁰ Je' ñigapx je tiy'ajt, ca' ñaygoyützi, chi yminañ:

—Ca' i:ch njējity je Cristo.

²¹ Chi ajcxy jac'amidooy:

—¿E pin müch mneydijyii? Pen ca' mjējity je Cristo. ¿Nej müich je' je Elías?

Chi Juan y'adzooy:

—Ca' je' n'i:chity.

Chi ajcxy jac'amidooy:

—¿Nej müich je' je Dios y'ayuccapxhuäcxpi, je huidibi ñigapxy ma Dios ñecy co ymiinañ ya naaxhuin?

Chi Juan y'adzooy:

—Ca'.

²² Chi y'amidooy ajcxy jadüg'oc:

—¿Mbin müich? Jigix i:ch ajcxy tiy'ajt nyajñicxibich ma yi' tiibi i:ch ajcxy xyquexyich. ¿Ti müch nayxigoyäxyi?

²³ Chi Juan yminañ:

—İich je' je jāy huidibi Dios y'ayuccapxhuācxip ma tūg miŋtigēduum, tim jadu'n nej jiiŋby jaybety ymiin İsaías ñecy, nañ tim jadu'n iich nmiina'ñich co copicy nayñi'ixiiyigix ma yi mjet yi mhuinma'ñ, jēbi naybāatigixy miid mHuindzin Dios. Jadu'n nej jāy ixyipy tū'aa yaj'oyi co tūg huindzin ymiina'ñ.

²⁴ Je teedytjic etz tzejptjic tungmūdpi huidibi oy migapxy Juan, hue' anajty ajcxy fariseojāy ti yquexyii. ²⁵ Chi ajcxy jactim'amido y Juan:

—¿Ti miich co mjāyayniibety? Peni ca' miich mjējity je Cristo, ni mgajējity je Elías, ni mgajējity huidibi Dios y'ayuc najtzcapxiiyip.

²⁶⁻²⁷ Chi Juan y'adzooy:

—İich hue' jāy nyajniibetyich miid ni. Ya naaxhuiñ ji tūg jāy huidibi miich ajcxy ca' m'ixy'adyii. Je' huidibi jac'axam mimb ma iich, je huidibi ca' mihuaadity nicxy yi' xytumbi'adyiijich, nicxyich yčighuin nguejich.

²⁸ Jadu'n ytuni yjajti jim Betābara, jim'amy ahuin ma Jordān mij ni, jim anajty Juan jāy yajniibety. Juan tiy'ajt yejc co Jesús je' anajty yjugy'ajt yegam miid iich ajt nbocy ycixpi.

Jesús naysajhuindzigihuaanip ma Dios miid jāy ajcxy ypocy ycixpi

²⁹ Chi je com jabom co ijxy Jesús anajty ñimiñyii, chi Juan nimay je jāy ajcxy:

—Cha je' ymiñ je Dios yjāy huidibi Dios naysajhuindzigihuaanip miid naaxhuiñyājy ajcxy ypocy ycixpi. Tim jadu'n nej judiojāy ajcxy Dios huindzigiy miid ypocy ycixpi. ³⁰ Jada je' huidibi iich nnigapxypich co jac'axam ymiina'ñ ma iich tūg yēdyjic huidibi niği Dios ymic'ajt y'oy'ajt mīdity ca'yd iich. Com jiiyim anajty yi' yjugy'aty co oga'n naaxhuiñybi chondacy.

³¹ Oy iich anajty ca' yi' n'ixy'adyiijich huingixy jipjicixy, nyajniibetjich jāy, jigix yi judiojāy nejhuñhuip ajcxy co ji yajpaady je Cristo je huidibi Dios ymic'ajt miid.

³² Chi Juan nigodiy'ajt'ajty je Cristo co ymiina'ñ:

—İich ti n'ixyich yi Espiritu Santo jiiŋby choñ tzejpjoty, jadu'n yquēxgy nej tūg muuxy, e chi y'ixtacy ma Jesucristo. ³³ Tiydudāgy ca' iich anajty n'ixy'adyiijich. Je Dios huidibi xyquejixich jāy yajniibetjpi, je' iich anajty jadu'n ti xyñimāyich co je jāy ma anajty n'ixyich je Espiritu Santo ñigidāgyii anajty etz yhui'my ma je'. Je' je' jadu'n anajty huidibi y'adigihuipy yjottigihuipy Dios yjihui'ñ ymic'ajt ma je jāy ajcxy. ³⁴ Cham nnigapxpetyich co iich ti n'ixyich je jāy, e nyejcpyich tiy'ajt co je' je' je Dios y'ung.

Jesús yhuin'ijx niñējity jāy huidibi anajty ydiscipulo'andaanipy

³⁵ Chi je com jabom jopy jim anajty Juan yajpaady miid metz jāy huidibi ixpijcp ma yi'.

³⁶ Chi anajty ajcxy tzachhuindixy Jesús co anajty jim ñaxy, chi Juan nimay je metzpi jāy:

—Oc'ijxcix ocnejhuiyigix, cha je jāy huidibi Dios naysajhuindzigihuaanip miid naaxhuiñyājy ypocy ycixpi.

³⁷ E je metzpi jāy huidibi anajty ajcxy ixpijcp ma Juan, co jadu'n ajcxy midoy nej Juan ymiinañ, chi ajcxy Jesús padzooñ. ³⁸ Chi Jesús y'ijxhuimbijty, chi ijxy co anajty ajcxy ypanicxyii, chi jada' nimay ajcxy:

—¿Ti ajcxy m'ixtaayb?

Chi ajcxy y'adzooy:

—Huindzin, ¿ma tiyi ti mja'ttāgy?

³⁹ Chi Jesús y'adzooy:

—Miingix, jigix ajcxy m'ixipy ma ti nja'ttāgyich.

Chi jada' ajcxy panicxy, e chi ajcxy ijxy ma anajty ti yja'ttāgy. Je huin'it xñimbi chi jim je' miid yhui'miy, com mijminacyiñ anajty co ajcxy jim ymejch.

⁴⁰ Andrés, je Simón Pedro ymiguēx, je' anajty tūg tzooniŋ huidibi nimetz ajcxy midou jadu'n nej Juan ymiinañ, etz je' anajty ajcxy ti padzooñ Jesús. ⁴¹ Chi jada' Andrés oy ixtāy y'uch Simón tim jayijp, chi nimay:

—Ti iich ajcxy nbaady je Mesías —jadu'n je ayuc Mesías yhuimbizima'ñ Cristo.

⁴² Chi Andrés miidnicxy Simón ma Jesús, e chi Jesús huindixpetjty, nimay:

—Miich je' Simón, Jonás miich xy'ung'ajtp. Miich je' mxii'adiyb Cefas —huidibi ayuc'amy huimbizimb tzaa.

Jesús je' yhuin'ijx Felipe etz Natanael

⁴³ Chi com jabom Jesús chooñ ñicxy jim Galilea, chi minaybaati Felipe, chi jadu'n nimay:

—Pajamgich.

⁴⁴ Felipe jim anajty ycogajpity Betsaida, nañ je' je' je cajp ma anajty ajcxy ycogajpity Andrés etz Pedro. ⁴⁵ Chi Felipe minaybaati je jāy huidibi yxii Natanael, chi jadu'n nimay:

—Ti iich ajcxy je' nbaadyich je jāy huidibi yajniŋgapx yajnimiydacc ma Moisés ñecy, etz yi Dios y'ayucnajtzcapxiiybi ñecy. Yi' je' je Jesús, José y'ung huidibi cogajpip jim Nazaret.

⁴⁶ Chi Natanael y'adzohuimbijty:

—¿Nej jim Nazaret ti choñ tüg oyjäy? Com ac jadu'n jäy ymina'n co ac jibicjäydijc jim tzinaayb.

Chi Felipe yminañ:

—Jam ci'm octim'ix.

⁴⁷ Co Jesús ixxy co Natanael ñimiñyii, chi jadu'n yminañ:

—Cha tüg judiojyä huidibi ca' pin huin'iniy.

⁴⁸ Chi Natanael yminañ:

—¿Nej miich ti xy'ijxcapyich pin jäy ich?

Chi Jesús nimay Natanael:

—Ca'ni anajty Felipe xyñimaayñi: “Jam ixxim je Jesús” co anajty miich jiiy'emy ma je higueri quipypa't, huin'it ich miich ti n'ijxcapy.

⁴⁹ Chi Natanael y'adzooy:

—Huindzin, miich je' Dios y'ung. Miich je' Rey'adam ma je judiojyä ajcxy.

⁵⁰ Chi Jesús y'adzooy:

—Müid co ti nimäy co jiiy'emy anajty miich ma je higueri quipypa't co ich miich ti n'ijxcapy. ¿E ti mdimjanimibicy? Jactimmijhuinma'n etz jactimmij'oy'ajt m'ixamyb mbadamyb.

⁵¹ Chi Jesús jadu'n yminañ:

—Janch tim tiy ich miich ajcxy yam jadu'n nimäy co m'ixipy ajcxy yi tzaip y'ahuäch etz Dios y'ángeles ajcxy choon tzaipjoty xyñigidägyich, e ypa'ttigüygixy jadüg'oc tzaipjoty. Choongixy yja'tcixy ma ich je jäy huidibi tzoön tzaipjoty.

2

Jesús y'oy ma anajty jäy nix#duñ tüg pijcin jim Caná

¹ Midugüxiiibi anajty maabi ajcxy Jesús minaymigápxigixy, ma je cajp huidibi yxi Caná ma je Galilea naaxjot jim anajty huinx#dungixy tüg jäy huidibi anajty ti ypic. E jim anajty nañ jadu'n Jesús ytaj. ² Chi Jesús müid je' ydiscipulos ajcxy yajhuooy jim ma je xii anajty ytuñyii yjadyii. ³ Ti anajty vino ycijxtaayñi, huin'it Jesús ytaj ñimaayñi:

—Ca'p ajcxy müidiñ vino.

⁴ Chi Jesús y'adzooy ytaj nimay:

—Ca' ti jotmay nmüididyich müid miich töxyäy. Ich nhorí ca'ni paady mina jäy ajcxy nyajnejhuñhuibich pin ich.

⁵ Chi je ytaj nimay je tumbidijc ajcxy:

—Mdúngxipy nej anajty ajcxy Jesús xyñimaaygixy.

⁶ Jim anajty tudujc tzaadu'tz ma anajty nii y'ity. Je nii anajty ajcxy yajtumy co anajty ajcxy ycibujcixy jadu'n nej ypocy ixpujixy, jadu'n anajty ajcxy judiojyä costumbre müidity. Tügpi tzaadu'tz ymüid anajty yjot metz majt tugiig majt nii. ⁷ Chi Jesús nimay je tumbidijc ajcxy:

—Yaj'ujtzcix yi tzaadu'tz müid nii.

E chi ajcxy yaj'ujtzatay mabaat y'a'ujtnaxy je tzaadu'tz. ⁸ Chi Jesús yminañ:

—Yajpidzimgix cham yi nii, e yajnicxcix jiiy ma huidibi ane'mb ma yi caydac uuctac.

Chi ajcxy yajnicxy je nii. ⁹ Co jada' je ane'mbi jihuiymajch je nii ti anajty yvinocojy, chi mijhuoy je yëydijc huidibi anajty ti ypic. Je ane'mbi ca' anajty nejhuñy ma anajty je vino ti choñ. Jëyi anajty je ytumbidijc ñejhuñy co nii anajty ajcxy yajpidzimgixy ma je tzaadu'tz.

¹⁰ Chi je ane'mbi nimay je huidibi anajty ti ypic:

—Tüg'öciy jäy ajcxy huidibi xiidumb, hue' ajcxy yajtumy jayijp je vino oybi. E co jäy ajcxy ooy yxondaacni, chi oyñihuidibi vino nii jacyajtungixy. Miich janchtiy, ti m'amay'aty yi vinonii oybi ixti chamni myajtuñ.

¹¹ Je' je' je oga'nibi mijhuinma'n huidibi Jesús ytuun jim Caná ma Galilea ñaaxjot. Chi yajnigüexigy je ymic'ajt etz y'oyjäy'ajt. E je huidibi anajty ajcxy yaj'ixpijcpy, chi ajcxy ooy mijbicxy mijpidacy je Jesús.

¹² Co jadu'n tüg'öciy ytuñ yjaty, chi Jesús y'idacy jim ma je cajp huidi yxi Capernaum müid ytaj etz y'uch ajcxy, etz huidibi anajty yaj'ixpijcpy. Jim ajcxy yhuäcxijpy tüg xii mejtz xii.

Jesús yajpidzim ajuuypi adoocpi ma Dios ytijc

¹³ Tim huington anajty je pascua xii huidibi judío ajcxy ytuñy jim Jerusalén, paady Jesús ñicxy jim. ¹⁴ Jim ma Dios ytijc Jesús paty je' huidibi anajty ajcxy ajuuypi adoocpi, jadu'n nej ma ymiñi huaj, borregi, etz muuxy (huidibi jäy ajcxy Dios yajhuindzigüyb). Nañ jim meeñyhuingogombidijc anajty ajcxy y'ñaaygixy ma ymesa. ¹⁵ Chi Jesús yaj'oyüy tüg cochac huojp. E chi ixhuojpidzimday je ajuuypi adoocpi ajcxy ma Dios ytijc ñihuaj etz ñiborrego. Chi yi meeñyhuingogombidijc ymeeñ cöxijtnaxtayi, e chi ymesa tijhuimbijttaayi. ¹⁶ Chi nimay je muuxytoocpidijc ajcxy:

—Yajpidzimgix jada muuxy ya. Ca' ñich nDeedy ytiyc yhuaani ajcxy ajuydac adoocac.

¹⁷ Je' ajcxy huidibi anajty Jesús yaj'ixpijcpy chi ajihuiygooti ajcxy je ayuc, jadu'n nej jaybety ymiñ ma Dios ñecy: "Ooy ndzocy njihuñyich Dios ytiyc, paady ooy nnijottigoyich Dios ytiyc."

¹⁸ Chi je judío xpicitytjic ajcxy y'amidooy Jesús:

—¿Ti mijhuinma'ñ miich xy'ocyaj'ixambich ajcxy nej tög iixpejt, pen janch müdity cötujcin co m'ixhuoipidzimday yi ajuybi adoocpi ajcxy?

¹⁹ Chi Jesús y'adzooy:

—Yajhuindigooygix jada Dios ytiyc, e codugiig xii ñich yi' jadüg'oc nyajpidigipy.

²⁰ Chi jada' je judío xpicitytjic ajcxy y'adzooy:

—Huixchigüipx tudujc jimajt yhuäcxijpy co jäy cojy jada Dios ytiyc. ¿E miich tijy myajpidigamy codugiigxiij?

²¹ Per ca' je' anajty nigapxy je Dios ytiyc. Hue' je' anajty ci'm ñayñigapxyii co anajty y'öga'ñ, etz co yjugypigipy jadüg'oc codugiig xii. ²² Chi jada' co Jesús yjugypijcy codugiig xii maabi anajty y'ögy, je huidibi anajty ajcxy ti yaj'ixpicy, ajihuiygooti ajcxy huidibi Jesús anajty ti yajnimäyigixy. Chi jada' ajcxy mibijcy ooy jadu'n nej anajty ycojaayity ma Dios ylibro, etz com nañ jadu'n anajty Jesús ti ymina'ñ.

Jesús ñejhuñy nej jäy ajcxy yjot yhuinma'ñ müdity

²³ Co anajty Jesús yjimity Jerusalén pascua xiijoty, mayjäy ooy ymibijci co ajcxy iixy je mijhuinma'ñ huidibi anajty ytumyb. ²⁴ Jesús ca' anajty yjaty ñaygiyegyii ma je mayjäy ajcxy (hue' anajty ajcxy chachyajrey'adamy). ²⁵ Com Jesús ñejhuñydaayb anajty nej jäy ajcxy nidüg nidüg yjot yhuinma'ñ müdity ca' tzocy pin yajnimähuiyb ti anajty ajcxy ytunamy, com ñejhuñydaayb nej jäy ajcxy yjot yhuinma'ñ müdity.

3

Nicodemo oy ytiy'ajtpicy ma Jesús

¹ Jim anajty tög yëdyjc, fariseojäy y'ixpijcin anajty yajtuunipy. Hue' anajty yxii Nicodemo. Je' anajty ñigohuajc'ajtpy ma je judiojy ajcxy ymiñ. ² Chi jada' Nicodemo ymiñ coodz ma Jesús anajty y'ity, chi nimay:

—Huindzin, nejhuiyb ñich ajcxy co miich tög huindzin huidibi tzomb ma Dios. Com ca' ni pin jaty nej tunipy je mijhuinma'ñ huidibi miich mdumyb, pen ca' Dios ymic'ajt müdity.

³ Chi Jesús y'adzooy:

—Janch janch ñich miich yam jadu'n nimäy, co ca' ni pin ixipy Dios y'it, pen ca' jadüg'oc yma'xung'ajttigach.

⁴ Chi Nicodemo yajtiy:

—Per, ¿nej tög jäy tiibi ymij'anäcciyñi y'ocnima'xung'ajttigajtzpity jadüg'oc? ¿Nej jëbi jadüg'oc ytiigy ma ytaj y'aa yjot, e chi yma'xung'adity jadüg'oc?

⁵ Chi Jesús y'adzooy:

—Janch janch ñich miich yam jadu'n nimäy pen ca' jäy yjothuimbity etz ñibety, pen ca' Dios yjihui'ñ ymic'ajt y'adigiyyi yjottigiyii, ca' jëbi ytiigy ma Dios chinäy. ⁶ Je jäy huidibi ajcxy ma'xung'ajtp ma töxyjäy, ymiid ajcxy ñinix yjugy'ajtin. Je jäy ajcxy huidibi Dios yjihui'ñ ymic'ajt adigiyyipy jottigiyipy ymiid ajcxy Dios yjugy'ajtin. ⁷ Ca' nej mnayjihuihuñy co ti nniimäy co copicy mma'xung'adipy huinjemy, co Dios yjihui'ñ ymic'ajt xy'adigihuipy xyjottigihuipy. ⁸ Com je poj miiniyb hueñytmyma'amyity, e nmidoohuim co y'a'ñich, e ca' nnejhuñyim ma choñ e ma ñicxy. Jadu'n nej je poj ypoje e nganejhuiñyim ma choñ, nañ tim jadu'n yjaty müd je Espíritu Santo, co' nejhuiñyim nej yjaty co adigiyy jottigiy jäy.

⁹ Chi Nicodemo yajtihuimbijty:

—¿Nej tijy co yjadu'nity? Ca' nhuinjihuiñyich.

¹⁰ Chi Jesús y'adzooy:

—Miich huindzin'ajtp ma yi judiojy, ¿ti co ca' mhuinjihuiñy jadayaabi tiy'ajt? ¹¹ Janch janch ñich miich yam jadu'n nniimäy co ñich etz nDeedich ngapxyp yi huidibi nejhuiñyixpich, e nyejcpych ajcxy tiy'ajt yi huidijaty ñich ti n'ixixyich. Miich ajcxy judío xpicitytjic ca' ajcxy mgöbijccixy ñich ajcxy ndiy'ajt. ¹² Pen ca' miich ajcxy mibijccixy jada tiy'ajt huidibi njanimydacypich huidibi yajpatp ya naaxhuiñ, ca' ajcxy mmibigipy co njanimydagibich yi tiy'ajt huidibi tzajpjoty yajpatp.

¹³ Ca' ni pin ti y'oy tzajpjoty, ñich je jäy tögajc huidibi ti ndzoñich tzajpjoty, ti ngidägyich ya naaxhuiñ. ¹⁴ Jadu'n nej Moisés yaj'oyiy je pujx tza'ñ, e chi yajcruudzpety jim mijtigiduum jigix chögipy je jäy ajcxy ma je ahua'n iyujc chüchyii. Nañ tim jadu'n jäy ajcxy xyajcruudzpeta'ñich. ¹⁵ E tög'öcy jäy ajcxy pinjaty xymijpidaacpich, ca' yi' jugy'ajtin yxicy ytiigooy ni mina.

Dios ooy mijcajee tzoczy jihuüy yi naaxhuiñjyá

¹⁶ Ooy mijcajee Dios tzoczy jihuüy yi naaxhuiñjyá co yecy y'ung tügpajcpi müd jáy ajcxy ypocy ycixpi. Paady pinjaty mibijcp mijpidacp yi' y'ung, ca' yjugy'ajtin ycixipy ytigoyipy tücci'yi. Hue' janchtiy y'alma ypaadipy tüg jugy'ajtin huidibi ca' ni mina ycixipy ytigoyipy. ¹⁷ Dios ca' quejxy y'ung ya naaxhuiñ co tzaachytunipy yi naaxhuiñjyá ajcxy müd ypocy ycixpi. Paady y'ung quejxy co yajpocyññuáatzcixipy.

¹⁸ Je jáy ajcxy pinjaty mibijcp mijpidacp Dios y'ung, ca' ajcxy Dios chaachytunipy müd ypocy ycixpi. Je jáy ajcxy pinjaty ca' mibicy ca' mijpidágy Dios y'ung, pocycähuipy ajcxy ma Dios, co ca' mijpidaci ajcxy Dios y'ung tügpajcpi. ¹⁹ Paady ycixpi Dios tzaachytuna'ñ mayjáy müd ypocy ycixpi, com co Dios quejxy y'ung müd ytiy'ajt ya naaxhuiñ, e ca' ajcxy mibijcy Dios y'ung, jadu'n je' anajty nej tüg jün huidi codicxip jáy ajcxy ma chinaayin yjugy'ajtin. Per ca'p ajcxy je naaxhuiñjyá mijpidacy je jün, jadu'n nej jihuüy ajcxy anajty yjacjotcujcity co chinaayixy agoodztuuyb, com je' co nigi tzachnijot'ajtcixy jibic-huinma'ñ. ²⁰ Com je jáy ajcxy huidibi jibic-huinma'ñ tzach nijot'ajtcixp, ca' ajcxy tzojci Dios ytiy'ajt, jadu'n nej jihuüy ca' chinähuaangixy ma jün ytiicxin. Ca' ajcxy y'amidoo'idani Dios y'ayuc, ca'ydi ñiguéxigy je jibicpi huidibi ajcxy ytumy. ²¹ Je jáy ajcxy huidibi cuydumb Dios ytiy'ajt, je' ajcxy ñiminipy Dios y'ung ytiy'ajt, jadu'n nej jihuüy jün nimingixy ma ytiicxy, huen jatymy ñiguéxigy co oy ytungixy etz co Dios ytiy'ajt ajcxy müdity ma yjot yhuinma'ñ.

Juan (el Bautista) tiy'ajt yejc ma jáy ajcxy müd Jesús ycixpi

²² Co jadu'n ytuni yjajti, chi Jesús ñicxy jim Judea naaxjot müd ydiscípulos ajcxy. Chi ajcxy jim yhuácxijpy. Jim ajcxy jáy yajñibejty. ²³ Nañ jadu'n Juan anajty yjáyajñibety jim Enón, com jim anajty ooy comñi, e jim anajty jáy ymingixy etz ñibejtcixy. ²⁴ Hue' jada jadu'n ytuni yjajti ca'ni anajty je Juan pidaaccixy pujxtigoty.

²⁵ Ca' ajcxy ñay'ayuc-huinjihuüy niñejity huidibi anajty Juan yaj'ixpijcp etz tüg jáy nej jebi huaad ypocy ñayajñiñuádziiyb ajcxy. ²⁶ Chi jada' ajcxy Juan nidzooñ, oy ajcxy paty, e chi ajcxy nimay:

—Huindzin, je jáy huidibi anajty müch jim müd jim'amy Jordán mijñinaxy, je huidibi müch anajty mnidiy'ajt'ajtpy co je' je' je Cristo, nañ ooy chachjáyajñibety. E janch mayjáy y'ocnimujcin.

²⁷ Chi Juan y'adzooy:

—Ca' ni pin ni ti mic'ajt müdity, pen ca' Dios ni ti mic'ajt ymöy. ²⁸ Müch ajcxy mnejhuüyb co mninaañich co iich ca' njējity je Cristo. Hue' janchtiy Dios xyquejxich jayijp co nnidiy'ajt'adipyich je Cristo. ²⁹ Co jáy ypicy je yēdyjc je' je' müd'idam je ytōxyijc. E je tōxycapxpi huidibi ti yaj'oyiy je pijcin, ca' je' müd'ida'ñ je tōxyjāy, jēyi co yjotcugiy co yōcmidoohui je tōxyjāy ñāy co yjādy ma je' ytiyc co ypigaani. Cristo jadu'n je' nipaady nej tüg tōxyjāy ñāy, e je tōxyjāy jadu'n je' nipaady nej Dios yjāy. Je Cristo ymüd'idaanipy Dios yjāy. Jadu'n iich nipaady nej tüg tōxycapxpi, ti Dios yjāy nyajni'ixi'yich jigix mijpidáaccixipy je Cristo. Jotcujcich cham co je Cristo ti ymñ, e ñicxy yi jáy ajcxy ma yi'. ³⁰ Ooy ytimycopycity co Jesús ymij'ajt paatnipy, e iich ndung ycixnipy ymayñipy.

Dios y'ung tzoön jilby ma Dios

³¹ Chi Juan yjacminañ:

—Je Cristo huidibi jilby tzoön ma Dios jacmij xpijcin müdity ca'ydi naaxhuiñjyá ajcxy. Je jáy ajcxy huidibi ya naaxhuiñ ijtp, yminaaxhuiñjyá ti yaj'ixpijcgixy, e je' ajcxy ñidiy'ajt'ajtpy je naaxhuiñjyá y'ixpijcin. Je Cristo tzoön jilby tzajpioty, jacmijcajee yi' ma y'ayuc ytiy'ajt ca'dyi pin. ³² Je Cristo ñigapxyp huidibi ti ixy e ti midooy, e yi'y'ayuc ytiy'ajt ca' jáy ajcxy cōbigaangixy. ³³ Je jáy ajcxy huidibi cōbijcp Dios y'ung y'ayuc ytiy'ajt, je' ajcxy ñigapxpejtyp co Dios ytiy'ajt janch yi'. ³⁴ Je Jesús huidibi Dios yquejx, ca'pxy Dios ytiy'ajt ñigapxpejti, com Dios ti möy yi' y'ung yi' yjihui'ñ ymic'ajt mijcajee. ³⁵ Dios Teedy chojcyp yjihuiy y'ung, e tüg'óciy ymic'ajt ytiy'ajt yi'ti yajmigo'ixi'yāy. ³⁶ Je jáy ajcxy pinjaty mibijcp Dios y'ung, ymüd'ajtpy ajcxy y'alma je jugy'ajtin huidibi ca' ycixy ytigooy. Je jáy ajcxy pinjaty ca' capxymidooy Dios y'ung, ca' ajcxy y'alma müd'adipy je jugy'ajtin huidibi ca' ycixy ytigooy. Je yi' ypaadipy ajcxy Dios chip y'ejcin.

4

Jesús ñaybaati müd tüg tōxyjāy jim Samaria

¹ Chi je Huindzin Jesús ayuc midoy jadu'n nej anajty je fariseojāy ajcxy ycapxcixy ymydaaccixy co je Jesús jacmayjáy anajty yaj'ixpiy etz yajñibety ca'ydi Juan. ² Oy Jesús ca' anajty jáy yajñibety ci'm. Hue' janchtiy je' ydiscípulos anajty ajcxy jáy yajñibejtp. ³ E co Jesús jada nejhuüy, chi jim Judea choni, yhuimbijtni jim Galilea.

⁴ Co yhuimbijty, hue' anajty yjatytiymñaxihua'ñ jim Samaria. ⁵ Chi jada' yja'ty huingon ma je mij cajp huidi xijip Samaria, jim ma anajty tüg pi'ccajp huidi xijip Sicar, mihuingon je naax huidibi Jacob anajty ti möy y'ung José. ⁶ Jim anajty Jesús yajpaady ma je Jacob ñüigondac. Com ti anajty Jesús y'anucxiyñi müid je tüyöyüi, chi y'ijxtacy jim ma je nüigondac anajty. Hue' anajty xii jim cugihuaanip. ⁷ Chi jim yja'ty nüigombi tüg töxyjäy. Chi Jesús yminañ:

—ñich yajni'uucc. ⁸ Com je' ydiscipulos ajcxy huidibi anajty Jesús yjajmüid'ajtp, ti anajty ñicxcixy cajpoty juuyb pijcp.

⁹ Chi je töxyjäy y'adzooy huidibi anajty cogajpip Samaria:

—¿Na'amy co ñich nü xypijctzoohuich? com müich hue' müich judiojäy, e samariajäy ñich.

(Co yi judiojäy etz samariajäy ca' ajcxy ñaygodigiyüigixy.)

¹⁰ Huin'it Jesús y'adzooy:

—Co ixypiy m'ocnejhuiy je oybi huidibi Dios yejcyp müid müich ycixpi, e m'ocnejhuiy ixypiy nañ jadu'n pin xypijctzoohuipy yi nü, janch co müich ixypiy xyñimäyich: "ñich yajni'uucc". E ñich müich ixypiy nmooyb nü huidibi jugy'ajt yegipy huinixii.

¹¹ Chi je töxyjäy y'adzooy nimay Jesús:

—Huindzin, müich ca' mmüidity ti müid myajpidzimipy yi nü, e yi nüijut cücy yi' ooy. ¿Ma tijy m'ocpada'ñ yi nü huidibi yajjugy'ajtp? ¹² ¿Nej jacñigi tijy müich mij mñayyajnaxyii, ca'ydi ñich ajt n'ap ndeedy Jacob? Je'je' huidibi jada nüigop yaj'oyüi. Jacob etz y'ung y'anäg nü'uuc ma jada nüigop, e nañ jadu'n yajni'uucy yhuaj y'iyujc ajcxy ya.

¹³ Chi Jesús y'adzooy nimay je töxyjäy:

—Tüg'óciy pinjaty nü'uucp ma jada nüigop tidzi huiib ajcxy jadüg'oc. ¹⁴ Yijäy ajcxy pinjaty nü'uucp huidibi nmooybich, ca' ni mina ytidzihuiyb, com hue' yi nü huidibi neyecpich, ahuimbidity ma je jäy jadu'n nej tüg nüigop huidibi yegam jugy'ajtn huidibi ni ca' ycixy ytigoy.

¹⁵ Chi je töxyjäy y'adzooy:

—Huindzin, ñich mooyg yi nü, ca'ydi jabom jabom ndidziyüijich, e ca'ydi n'ocjactmüinibich ma jada nüigop nü yajpidzimbi.

¹⁶ Chi Jesús y'adzooy:

—Ñicx yajtzon mñäy, e müid miin.

¹⁷ Chi je töxyjäy y'adzooy:

—Ca' nmüidityich mñäyich.

Chi Jesús y'adzooy:

—Janch tiy'ajt jadu'n nej müich mina'ñ, co ca' mmüidity mñäy. ¹⁸ Com ti müiddzinäy migoox yëdyjc, e huidibi cham mmiid, ca' mñäy'adyii. Janch tiy'ajt jadu'n nej ti m'adzooy.

¹⁹ Chi je töxyjäy yminañ:

—Huindzin, cham nhuinjihuiyich co müich je' tüg huidibi Dios yhui'ajt ycuje'ajt müid.

²⁰ ñich ajcxy n'ap ndeedyich hue' je' yminañ co jëbi ya huaad ñich ajcxy nDios'ojadajtcixyich ma jadayaabi huingombi copijp. E müich ajcxy judiojäy yminaangixy co jim Jerusalén je' ma huaad jëbi nDios'ojadajtm, ca' jac ma.

²¹ Chi Jesús y'adzooy nimay je töxyjäy:

—Töxyjäy mijpidäg ñich n'ayuc. Co ypadamy je xii je tiempo co ni ya ma müich ajcxy mDios'ojadajttac, e ni jim Jerusalén jäy ca' ojadadipy ajcxy yi Dios Teedy. ²² Müich ajcxy ca' tiy'ajt mnejhuiyigixy nej jëbi huaad mDios'ojadajtcixipy. ñich ajcxy judiojäy nejhuiybich ajcxy je tiy'ajt nej jëbi huaad nDios'ojadajtm. Com tüg judiojäy je huidibi yajnidzoocätahuam je jäy ajcxy y'alma ma Dios. ²³ Ypadamy je xii je tiempo, e jada jëdu'n je tiempo co je huidibi ajcxy tiydudägy Dios ojadajtp, y'ojadadipy ajcxy Dios müid oyjot oyhuinma'ñ etz müid Dios ytiy'ajt. Com yi Dios Teedy y'ixtaayb yi jadu'mbi jäy huidibi ojadadib müid oyjot oyhuinma'ñ. ²⁴ Dios ca' ñinix müidity, jadu'n je' nej poj ca' yaj'ixy. Je jäy ajcxy pinjaty ojadajtp Dios, copicy co huen ojadajtcixy müid tudägyjot tudägyhuinma'ñ, etz müid Dios ytiy'ajt.

²⁵ Chi je töxyjäy yminañ:

—ñich nejhuiyb co je Mesías ymina'ñ huidibi naydijaanip Cristo, co je' yminipy, huin'it xyajni'ixihuaanim tüg'óciy tiy'ajt.

²⁶ Chi Jesús y'adzooy:

—ñich jëdu'n je Cristo huidibi müich müidmiydacyp.

²⁷ Chi jada' yja'ty ajcxy Jesús ydiscipulos ajcxy. Chi ajcxy ooy jihuüy ti anajty co Jesús je töxyjäy müidmiydägy, e ni pin ca' yaj'amidooy ti anajty chojcyp ti anajty yñimiydacyp müid yi töxyjäy. ²⁸ Chi je töxyjäy jim ymajt izmajch, chi ñicxy cajpoty oy mayjäy nimay:

²⁹ —Mingix, jam tüg yëdyjc ijxim. Ti ñich yi' xyajnimaydäyich tüg'óciy tijaty ti nduñich. ¿Nej ca' jada' yi' jëjity je Cristo?

³⁰ Chi choñ ooy mayjäy cajpjoty, ninicxy ajcxy Jesús. ³¹ Yam anajty ajcxy Jesús ydiscípulos chachnimäyii adzip:

—Huindzin, occaay.

³² Chi Jesús y'adzooy:

—Ich nmüdich tüg caayin uucin huidibi miich ajcxy ca' mnejhuüygixy.

³³ Paady je' ydiscípulos ajcxy tzachhuinmay, ac jëyi ajcxy, nayñimayigixy miñ xipy:

—¿Nej ti pinjaty yajcayyii yaj'ügyii?

³⁴ Chi Jesús yminañ:

—Jotcujc nayjihuiyijich co ti nguynunich Dios chojcin. Com yi' ti xyquexyich ya naax-huñ, e nguynunibich yi' y'ané'min. ³⁵ Miich ajcxy minaaingixp co jactigoy'ijtni jamidaax po' mina cosecha nyajpidicim. Oc-huinmay miich ajcxy, ich nmína'ñich, jëbi nyajpidicim yi cosecha cham cham. Huindixcix yi mayjäy huidibi xyñigidaacim choñ cajpjoty. Ni'ixi yi' ajcxy y'ity co amido'idaangixy Dios y'ayuc. Jadu'n ajcxy nipaty nej tügi cosecha huidibi ti ymiyaani, jëbi nyajpidicim. ³⁶ E pinjaty cosecha yajpidicp ypaatyp ajcxy ymuju'ñ. Nañ tim jadun miich ajcxy huidibi myajmibijcy yi jäy ajcxy co ich je' je Cristo, mbaadipy ajcxy jotcujc'ajtin, etz huidibi ajcxy xymibijcpich xymijpidaacpich ypadamy ajcxy y'alma jugy'ajtin huidibi ca' ycixy ytigooy. Tim jadun nej je jäy ajcxy huidibi niip etz huidibi cosecha yajpidicp yjotcugiygixy müd co je cosecha ti y'ity, nañ tim jadun je jäy ajcxy huidi cojaay jecy'ajty jada Dios y'ayuc etz miich ajcxy jotcugiygixy aguixpy co yi jäy ajcxy xymijpidägyich. ³⁷ Paady ty'ajt je ayuc huidibi minam: "Tüg jäy niip etz jadüg jäy cosecha yajpidicp." ³⁸ Ich ti nguexyich miich ajcxy myajmibigipy jäy huidibi ti paady Cristo ytiy'ajt ma Dios ñecy. Yi Dios y'ayuc ycojaaybi ti möy je jäy Dios ytiy'ajt, e miich ajcxy je' mbubedipy co myajmibigipy co ich je' je Cristo.

³⁹ Mayjäy huidibi cogajpip jim Samaria ymijpidac ajcxy je Jesús co je' je' je Cristo, müd co je töxyjäy anajty ti ymina'ñ: "Ti yi' xyajnimaydäyich tijaty ich ti nduñich." ⁴⁰ Co je samariajäy ajcxy yjäy ma Jesús yhuinduu, chi ajcxy cohuaniiy huen hui'my. Chi Jesús jim yhuimüy mejtz xii. ⁴¹ Janch mayjäy ooy nigi mibijcy mijpidacy Jesús, co je' je' je Cristo co ajcxy ci'm midomiydacy je Jesús. ⁴² Chi ajcxy nimay je töxyjäy:

—Canan jëyi co miich ti xyajnimäy ich ajcxy, paady yci'ixp ich ajcxy yam nmibicyich. Nañ ti ich ajcxy yam ci'm n'amido'ityich, paady ich ajcxy nejhuüy co janch jada yjëjty je Cristo huidibi yajnidzögam yi naaxhuñijäy ajcxy y'alma ma Dios.

Jesús yajtzooc tüg gobierno mijtungmüdpimang

⁴³ Mimejtz xii bi anajty co Jesús choñ jim, nicxy jim Galilea. ⁴⁴ Jesús ci'm anajty ti ymina'ñ:

—Co jäy ajcxy huidibi müd Dios yhui'ajt ycuic'ajt yajpaady ma yci'mgajp, ca' pin yajmij'adyii. ⁴⁵ Co Jesús yja'ty jim Galilea naaxjot, huidi anajty ajcxy jimip agujc jotcujc ajcxy cöbijcy Jesús, com ti anajty ajcxy ijxcixy tijaty mijhuinma'ñ anajty ti tuñ jim Jerusalén xijjoty, com nañ ti je' anajty ajcxy jim y'oygixy xii'ajtpi.

⁴⁶ Chi yhuimbijty Jesús jadüg'oc jim Caná ma Galilea ñaaxjot, ma je nii yajvinocojy. Jim Capernaum anajty tüg rey mijtungmüdpim huidibi anajty y'ung pójcip. ⁴⁷ Co je' nejhuüy co Jesús anajty ti yhuimbijty Galilea co anajty ti y'oy Judea, chi ninicxy, e chi cohuaniiy co Jesús huen nicxy y'ung tzozyii huidibi anajty ögaanip. ⁴⁸ Huin'it Jesús yminañ:

—Pen ca' ixypy ti m'ixy mijhuinma'ñ etz tijaty ijxpejt, ca' ixypy nmibicy.

⁴⁹ Chi y'adzoy je rey ymijtungmüdpim:

—Huindzin, tun may'ajt ninicx ich n'ung ma ca'ni y'o'cyñi.

⁵⁰ Chi Jesús yminañ:

—Huimbit ma mdijc, je m'ung jugy'ajtni je'.

Chi je yëdjic mibijcy Jesús nej anajty ti ñimäyii, chi ñicxy jadüg'oc ma ytiyc. ⁵¹ Nicxnip anajty co ytumbi ajcxy oy yjijpcobadiyii, e chi ñimaayii co je' y'ung ti anajty y'agidägy.

⁵² Chi yaj'amidooy ajcxy ti hora anajty ti yhuaadjihuüy, chi ajcxy y'adzooy:

—Ixiiy cujc yxii naxy je toyii y'ixmajtzn.

⁵³ Paady je ungdeedy jihui'ñbijcy co huin'it je' jada' je tiempo co anajty Jesús ti ñimäyii: "Je m'ung jugy'ajtni je'." Chi jada' mibijcy mijpidacy Jesús müd tüg'ocy jäy huidijaty anajty yajpat ma yjin ytiyc.

⁵⁴ Je' je' je mimetzpim mijhuinma'ñ mij'oy'ajt huidibi Jesús ytun co choñ jim Judea ñicxy jim Galilea ñaaxjot.

5

Jesús yajtzooc tüg jäy huidibi anajty yci' ytecy xuuxy

¹ Co jadun ytuni yjajti jim Jerusalén anajty ajcxy judiojäy tungixy tüg mijxii. Huin'it Jesús jim ñicxy jim Jerusalén. ² E jim Jerusalén jim anajty nii abojtzig y'ity, mihuingon je poch aguü huidi xiiijp puerta de las ovejas. Je it hue' anajty yajtijy hebreo'amy Betesda, e

ymiid anajty migoox it yhuinguembetpa't. ³ Ma je huinguembetpa't mayba'mjäy anajty jim chachcönaaygixy; je huintzpi, ciducp tecytucpi, cixuxy tecyxuxypi, huidibi anajty ajcxy jim tzach'ahuijxp mäna je nii y'ocpu'xhuimbity. ⁴ Com tüg ángel anajty yhuimbety y'adijy ma je nii abojtzig y'ity, chi je nii yajyücx. E je jäy pinjaty anajty jayjip jiihy nijoty tigüyb co je nii yücx, huin'it anajty ajcxy choocixy, oy ixyipy ti pa'm ajcxy tim müidity. ⁵ Jim anajty tüg yëdjic hue' anajty ti ypa'mgögnäy iipx majmoxc tugüig jimijt. ⁶ Co Jesús ijxy jim ycögnäy, ijxajpy co anajty je' jecyip chachmijtacni, chi nimay:

—¿Nej mdzögambi?

⁷ Chi je pa'mjäy y'adzooy:

—Huindzin, ca' nmüdidyich tüg yëdjic pin iich xypidägipy jiihy nijoty co anajty nii y'ahuidijtcoty. E paady ycixpi co oy iich jim njamechich ma yi nii, ti huingbi ñitigüyñi.

⁸ Chi Jesús yminañ:

—Pidig, yajpidig yi mmaabejt, etz tüyöychon.

⁹ Chi mic'amy choocy, chi je' ymaabejt yajpidigy ytigüy yöybi najxpi janch mic oy. Hue' anajty tüg sábado xii co choocy. ¹⁰ Paady je judíoäy ixcipyitjc ajcxy nimay je huidibi anajty ti chögy:

—Hue' yam sábado xii, paady ca' jadu'n ñigo'aducyity jadu'n nej m'idich co mmaabejt mdzimhuidity.

¹¹ Chi y'adzooy je':

—Je jäy tiibi iich xyajtzögy, yi' iich jadu'n ti xyñimäy: “Yajpidig yi mmaabejt etz tüyöychon.”

¹² Chi ajcxy y'amidooy:

—¿Pin müich jadu'n ti xyñimäy: “Yajpidi yi mmaabejt etz tüyöychon?”

¹³ Per je tiibi anajty chögy, ca' anajty je' nejhuüy pin je' anajty. Com ti anajty Jesús niyöydiagooñi ma je mayjäy huidibi anajty ajcxy jim tzachajtip ma je it. ¹⁴ Chi jada' jacomjency minaybaatti Jesús jim ma Dios ytijc, e chi Jesús yminañ:

—Cuentipic nej ti mdzögy, ca' ni ti bocy mjactunipy. Co pocy mjactunipy ca' yjencyity co tim niigi jibic nicxy mjayty.

¹⁵ Chi je yëdjic ñicxy oy je' yajnimäy je judío ixcipyitjc co hue' je' anajty Jesús, je huidibi anajty ti yajtzögyii. ¹⁶ Paady ycixpi je judío ixcipyitjc anajty tzach'ixhuidijtcixy tzachpahuidijtcixy je Jesús, e yaj'ögaangixy müid co anajty jäy ti yajtzögy sábado xii. ¹⁷ Chi Jesús yminañ:

—Iich nDeedy tumb je' cham, ca' ypooxxy, paady ycixp iich nañ jadu'n nduñich cham ma müich ajcxy sábado xii.

¹⁸ Co Jesús jadu'n yminañ, paady ycixpi je judío y'ixpcyitjc ajcxy niigi yjacjtotma'tcoty, ytimy yaj'ögamy anajty aj y Jesús. Ca' ajcxy jadu'n yjotucyity co anajty Jesús ca' cuyduñ judíoäy ajcxy ytiy'ajt nej ajcxy sábado xii yajmij'ajtcixy, etz co jadu'n yminañ: “Dios yi' nDeedy'ajtypich.” Paady ycixpi ajcxy judío y'ixpcyitjc yminañ co Jesús ci'm anajty ytüghua'ñ müid Dios.

Dios ymooy je y'ungymic'ajt

¹⁹ Chi Jesús yminañ:

—Janch janch iich müich ajcxy yam jadu'n nimaaygixy co iich Dios nDeedy'ajtypich. Ca' huaad ti nduñich müid ngi'mjot ngi'mhuinma'ñich. Jëbi janchtiy nduñich huidibi n'ijxpyich Dios Teedy ytumy. Huidibi Dios Teedy ytumyb, ndumybich com Dios yi' nDeedy'ajtypich.

²⁰ Com yi Dios Teedy ooy yi tzocy jihuü yci'm'ung, paady xyajni'ixiydaaybich tüg'óciy yi huidibi ytumyb. E nañ xyajni'ixihuaambich jacmijjatypi mijhuinma'ñ, ca'ydí jadayaabi mijhuinma'ñ nej ajcxy ti m'ijxycixy nej jada pa'mjäy ti chögy, paady ycixpi niigi mhuinmayipy ajcxy. ²¹ Jadu'n nej Dios Teedy yajjugypicy yi o'cpi, e chi yajtzinäy jadüg'oc. Nañ jadu'n iich anajty ndimymöhuamby. ²² Com je Dios Teedy ca' je' ci'm ocyajciyöyaani ocyajtecyyöyaani jäy ajcxy ypocy. Hue' tüg'óciy je ymic'ajt xyajcidigiydaayich co iich ndiydunipyich tüg'óciy naaxhuiñjäy, com Dios nDeedy'ajtypich. ²³ Hue' tüg'óciy je ymic'ajt xyajcidigiydaayich, jigix tüg'óciy jäy xyajmij'adipyich. Je jäy ajcxy huidibi ca' xyajmij'ada'ñich, nañ ca' ajcxy yajmij'ada'ñ Dios Teedy huidibi xyquejxich ya naaxhuiñ.

²⁴ Janch janch iich müich ajcxy yam jadu'n nimaaygixy: Co hueñypinjäyity, pinjaty xy'amido'jtiibich n'ayuc, e ymibijcyp ymijpidacyp je tiibi xyquejxich ya naaxhuiñ, ymüid je'je y'alma jugy'ajün huidibi ca'ycixipy ytigoyipy, e ca' Dios Teedy chaachytuna'ñyii müid ypocy ycixpi. Hue' janchtiy co y'ögipy, chi janchtiy jadügtecy yjugypigipy. ²⁵ Janch janch iich müich ajcxy jadu'n nimaaygixy co yi xii tiempo paatnipy, e cham jëdu'n ti paady, co yi jäy ajcxy tiibi y'o'ccixy ymidohuipy yi n'ayucich, co anajty ngapxyich, com Dios yi nDeedy'ajtpyich. Pin jäy anajty midoob n'ayucich jugypigip jadüg'oc ajcxy. ²⁶ Com yi Dios Teedy mic'ajt müid jëbi yajjugypicy jäy tiibi y'o'ccixy. Nañ Dios ti xymöyich ymic'ajt jëbi

huaad nyajjugypicyich jây tiibi y'o'ccixy, com Dios ïch nDeedy'ajtypich. ²⁷ Ti Dios xymöyich ymic'ajt jëbi ndiyduñich je jây ajcxy müd ypocy ycixpi, com ïch je' je jây huidibi tzoön tzejpjoy. ²⁸ Ca' ooy jada ayuc tiy'ajt mhuinmaaygixy. Com ypaadipy je xii je tiempo co je huidijaty ajcxy yajpatp ma naaxtigiydac, ymidohuipy ajcxy n'ayucich co ïch anajty nmigapxyich ajcxy. ²⁹ Chi ypidzimipy ajcxy ma ñaaxtigiy. Je' ajcxy huidibi anajty oybi ti tungixy, jugy'adip ajcxy y'alma jadüg'oc. Je' ajcxy huidibi anajty jibicpi ti tungixy ypaadipy ajcxy tzaachyipi müd ypocy ycixpi.

Dios tiy'ajt yejc co Jesús ymüd anajty mic'ajt

³⁰ Ca' ni ti huaad nduñich müd ngi'mmic'ajtich ngi'm'ayucich. Je ayuc tiy'ajt huidibi nmidooybich ma Dios Teedy, jada ayuc tiy'ajt müd nyajciyöya'ñich nyajtecyyöya'ñich jây ajcxy ypocy. Jadu'n tiydudägy nduna'ñich, com ca' ïch nduñich ngi'mdzójcinich. Yi' ïch ndumyb nej Dios Teedy tzocy, yi' huidibi xyquejxich ya naaxhuñ. ³¹ Co ixypiy ïch ci'm nayñigodiy'ajt'adyiijich, ca' ixypiy müch ajcxy mmijpidägy n'ayuc ndiy'ajtich. ³² Com huingbi yi' huidi xyñigodiy'ajt'ajtpich co ïch Dios ymic'ajt nmüdidyich, e nejhuiybich co janch yi' huidibi xyñigodiy'ajt'ajtpich. ³³ Müch ajcxy ti mguexy je migütiyc ajcxy tiy'ajtpijcpi ma Juan. E je' yejc tiydudägy ayuc tiy'ajt janchyipi pin ïch. ³⁴ Co jadu'n nmına'ñich co Juan xyajnidiy'ajt'atyich co ïch je' je Cristo, ca' jadu'n nmına'ñich co ooy ycopicyity co tüg jây xyñidiy'ajt'adipyich. Com Dios ci'm xyñidiy'ajt'ajtpich. Jadu'n ajcxy nyajnimäy jada tiy'ajt, jigix ajcxy m'alma nïdzoocin paadipy ma Dios. ³⁵ Je Juan mictägy ooy Dios y'ayuc najtzcapxiyi, jadu'n je' anajty nej tüg jün huidibi tücxp jajp, e müch ajcxy tüg jaxigyi ti mxondaaccixy müd yi' y'ayuc ytiy'ajt. ³⁶ Nigi ïch Dios y'ayuc ytiy'ajt nmüdidyich ca'ydí Juan. Yi' mihuinma'ñ huidibi ndumybich müd Dios Teedy ymic'ajt. yi' xyajnigüexigibich co ïch ya naaxhuñ Dios Teedy xyquejxich. ³⁷ Yi' Dios Teedy tiibi xyquexyich, yi' ci'm yejc tiy'ajt co ïch je' je Cristo. E ni camınaabi müch ajcxy yi' mgamidoohui ycapxin, nañ ni camınaabi müch ajcxy Dios Teedy yhuñiyijp maga'ixi. ³⁸ Ni ca' müch ajcxy mmüdiyi yi' y'ayuc ma mjot mhuinma'ñ, müd co müch ajcxy ca' xymijpidägyich co ïch je' je jây huidibi Dios ti tuxey ya naaxhuñ. ³⁹ Ijxtaaygixy jada tiy'ajt ma Dios ylibro, com jiiyb mdijy müch ajcxy mbaadipy tiy'ajt nej jëbi ajcxy mjugy'adipy co anajty ti m'o'ccixy, e yi' Dios ylibro nañ ïch yi' xyñigapxp. ⁴⁰ E ca' müch ajcxy mgöbigaangixy ïch n'ayuc ïch ndiy'ajt, jigix ajcxy jugy'ajti mbaadipy huidibi ca' ycixy ytiyoooy.

⁴¹ Dios xycömayipyich, ca' ngöbigipyich co naaxhuñiyjây ajcxy xycömayipyich. ⁴² Nnejhuñiybich, nej müch ajcxy mjot mhuinma'ñ mmüdiyi, co ca' ajcxy Dios ytiy'ajt mguyduuni. Ca' ajcxy migüg mdzójccixy mihuiyigixy jadu'n nej Dios tzocy jihuñ jây ajcxy. ⁴³ Hich ti nmüñich müd nDeedyich ymic'ajt. Müch ajcxy ni ca' xycöbiyich. Pen ji huingbi jây ymiñ müd yci'mmic'ajt, ca' müdiyi Dios ymic'ajt, je' janchtiy müch ajcxy ooy mijpidägaangixy. ⁴⁴ Ca' mjañtcixipy nej ïch müch ajcxy xymijpidägbich, müd co ajcxy ci'm mdzachnaygömayaanigixy ac müch ajcxy jëyi. E co ixypiy müch ajcxy xycöbiga'ñich, huñit ajcxy Dios xycömayipy. ⁴⁵ Ca' ajcxy mmına'nipy co ïch müch ajcxy nxihuaamy ma Dios Teedy yhuinduu. Je Moisés müch ajcxy yxihuaam ma Dios, je huidibi müch ajcxy mdzachmijpidaacyp ytiy'ajt. ⁴⁶ Pen mmijpidaacyp ixypiy ajcxy je Moisés y'ayuc ytiy'ajt, nañ jadu'n ixypiy ïch müch ajcxy xymijpidägyich. Com Moisés ïch yi' xychachñimiydaacich ma yi' ñecy. ⁴⁷ Pen ca' mmijpidaaccixy Moisés ñecy, ca' mjañtcixipy nej ajcxy mijpidäaccixipy ïch n'ayuc.

6

Jesús ymoy jây jicxy picy migoox mil

¹ Co jadu'n ytuni yjajti, chi Jesús ñicxy jim Galilea mejy ninaxy, huidibi nañ jadu'n xiiijp Tiberias mejy. ² Janch mayjây anajty Jesús ypanicxyii axam co anajty ajcxy ixy je mihuinma'ñ tijaty anajty Jesús ytumyb ma mayba'mjây. ³ Chi Jesús ypejty ma tüg cögor, chi jim y'ixtacy müd je' ydiscipulos ajcxy. ⁴ Tim huingonip anajty je pascuaxii huidibi anajty judiojây ajcxy ytumyb. ⁵ Chi Jesús ijxy co janch mayjây ti ypamiñiyi, chi nimay Felipe:

—¿Ma jada' caayin uucin n'ocjuyim, ti nyajcaayim jada mayjây huidibi ti xypamiñim?

⁶ Hue' anajty y'ocijxmazamy nej Felipe y'oc'adzooy. Jesús anajty ñejhuñiyb yajxon ti anajty ytunamy. ⁷ Chi Felipe y'adzooy:

—Ni ycahuaadihuip mejtz mil peso meñ, co ixypiy ajt n'ocjuyaanim caayin uucin, e nmöhuuanim cijp tüg'aa cijp mejtz'aa jëyi.

⁸ Tüg Jesús ydiscipulo, hue' anajty yxi Andrés, Simón Pedro y'uch, je' jadu'n nimay Jesús:

⁹ —Cha tüg pi'c'anäg huidibi müd migoox cebada tzejcaagy, e mejtz acx ung. E ni ycatiijity yi' yi' migooxpi tzejcaagy, etz mejtz acx ung müd jada mayjây.

¹⁰ Chi Jesús nimay je' ydiscipulos ajcxy:

—Yaj'ixtacta' yi mayjây.

Müyjot anajty ooy ma je it.

Chi ajcxy y'ixtactay. Hue' jada' anajty ajcxy ñaybadyii migoox mil ac yëydijctijc, abicy yi töxyjäydijc etz y'ung y'anäg ajcxy. ¹¹ Chi Jesús je tzajcaagy conigy, chi yajnajxy Dioscojuyip, chi yajniğidagüyday je jäy ajcxy huidijaty anajty jim iñaayb, mooy jadu'n nej pin tim tzocy je tzajcaagy etz je acx. ¹² Co je mayjäy cayday, chi Jesús nimay je' ydiscipulos ajcxy:

—Yajmujcta' ajcxy yi cayduc, ca'ydi huaad ni ti y'iyoy.

¹³ Chi ajcxy yajmujctay je cayduc, e yaj'ujch ajcxy majmetz mijjaty cach müd je tiibi anajty yconaxy je migooxpi tzajcaagy. Je' anajty jadu'n ti yjaconaxy. ¹⁴ Co ajcxy y'ijxy je mijhuinma'ñ huidibi anajty Jesús ti tuñ, chi je jäy ajcxy yminañ:

—Janch jëdim jada je yëydijc huidibi Dios y'oy'ajt ymic'ajt müd, je huidibi anajty miinam ya naaxhuiñ.

¹⁵ Co Jesús nejhuiy co ajcxy anajty yajrey'ada'ñyii, chi jada' jadüg'oc huinhuäctuttay je mayjäy. Chi ñicxy naydüg ma tüg yuugjot.

Jesús yöy ñihuingixy

¹⁶ Co oy chu'iiyñi, chi Jesús ydiscipulos ajcxy y'idaacni ma mejypa'. ¹⁷ Chi ajcxy ybarcotigüy, ñicxy ajcxy jim Capernaum jadügpi mejypa'. E ti anajty ycoodziyñi, e ca'ni anajty Jesús ajcxy ñihuimbidyini. ¹⁸ Chi tüg mijpoj ymiñ, chi je mejy ytigüy oy yücxpi. ¹⁹ Ti anajty ajcxy ytüyöy oy migoox tudujc kilómetro co ajcxy ijxy Jesús yhuingoñ ma je barco, hue' anajty ytüyöy mejyhuingixy. Chi ajcxy ooy ñay'adzigiñyi. ²⁰ Chi Jesús yminañ:

—ñich yi', ca' mdzigiñyigixy.

²¹ Chi ajcxy jotcujc Jesús yajbarcotigüy. Chi tim mic'amy ajcxy ymejch jim ma mejypa' ma anajty ajcxy ñicxcixy.

Mayjäy ixtaay Jesús

²² Je mayjäy huidibi anajty ajcxy ti yhui'müy jim'amy y'ahuin, y'ijx ajcxy co ac jëyi Jesús ydiscipulos ajcxy ytigüy ma tüg barco, e Jesús ca' anajty ti ytigüy barcojoty müd je' ajcxy. Ac jëyi anajty ajcxy ti choogixy barcojoty. ²³ Je com jabom nijejity barco huidibi anajty jim tzomb Tiberias, ti anajty yjädy mihuingon ma je it, ma anajty Jesús ti yajcaaygixy je mayjäy müd je Huindzin Dios ymic'ajt, huin'it co Dios mibijctzoy. ²⁴ Chi je mayjäy ajcxy ijxy co ca' anajty jim Jesús, ni ca' anajty jim je' ydiscipulos ajcxy. Chi ajcxy ybarcotigüyday, chi ajcxy oy ixtaaygixy Jesús jim Capernaum.

Jesús ymôhuamy jäy ajcxy jugy'ajtin huidibi ca' ycixipy ytigoyipy

²⁵ Co ajcxy minaybaati Jesús mejy ñinaxy, chi ajcxy nimay:

—Huindzin, ¿mina müch ya ti mmiñ?

²⁶ Chi Jesús y'adzooy nimay je mayjäy ajcxy:

—Janch janch co ñich müch ajcxy yam jadu'n nimaaygixy co müch ajcxy xy'ixtaaybich, canan yi' ycixpi co ajcxy ti m'oc'ixy yi mijhuinma'ñ huidibi ti nduñich, paady ycixpi müch ajcxy xy'ixtäyich co ajcxy nyajcay cüxyi müd tzajcaagy.

²⁷ Chi Jesús yjacminañ:

—Ca' myajjotmaygojixy yi jicxy picy huidibi cijxp tigooyb. Yi' janchtiy mijottigooygixy yi jicxy picy huidibi xymôhuipy yi jugy'ajtin huidibi ca' ycixipy ytigoyipy tücc'i'yi. ñich müch ajcxy je jugy'ajtin nmôhuibich huidibi ca' ycixipy ytigoyipy tücc'i'yi, com ñich je' je jäy huidibi tzoon tzajpjoty, e Dios Teedy xymic'ajtmooyich, jëbi ñich müch ajcxy nmôy jugy'ajtin huidibi ca' ycixipy ytigoyipy tücc'i'yi.

²⁸ Chi ajcxy nimay Jesús:

—¿Ti ñich ajcxy jëbi huaad nduñ, nej jëbi ñich ajcxy Dios xymijotcujc'aty?

²⁹ Chi Jesús y'adzooy:

—Dios chojcpj co müch ajcxy xymibicyich, com Dios xyquejxich ya naaxhuiñ.

³⁰ Chi ajcxy nimay Jesús:

—¿Ti ijxpejt mdunamy müd ñich ajcxy, jëbi ñich ajcxy n'ixipy Dios ymic'ajt etz ñich ajcxy nmibigipy co müch je' je Cristo? ¿Ti mijhuinma'ñ mdunamy? ³¹ ñich ajt nmij'ap nmijteedy ajcxy jecy'ajty yjicxy pijc ajcxy je maná jim ma tütznaax'it. Jadu'n ymiñ jaybety ma jadu'n yminañ: “Dios yejcpj jicxy picy huidibi tzoon tzajpjoty.”

³² Chi Jesús y'adzooy:

—Janch janch ñich müch ajcxy yam jadu'n nimaaygixy co canan je' je' je Moisés huidibi müch ajcxy xymooyb je jicxy picy janchypi huidibi tzomb tzajpjoty. ³³ Je jicxy picy huidibi Dios yejcpj huidibi tzomb tzajpjoty, je' je' huidibi jugy'ajtin moy je naaxhuiñ-jäy huidibi ca' ycixipy ytigoyipy tücc'i'yi.

³⁴ Chi ajcxy nimay Jesús:

—Huindzin, ñich ajcxy mooyg je jicxy picy janchypi jabom jabom huinixii.

³⁵ Chi Jesús yminañ:

—Hich jëdu'n je jüxcy picy huidibi miich ajcxy xymöhuip jugy'ajtin huidibi ca' ycixipy ytigoyipy tücci'yi. Co jäy ajcxy xyñimnich, e xymijpidägich, huin'it ca' yi' ajcxy yuböccoda'ñyii nimiraxi, e co jäy ajcxy xymibicyich, ca' yi' ajcxy ytidzihua'ñyii nimiraxi.³⁶ Com ti iich miich ajcxy nimäy, oy iich miich ajcxy ti xyja'ijxcy, per ca' mibijccixy.³⁷ Tüg'öciy pinjaty iich nDeedy yquexyp ma iich, xyñimimbich yi' ajcxy. E pinjaty xyñimimbich etz xymijpidaacpich, ca' iich yi' ajcxy n'ixtijy.³⁸ Canan paady ycixpi iich ti ndzooñ tzejpjoty ngidägich ya naaxhuiñ co nduna'ñich ngi'mhuinma'ñ. Hue' janchtiy yi' ndunaamyich nDeedyich y'ayuc ytiy'ajt, com yi' xyquejxich ya naaxhuiñ.³⁹ Yi' jadu'n tzejcp iich nDeedy huidibi xyquejxich ya, co iich ca' ni pin nyajtigoyipyich, yi huidijaty xymooybich. Hue' janchtiy yi' ajcxy nyajjugypigipyich jadüg'oc co anajty naaxhuiñbi ti yhuaad'ajtni mina ytigadzipy.⁴⁰ Dios Teedy ti xyquexyich ya naaxhuiñ e yi' jadu'n tzejcp co pin jäy iich anajty xy'ixpich, e xymijpidaacpich, ymüid'adipy je' ajcxy jugy'ajtin huidibi ca' tücci'y ycixipy ytigoyipy. Hue' janchtiy nyajjugypigipyich ajcxy jadüg'oc co anajty je naaxhuiñbi ti yhuaad'ajtni mina anajty ytigadza'ñ.

⁴¹ Chi je judiojäy ajcxy ooy yajtzibiiy yajcapxiy co anajty Jesús jadu'n ti ymina'ñ: "Hich je' je jüxcy picy huidibi tzoön tzejpjoty." ⁴² Jadu'n anajty ajcxy chachmina'ñ:

—¿Nej ca' je' yjadaajty je Jesús, je José y'ung, je huidibi ajt ytaj yteedy n'ixy'ajtm? ¿Nej co jadu'n ymina'ñ: "Hich ti ndzooñich tzejpjoty?"

⁴³ Chi Jesús y'adzooy:

—Ca' myajtzibiiygixy myajcapxiygixy ac miichiy ajcxy.⁴⁴ Ni pin jäy xycaniminipyich, pen ca' jayijp Dios Teedy huinma'ñ ymöyii co xymijpidägibich. E co xymijpidägibich, chi nyajjugypigipyich jadüg'oc co anajty naaxhuiñbi ti yhuaad'ajtni mina ytigadzipy.⁴⁵ Com jadu'n ymiñ jaybety ma Dios ñecy huidibi je jäy ajcxy anajty Dios ytiy'ajt müid huidibi jecy'ajty yjaay co Dios yaj'ixpigamy je jäy ajcxy tüg'öciy. Paady ycixpi tüg'öciy jäy huidibi midoob Dios y'ayuc etz y'ixpijcy Dios ytiy'ajt xymijpidägibich ajcxy.

⁴⁶ Ca' ni tüg jäy ti ixy yi' Dios Teedy. Jëyi je jäy tügpaic huidibi ti choñ ma Dios, yi' je' ti ixy yi' Dios.⁴⁷ Janch janch iich miich ajcxy yam jadu'n nimaaygixy co pinjaty xymibijcpich xymijpidaacpich, ymüid yi' ajcxy yjugy'ajtin huidibi ca' ycixipy ytigoyipy tücci'yi.⁴⁸ Hich jëdu'n je jüxcy picy huidibi jugy'ajt mooyb je jäy huidibi ca' ycixipy ytigoyipy tücci'yi.⁴⁹ Miich ajcxy mmij'ap mmijteedy yjüxcy'ajti ycaagy'ajti ajcxy je maná jim tüznaaxtuum'it jecy'ajty. E chi ajcxy y'octay. E ni ca' ajcxy jugy'ajtin paty huinixiibi.⁵⁰ Je jüxcy picy huidibi nnigapxypich huidibi tzoön tzejpjoty, co jäy ajcxy jüxcipy, ymüid'adipy ajcxy je jugy'ajtin huidibi ca' ycixipy ytigoyipy tücci'yi.⁵¹ Hich jëdu'n je jüxcy picy huidibi ti choñ tzejpjoty, etz ti ycidägy ya naaxhuiñ huidibi jugy'ajtin yejcp. Co jäy ajcxy jüxcyp je jüxcy picy, ymüid'adipy ajcxy je jugy'ajtin huidibi ca' ycixipy ytigoyipy tücci'yi. Je jüxcy picy huidibi nyegaamyich müid naaxhuiñjäy ajcxy ycixpi, je' je' je' nninixich.

⁵² Chi je judio y'ixpijcy ajcxy ooy yaj'ayucyoön yajcapxyoön, ac je'yi ajcxy ñayñimäyigixy:

—¿Nej jada yëydijc tijy yi' ñinix njüxcy'ajtm?

⁵³ Chi Jesús ymina'ñ:

—Janch janch co iich miich ajcxy yam jadu'n nimaaygixy, pen ca' miich ajcxy mdzüdzcixy iich nninix, e pen ca' m'uuccixy iich nni'py, iich je jäy tügpaic huidibi tzoön tzejpjoty, ca' miich ajcxy müid'adipy yi' Dios yjugy'ajtin.⁵⁴ Com pinjaty iich nninix xychu'tzip etz iich nni'py xy'uucibich, ca' je ajcxy yjugy'ajtin ycixipy ytigoyipy tücci'yi, oy ajcxy yja'o'ccixy. Nyajjugypigipyich je' ajcxy jadüg'oc co anajty naaxhuiñbi ti yhuaad'ajtni mina ytigadzipy.⁵⁵ Hich nninix janchypi jüxcy picy yi', etz iich nni'py janchypi ügy yi'.⁵⁶ Co yi' jäy ajcxy xymibicyich xymijpidägich jadu'n ni paady nej jihuüy iich nninix xychüdz, etz iich nni'py xy'uuci. Chi y'idipy ajcxy huinixi ma iich, etz iich n'idipyich huinixi ma je' ajcxy.⁵⁷ Dios Teedy huidibi xyquejxich ya naaxhuiñ ymüid jugy'ajtin huidibi ca' ycixy ytigooy. Hich ti nbaadyich ma Dios Teedy je jugy'ajt huidibi ca' ycixy ytigooy. Nañ mbadamy miich ajcxy jugy'ajtin huidibi ca' ycixy ytigooy ma iich. Co miich ajcxy xymijpidägibich, jadu'n anajty nipaady nej jihuüy mjüxcy'ajtigixy iich nninix.⁵⁸ Je jüxcy huidibi tzoön tzejpjoty, e ycidacy ya naaxhuiñ co jäy ajcxy jüxcy'adyii, yajtzinähuiñ je ajcxy, ca' ajcxy yjugy'ajtin ycixipy ytigoyipy tücci'yi. Yi' mmij'ap mmijteedy huidibi jüxcy'ajtigixy je maná jecy'ajty, o'ctay ajcxy, ca' ajcxy paty je jugy'ajtin huinixiibi.

⁵⁹ Jadu'n Jesús ymiydacy jim ma je judiojäy ajcxy ñaymujctac jim Capernaum co anajty jim yaj'ixpicy.

Mayjäy ca' mijotcuje'ajty Jesús y'ayuc

⁶⁰ Co ajcxy Jesús y'ayuc midodaayi, nigujc-huäcxy je huidibi anajty xpijcp ma Jesús. Chi ajcxy capxpizimy, e jadu'n ajcxy ymina'ñ:

—Ooy chachchipity je Jesús y'ayuc. Ca' huaad ji pin huinjihuiday.

⁶¹ Com Jesús ñejhuiyb nej ajcxy anajty yajtzibiy yajcapxiy, chi yminañ:

—¿Nej ca' miich ajcxy mijotcuje'aty je tzip ayuc jadu'n nej cham ajcxy ti nyajnimay?
⁶² ¿Nej xymijpidägbich ajcxy, pen m'ixpy ixypiy ajcxy co anajty nba'ttigiyich jadüg'oc jilby tzajpjoty ma ndzooñich? Com iich je' je jây huidibi tzoon tzajpjoty. ⁶³ Je jây ajcxy yjihui'ñ, yí' je' ñinix yajjugy'ajtp, e je jây ajcxy ninix ca' yí' ni ma chobaady, pen ca' müdity yjihui'ñ. Co miich ajcxy mgöbigipy yí ayuc tiibi ngapxyich, huin'it ajcxy mbaadipy Dios yjihui'ñ (je Espíritu Santo), etz mbaadipy ajcxy jugy'ajtin huidibi ca' tücci'yí ycíxy ytigooy, oy mja'o'ccixy.
⁶⁴ Per nigujc-huächy ma miich ajcxy pinjaty ca' mibicy iich n'ayuc.

Com Jesús ñejhuiyb anajty jayipni pinjaty ca' ymibigyí y'ayuc, etz pinjaty anajty cïyegaanip ma ymidzip. ⁶⁵ Chi Jesús yjacminañ:

—Paady ycixpi jayipj ti nmína'ñich, co ca' ni pin jëbi iich xymijpidägy, pen ca' Dios Teedy jayipj yhuinma'ñ ymöyí co cöbiga'ñ ymöyí co cöbiga'ñ iich n'ayuc.

⁶⁶ Huin'it mayjây ajcxy, je huidibi anajty ixpijcp ma Jesús, chi ajcxy huinhuäctut ixmajtzní ajcxy Jesús. Ca' ajcxy y'ocjacpanicxni. ⁶⁷ Chi jada' Jesús nimay je nimajmetz discípulos ajcxy:

—¿Nej nañ xy'ixmadzaambich miich ajcxyi?

⁶⁸ Chi y'adzooy Simón Pedro:

—Huindzin, ca' jac ni pin iich ajcxy jëbi huaad nmijpidägyich, com miich tügpajc müd je ayuc huidibi xyajni'ixiyich ajcxy nej jëbi huaad iich ajcxy nbaadipy jugy'ajtin huidibi ca' ycixipy ytigoyipy tücci'yí. ⁶⁹ Iich ajcxy nmibijcypich e nnejhuiybich co miich je' je jây huidibi tzoon ma Dios huidibi huädz yhuinma'ñ ymüd.

⁷⁰ Chi Jesús yminañ:

—Miich ajcxy je' ti nhuin'ixiyich nimajmetzpi, e nidügti miich ajcxy mujcu' huinma'ñ mmüidity.

⁷¹ Je Judas Iscariote, Simón ymang, anajty ytiijpy. Com je' je' anajty cïyegam Jesús ma ymidzip, oy je' anajty yjajëjity nidüg ma je nimajmetzpi.

7

Jesús y'uch ajcxy nañ ca' anajty jaty mijpidaaci Jesús y'ayuc

¹ Co jadu'n ytundaayi yjajtaayi, jim anajty Jesús yhuidity Galilea naaxjot, ca' anajty ñicxa'ñ jim Judea naaxjot, co anajty yí judíoäy ajcxy huidibi midzip'ajtp yaj'öga'ñyí. ² Tim huingon anajty je judíoäy yxií, hue' anajty ajcxy yxiigoyäxy Tabernáculo xii. ³ Chi Jesús ñimaayi y'amigüg y'uch yëdjicpi:

—Tzon müch ya, nicx jim Judea naaxjot nayguëxigii mayjâyjoty. ⁴ Com huenpinity huidibi nayguëxigaanip mayjâyjoty, ca' ajcxy naygoyüchyí. Mdunipy miich mijhuinma'ñ xiioty, jigix je mayjây xycömayipy.

⁵ Ni Jesús y'amigüg ajcxy ca' anajty yjaty ymijpidägyí y'ayuc. ⁶ Paady Jesús y'adzooy:

—Iich nxii ndiempo ca'ni paty mina ndigihua'ñich jim Jerusalén jadu'n nej je Mesías. Janch miich ajcxy oytimyminaajty jëbi mnyguëxigixy ma je mayjây ajcxy. ⁷ Ca' huaad jëbi miich ajcxy, naaxhuiñjây ajcxy, xymidziptzoñ. Janch iich xymidzip'ajtpich ajcxy yí', je' co ngapxpídzimiyich yí yjibic-huinma'ñ huidibi ajcxy ytumyib. ⁸ Nicx miich ajcxy jim ma xii yjadyyí. Iich ca' ñnicxa'ñich cham, com ca'ni iich ndiempo yhuaad'aty mina ndigihuibych jim Jerusalén jadu'n nej je Mesías.

⁹ Jadu'ñydi jëda'ajty yminañ, chi yhui'müy jim Galilea.

Jesús ñicxy jim Jerusalén xiioty

¹⁰ Co Jesús y'amigügtijc ajcxy jayipj ñicxtay xii'ajtpi jim Jerusalén, chi Jesús nicxy nañ jadu'n ayüch ameech ma anajty xii yjadyí. ¹¹ Xiioty je judíoäy ooy ajcxy ja'ixtay Jesús, e chi ajcxy yminañ:

—¿Ma jada' je Jesús?

¹² Ma je mayjây ajcxy may anajty ajcxy tzachnigapxcixy tzachnimiydaaccixy Jesús. Nijëjity anajty yminaangixy: “Tüg yëdjic oyjáybi yí”; e nañ nijëjity yminaangixy: “Ca'p yí' y'oyjáyity, nigo jây tzachhuin'ññ.”

¹³ E ni pin anajty ca' capxpídzimiy mayjâyjoty co y'oyjáyity anajty Jesús, müd co anajty ajcxy je judío ixpijtiyc ajcxy tzachtzigiyigixy.

¹⁴ E mxiixiioty Jesús ñicxy jim ma Dios ytiijc, chi jim ytiigüy yaj'ixpijcpí. ¹⁵ Je judío y'ixpijtiyc tzachmaañhuindixcixy anajty je Jesús, chachminaangixy anajty:

—¿Nej jada' tiijy jada chach'ixpijtiyc? e ca' ni ma ti y'escuel'aty.

¹⁶ Chi Jesús y'adzooy:

—Jada ixpijcin ca' iich jada një'adyí. Yí' jada yje' je huidibi xyquejxich ya naaxhuiñ. ¹⁷ E pen ji pinjaty cuydunaani yí' ytiy'ajt je huidibi xyquejxich, huinjihuñhuipy yí' jada ixpijcin, pen janch Dios yí' ytiy'ajt, o pen iich yí' ngi'm ayuc huidibi ngapxypich. ¹⁸ Je jây

huidibi yci'm'ayuc yci'mdiy'ajt müd yaj'ixpicy, ci'm je' ñaygömaya'ñiyi. Janch pinjaty tzojcp co ycomayiyb je' yhuindzin huidibi ti yquexyii, tiydudägy je', ca' je' y'aniijity.

¹⁹ Janch co Moisés müich ajcxy xymoy Dios ytiy'ajt. E ni tüg müich ajcxy mgacuydungixy je tiy'ajt. ¿Ti ycixpi co müich ajcxy xyaj'öga'nich?

²⁰ Chi je jäy ajcxy y'adzooy:

—Mujcu' müich müd ma mjot mhuinma'ñ. ¿Pin müich yam xyaj'ögam?

²¹ Chi je' ajcxy nimay:

—Müid tügpaic mijhuinma'ñ tiibi nduñich sábado xii, yi' müich ajcxy mij mdzachjihuiyb mdzachhuinmaayb. ²² Moisés müich ajcxy xyajnajtz'ane'miyy je cötujcin co ajcxy m'ung mdiy'ajttiyyigixy (oy je' ca' yajtzondac, müich janchtiy ajcxy mmij'ap mmijteedy Abraham yajtzondac), e paady ycixpi müich ajcxy m'ung mdiy'ajttiyyigixy oy yjapocxxiidumity. ²³ E chi jada' ca'ydí müich ajcxy Moisés ytiy'ajt mnixiici myajxiici, paady ajcxy m'ung mdiy'ajttiyyigixy oy sábado xiijoty. ¿Ti müich ajcxy co xymijotma'tcixich co tüg jäy ti nyajtzögyich sábado xiijoty? ²⁴ Ca' m'ix'ijxcixy mba'ijxcixy mmigüg müid anii. Yajciyöyi yajtecyöyi müich ajcxy jäy ypocy müid tiy'ajt.

Ooy ajcxy tzachhuinmay je jäy, peni Jesús je' je' anajty je Cristo

²⁵ Chi ajcxy nijëjity Jerusalénjäy yminañ:

—¿Nej ca' jada jada' yjëjity je huidibi ajcxy yjajaj'ögamyi? ²⁶ Oc'ix ajcxy, ta ycapxy ymiydägy iixna' que'xna', e ca' ajcxy huam nimäy. ¿Nej ti jada ajcxy iixcajpcixy yajxon tungmüdpí ajcxy co jada yjëjity je Mesías? ²⁷ Hich ajt nnejhuiyim ma jada yëdydj choon. Per je Cristo co anajty je' ymiñ, ni pin je' canejhuihuipy ma je' anajty choñ ma ycgajpity.

²⁸ Co Jesús jadu'n midooy, co anajty yaj'ixpicy ma Dios ytiyc, huin'it Jesús mic yminañ:

—Mnejhuiyb müich ajcxy pin ich, e ma ndzooñich. Per ca'p ich ti nmiñich ya naaxhuñ müid ich ngi'ndzojcin. Yi huidibi ich ti xyquexyich, tiydudägy yi' ytuñ, e ca' müich ajcxy yi' m'ixy'ajtigixy. ²⁹ Hich janchtiy n'ixy'ajtypich je'. Je' co jim ndzooñich ma je', e je' ich xyquejxich.

³⁰ Huin'it ajcxy jamadzaañ, per ca' ni pin cñixajiy, com ca'ni anajty paady je xii je tiempo mina ñaygiyegüyb ma ymüdzip ajcxy. ³¹ Per mayjäy ooy mibijcy je Jesús y'ayuc, e yminañ ajcxy:

—Co anajty je Cristo ymiñ, ca' jada' ngi mijhuinma'ñ tuna'ñ ca'ydí jadayaabi yëdydj.

Je teedy mjtungmüdpí yquejx ajcxy soldadotijc huen majtzcixy Jesús

³² Co je fariseojäy ajcxy ayuc midooy co jäy chachminaangixy jadu'n co je Jesús je' je' je Cristo, chi ajcxy quejxy tungmüdpí huen Jesús yajmach. ³³ Paady Jesús yminañ:

—Hich jac-huäcxijpich hueeni ma müich ajcxy, chi nnicxa'ñich jadüg'oc jiiyby tzejpjoty ma huidibi xyquejxich. ³⁴ Xy'ixtähuiwich müich ajcxy, e ca' ich müich ajcxy xypaadipy. Ma anajty ich nnicxyich, müich ajcxy ca' jaydëbi jiiyby nnicxcixy.

³⁵ Huin'it je judiojäy ixcipytiyc acjëyi ajcxy ñay'amidoohui:

—¿Ma jada jada' y'ocnicxa'ñ, e nixcy ich ajt ngapaatim? ¿Nej nixciib jada' ma je judiojäy ajcxy huidibi yajpaatcixy yxii yaa ma yi griegojäy ajcxy, e yaj'ixpigaangixy yi griegos ajcxyi?

³⁶ ¿Nej jada' yajhuimbizimiy? co yminañ: “Xy'ixtähuiwich müich ajcxy, e ca' xypaadibich, e ma anajty ich nyajpaady, ca' müich ajcxy jaydëbi jiiyby nnicxcixy.”

Je nii huidibi jugy'ajt yejcp huidibi ca' ycixy ytigoy

³⁷ Co je mijxii ycodicxni, chi Jesús ytinay'ahuüy, chi mic yminañ:

—Pen ji pinjaty tiy'ajt nejhuihua'ñ jadu'n nej ixyipy jäy ytidziyii tzocy yi nii, huen xyñimiñich, etz nmöhuibich tiy'ajt. ³⁸ Je jäy ajcxy pinjaty xymibijpcich xymijpidaacpich, ytinipy ajcxy jadu'n nej Dios ñecy ymina'ñ ma jadu'n yjaybetyity: “Ycapxypidzimipy je' ajcxy Dios ytiy'ajt, etz mayjäy jotcujc'ajtin etz jugy'ajtin pada'ñ huinixii, ytimyñipaaty jadu'n nej nii ypidzimiy janch com ma tüg niigop.”

³⁹ Je' anajty jadu'n Jesús ytiyyp pinjaty je' anajty mibijcip, je' anajty ajcxy adigihuaanip jottigihuaanip je Espíritu Santo. Ca' ni anajty je Espíritu ymini ma je discípulos ajcxy com ca'ni anajty Jesús yhuimbityñi tzejpjoty.

Jäy ajcxy ca' ñay'ayuc-huinjihuiyi müd Jesús ycixpi

⁴⁰ Je mayjäy ajcxy huidibi anajty ti midooy nej Jesús anajty ti ymina'ñ, nidüg nimetz yminañ:

—Jadaabi je' je' tiydudägyipi jäy huidibi Dios y'ayuc najtzcapxiiyip.

⁴¹ Jacjadyii yminañ ajcxy:

—Je' yi' je Mesías.

Per nijëjity ajcxy huidibi ca' ymibijccixy chachminaangixy:

—Ca' jim Galilea naaxjot chona'ñ je Mesías. ⁴² Com jadu'n yjaybetyity ma Dios ñecy co je Mesías jim chona'ñ ma David y'ap y'oc, jim ma je cajp huidi xiijip Belén ma David ycgajpity.

⁴³ Je mayjāy ca' anajty ajcxy ñay'ayuc-huinjihuiygixy müd Jesús ycixpi. ⁴⁴ Nijējity anajty ajcxy ytimymadzamy Jesús, per ca' ni pin ymajtzi.

Judío xpicytjic ca' ajcxy mijpidacy Jesús

⁴⁵ Chi ajcxy policías huidibi tumb ma tzejptjic nihuimbijty ajcxy je teedy mijtungmüdpī etz je fariseojāy ajcxy, chi ajcxy ñimaayi:

—¿Nej ajcxy co ca' ti mmajtzcixy je Jesús?

⁴⁶ Chi ajcxy je' y'adzooy:

—Nica minaa xii tūg yēdyjc jadu'n ti ymiydāgy jadu'n nej yijibi yēdyjc.

⁴⁷ Chi je fariseojāy ajcxy yminañ:

—¿Nej nañ ti müch ajcxy myajhuin'ñigixy? ⁴⁸ Ca' nminaanim ti ajcxy teedy mijtungmüdpī o fariseojāy ajcxy mibijccixy Jesús. ⁴⁹ Je mayjāy huidibi mijpidaaci Jesús y'ayuc, ca' ajcxy y'ixpicity ma Dios yčotujcin. Dios y' ajcxy tzaachytuniñ.

⁵⁰ Nidūgti ajcxy je' anajty je Nicodemo huidibi oga'n'aty ni'oy Jesús coodz, je' ymīgūgtijc jadu'n nimay:

⁵¹ —Jadu'n iich ajt ngōtujcin xy'ane'mim co ca' huaad ndzaachytuunim pinjāy, pen ca' p jayjip n'ixyōyim nbayōyim ti anajty ti tuñ.

⁵² Chi ajcxy ymīgūgtijc y'adzohuimbijty oyñinej:

—¿Nej müch nañ jadu'n galileojāy? Ixta' yajxon ma Dios ñecy, com jibi mnejhuihuipy co jim Galilea ca' jim chona'ñ pinjāy huidibi Dios y'ayucnajtzcaxiyip.

⁵³ Chi ajcxy ñicxtay nidūg nidūg ma yjin ydijc.

8

¹ Chi Jesús ypa'ttigiy ma je cōgop huidibi xiijip Olivos. ² Com jabom jopyñi Jesús yquidacy jadūg'oc ma Dios ytiyc. Chi mayjāy ñimiñi. Chi y'ixtacy, e chi ytigiy yaj'ixpijcpī. ³ Je jāy ajcxy huidibi Dios yčotujcin yaj'ixpijcp etz je fariseojāy ajcxy müdmüñ tūg tōxyjāy ma Jesús huidibi anajty ti ytundigooy müd huingbi yēdyjc. Chi ajcxy pidacy cujc'amy ma je mayjāy. ⁴ Chi ajcxy nimay Jesús:

—Huindzin, jadayaabi tōxyjāy huingbi yēdyjc müd ti ytundigoy. ⁵ Moisés ytiy'ajt iich ajcxy xyñajtz'ane'miy jecy'ajty co yajtzaagōgādzipy jada jadu'mbi tōxyjāy. ¿Nej müch m'ocminambi?

⁶ Jadu'n ajcxy nimay co anajty ajcxy oc-huinma'ñ'ixa'ñ. Hue' anajty ajcxy ixtaayb nej jēbi huaad yajpocycāy Jesús. Chi Jesús yhuindacy, chi jada' ytigiy jaaybi müd yčihuāx naaxcixy.

⁷ Com je' anajty ajcxy chachyaj'amidooyb, chi Jesús ytinayigy. Chi ajcxy nimay:

—Pin jāy ji ma müch ajcxy ca' ti pocy müdity, huen y' jayjip tzaagāch jada tōxyjāy.

⁸ Chi Jesús yhuindacy jadūg'oc. Chi ytigiy jaaybi jadūg'oc naaxcixy. ⁹ Co ajcxy jadu'n ayuc yajhuinjihuiydaayi, chi ajcxy ooy chōyduñ, com yjihuiy ajcxy ypocy. Chi ajcxy yjihuačtay. Chi je mijjādyjc ajcxy ñaybattzondayi. Jesús yhuimiy nimetz müd je tōxyjāy huidibi jim anajty tinaayb huington. ¹⁰ Chi Jesús yhuāccugiy jadūg'oc nimay je tōxyjāy jada':

—¿Ma ajcxy je jāy? ¿Ca' ni pin ti xychaachytuñ müd mbocy ycixpi?

¹¹ Chi je tōxyjāy y'adzooy:

—Huindzin, ca' ni pin.

Chi Jesús yminañ:

—Ni iich müch ngatzaachytunipy müd mbocy ycixpi. Nicx, e ca' m'ocjacpocytuunip.

Jesús jadu'n nipaady nej tūg jin huidibi tūcxpi

¹² Chi jadūg'oc Jesús yjactigiy miydacp yminañ:

—Iich je tiy'ajt nmüd ya ma naaxhuiñjāy, jadu'n iich nipaady nej tūg jin huidibi tūcxp ma jāy ajcxy. Pinjāy xymijpidaacpich ymüd tiy'ajt nej jēbi huaad tudāgy chināhuipy, jadu'n nipaady nej jihuiy ytūyōy ma jin ytičxin.

¹³ Chi je fariseojāy ajcxy nimay Jesús:

—Müch ci'm nayñidiy'ajtip co müch je' je Cristo, e ca' ndiy'ajt chobaady.

¹⁴ Chi Jesús y'adzooy:

—Janch co iich ci'm nayñidiy'ajt'adyijich co iich je' je Cristo. E iich ndiy'ajt janch y'i. Com nnejhuiybich ma ti ndzooñich, e ma nnicxa'ñich. E müch ajcxy ca' mnejhuiygixy ma ndzooñich, e ma nnicxa'ñich. ¹⁵ Müch ajcxy mmīgūg mbocy'ixyp müd mgi'mhuinma'ñ. Ca' ni pin nbocy'ixyich müd ngi'mhuinma'ñich. ¹⁶ Pen iich anajty nyajcīyōybich nyajte-cyōybich jāy ypocy, tīydudāgy anajty jadu'n nduñich. Com iich ca' nyajpaadyich naydūg. Je' xymid'ijtpich je Dios Teedy huidibi ti xyquexyich. ¹⁷ Com cojaay jadu'n y'ity ma müch ajcxy ngōtujcin ñecy: "Pen nimetz jāy nigodiy'ajt'aty huentijity, tzoobatp ajcxy y'ayuc." ¹⁸ Iich ci'm ñayñidiy'ajt'adyijich co ndzooñich tzejpjoty, etz nDeedyich nañ jadu'n xyñidiy'ajt'ajtpich, co je' ya ti xyquexyich.

¹⁹ Chi ajcxy y'amidooy:

—¿Ma miich mdeedy vajpaady?

Chi Jesús y'adzooy:

—Com co ca' iich miich ajcxy xy'ijxcapy co iich je' je Cristo, nañ ca' ajcxy m'ixy'adyii iich nDeedy. Co ixypy ajcxy xy'ijxcapyich, nañ jaydëbi ixypy ajcxy nejhuüy pin iich nDeedy'ajtyp.

²⁰ Jim jadu'n Jesús ycapxy ymiydacy ma je meef'i'jtac, co anajty yjáy yaj'ixpicy ma Dios ytiyc. E ca' ni pin ymajtzi. Com ca'ni anajty yxii yhora anajty paadyñi mina ñaygiyegüyb ma ymidzip.

Jesús ñimay ymügütiyc co ca' huaad ñicxy ma je' anajty ñicxy

²¹ Chi Jesús yjacnimaayi ajcxy:

—ñich nnicxaanip iich, miich ajcxy xy'ixtähuibich. Miid ajcxy mbocy ycixpi m'ögaangixy, com ma nnicxa'ñich ca' huaad miich ajcxy jëbi nnicxcixy miid mbocy ycixpi.

²² Huin'it je judíoäy ajcxy ac jëyi ñayñimaayi:

—¿Nej nicxy jada' ci'm ñayyaj'öga'ñiyi? Com jadu'n ymina'ñ co ma yi' ñicxy, ca' huaad iich ajt jëbi nnicxim.

²³ E Jesús nigi nimay'idich anajty:

—Miich ajcxy ya naaxhuiñ mmiidity mdiy'ajtcp. ñich tzajpjoty nmiidityich ndiy'ajtcpich. Miich ajcxy naaxhuiñjáy ajcxy ytiy'ajt nmijpidaacipy. ñich ca' nmijpidägyich naaxhuiñjáy ytiy'ajt. ²⁴ ñich miich ajcxy jadu'n nnimaayb co m'ögam miich ajcxy, e ca' ajcxy Dios mbocy xyhuinmeecxip. Copicy ajcxy m'ögipy, e ca' Dios mbocy ajcxy xyhuinmeecxip, pen ca' xymibigängixyich co iich je' je huidibi jëbi mbocy ajcxy xyhuinmeecxip.

²⁵ Chi ajcxy nimay Jesús:

—¿E miich, pin miich?

Chi Jesús y'adzooy:

—Ti ajcxy nyajnamaagyixy pin iich, co oga'n ndigiyyich jáy yaj'ixpijcp. Cham jadüg'oc nyajnamaagyixy. ²⁶ May ooy tijaty ayuc nyajnimähuaangixy nej ti mdundigoogyixy ma Dios ytiy'ajt. Cham ca' ajcxy nyajnimaydähuipy. Je huidibi ti xyquexyich ya naaxhuiñ je' tüg'óciy tiy'ajt miid. E ngapxidzimych je ayuc je tiy'ajt jëyi huidibi ti nmidooyich ma je'.

²⁷ Je jáy ca' ajcxy huinjihuüy co Dios Teedy anajty Jesús ñigapxyp. ²⁸ Paady Jesús nimay ajcxy:

—Co anajty miich ajcxy ti xyajcrudzpetyich, iich je jáy huidibi tzoön tzajpjoty, huin'it miich ajcxy mnejhuñhuip co iich je' je Cristo. E co iich ca' ngi'mhuinma'ñ nduñich. Yi' iich ya nmiydacypich huidibi Dios Teedy ti xyaj'ane'myich. ²⁹ Je Dios Teedy huidibi ti xyquexyich, yi' iich miid n'ityich. Ca' iich yi' xy'ixmachich. Com co iich njatyitmytummybich jabom jabom huidibi yi' chojcp.

³⁰ Co Jesús jadu'n yminañ, chi mayjáy ooy ymibijcy.

Jáy huidibi mibijcp Jesús ycuychinaacyipy yi' ytiy'ajt

³¹ Chi Jesús nimay je judíoäy ajcxy huidijaty anajty ti ymibicy:

—Pen mibijc ajcxy cixyjot huinjot tüg'óciy iich n'ayuc, e ca' m'ijxmadzipy ajcxy iich n'ayuc, huin'it iich miich ajcxy jëbi njáy'adyii. ³² Huin'it jëbi ajcxy mnejhuñhuipy Dios ytiy'ajt. E. Dios ytiy'ajt xyñihuängixip ma je mibic-huinma'ñ ooy xy'ane'mgixy.

³³ Chi ajcxy y'adzooy:

—Abraham iich ajcxy nmij'ap nmijteedy'ajtyp. Ca' iich ajcxy huaad ni pinjáy xy-jac'ane'my. ¿Nej co miich jadu'n mina'ñ: “Dios ajcxy xyñihua'ñip ma yi' mibic-huinma'ñ xy'ane'mgixy”?

³⁴ Chi Jesús y'adzooy:

—Janch janch iich miich ajcxy jadu'n nimaagyixy co tüg'óciy pinjaty pocy ytundiib, jibicp yi' ane'mip. Tim jadu'n nipaady nej tüg tumbi huidi codoogü y ijtp, yi' yhuindzin jatytim'yane'mip. ³⁵ Yi' tumbi huidibi codoogü ijtp, ca' yhui'ma'ñ ma je jáy ytiyc huinixii. Yi' jáy y'ung janchtiy hui'mam huinixii ma yteedy ytiyc. ³⁶ Pen Dios y'ung miich ajcxy xyajpidzixp ma je jibicpi xy'ane'mgixy, janch huinixii m'idaangixy, ca' ma ti jibicpi xy'oc'ane'mgixnipy. Tim jadu'n nej Dios y'ung y'ity, ca' ti jibicpi y'ane'myii. ³⁷ Nejhuñyich co miich ajcxy Abraham mmi'ap'adyii nmijteedy'adyii. Per miich ajcxy chachyaj'ögaambich. Je' co ca' mijpidaaccixy iich n'ayuc huidibi njayajnamaagyixyp. ³⁸ ñich miich ajcxy nyajmüdmidyacyp tiibi n'ixyich huidibi ndeedyich ytumyb. E miich ajcxy yi' mdumyb nej m'ap mdeedy ti xyajnamaagyixy.

³⁹ Chi ajcxy y'adzooy:

—Hue' iich ajcxy nmij'ap'ajtyp nmijteedy'ajtyp je Abraham.

Chi Jesús y'adzooy:

—Pen janch ajcxy Abraham mmij'ap'adyii mmijteedy'adyii, yi' ixyipy ajcxy mdungixyp jadu'n nej Abraham tuuñ. ⁴⁰ Janch iich miich ajcxy xychachyaj'ogäängixyich, e ti ajcxy njayajnimäy je huidibi iich ti nmidooyich ma Dios. Ca' Abraham yaj'ögy je jäy ajcxy huidijaty anajty Dios ytiy'ajt m'id, jadu'n nej miich ajcxy m'iditzaangixy. ⁴¹ Miich ajcxy jibic-huinma'ñ mdungixyp, tim jadu'n nej m'ap mdeedy jibic huinma'ñ ajcxy tuñ jecy'ajty.

Chi ajcxy Jesús adzooy:

—Ca'iich ajcxy ndigoy'ungity. Je' tügpajc iich ajcxy ndeedy'ajtyp Dios Teedy.

⁴² Chi Jesús yminañ:

—Peni Dios ixyipy ajcxy mdeedy'ajtyp, xychojcpich xymijpidaacpich ixyipy ajcxy. Com Dios ti xyquexyich ya naaxhuñ, e jilby ndzooñich ma Dios. Ca'iich ngi'mdzojcin yciyp nmiñich ya naaxhuñ. Yi' je' jadu'n tzojcp pin ti xyquexyich. ⁴³ ¿Ti co ca' miich ajcxy mhuinjhuüy iich n'ayuc? Je' co ca' ajcxy midohuaangixy iich n'ayuc. ⁴⁴ Je' miich ajcxy mdeedy'ajtyp je mujcu'. M'id mgi'mdzojcin mguydungixy je mujcu' chójcin. Je mujcu' yaj'öctiib y'i' jäy maabi naaxhuñybi chondägy. Je mujcu' ca' je' izaani Dios ytiy'ajt. Ca' ni ti tiy'ajt yajpaady ma je', com je mujcu' indaacy je', chi ci'm ooy nijot y'idich. Je' ooy indacy, e je' oga'n anii yajtzondac. ⁴⁵ Com miich ajcxy mujcu' yhuinma'ñ m'id, paady miich ajcxy ca' xymibijci xymijpidaaci n'ayucich co iich tiy'ajt njamiydägy. ⁴⁶ Ni pin miich ajcxy xycayajpocycähuipy. Peni tiy'ajt iich miich ajcxy nyajnimaaayb, ¿ti co ca' mmijpidaaccixy iich n'ayuc? ⁴⁷ Je jäy ajcxy huidibi yajpatp ma Dios, y'amido'ijtyp ajcxy Dios y'ayuc. Paady miich ajcxy ca' m'amido'ijtcixy Dios y'ayuc, com ca' ajcxy Dios mDeedy'ajtigixy.

Jesús jiiyim anajty yjagy'aty ca'ydí Abraham

⁴⁸ Chi je judío ixpicytije ajcxy y'adzooy:

—Ti iich ajcxy yajxon nmína'ñ co miich mgogajpity jim Samaria, e mujcu' miich m'id ma mjot mhuinma'ñ.

⁴⁹ Chi Jesús y'adzooy:

—Ca' iich mujcu' nmidity ma njot nhuinma'ñ, com nyajmij'ajtypich nDeedy, e miich ajcxy xy'ixtipich. ⁵⁰ Iich ca' ci'm naygömayiijich. Dios Teedy iich xycömaaayb, com yi' je' huidibi ixyöyp payöyp jäy ajcxy ypocy. ⁵¹ Janch janch iich miich ajcxy nimaaygixy co ji nijëjity jäy huidibi iich n'ayuc cuydumb, e ca' yi' ajcxy yjagy'ajtin yciixipy ytigoyipy tücci'yi co y'óccixipy.

⁵² Chi je judío ixpicytije ajcxy y'adzooy:

—Cham iich ajcxy janchtiy ti nnejhuüyich tiydudägy co miich mujcu' m'idity ma mjot mhuinma'ñ. Abraham o'c je', nañ jadu'n o'c ajcxy je huidibi anajty Dios ytiy'ajt capx-huäcxip, e miich mmina'ñ co pen ji pinjaty miich m'ayuc xymibijcip xymijpidaacip, ca' je' y'ögipy. ⁵³ ¿Nej mjacm'id miich mic'ajt, ca'ydí Abraham, iich ajt nmij'ap nmijteedy huidibi o'ci? ¿Nej mjacm'id miich mic'ajt, ca'ydí ajcxy huidibi Dios y'ayucnajtzcaxi, huidibi ajcxy o'ci? ¿Pin miich mdimnaydijiyi?

⁵⁴ Chi Jesús y'adzooy:

—Pen iich nnaygömayibich ci'm, ca' n'ayucich chobaadipy. Iich nDeedy yi' xycömayipich, je huidibi miich ajcxy mdijpy co ajcxy mDios'adyii. ⁵⁵ Per miich ajcxy ca' Dios m'ixy'adyii. Iich janchtiy n'ixy'ajtypich Dios. E co ixyipy nmína'ñich co ca' iich Dios n'ixy'adyii, indaacy ixyipy, jadu'n nej miich ajcxy m'indaaccixy. Janch iich n'ixyich Dios, e nguy-dumyibich yi' y'ayuc. ⁵⁶ Je Abraham, miich ajcxy mmij'ap mmijteedy, jotcuje ooy ñayjihuüy co anajty ixa'ñ iich nxi' ndiempo ya naaxhuñ. E co ijxy co iich nmiñich, chi ooy yjotcugiiy.

⁵⁷ Chi je judío ixpicytije ajcxy nimay Jesús:

—Ni mgamidity huixchigui'px majc jimijt, e ¿mmina'ñ co m'ijxy Abraham? (Ca' m'ixy'ajti je Abraham, naxy tüg mil jimijt maabi je' y'o'cni.)

⁵⁸ Chi Jesús y'adzooy:

—Janch janch iich miich ajcxy jadu'n nimäy co ji anajty iich co ca'ni anajty Abraham yma'xung'aty.

⁵⁹ Chi ajcxy tzaa conigy tzaagäzda'ñ anajty ajcxy. Chi Jesús yhuingoyüch, e ypidzimy ma Dios ytiyc.

9

Jesús yajtzooc tüg huintzpi

¹ Hue' anajty Jesús huidijtp co ijxy tüg huintz, jadu'n anajty huiintz ti yma'xung'aty. ² Chi ydiscipulos ajcxy y'amidoohui:

—Huindzin, ¿pin pocy ytuun, jada huintzpi o ytaj yteedy, co huintz yma'xung'aty?

³ Chi Jesús y'adzooy:

—Ca' yi' ypocytuuñ, ni ytaj yteedy, hue' janchtiy paady yciyp jadu'n yajty, jigix Dios ymic'ajt ñiguëxigity ma yi'. ⁴ Copicy njactúunibich yi' ytung huidibi ti xyquexyich ya naaxhuñ. Miinip je xii tiempo ma ca' pin Dios y'ayuc tunaani. Jadu'n nej jihuüy ixyipy je

xiiṁbi ti ñaxy etz je coodzpɪ ti ymiñ. ⁵ Jadu'n nej n'ityich ya naaxhuiñ nm̃idich Dios yti'y'ajt, jadu'n iich nipaady nej tũg jiin huidibi codiicxp yi naaxhuiñyã.

⁶ Co Jesús jadu'n ym̃inanday, chi nidzujy naax, chi mo'ntz yaj'oyy m̃id chujnii, chi jada' yajjaaxi je jã yhuin m̃id je mo'ntz. ⁷ Chi nimay jada':

—Nixc quejtzpuj yi mo'ntz jim ma yi Siloé ñi y'abojtzĩgity —je ayuc Siloé jadu'n yhuimbizim̃y: quexyõybi.

Chi je jã huintzpi ñicxy jim, chi oy quejtz puji je mo'ntz, chi oy huimbity ti anajty yhuindicxĩg. ⁸ Je ym̃ijiin ym̃idijc ajcxy etz tũg'õciy huidijaty anajty ajcxy ti ixy je huintzpi co jabom jabom iñã limosna yajmucy, chi ajcxy ñay'amidoohui miñ xyipy:

—¿Nej ca' jada yjẽjty je huintzpi huidibi anajty jabom jabom limosna yajmujcpi?

⁹ Nijẽjty ajcxy ym̃inañ:

—Je' yi'.

E jacjadyii ajcxy ym̃inañ:

—Huingbi yi', nigoob jadu'n yquẽxĩg nej je'.

E je' ym̃inañ ci'm:

—Iich jẽdu'n huidibi anajty huintz.

¹⁰ Jadu'n anajty ajcxy tzach'amidooy:

—¿Nej yi m̃huin ti ñay'ahuãcxyii?

¹¹ E je' anajty y'adzooy:

—Yi yẽdijc huidibi ajcxy ytiyyp Jesús, yi' mo'ntz yaj'oyy xyajjaaxich nhuiin, e chi xyñimaayich: “Nixc quejtzpuj ma yi Siloé ñi.” Chi nnicxyich, e oy nguejtzpujyich, e chi nhuindicxi'cyich.

¹² Chi ajcxy je' nimay:

—¿Ma je' je yẽdijc?

Chi je huintzpi y'adzooy:

—Ca' nnejhuĩyich.

Fariseojã ty'ajt pijcy nej je huintzpi anajty ti chõg

¹³ Chi ajcxy yajnicxy ma fariseojã ajcxy yhuinduu, je huidibi anajty huintz yajpatp.

¹⁴ Hue' anajty tũg sábado xii (judiojã ajcxy amayxii) co Jesús mo'ntz yaj'oyy, e yajhuindicxĩg je huintzpi. ¹⁵ Chi je fariseojã ajcxy jadũg'oc yajty nej anajty je jã ti yhuindicxĩg. Chi je jã y'adzooy:

—Mo'ntz ti pidãg ma iich nhuiin, chi iich ti nguejtzpuj, e cham n'ijxnibich.

¹⁶ Nijẽjty fariseojã ajcxy ym̃inañ:

—Yi yẽdijc huidibi jada jadu'n ti tuñ, ca' yi' Dios yti'y'ajt m̃idity, com ca' yi' amay'aty sábado xii.

Chi ajcxy jacjadyii y'adzooy:

—¿Nej tijy jada mijhuinma'ñ octuñ, pen hue' yi' pocyjã?

Ca' ajcxy nay'ayuc-huinihuĩyigixy. ¹⁷ Chi ajcxy jadũg'oc nimay je jã huidibi anajty ti y'ijxĩg:

—E miich, ¿nej m'ocm̃inambi? ¿Pin jã yi tiibi xyajhuindicxĩg?

Chi je jã y'adzooy:

—Tũg jã huidibi Dios y'ayuc etz ym̃ic'ajt m̃id.

¹⁸ Chi je judio icpicytjic ajcxy ca' anajty tim mibigaangixy co je yẽdijc anajty huintz yajpaady, e co anajty ti yhuindicxĩg, ixti cooni ajcxy ytaj yteedy mijhuoohui. ¹⁹ Chi ajcxy amidoohui ytaj yteedy:

—¿Nej je' jada miich ajcxy m'ung huidibi huintz ma'xung'ajti? ¿Nej jada ti yhuindicxĩg?

²⁰ Chi je' ytaj yteedy ajcxy y'adzooy:

—Iich ajcxy nnejhuĩyib co iich ajcxy yi' n'ung, e co yma'xung'ajty huintz. ²¹ Per jadu'n nej cham ti yhuindicxĩg, e pin yi' yhuin ti yajhuãcxyii, ca' iich ajcxy yi' nnejhuĩyigixy. Amidoo miich ajcxy yi' ci'm. Mij'anãciñ yi', ñigapixy yi' ci'm.

²² Jadu'n ajcxy ytaj yteedy y'adzooy, m̃id co ajcxy tzachtzĩgĩyigixy je judio icpicytjic ajcxy. Com je judio icpicytjic ajcxy ti anajty ñaygãpigixy co anajty yajpidzimaangixy ma ajcxy ñaymujtac je jã ajcxy pinjaty anajty mibijcp co Jesús anajty yjẽjty je Cristo. ²³ Paady ajcxy ytaj yteedy ym̃inañ:

—Mij'anãciñ yi', amidoogix miich ajcxy yi' ci'm.

²⁴ Chi ajcxy y'amidooy mimejtz'oc je yẽdijc huidibi anajty ti y'ijxĩg, e chi ajcxy nimay:

—Cõmay capxpat yi' Dios co ti mdzõg. Ca' mgõmay mgapxpaady je Jesús. Com iich ajcxy nejhuĩyib co yi' Jesús, tũg yi' pocytumbi. Ca' yi' Dios y'ayuc yti'y'ajt m̃idity.

²⁵ Chi je jã y'adzooy:

—Pen tũg pocytumbi yi' Jesús, ca' nejhuĩyich. Huidibi janchtiy nnejhuĩyibich, co anajty iich nhuintzity etz co cham huindicxnibich.

²⁶ Chi ajcxy y'amidooy jadüg'oc:

—¿Nej ti xytuñ? ¿Ti ti tuñ co ti xyaj'ijxici yi mhuin?

²⁷ Chi je' y'adzooy:

—Ti ajcxy nyajnimaaigy, e ca' ajcxy ti m'amido'idaangixy. ¿Nej nañ ixpigaangixy miich ajcxy ma yi'ji?

²⁸ Chi ajcxy je' oiy, nimay ajcxy jadu'n:

—Miich ixpijc ma yi', iich ajcxy n'ixpijcpich ma Moisés ytiy'ajt. ²⁹ Hich ajcxy nejhuüyb co Dios Moisés migapxy. Janch yi Jesús ca' iich ajcxy nnejhuüyigy ma yi' chooñ (ma mic'ajt ti paady).

³⁰ Chi je jäy y'adzooy:

—Ooy yi' y'oychigüñity y'oyhuinmañity co miich ajcxy ca' mnejhuüyigy ma yi' chooñ (ma mic'ajt ti paady), e ti iich yi' xyajhuindicxygich. ³¹ Yajxon yajnejhuüy co Dios ca' yi' midoohui pocyjäydic y'ayuc. Pen oy jäy iich ajt, e nguyduunim Dios ytiy'ajt, huin'it ajt Dios n'ayuc xymidoohuim. ³² Ni caminaaxi ycayajmidoy, co pinjäy tüg huintzpi ti yaj'ijxigy huidibi jadu'n ti yma'xung'aty huintz. ³³ Co ixypy je Jesús ca' jiihy chooñ ma Dios, ca' ixypy jaty nej ti tunipy.

³⁴ Huin'it ajcxy y'adzooy:

—Miich jadu'n ti mma'xung'aty pocymiid. Ca' miich huaad ti xyaj'ixpijccixyich.

E chi ajcxy yajpidzimy tibäy'tücciyi (ma ajcxy ñaymujctac etz ma Dios ytiyc).

Je jäy ajcxy huidibi ca' cöbjccixy Dios ytiy'ajt jadu'n nipaady ajcxy nej jihuüy huintzity

³⁵ Chi Jesús nejhuüy jadu'n co anajty ti yajpidzimy tibat'ücciyi ma Dios ytiyc. Co minaaaybaati chi nimay:

—¿Nej mmibijcyp mijpidaacyp miich je jäy huidibi tzoön tzajpjoty?

³⁶ Chi je' y'adzooy:

—Huindzin, nimaaygich pin je', jigix nmibicyich.

³⁷ Chi Jesús je' y'adzooy:

—M'ijxyp yi'du'n yam. Yi je' je huidibi xymiidmıydacp.

³⁸ Chi jada' huingoxtinay'ahuüy ma Jesús yhuinduu, je huintzpi huidibi Jesús ti yajtzögy nimay:

—Nmibijcypich, huindzin.

³⁹ Chi jada' Jesús yminañ:

—Hich ti nmiñ ya naaxhuiñ co n'ixyöyaanich nbayöyaanich jäy ypocy, jigix nya-jpocycähuibich pin ca' ypocymıdity, etz nyajpocyñhuädzibich pin ypocy miid. Jadu'n nej jihuüy nyajhuindziyich je jäy huidibi iixp, etz jadu'n nej jihuüy nyajhuindicxygich yi huintzpi.

⁴⁰ Chi nijëjity fariseojäy huidibi anajty jim ma Jesús ymıjc jadu'n midoy nej Jesús yminañ, chi ajcxy nimay Jesús:

—¿Nej nañ jadu'n miich mdıjy iich ajcxy ca' Dios ytiy'ajt nejhuüyich, jadu'n nej jihuüy iich ajcxy nhuintzity?

⁴¹ Chi Jesús y'adzooy:

—Co ixypy miich ajcxy janch janch ca' mnejhuüyigy Dios ytiy'ajt, ca' ixypy ti pocy ajcxy mmıdity. Per miich ajcxy minam co Dios ytiy'ajt mguyduunıy, e ca' yjanchity. Paady ajcxy mbocymıdity. Nipaaty jadu'n nej jihuüy miich ajcxy mhuintzity, e mmınaangixy co m'ijxcıxy.

10

Jesús yaj'ixpijc jihuimbit ayuc

¹ Chi Jesús jacnimay je judıo y'ixpıcytiyc, je fariseojäy ajcxy:

—Janch janch iich miich ajcxy yam jadu'n nimaaygixy co je jäy ajcxy huidibi ca' ytigihuaangixy ma borregi agaj aguü (ma je cuend'ajtpı ycuend'aty), huidibi huingduum ameech tzach tigihuaam ma yborregi agaj, je' je' je meetzpi huidibi meedzam je borregi ajcxy ameech. ² Je jäy huidibi tigihuaam ma yborregi agaj aguü, je' je' je borregi cuend'ajtpı.

³ Co je borregi cuend'ajtpı ymiñ ma agaj aguü, chi je agaj aguü cuend'ajtpı yaj'ahuäch je agaj aguü. Chi yborregi ajcxy yöcmıdoyı, chi je' migapxy xıibety xıibety, chi yajpidzimy ajcxy. ⁴ Co ajcxy yajpidzımdäy, ac je' yje', chi jayıjp ñıcxıy, e axam ajcxy ypanıcxııı, com je' co yöcmıdoyıı. ⁵ Ca' je borregi ajcxy jëbi panıcxıy tüg huingjäy. Nıgi ajcxy cöguëgy, com yöcmıdooyb ajcxy co yhuıngjäyıty.

⁶ Jadu'n Jesús mayjäy yaj'ixpijcy jihuimbit'amy, jaygue' ajcxy ca' huaad huınjıhuüy nej anajty Jesús yjaminäna'ñ.

Jesús je oybi cuend'ajtpı

⁷ Chi ajcxy Jesús jadüg'oc ñimaayi:

—Janch janch ñich miich ajcxy yam jadu'n ñimaaygixy, co je Dios nDeedy'ajtypich. Jëbi jây ajcxy paady Dios yti'yajt ma ñich, e huin'it ytiyigixipy ma Dios y'it. Jadu'n nipaady nej jihuüy ñich je agaj aguu ma borregi ajcxy ytiyigixy. ⁸ Tüg'ócüy je huindzindijc huidibi ajcxy miin jayijp ca'ni ñich anajty nmiñich, e ymīnaangixy anajty co ajcxy mīd'ajti Dios yti'yajt, jadu'n je' anajty ajcxy nej meetzpi huidibi meedzaanip Dios yjây. Per je Dios yjây ca'p je' ajcxy tuuñ cuendi, jadu'n nej je borregi ca' yōcmidoogixy je meetzpi. ⁹ Jadu'n nej je borregi ajcxy ytiyigixy ma agaj aguu, nañ tim jadu'n jây ajcxy paady Dios yti'yajt ma ñich. Je jây ajcxy huidibi ypaatyp Dios yti'yajt ma ñich, nañ ypadaamy jugy'ajtin huidibi ca' ycixipy ytiyogipy tücc'i'yi. E huidibi je' ajcxy yajmayajtyp ma yi chinaayin, nmōhuibych. Tim jadu'n nej borregi ajcxy jabom jabom ypidzimgixy ma agaj aguu nīcxcixy mīy'ojcpi, etz yhuimbijtcixy tzuu tzuu.

¹⁰ Yi meetzpi ajcxy mimb co ymeedzaangixy yaj'ōgaangixy yajhuindigoyaangixy. ñich ti nmiñich, jigix miich ajcxy mbáatcixipy jugy'ajtin mijcajee huidibi ca' tücc'i'yi ycixipy ytiyogipy.

¹¹ Chi Jesús yjacminañ:

—ñich jadu'n nipaady nej tüg borregi cuend'ajtpi oybi. Je oybi borregi cuend'ajtpi yciyeycyp yi' yjugy'ajt ma yi o'cin mīd yborregi ycixpi. ¹² Je borregi cuend'ajtpi huidibi mujuy tumb, huidibi ca' yci'mborregi cuend'aty, ni ycajēity je borregi yhuindzin, co icy caa ymiñ, chi cōguēy je borregi, e yajqueec-huäcxtây. ¹³ Com je' co mujuy ytuñ, paady cōguēy je borregi ajcxy, ca' tzocy jihuüy borregi.

¹⁴ Tim jadu'n nej je oybi borregi cuend'ajtpi ixcajtây je' yborregi, nañ tim jadu'n ñich n'ixcajptây je njâyich (huidibi xymijpidaacpich), etz je' ajcxy xy'ixy'ajtpich. ¹⁵ Tim jadu'n nej Dios Teedy xy'ixy'adyiijich, nañ tim jadu'n n'ixy'adyiijich Dios Teedy. Tim jadu'n je' nej je oybi borregi cuend'ajtpi yciyegamy yjugy'ajtin mīd yborregi ycixpi. Nañ tim jadu'n ñich ngiyegamyich njugy'ajtin mīd ñich njây ajcxy ycixpi. ¹⁶ Nmīdich jadügpicy jây, ca' ajcxy yjudiojâyity, je' ajcxy nañ jadu'n nmīd'idaamyich tūgmucy (mīd je judio jây ajcxy huidibi xymijpidaacpich). Tim jadu'n nej je cuend'ajtpi ymīd'ajtyp je' yborregi ajcxy tūgmucy. E je' ajcxy y'amīdoo'idaamy ñich n'ayuc, tim jadu'n nej borregi ajcxy yōcmidoogixy yhuindzin. Ji y'idipy tūgmucy jây (huidibi xymijpidägibich), etz tüg cuend'ajtpi (ñich jēdu'n).

¹⁷ Chi Jesús yjacminañ:

—Paady ycixp Dios Teedy ooy xychocyich xyjihuiyich, co ngiyegaamyich njugy'ajtin ma yi o'cin (mīd jây ajcxy ypocy ycixpi), etz njugypigipyich jadüg'oc. ¹⁸ Ca' ni pin xypijcibich yi njugy'ajtin, ñich yi' ci'm ngiyegamy. Nmīdich mic'ajt nej ngiyegipyich njugy'ajtin, etz nañ nmīdich mic'ajt nej njugypigipyich jadüg'oc. Jadu'n nDeedyich ti xy'ane'myich co jadu'n ndunipyich, n'ōgibich, njugypigipyich jadüg'oc.

¹⁹ Chi jadüg'oc ajcxy ca' nay'ayuc-huinjihuiy: je judiojây ajcxy mīd Jesús y'ayuc ycixpi.

²⁰ Mayjây yminañ:

—Ca'oybi yi' ymīd, locjiyb yi', ¿nej co ajt n'amīdo'ijtim y'ayuc?

²¹ E jacjadyi ajcxy ymīnaangixy:

—Jadayaabi ti'yajt etz mic'ajt ca' yajpaady ma tüg jây huidibi mujcu' ymīd. Ca' jëbi tüg mujcu' jây huintzpi yaj'ixigy.

May judiojây ajcxy ca' cōbijcy Jesús

²² Jim Jerusalén anajty xi' yjadyii, je' anajty ajcxy ñixidumyb jimijt Dios ytiyc. ²³ E hue' anajty tiich tiempo. Chi jim anajty Jesús yhuidity ma Dios ytiyc, ma je Salomón ytiyc-huinduu. ²⁴ Chi ajcxy je judio y'ixpicityic nimucy ooy Jesús, nimay ajcxy:

—¿Ixti mīnaani miich ñich ajcxy tiydudägy xyajhuinjihuihuāangixyich pen miich je' je Cristo? Yajhuinjihuiyigich ajcxy tiydudägy.

²⁵ Chi Jesús y'adzooy:

—Ti ajcxy nyajñimaaygixy, e ca' miich ajcxy ti nmībijccixy. Je mijhuinma'ñ huidibi ndumybich nmīdich nDeedy ymīc'ajt, yi' je' nidiy'ajt'ajtp co ñich je' je Cristo. ²⁶ Paady ycixp miich ajcxy ca' nmībijccixy, com ca' miich ajcxy njây'adyiijich. ²⁷ ñich njây ajcxy ymijpidaacyp ñich n'ayuc, e n'ixcajptich ajcxy je', e je' ajcxy xypanicxpich. Tim jadu'n nej je borregi ajcxy yōcmidooy je yhuindzin, jadu'n nej je huindzin ixcapy je' yborregi, e jadu'n nej yi yborregi ypanicxyii. ²⁸ ñich njây ajcxy nmooybich yi jugy'ajtin huidibi ca' tücc'i'yi ycixi'ñ ytiyogya'ñ. Ca' je' ajcxy yjugy'ajtin ytiyogipy ni camina, e ni pin ca' huaad je' ajcxy xypijcich. Je' ajcxy ci'am nmīdidyich. ²⁹ Yi Dios Teedy huidibi ñich njây ti xymōy, tūgpajc yi' ymijity, e ni pin huaad ni ti capijciy huidibi Dios Teedy ymīd ci'am. ³⁰ Dios Teedy etz ñich tū'ciy ñich ajcxy.

³¹ Chi je judiojây ajcxy jadüg'oc tzaa conīg cādzaangixy anajty ajcxy. ³² Chi Jesús je' ajcxy nimay:

—Ti ñich ooy mij oybi nduñich ma miich mhuinduu miid je nDeedyich ymic'ajt ycixpi. ¿Huidi ycixpi miich ajcxy xychaagädzangixyich?

³³ Chi je judío ixpicytijc ajcxy y'adzooy:

—Ca' nminaanim paady ñich ajcxy miich ndzaagädzangixy miid je oybi tiibi mduñ, hue' janchtiy ycixpi ndzaagädzangixy miid co ooy Dios myajjotmädy. Com miich nañ jäy, e mnayyajnaxyii Dios.

³⁴ Huin'it Jesús je' ajcxy nimay:

—Jadu'n ycojaayity ma yi judíoäy ajcxy ytiy'ajtnecy, ma Dios jadu'n ymina'ñ: “Jadu'n nej dios miich ajcxy.” ³⁵ Paady ca' ngapxtigooyich, com Dios ci'm jadu'n minamb ma ñecy, co jadu'n nej Dios je' ajcxy huidibi Dios y'ayuc cöbijcip (e ca' huaad pinjäy ymina'ñ co Dios ñecy ca' yjanchity). ³⁶ Dios ti xyajñibicyich jada tung, e xyquejxyich ya naaxhuiñ. ¿Nej co mminaanixy co ñich ngapxtigooyich co nmina'ñich co Dios xy'ung'adyiijich? ³⁷ Pen ca' nduñich nDeedyich ytung, ca' ñich ajcxy huaad n'ayuc xymibijcich. ³⁸ E pen ndumybich nDeedyich ytung, oy xyipy miich ajcxy ca' xymijpidaacich n'ayuc, jëbi ixipy mijpidägy ajcxy je mijhuinma'ñ huidibi ndumybich. E chi mnejhuñhuipy miich ajcxy, etz mmijpidägy miich ajcxy co je Dios Teedy yajpaady ma ñich, e ñich nyajpaadyich ma Dios Teedy.

³⁹ Ooy ajcxy jamadzaañ Jesús, e chi Jesús oy choni, ca' ajcxy majch.

⁴⁰ Chi Jesús ñicxy jadüg'oc jim Jordán mij nü nünaxy ma Juan yjäy yajñibejty oga'n'aty, chi jim yhu'i'mäy. ⁴¹ Mayjäy Jesús ooy ñimujci, e yminañ ajcxy:

—Je Juan el Bautista ca' jadu'n ooy mijhuinma'ñ tuuñ, per tüg'ócy yi tiy'ajt jadu'n nej nimiydactay jada Jesús, janch tiy'ajt je'.

⁴² E janch mayjäy ooy mibijcy Jesús jim ma je jimbi it.

11

Co Lázaro y'o'cy

¹ Jim Betania anajty tüg pa'mjäy, hue' anajty yxii Lázaro. Hue' je' anajty chinäy ma María etz Marta ycojajpity. ² María je' anajty huidibi je Huindzin Jesús anajty ti yajjaxy je ujtzpíjyñiñi huidibi ooy oy yxuugy, etz po'ti Jesús ytecy miid ycöhuay. Hue' je' anajty María etz Marta ymidügüex Lázaro huidibi anajty pijcip. ³ Chi Lázaro ymidügüex ajcxy ycapxyquejxy ma je Huindzin Jesús anajty yajpaady, e chi oy yajnimäyii:

—Je mmigüg huidibi ooy mdzocy, pijcip je'.

⁴ Co Jesús jadu'n midooy, chi yminañ:

—Je' ypa'm ca' yaj'öga'ñyii tüccí'yi. Je' ypa'm hue' yajñigüexigamy Dios ymic'ajt, jaydëb Dios ycomaybidzimipy, e nañ ñich nyajcömayipyich, ñich je jäy huidibi tsoon tzajpjoty.

⁵ Jesús ooy anajty tzocy jihuüy je Marta, María etz je Lázaro. ⁶ Oy jadu'n Jesús nejhuüy co anajty Lázaro ypigyii, jamejtz xii jim yjaccñinajxy ma anajty yajpaady. ⁷ Huin'it Jesús nimay ydiscipulos ajcxy:

—Tzoc jamim jim Judea naaxjot.

⁸ Chi je' ydiscipulos ajcxy y'adzooy:

—Huindzin, namni jäy ajcxy jim Judea ti xy'ocjaccögädzambi, e ¿mnicxaanip jim jadüg'oci?

⁹ Chi Jesús y'adzooy:

—Majmetz hora tüg xiimbi müdity. Pinjäy miid Dios ytiy'ajt, ca' ayo'n pada'ñ, tim jadu'n nej jihuüy yhuidity xiim, e ca' ycönepy, com co xii codücxxy jada naaxhuiñybi. ¹⁰ Pinjäy ca' müdity Dios ytiy'ajt, ca' je' nejhuüy ti anajty jadaanip, chi ayo'n pada'ñ, tim jadu'n nej jäy ycoodzhuidity, e chi ycönepy miid co ca' anajty icy ma ñicxy.

¹¹ Huin'it Jesús je' ajcxy nimay:

—Ñich ajt nmigüg Lázaro maab je', ñicxy nyajpidäga'ñich.

¹² Chi je' ydiscipulos ajcxy y'adzooy:

—Huindzin, pen maab, huaadjihuñjihuip yi', ci'm yi' ymäyhuijipy.

¹³ Je' Jesús anajty ñimiydaacyp je o'cin, e je' ajcxy tijy Jesús ñimiydaacyp je mähuui. ¹⁴ Chi Jesús yajmüdmidyacy ajcxy tyidudägy, yminañ:

—Lázaro ti je' y'o'cy. ¹⁵ E ooy njotcücidyich miid miich ajcxy ycixpi co anajty ñich ca' njimity, jigix ajcxy mmibigipy co Dios ymic'ajt nmüdidyich. Tzoc ajt jamim jim Betania.

¹⁶ Tomás huidibi anajty ajcxy yxiigoyaaxyp Dídimó, huidi ayuc-huimbídzim: cuate, nimay jacjadyiñ Jesús ydiscipulos ajcxy:

—Tzoc ajt nañ jadu'n jamim, huen jäy jim xyaj'o'cim quipxy miid Jesús.

Jesús yajjugyigipy je jäy ajcxy etz möhuipy ajcxy jugy'ajtin

¹⁷ Co ajcxy jim yja'ty, chi ajcxy paty tiy'ajt co mimidaaxxiibi anajty maabi Lázaro ñaaxtigüy.

¹⁸ Betania ca' anajty ooy yjigüegüity miid Jerusalén, jëyi jada' anajty müdity tugüg kilómetro.

¹⁹ May judíoäy ajcxy anajty ti ymiñgixy ma Marta etz María, yajjotcugihua'ñ ajcxy miid je'

ymiguëx ycixpi co anajty ti y'ögy. ²⁰ Co nejhuiy Marta co Jesús anajty jim ymiñ, chi nidzooñ oy jipcobadiy. E María jim yhui'miñ ma ytiç, tigoty anajty iñäy. ²¹ Chi Marta Jesús nimay: —Huindzin, co ixipy miich ya anajty myajpaady, ca' ixipy ti y'ögy nmiguëxich. ²² Per nnejhuiyich co miich cham jëbi Dios mmibijctzoy, e xymöhuip ti mdimdzojcp.

²³ Chi Jesús y'adzooy:

—Je mmiguëx jugypigip jadüg'oc.

²⁴ Chi Marta y'adzooy:

—Nnejhuiyich co yjugypigipy jadüg'oc co anajty naaxhuiñybi ti yhuaad'ajtni co Dios anajty yajtigadza'ñ.

²⁵ Per huin'it Jesús y'adzooy:

—Ich je' nyajjugypigipyich je jäy ajcxy, e nmöhuibych ajcxy jugy'ajtn. Pinjäy ajcxy xymibijcpich xymijpidaacpich, oy anajty yja'ögy ajcxy, jugy'ajtcixip ajcxy jadüg'oc. ²⁶ E tüg'öciy pinjaty ajcxy xymibijcp xymijpidaacpich juugyñi, ca' y'ögipy ajcxy tücciyi. ¿Nej mibijcp miich jadaaj?

²⁷ Chi Marta y'adzooy:

—Nmibijcpich, Huindzin. Nmibijcpich co miich je' je Cristo, Dios y'ung, huidibi anajty miinam ya naaxhuiñ.

Jesús taj may ooy müd Lázaro ycixpi

²⁸ Co Marta jadu'n yminañ, chi jada' oy huoy y'uch María, e yajnimay ameech:

—Je Huindzin chiiby je', e miich jiiby xymiidmíydägamb.

²⁹ Co María jadu'n midooy, chi ypidigy mic'amy, e chi ñicxy ma Jesús. ³⁰ Ca'ni anajty Jesús yja'ty cajpjoy. Jimni anajty yhuacxip ma anajty Marta ti yjipcobadiy. ³¹ Co ajcxy ixy co María ypidigy, e ypidizimy janch mic'amy, je judíoäy huidibi anajty ajcxy jim ma je tiç müd je', hue' ajcxy tijy María ñicxy yaaxpi ma anajty ti ñaaxtigiy je Lázaro. Chi ajcxy panicy.

³² Co yjädý María ma je it ma anajty Jesús, co iixpaty, chi ycojxtinaay'ahuüy ma Jesús yhuinduu, chi nimay:

—Huindzin, co ixipy miich anajty m'ocyajity, ich n'ay ca' je' ixipy y'ögy.

³³ Co Jesús ixy yäxy je María etz je judíoäy ajcxy huidibi anajty yjajmíid'ajtip, chi ooy jihuiy etz ytaj ymaay. ³⁴ Chi jada' Jesús yajtiy:

—¿Ma ajcxy Lázaro ti myajnaaxtigí?

Chi ajcxy nimay:

—Huindzin, jam iixim.

³⁵ Chi Jesús yaaxy. ³⁶ Chi judíoäy ajcxy ñayñimaayi miñ xyipy:

—Ooydim anajty tzocy je Lázaro.

³⁷ Per nijëjity ajcxy yminañ:

—Jadayaabi jäy huidibi huintzjäy yajhuindicxgy, ¿nej ca' jada' ixipy mic'ajt müdity jëbi ixipy ti yajtzögy je Lázaro, e ca'ydi ixipy ti y'ögy?

Jesús yajjugypijc Lázaro

³⁸ Chi Jesús jadüg'oc yjotmaybaty, chi ymijhuägy ma je o'cpi jut. Hue' je' anajty tüg ang müd tüg mij tzaa y'agiyducyity je jut aguü. ³⁹ Chi Jesús yminañ:

—Jügi' ajcxy jada tzaa.

E chi Marta je o'cpi y'uch y'adzooy:

—Huindzin, xuucnip yi', com cham yi' mimidaaxxiibiñ maabi ñaaxtigíy.

⁴⁰ Chi Jesús yminañ:

—¿Nej cay ti jadu'n nnimäy? Pen xymibijcibich yi' n'ayuc, m'ixipy Dios ymic'ajt y'oy'ajt.

⁴¹ Chi ajcxy je tzaa jügiy, chi Jesús cix ypa't'ixy, yminañ:

—Dios Teedy, jäygiäacín nyajnajxypich ma miich, co miich xymidoohui n'ayucich

⁴² Yajxon nnejhuiyich co miich xy'amido'ijtpich jabom jabom, paady ycixp miich jadu'n ti nnimäy müd jadayaabi jäy ajcxy ycixpi ma ich nhuinduu, huen ajcxy mibicy co miich xyquejich ya naaxhuiñ.

⁴³ Co Jesús jadu'n yminañ, chi jada' mic ycapxy:

—Lázaro, pidzim tibäy.

⁴⁴ Hue' je o'cpi mic'amy ypidizimy ymo'nity yajxon tüg'öciy ñinícx etz huingoyebiyity müd huit, chi Jesús yminañ:

—Huimbidiittuutcixy, e najtzmazdixyigix, huen yöychooñ.

Judio ixpicytijc ymadzamy anajty Jesús

⁴⁵ May je judíoäy ajcxy ymibijcy huidibi anajty María yjajmíid'ajtyp, co ajcxy ixy je huidibi anajty Jesús ti tuñ. ⁴⁶ Per jadyii judíoäy ajcxy oy ixtäy je fariseoäy ajcxy, chi ajcxy yajmíidmíydacy huidibi anajty Jesús ti tuñ. ⁴⁷ Je teedy tungmíidpi ajcxy, etz je fariseoäy ajcxy, chi ajcxy ñayhuoomujctay je tungmíidpi ajcxy nidüg'öciy, chi ajcxy yminañ:

—¿Nej ajt Jesús n'octuunim? Yijiibi yëdyjic ooy yi' mijhuinma'n tzachtuuni. ⁴⁸ Pen nna-jtz'ixiim jadu'ñyi, tüg'óciy jáy mibijctähua'ñ yi'. Chi ajcxy ymiinipy je Romano tungmüdpí huidibi ajt xy'ané'mim, e chi yajhuindigoyipy iich ajt nDios y'it, e nañ yajhuindigoyipy iich ajt ndzinaayin njugy'ajtin.

⁴⁹ Nidügti ajcxy je jáy, hue' anajty yxi Caifás, hue' anajty mjtungmüdpí, je' anajty teedy huindzin, je' jadu'n jáy nimayday:

—Miich ajcxy ca' ti mhuinjihuüigixy. ⁵⁰ Ca' ajcxy mnejhuüi co jac'oy nyaj'o'cim je Jesús tügpajc, huen yi' codinaydahuip naax cajp, jigix ca'ydi iich ajt nnaax ngajp yhuindiooyim.

⁵¹ Canan yci'mhuinma'ñ jadu'n ycixpi yminañ je'. Hue' janchtiy com je' anajty ymijtungmüdpí je huin'it jimijt ma teedy ajcxy ymiñ, paady Dios huinma'ñ jadu'n yejcy, co jadu'n najtzcapxiy co Jesús anajty y'oga'ñ müdpí tüg'óciy ajcxy naax cajp ycixpi. ⁵² E ca' nminaanim müdpí jëda'ajty müdpí je judío ajcxy ñaax ycajp ycixpi, nañ jëgix co huoomujctähua'ñ tüg'óciy Dios y'ung huidijaty anajty ajcxy yajpatp xii ya. ⁵³ Huin'it oga'n ajcxy je tungmüdpí yajnigodugüy co yaj'ögaangixy Jesús.

⁵⁴ Jesús ca' anajty ma y'ocay'ijxni mayjäyoty ma je judíoajy ajcxy. Chi jada' ñicxy jiguem mihuington ma je titznaax'it, ma anajty tüg cajp xijity Efraín. Chi jim yhui'miy müdpí ydiscípulos ajcxy.

⁵⁵ Huingoonip anajty je pascua xii huidibi anajty judíoajy ytumyib. Ti anajty may judíoajy ajcxy ñinixni jim Jerusalén xii'ajtp huidibi anajty jigüegiyaty tzomb. Jayijpni ajcxy ñicxy ca' anajty xii paady, co anajty ajcxy ñayyajpocyñi huädza'ñyi. ⁵⁶ Ooy anajty jáy ajcxy ijxtäy Jesús huin'it. Paady anajty chachnayñimáayigixy nidüg nidüg miñ xyipy, co ajcxy ytinay'ahuüy ma Dios ytiç, jadu'n ajcxy yminañ:

—¿Nej m'ocminaangixy? ¿Minipy jada' Jesús xii'ijxpi, o ca'ji?

⁵⁷ Je teedy ajcxy je' yhuindzin etz fariseojäy ajcxy ti anajty yejccixy cötujcin co huentimpinity huidibi anajty nejhuüiy ma je Jesús, huen nigapxy jigix ajcxy madzipy.

12

María yajjaax aceite Jesús ytecy

¹ Jatudujcxini anajty pascuaxii ca' paady, co Jesús ñicxy jim Betania, jim ma anajty Lázaro yajpaady, je huidi anajty ti yajjügypicy jadüg'oc. ² Chi ajcxy jim yaj'oyiüy tüg adzu'ibi. Marta anajty jim yajcaayb yaj'uucp je jáy ajcxy. Lázaro anajty müdpí Jesús iñäy ma je mesi. ³ Chi María conigy tüg libra ujtzpijyñii huidibi anajty ooy oy yxuugy. Tzou je' anajty ooy, je' müdpí Jesús ytecy yajjaaxtaayi. Chi jada' müdpí ycöhuay po'ttiich. Chi ac ujtzpijyñii yxuugitay tigoty. ⁴ Huin'it je Judas Iscariote je Simón ymang huidibi anajty yhuindzin ciyegam ma ymidzip, je' jadu'n yminañ:

⁵—Jac'oy co ixipy ti ndoocim jada ujtzpijyñii oy migo'pxpeexyti jadüib ixipy ajt ayoobitijc nbubejtim.

⁶ Canan paady Judas jadu'n yminañ co ayoobitijc tzachpa'ayoy. Paady jadu'n yminañ co ajcxy chachmeedza'ñ. Com je' anajty meeñybity cuend'ajtp, e chachpuugomyb huidijaty anajty jiiib ajcxy yjapidaacyp. ⁷ Chi Jesús nimay je Judas:

—Ixmatz müch yi', hue' yi' yi' María ti yujcpicy jada ujtzpijyñii co yajtuna'ñ co anajty naaxtiçiyich. ⁸ Com yi' ayoobitijc ajcxy huinixii yi' müch ajcxy müdpí idipy. Janch iich ca' iich müch ajcxy müdpí n'idipy huinixii (ya naaxhuin).

Judio xpicityic yaj'ögamy anajty Lázaro

⁹ Co ajcxy nejhuüiy may judíoajy ajcxy co anajty Jesús yjimity Betania, chi ajcxy nimiiñ. E canan müdpí Jesús ycixpi jëda'ajty, je' anajty ajcxy nañ jadu'n chach'ixaamy je Lázaro huidibi anajty ti jügypicy jadüg'oc. ¹⁰ Chi je teedy ajcxy yhuindzindijc ñaygapxi, co yaj'ögaangixy Jesús etz nañ jadu'n je Lázaro, ¹¹ com may judíoajy ajcxy anajty ñayjiibjcin, etz tzachmibijcixni Jesús.

Jesús tigiy Jerusalén jadu'n nej tüg rey

¹² Je com jabom je mayjäy huidibi anajty ajcxy ti ymiingixy xii'ajtpi ñejhuüiy ajcxy co Jesús anajty yminañ jim Jerusalén. ¹³ Chi ajcxy cabigy may ytiixy y'aacx, chi ajcxy nidzooñ Jesús, chachminaangixy:

—¡Dios ajt xyñihuaanim xyajtzoocim! Mimb tüg jáy huidibi Dios ti yconucxyii. Ymüdpí yi' Dios ymic'ajt, je' je' je' judíoajy yrey.

¹⁴ Co Jesús paty tüg burro mang huidibi ca' ni pin yaj'iñayñi, chi yajpejty, chi cuyduuñ jadu'n nej anajty jaybety y'ity ma Dios ñicxy co jadu'n yminañ:

¹⁵—Ca' mdziçiy müch ajcxy huidibi tzinaayb ma Sión cajp (Jerusalén). Cha je mrey ymiñ y'iñäy ma tüg burro mang.

¹⁶ Je huidibi anajty ajcxy Jesús discípulo'ajtyp, ca' anajty ajcxy huinjihuigixy ixti cooni Jesús paty jadüg'oc yi' y'oy'ajtin ymij'ajtin jilby tzejpjtoty. Huin'it ajcxy ajihuigooti co jadu'n anajty ycojaayty mid Jesús ycixpi, e nañ co je' anajty Jesús ti yajtunyti ti yajjadyii jadu'n nej jaybety ymiñ.

¹⁷ Je jay ajcxy huidibi anajty ajcxy ymid Jesús, huin'it co Lázaro ypidzimy ma yaj-naaxtigiiyi, e yajjugypici jadüg'oc, chachyejcyp anajty ajcxy tiy'ajt nañ jadu'n huidibi anajty ajcxy ti ijxcixy. ¹⁸ Nañ paady ycixpi je mayjáy oy nañ jadu'n yjajpcobadiyii, co ajcxy nejhuíy je mijhuinma'n huidibi anajty Jesús ytumyb. ¹⁹ Paady je fariseojáy ajcxy ñayñimaayi miñ xyipy:

—Ix ajcxy, ca' jada' ninej nmimadaacim Jesús, com tüg'óciy yi mayjáy aham ajcxy je' panixcixy.

Nijëjity anajty griegojáy midmiydägaangixy Jesús

²⁰ Nijëjity griegojáy nañ ti anajty ñicxcixy jim Jerusalén Dios ojadajtpi xijoty. ²¹ Chi jada' je griegojáy ajcxy nimijhuäg Felipe, huidibi anajty Betsaida cogajp jim Galilea naaxjot, e chi ajcxy minucxtaacy nimay:

—Migüg, tun may'ajt pubejtich, Jesús ich ajcxy nja'ixamy.

²² Chi Felipe oy yajnimay Andrés, chi ajcxy Felipe etz Andrés oy Jesús yajnimay. ²³ Chi Jesús yminañ:

—Ti je tiempo paady co ich je jay huidibi tsoon tzejpjtoty nyajcömayipyich. ²⁴ Janch janch ich miich ajcxy jadu'n nimaaygixy co jay nily tüg mocpajc, e co je mocpajc ymuxe, huin'it yhuindigoy, e chi ytiim'ajtni may'amy. Pen ca' ni pin nily jada mocpajc, ca' ytiim'ada'n. Jadu'n ich nipaady nej je mocpajc. Copicy n'ögibiyich, huin'it mayjáy jugy'ajtin paadaangixy huidibi ca' ycixipy ytigoyipy ni mina. ²⁵ Je jay huidibi ooy nigi nixondägy yi chinaayin ya naaxhuiñ, yajtigoyamy je' yjugy'ajtin tücciyi. Per je pin ca'p ooy nijot'aty je chinaayin ya naaxhuiñ, e nixondaaci ooy nigi Dios y'ayuc, je' y'alma nidzocin paadip ma Dios. ²⁶ Pen ji jay huidibi naybidaacip ma ich, copicy ajcxy xypaníxcibich. Ma ich nyajpaady, nañ jim yi' yajpaadipy nañ jadu'n. Yi jay pinjaty naybidaacip ma ich, Dios Teedy yi' cömayib.

Jesús capxpizimy co y'öga'n

²⁷ Chi Jesús yjacminañ:

—Tajñibich mayñibich cham jotjoty huinma'ñjoty. ¿Nej nmimähuibich nDeedyich? ¿Nihuaangich ma jada ayo'n tzaachypí huidibi ti yhuad'ajtni? Ca' yjadu'nity. Com paady ycixp ti nmüñich ma jada xii tiempo, jëbi ayo'n nyajnajxich mid jay ajcxy ypocy ycixpi. ²⁸ Dios Teedy tun huidibi copicy, jëbi jay ajcxy ijxcixy miich mmic'ajt etz miich m'oy'ajt.

Huin'it je jay ajcxy huidi anajty jim ma Jesús yajpaady midooy tüg ayuc choñ tzejpjtoty yminañ:

—Ti nduñich mijhuinma'n, e ti jay ixy ich nmic'ajt n'oy'ajt. E nañ jadüg'oc ndunipyich mijhuinma'n, jigix jay ajcxy ijxcixipy jadüg'oc ich nmic'ajt ich n'oy'ajt (jadu'n Dios y'adzooy y'ung Jesús).

²⁹ Je mayjáy huidibi anajty ajcxy jim, je tiibi anajty ajcxy midoogixy je ayuc huidibi tsoon tzejpjtoty, yminañ ajcxy:

—Enee yi' ti yjidity.

Jacjadyii ajcxy yminañ:

—Tüg ángel ti ymigapxyii.

³⁰ Chi Jesús nimay je mayjáy ajcxy:

—Ca' nmīnaanīm mid ich ycixpi jadu'n ti yajmidoy jadayaabi ayuc huidibi ti choon tzejpjtoty. ³¹ Jadachambi jada' Dios yajpocycähua'n naaxhuiñjáy, e nañ ypigaanipy je mujcu' ymic'ajt huidibi ane'mb naaxhuiñjáy ajcxy. ³² Co ich anajty jay ti xyajcruudzpetyich, e co ich anajty ti njugypicyich jadügtecy, e co ich anajty ti nhuimbityich tzejpjtoty, huin'it tüg'óciy jay ajcxy huidibi xymibijcpich, nyajpa'ttighuibich jilby tzejpjtoty ma nyajpaadyich.

³³ Paady jadu'n Jesús yminañ, jëbi huaad tüg'óciy jay ajcxy huinjihuip ti o'cin anajty ypadamy. ³⁴ Chi je mayjáy ajcxy yminañ:

—Ma Dios ñecy jilby jadu'n ymiñ jaybety co je Cristo huinixii je' y'ida'n. E ¿nej miich co cham jadu'n mina'n co copicy co yi jay huidibi tsoon tzejpjtoty, huimbidad jadügtecy tzejpjtoty? ¿Pin jedu'n mdijyp huidibi tzomb tzejpjtoty?

³⁵ Chi Jesús nimay je jay ajcxy:

—Jahueeni xii tiempo njac'ida'nich mid miich ajcxy. Jadu'n ich ndiy'ajt nej tüg jin huidibi codicxp jay co ytüyöy. Cuychinäy ich ndiy'ajt, co tzojc nhuimbida'nich tzejpjtoty, e miich ajcxy mhuima'n jadu'n nej jay huidibi ca' jin midity. Je jay ajcxy huidibi ca' cuychinaaygixy ich ndiy'ajt, ca' ajcxy nejhuigixy ma ñicxcixy. Jadu'n ajcxy nej jihuíy

yöygixy coodz, e ca' iixcixy ma ñicxcixy. ³⁶ Com occhaani ñich ma miich ajcxy, nyaj'ixpijcy ñich miich ajcxy Dios ytiy'ajt. Pen xymibijccixpich, m'ñtcixip ixpicy ma Dios ytiy'ajtin.

Co Jesús jadu'n je jāy ajcxy ñimayday, huin'it Jesús je' ajcxy puhua'ctuutni, chi ñicxni, e ca' ma y'ocjac'ixjin.

Je judíoäy ca' mibigañ Jesús

³⁷ Ooy anajty canaag mihuinma'ñ Jesús ti jatuuñ ma jāy ajcxy yhuinduu, e ca' anajty ajcxy ni ti tim mibijccixy. ³⁸ Huidibi Jesús ytun ycapx, jibby anajty jadu'n ycojayity ma je Dios y'ayuc necy, je Isaías ñecy, co Isaías jadu'n yminañ:

Huindzin, ca' ni pin ajt n'ayuc ndiy'ajt ti xymibijcim. Ca' ni pin huidibi huinjihuñyib je Huindzin Dios ymic'ajt.

³⁹ Ca' anajty ajcxy huaad ymibijccixy, com nañ ti anajty jadu'n Isaías jay ma jadu'n yminañ:

⁴⁰ Jadu'n yi' ajcxy nej jihuñy Dios ti yajhuindziygixy, e ti yajjotjuniiygixy, jigix ca' y'ñxcixipy müd yhuin, e müd yjot yhuinma'ñ ca' huinjihuñyigixyipy, ni ycajothuimbjtcixipy nej jēbi Cristo yajtzóocigixy.

⁴¹ Paady jadu'n Isaías yminañ je' co anajty ti iixi Cristo y'oy'ajt, e chi cojay nej anajty ti ixy.

⁴² Ca' nidüg'óciy judío ixpicytije mijotmädy anajty Jesús. Jim anajty nijējity huindzindijc huidibi mibijcp Jesús. Per müd je fariseojāy ycixpi co chachjotma'tcixy, paady anajty ajcxy ca' capxpizimigixy co mijpidaaccixy Jesús. Je' co chigiigixy co jim yajpidzimñyib ajcxy tücc'i'yi ma Dios ytiyc, etz ma yi judío ñaymujctac. ⁴³ Jacnigi anajty tzojccixy co huen jāy cōmāyigixy, ca'ydi co ajcxy Dios ycōmayiib.

Dios yajpocycāhuip je mayjāy müd Jesús y'ayuc

⁴⁴ Chi jada' Jesús yminañ mic:

—Je jāy ajcxy huidibi xymibijcpich xymijpidaacpich, caminaanim ñich naydüg xymibijcpich xymijpidaacpich, nañ ymibijcyp ymijpidacyp ajcxy je tübi ñich ya naaxhuiñ xyquexyich. ⁴⁵ E je jāy huidibi xy'ixpich, tim jadu'n nipaady nej jihuñy ti ixy je huidibi ti xyquexyich. ⁴⁶ ñich ti nmimiiñich ya naaxhuiñ Dios ytiy'ajt, jadu'n ñich nipaady nej jihuñy tüg jin huidibi codiicx je jāy ajcxy. Je jāy ajcxy huidibi xymibijcpich ca' ajcxy yhuimipy jibictuuby, jadu'n nej jihuñy ca' ajcxy chinaaygixy agootztuuby. ⁴⁷ Je jāy ajcxy huidibi midoob ñich n'ayuc, e ca' cuydungixy, ca'p je' ñich je' ypocy ajcxy n'ixyōaani nbayōaani cham. Ca'p ñich ti nmiiñich ya naaxhuiñ müd co jāy ajcxy ndzaachytunipyich müd ypocy ycixpi. Paady ñich ti nmiiñich ya naaxhuiñ co nyajpocynñihuäda'ñich yi jāy ajcxy. ⁴⁸ Je jāy ajcxy huidibi xycapxhuimbjtcibich n'ayuc, e ca' xycōbiga'ñich, ymüd ajcxy huidibi yajpocycāhuib. Yi ayuc huidibi ti ngapxyich, yi' yajpocycāhuib ajcxy co anajty naaxhuiñybi ti yhuaad'ajtni co Dios anajty yajtigatzaani. ⁴⁹ Com ñich ca' ngi'm'ayuc ngapxhuäcxxyich. Je' je' Dios Teedy y'ayuc, je huidibi ti xyquexyich, yi' ngapxhuäcxibich y'ayuc. Je huidibi ti xyquexyich ya naaxhuiñ ti xyñajtzcapxiyich yi' y'ayuc, jada ayuc ngapxhuäcxypich nyajnimaygixyp. ⁵⁰ E nejhuiñyich co Dios y'ayuc ytiy'ajt ymimimyb yi' tzinaayin jugy'ajtin judibi ca' tücc'i'yi ycixy ytigoy. Paady ycix je ayuc huidibi ajcxy nyajmñidmiydacyp, jadu'n nyajmñidmiydaaccixy nej Dios Teedy ti xyajnajtz'ane'miñyich.

13

Jesús ypuji ydiscípulos ajcxy ytecy

¹ Ca'ni anajty xii paady, pascuaxii anajty ajcxy tijy. Chi Jesús ñejhuñyib co anajty yxii ytiempo yhuaad'ajtni mina chonaani ya naaxhuiñ yhuimbidaani ma Dios Teedy. E Jesús ooy anajty tzocy jihuñy ymügütiyc ajcxy huidibi ya naaxhuiñ anajty ajcxy hui'ma'ñ. Jadu'n tzocy jihuñy huinixii.

² Chi jada' Jesús etz ymügütiyc ytiigiy ajcxy adzuu'ajtp (je pascuaxii adzu'ajtin). Ti anajty je mujcu' huinma'ñymōy Judas Iscariote, Simón ymang, co anajty Jesús cīyega'ñ ma ymidzip ajcxy. ³ Ñejhuñyib anajty Jesús co je Dios Teedy ti yajcēdigiyii tüg'óciy ymic'ajt, e Jesús nañ ñejhuñyib anajty co je' ti choon ma Dios y'it, e nañ jibby anajty jadüg'oc yhuimbida'ñ. ⁴ Chi ypidigy ma mesi, chi je yoñybi yhuñt ñayyajñjenduutti. Chi huijtzigy tüg huit huidibi müd ñaymextiitzi nayböttiitzi, ñayyajmijxojtzpejti yhuindiiy. ⁵ Co jadu'n ñayñi'ixiiyi, chi pidacy nii ma tüg cibuj'i'ñyoc. Chi nihuägiyi ydiscípulos ajcxy ytecy. Chi yajtzondacy tecypujii tüg tüg, e mextiich pōttiich müd je huit huidibi anajty ti ñayyajhuindiñyiyii.

⁶ Co nihuägiyi Simón Pedro ytecy, chi Pedro yminañ:

—Huindzin, ca' huaad miich ndecy xypujich.

⁷ Chi Jesús y'adzooy:

—Huidibi ñich ndumyb ca' yi' miich ajcxy mhuinjihuñyigixy jadachambi, jacomjegy miich ajcxy mhuinjihuñyipy.

⁸ Chi Pedro y'adzooy:

—Miich ca' huaad ñich ndecy xypujich ni caminaabi.

Chi Jesús y'adzohuimbijty:

—Pen ca' mdecy nbuji, ca' ñich miich jëbi njäy'adyii.

⁹ E huin'it Pedro nimay Jesús:

—Huindzin, ca' ñich jëda'ajty ndecy xypújibich, hue' janchtiy tüg'óciy ngjijich etz ngo-huajich.

¹⁰ Chi Jesús nimay Pedro:

—Com tiibi mjet mhuinma'ñ yajhuäch, ca' yi' ocjactzojcní yajhuädzipty mjet mhuinma'ñ jadügtecy. Tim jadu'n nej jihuïy naamni chly, e cham ca' tzojcní yajtzlhuibych jadügtecy. Jëda'ajty mdecy nbujich cham. Miich ajcxy huädz mjet mhuinma'ñ ajcxy mmidiñ, oy ca' miich ajcxy nidüg'óciy.

¹¹ Com Jesús ñejhuïyb anajty pinjäy cïyegaanip ma ymidzip, e paady jadu'n yminañ:

—Ca' ni tüg'óciy miich ajcxy mjet mhuinma'ñ yhuädzipty.

¹² Chi jada' co yajtecypujtay, chi jada' yoñyhuit yajtügüy jadüg'oc. Y'ixtacy ma mesi, e chi jada' nimay ajcxy:

—¿Nej mhuinjihuïyb ajcxy ti ñich ti nduñich müid miich ajcxy? ¹³ Miich ajcxy jadu'n minamb co ñich miich ajcxy myaj'ixpijcy, etz ñich miich xyhuindzin'ajtpich. E tiydudägy miich ajcxy mina'ñ com ñich jëdu'n miich ajcxy mHuindzin. ¹⁴ Pen ñich miich ajcxy nyaj'ixpijcy etz xyhuindzin'ajtpich, e ti ñich miich ajcxy nyajtecypujy, nañ jadu'n miich ajcxy myajtecypujyib miñ xyipy. ¹⁵ ñich miich ajcxy ti nmöy tüg'ixpejt, jigix ajcxy jadu'n mdunipy jadu'n nej ti nduñich, e huin'it ca' amij agix nayjihuihuïyb ajcxy. ¹⁶ Janch janch ñich miich ajcxy yam jadu'n nmimäy co je huindzin jac mij je' ca'ydí yi' ytumbi. E nañ je' huidibi yajquejxyöyb jac mij je' ca'ydí huidibi quejxyöyb. ¹⁷ Co ajcxy tiy'ajt mnejhuihuipy, chi jotcuyc ajcxy m'idipy, pen mbadumy ajcxy jadu'n nej nduñich.

¹⁸ Ca' nmína'ñich co nidüg'óciy miich ajcxy mbocymüidity. Ti ñich yi' nnejhuïy pin ti nhuin'ixych. Ti nhuin'ixych tüg' huidibi pocymüid, jigix cyduunip nej anajty yjabyetyty ma Dios ñecy ma je Cristo jadu'n yminañ: “Yi' huidibi caymujcp müid ñich, ti ñich yi' xymibidigy.” ¹⁹ Ti ñich yam miich ajcxy jayijp nyajnimaaigy, jigix co anajty jadu'n ytunyii yjadyii, mmibigipy ajcxy co ñich jëdu'n je Cristo. ²⁰ Janch janch yam ajcxy jadu'n nmimaaigy co je jay ajcxy huidibi cöbijcp je huidibi anajty nguejxypich, tim jadu'n nipaady jadu'n nej ñich anajty xycöbijcyich. E je jay ajcxy huidibi xycöbijcpich, je' ajcxy anajty ycöbijcp je' huidibi xyquejxich ya naaxhuñ.

Jesús ñimay ymügütyjc co je Judas anajty cïyegaanip ma ymidzip

²¹ Co jadu'n Jesús yminañ, chi tajnip mayñip anajty ooy jotjoty huinma'ñyoty, chi capxypidzimy:

—Janch janch ñich miich ajcxy yam jadu'n nmimäy co nidügti miich ajcxy xycïyega'ñich ma nmidzipich.

²² Chi Jesús ydiscipulos ajcxy ñayhuindixpejttaayi nidüg' nidüg'. Ca' anajty ajcxy nejhuïy pin anajty jëdu'n Jesús ytiyyp. ²³ Nidügti je' ajcxy huidibi anajty Jesús ooy müid ñaychogyii ññäy anajty ma mesi tim huington ma Jesús yhuinduu. ²⁴ Chi Simón Pedro yci' yaj'ixy yajhuinjihuïy co huen yaj'amidooy Jesús pin anajty jadu'n ytiyyp. ²⁵ Chi je discipulos ajcxy huidibi anajty ññäy ma Jesús yhuinduu nimay yhuindzin:

—¿Pin jadu'n mdiyyp?

²⁶ Chi Jesús y'adzooy:

—Yi' je' pin anajty ñich nmooybich yi' tzajcaagy huidibi anajty nyajxoocpyich ma je ügy.

Chi yajxoogy tüg' pedasi tzajcaagy, chi moy je Judas, je Simón Iscariote ymang. ²⁷ Tim huin'ity co Judas je tzajcaagy cöbijcy, chi je mujcu' ytiügüy ma je' y'ay yjot. Chi Jesús nimay Judas:

—Yi' huidibi mdunamyb, tungo jadu'n mic'amy.

²⁸ Huidijaty anajty ajcxy jim caayb, ni pin cahuinjihuïy je ayuc huidibi Jesús yajnimay Judas, nej je ayuc yhuimbizimy. ²⁹ Com je Judas anajty müid je meefnybijty, paady ajcxy nijëjity huinjihuïy co anajty tijy ñimäyii:

—Nicx juy yi' huidibi ajt nyajmayajtim yi' xiigixpi.

Jacjadyii ajcxy anajty tijy ñimäyii:

—Mo' tigatii ayoobitjc. ³⁰ Tim huin'ity co je tzajcaagy cayday, chi ypidzimy Judas tiba'y, e ti anajty ycoodziññi.

Jesús ñajtz'ane'miy jemybi cötujcin

³¹ Co Judas ypidzimy, chi Jesús yminañ:

—Cham je jay ajcxy ixa'ñ ñich nmic'ajt ñich n'oy'ajt, ñich je jay huidibi tzoön tzajpjoty. Etz nañ ma ñich je jay ajcxy ixa'ñ Dios ymic'ajt Dios y'oy'ajt. ³² Jadu'n nej je jay ajcxy ti ijxcixy Dios ymic'ajt ma ñich, nañ tim jadu'n Dios yajniügëxigipy yi' nmic'ajtiñ n'oy'ajtiñ

tim mic'amy. ³³ Migügtijc huidibi ooy ndzocy njihuüyich, ca' n'ochuäcxibaanich jecy müd miich ajcxy. Xy'ixtähuibich miich ajcxy. Jadu'n nej ti nnimáaygixyich yi jacyadyi judföy ajcxy, nañ jadu'n ñich miich ajcxy yam njacnimaaygixy co ma nnicxa'ñich, ca' huaad miich ajcxy jiiy mnicxcixy. ³⁴ Cham ajcxy nmöhua'ñ tüg ané'min huinjemybi. Cham miich ajcxy nyajnajtz'ane'mihuaangixy jadüg'oc jadayaabi tiy'ajt: Naychójcigix nayjihuiyigix ajcxy nidüg nidüg, tim jadu'n nej ñich miich ajcxy ti ndzocy ti njihuüy. Naychójcigix nayjihuiyigix aguipxyi. ³⁵ Müd jada ycixpi ñejhuihuipy tüg'óciy jáy co ñich miich ajcxy ti nyaj'ixpijccixy co ajcxy nidüg nidüg mnaychogüyb mnayjihuihuüyb.

Jesús ñimay ymigügtijc co je Pedro anajty coyüdzaanip

³⁶ Chi Pedro nimay:

—Huindzin, ¿ma miich mnicxa'ñ?

Huin'it Jesús y'adzooy:

—Ma ñich mnicxa'ñich miich ca' huaad xypanicxyich. Jac'axam xypanícxyibych.

³⁷ Chi Pedro yminañ:

—E ¿nej co ca' huaad jébi ñich miich nbanicxy? com ñich ngýegamyich njugy'ajtin ma yi o'cin müd miich ycixpi.

³⁸ Chi jada' Jesús y'adzooy:

—¿Nej janch co mgýega'ñ yi mjugy'ajtin ma yi o'cin müd ñich ycixpi? Janch janch ñich miich ajcxy yam jadu'n nimäy, co ni ca'ni anajty jabom tugüg'oc tzey yaaxigy, co ñich miich anajty tugüg'oc ti xycoyüchich.

14

Pinjaty mibijcp Jesús nixcip ma Dios Teedy yajpaady

¹ Chi Jesús yjacminañ:

—Ca' ajcxy jotmay mjihuüy ma m'aa mjot müd jada ayuc. Mibic ajcxy Dios etz ñich nañ jadu'n mibijccich. ² Jiiy ma ñich nDeedy chinäy, jiiy migtigyidac. Co ixxyip ca' yjadu'niy, ca' ixxyip ti nnimaaygixy co mnicxyich ma nDeedyich n'ocni'ixiy tzinaaydac müd miich ajcxy ycixpi. ³ E co ñich anajty ti nba'ttigüyich, e ti ni'ixüyich tzinaaydac jayijp müd miich ajcxy ycixpi, huin'it ajcxy nihuimbidiy, jébi ñich ajt naydügmujcim, jigix ma anajty n'ityich, nañ jiiy miich ajcxy m'idipy. ⁴ Miich ajcxy mnejhuiyb nej jébi ajcxy mjädip ma mnicxyich oyduuby.

⁵ Chi Tomás yminañ:

—Huindzin, ca' ñich ajcxy nejhuiyigixy ma miich mnicxa'ñ, e ca' ñich ajcxy nnejhuiyigixy nej jébi njá'tcixibych jiiy.

⁶ Chi Jesús y'adzooy:

—Jadu'n nej ti ndzinäyich jada je' je iixpejt nej Dios tzocy co miich ajcxy mdzinähuipy. Nyejcpych je tiy'ajt huidibi jébi huaad mguychinaaygixy. Co jadu'n mguydundáyigixipy ñich ndiy'ajt, chi mjá'tcixipy ma Dios. Nyejcpych je jugy'ajtin huidibi ca' tücci'yi ycixy ytigoy. Ca' ni pinjäy yjädipy ma Dios Teedy, peni ca' cuydundáy ñich ndiy'ajt. ⁷ Jadachambi etz nej xii tiempo yjacnixa'ñ miich ajcxy m'ixy'ajty Dios Teedy. Pen xy'ixy'ajtpich miich ajcxy, nañ m'ixy'ajtyp miich ajcxy Dios Teedy.

⁸ Chi Felipe y'adzoy:

—Huindzin, ñich ajcxy yi Dios Teedy yaj'ijxcich cham cham, e müd tim yi'yi jotcuje'adipyich ajcxy.

⁹ Paady Jesús nimay je Felipe:

—Cham xii jimijt ñicxni maabi ñich nja'ityich müd miich ajcxy, e ¿ca'ni miich xytym'ijxhu'myich Felipe? Yi jáy ajcxy tübi xy'ijxcixyich, nañ y'ijxyp ajcxy yi' Dios Teedy. E chi jada', ¿nej miich co jadu'n xyñimäyich: “Yaj'ijxcich je Dios Teedy?” ¹⁰ ¿Nej ca' mmibicy co ñich n'ity ma Dios Teedy, e Dios Teedy ijtp ma ñich? Yi ayuc huidibi ngapxhuäcxypich, ca' yi' ngi'm'ayuc'adyiijich ngi'mdiy'ajt'adyiijich. Yi mijhuinma'ñ huidibi ajcxy m'ijxyp ndumybich, yi Dios Teedy huidibi ijtp ma ñich, yi' jadu'n tumb. ¹¹ Mibijccich ajcxy co ñich n'ityich ma Dios Teedy, e Dios Teedy ijtp ma ñich. Peni ca' mdimmibigaangixy, mibic ajcxy müd je mijhuinma'ñ ycixpi huidibi ti nduñich. ¹² Janch janch ñich miich ajcxy jadu'n nimaaygixy co je jáy ajcxy huidibi xymibijcpich, nañ ytuñipy ajcxy nañ jadu'n yi mijhuinma'ñ huidibi ti nduñich. Jac tim nigi tunipy mijhuinma'ñ, com ñich mnicxaambich ma Dios Teedy y'ity. ¹³ E tüg'óciy ti miich ajcxy mibijctzooyb ma Dios Teedy müd ñich nxii, ndunipyich yi'. Dios Teedy huidibi nDeedy'ajtpich, je' cómay y'idip müd huidibi miich anajty ajcxy mdumyb müd ñich mnic'ajt. ¹⁴ Co myajmibijctzohuipy tijaty, xycapxpáatibich nxii, huin'it nguyduñipyich huidibi anajty ti mbijectzoogixy.

Jesús yquexamy Dios yjihui'ñ ymic'ajt

¹⁵ Peni xychojcpich miich ajcxy, cuydúniigich ajcxy tüg'óciy n'ayuc ndiy'ajt, jadu'n nej anajty ti nnaajt'ane'míyich. ¹⁶ E co ndzoonibych, chi nbijctzóohuibych yi Dios Teedy jadüg yjaym'id huidibi ajcxy xyjaym'id adüib. Dios ajcxy xymóhuipy jadüg jaym'id huidibi ajcxy xycapxhuijip, je huidibi ajcxy m'jot'amij'adiyb, e je' xym'id'idipy ajcxy huinixii. ¹⁷ Je huidibi xycapxhuijip, je' jada'ajty Dios yjihui'ñ ymic'ajt, je Espíritu Santo. Je' Dios ytiy'ajt ym'id. Dios yjihui'ñ ymic'ajt ca' adigihua'ñ yi naaxhuiñyäj huidibi ca' xymibicyich. Com ca' ajcxy icy, e nañ ca' ajcxy icy'adyii je Espíritu Santo. Miich ajcxy m'ixy'ajtyp je Espíritu Santo, com je' tzinaayb ma miich ajcxy, e nañ xy'adigihuiipy xyjottigihuiipy ajcxy. ¹⁸ Ca' miich ajcxy nyajhui'maangixy naydüg jadu'n nej co'ögy'ung. Nnihuimbidiipyich miich ajcxy jadügtecy. ¹⁹ Tim huingónip yi xii tiempo mina yi jacjadyii naaxhuiñyäj ajcxy ca' xy'ocjac'ixnibich. Com jadu'n nej ich njactzinähua'ñ, ca' ich njugy'ajtin ycixipy ytigoyipy tücci'yi. Nañ jadu'n miich ajcxy njactzinähua'ñ, ca' mjugy'ajtin ajcxy ycixipy ytigoyipy tücci'yi. ²⁰ Co anajty Dios yjihui'ñ ymic'ajt ajcxy xy'adigiy xyjottigiy, huin'it ajcxy mnejhuihuipy co nyajpaadyich ma nDeedyich, yi Dios Teedy, e miich ajcxy myajpaady ma ich, e ich nañ jadu'n yajpatpich ma miich ajcxy. ²¹ Je jay ajcxy huidibi ich n'ayuc ndiy'ajtic xycöbijcip, e cuydungixy, je' je' jadu'n xychojcpich, e tzogüib je' ich nDeedy. E ich nañ jadu'n ndzogipy njihuihuibych je' ajcxy, e nnayyajnigüëxigüybich ma je' ajcxy.

²² Je jadügi Judas, ca' nminaanim Judas Iscariote, nimay Jesús:

—Huindzin, ¿nej co mnayyajnigüëxiga'ñyii ma ich ajcxy, e ca' mnayyajnigüëxiga'ñyii ma je jay ajcxy huidibi ca' xymijpidägy?

²³ Chi Jesús je' y'adzooy:

—Yi jay ajcxy huidibi xychojcpich xyajmij'ajtpich, xycuydúunibich yi' ajcxy ich n'ayuc ndiy'ajt. E huin'it yi' ajcxy chogüyb ich nDeedy. Je nDeedyich etz ich miinip ich ajcxy ma je jay ajcxy huidibi xycuyduunip ich ndiy'ajt, e tzinaydacpigipyich ma yi' ajcxy yjot yhuinma'ñ. ²⁴ Je jay ajcxy pinjaty ca' xychocyich, nañ ca' ajcxy ich n'ayuc xycuyduunich. Paady ca' nnayyajnigüëxiga'ñyijich ma je' ajcxy. Com yi ayuc huidibich miich ajcxy nyaj'amido'ljityp, ca' yi' ich ngi'm'ayuc'adyii. Yi' je' Dios Teedy y'ayuc ytiy'ajt, com yi' ich ya naaxhuiñ xyquejxich.

²⁵ Jadayaabi ayuc ajcxy cham jadu'n njacyajnamaayb, jadu'n nej njacyaanigyich ya naaxhuiñ m'id miich ajcxy, ma ca'ni ndzoonich. ²⁶ Per je Espíritu Santo huidi miinam, je' ajcxy xycapxhuijip. Dios Teedy yquexamy je Espíritu Santo m'id ich nxii. Je Espíritu Santo xyajnejhuiyadähuiipy miich ajcxy tüg'óciy tiy'ajt, e nañ xyaj'ajihuihuib tüg'óciy jadu'n nej ich miich ajcxy nnimaaygixy.

²⁷ Ich miich ajcxy nyajmihui'my jotcuyc'ajtin. Jadu'n nej ich njotcuyc'atyich, nañ nyajjotcuyc'adipyich miich ajcxy. Yi jotcuyc'ajtin huidibi nyajmihui'maamyich miich ajcxy, ca' yi' yjadu'nti nej je jotcuyc'ajtin huidibi yajpaatp ya naaxhuiñ. Ca' mdajcixy maygixy, nañ ca' mdzigüygixy. ²⁸ Ti ich miich ajcxy nnimaaygixy jayijp'aty co ndzona'ñich ma miich ajcxy, e nhuimbida'ñich jadüg'oc ma miich ajcxy. Peni xychojcpich miich ajcxy, mxondägipy ajcxy co nnicxa'ñich ma Dios Teedy, com yi Dios Teedy jac mij yi' ca'ydí ich. ²⁹ Ti ich jada tiy'ajt jayijp nimidyägüyich ma ca'ni ndzoonich, jigix co anajty je tiempo paady mina jadayaabi ytuñyib yjadüyb, huin'it ajcxy mmibigipy ich n'ayuc.

³⁰ E ca' ich miich ajcxy mijcajee ooy njacm'idmiydägaangixy yam. Com tim huingónip mina je mujcu' huidibi ane'mb ya naaxhuiñ xyñimina'ñich. Ca' ich yi' huaad jébi xymimadägyich. ³¹ Per copicy yi' nguydunipyich Dios Teedy y'ayuc nej xyajna-jtz'ane'míyich, jigix je naaxhuiñyäj nejhuihuipy co nyajmij'atyich yi Dios Teedy. Pidiccix, tzoc'ajt huingduum jamim.

15

Je camuuxy'aadz etz y'aacx

¹ Chi Jesús jacnimay ydiscipulos ajcxy:

—Jadu'n ich nipaady nej camuuxy'aadz ma tüg muuxy'aadz cam. Ich nDeedy, yi Dios Teedy, jadu'n yi' nipaady nej je muuxy'aadz cam cuend'ajtpi. ² Tüg'óciy jay jadu'n ajcxy nipaady nej muuxy'aadz y'aacx. Je jay ajcxy huidibi ca' cuychinäy ich ndiy'ajt, yi Dios Teedy yajcödigoyiib, jadu'n nej je muuxy'aadz cam cuend'ajtpi quejtzpuxy je muuxy'aadz y'aacx huidibi ca' ytiim'aty. Je jay ajcxy huidibi cuydundaayb ich ndiy'ajt, Dios yaj'oyiib je' ajcxy yjot yhuinma'ñ, jébi oybi tuñ, jadu'n nej je muuxy'aadz cam cuend'ajtpi huijtz'oyiy je muuxy'aadz y'aacx, jigix jébi nigi ytiim'aty. ³ Yi ayuc huidibi ti nyajnimaaaygixy, yi' ti yajhuäch yi jibicpi ma miich ajcxy m'jot mhuinma'ñ. ⁴ Mibijccich ajcxy, panicxigich ajcxy ndiy'ajt huinixii. Co ajcxy jadu'n mdunipy, ich miich ajcxy m'id'idipy huinixii. Jadu'n nej ixipy camuuxy'aadz y'aacx co ca' ytiim'aty co ahuinggujc y'ity, e ca' mic'ajt paady ma

ycop. Nañ tim jadu'n miich ajcxy pen ca' mmic'ajt mbaadipy ma #ch, ca' mmimadaaccixipy mgyuchináyigixipy #ch ndiy'ajt.

⁵ Jadu'n #ch nipaady nej camuuxy'aadz cop, e miich ajcxy jadu'n nipaady nej camuuxy'aadz y'aacx. Je jáy ajcxy huidibi yajpatp ma #ch, e #ch nyajpaady ma je' ajcxy, je' ajcxy oyhuinma'n tunam maj cajee, tim jadu'n nej camuuxy'aadz huidibi tim'ajtp may'amý. Co ixipy #ch ca' nyajpaady ma miich ajcxy, ca' miich ajcxy huaad ti mdungixy. ⁶ Co jáy ajcxy ndiy'ajt xy'ixmájtzibich, Dios ajcxy yajcódigoyiib, tim jadu'n nej jáy yajcódigoy miid jün yi muuxy'aadz y'aacx huidibi ymibuxiib co ca' ytim'ajtni. Co je y'aacx ytidzity, chi ajcxy yajmucy, e pidaaccixy jünjoty, e jadu'n jüby ndoyiy jünjoty.

⁷ Co miich ajcxy m'ijtcixy ma #ch, e co #ch n'ayuc nañ jadu'n ijtp ma miich ajcxy mjet mhuinma'n, jébi mbijctzoogixy ti ajcxy mdzojcy ma Dios, e nguydunipyich miid miich ajcxy ycixpi. ⁸ Chi je jáy ajcxy cōmayipy Dios co miich ajcxy mgyudunipy #ch ndiy'ajt tydudägy, tim jadu'n nej camuuxy'aadz y'aacx ytim'aty may'amý. Co je jáy ajcxy ixipy nej tudägy mgyudungixy #ch ndiy'ajt, chi je jáy ajcxy tydudägy nejhuhiuipy co ti nyaj'ixpicyich miich ajcxy. ⁹ Jadu'n nej Dios Teedy xychocyich xyjihuiyich, nañ tim jadu'n #ch miich ajcxy ti ndzocy ti njihuiyich. Ndzogipy njihuihuibych miich ajcxy huinixi co ca' ajcxy xy'ixmájtzybych ndiy'ajtich. ¹⁰ Co mgyundundähuipy ajcxy jadu'n nej nyajnajtz'ane'müygixy, ndzogipyich njihuihuibych miich ajcxy huinixi. Tim jadu'n nej nguyduñich yi huidibi Dios Teedy xyajnajtz'ane'müybich, e yi' xychojcpich xyjihuiyibich huinixi.

¹¹ Cham jadayaabi ayuc nyajnajtz'ane'müygixy, jigix jotcujc m'ijtcixipy. Jadu'n nej jotcujc ti n'ityich, e nañ jadu'n miich ajcxy mjetcujc'adipy anaxy. ¹² Jadaabi ayuc #ch miich ajcxy nyajnajtz'ane'müybich co naychójcigix nayjihuiyigix nidüg nidüg, tim jadu'n nej #ch miich ajcxy ndzocy njihuiy. ¹³ Je tiy'ajt jac'oybi co migügtjc ajcxy naychogiyb nayjihuihuibych, co tüg jáy ciyegipy yjugy'ajtin miid ymigügtjc ycixpi. ¹⁴ #ch miich ajcxy migüg'ajtyp, pen mgyudumyib nej ajcxy nyajnajtz'ane'müygixy. ¹⁵ Jadu'n nej xü tiempo yjacnixa'n, ca' miich ajcxy n'ocnaydijnip #ch ndumbi. Com je tumbi ca' huinjihuiy huidibi yhuindzin ytumyib. Hue' miich ajcxy nyajnaxyich nmigügtjcich, com tüg'óciy tiy'ajt tibi nmidooyich ma #ch nDeedy, yi Dios Teedy, ti #ch miich ajcxy nnimaaygixy. ¹⁶ Ca' nmīnaanīm #ch miich ajcxy ti xyhuin'ixy. #ch miich janchtiy ajcxy ti nhuin'ixy. E ti #ch miich ajcxy nyajñibicy co nicxy mgapxhuäccixy #ch n'ayuc. E nañ mayjáy mijpidägyipy je ayuc huidibi miich ajcxy mgapxhuäccixy. E nañ #ch n'ayuc, huidibi miich ajcxy mgapxhuäccixy, y'idipy ma je jáy ajcxy yjot yhuinma'n huinixi. Paady ycix tüg'óciy tijaty miich ajcxy mbijctzooyb ma Dios Teedy miid #ch nxi, yi' ajcxy xymöhuipy. ¹⁷ Jada ayuc ajcxy yam nyajnajtz'ane'müyb co ajcxy mnaychogiyb mnayjihuihuibych miñ xyipy.

Je maybi naaxhuiñjáy ca' ajcxy ixaangixy Jesús etz cham je'yjáy

¹⁸ Co je may naaxhuiñjáy ca' xy'ixaangixy miich ajcxy, ca' ajcxy ooy mhuinmayipy, com mnejhuiyb ajcxy co #ch nañ jadu'n jac jayjip ca' yi' ajcxy ti xy'ixaangixyich. ¹⁹ Co ixipy ytügiy miich ajcxy m'ayuc miid yajmij mñe je jacjadyii naaxhuiñjáy y'ayuc ytiy'ajt, huin'it ixipy ajcxy xychojccixy xyjihuiyigixy, com tú'ciy miich ajcxy mhuinma'n ixipy miid yi' ajcxy yhuinma'n. Janch com co ca' ytügiy miich ajcxy m'ayuc mñe'ajt mñe je jacjadyii naaxhuiñjáy y'ayuc ytiy'ajt, paady je jacjadyii naaxhuiñjáy ca' ajcxy xy'ixa'nip. Com #ch miich ajcxy ti nyajñijphujtztüdy, jadu'n nej yi' jacjadyii naaxhuiñjáy ajcxy chinaaygixy yjugy'ajtcixy. ²⁰ M'ajihuihuib ajcxy jadu'n nej ti nnimaaygixy co #ch miich ajcxy xyhuindzin'ajtpich, paady jac mij #ch ca'ydi miich ajcxy. Jadu'n nej naaxhuiñjáy ajcxy ti xy'ixhuidityich ti xypahuidityich, nañ jadu'n miich ajcxy yi' xy'ixhuidida'n xypahuidida'n. Nañ may je jáy huidibi ca' ti xycapxymidooyich, nañ jadu'n may je jáy huidibi miich ajcxy ca' xycapxymidoohaangixy. ²¹ Nijot ajcxy y'iditzaangixy miid miich ajcxy ycixpi, com ca' ajcxy ix'yadyii Dios Teedy huidibi xyquejxyich ya naaxhuiñ.

²² Co ixipy ca' ti nmiñich ya naaxhuiñ nyajñimäyich je jáy ajcxy Dios ytiy'ajt, ca' ixipy ajcxy pocy mñidity. Per com ti nmiñich ya naaxhuiñ, paady cham ypany ajcxy mñidity co ca' ajcxy xy'ixa'nich. ²³ Je jáy ajcxy huidibi ca' xy'ixa'nich, jadu'n nipaady nej #ch nDeedy ca' ajcxy ixaangixy. ²⁴ Co ixipy #ch ca' ti nduñich ma yi' ajcxy yhuinduu mijhuinma'n, huidibi ca' ni pin jáy tuñi, ca' ixipy ajcxy pocy mñidity. E janch ti ajcxy ooy ja'ijxcixy je mijhuinma'n, e ca' #ch yi' ajcxy xy'ixa'n, e nañ ca' ixaangixy #ch nDeedy. ²⁵ Paady jada jadu'n ytuñyii yjadyii, jigix yajcuydunipy jadu'n nej ycojaayity ma yi' judiojáy ajcxy ley ñecy, ma jadu'n ymina'n: "Ni ti tiy'ajt ycaca'ty, co #ch yi' ajcxy ca' xy'ixa'nich."

²⁶ E co anajty xyñigidaaccixy yi' Espíritu Santo, yi' huidibi xycapxhuijip ajcxy, je huidibi miich ajcxy nyajñiguexam, chon ma Dios Teedy, je huidibi Dios ytiy'ajt mñid. Yi' xyñidiy'ajt'adaambich co Dios ytiy'ajt nmñidityich. ²⁷ E miich ajcxy nañ

jadu'n xyñidiy'aj't'adipich co Dios ytiy'ajt nmñididyich. Com ñich miich ajcxy jayijp nyaj'ixpijctzondac Dios y'ayuc ytiy'ajt.

16

¹ Ti ajcxy yam tiy'ajt njacyajnimaaaygixy, jigix ca' ajcxy m'ixtigihuaägipy. ² Com judiojāy ajcxy xy'ixhuidzipy ajcxy ma ajcxy yi' ñaymujctac. Ypadaamy yi xii tiempo co miich ajcxy jāy xyaj'ögipy, hue' ajcxy tijipy co Dios anajty ooy jadu'n jāygidägy tiibi anajty ajcxy tuñ. ³ Paady ajcxy jadu'n xytunipy jibic, je' co ajcxy ca' ix'y'adyii yi Dios Teedy, etz nañ jadu'n ca' xy'ixy'adyiijich. ⁴ Paady ñich miich ajcxy jadachambi jadu'n nnimaaygixy, jigix co anajty je xii tiempo paady, chi m'ajihuñiñyib ajcxy co ti anajty jayijp nnimaaygixy co ayo'n tzaachypi mminaxa'ñ myajnaxa'ñ ajcxy.

Dios yjihui'ñ ymic'ajt tunam ma jāy yjot yhuinma'ñ

Ca' anajty ajcxy jada ti nyajnimāy müd jēgix nmñid'ity ajcxy. ⁵ E cham janchtiy nnicxānibich ma yi huidibi ti xyquexyich ya naaxhuiñ. E ni tūg miich ajcxy xyc'a'amidooyich: "¿Ma nmñica'ñ?" ⁶ Paady miich ajcxy mdajy mmay ma m'aa mjot, co ajcxy cham jadu'n jada ayuc ti nyajhuinjhuiñyigixy. ⁷ Oy ixipy miich ajcxy cham mjatajy mjamay, tiy'ajt nej nmñina'ñich co jac'oy müd miich ajcxy ycixpi co nhuimbidiipyich ma Dios Teedy. Co ixipy ca' jibiy nnicxa'ñich tzejpjoty, ca' ixipy xyñiminaangixy Dios yjihui'ñ ymic'ajt, je Espiritu Santo, je huidibi ajcxy xycapxhuijip. Per co ñich anajty tzejpjoty ti nhuimbity, huin'it ñich yi' miich ajcxy nyajniguxipy. ⁸ E co anajty je Espiritu Santo miñ ya naaxhuiñ, huin'it yi' yajjihui'ñyibigipy jāy ajcxy ypocy. E nañ yajni'ixihuipy je jāy ajcxy co Dios tiydunib müd ypocy ycixpi. ⁹ Yi Espiritu Santo yajjihui'ñyibigipy jāy ajcxy ypocy, co ñich ca' ajcxy ti xymibicy ca' ajcxy ti xymijpidägyich. ¹⁰ Je Espiritu Santo yajnejhuñhuipy jāy ajcxy nej huaad cuychinaaygixy Dios y'ayuc ytiy'ajt. Com co ñich nba'ttigihua'ñich ma Dios Teedy, e miich ajcxy ca' xy'ocjac'ixñibich. ¹¹ Je Espiritu Santo yajhuinjhuiñhuip je jāy ajcxy co Dios tiydunib ajcxy müd ypocy ycixpi huidibi ajcxy ca' tiydudägy chinaaygixy. Com yi Dios ti yi' mujcu' tiyduñ müd ypocy ycixpi.

¹² Ooy may ayuc ñich nmñidity huidibi njayajnimāhuaamyich ajcxy per ca' miich ajcxy mhuinjhuiñhuipy cham. ¹³ Jacjiini mhuinjhuiñhuipy ajcxy je ayuc huidibi njayajnimāhuaamy ajcxy, co Dios quexipy je Espiritu Santo ya naaxhuiñ huidibi tiy'ajt müd. Yi' je' miich ajcxy xyajhuinjhuiñdāhuipy tūg'öciy Dios ytiy'ajt. Com yi' ca' yci'mhuinma'ñ tunipy. Yi' janchtiy ñigapxtāhuipy tūg'öciy ayuc tiy'ajt huidijaty anajty ymidooyb ma Dios Teedy, e nañ yajniguxēictāhuipy tūg'öciy tiy'ajt huidibi mimb cidaacp. ¹⁴ Je Espiritu Santo ñich yi' capxpaady xyaj'idipyich, com yi' ñich ndiy'ajt miich ajcxy xyajhuinjhuiñhuaam. ¹⁵ Tūg'öciy huidibi Dios Teedy ymüd, nañ njē'ajtpich yi', paady jadu'n ti nmñina'ñich co je Espiritu Santo xyajhuinjhuiñdāaygixipy ajcxy ñich yi' n'ayuc yi' ndiy'ajtach.

Jesús ñimay ymīgūtjic co ajcxy yjotmay ahuimbidiipy jotcuje'ajtn

¹⁶ Tim huaad'ajtp xii tiempo, co ñich miich ajcxy ca' xy'ocjac'ixxi. Chi co xii tiempo yjacnajtznñicxiñhuip, huin'it ñich miich ajcxy xyjac'ixipy jadüg'oc.

¹⁷ E huin'it ajcxy nijējity Jesús ydiscipulos ajcxy ñayñimaay'i miñ xyipy ac jēyi:

—¿Ti jadu'n ytiyyp? Co jadu'n ymñina'ñ, co tim huaad'ajtnip xii tiempo mina ñich miich ajcxy ca' xy'ocjac'ixñibiyich, e co yjacnajtznñicxiñhuip xii tiempo, huin'it miich ajcxy xyjac'ixipyich jadüg'oc, com nnicxaamich ma Dios Teedy. ¹⁸ Chi ajcxy jadu'n ñayñimaay'i miñ xyipy:

—¿Ti jadu'n ytiyamy? Co jadu'n ymñina'ñ co tim huaad'ajtnip xii tiempo. Ca' ñich ajt nhuinjhuiñyim ti jadu'n ytiyamy.

¹⁹ Com Jesús ñejhuñyib anajty nej ajcxy yja'amidoohua'ñyii, chi ñimay ajcxy:

—Yi' miich ajcxy ooy mjayajtiñhua'ñ. ¿Nej co jadu'n ti nmñina'ñich? Tim huaad'ajtnip xii tiempo co ñich miich ajcxy ca' xy'ocjac'ixñipy. E chi yjacnajtznñicxiñhuip xii tiempo, e chi miich ajcxy xyjac'ixipyich jadüg'oc. ²⁰ Janch janch ñich miich yam nnimaaygixy co mjotmaybaadip ajcxy, e nañ myāxip ajcxy müd jotmay. Chi je naaxhuiñyājy ajcxy huidibi ca' xymijpidägyich, xondāgam ajcxy, e miich ajcxy nañ mjotmaybaadip. Per yi' mjotmay ajcxy ahuimbidiipy tūg' xondaacin. ²¹ Jadu'n ajcxy mjada'ñ jadu'n nej tūg' tōxyjāy tzaachypi jihuñy co y'ung yma'xung'ada'ñ. E co ti yma'xung'aty ypi'c'ung, chi jāydigoy yi' tzaachypi müd xondaacin co tūg jāy ti ymiñ ya naaxhuiñ. ²² Tim jadu'n nej yjaty müd je tōxyjāy, nañ jadu'n yjada'ñ müd miich ajcxy. Cham ajcxy jotmay mjihuñy ma m'aa mjot, e chi co xy'ixipyich jadüg'oc miich ajcxy, huin'it ajcxy m'aa mjot yxondāga'ñ. E ni pin huaad mxondaacin ajcxy xycapijipy.

²³ Je huin'it ximbi (co anajty je Espiritu Santo ti ymiñ ya naaxhuiñ) ca' ñich miich ajcxy ni ti xyjacyajmbijctzohuipyich, com janch ñich miich ajcxy yam jadu'n nimaaygixy co tūg'öciy huidijaty myajmayajtcixyp, chi ajcxy mbijctzohuipy ma Dios Teedy müd ñich nxii,

e xymöhuipy ajcxy yi'. ²⁴ Chambaadni ca'ni ni ti ajcxy mbijctzoy ma Dios müd ich nxi. Pijctzoogix, e xymöhuipy ajcxy yi', jigix mjectcugihui ajcxy anaxy.

Jesucristo yimadac je jibic-huinma'n ya naaxhuiñ

²⁵ Tüg'óciy jada ayuc tiy'ajt ac jihuimbít müich ajcxy ti nyajnimäy. Huingomb xü tiempo mina tiydudägy ajcxy nyajmüdmüydactähuipy yi Dios Teedy y'ayuc ytiy'ajt yajxon, e ca' y'ocjihuimbít. ²⁶ Je huin'it xü co anajty ich ti nhuimbityich ma Dios Teedy, jëbi müich ajcxy mbijctzoogixy ma Dios Teedy tijaty ajcxy myajmayajtyp. Co ti mbijctzóogixipy müd ich nxi, xymöogixipy yi' Dios Teedy. Ca' ycopicyity co ich yi' nmibijctzohuipy müd müich ajcxy ycixpi. ²⁷ Com yi' Dios Teedy nañ xychojcp xyjihuiyb yi' müich ajcxy. Com müich ajcxy jayjip ti xychocyich ti xyjihuiyich, e ti nmibicy ajcxy co ti ndzooñich ma Dios Teedy, paady Dios müich ajcxy xymöhuipy tijaty anajty myajmbijctzooyb. ²⁸ Jiiby ich ndzooñ ma Dios Teedy yajpaady, co nmiiñich ya naaxhuiñ, per jadachambi n'ixmájtznbiyich jada naaxhuiñybi, e nhuimbijtnich ma Dios Teedy.

²⁹ Huin'it je' ydiscípulos ajcxy ymínañ:

—Cham janchtiy tudägy müydägy, ca' m'ocyajtuuni jihuimbít ayuc. ³⁰ Cham ich ajcxy nnejhuify co müich mnejhuiday tüg'óciy tiy'ajt. E ti xyajnimaydäyich co anajty ca' ti tiy'ajt ich ajcxy nmibicy co müich mdzooñ ma Dios.

³¹ Chi Jesús y'adzooy:

—¿Nej nmibijcyp cham jada ayuc jadu'n nej ti nmíáaygixy? ³² Jihui'ñybijccix co huingtonip je xü tiempo, e ti tim paady mina müich ajcxy mgueec-huäcxtáaygixipy nidüg nidüg ma pin timdzocy, e xyajhuí'ngixich naydüg. Per ca'p ich nnaydügy, com yi' Dios Teedy yi' ijtp müd ich. ³³ Müich ajcxy yam jada ayuc nyajnimaaayb, jigix ajcxy jotcuyc'ajtin mbaadip ma ich. Ya naaxhuiñ mbadamy ajcxy ayo'n etz tzaachypi. Jotcugiygix, ca' mdajcxy maygixy, com ti nmímadägyich yi' jibicpi ya naaxhuiñ.

17

Jesús ymbijctzou Dios müd ydiscípulos ajcxy ycixpi

¹ Co Jesús jadu'n ymínañ jayjip, chi ypa't'ijxy tzajpcíxy, chi Dios Teedy pa'tcapxy nimay:

—Dios Teedy, ti hora paady mina ayo'n nyajnaxa'ñich jadu'n nej müich jayjip'aty myajnihuinmayiy. Yajnigüëxig ich nmic'ajt ich n'oy'ajt, com ich müich nDeedy'ajtypich, jigix ich nañ jadu'n nyajnigüëxigibych müich nmic'ajt müich m'oy'ajt ma yi' jay ajcxy. ² Com müich ti xymöyich mic'ajt ma tüg'óciy jäy, jëbi nmöyich ajcxy jugy'ajtin huidibi ca' ycixipy ytiyoyipy. Nmöhuibych jada jugy'ajtin tüg'óciy jäy ajcxy huidibi müich ti xymöyich. ³ Je jäy ajcxy huidibi icy'ajtp je Dios janchypi, je Dios tügpajcpi etz y'ixy'ajtp nañ jadu'n Jesucristo huidibi ti mguexy ya naaxhuiñ, ymíad ajcxy jugy'ajtin huidibi ca'ycixipy ytiyoyipy niminaa.

⁴ Ti ich nyajnigüëxigych müich ajcxy yi' nmic'ajt ya naaxhuiñ, co ich ti nduñ yi' mdung huidibi müich xyajnbijcich. ⁵ Jadachambi Dios Teedy yajmijtigiygich müich, müd je mic'ajtin huidibi anajty nmídicich ma müich mhuinduu co anajty ca'ni naaxhuiñybi chondacyñi.

⁶ Ti ich müich ya naaxhuiñ nyajnigüëxici yi' nmic'ajt ma yi' jäy ajcxy huidibi müich xymooyich, huidibi müich mhuin'ijx ma naaxhuiñyjäy ajcxy. Müich yi' ajcxy mjäy, e müich ti xymöyich, e ti ajcxy müich m'ayuc cuydungixy. ⁷ Jadachambi ñejhuíyñip yi' ajcxy, co tüg'óciy tijaty tiy'ajt ich müich yi' xymooyb, jiiby yi' chooñ tzajpjoty ma müich. ⁸ Com yi' ayuc huidibi müich ti xymöyich, ti ich yi' ajcxy nyajnimaydäy, e ti yi' ajcxy cöbijccixy. E nañ ti ajcxy huinjihuíygyxy tiydudägy co ich jiiby ndzooñich ma müich, e nañ ti ajcxy mbijccixy co müich ya naaxhuiñ xyquejyxych.

⁹ Müd yi' ycixpi ajcxy müich Dios Teedy nmibijctzooy, ca' nmínaaním müd jacjadyii naaxhuiñyjäy ajcxy ycixpi nmibijctzoy. Müd yida'ajty ycixpi ajcxy huidibi müich ti xymöyich, com nañ mjë'ajtyp müich yi' ajcxy. ¹⁰ Tüg'óciy tijaty ich një'ajtyp, nañ mjë'ajtyp müich yi', e tijaty müich mjë'ajtyp nañ një'ajtyp ich yi'; e ich nmic'ajt nigüëx'cp yi' ma yi' ajcxy chinaayin yjugy'ajtin.

¹¹ E ca' n'ocjacyajpadaanich ya naaxhuiñ. Ich njäy ajcxy jacyajpadam ya naaxhuiñ. Nñicxnibich jiiby tzajpjoty ma müich. Dios Teedy, cuend'at ich ndiscípulos ajcxy müd müich nmic'ajt huidibi müich ti xymöyich, jigix yi' ajcxy tú'ciy yjot yhuinma'n yajpaadipy ma müich, tim jadu'n nej ich ajt tú'ciy njot nhuinma'n nyajpaatim. ¹² Co anajty ich njac'yaajity naaxhuiñ müd ich njäy ajcxy, ti nguënd'atych anajty ajcxy müd je mic'ajt huidibi müich xymooyich. E ni tüg ajcxy ca' yhuinma'ñyigooy. Abicy ich n'octimpidägy je huidibi nayyajhuinma'ñyigooyi (je Judas Iscariote), co yi' anajty jadu'n yajcuydunam jadu'n nej jaybety ymiñ müd yi' ycixpi etz müd ich ycixpi.

¹³ Cham ich müich níba'ttigihuaani jada'. Müich m'ayuc mdíy'ajt nyajnimaaaybich jada naaxhuiñyjäy ajcxy huidibi nyaj'ixpijtypich, jigix agujc jotcuyc yhuí'mip ajcxy. ¹⁴ Ti ich

ajcxy yi' nyajnimaydäyich miich m'ayuc mdiy'ajt. E ca' ajcxy y'ixa'ñiyi yi naaxhuiñyäjy ajcxy huidibi ca' xymijpidägyich. Com je' co ajcxy yjot yhuinma'n ti yajtigach, ca' ytügyi müd yi jacyadyi naaxhuiñyäjy yjot yhuinma'n. Jadu'n nej iich ca' ytügyi njot nhuinma'n müd naaxhuiñyäjy ajcxy yjot yhuinma'n. ¹⁵ Ca' iich cham miich nmibijctzoy co myajpidzimipy iich ndiscipulos ajcxy ma jada naaxhuiñybi. Hue' janchtiy tun may'ajt cuend'at ajcxy ma yi ca'oybi ymiñi. ¹⁶ Yi' ajcxy yjot yhuinma'n ca' ytügyi müd yi jacyadyi naaxhuiñyäjy ajcxy yjot yhuinma'n. Tim jadu'n nej iich ca' ytügyi njot nhuinma'n müd yi jacyadyi naaxhuiñyäjy ajcxy yjot yhuinma'n. ¹⁷ Yajhuaatzajcxy yjot yhuinma'n müd miich m'ayuc, com yi m'ayuc yi' je' tiy'ajt müd. ¹⁸ Jadu'n nej miich xyquejxyich ya naaxhuiñ, nañ jadu'n iich yi' ajcxy nguejxhuäcxyich ya naaxhuiñ. ¹⁹ Müd yi' ajcxy ycixpi ti nnaygiyegyiijich amuumdügjot ma miich, jigix yi' ajcxy nañ jadu'n ñaygiyegyiib amuumdügjot ma miich, co ajcxy cuydunipy miich m'ayuc mdiy'ajt.

²⁰ E ca' iich jada'ajty ajcxy nibijctzohuiyich. Hue' iich janchtiy nibijctzohuiydaaybich tüg'óciy jay ajcxy huidibi xymibijcibich xymijpidägyich müd yi ayuc huidibi iich ndiscipulos ajcxy ycapxhuäcxiy. ²¹ Huen ajcxy nidüg'óciy yjot yhuinma'n yajtügü, jadu'n nej miich Dios Teedy mjot mhuinma'n yajpaady ma iich, e iich njot nhuinma'n yajpaady ma miich. Co yi' ajcxy yjot yhuinma'n yajtügühiipy müd iich ajt njot nhuinma'n, huin'it jacyadyi naaxhuiñyäjy ajcxy mibigipy co miich xyquejxyich ya naaxhuiñ. ²² Ti iich ajcxy nmöyich je tiy'ajt etz je oy'ajt huidibi iich miich ti xymöy, jigix ajcxy yjot yhuinma'n jatymy yajtügühiipy ajcxy, jadu'n nej iich ajt njot nhuinma'n yajpaatim tü'ciy. ²³ Iich yajpatpich ma iich njäy, e miich nañ myajpatp ma iich, jigix tiydudägy ajcxy tügmucy y'idipy, e nañ jigix naaxhuiñyäjy ajcxy jatymy nejhuñhiipy co miich xyquejxyich ya naaxhuiñ, e nañ co yi' ajcxy ti mdzocy ti mjihuñy jadu'n nej iich miich xychocy xyjihuñyich.

²⁴ Dios Teedy ndzojpcyich co yi' jay ajcxy huidibi miich ti xymöyich y'idipy ajcxy nañ jadu'n ma anajty n'ityich jibiy tzajpjoty, jaydëbi ajcxy ixipy iich nmic'ajt iich n'oy'ajt huidibi miich ti xymöyich. Com miich ti xychocy ti xyjihuñyich jacyajip ca'ni anajty naaxhuiñybi myajcojñi. ²⁵ Dios Teedy, miich ooy mmijity mjanchity, e yi' jacyadyi naaxhuiñyäjy ca' ajcxy yi' xy'ixy'ajtyp. Iich miich n'ixy'ajtyp. Iich njäy ajcxy ti mibicy ti mijpidägy co miich xyquejxyich ya naaxhuiñ. ²⁶ Ti nyajnimaaayich yi' ajcxy pin miich, co miich je' Diosip. E njacyajnimähuaamyich yi' ajcxy tiydudägy, jigix yi' ajcxy nañ jadu'n ñaychogiyb ñayjihuñyib nidüg' nidiug, jadu'n nej miich xychocy xyjihuñyich, e nañ jadu'n jigix iich ndiy'ajt yajpaadipy ma yi' ajcxy yjot yhuinma'n.

18

Ymajtz ajcxy Jesús

¹ Co jadu'n Jesús ycapxymiydacy jayip, chi jada' ñicxy müd je jay ajcxy huidibi anajty ajcxy yaj'ixpijcy. Ñicxy ajcxy jim'amy huoc nñaxy, je huoc hue' anajty xijity Cedrón. Ñicxy ajcxy jim ma anajty tüg aguemy. Chi Jesús ytiñy ma je aguemy müd ydiscipulos ajcxy. ² Judas huidibi anajty cñeygam Jesús, ñejhuñyib anajty ma je it ma anajty müd'oy canaag'oc je' ydiscipulos ajcxy. ³ Chi jada' Judas müddzoñ soldados ajcxy etz jacyadyi tungmüdp huidibi je teedy yhuindzin ajcxy etz fariseojäy ajcxy yquejx. Chi ajcxy yja'ty ma je it ma anajty Jesús yajpaady, ymiid ajcxy linterna, ymiid ajcxy chinjin etz canaagnax tijaty huidibi anajty ajcxy müd chiptuñ. ⁴ E Jesús com ñejhuñydaayb anajty tüg'óciy nej anajty yjada'ñ y'ayohua'ñ, chi jipcohuägyi je ymaymidzip ajcxy, e ñimay:

—¿Pin ajcxy m'ijxtaayb?

⁵ Chi je' ymidzip ajcxy y'adzooy:

—Yi' iich ajcxy n'ixtaayb je Jesús, je Nazaret jäy.

Chi Jesús yminañ:

—Iich jëdu'n.

Je Judas huidibi anajty cñeyjcp Jesús, jim anajty ytinäy müd Jesús ymidzip. ⁶ Co Jesús jadu'n yminañ: "Iich jëdu'n." Chi ajcxy yëphuibijtay jadu'ñyi. ⁷ Chi Jesús jadüg'oc y'amidooy ajcxy:

—¿Pin ajcxy m'ijxtaayb?

Chi ajcxy jadüg'oc y'adzooy:

—Yi' Jesús, je Nazaret jäy. ⁸ Chi Jesús yminañ:

—Ti ajcxy njanimäy co iich jëdu'n. Pen janch iich miich ajcxy xy'ijxtaayb, najtmadziydäy jadaayaab iich nmigütiyc ajcxy, huen nicxcixy.

⁹ E jadu'n yajcuyduñ je ayuc co anajty Jesús ci'm ti yminañ: "Tüg'óciy jay huidibi nDeedy ti xymöyich, ca' ni tüg jëbi huaad ytiagooy." ¹⁰ Chi jada' je Simón Pedro huidibi anajty müd tüg espada, juudy je y'espada ma ñidijc, e chi yajtzaachiyi je Teedy mijtungmüdp ytumbi, tüg yta'tz'ac aa'oy'amybi yajminäciy. Je tumbi hue' anajty xijity Malco. ¹¹ Chi Jesús ñimay Pedro:

—Pidäg m'espada ma ñidijc. Ca' mnejhuñy co copicy nyajnaxipyich je tzaachypi je ayo'n huidibi Dios Teedy ti xyajniño'adug'yich. Min n'ocminaxy n'ocyajnaxyich jada tzaachypi jadu'n nej ixypiy tüg tasi ta'm'ujtznñ ngo'uucnaxyich.

Jesús ma je Teedy mijtungmüdpí yhuinduu

¹² Chi je soldados ajcxy, je soldado yhuindzin etz judiojāy ajcxy ytungmüdpí huingo-huāñy ajcxy Jesús. Chi ajcxy majch, e chi ajcxy cīxojch. ¹³ Chi ajcxy jayijp yajnicxy Jesús ma Anás yajpaady, je' anajty Caifás ymīd'ajtyp, je huidibi anajty mijtungmüdpí ma teedytjic ajcxy ymīñ je huin'it jīmijt. ¹⁴ Je Caifás je' anajty ti yecy je capxhuijin ma yi judiojāy ajcxy co tügtecy ymīñ: jac'oy co tüg jāy y'ōgipy müd tüg'ōciy naax cājp ycixpi.

Pedro ymīñ co ca' ix'y'adyii Jesús

¹⁵ Simón Pedro müd jadügpí ydiscípulo ypanicx ajcxy Jesús (co je ymidzip yajnicxi mach). E je jadügpí ydiscípulo ix'y'ajtp anajty yajxon je teedy mijtungmüdpí, paady ytigñy axam huin'it co Jesús ymidzip yajtigñy ma je teedy mijtungmüdpí ytič. ¹⁶ E je Pedro jībby je' yhuin'miy ma tič aguu. E je jadügpí ydiscípulo co anajty ajcxy ñay'ix'y'adyii müd je teedy mijtungmüdpí, chi ypidzimy migapxy je tič aguu adinaayb, chi Pedro ajcxy yajtigñy jībby tigoty. ¹⁷ Chi jada' je tōxy'anāg huidibi anajty tič aguu adinaayb, nimay je Pedro:

—¿Nej ca' müñch nañ jadu'n Jesús xydiscípulo'adyii?

Chi Pedro y'adzooy:

—Ca'.

¹⁸ Je tumbidjic ajcxy etz je soldadtjic ajcxy ti anajty ajcxy oy jīn yajmijñyigixy co anajty chachtñichity, e Pedro nañ jīm anajty nañ jadu'n müd xamy ajcxy.

Je teedy mijtungmüdpí yajcomidou Jesús ypocy

¹⁹ Chi je teedy mijtungmüdpí y'amidooy Jesús pinjaty anajty ti yaj'ixpicy etz tijaty anajty ti yaj'ixpicy. ²⁰ Chi Jesús y'adzooy:

—Ti ñich oy njacapxy njamiydāgy mayjājyoty. E ti ñich njatyimiy nyaj'ixpicyich ma müñch ajcxy mnyamujctacīn etz ma Dios ytič, ma yi judiojāy ajcxy nidüg'ōciy ñaymugyīi. Ca' nī ti ameech ti nnigapxyich. ²¹ ¿Na'amy co xyjactim'amidooyich ti anajty ti nyaj'ixpicyich? Yi' ajcxy amidou pinjaty ti xy'amido'ijtič n'ayucich, yi' ajcxy nejhuñyib ti ñich jadu'n ti nyaj'ixpicyich. Yi' ajcxy tüg'ōciy ñejhuñyidaayb nejaty ñich ti nmīna'ñich.

²² Co jadu'n y'adzooy Jesús, huin'it tüg judio tungmüdpí huidibi anajty jīm huingon tīnaayb ma Jesús, chi tüg cī' acojxīgxy Jesús, chi mīñañ:

—¿Nej co jadu'n jībic m'adzooy yi teedy mijtungmüdpí?

²³ Chi Jesús y'adzooy:

—Pen jībic ñich ti n'adzooy yec tiy'ajt nej co yjibicity. Pen oy ñich ti n'adzooy, ¿nej co xycoxyich?

²⁴ Chi Anás nimay soldadtjic co huen Jesús yajnicxy cīxoch jīm ma yi Caifás ytič, je teedy mijtungmüdpí.

Chi Pedro jadüg'oc ymīñ co ca' ix'y'adyii Jesús

²⁵ Simón Pedro jīmñi anajty ytināy ma jīmba' yxamy anajty, chi ajcxy amidoy jadüg'oc:

—¿Nej cay yi' müñch xyaj'ixpičp nañ jadu'n?

Chi Pedro jadüg'oc coyūch Jesús ymīñañ:

—Ca' je' n'ñichity.

²⁶ Nidügti ajcxy je teedy mijtungmüdpí ytumbi, je' anajty y'amigüg yi Malco, huidibi Pedro yta'tz'ac quejtzpujxi, chi jadu'n ymīñañ:

—¿Nej ca' mdijy n'ijxyi jīm ma je aguemy müd Jesús?

²⁷ Chi Pedro midugñg'oc oy coyūch yhuindzin, e tim huin'itiy tzey oy yaaxīgxy.

Jesús ma je gobernador yhuinduu

²⁸ Chi ajcxy jīm yajtzoōñ Jesús ma Caifás ytič yajnicxy ajcxy ma agujctijc, tim jopyñi anajty. Chi je judiojāy ca' ajcxy ytigñy ma agujctijc, com ca' anajty ytundigoyaangixy müd judiojāy ycostumbre. Ca' ajcxy ytiğñhua'ñ anajty ma je romanojāy gobernador ytič amayxñijoty, e ca' anajty ajcxy ñayyajibicñhua'ñyīi. Com co jadu'n ycanayyajibicñyīi ajcxy, e huin'it ca' ajcxy ycacaay ma je pascua xī adzuu'ajtin. ²⁹ Co ca' ajcxy ytiğñhua'ñ anajty ma je agujctijc, chi je gobernador Pilato nibidzimy ajcxy tība'y ma anajty ajcxy müdity Jesús cuend'aty. Chi Pilato ymīñañ:

—¿Ti xīhuin ajcxy mmüdpí, müd jadayaabi yēdydjic?

³⁰ Chi ajcxy y'adzooy:

—Co ixypiy ca' ti jībicpi tuñ, ca' ixypiy ñich ajcxy ya yi' nyajmīñ ma müñch.

³¹ Chi Pilato ymīñañ:

—Yajnicxcix müñch ajcxy. Nīcx tiyduñgix jadu'n nej müñch ajcxy mley y'ané'my.

Chi je judiojāy ajcxy y'adzooy:

—İich ajcxy ca' ni ti mic'ajt nmüidity nicxy İich ajcxy njäyyaj'ögy.

³² Co jadu'n ajcxy yminañ, chi jadu'n ajcxy cuyduñ je Jesús yci'm'ayuc jadu'n nej anajty ti yminañ ti o'cin anajty ypadamy. ³³ Chi Pilato jadüg'oc ytiğiyy jüby aguctigoty, chi coyaaxiyy Jesús, chi nimay:

—İNej miich je' rey'ajtp ma yi judíoäy ajcxy?

³⁴ Chi Jesús y'adzooy:

—İNej mgi'mhuinmañ müd xy'amidooyich pen İich nrey'ajtpich, o huingjäy ti xyajnimäy co nrey'atyich?

³⁵ Chi jada' Pilato y'adzooy:

—İNej nañ judiojäy jada' İichi? Mgi'mnaax mgi'mgajp etz je teedy mjtungmüdpı ti xycıyey ma İich. İTi ti mdundigooy?

³⁶ Chi Jesús y'adzooy:

—İich ca' n'ane'myich ya naaxhuiñ. Huingduum İich n'ané'min nmüdidyich. Co İxyipy ya naaxhuiñ n'oc'ane'myich, tüg'óciy İich nmigütiyc ajcxy ti İxyipy ajcxy tziptungıxy, ti İxyipy ajcxy xyñihua'İich. E ca' İxyipy ti naygiyeyüjich ma yi judiojäy tungmüdpı ajcxy. Per janch İich ca' İich ya naaxhuiñ n'ane'myich.

³⁷ Chi Pilato y'adzooy:

—İNej mrey miichi?

Chi Jesús yminañ:

—Miich jadu'n xytijypich co nrey'atyich. Paady ti nmiñich ya naaxhuiñ, e ti nma'xung'atyich, jigix nyecyich tiy'ajt tiydudägy. Tüg'óciy yi jäy pinjaty tiy'ajt cuydumb xy'amido'İtibich yi' n'ayucich.

Pilato y'ane'my huen Jesús yaj'ögyi

³⁸ Chi Pilato y'adzooy:

—İTi jadu'n mdijy tiy'ajt tiydudägyı?

Jadu'ñyi je' jada'ajty yjacminañ, chi pidzimy jadüg'oc tıba'y ma anajty je judíoäy ajcxy. Chi ajcxy nimay:

—Ca' İich ni ti bocy nbaadyich ma jada jäy ma yi romanojäy yley. ³⁹ E com miich ajcxy müd tüg costumbre co tüg nnajtzmazııym machyjäy müd jada pascua xıı ycıxpı, İnej mdzojcyp ajcxy co nnajtzmazıhuıbyich jada judíoäy reyı?

⁴⁰ Chi ajcxy nidüg'óciy minanday:

—Jadayaabi jäy ca' mnajtzmazıhuıpy, yi' janchtiy mnajtzmazıı' yi Barrabás.

Barrabás hue' je' anajty tüg meetzpi.

19

¹ Chi jada' Pilato ané'min pidacy co huen ajcxy Jesús huınhuopy jıjphuopy. ² Chi jada' je soldados ajcxy yaj'oyııy tüg corona mıj'apy pa'apy, chi ajcxy yajcojenıy Jesús. Chi ajcxy yajñıjenıy tüg rey yhuıt ucypı ycolor. ³ Chi soldados ajcxy huingohuägyı jadüg'oc capxpoocxıxy yajxıgy'amy, nımaaygıxy:

—İViva miich judíoäy rey!

Chi ajcxy ooy huingojxy jıjpcojxy.

⁴ Chi Pilato jadüg'oc ypidzimy tıba'y. Chi nimay je mayjäy:

—Cham ajcxy nyajpidzimy tıba'y jada Jesús, jigix ajcxy mnejhuıhuıpy co ca' ni ti pocy ti nbaadyich ma yi'.

⁵ Co Jesús ypidzimy tıba'y müd je apy corona ma ycohuajc etz je rey yhuıt ucypı ycolor. Huın'ıt Pilato yminañ:

—İjxcıx, cha je yäyđıjc.

⁶ Co je teedy tungmüdpı etz je judiojäy ajcxy İjxy, chi ajcxy yminanday nidüg'óciy aguıpxyjatyı:

—Yajcruudzpet, yajcruudzpet.

Chi Pilato yminañ:

—Yajcruudzpejtıx miich ajcxy, janch İich ca' ni ti tiy'ajt nbaadyich nej İich yi' nyajcruudzpedıpy.

⁷ Chi je judiojäy ajcxy y'adzooy:

—İich ajcxy müd tüg cötujcin, jēbi y'ögy müd İich ajcxy ngötujcin ycıxpı, com ti ycapxtigooy co yminañ co yi Dios yteedy'ajtp.

⁸ Co jada ayuc midooy Pilato, chi nıgi chıgiygoty. ⁹ Chi ytiğiıy jadüg'oc ma je cötujctac müd Jesús, chi nimay:

—İMa miich tiıyı mgogajpıty?

E Jesús ca' y'adzooy.

¹⁰ Paady Pilato yminañ:

—¿Iich miich ca' xy'adzohua'n? ¿Ca' mnejhuüy co nmüdidyich mic'ajt jëbi nnajtzmazdzy etz nañ jëbi nyajcruudzpety?

¹¹ Chi Jesús y'adzooy:

—Ni ti mic'ajt ixypiy mgamüidity ma iich, pen ca' ixypiy mic'ajt ti xymöyich yi huidibi ane'mb jüby tzajpjoty. E paady ycixpi yi tübi iich xycüeycyich nigi yi' pocy müidity ca'ydí miich.

¹² E huin'it Pilato ooy yjahuinma'n ixtay nej huaad ca' jëbi ocnajtzmazdzy Jesús. E je judíoäy, je Jesús ymidzip, nigi anajty ajcxy chachxi'idich:

—Pen miich mnajtzmazdzyb jada Jesús, huin'it ca' m'ocjacnaymigüg'ájtinipy müid yi mhuindzin je César huidibi ané'min ti xymöy. Com tüg'óciy pinjaty naydijip rey, ca' yi' müid nay'ixa'nüy je César.

¹³ Co Pilato jadu'n ayuc midooy, chi yajpidzimy Jesús tiba'y. Chi Pilato y'ixtacy jim ma je' y'ane'mdac ycötujtac, jim ma je it huidibi anajty xiijip Empedrado, hebreo'amy xiijity Gabata. ¹⁴ Hue' tim cujcxü anajty, e chi com jabom anajty je pascuaxü ycodücxni, co Pilato jadu'n nimay judíoäy ajcxy:

—Cha ajcxy jada mrey.

¹⁵ E je' ajcxy y'adzooy:

—Huen ögy, huen ögy. Yajcruudzpet.

Chi Pilato yminañ:

—Miich ajcxy mrey, ¿miñ n'ocyajcruudzpétyichi?

Chi je teedy tungmüdpí ajcxy y'adzooy:

—Iich ajcxy ca' iich ajcxy huingbi rey nmüidity, jëyi César iich ajt nrey'ajtim.

¹⁶ Chi Pilato cüeycy Jesús ma je judíoäy ajcxy, huen ajcxy ci'm yajcruudzpety. Huin'it ajcxy Jesús nihaügy. Chi ajcxy yajtzoön.

Yajcruudzpejty ajcxy Jesús

¹⁷ Chi ajcxy je cruudz Jesús ci'm yajquejycabüy. Müid nicx ajcxy ma je it xiijity o'cpi cohuajc, hebreo'amy xiijity Gólgota. ¹⁸ Jim ajcxy yajcruudzpejty quipxy müid jametz jäy, tüg anajty'amy, jadüg a'oy'amy etz Jesús cujc'amy. ¹⁹ Chi Pilato ane'my huen cijxjay ayuc ma je cruudz, e jadu'n je ayuc ajcxy jay: “Jesús, Nazaret jäy, je judíoäy ajcxy yrey.” ²⁰ May ajcxy ooy je judíoäy capxy je ayuc huidibi anajty cijxjay ma je cruudz. Com je it ma anajty ajcxy Jesús ti yajcruudzpejtcixy mihuingon anajty Jerusalén. Hue' anajty yjayity: hebreo'amy, latin'amy etz griego'amy. ²¹ Chi je teedy mjtungmüdpí ajcxy nimay je Pilato:

—Ca' ixypiy jadu'n ti mjay: “Judíoäy yrey”. Hue' ixypiy ti mjay: “Yi' jadu'n naydijip iich judíoäy xyrey'ajtpich.”

²² Chi Pilato y'adzooy:

—Yi tübi njaayich, ti iich yi' njaay, ca' nyajtigadza'nich.

²³ Co soldados ajcxy yajcruudzpejtay je Jesús, huin'it je' yhuít ajcxy huijtzí'ci. Chi ajcxy je huit yajhuäcxy midaxpicy. Chi soldados ajcxy cijptüg ciichypijcy. Yi' yjocxhuit jadu'n nej anajty ytügijpxuyity. ²⁴ Chi ajcxy ñayñimayí ac jëyi soldadtijc:

—Ca' huaad ajt n'agüdzüym jada jocxhuit. Tzoc ajt suerte n'oc'ijxim, jigix ajt nnejhuüyím pin anajty suerte'ajtip.

E jadu'n ajcxy cuyduñ nej anajty ycojaayity ma Dios ñecy, ma Cristo jadu'n yminañ: “Yajhuäcx ajcxy iich nhuit, e ma iich njocxnijen jim ajcxy suerte ijxy.” Je' je' huidibi soldadtijc ajcxy ycuuyduun.

²⁵ Jim ma Jesús ycruudzmijc, jim anajty ajcxy ytinäy: Jesús ytaj, je ytaj chi', je María (Cleofas ytöxyjc), etz María Magdalena. ²⁶ Co Jesús ijxpaty ytaj etz je ydiscípulo huidibi anajty ooy nigi tzocy ma ytaj ymijc, chi nimay ytaj:

—Nan, iich nmigüg huidibi tinaayb ma miich mmijc, yi' xycuend'adip jadu'n nej jihuüy miich yi' xytaj'adyii.

²⁷ Chi Jesús nimay je' ydiscípulo:

—Iich ndaj miich mgüend'adipy, jadu'n nej ixypiy mgi'mdaj'adyii.

Jadu'n nej xi' tiempo jac nicxni Jesús ytaj tzinaydacpicy ma jada discípulo ytijc.

O'c Jesús

²⁸ Co jadu'n ytundaayí yjajtaayí, chi Jesús nejhuüy co ti anajty tüg'óciy ytundäyí yjajtäyí jadu'n nej Dios tzocy. Huin'it jadu'n yminañ:

—Tidzüyínibich.

Co jadu'n yminañ, je' anajty ycuuydundaayb nej anajty ycojayity ma Dios ñecy müid yi' ycixpi.

²⁹ Jim anajty tüg pi'c uugi'nü ymüid anajty vinoxunnü. Chi ajcxy je' yajxoogy tüg esponja (jadu'n yi' nej po't) müid vinoxunnü, e chi yajjip'eedzüy tüg paxyjijp, je' müid yajjädy je

vinoxunnü ma Jesús y'ahuac. ³⁰ Co jada' Jesús co'uucnajxy je vinoxunnü, huin'it jadu'n yminañ:

—Ti tüg'óciy nguydundäyich.

Chi ñaax'ijxy, e chi y'o'cni.

Tüg soldado cumy Jesús ma ycaachyijp

³¹ Com jabom anajty je pascua mijxü (amayxü ooy), e nañ sábado xü anajty. Paady copicy anajty co ajcxy yajminácpicy ajcxy je jāy ninícx je tübi anajty yajcruudzpejtcixy. Miid je' ycixpi je judío jāy ajcxy ma Pilato pijctzoy may'ajt co huen ane'my yi soldados ajcxy, co huen nícxy yajtijy je jāy ytecy ajcxy huidibi ti yajcruudzpety. ³² E chi ajcxy je soldados yja'ty ma je it ma ajcxy yajcruudzpejty Jesús. E je metzpi jāy ajcxy ytecy tiji huidibi ajcxy yajcruudzpejt tú'ciy miid Jesús. ³³ Co je soldados ajcxy ymijhuāgy ma Jesús, huin'it ajcxy ijxy co ti anajty y'o'cni, paady ca' ajcxy tiji ytecy.

³⁴ Chi tüg soldado cumy Jesús ma ycaachyijp miid quipy jipxü'ñybi. E huin'it tim mic'amy ni'py etz nü ypidzimy. ³⁵ Tüg jāy jim anajty icy nej ytuni yjajti, e nañ yejc tiy'ajt. E je' ytiy'ajt janch je', e je' nejhuñyby co yjanchity. Miid je tiy'ajt ycixpi jēbi miich ajcxy nañ jadu'n mmibijctahuip. ³⁶ Paady je' jadu'n ytuni yjajti, co jadu'n anajty yajcuyduna'ñ jadu'n nej yjaybetyty ma Dios ñecy, co jadu'n yminañ: “Ca' huaad ni tüg ypajc yajtijy.” ³⁷ E jadüg'it anajty ycojaayity ma Dios ñecy, ma jadu'n yminañ: “Y'ixipy ajcxy je jāy huidibi ajcxy ycuum.”

Yajnaaxtigüy Jesús

³⁸ Jim anajty José huidibi anajty cogájpip Arimatea. Yi' je' huidibi anajty mijpidacp Jesús, oy anajty ca' capxpizimy, miid co anajty chigüy miid je judío jāy ajcxy huidibi anajty midzip'ajtp Jesús. Co Jesús y'o'cy huin'it José oy pijctzoy may'ajt ma Pilato, co jēbi nícxy yajtzooni Jesús ñaaxnícx ma anajty ti yajcruudzpedyüi. Co Pilato a'ixiy, chi José ñicxy jim oy yajminajci je Jesús ñaaxnícx, e chi yajnicxy. ³⁹ Nañ miid ñicxy José je Nicodemo, je huidibi anajty jayijp ti ni'oy Jesús coodz. Nicodemo yminicx oy nimigo'px libra mirra etz áloes tzooy huidibi ooy oy yxuugy. ⁴⁰ Chi ajcxy yajpidici Jesús ñaaxnícx, chi ajcxy mo'ñ miid poob huit, chi tzooy ajcxy miid mirra etz áloes tzooy, jadu'n nej je judío jāy ajcxy ycostumbre miidity co o'cpi yajnaaxtigüygixy. ⁴¹ Huingon ma je it ma ajcxy yajcruudzpejty Jesús, jim anajty tüg aguemy, e jim ma je aguemy jim anajty tüg o'cpi jut jemybi ma anajty ca'ni pin ñaaxtigüy. ⁴² Jim ajcxy Jesús ñaaxnícx yajnaaxtigüy, co anajty jim yjac-huingonity, e janch jottigooy ajcxy yajnaaxtigüy, miid co anajty ti chu'ñyñi, e je judío jāy ajcxy tzachni'ixüñi tzach'a'ixüñi co je amayxü anajty chondägaani com jabom.

20

Jesús jugypijc jadüg'oc co anajty ti y'o'c'cni

¹ Tim seman ixtigi', moñy anajty, ca' anajty oy xümiñyñi. Huin'it María Magdalena ñicxy ma Jesús anajty ti ñaaxtigüy. E chi jim ijxy co je tzaa ti anajty jim yajjiidiguecy ma je jut aguü. ² Co ajcxy ijxy je jut ahuādz, chi jada' mic'amy poyügy ninícx Simón Pedro, etz je jadügpi ydiscípulo huidibi anajty Jesús miid ooy naychogyüi, chi nimay:

—Ti yajtzoongixy ich ajt nHuindzin ñaaxnícx ma ajcxy yajnaaxtigüy, e ca' nejhuñyñim ma ajcxy ti pidaaccixy.

³ Huin'it ajcxy nimetz choon poyügy Pedro etz je jadügpi discípulo, ñicxy ajcxy ma je o'cpi anajty ñaaxtigüy. ⁴ Poyügy ajcxy ñicxy nimetz, per je jadügpi discípulo jayijp ñajxy, e jayijp jim oyja'ty ma je naaxtigüy. ⁵ Chi yco'ixüy jutjoty, huin'it jim oy icy je mo'nhuít jilby jutjoty y'ooxnāy, per ca' yi' jilby ytiñy jutjoty. ⁶ Simón Pedro co ymiñ jac'axam, tim janitigüy jutjoty, chi ijxy je mo'nhuít y'ooxnāy jilby jutjoty. ⁷ E chi ijxy je cōxotz, je huidibi anajty miid ycohuaqy yxochity, abicy je' anajty, ca' anajty tú'ciy y'ooxnāy miid ymo'nhuít. Y'ijx ajcxy je cōxotz yajxon y'anēgyity abicy. ⁸ Huin'it ytiñy jutjoty je jadügpi discípulo huidibi jacyajijp ja't. Chi ijxy, e huin'it mibijcy co Jesús ñaaxnícx ca' anajty jilby. ⁹ Ca'ni anajty ajcxy yajxon huinjhuñy co anajty jadu'n ycojaayity ma Dios ñecy, co anajty je Cristo yjugypiga'ñ. ¹⁰ Chi je metzpi ajcxy ydiscípulos yhuimbijty ma ytiç.

Jesús nayguēxi ma María Magdalena

¹¹ E je María jim yhuñ'miy ma je o'cpi jut ayaaxip. Chi ayaaxip yco'ixiy ma je jut. ¹² E chi ijxy metz ángel, poob huit ajcxy ymiid, y'ñaaygixy jilby ma je Jesús ñaaxnícx anajty yhuitznāy, y'ñaaygixy tüg cōduy, jadüg teci xaa. ¹³ Chi je ángel ajcxy nimay je María:

—Miich töxyjāy na'amy co myāxy?

Chi je María y'adzooy:

—Ti ajcxy nHuindzin ñaaxnícx yajnicxi, e ca' nnejhuñyñich ma ajcxy ti pidägy.

¹⁴ Jadu'n anajty ymina'n, co ñayji'ijxi, chi ijxy Jesús ytinäy ma yjiix, e ca' ijxcapxy pen Jesús je' anajty. ¹⁵ Chi Jesús ymina'n:

—Töxyjäy, ¿ti co myäxy? ¿Pin m'ixtaayb?

María hue' anajty tijy je aguemy cuend'ajtpi migapxi, paady jadu'n ymina'n:

—Huindzin, pen ti myajnicxy Jesús ñaaxnicx, nigapx ma ti mbidägy, e ich nicxy nyajt-zoonich.

¹⁶ Chi Jesús ymina'n:

—María.

Chi jada' María yhuäg-huimbijty, chi yajxon huindicxpejty, chi nimay:

—iRabonil —jada hebreo ayuc yhuimbizimy Huindzin.

¹⁷ Chi Jesús nimay María Magdalena:

—Ca' xyñidooñich, com ca'ni ich nba'ttigüy ma Dios Teedy yajpaady. Nicx miich ixta' nmigütiñich, e nima' co nnicxaamich ma Dios Teedy, ich nDeedy etz miich ajcxy mDeedy, ich nDios, etz miich ajcxy mDios nañ jadu'n.

¹⁸ Chi María Magdalena oy yajnimäy je discípulos ajcxy, chi jadu'n nimay:

—Ti n'ixyich je Huindzin Jesús, e jadu'n yi' ti xycapxymöyich co nyajnimähuiyich miich ajcxy.

Jesús nayguëxici ma ydiscipulos ajcxy

¹⁹ Co je huin'it xämbi chuu'iy seman ixtigi', aducy anajty tijc'aguu y'ity ma anajty je discípulos ajcxy yajpatcixy, müd co anajty ajcxy tzigüy je judiojäy ajcxy huidibi anajty midzip'ajtp Jesús. Chi Jesús ytiñiy cujc'amy ma je' ajcxy, e chi jada' capxpocxy ajcxy, nimay:

—Jotcugi' miich ajcxy.

²⁰ Yam jadu'n anajty ymina'n, chi ajcxy yaj'ijxy je' yci' ma je clavo ytiñiy, etz ycaachyjijp ma anajty jäy ti ycumyü. Chi yjotcugi' ajcxy co ajcxy ijxy je yHuindzin. ²¹ Chi jada' Jesús jadüg'oc capxpocx, nimay ajcxy:

—Jotcugi' miich ajcxy. Jadu'n nej ich nDeedy xyquejxyich ya naaxhuñ, nañ jadu'n ich miich ajcxy yam nguejxhuäcxy müd ich n'ayuc.

²² Co Jesús jadu'n ymina'n, chi jada' ajcxy nübuxujy cöbuxujy nimay:

—Huen Dios yjihui'n ymic'ajt xy'adigüy xyjottigüy ajcxy. ²³ Huenpinjäyity huidibi miich ajcxy mbocyhuinmeecxyp, nañ ypocyhuinmeecxipy Dios Teedy. Huenpinjäyity huidibi miich ajcxy ca' ypocy mhuinmeecxaani, nañ jadu'n Dios Teedy ca' yi' ypocyhuinmeecxa'ñyü.

Tomás ymibijc co yHuindzin yjugypijcy

²⁴ Tomás je' huidibi anajty müd majmetz yca'pxy Jesús ydiscipulos ajcxy, je huidibi anajty yajtijp Dídimö, ca' je' anajty jim choonity co Jesús ymiñ oga'n. ²⁵ Chi je jacjadyü ajcxy ymigüg ñimaayi:

—Ti ich ajcxy n'ixy je Huindzin Jesús.

E chi je' y'adzooy:

—Pen ca' n'ixyich ma yi' yci' je clavo'au, e pen ca' ngühuäxich ngodijiyich ma clavo'au, e ngü' nbidägyich ma ycaachyjijp ma anajty ycumyity, ca' nmibigipyich co yjanchity.

²⁶ Chi jacoductujc xii ajcxy jadüg'oc anajty yajpaady tigoty nidüg'öciy je discípulos ajcxy. Tzoon anajty Tomás nañ jadu'n. Chi Jesús ymiñ. Agüy anajty tijc co Jesús ytinay'ahuüy cujc'amy ma je' ajcxy. Huin'it ycapxpocxy, chi nimay:

—Jotcugi' miich ajcxy.

²⁷ Chi jada' nimay je Tomás:

—Pidäg ya mgühuäx ma clavo'au ma ngüjich. Najtzxaji' mgi' etz pidäg ma ich ngaach ma jäy xcumyich, e mibic yajxon tiydudägy.

²⁸ Chi Tomás y'adzooy:

—Ich miich nHuindzin'ajtp etz ich miich nDios'ajtp.

²⁹ Chi Jesús Tomás nimay:

—Müd co miich ti xy'ixyich, paady miich ti mmibicy. Jotcujc yi' ajcxy huidibi ca' xy'ixyich, e ti ymibicy co ti njugypicyich co n'o'gyich.

Jada ayuc ngojaaybich ma jada necy, jigix miich ajcxy mmibigipy co Jesús je' yi' je Cristo, je Dios y'ung

³⁰ Ti anajty Jesús ooy tuñ mijhuinmañ ma ydiscipulos ajcxy yhuinduu huidibi ca' yco-jaayity ma jadayaabi necy. ³¹ Paady ycix jada ngojaayich jigix ajcxy mmibigipy co Jesús je' yi' je Cristo je Dios y'ung. E co miich ajcxy mmibigipy, huin'it mbaadip jugy'ajtin huidibi ca' tücc'i'yi yciixipy ytigoyipy müd Jesucristo yxi yciixpi.

¹ Co jadu'n jayijp ytuni yjajti, huin'it jadüg'oc Jesús ñayguëxíci ma je' ydiscípulos ajcxy jim ma mejypa', je huidibi anajty xiijp Tiberias mejy. E jadu'n ñayguëxíci: ² Jim anajty ajcxy Simón Pedro müd Tomás huidibi jáy ytiijp Dídimó. Nañ jim Natanael huidibi anajty cogajp jim Caná Galilea naaxjot. E nañ jim anajty je Zebedeo ymang ajcxy etz jametz discípulos ajcxy. ³ Chi Simón Pedro yminañ:

—Nícxý n'oc'acxmachich.

Chi ymígügtijc ajcxy yminañ:

—Tzoc ajt jámim.

Chi ajcxy ytiíy ma tüg barco. E je huin'it tzuu ca' ni ti ajcxy majch. ⁴ Co yjóbíy jim Jesús anajty ytináy ma mejypa'. Je' ydiscípulos ajcxy ca' anajty ajcxy nejhuíy co Jesús je' anajty.

⁵ Chi Jesús yminañ:

—Mígügtijc, ¿nej ca' ajcxy mbaadyñi acxi?

Chi ajcxy y'adzooy:

—Ca' ni ti.

⁶ Chi Jesús yminañ:

—Pidaaccix ajcxy je huidibi müd m'acxmajtcixy aa'oy'amy ma yi barco, e huin'it ajcxy mbaadipy acx.

Chi ajcxy pidacy je acxmadzi'ñ aa'oy'amy, e huin'it janch adzaach ajcxy yajpidzimy, co janch may acx anajty ti ytiíy. ⁷ Je ymígüg huidibi müd Jesús ooy anajty ñaychogyi, chi nimay Pedro:

—Je' yí, íich ajt nHuindzin.

Co jadu'n midooy Simón Pedro co anajty yjéjty je Huindzin Jesús, huin'it yhuít yajtigíy. Com ti anajty yhuít jeñ, com jadu'n anajty jac'oy ytuñ. Chi ytiíy mejyjoty huitmüd.

⁸ Jacjadyi ajcxy ymígügtijc yjády ma mejypa' müd je barco, pahuich pajugucy ajcxy je y'acxmadzi'ñ janch ujtz müd acx. Hue' anajty ca' ooy yjigüemyity ma mejypa', jéyi anajty migo'px metro yjigüemyity. ⁹ E co ajcxy ymejch ma mejypa', chi ajcxy ijxy co jim anajty jimbajc y'ity ni'ixi', e jim anajty acx jimbajc nigix huidibi yajtzaayb, e nañ jim anajty tzajcaagy. ¹⁰ Chi Jesús nimay je' ydiscípulos ajcxy:

—Yajmiingix yi acx tiibi ajcxy mmajtcixy.

¹¹ Chi Simón Pedro ypejty barcojoty, chi yajpidzimy huindíztuum y'acxmadzi'ñ ujtz müd may'acx. Chi ajcxy míchoy migo'px jahuixchigi'px majctugig acx mijatypi, e jadu'n ca' je acxmadzi'ñ yciich müd tzachmay'acx. ¹² Chi Jesús nimay ajcxy:

—Min ajop'ajtcix.

E ni tüg ydiscípulos ajcxy ca' y'amidoohui:

—¿Pin müich?

Com ñejhuíyb anajty ajcxy co je' anajty Huindzin Jesús. ¹³ Chi Jesús ymijhuägy ma je acx ci' etz tzajcaagy anajty y'ity, e chi yajhuäcxy, chi moyday ymígügtijc ajcxy.

¹⁴ E je' je' anajty je midugig'ocpi co Jesús ñayguëxíci ma je' ydiscípulos ajcxy, huin'it co yjugypíjcy co y'o'cy.

Jesús yajni'ixíy Simón Pedro ti ytunipy

¹⁵ Co ajcxy y'ajop'ajttay, chi Jesús nimay je Simón Pedro:

—Simón, Jonás y'ung, ¿nej xyjactzojcpich müich, ca'ydí jada jacjadyi ndiscípulo'ichi?

Chi y'adzooy Pedro:

—Huindzin mnejhuíyb müich co ndzojcpich njihuíybich müich.

Chi Jesús nimay:

—Cuend'at íich njäy, jadu'n nej jihuíy borregi cuend'ajtpi yaj'ocy yi' yborregi.

¹⁶ Chi Jesús míméjtz'oc yminañ:

—Simón, Jonás y'ung, ¿nej xychojcpich xyjihuíybich müich?

Chi Simón y'adzooy:

—Huindzin, mnejhuíyb müich co ndzojcpich njihuíybich müich.

Chi Jesús nimay:

—Cuend'ajtigich njäy, jadu'n nej yi borregi cuend'ajtpi cuend'aty yborregi.

¹⁷ Co midugig'ocpi oy y'amidooy:

—Simón, Jonás y'ung, ¿nej xychojcpich xyjihuíybich?

Chi Pedro yjotmaybijcni co midugig'ocpi y'amidoohui: “¿Nej xychojcpich xyjihuíybich?”

Chi Simón yjac'adzooy:

—Huindzin, müich mnejhuíydaayb tüg'óciy, e nañ mnejhuíyb co íich ndzojcpich njihuíybich müich.

Chi Jesús jacnimay:

—Cuend'ajtigich njäy, jadu'n nej borregi cuend'ajtpi cuend'aty yborregi. ¹⁸ Janch janch íich müich yam jadu'n nimäy: “Co anajty müich mjac'anágnity, ci'm anajty mhuít

nayyajñijēñīyī, e mñicxp anajty ma mñimdzocy. E co mñacmijjāyīhuipy, huin'it mñi' mñajtzxajīhuipy, e huingbi mhuit xyajñijēñīhuipy, e xyajñicxyipy ma anajty ca' mdzocy.”

¹⁹ Co Jesús jadu'n ymīnañ, chi Pedro yajhuinñihuīy jadu'n nej anajty jāy ajcxy yaj'ōga'ñīyī mñid Jesús y'ayuc ytiy'ajt ycixpi, e nañ ma yī y'o'cin tiy'ajt yegipy co ymñid Dios ytiy'ajt.

Je discípulo huidibi anajty Jesús ooy tzocy jihuīy

²⁰ Chi Pedro ñayñi'ijxi, chi ijxy co anajty tú'ciy anajty ymiingixy je' ydiscípulo huidibi anajty Jesús ooy tzocy jihuīy je huidibi anajty iñaayb huington ma Jesús ma je mesa co anajty y'adzūu'ajtcixy. Je huidibi nīmay je' yHuindzin:

—Huindzin, ¿pīn mīich yī' xycīyegam ma yī mmidzip? ²¹ Co Pedro ijxy je jadūgpi discípulo axam Jesús ypanicxyī, chi ymīnañ:

—Huindzin, e jadayaabi mīgūg, ¿ti yī' jadaanip?

²² Chi Jesús y'adzooy:

—Co ixipy ndzocyich co yī' huen jugy'aty ixti mabaad nhuimbityich, ca' mīich xypaady mnejhuīhuipy ti yī' jadam. Panicxcich mīich.

²³ Paady ycixp huinñihuīy je ymīgūgtijc ajcxy co je ymīgūg huidibi Jesús ooy tzocy jihuīy ca' anajty y'ōga'ñ. Per Jesús canan je' anajty jadu'n ytiyyp co ca' y'ōga'ñ. Hue' anajty ti ymīnañ janchtiy:

—Pen ndzojcypich ixipy co jada mīgūg yhuī'mīpy ixti mabaad nhuimbityich, ca' mīich xypaady mnejhuīhuipy ti yī' ytunamy.

²⁴ Je' je' je Jesús ydiscípulo huidibi tiy'ajt yejcp jadu'n nej Jesús ytuñ y'ayoy etz yjajty y'ayoy, e nañ yī' je' huidibi cojay nej Jesús ytuñ y'ayoy, yjajty y'ayoy. E ñich ajt nejhuīyīm co janch yī' je tiy'ajt huidibi ti yecy.

²⁵ May ooy tijaty mij huinmañ Jesús jactuñ. Co ixipy yajcojaydāy tūg'óciy, ca' yī naaxhuīñybi ixipy yhuadāy mñid maylibro tzachpidāgipy. Jadu'n n'aa'ixiyich.

LOS HECHOS

Jadu'n Nej Jesús Y'ayuccapxhuácxpi Ytuun Yjajti

¹⁻² Ma je jayjip'atypi necy, migüg Teófilo, ti nyajnijayjy tüg'óciy jadu'n nej Jesús ytuun etz jadu'n nej yaj'ixpijctzondacy oga'n'aty, ixti cooni ypättigüy tzajpjoty. Ca'ni Jesús anajty ypättigüy tzajpjoty co huin'ixxy je' yjáy huidibi yi' y'ayuc yti'ajt capxhuácxhiib, e chi müd je Espiritu Santo najtztunüy najtz'ane'müy nej huaad ajcxy ytuunipy. ³ Co anajty Jesús y'ögy, chi ñayguéxici canaag'oc ma je' ydiscipulos ajcxy, e huixchigüipx xii ñayguéxigo'ci ma je' ajcxy, yajniquéxigy huadz co anajty yjuugyity, etz nañ yajmüdmidyacy je' yjáy je Dios y'ayuc etz Dios y'ane'min.

⁴ Co anajty jim ijticy tügümy müd Jesús, chi Jesús je' ydiscipulos ajcxy ane'my co ca' huaad jim choongixy jim Jerusalén. Chi ajcxy nimay:

—Ahuijxcix tiibi Dios nDeedy ahuanüy ma müich ajcxy, je huidibi müich ajcxy nyajmüdmidyägy. ⁵ Janch Juan je Bautista jäy yajniibejt müd nü, tzojc müich ajcxy xy'adigühuipy xyjottigühuipy yi Espiritu Santo.

Jesús ypättigüyñi tzajpjoty

⁶ Ni'amugi anajty ajcxy jim müd Jesús, chi ajcxy yajtiüy:

—¿Huindzin, nej myajcödigoyamy je Israeljäy ymüdzip jadachambi?

⁷ Chi Jesús y'adzooy:

—Ca' xypaatcixy mnejhuüygixy je xii je tiempo mina anajty ti yhuaad'ajtni, mina Dios Teedy tuna'n tijaty, je' tügüjic müd cötüjcin tijaty ytuunamy. ⁸ Co anajty je Espiritu Santo chinaydacpicy ma ajcxy mjot mhuinma'n mbaatcixp mic'ajt. E chi mdzoongixp ayuc capxhuácxpi müd iich ycixpi ya Jerusalén, etz tüg'óciy Judea ñaaxjot, etz jim Samaria, etz huindu'my ñaaxhuüfybi.

⁹ Ti jada ajcxy jadu'n yajnimäy, jim anajty ajcxy yhuindüxcixy, chi Jesús chajppejtni. Chi miñ joc yeeg huidi Jesús yajnidigoyday, chi ajcxy ca' ocjac'ixxni. ¹⁰ Jadu'n anajty ajcxy chachpät'ijxcixy tzajpcixy, co Jesús ypättigüy. Huin'it mejtz yëdjic ñayguéxici ma je' ajcxy ymijc, poob huit müd, ¹¹ chi ajcxy ñimaay:

—Galilea jäy ajcxy, ¿nej co mdzachpät'ijxcixy tzajpcixy? Yi Jesús huidibi ti chajppety, ti choon ma müich ajcxy, minaamb jadü'oc jadu'n nej ti m'ijxcixy co ti ypättigüy.

Matías yajhuin'ixxy co Judas ytung jiptunüyipy

¹² Huin'it Jesús ydiscipulos ajcxy chooni ma je cögop huidi xüjip Olivos, yhuimbjctcixni jim Jerusalén, ca' ooy yjigügyity, jëbi yajyöy sábado xii, jadu'n nej Moisés ycötüjcin y'ane'my. ¹³ Co ajcxy yja'ty ma je cajp, chi ajcxy ypejty ma je cuarto mümetz nühuijtzpetypy ma ajcxy anajty müdity yjättac. Jim yi' anajty ajcxy: Pedro, Jacobo, Juan, Andrés, Felipe, Tomás, Bartolomé, Mateo, Alfeo ymang Jacobo, Simón je Zelote etz Judas Jacobo ymiguëx. ¹⁴ Tüg'óciy anajty ajcxy y'ijtcixy tügümy Dios mibijctzoogixy chajpcapxycapxcixy. Ymüd ajcxy anajty Jesús y'uch etz María Jesús ytaj, etz jacjadyii töxyjäydijc.

¹⁵ Huin'it xii Pedro ytinayigy agujc'amy ma je ymügüjic ajcxy huidibi yajmij'ajtp Jesús, huidi anajty ajcxy naybaatip migo'px ja'ipxti jäy, chi nimay ajcxy:

¹⁶ —Migügtijc, copicy co jada yajcuydüniy nej Dios yminañ ma ñecy huidi jaybety ijt, ma David jaay Dios y'ayuc, ma Dios nigapxy Judas. Je'huidi coduu'ajt taabi je judiöy ajcxy majch Jesús. ¹⁷ Je Judas yaj'amichomujcp je' anajty müd iich ajt, paatip anajty Dios ytung tü'ciy müd iich ajt. ¹⁸ Chi Judas ñicxy juy tüg naax müd je muju'n huidibi anajty ti paady müd yjibic-huinma'n. Chi jim mic'amy ycäy tzuxcödeëñ, chi ytopxy ymooxac, e chi ytiinch ypidzimday. ¹⁹ Je jäy ajcxy huidibi anajty tzinaayb jim Jerusalén, co nejhüüy, chi ajcxy yximoy je naax Acéldama, hue' je' yhuimbizimy ma je' ajcxy ayuc, ni'py ñaaxjot. ²⁰ Jada je' je ayuc huidibi David yjaay ma je Salmo necy:

Hui'mip najtz'ixy yi' chinaaydac. E ca' pin yajtunipy.

Nañ jadu'n yminañ:

Huingbi huen yajnicxyii je' ytung.

²¹⁻²² Copicy co tüg yëdjic huidibi müd ti yhuidity nHuindzin Jesús quipxyi müd iich ajt, huen tunipy je tung huidibi Judas anajty ytumyb, maab Juan yajniibety ixti taabi xypuyöyduutim co pättigüy tzajpjot, tüg jëbi testig'aty müd iich ajt co Jesús yjugupijcy.

²³ Chi Jesús ydiscipulos ajcxy huin'ixxy mejtz jäy: tüg jäy huidi anajty yxii José, huidi yxii anajty yajtijy Barsabás etz nañ jadu'n anajty yajtijy Justo. E huin'ixxy ajcxy nañ jadu'n Matías. ²⁴⁻²⁵ Chi Jesús ydiscipulos ajcxy Dios mibijctzoy, yminañ ajcxy:

—Huindzin Dios, m'ijxyp mnejhuüyb tüg'óciy jäy yjot yhuinma'n, yajni'ixyigich jada metzpi jäy huidibi müich nidügti ti nhuin'ixy, je huidibi jëbi jiptigüy müich mdung tü'ciy

müid ñich ajcxy, etz huidibi apóstol'adip. Huen jada jāy jįptigiŷy je tung huidibi Judas ti yajtigooy, co ytundigooy e ñicxy ma ypaadyi.

²⁶ Chi ajcxy suerte iŷy, e je suerte ñibidzimni je Matías. E huin'itŷy je Matías oy ymicho'ndigŷy ma je nimajtųpi ajcxy huidi ycapxhuáčxy Jesús y'ayuc.

2

Co je Espíritu Santo ycidacy choñ tzajpjoty

¹ Co oy je Pentecostés xii paady, jim anajty Jesús ydiscípulos ajcxy ni'amugi' tú'ciy iŷtcixy. ² Huin'it janch timitiini yajmidoy tųg ne'min, choñ tzajpjoty, jadu'n nej poj micpi. Chi yaj'ujtzaay je tigot ma anajty iñaaygixy. ³ Chi nigidaaci nidųg nidųgti toodz jadu'n nej jünye'n. ⁴ Chi je Espíritu Santo nidųg nidųgti ajcxy y'adigŷy yjottigŷy. Chi ytigŷygnxi capxy miydaacp nŷje' nŷje' ayuc jadu'n nej je Espíritu ajcxy yajcapxyi.

⁵ Jim Jerusalén anajty je huin'it xii may judíoŷy ajcxy huidibi tzoomb canaag agajp. Hue' ajcxy chachucdumb judíoŷy ycostumbre. ⁶ Co je cajpjāy ajcxy midooy je ne'min, chi ajcxy ooy yöymujcy. Chi je mayjāy ooy yhuinmay'ahuidijty, co ajcxy midooy chachcapxcixy chachmiydaaccixy ma yci'm'ayuc. ⁷ Je mayjāy ajcxy ooy chigŷy jihuŷy, chi ajcxy ñayñimaay miñ xyipy:

—Ix ŷnej cay Galilea jāy jada ajcxy nidųg'óciy huidibi jadu'n tzachcapxcixy tzachmiydaaccixy ñich ajt ngi'm'ayuc? ⁸ ŷNej ñich ajt co nmido'mbįcjm co tzachmiydaaccixy ñich ajt n'ayuc huidibi ti nmibi'c'ajtım? ⁹ Ya anajty ajcxy Partia jāy, Media jāy, Elam jāy, Mesopotamia jāy, Judea jāy, Capadocia jāy, Ponto jāy, etz cham huidi tzinaayb ajcxy jim Asia ñaaxjot, ¹⁰ etz huidibi ajcxy tzomb jim Frigia, etz Panfilia, huidibi tzomb jim Egipto, etz huidibi tzomb jim ma yi Africa ñaaxjot Cirene nŷnaxy. Nañ jadu'n jim romanojāy huidibi ya adzinaayb. May ajcxy jim huidibi judíoŷy etz nijējity huidibi ca' yjudíoŷyity huidibi judíoŷy ycostumbre ajcxy ti yjįptigiŷy. ¹¹ Ya nañ jadu'n Creta jāy etz Arabia jāy; e ñich ajt tųg'óciy nmidoohuim jada jāy ajcxy nigapxcixy nimiydaaccixy huidi Dios ti tuñ mijcajee ma ñich ajt ngi'm'ayuc.

¹² Nidųg'óciy ajcxy ooy jihuŷy, e chi ajcxy ooy yhuinmay'ahuidijty, miñ xyipy ñay'amidóohuigixy:

—ŷNej jada yhuimbidzima'ñ?

¹³ E nijējity jāy jēyi nixŷgy yajxŷgy, yminaangixy:

—Muucip jada yi' ajcxy.

Pedro yaj'ixpijcy je mayjāy

¹⁴ Huin'it Pedro ytinayŷgy müid je nimajtųpi apóstoles, e ytiŷy capxpı mic yminañ:

—Yēdjįctjcy ajcxy huidibi tzinaayb Judea etz tųg'óciy huidibi tzinaayb ya Jerusalén, nejhuŷuipy miich ajcxy jada e midou ajcxy yajxon huidibi ajcxy nyajnimāhuamyb. ¹⁵ Jada jāy ajcxy ca' ajcxy ymųgyi jadu'n nej miich ajcxy minaangixy. Tim petyxñi jada cham. ¹⁶ Jada je' huidibi ñigapxy je Joel, Dios y'ayuc najtcapxŷybi, co jadu'n mina'ñ:

¹⁷ Je huin'it xii mina anajty je naaxhuiñybi cixa'ñ, jadu'n Dios mina'ñ, nyajhuáčxtāhuibich je nEspíritu ma tųg'óciy naaxhuiñyāy. Miich mnŷx etz mmang ajcxy capxhuáčxip ñich n'ayuc ndiy'ajt, e je yujcyecpidicj ajcxy yhuin'ixipy ooy mijhuinma'ñ, e je mijjāydjc cumāhuipy ajcxy.

¹⁸ Nyajhuáčxtāhuip ñich je nEspíritu huin'it xii ma ñich ndumbi yēdjįcpi tőxyjāybi, e yi' ajcxy capxhuáčxip ñich n'ayuc ndiy'ajt.

¹⁹ Nyajquēxŷibich tzajpcixy huidijaty oy chigŷyñi, e ya naaxhuiñ nyegipyich tiy'ajt: ni'py, jün etz jünjoc.

²⁰ Yi xii ahuimbidipy coodz, etz je po' ahuimbidipy nej ni'py, ma anajty ca' miñ je xii je tiempo mina anajty mina'ñ je Huindzin Dios. Mij ayo'n ji tunaanip jadaanip iŷxna' quēxna'.

²¹ E tųg'óciy jāy huidi miyaaxp ojadaŷp je Huindzin Dios, Dios ajcxy yajnidzōgiib y'alma.

²² Chi Pedro yjacminañ:

—Amido'įtcix, miich judíoŷy ajcxy, jadu'n nej cham nmına'na'ñich. Je Jesús huidibi tzoon jim Nazaret ti xyaj'įxcixy Dios ymic'ajt, mijhuinma'ñ, etz iŷxpejt, jadu'n nej miich ajcxy ti ni'įxcixy ti mnejhuŷygyx. ²³ Jada yajcŷyjc ma miich ajcxy, jadu'n nej anajty Dios ti yajnigódugŷy, e ti huinmay. Ajcxy mmaŷch je Jesús e myaj'ōgy ajcxy, chi ajcxy myajcruudzpejty müid jibic jāydjc y'ané'min. ²⁴ Chi Dios yajjugypijcy yajnihuádzictuty ma yi ó'cin, ca' huaad yhu'my ŷgy huinxi. ²⁵ Je David ñimiydac Jesús chi yminañ: Nejhuŷyibich co je nHuindzin Dios y'ity ma ñich nhuinduu. Yi' įjt ma ñich n'a'oy, jįgix ca'ydi pin xy'adzŷyich xyajhuinma'nydigooyich.

²⁶ Paady ti njotcugiyich, e ti ngapxypidzimiyich co ooy njotcujcich. Paady co oy n'ögbich etz ninicx ñaaxtigihuipy, ca' ndajy mayich.

²⁷ Co miich Dios ca' myajhui'ma'ñ iich n'alma ma ñaaxtigiydac. Ni mga'aa'ixihuipy, co miich mdumbi huidibi ooy mdzocy, co nicxy ñinicx ñaaxhuindigoydäy.

²⁸ Miich Dios, ti xyajni'ixiyich yi tzinaayin huidibi ymiid jugy'ajtín huinixibi. Xya-jjotcugihuibich miid co xymiid'idipyich.

²⁹ Chi Pedro yjacminañ:

—Migügtijc ajcxy, huädz miich mnejhuüyigixy co iich ajt nmij'ap David y'o'cy etz yaj-naaxtigiyi. E ma ñaaxtigiyi nmiidni jè'ajt chambaad. ³⁰ Je David hue' je' anajty Dios y'ayuc ñajtzcapxiiybi, e ñejhuüyb anajty co ti Dios yajnimäyii huidibi ca' y'anijity. David ñejhuüyb anajty co ma y'ap y'oc ma'xung'adipy Cristo, jaydëbi ané'mipy ma David y'ane'mdac.

³¹ Jadu'n co David jecy'ajty huinjihuüy e nejhuiy etz nigapxy jadu'n nej yjugypiga'ñ je Cristo co anajty ti y'ögy. E yminañ co ca' yi' y'alma yhui'mipy jutjoty etz ñinicx ca' ypüdzipy. ³² Dios yajjugypijcy je Jesús co y'o'cy. Jada tiy'ajt iich ajcxy nidüg'öciy nidiy'ajt'ajtpy. ³³ Jadu'n Dios Jesús mooy mij'ajt jüby tzajpjoty, chi yajcidiüiyi je Espíritu Santo huidibi Dios Teedy y'ahuaniiy e tüg'öciy huidibi miich ajcxy ti m'ijxcixy ti mmidoogixy jüby yi' choon ma yi'.

³⁴ Com David ca' je' chajppejty, je David ci'm yminañ:

Je Huindzin Dios nimay iich nHuindzin: “Íña' ma iich a'oy'amy,

³⁵ ixti cooni nmimadactähuibich yi mmidzip, jadu'n anajty nipaady nej jihuüy mdecypocx-pejt'adyii.”

³⁶ Chi Pedro yjacminañ:

—Ñejhuihuipy nidüg'öciy yi Israel jäy ajcxy co janch janch co je Jesús huidibi miich ajcxy myajcruudzpejt, Dios yajniibc co yhuindzin'adipy ma miich ajcxy, etz Cristo huidibi xyñihua'nipy xyajtzögipy ajcxy.

³⁷ Co je mayjäy ajcxy jadu'n midoy, chi ajcxy yjotyungiiy, e amidoy ajcxy je Pedro etz jacjadyii jäy huidi Jesús y'ayuc capxhuäcxi anajty, chi ajcxy yminañ:

—Migügtijc, ¿ti iich ajcxy jëbi huaad nduñ?

³⁸ Huin'it Pedro y'adzooy:

—Jothuimbijtcix e niibejtcix nidüg nidüg miid Jesucristo yxi, jigix Dios miich ajcxy mbocy xyhuinmeecixpy. E jadu'n Dios xymöhuipy je Espíritu Santo. ³⁹ Huidibi Dios y'ahuaniiy miich yi' ajcxy mje' etz m'ung ajcxy, etz m'ap m'oc ajcxy, etz nañ jadu'n je jäy ajcxy huidi jigüemip, etz jacjadyii jäy ajcxy huidi Dios huin'ixamy.

⁴⁰ Miid jadayaab ayuc etz jacjadyii ayuc Pedro yajnimay capxhuiy je mayjäy yminañ:

—Ca' mmijpidaaccix je jäy ajcxy y'ayuc huidibi ca' capxymidooy Dios.

⁴¹ Jadu'n yjajti, je jäy ajcxy huidijaty mibijc Pedro y'ayuc, chi ajcxy ñiibejtay huin'it xii. Ñamayiy ajcxy huidibi mijpidac Jesús y'ayuc oy nidugiig mildi jäy. ⁴² Tüg'öciy ajcxy anajty panicxcixy yi ixpijcin jadu'n nej yi Jesús y'apóstoles ajcxy yaj'ixpijcy. Chinaaygixy yquipxyjot yquipxyhuinma'ñ. Etz Dios mibijctzoogixy e ñayyöymüjcgixy co anajty ajcxy chajcaagy tujc-huäcxaangixy.

Jadu'n nej je mibijpidijc chinaaygixy jugy'ajtcixy

⁴³ Nidüg'öciy ajcxy anajty ooy mijcajee jihuüy. E Jesús y'apóstoles ajcxy iixpejt etz mijhuinma'ñ ooy anajty tungixy. ⁴⁴ Nidüg'öciy je jäy ajcxy huidibi anajty ti ymibijccixy ijtp anajty ajcxy tüg mucy, e yajhuäcxcixy tijaty ajcxy anajty ymiid, mooygixy ymigügtijc.

⁴⁵ Ytoocpy anajty ajcxy yi' ypidägy huidibi anajty ymiid, e chi anajty yajhuäcxcixy yi meefi nije' nije' nej pin ti yajmayjaty. ⁴⁶ Jabom jabom anajty ajcxy ñayyöymugyii ma Dios ytijc, etz nañ ñayyöymugyii ajcxy ma ytijc tzajcaagy tujc-huäcxcixy etz ycaaygixy y'uuccixy ni'amugi' jotcujc miid ajcxy y'oyjot y'oyhuinma'ñ. ⁴⁷ Ñi'igixy niyaacxcixy yi Dios, e tüg'öciy jäy nayyajmij'ajtip anajty ajcxy. Chi je Huindzin Dios yajmayiy jabom jabom yi mibijcpidijc, yi' huidibi anajty patp nidzocin.

3

Tüg tecyma'tpi chögy

¹ Tüg xii Pedro etz Juan ypättigiy ajcxy tú'ciy ma Dios ytijc, mijminacy xii anajty, je' je' anajty je hori mina ajcxy Dios mibijctzoogixy. ² Jabom jabom anajty jäy yajniacxcixy ma je Dios ytijc'aguu tüg tecyma'tpi, jadu'n je' anajty ti yma'xung'aty. Chi ajcxy pidägy je tecyma'tpi ma je Dios ytijc'aguu huidi anajty yxi la Hermosa, jigix jim pijctzohuipy meefi ma je jäy ajcxy huidibi tigiüy ma Dios ytijc. ³ Co je jäy tecyma'tpi ijxy Pedro etz Juan ytigihuangixy anajty ma Dios ytijc, chi pijctzoy meefi. ⁴ Co Pedro etz Juan ijxy je tecyma'tpi, chi Pedro yminañ:

—Huindicxpejtcich.

⁵ Chi je jāy huindicxpejty, yjijp'ijxpy anajty ti mōhuaanip. ⁶ Chi Pedro je tecyma'tpi nīmay: —Ca' nmīdididyich plata, oori, huidibi janchtiy nmīdich je' nmōhuip. Mīid Jesucristo je Nazaretpi ymic'ajt iich miich nīmaayb: Tinaayig etz yōy.

⁷ Huin'it Pedro majch je tecyma'tpi ma a'oygi', e yajtinaygugūy. Huin'itīy y'oyūy ymicpijcy je ytecy etz ytecyōg. ⁸ Chi je tecyma'tpi ytinaygugūy etz chi űajztibīy. Chi jada' yōychoñ e ytiūy ma Dios ytiyc mīid Pedro etz Juan yōyñip űidijcni yujctijcni, yam Dios ooy jāymeche. ⁹ Tūg'ōciy je mayjāy ijxy co anajty yōyñip etz jāymeche yi Dios. ¹⁰ Je jāy ajcxy y'ijxy'ajtpy anajty ajcxy je tecyma'tpi e űejhuūyigixyp co je' anajty je' huidibi pijtzohuo'cp pi'c meeñ ma Dios ytiyc'aguu huidi anajty yxū la Hermosa. Paady je jāy ajcxy ooy chigūy jihuūy, co ajcxy ijxy nej anajty yam ti ytunyīi ti yjadyīi.

Pedro nīmīydacy nej anajty je tecyma't ti chōgy

¹¹ Je tecyma'tpi huidibi anajty ti chōgy ca' anajty ixmach Pedro etz Juan, e tūg'ōciy yi jāy anajty ooy jihuūyigixy huinmaaygixy. Chi mic'amy mayjāy nīmūjcy Pedro etz Juan jīm ma yi Dios ytiyc huinduu huidibi jāy ytiūy Salomōn. ¹² Pedro co jadu'n ijxy je mayjay, chi ymīañ:

—Judío yēdijctijc, űnej co mdzachuīnmaaygixy mījcajee? űNey co iich miich ajcxy yxhachhuīdīxcxicy jadu'n nej jihuūy iich ajcxy jada jāy ti nyajtzōgyich ti nyajyōychooñich mīid ngīmnic'ajtiich, o mīid co iich ajcxy ooy nDios'ojadaty? ¹³ Iich'ajt nDios, je Dios huidi nmīj'ap nmījteedy, je Abraham, je Isaac, etz je Jacob y'ojadajt, yi' ti yajtzōgy jada tecyma'tpi, jigix yajcōmayipy yi' y'ung Jesús huidibi miich ajcxy mgiyejc ma je tungmīdipi. E co je gobernador Pilato je' najtzmazdīhuañ, miich ajcxy ca' m'aa'axūy. ¹⁴ Ma yjapadyīi ajcxy mgapijctzoy co huen yajnajtzmazdīy, je huidi anajty yajpaat huadz etz tudāy, chi miich ajcxy mbījctzoy co huen yajnajtzmazdīy tūg jāy huidibi anajty ti yjāy'aj' o'cy. ¹⁵ Jadu'n je jāy ajcxy yaj' o'cy je' huidibi anajty jugy'ajt yejcp. Je huidibi Dios yajjugypijcy ma anajty ti y'ōgy e jada tiy'ajt iich ajcxy nidīy'ajt'ajtpyich. ¹⁶ Mīid co ti mībicy Jesús yxū, je mījhuīnma'ñ huidibi Jesús ymic'ajt ti tuñ mīid jada pa'mjāy huidibi miich ajcxy m'ijxy mnejhuūyib. Com ti mībicy Jesús paady ti chōgy janch yajxondīcni, jadu'n nej miich ajcxy nidūg'ōciy ti m'ijxcixy.

¹⁷ Chi Pedro yjacmīañ:

—Nmīgūgtijcich, nejhuūyibich co miich ajcxy etz mhuīndzīndijc yaj' o'cy Jesús, mīid co anajty mganejhuūyigixy ti anajty ajcxy mduungixy. ¹⁸ Jadu'n cham Dios ti cuyduñ jadu'n nej Dios y'ayucnajtzcaxūybi ymīañ co copicy co yi Cristo yajnaxipy ayo'n. ¹⁹ Paady jātyim jothuimbijctix miich ajcxy ma Dios, jigix ajcxy mbocy yajjōtztāhuipy. Huin'it je Huīndzin Dios xyajniguxepiy ajcxy jotcujc'ajtin huīnixū, ²⁰ e yi' quexamb je Jesús, je Cristo, je huidibi Dios yajijp'aty yhuīn'ijx co quexa'ñ ma miich ajcxy. ²¹ Oy jadachambi Jesucristo y'oc-huī'mīpy jībīy tzejajoty ixti cooni Dios anajty yaj'oyīdyāy tijaty, co jadu'n yjaay yi' y'ayucnajtzcaxūybi huidibi mīid huadz yjot yhuīnma'ñ huidibi ajcxy jecy'ajty tzinay. ²² Jadu'n Moīśes nīmay iich ajt nmīj'ap nmījteedy jecy'ajty: “Je Huīndzin Dios xyajniguxaan miich ajcxy tūg yi' y'ayucnajtzcaxūybi, huidibi pidzīmamyb ma miich ajcxy mjuugy mmiīgūg jadu'n nej iich yi' xyguejxy. M'amīdō'idipy miich ajcxy yi' y'ayuc. ²³ Jadu'n yjadīpy co tūg'ōciy jāy huidibi anajty ca' capxymīdooy je Dios y'ayucnajtzcaxūybi, huadz ajcxy ytigoydāhuipy, e tūg jībīcy ajcxy idipy ma judīōjāy ajcxy yajpaady.”

²⁴ Chi Pedro yjacmīañ:

—Jadu'n jada tūg'ōciy Dios y'ayucnajtzcaxūybi, chondacy ma Samuel ixti ma jacyadyīini ajcxy, űigapxtay ajcxy jadu'n nej cham ytuñyīi yjadyīi. ²⁵ Yi Dios y'ayucnajtzcaxūybi ajcxy, miich je' anajty ajcxy nmīj'ap nmījteedy. E je ayuc huidibi Dios yajnīmay Abraham ycyūdunaayb mīid miich ajcxy co jadu'n ymīañ: “Ngonūcxibich tūg'ōciy naaxhuīñjāy mīid tūg miich m'ap m'oc.” ²⁶ Co Dios y'ung y' o'cy, chi Dios yajjugypijcy jadūg'oc, e quejxy yajijp ma miich ajcxy, jigix xyconūcxīxipy, etz jigix nidūg'ōciy miich ajcxy m'ixmazdīpy yi mījibichuīnma'ñ.

4

Pedro etz Juan ma tungmīdipi yhuīnduu

¹ Pedro etz Juan jīmī anajty tzechmīdmīdaaccixy je mayjāy ajcxy, co oy mīingixy je judío teedy ajcxy, mīid je soldado huīndzin, je tzejptijc cuend'ajtpi etz mīid saduceōjāy.

² Ooy ajcxy anajty yjotmātcixy co Pedro etz Juan yaj'ixpijccixy anajty je mayjāy etz nīmaaygixy co yi űōpi jugypigipy yi' ajcxy, com co Jesús yjugypicy co y' o'cy. ³ Chi je tungmīdipi ajcxy majch Pedro etz Juan, e chi ajcxy pidacy pujxtigoty ixti com jabomni, com ti anajty chu'īñ. ⁴ Mayjāy ajcxy huidibi anajty ti amīdō'ijtcixy je Pedro y'ayuc ymībijc ajcxy. E hue' je mībijcīdijc, ac yēdijctijcpi, yajmichomūjcy jahueen ycamīgoox mīlity.

⁵ Je com jabom ajcxy űaymūjccī jīm Jerusalén judīōjāy tungmīdipi, je mījāydijc etz yi escribas. ⁶ Nañ jadu'n jīm anajty Anās huidibi anajty ane'mb je teedy ajcxy, etz je Caīfās,

je Juan, je Alejandro, etz tüg'óciy teedy mǵtungmǵdǵpǵ yjugymǵigü. ⁷ Chi ajcxy pǵdacy Pedro etz Juan cǵj'amy ma anajty ajcxy ñaymǵyüi, chi ajcxy y'amidooy:

—¿Pin miich ajcxy ti xymöy cötuǵcin co jada jadu'n ti mdungixy?

⁸ Huin'it Pedro ymǵid anajty Espǵritu Santo ma yjot yhuinma'ñ, chi yminañ:

—Miich ajcxy tungmǵdǵpǵ etz judíoǵy mǵjǵyǵdǵj, ⁹ yǵ' ñich miich ajcxy cham xyaj'amidoob yǵi oybi tiibi yajtuñ ma tüg pa'mǵjǵy e nejhuihuaangixy nej ti chögy. ¹⁰ Cham nimǵydactǵyich ma miich ajcxy mhuinduu, jaydǵbi ajcxy nejhuiydǵhuipy tüg'óciy judíoǵy, co jadayaabi jǵy huidibi anajty tecyma'tpi, cham yajpaady ya ma miich ajcxy mhuinduu mic oy, mǵid je mic'ajt huidibi Jesucristo je Nazaretpi yejcǵy, je jǵy huidibi miich ajcxy myajcrudzpejt, huidibi Dios yajjugypǵj co y'o'cy. ¹¹ Yi Jesús jadu'n nipaady nej tüg tzaa oybi, huidibi ajcxy potzpidǵj, ca' yajtǵngixy co ytǵjcoǵixy. Jesús cham ti paady mǵitung ma Dios, jadu'n yǵi ni paady nej tüg mǵj tzaa huidibi ytungbaatp ma poch ytaatz. ¹² Ca' jac ni pin huidibi jǵbi xyajnidzooǵim ajt n'alma. Jesucristo yǵi je' tügpǵj huidibi Dios yejc ma jǵy ya naaxhuiñ huidibi jǵbi xyajnidzooǵim ajt n'alma.

¹³ Co je mǵitungmǵdǵpǵ ajcxy iǵxy midoy jadu'n nej Pedro etz Juan ajcxy huinmic jotmic ycapxcǵy, etz nejhuiy co ca' ajcxy y'ixpǵyǵyity, chi ajcxy ooy jihuiy huinmay. Nañ yǵi iǵxcaǵp ajcxy co je' anajty huidibi ajcxy ti mǵid huidity Jesús. ¹⁴ Cha co yjactimǵimǵy anajty je jǵy huidibi anajty ti chögy ytinǵy mǵid Pedro etz Juan, paady ajcxy ca'jajty nej midziptzoonipy. ¹⁵ Chi je tungmǵdǵpǵ ni'ane'mdiy huen yajpidzimǵy Pedro etz Juan ma je mayǵjǵy anajty ñaymǵyüi, jǵigix ac jǵy iǵy tungmǵdǵpǵjǵy iǵyöyaangixy capxyöyaangixy Pedro etz Juan ypocy. ¹⁶ Chi ajcxy yminañ:

—¿Ti cham nduunim mǵid yǵiibi jǵy ajcxy? Com tüg'óciy jǵy huidibi tzinaayb ya Jerusalén ñejhuiyb ajcxy co ti tǵngixy mǵjhuinma'ñ, e ca' huaad ñich ajt nmīnaanīm co ca' yjanchity. ¹⁷ Tzoc capx'adujcim co ca' huaad ajcxy jacnimǵyǵǵipy Jesús jadachambi etz jacnicxpi xǵi tiempo.

¹⁸ Chi ajcxy mǵjhuoy Pedro etz Juan, chi ajcxy nimay co ca' huaad ajcxy ni nej ocnimǵydaacnip, ni ca' jacyaj'ixpǵipy mǵid Jesús yxǵi. ¹⁹ Huin'it Pedro etz Juan y'adzooy:

—Huinmaayǵix miich ajcxy ci'm pen tiy'ajt jada ma Dios co ñich miich ajcxy ngapxycöbǵipy jayǵj, ca'ydi yǵi Dios. ²⁰ Com ñich ajcxy ca' nni'amonaaǵixy jadu'n nej ñich ajcxy ti n'ixy ti nmidooy.

²¹ Huin'it je tungmǵdǵpǵ ajcxy adzǵi'ñ mǵgapxy Pedro etz Juan, e najtzmazǵy ajcxy. Ca' ajcxy mǵjhuinma'ñbaty nej tzaachytunipy Pedro etz Juan. Com tüg'óciy jǵy yǵjǵymejchpy ycömaayb anajty yǵi Dios jadu'n nej anajty ti ytuñyǵi ti yjadyǵi. ²² Je jǵy tecyma'tpi huidibi tzooc co Dios mǵjhuinma'ñ ytuñ, ymǵid anajty yjimiǵt huixchǵguǵpx naxy.

Je mǵibǵjcpǵdǵj ajcxy pǵjctzooǵixy ma Dios jotmic'ajt

²³ Chi Pedro etz Juan co yajnajtzmazǵy, chi ajcxy ñicxy ma ymǵigüǵtǵj anajty, yajmǵidmǵydactay tüg'óciy jadu'n nej teedy huindzin etz mǵjǵyǵdǵj anajty ti ñimǵayǵixy.

²⁴ Co jada ayuc ajcxy midoy nidüǵ'óciy ajcxy tú'ciy yjot yhuinma'ñ pǵdacy, chi ajcxy Dios mǵibǵjctzoy yminañ ajcxy:

—Huindzin Dios, miich je' ti m'oyduñ je tzajp, je naaxhuiñybi, je meǵy etz tüg'óciy tijaty.

²⁵ Miich mǵid mEspǵritu je David myajcapxy, e yǵi jadu'n yminañ:

¿Nej co jada naaxhuiñybi jǵy chachhuaangixy chachjihuiyǵixy, e yǵi jǵy ajcxy huinmaayǵixy huidibi ca' ytimyǵiǵjty?

²⁶ Yi reyǵjǵy ya naaxhuiñybi midziptzooñ ajcxy yǵi Dios. Etz je tungmǵdǵpǵ cǵjp cǵjp ñaymǵjci ajcxy, midziptzooñ ajcxy Huindzin Dios, etz midziptzooñ ajcxy Cristo.

²⁷ Com janch co je rey Herodes etz yǵi gobernador Poncio Pilato ñaymǵjci ya ma jada cǵjp mǵid huidibi ca' yjudíoǵyity ajcxy etz mǵid judíoǵy ajcxy, midziptzooñ ajcxy yǵi m'ung Jesús huidi anajty ti mhuin'ixy. ²⁸ Yi' ajcxy ti cuydungixy tüg'óciy jadu'n nej miich, Huindzin Dios, ti myajniǵöduǵy jadu'n nej ytunǵyb yjadǵyb. ²⁹ Jadachambi Huindzin Dios, ix jadu'n nej yǵi tungmǵdǵpǵ xychachmǵjotmǵa'tcǵyich. Mo' yǵi mdumbi ajcxy jotmic'ǵjtin, jǵigix m'ayuc ajcxy capxhuǵcǵpy amic jotmic, ³⁰ e mǵid miich mmic'ǵjtin chöǵipy pa'mǵyǵdǵj, tunipy ajcxy tijaty iǵxpǵej etz mǵjhuinma'ñ mǵid yǵi m'ung Jesús yxǵi, huidibi mǵid huǵdz yjot yhuinma'ñ.

³¹ Co ajcxy mǵibǵjctzoday, chi je naax chuyuy ma anajty ajcxy tügmucy yajpaatcǵy, etz nidüǵ'óciy yǵi ajcxy ymic'ajt mooyǵi je Espǵritu Santo, e yǵi Dios y'ayuc capxhuǵcǵcǵy anajty amic jotmic.

Je mǵibǵjcpǵdǵj tú'ciy anajty ajcxy yjot yhuinma'ñ

³² Je mayǵjǵy huidibi anajty ti mǵibcy, tú'ciy ajcxy yjot yhuinma'ñ. Ni pin anajty ycamina'ñ co naydüg jǵe'adyǵi. Hue' anajty yminaangixy co tú'ciy jǵe'ǵjǵigixy. ³³ Je majmetzpi Jesús y'ayuccapxhuǵcǵpy amic jotmic capxhuǵcǵy je tiy'ajt jadu'n nej je Huindzin Jesús yjugypǵjcy co y'o'cy. E mǵj ajcxy Dios ypubejti. ³⁴ Ma je' ajcxy ca' ni ti yajmayajtcǵy, com tüg'óciy tijaty anajty ajcxy ymǵid ñaax o ytǵj ytoocpy anajty ajcxy, e yejcǵixy anajty meef. ³⁵ Chi

je meen' yajč'idig'igixy je apóstoles ajcxy e yi' ajcxy moy nidüg nidüg pinjaty yajmayajtp. ³⁶ Jim anajty müd je' ajcxy tüg levita jäy huidi anajty yxii José, huidibi ma'xung'ajt ma yi ñaaxjot meyy agujc huidibi yxii Chipre, je huidibi je majmetzpi Jesús y'ayuccapxhuäcxpi, yxii moy Bernabé, huidibi huimbizim je yajjotcuyc'ajtpi. ³⁷ Je Bernabé tocy ytundac huidibi anajty ymüid, e chi mimiñ je meen', e yajč'idigiy je apóstoles ajcxy.

5

Je Ananías etz Safira ajcxy Dios midundigoy

¹ Chi jadüg yëydijc, huidi anajty yxii Ananías, müd ytöxyijc, Safira, toogy ajcxy tüg it ytundac. ² Ananías ñayyajnihui'mi jac'anaxy je meen', e yajninicxy Jesús y'apóstoles ajcxy je jac-hueenip, jadu'n nej jihuüy yejctay tüg'óciy, etz yi' ytöxyijc ñejhuüyb anajty. ³ Chi Pedro nimay Ananías:

—Ananías, ¿nej co myajtuñ je mujcu' yhuinma'ñ, e mhuin'ina'ñ je Espíritu Santo, e ti mbugoñ jac'anaxyp meen' nej ti tzo'o'adyi yi pidägy tiibi mdoogy? ⁴ ¿Nej ca' anajty yi' müich mdundac'adyi? E co ti mdoogy, ¿nej ca' anajty je' müich mmeen'adyi? ¿Nej co jadu'n ti midundigooy? Dios ti mhuin'iiñ, canan jäy.

⁵ Co jadu'n midoy, jimiyy Ananías yciday, e chi y'o'cy. E tüg'óciy jäy ajcxy huidijaty nejhuiy, ooy ajcxy chigiiy. ⁶ Huin'it ymiñ jadyi yujcyecpidijc, chi ajcxy mo'ñ Ananías ñiñicx, e oy ajcxy yajnaaxtigiiy.

⁷ Codugüg hori naxy, oy ytigiiy je Ananías ytöxyijc, e ni ca' nejhuiy anajty ti ti ytuñyii ti yjadyi je ñäy. ⁸ Pedro y'amidoohui:

—Yajniimaaygich, ¿nej janch jadu'n ti mdoocixy yi mdundac jadu'n nej ti mgapxcixy?

Chi je töxyjäy y'adzooy:

—Janch jadu'n ti mdoogyich.

⁹ Chi Pedro yminañ:

—¿Nej co ti mnyagáp'igixy mhuin'ina'ñ yi Espíritu Santo? Cha ma tijc'aguu je jäy ajcxy ytinäy huidi oy ti yajnaaxtigiiy mñäy, e jadachambi müich ajcxy xyajnicxaam nañ jadu'n.

¹⁰ Tim huin'itiiy Ananías ytöxyijc yciday, e chi y'o'cy. E chi oy ycidägy ma Pedro ytecimijc. Co je yujcyecpidijc ytigiiy, chi ajcxy je' paaty ögy. Chi ajcxy yajpidzimy etz oy yajnaaxtigiiy ma ñäy ymijc. ¹¹ Chi tüg'óciy je jäy ajcxy huidibi Jesús mibijcp etz tüg'óciy huidibi midou jada nej ti yjadyi ti ytunyii, chi ajcxy ooy chigiiy.

Canaag mij'ixpejt etz tiy'ajt

¹² Je majmetzpi Jesús y'ayuccapxhuäcxpi ooy anajty ajcxy Dios ymic'ajt yajnigüexici etz ijxpejt yecjixy ma yi jäy ajcxy. E tüg'óciy jäy ajcxy huidibi Jesús mibijc jabom jabom anajty ñayyömmüjigixy ma Dios ytiyc huinduu huidibi yxii Salomón. ¹³ Ca' jac ni pin anajty mijnicxpeda'ñ mijyöpeda'ñ je' ajcxy. E je jäy ajcxy yajcyajmij'ajtpy huidi Jesús anajty ooy mibijccixyp. ¹⁴ Mayjäy oy mibijcni Jesús y'ayuc, yëydijctijc etz töxyjäydijc. ¹⁵ Etz ixti pa'mjäydijc anajty ajcxy yajnicxy mijtügujc cijx'aam pidaaccixy, jigix co Pedro ñaxipy jim ycadimjeyiti co nicxy y'aa'ap yjäty ma je pa'mjäy. ¹⁶ Nañ jadu'n mayjäy chooñ anajty huidijaty huington ycajp, ymiingixy Jerusalén, müdmüingixy pa'mjäy, etz huidibi ca'oybi müd ma yjot yhuinma'ñ, e tüg'óciy yajtzoocaaayb anajty ajcxy.

Pedro etz Juan yaj'ixhuidijtcixy yajpahuidijtcixy

¹⁷ Huin'it je teedy mijtungmüidpi etz huidibi saduceo ijxpjicjin ymijpidacp ooy ajcxy yajca'oy'ijxy, ¹⁸ e co ajcxy majch je apóstoles ajcxy, chi ajcxy pidacy ma je mijpujxtijc. ¹⁹ Chi Huindzin Dios tüg y'ángel je huin'it coodz yaj'ahuaach je pujxtijc aguu, yajpidzimy ajcxy, chi ajcxy nimay:

²⁰ —Ñicxcix, tinay'ahuüygix tzejtigoty, yajmüdmüidaaccix yi mayjäy ajcxy Jesucristo ytiy'ajt nej jëbi jäy ajcxy paadipy jugy'ajtin jemybi.

²¹ Co jadu'n midoy, chi com jabom ytigiiy ajcxy jopyñi tzejtigoty. Jiiby je' ajcxy anajty ñiyaj'ixpijcco'ni.

Chi je teedy mijtungmüidpi etz jacpinjaty müid, chi ajcxy capxyñiguejxy yi judiojäy ymijjäydijc etz icpicytijc co huen junta jadyi. Chi ajcxy capxyñiguejxy huen nicxy yajpidzimyii jiiby pujxtigoty yi apóstoles ajcxy. ²² Co je policías ajcxy ymejch ma je pujxtijc, ca' ajcxy paady je apóstoles ajcxy. Chi ajcxy huimbijtni müd tiy'ajt, ²³ chi ajcxy nimay:

—Hue' iich ajcxy ti nbaadcixy yi pujxtijc aducy, etz je soldadtijc jim tijc aguuy yjac-cuend'ajtcixy. Chi co iich ajcxy nyaj'ahuäch je pujxtijc, ca' iich ajcxy ni pin ti nbaatyich jiiby pujxtigoty.

²⁴ Co jadu'n ajcxy midoy, je teedy mijtungmüidpi etz je soldado huindzin, etz jacjadyi teedy huindzin ajcxy, chi ajcxy ooy huinmay nej jada y'occogixihuip. ²⁵ Huin'it tüg jäy müiñ huidibi nimaayy ajcxy:

—Je jāy huidibi miich ajcxy mbidac pujxtigoty, čim je' ajcxy tzaigtigoty yaj'ixpijccixy yi mayjāy.

²⁶ Chi je soldado huindzin mūd soldadtijc ņicxy ma yi apóstoles ajcxy jāy yaj'ixpijccixy, chi ajcxy yajnicxy oy'amy, com tziŕiyyb anajty ajcxy co je mayjāy chaagādziyyb. ²⁷ Co ajcxy yajmūiŋ, chi ajcxy pidacy ma je maytungmūdpi yhuinduu. Chi je teedy mījtungmūdpi je apóstoles ajcxy nimay:

²⁸ —Iich ajcxy ti ngapx'aducy co ca' huaad m'ocjacyaj'ixpijccixni ma Jesús yxii. E čti ti mdungixy? Ti myajhuäcxtaaygixy yi m'ixpijcin ma Jerusaléngajp, e iich ajcxy miich pocy xyjátyim yajmihui'mam co Jesús y'o'cy.

²⁹ Chi Pedro etz jacjadyii apóstoles ajcxy y'adzooy:

—Copicy iich ajcxy ngapxycöbigipyich yi Dios jayijp ca'ydi jāy. ³⁰ Je Dios huidibi iich ajt nmij'ap nmijteedy y'ojadaj, yi' yajjugypijc je Jesús huidibi miich ajcxy myaj'öc cruudzcixy.

³¹ Je Dios Teedy jadachambi hue' Jesús mūdity aa'oy'amy jiiyb tzaipjoty, e ti pidägy ane'mbi etz yajniđzoocpi jigix yi judío jāy ajcxy yjothuimbidity e yajhuinmeecxipy ajcxy ypocy.

³² Iich ajcxy tiy'ajt nyejcpy mūd jada ycixpi, etz nañ jadu'n je Espíritu Santo huidibi Dios ymooyb pinjaty capxymidoohuip.

³³ Co je jāy ajcxy jadu'n midoy, chi ajcxy ooy yjotmātcoty, chi ajcxy jayaj'öga'ñ. ³⁴ Huin'it ytinayigy ma je naymujctac tūg fariseojāy, hue' anajty yxii Gamaliel, hue' je' anajty Moisés yley ņihuindzin'ajtjip. E jāy ajcxy ooy anajty yajmij'ajtcixy je Gamaliel. Chi je' ni'ane'mdiy co huen yajpidzimyii tzojcyi jiiyb tiba'y je apóstoles ajcxy. ³⁵ Chi Gamaliel nimay yi tungmūdpi ajcxy:

—Judío yēdyjctijc ajcxy, ixcim ti mdungixy mūd jada jāy ajcxy. ³⁶ Jāymetz miich ajcxy co jecy'ajty je Teudas ypidigy yminañ co je' ymijity yjanchity, e chi ypanicxi oy nimidaax migo'pxti yēdyjct. Chi ajcxy yaj'o'ci, chi tūg'öciy huidibi anajty ti ypanicxyii yöyhuäcxtay, e jadu'ñyi je' ajcxy ņitigoyday. ³⁷ Jacnamni je huin'it xii mina cajpijāy anajty ņecypejtcixy, ypidigy Judas huidibi tzon Galilea. Mayjāy ypanicxi; nañ jadu'n ajcxy yaj'o'cy, e tūg'öciy jāy huidibi panicxy jadu'ñyi ajcxy yöyhuäcxtay. ³⁸ Paady iich miich ajcxy jadu'n nimaaygixy, ixmajtcixy yi apóstoles ajcxy, e ca' mmijyöybejtcixy. Peni jāy yi y'ayuc ytiy'ajt huidibi ajcxy ymūd, cixip tigoyip yi'. ³⁹ Pen Dios y'ayuc ytiy'ajt yi' ajcxy ymūd, ca' ajcxy mjadipy nej myajcödigöygyxipy. Jaty nayguend'ajtigixy, ca' jecyity co Dios anajty mūd mdziptungixy.

⁴⁰ Nidūg'öciy ajcxy jāygidacy Gamaliel ycapxhuñjin. Huin'it ajcxy mihuoy yi apóstoles ajcxy. Chi ajcxy tzaachytuñ, chi ajcxy ci'ajty, etz capx'adujcy co ca' huaad Jesús y'ayuc jaccapxhuäcxip. Huin'it ajcxy najtmadziiy. ⁴¹ Je apóstoles ajcxy ypidzimy ajcxy ma tungmūdpi ajcxy yhuinduu ooy yjotcujcity co Dios jadu'n ti aa'ixiy co huen tzaachytuñyi mūd Jesús yxii ycixpi. ⁴² E ooy ajcxy yaj'ixpijccixy etz nimydaaccixy Jesucristo jabom jabom jadu'n tzaigtigoty nañ jadu'n majaty tijc.

6

Chi ajcxy yajniḃejty huixtujc mutztungmūdpi

¹ Je huin'it xii ajcxy huidibi ixpijcp Jesús y'ayuc ņigi anajty ņimayiy'adiitczixy. E huidibi anajty capxp griego ayuc ytiŕiyy nayŋigäpxip mūd huidibi judío y'ayuc capxp. Yminaangixy co yi griegojāy co'ögy tōxyjādijc, ca' anajty ajcxy paady quipxyjaty mūd je judiojāy co'ögy tōxyjādijc caayin ucin jabom jabom. ² Huin'it yi majmetzpi apóstoles ajcxy yajnaymujctaa'yi je jāy huidibi Jesús mibijcp, chi ajcxy yminañ:

—Ca' huaad iich ajcxy Dios y'ayuccapxhuäcxin n'ijxmajch, e nicxyich caayin ucin yajhuäcxcixy. ³ Paady miich ajcxy miŕgūtijc nayhuin'ijxigix huixtujc yēdyjctijc huidibi oy yajmij'ajtni Dios, huidibi huädz oy yhuinma'ñ ymūd, huidibi je Dios yjihui'ñ ymic'ajt mūd, e huen ajcxy tung'adiib jada tung. ⁴ Iich ajcxy njacmibijctzohuamy Dios, etz iich ajcxy njacyaj'ixpigamy Dios y'ayuc.

⁵ Tūg'öciy ajcxy jāygidacy je' ayuc. Chi je mayjāy huin'ijxy Esteban huidibi ymūd ooy ymibijcin, etz ymūd Espíritu Santo. Nañ huin'ijxy ajcxy Felipe, Prócoro, Nicanor, Timón, Parmenas, etz Nicolás. Nicolás ca' je' anajty yjudiojāyity. Hue' je' anajty chooñ jim Antioquía, jēcyip anajty jiptigiyiŕi judiojāy ytiy'ajt. ⁶ Chi ajcxy yajnicxy je jāy ma je apóstoles ajcxy. Chi ajcxy je apóstoles Dios mibijctzoy e ciniŕiyy ajcxy.

⁷ Je Huindzin Jesús y'ayuc ņigi anajty jāy tzachnejhuñyi. E je mibijcpidijc ņigi anajty ajcxy chachnimayiiyi jim Jerusalén, ixti may judío teedy ajcxy ymibijcy.

Majch ajcxy Esteban

⁸ Je Esteban ymūd anajty Dios ymic'ajt etz y'oy'ajt e oy mijhuinma'ñ tuuñ, etz yějcy iixpejt ma jāy ajcxy. ⁹ Huin'it xii niŕējity ixpicytijc ooy ņay'ijxqupīgixy y'ixpijcin mūd Esteban jim ma judiojāy ajcxy ņaymujctac huidi anajty yxii Libertados. E jim anajty Cirene jāy,

Alejandria jāy, Cilicia jāy, etz huidibi tzomb jim Asia ñaaxjot. ¹⁰ Ca' ajcxy mimadacy Esteban com hue' je' anajty ycapxy müd yhuijy'ajt ycuje'ajt huidibi je Espiritu Santo anajty mooyip. ¹¹ Chi Esteban ymidzip ajcxy mujuy jāy huidibi jēbi nihuambety Esteban, co ti anajty ooy ycapxtigooy etz ni'ojy Moisés etz Dios. ¹² Jadu'n ajcxy yajyuumigy yaj'oxigy yi jāy mijjāydijc, etz huidibi ajcxy yaj'ixpijcp Moisés yley. Chi ajcxy mimadacy majch ajcxy Esteban, yajnicxy ajcxy ma je judiojāy ymijtungmüdpi etz ixpicytjic ñaymúcgigy. ¹³ Chi ajcxy ixtaayi jāy huidibi nihuambediib, chi ajcxy yminañ:

—Jada Esteban jibic nigapxy yi Dios ytijc etz Moisés ytiy'ajt. ¹⁴ Ti ich ajcxy midoy co yminañ co Jesús je Nazaretpi yjidamy je Dios ytijc, e yajtigadzañ Dios ytiy'ajt judu'n nej Moisés ajt xymooyim.

¹⁵ Huin'it je judiojāy tungmüdpi e tūg'óciy jāy nej anajty ajcxy jim iñaaygixy huindixpejty ajcxy Esteban. E chi ajcxy ijxi yhuiñyijp judu'n anajty quēxigy nej y'angel yhuiñyijp.

7

Esteban ñaygohuaani ma tungmüdpi yhuinduu

¹ Huin'it je teedy mijtungmüdpi yaj'amidooy Esteban:

—¿Nej janch jadaji?

² Chi Esteban y'adzooy:

—Migügtjic ajcxy etz mijjāydijc ocmidoogix. Ich ajt nDios müjpi janchypí nayquēxici ma ich ajt nmij'ap nmijteedy Abraham jecy'ajty co anajty jim ity Mesopotamia ñaaxjot, ca'ni anajty chinaydacpicy jim Harán. ³ Chi Abraham Dios ñimaayi: “Ixmatz mnaax mgajp etz tūg'óciy m'amigügtjic, e nicx ma yi naaxjot huidibi myajñixihuambyb.” ⁴ Chi Abraham choon ma yi Caldea ñaaxjot, e nicxy tzinaydacpijcp jim Harán. Co yteedy oy y'o'cni, chi Dios Abraham yajmüñ ma jada naaxjot ma müich ajcxy cham mdzināy. ⁵ E ca' Dios moy Abraham jada naaxjot ya, ni ca' ma yhuācxtāgipy. Hue' je' janchtiy yaj'ahuaniiy co möhuaaniiy y'ap y'oc, e co anajty je' ajcxy jēdiib. Oyñi anajty Abraham ca' y'ung müdity co Dios ymigapxi. ⁶ Nimaayi Dios co y'ap y'oc y'adzināhuipy ajcxy ma huingjāy ñaaxjot, etz chi ajcxy ytumbi'adiiyb etz chaachytuniyb midaax migo'px jimiit. ⁷ Nañ judu'n Dios nimay Abraham: “Ndzaachytunipyich je naax cajp ma yi m'ap m'oc anajty ytumbi'adyii. Chi choonip ajcxy jim, e chi xymidunipyich ma jadayaabi it.” ⁸ Dios ytuun tūg capxytuunin müd Abraham, co huen ajcxy yajtiy'ajttihuip. Paady co Abraham y'ung Isaac yma'xung'ajty conductujc xii ajcxy oy tiy'ajttiy. Nañ judu'n Isaac ymang Jacob, e Jacob yi ymang nimajmetzpi ajcxy, huidibi ajcxy ñi'ap'ajty yi nimajmetzpicypí Israel ycajp.

⁹ Chi Esteban yjacminañ:

—Je' ajcxy Jacob ymang, ich ajt nmij'ap nmijteedy, ymi'ijxtinaayb anajty ajcxy y'uch José. Chi ajcxy José toocy, chi je' yajnicxi jim Egipto, per Dios müd anajty y'ity José, ¹⁰ etz nihuaañ yajtzoocy ma ayo'n jotmay. Chi Dios moy ixpijcin jigix cōmay ypidzimipy ma Faraón, je Egipto jāy yrey. Chi je rey José tung moy huen ane'my je Egipto naaxjot etz ane'mipy je rey ytijc.

¹¹ Huin'it xii ymiñ mijyuu mij'ayo'n jim Egipto etz jim Canaán ñaaxjot. Je huin'it xii ich ajt nmij'ap nmijteedy ca' anajty ajcxy paady ti ycaipy. ¹² Co Jacob oy nejhuñy co jim Egipto yajpaady jim trigo, chi jim quejxy ymang ajcxy trigo juuybi. Je' ajcxy huidibi ich ajt nmij'ap'ajtm nmijteedy'ajtm. Chi ajcxy y'oy tūgtjicy trigo juuyb. ¹³ Je mimejtz'ocpi co ajcxy oy trigo juy, huin'it José ñayñigapxi ma y'ajch ajcxy. E chi je rey nejhuñy pinjāy je' anajty je José. ¹⁴ Chi José capxyñiguejxy huen cidaaccixy jim Egipto yi' yteedy Jacob müd tūg'óciy yjuugy ymigü. Hue' anajty ajcxy ñaybaattāayigixy nidugi'px majmoxc jāy. ¹⁵ E judu'n yjajty co Jacobo oy chinaydacpicy jim Egipto. Jim oy comjey y'o'cni. Nañ judu'n jim ajcxy y'o'cy may ich ajt nmij'ap nmijteedy. ¹⁶ E chi Jacob yjuugy ymigü com jecy yajpidzimy Jacob ypaic ma ñaaxtigy, e chi ajcxy yajnicxy jim Siquem, oy pidaaccixy ma je o'cpi jut huidibi Abraham anajty ti juy meeñyigixy ma Hamor ymang jim Siquem.

¹⁷ Chi Esteban yjacminañ:

—Ytimypadaanipy anajty tiempo nej anajty Dios ti yaj'ahuaniiy Abraham. Ti anajty yi judiojāy ooy ymayiñii jim Egipto. ¹⁸ Chi oy jadüg rey ytigiiy ane'mbi huidibi ca' ix'yadyii José. ¹⁹ Je rey yhuin'ñiñ ich ajt nmij'ap nmijteedy, e oy ajcxy chaachytun. E chi ane'my co huen y'ung ajcxy ñigucytaaigixy huidibi anajty ajcxy ma'xung'ajtp, jigix y'o'ccixipy. ²⁰ Huin'it tiempo oy yma'xung'ajty Moisés, je huidibi ooy Dios jāygidacy. Chi Moisés ytaj yteedy tugig po' yajyeeci ma ytijc. ²¹ Co ajcxy yajñigueeci, chi je rey ñiix je' agondigiiy, e yajyeegy judu'n nej yci'm'ung. ²² Paady Moisés ixpijcy tūg'óciy judu'n nej Egipto jāy anajty ajcxy y'ixpicyity, e ooy ymadacy müd y'ayuc etz müd ytung.

²³ Co Moisés anajty müdity huixchigüpx jimiit, chi pidacy yhuinmañ co nicxy ixañ je' y'amigügtjic je Israel y'ap y'oc. ²⁴ Chi Moisés ijxy co tūg egipciojāy chaachytuniiy

tüg je' y'amigüg. Chi Moisés yaj'o'cy je egipciojāy, yaj'ahuimbijty nej anajty y'amigüg yajtzaachytuñ. ²⁵ Hue' Moisés tijy co je' y'amigügtijc ajcxy huen nejhuüy huinjihuüy co Dios nihua'naanip ma ymidzip mñid Moisés ycixpi. Chi ajcxy ca' huinjihuüy co Moisés nihua'naanip. ²⁶ Com jabom Moisés paty mejtz Israel jāy chachtziptungixy. Chi Moisés jayajxemañ je tzip, chi nimay: "Miich ajcxy nay'amigüg'ajtj, ¿nej co mdziptungixy miich ajcxy miñ xyipy?" ²⁷ Je huidibi anajty ymigüg tzaachytuumb huin'it najtztijuy Moisés, nimay: "¿Pin ti xypidāy huindzin etz tiydumbi ma iich ajcxy?" ²⁸ ¿Nej xyaj'ōgaamich jadu'n nej axiy myaj'o'cy yi egipciojāy?" ²⁹ Co Moisés jadu'n midoy, chi yqueegy, ñicxy jim ma Madián naaxjot. Moisés jecy y'adzinaay jim Madián naaxjot, e jim oy ypicy. Chi ytōxyijc paty metz ymang.

³⁰ Huixchiguipx jimijt naxy, huin'it jim adügtuum ma je cop huidibi yxñ Sinaí, ñayguēxici tüg ángel jinoty ma tüg quipymang huidibi anajty tzachtooyb. ³¹ Chi Moisés ooy jihuüy huinmaay mñid je' ycixpi huidibi anajty y'ijxyp. Co oy mihuingoñ, chi midoy co je Huindzin Dios ñimāy: ³² "Iich Dios huidibi nmij'ap nmijteedy ajcxy Abraham, Isaac etz Jacobo Dios'ajtpy." Chi Moisés chiyuygoty, ca' anajty ocjac-huindcixpedaani. ³³ E je Huindzin Dios nimaay: "Jen mgig, com je it ma miich mñināy, Dios y'i' y'it. ³⁴ Iich ti n'ixyich njāyich nej tzaachypipaaticxy jim Egipto. Ti nmidooyich co y'i'ajcxy yāxy ytināy mñid je tzaachypiy ycixpi. Ti ngidāyich co ajcxy ngohuaanip. Iich miich nguexamyb jim Egipto ma y'i' Israel jāy ajcxy."

³⁵ Chi Esteban yjacminañ:

—Co Moisés oga'n ñicxy ma iich ajt nmij'ap nmijteedy ca' ajcxy cōbijcy huen y'ane'mñiyb, chi ajcxy yminañ: "¿Pin ti xyñimāy co iich miich ajcxy nhuindzin'adñiyb?" Co mñimetz'ocpi Moisés ñicxy ma y'i' Israel jāy, je taabi anajty je ángel ti ymigaipyñ jinye'ñ agujc, chi ajcxy cōbijcy. ³⁶ Je Moisés je' yajpidzim iich ajt nmij'ap nmijteedy jecy'ajty jim Egipto. Moisés ytuun oy mijhuinma'ñ etz iixpejt huixchiguipx jimijt jim Egipto, jim ma tzaptz mejy, etz jim ma mñitigüduum. ³⁷ Je Moisés huidibi jecy'ajty nimay je Israel jāy: "Dios y'ijxtihuipy tüg jāy ma miich ajcxy m'ap m'oc huidibi najtzcapihuipy y'i' y'ayuc, jadu'n nej ti xy'ijxtiuyich ma miich ajcxy. M'amido'ijtp ajcxy y'i' y'ayuc." ³⁸ Je Moisés jim je' anajty mñitigüduum mñid je mayjāy. Chi jim je Dios y'ángel mñid mñidacy ma je cop huidi yxñ Sinaí, etz Moisés yajnaxz Dios y'ayuc ma iich ajt nmij'ap nmijteedy. Moisés ycōbijc Dios y'ayuc huidibi jugy'ajtin huinixiibi mñid, etz jayhu'i'my mñid iich ajt ycixpi.

³⁹ Chi iich ajt nmij'ap nmijteedy ajcxy jecy'ajtpy ca' anajty ajcxy capxcōbigaangixy Moisés, ca' anajty cōbijccixy je' y'ane'mñin, chachhuimbidaangixy jim Egipto. ⁴⁰ Chi ajcxy Aarón nimay: "Ndzojcypich ajcxy co miich oyduñ tüg Dios huidibi iich ajcxy xyhuinhuoohuip, com ca' nnejhuüyim ti jada' ti yjaduyi je Moisés huidibi ajt xyajtzoonim Egipto ñaaxjot." ⁴¹ Chi oyduñ ajcxy tüg huajmang. Chi huindzigüy ajcxy je huajmang huidibi anajty ti yajcojicxy, e ooy ajcxy mijotcuja'ajty huidibi ci'm anajty ti yajcojy. ⁴² Huin'it xñ ajcxy Dios y'ixmajtzi, huen ajcxy ojadaty y'i' xñ, y'i' po' etz madza'. Com jadu'n Dios y'ayuc cojaaybi cojaay co Dios jadu'n yminañ:

Israel jāy ajcxy canan iich je' huidibi ti mhuindzigüygixy jim mñitigüduum huixchiguipx jimijt.

⁴³ Ti mgiynicxixy Moloc ytijc etz y'i' Renfán ymadza', tzadzech, quipychech etz oori oyduñ huidibi miich ajcxy ci'm myajcoj huidibi anajty ajcxy m'ojadadamy. Paady iich miich ajcxy nyajpidzimaangixy ma y'i' mñaaxjot, e nguexaangixy jiguem jim Babilonia nñinaxy.

⁴⁴ Chi Esteban yjacminañ:

—Jim mñitigüduum iich ajt nmij'ap nmijteedy ymñid anajty cochactijc ma anajty ajcxy Dios huindzigüy. Jiiby anajty ajcxy yujcciy je tzaa ma Dios ytiy'ajt ycojaayity. Je cochactijc ajcxy ycoj jadu'n nej anajty ti yaj'ane'mñiy Moisés, e nej anajty yajni'ixiyi nej tunipy. ⁴⁵ Iich ajt nmij'ap nmijteedy mñihuim je cochactijc, e iich ajt nmij'ap nmijteedy huidibi mñiñ ma jada naaxjot mñid Josué, chi mñimñiñ ajcxy je cochactijc je taab ajcxy mñimadacy je ymidzip canaag'agajp. Dios yajpidzim je' ajcxy ymidzip ma je naaxjot, jigix yajcñidigihuip iich ajt nmij'ap nmijteedy. Yajtuuñ ajcxy je cochactijc, ixti cooni David ytiñiy ane'mbi. ⁴⁶ Dios yjāygidac je rey David, e David yjacoja'ñ anajty tüg tijc oyduñ ma jēbi yaj'ojadaty yajhuindzigüy Dios, je Dios huidi Jacob mñipidac jecy'ajty. ⁴⁷ Per Salomón je' oy cojy Dios ytijc. ⁴⁸ Oy y'i' Dios tzejapjotpy ca' chināy ma y'i' tijc tiibi jāy cojy. Jadu'n nej je Dios y'ayucnajtzcapihuipy jecy'ajty jaybety co Dios jadu'n yminañ:

⁴⁹ Je tzejp hue' je' iich n'ane'mdac, jada naaxhuñiybi iich ndecypocxtac. ¿Ti tijc iich miich ajcxy xycojaanip? ¿Ma je it huidibi it ma iich jēbi nbocxy?

⁵⁰ ¿Nej cay iich ti n'oyduñdāy tüg'ōciy?

⁵¹ Miich ajcxy ooy mñotjuññity, ca' mgapxymidoy Dios. Jadu'n Esteban yjacminañ:

—Jadu'n miich ajcxy mjot mhuinma'n müidity jadu'n nej jäy ajcxy huidibi ca' Dios ytiy'ajt nejhuiyi. Miich ajcxy jätyim midzip'ajtpy je Espíritu Santo. Mdügiyb ajcxy müid mmij'ap mmijteedy. ⁵² Miich ajcxy mmij'ap mmijteedy chaachytuun tüg'óciy Dios y'ayucnajtzcaxpiybi. Yi' ajcxy yaj'o'c Dios y'ayucnajtzcaxpiybi huidibi jayijp'aty najtzcaxpiy co ymina'n tüg jäy huidibi tudägyip. E co je tudägy jäy ymiin, chi miich ajcxy agojix myaj'o'cy. ⁵³ Je Dios y'ängel miich ajcxy xymooy je Dios ytiy'ajt, e ca' ajcxy mgöbijcy.

Yajtzaagögätcixy Esteban

⁵⁴ Co je mayjäy midoy jadu'n nej Esteban ymina'n, chi ajcxy mijotmätcoty Esteban, chi ytiy'aj ajcxy tüztmucxpi tüztqueetpi. ⁵⁵ E chi je Esteban jihuiy je Espíritu Santo ma yjot yhuinma'n, chi chajp'ijxy, e ijxy yi Dios y'oy'ajtin etz ijxy Jesús ytinäy a'oy'amy ma Dios Teedy. ⁵⁶ Chi Esteban nimay je mayjäy:

—ijxcix! N'ijxypich yi tzajp ahuadz, e n'ijxypich je jäy huidibi tzoön tzajpjoty ytinäy a'oy'amy ma Dios Teedy.

⁵⁷ E chi je mayjäy ajcxy ytätz'ac amo'cxy, chi ajcxy ytiy'aj huambi jihuiybi, e chi ajcxy nimujcy yajmujcy Esteban. ⁵⁸ Chi ajcxy yajpidzimy Esteban cajppa', je' oy gögätcixy. Je tiy'ajt yejcpí huidibi jadu'n iditiz, chi yjocxhuit ajcxy yajmihui'my tüg yeeg'anäg huidibi anajty yxii Saulo. ⁵⁹ Jim anajty ajcxy Esteban tzachätcixy. Chi Esteban Dios mibijctzoy, ymina'n:

—Huindzin Jesús, cöbijcigich n'alma.

⁶⁰ Huin'it ycoxthinay ahuuiy, e chi yaaxqueegy mic ymina'n:

—Huindzin, ca' mbocy ixipy nej ajcxy xytuñich.

Co jadu'n Esteban yminanday, chi oy y'ögy.

8

Saulo pahuidijttägy ooy mibijcpidijc

¹ Saulo ytuun quipxycapxy müid huidibi ajcxy yaj'o'c Esteban.

Huin'it xii yaj'ixhuidijt yajpahuidijt pinjaty anajty Jesús mibijcp jim Jerusalén. Tüg'óciy je jäy ajcxy huidibi Jesús mibijcp anajty yqueec-huäcxtay, ñicxy ajcxy jim Judea ñaaxjot etz Samaria ñaaxjot. Jéyi je majmetzpi apóstoles ajcxy jac-hui'müy. ² Nijëjity yëydijc huidibi Dios huindzigiyb oy yajnaxtigiy Esteban. E ooy ajcxy jotmay jihuiy, yaaxy ajcxy müid je' ycixpi. ³ Chi Saulo ooy ixhuidijtcoty pahuidijtcoty huidijaty Jesús mibijcp etz tijc tijc anajty yajpidzimy pahuich pajuguty yëydijctijc etz töxyjäydijc, e pidaaccixy anajty pujxtigoty.

Jim Samaria ajcxy capxhuäcxy Dios y'ayuc

⁴ Je huidi ajcxy queec-huäcxtay ycapxhuäcxy anajty ajcxy Jesús y'ayuc huen tim ma'amy huidijtcixy. ⁵ Nidügti huidibi anajty yxii Felipe ñicxy jim Samaria, ytiy'aj y'ayuccapxhuäcxi, yajnimay ajcxy Cristo ytiy'ajt. ⁶ E je jäy ajcxy ñayöymujci nidüg'óciy ajcxy y'amido'ijtcixy janch amoñiy jadu'n nej Felipe anajty ymiydägy e ijxyp anajty ajcxy je mijhuinma'n huidibi Felipe anajty ytumyb. ⁷ Com may anajty jäy jim huidibi müid ca'oybi ma yjot yhuinma'n, e tzoocp anajty ajcxy. E co je ca'oybi anajty ypidzimy ma je jäy, chi je jäy ooy yjacyaaxqueecy. Etz nañ mayjäy anajty chögy huidibi ca' yci' ytecy yücxy etz tecyma'tpi. ⁸ E jadu'n je mayjäy ajcxy jim ooy yjotcujcity.

⁹ Jim anajty tüg yëydijc huidibi anajty yxii Simón huidibi anajty ti ni'ixpigiy huijyäj huinma'n, e ooy anajty may Samaria jäy huin'iiñ, ymina'n co je' anajty ymijity yjanchity. ¹⁰ Tüg'óciy jäy anajty oy amido'ijtcixy Simón y'ayuc, pi'tctijc etz mij'anäctijc, e yminaangixy:

—Jadayaabi yëydijc ymüid jada Dios ymic'ajt.

¹¹ Ooy anajty je jäy ajcxy Simón mijnicxpejtcixy, com müid je mañ'ajt anajty jecy ti chachhuin'üñigixy. ¹² Co je Samaria jäy mibijcy je ayuc jadu'n nej Felipe ñimiydacy Dios y'ané'min etz Jesucristo, chi ajcxy ñiibejty yëydijctijc etz töxyjäydijc. ¹³ Etz je Simón, je huijyäj, nañ jadu'n mibijcy e ñiibejty. Chi Simón puyöyiy Felipe, ooy jihuiy huinmaay jadu'n nej je mijhuinma'n huidibi anajty Felipe ytumyb etz jadu'n nej anajty Dios ymic'ajt ijxi.

¹⁴ Co ajcxy je majmetzpi apóstoles ajcxy, huidi anajty jim Jerusalén, nejhuiy co je Samaria jäy anajty ti cöbijcixy Dios y'ayuc, chi ajcxy quejxy jim je Pedro etz Juan. ¹⁵ Co Pedro etz Juan y'ajty jim Samaria, chi ajcxy Dios mibijctzoy müid je mibijcpidijc ycixpi, jigix ajcxy ymöhuiyib je Espíritu Santo. ¹⁶ Com ca'ni anajty je' ajcxy ñicidägyii, jéyi anajty ti ñiibejtcixy ma Huindzin Jesús yxii. ¹⁷ Huin'it Pedro etz Juan cñixajy ajcxy, e chi je Espíritu Santo y'adigiy yjottigiy ajcxy.

¹⁸⁻¹⁹ Co Simón ijxy co je Espíritu Santo y'adigiyii yjottigiyii co yi apóstoles ajcxy ycinixajy, chi Simón yaj'ahuaniy je' ajcxy meef, ymina'n:

—Mooygich nañ jadu'n yi mic'ajt jigix co ngñixájibich hueñypinity nañ jadu'n jëbi ajcxy je Espiritu Santo y'adigiyii yjottigiyii.

²⁰ Chi Pedro nimay Simón:

—Mi'ögñihuipy miich mmeeñ, müd co mhuinma'n ti mbidägy co meeñyigix mbada'n je huidibi Dios ñiyejcp. ²¹ Com miich ca' xypaady jadayaabi tung, com miich mjot mhuinma'n ca' ytuädagity ma Dios. ²² Jothuimbit e ixmatz yi mjibic-huinma'n, e mibijctzou Dios, ca' jécycity xyhuinmeecxipy jadu'n nej jibic mjot mhuinma'n mmidity. ²³ Com janch ta'm miich mjot mhuinma'n, e yi jibicpi hue' xymidity mach.

²⁴ Chi Simón y'adzooy:

—Mibijctzou je Huindzin Dios müd ich ycixpi, jigix ca' ti xyjadipyich jadu'n nej miich ti xyñimäyich.

²⁵ Co Pedro etz Juan tiy'ajt yejcy etz capxhuäcxy Dios y'ayuc jim Samaria, chi ajcxy yhuimbijty jim Jerusalén. Chi ajcxy canaag agajp ñaxiyy jim Samaria ñaaxjot, e capxhuäcxy Dios y'ayuc nej ajcxy y'alma nidzoocin paadipy.

Felipe müd je Etiopía jäy

²⁶ Huin'it xii Huindzin Dios y'ángel migapxy je Felipe, nimay:

—Tzoon ya, nicx ma madzácrudz ypidzimy, ma je tü'aa huidi tzomb jim Jerusalén huidibi nicxp jim Gaza.

Je' je' je tü'aa huidibi adügtuum najxp. ²⁷ Felipe tim janitzon e ñicxy, e tü'am naybaatti müd tüg Etiopía jäy. Hue' je' anajty eunuco, mijtungmüd jim Etiopía. Yi' je' tesorero'ajt anajty ma je töxyjäy huidibi anajty yxii Candace huidibi anajty ane'mb jim. Je eunuco jim anajty ti y'oy Jerusalén Dios ojadaajt. ²⁸ E chi yhuimbijtni anajty ma ycajp, iñaayb anajty carretijoty yam chachnecycapxy. Hue' anajty chachcapxyp je Dios y'ayuc huidibi Isaías ycojaay. ²⁹ Chi je Espiritu ñimay Felipe co huen nicxy najtzpadíy je carreti ma je eunuco anajty y'iñäy.

³⁰ Co Felipe mihuingoñ je carreti, chi midoy co je jäy anajty capxy je necy huidi Isaías yjaay, chi y'amidooy:

—¿Nej mhuinjihuñiyb huidibi mgapxyp?

³¹ Chi je jäy y'adzooy:

—¿Nej iich nhuinjihuñihuipy pen ca' pin xyajnimäyich?

Chi je eunuco nimay je Felipe co huen müd iñäyii carretijoty.

³² Je huidibi anajty je eunuco chachcapxyp jadu'n je' anajty ymina'n:

Jadu'n ajcxy nicxy yaj'ögy nej jäy borregi nicxy yaj'ögy. Je' amon'ijty jadu'n nej borregi amon'ity co jäy nime'pxy. Ni tüg'aa huam ycaminañ.

³³ Ti jäy yajtzöyduñiyii, ca' ajcxy a'ixiyy co yjanayñigapxtüdaani. Ni y'ap y'oc ycaca'ty pin ocnigapxtüdiib. Co yaj'öci, chi chooni ya naaxhuñi.

³⁴ Chi je eunuco y'amidooy Felipe:

—Tunmay'ajt yajnimaygich pin jada ayucnajtzcaxiyybi ñimiydacpy, ¿ci'm ñayñimidyägyii o ji jada huingbi pin nimiydacpy?

³⁵ Chi Felipe yajtzondacy je ayuc capxtücxin ma jadayaabi Dios y'ayuccojaaybi ñecy. Chi yajmüdmidaaci nej Jesús yjaity y'ayoy. ³⁶ Co ajcxy ñajx ma tüg nüi, chi je eunuco yminañ:

—Cha nüi, ¿nej ca' iich jëbi huaad nnüibetyi?

³⁷ Chi Felipe y'adzooy:

—Pen mmibijcipy Jesús müd tüg'öciy yi mjot mhuinma'n jëbi mnüibety.

Chi je jäy y'adzooy:

—Nmibijcypych co Jesucristo Dios yi' y'ung.

³⁸ Chi je eunuco nimay je carreti huindzin co huen yajtinayxipy je' carreti. Chi nimetz ajcxy ñicxy ma nüi, e chi Felipe yajniibejty je eunuco. ³⁹ Co ajcxy ñiibidzimy, chi je eunuco ixtigoy je Felipe. Jadu'ñyi je Huindzin Dios y'Espiritu yajnicxi. E chi je eunuco ytu yajjyöñi jotcujc. ⁴⁰ Felipe yajpaty jim Azoto, chi ñajxy cajp cajp capxhuäcxi Jesucristo y'ayuc ixti yja'ty jim Cesarea.

9

Saulo yjothuimbijty

¹ Ooy Saulo tzach'ixhuidijty pahuidijty Jesús yjäy, y'ahuändacy ooy, e yaj'öga'n anajty ajcxy. Paady oy ixty je teedy mijtungmüdpí, ² pijctzoy cötújcin, co anajty ñicxa'n jim Damasco ma yi judíoäy ajcxy ñaymujctac, madza'n pinjaty Jesús y'ayuc mibijcip. Saulo yajmiina'n anajty ajcxy mach jim Jerusalén huen yëdjictjcity huen töxyjäydjcity. ³ Jim anajty Saulo ñicxy mihuingoñ je Damasco cajp. Huin'it jotcömoñyi je tücxin huidi tzomb tzejpjoty, ñigidaaci jühuidity je Saulo. ⁴ Huin'it Saulo yciday, e midoy co ñimäyii:

—Saulo, Saulo, ¿na'amy co xychachpahuidijtgäyich?

⁵ Chi Saulo yajtiy:

—¿Mbin miich, Huindzin?

Chi midoy co y'adzoyii:

—Ich je' Jesús, je huidibi miich mdzachpahuidijttacpy, ci'm nayyajtzaachytunyii jadu'n nej huajyuub co jipconebi'y huidi müd ñuummygumyii.

⁶ Chi Saulo chiyuygoty chachchiy, e yminañ:

—Huindzin, ¿ti mdzojcpy ndunipyich?

Chi je Huindzin Jesús ñimaayi:

—Pidig etz nicx cajpjoty, e jim nyajnimähuipy ti jëbi mduñ.

⁷ Je yëydijctijc huidibi anajty Saulo ymüd ooy ajcxy ñay'adzigiyyi, co midoy je' ajcxy ayuc e ca' ajcxy ni pin ma y'ijxy. ⁸ Chi Saulo ypidigy, e co huindicxiñi ca' pin ma oc'ijxni. Chi ajcxy majch Saulo ma yci', e chi ajcxy huijznicy jim Damasco. ⁹ Tugüig xii Pablo jim y'ijty huiintz, ca' ycaay y'uucy.

¹⁰ Jim Damasco anajty tüg yëydijc chinäy huidibi Jesús y'ayuc mibijcip, huidi anajty yxii Ananías, cumäyjoty Dios ñimaayi:

—¡Ananías!

E chi je' y'adzooy:

—Cha ich, Huindzin Dios.

¹¹⁻¹² Chi je Huindzin Dios ñimaayi:

—Pidig, nicx ma je tü huidibi yxii Derecha, e jim ma Judas ytjc yajtiü tüg Tarso jäy, huidi yxii Saulo. Dios mibijctzoob je' jim cham, cumäyjoty ti huin'ijxy tüg yëydijc huidi yxii Ananías, co oy ñimiñyii, e ycinäxajy jigix y'ijxigip jadüg'oc.

¹³ Chi Ananías y'adzooy:

—Huindzin Jesús, mayjäy ti xyajmüdmidyägyich ajcxy jadu'n nej yi Saulo jibic y'idich jim Jerusalén müd miich mjäy ajcxy. ¹⁴ Jadachambi ti mimiñ ya je necy, ma teedy mijtungmüdp ti ycötujcmöyii, co huen majztäy je jäy, e yajnicxtähuipy jim Jerusalén, tüg'óciy pinjaty ojadajtp müch mxii.

¹⁵ Chi je Huindzin Jesús nimay Ananías:

—Nicx, com ti ich nhuin'ixy yijibi yëydijc, jigix ich nxii etz n'ayucich capxhuäcxipy ma tüg'óciy naax cajp huidi ca' yjudiojäyity, etz ma yi reydiy, etz nañ jadu'n ma yi judiojäy ajcxy.

¹⁶ Ich yi' nyajnimähuipy tüg'óciy, nej ayo'n yajnaxipy müd ich nxii yciñpi.

¹⁷ Chi Ananías ñicxy ma Saulo anajty ti yjättägy, co ytigüy tigoty, chi cinäxajy Saulo, e chi nimay:

—Migüg Saulo, je Huindzin Jesús huidibi nayguëxici jim tü'am ma miich anajty miiñ, yi' ti xyquexyich jigix m'ijxigipy jadüg'oc, etz je Espíritu Santo xyñdigihup xycödighuip.

¹⁸ Mic'amy ycäy ma Saulo yhuin jadu'n nej acx ñimeefi, chi y'ijxigy. Huin'it Saulo ypidigy e chi yajniibejti. ¹⁹ Chi Saulo ycaay y'uucy, e chi ymic'picy jadüg'oc. Chi jim müd'ijty jecy huidibi ajcxy xipijcip Jesús y'ayuc jim Damasco.

Saulo capxhuäcxy Dios y'ayuc jim Damasco

²⁰ Chi janch mic'amy Saulo ytigüy Dios y'ayuccapxhuäcxp ma je judiojäy ajcxy ñaymujctac jim Damasco, yminañ co je Jesús hue' je' Dios y'ung. ²¹ Tüg'óciy pinjaty anajty midoohuip Saulo y'ayuc, ooy ajcxy jihuüy huinmaay, etz ñayñimäyigixy:

—¿Nej ca' jada' yjëjity je huidibi tzachyacödigoyam yi jäy ajcxy huidibi Jesús yxii miyaax ojadajtp jim Jerusalén? ¿Nej ca' jada' yjëjity huidi anajty ti ymiñ ya jäy ymajtzpi, e nicxy ciyega'n ma teedy mijtungmüdp?

²² Je Saulo capxhuäcxp anajty Jesús y'ayuc huinmic jotmic, e nigapxtäy co Jesús hue' je' je Cristo, chi yi judiojäy ajcxy huidi anajty jim tzinaayb Damasco cijx ajcxy yhuinmañ tigoydäy.

Saulo yqueecy ma judiojäy ajcxy

²³ Ti anajty huenei xii tiempo ñajtznicxiyyiñi, chi je judiojäy ajcxy ñaygapxi co yaj'ögaangixy je Saulo. ²⁴ Saulo ñejhuüy co anajty yaj'öga'ñyii. Chi jim anajty ajcxy y'ahuixyii xiiñ tzuum ma je poch aguu cajppäbi, jim anajty yaj'öga'ñyii. ²⁵ E je jäy ajcxy huidibi anajty ymijpidacpy Jesús, chi je' ajcxy codiyñajxy je Saulo mijcachjoty ma je pochycop huidi je cajp müd jübojtz'ahuidityity, e jadu'n je' choocy.

Saulo yajpaady jim Jerusalén

²⁶ Co Saulo yja'ty jim Jerusalén, oy japuyöyihuaañ je mibijcpidijc ajcxy. Nidüg'óciy anajty ajcxy ooy tzigiygixy anajty com ca' anajty mibijccixy co je Saulo ti anajty yjothuim-bity. ²⁷ Chi Bernabé yajnicxy Saulo ma je nimajmetzp apóstoles ajcxy yajpaady, e chi yajmüdmidyactay nej Saulo anajty ti ixxy je Huindzin Jesús tü'am, e nej anajty Saulo Jesús y'ayuc ti capxhuäcxi huinmic jotmic jim Damasco. ²⁸ Huin'it Saulo yhui'my jim Jerusalén, e

müid huidity anajty ajcxy. ²⁹ Aamic jotmic capxhuäcxy je Huindzin Jesús y'ayuc, etz müid müydaaccixy e ñaymicmígäpxigixy müid je judiojāy huidibi griego ayuc caxp. E je' ajcxy nihuinmayñyib co yaj'ōgaangixy. ³⁰ Co je mibijcpidijc nejhuñy, chi ajcxy yajnicxy je Saulo jim Cesarea, e chi ajcxy quejxnajxy huen nicxy jim Tarso.

³¹ Huin'it tiempo je' ajcxy huidijaty mijpidacp Jesús, jotcuyc anajty chinaaygixy, e ñgi anajty ixpij'idich Dios y'ayuc yti'yajt, jadu'n nej yi huidibi ajcxy tzinaayb ma yi Judea ñaaxjot, Galilea ñaaxjot, etz Samaria ñaaxjot. Chi ajcxy ooy yajmij'ajtcixy je Huindzin Jesús, e müid je Espíritu Santo ypubéjtin, ñgi anajty yjacmayñyigixy.

Pedro yajtzoocy Eneas

³² Co anajty Pedro yhuidijty cogapñy cajp cajp je mibijcpidijc ajcxy, y'oy nañ jadu'n ma je mibijcpidijc ajcxy huidibi tzinaayb jim Lida. ³³ Jim minaybaatti tūg yēydijc huidibi anajty yxii Eneas, huidibi anajty ti ypa'm'ijtni tuctujc jimijt, hue' je' anajty ycxuxy ytecuxuxy. ³⁴ Chi Pedro nimay:

—Eneas, Jesucristo xyajtzoocp, pidīg, etz yajpidīg yi mmaabejt.

Chi Eneas mic'amy ypidīg. ³⁵ Chi ijxy tūg'ōciy jāy huidibi tzinaayb jim Lida etz Sarón. Chi ajcxy yjothuimbijttay nidūg'ōciy, ixmajttay tūg'ōciy yi ñi'ap huinmañ e jipjtigiñy yi Huindzin Jesús y'ixpijcin.

Co Dorcas y'o'cy, chi yjugypijcy jadūg'oc

³⁶ Je huin'it tiempo jim Joep, jim anajty tūg tōxyjāy chināy huidibi mibijcp Jesús, hue' anajty yxii Tabita, je' huidi griegojāy ytiyjp Dorcas. E je Dorcas oy xii tiempo anajty yajnaxy m'oyjāy'aty yi jāy ajcxy. ³⁷ Jadu'n yjajti huin'it tiempo Dorcas ypa'mbejt, e chi ytimy'o'cy. Co ajcxy yajtziliday, chi ajcxy je ōcpi yajnicxy ma je tijc mimejtzñihujtzpetypi. ³⁸ Je Joep cajp naymihungon'ājtijp anajty müid Lida cajp ma anajty Pedro yajpaady, co mibijcpidijc ajcxy anajty nejhuñy co je' anajty yjimity, chi ajcxy mejtz yēydijc quejxy co huen nimāyii:

—Min tzojc ya Joep.

³⁹ Huin'it Pedro ñicxy müid je' ajcxy. Co jim yja'ty, chi ajcxy yajnicxy ma je tijc mimejtzñihujtzpetypi, e jim anajty ajcxy je co'ōgy tōxyjāydijc ajcxy ytinayjühuidity ma je ōcpi, chachyaaxcixy. Chi ajcxy Pedro yaj'ijxy je huit ñijen huidibi Dorcas anajty ti yaj'oyñy co anajty yjugy'atñi. ⁴⁰ Mic'amy je Pedro quejxpidzimday je jāy ajcxy. Chi ycoxtinay'ahuñy, e Dios mibijctzoy. Chi huindicxpejty je ōcpi, nimay:

—Tabita, pidīg.

Huin'it Tabita yhuindicxgēy, e ijxy je Pedro, chi iñaygugñy. ⁴¹ Chi Pedro majtzi yci', e chi hujtzgēy. Chi yaaxi ymīgūgtijc etz co'ōgytōxyjāydijc ajcxy, chi ajcxy yajcīdīgñy juugy. ⁴² Tūg'ōciy jāy ajcxy jim Joep nejhuñyday co Pedro yajjugypijcy je Dorcas. E mayjāy mibijcy je Huindzin Jesús. ⁴³ Jadu'n yjajty co Pedro y'ijty jim Joep canaax xii ma je coodzpi ytiyc huidi anajty yxii Simón.

10

Pedro etz Cornelio

¹ Jim Cesarea anajty tūg tungmüidpi huidi anajty yxii Cornelio, hue' je' anajty capitán'ajtp ma tūg batallón soldado ajcxy yxiiñip, la Italiana. ² Je Cornelio ooy anajty ytuädgyty, etz je' müid tūg'ōciy y'ung ytōxyijc ooy anajty yajmij'ajtcixy Dios. Je Cornelio nañ jadu'n ypubety müid meen je judiojāy ayoobtijc, e je' Dios ojadajt anajty jabom jabom. ³ Tūg xii, minacyxii anajty, Cornelio huin'ijxy janch huādz Dios tūg y'āngel ñigidaaci, e ñimaayi:

—¡Cornelio!

⁴ Chi Cornelio huindicxpejty je āngel janch tzigñyib anajty, e chi yajtiy:

—¿Ti Huindzin?

Huin'it je āngel y'adzooy:

—Jadu'n nej mDios'ojadaty etz jadu'n nej mbubety ayoobtijc ti Dios jāygidāgy. ⁵ Quex mjāy jim Joep, huen nicxy yajtzoñ Simón, huidibi nañ jadu'n yajtijp Pedro. ⁶ Jim je' yja'ttacy ma jadūgpi Simón, je cootzpi huidi ytiyc mihungon mejypa'. Je Pedro xyajnimāhuipy ti mdunipy.

⁷ Co je āngel ñicxni huidi anajty ti ymīgapxyii, chi Cornelio yaaxi mejtz ytumbi, etz tūg soldado huidi Dios capxymidoob, etz huidibi je Cornelio ooy ymijnicxpedyii. ⁸ Chi yajmīdmīdydactay nej je āngel ñimaayi, chi ajcxy quejxy jim Joep.

⁹ Com jabom jim anajty je quejxyōybi ajcxy ñicxy mihungon Joep, cujc yxii anajty, e chi Pedro ypejty ma tijcnicx Dios ojadajt. ¹⁰⁻¹¹ Ooy Pedro anajty yuubōgyii, e ooy jacayañ, jimni anajty yjicxy yaj'oyñyii. Chi Pedro huin'ixy je tzaip ahuādz, e huin'it ijxy quidāgy jadu'n nej poob huñ mījpi yxóchity majaty ytaatz. ¹² Jiiby ma je poob huit, jiiby anajty

canaagnax iyujc huidijaty midaax yci' ytecy etz tza'n etz joon. ¹³ Huin'it Pedro midoy co anajty ñimäyii:

—Pedro, pidig nicxy yaj'ög yi iyujc etz tzüdz.

¹⁴ Chi Pedro y'adzooy:

—Ca', Huindzin, caminaabi ñich ti njicxy huidibi jibicip etz huidibi ca' ñigödúcyity nicxy judiojáy jicxcixy.

¹⁵ Huin'it jadüg'oc ayuc midoy ñimäyii:

—Huidibi Dios yajhuäch ca' huaad mdijy co yi' yjibicity.

¹⁶ Tugüg'oc jadu'n yjajti, chi je poob huit ypättigüyñi tzejpjoty. ¹⁷ Jim anajty Pedro tzachhuinmay nej anajty yhuimbizimy je tiibi ixy co yja'ty ma tijc aguu je Cornelio yquexyöybi huidi ajcxy anajty nidihiuip yajtihiuip je Simón ytiyc. ¹⁸ Chi ajcxy mic ycogapxiy yajtiy pen jim anajty yjättägy Simón huidibi anajty nañ jadu'n yajtiyp Pedro. ¹⁹ E je Pedro je' anajty chachhuinmaayb tiibi ixy, chi je Espíritu Santo Pedro ñimaayi:

—Tugüg yëdyjc ji xy'ixtáy. ²⁰ Pidig e minac, nicx müid je' ajcxy, e ca' ti mhuinmay, com ñich jadu'n ti ñimäy co huen xy'ixtáy.

²¹ Huin'it Pedro yminajcy ma je' ajcxy, je Cornelio quexyöybi, ñimay ajcxy:

—Ñich je' huidibi miich ajcxy m'ixtaayb, çti ycixpi co ti mmiingixy?

²² Chi ajcxy y'adzooy:

—Yi' ñich ajcxy ti xyquexyich yi Cornelio huidibi capitán'ajtpi, je' tudägy jáy huidibi Dios yajmij'ajtp, je huidibi tüg'óciy judiojáy ooy tzójccixy, etz cómaaygixy. Huindzin Dios tüg y'ángel ñimay Cornelio co miich miñ njayhuoy, jigix mnícxip ma yi' ytiyc, e y'amido'ida'ñ ajcxy nej miich myaj'ixpiga'ñ.

²³ Chi Pedro yajtiçtigiyy je' ajcxy. Chi ajcxy jim ymaahui'my. Com jabom Pedro ñicxy müid je' ajcxy, e chi nijëjity ypanícxí huidibi mijpidacp Jesús huidi anajty ajcxy tzinaayb jim Jope.

²⁴ Com jabom ajcxy yja'ty jim Cesarea ma Cornelio anajty y'ahuixy tūgmucy müid yjugymigüg, etz nijëjity pin ooy müid ñaymigüg'adyii, huidijaty anajty ajcxy jayijp ti ñimäy. ²⁵ Co Pedro oyjäty ma je tijc, chi Cornelio ytiçpidzimy oy yjiçpobadij je Pedro, e chi ycoxtinay'ahuixy yajmij'ada'ñ anajty je Pedro. ²⁶ Chi Pedro huijtzinaygy je Cornelio, e ñimay:

—Tinayig, ca' xyajmij'ida'ñich, nañ jadu'n ñich njäyity nej miich.

²⁷ Müid anajty ycapxy ymiydägy co ytiçtigiyy, jilby anajty mayjáy ni'amug'i ahuijxcixy.

²⁸ Chi Pedro ñimay ajcxy:

—Miich ajcxy mnejhuixy co yi judiojáy ycostumbre capx'aducy ca' huaad judiojáy yöymucy müid huidibi ca' yjudiojáyity, ca' huaad ytiçiygixy ma ajcxy ytiyc. Per Dios ti xyajni'ixiyich co ca' huaad mnina'ñich ca' oyjäyity huádzjäyity pinjaty. ²⁹ Paady co oy ti xyajhuoyiijich ti nmiiñich, ni ca' huam ti mnina'ñich. Nnejhuixuaamyich na'amy co oy ti xyajhuoyiijich.

³⁰ Chi Cornelio y'adzooy:

—Cham ymimidaaxxiijy, jadu'n nej jadachambi hora, ya ñich anajty ma ndijcich, jaygay jay'ügy nDios'ojadatyich. Com hue' anajty mijminacy xii mina judiojáy ajcxy ycapxtaaccixy, co tüg ñayguëxici jadu'n nej jáy müid ypoob huit janch adícxp. ³¹ E je ángel xyñimaayich: “Cornelio, Dios ti xymidoohui m'oración e ti jadu'n jáygidägy jadu'n nej mbubety yi ayoobtijc ajcxy. ³² Quex mdumbi jim Jope, huen nicxy yajtzoñ Simón huidi nañ jadu'n yajtiyp Pedro. Jim Pedro yja'ttägy ma je cotzpi ytiyc huidibi yxii Simón, huidibi tzinaayb mihuingon mejypa'. Co je' ymiinipy, chi xymiidmiydägipy.” ³³ Paady nguejxyich janch mic'amy huen nicxy xy'ixtáy. E ti may'ajt mduñ co ti mmiñ. Jadachambi cha ñich ajcxy nidüg'óciy ma Dios yhuinduu. E n'amido'idaangixyich tüg'óciy je y'ayuc huidibi je Huindzin Dios ti xyaj'ane'my jëbi xyajnimaaaygixy.

Pedro Dios yti'ajt nigapxy nimäydacy ma Cornelio ytiyc

³⁴ Huin'it Pedro ytiçiy y'ayuccapxhuächpi, ñimay ajcxy:

—Jadachambi huiñjhuixyich, co yi Dios ca' ni tüg ixy'ixy jáy, y'actzojctayb hueñipínity. ³⁵ Dios yciöbicipy hueñipinjäyity huidibi tzinaayb huen huidibi naax huen huidibi capjity, pen chigüyb ajcxy Dios, pen tumyb oybi. ³⁶ Dios ti quexy yi' yti'ajty ma yi Israel jáy ajcxy, yajnimay co ji cham jotcujc'ajtin müid Jesucristo ñich ajt nHuindzin. ³⁷ Miich ajcxy mnejhuixy yajxon nej ti ytunyii ti yjadyii ma judiojáy ajcxy ñaax ycajp chondacy jim Galilea, Juan el Bautista ti anajty capxhuächí Dios y'ayuc yti'ajt etz yjääyainibety. ³⁸ E mnejhuixy miich ajcxy co Dios yejc je Jesús je Nazaretpi je Espíritu Santo, e nej Jesús yhuidjity e tuuñ oy'ajtin, etz mijhuinma'ñ, jadu'n nej yajtzocy je jáy ajcxy huidi anajty ane'm'ijtp ma yi mujcu'. Com Dios anajty müid y'ity je Jesús. ³⁹ Ñich ajcxy je tiy'ajt nmüidich tüg'óciy jadu'n nej Jesús yjaty y'ayoy jim Judea naaxjot etz jim Jerusalén. Huin'it ajcxy Jesús yaj'ocy cruudzcixy. ⁴⁰ E Dios yajjugypijcy codugüg xii, e chi yajnayguëxici ma ñich

ajcxy. ⁴¹ Ca' ti yajnayguëxgyii ma tüg'óciy jäy, jëyi ma ïch ajcxy huidi jayijp Dios yhuin'ijx jigix tiy'ajt nyegipyich. ïch ajcxy caaymujc uucmujc huin'it co yjugypijcy ma y'o'cy. ⁴² Ti xyquexy ïch ajcxy ayuc ngapxhuäcxpi ma mayjäy ajcxy etz nidiy'ajt adäpyich ajcxy co Dios Jesús ti pidägy mij'ane'mbi ma yi juugypi etz ma yi ögyi. ⁴³ Nañ jadu'n jecy'ajty tüg'óciy Dios y'ayucnajtzcaxpiybi ñimiydac ajcxy Jesús, e yminañ ajcxy co tüg'óciy je jäy ajcxy pinjaty mibijc je Cristo, Dios huinmecxiib ajcxy ypocy.

Je Espiritu Santo ycidacy ma je ca'pi ajcxy yjudiojäyity

⁴⁴ Yam anajty Pedro ycapxyñi co je Espiritu Santo ñidigiyi ycödigiyyi ajcxy nidug'óciy huidijaty y'amido'ijt Pedro y'ayuc. ⁴⁵ E je judío mibijcpidijc ajcxy tiibi anajty miin müd Pedro, ooy ajcxy jihuiy huinmay co Dios quejx Espiritu Santo ma je jäy ajcxy huidibi ca' yjudiojäyity, ⁴⁶ co midoy ycapxcixy müd huingbi ayuc, etz cömaygixy jäymejtcixy Dios. ⁴⁷ Chi Pedro yminañ:

—¿Nej ca' jada' y'óyity co ñibedipy ajcxy huidibi Dios ti ymóoyigixy je yEspiritu Santo jadu'n nej ïch ajt xymooyim?

⁴⁸ Chi Pedro ni'ane'mdiy huen ñibejtcixy ma Huindzin Jesucristo yxi. Huin'it ajcxy Pedro cohuaniiy huen hui'my tüg xii mejt xii müd je' ajcxy.

11

Pedro yajmüdmüydacy jim Jerusalén nej anajty ti ytuñiyi ti yjadyii

¹ Je apóstoles ajcxy etz je mibijcpidijc ajcxy huidi anajty ajcxy jim Judea, midoy ajcxy ayuc co nijëjity jäy huidi ca' yjudiojäyity ti anajty ajcxy cöbijciy Dios y'ayuc. ² E co Pedro yhuim-bijty Jerusalén, chi nijëjity judiojäy ajcxy ooy Pedro, je' ajcxy huidibi tzaçmijpidaaccixp judiojäy ycostumbre jadu'n nej ajcxy tiy'ajttüygixy ymag. ³ Je' ajcxy nimay Pedro:

—¿Na'amy co oy ti mgo'ixiiy jäy ajcxy huidi ca' yjudiojäyity, etz ti mgay m'ügy müd je' ajcxy?

⁴ Chi Pedro nimiydactay tüg'óciy jadu'n nej anajty ti yjaty, chi yminañ:

⁵ —Jim ïch anajty Jope nDios'ojadatyich. Chi nhuin'ijxyich jadu'n nej tüg mij poob huit chooñ tzaipjoty, cidägy ma ïch nhuinduu, xóchity anajty ma midaax ytaatz. ⁶ Co nmimijhuägxyich n'ixa'ñich ti jiiy, chi n'ijxyich may iyujc, jiiyby iyujc midaaxpi yci' ytecy, jiiyby ahua'nbi iyujc, jiiyby tza'ñ, etz joon. ⁷ Chi nmidooyich tüg ayuc huidibi xyñimaaybich: “Pedro, pidig, yaj'ög yi iyujc etz tüzdz.” ⁸ Chi n'adzooyich: “Ca' Huindzin, com caminaabi ndzüchich iyujc huidibi ca' ñigo'adücyty judiojäy ajcxy tüzdzipy.” ⁹ Chi mimetz'ocpi tüg ayuc tzaipcixy xyñimäyich: “Huidi Dios ti yajhuäch, ca' huaad midiy co ca' y'oychü'tznity.” ¹⁰ Tugig'oc jadu'n yjajti, chi je poob huit ypättigüñi tzaipjoty. ¹¹ Huin'it xyñimiiñich je quexyöybi nidugüg, chooñ ajcxy jim Cesarea. ¹² Chi je Espiritu xyñimaayich, co min n'ocnicxich müd je' ajcxy, ca' ma ni ti nhuinmayipyich. Müd nicxyich nidugüg nmigügtijc. Chi ïch ajcxy ndigüy ma je jäy ytiyc. ¹³ Je codijc xyajmüdmüydacich co je' anajty ti huin'ixy tüg ängel ma ytiyc, ñimäyii: “Quex mdumbi ajcxy jim Jope huen nicxy yajtzoongixy Simón huidibi jäy ytiyby Pedro, ¹⁴ e je' xyajnimähuip nej jëbi Dios m'alma xyajnidzoocip, miich etz tüg'óciy mjün mdijc mjuugy-migüg.” ¹⁵ Co Jesús y'ayuc ngapxhuäcxztzondaacich, chi je Espiritu Santo ñidigiyi ycödigiyyi je' ajcxy. Tim jadu'n nej xyñidigiiyim xycödigiyyim je jayijp'atypi. ¹⁶ Huin'it njäymejtcöodyich nej je Huindzin Jesús yminañ: “Janch Juan, je Bautista, jäy yajniibejt müd ni, e Dios jäy ajcxy y'adigihuiyby yjottigihuiyby je Espiritu Santo.” ¹⁷ Pen Dios ti ymöyii je jäy ajcxy huidibi ca' yjudiojäyity tú'ciy müd huidibi ïch ajt ti xymooyim co nmibijcim Jesucristo. ¿Ocjactim pin ïch co Dios nmidzip'adiybich?

¹⁸ Je mibijcpidijc ajcxy jim Jerusalén, co ajcxy midoy Pedro y'ayuc, chi ajcxy y'amonday. Chi ajcxy Dios jäymejch cömay, chi ajcxy yminaangixy: “Dios jadu'n ti ymina'ñ co je' ajcxy huidibi ca' yjudiojäyity jëbi yjothuimbijtcixy, jigix Dios ymóhuuiyby jugy'ajtin huinixiibi.”

Antioquia jäy ymidoo ajcxy Dios y'ayuc

¹⁹ Taabi jäy yaj'o'cy Esteban, chi jäy ajcxy ooy ixhuidijtcoty pahuidijtcoty Jesús yjäy jim Jerusalén. Chi nijëjity ajcxy yqueecy, nicxy ajcxy jim Fenicia ñaaxjot, etz jim Chipre, etz jim Antioquia. E capxhuäcxy ajcxy je oybi ayuc ma jadyii judiojäy, ca' ajcxy jac ni pin yajnimay. ²⁰ E nijëjity mibijcpidijc huidibi jim anajty ajcxy yconaaxip ycogäjpip Chipre etz Cirene, chi ajcxy ñicxy jim Antioquia. Chi yajmüdmüydacy ajcxy je Huindzin Jesús y'ayuc müd griegojäy ajcxy. ²¹ E je Huindzin Dios ooy ypubejti je' ajcxy, e ooy mayjäy ixmajch je jibic-huinma'ñ etz mijpidaaccixy yi Huindzin Jesús ytiy'ajt.

²² Co je mibijcpidijc ajcxy jim Jerusalén midoogixy jada ayuc, chi ajcxy quejxy Bernabé jim Antioquia. ²³ Co Bernabé jim yja'ty, chi ijxy jadu'n nej Dios anajty oy'ajtin ti tuñ, chi oy yjotcugiiy je Bernabé. Chi capxhuiy tüg'óciy co huen ajcxy janch cixyot huinijot cuyduuni yi Huindzin Jesús y'ayuc ytiy'ajt. ²⁴ Com Bernabé oyjäy je' anajty, e ooy mijpidägy Dios

y'ayuc etz ooy müdity je Espíritu Santo jotjoty huinma'ñyoty. Ymüid je' ycapxhuñin ooy mayjäy mijpidacy Jesús y'ayuc ytiy'ajt.

²⁵ Co jadu'n yjajti, chi Bernabé oy ixtay Saulo jim Tarso, e co paty, chi müdmüñ Antioquía. ²⁶ Jadu'n yjajty jim ajcxy y'ijty tüg jimijt, yaj'ixpijccixy je mayjäy huidibi ajcxy jipjtigiyi je Jesús y'ixpijcin. Jim Antioquía oga'n yxiimoy cristiano, je jäy ajcxy huidibi mijpidacp Jesús.

²⁷ Huin'it tiempo nijëjty tiy'ajtnajtzcapxhiybi choon Jerusalén ñicxy ajcxy jim Antioquía. ²⁸ Tüg huidi anajty yxi Agabo ytinay'ahuñi mayjäyoty, e chi je Espíritu Santo yajcapxi, e yminañ co mijyuu anajty ñaxcidäga'ñ huindu'ñybi naaxhuiñ. E janch jadu'n yjajti taab anajty Claudio y'ane'my. ²⁹ Huin'it je mibijcpidijc ajcxy jim Antioquía pidacy ajcxy yhuinma'ñ co quexaangixy pubëjtin ma ymigütiyc ajcxy huidi tzinaayb jim Judea, jadu'n nej pubëjtin pin tim yega'ñ. ³⁰ E jadu'n ajcxy tuuñ. E je meen tübi anajty ymucy yajmiguejxy ajcxy je Bernabé etz Saulo ma je mibijcpidijc tungmüdpi jim Judea.

12

Co Jacobo y'o'cy etz co Pedro yajpujxtijctigiyi

¹ Huin'it tiempo je rey Herodes yajmajtzi nijëjty Jesús yjäy, e chi yajtzaachytuuni. ² Chi ni'ane'mdiy huen yaj'ögyi müid espada je Jacobo, je Juan y'uch. ³ Co je rey nejhuñi co je judiojäy ajcxy jadu'n ooy jäygidaaccixy, chi ymajtzi Pedro nañ jadu'n. Hue' jadu'n yjajti xijoty, je xi mina tzejcaagy caaygixy huidi ca'pi ylevadura müdity. ⁴ Co Pedro yajmajch, chi yajpidacy pujxtigoty. E chi je rey ane'my co huen midaaapxy soldado ajcxy cuend'adyi, tügpicyjaty midaaax soldado ajcxy. Hue' anajty je rey ti huinmay xiinaxy anajty tiyduna'ñ Pedro mayjäy agujc. ⁵ Pedro jüby anajty pujxtigoty janch oy cuend'aty. E je mibijcpidijc janch Dios mibijctzodiib anajty ajcxy müid Pedro ycixpi.

Dios y'ängel yajpidzimy Pedro pujxtigoty

⁶ Huin'it coodz ma ca'ni anajty yxiimiy, ma je Herodes anajty tiyduna'ñ Pedro mayjäyoty com jabom, Pedro maab anajty, e soldado agujc ajcxy cixoch tecyoch anajty müid cadena, e jadügpicy soldado ajcxy pujxtijc'aguy anajty ajcxy ycuend'aty. ⁷ Chi janch timetiini yHuindzin Dios tüg y'ängel ñayguëxici ytinäy ma Pedro yhuinduu, e je pujxtijc yaj'anayday. E chi je ängel tijyüxcy Pedro ma ycaach, chi yajmäyhuijy, e nimay:

—Pidig mic'amy.

Chi je cadena ycäday ma Pedro yci'. ⁸ Chi je ängel nimay Pedro:

—Ñayhuñi, yajtigi' mgig.

Co Pedro yajtigiycy yci, chi je ängel ñimaayi:

—Yajtigi' mjocxhuit, e pajamgich.

⁹ Chi Pedro pujxtijc pidzimy axam ma je ängel, ni ca' nejhuñi pen janch anajty huidibi je ängel tummy, hue' jihuiy jadu'n nej ycumäy. ¹⁰ Chi ñajxy ajcxy ma tügpicy cuend'ajtpi, mic'amy ajcxy mimetzi pinajxy. Co ajcxy yjäty ma mijpujxtijc aguü, ma mijtuba', chi je' ci'm'ahuaach. Chi ajcxy ypidzimy. Ti anajty mijyöygixni co je ängel ixmajtzn Pedro.

¹¹ Huin'it Pedro yhuinma'ñyemch, chi yminañ:

—Jadachambi njihuñyibich co janch jada' co je Huindzin Dios ti quexy y'ängel, e yi' ti xyñihua'ñich ma Herodes, etz jadu'n nej tüg'öcy judiojäy ajcxy anajty xytuna'ñich.

¹² Co Pedro yjot yhuinma'ñ ymejch, chi ñicxy ma María ytiyc, je Juan ytaj, je Juan huidi jäy ytiy Marcós, ma anajty ajcxy jim mayjäy tügmucy y'ijtcixy Dios mibijctzoogixy. ¹³ Co Pedro tijc'aguu cojxnojcy, je tibi'y'amybi, chi tüg töxy'anäg ypidzimy huidi anajty yxi Rode, ixa'ñ pin je' tijc'aguu cojxnojcy. ¹⁴ Co oy yögmidoy co Pedro je' anajty, chi ca' ytiyc'aguu yaj'ahuaach. Jëyi co poyigy ñicxy tigoty co anajty tzachjotcücicy, nigapxy co Pedro je' anajty ma tijc'aguu.

¹⁵ Chi je jäy ajcxy nimay Roda:

—Mloocjiy jada' müich.

Chi je töxy'anäg y'adzooy co janch je' anajty. E je jäy ajcxy yminaangixy co ca' yi' yjëjty, hue' jada' Pedro y'ängel.

¹⁶ Yam Pedro anajty tijc'aguu tzachcojxnocy co ajcxy yaj'ahuaach, chi ajcxy ijxy, chi ajcxy ooy chigiy yjihuiy. ¹⁷ Pedro cümüid ytiy'ajtyejcy co huen amon ajcxy. Chi yajmüdmidyacy nej je Huindzin Dios anajty ti yajpidzimyijc pujxtigoty. E nimay ajcxy co huen nicxy yajmüdmidyägy jada je Jacobo etz jacjadyi mibijcpidijc.

Chi Pedro ñicxy huingbi cajn.

¹⁸ Co yxiimiy, huin'it soldadtijc ajcxy ooy ytiy huambi jihuiybi huinmay'ahuidijty, com ca' nejhuñyixy nej je' anajty ti ytunyii ti yjadyii müid Pedro ycixpi. ¹⁹ Chi Herodes ni'ane'mdiy huen nicxy yaj'ixtäy Pedro. E co ca' yajpaty, chi pijctzoy ti'ajt ma soldado ajcxy huidi anajty Pedro ti ycuend'adyi. Chi ni'ane'mdiy huen ajcxy nicxy yaj'ögyi. Chi Herodes choon jim Judea, chi oy chinaydacy jim Cesarea.

Herodes y'ögy

²⁰ Herodes janch ymijotmätpy anajty je jäy huidibi tzinaayb jim Tiro etz Sidón. Chi je Tiro etz Sidón jäy ajcxy ñaygapxi nej jëbi huingohuägihuaangixy je rey. E ymimadac ajcxy co migapxy je Blasto je mijtungmüdpí maabi rey Herodes ytiyc. E chi ajcxy pijctzoy co huen tzip cixy naxy, com co ajcxy xijc mooc jim anajty yajtzoongixy ma rey ñaaxjot. ²¹ Chi Herodes agapxtujcy tüg xii, chi je reyhuít yajtigüi, chi ñaydac paty ma yctüjctac, chi migapxy ajcxy je jäy. ²² Chi je mayjäy ajcxy ytiigü mic capxp miydaacp, chi ajcxy yminaangixy:

—Jada jäy huidibi capxp, ca' jada yjäyity, jadu'n yi' nej tüg dios!

²³ E huin'itiy Huindzin Dios y'ängel yajpa'mbejty Herodes, com ca' anajty huindzigüy cömay je Dios. Chi y'o'cy, ting je' tzützaayi.

²⁴ Je Huindzin Dios y'ayuc mibijc'idichpy anajty jäy, e yajcapxhuäcxp anajty hueñyitmma'ámyity.

²⁵ Co Bernabé etz Saulo ajcxy ytungmay jim Jerusalén, huin'it chooni ajcxy jim ymüdnicy huidibi anajty yxii Marcos.

13*Bernabé etz Saulo yajtzondaaccixy ytung huidibi ajcxy pátip*

¹ Ma je' ajcxy huidi mijpidacp Jesús jim Antioquía, jim anajty jadyii huidi Dios y'ayuc yaj'ixpijcp anajty, etz nañ huidibi tiy'ajt najtzcapxiyb. Jim anajty Bernabé etz Simón, huidi anajty ajcxy ytiyyp el Negro, etz Lucio huidi tzoön Cirene ñaaxjot, etz Manaén huidi tüg yeectac müd Herodes, huidibi ane'm jim Galilea, etz Saulo. ² Tüg xii ajcxy ñayyöymüjcgixy jaygay jay'ügy Dios ojadajtciy. E chi je Espiritu Santo ñimaayi:

—Huen pidáacigich ajcxy Bernabé etz Saulo ahuing jigix ajcxy ytunipy ma je tung tiibi nyajnihuohüiyich.

³ Chi ajcxy yjacDios'ojadajty etz yjac'ayuu'ajty, e chi je jäy ajcxy cínixajy Bernabé etz Saulo, e chi ycapxycixy müd je' ajcxy.

Je apóstoles ajcxy capxhuäcxixy Dios y'ayuc jim Chipre

⁴ Chi jada' je Espiritu Santo yquejxi Bernabé etz Saulo huen nicxy Seleucia, e jim ajcxy ybarcotigüy nicxy ajcxy jim Chipre mejy agujcpi. ⁵ Co jim ajcxy yja'ty ma barco yjättac huidi yxií Salamina, chi ytiigü Jesús y'ayuccapxhuäcxp ma je judíoäy ajcxy naymujctac. Tzoön je Juan anajty nañ jadu'n je' anajty Bernabé etz Saulo pubéjtip. ⁶ Huidijttay ajcxy ma je naax mejy'agujcpi, e yja'ty ajcxy ma je cajp huidi yxií Pafos. Jim ajcxy paty tüg judíoäy huidi anajty yxií Barjesús, hue' je' anajty huíjyäj, e ñaydijyii anajty co Dios ytiy'ajt najtzcapxiyi, e ca' anajty yjanchity. ⁷ Je huíjyäj ooy müd ñaymigüg'adyii anajty je huidibi ane'm jim, hue' anajty yxií Sergio Paulo. Je Sergio Paulo ooy anajty ycohuinma'ñity, ooy y'ixpícyity. Chi ni'ane'mdiy co huen nicxy yajtzonyii Bernabé etz Saulo. Com je Sergio Paulo anajty midoohuaani je Dios y'ayuc. ⁸ Je huíjyäj, huidi nañ jadu'n yajtijp Elimas, midziptzoñ Pablo etz Bernabé, e tücci' y capx'aduga'ñ ca'ydí je gobernador ymibicy. ⁹⁻¹⁰ Chi Saulo, huidibi nañ jadu'n yajtijpy Pablo, müd je Espiritu Santo huindixpejty je huíjy jäy, e nimay:

—Ooy mibicijäyity müich, ooy m'anijity, mujcu' müich xy'ung'ajtp, ooy mmidzip'aty pinjaty oyjot oyhuinma'ñ müid! ¿Mina m'ixmadza'ñ nej mdzachyajtigoya'ñ je Huindzin Dios ytiy'ajt? ¹¹ Jadachambi je Huindzin Jesús yxhachytunaamb, e mhuí'mip huíintz, etz ni ca' je ximbi tzojc m'ixipy.

Chi je huíjyäj mic'amy yhuí'my huíintz coodz, chi ixtay pin oc-huítznicxiib com ca' anajty y'oc'ixxni. ¹² Co je gobernador jadu'n ixxy, chi mijpidacy Jesús y'ayuc, e chi ooy jihuüy huinmaay nej Pablo nimiydägy je Huindzin Jesús y'ayuc ytiy'ajt.

Pablo etz Bernabé yajpátcixy jim Antioquía etz Pisidia

¹³ Chi Pablo etz ymigügtijc ajcxy müd ybarcotigüy, chi ajcxy ñicxy Perge ma Panfilia ñaaxjot. Chi Juan puyöyduutni Pablo etz Bernabé, e chi ñicxni Jerusalén. ¹⁴ Pablo etz Bernabé ñajxy jim Perge oyja'tcixy jim Antioquía ma Pisidia naaxjot. Sábado xii ajcxy ytiigüy ma je judíoäy ajcxy ñaymujctac, chi ajcxy ixtactay. ¹⁵ Co ñecycapxtay ma Moisés ñecy etz Dios y'ayucnajtzcapxiybí ñecy, chi je naymujctac huindzin quejxy ayuc ma Pablo ajcxy, ñimaayi:

—Migügtijc, pen mmüd ayuc tiy'ajt müd jäy ycixpi jëbi cham myajnimäy ajcxy.

¹⁶ Chi Pablo ytinayigü, yci' müd ytiy'ajt yecy co huen amoongixy, e nimay ajcxy:

—Midoogix, müich Israel jäy ajcxy, etz huidibi Dios yajmij'ajtp. ¹⁷ Je Israel jäy Dios huin'ixy ich'ajt nmij'ap nmijteedy jecy'ajty etz yajyujcejt ajcxy micho'n co anajty ajcxy jim yjactzinäy Egipto ñaaxjot. Chi ajcxy yajpidziimni müd Dios ymic'ajt. ¹⁸ Dios je' ajcxy mihuindinay huixchigüipx jimijt jim mijtigüduum. ¹⁹ Je Dios huixtucj it naax cajp yajtigoy huidi anajty jim tzinaayb Canaán ñaaxjot, etz yajmoy je naax ich'ajt nmij'ap nmijteedy

jecy'ajty jigix ajcxy jim chinähuipy. ²⁰ Midaax migo'px jahuixchigipx majc jimijt Dios mic'ajt mooy juez ajcxy huen ane'myii Israel jäy ixti mabaad Samuel je Dios y'ayucnajtzcaxxiyb ytungbijcy. ²¹ Huin'it ajcxy tüg rey pijctzoy huidi ane'miib ajcxy. Chi Dios yajreytigüy Saul huidi tuun huixchigipx jimijt. Je Saul yteedy hue' je' anajty yxii Cis, hue' je' anajty Benjamín y'ap y'oc. ²² Chi Dios tungbijcy Saul e yajreytigüy David, chi Dios yminañ: "Ti nbaadyich David, Isai ymag, tüg yëdyjc huidibi cuydundähuipy ne ndimdzocyich." ²³ Ma David y'ap y'oc Dios yajniibjcy Jesús, jigix nihuänipy yajniidzögipy je Israel jäy ajcxy, jadu'n nej anajty jécyp Dios yaj'ahuaniy ajcxy. ²⁴ Ca'ni anajty Jesús miñ co Juan, je Bautista, capxhuäcxy Dios y'ayuc ma je Israel jäy ajcxy, nimaaygixy co copicy huen jothuimbijtcixy ma Dios, e huin'it jëbi ñiibéjtcixipy. ²⁵ Co anajty Juan y'o'cin huingon, chi yminañ: "Ca' ñich njëjity je Cristo, jadu'n nej mmınaangixy. Jayijp ti nmiñich, jac'axam miina'ñ je Cristo; jacmic'ajt miid je' ca'ydi ñich. Ca' xypaadyich nicxy yi' ycighuin nguejich."

²⁶ Chi Pablo yjacminañ:

—Migügtijc, Abraham y'ijx y'oc etz pinjaty yajmij'ajtp Dios, Dios ti xyajnigüexy jada ayuc nej ajcxy jëbi m'alma niidzoocin paady. ²⁷ Je jäy ajcxy huidi anajty ajcxy tzinaayb jim Jerusalén etz tungmiidpi ajcxy, ca' ajcxy nejhuüy pin je' anajty je Jesús, ni ca' anajty huinjihuüyigixy y'ayucnajtzcaxxiyb ajcxy y'ayuc huidibi anajty yajcapxp ma ajcxy ñaymujctac huindüg sábado. E je' ajcxy ci'm yajpocycäy Jesús, e cuyduñ nej anajty ajcxy yjaybétyity ma Dios ñecy. ²⁸ Oy ajcxy ca' paty pocy nej yaj'öccixipy Jesús, chi ajcxy nibijctzohuüy ma Pilato co huen nicxy yaj'ögyii. ²⁹ Co je jäy ajcxy cuydunday jadu'n nej anajty yjaybétyity ma Dios y'ayuc miid je' ycixpi, chi ajcxy yajminajcy cruudzcixy, etz oy yajnaaxtigüygixy. ³⁰ E Dios je Jesús yajjugypijc co anajty ti y'ögy. ³¹ Chi canaag'oc ñayguëxig'ci ma ymigügtijc huidi anajty ti ymiidhuididyii co choon Galilea ñicxy Jerusalén. Jadachambi yi' je' ajcxy huidi tiy'ajt yejcyp ma je jäy ajcxy.

³² Je oybi ayuc ñich miich ajcxy nyajmiidmiydacpy cham, huidi Dios yajnimay ñich'ajt nmij'ap nmijteedy jecy'ajty. ³³ Je oybi ayuc ti Dios cuyduñ cham ma ñich'ajt co yajjugypijcy Jesús co y'o'cy. Jadu'n yi Dios y'ayucjoaaybi jaay jecy'ajty ma je Salmo necy mimetzp ma Dios jadu'n yminañ: "N'ungich cham ti nyajjugypicyich." ³⁴ Miid jadyaabi ycixpi co Dios ti yajjugypicy Jesús co y'o'cy, jigix ñiñicx ca yhuindigooyipy jadu'n anajty yjaybétyity ma Dios ñecy ma Dios jadu'n yminañ: "Nmöhuaamych miich ajcxy je conücxin huidibi nyajnimaaayich je David." ³⁵ Paady nañ jadu'n Dios y'ayucjoaaybi jaay jadüg'it, ma yminañ: "Ca' Dios a'ixiy nicxy y'ung ñiñicx yhuindigooy, je y'ung huidibi miid huädz jot huinma'ñ." ³⁶ Com janch co je David Dios huin'ijxy, jigix ane'mipy yi' yjuugy ymigüg ajcxy. E co ytung yajmay, chi y'o'cy, e je' y'alma ñaybaatti miid je y'ap yteedy y'alma, e je' ñiñicx huindigooy je'. ³⁷ Je Jesús huidibi Dios yajjugypijc ca' je' ñiñicx yhuindigooy. ³⁸ Migügtijc, jëbi mnejhuüyigixy, co je pocyhuinmeecxin yaj'ihuäcxy yajcapxhuäcxy miid Jesús ycixpi. ³⁹ Miid je' ycixpi pinjaty mibijcp ti ypocyajhuinmeecxcixy huidibi Moisés yley anajty ca'p pocyhuinmeecxin jecy. ⁴⁰ Nayguend'äjtigix, ix xyajcidaceptcix je mij ayo'n jadu'n nej Dios y'ayucjoaaybi jaay jecy'ajty co Dios jadu'n yminañ:

⁴¹ Midoogix ñich n'ayuc, miich ajcxy nixiicpi yajxiicpi, nay'adzigiüyigixy, ix m'alma myajtigooygixy. Com ñich Dios ndumybich tüg mijhuinma'ñ ma miich ajcxy mxii mdiempo. May miich ajcxy ca' mmibigipy, oy pin xyjayajmiidmiydäaccixipy.

⁴² Co Pablo ajcxy ypidzimy ma yi judiojy ñaymujctac, chi je jäy huidibi ca' yjudiojyity nimay je Pablo co huen nañ jadu'n yajmiidmiydägiyb ma je jadügpi sábado. ⁴³ Co ajcxy yöyhuäcxni ma nayyöymujctac may judiojy etz mayjäy huidi ca' yjudiojyity huidibi jijptigüy je judiojy y'ixpijin, panicxy ajcxy je Pablo etz Bernabé. Pablo etz Bernabé capxhuüy ajcxy co huen panicxcixy je tiy'ajt jadu'n nej Dios tiibi tuñ may'ajt miid jäy ycixpi, e ca' ajcxy ixmadzipy.

⁴⁴ Co sábado yxii paty, chi jäy ñayyöymujci jahunenjaty cajp jäy ycanicxtay co anajty tzachmidoohuaangixy Dios y'ayuc. ⁴⁵ Ca' anajty ajcxy yjotcücicy co je judiojy ajcxy ijxy je mayjäy. Chi ajcxy ooy yjot'ambijccoty ni'ojüygixy etz nimaaygixy oy ni nej Pablo. ⁴⁶ Chi Pablo etz Bernabé ytiügüy miccapxpi yminañ ajcxy:

—Copicy anajty co ñich miich nyajnimähuipy Dios y'ayuc yajijp. Com ca' mgöbigaangixy Dios y'ayuc, e co ca' mnaybiidäacigixy tudägy ma jugy'äjtin miid huinixiibi, nicxyich n'ocyajnimäy ajcxy Dios y'ayuc huidibi ca' yjudiojyity. ⁴⁷ Com jadu'n xy'ane'myich ajcxy yi Huindzin Jesús, e xyñimaayich ajcxy:

Ti ñich miich nbidägy jadu'n nej tüg tiicxin jajin ma tüg'öcy naaxhuñybi jäy jigix myajne-jhuñhuipy ajcxy je niidzoocin jiguembaad huindu'my naaxhuñ.

⁴⁸ Co ajcxy jadu'n midoy huidibi ca' yjudiojyity, chi ajcxy ooy nigi yjotcügüy, e chi ajcxy yminandacy co je Huindzin Jesús y'ayuc ooy anajty y'öyity. E may ajcxy mibijcy huidibi anajty Dios ti yajniidzögüy co paatip jugy'äjtin huinixiibi. ⁴⁹ E jadu'n jim yajcapxhuäcxy

Jesús y'ayuc ma je jimbi naax cajp. ⁵⁰ E je judíoäy ajcxy minaygapxi nijëjity töxyjäydijc ajcxy tudägypi huidibi Dios yajmij'ajtp, etz je mijäydijc, e je' ajcxy müd mibidigy Pablo etz Bernabé co pahuojpquëgaangixy ma jejimbi naaxjot. ⁵¹ Chi Pablo etz Bernabé ycëg huinhuoipy, je' je' tiy'ajtp co ca' jäygidacy ajcxy nej jäy anajty ytungixy. Chi ajcxy ñicxni jim Iconio. ⁵² E je' ajcxy huidibi mijpidaacp Jesús ooy anajty ajcxy yjotcujcity. E ymüid anajty ajcxy je Espiritu Santo ma yjot yhuinma'ñ.

14

Pablo müd Bernabé jim Iconio

¹ Jim Iconio Pablo etz Bernabé ytiigy ajcxy yquipxyi ma je judíoäy ñaymujctac, e oy yajxon ajcxy capxhuäcxy Jesús y'ayuc. E may judío etz griegoäy ajcxy ymibijcy. ² Je judíoäy ajcxy huidibi anajty ca' ymibijccixy nigapxcoty ni'ojygoty ajcxy huidibi ca' yjudíoäyity huen je cajp jäy ajcxy mijotmädiipy je mibijcpidijc. ³ Müd jada ycixpi Pablo etz Bernabé yhuim'y je' ajcxy jecy etz capxhuäccixy ajcxy Dios y'ayuc huinmic jotmic etz je Huindzin mijotcujc'ajtcixy ooy, e mooyi ajcxy je mic'ajt jëbi ajcxy pa'mjäy yajtzögipy etz mijhuinma'ñ tungixy huidibi ijxpejt'ajtp ma Dios ymic'ajt. ⁴ E je cajpjäy mejtzcipy je' anajty ajcxy, nijëjity ymijpidacpy ajcxy yi judíoäy, etz nijëjity ymijpidacpy ajcxy je Dios y'ayuccapxhuäcxi. ⁵ Chi nijëjity judíoäy etz huidibi ca' yjudíoäyity ñaygapxi müd tungmüidpi co mijotmätcodaangixy etz tim tzaagögädaangixy Pablo etz Bernabé. ⁶ Co Pablo etz Bernabé nejhuüi, chi ajcxy yqueecy ñicxy ajcxy jim Listra etz Derbe jim Licaonia, e majaty naax cajp huidi huinduy'agonbi. ⁷ Jim ajcxy capxhuäcxy Jesucristo ytiy'ajt nej jëbi ajcxy huaad y'alma nüzzoocin paatcixy majaty cajp huingonbi.

Tzaagätzcixy Pablo jim Listra

⁸ Jim Listra anajty tüg yëydijc iñäy tecyma'tpi, caminaabi anajty yöy, com jadu'n anajty yma'xung'aty. ⁹ Je tecyma'tpi amido'ijtpy anajty Pablo y'ayuc, e Pablo ijxpy anajty co ymüid mibijcin nej jëbi chögy. ¹⁰ Chi Pablo mic nimay:

—Tinaayig.

Chi je tecyma'tpi tüg tipy ytinaygugüi, e chi ytiigy yöyb. ¹¹ Co je mayjäy ajcxy ijxy nej Pablo anajty pa'mjäy ti yajtzögy, huin'it ajcxy ytiigy huambi jihuüybi müd Licaonia ayuc chachminaangixy:

—¡Dios ajcxy jadu'n nej jäy ti ycidaaccixy ma iich ajt!

¹² Yminaangixy co Bernabé je' anajty Júpiter, e je Pablo je' anajty Mercurio, com je' anajty capxp. ¹³ E je Júpiter teedy huidibi anajty tumb jim ma je Júpiter chajptijc cajppäbi, mimiñ toro ajcxy etz pijy. E je teedy müd je jäy ajcxy yhuindzigihuaangixy etz ojadadaangixy anajty Pablo etz Bernabé, yaj'ögaangixy je toro ajcxy. ¹⁴ Co Pablo etz Bernabé nejhuüi, ca' ajcxy jäygidacy nej jäy anajty ajcxy y'ididzaangixy, chi ajcxy ci'm yhuit agidzäy, e ytiigy ajcxy mayjäy'agujc yam chachminaangixy:

¹⁵ —¡Yëydijctijc ajcxy! ¿Nej co jada jadu'n m'iditzcixy? Nañ jadu'n iich ajcxy jäyity, jadu'n nej miich ajcxy. Paady iich ajcxy ti nmingixy ma miich ajcxy mgajp jigix ajcxy m'ixmadzipy jada jadu'mbi huinma'ñ huidibi ca' choobaady ma Dios. E mijpidaaccixp je Dios juugypi huidi oyduñ tzajp etz naaxhuüiybi, je mejy etz tüg'óciy tijaty ya n'ixim. ¹⁶ Jecy'ajty Dios ixmajch je jäy ajcxy huen tungixy nej tzojccixy. ¹⁷ Oy Dios anajty jayecy tiy'ajt co je' Diosity, jatuñ jadu'n yi oybi müd miich ajcxy ycixpi. Dios yi' yajtuub etz yecy oybi cosecha e xymooyim mijcajee huidi ngaayim n'uucim e xyajjotcugüiyim.

¹⁸ Oy anajty Pablo jadu'n jadim tzachnimaangixy, ca'p ajcxy mimadacy co yi jäy ajcxy ca'p yaj'óccixipy je toro co anajty yhuindzigihuaangixy.

¹⁹ Huin'it xii nijëjity judíoäy yja'ty, choon jim Antioquia etz Iconio. Chi ajcxy yajnimay je mayjäy co huen midziptzoongixy Pablo etz Bernabé. Chi mic'amy je mayjäy midziptzoon Pablo etz cögäch ajcxy. Hue' ajcxy tijy ti anajty yaj'öccixy. Chi ajcxy oy ixjugucy cajppa'. ²⁰ Chi je apóstoles ajcxy jübügüi je Pablo, chi je' ypidigy, e ñicxy jadüg'oc cajpjoty. Com jabom Pablo etz Bernabé choon, ñicxy ajcxy jim Derbe.

²¹ Co Pablo etz Bernabé jadu'n capxhuäcxy je Jesucristo y'ayuc oybi jim Derbe, chi mayjäy ajcxy mijpidacy Jesús. Chi Pablo etz Bernabé ajcxy yhuimbijty Listra, Iconio, etz Antioquia. ²² Jim ajcxy jotmicmigapxy je mibijcpidijc ajcxy, e capxhuüiy huen tügiip mibijccixy Dios y'ayuc, nimaangixy:

—Co ndigihuaanim ma Dios y'ane'my copicy co nyajnáxim may ayo'n. ²³ Cajp cajp majaty mibijcpidijc yajpaady jim Pablo etz Bernabé yajniibicy nijëjity yëydijctijc huen nigohuajc'ajtcixy je jäy ajcxy huidibi mijpidacp Jesús. Co anajty ti yajniibicy je' ajcxy huidibi nigohuajc'adipy, chi jaygay ajcxy y'ijty etz Dios mibijctzoy müd je' ajcxy ycixpi.

Pablo müd Bernabé yhuimbijtcixy Antioquia jim Siria naaxjot

²⁴ Pablo etz Bernabé ñajxy ajcxy Pisidia oy ajcxy yja'ty jim Panfilia. ²⁵ Chi Pablo etz Bernabé Jesús y'ayuc capxhuäcxi jim Perge, chi ajcxy ñicxy jim Atalia. ²⁶ Chi ajcxy jim ybarcotigüy ñicxcixy jadügtecy jim Antioquia ma anajty ajcxy ti yajñibigüi Dios chójcin müid je tung huidibi anajty ti yajcixcixy. ²⁷ Co ajcxy yja'ty jim Antioquia, chi ajcxy huoomujcy je jay ajcxy huidibi anajty mijpidaacp Jesús, e yajmüidmiydactay tüg'óciy nej anajty Dios ti ytuñ müid je' ajcxy ycixpi, nej anajty Dios ti yaj'ahuäch je tü'aa nej huaad mibicy ajcxy je huidibi ca' yjudiojäyity. ²⁸ Pablo etz Bernabé ijt ajcxy ooy jim jecy müid je mibijcpidijc ajcxy.

15

Mibijcpidijc ñayyöymujci ajcxy jim Jerusalén

¹ Je huin'it tiempo nijëty jay huidi tzoön Judea yja'ty ajcxy jim Antioquia, e ytigüy yaj'ixpijcp ma ajcxy je huidibi mijpidaacp Jesús, yminaangixy: "Pen myajñidzögamy ajcxy yi m'alma, copicy co ajcxy myajtiy'ajttihuijy jadu'n nej Moisés y'ane'my." ² Chi Pablo etz Bernabé ñaymidziptzongooti ajcxy müid huidi anajty ajcxy tzomb jim Judea, e ca' ajcxy ñay'ayuc-huinjihuiyi. Chi jada' yajñibeji Pablo etz Bernabé etz jacjadyii mibijcpidijc huen nicxy ajcxy Jerusalén yajtiydigüy ma je apóstoles ajcxy etz huidibi ajcxy nigohuajc'ajt je mibijcpidijc jim Jerusalén.

³ Je mibijcpidijc huidibi anajty ajcxy jim Antioquia oy ajcxy tujijphuohüy Pablo etz je' ajcxy huidi nicx müid Pablo. Chi Pablo etz müid yjajmüidtiyc ajcxy ñicxy, e ñajxy ajcxy Fenicia ñaaxjot etz Samaria ñaaxjot. Yajmüidmiydaaccixy je mibijcpidijc cajp jadu'n nej jay ajcxy huidibi ca' yjudiojäyity ti yjothuimbijtcixy etz yajmij'adaangixy Dios. E tüg'óciy mibijcpidijc ooy ajcxy jaygidacy je Pablo y'ayuc.

⁴ Co Pablo etz Bernabé ajcxy yja'ty jim Jerusalén, chi je mibijcpidijc ajcxy cöbijci je apóstoles ajcxy, etz je' ajcxy huidi nigohuajc'ajtp anajty je mibijcpidijc. Chi Pablo yajmüidmiydactay nej anajty Dios ti ytuñ müid je' ajcxy. ⁵ Chi nijëty fariseojäy, tiibi anajty mibijcixy Jesús, ytinayigüy ajcxy juntijoty, e yminañ ajcxy:

—Copicy co huen yajtiy'ajttij je jay huidibi mibijcp Jesús huidi ca' yjudiojäyity, e copicy nyaj'ané'mim co huen ajcxy Moisés ycötüjcin cuyduuni.

⁶ Chi ñayyöymujci je apóstoles ajcxy etz huidi ajcxy nigohuajc'ajtp je mibijcpidijc, co capxyöyaangixy je fariseojäy y'ayuc nej yhuimip. ⁷ Ca' ajcxy tzojc ñay'ayuc-huinjihuiyi, chi Pedro ytinayigüy yminañ:

—Migügtijc, mnejhuiyb ajcxy co jayhuin Dios ti xyhuin'ixyich ma müich ajcxy, jigix nyajnimähuiwich jay ajcxy huidibi ca' yjudiojäyity je Jesús ytiy'ajt oybi nej ajcxy y'alma nidzocin paadipy. ⁸ E Dios huidi nejhuiyb jay yjot yhuinma'n xyaj'ixxich je tiy'ajt co yejcy Espíritu Santo ma yi' ajcxy nañ tim jadu'n nej ytuuñ ma iich ajt. ⁹ Dios tü'ciy ytuñ müid iich ajt etz müid yi' ajcxy, müid co yi' ajcxy mibicy Jesús paady Dios yajhuaatzajcxy yjot yhuinma'n. ¹⁰ Jadachambi, ¿nej co ca' mhuinjihuihuaangixy mibigaangixy nej Dios ytuñ müid huidibi ca' yjudiojäyity? ¿Ney co adzip myajñihuidzaangixy je costumbre huidi ni iich ajt ni n'ap ndeedy ca' ti mimadägy nicxy cuydundaaygixy? ¹¹ Janch iich ajt nmibijcim co müid je may'ajt huidi Jesús ti tuñ müid iich ajt ycixpi ti nbaatim n'alma nidzocin. Nañ tim jadu'n je' ajcxy huidi mibijc Jesús huidi ca' yjudiojäyity ypaat y'alma nidzocin müid je may'ajt huidi Jesús ti tuñ.

¹² Huin'it je jay ajcxy y'amonday, y'amido'ijtcixy nej Bernabé etz Pablo nimiydaaccixy nej anajty Dios ti tuñ müid yi' ajcxy, jadu'n nej ajcxy ti yajtzögy pa'mjäy müid Dios ymic'ajt, etz jac tijaty mijhuinma'n huidi ti tuñ ma yi jay ajcxy huidi ca' yjudiojäyity. ¹³ Co Pablo etz Bernabé ajcxy miydactay, chi Jacobo yminañ:

—Migügtijc mido'mbijcgigich ajcxy iich n'ayuc. ¹⁴ Simón Pedro ti xyajmüidmiydaacim nej Dios may'ajt ti tuñ oga'n ma huidibi ca' yjudiojäyity, co huin'ixy huidi yi' yjaj'adaanip ma yi' ajcxy. ¹⁵ Quipxy jada ñaybadyii müid huidi je Dios y'ayucnajtzcaxxybi jecy'ajty ycojay, ¹⁶ co jadu'n yminañ:

Co anajty jadu'n ti y'ocjadyii, chi nhuimbidiyich ya naaxhuin. Nyaj'oyihuiwich jadüg'oc je naax cajp huidi David anajty y'ane'myb huidi anajty ti y'octigoooybi jadu'n nej tüg tijc huidi ti yciday. Ma David y'ap y'oc nyaj'a'oyihuiwich jadüg naax cajp, jadu'n nej jay ytiyc cojy huinjemybi.

¹⁷ Jigix jacjadyii jay y'ojadadipy ajcxy yi Dios. Nañ jadu'n je' ajcxy huidi ca' yjudiojäyity, huidi iich njäy'adaanip.

¹⁸ Jadu'n je Huindzin Dios jécyp jada tiy'ajt jadu'n yejcy.

¹⁹ Chi Jacobo yjacminañ:

—Paady iich jadu'n nmina'ñich co ca' huaad n'amayiyim ajcxy huidi ca' yjudiojäyity huidi ajcxy ti mijpidägy Dios. ²⁰ Hue' janchtiy tzoc nijayiyim co ajcxy ca' tzüdzäpy huidi jay yajhuindzigüyb ídolos, etz ni ca' huaad migapxcixy huingbi töxyjäy, etz ni ca' huaad tzützcixy iyujc huidijaty jay yöc-huüidy, etz ni ca' huaad jüxcixy tijaty iyujc n'ipy. ²¹ Jecy'ajty ixti

chamni tũg tũg cajt, ji pĩn ñhua'cxp capxhua'cxp Moisés yley majaty nanyõymujctac naag naag pocxĩxi.

²² Chi je apóstoles ajcxy etz je huidi nigohuajc'ajt yi mibijcpidijc, mĩd tũg'ócĩy Jesús yjãy pidacy ajcxy yhuinma'ñ co huin'ixaangixy nijẽjity jãy ma je' ajcxy etz quexaangixy jim Antioquia quipxỹ mĩd Pablo etz Bernabé. Chi ajcxy yajniẽjity Judas, huidi nañ jadu'n yajtijy Barsabás, etz mĩd Silas, yẽydijctijc huidi ajcxy capxpaadip. ²³ E je' ajcxy yajmiguejy necy nej anajty ti jaay: "Ñich ajcxy apóstoldijc, etz huidi nigohuajc'ajt yi mibijcpidijc, etz nidũg'ócĩy mibijcpidijc, cham ñich ajcxy nguexy capxpcxin ma ajcxy mibijcpidijc huidi ca' yjudiojãyity huidi ajcxy tzinaayb jim Antioquia, etz huidi ajcxy tzinaayb Siria etz Cilicia ñaaxjot. ²⁴ Ti ñich ajcxy nejhuĩyich co nijẽjity jãy ti xyñicixcixy, choñ ma ñich ajcxy, ca' ñich ajcxy ngõtũjcin mooy, e xy'amayĩygixy jim mĩd y'ayuc, e xyajhuinma'ñytigoya'ñ ajcxy, co ajcxy xyñimaaygixy co copicy co myajtiy'ajttũhuip ajcxy m'ung, etz mbayõyipy ajcxy je Moisés ycotũjcin. ²⁵ Paady ñich ajcxy ti nnaygãpxigixy nidũg'ócĩy co nyajniẽbedipỹch nijẽjity jãy huidi yajpaatp ma ñich ajcxy co huen nicxy xy'ĩxcixy nigũipxỹ mĩd nmigũtĩjicich huidi ooy ndzocyich, je Bernabé etz je Pablo. ²⁶ Je huidi ajcxy yjũgy'ajt ti yoxy ti toogy mĩd ajt nHuindzin Jesucristo ycxĩpi. ²⁷ E jadu'n yam nguexyich ajcxy Judas etz Silas, e yi' ajcxy ci'm xyajmĩdmiydãgipy tũg'ócĩy ñich ajcxy n'ayuc. ²⁸ Ti je Espĩritu Santo huinma'ñ pidãgy ma ñich ajcxy nhuinma'ñ etz ñich ajcxy ti nhuinma'ñ nbidãgyich, co ca' nyajniẽbigipy ajcxy tijaty ayuc tzaachypĩ, jẽyĩ janchtiy je huidi copĩcip. ²⁹ Copicy co ca' ajcxy mdzũdĩzy huidi jãy yajhuindzĩgyĩb ídolos, ca' ajcxy ni'py mĩĩcxcixipy, ni ca' ajcxy mdzũdĩzy iyujc huidi yõchuiity ti y'õgy, e ca' ajcxy mmĩgapxtĩgooygixipy huingbi tũxyjãy. Pen mguỹdũdaayb ajcxy jada ané'mĩn, oy anajty mdungixy. E Dios ajcxy xypubedipy xypudĩgĩhuipy."

³⁰ Jadu'n je' ajcxy huidi ti yajquexy nicxy ajcxy jim Antioquia. Jim ajcxy huoomujcy je mibijcpidijc, e yajcĩdĩgyĩy ajcxy je necy. ³¹ Co je mibijcpidijc je necy capxy, chi ajcxy ooy yjotcũgyĩy mĩd je oybi ayuc tũbi anajty ajcxy yajnigũexyĩ. ³² Com Judas etz Silas hue' je' anajty Dios y'ayucnajtcapxĩybi, paady ajcxy yajjotcũgyĩy jot'amĩy moy je mibijcpidijc mĩd je ayuc. ³³ Jecy ajcxy jim yhuãcxipy, chi je mibijcpidijc mĩd ajcxy ycapxycĩxy, yajmĩhuaniy ajcxy Dios, chi ajcxy yhuĩmbijtni ma anajty ti choongixy. ³⁴ Chi Silas yhuinma'ñpidacy co anajty yhuĩ'ma'ñ. ³⁵ Nañ jadu'n Pablo etz Bernabé jĩt ajcxy jim Antioquia, etz mĩd jac nijẽjity ymĩgũtĩjic yaj'ixpij'c'idĩtzcixy etz capxhuãcx'idĩtzcixy je Huindzin Jesús y'ayuc yti'y'ajt.

Pablo mĩmetz viaje

³⁶ Ti xĩ tiẽpĩmo anajty ñajtzniĩcixyĩni co Pablo nimay Bernabé:

—Jam'ajt nmĩgũtĩjic co'ixĩyĩm cajt cajt majaty ti ngapxhuãcxĩm Huindzin Jesús y'ayuc. Ooy njanejhuĩhua'ñich nej ajcxy yajpaady. ³⁷ Bernabé ymĩd nicxaamy anajty je Juan huidi yajtijy Marcos. ³⁸ E je Pablo ca' a'ixĩy co mĩd nicxip Juan, com ti anajty y'ocpuỹyũdũtĩbi jim Panfilia, e ca' anajty ti yjacmĩdyajtũyõyĩ je tung. ³⁹ E ca' ajcxy ñay'ayuc-huinjihuĩyĩ mĩñ xyipy. Chi Bernabé mĩdnicxy Marcos e ybarcotĩgyĩy ajcxy, chi ajcxy ñicxy jim Chĩpre. ⁴⁰ E je Pablo abicy huin'ĩjxy Silas huidi anajty mĩd ñicxa'ñ. Chi je mibijcpidijc mĩd ycapxycĩxy, chi chooni ti anajty je mibijcpidijc yajmĩhuaniyĩy Dios, ⁴¹ chi ñajxy jim Siria ñaaxjot etz Cilicia ñaaxjot jot'amĩjmooy je mibijcpidijc.

16

Timoteo mĩjhuãcpejty je Pablo etz Silas

¹ Chi Pablo etz Silas yja'ty ajcxy jim Derbe etz Listra. Jim ajcxy paty tũg jãy huidi anajty yxi# Timoteo huidi anajty mĩjpidaacp Jesús. Judĩõjãy anajty ytaj'ajtpy, e griegojãy anajty yteedy'ajtpy. Je' ytaj nañ ymibijcipy anajty Jesús. ² Je jãy ajcxy huidi yajmĩ'ajtp Jesús jim Listra etz jim Iconio ooy anajty oy nimĩydaaccixy Timoteo. ³ Pablo ooy jatzojcy co Timoteo ycajãymiĩd'ajti. Chi Pablo yajtiy'ajttĩyĩ Timoteo, jĩgix ca' ymĩjotmãdĩyĩb je judĩõjãy huidi anajty ajcxy jim tzinaayb, com tũg'ócĩy ajcxy nejhuĩy co griegojãy teedy'adyĩ. ⁴ Cajt cajt ma anajty ajcxy ñaxy yajmĩdmiydaaccixy ajcxy je mibijcpidijc je cõtũjcin huidi je apóstoles ajcxy, etz huidi nigohuajc'ajt je mibijcpidijc jim Jerusalén. ⁵ Je' ajcxy huidi yajmĩ'ajtp Jesús cajt cajt nĩgi anajty yjotmĩcpĩjccixy, etz mĩjpidaaccixy Dios y'ayuc, etz ñĩmayĩ'idĩtzcixy jabom jabom.

Pablo yhuin'ĩjx tũg Macedonia jãy

⁶ Je Espĩritu Santo ca' a'ixiy nicx capxhuãcxixy Dios y'ayuc jim Asia ñaaxjot. Paady ajcxy huingduum ñicxy yajyõyñajxy ajcxy Frigia ñaaxjot etz Galacia ñaaxjot. ⁷ Chi ajcxy jim yja'ty ma Misia ñaaxtĩzĩba'n. Chi huinmay co ñicxa'ñ ajcxy Bitinia ñaaxjot. E je Espĩritu yajnejhuĩy ajcxy co ca' yi' tzooy co jim nĩcxcixipy. ⁸ Chi ajcxy jũyõyñajxy Misia ñaaxjot, chi ajcxy y'idacy jim Troas. ⁹ Chi Pablo cumãyjoty huin'ĩjxy tũg yẽydijc, huidĩbi yconaaxity anajty Macedonia, ytinay'ahuĩy ma Pablo yhuĩnduũ, e ycohuanĩyĩ, ñĩmãyĩ: "Tun may'ajt nicx jim Macedonia,

e jim xypubedipy ñich ajcxy.” ¹⁰ Co Pablo jadu'n huin'ijxy cumäyjoy, chi ñich ajcxy n'ixtay barco huidi nicxamb jim Macedonia. Nhuinjihuüy ñich ajcxy co jim Dios xyquéjxcixich jigix jim ngapxhuäcibich Jesucristo ytiy'ajt je oybi nej jëbi ajcxy alma nüdzoocin paadipy.

Pablo etz Silas jim Filipos

¹¹ Chi ñich ajcxy nbarcotigüy jim Troas nicxy ñich ajcxy tüiyi ma naax mejy'agujcpi huidibi anajty yxi Samotracia. Chi com jabom ajcxy nja'tyich jim Neápolis. ¹² Co ñich ajcxy jim ndzooñ, chi ñich ajcxy nicxy jim Filipos. Filipos hue' je' romanojäy ycajp. Je' je cajn jac mijpi ma je Macedonia ñaaxpa'. Jim ñich ajcxy nhuäcxijpy jecy. ¹³ Tüg sábadó nicxy ñich ajcxy cajppa', mihuingon tüg mijni, ma anajty judiojäy ajcxy müdity Dios ojadajtac. Chi ñich ajcxy n'ixtacy jim, e ngapxhuäcibich ajcxy Jesús y'ayuc ma je töxyjäydijc ajcxy huidi jim anajty ajcxy ti yömjucixy. ¹⁴ Je Lidia anajty y'amido'ijtp. Hue' je' anajty Lidia ycgajpity jim Tiatura, e ytocpy anajty ucy huit oy jatypi. Lidia yajmij'ajtpy anajty Dios, e je Huindzin Dios yajyungüiy yjot yhuinma'ñ, jigix amido'idipy nej Pablo Dios y'ayuc capxhuäcxi. ¹⁵ Je Lidia ñibejt müd tüg'óciy yjuugy ymigüg, chi ñich ajcxy xycohuanüy, e xyñimáaygixich:

—Pen minamb ajcxy co nmibicich je Huindzin Jesús, miin jättaaccix ma ñich ndijc.

Chi ooy xycohuanüy ñich ajcxy, ixti cooni jim xyajhui'myich ajcxy.

¹⁶ Jadu'n yjajti tüg tecy co ñich ajcxy anajty ñicxy ma Dios ojadajtac, chi ñich ajcxy nbaty tüg tumbi töxy'anäg mañ'ajt müdpi huidi ooy ytiygapxy. Ymüid anajty yhuindzin ma ytuñ, e je' yhuindzin ooy anajty ymeeñybaaty co je töxy'anäg ytiygapxy. ¹⁷ Je töxy'anäg ypanicxy chach yam Pablo etz ñich ajcxy yminañ:

—Jada yëydijc Dios tzajpjotjpi ajcxy ymidumyb. Capxhuäcxi ajcxy Dios y'ayuc jadu'n nej jëbi ñich ajt n'alma nüdzoocin paady.

¹⁸ Canaag xii jadu'n ñich ajcxy xychach'amayüy. Co Pablo chijpin, chi yhuäc-huimbijty nimay je mañ'ajtmüdp:

—Müid Jesucristo yxi n'ane'myich, pidzim ma jada töxy'anäg.

Tim huin'itij je ca'oybi yajyöyduuty je töxy'anäg.

¹⁹ Co je töxy'anäg yhuindzin jadu'n ijxy co ca' y'ocmeeñybadaani, chi müd je' ycixpi ajcxy majch Pablo etz Silas, e yajnicxy ajcxy ma je tungmüdp ma je' ajcxy y'agujtjic. ²⁰ Co ajcxy jiiby müdja'ty ma je tungmüdp, chi yminañ:

—Jada yëydijc ajcxy judiojäy jada, nigoo ajcxy ñaax yajmätü ycajp yajmätü, ²¹ etz yaj'ixpicxy ajcxy costumbre huidi ca' huaad ñich ajt ngöbajcim, e ñihuaad ngatuunim, com hue' ñich ajt romanojäy.

²² Chi je mayjäy ajcxy müddziptzoon Pablo etz Silas, e je tungmüdp ni'ane'mdiy co huen ajcxy yajniñeñ yaj'ixjeñ huen yajhuojpcixy müd matz. ²³ Co ajcxy huojptay, chi pidacy ajcxy pujxtigoty, e ane'my ajcxy pujxtijc huindzin co huen cuend'ajtcixy yajxon. ²⁴ Co je pujxtijc huindzin ypaati je cötujcin, chi pidacy Pablo etz Silas jac jiiby öc'am, e chi ajcxy ixmajch co'adzity ytecy ma je quipy huidi yxi cepo.

²⁵ Chi jadu'n yjajty mijcuctz anajty, co Pablo etz Silas chach Dios ojadajtacixy chach huin'igixy yi Dios, e jacjadyi machyjäy chach amidoo'ijtcixy. ²⁶ Chi timitiini uyx huinxijty pujxtijc poch. Chi y'ahuatztay je pujxtijc agi', e y'adzittutay je cadena ma tüg'óciy machyjäy. ²⁷ Chi oy ymähuiy je pujxtijc huindzin. Co jadu'n ijxy ac'ahuädz pujxtijc aguü, chi yajpidzimy y'espada ñayyaj'öga'ñiy anajty. Com hue' anajty tijy ti je machyjäy yqueectäy. ²⁸ Huin'it Pablo mic'amy migapxy je pujxtijc huindzin nimay:

—Ix nej mnayduuni, cheeby ajcxy nidüg'óciy.

²⁹ Chi je pujxtijc huindzin pijctzoy jin, e ytiygy poygy pujxtigoty, janch tziyuuy müd tzig'iñ. Chi ycoxtinay'ahuüy ma Pablo etz Silas ajcxy yhuinduu. ³⁰ Chi yajpidzimy Pablo etz Silas, e yaj'amidooy:

—Huindzin, çti ñich jëbi nduñ jigix nüdzoocin nbáadibich?

³¹ Chi je' ajcxy minañ:

—Mibic Huindzin Jesús etz mbaadipy nüdzoocin, müich etz m'ungdöxyjic.

³² Chi ajcxy yajnimay je Huindzin Jesús y'ayuc tüg'óciy pinjaty anajty jim ma je pujxtijc huindzin ytiy. ³³ Mijcuctz je pujxtijc huindzin puji je Pablo ajcxy chaach'au, e chi je pujxtijc huindzin ñibejtay ajcxy müd y'ung ytöxyjic. ³⁴ Chi je pujxtijc huindzin yajnicxy Pablo etz Silas ma ytiy, yajcaay yaj'uucy ajcxy. Ooy anajty ajcxy yjotcujcity nidüg'óciy, com ti anajty mibijccixy Dios.

³⁵ Com jabom je mijtungmüdp quejxy mutztungmüdp jim ma pujxtijc huindzin müd cötujcin huen najtzmazdizigixy Pablo etz Silas. ³⁶ Chi je pujxtijc huindzin nimay Pablo:

—Ti je tungmüdp quexy cötujcin co jëbi nnajtzmazdizich müich ajcxy. Nicxcix jotcujc.

³⁷ Chi Pablo migapxy je mutztungmüdp, e chi nimay:

—Romanojäy ñich ajcxy. Yi cajptungmüdpí ti xyhuopyich müd matz mayjäy agujc, ni ca' jayijp ti xytyiduñich, e ti xypidägyich pujxtigoty. ¿Nej co jadachambi xyñajtmadzihuañich ameechi? Ca' jadu'n y'óyity. Huen mijtungmüdpí ci'm müñ xyajpidzimigixich ñich ajcxy.

³⁸ Chi je mutztungmüdpí cijx nimiydactäy ma mijtungmüdpí tüg'óciy Pablo y'ayuc. Chi ajcxy ñay'adzigiñi co nejhuiy co Pablo etz Silas hue' je' anajty ajcxy romanojyä. ³⁹ Chi je mijtungmüdpí ñicxy ci'm oy capxjotcidägy je Pablo etz Silas. Chi yajpidzimy pujxtigoty, e pijctzoy may'ajt huen huingduum ñicxcixni. ⁴⁰ Co Pablo etz Silas ypujxtijcpidzimy, chi ajcxy ñicxy ma Lidia ytijc. Jim ajcxy jadu'n ijxy mibijcpidijc, e jot'amijmoy ajcxy. Chi ñicxcixni.

17

Jim Tesalónica yjajti ooy capxy ayuc, ca' nay'ayuc-huinihiuñi

¹ Pablo etz Silas ajcxy ñajxy Anfípolis, etz Apolonia, chi ajcxy yja'ty Tesalónica. Jim anajty judiojyä ajcxy tüg ñaymujctac. ² Com jadu'n anajty costumbre müdity, Pablo nicxp anajty ma judiojyä ajcxy ñaymujctac sábado xii. E tugüig sábado xii jim capxy miydacy müd je' jim Tesalónica. ³ Hue' anajty müd miydaaccixy jadu'n nej jaybecyity ma Dios ñecy co Cristo copicy ayo'n yajnaxtähuiy, e chi y'ógipy, huin'it yjugypigipy. Chi Pablo yminañ:

—Je Jesús huidibi y'ayuc ngapxhuäcxibich, je' je' je Cristo.

⁴ Nijëjity judiojyä ymibijc ajcxy e mijyöybejty ajcxy Pablo etz Silas. Nañ jadu'n may griegojyä huidi anajty Dios yajmij'ajtp, etz maytöxyjäydijc huidijaty oy ymijpidacni ymijñicxpejt etz mibijc ajcxy Pablo etz Silas y'ayuc. ⁵ Je judiojyä huidi anajty ca' ymibicy, yjotmätcoty ajcxy. Huomujcy ajcxy amügy jäydijc etz jibic jäydijc, etz naax cajp yajmättay, anejptuuti agojxtuuti ajcxy Jasón ytijc'aguu tzach'ixtaaygixy Pablo etz Silas. ⁶ E co ca' ajcxy paty Pablo etz Silas, chi ajcxy majch Jasón etz jacjadyii mibijcpidijc. Adzip ajcxy yajnicxy pahuijch pajugujcy ajcxy jim ma cajp tungmüdpí. Yam chachminaangixy mic:

—Jada jäy ajcxy je' huidi tzachyahuinmañyidigooyb tüg'óciy naax cajp, nañ iyabaad ajcxy ti ymiingixy. ⁷ Jada Jasón ti Pablo etz Silas jim yajjättägy ma ytijc, tüg'óciy ajcxy müddzip'adyii je César huidi ane'mb, yminaangixy co ji jadüj rey, je' je' je Jesús.

⁸ Co jadu'n midoy, chi ajcxy ooy yajyumigy yaj'oxigy cajpjäy etz je tungmüdpí ajcxy. ⁹ Chi Jasón etz ymigütijc yajmeñyejcy, chi najtmadzüy ajcxy.

Pablo etz Silas jim Berea

¹⁰ Co oy ycodziy mic'amy yi mibijcpidijc yajpidzimy ajcxy cajpjoty Pablo etz Silas, e quejxy ajcxy jim Berea. Co ajcxy jim yja'ty, chi ajcxy ñicxy ma judiojyä ñaymujctac. ¹¹ Jim Berea judiojyä ajcxy yjacmüid oyot oyhuinmañ, ca'ydí judiojyä ajcxy jim Tesalónica. Je Berea jäy ajcxy ycöbije ajcxy Jesús y'ayuc ymüid oyot oyhuinmañ. Jabom jabom ixtaaygixy ma yjaybetyity ma Dios y'ayuc pen janch jadu'n yminañ nej Pablo yaj'ixpicy. ¹² May judiojyä ymibijcy etz may griegojyä huidibi ooy ymijpidaacni nañ jadu'n ymibijcy, töxyjäydijc etz yëydijctijc. ¹³ Co yi judiojyä jim Tesalónica nejhuiy co Pablo nañ jadu'n Dios y'ayuc capxhuäcxí jim Berea, chi ajcxy jim ñicxy, etz yajyumigy yaj'oxigy je cajp jäy ajcxy. ¹⁴ Mic'amy ajcxy, je mijpidaacpi Jesús, yquejx Pablo mic'amy, huen nicxy jim ma mejypa'. Chi Timoteo etz Silas yjac-hui'my ajcxy jim Berea. ¹⁵ Je huidibi ajcxy Pablo jaymüid'ajt ymüidnicxy, müd ñicxy ajcxy ixti cooni yja'ty jim Atenas. Huin'it ajcxy yhuimbijty müd tüg ayuc co huen Timoteo etz Silas nicxy minaybadyii Pablo jim Atenas janch mic'amy.

Pablo jim Atenas ahuijxy Silas etz Timoteo

¹⁶ Co anajty Pablo ahuixy je Silas etz Timoteo jim Atenas, ooy anajty ytajy ymay co ijxy nejhuiy co je cajp müd ooy may quipychech, tzaadzech, etz oori oyduñ huidi ajcxy dios'ajtpy. ¹⁷ Paady Pablo nimiydacy Jesús ma yi judiojyä ñaymujctac müd je judiojyä etz jacjadyii jäy huidi Dios miyaaxp ojadaajtp. E jabom jabom müd miydaaccixy pinjaty y'oymujcp cajp cujc. ¹⁸ Nijëjity ixpicytijc ñay'ixquixigixy y'ixpijcin müd Pablo. Jim huidibi ni'ixpiñiyb epicüreo ixpijcin, etz cham huidi ni'ixpiñiyb estoico ixpijcin. Chi ajcxy nijëjity yminaangixy:

—¿Ti jada jada' ajt xyajnimaaayim jada yëydijc capxymaaybi?

Chi jadyii yminaangixy:

—Hue' jada ycapxhuäcxyp huingbi dios y'ayuc.

Jadu'n ajcxy yminañ co Pablo nimiydacy Jesús etz jadu'n nej jäy yjugypicy huidijaty ti y'öccixyp. ¹⁹ Chi ajcxy müdnicxy Pablo ma je it ma je ixpicytijc ñaymugyii huidi anajty yxii Areópago, chi ajcxy Pablo nimay:

—¿Nej jëbi njäitcixich jada jembyi ixpijcin huidi müich mmimimb? ²⁰ Com ti ñich müich xyajnimaaaygich ayuc ca'pi yhuinihiuñity, e nejhuihuaamyich ajcxy nej yhuimbizimy tüg'óciy jada ayuc.

²¹ Tüg'óciy Atenas jáy etz nañ jadu'n huidi ajcxy jim adzinaayb, ca' anajty ni ti tungixy, jëyi nigoobi amido'ijtcixy etz miydaaccixy jemybi ayuc tiy'ajt.

²² Huin'it Pablo ytinayigiy mayjây agujc jim Areópago, e yminañ:

—Atenas jáy, n'ijxypich co miich ajcxy ooy myajmij'ajtcixy canaagnax huidibi miich ajcxy mdios'ajtpy. ²³ Com ti xii ya n'ixyich canaagnax huidi ajcxy m'ojadajtpy, chi ti nbaatyich tüg altar ma jadu'n yjaayity: “Je Dios huidi ca' pin ix'y'adyii.” Je Dios huidi miich ajcxy m'ojadajtpy, e ca' ajcxy m'ixy'adyii, jada je' huidi nyajnimaaayb ajcxy.

²⁴ Je Dios huidi oyduñ naaxhuiniybi etz tzajp etz jac tijaty, yi' je' ni huindzin'ajttayb tüg'óciy. Je Dios ca' chinây ma tzajptijc huidi jáy ajcxy cojpy. ²⁵ Dios ca' ni ti yajtigoy'ity huidi naaxhuiniyây jamöhuaniip. Dios yi' jejcp jugy'ajtin etz huidibi nxejim, etz tüg'óciy tijaty.

²⁶ E tügpi n'ipy tügpi jot ti yaj'oyi'y tüg'óciy yi jáy, jigix huen tzinaaygixy huindu'my naaxhuin. Dios tiy'ajt jejcp nej xii tiempo yöyipy, e ma jáy jëbi huaad chinaaygixy, ²⁷ jigix ixtaaygixipy Dios, jadu'n nej jihuüy ixtaaygixy tondây xajtây, com ca' je' jiguemity ma ich ajt nidüg nidüg. ²⁸ Dios yciixpi ich ajt ndzinaayim nyücxim etz nji'ajtim, com jadu'n minañ miich ajcxy mboeta, huidibi i'y yajcojp: “Dios ich ajt xy'ung'ajtim xy'anäg'ajtim.” ²⁹ Pen Dios ich ajt xy'ap'ajt xy'oc'ajtim ca' huaad nhuinma'n nbidaacim co Dios yjadu'ñity nej oori oyduñ, plata oyduñ, etz tzaadzech quipychech huidi jáy ti yaj'oyi'y müd yci'nhuinma'n. ³⁰ Dios ca' müdity jotcöduuyb je jáy chuuhuinma'n tiibi ñajxni. Jadachambi ane'mb Dios hueñytimma'amity huen jáy ajcxy jothuimbijtcixy. ³¹ Com ti Dios yajnihuinmayiy tüg xii mina tiyduna'n yi naaxhuiniybi jáy müd je yëydijc huidibi ti huin'ixy, jada tiy'ajt Dios ti yaj'ixy yajnejhuüy tüg'óciy jáy co ti yajjugypicy Jesús co y'o'cy.

³² Co ajcxy jadu'n midoy co yi öcpi yjugypigipy, chi nijëjity ytiyiy nixiicpi yajxiicpi. Chi jacjadyii yminaangixy:

—Huaad ich ajcxy n'amido'idipyich miich m'ayuc mina anajty jadüg'oc.

³³ Chi Pablo jim chooni ma je' anajty ajcxy. ³⁴ Chi nijëjity jáy ypadzooni huidi anajty ti mibicy Pablo y'ayuc. Ma je' ajcxy jim anajty tüg jáy huidibi anajty yxii Dionisio, yi' je' anajty tungmüd jim Areópago. Nañ jadu'n tüg töxyjây huidi anajty yxii Dámaris ypadzooni, etz jacjadyii jáy.

18

Chi Pablo ñicxy jim Corinto

¹ Co jada jadu'n ytuni yjaty, chi Pablo chooni jim Atenas, ñicxi jim Corinto. ² Jim minaybaati tüg judíoây huidi anajty yxii Aquila, Ponto anajty ycocajpity, namja'tni anajty müd ytöxyijc Priscila. Jim anajty ti chongixy Italia ñaaxjot, jëgixpi co je mij'ane'mbi, Claudio, pidacy cötujcin co huen tüg'óciy judíoây pidzimdaaygixy jim Roma. Chi Pablo oy cocapxiy Aquila. ³ Aquila etz Priscila ytung'ajtpy anajty cochactijcxuuyi, com nañ cochactijcxuuyb anajty Pablo, paady Pablo jim yhui'my müd je' ajcxy. Chi ajcxy tú'ciy ytuuñ. ⁴ Tüg tüg sábado xii Pablo ñicxy ma je judíoây ajcxy ñaymujctac yajmüdmidydaaccixy Jesús y'ayuc ytiy'ajt etz capxjotcdaaccixy judíoây etz nañ huidi ca' yjudíoâyity.

⁵ Co ajcxy Silas etz Timoteo yja'ty jim Corinto, choon ajcxy Macedonia, chi Pablo adügijp ytiyiy ayuccapxhuäcxpi ma judíoây ajcxy co Jesús je' je' je Cristo huidi je' ajcxy chach'ahuixyp. ⁶ E je judíoây ajcxy ytiyiy jotma'tpi, tzicapxpi ahua'ngapxpi. Chi Pablo yhuut huinxiy, je' je' je tiy'ajt co puyöydüdaani ajcxy, e chi Pablo yminañ:

—Miich ajcxy müd mgi'mbocy ajcxy myajtigoya'n yi m'alma. Ich ca' ti pocy nmüdidyich ma miich ajcxy. Cham nicxy Dios y'ayuc ngapxhuäcxich ma huidi ca' yjudíoâyity ajcxy.

⁷ Chi Pablo yöybojtni ma judíoây naymujctac, chi ñicxy ma Justo ytiyc. Justo ooy anajty Dios miyáxy ojadaty, e ymüid anajty ytiyc mihuingon je judíoây ñaymujctac. ⁸ E Crispo, je judíoây ñaymujctac huindzin, ymibijc je' je Huindzin Jesús y'ayuc ytiy'ajt, müd tüg'óciy y'ung y'anäg, yjuugy ymigüg. Nañ jadu'n nijëjity Corinto jáy co midoy Jesús y'ayuc, chi mibijcy e ñiibejty ajcxy. ⁹ Chi je Huindzin Dios nimay Pablo cumäyoty:

—Ca' mdzigí, capxhuäcx'aditz n'ayucich, e ca' mni'amoñ. ¹⁰ Com ich miich nbubedipy, ca' pin jot müd'adipy nicxy nejaty xytuñ. Ich may ich ya nmüdity jáy ma jada cajp.

¹¹ Chi Pablo yhui'my jim Corinto tüg jimijt jacup, yaj'ixpiy jáy je Huindzin Dios y'ayuc ytiy'ajt.

¹² Huin'it tiempo co Galión ygobernador'ajty jim Acaya ñaaxjot, chi judíoây ajcxy midziptzoñ je Pablo, yajnicxy ajcxy ma cötujctac. ¹³ Chi ajcxy nimay je gobernador:

—Jada yëydijc tzach jáy yaj'ixpijcp co ca' ycopicity yajcuydunipy Moisés ycötujcin huidi jaybety iijp.

¹⁴ Pablo capxamb anajty co oy yi Galión nimây ajcxy je judíoây:

—Pen yi Pablo ti ytundigooy o mijpocy ti tuñ, huin'it nmijpidägiwich miich ajcxy m'ayuc, miich ajcxy judiojāy. ¹⁵ Pen je Cristo y'ayuc etz miich ajcxy mgötujcin myajtzibihyby myajcapxyhyb, ca' ñich huaad nyajtigiyihyby yijibi huinmañ.

¹⁶ Chi je gobernador y'ané'min pidacy co huen judiojāy ajcxy yajpidzimdāyii ma je cötujctac. ¹⁷ Huin'it tūg'öciy griegojāy ma je cötujctac huijtzpidzimhyb je Sóstenes, yi judiojāy naymujctac huindzin, e chi ajcxy cujy jibijpy hüingojxy jipcojxy ma gobernador yhuinduu, e Galión ca' tuñyuenti.

Pablo yhuimbijtni Antioquia, e yajtzondacy midugügpi viaje

¹⁸ Jac-huäcxijp Pablo jecy jim Corinto. Chi yhuinmañypidacy co chonaani. Chi ycapxycijxni müd je mibijcpidijc, e chi ybarcotigiiyñi ñicxni jim Siria ñaaxjot. Ñicxni quipxyi müd Priscila etz Aquila. Jim Cencrea, ca'ni anajty ybarcotigiiyi, Pablo yajcöme'px cödzam co anajty cuyduñ yhuandaacni. ¹⁹ Co ajcxy yja'ty jim Efeso, chi Pablo ñay'ixmajtz ajcxy müd Priscila etz Aquila, e ñicxy ma je judiojāy ajcxy ñaymujctac. Chi müdmidyacy je judiojāy ajcxy huidi jim anajty ti ñayöymüjigixy. ²⁰ Chi je judiojāy ajcxy jim Efeso cohuaniiy co huen jac-hui'my, e Pablo ca' a'ixiiy co yhui'mipy. ²¹ Chi Pablo ycapxycijxni müd je Efeso jāy, chi yminañ:

—Copicy co jim xii nyajnaxa'ñyich Jerusalén, e nhuimbidityich jadüg'oc ma miich ajcxy, pen Dios jadu'n tzojcp.

Chi Pablo ybarcotigiiy chooni jim Efeso. ²² Co anajty ti ypättigiy jim Cesarea, Pablo ñicxy Jerusalén co anajty capxpcxaangixy je mibijcpidijc, chi mic'amy idaacni jim Antioquia. ²³ Jim hueeni yhuäcxijpy, chi choñ jadüg'oc ñicxy cajp cajp ma Galacia ñaaxjot etz Frigia ñaaxjot jotmicmigapxcixy tūg'öciy yi mibijcpidijc.

Apolos Dios y'ayuc capxhuäcxii jim Efeso

²⁴ Huin'it tiempo yja'ty jim Efeso tūg jāy huidi anajty yxii Apolos, hue' anajty ycojápiity Alejandria. Ooy anajty oy ayuc capxhuäcxxy. E yajxon nejhuuidāy Dios y'ayuc huidi jaybety ijt. ²⁵ Apolos ooy anajty ixpiyity ma Huindzin Jesús y'ayuc e ooy yjotmiccapxy, oy anajty yaj'ixpiy nej je Huindzin Jesús yja'ty y'ayoy. Oy jēda'ajty anajty janehuñy nej Juan, je Bautista, jāy ajcxy yajniibejty. ²⁶ Chi Apolos ytigiiy capxpi miydaacpi ma je judiojāy ajcxy ñaymujctac janch ni ca' chigiiy chöyduñ. Chi co Priscila etz Aquila ajcxy midooy Apolos y'ayuc, chi ajcxy yajnicxy ahuingujc, chi ajcxy oy yajmüdmidyägy jac-huädz Dios y'ayuc ytiy'ajt. ²⁷ Chi co Apolos anajty ñicxa'ñ jim Acaya ñaaxjot, chi je mibijcpidijc jotmicmigapxy, e pubejty ajcxy. Chi ajcxy nijayiiy je mibijcpidijc huidi ajcxy jim Acaya, huen ajcxy cöbigipy yajxon je Apolos. Co Apolos yja'ty jim Acaya ñaaxjot, chi ypubejti ooy pin anajty mibijcp Jesús y'ayuc, com Dios anajty may'ajt ti tuñ ma je' ajcxy. ²⁸ Chi je Apolos oy capxpizimay mayjāy agujc co ca' yjanchity nej anajty ajcxy judiojāy yhuinmañ müdity, co Jesús ca' je' yjējity je Cristo. Je Apolos jim je' mic'ajt tzachpaady ma Dios y'ayuc ycojaayity co Jesús je' je' anajty je Cristo huidi anajty ajcxy y'ahuixyp.

19

Pablo may mibijcpidijc minaybaati jim Efeso

¹ Jim Corinto anajty Apolos, co Pablo tegyi'm yajyöyñajxy mijyuugjot, chi oy yja'ty jim Efeso. Chi jim paty may mibijcpidijc. ² Chi Pablo y'amidooy je mibijcpidijc:

—¿Nej ti xy'adigiiy xyjottigiiy je Espíritu Santo taab ajcxy mmibijcy Jesús?

Chi ajcxy y'adzohuimbijty:

—Ni ngamidooyñi ñich ajcxy pen ji Espíritu Santo.

³ Chi Pablo y'amidooy ajcxy:

—¿Ti ñibejtin miich ajcxy mbaad?

Chi je' ajcxy y'adzooy:

—Je Juan, je Bautista, ñibejtin.

⁴ Chi Pablo yminañ:

—Juan jāy yajniibejt je', je' je' je' tiy'ajt co huen jothuimbijtcixy. E nimaaygixy anajty co huen ajcxy mibigipy je Cristo huidi jacmiinamni. Je' je' je' Jesús, je Cristo.

⁵ Co jada ajcxy jadu'n midoy, chi ajcxy oy ñibety müd je Huindzin Jesús yxii. ⁶ E co Pablo cinixajy ajcxy, huin'it je Espíritu Santo y'adigiy yjottigiy ajcxy. Chi ajcxy ytigiiy capxpi miydaacpi tigachyaty ayuc, e capxhuäcxxy anajty ajcxy Dios y'ayuc. ⁷ Jēyi anajty nimajmetz yēydijctjic huidibi ajcxy ñibejt.

⁸ Tugüg po' Pablo jim yhuäcxijpy, e yöydiib anajty ma judiojāy ajcxy ñaymujctac capxhuäcxxy Dios ytiy'ajt janch huinmic jotmic. Chi capxjotcidāgy mayjāy müd Dios ytiy'ajt. ⁹ Nijējity jotjuuñdijc ca' ajcxy ymibijcy, jēyi ajcxy jibic tzachnigapxy Jesús ytiy'ajt ma jāy ajcxy yhuinduu. Chi Pablo puyöyduíteixni. Chi abicy yajnicxy je mibijcpidijc ma tūg escueltijc.

Hue' je' je escuela huindzin anajty yxii Tirano, e jim Pablo Dios y'ayuc anajty capxhuäcxi jabom jabom. ¹⁰ Mejtz jimajt jadu'n jim chachyay'ixpijcy, e tüg'óciy jäy ma je Asia ñaaxjot ymidoday ajcxy je Huindzin Jesús y'ayuc, je judíojäy etz huidi ca' yjudíojäyity. ¹¹ E Pablo mayba'mjäy yajtzoocy müd Dios ymic'ajt etz ooy mihuinma'n ytuñ. ¹² Ixti yajnicxy anajty ajcxy yhuitt etz ypaay'i huidi Pablo finicx anajty ti ypanyii, e yajpaatcixy anajty pa'mjäy, e je' anajty müd chooccixy, e nañ je' anajty müd ca'oybi ypidzimy ma jäy ajcxy y'ay yjot.

¹³ Chi nijëjity judíojäy huidi anajty huidijtp tzoymdumbi, huidibi anajty yajpidzimigixyp ajcxy ca'oybi, jayajtzögaañ tüg pa'mjäy müd je Huindzin Jesús yxii co huen yajyödydüyii je ca'oybi. Chi ajcxy nimaygixy je ca'oybi:

—Hich miich yam nimaayb müd Jesús yxii, je huidi Pablo ycapxhuäcxp, yajyödyüt jada jäy.

¹⁴ Jadu'n anajty y'idüztcixy je Esceva ymang ajcxy, je nihiuxtujcpi ajcxy. Je Esceva hue' je' anajty judíojäy etz nihiuindzin'aty teedy'adii. ¹⁵ Co je Esceva ymang ajcxy migapx je ca'oybi, chi je ca'oybi y'adzooy:

—N'ix'atypich je Jesús, e nnejhuiybich pin je' Pablo, e miich ajcxy, ¿mbin miich ajcxy?

¹⁶ Chi je yëydijc huidi ca'oybi anajty müd, ytiçpügy tüg ma je' ajcxy, ymimadactay je nihiuxtujcpi, e yqueectay ajcxy ma je tiçc nihiuädz ixhuädz etz tzaachi. ¹⁷ Tüg'óciy jäy ajcxy huidi anajty tzinaayb jim Efeso, judíojäy etz huidi ca' yjudíojäyity nejhuiyday ajcxy, chi ooy ajcxy chigiy e nimiydaaccixy e cómaaygixy je Huindzin Jesús yxii.

¹⁸ E mayjäy huidi mibijc Jesús y'ayuc ooy ajcxy ypocy nigapxtay, jadu'n nej anajty yi jibic mañ'ajt ajcxy ti mi'ijtcixy. ¹⁹ E mayjäy tiibi anajty capxy je mañ'ajt necy yajminday tüg'óciy e no'tay je necy ma jäy ajcxy yhuinduu. E co ajcxy maymujcy je libro tzou, chi naybaati jada' huixchiguijpx majc mil plata meñi (moneda mexicana naybaati jacnaxy jahueenjaty ycatüg migo'px jamajcmocx tüg mil). ²⁰ E je Huindzin Jesús y'ayuc nigi anajty yhuäcx'idich, nigi ymijtiçiy'idich.

²¹ Co anajty jadu'n ti ytuñyii ti yjadyii, chi Pablo yhuinma'ñipidacy co nicxy cogapxihua'ñ je mibijcpidijc jim Macedonia etz Acaya. Chi anajty yjacnicxa'ñ Jerusalén e jadu'n yminañ co jim chondäga'ñ jadügetcy e ñicxa'ñ jim Roma. ²² Chi quejxy jim Macedonia mejtz je ypubejtpi, Timoteo etz Erasto. Chi Pablo je' yjac-hui'my jecy jim Asia.

Canay'ayuc-huinihuinihiuini jim Efeso müd Dios y'ayuc yciçpi

²³ Huin'it tiempo tzip oy pidicni jäy y'ocyumigni y'oc'oxigni müd Huindzin Jesús y'ayuc yciçpi. ²⁴ Co je', je plateri huidi anajty yxii Demetrio, yaj'oyi anajty ac plata Diana chajptijc'ung, e jadu'n anajty Demetrio etz jacjadyii jäy oy ymeñybaatcixy müd je ytung. ²⁵ Chi Demetrio huomujcy ymigügtijc je huidi jadu'mbi tung tumb, nimay ajcxy:

—Migügtijc, mnejhuiyb ajcxy co müd jadayaabi tung huidi iich ajt nduunim, jada müd jotcujc ndzinaayim njugy'ajtim. ²⁶ E miich ajcxy m'ijxpy mnejhuiyb co je Pablo chach yaj'ixpijcy co ca' yi' diosity huidi jäy ajcxy yajcojpy. E Pablo ti ooy mayjäy capxjotcidägy, canan yaay'i Efeso, nañ jadu'n ma tüg'óciy Asia naaxjot. ²⁷ Mij jada xyajtigoyaanim ma iich ajt n'adogii e nañ jadu'n je miji dios, je Diana, ytigoyipy, ca' ni pin occapxpaatnipy, je huidi cham mayjäy y'ojadajtpy tüg'óciy ya Asia ñaaxjot etz huindu'my naaxhuiñybi.

²⁸ Co jadu'n ajcxy midoy, chi ajcxy ooy yjotmätcooty, chi ytiçiy ajcxy huambi jihuiyb, chachminaangixy:

—¿Cömay jada Diana, yi efesiojäy ydiosa!

²⁹ Chi ajcxy yajhuinmañydgoyday je cajp jäy e majch ajcxy je Gayo etz Aristarco, huidi tzoon Macedonia, metz yëydijc, huidi Pablo anajty ajcxy ymüd huidijtpy. Chi je cajpjäy ooy pahuijch pajugujcy ajcxy je Gayo etz Aristarco, yajnicxy ajcxy ma agujtjic huinduu ma jäy ñaymugyii. ³⁰ Chi Pablo yjatigihuaa'ñ jäy agujc, müdcapxa'ñ müdmidyäga'ñ anajty je mayjäy. E je mibijcpidijc ca' ajcxy a'ixiy nicxy jibiy ytiçiy. ³¹ Nañ jadu'n nijëjity Asia mijtungmüdpdi huidi anajty Pablo müd ñaymigüg'adyii, yajnigüejxy ayuc, co ca' huaad ñicxy ma jäy ñaymüçigixy. ³² Je mayjäy tügmucy anajty ijtciçy, ooy anajty yhuaangixy yjihuiygixy, ca' anajty ajcxy ñay'ayuc-huinihuinihiuiniygixy. E je jacmaaybi ni ca' anajty nejhuiygixy ti co chachnaymüçigixy. ³³ Nijëjity jäy huidibi anajty ajcxy mayjäy agujc, je ajcxy yajmüdmidyactay je Alejandro ti anajty tuunip jajtpt. Chi je judío jäy ajcxy tijpidzimy je Alejandro ma mayjäy agujc. Chi Alejandro cimiid tiy'ajt yejcy co huen amongixy. Je' anajty ñigapxtüdamy judíojäy ajcxy. ³⁴ Co je mayjäy nejhuiy co je' je' yjudíojäyity, chi ajcxy ytiçiy huaambi jihuiyb jahuenjaty ycamejtzhority, yminaangixy:

—¿Cömay ooy yi Diana, yi Efeso jäy ydiosa!

³⁵ Chi je cajp jaaybi co anajty je jäy ti yaj'amoongixy hueeni, chi ajcxy nimay:

—Efeso jäy, tüg'óciy yi naaxhuiñyjäy nejhuiy co jada Efeso cajp yi' cuend'ajtp yi Diana chajptijc, je' Diana huidi ooy ti yajcömay, etz yi Diana finicx huidi cä'u tzaçpçixy. ³⁶ Ca' huaad ni pin ymina'ñ co ca' yjanchity. Amongix, ca' ti mdüngixipy pen ca' jayijp yajxon mhuinmaaygixy. ³⁷ Com jada yëydijc ajcxy tiibi myajmiingixy, ca' ma ytundigooygixy, ca'

yi' ma ajcxy jibic capxcixy ma miich ajcxy mdiosa Diana. ³⁸ Pen Demetrio etz huidijaty miid ytuñ pen ymiid xihuñ miid pinjaty, paady tungmiidpi etz tiydundac jiiijity. Jëbi nigapxy ma tungmiidpi, jëbi miñ xyipy ñayñgapxtúutigixy. ³⁹ E pen huingbi ayuc huidi miich ajcxy mbijctzooyb, copity jada y'oyihuipy ma jây naymugy. ⁴⁰ Ymiid jada ayo'n co nicxy nayyaxihuñ co jây cham ñaymihuididyii miid jada ycixpi nej yam ytunyii yjadyii e ni ti tiy'ajt iich ajt nganejuhuiyim nej nmanaanim pen ji anajty xyaj'amidoohuim miid co jây cham chachhuaangixy chachjihuiyigixy.

⁴¹ Co jadu'n miydactay, chi ycapxcijxy miid je naymujcpidijc.

20

Pablo ñicxy jim Macedonia etz Grecia

¹ Co je cajp jây ycapxy'ayuc xeemy, chi Pablo huoomujcy je mibijcpidijc, e jaccapxhuijy ajcxy chi ycapxcijxni, chi chooni Efeso ñicxy jim Macedonia ñaaxjot. ² Cajp cajp Pablo oy co'ixiy je mibijcpidijc jaccapxhuijy ajcxy. Chi Pablo yja'ty jim Grecia ñaaxjot. ³ Chi Pablo yhuäcxijpy jim tugig po'. Jim Grecia Pablo anajty ybarcotigihua'ñ ñicxa'ñ Siria. Co Pablo oy nejhuüy co judiojây ajcxy ti yajnihuinmayiyii yaj'oga'ñyii barcojoty, chi yhuinma'ñybaty co huimbida'ñ tegyi'm, ñaxa'ñ jadüg'oc Macedonia. ⁴ Pablo mayjây miid ñicxy, miidnicxy je Sópater huidi anajty cogajp Berea, etz Aristarco, etz Segundo huidi anajty cogajp Tesalónica, etz Gayo huidi anajty cogajp Derbe, etz Timoteo, etz nañ jadu'n Tíquico, etz Trófilo huidi tzoon jim Asia ñaaxjot. ⁵ Co jada mibijcpidijc ajcxy ñicxy jayijp, chi ajcxy xy'ahuixyich jim ma je cajp huidi xii Troas. ⁶ Co xii ñajxtay mina yajcaay je tzajcaagy je huidi ca' müdity levadura, chi iich ajcxy ndzooni jim Filipo barcojoty. Co migoox xiiñi, oy iich ajcxy naybátigixy jim Troas. Jim iich ajcxy yhuäcxijpy huixtucj xii.

Pablo co'ixiy je mibijcpidijc jim Troas

⁷ Domingo xii ajcxy ñayyöymujci je mibijcpidijc chajcaagy ytuñc-huäcxaangixy, e Pablo anajty ymügütiyc yjacyaj'ixpijpy. Je' co anajty com jabom chonaani, paady oy ayuc jacyajyoñ ixti ycuñc-hua'cxchumüi. ⁸ Jilby anajty canaag lámpara ytiicxy ma ajcxy anajty ti yöymujccixy ma tüg cuarto huidi anajty oy ycixity. ⁹ E tüg yeeg'anäg huidi anajty yxii Eutico, ma ventana aguu anajty y'iñây. Com Pablo jecy oy yaj'ixpijcy, chi je yeeg'anäg ymâymajtzi, e tugiig nñhuijtzpety anajty ycixity je tijc ma ycây. Chi ajcxy yajpidigy ögy. ¹⁰ Co Pablo yminajcy, chi ñaygijxnajaji amineenmujcy je yeeg'anäg huidi anajty ti ycây. Chi Pablo nimay ymügütiyc:

—Ca' mdzigiygixy, juugy jada.

¹¹ Chi Pablo jadüg'oc ypejty ma je cuarto cixpi, chi chajcaagy tuñc-huäcxy e yajcaay ajcxy, e jadu'n Pablo yjacmiydacy co oy xiiñyñ. Chi ycapxcijxni miid je' ajcxy, chi ñicxni. ¹² E je yeeg'anäg huidi anajty ti ycây, chi ajcxy yajnicxy juugy, e ooy ajcxy yjotcugiy nidüg'óciy.

Choñ ajcxy Troas ñicxcixy Mileto

¹³ Chi iich ajcxy jayijp nicxígy barcojoty jim Asón co anajty jim nyajtzonáangixich Pablo, com ti anajty jadu'n miidnayñimáayigixich co je' tegyi'm anajty ñicxa'ñ. ¹⁴ Co iich ajcxy naybaatti jim Asón, chi Pablo ybarcotigiiy miid iich ajcxy. Chi iich ajcxy ñicxy jim Mitilene. ¹⁵ Chi iich ajcxy jim ndzoñ, chi com jabom iich ajcxy najxy mihuingon Quio, comaax iich ajcxy nja'ty jim ma barco jättac huidi anajty yxii Samos. Jim Trogilio iich ajcxy nbocxy, com jabom iich ajcxy nja'ty jim Mileto. ¹⁶ Chi Pablo ca' ñicxa'ñ jim Efeso co ca' yhuäcxiba'ñ jim Asia ñaaxjot, com tzojc anajty yjâda'ñ Jerusalén, com jim anajty yajnaxa'ñ Pentecostés xii.

Pablo yajmüdmaydacy je huídibi ajcxy ane'mb je mibijcpidijc

¹⁷ Jim Mileto anajty Pablo, chi capxyñiguejxy huidi ajcxy nigohuajc'ajtp je mibijcpidijc huidi ajcxy jim Efeso. ¹⁸ E co ajcxy miñ, chi Pablo yminañ:

—Miich ajcxy mnejhuüyb jadu'n nej iich ti njây'atyich ma miich ajcxy tüg'óciy je xii je tiempo nej oga'n nja'tyich ya Asia. ¹⁹ Jecy iich ooy ti n'ityich miid miich ajcxy, nduñich ma nHuindzin Jesús ytung miid yung naxy njot nhuinma'ñich, etz miid huinnii jotmay, etz ti may ayo'n nyajnaxyich ma yi judiojây ajcxy. ²⁰ Ca' ti n'ixmachich je ngap'ayuc huidi oyip miid miich ajcxy ycixpi. Ti nyaj'ixpicxy mayjây'agujc etz tijc tijc. ²¹ Ti ndiy'ajt yecyich ma judiojây etz cham ma huidi ca' yjudiojâyity. Nnimaydaayich co huen jothuimbijtcixy ma Dios, etz huen mibijccixy iich ajt nHuindzin Jesucristo. ²² Jadachambi nicxpich jim Jerusalén; adzip je Espíritu Santo xyquexyich e ni nganejuhuiyich ti iich jim xyjadamy. ²³ Co iich cajp cajp ma nnicxyich, je Espíritu Santo xyajnejhuüybich co jim Jerusalén jây ajcxy xypidäga'ñich pujxtigoty etz jim ajcxy xychaachytuna'ñich. ²⁴ Yi jadu'mbi ayuc ca' iich nduñich cuendi, jada njugy'ajtich ca' ti tzoohuity. Jëyi janchtiy co nyajcixipych jada tung jotcujc, e nguydunipych je Huindzin Jesús y'ayuc, je tiibi xyajñibicyich jada tung.

Ngapxhuäcibich yi oybi Jesucristo y'ayuc ytiy'ajt jadu'n nej Dios may'ajt ti tuñ müd jäy ajcxy ycixpi.

²⁵ E jadachambi nnejhuüybich co müich ajcxy ma ti ngapxhuäcxyich Dios y'ayuc, ca' müich ajcxy xy'ocjac'ijxcixni jadügtecy. ²⁶ Paady cham nnimäyich müich ajcxy, ca' ni ti ngo'adzohuipych müd müich ajcxy ycixpi. ²⁷ Com ti ngapxhuäcxyich ma müich ajcxy tüg'óciy je Dios y'ayuc je Dios yhuinma'ñ. Ni ti ayuc ni ti ytiy'ajt ti ngacoyüchich ma müich ajcxy. ²⁸ Naycuend'ájtigixy ci'm etz cuend'ajtcixy tüg'óciy jäy ajcxy huidi yajmij'ajtp je Huindzin Jesús, jadu'n ajcxy nipaady nej tügicy cóbixy, etz müich ajcxy huidi nigohuajc'ajt je mibijcpidijc jadu'n müich ajcxy nipaady nej cóbixy cuend'ajtpi. Je Espiritu Santo ti xyajnlbïjccixy co mgüend'adipy ajcxy yi Jesús yjäy, huidi ti cojuuy ajcxy ypocy müd yci'mni'py co y'o'cy.

²⁹ Chi Pablo yjacminañ:

—Nejhuüybich co ya ndzoonibich miinip huingbi jäy huidi yajhuinma'ñdigoyam mibijcpidijc, jadu'n nej ahua'n iyujc huidi cóbixy tzüdzip. ³⁰ Ji ma müich ajcxy ji jäy yaj'ixpigam anii ma yjapadyii yaj'ixpigipy tiy'ajt oybi jigix yi mibijcpidijc ypanicxüyb. ³¹ Naygüend'ájtigixy, mjäymedziyb ajcxy jadu'n nej iich tugüg jimijt ti nyaj'ixpicxyich xäm tzuum jabom jabom, müd huinnii jotmay ti nyaj'ixpijccixy müich ajcxy nidüg nidüg.

³² Jadachambi iich, nmigügtijcix ajcxy, Dios müich ajcxy nyajpuhuanüyb, nyajmihui'maamyich müich ajcxy Dios y'ayuc jadu'n nej Dios ajt xychojcm xyjihuiyüm. Ma Dios y'ayuc müich ajcxy mbaadipy mic'ajt ma yi mibijcin, e mbaadipy ajcxy it lugar ma Dios quipxyi müd ajcxy nidüg'óciy tübi yajhuäch yjot yhuinma'ñ. ³³ Ni ti iich ti nga'adzocy, ni pin yhuít ymeen huidibi n'ocjediibich. ³⁴ Müich ajcxy mnejhuüyb co ti nduñich, müd ngi'mgüjich ci'm ti nnaymöyijich huidi nyajmayajtpych etz nañ jadu'n ti nbubetich nmigügtijcix huidi iich anajty nmüd. ³⁵ Iich müich ajcxy ti nyajni'ixüygixy nej jëbi mdungixy, nej jëbi mbubéjtcixy migügtijc huidi pa'm'ijtp, etz huidi tijaty yajmayajtp. Jäymedzi ajcxy je Huindzin Dios y'ayuc co yminañ: “Jacjotcujc je' huidi yejcp, ca'ydí huidibi yajmooyb.”

³⁶ Co jadu'n ycapxtay, chi Pablo ycoxtinay'ahuüi müd je' ajcxy, e mibijctzoy ajcxy Dios. ³⁷ Ytigi ay jcxy yaaxpi nidüg'óciy, e mineen ajcxy Pablo etz tzücxxy. ³⁸ Ooy ajcxy jihuüi nej anajty ti ñimäyigixy ajcxy co ca' yjac'ixüyb ajcxy jadügtecy. Chi ajcxy oy najtzhuohuij jim ma barco.

21

Pablo ñicxy jim Jerusalén

¹ Co iich ajcxy ngapxycijxy müd je mibijcpidijc, chi iich ajcxy nbarcotigüi, tüi ñicxy iich ajcxy jim Cos. Com jabom ndzoonich Cos ñicxy iich ajcxy jim Rodas. Chi iich ajcxy ndzoon Rodas ñicx iich ajcxy jim Pátara. ² Jim Pátara iich ajcxy nbaaty tüg barco huidi anajty najxp Fenicia ñaaxjot. Jim iich ajcxy nbarcotigüi jadüg'oc, chi iich ajcxy nnicxni. ³ Chi iich ajcxy mmij'ixxy Chipre je naax me'y'agujcpi, anajty'amy je' yhu'i'my. Jacnicxy iich ajcxy Siria ñaaxjot, chi je barco ytigüi ma yjättac jim Tiro co jim anajty chimydajc yajhuüma'ñ. ⁴ Jim iich ajcxy nbaty jäy huidi anajty yajmij'ajtp Jesús, chi nmüdhua'cxijpich ajcxy huixtujc xii. Je' ajcxy je Espiritu Santo yajnejhuüi co Pablo ayo'n pada'ñ Jerusalén, paady ajcxy nimay Pablo co ca' huaad jim ñicxy. ⁵ Co huixtujc xiibi yca'pxy, chi iich ajcxy ndzooni. E tüg'óciy mibijcpidijc müd y'ung ytöxyijc oy xytüjijphuohüigixyich cajppa'. Jim ma mejypa' ngoxtinay'ahuüi iich ajcxy, chi iich ajcxy nmibijctzoy Dios. ⁶ Huin'it iich ajcxy ngapxycijxni, chi nbarcotigüi iich ajcxy e je mibijcpidijc yhuimbijtni ajcxy ma ytiyc.

⁷ Co iich ajcxy ndzoon Tiro, chi ñicxy iich ajcxy Tolemaida. Jim iich ajcxy ngapxpocxich je huidi anajty ajcxy mijpidaacp Jesús, e nmüdhui'my iich ajcxy jim tüg xii. ⁸ Com jabom iich ajcxy ndzoon Tolemaida müd Pablo etz pinjaty iich ajcxy anajty nmüd. Chi iich ajcxy nja'ty jim Cesarea. E chi iich ajcxy ñicx ma Felipe ytiyc, je huidibi anajty capxhuäcxy Jesucristo ytiy'ajt je oybi. Je' je' huidi tuun je nihiixtujcpi taabi ajcxy caayin uucin yajhuüxxy jim Jerusalén oga'n. Chi iich ajcxy nhui'my müd je'. ⁹ Felipe midaax anajty ñix müdity, ca'ni anajty ajcxy ypijccixy. E je' ñix ajcxy anajty Dios y'ayucnajtzcaxüyipy. ¹⁰ Ti anajty iich ajcxy jim nhuäcxiy canaag xii co oy yjaty tüg ayucnajtzcaxüyibi huidi anajty yxi Agabo, jim anajty ti choon Judea. ¹¹ Chi Agabo y'oy xycogapxüygixy ma iich ajcxy njättac. Chi Agabo Pablo yhuün huijtzicci, e je' müd ñaygixojtz ñaydecyxoitz, chi yminañ:

—Je Espiritu Santo jadu'n minamb co jim Jerusalén jadu'n judiojäy ajcxy cixodza'ñ tecyxodza'ñ jada huün yhuindzin, e nañ ciyega'ñ ajcxy ma huidi ca' yjudiojäyity.

¹² Co jadu'n yajmidoy, iich ajcxy etz je Cesarea jäy ngohuanüi iich ajcxy Pablo co ca' huaad ñicxy jim Jerusalén. ¹³ Huin'it Pablo y'adzooy:

—¿Nej co myaaxcixy müd iich ycixpi? ¿Nej iich müich ajcxy co njot nhuinmañ xyaj'amutzciyi? Iich nayyéicibich müd naygixodxi naydecyxodxi, nañ jébi n'ogibich jim Jerusalén müd je Huindzin Jesús ycixpi.

¹⁴ Co ca' iich ajcxy mimadacy nicxy nyajhuí'mgixyich Pablo, chi iich ajcxy n'amooni, chi iich ajcxy ñayñimaayi:

—Huen cuyduñ je Huindzin Jesús chojcin.

¹⁵ Co jadu'n yjajti, chi iich ajcxy ndzonii ni'ixiixy e chi iich ajcxy nicxy jim Jerusalén. ¹⁶ Müd nicxy iich ajcxy nijéjity mibijcpidijc huidi tzoón Cesarea, e nañ tzoón anajty tüg Chipre jay huidi anajty yxi Mnasón, jecyip anajty jijptigiyiñi jada mibijcin e je' iich ajcxy nicxy xyajjättagaangixy.

Pablo oy cogapxi Jacobo

¹⁷ Co iich ajcxy nja'ty jim Jerusalén, chi je mibijcpidijc iich ajcxy xycóbijcy janch jotcuic. ¹⁸ Com jabom iich ajcxy nicxy müd Pablo, y'oy iich ajcxy ngogapxi Jacobo, e jim anajty tüg'óciy huidi nigohuaj'ajtp je mibijcpidijc. ¹⁹ Chi Pablo ymigüjtijc capxocxy, e yajmüdmidyacy ti anajty Dios ti tuñ müd yi' ma yi jay ajcxy huidi ca' yjudiojáyity. ²⁰ Co ajcxy jadu'n midooy, chi ajcxy huin'iy jáymejch yi Dios, chi ajcxy Pablo nimay:

—Migüg Pablo, müich mnejhuüyb co ya canaag mil jay ti mibicy Jesús, e yjactimminañ ajcxy co copicy nguyduunim Moisés ycótujcin je jecyip. ²¹ Ti ajcxy yajmüdmidyagyii co müich mdzachjáyaj'ixpicy ma tüg'óciy judiojáy huidi ajcxy jigüegý adzinaayb co ca' huaad tuñyucnti Moisés ycótujcin je jecyip, etz ca' ycopicyty co tiy'ajttiigixipy y'ung, etz ni ca' ycopicyty payóyipy iich ajt ngostumbre. ²² ¿Ti huaad nduunim? Jotmädam ajcxy co nejhuihuipy co ya müich ti mjáty. ²³ Hue' janchtiy jadu'n müich mdunipy: cha midaax yéydijc huidi cuydunamy tüg huandaacin. ²⁴ Müdnicxy je' ajcxy, nicx nayyajpocyñihuaatzí müd yi' ajcxy, e müich mgojuydayipy nej anajty ajcxy ypanyi je meefyduunii. E chi ajcxy myajcöme'pxipy cödzam, e jadu'n je jay ajcxy huinjihuüydáhuipy co ca' yjanchty jadu'n nej xyñimiyaaccixy, jéyi co müich nañ jadu'n mguydun je Moisés ycótujcin je jecyip. ²⁵ Huidibi janchtiy jadu'n nej yi huidibi ajcxy ca' yjudiojáyity, e ti mijpidaaccixy Jesús, ti iich yi' ajcxy nijayiygixich co ca' túngixipy cuenti jada jadu'mbi judiojáy ycostumbre. Je' janchtiy co ca' huaad tzützcixipy je tiibi jay yajhuindzigiy ídolos, ni ca' huaad jicxcixipy ni'py, etz ni ca' ajcxy tzüdzipy huidi yoc'h-huüdy ti y'ögy, etz ca' ajcxy huingbi töxyjáy migapxtigóoygixipy.

Chi ajcxy majch je Pablo ma Dios ytiyc

²⁶ Chi Pablo müd nicxy je nimidaaxpi yéydijc, com jabom ajcxy nayyajpocyñihuaatzí ajcxy, chi ajcxy ytiigiy ma Dios ytiyc, e chi ajcxy ytiy'ajt yejcy ma judio teedy ti xi ycixañ je nayyajpocyñihuaadxi, etz ti xi huindzigiñ iyuc cýegaangixy nidüg nidüg.

²⁷ Ma anajty yca'pxaani je mihuixtujcxiibi nijéjity judiojáy, choon jim Asia, chi ajcxy ijxy Pablo ma Dios ytiyc. Huin'it ajcxy je mayjáy majch Pablo, yajhuangoty yajjihuiygoty, ²⁸ chi ajcxy yam chachminaangixy:

—¡Israel jay ajcxy, pubejtcich iich ajcxy! Jada je' je yéydijc huidi xi ya tzach nigapxp ni'ojáiyb judiojáy ycostumbre, Moisés ycótujcin, etz nDios ytiyc. E jadüg nax ti yajtiigiygixy griegojáy ma Dios ytiyc, yajjibicixyigixy jada it lugar huätzpi. (Com ca' ñigödücyty nicxy griegojáy ytiigiy ma Dios ytiyc.)

²⁹ Paady anajty jadu'n yminaangixy je huidi ajcxy majtz je Pablo, com co ijxy ajcxy Pablo müdhuidity cajpjoty je Trófimo, huidi anajty cogajp Efeso. Hue' anajty tjcixy co Pablo ti müdtigiy Trófimo tzajtigoty.

³⁰ Tüg'óciy je cajpáy yjotmätcottay, müñ ajcxy poyigy majch ajcxy je Pablo yajpidzimy tzajtigoty pahuijch pajuguicy. Chi ajcxy mic'amy agüy Dios ytiyc. ³¹ Yaj'ögamyb anajty ajcxy Pablo. Chi je soldado huindzin ayuc midoy co tüg'óciy je cajp jay ajcxy ti chachhuaangixy chachjihuiyigixy. ³² Je soldado huindzin huodzonday ysoldado ajcxy, e chi ajcxy ñicxy poyigy ma je mayjáy yhuaangixy yjihuiyigixy. Co je mayjáy ajcxy ijxy müñ soldado ajcxy müd yhuindzin, chi ajcxy ixmajch Pablo ca' ocjaccóxcixni. ³³ Co je soldado huindzin jim ja'ty, chi yajmajtzí je Pablo, ni'anémdiy co huen cixochyü müd mejtz cadena. Chi yajtiy pin je' anajty, e ti ti tuñ. ³⁴ Chi je mayjáy ajcxy ytiigiy huaambi jihuiybi, e jadu'n je soldado huindzin ca' ni nej huinjihuüy müd je ne'mbi. Chi ni'ane'mdiy co huen Pablo yajnicxyii ma cuartel. ³⁵ Co jim ya'ty ma cuartel pedydac, chi je soldado ajcxy cýigy Pablo, co anajty je mayjáy chachjottigoyñajcixy tzachyaj'ogaangixy anajty Pablo. ³⁶ Tüg'óciy je mayjáy pamiingixy axam je soldado ajcxy, yam chachminaangixy:

—¡Huen ögy!

Pablo ñaygohuaani ma je mayjáy

³⁷ Co anajty yajtiigihuañii cuartel tigoty, chi Pablo migapxy je soldado huindzin müd griego ayuc, yminañ:

—¿Nej jēbi ii nmīdmīydāgy tūg'aa metz'aa?j?

Chi je soldado huindzin y'adzooy:

—¿Nej mājtpy mīich griego y'ayuc? ³⁸ ¿Nej ca' jada' mīich jējity je egipcio jāy huidi namni tzip yajpidīcp, e huobidzīmy mīdaax mīl jāy yaj'ōcpī, mīd nīcxy ajcxy jīm mījtīgīduum?

³⁹ Chi Pablo nīmay je soldado huindzin:

—Ich judíoāy īich, jīm ngogápidyich Tarso, tūg mījcayp huidi yajpatpī jīm Cilicia ñaaxjot. Tun may'ajt mīñ mayjāy n'ocmīgapxich.

⁴⁰ Co je soldado huindzin a'ixīy, chi Pablo ytinay'ahuīy ma je cuartel pedydac, e cīmīd ytiy'ajt yeycy co huen amoongixy. Co je mayjāy ajcxy y'amonday, chi migapxcoty mīd hebreo ayuc yminañ:

22

¹ —Mīgūgtīc etz mīj'anāctīc, mīdoogixy jadu'n nej īich yam nnayñīgapxtūdyī.

² Co je mayjāy ajcxy mīdooy co ymīgápxīgīxy mīd hebreo y'ayuc, chi ajcxy y'amonday, chi Pablo yminañ:

³ —Judíoāy īich. Jīm Tarso nma'xung'ajtyich, Cilicia ñaaxjot. E ya Jerusalén ti nyeeegyich. Ixpīcīch ya ma Gamaliel, etz yajxon Gamaliel ti xyaj'ixpīcyīch ajt nmīj'ap nmījteedy ytiy'ajt etz ycōtūjīcīn. Njatyīm nyajmīj'ajtpyīch Dios jadu'n nej mīich ajcxy Dios myajmīj'ajtcīxy cham. ⁴ Jecy ti n'ixhuidity ti nbahuidityich je jāy ajcxy huidi anajty mījpīdaacp Jesús y'ayuc, nyaj'ōctāhuaamyīch anajty, e nyajnīcxyīch anajty mach yēdyīctīc etz tōxyjāydyīc, nbīdāgyīch anajty ajcxy pujxtīgoty. ⁵ Je teedy mījtungmīdīc etz tūg'ōcy mīj'anāctīc ymīd tīy'ajt, co īich ajcxy xymooyīch cōtūjīcīn, e nīcxyīch anajty jīm Damasco ma nmīgūgtīcīch yī judío jāy ajcxy. N'ixtāyīch anajty je jāy ajcxy huidi Jesús y'ayuc mījpīdaacp, madza'ñīch anajty ajcxy, e nyajmīīna'ñīch anajty ajcxy ya Jerusalén huen yajtzaachytunggīxy.

Pablo nīmīydacy nej yjothuīmījty

⁶ Co īich anajty ndūyōyīch mīhuīngon Damasco, cujc yxī anajty, chi janch tīmītiīni ytiīcxīgy jūhuidity jadu'n nej jīn ma īich, hue' anajty choōñ tzajpjoty. ⁷ Chi jīm ngīdaayīch, huīn'it nmīdooyīch tūg ayuc xyñīmāyīch: “Saulo, Saulo, ¿ti co xypahudījtāgyīch?” ⁸ Huīn'it n'amīdooyīch: “¿Mbin mīich, Huīndzin?” Chi xy'adzooyīch: “Ich je' je Jesús je huidi cogajp jīm Nazaret, je huidi mīich mdzachtpahudījtacpy.” ⁹ Pīnjaty īich anajty nmīd y'ijx je' ajcxy je tīcxīn, chi ajcxy ooy chīgīy, e ca' ajcxy huīnjīhuīy je ayuc huidi anajty nmīgápxyījīch. ¹⁰ Huīn'it nmīmaayīch: “¿Tī jēbi nduñīch, Huīndzin?” Chi je Huīndzin Jesús xy'adzooyīch: “Pīdīg e yajyōy mdu', nīcxy jīm Damasco, jīm myajnmāhuīy tūg'ōcy tī jēbi mduñ.” ¹¹ Je tīcxīn hue' je' xy'ixmajchīch huīntz. E chi je nmīgūgtīcīch xyhuījtzoonīch ajcxy cīgīxy, xyajja'tyīch ajcxy jīm Damasco.

¹² Jīm Damasco anajty chīnāy tūg yēdyīc huidi anajty yxī Ananías, je huidi anajty ooy cuyduñ Moisés ycōtūjīcīn je jēcyīp. E judíoāy ajcxy huidi jīm tzīnaayb ooy cōmaaygīxy co ooy y'oyjāyity. ¹³ Chi Ananías ymīīñ ma njāttaacīch, e ytinay'ihuīy ma īich nmīc, chi xyñīmāyīch: “Mīgūg Saulo, ījxīgīch jadūg'oc huīnjemy.” Tīm huīn'itīy n'ījxīgīch. ¹⁴ Chi Ananías xyñīmāyīch: “Je Dios huidi ajt nmīj'ap nmījteedy ojajaj, je' tī xyhuīn'ixy jīgīx mnejhuīhuīpy Dios yhuīnma'ñ, etz m'ixīpy je tudācyī jāy, e nmīdohuīpy yci'm ayuc huidi ycapxpy. ¹⁵ Dios tī xyhuīn'ixy jīgīx nīcxy mdyī'ajt yecy ma tūg'ōcy naaxhuīñjāy, etz nmīmīydāgy nej tī m'ixy tī nmīdooy. ¹⁶ Jadachambī, ¿nej co mhuācxīpy? Pīdīg etz nībet. Mībījctzou Dios jīgīx mbocy ñīhuādzīpy.”

Pablo nīmīydacy nej oy yajquexy ma je hūdībī anajty ajcxy ca' pyjudíoāyity

¹⁷ Co nīcxcīch jadūg'oc Jerusalén, chi nīcxcīch ma Dios ytiīc, oy Dios nmībījctzooyīch. Chi īich jībīy tzajtīgoty n'ixmañīyīch. ¹⁸ N'ījxyīch je Huīndzin Jesús e xyñīmāyīch: “Pīdzīm ya Jerusalén mīc'amy, ca' je Jerusalén jāy ajcxy cōbīgīpy mīich m'ayuc jadu'n nej xyñīgápxa'ñīch.” ¹⁹ Huīn'it n'adzooyīch: “Huīndzin Jesús, yī jāy ajcxy ñējhuīyb co īich anajty nīcxcīch huen huidi judíoāy naymujctac n'ixtāyīch yī jāy ajcxy huidi mīich m'ayuc xymībījcp, tī nbīdāgyīch anajty ajcxy pujxtīgoty, ooy īich ajcxy yī' tī ndzaachytuñ tī nga'oyduñīch. ²⁰ Co ajcxy yaj'ōgy je Esteban, mīich mdumbī, huidi mīich m'ayuc xycapxhuācxīp, jīm īich anajty nañ jadu'n yajpaady. E ooy njāygidacyīch co ajcxy yaj'ōcy, īxtī ngūēnd'ajtīch je' ajcxy yjocxhuīt huidi Esteban yaj'ōc.” ²¹ Chi īich nHuīndzin Jesús xyñīmāy: “Cham īich mīich nguexy jīgūēgy it ma yī jāy ajcxy huidi ca' yjudíoāyity.”

Pablo, ma je comandante yci'am

²² E yabaad je mayjāy y'amīdo'ījty Pablo y'ayuc, chi ytiīgy ajcxy huambi jīhuīybī chachmīnaangīxy:

—¡Huen ōc yījībī yēdyīc! ¡Ca' huaad yjactzīnāy!

²³ Yam yhuaangixy yjihuiygixy, yam yjocxhuit tzachjengixy, etz naaxhuaay tzachyujc-huijixy. ²⁴ Chi je soldado huindzin ni'ane'mdiy co huen Pablo yajnicxyii cuartel tigoty, e ni'ane'mdiy co huen ci'adyii jigix nigapxip ti ti tuñ co je jay ti ymibidigyii. ²⁵ Ti anajty ajcxy cixojtcixy, e chi anajty ajcxy tzaachytunaangixy co Pablo nimay je capitán huidi anajty huindy:

—¿Ti cótujcin miich ajcxy müd co mdzaachytuna'n tüg romanojáy, ni ca' ajcxy jayijp mdiyduñ?

²⁶ Co jadu'n midooy je capitán, chi ñicxy oy yajnimáy je comandante:

—Ixcim nej mduñ yi jáy, com hue' yi' romanojáy.

²⁷ Huin'it je comandante ymijhuágy ma je Pablo, chi y'amidooy:

—¿Nej janch co miich mromanojáyity?

Chi Pablo y'adzooy:

—Janch.

²⁸ Huin'it je comandante nimay Pablo:

—Meeñygyxy ich jada nbaaty co naydijyijich romanojáy.

E chi Pablo y'adzooy:

—Ich ti nmiibi'c'ajtxich yi'.

²⁹ Müd jëyi, je huidibi anajty ajcxy ci'adam je Pablo, chi puyödyuticxni. Nañ jadu'n je comandante ooy ñay'adzigyii, müd co cixojch Pablo müd cadena.

Pablo ma je judíoáy ajcxy yjuntitungixy

³⁰ Com jabom je comandante co anajty nejhuñhua'n ti ycxipi co ti yxyii je Pablo yi judíoáy, huen yajminagyii cadena ma Pablo yci'. Chi ane'my co yajhuomujci je teedy tungmüdpí etz je judío mij'anactijc. Huin'it je comandante yajnicxy Pablo ma je huindzindijc etz ixpicytijc anajty ti ñaymújicixy.

23

¹ Huin'it Pablo yaj'ixxpejty je mayjáy huidi anajty ti nayyöymújicixy, e chi ajcxy nimay: —Migügtijc, Dios y'ijxpy ñejhuiyb nej ich ti nduñ maabi nyeecpidzimyich, tudägy n'ityich ixti chambaadni.

² Huin'it je Ananías, je teedy mijtungmüdpí, ni'ane'mdiy Pablo co huen yaj'accoxgy. ³ Chi Pablo yminañ:

—¡Dios yxchaachytunipy miich huidibi mnaybidaacip nej jihuuy ooy mdudägyjáyity, e ca' yjanchity! Paady miich m'ñäy ma cötujctac jigix nyajtydunipyich nej je ley y'ane'my. Chi mmidundigooy je ley co ti xyajcojxyijich.

⁴ Je jáy ajcxy huidi anajty jim minañ:

—¡Jadu'n miich mmigapxtigoy yi Dios ymijtungmüdpí?

⁵ Chi Pablo yminañ:

—Migügtijc, ich ca' anajty nejhuiyich, pen yi' je' Dios ymijtungmüdpí. Com jaybety jadu'n ma Dios ñecy: “Ca' huaad jibic mnigapxipy huidi tungmüdpí ijtj ma miich mjáy.”

⁶ Huin'it Pablo ijxy nejhuiy co jim juntijoty meijtzipcy ixpicytijc anajty jim, jim huidi saduceo y'ixpijcin ymijpidacp etz nañ jadu'n jim huidi fariseo y'ixpijcin ymijpidacp, chi Pablo yminañ mic:

—Migügtijc, fariseojáy ich, nañ jadu'n ndeedyich fariseojáy je'. Cham nyajtyduñich müd jëgixpi co nmibicyich co Dios yajjugypigipy jáy tiibi y'öccixy.

⁷ Co Pablo jadu'n yminanday, chi fariseojáy etz saduceojáy miñ xyipy ajcxy ca' ñay'ayuc-huinjihuuyi. Chi je naymujcpidijc ajcxy ñaybijc-huäcxí. ⁸ Je' co je saduceojáy yminaangixy co o'cpi ca' yjugypigipy, ni ca' ji ángel ajcxy, nañ ca' jáy y'alma, nañ ca' ji je Espíritu Santo, etz ni ca' ji mujcu' ajcxy. Je fariseojáy ymibijcipy je' ajcxy co yjiijity ángel ajcxy, co öcpi jugypigaangixy, co je Espíritu Santo yjiijity, co jáy ajcxy müdity y'alma, etz co mujcu' ajcxy yjiijity. ⁹ Tüg'öcy jáy ajcxy ma je naymujctac ytigüy huambi jihuiybi. Chi nijëjity fariseojáy huidi nihuindzin'ajtpy je Moisés ycötujcin nigapxtuy Pablo yminañ:

—Jadayaabi jáy ca' ti pocy ti tuñ. Ca' yjeycity ti jada' ymigapxyii tüg espíritu o tüg ángel.

¹⁰ Chi je mayjáy anajty ooy mic ti ñayyajot'ambijcixy. Je soldado huindzin tzigüyb anajty co Pablo y'ahuoonñihuuyb y'agidzihuuyb, paady ni'ane'mdiy huen yi soldado ajcxy yajpidzimixy juntijoty e yajnicxixipy yi Pablo jadüg'oc ma cuartel.

¹¹ Huin'it coodz ñaygüëxici je Huindzin Jesús ma Pablo ymijc, nimaayi:

—Jotmicpic Pablo, com jadu'n nej ya Jerusalén ti xyñigodiy'ajt'átyich, nañ jadu'n xyñigodiy'ajt'adipyich jim Roma.

Ixtaagyxy huinma'n nej huaad Pablo yaj'öccixy

¹² Com jabom nijëjity judíoäy ñaygapxi co yaj'ögaangixy Pablo. E chi ajcxy capxycödujcy ñay'libojci ñaygapxpojci co ca' ycayaangixy y'ügaangixy ixti cooni ajcxy yaj'öccixipy Pablo. ¹³ Nihuixchiguijpx naxy anajty yëydijctijc huidi ajcxy jadu'n naygapxi. ¹⁴ Chi ajcxy ninicxy je teedy ajcxy huidibi mijtungmüid etz judío mij'anäctijc, nimay ajcxy:

—Ich ajcxy ti ngapxycödujccixy co ca' ngayáangixyich n'ügaangixyich ixti cooni ich ajcxy nyaj'öcip Pablo. ¹⁵ Jadachambi müich ajcxy, etz jacyadyii xpicytijc mij'anäctijc nidungüygixy ma je soldado huindzin, co huen jabom yajminyii Pablo jadügtecy ma müich ajcxy. E aaniidaaccixy co jacyajxon yajtiyduna'n, e ni'ixi ich ajcxy anajty n'ijtcixy co Pablo nyaj'ögibich ca'ni anajty yjaty ma naysujctac.

¹⁶ Pablo chi' ymang nejhuiy nej je' anajty ti ñaygápaxigixy, chi ñicxy ma cuartel oy Pablo yajnimäy. ¹⁷ Huin'it Pablo yaaxi tüg soldado huindzin, e chi nimay:

—Yajnicx jada yeeg'anäg ma je comandante, ymüid yi' ayuc ti nigapxaamy.

¹⁸ Chi je soldado huindzin yajnicxy je yeeg'anäg ma je comandante, e chi nimay:

—Pablo, je machyjäy, ti xyaaxych, ti xyñimäyich co nmüidminipyich jada yeeg'anäg, ymüid yi' ayuc huidi ñigapxaamy ma müich.

¹⁹ Chi je comandante majch je yeeg'anäg ma yci', e yajnicxy abicy, chi yaj'amidooy:

—¿Ti xyajnimähuaamyich?

²⁰ Chi je yeeg'anäg yminañ:

—Yi judíoäy ajcxy ti ñaygápaxigixy co xyñimähuaangixy co jabom Pablo myajnicxipy jim ma ñayyöymugáanigixy, y'aaniidägaangixy co jacyajxon tiydunaangixy. ²¹ Ca' mi-ich yi' mmibigipy; com nihuixchiguijpx naxy yëydijctijc jim yi' ajcxy ahuixy yüch. Ti capxycödujccixy co ca' ajcxy ycaya'n y'üga'n ixti cooni ajcxy yaj'ögipy je Pablo. Jadachambi ni'ixi jim y'ijtcixy, jëyi müich m'ayuc ajcxy xyjamidohuaani, pen mni'adzooyb.

²² Chi je comandante ycapxycixy müid je yeeg'anäg. Chi nimay co ca' huaad ymyidägy müid jacyinjaty jadu'n nej anajty ti ymyidaaccixy.

Yajnicxy ajcxy Pablo ma je gobernador Félix

²³ Chi je comandante yaaxi metz capitán moy cötújcín huen nayñi'ixiüyigixy nime-jtmigo'px soldado huidi nicxip tegyi'm, etz tugi'pxmajc huidi nicxip cohuaayigixy, etz mejtz migo'px quipyijpxu'ñmüidpi, huen nicxcixy jim Cesarea mijcoodz. ²⁴ Nañ ni'ane'mdüy co huen cohuaay ni'ixi pidägyii huidi Pablo yaj'ñähuiipy, e moy cötújcín co huen oy yajxon ajcxy Pablo yajjädipy ma je gobernador Félix. ²⁵ Chi yajmiguejxy tüg necy yjaayity jadu'n:

²⁶ "Ich comandante, Claudio Lisias, cham nguejxyich jada necy ma müich, mijpi gobernador Félix, e nguejxpyich capxpooxín. ²⁷ Je judíoäy ajcxy ti anajty majtzicxy jadayaabi yëydijc, yaj'ögamy anajty ajcxy co ich oy nejhuiy co je' yromanojáyity, chi nninixich müid soldadtijc etz nnihuaañich. ²⁸ Co ich ooy anajty nejhuihua'ñich ti anajty co ti xigixy, chi nyajnicxich ma anajty ajcxy tungmüidpi etz mij'anäctijc ti ñayyöymüjcigixy. ²⁹ Hue' anajty yi' ycixpi ti yajxiy co anajty ti ytundigooy ma yi' ajcxy ycötújcín. Ca' anajty ytiy'ajtity co yaj'öccixipy, e ni ca' huaad ymach'ñäy. ³⁰ Co ich oy nejhuiy co yi judíoäy anajty ti nihuin-mayüygixy co yaj'ögaangixy, cham ich müich yi' nyajnigüexy. E ti ich nañ jadu'n nimay huidi ti xxiyüi huen nicxcixy ma müich, e jëbi ajcxy jim nigapxy ti ycixpi co midzip'ajtcixy. Ji naybaatim."

³¹ Je soldadtijc nej anajty ti ycötújcín möyüi tim huin'itiy müid tzoñ je Pablo mijcoodz ixti yajja'ty ajcxy Antipatris. ³² Je soldadtijc huidi ajcxy tegyi'm nicxp, com jabom huimbjctixni, chi yj'a'ctixni ma cuartel. E je soldadtijc cohuaayigixpi jacyicxy je' ajcxy müid Pablo. ³³ Co je' ajcxy yja'ty jim Cesarea, chi ajcxy je gobernador necy yajcädigüy, chi ajcxy nañ jadu'n yajquëxigijc je Pablo ma je' yhuinduu. ³⁴ Co ñecy capxtay, chi je gobernador y'amidooy Pablo ma anajty yconaaxity. Co nejhuiy co yCiliciajáyity, ³⁵ chi nimay:

—Jiini nejhuihuibich je tiy'ajt co anajty miingixy huidi ti xyxigixy.

Huin'it ni'ane'mdüy co huen cuend'adyii ma je Herodes ymijtijc.

24

Pablo ñaygohua'ñiyii ma je gobernador Félix yhuinduu

¹ Co migoox xii Ananías je teedy ajcxy ymijtungmüidpi yja'ty jim Cesarea müid judío mij'anäctijc ajcxy etz müid tüg huingapxpi huidi anajty yxi Tértulo, chi ajcxy ñayguëxici ma gobernador co xihuaangixy Pablo. ² Co ajcxy Pablo yajmiñ, chi Tértulo ytiyüi xibi, nimay Félix:

—Müid müich ycixpi jotcujc je naaxcayp y'ijty, ca' ma tzip, je' co yajxon m'ane'mdüy müid oyhuinma'ñ. ³ Tüg'óciy ich ajcxy njäygidacpyich hueñyma'ámyity, müich mijtungmüidpi Félix. ⁴ Ca'ydi mdiempo nyajtigoooyi mij, tun may'ajt amido'ijtigich n'ayuc tüg jaxigiyi. ⁵ Com ti

nnejhuüigyxich co jada Pablo, ooy ayo'n yecy hueñytimma'ámyity. Xi ya judíoäy tzach pijc-huäcxy müid y'ayuc huidi ymiid. Yi' je' nigohuajc'ajtp tüg picy jäy huidi jäy ytipty Nazaret jäy. ⁶ Com tundigoy ma iich ajcxy nDios ytijc nej ca' ypadyi, chi iich ajcxy nmaich, e chi iich ajcxy njatidyunañich jadu'n nej iich ajcxy ngötújcín y'ane'my. ⁷ Per je comandante Lisias je' yajtiyiy mictägy, chi iich ajcxy xypijci jada Pablo. ⁸ E Lisias yminañ co pinjaty anajty ti xyiyii huen miiñ co miich. Miich ci'm jébi myajtiy, e mnejhuüiup tüg'óciy je tiy'ajt jadu'n nej iich ajcxy yi' ti nxíy.

⁹ E je judíoäy ajcxy huidi anajty jim gobernador yhuinduu, ac jadu'n ajcxy yminaangixy co yjanchity jadu'n nej Tértulo ymina'ñ. ¹⁰ Huin'it je gobernador tiy'ajt moy Pablo cimiid co huen capxy, chi Pablo yminañ:

—Janch jotcuje jébi nayñgapxtüdyiijich ma miich Félix, com nejhuüibich co miich mjtungmüid ma jada naax cajp cham xii jimijt ñicxni. ¹¹ Miich ci'm jéb mnejhuüi je tiy'ajt, jéyi anajty ñimajcmetzxiiy maabi anajty nbättigiyich jim Jerusalén Dios ojadaajtpi. ¹² Ca' iich yi' ajcxy xypaty ndzipcapxy n'ahua'ngapxyich müid pinjaty. E ni iich ngajäy'axiiy ngajäy'agapxyi ma Dios ytijc, etz ni ma naymujctac etz ni ma Jerusalén cajp. ¹³ Jada jäy ajcxy ca' ajcxy müidity pinjaty tiy'ajt yegipy nej iich yi' ajcxy yxíy. ¹⁴ Huidi janch ngapxypidzimyibich ma miich jadu'n nej je tzinaayin, je jemybi ixpijcín huidibi yi' ajcxy ytipty ca' y'óyity, je' je' je' ixpijcín huidi iich müid n'ojadaajtpich Dios, je Dios huidi iich ajcxy nmij'ap nmijteedy y'ojadaajtp. Nmibijcpiyich tüg'óciy jadu'n nej yjaybetyity ma Moisés ñecy, etz je Dios y'ayucnajtzcaxiybi ñecy. ¹⁵ Nañ nmibijcpiy co Dios yajjugypigipy pinjaty ti y'óy, tiibi oybi tuñ etz tiibi jibicpi tuñ. ¹⁶ Paady ycipxi naymijottigoyiijich co njothuinma'ñich huädz ooy nmüid'idipiyich ma Dios etz ma jäy.

¹⁷ Canaag jimijt iich anajty ti nhuidityich huingduum, chi nhuimbijtyich ma iich ngajp limosna cuejtp etz nhuindzigihua'ñich anajty Dios. ¹⁸ Jadu'n iich anajty nduñ co nijéjity judíoäy xypatyich ma Dios ytijc huidi anajty tzoomb Asia ñaaxjot. Ti anajty naybo-cyñhuächyijich, ti anajty nguyduñich costumbre, ca' anajty mayjäy pin yhua'ñ yjihuüi. ¹⁹ Je jäy ajcxy huidi xy'ijxyich ma Dios ytijc, je' ajcxy ixipy ti ymiingixy ya tiy'ajt yejcp. ²⁰ Co ca' ajcxy ti miiñ, huen jada jäy ajcxy huidi ya nigapxcixy pen ypaat ajcxy nbocyich je taabi ajcxy xytidyuñich ma judío jäy tungmüidpi etz huinmij'anäctijc ajcxy ñaymujci. ²¹ Jéyi co iich mic ngapxyich juntijoty, chi mninaañich: “Xytiydumbich miich ajcxy cham müid co nmibicyich co Dios yajjugypigipy pinjaty ti y'o'cy.”

²² Co Félix jadu'n müdodaay, com ñejhuüidaayb anajty nej tüyöy je mibijcpidijc y'ayuc yhuinma'ñ, chi capxhui'my je ayuc, ñimay ajcxy:

—Co anajty miiñ je comandante Lisias, huin'it njacnejhuüidähuibich nyajtiy digihuibich miich ajcxy m'ayuc.

²³ Huin'it Félix ane'mdiy je capitán co huen yajcuend'aty yi Pablo, e huen a'ixihuip co pidzim tiibiñ tiibäy e pen ji ymügütijc miiñ co'ixihuüi, huen möyii huidi yajmayajtpy.

²⁴ Ti anajty xii ñajtzñinixiiyñi co Félix jadüg'oc miiñ müid ytoxyijc Drusila. Je Drusila judíoäy je' anajty. Chi Félix capxyñiguejxy Pablo huen miiñ müidmüidyägyi nej jäy müibicy Jesucristo. ²⁵ E co Pablo yajnimay je tiy'ajt nej Dios tzozy co huen jäy tudägy tzinäy, etz yajnimay jadu'n nej Dios jiini jäy tiyduna'ñ tüg'óciy, chi Félix ñay'adzigiyyi, yminañ:

—Nixx miich jadachambi, co iich anajty xyñibadiyigixy huin'it nicxy nyajhuooyii.

²⁶ Nañ jadu'n Félix y'ahuixpy anajty mina Pablo y'ocmeeñmoyii, e huin'it anajty najtz-madzihua'ñ. Paady anajty janam jadzojc nicxy yajhuoyii, e müid müidyägy anajty. ²⁷ Mejtz jimijt jadu'n yjaty, huin'it Félix ygobernadorbidzimy. Chi Porcio Festo ygobernadortigiyi ma Félix anajty ytuñ. Co Félix anajty nayyajhui'ma'ñyii ooy müid je judíoäy ajcxy, paady ixmajch Pablo mach.

25

Pablo ma Festo yhuinduu

¹ Jadu'n yjaty co Festo anajty ti ygobernador tigiy, chi codugig xii choñ Cesarea, ypättigiy Jerusalén. ² E jim Jerusalén je teedy mjtungmüidpi etz nijéjity huinmij'anäctijc jactimxyi Pablo ma Festo. ³ Chi ajcxy may'ajt pijtzozy ma je gobernador Festo co huen quexy Pablo jim Jerusalén. Hue' anajty ti huinmaaygixy co yaj'ogaangixy tü'am. ⁴ Chi Festo y'adzooy co Pablo cuend'aty anajty y'ity Cesarea, e je' anajty nixca'ñ janch tim tzojc jim. ⁵ Chi ajcxy ñimay:

—Jébi nijéjity miich ajcxy mdungmüidpidijc etz huinmij'anäctijc quipxy nixcibich müid iich. Pen ti je Pablo ytundigooy jébi miich ajcxy mxíy jim Cesarea.

⁶ Festo jéyi jim y'ity tuctujc xii taxtujc xii Jerusalén, chi yhuimbijtni Cesarea. Com jabom ñicxy ma tiydundac, huin'it capxyñiguejxy Pablo co huen yajminy. ⁷ Co Pablo ytiyiy ma tiydundac, chi mic'amy je judíoäy ajcxy yjübigiydäy huidi anajty ti choongixy jim Jerusalén.

Chi ajcxy oyxý Pablo co mij anajty ti ytundigoy. E ca' ni ti tiy'ajt ajcxy miguëxýg. ⁸ Chi Pablo ñaygogapxi yminañ:

—Hich ca' ni ti ndundigooyich, ni ngamidundigooyich yi judío jáy ycötújcín, etz ni ngamidundigooyich Dios ytíjc, etz ni ngamidundigooyich je mij'ane'mbi jim Roma.

⁹ Co Festo anajty jatytimayjömaya'ñ ma judíoáj ajcxy, chi y'amidooy Pablo:

—¿Nej mnicxam jim Jerusalén, jigix jim ndiydunípiy?

¹⁰ Chi Pablo y'adzooy:

—Cha ñich cham ma je cötujctac huidi je romano codung y'ane'myb e ma jébi yajtiyduñich. Yajxon miich mnejhuíy co ca' ti ti ndundigooyich ma yi judíoáj ajcxy. ¹¹ Pen ti ndundigooyich huidi jébi co'ögýich, ca' nminá'ñibich co ñich ca' n'öga'ñ. Pen ca' ji ni ti tiy'ajt jadu'n nej yi' ajcxy ti xyxiyich, ni pin cötújcín camíidity nicxy xycíyecyich ma yi' ajcxy. Hich nbijctzoy co nyajtiyduñich ma César, je emperador, jim Roma.

¹² Co Festo capxyöyday müd ymidungmüdpí, chi nimay Pablo:

—Pen miich jadu'n minamb co jim nicxy myajtiyduna'ñ ma je César ycötujctac, nguexipyich miich jim. Miich ti mbijctzoy co je emperador xytíyduna'ñ. Pis jim mnicxipy miich.

Pablo ma je rey Agripa yhuinduu

¹³ Chi yi xii tiempo ñajtzññicxiyñi co je rey Agripa etz Berenice ycidacy Cesarea, cogapxiñua'ñ anajty Festo. ¹⁴ Co ajcxy jim yhuäcxíjpy canaag xi, chi Festo yajmüdmíydcy je rey Agripa je Pablo ayo'n, e nimay:

—Ji tüg yëydíjc huidi Félix y'ixmajtz mach. ¹⁵ Co n'oyich jim Jerusalén, chi je teedy migtungmüdpí etz judío mij'anäctíjc xymixíyich, nibijctzohuíy co Pablo nyaj'ögibich. ¹⁶ Chi n'adzooyich co romanoáj ca' cötújcín jadu'n müdity nicxy yaj'ögy yi machyjáy ma ca'ni ñayhuindíñayigixy müd je huidi müd ñaxíyíi, jigix ñaygogapxiyb nej anajty ti xyxiíi. ¹⁷ Paady co je judíoáj ajcxy y'oy ya ca' nigoob tiempo nyajtigooyich co jabom mnicxich ma ngötujctaacich, e nni'ane'mdíyich co huen yajmiñyíi je Pablo. ¹⁸ Co ajcxy ñayguëxi'ci, je huidi anajty ti xíy, ca' jac ni ti ayuc anajty ajcxy müdity jadu'n nej ñich anajty ti ndíyich. ¹⁹ Jéyi janchtiy co jadu'n anajty yminaangixy co Pablo ti ytundigooy ma yi' ajcxy ycostumbre huinma'ñ, etz Pablo capxhuäcxy co je Jesús huidi o'c, juugyñi je'. ²⁰ Com ñich ca' nnejhuíy nej ndunipich müd jada jadu'mbi huinma'ñ, chi n'amidooyich Pablo, pen nicxam anajty Jerusalén, jigix jim ngatíyduñich müd jadayaabi ycixpi. ²¹ Pablo ci'm minañ co ñigi oy yajtiydunipy jim ma je emperador huidi ane'm jim Roma. Chi nni'ane'mdíyich co huen jacmach'íñáy, íxti cooni nguexipyich jim Roma ma César.

²² Chi je rey Agripa yminañ:

—Nañ ooy ñich nja'amído'idaani Pablo y'ayuc.

Chi Festo y'adzooy:

—Jabom jébi ayuc midohuipy.

²³ Com jabom miñ Agripa etz Berenice müd mayjáy etz xuuxpidíjc, chi ytigíy ajcxy ma tiydundac müd je soldado huindzin ajcxy, etz huinmij'anäctíjc. Chi Festo capxyñigüejxy co huen Pablo nicxy yajtzonyíi. ²⁴ Chi Festo yminañ:

—Rey Agripa, etz tüg'óciy mij'anäctíjc huindzindíjc huidi ya ti mnayyöymüdcigixy müd ñich ajcxy, cha je' je yëydíjc huidi oy yi judíoáj ti xyxiíi ma ñich. Xymixíyich jim Jerusalén, e nañ ya Cesarea, e jatymyminaangixy co jébi y'ögy. ²⁵ Ca' ti ti tundigooy, paady ca' huaad nyaj'ögyich. Com ti ci'm ñayñbijctzohuíyíi co jim yajtiyduna'ñ ma je emperador jim Roma, paady ti n'a'ixíyich co nguexañich. ²⁶ E com ca' ni ti tiy'ajt nej nijayíhuibich nhuindzinich, je emperador César, müd yi' ycixpi, paady nyajmiñich ma miich ajcxy, etz tim jayíjp ma miich mhuinduu, rey Agripa, jigix jébi m'amídohuipy e nmüd'idipyich ti ii njáayibich. ²⁷ Ca' jadu'n y'óyity nicxy nguexyich tüg machyjáy jim ma je mij'ane'mbi e ca' ni ti tiy'ajt müdity nej ti xyxiíi.

26

Pablo nimíydägy nej anajty yjatyin ma je rey Agripa

¹ Chi je rey Agripa nimay Pablo:

—Jébi ci'm mnayñimíydägyíi.

Chi Pablo yujcxajy yci' e ytigíy nayñgapxtuutíy, yminañ:

² —Jotucj nayjihuíyíjich, co jébi nmíydägyich ma miich, rey Agripa, jigix nayñgapxtüdüybich tüg'óciy jadu'n nej judío jáy ti xyxiyich. ³ Com miich mnejhuíyib yajxon nej judíoáj ajcxy yhuinma'ñ müdity, etz tjaty tzíp yi' ajcxy ymüd, etz jadu'n nej yi' ajcxy y'ixpijcin oy ñay'ixquípíxigixy.

Pablo nigapxy nej anajty chináy ma anajty ca'ni yjothuimbity

⁴ Tüg'óciy judíoäy ñejhuiyb nej ti ndzinäyich ma yi' ajcxy jim ma nnaaxjotich etz jim Jerusalén maabi nyecpidzimyich. ⁵ E yi' ajcxy ñejhuiyb nañ jadu'n, e jëbi nigapxcixy jadu'n nej ti nyucyeeep'atyich. Hue' naydijyijich anajty fariseojäy, je tügpicpyi jäy huidi mictägy je judío jäy ycostumbre etz ycotújin payöyip. ⁶ E jadachambi xytyiduñich müd co njijp'ixyich co Dios yajjugypig'añ yi jäy ajcxy tübi y'o'ccixy, jadu'n nej Dios yajnimay nmij'ap nmijteedy jecy'ajty. ⁷ Je majmetzpicypí Israel ymang y'ap y'oc y'ahuijxpy mina Dios cuydunañ nej anajty ti yajnimäyii je' ajcxy ymij'ap ymijteedy. Paady ajcxy Dios ojadaty huindzigíy xiim tzuum. Miich, rey Agripa, nmibicyich co Dios yajjugypigipy je jäy tübi y'öccixy, paady ycixpi yi judíoäy yxíyich. ⁸ ¿Na'amy co ca' miich ajcxy mibiga'ñ co jëbi Dios yajjugypicy je tübi ajcxy y'ögy?

Nej anajty Pablo jayjip'aty mibijcpidijc ixhuidity pahuidity

⁹ Jecypí ñich hue' ndijyich oy nduñich co anajty ndzachmidzıp'adyijich je Jesús je Nazaretpi. ¹⁰ E jadu'n nduñich jim Jerusalén. Müd je teedy mįjtungmįdipi ycotújin nbidaacich Jesús yjäy may pujxtigoty. E co ajcxy yaj'o'cy, nañ nigapxpejt ñich co huen yaj'öccixy. ¹¹ E nnicxyich anajty majaty judío ñaymujctac jim ndzaachytuñich huidi ajcxy mįpidacp anajty Jesús, jigix ajcxy y'ixmadzıpy je' ymibıjcin co Jesús je' je' je Cristo. Nigi anajty nmįjotmätcootyich ixti nbahuidijttacyich huingnaax huinggajp.

Pablo nimıyđägy jadü'oc nej yjothuimbıjty

¹² Müd yi jadu'mbi huinma'ñ nnicxyich anajty jim Damasco. Je teedy mįjtungmįdipi anajty xyquejxpich, e xymöyich anajty cotújin. ¹³ E tü'am, señor rey, ñich anajty nicxy, cıjc xıi anajty co n'ıjxyich tügi tücxin jacmic ca'ydi xıi ytücxin chooñ tzejpjoty, xyñigidacyich etz nañ jadu'n huidi anajty ajcxy xymıdnicxich. ¹⁴ Huin'it nidüg'óciy ñich ajcxy ngıdaday, e nmıdooyich tüg ayuc xymıgapxich müd hebreo y'ayuc, xyñimäyich: "Saulo, Saulo, ¿nej co chach xypahuidijttägy? Cı'm nayyajtzaachıyii jadu'n nej huaj yuub co jıjpconebiy huidi müd ñumygyumıy." ¹⁵ Huin'it n'adzooyich, nnımaayich: "¿Mbin müch Huindzin?" E je Huindzin xyñımaayich: "İich je' Jesús je huidi müch mdzachpahuidijttacpy. ¹⁶ Pidig e tınaaygugi', com ti nnaygüexıgyıjich ma müch jigix xymıdnıpyich etz mgodıy'ajt'adıpy jadu'n nej cham ti nyajnimäy ti nyajnejhuiy, etz jadu'n nej jiini njacyaj'ıxa'ñ njacya-jnejhuihua'ñ. ¹⁷ İich müch nnihuänıp nyajtızögıp ma yi judíoäy, etz nañ ma huidi ca' yjudíoäyity. İich müch jim ngıejxpy ma huidi ca' yjudíoäyity. ¹⁸ Nicx jim mya-jhuinjihuıygyıy ñich ndıy'ajt, huen ixmach ajcxy yi jıbic-huinma'ñ e jadu'n ypidzimıpy ajcxy ma je mujcu' y'ané'mıgıxy, etz mįjnicxpedıpy ajcxy Dios ytiy'ajt. Co ajcxy mibıgıpy mįpidägıpy ñich ndıy'ajt huin'it nmöhuıbich tügydac tzejpjoty ma yi oyjäyđıjc ity tübi Dios yajpocyñıhuächıyii."

Pablo cuyduñ nej anajty ti y'ıjxmañıyın

¹⁹ Rey Agripa, jadu'n ti ngapxymıdooyich huidi n'ıjxich nmıdoohuıch tzoön tzejpjoty. ²⁰ Jayjıp ngapxhuäcxich Dios y'ayuc jim Damasco, chi ngapxhuäcxich jim Jerusalén etz tüg'óciy Judea ñaaxjot, etz cham ngapxhuäcxich Dios y'ayuc ma huidi ca' yjudíoäyity. Nyajnimäaygıxyich huen jothuimbıjtcıxy, huen mibıjccıxy Dios y'ayuc ytiy'ajt, etz huen yajtungıxy oyjot oyhuinma'ñ jigix ñıguëxıgıpy co ti yjothuimbıjtcıxy. ²¹ Müd jada ycıxpi xymajchich ajcxy je judíoäy ajcxy ma Dios ytiyc, e xıyaj'ögängıxyich anajty. ²² Müd co Dios ti xypubety ti xypudıgıyich cha nyajpaadyich juogy. Ngapxhuäcxıyich Dios y'ayuc ytiy'ajt ma tüg'óciy ayoobtıjc etz ixpıctıjc. Tüg'óciy huidi ngapxpyich je Dios y'ayucnajtzcıpxıybi jaay jecy'ajty, etz je Moisés nañ jadu'n jaay jecy'ajty co jadu'n ytuna'ıyii yjada'ñıy. ²³ Hue' yajmina'ñ co je Cristo copıcy ayo'n tzaachpyı yajnaıxpy, e y'ögıpy e huin'it jugypıgıpy, e je' je' je jayjıp jäy huidi jugypıgıpy co anajty ti y'ögy. E yajcapxhuäcxıp je ayuc ytiy'ajt ma ñich ajcxy judíoäy, etz ma huidi ca' yjudíoäyity.

Pablo jahueeni cayajjothuimbıjty Agripa

²⁴ Co Pablo jadu'n yminañ ma anajty ñayñıgapxtüdyii, chi Festo mic minañ:

—İMlocııyb müch Pablo! Müd je xpıjcin nıgi m'ahuimbıty loci.

²⁵ Chi Pablo y'adzooy:

—Ca' ñich nlocıjıy, müch mįjtungmįdipi Festo. Yi huidi ñich ngapxpyich je' je' tiy'ajtıp etz janchıp. ²⁶ Yi rey Agripa ñejhuiydaayb yi' tüg'óciy jada, paady nmıyđägıch aamıc jotmic ma yi' yhuınduu; com nnejhuiybıch co yi' ñejhuiydaayb jada tüg'óciy, com canan hue' jada yajtuuñ yajmıydacy ayüchytuum. ²⁷ ¿Nej mmıbjcpıy, müch rey Agripa, jadu'n nej ajcxy yminañ yi Dios y'ayuccıjaaybi? Nnejhuiybıch co müch mmıbıcy.

²⁸ Chi je rey Agripa y'adzooy, yminañ:

—Janch tim jayınjaty jahuenjaty müch xycayajmıbıcyich Jesucristo.

²⁹ Chi Pablo yminañ:

—Oy yjajinjaty yjahuenjatyity ooy mijcjee mgamibicy, chojczy Dios co miich mmibigipy Jesucristo etz nañ jadu'n tüg'ócay jây huidi cham xy'amidoo'itip iich n'ayuc. Dios chojczy co mmibigipy Jesucristo jadu'n nej iich mmibicyich, jëyi janchtity co ca' mmach'idipy jadu'n nej iich mmach'ityich.

³⁰ Co je Pablo ymiydactay, chi je rey etz gobernador ytinayigy quipxyi müd Berenice etz jacjadyi huidi anajty ajcxy jim. ³¹ Chi ajcxy ahuingujc oy capxyöygixy Pablo ypocy, ñayñimáayigixy miñ xyipy:

—Jada yëydijc ca' jada ti tundigoy, ca' ypadyii nicxy y'ögy, ni ca' ypadyii nicxy ymach'ifñây pujxtigoty.

³² Chi Agripa nimay Festo:

—Jëbi ixypy nnaizmadzñyim Pablo co ca' ci'm ycanayñibjctzohuüyi co huen tiydunyii je emperador César jim Roma.

27

Pablo yajnicxi jim Roma

¹ Co ajcxy yajnihuinmayiyy co xyquexáangixyich jim Italia, chi Pablo yajcýeje müd jacjadyi machyây ma tüg capitán huidi anajty yxii Julio, je' huidi nihuindzin'ajtp tügpicy soldadtijc huidi anajty yxii batallón Augusto. ² Chi iich ajcxy ndigiy ma tüg barco huidi yhuindzin cogajpip jim Adramitio. Je barco hue' anajty ñicxa'ñ ma nijëjity barco jättac jim Asia ñaaxjot. Chi iich ajcxy ndzooni. Müd iich anajty ajcxy Aristarco huidi anajty cogajpip Tesalónica jim Macedonia. ³ Com jabom iich ajcxy nja'ty ma barco jättac jim Sidón. Jim je Julio pa'ayoy Pablo, e ahuaatz'i ytu' co huen nicxy co'ixiy ymigüjtijc, etz huen je' ajcxy yajcayyii yaj'ügyii. ⁴ Co iich ajcxy ndzooni jim Sidón, chi je naax mejoy'agujcpi yhu'i mni anajty'amy huidi yxii Chipre, müd co je poj anajty jippcobojiy je barco. ⁵ Chi je barco huinyöyñajxy je Cilicia ñaaxjot etz Panflia ñaaxjot, oy njädyich ajcxy jim Mira, tüg cajp jim Licia ñaaxjot.

⁶ Jim je capitán paty tüg Alejandria ybarco hue' anajty ñicxy jim Italia. Chi je capitán iich ajcxy xyajbarcotigüi. ⁷ Canaag xii iich nyöy janch ofñägy, adzaach iich ajcxy nja'ty mihuingon je Gnido co anajty je poj tzach jippcobojiy je barco. Najx iich ajcxy mihuingon Salmón, etz njüyöy'ahuidijtyich ajcxy Creta je mejoy'agujcpi naax. ⁸ Adzaach iich ajcxy nja'ty ma barco jättac huidi anajty yxii Buenos Puertos, mihuingon Lasea.

⁹ Ti iich ajcxy ooy anajty nxidigoy, e ooy anajty ycodzigijity je barco yajyöyii. Ti anajty je ayuuxii ñajxni, e ti mihuingon anajty je poj tuu tiempo huidi jây ytipty invierno. Paady Pablo je soldado huindzin jaccapxhuijy, ¹⁰ chi Pablo yminañ:

—Huindzindijc, jadu'n nej yam codzig'i jada ooy co njacnecxim barcojoty, ca' yjeczyty co nicxy ndigooyim müd barco etz müd ñidzimy etz n'o'ctaayim.

¹¹ E je soldado huindzin yjacmijpidac oy je barco yajyöybi y'ayuc etz je barco capitán y'ayuc, ca'ydi Pablo y'ayuc. ¹² Com je' co je barco yjättac ca' anajty y'öyity, nicxy jim yajnajxcixy je poj tuu tiempo, chi je jacmaybi ajcxy yhuinma'ñpidacy, co jëbi barco yjacýöy, oc'ixaangixy pen yjätcixy jim Fenice ma Creta ñaaxjot. Jim ma tüg barco yjättac huidi y'aguu najtz'ixiyyb ma xii pidzimy, e jim anajty je poj tuu tiempo yajnaxaangixy.

Je mijpoj mijtigoy ma je mejoy

¹³ Jadu'n yjajty co je jünboj hueeni ypidzimy, huin'it huinmay ajcxy co jëbi yjactüyöy je barco. Chi ajcxy yajpidigy je mij pujx huidi barco yajtinayxijp, e yajyöychoofi je barco. Chi ñicxy je barco mejypa' mejypa' ma Creta ñaaxjot. ¹⁴ Huin'it hueeni tiempo ñajx, chi je micpoj miñ ma tiichpoj pidzimy, huidi jây ytipty Euroclidón, jadu'n yhuimbizim, Noreste. ¹⁵ Chi je mic poj yajtütigajch je barco, e com ca' anajty ndimdüyöygixni müd je poj ycixpi, chi je mic poj iich ajcxy xyajnicxy adzip ma anajty tzocy. ¹⁶ Najx iich ajcxy mihuingon tüg naax mutzp mejoy agujcpi huidi yxii Claudia, e adzaach iich ajcxy nyujcjuguujcy je mutz barco huidi anajty miimb ixhodziy ma je mijpi. ¹⁷ Co ajcxy jugujcpidzimy je mutz barco, chi ajcxy yajtuuñ maychaay e xojtzmuujcy je barco aguu. Chi ajcxy yajminajcy je huit huidi anajty poj mic tzach ymajchyp. Je' co chigüygixy co chimnicxiyyb je barco jim ma mejoy huidi ca' y'agomity, ma pijot huidi yxii Sirte. Chi ajcxy ñayyejci huen poj yajñicxigixy. ¹⁸ Com jabom, com ooy mic anajty je poj, chi ajcxy je chimy mejoy cöjibijptaayi. ¹⁹ Je midugüg xii, chi iich ajcxy nmejycöjibijptay je tungbejt huidi yajtumyib ma je barco. ²⁰ Ti anajty canaagxii ñajxni e iich ajcxy ca' ma xii madza' n'oc'ijxcixni, müd je mij poj ycixpi huidi anajty iich ajcxy xychachyajtüyöyp. Hue' iich ajcxy ndijcixy co ti ndigöyigixyich, ca' ndijy iich ajcxy ndzöjipy.

²¹ Ti anajty xii tiempo iich ajcxy nyajnajxcixy jaygay, chi Pablo ytinayigy, nimay je jây ajcxy:

—Yëydijctijc, co iich miich ajcxy xycacapxymidoy ca' ngatzoonim jim Creta ñaaxjot, e ca' ixypy jada ayo'n yam jadu'n nbaatim. ²² Jadachambi ca' mdajcixy mmaygixy, ca' ni pin

ytigoyañ, oy je barco yjatigoy. ²³ Amygoodz je nHuindzin Dios tüg y'ánel ti ñayguëxgyii ma iich, je Dios huidi iich ngapxymidooybich, yi' ti quexy. ²⁴ Je ánel ti xyñmâyich: "Ca' mdzigy, Pablo, copicy co mjatyjädipy ma je mij'ane'mbi, je César yhuinduu. Müd miich ycixpi, Dios ñihuänamy yajtzögamy tüg'óciy huidi ji barcojoty, ca' ni tüg y'ögipy." ²⁵ Paady nayjot'amijmóoyigix, yëdyictijc, nmibijcypich Dios co jadu'n yjada'ñ jadu'n nej yi' y'ánel ti xyñmâyich. ²⁶ Ooy ycopicyiti nicxy nmijpojeitim ma tüg naax mejy agujcpi.

²⁷ Majmactz xii je mic poj anajty yajyöyii je barco oyñine jim ma je mejy huidi yxii Adria, chi mijcutz je barco yajyöybi jihui'ñybicy co anajty ti mihuingoñ naax. ²⁸ Chi ajcxy quipxy je nii jadu'ñi anajty ycicyity, e hue' ajcxy quipxy iipx xap ycicyity. Jahuengi huin'it jadüg'oc ajcxy quipxy je nii, e hue' oy quipxcixy majmocx xap ycicyity. ²⁹ E co anajty chigiygixy co tijy je barco jippcobonihuiipy ma tzaagop, chi ajcxy pidacy nijoty midaax pujx ma barco y'ijx, je huidi yxiiijip anclas, janch tzigiyb anajty ajcxy y'ahuixcixy cooni xiiimihuiipy. ³⁰ Chi je' ajcxy huidi anajty barco yajyöpy yhuinma'ñybaty co yquëga'ñ ameech. Chi ajcxy pidacy niihuingixy je mutz barco. Chi ajcxy ñaybidaaci jadu'n nej jihuiy je ancla jac yajminagaangixy jim ma barco yhuinduu. ³¹ Huin'it Pablo nimay je soldado huindzin etz je soldadtijc:

—Pen ca' jada hui'mgixy ma barco, ca' miich ajcxy mejy ypidzimipy.

³² Huin'it ajcxy tzujctujcy je tzaay huidi je mutz barco anajty müd ycoxochity, chi ajcxy yajcäy je mutz barco nijoty, e chi je mejy yajnicxyi.

³³ Moñyi Pablo migapxy je jäy ajcxy, chi ajcxy nimay co huen huingayñajcixy, chi Pablo yminañ:

—Cham majmactz xii ma miich ajcxy ca' mmaagixy, e ni ca' mgaagixy m'uuccixy. ³⁴ Tun may'ajt caaygixy oy jadu'ñyi, copicy jada co njatyñidzoctähuaanim, ni tüg ngöhuay ca' ytigoyaanim.

³⁵ Co Pablo jadu'n yminanday, chi tüg tzaajcaagy congy, chi jayijp Dioscojuyip yajnajxy mayjäy agujc, chi tujc-huäcxy etz ytigüy ajcxy caaybi. ³⁶ Mic'amy je jäy ajcxy yjotmigiyday nidüg'óciy, e chi ajcxy ytigüy caaybi. ³⁷ Hue' anajty ñaybáatigixy barcojoty mejtz migo'px jatugi'px majmocxtüg jäy. ³⁸ Co ajcxy ycayday, chi jacniigöjibijpy je trigo, jigix huen cöminacy je barco chimy.

Chi barco tüg yquiiñ

³⁹ Co yxiiimiy, chi je barco yajyöybi ca' ijxcapy je naax, e y'ijxpaty tüg it ma mejy huen ycoguegüy, e jim anajty püjot. Chi ajcxy yhuinma'ñybaty co'ixaangixy pen jëbi jim yjäty je barco. ⁴⁰ Chi ajcxy tzujctujcy je tzaay huidi anajty müd yxochity je anclas, e chi anclas yhuimni nijoty, huin'it ajcxy miguejiy je niigaap huidi tumb co tümöy je barco. Chi huit jadüg'oc ajcxy pidacy huidibi pojmajtzp. Chi je barco ytigüy yöyb, tiy ajcxy yajnicxy ma püjot. ⁴¹ E chi oy minaybadyyi ma anajty je mejy mejtz it oy mic ycujiyn, chi oy yjëpxy püjoty. Je barco jijp oy ytigüy tätzpicy ca' huaad y'ocyücxni, e je barco ijx oy ytigüyñ aguejthüäcxpi ymiid je mejy püjoty ymijaa. ⁴² Chi je soldado yjayaj'ögaañ je machyjäy ca'ydi yqueeccixy ayaahuip. ⁴³ Je soldado huindzin ca' a'ixüy nicxy yaj'ögyii Pablo, chi nimay soldado ajcxy co huen ixmajtcixy yi machyjäy. Chi je soldado huindzin nimay je jäy ajcxy co huen niidigüygixy pinjaty jajtp yau. ⁴⁴ E huidi ca' jajtcixy yau jaydëbi niidigüygixy müd pu'y etz müd barco pedasi. Jadu'n ajcxy nidüg'óciy ymejj ypidzimday.

28

Pablo yjädy ma tüg naax mejy'agujcpi huidibi yxii Malta

¹ Co iich ajcxy niibidzimday, chi iich ajcxy nejhuuy co je naax mejy agujcpi hue' anajty yxii Malta. ² Je conaax ajcxy ooy oyjäy'ajtin tuuñ müd iich ajcxy, chi ajcxy yajmijüy jün mij, müd co anajty ooy ytiichity, etz co anajty ooy ytuubojy. Chi xyñimay iich ajcxy co miñ n'ocxáamgixyich. ³ Chi Pablo ytigüy jäycaajpmujcpi, e chi pidacy jünjoty. Chi tüg ahua'n iyujc pidzimy, yquëgy anajty müd je anbi, chi Pablo ymajtzi ma yci'. ⁴ Co je cogajp ajcxy ijxy je ahua'n iyujc ytiññay ma Pablo yci', chi ajcxy ñayñimaayi miñ xyipy:

—Jadayaabi yëdyic, jäy yaj'öcpi jada. Oy ca' ti y'ögy mejyjoty, je tiydumbi tzajpjototy ca' a'ixiy nicxy yjactzinäy.

⁵ Chi Pablo yci' huinxidicxy, e jünjoty oy ycäy je ahua'n iyujc, e ca' Pablo ni nej yjaty. ⁶ E tüg'óciy je jäy tzach'ahuixcixy mina anajty y'ocquixigüy, o mina anajty y'oc'ögy. Ti anajty ooy y'ahuixcixy jecy; co ajcxy ijxy ca' ni nej yjaty, chi ajcxy yhuinma'ñ yajtigajch. Yminañ ajcxy co Pablo hue' jada' yi' tüg dios.

⁷ E mihuingon anajty je Publio ytiyc, je huidi nigohuajc'ajty je jimbí naax mejy'agujcpi. Je Publio xyajjättacich ajcxy, e xyajcaay xyaj'uucich iich ajcxy yaxxon tugüig xii. ⁸ Jadu'n yjajti co je Publio anajty yteedy ypigüy müd tooy gohuajc etz müdity anajty ni'pypa'm. Chi Pablo oy ixy je pa'mjäy. Chi Pablo Dios mibijctzoy, e chi cinixajy, e yajtzoozy. ⁹ Müd jadaay

miñ ajcxy nijëjity pa'mjäy huidi anajty ajcxy tzinaayb ma je naax mejy'agujcpi e chi ajcxy chooctäy. ¹⁰ Miñ jada ycixpi nyajcömay iich ajcxy, e nyajmooyich iich ajcxy tijaty huidi iich ajcxy nidüöyipy barcojoty.

Chi Pablo oy yjädý jim Roma

¹¹ Tugiig po' iich ajcxy anajty ti ni'itjni jim. Chi iich ajcxy nbarcotigüy ma tüg barco huidi anajty je tuuboj tiempo ti yajnaxy jim Malta. E je barco capitán jim anajty ycgajpity Alejandria. E je barco ymiid anajty ahuinax huidi anajty yxií Cástor etz Pólux huidi ajcxy dios'ajtpy. ¹² Chi iich ajcxy oy njäty ma je barco jättac huidi anajty yxií Siracusa. E jim iich ajcxy nhui'müy tugiig xii. ¹³ Ndzoñich ajcxy Siracusa barcojoty, nicxy iich ajcxy mejypa' mejypa', ixti nja'tyich ajcxy jim Regio. Com jabom oy ypidzimy jinboj, chi co maax oy nja'ty iich ajcxy Puteoli. ¹⁴ E jim iich ajcxy nbaaty nijëjity jäy huidi anajty mijpidaacp Jesús. Je' ajcxy xycohuanüyich co iich ajcxy jim hui'müpy tüg semaan. Chi iich ajcxy jadüg'oc ndzoñ, nnicxyich ajcxy jim Roma. ¹⁵ Je mibijcpidijc ajcxy huidi anajty jim Roma ymidou ajcxy ayuc co iich anajty ajcxy jim nicxy, chi ajcxy chooñ nijëjity oy xyjijpcobadüygixyich ma je cajp mercado miid huidi anajty yxií Foro de Apio. Jacjadyii mibijcpidijc oy xyjijpcobadüyich ma tüg jättac huidi anajty yxií, Tres Tabernas. Co Pablo jijpco'ixiiy je mibijcpidijc ajcxy, chi Dioscojuyip yajnaxy etz ñayjihuiiyi janch jotcuje. ¹⁶ Co iich ajcxy nja'ty jim Roma, chi je soldado huindzin ciyejcy je machyjäy ma je comandante, per a'ixiiy co Pablo tzinäy ahuingujc ma tüg pijctzoydijc, jëyi anajty tüg soldado ycuend'adyii.

Chi Pablo Dios y'ayuc capxhuäcxi jim Roma

¹⁷ Tugiig xii maabi Pablo anajty yjätý jim Roma co capxyñiguejcy je judío huinmij'anäctijc huidi anajty ajcxy tzinaayb jim Roma. E co ajcxy ñaymujci, chi Pablo yminañ:

—Migügtijc ajcxy, oy iich ca' ti ndundigooyich miidi judío jäy ajcxy etz miid ajt nmij'ap nmijteedy ycotüjcin, chi je judíoäy ajcxy xymajchich etz xyciyejcih ma romano tungmiidpi jim Jerusalén. ¹⁸ Co je romano tungmiidpi ajcxy xy'amidooyich, huin'it ajcxy xyjanajt-madzihuaañich, ca' ti ajcxy paaty ma iich huidi ajcxy xyajco'ögihuibich. ¹⁹ Co je judíoäy yjotmätcoty ajcxy, ca' ajcxy a'ixiiy co nyajnajtmadzihuibich, chi nayñibictzohuiyich co nyajtiydunipyich ma je mij'ane'mbi ya Roma, oy iich ca' ti xihuin nmiiidty miid iich nmigonaax nmigogajpich. ²⁰ Paady ti ngapxyñiguejxcixy co nyajmiidmiydäga'ñ ajcxy tigix co nmach'ityich. Miid co iich ajt n'ahuixim co Dios nihuäna'ñ yajnidzöga'ñ yi Israel jäy etz yajjugypiga'ñ je jäy tübi y'öccixy. Paady jadachambi nyajpaadyich mach.

²¹ Chi ajcxy y'adzooy:

—Ca'ni iich ajcxy ni ti necy xyñijäty huidi tzoomb jim Judea miid miich ycixpi. E ni tüg ajt nmigügtijc ca' jibic xyñimiydägy. ²² Nja'amido'idaamyich jadu'n nej miich mmiydägy, com nnejhuibich co huen yma'amyity jäy ymidzip'ajty je jemybi y'ijxpjcin.

²³ Chi tüg xii ajcxy agapxtujcy. Co oy paady mina anajty ti agapxtujccixy, chi mayjäy ñayöymujci ma je Pablo anajty jättac miidity. Jopy ajcxy yajtzondacy capxi miydägi ixti ycootztzuu'iy, jadu'n Pablo tzachyajnimaaygixy je Dios y'ayuc nej Dios yhuinma'ñ miidity. E yajjothuimbidaangixy anajty ma je Jesús miid co capxticixy je Moisés ycotüjcin nej anajty yjaybetyity, etz jacjadyii ayuc cojaaybi ñecy. ²⁴ Nijëjity cöbijc ajcxy nej Pablo anajty yminañ, etz nijëjity ca' ajcxy mibijcy. ²⁵ Co ca' anajty ajcxy miñ xyipy yajtügüy yhuinma'ñ, chi ajcxy ixy ca'ixy yöychöongixni. Chi Pablo yminañ:

—Tiytädgy je Espíritu Santo nimay je nmij'ap nmijteedy ajt co yajcapxy je profeta Isaías co yminañ:

²⁶ Nicx nima' je jäy ajcxy: Miich ajcxy oy mjamidohuiipy n'ayucich, per ca' ajcxy mhuinjihuühuip; oy mjuhuindüxcixixy, e ca' ajcxy mhuinjihuühuip.

²⁷ Com jada jäy ajcxy hue' yjot'ahuimbijtcixy janch juuñ, e ymidoogixy oyñinej, jadu'n nej jihuiy yhuimbiz'jtcixy, e ni ca' y'oc'ljxcixy miid yhuin e ni ca' ocmidoogixy miid yta'tz'ac, ni ca' huinjihuüygixy miid yjot yhuinma'ñ, ni ca' minipy ajcxy ma iich jigix mayjtzögibich.

²⁸ Nejhuüygixy miich ajcxy co jadachambi etz jacnicxpi xii tiempo Dios y'ahuaniyb y'ayuc ytiy'ajt nej jëbi jäy y'alma ajcxy yajnidzögipy ma je jäy ajcxy huidi ca' yjudiojäyity, e je' ajcxy y'amido'idipy.

²⁹ Co Pablo jadu'n nimay ajcxy, chi ajcxy ñicxtäyagixni chach ñayhuin'ibéjtigixy ñayhuingapxpéjtigixy miñ xyipy.

³⁰ Pablo mejtz jimijt jim chinay ma je pijctzoydijc jim Roma, e yajxon xiic'adzoy capx'adzoy pin miñ ycgapxiyii. ³¹ Janch agujc jotcuje anajty capxhuäcxy je Dios y'ané'min, e yaj'ixpicy je Huindzin Jesús ytiy'ajt, e ni pin ma ycapx'adugyii.

ROMANOS

Yi Necy Huidi San Pablo Yajñigüe Jx Je Mibijcpidijc Jim Roma

¹ Hich Pablo tumbich ma Jesucristo ytung. Jesucristo ti xyajñibicyich co nduna'ñich ma yi' ytung quipxy müd yi' y'apóstol ajcxy. Ti xypidägyich ma jada tung tügijp co ngapxhuäcxibich Dios y'ayuc ytiy'ajt oybi.

² Dios jecy'ajty y'ayuc yajhui'my cojay ma yi' y'ayucnajtzcapyi'ñecy co quexa'ñ anajty je Cristo ya naaxhuiñ. ³ Ngapxhuäcxich jada ayuc jadu'n nej ajt nHuindzin Jesucristo, je Dios y'ung, yma'xung'ajty ya naaxhuiñ. Hue' yi' ñinícx paty ma ytaj. E yi' ytaj je rey David je' ymij'ap'ajti ymijteedy'ajti. ⁴ Per Jesucristo ti paady ma Dios yi' yjihui'ñ ymic'ajt. Co Dios yajjugypijcy y'ung ma anajty ti y'ögy müd yjihui'ñ ymic'ajt, chi ti yajnejhuiy anajty je naaxhuiñyäj co Jesucristo hue' je' Dios y'ung, huidibi müd huädz yjot huädz yhuinma'ñ, etz nañ ymüid Dios yjihui'ñ ymic'ajt. ⁵ Co Dios yajjugypijcy Jesucristo ma anajty ti y'ögy, chi mijmay'ajt tuñ müd ich ajt ycixpi. E nañ müd Jesucristo ycixpi Dios ti xyajñibicyich co ngapxhuäcxibich yi' y'ayuc ytiy'ajt ma yi' mayjāy ajcxy ma tüg'öciy naax cajn, jigix jēbi mayjāy mibijccixy e nañ capxymidoogixy Jesucristo. ⁶ E müch ajcxy huidibi tzinaayb jim ma yi' cajn huidibi xijip Roma, nañ jadu'n Dios müch ajcxy ti xyhuin'ijxcixy jēbi ajcxy Jesucristo xyjāy'adyii.

⁷ Jada necy nguejxypich ma müch ajcxy nidüg'öciy huidibi jim yajpatcixp ma yi' cajn huidibi xijip Roma. Dios müch xychojccixp xyjihuiyigixp, e nañ Dios ti xyhuin'ijxcixy jaydēbi yi' xyjāy'adyii, etz nañ jaydēbi mdzinaaygixy müd huädz mjot huädz mhuinma'ñ. Huen ich ajt nDios Teedy etz ajt nHuindzin Jesucristo may'ajt oy'ajt tunipy müd müch ajcxy etz nañ xyajjotcugihuip ajcxy.

Pablo nicxy mibijcpidijc cogapxihua'ñ jim Roma

⁸ Tim jayijp nyajñajxpich jājyidaacin ma Dios, müd Jesucristo yxi, co müch ajcxy ti mmibijccixy Jesucristo. Mayjāy ma nidüg'öciy naax cajn ti nejhuuiyigixy jadu'n nej müch ajcxy ti mmijpidaaccixy Jesucristo. ⁹ Hich tumbich cixyjt huinijot ma Dios ytung, co ngapxhuäcxich Dios y'ayuc ytiy'ajt müd Jesucristo ycixpi. Dios yi' tiy'ajt yegip jadu'n nej jabom jabom Dios mmibijctzooyich müd müch ajcxy ycixpi. ¹⁰ Dios mmibijctzooyich pen yi' jadu'n tzojcp co jēbi nnicxyich cham tiempo jim ma müch ajcxy myajpaady. Canaag'oc ich müch ajcxy nicxy nja'ixaangixy, e ca' y'oyiy nej nícxibich. ¹¹ Ooy njanijot'atyich co ich müch ajcxy nicxy n'ixaangixy, jaydēbi ngapxhuäcxibich Dios y'ayuc ma müch ajcxy müd Dios yjihui'ñ ymic'ajt, e nañ ngapxhuäcxibich Dios y'ayuc ma müch ajcxy jaydēbi tiydudāgy mmibigipy ajcxy Jesucristo. ¹² Pen oyiiyb nej nícxibich ma müch ajcxy myajpaady, chi jēbi njotcugihuibich co anajty n'ixyich nej müch ajcxy mibijccixy Jesucristo, e nañ jaydēbi njotcugihuipy müch ajcxy co anajty m'ijxcixy nej ich mmibicyich Jesucristo, e jadu'n nayyajjotcugiiym miñ xyipy.

¹³ Ndzojcpich co müch ajcxy mnejhuihuipy co canaag'oc ti njapidägyich nhuinma'ñich co anajty nnicxa'ñich ma müch ajcxy myajpaady, e ca' y'oyiy nej nícxibich. Njijp'ijxypich co oyihuip jadachambi tiempo jadu'n nej jēbi nñicxibich jim ma müch ajcxy. Com njacyaj'ixpigaamybich müch ajcxy, e nañ njacyajmibigaamybich ajcxy Dios y'ayuc. Tim jadu'n nej nduñich canaag agajp ma chinaaygixy yi' jacjadyii jāy huidibi ajcxy ca' yjudiojāyity. ¹⁴ Dios jadu'n xyajñibijich jada tung, paady copicy co ngapxhuäcxibich yi' y'ayuc ma tüg'öciy jāy, etz majaty naax cajn. Ngapxhuäcxamybich Dios y'ayuc ma yi' jāy ajcxy huidibi griego ayuc capxcixp, etz ñan ma yi' jāy ajcxy huidibi ca' griego y'ayuc capxcixy. Ngapxhuäcxamybich Dios y'ayuc ma yi' ixpicy jāy ajcxy, etz nañ ma yi' jāy ajcxy huidibi ca' y'ixpicyity. ¹⁵ Paady ycixpi ooy ndzachcapxhuäcxia'ñich Dios y'ayuc ma müch ajcxy huidibi yajpatp jim Roma nañ jadu'n.

Je ayuc tiy'ajt oybi

¹⁶ Ca' nmidzo'yduyijich Cristo y'ayuc ytiy'ajt. Com je' jada je oybi ayuc huidibi tzoon ma Dios, ymüid yi' Dios ymic'ajt jigix jēbi tüg'öciy jāy ajcxy paadipy pocy huinmeecxin, pinjaty cōbigaamb Cristo y'ayuc. Tim jayijp ti ngapxhuäcxu Jesucristo y'ayuc ytiy'ajt ma yi' judiojāy ajcxy, e jac'axam ma yi' huidibi ajcxy ca' yjudiojāyity. ¹⁷ Jesucristo ytiy'ajt xyajnejhuiyim co mmibijcim co Cristo ti jōch ajt nbocy etz nxihuñ, chi Dios xycōbigaanim jadu'n nejjiuhiy tudāgyjāy. Ca' ji jadüg huinma'ñ nej Dios jēbi xycōbijcim jadu'n nej jihuñ tudāgyjāy. Com jadu'n jaybety y'ity ma Dios ñecy ma jadu'n yminañ: "Pinjaty tudāgy'ajtin ti paady müd co ti mjidägy Dios y'ayuc, hue' je' tzināhuip, ca' yjugy'ajtin ycixipy ytigoyipy."

Je naaxhuiñyājy ajcxy ypocy

¹⁸ Copicy nbaatim tudägy'ajtin ma Dios, com je Dios huidibi tzinaayb tzejpjoty ti xyajne-jhuüim co y'i' tzaachytuna'n mictägy tüg'öciy jäy ajcxy huidibi midundigooyb y'i' ytiy'ajt, tüg'öciy huidijaty jibic huinma'n ymiid, tüg'öciy y'i' ajcxy huidibi yajtigooyb Dios ytiy'ajt miid je jibicpi huidibi ajcxy ytumyb. ¹⁹ Com yi jäy ajcxy huidibi jibicjot jibic-huinma'n miid, y'ijxpy ñejhuiyb ajcxy Dios ytiy'ajt, com Dios ti pidägy y'i' ytiy'ajt ma y'i' ajcxy yjot yhuinma'n. ²⁰ Ñejhuiyb jäy ajcxy Dios ytiy'ajt, com mabaad oga'n Dios yajcojy naaxhuiñybi ixti chambaad, quëxip ya naaxhuiñ Dios ymic'ajt y'ijxpejt, oy ca' pin Dios icy, huidibi Dios ti cojy ti macxy yejcxy ijxpejt co Dios yjiijity, etz Dios ymic'ajt huinixü huinitempo ijtp y'i', ca' ycixipy ytigoyipy nimina. Co anajty Dios tzaachytuna'n yi pocyjäy ajcxy, ca' ajcxy ni ti ayuc miid huaad adzohuimbidip Dios miid ajcxy ypocy ycixpi. ²¹ Com ñejhuiyb ajcxy co ji Dios yajpaady, e ca' ajcxy ojadajtcixy ca' ajcxy huindzigüygixy Dios. E nañ ni ca' ajcxy yajnaxy Dioscojuyip ma Dios. E nañ jadu'n ajcxy ñaybidäacigixy amij agix, yhuinma'n ixtaaygixy huidibi ca' ytiy'ajtiy. Yajtigooyi ajcxy Dios ytiy'ajt ma ajcxy yjot yhuinma'n, e nañ miid'ajtcixy tzuuhuinma'n. ²² Yi jadu'mbi jäy ajcxy hue' yhuinma'n pidaaccixy co ajcxy ooy ycoluunma'ñity, co ajcxy ooy y'ixpicity, e ca' yjanchity, tzuu huinma'n ajcxy ymiid. ²³ Ma yjapadyii ojadajtcixipy huindzigüygixipy Dios huidibi ymic'ajtin y'oy'ajtin ca' ycixipy ytigoyipy nimina. Chi ajcxy yajtigach yjot yhuinma'n, e huindzigüygixy jäy y'ahuinax e jäy ajcxy yjugy'ajtin etz y'oy'ajtin cixaamb tigoayaamb. Ixti mijpidaaccixy nañ jadu'n joon y'ahuinax, iyujc y'ahuinax etz tza'n y'ahuinax.

²⁴ Co jäy ajcxy jadu'n ytundigoy, paady Dios ñajtz'ixüiyin ajcxy, huen tundigooygixy nej anajty ci'm jibichuinma'n nijot'ajtcixy. Ñaymidundigüoygixy ñinixc miñ xyipy huidibi janch oy midzo'yduuni. ²⁵ Ma yjapadyii ixipy mijpidaaccixy je tiy'ajt tiydudägypi nej Dios ti yecy, huin'it ajcxy mijpidaaccixy anü huidijaty jäy ti cojy ti macxy. Ma yjapadyii ixipy huindzigüygixy Dios, huidibi ci'm ti yajcojtäy tüg'öciy tijaty ji yajpaat, huin'it ajcxy huindzigüygixy jäy y'ahuinax joon y'ahuinax, etz iyujc y'ahuinax huidijaty ca' ti mic'ajt miidity. Copicy n'ojadajtim ngömaayim Dios huinixü huinitempo. Amén.

²⁶ Miid co jäy ajcxy tzachhuindzigüygixy jäy y'ahuinax etz jactijaty ahuinax, paady ycixpi Dios ajcxy ñajtz'ixüiyi, chi ajcxy tungixy yi jibic-huinma'n huidibi ci'm ñijot'ajtcixyp huidibi oy ymidzo'yduuni. Töxyjäy ajcxy ma yjapadyii chinäaygixipy tudägy miid ñäy, chi ajcxy ñaymiidtzinaayigixy e ñaymiidtungigüoygixy actöxyjäydijc. ²⁷ Yëdijctijc ajcxy nañ jadu'n ñaymiidtungigüoygixy miñ xyipy. Ñaymiiddzinäayigixy ma yjapadyii ixipy chinaaygixy miid töxyjäy ajcxy, huin'it ytundigooygixy ma Dios ytiy'ajt. Ci'm nijot'ajtcixy jibic-huinma'n huidibi oymidzo'yduuni, ypätcixipy ma ajcxy ñinixc je tzaachypi huidibi Dios ypidacpy miid yi' ajcxy ypocy ycixpi.

²⁸ Co yi jäy ajcxy jadu'n ci'm yhuinma'n ti pidaaccixy co ca' yajmij'ada'n Dios, paady ycixpi Dios ñajtz'ixüiyi ajcxy. Huen tim tungixy huidibi ajcxy ci'm ñijot'ajtpy, huidibi Dios ca' jäygidägy. ²⁹ Jäy ajcxy ooy mij jibic-huinma'n canaagnax nijot'ajtcixy; yëdijctijc ooy ajcxy jibic-huinma'n tungixy; ooy ajcxy migapxtigoy töxyjäy ajcxy; ooy ajcxy adzojccixy comeen'ajtin; ooy m'i'jxtinaaygixy ymügügtijc; ca' ajcxy ymügüg ixaangixy; ooy ajcxy yjäyyaj'öccixy; ooy ajcxy chiptunaangixy; ca' ajcxy ycapxymidohuaangixy; ooy ajcxy ymügüg huin'ingixy; ooy ajcxy ypiitcapxcixy; ca'p ajcxy ymügüg ixaangixy. ³⁰ Jäy ajcxy ooy nigapxy ni'ojij ymügügtijc; ca' ajcxy ixaangixy Dios; ca' ti jäygidaaccixy; ooy ajcxy amij agix ñayjihuiyigixy; ooy ajcxy ci'm ñaygömaayigixy; ooy ajcxy cojy macxy jibic-huinma'n, ca' ajcxy capxymidoogixy ytaj yteedy. ³¹ Jäy ajcxy ca' y'ayuc-huinjihuiyigixy; ca' ajcxy cuydungixy yci'm'ayuc; ca' ajcxy ni pin tzojccixy jihuiyigixy; ca' ajcxy ni pin pa'ayoogixy. ³² Jadayaabi jäy ajcxy ñejhuiyb co Dios ti cojy ti macxy ycotujcin co pinjaty tundigooyb jadu'n miid Dios ytiy'ajt, tigooyip ajcxy yjugy'ajtin. Oy ixipy yi jäy ajcxy janejhuiyigixy co padaangixy y'o'cin, huin'it ajcxy jactimtungixy jibic-huinma'n, e nañ jadu'n jotcuje ajcxy co jac pinjaty jibic-huinma'n tungixy.

2

Dios tiydumb jadu'n nej yi' tzocy

¹ Paady co miich migüg m'ix'ixy mba'ixy ti ytumyb, ti migüg ycapxyp ti anajty pocy mnaymöyüi, oy ixipy ypinjäy ñejpyjäyity. Miich ooy ti pocy m'ixy ma huing jäy, e nañ jadu'n miich ooy mij mdundigoy, tim jadu'n nej yi' ajcxy ytundigooygixy. ² Nejhuüim co Dios tudägy ytuñ co tzaachytun tüg'öciy pinjaty tundigooyb. ³ E miich co migüg m'ix'ixy mba'ixy ti ytumyb ti migüg ycapxyp, nañ jadu'n miich Dios xychaachytuna'n. ¿Nej mdijy mdzögip co anajty Dios xytidyuna'n? ⁴ ¿Nej ca' m'jäygidägy nej Dios mij ooy may'ajt oy'ajt ti tuñ miid miich, nej ooy mij ti xypa'ayoy, mij ti xymimecxtucy? ¿Nej ca' mnejhuiy co Dios mij ooy xypa'ayoy xymimecxtucy, jigix mjothuimbidipy nej mdundigoy ma Dios ytiy'ajt?

⁵ Muid co ooy mjetjuuñity mgöjuuñity, ca' ajcxy mjothuimbida'ñ, ca' ajcxy m'ixmadza'ñ nej ajcxy mdundigoogixy. Paady ycixpi Dios huidibi tudägy tumb nigi miich yi' ooy mij xychaachytuna'ñ co anajty xii tiempo ycixy ytigoy, e Dios chaachytunamyb jäy ajcxy müd ypocy ycixpi. ⁶ Co anajty Dios tiyduñ yi naaxhuñ jäy, chi yajinigidagihua'ñ nidüg nidüg nej anajty ti chinäy. ⁷ Nijëjity jäy ajcxy oyjot oyhuinma'ñ tungixy jabom jabom, yjiyp'ixjy ajcxy co Dios oybi ymöhuaangixy, nañ yjiyp'ixjy ajcxy co Dios ycomayiyb, yjiyp'ixjy ajcxy yjugy'ajtin huidibi ca' ycixipy ytigoyipy nimina. Yi jadu'mbi jäy Dios ymöhuaamyb jugy'ajtin huidibi ca' ycixipy ytigoyipy nimina. ⁸ Per Dios chaachytunamyb mijcajee yi jäy ajcxy huidibi ca' ycapxymidoohuaangixy, huidibi ca' cuydungixy Dios ytiy'ajt, huidibi ajcxy tumb jibic-huinma'ñ. ⁹ Ayo'n tzaachypipadamyb tüg'öciy jäy ajcxy huidibi jibic-huinma'ñ ti tuñ. Nañ jadu'n miich judíoäy ajcxy tim jayijp mbadaangixy tzaachypip, pen mdundigoogixp, e chiini yi jacjadyii jäy padaangixy tzaachypip, pen tundigoogixp. ¹⁰ Tüg'öciy pinjaty oyjot oyhuinma'ñ tungixp, Dios ymöhuaamyb yi' ajcxy oy'ajtin, nañ cömayaanip yi' ajcxy Dios, etz nañ yajjotcugihuib ajcxy. Tim jayijp yi judíoäy pada'ñ ajcxy oybi, etz jac'axam yi jacjadyii jäy ajcxy.

¹¹ Dios ca' tiyduna'ñ jäy ajcxy huin'ixjy, quipxyjaty tiyduna'ñ nidüg'öciy jäy ajcxy. ¹² Nidüg'öciy jäy ajcxy huidibi tundigoogixp, Dios yajtigoyaanip ajcxy yjugy'ajtin. Yi jäy ajcxy huidibi ca' müidity Dios ycotujcin huidibi cojaayip, Dios yajpocycähuaanip ajcxy, com ymuid ajcxy Dios ytiy'ajt ma yjot yhuinma'ñ. Yi jäy ajcxy huidibi müd Dios ycotujcin cojay, Dios yajpocycähuaanip ajcxy müd yi' ycotujcin huidibi cojaayip. ¹³ Yi jäy ajcxy huidibi nigoob amido'ijtp co yajcapxy Dios ycotujcin, e ca' ycapxymidoogixy, ca' ycobiga'ñyii Dios jadu'n nej jihuüy ytuädgyäyity. Yi jäy ajcxy huidibi capxymidoob Dios ycotujcin, Dios cobigaanip co ajcxy ytuädgyäyity. ¹⁴ Yi jäy ajcxy huidibi ca' müidity Dios ycotujcin huidibi cojayip, co ajcxy nijot'ajtcixy oyjot oyhuinma'ñ jadu'n nej Dios tzocy, jadu'n nipaady nej jihuüy ajcxy müidity Dios ycotujcin. ¹⁵ Co je jäy ajcxy oyjot oyhuinma'ñ tungixy, huin'it yajnigüëxícixy co ajcxy ymuid Dios ycotujcin ma ajcxy yjot yhuinma'ñ. E co paatcixy jibic jot jibic-huinma'ñ, huin'it jibic ñayjihuüyigixy. E co patcixy oyjot oyhuinma'ñ, huin'it ooy oy ñayjihuüyigixy. ¹⁶ Jada je'du'n je jemybi oybi ayuc huidibi ngapxhuäcxypich co miinip je xii je tiempo co Jesucristo, müd Dios ycotujcin, tiydunip tüg'öciy jäy ajcxy nej anajty yjot yhuinma'ñ ajcxy müidity, tüg'öciy pinjaty ti tuñ ayüch ameech tijaty.

Je Dios ycotujcin huidibi Moisés yjay jecy'ajty

¹⁷ Miich ajcxy huidibi minamb co mjudioäyity, miich ajcxy mmijpidaaccixyp Dios ycotujcin, je jecyp huidibi jaybetyip. Miich ajcxy mnaygömaayigixy co miich ajcxy Dios xyjäy'adyii. ¹⁸ Miich ajcxy mnejhuüy nej Dios tzocy nej huaad mjäy'ajtcixy. E nañ ti m'ixpicxy Dios ycotujcin huidibi ti xyajnejhuüyigixy huidibi tiy'ajt jac'oyip. ¹⁹ Miich ajcxy minamb co janch janch co miich ajcxy Dios ytiy'ajt myejci ma yi jäy ajcxy huidibi ca' Dios ytiy'ajt müidity, jadu'n nipaady nej jihuüy tüg huintzpi mhuijtyöy, e nañ jadu'n nipaady nej jihuüy mgodicxy je jäy ajcxy huidibi agootztuum tzinaayb. ²⁰ Miich ajcxy judíoäy myaj'ixpijcy yi jäy ajcxy huidibi ayoob, huidibi ca' ti tiy'ajt nejhuüyigixy, e ngapxhuüy yi jäy ajcxy huidibi ca' yhuinma'ñyemjtzixy. Miich ajcxy minamb co m'ayuc etz mdiy'ajt mbaatcixy ma Dios ycotujcin huidibi jaybetyip. ²¹ Miich ajcxy myaj'ixpijcy jacjadyii jäy ajcxy Dios ytiy'ajt. ¿Nej co ca' ci'm mguydungixy nej ti myaj'ixpijccixy? Myaj'ixpijcy ajcxy jacjadyii jäy co ca' huaad ymeetzcixy, e miich ci'm ajcxy meetzp. ²² Miich ajcxy myaj'ixpijcy jacjadyii jäy co ca' huaad migapxtigoy töxyjäy ajcxy, e ¿miich ajcxy nej co mmigapxtigooxy töxyjäy ajcxy? Miich ajcxy ci'm minamb co ca' huaad yajhuindzigiy tzaaboch quipyech, e miich ajcxy ci'm mdzachmeech je meen ma je tzaajtpic ma je quipyech y'ity. ²³ Miich ajcxy mdzachnaygömaayigixy co mguydungixy Dios ycotujcin. Miich ajcxy m'ixtij Dios müd co ca' ajcxy mguyduni yi' ytiy'ajt. ²⁴ Paady jadu'n jaybety miin ma Dios ñecy, ma jadu'n ymina'ñ: "Com co miich ajcxy mdundigoogixy, paady ycixpi yi jacjadyii jäy ajcxy ngapxy ni'ojy Dios yxii."

²⁵ Co ajcxy mguyduunip Dios ycotujcin, huin'it Dios xytunipcuendi co miich ajcxy müdity je tiy'ajt ma mninix co Dios xyjäy'adyii. Co ca' ajcxy mguyduunip Dios ycotujcin, huin'it Dios ca' xytunipcuendi co miich müdity je tiy'ajt ma mninix co Dios xyjäy'adyii. Jadu'n nipaady nej jihuüy ca' mdiy'ajttiyity. ²⁶ Co yi jacjadyii jäy ajcxy huidibi ca' müdity tiy'ajt ma ñinix, e cuyduni ajcxy Dios ytiy'ajt, jadu'n nej ajcxy ytiy'ajttiyity. ²⁷ Yi jacjadyii jäy co ajcxy cuyduñ Dios ytiy'ajt, yi' ajcxy capxpaady'idipy ma Dios. E miich ajcxy judíoäy mbocycähup miich ajcxy, oy miich ajcxy mjamüidity ixypiy Dios ycotujcin huidi cojaayip, pen ca' mguydungixy. ²⁸ Je iixpejt janchypip co pinjaty Dios yjäy'ajtp, canan je' je iixpejt huidibi ymuid ma ninix. E nañ jadu'n canan je' je tiy'ajttihuü cötujcin huidibi jäy cuydun jecy'ajty. ²⁹ Je iixpejt janchypip co pinjaty Dios yjäy'ajtp, je' je' je iixpejt huidibi ymuid ma yjot yhuinma'ñ, je oyjot oyhuinma'ñ huidibi ymuid, je iixpejt co je Espíritu Santo ti yajhuächyii yjot yhuinma'ñ, canan

je' je tiy'ajt co ti cuyduñ je jecyip cõtujcin huidibi cojay ijtp. Yi jadu'mbi jây ajcxy cõmay'idipy ma Dios, e ca' ycõmay'ida'n ma jây ajcxy.

3

¹ Pen tiy'ajt jadu'n nej nmına'ñich, çti jâygidaacin yi judíoñy ajcxy ymüd ma Dios huidibi yi jacjadyii jây ajcxy ca' müdity? Çti jâygidaacin ajcxy ypatpy co ajcxy müdity tiy'ajt ma ñinñx co Dios yjây'adyii? ² Yi judíoñy ooy canaagnax oy'ajtin jamüdity. Tim jayijp Dios yajnñijci ajcxy yi' ycõtujcin yi' y'ayuc huidibi cojaayip. ³ ÇNej mdijy co Dios ca' cuyduna'ñ yi' y'ayuc müd yi judíoñy ajcxy müd co nijëjity judíoñy ca' cuyduñ yi' ycõtujcin? ⁴ Dios ca' jadu'n huinma'ñ müdity nej jây ajcxy huinma'ñ müdity. Oy ixypy nidüg'óciy jây y'aniidaaccixy, Dios ca' y'anidäga'ñ nimina. Paady jadu'n jaybety miñ ma Dios y'ayuc co David jadu'n yminañ:

Ñejhuñhiipy jây ajcxy co miich, Huindzin Dios, tudägy mguyduñ yi m'ayuc. Ca' huaad pinjaty ymina'ñip co ca' miich mguyduñ yi m'ayuc.

⁵ Pen Dios cõmaybidzimipy müd ajt nbocy ycixpi, çnej tiy'ajt jadu'n nej jây yminaangixy co Dios ca' oy ytuñ, co xychaachytuunim müd ajt nbocy ycixpi? ⁶ Ca' yjadu'nity. Co ixypy yjadu'nity, Dios ca' yi' tydunipy naaxhuññy jây müd ajcxy ypocy ycixpi.

⁷ Co ixypy ytiy'ajity jadu'n nej jây yminaangixy co Dios ooy yjotucjcity co ca' xychaachtunipyich müd nbocyich ycixpi, jac'oy co ixypy ndundigooyich, jigix Dios janch ycõmaybidzimipy. ⁸ Jac'oy ixypy nmınaanim: "Tzoc tundigooyim jigix jëbi Dios cõmay ypidzimipy." Ixti nijëjity jây ti xyñhuambetyich co iich jadu'n ti nmına'ñich. Ca' jadu'n nmına'ñich co Dios jây tzaachtunipy ninigoob. Dios chaachtunipy pocjy jây ajcxy, com paatip ajcxy jadu'n yi tzaachypy.

Nidüg'óciy iich ajt nbocymüdity

⁹ ÇNej janch jadu'n co iich ajcxy huidibi judíoñy, jac'oy jây iich ajcxy ca'ydi yi jacjadyii jây ajcxy? Ca' yjadu'nity, ca' iich ajcxy njac'oyjâyity. Com ti jayijp nya'ixpicyich co tüg'óciy jây ajcxy yajpaady pocymüd, yi judíoñy, etz nañ jadu'n jacjadyii jây ajcxy. ¹⁰ Com jadu'n jaybety miñ ma Dios ñecy ma jadu'n ymina'ñ:

Ca' ji ni tüg jây tudäcpy, ni tüg.

¹¹ Ca' ji ni pin huidibi huñjihuñyb Dios ytiy'ajt. Ni pin huidibi ixtaayb Dios ytiy'ajt.

¹² Nidüg'óciy jây ti ixmajtzicxy Dios ytiy'ajt. Quipxy ycapxy ajcxy ytumyib co ytundigooyixy. Ca' ji ni pin, pin huadz oy yjot oy yhuinma'ñ tumb, ca' ji ni tüg.

¹³ Yi jây ajcxy ooy ycapxtigooyixy, oy ajcxy yhuin'ñ müd y'ayuc. Jadu'n ajcxy yöcpajc nipaady nej tüg öcpi jut huidibi ahuadz. Ooy ajcxy yajtzachñy müd y'ayuc jadu'n nej jihuñy tza'ñ chüch.

¹⁴ Ooy ajcxy ycapxtigooyixy. Ooy ajcxy jibic ayuc capxcixy.

¹⁵ Müd yinjaty huenjatypi ayuc, mic'amy ymigüg yaj'o'ccixy.

¹⁶ Ma ajcxy yhuidity ooy midundigooyixy ymigüg, e nañ yecy ajcxy tajin mayin.

¹⁷ Ca' ajcxy nejhuñyixy nej huaad chinaaygixy jotcujc, ca' ma ti tzip ti capxy.

¹⁸ Ni cahuinmaaygixy nej Dios tzigüygixipy.

¹⁹ Tüg'óciy ayuc ycojaayity ma Dios ycõtujcin necy, mic'ajt müdpi müd yi jây ajcxy huidibi yajmij'ajtp je cõtujcin. Dios ti pidägy yi' ycõtujcin, jaydëbi pinjaty tundigooyb, huaad ca' ti anñi tuñ ma Dios. Dios ytiydunipy tüg'óciy jây ajcxy müd yi' ycõtujcin. ²⁰ Dios ca' capxpada'ñ co ytudägyity, müd co ti cuydunyii ycõtujcin. Dios ti pidägy ycõtujcin jaydëbi nejhuñyim co ajt nbocymüdity.

Yi alma nidzoocin, hue' yajpaady müd mibijcin

²¹ Jadachambi Dios xyajnejhuñyim jemybi tiy'ajt jadu'n nej tudägy'ajtin jëb nbaatim ma yi', e jada jemybi tudägy'ajtin tiy'ajt, ca' yi' yjadu'nity nej yi tiy'ajt huidibi yajpatp ma Dios ycõtujcin jecy'ajtpyi. Per yi Dios y'ayucnajtzcaxxiybi ñecy etz Dios ycõtujcin necy yejc tiy'ajt jecy'ajty co Dios xymõhuaanim tudägy'ajtin. ²² Jadu'n Dios yaj'ahuimbidaangixy tudägy tüg'óciy jây huidibi mibijcp Jesucristo, ca' ñejity pinjây ajcxy, pen judíoñy o pen ca' judíoñy ajcxy. ²³ Com nidüg'óciy naaxhuññy jây ti ytundigooyixy. Ni tüg jây yhuadz'ajtin ycanaybadyii müd Dios yhuadz'ajtin y'oy'ajtin. ²⁴ (Müd co nidüg'óciy jây ytundigooyixy), paady ycixpi Dios mijmay'ajt mij'oy'ajt tuñ ninigoob müd tüg'óciy jây ajcxy, e Jesucristo ti cojuydäy tüg'óciy ajcxy ypocy, e jadu'n yaj'ahuimbity tudägy nidüg'óciy jây ajcxy huidijaty mibijccixp Jesucristo. ²⁵ Dios yquejx y'ung ya naaxhuñ, jaydëbi huinmeecxip jây ajcxy ypocy, müd co Jesucristo ti y'ögy müd ajcxy ypocy ycixpi. Dios yhuinmeecxip jây ajcxy ypocy co ajcxy mibigipy Jesucristo. Jayijp ca'ni anajty Jesucristo miñ ya naaxhuñ, Dios ooy mimecxtujcy jây ajcxy, ca' anajty müdity jotcõduuyb jây ajcxy ypocy. ²⁶ Jadachambi xii tiempo Dios ti yaj'oyiy jadu'n nej jëb huinmeecxipy jây ajcxy ypocy, e jadu'n yaj'ahuimbidity

ajcxy tudägy ma yi' yhuinduu. Jadu'n Dios tuñ jigix ñiguëxigipy co Dios tudägy yi', e tudägy'adaanim yi', co cöbicy jäy, yi pinjaty mibijcp Jesucristo.

²⁷ ¿Ti huaad jäy ajcxy tungixy huidibi jëbi müd ñaygömayiib ma Dios? Ca' ni ti. ¿Na'amy co yjadu'nity? ¿Nej jëbi ajcxy ñaygömayiib müd co yajmij'ajtcixy Dios ycötujcin? Ca' yjadu'nity. Ca' huaad ñaygömayigixy ci'm, com Dios ti yaj'ahuimbity jäy ajcxy tudägy huidibi mijpidacp Jesús. ²⁸ Paady nmina'ñich co jäy ajcxy y'ahuimbity tudägy co ajcxy mibicy Jesucristo, e canan co janch ypaad jacuydungixy canaag cötujcin.

²⁹ ¿Nej miich ajcxy mdijcixy Dios ytuñ müd ac yi'yi judiojäy ajcxy, e ca' jacmüid pinjaty? Ca' yjadu'nity. Dios tuumb müd janch nidüg'óciy jäy ajcxy. ³⁰ Ji tügpaic Dios, e yi' tú'ciy ytuñ müd judiojäy, etz nañ jadu'n jacjadyii jäy ajcxy. Dios yaj'ahuimbijtaayb tudägy nidüg'óciy jäy ajcxy co ajcxy mibijccixy Jesucristo. ³¹ Co jadu'n nbaatim ndudägy'ajtin müd co nmibijcin Jesucristo, ca' nminaanim Dios anajty yi' ycötujcin je jecyip nyajcödigooyim. Hue' janchtiy ñigi anajty nmic'ajtmooyim Dios ycötujcin.

4

Je iixpejt huidi Abraham yejc

¹ ¿Nej n'ocminaanim? ¿Ti oybi ti paady ma Dios je Abraham iich ajt nmij'ap nmijteedy? ² Co ixyipy Dios Abraham tudägy ti ixy, müd co oybi ti tuñ, jëbi Abraham ixyipy ñaygömayii. Per ca' huaad ci'm ñaygömayii ma Dios. ³ Jadu'n jaybety ymiñ ma Dios ñecy ma jadu'n ymina'ñ: "Abraham ymijpidaaci Dios, e paady Dios jadu'n cöbicy Abraham jadu'n nej tüg tudägyjäy." ⁴ Je jäy huidibi ymuju'ñ patp müd ytung ycixpi, jada meen huidibi ymuju'ñ ajtpy ca' nigoo ñimöyii, hue' tim paatip jadu'n müd ytung ycixpi. ⁵ Yi jäy huidibi ca' jijp'ixy co tudägy'ajtin padañ ma Dios müd oy'ajtin ycixpi huidibi ytumyb, jëyi ymibijcipy ymijpidacpy co Dios yaj'ahuimbida'ñyii tudägy. Yi jadu'mbi jäy tudägy'ajtin ypadamy müd ymibijcin ycixpi. ⁶ Jaybety ymiñ ma Dios ñecy co je David jecy'ajty nimiydacy tüg jäy huidibi ooy anajty jotcuje ñayjihuiyii müd co Dios ti y'ixyii jadu'n nej jihuiy ytudägyjayity müd ymibijcin ycixpi, e ca' nminaanim müd oyjäy'ajtin ycixpi huidibi ytumyb. ⁷ David jadu'n ymina'ñ: Jotcuje je jäy ajcxy huidibi ypocy ti yhuinmecxyii, huidibi ypocy ti yajtigoyii.

⁸ Jotcuje je jäy huidibi Dios cöbicip jadu'n nej jihuiy ca' ypocy ymiidity.

⁹ ¿Nej janch tiy'ajt jadu'n co jada jotcuje'ajtin huidibi David ñimiydac jecy'ajty, co ac yi judiojäy yi' ajcxy padaamb midijaty müd tiy'ajt ma ñinix co Dios yjäy'adyii? Ca' yjadu'nity, yi jacjadyii jäy nañ jadu'n yi' ajcxy padañ jotcuje'ajtin. Ti nmināangixyich co Abraham ymibijci Dios, e Dios ycöbicip jadu'n nej jihuiy ytudägyity. ¹⁰ ¿Nej mdij Dios ycöbicip Abraham jayijp ca' anajty yajtiy'ajtiyñi? o ¿ti anajty yajtiy'ajtiy? Dios ycöbicip Abraham jadu'n nej jihuiy ytudägyjayity ca'ni anajty pidacy tiy'ajt ma ñinix co Dios yjäy'adyii. ¹¹ Jayijp anajty Abraham ti mibicy Dios, e ti anajty Dios ycöbigyii. Jac'axam Dios Abraham je cötujcin mooy co huen tiy'ajttihiipy y'ung etz y'ap y'oc. Je' je' iixpejt'ajtp co Dios anajty jayijp ti ycöbigyii jadu'n nej jihuiy ytudägyjäyity, ca'ni anajty ymöyii cötujcin. Co Dios jadu'n ytuñ müd Abraham jadu'n nipaady nej jihuiy Abraham nmijteedy'ajtim iich ajt nidüg'óciy huidibi cham mibijcp Jesús. ¹² Abraham nañ jadu'n ñimijteedy'ajtpy yi judiojäy huidibi mibijcp mijpidacp Dios tim jadu'n nej yi' mibicy anajty Dios, jayijp ca'ni anajty miidity tiy'ajt ma ñinix co Dios yjäy'adyii. Jadu'n nipaady nej jihuiy Abraham ca' nmijteedy'aty yi judiojäy huidibi ca' mibicy Dios.

Je huidibi Dios ti xyaj'ahuaniyim ti ycixy yca'px müd je mibijcin

¹³ Müd co Abraham etz y'ap y'oc ymibijcipy ymijpidacpy anajty ajcxy Dios, e paady anajty Dios yaj'ahuimbida'anigixy tudägy, e paady Dios nimay Abraham co yi naaxhuiñybi yi' ajcxy je' adaanip. Canan jadu'n ajcxy Dios ñimay co ymōhuaanigixy je naaxhuiñybi müd co anajty nidüg'óciy ajcxy ti cuydungixy Dios ycötujcin. ¹⁴ Co Abraham etz y'ap y'oc padaanigixy je naaxhuiñybi huidibi yaj'ahuaniyi, müd co ajcxy ti cuydundaayi Dios ycötujcin, paady naadig'ajtp ixyipy co nmibijcin co Dios xyaj'ahuimbidaanim tudägy. E nañ naadig'ajtp ixyipy co Dios je Abraham nimay: "Je naaxhuiñybi mūch je' mje'adaanip, com ti xymibicyich." ¹⁵ Je pinjaty mijpidaacp Dios ycötujcin je jecyip, Dios yi' tzaachytunaanip, com ca' cuydundaagyixy. Pinjaty ca' miidity Dios ycötujcin huidibi jaybetyip, ca' yi' midundigoogyixy jadayaabi cötujcin.

¹⁶ Müd co Abraham anajty Dios ti mibicy, paady ycixpi Dios ñimaayi co je naaxhuiñybi yi' je'adaanip. Jadu'n Dios may'ajt tuñ müd Abraham, jaydëbi tüg'óciy pinjaty mibijcp Dios, tim jadu'n nej Abraham mibijcy Dios, jëbi ajcxy paatcixy yi oy'ajtin huidibi Dios yajnimay Abraham co mōhua'ñ je oy'ajtin huidibi yegamyb ninigooobi. Dios ycuydunamyb yi' y'ayuc müd tüg'óciy jäy huidibi mibijcp Dios, tim jadu'n nej Abraham anajty mibicy Dios, canan y'yi judiojäy ajcxy padam oy'ajtin, com Abraham iixpejt yejc ma tüg'óciy jäy ajcxy. ¹⁷ Ma Dios yhuinduu jadu'n nipaady nej jihuiy Abraham iich ajt nmij'ap'ajtim

nmijteedy'ajtm nidüg'óciy huidibi mibijcp Dios, com Abraham nañ jadu'n ymibijcyp anajty Dios. Com jadu'n jaybety ymiñ ma Dios ñecy co Dios jecy'ajty jadu'n nimay Abraham: "ñich müich nyajñbijcyp co müich mnimij'ap'adamyb mnimijteedy'adamyb tüg'óciy je mayjáy huindu'mybi naax huindu'mybi cajp." E Dios ycuydunipy yi' y'ayuc com mic'ajt müid, ixti jaydëbi yajjugypigipy jadüg'oc jáy tübi y'óccixy. E nañ mic'ajt müid jaydëbi ane'min pidägy co huen yji'adipy huidijaty ca' ca'tni.

¹⁸ Müid co Dios anajty ti ñimäyii co ymiñ'adamyb may y'ap y'oc, paady ycixpi Abraham ti jijp'ixy anajty co Sara anajty y'ung'ixa'ñ. Canaag jimijt anajty jajijp'ixy co huen y'ung paadip. Ti anajty tiempo ñajxni mina y'ung'ixipy. Hue' Abraham ymibijc huidibi anajty Dios ti yajnimäyii co yi' müid'adamyb may'amy y'ap y'oc. Paady ti ni'ap'aty ti nideedy'aty may'amy y'ap y'oc. ¹⁹ Abraham ti anajty ymic'ajt ycixni com ti anajty ymijäyiyi. Ymiñ anajty migo'px jimijt, e nañ yi' ytöxyijc Sara ni tüg anajty ti yca'ung'ixy, per Abraham yjacmibijcyp anajty co Dios cuyduna'ñ y'ayuc müid yi'. ²⁰ Abraham ca' anajty ixmach yi ymibijcin jadu'n nej anajty Dios ymiñdity ymic'ajt jaydëbi cuydunip yi'y'ayuc. Chi Abraham iibaty capxpaty Dios. ²¹ Com Abraham ti anajty huinma'ñ ypidägy ma Dios co yi' ymiñ ymic'ajt jaydëbi ycuyduniyb yi' y'ayuc huidibi yaj'ahuaniy. ²² Com Abraham ymijpidaacip anajty Dios y'ayuc, paady Dios anajty ti cöbicy Abraham, e jadu'n anajty ti yajnaxy nej jihuüy ytudägyjyity.

²³ Dios ymoy Abraham jada y'ayuc huidibi jaybety, canan jëda'ajty Abraham yajmoy, nañ yajmoyday mayjáy. ²⁴ Nañ jadu'n jaybety miñ jada ayuc müid iich ajt ycixpi. Dios nañ xycöbigaanim jadu'n nej jihuüy ajt ndudägyjyity müid co nmibijcim Dios huidibi ti yajjugypijcy anajty jadüg'oc ajt nHuindzin Jesucristo. ²⁵ Dios ycíyec Jesús huen yaj'ögyii müid ajt nbocy ycixpi. E nañ Dios yajjugypijc Jesús jadüg'oc jaydëbi xyaj'ahuimbijtm tudägy ma Dios.

Je nejyhuimbizimni co Dios xycöbijcim tudägyjy

5

¹ Müid co nmibijcim nmijpidaacim ajt nHuindzin Jesucristo, paady Dios ti xyaj'ahuimbijtm tudägy. E müid co Dios ti xyaj'ahuimbijtm tudägy, paady jotcuje n'ijtm müid Dios. ² Co nmibijcim nmijpidaacim Cristo, chi nbaatim je may'ajt je oy'ajt huidibi Dios ytumyb müid iich ajt, e jadu'n oy n'ijtm müid Dios, ca' ma ti tzip. Nañ ooy njotcugüym, müid co njijp'ijxim co nbadaanim Dios y'oy'ajtm. ³ Canan jëda'ajty nmijotcuje'ajtm co nbadaanim Dios y'oy'ajtm, nañ jadu'n tzoc mijotcuje'ajtm ayo'n tzaachypi. Com nejhuüiyim co nminajxim nyajnajxim tzaachypi, huin'it jëbi nyajtunim mecxtujcin. ⁴ E co nyajtunim mecxtujcin, cömay najxim ma Dios, e co anajty cömay ti nnajxim, chi njijp'ijxim co nbadaanim oy'ajtm ma Dios. ⁵ Com njijp'ijxim co nbadaanim Dios y'oy'ajtm, chi ca' ndajim nmayim com Dios ti yi' yEspíritu Santo xy'adigüym xyjottigüym huidibi xyajnejhuüiyim jadu'n nej Dios xychojcin xyjihuüym.

⁶ Jecy'ajty co anajty ca'ni Jesucristo ymiñ, je naaxhuüijy ca' anajty mic'ajt müidity nej ci'm y'ahuimbijtcixipy tudägy. Co yhuaad'ajtni je xii je tiempo huidibi Dios ti yaj'ixtägy, huin'it Cristo y'o'cy müid iich ajt nbocy ycixpi müid co ndigooyim müid Dios yti'y'ajt. ⁷ Co ixipy n'ijxtaayim pinjaty codinähuij tüg jáy tudägyi ma yi o'cin, ca' ni pin nbaatim. Co ixipy n'ijxtaayim pinjaty codinähuaamyb tüg jáy huidibi ooy ycömayity ma yi o'cin, ca' yjecyity co nbaatim tüg metz. ⁸ Per Dios yajniquëxícyp jadu'n nej xychojcin xyjihuüym mijcajee co quejxy Cristo huen o'cy müid ajt nbocy ycixpi, oy anajty iich ajt ooy njacpocytuunim. ⁹ Cristo ti xyaj'ahuimbijtm tudägy co ñi'py ti temy ti yocy müid ajt nbocy ycixpi, e nañ Cristo nigi may'ajt tuna'ñ müid iich ajt ycixpi co anajty xyajnidzögaanim ajt n'alma, jadu'n nej Dios tzaachytuna'ñ naaxhuüijy müid ajcxy ypocy ycixpi. ¹⁰ Co anajty ca' Cristo ymiñi ya naaxhuüi, huin'it anajty nmidzip'ajtm Dios. Je tzip capxy ti Dios yaj'oyiy co quejxy y'ung ya naaxhuüi, e y'o'cy müid ajt nbocy ycixpi. Müid co Cristo xycodinaayim ma yi o'cin, paady nigi xypubejtm xypudigüym cham co yajpaady juugy. ¹¹ Canan jada'ajty co Jesucristo xyajnidzögaanim ajt n'alma, nañ jadu'n tzoc xondaacim müid co n'ijtm müid Dios, müid je may'ajt huidibi ajt nHuindzin Jesucristo ti tuñ müid iich ajt ycixpi co yaj'oyiy je tzip nej anajty Dios nmidzip'ajtm, jëbi jotcuje n'ijtm müid Dios.

Adán etz Cristo

¹² Müid jada ycixpi co yi pocytni chondacy jecy'ajty ya naaxhuüi müid tügpi jáy. E co jáy ytundigooy oga'n müid Dios, paady ycixpi je o'cin ytigüy ya naaxhuüi. Müid co tüg'óciy jáy midundigooyixy Dios, paady tüg'óciy jáy patcixy yi o'cin. ¹³ Janch tiy'ajt jadu'n co jáy ajcxy ytundigooy jecy'ajty jajijp ca'ni anajty Dios yecy yi' ycötujcin cojaaybi, e co ca' jáy anajty ajcxy cötujcin müidity jecy'ajty, paady ca'pin tiyduñ ajcxy nej ajcxy ytundigooy. ¹⁴ Ca' ñejity, oy ajcxy anajty ca' müidity Dios ycötujcin, nañ jadu'n y'o'tay ajcxy, chondacy müid Adán,

ixti yja'ty ma Moisés yxii ytiempo. Nañ o'ctay jây ajcxy huidibi tigachjaty tundigooy, ca' yjadu'nity neñ Adán oga'n ytundigooy. Ich ajt nninixc ymiid je jibicpi huidibi nbaatim ma Adán. Per ajt njemyjot njemyhuinma'n nbaatim ma Cristo.

¹⁵ Je pocytunii huidibi Adán yajtzondac, ca' naybadyii miid je tudägy'ajtin huidibi Dios ti xyñimooyim. Miid je pocytunii ycixpi huidibi tüg jây ti yajtzondägy, tüg'óciy jây öcin ti paady. Dios miid tüg yëydijc, je Jesucristo, mijmay'ajt tuñ miid jây ajcxy ycixpi co yaj'ahuimbijtcixy tudägy, chi mayjây tudägy'ajtin ti paady. ¹⁶ Per je tudägy'ajtin huidibi Dios xyñimooyim, ca' jadu'n naybadyii miid huidibi Adán ytuun. Miid co Adán ytundigooy tügtecy miid Dios, paady ycixpi mayjây o'cin ti paady miid tüg pocy ycixpi. Miid co Dios ti xyñimooyim tudägy'ajtin miid Jesucristo, paady mayjây tudägy'ajtin y'oy'ajtin ti patcixy huidibi mibijcp Cristo. ¹⁷ Miid co tüg jây capxycömidodacy Dios, paady tüg'óciy jây ti patcixy yi o'cin. Miid co tüg jây, je Jesucristo, may'ajt oy'ajt tuñ co xyaj'ahuimbijtim tudägy, paady tüg'óciy jây ajcxy huidibi mibijcp Jesucristo ypadaangixyp jotcuñ'ajtin etz nañ chinähuaangixy jiihy tzañpjoty ma Jesús y'ane'my.

¹⁸ Miid co tüg jây ytundigooy oga'n, paady nidüg'óciy je mayjây ypcocäy ajcxy, e patcixy yi o'cin. Nañ tim jadu'n miid tüg jây huidibi ti chinäy tudägy, Dios mayjây yaj'ahuimbijty ajcxy tudägy, e ti patcixy yjugy'ajtin huidibi ca' ycixipy ytigoyipy nimina xii. ¹⁹ Miid co tüg jây capxycömidodacy Dios, paady tüg'óciy jây ti patcixy je pocy. Nañ miid co tügpi jây capxymidoy Dios, paady je mayjây tudägy'ajtin ti patcixy huidibi mibijcp Jesucristo.

²⁰ Co Dios moy jây ajcxy yi' ycötujcin huidibi cojaayip, chi nigi jây ajcxy nejhuuiygixy co ypcotyungixy. Je may'ajt oy'ajt huidibi Dios ytumyb, nigi yi' y'oyity, ca'ydí je mijpocy huidibi jây ajcxy ytungixyp. ²¹ Tim jadu'n nej co jây ypcotyungixy, huin'it ajcxy pocymiid chinaaygixy, ixti mabaad anajty y'öccixy miid ypocy ycixpi. Nañ tim jadu'n co Dios may'ajt tuuñ co yaj'ahuimbity jây ajcxy tudägy, huin'it Dios ane'my yi' ajcxy chinaayin miid tudägy huinma'n, etz nañ xymöhuaanim jugy'ajtin huidibi ca' ycixipy ytigoyipy nimina, co nmijpidaacim ajt nHuindzin Jesucristo huidibi yjugy'ajtin yejc miid ajt nbocy ycixpi.

O'cy miid yi pocy ycixpi, jugy'aty miid Cristo ycixpi

6

¹ ¿Nej n'ocminaanim? ¿Tzoc ooy nigi tundigooyim jigix Dios nigi may'ajt tunipy miid ich ajt? ² Ca' jadu'n ytiy'ajity, ca' huaad njacpocytuunim. Co nmibijcim Jesucristo, chi jadu'n nipaady nejhuuiy ti n'o'cim, e cham ca' n'ijtim pocymiid. ³ ¿Nej ca' mnejhuuiygixy jada tiy'ajt? Co nmibijtim miid Jesucristo yxii, chi n'ijtim miid Jesucristo. Jadu'n nipaady nej jihuuiy ti n'o'cim quipxy miid Cristo co yi' y'o'cy miid ajt nbocy ycixpi. ⁴ Co ich ajt nmibijtim jadu'n nipaady nej jihuuiy ti n'o'cim, e ti nnaaxtigiiyim quipxy miid Jesucristo. Dios Teedy miid ymic'ajtin oybi yajjugypijcy Cristo co anajty ti y'ögy, chi Cristo paty jemybi jugy'ajtin, nañ jadu'n ich ajt ti nbaatim jemybi jugy'ajtin quipxy miid yi', paady copicy ndzinaayim miid jemybi jot jemybi huinma'n.

⁵ Co nmibijcim Jesucristo, chi n'ijtim miid yi', co yi' ti y'ögy, jadu'n nipaady nej jihuuiy ti n'o'cim quipxy miid yi'. Co Jesucristo yjugypijcy miid jemybi yjugy'ajtin, nañ jadu'n ich ajt nbaatim jemybi jugy'ajtin quipxy miid yi'. ⁶ Nejhuuiyim ich ajt nej anajty jibic-jot jibic-huinma'n nmiiid'ajtim jayijp'aty ca'ni anajty nmibijcim. Jadu'n nipaady nej jihuuiy ajt njibicjot njibic-huinma'n ti y'ögy quipxy miid Cristo co yi' y'o'cy cruudzciy. Cristo ti y'ögy miid ajt nbocy ycixpi, jigix jëbi n'ijxmajtzim pocytunii huinma'n, etz jigix jëbi je pocytunii ca' xyjac'ane'mim ajt njot nhuinma'n. ⁷ Com pinjaty ti y'ögy, yi' ypcotyunii ca' ti mic'ajt jacmidity ma yjot yhuinma'n. ⁸ Pen jadu'n nipaady nej jihuuiy ti n'o'cim quipxy miid Cristo, paady ndzinähuaanim njugy'adaanim quipxy miid yi'. ⁹ Nejhuuiyim co Cristo ti yjugypijcy co y'o'cy, e ca' yi' y'öga'n jadüg'oc. Yi' o'cin ca' ti mic'ajt jacmidity ma Jesucristo. ¹⁰ Co Cristo ti y'o'cy miid jây ypocy ycixpi, chi y'ögy tüg teczpayc miid nidüg'óciy jây ajcxy ycixpi. Co Jesucristo yjugypijcy, chi tüg'óciy huidibi yi' ytumyb ma yi' chinaydac yjugy'ajttac, yi' ytumyb miid Dios ycixpi. ¹¹ Nañ jadu'n miich ajcxy mhuinma'ñpidaaccix jadu'n nej jihuuiy ti m'öccixy, e yi' ypcotyunii ca' ti mic'ajt jacmidity ma miich ajcxy mdzinaayin. E jadachambi xii tiempo tzinaaygix miid Dios ycixpi quipxy miid Jesucristo ich ajt nHuindzin.

¹² Paady ycixpi ca' huaad xy'ane'mgixy je jibic-huinma'n huidibi ajcxy mninixc yjani-jot'ajtpy. ¹³ Ca' huaad mgíeyecixy yi' mninixc ma pocytunii. Naygiyéjigix ma Dios, ixmajtcix yi' pocytunii. Jadu'n nipaady nej jihuuiy ti m'öccixy, e ti mjugypijccixy jadüg'oc. Hue' janchtiy ciyecix yi' mninixc ma Dios, jaydëbi mdzinaaygixipy miid ajcxy tudägy mjot mhuinma'n, e cuydungix Dios chojcin. ¹⁴ Jadachambi xii tiempo ca' miich ajcxy mdzinaaygixy pocymiid, jadu'n nej jecy'ajty ajcxy mdzinaaygixy co anajty ajcxy mguydungixy Dios ycötujcin je jecyip. Hue' janchtiy tzinaaygix miid Dios ycixpi, com Dios mij may'ajt ti tuñ miid miich ajcxy.

Tüg iŋxpejt huidibi yajpatp ma n'ijtim yajtuñ

¹⁵ ¿Ti huaad nduunim? ¿Nej jēbi huaad njacpocytuunim? Com Dios mijmay'ajt ti tuñ co ti jōch ajt nbocy etz nxihuñ, e Dios ycōtujcñ, je jecyip, ca' xyjacyajpocycāhuim. Ca' huaad njacpocytuunim. ¹⁶ ¿Mnejhuñyib miich ajcxy jada tiy'ajt? Co ixyipy pinjaty ñaygiyegyii co ytunañ miid tüg huindzin huidibi mic yajtumb, copicy co je tumbi capxymidohuipy je yhuindzin. Nañ tim jadu'n nipaady miid pocytunü. Pen mnaygiyəcip miid pocytunü, huin'it anajty pocy xy'ane'my ma mdzinaayin, ixti mabaad anajty m'ōgy miid mbocy ycixpi. Co mnaygiyəcigixipy ma Dios, huin'it ajcxy mgapxymidohuipy Dios, e mdzināhuip ajcxy tudägy. ¹⁷ Jecy'ajty miich ajcxy anajty pocy xy'ane'mgixy, co jibic-huinma'ñ mdungixy. Nyajnajxpyich jäygidaacin ma Dios co jadachambi tiempo ti mgōbijccixy cixyjot huinijot Dios ytiy'ajt huidibi xyaj'ixpijccixp, e mgapxymidoogixy Dios. ¹⁸ Cristo ti xyaj'a'oyñyi ajcxy mjot mhuinma'ñ, ca'ydi mjactzinaaygixy pocymiid. Ti mhuinma'ñ mbidaaccixy co mgapxymidohuaangixy Dios e mdzināhuaangixy tudägy. ¹⁹ (Ngapxhuijpyich miich ajcxy cham miid naaxhuñjyāy y'ayuc ytiy'ajt, com ca' yajxon mhuinjihuñyigixy Dios y'ayuc ytiy'ajt.) Jadu'n nej jecy'ajty co ca' anajty mmibijccixy Cristo, ooy anajty mnaygiyəcigixy xii ya ma jibic-huinma'ñ, e mdundigooygixy xii ya miid mninixc. Ooy miich anajty ajcxy miidity jibicpi ma mjot mhuinma'ñ, ooy anajty mdundigooygixy. Jadachambi xii tiempo naygiyəcixy ma Jesucristo, jigix jēbi huaad mdungixy miid tudägy jot tudägy huinma'ñ, etz jigix jēbi huaad mdzinaaygixy miid huädz jot huädz huinma'ñ.

²⁰ Co anajty yi jibic jot jibic-huinma'ñ xy'ane'mgixy, chi ca' je oyjot oyhuinma'ñ anajty xy'oc'ané'mgixni. ²¹ ¿Ti jotcujc'ajtin miich ajcxy ti mbaatcixy co jibic jot jibic-huinma'ñ mdungixy huidibi jadachambi tiempo mdzōydu'n'ajtip ajcxy? Yi jibic jot jibic-huinma'ñ xyyajnixcp ajcxy ma yi o'cin. ²² Jadachambi xii tiempo Dios ti yaj'oyñy nej jēbi m'ixmajtzicixipy yi pocytunü, ca' huaad mjactzinaaygixy pocymiid. Ti m'ahuimbijtcixy Dios ytumbi, jadayaabi tzinaayin xymōhuip ajcxy mjotcujc'ajtin. Tiydudägy cham tzinaaygix miid Dios ycixpi, e mbaadip ajcxy jugy'ajtin huidibi ca' ycixipy ytigoyipy nimina. ²³ Yi pocytunü ycoju'n'yi'je' yi o'cin. Per je huidibi Dios xyñimooyim, hue'je' je jugy'ajtin huidibi ni caminaxii ycixipy ytigoyipy co n'ijtim miid ajt nHuindzin Jesucristo.

7

Tüg iŋxpejt huidibi yajpatp ma picychinaayin

¹ Miich ajcxy migügtijc huidibi ti m'ixpicy Dios ycōtujcñ huidibi Moisés yjaay, mnejhuñyib miich ajcxy co yi naaxhuñjyāy ycōtujcñ ymiid mic'ajt ma ajt ndzinaayin, ixti mabaad anajty n'o'cim. ² Paady co tüg töxyjāy ycivilbicy miid tüg yēydijc, ca' huaad izmach ñay mabaad china'y yjugy'aty. Co janchtiy anajty je töxyjāy ñiyēydijc ti y'ōcni, huin'it anajty ca' ocmiidiñ ñay y'ane'min. ³ Ooy anajty mij ytundigoy je töxyjāy co ypigipy miid huingbi yēydijc pen jugy'ajtni je ñay. Cooni janchtiy anajty ñiyēydijc ti y'ōgy, huin'itni janchtiy jēbi ypicy miid huingbi yēydijc, e ca'p'je' anajty ytundigoy.

⁴ Miich ajcxy nmigügtijcñ, judiojāy huidibi mibijcp Cristo, jayijp co anajty ca'ni mmibijccixy Cristo, je Dios ycōtujcñ huidibi Moisés yjaay xy'ane'mgixp anajty ma mdzinaayin. Jadachambi xii tiempo yi jadu'mbi cōtujcñ ca' yi' xyjac'ané'mgixni. Jadachambi Cristo ytiy'ajt xy'ane'mgixp, je Cristo huidibi Dios yajjugypijc jadüg'oc co y'o'cy. Jadu'n miich ajcxy nipaady nej je töxyjāy huidibi ñiyēydijc ti y'ōgy, e ti ypijctigach. Cristo miich ajcxy xyñigohuajc'ajtp, jigix jēbi mdzinaaygixy miid Dios ycixpi. ⁵ Jayijp ca'ni anajty nmibijcim Jesucristo ooy anajty nguyduunim huidibi ajt nninixc ñijot'ajt. Je huin'it tiempo anajty je jibic-huinma'ñ xy'ane'mim ma ajt ndzinaayin. Je'je' je jibic-huinma'ñ huidibi Dios xycapx'adujcim miid ycōtujcñ. Miid co jibic-huinma'ñ xy'ane'mim anajty ajt ma mdzinaayin etz xyajnixcaanim anajty ma yi o'cin. ⁶ Jadachambi xii tiempo Dios ycōtujcñ huidibi Moisés xymooyim, ca' ti mic'ajt miidity ma iich ajt, ti n'ixmajtzim. Jadu'n nipaady nejhuñy ti n'o'cim, e njugypijcim jadüg'oc. Paady nguyduunim je jemybi tyi'ajt huidibi je Espiritu Santo xyajnejhuñyim. Canan je' anajty nguyduunim je jecy'ajtpy cōtujcñ.

Je pocy huidibi ijtp ma iich

⁷ ¿Nej n'ocminaanim? ¿Nej janch co je cōtujcñ huidibi Moisés xymooyim xyajpocytuunim anajty? Ca' yjadu'nity. Co ixyipy ca' anajty nmüdidyich Moisés ycōtujcñ, ca' ixyipy iich ti mnejhuñyich co ti ndundigooyich ma Dios ytiy'ajt. Co ixyipy anajty ca' n'ocnejhuñyich Moisés ycōtujcñ ma jadu'n yminañ: "Ca' mmigüg ni ti m'adzojciy." Ti ixyipy ndundigooyich, e ca' ixyipy nejhuñyich ma ti ndundigooyich. ⁸ Miid co iich jecy'ajty ooy anajty nni-jot'atyich pocytunü, paady ycixpi iich anajty ooy ndundigooyich. E jadu'n anajty nigi ooy n'adzojyich, e jaminam anajty Dios ycōtujcñ co ca' migüg ni ti m'adzojciy. Co ixyipy Dios ca' jadu'n cōtujcñ ti pidägy, ni ca' ixyipy njihui'ñybicyich co ndundigooyich. ⁹ Jayijp co ca'ni anajty nhuinjihuñyich Dios ycōtujcñ, huin'it tiempo ca' anajty njihui'ñybicyich

nbocy. E co nbatyich Dios yčotujcin, chi njihui'nybijcyich nbocy, e nañ ti nejhuĩyich co tigoyaamich njugy'ajtin. ¹⁰ Dios ypidac yčotujcin jaydēbi nbāadibich jugy'ajtin huidibi ca' ycixipy ytigoyipy. Per ca' jadu'n ti oyĩy müd iich. Yi čotujcin ti xyajpocycāyich anajty, e jadu'n tigoyaambich anajty njugy'ajtin. ¹¹ Jadu'n anajty huinma'ñ nmādidyich co nguydundāhuaamybich Dios yčotujcin huidibi Moisés yjayhu'i'm. Pero com ca' njatyich nej nguydundāhuibych, chi nbocyāyich ma Dios. Je pocytunii ti xyhuin'ñiich, e müd je' ycixipi nbadaamybich anajty yi o'cin.

¹² Tüg'óciy Dios yley etz Dios yčotujcin huidibi cojay ijtp, huādz yi', tudāgy yi', ooy yi'. ¹³ ¿Nej tigoyaambich anajty njugy'ajtin müd co anajty nmi'ityich Dios oybi čotujcin? Ca' yjadu'nity. ¿Nej je Dios yčotujcin je oybi ti huimbizimy jibic müd iich co xyajtigoyaanich anajty njugy'ajtin? Ca' yjadu'nity. Nicxpich anajty ma yi o'cin müd nbocyich ycixpi. Je Dios yčotujcin xyajnejhuĩyich co o'cin nbadaamybich müd nbocyich ycixpi. Jadu'n Dios pidacy yčotujcin ya naaxhuin', jigix jēbi jāy ajcxy nejhuĩhuipy co mij ajcxy ooy ytundigooy müd Dios.

¹⁴ Nejhuĩyim co yi Dios yčotujcin huidibi Moisés xymooyim, jiiby yi' choon ma Dios, paady yi' ooy y'oyity. Iich nninix yi' je' huidibi nijot'ajtp yi' pocytunii, paady ndzināyich pocymüd. ¹⁵ Ca' nhuinjihuĩyich huidibi ndumyich. Yi oybi huidibi njatunaamybich, ca' njatyich nej ndunipyich. Yi jibicpi huidibi ca' y'oychojcnity, yi' ndumyich. ¹⁶ Co nduñich huidibi ca' ndzocyich, jadu'n niquēxgy co Dios yčotujcin ooy oy yi', tudāgy yi'. ¹⁷ Canan jotcujc iich jadu'n co nbocytuñich. Yi pocy'adzojcin huidibi nmüich ma njot nhuinma'ñ, yi' yi' xyajtundigooybich. ¹⁸ Nejhuĩyibich co ca' ti oybi yajpaady ma iich nninix. Ooy njatzocyich co oybi njatuna'ñich, per ca' njatyich nej oybi ndunipyich. ¹⁹ Je oybi huidibi njatunaamybich, ca' njaty nej ndunipyich. Je jibicpi huidibi ca' ndzocyich, je' ndumyich. ²⁰ Co yi' nduñich huidibi ca' ndzocyich, yi' je' je' pocytunii huidijaty njot'ajtibich nhuinma'ñ'ajtibich, yi' xyajtundigooybich.

²¹ Nbaatpich tüg tiy'ajtp, co njatunaamybich oyhuinma'ñ, jiipy jibicpi nbaadyich ma njot nhuinma'ñich. ²² Jotjoty huinma'ñjoty ooy nmixondāgyich Dios yčotujcin. ²³ E nañ müdich jotjoty huinma'ñjoty yi' jibicpi huidibi mi'ijxtinaayb je oybi. Yi tundigoyi yajpatp ma iich nninix. Yi nninixich yajpatp pocymüd.

²⁴ Paady ca' njotcujcigyich. ¿Pin jēbi xyñihua'ñich xyajnidzögibich ma jadayaab nninixich huidibi xyajnicxpich ma yi o'cin? ²⁵ Dioscojuyip nyajnajxpyich ma Dios co Dios, müd ajt nHuindzin Jesucristo, xyñihuaanim ma jada jibicpi huidibi ajt nninix xyñi'jot'ajtm. Paady müd n'oyjot n'oyhuinma'ñ nguyduñich Dios yčotujcin. Müd nninixich nijot'atyich pocytunii.

8

Je jugy'ajt müd je Dios yjihui'ñ ymic'ajt ycixpi

¹ Jadachambi tiempo janchity Dios ca' tzaachytuna'ñ yi jāy ajcxy huidijaty tú'ciy ijtp müd Cristo Jesús, huidibi ajcxy cuydumb Espíritu Santo chojcin, e ca' ajcxy tungixy nej je ninix nijot'ajtcixy. ² Je Espíritu Santo ti xyajpidzimim ma yi pocytunii etz ma yi o'cin huidibi yi jecy'ajty čotujcin ti xymooyim. Je Espíritu Santo xyajtzinaayim huinixii, iich ajt huidibi ijtp tú'ciy müd Jesucristo. ³ Müd co iich ajt ooy ninix nijot'aty jibicpi, paady Dios xymooyim yčotujcin jecy'ajty jaybety. Per je naaxhuĩñjāy yajtigoy ajcxy je čotujcin ymajaa, e ca' ymadacy nicxy xyajtzinaayim müd tudāgy jot huinma'ñ. Paady Dios yquejxy yci'm'ung huidi ti chināy ya naaxhuĩñ müd ñinix jadu'n nej iich ajt nmüity nninix, jigix jēbi ndzināayim müd huādz jot huinma'ñ. Jadu'n Dios y'ung chinay müd ñinix, per ca' ni ti bocy anajty müdity. E yi' ti y'ögy müd ajt nbocy ycixpi, e jadu'n yajtigoy je pocy huidibi ajt ngix'ajtm. ⁴ Jadu'n Dios ytuuñ jigix jēbi xyajtzinaayim müd tudāgy njot tudāgyhuinma'ñ jadu'n nej yi' yčotujcin y'ane'my. Müd co nmüid'ajtm Dios yjihui'ñ ymic'ajt ma ajt njot nhuinma'ñ, paady jēbi huaad ndzināayim müd tudāgy-jot tudāgy-huinma'ñ.

⁵ Yi jāy ajcxy huidibi ca' müdity Dios yjihui'ñ ymic'ajt ma yjot yhuinma'ñ, hue' ajcxy ycapxymidooyb je jibicpi huidibi ajcxy ñinix ñijot'ajtpy. Yi jāy ajcxy huidibi tzinaayb müd Dios yjihui'ñ ymic'ajt ma yjot yhuinma'ñ, hue' ajcxy ycapxymidooyb je Espíritu Santo. ⁶ Yi jāy ajcxy huidibi capxymidoob je jibicpi huidibi ajcxy ñinix ñijot'ajtpy, hue' ajcxy ypadaangixyp o'cin. Yi jāy ajcxy huidibi capxymidoob je Espíritu Santo, hue' ajcxy ypadaangixyp jugy'ajtin huidibi ca' ycixipy ytigoyipy, etz nañ ypadaangixyp jotcujc'ajtm. ⁷ Yi jāy ajcxy huidibi capxymidoob je jibicpi huidibi ajcxy ñinix ñijot'ajtpy, hue' ajcxy Dios ymidzip'ajtpy, ca' capxymidohuaangixy Dios yčotujcin. Ni ca' jajtcixy nej ajcxy capxymidogixipy Dios yčotujcin. ⁸ Ca' Dios jāygidāgy yi' ajcxy chinaayin huidibi ajcxy capxymidoob je jibicpi huidibi ajcxy ñinix ñijot'ajtpy.

⁹ Per müich ajcxy ca' mgapxymidoogixy je jibicpi huidibi nninix nijot'ajtpy. Com müich ajcxy nmüid Dios yjihui'ñ ymic'ajt ma mjot mhuinma'ñ, e mguydungixpy je Espíritu Santo

chojcin. Huenpinity huidibi ca' müdity Cristo yjihui'n ymic'ajt ma yjot yhuinma'n, ca' yi' y'ity müd Cristo. ¹⁰ Pen müich ajcxy ijtp müd Cristo, yi' mjugy'ajtin ajcxy ca' ycixipy ytigoyipy nimina, müd co Cristo ti xyaj'ahuimbijtcixy tudägy ma Dios yhuinduu. Yi' mnaaxnïc xixamb tigoyamb yi'. ¹¹ Pen ijtp ma müich ajcxy mjot mhuinma'n je' yjihui'n ymic'ajt je huidibi yajjugypijc jadüg'oc je Cristo co y'o'cy. Nañ jadu'n müich ajcxy Dios xyajjugypigaangixy jadüg'oc, co anajty ti m'öccixy, müd yi' yjihui'n ymic'ajt huidi yajpaatp ma müich ajcxy mjot mhuinma'n.

¹² Müd co nmüid'ajtim Dios yjihui'n ymic'ajt paady ycixpi, müich ajcxy migügtijc, copicy ngapxymidoohuim je Espíritu Santo, e ca' huaad ngapxymidoohuim je jibicpi huidibi ajt nninïc ñijot'ajtpy. ¹³ Pen ooy ajcxy xytim'yane'mgixy je jibicpi huidibi ajcxy nmünïc ñijot'ajtpy, co m'öccixipy, yi' mjugy'ajtin cixip tigoyip yi'. Per pen müd Dios yjihui'n ymic'ajt müich ajcxy mayajigoy je jibicpi huidibi nmünïc ñijot'ajtpy, co m'öccixipy, yi' mjugy'ajtin ajcxy ca' yi' ycixipy ytigoyipy.

¹⁴ Tüg'öciy pinjaty ajcxy capxymidoob je Espíritu Santo, Dios yi' ung'ajtp ajcxy. ¹⁵ Je Espíritu Santo huidibi müich ajcxy xy'adigüygixp xyjottigüygixp, ca' xychaachtungixy e nañ ni ca' mdzinähuangixy müd tzig'iñ jihu'iñ. Ca' müich ajcxy jadu'n paady nej tumbidijc huidibi ooy tzigüygixy yhuindzin. Co je Espíritu Santo yajpaady ma ajcxy mjot mhuinma'n, jadu'n nipaady nejihu'y müich ajcxy Dios xy'ung'adyii. E com nmüid'ajtim Dios yjihui'n ymic'ajt, je' jadu'n xyajminaanim: "¡Dios Teedy!" ¹⁶ Je Espíritu Santo tiy'ajt yejcp ma ajt njot mhuinma'n, je' jadu'n xyajminaanim co Dios xy'ung'ajtim. ¹⁷ Pen iich ajt Dios xy'ung'ajtim, chi nbadaanim it lugar quipxy müd Cristo jüby tzajpjoty ma Dios yajpaady. Pen nmünajxim nyajnajxim tzaachypi jadu'n nej Cristo minajxy yajnaxxy tzaachypi, chi nbadaanim Dios y'oy'ajtin quipxy müd Cristo.

¹⁸ N'a'ixüybich co yi' tzaachypi yi' ayo'n huidibi nmünajxim nyajnajxim ya naaxhuiñ, ca' yi' ytim tüitijty, ca' niney yquipxyjatytyi je oy'ajtin etz mijjotcujc'ajtin huidibi Dios xyaj'ixaanim je huin'it xii co Cristo anajty ymüñ jadüg'oc. ¹⁹ Tüg'öciy tijaty ya naaxhuiñ huidibi Dios ti yajcojy yaj'oyüy, y'aa'ijxpy yjijp'ijxpy ajcxy mina Dios ymöhüaanigixy y'oy'ajtin ymüñ'ajtin yi' jay ajcxy huidibi ajcxy Dios ung'ajtp. ²⁰ Tüg'öciy tijaty Dios ti yajcojy yaj'oyüy ya naaxhuiñ, hue' je' yjugy'ajtin cixamb tigoyamb, ögam tädzam. E canan ci'm jadu'n tzocy, hue' je' Dios jadu'n ti yajniödügüy. Per ca' yjugy'ajtin ycixipy ytigoyipy tu'ciyi hue' ajcxy y'aa'ijxpy yjijp'ijxpy co padaangixy oy'ajtin jadüg'oc. ²¹ Co anajty Dios yaj'oyüy nej jëbi ajcxy chinaaygixy, e ca' y'öccixipy, ca' ytiitzcixipy, etz ca' ypügixipy, chi ajcxy padaangixy oy'ajtin etz jotcujc'ajtin quipxy müd je jay ajcxy huidibi Dios ung'ajtp. ²² Com nejhuüym co ixti chambaad tüg'öciy huidijaty Dios yajcojy yaj'oyüy ya naaxhuiñ yjihuiyb tzaachypi, e ca' yjotcujc'ajtcixy. Tim jadu'n nipaady nej tüg töxyjy paady tzaachypi co yhuaad'ajtni mina y'ung yajma'xung'ada'n. ²³ Canan yi' naaxhuiñybi huidi Dios yaj'oyüy yi'yi tzaachypi jihuiyb, nañ jadu'n iich ajt huidijaty müd'ajtp Dios yjihui'n ymic'ajt, huidibi Dios xymooyim yajijp'aty ca'ni anajty nyajtigajtim nmünïc. Nañ iich ajt tajim mayim njüym nyaaxim ixti cooni anajty Dios xyajtigadzaanim ajt nmünïc etz xycöbiganim ma yi' y'it jüby tzajpjoty, e xymüid'idaanim ajt jadu'n nej yci'm'ung. ²⁴ Müd co n'aa'ijxim njijp'ijxim co Dios xyajniözügaanim ajt n'alma, paady ti nbaatim jugy'ajtin huidibi ca' ycixipy ytigoyipy. Co ixipy ti nbaatim huidibi anajty njijp'ijxim, ca' ixipy njacjijp'ijxim co nbadaanimni. Com ca' pin jacjijp'ijxim co padaanim je huidibi ti ocpatpi. ²⁵ Per co njijp'ijxim co nbadaanim huidibi ca' nmüid'ajtim, huin'it n'ahuixim müd mecxtujcin cooni nbaatim.

²⁶ Tim jadu'n nej jotcujc'ajtin nbadaanim co njijp'ijxim huidibi Dios xymöhuaanim, nañ tim jadu'n je Espíritu Santo xypubejtim xypudigüym co njotmetzcüym, com ca' njajtim nej jëbi huaad Dios nmüibjctzoohuim nej ypadüi. Paady je Espíritu Santo xycodüaanim ma Dios, ymüibjctzooyb je Dios mictägy müd iich ajt ycixpi müd jüym yaaxin, huidi ca' huaad yajcapxpizim müd mydacin. ²⁷ Dios nejhuüyb ti jot ti huinma'n jay ajcxy ymüid. E Dios nañ huiñjhuüyb tüg'öciy ayuc huidibi je Espíritu Santo yajnaxyp ma yi'. Je Espíritu Santo ypijctzooyb may'ajt jabom ma Dios müd tüg'öciy je müibjcpidijc ycixpi. Nañ jadu'n pijctzoy jadu'n nej Dios tzocy jaygidägy.

Mij madaacin ma müibicin

²⁸ Yi' jay ajcxy huidibi müjpädap Dios, huidibi ajcxy Dios ti huin'ixy, jëbi chinaaygixy jadu'n nej Dios jaygidägy ajcxy chinaayin. Nejhuüym co huentimtüitijty huidibi yi' ajcxy ymajnxpy yajnaxpy, pen jibicpi o pen oybi, Dios jadu'n ti a'ixy co huen minajcixy yajnaxcixy müd yi' ajcxy y'oy'ajtin ycixpi. ²⁹ Je' yi' ajcxy huidibi Dios ti yhuin'ixyüi, je' yi' ajcxy huidibi Dios nejhuüy yajijpni co ymübiga'nyii y'ayuc. Dios jadu'n tumb ma yi' ajcxy yjot yhuinma'n jaydëbi yquipxyjatytyi ajcxy yjot yhuinma'n müd Dios y'ung, jadu'n nej yi' yjot yhuinma'n müdity. ³⁰ Yi' mayjy huidibi Dios yajniödügüy ca'ni anajty naaxhuiñybi chondacy co ytuna'n müd yi', yi' ajcxy Dios huin'ixi. Yi' mayjy huidibi Dios ti yhuin'ixigixy, nañ Dios

yi' ajcxy yaj'ahuimbijitp tudägy. E yi mayjây huidibi Dios ti yaj'ahuimbity tudägy, nañ Dios yi' yajquixyatytihuaanip ajcxy y'oy'ajtin müd yi' y'ung y'oy'ajtin.

³¹ ¿Ti jada' njacjijp'ixim ti jada' njactzojcm? Ca' ni ti. Pen Dios ñich ajt xypubejtim xypudigüiyim, ¿pin ñich ajt jëbi xymimadaacim? Janch ni ca pin. ³² Dios ixti yci'm'ung ti yecy müd ñich ajt ycixpi, co oy y'o'cy müd ñich ajt ycixpi, co oy y'o'cy ma yi cruudz müd nidüg'óciy ajt nbocy ycixpi. Paady janch janch co Dios xymóhuaanim tüg'óciy oybi quipxyjaty müd yi' y'ung, Jesucristo. ³³ ¿Pin jada' jëbi ocxíy je jây ajcxy huidibi Dios ti huin'ixy? Ca' ni pin. Com Dios ci'm yi' ti yaj'ahuimbijitây tudägy. ³⁴ ¿Pin yi' ajcxy jëbi ocyajpocycây? Ca' ni pin. Com Cristo o'c je' müd ajt nbocy ycixpi, etz yjugypicy jadüg'oc, e jadachambi xii tiempo yajpaady a'oy'amy ma Dios ymijc, e yi' ane'mdaayb tüg'óciy. E Cristo ñich ajt xyñibijctzohüiyim, ypijctzooyb may'ajt ma Dios müd ñich ajt ycixpi. ³⁵ Com Cristo ooy xychojcm xyjihuiiyim, paady ni nej ca' xy'ixmadzaanim. Huen ti ndimpaatim ca' xy'ixmadzaanim. Oy ixipyi tzaachypí ayo'n nmínajxim nyajnaxim, oy ixipyi tajin mayin nbaatim; oy ixipyi jây xy'ixhuidijtim xypahuidijtim; oy ixipyi yuu ayo'n nbaatim; oy ixipyi huit tucxy nyajmayajtim; oy ixipyi tzig'iñ nyajnaxim; oy ixipyi jây xytimyyaj' o'cim. Oy ti ayo'n ndimbaatim, Cristo ca' xy'ixmadzaanim. ³⁶ Com jadu'n ymiñ jaybety ma Dios ñecy ma jadu'n yminañ:

Müd miich, Huindzin Dios ycixpi, je nmidzipich xyjatytimyyaj'ógaambich xim tzuum.

Jadu'n ñich ajcxy nej cöbixy huidibi yajnicxip ma yaj'óctac co yaj'óga'ñi.

³⁷ Ca' ti ayo'n nbadaanim. Nmimadactáhuaanim tüg'óciy ayo'n, müd co Cristo xychojcm xyjihuiiyim. ³⁸⁻³⁹ Janch nejhuiybich tiydudägy co Dios xychojcm xyjihuiiyim. Ca' ji ni pin jëbi huaad xypijc-huäcxim ma Dios chócin, oy ixipyi nja'o'cim; oy ixipyi njajugy'ajtim; oy ixipyi xymidzip'ajtim ángel ajcxy etz jacyadyi huidibi mic'ajt müd jilby tzajpjoty. Ca' ajcxy jëbi huaad xypijc-huäcxim ma Dios, ni ti huidibi ji ijt cham, ni je huidibi mimb cidacp, ni yi' jëbi xycapijc-huäcxim ma Dios chojcin. Ajt nHuindzin Jesucristo ti xyajnejhuiiyim jadu'n nej Dios xchojcm xyjihuiiyim co y'o'cy ma yi cruudz müd ajt nbocy ycixpi.

9

Dios ti huin'ixy yi Israel jây ajcxy

¹⁻² Nmüdich je Cristo ytiy'ajt, nyajnijayiybich miich ajcxy yi' ytiy'ajt, ca' n'indägyich, co ooy ndajy nmayich müd n'amigügtijcch ycixpi je Israel jây co ajcxy ca' cöbiga'ñ je Cristo. Nañ Dios yjihui'ñ, je Espíritu Santo, tiy'ajt yejcp ma ñich njot nhuinma'ñ co jadu'n tajin mayin njihuiyich müd yi' ajcxy ycixpi. ³ Com taty may nyajihuiyijich müd ñich n'amigügtijcch, ñich nmigogajp, ixti njaccodináhuaamybich ajcxy ma Dios müd ypocy ycixpi, ixti jëbi ixipyi Cristo nja'ixmachich müd yi' ajcxy ycixpi, ixti jëbi ixipyi Dios xychaachytuñich müd yi' ajcxy ypocy ycixpi, co ixipyi jëbi Dios pocyhunmecxy ajcxy. ⁴ Com hue' je' ajcxy Israel y'ap'ajtip y'oc'ajtip, Israel jây ajcxy. Hue' anajty ajcxy Dios ti ycöbigyí jadu'n nej jihuíy yci'm'ung, Dios anajty ajcxy ti ñi'ijxcidägyi, y'ijx ajcxy Dios y'oy'ajtin. Dios nimay ajcxy co ycuend'adip. Dios ajcxy jadu'n yajni'ixiíy nidüg'óciy tiy'ajt nej ajcxy jëbi huaad Dios huindzigíy, e Dios yajhuinhuaníy Israel jây ajcxy je Cristo. ⁵ Nañ hue' ajcxy ymij'ap'ajtip ymijteedy'ajtip ñich ajt nmij'ap nmijteedy; je Abraham, Jacob, etz David, e ma je' ymiñ ajcxy, ji ymiñ je Cristo, e je' je' Dios ajtp, yi' tüg'óciy ane'mdaayb jilby tzajpjoty etz ya naaxhuiñ. Je Cristo capxpaady y'idipy huinixi.

⁶ Co jadu'n mina'ñich co may ajcxy Israel jây ca' ajcxy Dios yjây'adyi tiydudägyi, ca' jadu'n mina'na'ñich co Dios ca' cuyduñ yi' y'ayuc huidibi yajhuinhuaníy Abraham etz Moisés. ⁷ Canan nidüg'óciy Abraham y'ap y'oc pada'ñ je oy'ajt huidibi yajhuinhuaníy Abraham, com jadu'n yjaybetyty ma Dios ñecy. Dios jadu'n nimay Abraham: "Yi mmang, Isaac, ti nhuin'ixyich jëbi y'ap y'oc paady je oy'ajt huidibi ti nyajhuinhuaníy." ⁸ Co Dios jadu'n nimay Abraham, paady ycixpi nejhuiiyim co ca' nidüg'óciy Abraham y'ap y'oc jëbi naydijyí Dios y'ung. Jëyi Isaac y'ap y'oc jëbi ñaydijyí Dios y'ung com Dios yajhuinhuaníy co may'ajt tuna'ñ müd yi' ajcxy. ⁹ Com jadu'n yjaybetyty ma Dios ñecy co Dios nimay Abraham: "Nihuimbidaamybich ma je tiempo huidibi ti n'agapxtucyich, e huin'it mdöxyijc Sara y'ungbaadip."

¹⁰ Ji jadüg tiy'ajt. Hich ajt nmij'ap Isaac ytöxyijc Rebeca metz ymang paty. ¹¹ Dios yhuin'ijx je jacmutzpi ca'ni anajty yma'xung'aty, e ca'ni anajty ñigüëxíy ti huinma'ñ ymüd, oyhuinma'ñ o jibic-huinma'ñ. Dios ninigoob anajty jayijpni ti huin'ixy je jacmutzpi. ¹² Com Dios ñimay je Rebeca co je jacmutzpi y'ane'mamyb y'ajch ma ca'ni anajty Jacob yma'xung'atyñi. ¹³ Tim jadu'n nej jaybety ymiñ ma Dios ñecy, Dios jadu'n minañ: "Jac ñgi ti ndzocyich Jacob, ca'ydi Esaú."

¹⁴ ¿Nej n'ocminaanim? ¿Dios ca' tiybi tuñyi? Ca' yjadu'nity. Dios tiydudägy ytuñ. ¹⁵ Com jadu'n Dios nimay Moisés: "Nba'ayohuipych ninigoobi pinjaty ndzocpyich." ¹⁶ Co Dios

jadu'n nimay Moisés paady nejhuiyim co canan paady ycixpi Dios pa'ayohua'n jay müd co ajcxy chachñaymija'ixigixy co tunaangixy oyhuinma'n. Hue' je' Dios pa'ayo'n tuñ müd jay ajcxy ninigoob co jadu'n tzocy. ¹⁷ Com jadu'n jaybety ymiñ ma Dios ñecy co Dios jadu'n nimay je Egipto rey:

Ich miich ti nmöy m'ane'min, jigix jëbi jay ajcxy ixipy je mij ayo'n huidibi ndunaamybich ma miich mnaax mgajp, huin'it jay ajcxy capxpaady xya'jidipy huindu'ñybi ñaaxhuñ.

¹⁸ Dios ypa'ayooyb je' pinjaty chojcpy, e nañ jadu'n yjot yajjuuni pin jadu'n yajmidzojcpy.

¹⁹ Huin'it miich ajcxy xyñimāhuibich: "Peni janch yjadu'nity, ¿ti co Dios jadu'n jadüg'oc pocy'ixy jay? ¿Pin jada' occapxhuimbidi nej yi' tzocy?" ²⁰ Miich jay, ¿mbin miich co ti myajcapxcoja'ñ myaj'ayuccoja'ñ müd Dios? ¿Nej jëbi pochytüdzt nimāy je pin anajty ti yajcojyñ? "¿Nej co jadu'n ti xya'cojyñ?" ²¹ Tüdzyajcojpi yi' yaj'oyiñy je mo'ntz nej tim tzocy. Pen yajcojamyb tüzdy oybi tzoocatyp, yajcojpy je'. Peni yajcojamyb tüzdy huidibi ca' oyjatity, yajcojpy je'.

²²⁻²⁴ Tim jadu'n nej je tüzzyajcojpi yaj'oyiñ mo'ntz nej tzocy, nañ jadu'n Dios tuñ müd jay nej tzocy. Dios ti yajcojy jay, e müd ymic'ajt jëb tzaachytüñ müd ypocy ycixpi. E co jadu'n tzaachytunipy, chi ñigüëxigipy yi' ymic'ajt. Dios ooy jecy ti jamimecxtucy ajcxy huidibi paatip co Dios chaachytuniyb ajcxy. Com Dios ti yajcojy jay paady jëb nañ jadu'n pa'ayoohuipy etz may'ajt tunipy müd yi' ajcxy, jëbi ajcxy paadip yi' y'oy'ajtin. Dios ich ajt ti xyhuin'ixim niñjety judiojy, etz niñjety huidibi ca' yjudiojyity, jëbi ajt n'alma nidzoocin paady. ²⁵ Com jadu'n jaybety ymiñ ma Oseas ñecy ma Dios jadu'n yminañ:

Yi jay ajcxy huidibi ich ca' anajty njäy'adyii, njäy'adāanibich cham. Yi jay huidibi ca' anajty ndzocyich, ndzogāanibich cham.

²⁶ E nañ jadu'n jadüg'it Oseas cojay: "E je jay ajcxy huidibi anajty tzinaayb ma canaag naax cajp huidibi anajty ca' Dios yjāy'adyii, jëb ñaydiyii Dios yjāy, je Dios huidibi huinixii tzinaayb."

²⁷ Nañ jotmay müd co Isaías jada tiy'ajt ycojay ma ñecy ma jadu'n ymina'ñ: "Oy ixipy ajcxy ti yjamayj jadu'n nej tzaa'ung yajpaady ma mejy ypa', nihueñ ajcxy y'alma ñidzoocin pada'ñ. ²⁸ Com Dios mic ooy cōtucjin müdity, e ca' mimecxtugipy jay ajcxy ypocytunii huinixii. E mic'amy tzaachyp: mōhua'ñ naaxhuinyjāy müd ypocy ycixpi co anajty xii tiempo paatni mabaad agapxtucy." ²⁹ Isaías ñajtzcapxiy jadu'n jecy'ajty:

Pen ca' ixipy je Huindzin Dios huidibi ane'mdaayb jibby tzejoty etz ya naaxhuñ, capubejty yi' Israel jay, co ca' ycajacyajtzooci niñjety ajcxy, ycacōdigoyday yi' ajcxy, tim jadu'n nej je jay ajcxy yjaty jim ma Sodomo cajp etz Gomorra cajp, cōdigoyday ajcxy.

Yi judiojy ajcxy etz Jesucristo y'ayuc ytiy'ajt

³⁰ Jadu'n jëbi mhuinjihiyigixy huidibi ti yajniyayiyigixy jadu'n nej Dios ytun müd jay ajcxy. Yi jay ajcxy huidibi ca' yjudiojyity, huidibi ca' cuyduñ Dios ycōtucjin je jecyip, co ajcxy mijpidägy je Cristo, chi ajcxy paady tudägy'ajtin ma Dios. ³¹ Per yi judiojy ajcxy huidibi jip'ixp co tudägy'ajtin padaangixy müd co tzachcuydungixy Dios ycōtucjin je jecyip, ni ca' ajcxy mimadägy cuydundähuipy, e ca' ajcxy tudägy'ajtin paady ma Dios. ³² ¿Na'amy co ca' ajcxy mimadägy cuydundäy Dios cōtucjin? Je' co ajcxy ca' mijpidägy huidibi Dios ti tuñ müd yi' ajcxy ycixpi. Hue' ajcxy tijy co tudägy'ajtin padaangixy ma Dios müd co tzachcuydungixy Dios ycōtucjin je jecyip. Hue' ajcxy ayo'n ypadamyb co ca' Cristo cōbiycixy, tim jadu'n nej jay ayo'n paady co ycōnepy ma tüg tzaa. ³³ Com jadu'n jaybety ymiñ ma Dios ñecy, ma Dios jadu'n ymina'ñ:

Nguexaamybich jim Jerusalén tüg jay. Mayjāy ca' mijpidäga'ñ je jay, e ayo'n ajcxy ypadamyb ma ich. Tim jadu'n nej ixipy ti nbidägyich tüg tzaa ma jay ajcxy huaad ycōnejpcixy, e chi yciday ajcxy. Tüg'ōciy jay pinjaty mijpidaacp je jay huidibi nbidägaamybich jim Jerusalén, hue' ajcxy yi' ca' ayo'n pada'ñ ma ich, nbocyhuinmecxaamybich yi' ajcxy.

10

¹ Miich ajcxy nmigügtjicich, ooy ndzocyich cixyot huinijot co yi Israel jay nidüg'ōciy pada'ñ y'alma ñidzoocin. Ooy ich niñi Dios nmibijctzoy müd yi' ajcxy ycixpi. ² Jëbi ndiy'ajt yecyich co yi Israel jay ooy ajcxy Dios jayajmij'ajtcixy. Hue' janchtiy ca' ajcxy huinjihiyiy Dios ytiy'ajt. ³ Com nejhuiyib ajcxy co Dios yajpocyñihuädzamyb jay ajcxy, hue' ajcxy ca' huinjihiyiy nej Dios yhuinma'ñ müdity. Ci'm anajty chachhuinma'ñ ixtaaygixy nej ajcxy jëbi ñayyapocyñihuädzigixipy. Ca' anajty ajcxy cōbicy Dios ytiy'ajt nej jëbi huaad ñayyapocyñihuädziyib.

⁴⁻⁵ Yi judiojy ajcxy ca' huinjihiyigixy co je Cristo y'oy ya naaxhuñ, e chi yajtigooyi Dios ycōtucjin ymic'ajt huidibi Moisés yjāy, jigix jëbi tüg'ōciy jay pinjaty mijpidacp Cristo ytiy'ajt, huin'it ajcxy paadip tudägy'ajtin. Moisés yjayhui'm ma jadu'n ymina'ñ: "Je pinjaty

cuydumb je Dios ytiy'ajt, jim mic'ajt paadipy müd chinaayin ycixpi.”⁶⁻⁷ Per yi jäy ajcxy huidibi mijpidaacp Cristo etz cuyduni yi' ytiy'ajt, yi' ajcxy yminañ: “Ca' huaad judiojäy ajcxy yminaangixy jotjoty huinma'ñyoty: ¿Pin ocpättigihup tzaipjoty nicx je Cristo yajtzoñ? o ¿Pin nicxamb ca'oydactuuby ma ajcxy öcpidijc y'ity e yajjugypigaanip je Cristo?”⁸ ¿Nej Dios y'ayuc yminañ? Jadu'n Dios y'ayuc yminañ: “Ti mmidooy müch ajcxy Dios y'ayuc ytiy'ajt ma mgi'm'ayuc, ti jäy ajcxy capxhuäcxy ma müch, ti mmido'mbijccixy.” Pues jada je' je y'ayuc tiy'ajt nej jëb mijpidaaccixy Cristo, huidibi tiy'ajt iich ajcxy ngapxhuäcxp.⁹ Pen müch mgapxypidzimyb mayjäy agujc co müch ajcxy Jesús mHuindzin'adyii, etz mmibijcipy ajcxy ma mjet mhuinma'ñ co Dios ti yajjugypijcy Jesús co y'o'cy, huin'it m'alma paadip ñidzoocin ma Dios.¹⁰ Co mmijpidägyipy Jesús cixyjet huinijot huin'it Dios xyajpocyñiñhuädzipy. Co mgapxypidzimipy mayjäy agujc co müch mijpidägy Cristo Jesús, huin'it yi m'alma ñidzoocin pada'ñ.

¹¹ Com jaybety jadu'n müiñ ma Dios ñecy, ma jadu'n yminañ: “Nidüg'öciy jäy huidijaty mijpidacp je Cristo, ca' ajcxy ayo'n pada'ñ ma Dios.”¹² Jëbi nidüg'öciy jäy mijpidägy je Cristo Jesús com Dios tú'ciy yajhuinhuaniy pocyñiñhuaatzin ma yi judiojäy etz ma huidi ca' yjudiojäyity. Ji tüg Huindzin je Jesucristo huidibi niHuindzin'ajttaayb. Jesucristo may'ajt oy'ajt tunam mijcajee müd huentimpinjäyity pinjaty pijczooob pubejtín ma Dios müd yi' yxii.

¹³ Com jadu'n jaybety ymiñ ma Dios ñecy, ma jadu'n yminañ: “Nidüg'öciy jäy pinjaty Dios mübijctzoob müd Huindzin Jesucristo yxii, yi' ajcxy y'alma paadip ñidzoocin.”¹⁴ ¿Nej jëbi jäy ajcxy occohuaníy Jesucristo co huen y'alma nidzögy, pen ca' anajty ti mübijci je ytiy'ajt? Pues ca' yjadu'nity. ¿Nej jëbi jäy mübicy Jesucristo peni ca'ni ajcxy amido'ijti y'ayuc? Pues ca' yjadu'nity. ¿Nej jëbi jäy ajcxy midoogixy Jesucristo y'ayuc, pen ca' pin capxhuäcxy ma yi' ajcxy? ¹⁵ ¿Nej jëbi jäy ajcxy capxhuäcxy Jesucristo y'ayuc ytiy'ajt, pen ca' pin yquexyii ayuccapxhuäcxpi? Com jaybety jadu'n ymiñ ma Dios ñecy, ma jadu'n yminañ: “Ooy oy jäy ñajyihuíyii co pinjaty mimimb mija'tp oybi tiy'ajt, pinjaty capxhuäcxp oybi tiy'ajt ma yi' ajcxy.”

¹⁶ Per ca' nidüg'öciy jäy mübicy je oybi tiy'ajt, com Isaías jadu'n cojay ma ñecy ma jadu'n yminañ: “Huindzin Dios, ¿pin ti mijpidägy iich ajcxy n'ayuc?”¹⁷ Cooni jäy ajcxy capxhuäcxy Jesucristo ytiy'ajt ma jäy chinaaygixy, huin'it ajcxy ymibijccixy com ti amido'ijtcixy je tiy'ajt.

¹⁸ Per n'amidooybich müich ajcxy: ¿Nej ca' jada' yi judiojäy ajcxy midoy Dios ytiy'ajt? Janch jadu'n ti ajcxy jamidooy, com jaybety jadu'n ymiñ ma Dios ñecy ma jadu'n yminañ: Ti capxhuäcxy ajcxy Dios y'ayuc ytiy'ajt huindu'mybi naaxhuiñ. Ti ajcxy Dios y'ayuc midodaayi huindu'mybi naaxhuiñ.

¹⁹ Jadüg'oc n'amidoogixy: ¿Nej ca' Israel jäy jada' ajcxy nejhuíy Dios ytiy'ajt? Ñejhuíyb ajcxy. Com jecy'ajty Moisés ycojay ma ñecy ma Dios jadu'n yminañ:

Nyajpocyñiñhuaatzäthuiyich yi jäy ajcxy huidibi ca' iich njäy'adyii, e huin'it müch ajcxy cohuindoyii mjihuíhuipy müd yi' ajcxy ycixpi. Nduñipyich may'ajt müd yi' ajcxy, e huin'it müch yi' ajcxy mmijotmädi.

²⁰ Jadu'n jadüg'it Isaías cojay ma yi' ñecy, ma Dios jadu'n yminañ:

Yi jäy ajcxy huidibi ca' xy'ixtäyich, ti xypaadyich ajcxy. Ti nyajnguëxigych ndiy'ajt ma yi jäy huidibi ca' xyñidiy xyajtiyich.

²¹ Com jadu'n jaybety ymiñ ma Dios ñecy, ma Dios jadu'n nigapxy yi Israel jäy co jadu'n yminañ:

Jabom jabom ti njamimecxtucyich yi Israel jäy ajcxy. Ti njayajnimäyich iich ndiy'ajt, e ca' ajcxy mijpidägy. Hue' ajcxy ca' xycapxymidooyich, xymijotmij'öcpich ajcxy.

11

Yi Israel jäy ajcxy huidibi ti ypocyniñhuaatzcixy

¹ Paady n'amidoogixy: ¿Nej ti jada' Dios ix'ijxni ixtijni yi Israel jäy ajcxy? Pues ca' yjadu'nity, Dios ca' yi' ixmachñi Israel jäy ajcxy. Com nañ Israel jäy iich. Abraham nmij'ap'ajtibich nmijteedy'ajtibich e nañ jim ngogäjpidyich ma anajty Benjamín ycojajpity.²⁻³ Dios ca' ixmach yi' yjäy huidibi yhuin'ijx jecy'ajty co jäy'ada'ñyii jigix jëbi may'ajt oy'ajt tunipy müd yi' ajcxy. ¿Nej ca' ajcxy mnejhuíy nej jaybety ymiñ ma Dios ñecy jadu'n nej Elías nigapxy yi Israel jäy ma Dios? Jadu'n yminañ:

Huindzin Dios, ti yi Israel jäy ajcxy yaj'öctäy huidibi anajty müch m'ayuc xycapxhuäcxp. Ti ajcxy yajhuindigoydäy je tzaa macxy ma anajty jäy xyhuindzigiy. Naydügpajc iich ti njachu'myich njaccapxhuäcxyich müch m'ayuc, e nañ xyaj'ögaamich jäy ajcxy.

⁴ E chi Dios y'adzooy nimay Elías:

Ca' mim naydügity, ji iich ahuing nmídidyich yujcipy jahuixtuc mil yëydijc huidi xy'ojadajtpich xyhuindzigiybich chambaad, huidibi ca'ni huingoxtinäy yi Baal, yi dios falso, ca'pi ti mic'ajt müdity ni ti tzöc'ajt ca müdity.

⁵ Tim jadu'n nej Dios m̄iditay anajty huixtujc mil yēydijctijc jecy'ajty co anajty Elías yjugy'aty, nañ tim jadu'n cham ma iich ajt nx̄i ndiempo Dios ym̄id nijējity judiojāy huidibi ti pa'ayoy, e paady ycixpi ti yhuin'ixyii jēbi yī' jāy'adyii. ⁶ Com co ixypiy ajcxy yajxon cuyduni Dios ycōtujc̄in, ca'p ni ti pa'ayo'n Dios jactunaani m̄id yī' ajcxy, com co ti anajty jim Dios y'ayuc ycuundāyii.

⁷ ¿Ti ti ytuynii ti yjadyii m̄id yī Israel jāy ajcxy? May ajcxy ca' may'ajtin oy'ajtin paady ma Dios jadu'n nej ajcxy j̄jip'ijxcixy. Jēyi ajcxy huidi Dios huin'ix̄i ti ajcxy paatcixy oy'ajt ma Dios. Yī jacjadyii Israel jāy ajcxy Dios n̄ig ooy yajjotmij'ōccixy. ⁸ Com jadu'n jaybety ym̄iñ ma Dios ñecy jadu'n nej Dios yajjotmij'ōgy yī Israel jāy, ma jadu'n yminañ:

Tim jadu'n ajcxy nipaady nej jāy ajcxy huidibi ti ym̄i'ōctigooñi, jadu'n nipaady nej jāy huidibi huintzpi, jadu'n nipaady nej huidibi cōnatip.

⁹ David nañ jadu'n ycojay jecy'ajty ma ñecy, ma jadu'n yminañ:

Huindzin Dios, cham je jāy tzachnixondāgy yī tzinaayin yī jugy'ajtin, ca' ajcxy xyjāymech. Timitiini ajcxy ayo'n mōhuipy; tim jadu'n nej iyujc ayo'n paady co yajtūxuuch o co yjut cōgāy.

¹⁰ Yajma'ti ajcxy yjot yhuinma'ñ, huen ahuimbijtcixy jadu'n nej jāy huintzpi. Mō ajcxy tzaachypi huinix̄i huinitiempo, tim jadu'n nej jāy ajcxy tzaachypi jihuñy huidibi jemxypi tzm̄iccixp.

Yī ypocyhuinmeec̄in huidibi ajcxy ca'p yjudiojāyity

¹¹ Co jadu'n yī maybi Israel jāy ca' cōbijccixy Dios ytiy'ajt, ¿nej mdijy, ti Dios y'ixmachyii ajcxy tūcc̄i'yī, e yajtigoya'ñ ajcxy? Pues ca' yjadu'nity, ca' Dios ixmach yī Israel jāy ajcxy tūcc̄i'yī. Co yī Israel jāy ca' cōbijccixy Dios ytiy'ajt nej Cristo y'o'cy m̄id yī' ajcxy ypocy ycixpi, paady cōbicy yī huidibi ca' yjudiojāyity, jēbi ajcxy y'alma nidzoc̄in paady. Jadu'n Dios ytuñ j̄igix jēbi yī judiojāy ajcxy cohuindoȳi jihuñhuipy, e chi nañ jadu'n mijpidāgipy ajcxy Jesucristo. ¹² Pen yī mayjāy ajcxy huidijaty ca' y'israeljāyity mij'oy'ajtin mijotcuyc̄ajtin ti paady, m̄id co yī jacmaybi Israel jāy ca' cōbijccixy Jesucristo, chi n̄igi oy'ajtin jotcuyc̄ajtin pada'ñ yī naaxhuñjyāy ajcxy co anajty nidūg'ōciy Israel jāy yjothuimbijtaaygixy etz cōbijctaaygixy je Cristo.

¹³ Cham nijayiygixy miich ajcxy huidi ca' yjudiojāyity, com Dios ti xyquexyich ngapx-huācxich yī' y'ayuc ma yī jāy ajcxy huidibi ca' yjudiojāyity. Ooy nyajcopic̄yich jada ndungich, j̄igix jēbi judiojāy oy'ajtin paady nañ jadu'n. ¹⁴ Ca' jecyity co iich n'amigūgtijc, yī judiojāy ajcxy, cohuindoȳi ajcxy jihuñhuipy, co anajty mayjāy huidi ca' yjudiojāyity mijpidāgy iich n'ayuc. Co jadu'n ajcxy cohuindoȳi jihuñhuipy, chi ajcxy nañ jadu'n mijpidāgipy Jesucristo. ¹⁵ Com pen je naaxhuñjyāy huidibi ca' yjudiojāyity, huidibi Dios jecy'ajty ca' j̄aygidaci ajcxy chinaayin, pen ti ajcxy cōbijci Dios ytiy'ajt, pen ti ajcxy oy'ajtin paady ma Dios, m̄id co Dios ti ixmach yī Israel jāy huidibi ca' cōbicy yī' ytiy'ajt, chi yī Israel jāy co ajcxy jadūg'oc yjothuimbidipy etz cōbijgipy Dios ytiy'ajt, nañ jadu'n ooy yjotcuḡihuipy ajcxy, jadu'n nejihuñy ti ajcxy y'ōgy etz nej jihuñy ajcxy ti yjugypicy jadūg'oc. ¹⁶ Com co Abraham, Isaac etz Israel Dios anajty jāy'ajtip, paady nañ jadu'n tūg'ōciy Israel jāy Dios jāy'adyii, m̄id co Israel y'ap'ajtip y'oc'ajtip ajcxy. Tim jadu'n nejihuñy judiojāy ajcxy tzaicaagy puuducy mōy Dios, nañ jadu'n je ytuictuc huidibi jac-hui'm nañ Dios je' yje', e nañ tim jadu'n nej co jāy ajcxy mōy Dios quipy ytictz, tūg'ōciy je' Dios je'ajtāyii quipy y'aacxy.

¹⁷ Hue' je' nijējity Israel jāy ca' mijpidāgy Dios ytiy'ajt, paady ñajtz'ix̄i'yī, e may'ajt oy'ajt tuñ m̄id huingbi jāy huidi ca' israeljāyity. Tim jadu'n nej jihuñy tūg oyguipy huidi tim'ajtp yajpubuxy y'aacx, e je ma ti yajjijp̄ujxtūtū, je' yjip yajpidāgy ma huingbi quipy y'aacx. Mi-ich ajcxy huidi ca' yjudiojāyity huidibi ti mibicy je Cristo, ti mbaady Dios y'oy'ajt tim jadu'n nej judiojāy ajcxy jecy'ajty m̄idty Dios y'oy'ajt. ¹⁸ Ca' huaad amij agix m̄nayjihuñyigixy, e ni ca' huaad m'ixt̄icixy yī judiojāy huidibi ca' mijpidaaccixy je Cristo. Miich ajcxy yī m'oy'ajt ti mbaady ma Dios, tim jadu'n nej je quipy y'aacx mic'ajtp paady ma yī quipy ytictz.

¹⁹ Ca' yjecyity co miich ajcxy m̄ina'naangixy co Dios najtz'ix̄i'yī yī judiojāy huidibi ca' mibicy Cristo, jaydēbi miich ajcxy m̄naydijyii co Dios xyjāy'adyii. ²⁰ Ti'y'ajt jadu'n nej miich m̄ina'ñ. Dios ñajtz'ix̄i'yī yī maybi judiojāy m̄id co ajcxy ca' mibicy Jesucristo. E Dios miich ti xycōbicy m̄id co ti m̄mibicy Jesucristo. Per ca' huaad miich amij agix m̄nayjihuñyii co Dios ti xycōbicy. Naygüend'adii yajxon ma Dios ytiy'ajt, tzi'g' Dios. ²¹ Com Dios ñajtz'ix̄i'yī yī judiojāy ajcxy m̄id co ca' ym̄ijpidāgyii yī ytiy'ajt. Nañ jadu'n miich ajcxy yī xyñajtz'ix̄ihua'ñ, pen ca' m̄mijpidaaccixy yajxon yī ytiy'ajt. ²² Cuentipic jadu'n nej Dios may'ajt oy'ajt tuñ m̄id nijējity jāy, etz mic tzaachytuñ nijējity jāy. Dios mic tzaachytuñ je judiojāy huidibi ca' ycapxymidoy, etz may'ajt oy'ajt tuñ m̄id miich ajcxy huidi capxymidoob. Jaccuydun yajxon Dios ytiy'ajt, e n̄igi Dios may'ajt oy'ajt xytuunipy, pen ca' m̄guyduni yī ytiy'ajt, huin'it Dios xyñajtz'ix̄ihuipy. ²³ E nañ jadu'n yī judiojāy ajcxy huidi ca' mibijccixy Jesús, co ajcxy yhuinma'ñ yajtigadzipy, e mijpidāgipy Jesús, huin'it Dios ycōbiḡuyb jadūg'oc, etz Dios m̄id

ymic'ajt jëbi may'ajt oy'ajt tunipy müd yi' ajcxy. ²⁴ Com pen müich ajcxy huidi ca' yjudiojáyity huidibi jecy'ajty anajty ca' Dios jáy'adyii, pen müich ajcxy Dios mic'amy ti xycóbicy, nañ jadu'n jactzojc cöbiga'n huidibi ajcxy judiojáyip, pen ycöbicy ajcxy.

Jadu'n nej Dios yajnidzoocogixihua'n Israel jáy ajcxy

²⁵ Müich ajcxy nmigügtjicich, nyajnijayiyb ajcxy jadu'n nej Dios tuna'n müd yi Israel jáy, jaydëbi ca' müich ajcxy amij agix mnayjihuihuipy, etz jaydëbi mnejhuihuipy jada tiy'ajt huidibi ca' pin nejhuíy, co yi Israel jáy ajcxy ooy ajcxy y'aamijity yjotmijity, ca' ajcxy capxymidoy Dios. E jadu'n ajcxy y'ida'n mabaad anajty yca'pxy je mayjáy, ca'pi y'israeljáyity je huidibi mijpidägam Jesucristo ytiy'ajt. ²⁶ Nejhuíyim co Dios may'ajt oy'ajt tunamb jadüg'oc müd tüg'óciy Israel jáy ajcxy, com jadu'n jaybety ymiñ ma Dios ñecy ma Dios jadu'n ymina'n:

Jacjini tüg Israel jáy ymina'n huidibi yajnidzögamb ajcxy ma yi' ypocy. Yi' yajtigogyaanip Israel jáy ypocy.

²⁷ Jadüg'it jaybety ymiñ ma Dios jadu'n ymina'n: Jadu'n nyajhuinhuaníyich yi Israel jáy co yi' ajcxy ypocy nyajtigooybich.

²⁸ Co yi Israel jáy ca' mijpidaaccixy Jesucristo ytiy'ajt, chi Dios ajcxy ñajtz'ixiíy. E co ñajtz'ixiíy ajcxy, paady ycixpi müich ajcxy Dios ti xycóbicy, co ti mmijpidaaccixy Jesucristo. Per chambaad Dios jactzojctay yi Israel jáy müd co Dios huin'ixy yi Abraham, Isaac etz Jacob jecy'ajty jëbi yi' yjáy'adyii. ²⁹ Dios ti huin'ixy yi Israel jáy ajcxy jëbi yi' yjáy'adyii, etz tüg'óciy huidi yajhuinhuaníy co möhua'n, co may'ajt tuna'n müd yi' ajcxy ycixpi. Ymöhuiipy yi', ytunipy yi'. Dios ca' y'ayuc yajxigy. ³⁰ Müich ajcxy huidi ca' yjudiojáyity jecy'ajty ca' anajty mmijpidaaccixy Dios. Jadachambi xii tiempo Dios müich ajcxy ti xypa'ayoy, müd co yi Israel jáy ca' mijpidägy Cristo ytiy'ajt. ³¹ Yi judiojáy jadachambi xii tiempo ca' mijpidaaccixy Dios ytiy'ajt, tim jadu'n nej jecy'ajty müich ajcxy ca' anajty mmijpidaaccixy Dios ytiy'ajt. Jacjini Dios pa'ayoohuin tuna'n jadüg'oc müd yi judiojáy ajcxy tim jadu'n nej ytuñ müd müich ajcxy jadachambi xii tiempo. ³² Com Dios anajty ti yajpocycädäy tüg'óciy jáy co ajcxy ycapxycömidodacy, yi judiojáy etz nañ huidi ca' yjudiojáyity, paady ycixpi Dios pa'ayo'n tuñ müd nidüg'óciy jáy, judiojáy etz nañ huidi ca' yjudiojáyity, tüg'óciy pin mijpidacp yi' ytiy'ajt.

³³ ¡Ooy ycodzigíity Dios! Dios ooy mijcájee may'ajt oy'ajt tuñ müd jáy ajcxy ycixpi. Dios ooy mijcájee mihuinma'n ti tuñ müd jáy ajcxy ycixpi. Dios ooy mijcájee ycohuinma'ñity. Ca' ni pin jëbi huinjhuíydäy je ayuc huinma'n huidi Dios ymiñ. Etz nañ ca' ni pin jëbi huinjhuíydäy huidibi Dios ytumyb. ³⁴ Com jaybety jadu'n müñ ma Dios ñecy ma jadu'n ymina'n:

Ca' ni pin jëbi huinjhuíydäy nej Dios yhuinma'n müdity. Ca' ji ni pinjáy huidi ti capxhuijy Dios.

³⁵ Ca' ji ni pinjáy huidi tijaty ti ocmooybi Dios. Dios ca' ni ti nuucxy müdity müd ni pinjáy.

³⁶ Tüg'óciy huidijaty ich ajt ya nbaatim, acjiiby choondäy ma Dios. Yi' tüg'óciy ti yaj'oyiydäy, e yi' je'ajttaayip tüg'óciy. ¡Tzoc Dios capxpaatim ojadajtím huinixi huiniñtiempo! Jadu'n jadu'n. Amén.

12

Je jugy'ajtin cixyot ma Dios

¹ E jadu'n nmigügtjicich, cham íich müich ajcxy nimaaygixy mictägy, com co Dios ti xypa'ayooxigy, paady ycixpi nay'ayéjcigix naygíyéjcigix amuumdügíot ma Dios. Cuychinay yi ytiy'ajt yajxon jabom jabom. Tzinaaygix müd huädz mjot mhuinma'n, jadu'n nej Dios jëbi jáygidägy yi mdzinaayin. Jada je tiy'ajt nej jëbi Dios m'ojadajtcixy tiydudägy. ² Ca' ajcxy mguydungixy mguychinaaygixy yi naaxhuiñjáy ajcxy yjibicjot yjibic-huinma'n huidibi tzinaaygixp jadachambi xii jadachambi tiempo. Com Dios ti xymoogixy jemybi mjot jemybi mhuinma'n, paady mguydunipy ajcxy yi' ytiy'ajt. Ixpíccix Dios ytiy'ajt, jigix ajcxy mnejhuihuipy huidibi tiy'ajt Dios chojcyp mguydunipy, etz jigix mhuinjhuíhuipy je oyhuinma'n, je tudägyi huinma'n huidibi Dios yjáygidacpy, je huinma'n huidi huädzip ca'pxyip.

³ Com Dios may'ajt oy'ajt ti tuñ müd íich etz ti xymöyich jada tung co ngapxhuäcxich yi' y'ayuc, paady íich müich ajcxy nimäy nidüg'óciy co ca' huaad amij agix mnayjihuiyigixy, ca' huaad nigí anaxy mnaygöamáyigixy ci'm. Nidüg nidüg ci'm huinmaaygixy yajxon huidi tung jëbi myajnicxcixy, jadu'n nej Dios huíjy'ajt cuj'ajt ti xymoogixy. ⁴ Jadu'n nej íich ajt nninícx ymiñ yhuin y'ahuac etz yci' ytecy, je ninícx abicy ytung müdity, je huin abicy ytung müdity, je y'ahuac abicy ytung müdity, etz je ci' teczy abicy ytung müdity. ⁵ Nañ tim jadu'n íich ajt huidi mijpidacp Cristo, e ni may íich ajt, e tügpicy jáy íich ajt com tú'ciy nmibíjím. E nije' nije' Dios huíjy'ajt cuj'ajt ti xymooyim abicyjaty, nej jëbi nije' nije' Dios ytung nyajnicxim.

⁶ Com abicyjaty Dios ti xymooyim huijy'ajt cujc'ajt, paady copicy nyajtuunim nije' je huijy'ajt cujc'ajt huidi Dios ti xymooyim. Pen Dios ti xymooyim huijy'ajt cujc'ajt jēbi ngapxhuācxim yi' y'ayuc, copicy ngapxhuācxim mibaad ixpijcin nmūd'ajtim. ⁷ Pen Dios huijy'ajt cujc'ajt ti xymooyim co jēbi nbubejtim nmigūgtijc, copicy nmigūgtijc nbubejtim. Pen Dios huijy'ajt cujc'ajt ti xymooyim jēbi nyaj'ixpijcin nmigūgtijc, copicy ndung'ajtim yaj'ixpigii. ⁸ Pen Dios huijy'ajt cujc'ajt ti xymooyim co jēbi ngapxhuijim nmigūgtijc, co jēbi njot'amijmooyim nmigūgtijc, copicy ngapxhuijim nmigūgtijc, etz njot'amijmooyim nmigūgtijc agujc jotcujc. Pen nyejcin tijaty ma nmigūgtijc, copicy agujc jotcujc nyejcin. Je huidi ajcxy nigohuajc'ajtp mibijcpidijc copicy yajxon y'anē'mgixipy. Pen Dios huijy'ajt cujc'ajt ti xymooyim co jēbi nbubejtim jāy ajcxy huidibi ayo'n mūd jotmay mūd, copicy agujc jotcujc nbubejtim pinjaty ayo'n mūd jotmay mūd.

Nej mibijcpidijc huaad jugy'ajtcixy chinaygixy

⁹ Naychōjigixy nayjihuiyigixy miñ xyipy amuumdūgijot, ca' y'ametz yjotmetzity. Ca' mnijot'ajtcixy jibic jot jibic-huinma'ñ. Nijot'ajtcixy nigi oyjot oyhuinma'ñ. ¹⁰ Naychōjigixy nayjihuiyigixy amuumdūgijot, jadu'n nej ypadyi mnaymigūg'ajtigixipy ma Jesucristo. Nayyajmij'ajtigixy nigi nidūg nidūg miich ajcxy.

¹¹ Nymic'ixigixy cixy jot huinijot, ca' mnuux'ajtcix. Tungix amuumdūgijot mūd mHuindzin Jesucristo ycixpi.

¹² Tzinaaygixy agujc jotcujc, com mnejhuiyib ajcxy co mbada'ñ oy'ajtin ma Dios. Mecxtujccix yi' tzaachyp i ayo'n huidibi mminajxyp myajnajxyp. Mibijctzoogixy Dios jabom jabom.

¹³ Naybubējigixy miñ xyipy, pen yajmayajtpy migūg tijaty. Nayyajjāttācigixy miñ xyipy oy yajxon.

¹⁴ Nibijctzohui' ma Dios huidibi ajcxy xy'ixhuidijtp xypahuidijtp. Nibijctzohui' mmidzip huen Dios may'ajt oy'ajt tuñ mūd yi' xcixpi. E ca' mnibijctzohuiy co huen ayo'n paadipy.

¹⁵ Tzoc jotcujc nayjihuiyim co ajc nmigūgtijc jotcujc ñayjihuiyii. Tzoc mūdajim mūdmayim nmigūgtijc pen tajp mayb.

¹⁶ Ooy yajxon nayyaj'ijtigixy naygodigūyigixy. Ca' amij agixy mnayjihuiyigixy. Migūg'adiyib yi' nmigūg huidi ayoob. Yung naxy mūd'at mjet mhuinma'ñ, ca' mnaygōmāyigixy.

¹⁷ Co jāy xymidundigōogixipy, ca' huaad jibic myaj'ahuimbijtcixy. Hue' janchtiy oybi ajcxy mdunipy jadu'n nej jāy jēbi jāygidāgy. ¹⁸ Oy nayyaj'ijtigixy mūd nidūg'ōciy jāy mabaad mmadāgy. ¹⁹ Miich ajcxy migūgtijc, co jāy jibic xymidundigōogixipy, ca' nañ jadu'n ajcxy myaj'ahuimbidity, mamecxtugipy ajcxy, com Dios yi' tzaachytunipy yi' jāy ajcxy huidi anajty xymidundigōogixp. Com jaybety jadu'n ymiñ ma Dios ñecy jadu'n yminañ: "ñich nyaj'ahuimbiditych nej anajty jāy xymidundigōogixy." ²⁰ Co jāy xymidundigōogixipy myaj'ahuimbidity ajcxy oybi, com jaybety jadu'n ymiñ ma Dios ñecy, ma jadu'n yminañ: Pen yi' mmidzip yubo'cip, myajcayipy myaj'ūgipy, pen yi' mmidzip tidziyipy, myajmū'ūgipy. Co jadu'n mdunipy mūd mmidzip huin'it tzōdyu'n jihuihuipy.

²¹ Pen myaj'ahuimbijtpy jibic co jāy xymidundigoy, ti anajty jibic-huinma'ñ xymimadāgy. Hue' janchtiy yajton mecxtujcin etz oyhuinma'ñ, e jadu'n jibicpi mīmādāgipy mūd oybi.

13

¹ Copicy co nidūg'ōciy jāy capxymidōogixipy yi' cajp tungmūdpi etz yi' gobierno tungmūdpi. Ca' ji ni tūg tungmūdpi huidibi jēbi y'ane'my pen Dios ca' a'ixy. Com Dios jadu'n cōtujcin ti yajhui'my co huen jii'aty tungmūdpidijc, paady ycixpi tungmūdpidijc nidūg'ōciy jim mic'ajt paady ma Dios. ² Paady jāy ajcxy pinjaty ca' ycapxymidoy ma tungmūdpidijc, hue' tundigōoyb ma Dios e tzaachyp ajcxy ypadaamyb. ³ Yi' mjtungmūdpi ca' yi' ajcxy adzigūy yi' jāy huidijaty oyhuinma'ñ mūd. Hue' janchtiy yi' ajcxy chaachytunipy yi' jāy huidi jibic-huinma'ñ mūd. Pen mdzojcp co ca' tzaachyp mbaadipy ma yi' tungmūdpi, hue' janchtiy oybi mdunipy, e huin'it m'idity jotcujc. ⁴ Com Dios ti pidāgy jada tungmūdpi mūd miich ajcxy ycixpi, jigix jēbi jotcujc ajcxy mdzinaaygixy. Pen mdundigōoyb huin'it je tungmūdpi mdzigihuipy, com yi' ymiid mic'ajt jēbi tzaachytuñ jāy ajcxy huidibi tundigōoyb. Com Dios ytung ytuunipy etz ycuuduunipy Dios ycōtujcin jadu'n nej Dios xyñajtz'ane'miym, copicy co tzaachytuñ je jāy ajcxy huidibi tundigōoyb. ⁵ Paady ycixp copicy mgapxymidohuipy tungmūdpidijc, jigix ca' miich ajcxy Dios xychaachytunipy e nañ jotcujc mnayjihuihuipy co ca' anajty ti ti mdundigoy. ⁶ Yi' tungmūdpidijc Dios ycixpi ajcxy ytuñ, e ymūd ajcxy ycōtujcin, paady ycixpi copicy nmigūedipy ajcxy.

⁷ Mgūedipy ma yi' tungmūdpidijc huidibi xypaatp. Co ajcxy cajp meeñ yajmucy, migūedipy. Co je gobierno tungmūdpi pidāgy impuestos, migūedipy. Jāy ajcxy huidijaty tungmūd myajmij'adipy, etz huidi mjtungmūd mgōmayipy. ⁸ Ca' pin minuucxy'adiyib. Tzoc jihui' mmigūgtijc, e mgūedipy oy'amy huidibi mnuucxyp. Co yi' mmigūgtijc mdzogipy mjihuihuipy ti anajty mguydundāy Dios ycōtujcin. ⁹ Jadu'n Dios ycōtujcin jaybety ymiñ,

ma jadu'n ymina'n: "Ca' mmigapxtigoyipy huingbi töxyjäy. Ca' mmigüg mmeedziipy. Ca' mjäyyaj'ögipy. Ca' mmigüg m'adzojczy ty ymiä." Pen mdzojczy mjihuiyb migüg nej miich ci'm mnaychogyi ti anajty mguydundaayi Dios y'ane'min yçotujcin. ¹⁰ Je naychojcin je nayjihuiyin ca'p je' ti jibicpi ti tzaachypi tuñ ma je migüg, co jadu'n jada mguydundauiipy ti anajty Dios yçotujcin mguydundaayi.

¹¹ Com miich ajcxy mnejhuiyb co huingon je xii je tiempo mina Jesucristo mina'n jadüg'oc ya naaxhuiñ, paady ycixpi jipp'ijxcix ajt nHuindzin Jesucristo co tzojczy yminipy. E jadachambi ti yjac-huingoni mina miina'n iich ajt nHuindzin Jesucristo, ca'ydi co oga'n nmibijcin. ¹² Canaag jimiit jäy ajcxy ahuijxy jipp'ijxpy co Dios yajnidzöga'ñiyi ajcxy y'alma, jadachambi ti yhuingoni je xii je tiempo mina n'alma ajt nidzoocin padaanim. Paady ycixp tzoc ixmajtzim yi jibic-huinma'n yi huidibi jäy ycyudumyb huidibi ca' Dios ytiy'ajt nejhuiyi. Tzoc cuychinaayim cuyjugy'ajtim Dios ytiy'ajt. ¹³ Tzoc tzinaayim jugy'ajtim tudägy. Tzoc cuyduunim Dios ytiy'ajt. Ca' huaad jadu'n ndzinaayim amügüjäy. Ca' huaad n'agootzhuidijim xiicyaax xiictinaayim. Ca' huaad ndundigooyim miid huingbi töxyjäy. Ni ca' huaad ndziptuunim ahua'nduunim. Ni ca' huaad nmigüg nmi'ixjtinaayim. ¹⁴ Tzoc cuychinaayim cuyjugy'ajtim Jesucristo ytiy'ajt. Tzoc tzinaayim tiyudädgy jadu'n nej Jesucristo tiyudädgy ti chinäy ya naaxhuiñ. Ca' nguyduunim ti jibicpi ajt n'aa njot yja'adzojczy.

14

Ca' migüg mbocy'ixy

¹ Miich ajcxy nmigügtijcch, copicy mgöbigipy agujc jotcuyc ma miich mnayyöymújcigixy ajcxy yi migügtijc huidibi mibijcp je Cristo, per ca' tiyudädgy huijihuüy je Cristo ytiy'ajt. Mgöbigipy per ca' mhuingapxpedipy, ca' ti myaj'ayucyoonipy miid yi' ajcxy. ² Ti migügtijc huidibi minamb co Dios ca' ti jicxy capx'aducy, etz jëbi ajcxy jicxy huenytim ti jicxyity. Etz nañ ji migügtijc huidibi minam co Dios ti capx'aducy tzüch, paady ajcxy jicxy'adyi je'jada'ajty aay utz. ³ Yi migüg huidibi tzüch tzützp ca' huaad ixtijy je ymügüg huidibi yjicxpy je'jada'ajty aay utz. E nañ ni yi migüg huidibi jicxp aay utz ca' huaad ixtijy yi migüg huidibi tzüch tzu'tzp, com Dios yçöbijctaayb je jäy ajcxy huidibi ti mibicy Jesucristo. ⁴ Ca' huaad miich ajcxy nmimähuipy yi mmigüg co ca' oyutuñ, tim jadu'n nipaady nej co tüg jäy nimähuipy huingbi jäy ytumbi co ca' oy ytuñ. Dios ci'm nimähuip huidi ajcxy mibijcp Jesucristo, pen oyutuñ o ca' oyutuñ. Dios ypubejtyp pinjaty mibijcp, paady madaacp ajcxy ma chinaayin.

⁵ Nijëjity ajt nmigügtijc ymina'n co ooy ycopicyity n'amay'ajtim nijëjity xii, jacjadyi jäy ymina'n co ca' ycopicyity n'amay'ajtim jada xii. Huen nidüg yci'mhuinma'n yajtuñ pen y'amay'adamy, o pen ca' amay'ada'n nije' nije' xii. ⁶ Ich ajt nmigügtijc huidi amay'ajtp nijëjity xii, hue' ajcxy tijy co Dios jadu'n tzojczy. E nañ iich ajt nmigügtijc huidi tzüch tzu'tzp, hue' ajcxy tijy co Dios jadu'n tzojczy, etz nañ yajnajxyp Dioscojuyip ma Dios miid yjicxy ypicyp ycixpi. Nañ tim jadu'n ajt nmigügtijc huidi ca' tzüch tzüdza'ñ, hue' tijy co Dios jadu'n tzojczy, etz nañ yajnajxyp Dioscojuyip miid yjicxy ypicyp ycixpi.

⁷ Ca' iich ajt nayyajtztinaayim amidzooci'm, nañ jadu'n ca' iich ajt ci'm ndzojcin co n'o'cim. ⁸ Pen njactztinaayim hue' anajty nguyduunim ajt nHuindzin Jesucristo chojcin. Pen n'o'cim yi' anajty jadu'n ti yajcöducy. Pen njactztinaayim, o pen n'o'cim, tü'ciy nipaady, com Jesucristo nHuindzin'ajtim ma yi tzinaayin etz ma yi o'cin. ⁹ Paady ycixp Cristo y'o'cy etz yjugypijcy jadüg'oc jigix jëb nihuindzin'ajttäy yi' yjäy huidibi jactztinaayb jacjugy'ajtp, etz jigix jëb nihuindzin'aty yi tiibi y'o'gy.

¹⁰ ¿Na'my co mmigüg mdzachpocy'ixy? o ¿Nej co mmigüg mdzax'ixtijy? Ca' jadu'n y'oyity co ajcxy jadu'n m'idich. Com nidüg'öciy ajt njädaanim ma Dios ytiydundac. ¹¹ Com jadu'n jaybety ymiñ ma Dios ñecy, ma jadu'n ymina'n:

Janch janch co iich, je tügpajcpi Dios, jadu'n nmina'ñich co tüg'öciy naaxhuiñjäy xyhuin-goxtinähuibich xyhuindzigihuibich, etz nañ tüg'öciy naaxhuiñjäy xycapxpaadibich co iich je' tügpajcpi je Dios.

¹² Com Dios nhuindzin'ajtim, paady ycixp nidüg'öciy iich ajt nayguëxictähuaanim ma Dios yhuinduu, chi Dios xy'amidohuaanim nej ti ndzinaayim ti njugy'ajtim nidüg nidüg.

Ca' migüg myajhuinma'ñyigooyixy

¹³ Paady ycixpi ca' huaad naynixiic naynigapxim miñ xyipy. Hue' janchtiy miich pidaaccix mhuinma'n co ca' ti mdüngixipy huidi nmigügtijc ca' jäygidägy, huidi mmigüg yajpocycähuib. ¹⁴ Nnejhuiybich tiyudädgy co ajt nHuindzin Jesucristo ytiy'ajt xyajnejhuiyim co jëbi njicxim huen tim huidi jicxy tim huidi picy. Je jicxy je picy ca' ma ycobocy. Per pen tüg migüg yhuinma'n pidacp co Dios ca' jäygidägy co yi' yjicxpy nijëjity jicxy picy, pues ca' yhuaadity co yi' jadu'mbi jäy jicxy huidi yi' ytiyco co ca' huaad njicxim. ¹⁵ Pen ca' m'oy'ity

müid tüg migüg co ti mjicxy je jicx picy huidibi yi' ytiypy co Dios ca' jadu'n yaj'cöduy, chi ca' anajty mdzocy mjihiüy yi mmigüg nej ypanyi. Com nañ Cristo ti y'ögy müid yi mmigüg ypocy ycixpi, paady ca' huaad myajtigoy yi mmigüg, müid co mjicxy huidi yi' ca' jäygidägy. ¹⁶ Ca' ajcxy m'a'ixiigixipy co jibic yajniapx yajnimiydägipy huidibi miich ajcxy myajnajxp co y'oyity. Oy miich mjahuinjhiüy Dios ytiy'ajt, per ca' huaad mdunipy huidi yi mmigüg ca' jäygidägy, e huin'it xyñigapxipy jibic. ¹⁷ Canan Dios jadu'n ytiy'ajt xyñajtz'ane'miüyim huidijaty huaad njicxim n'uucim, o huidi ca' huaad ndzüdzm, etz huidibi ti xyñajtz'ane'miüyim nej jëbi tiydudägyi ndzinaayim njugy'ajtim. Nej jëbi jotcuyc n'ijtim müid ajt nmigügtijc. Nej jëbi jotcuyc nayjihuiyim müid Dios ymic'ajt ma njot nhuinma'ñ. ¹⁸ Co jadu'n nguyduunim nej Cristo ytiy'ajt ti xyñajtz'ane'miüyim, huin'it jäygidägipy Dios etz nañ jadu'n jäygidägipy jäy ajcxy nej anajty nduunim.

¹⁹ Tzoc panicxim je huinma'ñ jadu'n nej jëbi ndzinaayim agujc jotcuyc müid ajt nmigügtijc, ca' ma ti tzip ti capxy nmüid'ajtim. Tzoc yajtuunim je huinma'ñ jadu'n nej jëbi huaad naybubejtim nidüg nidüg nej jëbi huaad nguychinaayim Dios ytiy'ajt. ²⁰ Ca' huaad nyajtichooym Dios ytung müid tzip capxy jadu'n nej huidi jëbi huaad ndzüdzm, etz huidibi ca' huaad ndzüdzm. Janch tiy'ajt co Dios ca' ti jicxy ti picy capx'aducy, per pen njicxim huidijaty nijëjity ajt nmigügtijc yajcoboicpy, e jadu'n nyajhuinma'ñyidigooyim ajt nmigüg, chi nmidundigooyim Dios ytiy'ajt. ²¹ Tiy'ajt jadu'n co ca' huaad tzüch ndzüdzm etz ca' huaad vino n'uucim, o jactijaty huidibi ajt nmigüg yajcoboicpy. Com co jadu'n ajt n'idüdzim, hue' anajty ajt nmigüg nyajhuinma'ñyidigoyaanim ma ymübijcin. ²² Miich ajcxy huidibi huinjhiuiyb Dios ytiy'ajt co Dios ca' capx'aducy ti jicxin ti pijcin, ca' mniimiydacconaxipy müid jäy ajcxy. Dios ñejhuiyb co miich mhuinjhiüy yi' ytiy'ajt. Jëbi jotcuyc mdzinähuipy pen mguychinaayb je huinma'ñ huidibi miich mnejhuiygixpy co ytuädgyity, e huin'it ca' jibic mnayjihuiuiyb ajcxy. ²³ Tundigooyb yi migügtijc huidibi jotmetz jicxp nijëjity jicxy picy, müid co tzigüiyb yi' co Dios ymijotmädiyb co ti jicxy huidi ytiypy co ycobocy. Tundigooyb jadu'n com ca' ti cuyduni Dios ytiy'ajt nej ci'm ti yajnügejy. Pen ca' nguyduunim jadu'n nej nhuinjhiuiyim Dios ytiy'ajt, tundigooyim anajty.

15

Tzocix migügtijc, ca' ñaydüg mnaychogyi

¹ Ich ajt huidibi tiydudägy nmübijcin etz nhuinjhiuiyim Dios ytiy'ajt, copicy nmimecxtujcin ajt nmigügtijc huidibi ca'ni huinjhiüy yajxon Dios ytiy'ajt. Ca' huaad ti nduunim müid ngi'm jäygidaacin ycixpi. ² Copicy nyajtuunim oyhuinma'ñ müid ajt nmigügtijc, jadu'n nej jëbi ajt nmigüg jäygidägy, etz jadu'n nej jëbi nbubejtim ajt nmigüg müid ymübijcin. ³ Com nañ Cristo ca' ti ytuñ müid yci'm jäygidaacin ycixpi, com jaybety jadu'n miñ ma Dios ñecy, ma je Cristo nimay Dios Teedy: "Miich mmidzip ajcxy huidibi xyñigapx xyñi'ojüyb, xyñigapxpich xyñi'ojüybich ajcxy nañ jadu'n." ⁴ Com tüg'öciy Dios y'ayuc huidibi ycojay jecy'ajty, hue' cojay müid ich ajt ycixpi, jigix jëbi nbubejtim ajt nbaatim. Dios ytiy'ajt xyajnejhuiyim co Dios jadu'n tzocy co nmimecxtujcin ajt nmigügtijc. Nañ Dios y'ayuc huen Dios may'ajt tunipy ma miich ajcxy mjot mhuinma'ñ, jigix jëbi mmüid'idipy tü'ciy mjot mhuinma'ñ nej Jesucristo yjot yhuinma'ñ müidity, e jadu'n jëbi mnayyay'oy'ijtigixy jotcuyc ca' ma tzip capxy. ⁶ Dios miich ajcxy xypubedipy xypudigihuiy, jigix jëbi myajtügüygixy mjot mhuinma'ñ, etz tü'ciy m'ojadäjtixipy mhuindzigüygixipy Dios Teedy etz ich ajt nHuindzin Jesucristo.

Jesucristo y'ayuc yajcapxhuäcxy ma huidibi ca' yjudiojäyity

⁷ Naygöbjicigix nidüg nidüg agujc jotcuyc, tim jadu'n nej Cristo xycöbajccixy agujc jotcuyc. Co mnaygöbjicigixipy nidüg nidüg agujc jotcuyc, huin'it Dios capxpaady y'idipy. ⁸ Janch tiy'ajt co Cristo y'oy ya naaxhuiy, oy pubejty judiojäy ajcxy, e jadu'n cuyduñ Dios ytiy'ajt huidi yajhuinhuanüy Abraham, Isaac etz Jacob jecy'ajty co jadu'n tuna'ñ müid yi' ajcxy ycixpi. ⁹ Nañ jadu'n Cristo ooy pubejty yi huidibi ca' yjudiojäyity, jaydëbi ajcxy capxpaadipy Dios, müid co ti ypa'ayoyii ajcxy. Com jaybety jadu'n ymiñ ma Dios ñecy, ma jadu'n David ymiñ:

Com miich Huindzin Dios ti xycohua'ñich paady miich ngapxpaady ma yi jäy ajcxy huidibi ca' yjudiojäyity. Ich miich huin'ihuiy müid himnos.

¹⁰ E nañ jaybety jadu'n ymiñ ma Dios yñecy:

Jotcuyc'ajtcixy quipxy müid Dios yjäy miich ajcxy huidi ca' yjudiojäyity.

¹¹ E nañ jaybety jadu'n ymiñ ma Dios ñecy, ma jadu'n ymiñ:

Capxpaatcix yi Huindzin Dios miich ajcxy huidi ca' yjudíoäyity. Capxpaatcix yi Huindzin Dios miich ajcxy nidüg'óciy naaxhuifjây.

¹² E Isaías ycojay nañ jadu'n ma yi' ñecy, ma jadu'n ymína'ñ:

Ma'xung'adamb tüg Isaí y'ap y'oc, e yi' ane'mamb yi jây huidibi ca' yjudíoäyity. Co yi jây ajcxy huidibi ca' yjudíoäyity mijpidägipy je mij'ane'mbi, hue' ajcxy yjiip'ijxpy co mōhuaanip oy'ajt.

¹³ Nmibijctzooybich Dios miid miich ajcxy ycixpi huidijaty mibijcp Jesucristo, com njijp'ijxim co Dios xymōhuaanim oy'ajtin. Nmibijctzooybich Dios miid miich ajcxy ycixpi co huen xyajjotcugihuip ajcxy, e nañ co huen xyajpooxixpy mjet mhuinma'ñ. Nmibijctzooybich Dios co huen xypubejtcixy xypudigiigixy miid yi' yjihui'ñ ymic'ajt, jaydēbi mijip'ixipy ajcxy co mbaadip oy'ajtin mijcajee ma Dios.

¹⁴ Miich ajcxy migügtijc, jotcujc nayjihuiyijich miid miich ajcxy ycixpi, com nejhuiyibich co miich ajcxy miidity oyjot oyhuinma'ñ, e nañ mhuinjihuiyb ajcxy tüg'óciy Dios ytiy'ajt, paady jēbi mnayyaj'ixpijicixy nidüg nidüg. ¹⁵⁻¹⁶ Jotmic'amy ti nyajjāymejtcoodyich miich ajcxy nijēity Dios ytiy'ajt ma jada necy huidi nyajnijayib ajcxy cham, com Dios may'ajt oy'ajt ti tuñ miid iich, e ti xyhuin'ixyich jaydēbi nduñich Jesucristo ytung ma yi jây ajcxy huidi ca' yjudíoäyity. Jadu'n nduñich miid Dios ycixpi, co ngapxhuācxich je oybi tiy'ajt jadu'n nej Jesucristo y'o'cy miid jây ajcxy ypocy ycixpi. Jadu'n Jesucristo ytuñ jigix jēbi Dios cōbigipy yi mayjây ca'pi yjudiōäyity huidi ti mibicy Jesucristo etz huidibi yi Espirito Santo ti yajhuāch je jibicp ma ajcxy yjot yhuinma'ñ.

¹⁷ Com Jesucristo ytiy'ajt yajpaatp ma iich njot nhuinma'ñ, paady ycixp ooy jotcujc nayjihuiyijich co nduñich miid Dios ycixpi. ¹⁸ Jada janchtiy iich nyajmiidmiydacy miich ajcxy je may'ajt huidi Cristo ti tuñ co ngapxhuācxich yi' y'ayuc. Ca' nyajmiidmiydacixy huidi Cristo ytumyb miid jacpinjaty. Miid co ngapxhuācxich Cristo y'ayuc, e nañ mijhuinma'ñ ndumybich miid Cristo ymic'ajt, paady mayjây ycapxymidooyb Dios huidi ca'p ajcxy yjudiōäyity. ¹⁹ Ti ngapxhuācxich tüg'óciy Cristo ytiy'ajt nej jēbi ajcxy y'alma ñidzocin paadip. Jim nyajtzondacyich Jerusalén, e ti nhuidijtāyich canaag agajp mabaad nja'tyich jim Ilirico ñaaxjot. E Dios yjihui'ñ ymic'ajt xypubejtich xypudigiigich co iich mijhuinma'ñ nduñich, etz Dios ytiy'ajt nyéjibich. ²⁰ Ooy nijot'atyich co ngapxhuācxibich Jesucristo ytiy'ajt ma anajty ca' pin jayijp capxhuācxyni. Iich oga'n Jesucristo y'ayuc jim nmicixi ma yi jây ajcxy huidi ca' anajty midoy Jesucristo ytiy'ajt. Jadu'n nduñich, jigix ca'ydí njijptigiigich ma huingbi anajty jayijp ti capxhuācxí Jesucristo ytiy'ajt. ²¹ Com jaybety jadu'n ymiñ ma Dios ñecy, ma Dios jadu'n ymína'ñ:

Yi jây ajcxy ymidohuaanip Cristo y'ayuc huidibi ca'ni anajty midoogixy. Yi jây ajcxy yhuinjihuihuamayb je Cristo ytiy'ajt huidibi ca'ni anajty nejhuiyigixy co yjiijity je Cristo.

Pablo huinmay co ñicxa'ñ jim Roma

²² Com ooy ndzachcapxhuācxich Cristo ytiy'ajt canaag agajp, paady ca' nyajniabadīyich nēcixibich ma miich ajcxy. ²³ Canaag jimijt ndzachnijot'atyich anajty nēcxa'ñich ma miich ajcxy. Ixti chamni ti nhuidijtāyich majaty anajty nhuidida'ñich. ²⁴ Paady njijp'ijxypich co jēbi nnaxihuibich ma miich ajcxy co anajty nēcixyich jim España ñaaxjot. Huācxibaambich jim ma miich ajcxy jēbi hueeni ajcxy ngapxim nmiydaacim. Nañ hue' njijp'ijxypich co xypubedaambich miich ajcxy miid ndu'amgixpich. ²⁵ Jayijp nēcxa'ñich jim Jerusalén, chiini nēcxa'ñich ma miich ajcxy. Nmīcxaamybich jim Jerusalén hueeni mēēñ huidibi nyegaamybich ma yi mibijcpidijc jim Jerusalén miid ayoobtiyc ycixpi. ²⁶ Com yi mibijcpidijc ya Macedonia etz Acaya ñaaxjot ti ajcxy yhuinma'ñ pidaaccixy co ajcxy pubeda'ñ yi ayoobtiyc jim Jerusalén huidibi mijpidacp Jesucristo. ²⁷ Ooy ajcxy jotcujc ñayjihuiyī co ymigügtijc pubeda'ñ jim Jerusalén. Paatip co pubedipy ajcxy, com ma yi judiōäy ajcxy, jim ajcxy ti paady Dios ytiy'ajt, paady paatip ajcxy huidi ca' yjudiōäyity co pubedipy yi judiōäy ajcxy. ²⁸ Co anajty ti nyajcīdigiydaaygixy je mēēñ huidibi yi migügtijc ya Macedonia etz Acaya ti yajmujccixy miid je mibijcpidijc ycixpi huidibi yajpatp jim Jerusalén, huin'it nēcxa'ñich jim España ñaaxjot. Nnaxihuaambich ma miich ajcxy co anajty jim nmicixich. ²⁹ Nejhuiyibich co anajty jim naxiyich ma miich ajcxy, je Cristo xypubedipich je ymic'ajt, e nyegipich Cristo ymic'ajt iixpejt etz nyaj'ixpigipich miich ajcxy je Cristo ytiy'ajt.

³⁰ Miich ajcxy nmigügtijc, com miich ajcxy mijpidaaccixyp iich ajt nHuindzin Jesucristo, e com miich ajcxy miid Dios yjihui'ñ ymic'ajt ma m'aa mjet, e nañ xychojcpich xyjihuiyibich, paady ycixp nbijctzooyich may'ajt, yajtūgiigixy m'ayuc mhuinma'ñ miid iich, jēbi tú'ciy Dios nmibijctzoohuim mictāgy miid iich ycixpi. ³¹ Mibijctzoogix Dios co huen xyñihua'ñich xycōhua'ñich ma yi judiōäy ajcxy jim Judea naaxjot, huidibi xyca'ixambich co ajcxy ca' mijpidāgy Jesús. Nañ mibijctzoogix Dios co yi mibijcpidijc jim Jerusalén cōbigipy ajcxy oy yajxon je pubejtin huidibi iich jim ngiyegaamy. ³² Mibijctzoogix Dios co huen

xypubedipy xypudigihuibich, jëbi ñícxibich ma miich ajcxy agujc jotcuje, ca' ti jotmay, pen Dios jadu'n tzojcp, etz nañ jëbi nhuácxibipich jim ma miich ajcxy agujc jotcuje, e jim ich nhuinma'ñ nyajpocxip. ³³ Mibijctzooybich Dios m'id miich ajcxy ycixpi, je Dios huidibi jotcuje'ajtin yejcp, co huen miich ajcxy xypubedipy xypudigihuipy. Jadu'n jadu'n. Amén.

16

Capxpooocxin nidüg nidüg ma pinjaty y'ixy'ajtyp

¹ Cham ich miich ajcxy nyajnbijccixy, cöbijccixy je ajt nmigüg töxyjây je Febe co anajty ñícxxy ma miich ajcxy. Yi' je' nidügti huidibi pubejtin tumb ma je mibijcpidijc jim Cencrea. ² Mdunipy may'ajt mgöbigipy Febe m'id ajt nHuindzin Jesús ycixpi. Com jadu'n ycopicyity co jây huidibi mibijcp Jesucristo huen naymigüg'ájtigixy. Mbubedip mbudigihuip jadu'n nej yi' jotmay midity. Yi Febe ti ooy mayjây pubety, e nañ ti xypubetyich.

³ Nguejxypich capxpooocxin ma jada necy m'id yi Priscila etz Aquila huidibi ich anajty m'id ooy oy nduñ co ngapxhuácxich Cristo ytiy'ajt. ⁴ Yi Priscila etz Aquila yojx ytooc ajcxy yjugy'ajtin m'id ich ycixpi, ca' ydi n'ögyich. Nyajnajxypich jâygidaacin ma Dios m'id yi' ajcxy ycixpi, co ti xypubetyich ajcxy. E nañ jadu'n tüg'öciy jây ajcxy huidibi ca'pi yjudíoáyity yajnajxcixy jâygidaacin ma Dios m'id yi' ajcxy ycixpi. ⁵ Nguejxypich capxpooocxin nañ jadu'n ma jada necy m'id yi mibijcpidijc ajcxy huidijaty naymujccip ma Priscila etz Aquila ajcxy ytiyc. Etz nañ nguejxypich capxpooocxin ma yi Epeneto huidibi ooy ndzocyich. Yi' je' tim jayijp huidibi m'ijpidaac Cristo jim Acaya ñaaxjot. ⁶ Etz nañ nguejxypich capxpooocxin ma María, yi' ooy ti ytuñ m'id miich ajcxy m'id Cristo ycixpi. ⁷ Etz nañ nguejxypich capxpooocxin ma yi Andrónico etz Junias. Ich n'amigüg ajcxy huidibi ti ypujxtijc iñây quipxy m'id ich. Capxpaady ajcxy y'ity m'id yi apóstoltijc. Jacjayijp ajcxy m'ijpidacy Jesucristo ca' ydi ich.

⁸ Etz nañ nguejxypich capxpooocxin ma yi Amplias, huidibi ooy yajxon m'ijpidágy ajt nHuindzin Jesucristo. ⁹ Nañ nguejxypich capxpooocxin ma yi Urbano huidibi xym'íduñich co ich anajty ngapxhuácxich Jesucristo ytiy'ajt. Nañ jadu'n nguejxypich capxpooocxin ma yi Estaquis huidibi oy ndzocy njihuüyich. ¹⁰ Nañ nguejxypich capxpooocxin ma yi Apeles, huidibi ooy tiy'ajt ti yecy co yi' ymibijcxy Cristo tydudágy. Nañ nguejxypich capxpooocxin ma yi Aristóbulo etz jac pinjaty huidibi yajpatp ma yi' ytiyc. ¹¹ Nañ nguejxypich capxpooocxin ma ich n'amigüg yi Herodión. Etz nañ nguejxypich capxpooocxin ma yi Narciso yjuugy ym'igüg huidibi m'ijpidacp ich ajt nHuindzin Jesucristo. ¹² Nañ nguejxypich capxpooocxin ma yi Trifena etz Trifosa huidijaty tumb ma ajt nHuindzin Jesús ytung. Nañ nguejxypich capxpooocxin ma Pérsida, je migüg huidi oy ndzocyich, etz nañ huidi ooy ytuñ ma ajt nHuindzin Jesucristo ytung. ¹³ Nañ nguejxypich capxpooocxin ma yi Rufo, je huidibi yi mibijcpidijc ycómaayb. Nañ nguejxypich capxpooocxin ma yi' ytaj, com jadu'n njihuüyich jadu'n nej jihuüy yi' ndaj'adyijch. ¹⁴ Nañ nguejxypich capxpooocxin ma yi Asíncrito, yi Flegonte, yi Hermas, yi Patrobas, yi Hermes etz ñan tüg'öciy yi mibijcpidijc huidi jim yajpatp ma yi' ajcxy. ¹⁵ Nañ nguejxypich capxpooocxin ma yi Filólogo, yi Julia, yi Nereo etz yi' y'uch töxyjâybi, yi Olimpas, etz nañ tüg'öciy yi mibijcpidijc huidibi yajpaatp jim ma yi' ajcxy.

¹⁶ Naygapxóocxigix xic xon nidüg nidüg. Naygimájtzigix miñ yxipy agujc jotcuje. Tüg'öciy huidibi mibijcp Jesucristo ma yi jacjaydii cajp, yquejxyp ajcxy capxpooocxin ma miich ajcxy.

¹⁷ Miich ajcxy migügtijc, may'ajt nbijctzooybich naygüend'adi' ajcxy ma yi jây ajcxy huidibi mimiimb ayuc ca'pi ytiy'ajity, huidibi nigoob yjâyajtziptuna'ñ yjâybijc-huácx'a'ñ, huidibi ca' ixa'ñ yi Dios ytiy'ajt huidibi ti m'ixpijccixy. Puuhuáctüd miich yi' ajcxy. ¹⁸ Com yi jây ajcxy huidibi ymigügtijc yajhuinma'ñyidigooyb, ca' ajcxy tuñ Jesucristo ytung. Hue' ajcxy yaj'ixpijcp huidi yci'mhuinma'ñ yci'mdzojcin. Je' ajcxy huin'ínigixp je jây ajcxy huidibi ca' mijcajee y'ixpicity. Yi ayuc huidibi ymihuidijtyp, jadu'n yajmidoy nej jihuüy oy ytiy'ity yjanchity, per ca' yi' yjanchity. ¹⁹ Com mayjây ti xyajmidooych jadu'n nej miich ajcxy ngapxymidoy Jesucristo, paady jotcuje nayjihuüyijich m'id miich ajcxy ycixpi. Ndzoj-cypich co miich ajcxy mnejhuihuipy huidibi oyhuinma'ñ jaydëbi mdungixipy ajcxy etz ca' jibic-huinma'ñ mdúngixipy. ²⁰ Dios oyhuinma'ñ etz mic'ajt ti xymooyim jëbi ndzinaayim m'id ajt nmigügtijc agujc jotcuje, ca' ma tzip capxy. Tim huingon je xii je tiempno Dios yajcódigoya'ñ yi mujcu' ymic'ajt, e yi' xypubedip xypudigihuip jëbi mmimadägipy yi ca'oybi. Nmibijctzooybich Dios m'id miich ajcxy ycixpi: co ich ajt nHuindzin Jesucristo huen may'ajt oy'ajt tuñ m'id miich ajcxy jabom jabom.

²¹ Je Timoteo huidibi tumb m'id ich co ngapxhuácxich Jesucristo ytiy'ajt xyajniguejxp ajcxy capxpooocxin. Nañ jadu'n Lucio, Jasón etz Sosípater ich n'amigüg ajcxy, xyajniguejxp capxpooocxin.

²² Ich Tercio huidibi cojaayb Pablo y'ayuc ma jada necy, nañ nguejxypich capxpooocxin ma miich ajcxy, com ich nañ jadu'n nyajpaadyich ma ajt nHuindzin Jesucristo.

²³ Nañ jadu'n Gayo xyajniguejxp capxpoocxin, yi' xyajjättacich. E nañ je jäy ajcxy huidibi mijpidacp Jesucristo huidibi ajcxy nayyöymujcip ma Gayo ytiç yquejxyp ajcxy capxpoocxin ma miich ajcxy. Erasto je cajp ytesorero etz ajt nmigüg huidibi yx# Cuarto, nañ xyajniguejxp ajcxy capxpoocxin.

²⁴ Nmibijctzooybich Dios müd miich ajcxy ycixpi jabom jabom co #ch ajt nHuindzin Jesucristo huen may'ajt oy'ajt tuñ ma miich ajcxy. Amén.

Je capxpoocxin ma yaj'übaady yajcapxpaady Dios

²⁵ Tzoc cömayim Dios, tzoc ojadajtim, tzoc huin'ühuim müd himnos. Dios müd ymic'ajt jëbi xypubedipy xypudigihuipy ajcxy, jaydëbi ajcxy tiydudägy mmibigipy Jesucristo, ca'ydi mjetmetzcüygy. Tim jadu'n nej je oybi tiy'ajt huidibi ngapxhuäcxpich tim jadu'n nej je Jesucristo ytiy'ajt huidibi jacjadyii jäy ycapxhuäcxixyp. Jada je tiy'ajt huidibi jecy'ajty ca' pin huinjihuipy huidibi Dios ti xyajnejhuüym. ²⁶ Dios ti xyajhuinjihuüym nej yhuimbidzimy je ayuc huidibi je profetas ajcxy ycojay jecy'ajty. Dios huidibi tzinaayb huinixii huinitiempo, ane'mb co huen yajcapxhuäcxy jada tiy'ajt oybi ma tüg'öciy naaxhuñjy, jigix jëbi mayjäy mijpidägip etz capxymidoohuipy Dios.

²⁷ Müd co Jesucristo ooy mijhuinma'ñ tuñ müd #ch ajt ycixpi, paady tzoc cömayim, tzoc ojadajtim etz tzoc huin'ühuim müd himnos huinixii huinitiempo yi tügajcpí Dios huidibi ñejhuíydaayb tüg'öciy. Jadu'n ngapxcíxyich. Amén.

1 CORINTIOS

Yi Miðügpí Necy Huídibí San Pablo Yajñigüeix Je Mibijcpidijc Jim Corinto

¹⁻² Hich Pablo, Dios jadu'n tzojcp co Jesucristo xyajñibicyich co ngapxhuäcxibych yí' y'ayuc. Hich etz ajt nmigüg Sóstenes nijayñybich miich ajcxy tüg'óciy huidibí jim Corinto huidibí mijpidacp Dios etz ñayyöymújcigixy jim miid Dios ycixpi. Nijayñybich miich ajcxy huidibí Dios ti yaj'ahuimbijttäy tudägy miid Jesucristo co y'o'cy miid ajcxy mbocy ycixpi. Nijayñybich miich ajcxy huidibí Dios ti huin'ixy, jaydëbí mmiid'idipy huädz jot huädz huinma'ñ. Nañ jadu'n nijayñybich tüg'óciy je jäy huenyma'amyity huidibí Dios mibijctzooob ojadaajtp miid ich ajt nHuindzin Jesucristo yxii. ³ Ndzojcypich co ich ajt nDios Teedy etz ajt nHuindzin Jesucristo oy'ajt may'ajt tunipy miid miich ajcxy, etz xyajjotcugihuipy ajcxy.

Oy'ajt miid Cristo ycixpi

⁴ Nyajñajxypich Dioscojuyip ma Dios jabom jabom miid miich ajcxy ycixpi, miid co Dios may'ajt oy'ajt ti tuñ miid miich ajcxy ycixpi ma Jesucristo. ⁵ Co ti mmijpidaaccixy Jesucristo, oybi ti mbaatcixy ma tüg'óciy mdzinaayin mjuy'ajtin. May'amy capxy ayuc oybi ti mbaatcixy, etz may'amy huinma'ñ oybi ti mbaatcixy. ⁶ Ma miich ajcxy mdzinaayin mjuy'ajtin etz mgapxy m'ayuc ñigüëxigipy Cristo ytiy'ajt etz ymic'ajt. ⁷ Dios miich ajcxy ti xymöy tüg'óciy ymic'ajt. Ca' ti myajtigoy'ijtcixy ma mdzinaayin mjuy'ajtin huidibí Dios ñiyejcpy, ma je' m'ahuixcixy co Dios yajñigüëxiga'ñ jadüg'oc ya naaxhuin' ajt nHuindzin Jesucristo. ⁸ Jesucristo miich ajcxy xyhuijt'ijtp tudägy, ixti cooni ycixipy tigoyipy je naaxhuin'iybi, e co anajty yí' tiyduñ naaxhuin'iyjäy ajcxy miid ypocy ycixpi, ca' miich ajcxy mbocycähuipy. ⁹ Dios yjatytimycuydunipy yí' y'ayuc miid miich ajcxy, ca' xy'ixmadzaangixy ni mina xii, com yí' ti xyhuin'ijxcixy co miid mnaymigüg'ajtigixy yí' y'ung, ich ajt nHuindzin Jesucristo.

Naybijc-huäcxii ma je mibijcpidijc

¹⁰ Migügtijc, ich miich ajcxy nmínucxtacyp miid Jesucristo yxii co tungixy may'ajt nay'yayuc-huinjihuüiyigix, e ca' mnaybijc-huäcxigixy. Tzinaagix xic xon miid tú'ciy mjot mhuinma'ñ. ¹¹ Miich ajcxy migügtijc, ti je Cloé y'amigügtijc xyajñimäyich co ooy miich ajcxy mnaychip'ijxigixy, e ca' mnay'yayuc-huinjihuüiyigixy. ¹² Miid jada ycixpi mnina'ñich co nijëjity miich ajcxy jadu'n minaaangixy: "Hich Pablo nmijnicxpejtpyich." E nijëjity yminaangixy: "Hich Apolos nmijnicxpejtpyich." E nijëjity yminaangixy: "Hich Pedro nmijnicxpejtpyich." E nijëjity yminaangixy: "Hich Cristo nmijnicxpejtpyich." ¹³ ¿Nej Cristo ti ñaybijc-huäcxiiyij? Ca'. ¿Nej Pablo yajcruudzpejti miid miich ajcxy ycixpi? Ca'. ¿Nej ti miich ajcxy mnñbejtcixy miid Pablo yxii? Ca' yjadu'nity. ¹⁴ Nyajñajxypich Dioscojuyip ma Dios co ca' jac ni pin ich ti ngayajñibety. Jëda'ajty ti nyajñibetyich Crispo etz Gayo. ¹⁵ Jadu'n ti nduñich je'gixpi co ca' huaad jäy ajcxy yminaangixy co ti ajcxy ñibety miid Pablo yxii. ¹⁶ Nañ jadu'n ti nyajñibetyich yí' Estéfano miid yí' yjuugy ymigüg ajcxy. Jac ni je' ca' njäyemehich pen ti nyajñibetyich. ¹⁷ Com Cristo ca' xyquejxyich jäy yajñibejtpi. Hue' janchtiy ti xyquexyich co ngapxhuäcxibich yí' y'ayuc ytiy'ajt oybi. Ca' nyajtuñich ixpicytijc y'ayuc yhuinma'ñ. Co ixipy nyajtuñich ixpicytijc y'ayuc yhuinma'ñ, naadig'ajt ixipy co Cristo y'o'cy ma yí' cruudz miid ajt nbocy ycixpi.

Cristo ymiid Dios ymic'ajt etz yí' y'ixpijcin etz ytiy'ajt

¹⁸ Yi jäy ajcxy huidibí y'alma tigoyam, loci huinma'ñ yí' tijcixy co Cristo y'o'cy ma yí' cruudz miid ajcxy ypocy ycixpi. Per ich ajt pinjaty y'alma nidzögam, hue' minaanim co jada ayuc tiy'ajt miid Cristo ycixpi, ymiid yí' Dios ymic'ajt. ¹⁹ Com jaybety jadu'n ma Dios ñecy, ma Dios jadu'n ymina'ñ:

Nyajtigoyaamybich yí' ixpicytijc y'ayuc yhuinma'ñ.

Nijbijcibich yí' cohuinma'ñyädijc ajcxy yhuinma'ñ.

²⁰ ¿Ti mic'ajt ymiid yí' cohuinma'ñyädijc ajcxy? ¿Ti mic'ajt ymiid yí' ixpicytijc? ¿Ti mic'ajt ymiid yí' huidibí ajcxy nay'ixquipxip miid ixpijcin? Ca' ti mic'ajt miidity yí' ajcxy, com Dios ti yaj'ahuimbity yí' naaxhuin' y'ixpijcin tzuu huinma'ñ loci huinma'ñ. ²¹ Com Dios jadu'n ti tzocy co jäy ajcxy ca' padaangixy Dios ytiy'ajt ma yí' naaxhuin'jäy ajcxy y'ixpijcin. Dios yjäygidacpy co jëbi jäy ajcxy y'alma nidzögipy co ajcxy mibigipy je Dios y'ayuc huidibí ngapxhuäcxypich. Je Dios y'ayuc ytiy'ajt huidibí ich ajcxy ngapxhuäcxpy, yí' yí' naaxhuin'jäy ajcxy huinjihuüiyigixyp nej tzuu huinma'ñ loci huinma'ñ.

²² Yi judíojäy ajcxy ooy tzachtzojccixy co Dios tunipy ijxpejt mijhuinma'ñybi. Yi griego jäy y'ixtaagixyp ayuc huinma'ñ etz huenhuidibity ixpijcin. ²³ Hich ajcxy ngapxhuäcxich

co Cristo y'o'cy ma yi cruudz müd jäy ajcxy ypocy ycixpi. Yi maybi judíojäy ajcxy ca' mijpidaangixy ca' cöbagaangixy iich ajcxy n'ayuc. Etz yi maybi jäy ajcxy huidibi ca'p yjudíojäyity, hue' tijcixy co tzuu huinma'n loci huinma'n iich ajcxy n'ayuc. ²⁴ Per yi jäy ajcxy huidibi Dios ti yhuin'ijxigixy, huen yjudíojäyity, o huen ycajudíojäyity, hue' ajcxy tijcixy co je Cristo ymüid anajty Dios ymic'ajt etz ymüid anajty Dios y'ayuc ytiy'ajt. ²⁵ Co ixpicytijc tijcixy co Dios ytung, tzuu huinma'n loci huinma'n je', nigi jac'oyhuinma'n yi' huidibi Dios tumyb, ca'ydí huidibi jäy ajcxy ytumyb. Co ixpicytijc yminaangixy co Dios ca' ymic'ajt müdity, nigi jacmic'ajt müd yi', ca'ydí huidi jäy ajcxy ymüid.

²⁶ Migügtijc ajcxy, huinmay müich ajcxy jadu'n nej Dios ti xyhuin'ijxcixy. Ni may müich ajcxy huidibi ca' y'ixpicyity, tim nihueeni huidibi ixpicyip ma müich ajcxy. Ni may müich ajcxy huidibi ca' ti mic'ajt, ca' ti ane'min müdity. Ni hueeni müich ajcxy huidibi mic'ajt müd etz ane'min müd. Ni may müich ajcxy huidibi oyñipinjäyity. Ni hueeni müich ajcxy huidibi y'ap yteedy rey'ajtp. ²⁷ Per Dios ti huin'ixy yi jäy ajcxy huidibi ca' y'ixpicyity co jadu'n yajtzo'yduna'n yi ixpicyjäy yi cohuinma'n jäy. Dios ti huin'ixy yi jäy ajcxy huidibi ca' ti mic'ajt müdity, müd co jadu'n yajtzo'yduna'n yi jäy ajcxy huidibi mic'ajt müd, ane'min müd. ²⁸ Dios ti huin'ixy huidibi jäy ajcxy ca' mij'ijx mijpidaaccixy, huidibi jäy ajcxy ytiy' co ca' y'oyity. Dios jadu'n tuuñ co yajcödigoya'n yi huidibi jäy ajcxy mij'ijxp mijpidacp, je huidibi jäy ajcxy ytiy' co y'oyity. ²⁹ Jadu'n Dios ytuñ co ca' tzocy co ni pinjäy ca' ñaygömayiib ci'm ma yi' yhuinduu. ³⁰ Per Dios ci'm yaj'oyiij nej jëbi müich ajcxy myajpatcixy müd Cristo Jesús. Dios ci'm yaj'oyiij nej jëbi ajt nbaatim ixpjin ma Cristo. Nañ jadu'n yaj'oyiij nej jëbi Cristo xyaj'ahuimbijtim tudägy, jaydëbi Dios xycöbajcim nej tudägy jäy. Nañ jadu'n Dios yaj'oyiij nej jëbi huaad nbaatim ajt nhuädzjot nhuädzhuinma'n ma Cristo. Nañ jadu'n Dios yaj'oyiij nej jëbi Cristo xyñihuaanim ajt n'alma etz njugy'ajtin. ³¹ Paady ycixpi jaybety ymiñ ma Dios ñecy, ma jadu'n ymina'n: "Pinjaty naygömayaanip ci'm, huen naygömayii müd co mibicy ajt nHuindzin Dios."

2

Je y'ayuc ytiy'ajt, je Cristo huidibi cruudzpejt

¹ Per co n'oyich ma müich ajcxy jayhuin, ngapxhuäcxyich anajty Dios y'ayuc ytiy'ajt, oy'amy nyaj'ixpicyich, ca' nyajtuñich ixpicyjäy ajcxy y'ayuc, etz nañ jadu'n ca' nyajtuñich tzipjatyp: ayuc. ² Co jim n'ijtyich ma müich ajcxy jayhuin, chi huinma'ñybidacyich co ca' jac ti ayuc ti huinma'n nyajmüidmydägaangixy, jë'yi janchtiy nyajmüidmydägaangixy Jesucristo etz jadu'n nej je' yajcruudzpejti müd jäy ajcxy ypocy ycixpi. ³ Co jim iich anajty nyajpaadyich ma müich ajcxy, chi ooy yung naxy naybidaacich, ooy ndzigiiy njihuiiich. ⁴ E co nmüidmydaacyich müich ajcxy, co ngapxhuäcxyich Dios ytiy'ajt ma müich ajcxy, ca' pi iich müich ajcxy nyajmibicy müd ixpicytijc y'ayuc müd tzipjatyp ayuc. Je Espíritu Santo xypubejtpich anajty co ajcxy nyaj'ijxy Dios ymic'ajt, e paady ycixpi ti ajcxy mmibijccixy Dios y'ayuc. ⁵ Jadu'n je Espíritu Santo xypubetyich anajty, jigix müich ajcxy mijpidaagipy Dios, ca' nminaanim müd co ti mmüidogixy oyjatyp ayuc huidibi jäy ajcxy ti cojy ti macxy. Ti mmijpidaaccixy Dios com ti m'ijxcixy ti mjihuiygixy Dios ymic'ajt.

Dios xyajnejhuüim yi' ytiy'ajt müd y'Espíritu Santo

⁶ Oy co ti nyajmibicyich müich ajcxy müd ayuc huidibi ca' chipjatyity, per nañ jadu'n nyaj'ixpicyich oyjatyp ayuc tzipjatyp ayuc yi mibijcpidijc ajcxy tübi yhuinma'n ymiñni ymejchni. Tigachjaty iich n'ayuc ndiy'ajt e ca' ñaybadyi müd naaxhuiñjäy ajcxy y'ayuc ytiy'ajt huidibi ca' mibijccixy huidibi tzinaayb jugy'ajtp jadachambi xii jadachambi tiempo. Iich n'ayuc ndiy'ajt ca' ñaybadyi müd je jäy ajcxy y'ayuc ytiy'ajt huidibi ane'mb ya naaxhuiñ, yi jadu'mbi jäy yi' ajcxy yjugy'ajtin cixamb tigoyamb tücc'yi. ⁷ Iich ajcxy nyaj'ixpicipy Dios y'ayuc ytiy'ajt huidibi ca' ni pin jecy'ajty nejhuüi huinjhuüi, je ayuc tiy'ajt huidibi Dios ymüid coyüch, je ayuc tiy'ajt huidibi Dios ti cojy ti macxy jecy'ajty ca'ni anajty naaxhuiñybi chondacy. Dios ycoj ymacx jada ayuc, jaydëbi ajt n'alma ñdzocim huinixi huinitioempo. ⁸ Ni tüg mij'ane'mbi huidibi tzinaayb jadachambi xii jadachambi tiempo, ca' huinjhuüi jada ayuc. Co ixypy ajcxy huinjhuüi, ca' ajcxy cayajcruudzpejty je Huindzin Dios y'ung, je huidibi müd Dios y'oy'ajtin ymij'ajtin. ⁹ Com ca' ajcxy huinjhuüi Dios y'ayuc, paady ycixpi jaybety ymiñ ma Dios ñecy, ma jadu'n ymina'n:

Ni tüg jäy ca' ixy, ni tüg jäy ca' midoy, ni tüg jäy ca' yhuinma'ñybaady jadu'n nej Dios ni'ixi müdity müd je jäy ajcxy ycixpi huidibi yi' mijpidaacip yajmij'ajtp.

¹⁰ Müd co nmijpidaacim Dios, paady ycixpi Dios yaj'oyiij nej jëbi je Espíritu Santo xyajnejhuüim yi' ytiy'ajt. E je Espíritu Santo yhuinjhuüidaayb ñejihuiydaayb tüg'óciy, ixti yhuinjhuüidaayb nej Dios yhuinma'n ti pidägy co tuna'n, je huidibi ca' pin nejhuüi.

¹¹ Ca' pinjäy jëbi huinjhuüi nej jadügi jäy yjot yhuinma'n müdity. Je jäy yci'mhuinma'n jëbi huinjhuüi nej je' yci'mjot yci'mhuinma'n müdity, ca' jac pin. Nañ jadu'n ca' jac

pin jëbi huinjihuüy nej Dios yjot yhuinma'n müdity. Dios yci'mjihui'n huinjihuüy nej Dios yjot yhuinma'n müdity. ¹² Dios ca' xyaj'adigüym xyajjottigüym huingjây yjihui'n ymic'ajt. Hue' Dios xyaj'adigüym xyajjottigüym y' yci'mjihui'n yci'mmic'ajt, paady ycxip jëbi huinjihuüyim tüg'öciy huidibi ti xymooyim. ¹³ Ich ajcxy nyajmüdmüydacpy müich ajcxy je ayuc tiy'ajt huidibi je Espiritu Santo xyaj'ixpijccixyich. E ca' nyajmüdmüydaaccixy je tiy'ajt huidibi ti n'ixpicyich ya naaxhuin' huidibi jây ajcxy ti cojy ti macxy. Nyaj'ixpijccixy Dios y'ayuc ytiy'ajt huidibi je Espiritu Santo xyajnejhuüyich. Ich ti nyaj'ixpicyich y' ajcxy huidibi müd Dios yjihui'n ymic'ajt ma y'aa yjot.

¹⁴ Pinjaty ca' müdity Dios yjihui'n ymic'ajt, ca' y' cöbiga'n je tiy'ajt huidibi je Espiritu Santo xyajnejhuüyim. Com y' ajcxy ytiy' co jada tiy'ajt tzuu huinma'n loci huinma'n y'. Nañ ni ca' ajcxy Dios ytiy'ajt huinjihuüy, com ca' ajcxy müdity Dios yjihui'n ymic'ajt huidibi yajnejhuüy Dios ytiy'ajt. ¹⁵ Je jây huidibi ymüd'ajtipy Dios yjihui'n ymic'ajt, y' jëbi yajciyöy yajtecyöy tüg'öciy pinjaty yjot yhuinma'n. Per ca' y' huaad pinjaty yajciyöy yajtecyöy yjot yhuinma'n. ¹⁶ Com jadu'n Dios ymina'n ma ñeey: "¿Pin jây huinjihuüy nej Dios yhuinma'n müdity? Ca' ni pin. ¿Pin jây huaad Dios yaj'ixpicy? Ca' ni pin." Oy ca' pin huinjihuüy jecy'ajty nej Dios yhuinma'n müdity, jadachambi ich ajt huinjihuüyim nej Cristo yhuinma'n müdity.

3

Je huidibi ajcxy mübijcp ytungixy ma Dios

¹ Migügtijc ajcxy, co ti n'oyich ma müich ajcxy, chi nmüdmüydaaccixy jadu'n nej jihuüy müich ajcxy mhuinma'n müdity nej naaxhuinjây ajcxy yhuinma'n müdity huidibi ca' ymübijccixy. E ca' anajty müich ajcxy müdity je mhuinma'n huidibi je Espiritu Santo yecpy. Müich ajcxy nmübijcin ma Cristo jadu'n y' nipaady nej ma'xungdjic ymübijcin. ² Ti nyaj'ixpijccixy Dios y'ayuc huidibi ca' jëbi tzip mhuinjihuüyigixy. Jadu'n nipaady nej jây ajcxy yaj'ügy leche y' ma'xungdjic, müd co cacöbiga'n caayin uucin huidibi jemxy cidacp ma yjot. Ca' müich ajcxy anajty ti mnay'n'ixiyigixy ma mjot mhuinma'n nej jëbi mhuinjihuüyigixy Dios y'ayuc y' tzipjaty. Chambaadni ca' mnay'n'ixiyiini ajcxy ma mjot mhuinma'n nej jëbi mhuinjihuüyigixy y' tzipjaty ayuc. ³ Chambaadni müich ajcxy myajtuñ mjot mhuinma'n jadu'n nej naaxhuinjây ajcxy müdity huinma'n ca' p' ymübijccixy, chambaad mmi'ixtinaaygix y' migügtijc, chambaad mnaychip'ixigix naybjic-huäcxigix. Jadu'n m'idiitccixy nej jacyadyi jây ajcxy y'idiitccixy huidibi ca' ymübijccixy. ⁴ Com nijëjity müich ajcxy minaangixy: "Ich naygomajtzip ma Pablo." Etz nijëjity minaangixy: "Ich naygomajtzip ma Apolos." Jada je tiy'ajt co ca' mnay'ayuc-huinjihuüyigixy tim jadu'n nej jây ajcxy ca' nay'ayuc-huinjihuüyigixy huidibi ca' müdity Dios yjihui'n ymic'ajt.

⁵ ¿Pin je' je Apolos? ¿Pin je' je Pablo? Ich Pablo etz Apolos nimetz ajcxy nduñ ma Dios ytung, e ich müich ajcxy nyajmübijccixy Cristo. Ich ajcxy nduñ nidüg nidüg je tung huidibi Dios xymooyich. ⁶ Ich jayijp'aty müich ajcxy ti nyaj'ixpicyich, e Apolos jac'axam. Jadu'n müich ajcxy nipaady nej tüg moc cam huidibi ich ti nñpy, e Apolos jac'axam ti pidägy nñ. Per Dios ti yajyeegy je moc. ⁷ Ca' ytimyñëjity pin ti yñpy, e pin ti pidägy je nñ. Dios y' tügpaic copicyip. Com y' yajyeecp je moc. ⁸ Y' huidibi nñpy etz y' huidibi nñ pidacp, quipxyjaty ajcxy. Dios yegamb je oy'ajt ma nidüg nidüg jadu'n nej anajty ti ytungixy. ⁹ Com ich etz Apolos naymigüg'ajtibich ajcxy ma Dios ytung. Jadu'n müich ajcxy nipaady nej Dios ycam huidibi Apolos ti tuñ etz huidibi ich ti nduñ.

Nañ jadu'n müich ajcxy nipaady nej tüg tijc huidibi Dios ycojpy. ¹⁰ Dios ti xyajñibicyich y' ytung ndunipyich. Ti nyaj'ixpicyich müich ajcxy Dios y'ayuc ytiy'ajt. Jadu'n ich nipaady nej tüg pojtzp' oybi huidibi ti yajtzondägy je tzaadjic poch. Chi huingjây xyajy'ixpijccixy. Jadu'n y' nipaady nej huingbi pojtzp' huidibi je tzaadjic poch jacyijppodzyib. Copicy co nidüg nidüg huidibi yaj'ixpijcp Dios ytiy'ajt yajxon yaj'ixpijccixy. ¹¹ Dios ti pidägy Jesucristo tügpaic huidibi huaad nmübijcin, e ca' huaad pidacy huingbi. Jadu'n Jesucristo nipaady nej tüg tijcpoch chondägy. ¹² Co pinjaty yaj'ixpicy Dios y'ayuc ytiy'ajt tydudägy, chi jadu'n nipaady nej jihuüy pinjaty tijcpojtzp müd ori, müd plata etz müd tzaa oyjatyp. Pinjaty ca' yaj'ixpicy yajxon Dios ytiy'ajt, jadu'n nipaady nej jihuüy tijcpojtzp müd quipy, müd miy, etz müd moc'aay. ¹³ Jiini co anajty xñ tiempo paady mina Cristo tyduna'n y' yjây huin'it ñiguëxigip nej Dios ytumbi ajcxy ti ytungixy co ti yaj'ixpijccixy. Niguëxigip pen oy ti yaj'ixpijccixy Dios ytiy'ajt, o pen ca' oy ti yaj'ixpijccixy. Jadu'n nipaady nej Dios jün pidägy ma je tijc, e je quipy, je miy, etz je moc'aay tigoydähuipy ma je jün. Etz je ori, plata etz tzaa oyjatyp ca' ytigoydähuipy müd je jün. ¹⁴ Peni oy yajxon pinjaty ti yaj'ixpicy Dios ytiy'ajt, chi Cristo premio möhua'n jada jây co ooy yajxon ti yaj'ixpicy. E jadu'n y' ytung nipaadip nej je ori, plata, etz tzaa'oyjatyp huidibi ca' ytigooy ma je jün. ¹⁵ Pen je Dios ytumbi ca' oy yajxon ti yaj'ixpicy Dios y'ayuc ytiy'ajt, chi ca' premio pada'n. Jadu'n y' ytung nipaadip nej

je quipy, je miy, etz je moc'aay huidibi ti ytigoy ma je jün. Jadu'n nipaadip müd jada jäy nej jihuüy ti ñaxy jünjoty, e ti ytigoydäy ma je jün tijaty ymüd, je'yi yjugy'ajtn ti yajtzögy.

¹⁶ ¿Nej ca' mnejhuüygixy? Pen Dios yjihuü'ñ ymic'ajt yajpat ma miich ajcxy, jadu'n nipaady nej jihuüy Dios ci'm ti chinaydacpicy ma miich ajcxy, nej jihuüy miich ajcxy Dios xytijc'adyi. ¹⁷ Pen ji pinjaty huidibi yajhuindigoy Dios chinaydac, huin'it Dios yajtigoya'ñ jada jäy. Yi Dios chinaydac huadz'it amay'it yi', com Dios ti chinaydacpicy ma miich ajcxy huidibi mibijccixp.

¹⁸ Ix mnayhuin'ñigix ci'm. Pen nidügti miich ajcxy mnaydijyii co oy ixpicyity ma naaxhuüñjäy y'ixpijcin, copicy jäydigoyipy yi' y'ixpijcin, jigix ixpigipy Dios ytiy'ajt. ¹⁹ Yi naaxhuüñjäy y'ixpijcin jadu'n nipaady müd Dios nej tzuu huinma'ñ loci huinma'ñ. Paady jadu'n yjaybetyity ma Dios ñecy ma jadu'n ymina'ñ: "Dios yajpocycähuip yi' ixpicyity müd yci'm'ayuc müd co chachnaygömayi." ²⁰ E jadu'n yjaybetyity jadüg'it ma Dios ñecy ma jadu'n ymina'ñ: "Je Huindzin Dios ñejhuüiy co yi' ixpicyity y'ayuc yhuinma'ñ ca' choobaady." ²¹ Ni pin ca' huaad amij agix ñayjihuüy, müd co mjinxcipety oyñipin y'ayuc. Miich ajcxy müd ajtaayb tüg'öciy tijaty. ²² Miich ajcxy müd ajtpy Pablo, Apolos etz Pedro. Nañ jadu'n miich ajcxy müd ajtpy je naaxhuüñyi, je tzaip, je jugy'ajtn, je o'cin, je xi je tiempo huidibi ji yajpatp, etz huidibi mim cidaacp. ²³ Je Cristo müd ajtpy miich je' ajcxy ci'am etz Dios ymüd ajtpy Cristo ci'am.

4

Je apóstoles ajcxy ytung

¹ Jëbi jadu'n co ñich etz Apolos, ñich miich ajcxy xytijcixy Cristo ytumbi huidibi Dios ti xyajñibijccixyich, nyaj'ixpijccixyich etz nguend'ajtcixyich yi' y'ayuc ytiy'ajt huidibi jecy'ajty ca' pin nejhuüy huinjihuüy. ² Pinjaty cuend'ajtp huingjäy yje', copicy tyduädgy ytuñipy, jaydëbi yi' yhuindzin yjäygidägyib yi' ytung. ³ Per ca' ooy nduñich cuendi co miich ajcxy xyajcüyöy xyajtecüyöy ñich nbocy. Nañ jadu'n ca' ooy nduñich cuendi co ixypy tüg juez yajcüyöy yajtecüyöy ñich nbocy. Nañ jadu'n ca' nyajcüyöyich nyajtecüyöyich ngi'mbocyich. ⁴ Ca' nayjihuüyijich co nmidundigooyich miich ajcxy. Ca' jadu'n nmina'ñich co ca' ma ndundigooyich. Hue' ajt nHuindzin Jesucristo yi' je' xyajcüyöy xyajtecüyöy ñich nbocy, ca' jac pinjaty. ⁵ Paady ycixpi ixmajtcix jadu'n nej miich ajcxy xypocy'ijxcixy jayjipni ma ca' ni Jesucristo ymiñ jadüg'oc ya naaxhuüñ. Ahuijccix co Jesucristo yajnguëxigaan je jäy ajcxy upocy huidibi cham ca' ñiguëxgy, huidibi jadu'n nipaady nej jihuüy yüch y'ity agootztuuby. Jesucristo co anajty ymiñ jadüg'oc, chi yajnguëxigipy nej jäy ajcxy yjot yhuinma'ñ müdity. E Dios nidüg nidüg jäy cömaya'ñ pen oy ti ytuñ, e ca' cömaya'ñ pen ca' oy ti ytuñ.

⁶ Migügtijc ajcxy, ci'm ti naybidägyiijich müd Apolos jadu'n nej tüg ixpejt ma jada tiy'ajt huidibi cham ti nyajñijayyigixp. Jadu'n ti nduñich müd miich ajcxy m'oy'ajtn ycixpi, jigix jëbi miich ajcxy m'ixpijccixy jadu'n nej jëbi mguydundaygixy Dios ytiy'ajt, e ca' mjactungixy huidibi Dios ycapxcöduj ma ñecy. Nañ jadu'n ñich ti nduñich müd Apolos nej tüg ixpejt, jigix miich ajcxy ca' mnaygömayiib ci'm, e ca' mminaangixy co mnaygomäjtzigixy ma tüg Dios ytumbi, e jadüg m'ixtijcixy. ⁷ ¿Pin ti xyajnajxcixy jadu'n nej jihuüy ajcxy ooy mgömayity? Ca' ni pin. ¿Ti miich ajcxy müdity, huidibi Dios ca' ti xymoogyixy? Ca' ni ti. E pen Dios ti xymoogyixy tijaty ajcxy mmüdity, ¿na'amy co mnaygömayigixy ci'm, jadu'n nej jihuüy ci'm ti mganar'ajtcixy tijaty ajcxy mmüdity?

⁸ Jadu'n miich ajcxy mnaybidäacigixy nej jihuüy ti mgüxigixy, nej jihuüy ti mgomeeñygojixy, nej jihuüy mrey'ajtcixy, e ca' mdzojccixy co nyaj'ixpigipyich. ⁹ Miich xytijcixyich nej jihuüy ñich ajcxy apóstoltijc Dios ti xypidaaccixich nej huidibi ca' ytimcapxpaadyity, nej huidibi upocy co'ögüyb, co ángeles ajcxy etz jäy ajcxy xyñixicixyich xyñiäaxcixyich. ¹⁰ Miich ajcxy xytijcixyich co ñich ajcxy apóstoltijc jadu'n nej jäy tzuu locip co ndüngixyich müd Cristo ycixpi. E miich mnaybidäacigixy co'ayuc cohuinma'ñ co ti mmibijccixy Cristo. Miich ajcxy xytijcixyich co ca' ti mic'ajt ajcxy müdityich, e miich ajcxy mnaybidaacip nej jihuüy ooy ti mmicijccixy, nej jihuüy ooy mgömayity, e ñich ajcxy ca' nyaj'ixaangixyich. ¹¹ Chambaad ñich ajcxy nyuubögyiijich etz ndidziyijich. Minaajity n'ijtcixyich ca' ñich ajcxy nhuit. Jäy ajcxy xyñi'ojüygixich etz xyhuingojxy xyjipcöjxcixich, ni ndijc ñich ajcxy ycaca'tcixy. ¹² Ndüngixyich xuuyi müd ngi'm ngijich. Co pinjaty xyñi'ojüygixyich, chi n'adzöogixyich müd oy ayuc. Co ñich ajcxy xy'ixhuidityich xypahuidityich, ooy nmecxtüjccixyich yi' tzaachypi. ¹³ Co pinjaty jibic xyñigäpxcixyich, chi huinma'ñ ixtäaygixyich oy'amy müd mecxtujcin n'ihuüjccixyich ngapxhuüjccixyich nej jëbi y'ayuc-huinjihuüygixy. Ca' naaxhuüñjäy ajcxy xychöjccixyich. Ixti chambaad jadu'n ajcxy xy'ijxcixyich nej pux, jadu'n ñich ajcxy nipaady nej jibicpi huidibi ca' jäy ajcxy tzocy.

¹⁴ Ca' ñich miich ajcxy nyajnijayñy jada ayuc co nyajtzöydunaangixy. Hue' janchtiy jada ayuc nyajnijayñy ajcxy co ngapxhuñjáangixy. Jadu'n ndzojccixy njihuñyigixy nej ndzocyich njihuñyich ngi'm'ung. ¹⁵ Oy ixyipy yjanchity co miich ajcxy müd majc mil huindzindijc huidibi xyaj'ixpijccixy Cristo ytiy'ajt. Per tügpajcpi je mhuindzin huidibi oga'n xyajmibijcy ajcxy Cristo, ca' nan canaag. ñich jadu'n oga'n ti nyaj'ixpicyich miich ajcxy Jesucristo ytiy'ajt nej jébi ajcxy m'alma ñidzögipy. Paady ycixpi jadu'n ñich nipaady nej miich ajcxy mdeedy ma mmibijcin. ¹⁶ ñich miich ajcxy nimaayb mictägy, com ti nyajmibijccixy Cristo oga'n, paady cuydungix ajcxy Dios ytiy'ajt, jadu'n nej ñich nguyduñich.

¹⁷ Paady ycixp nguexyich Timoteo ma miich ajcxy. Yi Timoteo ooy ndzocyich ooy njihuñyich. Ti ñich Timoteo nyajmibicyich Cristo, e ooy xycapxymidooyich yajxon, jadu'n yi' nipaady nej ngi'm'ungich. Yi Timoteo xyajjäymedzip miich ajcxy je ayuc je tiy'ajt jadu'n nej nyaj'ixpicyich ma tüg'öciy cajp ma yi jäy ñaymüjigixy huidibi mijpidaaccixp Jesucristo. ¹⁸ Cham nije' nije' miich ajcxy amij agix mnyajihuñyil co jadu'n minaaangixy co ca' nicxy n'ixa'ñich miich ajcxy jadü'og. ¹⁹ Per ca' jadu'n mminaangixy co ca' nñicxa'ñich ma miich ajcxy. Tzojc nñicxibich ma miich ajcxy, pen Dios jadu'n tzojcp. Co anajty jim nmechich, huin'it ca' n'amidoo'ida'ñich yi' ajcxy y'ayuc huidibi amij agix nayjihuiyip. Hue' janchtiy nejhuñhua'ñich pen ymüid yi' ajcxy Dios ymic'ajt chög'ajt. ²⁰ Pinjaty müd Dios ymic'ajt Dios chög'ajt, je' yajniuguëxip Dios y'ane'min. Pinjaty müd oyñiti ayuc, ca' je' yajniuguëxip Dios y'ane'min. ²¹ Co nñicxibich jim ma miich ajcxy, çti ajcxy mdzojccixyp ndunipyich? ¿Nej oy nminicxibich ma miich ajcxy tüg matz jigix ajcxy nhuöjpcixipy? o ¿Mdzojccixyp co nñicxibych ma miich ajcxy müd yungnaxy njot nhuinma'ñich, etz oy'amy ajcxy nmigapxipy, jadu'n nej jihuñy ooy ndzojccixy njihuñyigixy?

5

Moy ajcxy castigo tüg jäy huidibi anajty ti ytundigooy

¹ Mayjäy nejhuñy co ma miich ajcxy jim tüg yëydijc huidibi tundigooyb müd tüg töxyjäy. Nigi yi' ytundigooy ca'ydi huidi ajcxy ca' Dios y'ayuc mijpidaci. Ti nnejhuñyich co jim tüg yëydijc huidibi müddzinaayb ycoo'uu. ² Jim miich ajcxy müdity je mijpocytumbi, e miich ajcxy amij agixy mnyajihuñyigixy co ajcxy mdzach'ixpicyty ma Dios ytiy'ajt. Jac'oy co ixyipy mdajcixy mmaygixy. Yajpidzimgix ma miich ajcxy yi jäy huidibi jadu'n tundigooyb. ³ Ca' ytimyñejity co ca' nyajpaadyich jim ma miich ajcxy. Jadu'n nipaady nej jihuñy ñich njimity, müd co ooy njihuñyich nej miich ajcxy mjahtcixy m'ayoogixy. Paady ycixpi ti nyajpocycäyich müd Jesucristo y'ane'min yi jäy huidibi jim ooy mij ytundigooy, tim jadu'n nej ixyipy jim nyajpaadyich ma miich ajcxy. ⁴ Huomujctaaygix yi mübijcpidijc, e jadu'n nipaadipy nej jihuñy ñich njimity quipxyi müd miich ajcxy. Huin'it miich ajcxy müd'ajtccixipy ajcxy ajt nHuindzin Jesucristo y'ane'min ymic'ajt. ⁵ Müd je ane'min mic'ajt huidibi Jesucristo ti xymöyich, myajpidzimipy je pocytumbi ma miich ajcxy. Jadu'n mijhuin nipaadipy nej jihuñy myajcidigixyixy je mujcu', jaydëbi yi' ñinixc ytigoyipy, per je' y'alma ñidzögip mina anajty ñich ajt nHuindzin Jesús yhuimbity ya naaxhuñ jaydëbi tiyduñipy jäy ajcxy müd ypocy ycixpi.

⁶ Ca' mnyagömäyigixy ci'm müd huidibi mdungixyp. ¿Nej ca' mnejhuñyigixy nej jäy mina'ñ co levadura huidibi ca' y'oyity yajhuindigooyb tüg'öciy yi harina jich? ⁷ Jadu'n je pocytunü nipaady nej levadura huidibi ca' y'oyity, paady ycixpi yajtigoogixy je pocytunü nej anajty mdundigöogixy taabi anajty ajcxy ca'ni mmibijccixy. Jadu'n mdungixipy, jigix jébi m'ijtcixyp huadz ca' ma pocy. Co jadu'n mdungixipy, jadu'n nipaadip miich ajcxy nej tzajcaagy oyjatypi. Nejhuñyich co miich ajcxy ti mbocynñihuaatzcixy, com Cristo nayyejci huen yaj'ögyii müd ajt nbocy ycixpi. Jesucristo jadu'n nipaady nej ajt ngöbixy mang huidibi müd nhuindzigixyim Dios müd ajt nbocy ycixpi. ⁸ Tzoc tzinaayim müd huadz njot huadz nhuinma'ñ, jadu'n nipaady nej judiojäy co ajcxy amay'ajtcixy yi pascua xii. Tzoc yajtigooyim ma ajt ndzinaayin njugy'ajtin yi jibic jot jibic huinma'ñ. Tzoc cuydunim Dios ytiy'ajt.

⁹ Ti nnijayñyigixy jayhuin co ca' huaad migüg'ajtigixy pinjaty huidibi tundigooyb müd töxyjäy ajcxy. ¹⁰ Ca' nan jadu'n mnina'ñich co tücci'yi mbuhuäctütccixipy yi naaxhuñjäy ajcxy huidibi ca' ymibijccixy, huidibi tundigoogixyp müd töxyjäydijc, huidibi ooy y'adzojccixy, huidibi ajcxy meetzp, huidibi ajcxy tzaadzech quipychech ojadahtcixp. Co ixyipy tücci'yi mbuhuäctütccixipy yi naaxhuñjäy ajcxy, copicy co ixyipy miich ajcxy mbidzimgix ya naaxhuñ. ¹¹ Jayhuin ti nnijayñyigixy co ca' huaad mnyamigüg'ajtigixy müd yi jäy ajcxy huidibi naydjigixyp co ymibijccixy, je huidibi tundigoogixyp müd töxyjäydijc, huidibi ajcxy ooy adzojccixy, huidibi ajcxy ojadahtp tzaadzech quipychech, huidibi ooy ycapxtigoogixy, huidibi ajcxy amügy jäy, etz huidibi ajcxy meetzp. Nañ ni ca' huaad mgaymujccixy m'uucmujccixy müd yi' ajcxy. ¹²⁻¹³ Com ca' yhuaadity co ñich nyajciyöyipy

nyajtecyyöyipy yi jây ajcxy ypocy huidibi ca' mijpidaaccixy Jesucristo. Dios ci'm yajcïyöyam yajtecyyöyam yi' ajcxy ypocy. Hue' janchtiy copicy co miich ajcxy myajcïyöyipy myajtecyyöyipy yi mibijcpidijc ajcxy ypocy. Yajpidzingixp yi pocytumbi ma miich ajcxy.

6

Tzip capxy ma je juez ajcxy huidibi ca' ymibijccixy

¹ Pen xymidundigooyb tûg mibijcpi, ¿nej oy mnayjihuiyïi co nicxy mxiy yi mmigûg ma yi tungmïdpi huidibi ca' mibijccixy Dios y'ayuc? ¿Cay jac'oy co myaj'abigipy je mibijcpidijc ajcxy, e jim y'oyihuiyipy je ayuc nej anajty ti xymidundigoy? ² ¿Nej ca' mnejhuiyigixy co yi jây ajcxy huidibi Dios ti ypocyhuinmëecxigixy, yi' ajcxy yajcïyöyamyb yajtecyyöyamyb yi naaxhuiñyây ajcxy ypocy huidibi ca' mijpidaaccixy Dios? Pen miich ajcxy myajcïyöyipy myajtecyyöyipy yi naaxhuiñyây ajcxy ymïpocy, ¿nej co ca' mjahtcixy nej ajcxy myajcïyöyipy myajtecyyöyipy yi mibijcpidijc ajcxy ypocy huidibi ca' ytimymij ytimycajeejity? ³ ¿Nej ca' mnejhuiyigixy co miich ajcxy myajcïyöyamyb myajtecyyöyamyb ixti yi ángeles ajcxy ypocy? Pen miich ajcxy myajcïyöyamyb myajtecyyöyamyb yi ángeles ajcxy ypocy, nîgi ca' chipity co ajcxy myajcïyöyipy myajtecyyöyipy yi mibijcpidijc ajcxy ypocy huidibi tzinaayb jugy'ajtp ma jadachambi xü tiempo. ⁴ Pen miich ajcxy mnaymidundigooygixp, ¿nej co nicxy mbidaaccixy yi mxihuin ma yi jây ajcxy huidibi ca' yajpaady ma miich ajcxy myöymujccixy? ⁵ Jadu'n nnimáaygixyich miich ajcxy, jaydëbi mdzöydu'njihuiyigixy müd jada ycixpi. ¿Nej ca' yajpaady ma miich ajcxy ni tûg yëydijc huivy ycuipi huidibi jëbi yaj'oyiy je capxy je ayuc ma je mibijcpidijc ajcxy? ⁶ ¿Nej ooy jada ytimycopicyity co yi mibijcpidijc ajcxy ñayxihuigixipy ma je tungmïdpi huidibi ca' mijpidaaccixy Dios?

⁷ Co miich ajcxy mnayxihuigixy ma cajp tungmïdpi, je' je tiy'ajtp co ca' ajcxy mguydúngixy Cristo y'ayuc ytiy'ajtp. ¿Nej cay jac'oy co mnaymimexxtújcigixy, ca'ydí co mnayxihuigixy? ¿Nej cay jac'oy co xytigooygixipy tijaty, ca'ydí co mnayxihuigixy? ⁸ Ma yjapadyii ixypipy mnaymimexxtújcigixy, chí miich ajcxy ac mibijcpidijc naymidundigooygixp, e nañ jadu'n mjanayméetzigixy ti ajcxy ymïd.

⁹ ¿Nej ca' mnejhuiyigixy co yi jây ajcxy huidibi tundigooyb, ca' ajcxy it lugar padañ ma Dios y'ane'my? Ca' mnayhuin'ingixy, ca' ajcxy it lugar padañ ma Dios y'ane'my yi jây ajcxy huidibi migapxtigooyb tóxyjâydijc, huidibi ajcxy ojadaajtp tzaadzech quipychech, huidibi ajcxy migapxtigooyb ymïgûg ytóxyijc, huidibi ajcxy adóxyñ'aa. ¹⁰ Ca' ajcxy it lugar padañ ma Dios y'ane'my huidibi ajcxy meetzp, huidibi ajcxy tijaty adzocjp, huidibi ajcxy amügýjây'ajtp, huidibi ajcxy capxtigooyb, etz huidibi ajcxy ayucmihuidijtp capxmihuidijtp. Nidüg'óciy yi jây ajcxy huidibi jadu'n tundigooyb, ca' ajcxy it lugar padañ ma Dios y'ane'my. ¹¹ Jadu'n anajty nijëjity miich ajcxy mdundigooygixy jecy'ajtp, per co ti mmbijhuixy Cristo, chí Dios ti xyhuinmexxy ajcxy mbocy, e ti yajhuäch je jibicpi ma ajcxy mjot mhuinmañ, etz mnayyéjcigixy amumdúgot ma Dios. Co miich ajcxy mmijpidaaccixy je nHuindzin Jesús yxi e xy'adigüygixy xyjottigüygixy Dios yjihuiñ ymic'ajtp, paady ajcxy ti m' ahuimbijtcixy tudägy ma Dios yhuinduu.

Je tudägy'ajtn huidibi ijtp ma ajtp ndzinaayin

¹² Janch tiy'ajtp nej jây yminaangixy co jëbi huaad tungixy hueñytiijity huidibi ñijot'ajtcixyp. Per ca' tûg'óciy huidibi jây ajcxy tuñ y'oyjâygidaacnity. Janch jadu'n jëbi pinjaty tunipy hueñytiijity, per ca' huaad ymimadägyii je huidibi ajcxy ytumyb. ¹³ Janch tiy'ajtp nej jây yminaangixy co je jicxy picy ytungbaady ma je jây y'aa ymôx, e je aa móx ytungbaady müd je jicxy picy ycixpi. Per Dios yajcôdigoyamyb je jicxy picy, e nañ jadu'n yajcôdigoyañ je jây y'aa ymôx. Per nañ tiy'ajtp co Dios ca' ti yaj'oyiy je yëydijc ñinïcx, co midundigooyipy tóxyjâydijc. ¹⁴ Dios ti yajjugypicy jadüg'oc ich ajtp nHuindzin Jesucristo co y'o'cy. Nañ jadu'n Dios müd ymic'ajtp co xyajjugypigaanim jadüg'oc co anajty ti n'o'cim.

¹⁵ ¿Nej ca' mnejhuiyigixy co yi mminïcx ajcxy Cristo yi' yje? ¿Nej cay Cristo anajty midundigooybich co nnicxy mïdmâyich yi tóxyjây huidibi jibic-huinmañ müd? ¿Ca' jadu'n y'óyity nimina? ¹⁶ ¿Nej ca' mnejhuiyigixy co tûg yëydijc puhuägýy tûg tóxyjây huidibi jibic-huinmañ tumb, tûgity ajcxy y'ijtcixy? Com jadu'n yjabyetyity ma Dios ñecy, ma Dios jadu'n yminañ: "Nimetz y'idaangixy jadu'n nej tûgpi ninïcx." ¹⁷ Co tûg jây müd y'ity yi Huindzin Jesucristo, huin'it je jây yjihuiñ ymic'ajtp etz Dios yjihuiñ ymic'ajtp y'ijtcixy tú'ciy.

¹⁸ Ixmajtcix je jibic-huinmañyduñi, ca' mdundigooygixy müd tóxyjây ajcxy jibic-huinmañyduñi. Yí jacjadyii pocy huidi jây ajcxy ytumyb, ca' yi' ajcxy midundigoy ninïcx. Per co ytundigooygixy müd tóxyjây ajcxy, huin'it janchtiy yci'mninïcx anajty ymidundigooygixp. ¹⁹ ¿Nej ca' mnejhuiyigixy co je Espíritu Santo huidibi Dios xymooyim, ti chinaydacpicy ma miich ajcxy mjot mhuinmañ? Paady ycixpi miich ajcxy ca' ci'm nay'ané'migixy. ²⁰ Tzoohui Cristo ti cojuy miich ajcxy mbocy, paady ycixpi ooy ycopicyity co oybi mdúngixip müd mminïcx, jigix Dios cömay y'idipy müd co oy anajty ti mdungixy.

Capxhuijin ma je pijcin

¹ Cham n'adzohua'ñich je huidibi miich ajcxy ti xyaj'amidoobich ma je necy huidibi ti xyajniuguéjxcixyich. Oy jadu'n co tüg yéydijc ca' ypigipy. ² Per com may yéydijc huidibi ooy ytundigoya'ñ miid töxyjäydijc, paady ycixp jac'oy co nidüg nidüg yéydijc pigipy e miid'idipy yci'mdöxyijc. E nañ jadu'n jac'oy co nidüg nidüg töxyjäy ypigipy, e miid'idipy yci'm ñây. ³ Copicy je yéydijc chináhuipy miid ytöxyijc nej ypanyi, nan tim jadu'n je töxyjäy chináhuipy miid ñây nej ypanyi. ⁴ Com je töxyjäy ca' ane'my yci'mninícx, hue' ñay'ané'migixy miñ xyipy. Nañ jadu'n je yéydijc ca' ane'my yci'mninícx, hue' ñay'ané'migixy ymiñ xyipy. ⁵ Ca' huaad je yéydijc nimay je töxyjäy co ca' miid mähua'ñ miid pöocxa'ñ. Nañ jadu'n je töxyjäy ca' huaad nimay je ñây co ca' miid mähua'ñ miid pöocxa'ñ. Jébi janchtiy mīnaajity ñay'ayuc-huinjihuigixy co amay'adaangixy co Dios mibijctzohuaangixy ycapxtāgaangixy. Co Dios mibijctzohuin myajmāyigixy, huin'it jébi māagixni pōcxcixni agujc jotcujc, ca'ydī je mujcu' mīmadāgyi ajcxy.

⁶ Jada je' tiy'ajt nej jébi yéydijc mīddzināy ytöxyijc, hue' jada capxhuijin, ca' jada y'ané'minity. ⁷ Jadu'n njadzocyich co miich ajcxy ixipy m'ijtcixy adüg jadu'n nej n'ityich adüg. Per Dios ti xymooyim nidüg nidüg ngi'mhuinma'ñ ngi'mmic'ajt. Paady ji canaagnax jāy yhuinma'ñ, e nidüg nidüg miid yci'mhuinma'ñ nej ytunaangixy, pen pīgaangixp o ca' ypigangixy.

⁸ Jada ayuc nyajnimaaybich yi adügtijc etz yi co'ögytijc ajcxy. Jac'oy co ajcxy huen tzinaangixy adüg, jadu'n nej iich ndzināyich. ⁹ Pen ca' ajcxy mīmadāga'ñ yi chinaayin adüg, etz nijot'ajtcixy co ypigangixy, jac'oy co ypijicixipy. Com jac'oy co ypijicixipy ca'ydī co cuydūngixipy ninícx chojcin.

¹⁰ Jada ayuc nyajnimaaybich huidibi ajcxy ti ypijicixy. Ca' y'oyity co töxyjäy tüg ixmach yi' ñây. Nañ jadu'n ajt nHuindzin Jesús xymooyim jada ane'min. ¹¹ Co tüg töxyjäy ixmach ñây, copicy co huen tzināy adüg, e ca' huaad ypicy miid huingbi yéydijc. Jébi janchtiy jadüg'oc pudigiy ñây. Nañ jadu'n ni ca' y'oyity co tüg yéydijc ixmadzip ytöxyijc.

¹² Ich jada ngi'm'ayuc jada huidibi nyajnimaaybich je jacadyi mibijcpidijc. Yi Huindzin Jesús ca' ti ane'min yecy miid jadayaabi ycixpi. Pen tüg yéydijc mibijcp tzinay miid tüg töxyjäy huidibi ca' mijpidāgy Cristo, jac'oy co ca' ñay'ixmājtzigixipy, pen je töxyjäy jadu'n jotcujc jacmīddzināhua'ñ je yéydijc. ¹³ Nañ tim jadu'n co tüg töxyjäy huidibi mibijcp tzinay miid tüg yéydijc huidibi ca' mijpidāgy Cristo, jac'oy co ca' ñay'ixmājtzigixipy pen je yéydijc jotcujc jacmīddzināhua'ñ je töxyjäy. ¹⁴ Je töxyjäy ñây huidibi ca' mijpidāgy Cristo, jadu'n yi' nipaady nej jāy huidibi ypocy ti yajñihuāch miid co ytöxyijc ti mijpidāgy Cristo. Nañ jadu'n je töxyjäy huidibi ca' mijpidāgy Cristo, jadu'n yi' nipaady nej jāy huidibi ypocy ti yajñihuāch miid co ñây ti mijpidāgy Cristo. Pen ca' ixipy yjadu'nity, yi' ajcxy y'ung y'anāg, hue' ixipy nipaady nej jāy ajcxy y'ung huidibi ca' mibicy. Per com ti je yéydijc etz je töxyjäy yajpocyñihuāchyii, nañ jadu'n je y'ung ajcxy ti yajpocyñihuāchyii. ¹⁵ Per pen je yéydijc huidibi ca' mibicy Cristo ca' mīddzināhua'ñ ni jadu'ñyi yi' ytöxyijc huidibi ti mibicy Cristo, huin'it jébi ñay'ixmājtzigixy. Nañ jadu'n co je töxyjäy mibijcipy ca' mibicy Cristo, e ca' mīddzināhua'ñ ni jadu'ñyi yi' ñây huidibi ti mibicy Cristo, huin'it jébi ñay'ixmajtzigixy. Com Dios jadu'n tzocy co jotcujc ñaymīddzināyigixipy. ¹⁶ Jébi ñay'ixmajtzigixy com je töxyjäy ca' tiyduđāgy ñejhuüy pen mīmadacy yñāy yajmibigipy Cristo. Nañ jadu'n je yéydijc ca' tiyduđāgy ñejhuüy pen jébi ytöxyijc yajmibigipy Cristo.

¹⁷ Oy ixipy ñejity jada tiy'ajt cuydungixy. Copicy co nidüg nidüg miich ajcxy mdzināhuipy mjugy'adipy jadu'n nej Dios ti xyajni'ixiigixy mdzinaayin mjugy'ajtin, e jadu'n nej anajty myajpatcixy co Dios xyhuin'ixy jébi mibijbigipy Cristo. Yi jadu'mbi ane'min nyaj'ixpijcpych yi mibijcpidijc ma tüg tüg cajp. ¹⁸ Yi jāy huidibi ti yajtiy'ajttiy jayijp, e Dios yhuin'ixyii jac'axam, huen jadu'nity, ca' huaad yajtigoy je iixpejt nej ti yajtiy'ajttiy. E yi jāy huidibi ca'ni yajtiy'ajttiy e ti yhuin'ixyii Dios, huen jadu'n y'ity, ca' ycopicyity yajtiy'ajttihuipy. ¹⁹ Ca' ytimyñejity pen miich ajcxy ti yajtiy'ajttiy, o pen ca'ni yajtiy'ajttiyigixy. Huidibi copicyip, mguyduunip ajcxy Dios y'ane'min ycötujcin. ²⁰ Nidüg nidüg mibijcipy huen ijtcixy nej anajty yajpatcixy co Dios ajcxy yhuin'ijxy. ²¹ Pen miich anajty codoogiy tumb ma tüg jāy co Dios ti xyhuin'ixy, ca' mdajy may miid yi' ycixpi, hui'm miid mhuindzin. E pen mhuindzin a'ixiyb co mbidzima'ñ ahuātztuum, jébi mbidzimy ma codoogiy anajty m'ity. ²² Pinjaty codoogiy ijtp ma yhuindzin co mibicy ajt nHuindzin Jesucristo, chi Jesús yi' yajñihuādzictüdyii ma yi pocy y'ane'my. Pinjaty tungixp yci'mdung, co mibicy iich ajt nHuindzin Jesucristo, chi jadu'n nipaady nej jihuüy codoogiy y'ity ma Cristo. ²³ Tzohui ooy Jesucristo xycjojuuyi miich ajcxy mbocy, paady ycixpi cuydungix ajt nHuindzin Jesucristo y'ayuc ytiy'ajt. E ca' mguydungixy naaxhuiñjāy ajcxy y'ayuc ytiy'ajt huidibi ajcxy xypidāgip ma pocy

xy'ane'mgixy. ²⁴ Migügtijc ajcxy, nidüg nidüg mibijcpi, huen ijtcixy nej anajty yajpatcixy co Dios yhuin'ijxi ajcxy.

²⁵ Jada ayuc nyajnamaaybich yi mibijcpidijc huidibi ajcxy adüg yajpatcixp. Je Huindzin Jesús ca' ti tiy'ajt ahuing ti xymöyich müd müich ajcxy ycixpi. Hue' ajcxy nyajnamaayb ahuing je huinma'n huidibi nmüidich. Com Dios ti xypa'ayooyich, paady ycixpi jëbi mgöbigipy ajcxy ich n'ayuc ich ngapxhuijn. ²⁶ Jadu'n huinma'n nmüididyich co jac'oy co nidüg nidüg mij'anäg huen jac'ijtcixy nej yajpatcixy. Müd co tzaachypi ayo'n nminajxim nyajnajxim jadachambi xii tiempo, paady ycixpi ngapxhuijyich jadu'n. ²⁷ Pen mbijcyp tüg töxyjây, müiddzina'. Pen ca' ti picy tüg töxyjây, jac'oy co ca' mbigipy. ²⁸ Pen ti mhuinma'n mbidägy co mbiga'n, jëbi mbicy, ca' anajty mdundigoy co mbigipy. Nañ jadu'n tüg töxyjay mutz'anägnip ca' anajty ytundigoy co ypigipy. Janch tiy'ajt jada co yi' ajcxy huidibi pijccixp ypadamyb ajcxy jotmay ma chinaayin. Paady ycixp ti nnimaaygixy co jac'oy co ca' mbijccixipy, e ca'ydi ti jotmay mbäatcixipy.

²⁹ Migügtijc ajcxy, jada njacyajnamaaygixpy. Hueeni xii tiempo njactzinähuanim ya naaxhuiñ. Jadu'n nej je xii je tiempo yjacnixni müich ajcxy pinjaty ti ypicy, tzinaaygix jadu'n nej ixypy ca' mdöxijc ajcxy müidity. ³⁰ Müich ajcxy huidibi yaaxp etz ayo'n jihuixyb, tzinaaygix jadu'n nej ixypy ca' ti ayo'n müidity. Müich ajcxy huidibi xondacp, tzinaaygix jadu'n nej ixypy ca' mxondaaccixy. Müich ajcxy huidibi ajuyyb adoocp tzinaaygix jadu'n nej ixypy ca' ti ajcxy müidity. ³¹ Müich ajcxy huidibi mic'ajt comeen'ajtp, tzinaaygix jadu'n nej ixypy ajcxy ca' ti mgomeen'ity.

³² Hue' ndzocyich co ca' ti jotmay müich ajcxy mmüid'adipy ma yi mdzinaayin mjugy'ajtin. Yi jây ajcxy adügpi ymijottigooyb ajcxy je Huindzin Dios ytung, yajjâygidäga'n ajcxy je Huindzin Dios. ³³ Je tiibi ajcxy ypijccixy, chi ymijottigooyb ajcxy yi' ytung ya naaxhuiñ, jadu'n nej jëbi yajjotcujc'ajtcixy ytöxyijc. ³⁴ Nañ tim jadu'n tigachjaty yhuinma'n müidity je töxy'anäg huidibi ti ypicy. Je töxy'anäg adügpi ymijottigooyb Dios ytung, etz yecy ñinix etz yjihu'iñ ymic'ajt cixyjot huinijot ma ajt nHuindzin Jesucristo. Per je töxy'anäg huidibi ti ypicy, hue' je' ymijottigooyb ti ga ti ya naaxhuiñ, jadu'n nej huaad jâygidägyii ñây.

³⁵ Jada jadu'n ti nyajnamaaygixy müd müich ajcxy m'oy'ajtin ycixpi. Ca' nan tzipjaty ane'min ti nmooygixy. Jadu'n ti ngapxhuijixy jaydëbi jotcujc mdzinaaygixy mjugy'ajtcixy, etz jaydëbi ajcxy amumdügjot mdungixy ma ajt nHuindzin Jesucristo ytung, e ca' mdungixy ametz jotmetz.

³⁶ Pen ji pin jotmay müidity müd ñiix ycixpi, müd co yxii yjimijt ti yujc-huäcni, jada je' ooy ytimcaxpaadyity, jëbi tuñ huidibi y'a'ixiyyb jac'oyip, jëbi ypicy, ca' yi' ypocyity. ³⁷ Pen ji pinjaty ñiix yhui'ma'n jaybicy, e ca' pin ycohuaniiyi, nañ ni pin yca'adugyii co tuñ nej tzocoyin, e ñijot'ajtyp tudägy'ajt janch cixyjot huinijot co yñiix yhui'ma'n jaybicy, oybi anajty ytumyib. ³⁸ Je jây huidibi yñiix yajpijcp, oybi anajty ytumyib, e pinjây yñiix cayaipijcp, ñigi anajty oybi tuñ ca'ydi co ypigipy.

³⁹ Copicy co je töxyjây müddzinähuiipy yi' ñây mabaad yñây yjugy'aty. Co janch anajty yñây y'ögy, huin'it jëbi ypigipy müd huingbi, pen jadu'n anajty najtztzögyi. Hue' janchtiy copicy co pigipy je pin mibijcp je Huindzin Jesucristo. ⁴⁰ Ooy ñigi je töxyjây co'ögyi agujc jotcujc chinähuiipy yjugy'adipy pen ca' ypijctigach, jadu'n nmüididyich huinma'n, e nminambich co naybaatip ich huinma'n müd je tiy'ajt huidibi je Espiritu Santo yejcp.

8

Je tzüch huidibi ajcxy yajhuindzigiiyb quipychech

¹ Jadüg nax, jada ayuc ajcxy nyajnijayiiyb ma yi tzüch ymiñ huidibi jây ajcxy yajhuindzigiiyb tzaadzech quipychech. Janch tiy'ajt co nidüg'öciy ich ajt nmüid'ajtim ixiijcin. Per pen ooy mij nayjihuiyim ajt n'ixpicyity, chi amij agix nayjihuiyim. Per pen naychojcin nayjihuiyim nidüg nidüg, huin'it nyajyeecim nmüijcin. ² Pen ji nidüg ma müich ajcxy ñaydijyii co y'ixpicyity, ca'ni yi' jajtây ixiijcin huidibi tzaocopy yjadipy. ³ Co tüg jây yajmij'aty Dios, Dios ñejhuiyb nej jada jây yjot yhuinma'n müidity.

⁴ Jadu'n jada je tiy'ajt maabi je tzüch huidibi jây ajcxy ti yajhuindzigiiygixy tzaadzech quipychech ajcxy. Nejhuiyim co yi tzaadzech yi quipychech ca' ti jugy'ajtin müidity. Ji tügajc Dios huidibi tzinaayb jugy'ajtp. ⁵ Janch tiy'ajt co yi naaxhuiñjây ajcxy Dios'ajtigixy canaagnax huidibi yajpatp tzejpcix etz ya naaxhuiñ huidibi ca' Diosity. Etz nañ tiy'ajt co may yhuindzin'ajtcixy huidibi ca' yhuindzinity. ⁶ Per ich ajt n'ojadajtim tügajcp Dios, je Dios Teedy. Je Dios Teedy coj macx tüg'öciy huidibi ji'ajtp. Müd yi' ycixpi ich ajt ndzinaayim njugy'ajtim. Nañ tim jadu'n nmüid'ajtim tügajcp ajt nHuindzin Jesucristo, e yi' huijtz'ijtaayb tüg'öciy tijaty huidibi ji'ajtp, e nañ yi' ajt xyhuijtz'ijtim.

⁷ Janch tiy'ajt co yi tzaadzech quipychech ca' ti mic'ajt müidity, per nije'jity mibijcpidijc ca' huiñihuñi jada tiy'ajt. Nijëjity ajcxy jecy'ajty ooy huindzigiygixy tzaadzech, ixti chambaadni tijcixy co yi tzüch huidibi jäy müid huindzigiy tzaadzech, tzaadzech yi' yje'. Co ajcxy tzüdzcixy yi jadu'mbi tzüch, jibic nayjihuñiyigixy, nayjihuñiyigixy nejjihuñi ti ytundigoogixy. Ca' tiydudägy y'ijtcixy ma ymibijcin. ⁸ Ca' Dios xycöbigaanim müid je' ycixpi co ti njiicxim ti ndzüdzim tijaty tzüch, o müid co ca' ti njiicxim ca' ti ndzüdzim tijaty tzüch. Nañ tim jadu'n Dios ca' oybi xymöhuuanim müid je' ycixpi co ti njiicxim ti ndzüdzim ti tzüch, o müid co ca' ti njiicxim ca' ti ndzüdzim tijaty tzüch. ⁹ Oy Dios a'ixiy co jëbi ndzüdzim huenhuidibi tzüchity. Per müid je migügtijc ycixpi huidibi ca' tiydudägy müidity ymibijcin, tzoc naygüend'ajtim ca' ydi je' jibic yñayjiuñiyi müid huidibi iich ajt ndunim. ¹⁰⁻¹¹ Tzoc ocpidaacim co müich ajcxy mnejhuñi je tiy'ajt, e xy'ixipy tüg migüg co mgay m'uucy ma tüg mesa jibiy tigoty me je tzaadzech y'ity. Ca' jecyity co jada jäy huidibi ca' tiydudägy müidity ymibijcin, etz co xy'ixpaadipy jibiy, huin'it je' cöbiga'n je tzüch huidibi huindzig'i'n'ajtp. E jadu'n yhuimbizimy co müich jibic ijxpejt ti myecy müid yi m'ixpijcin ycixpi, com yi mmüg ti ytundigoy müid huidibi müich ti mduñ. E Cristo ti y'ögy müid yi' ypocy ycixpi nañ jadu'n. ¹² Co tüg mibijcpi jibic nayjihuñiyi müid co ti xy'ixy ma je caydac mdzüch je tzüch huidibi jäy ajcxy yajhuindzigiyb tzaadzech, müich anajty tundigooyb müid Cristo ytiy'ajt, müid co yi mibijcpi jibic ñayjiuñiyi. ¹³ Paady ycixp ca' ndzüdza'nich ni mina tzüch huidibi tzaadzech yhuindzig'i'n'ajtp. Pen jadu'n nduñich, jibic ijxpejt anajty nyejcipyich ma nijëjity migügtijc, e chi yi' ajcxy yhuinma'ñytigoya'n.

9

Je tung huidibi Pablo paatip

¹ Janch janch co jëbi nduñich huentijity huidibi ndzojcpich. Nañ jadu'n janch co Jesucristo ti xyajñibicych jada apóstol tung. Etz janch co ti n'ixyich ajt nHuindzin Jesucristo. Nañ jadu'n janch co müich ajcxy ijxpejt'ajtp ma iich ndung, com ti ajcxy mmijpidaaccixy je nHuindzin'ajtim Jesús y'ayuc huidibi ti ngapxhuäcxyich ma müich ajcxy. ² Ca' jécyity co jacjadyi jäy ajcxy ca' xycöbiga'nich jadu'n nej Jesús xy'apóstol'adyiijich. Per com müich ajcxy ti mmijpidaaccixy ajt nHuindzin Jesucristo, etz müich ajcxy mmibijcin nidiy'ajtp co Jesús ti xyajñibicych jada tung, paady ycixpi copicy co iich müich ajcxy xycöbigipyich jadu'n nej Jesús y'apóstol.

³ Jadu'n n'adzohuimbityich yi' ajcxy huidibi jibic xyñigapxip iich ndung. ⁴ Com Jesucristo xyajñibicych jada tung co ngapxhuäcxyich yi' y'ayuc ytiy'ajt, paady ycixpi xypatpich jadu'n co je mibijcpidijc xymöhuibich ngaayin n'uucin. ⁵ Nañ jadu'n xypaatpich co nmüid'adipyich tüg ndöxyijcich huidibi mibijcp, etz huidibi nmüidhuididipyich tim jadu'n nej yi jacjadyi apóstol'ajty müidity, etz je Huindzin Jesús y'uch ajcxy müidity, etz Pedro. ⁶ ¿Nej müich ajcxy mmüinaangixy co iich etz Bernabé nimejtzajc ca' iich ajcxy huaad ixmajtzixy yi ndungich co ngapxhuäcxyich Cristo y'ayuc ytiy'ajt? ⁷ ¿Huidibi soldado yi' ma je ejercito ci'm ygasto cojuy? ¿Pin ji cam ndungiyb, e ca' jüicxipy je huidibi ti yaj'ity? Pin ychibo cuend'ajtp, ¿e ca' ügipy je chibo yleche? ⁸ Ca' müich ajcxy mina'nipy co jäy y'ayuc jada. Nañ jadu'n jaybey y'ity ma Dios ñecy tim jadu'n nej mnina'nich. ⁹ Com jaybey jadu'n ymiñ ma Moisés ñecy, ma Moisés jadu'n ymina'n: "Ca' huaad huajyuub y'ajen mbidaaci ma yam ten moody yi trigo co yajpajc'aty." ¿Nej jëyi müid huajyuub ycixpi Dios jadu'n ymina'n? ¹⁰ Canan jëyi müid huaj yuub ycixpi Dios jadu'n ymina'n. Nañ jadu'n Moisés jaybeyti jada tiy'ajt müid iich ajt ycixpi. Com yi jäy ajcxy huidibi naaxjidzjitzp, etz yi' ajcxy huidibi trigo yajpajc'ajtp, hue' ajcxy yjijp'ijxyp co padaangixy je moc tim huidibi ajcxy ti nidungy. ¹¹ Nañ jadu'n iich ajcxy huidibi Jesús ytung tuunip, ti ngapxhuäcxyich Dios y'ayuc ma müich ajcxy, e müich ajcxy oybi ti mbaatcixy ma Dios. ¿Nej ca' jadu'n y'oyity co nbaadyich meef etz jicxy picy müid ndungich ycixpi? ¹² Pen jacjadyi Dios y'ayuccapxhuäcxi ti paatcixy meef etz jicxy picy ma müich ajcxy müid ytung ycixpi, ¿nej ca' jëbi nigi iich nbaadyich meef etz jicxy picy müidich ndung ycixpi? Oy njamüiditych je mic'ajt nej nja'ane'ngixy co xymöhuibych ajcxy meef etz jicxy picy müid iich ndung ycixpi, per ca' jadu'n ti n'ane'ngixy. Jadu'n iich tzaachapy nyajñajxich jim ma müich ajcxy, jaydëbi jäy ajcxy cöbijcixy Cristo agujc jotcuyc ca' ti adzjipin. ¹³ Mnejhuñiyb müich ajcxy co yi' huidibi ajcxy tumb ma Dios ytiyc, paatcixy ninigoobi caayin uucin. Nañ jadu'n yi' pin ajcxy huidibi iyujc yajhuindzigiyb Dios, paatip ajcxy je huindzig'i'n' tzüch. ¹⁴ Nañ jadu'n je Huindzin Jesucristo ane'my co huen yajcaayigixy yaj'uuccixy etz mooygixy yhuut ytuux yi' ajcxy huidibi capxhuäcxi y' y'ayuc ytiy'ajt. ¹⁵ Iich ca' ti nyajtuñich jada mic'ajt jada ane'min huidi nmüidich. Nañ jadu'n ca' jada ayuc nyajñijayiygixy, müid co ndzocy co pada'nich tijaty ma müich ajcxy. Jacjotcuyc co n'ögbich müid yuu, ca' ydi co n'ané'mibich caayin uucin ma müich ajcxy, e jadu'n tzöydu'n nbáadibych jadu'n nej cham naygömayijich, müid co ci'm nnayyajcayijich müid ndungich.

¹⁶ Com ca' huaad naygömayijich co ngapxhuäcxyich Cristo y'ayuc. Mïid co Cristo xyayajñibjich jada tung, paady ycixpi copicy ngapxhuäcxyich Cristo y'ayuc. Ayo'n nbadaamybich, pen ca' ngapxhuäcxyich Cristo y'ayuc. ¹⁷ Pen ngi'mdzócinich ycixpi ngapxhuäcxyich Cristo y'ayuc, nijjp'ixypich ixypy co jây ajcxy xymijuyipyich. Per ca' yjadu'nity. Hue' janchtiy je Huindzin Jesucristo xyajñibjich jada tung, e paady nduñich yi' ytung. ¹⁸ ¿Ti muju'ñ nbáadibich müid ndungich ycixpi? Nbáadibich jotcuje' ajtin co ngapxhuäcxyich Cristo y'ayuc jadu'ñyi, ca' ymeeñyixyity. Ca' nyajtuñich je ane'min huidibi Cristo xymóyich müid caayin uucin ycixpi.

¹⁹ Ca' ji ni pin jây mic'ajt müidity jaydëbi xy'ane'myijich. Oy ixypy ytimyñejity ti nnaybidägyijich müid ich ntot nhuinma'ñ jadu'n nej jihuñy tüg'óciy jây ajcxy xy'ane'myich. Jadu'n nduñich jaydëbi jac mayjây ajcxy nyajmibicxyich Cristo. ²⁰ Co ngapxhuäcxyich Cristo y'ayuc ma yi judiojây, hue' naybidägyijich judiojây, jaydëbi nyajmibicxyich ajcxy Cristo. Co ngapxhuäcxyich Cristo ma yi judiojây ajcxy huidibi cuydumyb yi' ajcxy ycótujcin etz ycostumbre, nañ jadu'n ich nguyduñich yi' ajcxy ycótujcin, jaydëbi nyajmibicxyich ajcxy Cristo. Ooy yjanchity co ca' yi judio ycótujcin etz ycostumbre xy'ane'myich. ²¹ Co ngapxhuäcxyich Cristo y'ayuc ma yi' ajcxy huidibi ca' yjudiojâyity, chi naybidägyijich jadu'n nej yi' ajcxy. Ca' nan nmınaambich co ca' nguyduñich Dios ytiy'ajt. Hue' njatytimycuydumybich Cristo ycótujcin, jaydëbi nyajmibicxyich ajcxy Cristo. ²² Co ngapxhuäcxyich Cristo y'ayuc ma yi' ajcxy huidibi ca' tiydudägy ymibijccixy, chi naybidägyijich jadu'n nej yi' ajcxy, jaydëbi nyajmibicxyich ajcxy Cristo. Ma nidüg'óciy jây ajcxy ma ngapxhuäcxyich Cristo y'ayuc, chi nbidägyich ntot nhuinma'ñ nej yi' ajcxy yjot yhuinma'ñ müidity, jaydëbi nijejity ajcxy nyajmibicxyich Cristo y'ayuc ytiy'ajt. ²³ Jadu'n nduñich tüg'óciy müid Cristo y'ayuc ycixpi, je ayuc nej jëbi jây ajcxy y'alma ñidzoocixy. Jadu'n nduñich, jaydëbi nbaadyich je jotcuje' ajtin etz oy'ajtin huidibi nbaatim nidüg'óciy co nmijpidaacim Cristo.

²⁴ Mnejhuñyixy co jây ajcxy ñayboñcuipxigixy co premio padaangixy, huin'it nidüg'óciy ajcxy ñaymic'ixigixy, per tügajc huidi je premio patp. Nañ jadu'n müich ajcxy mijottigooyix cuydungix Dios y'ayuc ytiy'ajt, jaydëbi Dios xymóoyixy ajcxy tüg premio. ²⁵ Tüg'óciy pinjaty nayñi'ixiñy co ñay'ixquipxáanigixy ma iyihuijin, ooy ñayguend'ajtigixy mic, jigix jëbi ymadaaccixy co ganar'adaangixy premio huidibi ca' huinixi ajcxy mi'ijtcixy. Pero ich ajcxy Dios y'ayuc capxhuäcxy, yi' ich ajcxy mijottigooyixy nganar'adaangixyich huidibi ca' nimina ycixipy ytigoyipy. ²⁶ E jadu'n ich ndung mijottigooyich, ca' yhuimbizity agoodzity, jadu'n nejihuñy ngoxich e nipin ca ypegyii. ²⁷ Nnaychaachytumybich ngi'mninicxich, jaydëbi ngi'mninicx yxapxymidooyich. Jadu'n nduñich co ti ngapxhuäcxyich Cristo ma je mayjây ajcxy, ca'ydí nyajtigoyipyich nbremio huidibi Dios xymöhuambich.

10

Capxhuijin ma yi pin ajcxy jac-huindzigyib quipychech

¹ Com ndzojycpich co müich ajcxy migügtijc mnejhuñyixy co ajt nmij'ap nmijteedy müid yhuidijty Moisés co Dios nidüg'óciy ajcxy cuend'ajttay, huinhuoy jecy'ajty müid tüg joc. E nañ jadu'n Dios yajnihuañ yajtzoocy nidüg'óciy ajcxy ma ymidzip co ajcxy yajnaxjy je tzaptz mejy cuje'amy. ² Co nidüg'óciy ajcxy panicxy je joc, e co ñidzoocay ajcxy nidüg'óciy ma je mejy, hue' nidüg'óciy ajcxy cöbijcy Moisés y'ane'min, e jadu'n nipaady nej jihuñy ni'amugi ajcxy yñiñejity müid Moisés yxi. ³ Nañ jadu'n nidüg'óciy ajcxy caay jixcy je maná huidibi Dios anajty yecpy, choñ je' anajty tzajpjoty. ⁴ Etz nañ jadu'n y'uuc ajcxy nidüg'óciy je ni huidibi Dios anajty yecpy, com y'uuc ajcxy je ni huidibi yajpidzim ma je tzaa. E je tzaa hue' je' anajty Cristo, e paady Cristo ymüid'ijtpy etz ypubejty ajcxy anajty nidüg'óciy. ⁵ Oy ajcxy Dios ooy yjapubejty, e ni may ajcxy ooy Dios yajjotma'ty, etz jahueen ajcxy yca'óctay jim migtigüduum jecy'ajty, com ca' Dios jaygidacy je' ajcxy yhuinma'ñ.

⁶ Jadu'n nej je ayo'n yjajty müid ajt nmij'ap nmijteedy jecy'ajty, je' iixpejtíp ma ich ajt, ca'ydí n'adzojcin tijaty jibicpi, jadu'n nej je' anajty ajcxy adzojccix jibicpi. ⁷ Nañ jadu'n ca' yhuaadity ca' y'oyity co müich ajcxy m'ojadajtcixy tzaadzech quipychech jadu'n nej nijejity ajt nmij'ap nmijteedy tuñ jecy'ajty. Com jadu'n yjaybetyity ma Dios ñecy ma jadu'n ymına'ñ: "Ixtactay je jây ajcxy caaybi uucpi, e huin'it ajcxy ypidigy etz ytigyixy iyiybi ejtzpi." ⁸ Nañ jadu'n ca' y'oyity co ndundigooyim müid töxyjây ajcxy jadu'n nej nijejity nmij'ap nmijteedy tuñ jecy'ajty, e iipx tugiug mü ajcxy y'o'cy tüg xiibi. ⁹ Nañ ni ca' y'oyity co ntot'ixxim nhuinma'ñ'ixxim ich ajt nHuindzin Jesucristo, jadu'n nej ajt nmij'ap nmijteedy ajcxy idiich jecy'ajty, e may ajcxy tza'ñchüdzí, e ytigooy ajcxy yjugy'ajtin. ¹⁰ Nañ ni ca' y'oyity co nnigapxim ni'ojyiyim Dios, jadu'n nej nijejity ajcxy idiich jecy'ajty, e müid je' ycixpi Dios y'angel yaj'o'cy mayjây ma yi' ajcxy.

¹¹ Tüg'óciy yi jadu'mbi ayo'n yjajti müd ajt nmij'ap nmijteedy, e jaybety yhui'my ma Dios ñecy, jigix n'ijxpejt'ajtm, e jadu'n tiy'ajt nbaatim, ca'ydi ndundigooyim müd Dios, ich ajt pinjaty tzinaayb ma jadachambi xii jadachambi tiempo huidibi janch tim huingónip ma Dios yajcixa'ñ yajtigoya'ñ jada naaxhuiñybi. ¹² Com nmüd'ajtm je tiy'ajt nej nmij'ap nmijteedy ajcxy ytundigooy, paady ycixp pinjaty yci'mhuinma'ñ pidacp co ooy mic'ajt müdity ma ymibjcin, huen naygüend'adyi, ca'ydi ytundigoy etz ypocycähuipy ma Dios. ¹³ Tüg'óciy tzaachypyi ayo'n, jot'ijxin huinma'ñ'ijxin huidibi müich ajcxy mminajxyp myajnajxyp, nañ jadu'n jacjadyii mibijcpidijc ajcxy minajxcixy yajnajxcixy. Per yajmij'ajtcix jot'amij'ajtcix Dios, com Dios ca' a'ixihuip co mjacminájxcixipy mjacyajnájxcixipy tzaachypyi ayo'n anaxy huidibi ca' ajcxy mmimadäga'ñ. Co anajty tzaachypyi ayo'n mminajxcixy myajnajxcixy mictägy, huin'it Dios xymöhuipy ajcxy huinma'ñ jadu'n nej jëbi mminaxtagyixy myajnajtagyixy yi tzaachypyi ayo'n.

¹⁴ Paady müich ajcxy migügtijc, huidibi ooy ndzocy njihuüyich, ixmajtzcixy ca' m'ojadajtcixy tzaadzech quipychech. ¹⁵ Nyajmüdcapxy nyajmüdmijdacpy ajcxy jadayaabi ayuc, com nejhuüyibich co müich ajcxy ooy oy huinma'ñ mmüidity. E jëbi ci'm mhuinmaaygixy pen tiy'ajt jada ich n'ayuc, o pen ca'. ¹⁶ Ma je "Santa Cena" co nyajnajxim Dioscojuyip ma Dios müd je ügy, e n'uucim. Je' je' ñidiy'ajt'ajtpy co Cristo ti xyajtüg'müjcm ajt njot nhuinma'ñ co yajcruudzpejti etz ñi'py yteemy yojcy müd ajt nbocy ycixpi. Nañ jadu'n ma je "Santa Cena" co ndujchuäcxim, e ngaayim je tzajcaagy, je' je' ñidiy'ajt'ajtpy co Cristo xyajtüg'müjcm ajt njot nhuinma'ñ müd ñinix co ñaygyejei ma ymidzip huen yajcruudzpedy. ¹⁷ Oy ajt ooy njanimaayity, per nidüg'óciy ich ajt ngaayim je tügpí "Santa Cena" tzajcaagy. Jada tzajcaagy tüg yi', paady ycixpi tügpicy jay ich ajt, e jadu'n ich ajt nipaady nej tügpí ninix.

¹⁸ Oc-huinmaaygixy müich ajcxy yi Israel jay ajcxy, co ajcxy tzüztzcixy je huidibi ajcxy yajhuindzigüyb Dios, chi ajcxy naydümcüjigixy müd Dios ycixpi ma je Dios ojadajttac. ¹⁹ Ich nminda'ñich co yi tzaadzech ca' ti mic'ajt müdity, e nañ jadu'n yi tzüch huidibi yajhuindzigüyb tzaadzech ca' jac ñigi oy'ajtm müdity, ca'ydi jac huidibi tzüch. ²⁰ Jadu'n nminda'ñich, co yi jay ajcxy huidibi ca' mijpidaaccixy Dios, co ajcxy yejccixy yhuindzigü'ñ, hue' ajcxy yajhuindzigüyb ca'oybi, e ca' Dios ajcxy yajhuindzigüy. E ca' ndzocyich co müich ajcxy migügpigipy je ca'oybi. ²¹ Co müich ajcxy m'uuccixy je ügy ma je "Santa Cena", ca' huaad m'uuccixy je ügy huidibi ca'oybi ajcxy yhuindzigü'ñ'ajtip. Etz co mgaaygixy je tzajcaagy ma je "Santa Cena", ca' huaad mgaaygixy je tzajcaagy huidibi ca'oybi yhuindzigü'ñ'ajtip. ²² ¿Nej tzoc yajjotma'tim yi Jesucristo? ¿Nej jacmic'ajt müd jada' ich ajt, ca'ydi yi'?

Je tzojcin huidibi tüg mibijcpi huaad tuñ müd ymigüj

²³ Janch tiy'ajt nej jay yminaangixy co jëbi huaad nduñich huentijity huidibi nijot'ajtpych, per ca' tüg'óciy nmigügtijcch jäygidäaccixy huidi ndumybich. Janch jadu'n jëbi huaad nduñich huentijity huidibi nijot'ajtpych, per huidibi ndumybich ca' tüg'óciy xypubetyich ma ich nmibjcin. ²⁴ Ca' y'oyity nnijot'ajtm ngi'm'oy'ajtm. Oy co nbubejtm nbudigüym nmigügtijc.

²⁵ Jëbi ajcxy mdzüch huen ti tzüch huidibi yajtoocp ma je mercado. Ca' ajcxy myajtihiuipy ma je tzüch choon, ca'ydi jibic mnayjihuiyigixy. ²⁶ Com Dios y'ayuc jadu'n ymina'ñ: "Je Huindzin Dios yi' nihuindzin'ajtp je naaxhuiñybi, etz ñihuindzin'ajttaayb tüg'óciy huidibi ji yajpatp."

²⁷ Pen jim pinjaty huidibi ca' ymibicy, xyajnihuohüiy tüg caayin uucin ma yi' ytiyc, e pen ti mhuinma'ñ mbidägy co nicxy mgaya'ñ ma yi' ytiyc, oy co mgaayipy mdzüdzp huentijity huidibi ajcxy xymooyb. E ca' mnidihuiipy myajtihiuipy ma je tzüch choon, ca'ydi jac pinjaty jibic ñayjihuiyii müd huidibi ti mduñ. ²⁸ Per pen je jay xyñimaayb: "Jada tzüch ti jay yajhuindzigüy tzaadzech." Pues ca' mdzüdzp je tzüch, jigix ca' jibic ñayjihuihüiyb je migüg huidibi ti xyñimäy co je tzüch ti yajhuindzigüy tzaadzech. ²⁹ Hue' nimiydäcypich je mmigüg huidibi jibic nayjihuihüiyb pen müich mdzu'chpyi tzüch huidibi tzaadzech yhuindzigü'ñ'ajtp. Ca' nnimiydägyich nej müich ci'm mnayjihuiyii. Ca' yjeyity co nijëjity jay xyñimähuibich: "¿Na'amy co xycapx'adujcich tijaty nigoob müd co huingbi jay jibic ñayjihuiyii müd jëgixpi?

³⁰ Pen nyajnajxypich Dioscojuyip müd tijaty ycixpi huidibi ngaaybich n'uucypich, ¿na'amy co xyñigapxa'ñich xyñi'ojihua'ñich co ti ngay ti n'ügyich tijaty?" ³¹ Paady ycixp huentijity huidibi mdungixyp, pen mgaaygixyp m'uuccixyp, o jac ti ga ti mdungixy, tungix tüg'óciy müd Dios y'oy'ajtm ymij'ajtm ycixpi. ³² Ca' mdungixipy tijaty huidibi yi judiojy ajcxy müd huing ñayjihuiyii. Ca' mdungixipy tijaty huidibi yi griegojy ajcxy müd huing nayjihuiyii. Etz ca' mdungixipy tijaty huidibi yi mibijcpidijc ajcxy müd huing ñayjihuiyii. ³³ Tüg'óciy huidibi ndumybich, hue' nduñich jigix tüg'óciy jay jäygidägipy huidibi ndumybich. Ca' ni ti nduñich nej jëbi ich ci'm nayjäygidägijich. Hue' nduñich müd jacjadyii jay ajcxy y'oy'ajtm ycixpi, jaydëbi ajcxy y'alma ñidzögipy.

11

¹ Jadu'n ndzocyich co miich ajcxy mdunipy jadu'n nej nduñich. E ñich tumbich jadu'n nej Cristo ytuuñ.

Nej huaad tõxyjädjic ajcxy yjây'ajtcixy co migügtijc naymújicigixy

² Miich ajcxy migügtijc, ngapxpatypich miich ajcxy, com miich ajcxy xyjatytimyjäymejtzpich, etz nañ mguydungixyp je ayuc je tiy'ajt huidibi ñich miich ajcxy ti nyaj'ixpijccixy. ³ Per ndzocyich co mhuinjihuüygixipy je tiy'ajt co Cristo nigohuajc'ajtpy nidüg nidüg yi mibijcpi yëdjicpi. E nañ nidüg nidüg yëdjic nigohuajc'ajty ajcxy ytõxyijc. E Dios nañ nigohuajc'ajtpy je Cristo. ⁴ Co tüg yëdjic cõjuuxy cõbe'ñ ñihuäcxy capxhuäcxy je tiy'ajt huidibi Dios ti ymõyii, tüg je' tzo'ydu'ñ anajty naymõyii. ⁵ E co tüg tõxyjây cõjuxtüdy cõbe'ndüdy ñihuäcxy capxhuäcxy je tiy'ajt huidibi Dios ti ymõyii, tüg je' anajty tzo'ydu'ñ ñaymõyii. Jadu'n je' nipaady nej jihuüy je' ycõme'pxity cõdza'm. ⁶ Pen tüg tõxyjây ca' ñaygõbe'na'ñii, jac'oy co huen yajcõme'pxy cõdza'm. Per pen je tõxyjây cho'ydu'n jihuühuamby co ycõhuay yme'pxity, o co ycõme'pxity cõdza'm, jac nãgi oy co ñaygõbe'ñiiyb. ⁷ Je yëdjicijc ca' y'oyity co ajcxy ycohuajc cõjuuxy cõbe'ñ mi'idipy ma ajcxy Dios mibijtzoogixy o yaj'ixpijccixy Dios y'ayuc. Com je yëdjic jadu'n yi' nipaady nej Dios, e Dios yajcoj je yëdjic miid yi' y'oy'ajtin ycixpi. Per Dios yajcoj je tõxyjây miid je yëdjic y'oy'ajtin ycixpi. ⁸ Co Dios yajcoj je jayijpi yëdjic, ca' yajtuuñ je tõxyjây ycaachypajc. Hue' janchtiy co Dios yajcoj je jayijpi tõxyjây, je' yajtuuñ je ñiyëdjic tüg ycaachypajc. ⁹ Dios yajcoj je tõxyjây miid je yëdjic ycixpi. E ca' nan yajcoj je yëdjic miid je tõxyjây ycixpi. ¹⁰ Paady ycixp copicy co je tõxyjây ajcxy y'ijtcixy cõbe'ñ co Dios mibijtzoogixy o najtcapxüygixy Dios ytiy'ajt. Je' je' je tiy'ajt co yajpaady ajcxy ane'my, nañ jadu'n yi' ángeles ajcxy yajpaatcixy ane'my. ¹¹ Per ca' ñejity, ñich ajt huidibi nmibijcim Cristo, ma ajt ndzinaayin je yëdjic ca' je' yajpaady naydüg, etz ni ca' je tõxyjây yajpaady naydüg, hue' ajcxy naymihddzinäayigixyp. ¹² Com tiy'ajt jadu'n co Dios yajcoj je jayijpi tõxyjây miid je ñiyëdjic ycaachypajc. Etz tiy'ajt jadu'n co je tõxyjây ajcxy yajma'xung'ajtcixy je yëdjic ajcxy. Per Dios ti yaj'oyiydäy, e tüg'õciy jilby chondäy ma Dios.

¹³ Miich ajcxy ci'm ocminaangix oc-huinmaaygix, pen oy jadu'n o pen ca' y'oyity jadu'n co tüg tõxyjây Dios mibijtzooy jaygõbe'ñ. ¹⁴ Jëbi tiy'ajt nbaatim huenma'amyty ya naaxhuñ co je yëdjic huidibi ymiid ycõhuay yoñ ooy cho'ydu'n yecy. ¹⁵ E je tõxyjâydjic ajcxy ooy ycõmaypidzimigixy co ajcxy miidity ycõhuay yoñ. Com yi' je' huidi ycõbe'na'ajtip. ¹⁶ Pen jim pinjaty ca' mijotcuje'aty ñich n'ayuc, copicy nejhühiuipy co ñich ajcxy etz nañ jadu'n tüg'õciy jây huidibi ajcxy mijpidaaccixyp Dios ma tüg'õciy cajp, cuydungixy nej ti nyaj'ixpicich miich ajcxy, ca' pin jac huingbi costumbre miidity.

Pin tundigooyb "Santa Cenajoty"

¹⁷ Jada ayuc nyajnimähuangixyp jadu'n nej mdungixy ma mnayyõymújicigixy co Dios m'ojadajtcixy. Ca' ngapxpaadyich miich ajcxy, com jibic yhuimbizimiy jadu'n nej mdungixy. ¹⁸ Jayijp nimähuangixy co nijëjity migügtijc ti xynimäyich co miich ajcxy mnaybijc-huäcxigixy co mnayyõymújicigixy ma je nayyõymujctac. E ñich nmibijcpich ma ga ma co yjanchity nej je migügtijc ajcxy ymina'ñ. ¹⁹ Ca' yjecyity paady miich ajcxy mnaybijc-huäcxí miid ajcxy mjibic-huinma'ñ ycixpi, jaydëbi ñigüëxigy pin je' janch tiydudägy cuydumb Dios ytiy'ajt. ²⁰ Co miich ajcxy mnayyõymújicigixy ma je nayyõymujctac, jadu'n yhuimbizimiy co ca' mguydungixy nej ypadyii ñich ajt nHuindzin Jesucristo ytiy'ajt co mjatungixy je "Huindzin je' ySanta Cena". ²¹ Com co je hora paady ma yam mdungixy je "Huindzin je' ySanta Cena" nidüg nidüg miich ajcxy mgaaygixy abicyjaty, e ca' mdungix cuendi yi' jacjadyii migügtijc, paady nijëjity migügtijc ayuu y'ijtcixy, e nijëjity anaxy ycaaygixy y'uuccixy, ixti ymuucigixy nijëjity. ²² ¿Nej ca' miich ajcxy miidity mjin mdijc ma jëbi mgaaygixy m'uuccixy? Jadu'n nej miich ajcxy mdungixy ca' mmij'ijxcixy ca' mijpidaaccixy je jây ajcxy nidüg'õciy huidibi mijpidacp Dios. E nañ jadu'n myajtzo'ydungixy yi' ayooibi jây huidibi ajcxy ca' ti miidity. ¿Huam ñich miich ajcxy nimähuipy? ¿Nej jëbi ngõmaaygixy miich ajcxy jadu'n nej mdungixy? Ca' huaad ngõmaaygixy miich ajcxy co jadu'n m'iditcixy.

Jadu'n nej njäymejtzim ajt nHuindzin Jesús ma yi "Santa Cena"

²³⁻²⁴ Com ñich ajt nHuindzin Jesucristo ci'm xyaj'ixpijcyich je tiy'ajt huidibi ti nyaj'ixpicich miich ajcxy, co je huin'it coodz co agojux ajcxy ciyejcy je nHuindzin Jesús, huin'it je' conigy je tzajcaagy, e co jayijp yajnajxy Dioscojuyip ma Dios, chi tujc-huäcxy je tzajcaagy, e moy nidüg nidüg ydiscipulos ajcxy. E co ajcxy moyday, chi nimay ajcxy: "Caaygix jada tzajcaagy. Jadu'n ñich jada nnimicx huidibi ngiyegaamybich ma yi o'cin miid miich ajcxy ycixpi. Jadu'n ñich ti nduñich, jadu'n jada miich ajcxy mdunipy jäymejtzig miid ñich ycixpi." ²⁵ Co ajcxy ycaayday, chi Jesús nañ jadu'n conigy je ügy copí'am, e yminañ: "Jada

ügy je' jada je Dios y'ayuc jemybi huidibi Dios yajhui'my müd jäy ajcxy ycixpi, je huidibi iich nni'py ñidi'yaj'tajtpy. Naag'oc naag'oc m'uuccixy jada ügy tungixy jäymejtzig müd iich ycixpi." ²⁶ Paady naag'oc naag'oc müich ajcxy mgaaygixy jada tzaajaagy, etz m'uuccixy jada ügy, myegipy ajcxy ti'yaj'ta jadu'n nej Cristo y'o'cy müd ajt nbocy ycixpi, ixti cooni anajty Jesucristo yhuimbity ya naaxhuiñ.

Nej huaad ngaayim je "Santa Cena"

²⁷ Paady ycixp pinjaty ajt ca'oyjot ca'oyhuinma'n caaygixy je tzaajaagy etz uuccixy je vino'ügy, huidibi ajt nHuindzin Jesús ñin'cx'ajtpy etz ñi'py'ajtpy, hue' ajcxy ymidundigooygixy ajt nHuindzin Jesús ñaaxn'cx etz yi' yñi'py. ²⁸ Paady ycixpi copicy nidüg nidüg mibijcpidijc jayijp yaj'oyihuipy yci'mjot yci'mhuinma'n, e huin't jäbi cayipy je tzaajaagy etz ügipy je vino ma je "Santa Cena". ²⁹ Com pinjaty caayb je tzaajaagy etz ügy je vino ma je "Santa Cena", e ca' tuñ cuendi co je' je' iich ajt nHuindzin Jesús ñin'cx etz ñi'py, hue' je' ci'm ñaymidundigoyi, e Dios tzaachytunib müd ypocy ycixpi. ³⁰ Paady ycixp may müich ajcxy myuumüidity mba'mmüidity, pumäy mnayjihuiyigixy. May müich ajcxy yuu ba'm xyaj'ayoogixy etz may ma müich ajcxy ti m'öccixy. ³¹ Co tiyudägy njot nhuinma'n nyaj'oyi'yim ci'm, ca' ajt nHuindzin Jesucristo xychaachytuunim. ³² Co ajt nHuindzin Jesucristo xychaachytunim müd yuu ba'm, paady ycixpi jadu'n xychaachytuunim, jigix ca'ydi nidigooyim ajt n'alma yjugy'ajtin quipxy müd je naaxhuiñjäy ajcxy huidibi ca' ajcxy Dios tzigiiygixy.

³³ Paady ycixpi müich ajcxy migügtijc co ajcxy mgaya'nip m'üga'nip je "Santa Cena" nay'ahuixigixy miñ xyipy, e jadu'n mgäyigixy amugi'. ³⁴ Pen jim pinjaty ma müich ajcxy ooy yuubögyi, jac'oy co ycaayipy y'ügipy ma yci'ndijc jacjayijp ma ca'ni ymiñ ma je nayöymujctac. Jadu'n mdüngixy, ca'ydi Dios xychaachytuungixy müd co ya' oy mduungixy je "Santa Cena". Yi jacjadyi ayuc huinma'n jim nyaj'oyihuibich co anajty n'cxxy ci'm n'jxcixyich müich ajcxy.

12

Je mic'ajt huidibi Espíritu Santo yejcy ma nidüg nidüg mibijcpidijc

¹ Migügtijc ajcxy, ndzojcypich co müich ajcxy mnejhuihuipy jadu'n nej je Espíritu Santo xymooyim mic'ajt. ² Müich ajcxy mnejhuibych co jayijp'ajty co ca'ni anajty mmibijccixy Cristo, ooy anajty je ca'oybi xyajnidigooygixy xyajtüdigoooygixy, co m'ojadajtcixy tzaadzech quipychch huidibi ca' ymidoy ca' ycapxy. ³ Paady ycixpi ndzojcypich co müich ajcxy mnejhuihuipy co pinjaty ymina'nipy: "iCa' oy jäy yi Jesús!" je jäy huidibi jadu'n minamb, ca' je' anajty yajcapxyi je Dios y'Espíritu. E pinjaty minamb: "iJesús iich ajt nHuindzin!" je' anajty yajcapxip je Espíritu Santo.

⁴ Dios yjihui'n ymic'ajt yejcy ymic'ajt canaag nax, per tügpajc jäyi je Dios yjihui'n huidibi mic'ajt yejcp. ⁵ Ji yajpaady canaagnax Dios ytung, per tügpajc ajt nHuindzin Jesús huidibi xyajni'bjicim nije' nije' tung. ⁶ Ji yajpaady canaagnax huinma'n nej jäbi ndunim Dios ytung. Per tügpajc Dios huidibi ymooyim nidüg nidüg je nhuinma'n nej huaad ndunim Dios ytung. ⁷ Dios yajni'guéxigyp ma nidüg nidüg mibijcpidijc je ti'yaj'ta co ajcxy müidity yi' yjihui'n ymic'ajt ma ajcxy yjot yhuinma'n. Jadu'n Dios ytuñ müd tüg'öciy ymibijcpidijc y'oy'ajtin ycixpi. ⁸ Dios müd yjihui'n ymic'ajt ymooyb nijëjity mibijcpidijc ayuc huinma'n nej jäbi ajcxy yaj'ixpicy Dios y'ayuc. E nañ jadu'n Dios müd yjihui'n ymic'ajt möy nijëjity mibijcpidijc ixpijcin ma yi' yti'yaj'ta, per tügpajc je Espíritu Santo huidibi mic'ajt yejcp. ⁹ E nañ jadu'n Dios müd yjihui'n ymic'ajt möy nijëjity jäy mibijcin, per tügpajc je Espíritu Santo huidibi mic'ajt yejcp. E nañ jadu'n jacnaagity möy mic'ajt jaydëbi yajtzögy pa'mjäy. ¹⁰ E nañ jadu'n Dios müd yjihui'n ymic'ajt ymooyb nijëjity mibijcpidijc mic'ajt, jaydëbi mihuinma'n yntungixy milagro tungixy. E jac nijëjity ymooyb mic'ajt, jaydëbi najtzcapxiygixy Dios yti'yaj'ta. E jac nijëjity Dios ymooyb ixpijcin etz huijy'ajtin, jaydëbi iixcaypcixy je espíritu huidibi ca' ti'yaj'ta müidity, etz nañ jadu'n iixcaypcixy je espíritu huidibi ti'yaj'ta müidip. E jac nijëjity Dios ymooyb je mic'ajt, jaydëbi capxcixy huingbi ayuc, etz nañ jadu'n jac nijëjity ymooyb je ixpijcin jaydëbi yajni'guejicy je huingbi ayuc. ¹¹ Per tügpajc je Espíritu Santo huidibi ymooyb nije' nije' mibijcpidijc mic'ajt etz huinma'n. Ymooyb nidüg nidüg nej yi' tzocy.

Nidüg'öciy ajt nyajpaatim ma Cristo

¹² Cristo jadu'n yi' nej tüg nin'cx, je nin'cx ymüd canaag nax huidibi yu'cxp. Oy canaag jamüidity huidibi yu'cxp, per tügpajc ñin'cx'aty. ¹³ Co nidüg nidüg iich ajt nni'bejtim, chi iich ajt nyajpaatim nej tügpicy jäy. Com Dios yjihui'n ymic'ajt tügpajc yajpaady ma nidüg'öciy iich ajt njot nhuinma'n, ca' ñejity pen judiojäy ajt, o pen ca' ajt njudiojäyity; pen jäy xytumbi'ajtim o pen ndunim ngi'mdung; hue' n'ijtim nej tügpicy jäy. Dios xy'adigiiyim xyjottigiiyim yi' yjihui'n ymic'ajt nidüg'öciy iich ajt, paady ycixpi tü'ciy nyajpaatim, com tü'ciy nni'ijtim Dios yjihui'n ymic'ajt.

¹⁴ Tügpi jäy ñinîcx müd canaagnax huidibi yu'exp, huidibi midoob, huidibi i'jxp. ¹⁵ Co ixyipy je teci jadu'n ymina'ñ: "Ca'p ñich ngîity, paady ca' nyajpaadyich ma je ninîcx." ¿Nej paady ycixpi ca' yajpaady ma ninîcxin? ¹⁶ O co ixyipy je tãdzac ymina'ñ: "Ca'p ñhuinîty, paady ca' nyajpaadyich ma je ninîcx." ¿Nej paady ycixpi ca' yajpaady ma ninîcxin? ¹⁷ Co ixyipy tûg'óciy je jäy ñinîcx y'oc-huin'aty, ¿ma ixyipy müdity huidi midooyb? O co ixyipy tûg'óciy je jäy ñinîcx ytãdzac'aty, ¿ma ixyipy müdity huidibi jëbi müd tijaty xuugyî? ¹⁸ Dios ti pidaci jäy ytecy yhuin y'ahuac etz jac tijaty ma tûgpi ninîcx jadu'n nej yî' tzojcy. ¹⁹ Pen huiindi'ajty ixyipy ninîcx'ajtp, ¿ti ninîcx ixyipy jada? ²⁰ Dios ti môy nidûg nidûg jäy yci' ytecy, yhuin y'ahuac, yijpput etz ytãdzac, per tûgpajc ñinîcx'aty.

²¹ Ca' huaad je huiin ixyipy nimäy je ci': "Ca' ñich müich nyajmayjaty." Nañ jadu'n ca' huaad ixyipy je cohuajc nimay je teci: "Ca' ñich müich nyajmayjaty." ²² Tûgpi ninîcx copicy ca'pxy tijaty müd. Huidijaty je ninîcx ymüid oy yjaquëxîgy nej jihuîy ca' y'oy'ojadajntîty, per copicy yî'. ²³ Jadu'n ñich ajt njäy'ajtm. Muum ma ajt nninîcx ca' oy n'ijxm, paady nayxo'jim, jigix jac'oy quëxîgy. Nañ jadu'n muum ma ajt nninîcx huidi y'oy'midzo'yduni, paady nyüzim müd huit, jaydëbi oy quëxîgity. ²⁴ Muum ma ajt nninîcx oy n'ijxm paady ca' nyüzim müd huit. Jadu'n Dios yaj'oyîy ajt nninîcx, jigix ma ca' oy y'ijxity, nxoxim müd huit, jigix jëbi oy quëxîgy. ²⁵ Jadu'n Dios yajcojy yaj'oyîy ajt nninîcx tû'ciy, jigix ca'ydi ñaychiptûnigixy nîje' nîje' huidibi yûcx ma ajt nninîcx. Tûg'óciy huidibi nmüid'ajtm ma ajt nninîcx naybubéjtigixp miñ xyipy. ²⁶ Pen pijcp muum ma je ninîcx, tûg'óciy je ninîcx jihuîy je pijcin. Pen muum ma ajt nninîcx ooy capxpaady y'ity, chi tûg'óciy je ninîcx jotcuyc ñayjihuîyî.

²⁷ Müich ajcxy nidûg'óciy Cristo xyñinîcx'ajtcixyp, e nidûg nidûg müich ajcxy myajpatcixy ma Cristo ñinîcx. Jadu'n nidûg nidûg ñich ajt nîpaady nej huidi yûcx ma tûg ninîcx. ²⁸ Dios yajnîbicjpy nîje' nîje' mîbijcpidîjc, jigix ajcxy yajnicxip nidûg nidûg yî' ytung. Tim jayîjp yajnîbicjy je apóstol ajcxy huidibi je mîjtung yajnicxip. E mîmetz Dios yajnîbicjy nîjêjity mîbijcpidîjc huidibi najtzcaxîyb yî' y'ayuc, je midugîgpi Dios yajnîbicjy nîje' nîje' je mîbijcpidîjc huidibi yaj'ixpijcp yî' ytiy'ajt. Dios yajnîbicjy mîbijcpidîjc nîjêjity huidibi mij huinma'ñ tumb. E Dios yajnîbicjy mîbijcpidîjc nîjêjity huidibi yajtzoocp pa'mjây. E Dios yhuin'ijx huidibi pubejtp ymîgûgtîjc. E Dios yhuin'ijx je mîbijcpidîjc huidibi ane'mîp je ymîgûgtîjc. E Dios yhuin'ijx je mîbijcpidîjc huidibi jadip nej capxip huingbi ayuc. ²⁹ Ca' nan nidûg'óciy mîbijcpidîjc huidibi Dios huin'ijxyp y'apóstol'ajtcixy. Nañ ni ca' nan nidûg'óciy ajcxy najtzcaxîygixy Dios y'ayuc. E nañ ni ca' nidûg'óciy yî' ajcxy mijhuinma'ñytungixy. ³⁰ Ca' nan nidûg'óciy mîbijcpidîjc huidibi Dios huin'ijxip ymüid ajcxy mic'ajt cõtucj yajtzoogîpy pa'mjây. Nañ jadu'n ni ca' ajcxy nidûg'óciy jajtciy nej yajnîgêjîcixipy huingbi ayuc. ³¹ Pîjctzoogix cixyot huinîjot ma Dios je mic'ajt etz je huinma'ñ oybi. ñich müich ajcxy nyajnîxîhuipy tûg nî'aa tû'aa jac'oybi.

13

Je tzojcin je oyjây'ajtm

¹ Co ixyipy ngapxyich tûg'óciy jäy ajcxy y'ayuc, etz nañ jadu'n ngapxyich ángeles ajcxy y'ayuc, e ca' ndzocxyich ca' njihuîyîch nmîgûgtîjcich, jadu'n yhuimbîdzîmy ñich n'ayuc jadu'n nej tûg tambor o tûg platillo huidibi nigoob ooy ñe'my. ² E co ixyipy najtzcaxîyîch Dios y'ayuc, etz co ixyipy njatyîch tûg'óciy xpijcin huidibi pinjaty nejhuîy etz huidibi pinjaty ca' nejhuîy, etz co ixyipy nmîjpidägyîch Dios ymic'ajt, ixti jëbi nyajpidägyîch tûg cop, pen ca' ndzocxyîch njihuîyîch nmîgûgtîjcich, ca' ñich ti ndzoohuîty. ³ E co ixyipy nmoydayîch ayooûtîjc tûg'óciy tijaty nmüidîch, e nañ co ixyipy ngîyecyîch nninîcx ma jäy ajcxy co huen nõctîgoydây, e ca' ndzocxyîch njihuîyîch nmîgûgtîjcich, ni ti oybi ca' nbada'ñich.

⁴ Yî jäy ajcxy huidibi ooy tzozy ooy jihuîy ymîgûgtîjc, hue' ajcxy ooy mecxtujcin müdity, nañ ooy ajcxy yung naxy yjot yhuinma'ñ. Nañ ca' ajcxy ymîgûg ti yajcohuindoyîi, e nañ ca' ajcxy ñaygómayîi ci'm. ⁵ Yî mîbijcpidîjc huidibi ajcxy tzojcp jihuîyb ymîgûgtîjc, ca' ajcxy oyñînej ycapxcixy, ca' ajcxy yci'm tzojcin adzip tungixy, nañ ni ca' ajcxy yhuindzipîty, nañ ni ca' ajcxy ymîgûg mijotma'tcixy. ⁶ Yî mîbijcpidîjc huidibi ajcxy tzojcp jihuîyb ymîgûgtîjc ca' ajcxy yjotcuicy co pinjaty ytundîgooy. Jotcuyc ajcxy co pinjaty tudägy yjây'ajtcixip. ⁷ Co naychojcin nayjihuîyîm, huin'it yajtunîm mecxtujcin, huin'it nmîbijctayîm huidijaty tîy'ajtp, huin'it nmîbijctaayîm co tûg'óciy tijaty oy yhuimbîdzîmîpy, huin'it nmecxtujctayîm tûg'óciy tzaachypî ayo'n.

⁸ Yî naychojcin nayjihuîyîm ca' yî' ycixîpy ytîgoyîpy ni mîna. Mînip je xîi tiempo ma ca' y'ocya'ijxnîpy y'ocya'jmîdoonîpy Dios ycapxy y'ayuc huidi jäy ajcxy ñajtzcaxîygixyp, nañ ni yca'ymîdoohuîpy pin huingbi ayuc capxp, ni yca'yajtzozy anajty ti di'yajt. ⁹ Com ca' yca'pxîty je xpijcin huidibi ñich ajt nmüid'ajtm. Nañ jadu'n ca' yca'pxîty je Dios y'ayuc huidibi ñich ajt nñajtzcaxîyîm.

¹⁰⁻¹¹ Per co anajty nmüd'ajtm ca'pxy Dios y'ayuc ytiy'ajt, chi ycixipy ytigoyipy je ayuc huidibi nmüd'ajtm cham huidibi ca' yca'pxity. Co nmutz'ajtyich nbi'c'anäg'ajtyich, jadu'n anajty ngapxyich nmiydägyich n'iyiyich nejtyin pi'c'anäcin. Per co oy nmij'anäc'iyñich, chi n'ixmajtznich je pi'c'anäg'atypi huinma'ñ. ¹² Nañ tim jadu'n nyajnajxim jadachambi xii tiempo ca' n'ixpijctaayim, ca' nhuinjuhuydaayim Dios y'ayuc ytiy'ajt. Jadu'n nipaady nej jihuüy nay'a'ixnajxim ma tüg iix, huidibi ti chijxni ti yjibiciyñi. Co anajty Jesús yhuimbity jadüg'oc, huin'it huädz nhuinjuhuydaayim Dios y'ayuc ytiy'ajt, com naybadaanim müd Jesús ahuin ajip. Jadachambi magama nhuinjuhuyich. Per co nnaybad'iybich müd Jesús, huin'it nhuinjuhuydähuibich nej Dios y'ixpijcin müdity, tim jadu'n nej Dios nejhuinydäy nej iich n'ixpijcin nmüidity. ¹³ Nmibigaanim Cristo huinixii huinitiempo, ca' n'ixmadzaanim nmibijcin ni mina. Nañ njip'ixxim co oybi nbadaanim ma Dios huinixii huinitiempo. Nañ jadu'n ndzojcin njihuüyim migügtijc huinixii huinitiempo. Hue' jac nigi copicyip co naychojcin nayjihuüyim ca'ydi jac ti.

14

Co huingbi ayuc yajcapxy

¹ Naychöjcgixy nayjihuüygixy miñ xyipy. Mijottigooygixy nej mbaatcixy Dios yjihui'ñ ymic'ajt canaagnax. Yi Dios yjihui'ñ ymic'ajt huidibi jac'oybi, yi' je' jejcpy mic'ajt jaydëbi mnajtcapxygixy Dios y'ayuc ytiy'ajt. ² Yi jäy ajcxy huidibi Dios ymic'ajt müd jaydëbi capxy huing ayuc, hue' ajcxy ymigapxyp Dios, e ca' nan jäy, com yi jäy ajcxy ca' huinjuhuygixy je' ajcxy y'ayuc huidibi capxp. Je Espiritu Santo jejcp je ayuc ma je huidibi capxp. Jadu'n nipaady nej jihuüy ameech je' ycapxy. ³ Pinjaty najtcapxyib Dios ytiy'ajt, yi' ycapxhuäcxyp Dios y'ayuc ma yi jäy ajcxy, jaydëbi yujcpedipy ajcxy y'ixpijcin ma Dios y'ayuc, nañ jadu'n jaydëbi ajcxy yjotmicpigipy etz yjotcugüygixipy. ⁴ Pinjaty capxp huing ayuc, hue' ci'm naybubedyi. Pinjaty najtcapxyib Dios y'ayuc ma yci'm ayuc, hue' ypubejtyp tüg'öciy yi mibijcpidijc.

⁵ Huaad co ixipy nidüg'öciy müich ajcxy mgapxcixy huingbi ayuc. Per jac nigi oy co müich ajcxy mnajtcapxygixy Dios ytiy'ajt, ca'ydi co mgapxcixy huingbi ayuc. Pinjaty huidibi najtcapxyib Dios y'ayuc, jac nigi oy tuñ, ca'ydi jac pinjaty huidibi capxy huingbi ayuc, pen ca' pinjaty capxticxipy je huingbi y'ayuc, jigix je mibijcpidijc jotcujc'ajtin páticxip. ⁶ Migügtijc ajcxy, co ixipy nnicxyich ma müich ajcxy, e ngapxyich ixipy huingbi ayuc, çti oybi müich ajcxy mbadamyb ma iich? Pen ca' anajty ti pubejtin nduñich ma müich ajcxy, pen ca' nyajnejhuüygixy Dios ytiy'ajt jemybi, pen ca' nyaj'ixpijccixy Dios ytiy'ajt o pen ca' mnajtcapxyich Dios y'ayuc, o pen ca' nyecyich ixpijcin.

⁷ Tzoc opcidaacim tüg iixpejt ma je xüxy, jadu'n nej je flauti o je arpa. Pen ca' nmido'mbijcim je nota je tono nidüg nidüg, ca' nmido'mbijcim ti pieza ti xüxy yajxuxp o yajcoob. ⁸ Nañ jadu'n co soldados ajcxy chiptunaangixy, pen je trompeta ca' huädz yxüxy, ca' ni tüg soldado ñayñi'ixihua'ñyii ma je tzip ytuna'ñyii yjada'ñyii. ⁹ Nañ tim jadu'n müd müich ajcxy, pen mgapxcixy huingbi ayuc huidibi ca' pin huinjuhuy, çnej yajnejhuühyip ti müich anajty mgapxy? Jadu'n je' anajty yhuimbizimni nej nigoo mdm'ixmiydaaccixy. ¹⁰ Janch co ji yajpaady canaagnax ayuc ya naaxhuñ ac tigachjaty. Etz janch co nidüg nidüg jäy ayuc müdity e ci'm je' ajcxy huinjuhuygixy. ¹¹ Per pen ca' nhuinjuhuyich je ayuc huidibi jäy xyajmigapxich jadu'n iich yi' nyajnaxyich nej agatz. O pen ca', yi' xyajnajxpich nej agatz. ¹² Paady müich ajcxy co ooy mnijot'ajtcixy Dios yjihui'ñ ymic'ajt canaagnax, yajtungix je mic'ajt huidibi pubedam yi mibijcpidijc, jigix yujcpedipy ajcxy ymibijcin etz y'ixpijcin ma Dios y'ayuc.

¹³ Paady pinjaty jajtp nej capxp huingbi ayuc, copicy co Dios mibijctzohuipy co mic'ajt ymöhüib, jaydëbi yajñiguejy je ayuc huidibi ycapxamyb. ¹⁴ Pen nmibijctzooybich Dios müd huingbi ayuc, nmibijctzooybich müd iich n'espíritu, per iich nhuinma'ñ ca' ti jäygidaacin paady. ¹⁵ Çti huaad ndunipyich? Pues copicy nmibijctzooyich n'ojadatych Dios müd iich njihuüñich, e nañ jadu'n nmibijctzooyich müd iich nhuinma'ñich. N'ibadaamyich ngapxpadaamyich Dios müd iich njihuüñich etz müd iich nhuinma'ñich. ¹⁶ Com pen müich mhuin'igixyp mhuingapxtaaccixyp Dios müd yi mjihuüñ, je migüg huidibi amido'o'ijtp ca' je' huinjuhuy je huing ayuc huidibi mgapxyp, e ca' jëbi ymina'ñip "jadu'n jada, Amén." Com ca' yi' huinjuhuy ti yi' mgapxyp. ¹⁷ Ca' yjeycity co oyjaty ayuc ti myajtuñ co ti myajnaxy Dioscojuyip ma Dios, per yi mmigüg huidibi ca' huinjuhuy müich m'ayuc ca' yi' ti jäygidaacin paady. ¹⁸ Nyajnajxypich Dioscojuyip ma Dios co nigi njatyich nej ngäpxibych huingbi ayuc, ca'ydi müich ajcxy nidüg'öciy. ¹⁹ Per co nyajpaadyich ma je mibijcpidijc ti ñayyöümücgixy, jac'oy co ngapxyich migoox ayuc huidibi mibijcpidijc yhuinjuhuygixyp, ca'ydi co ngäpxibich majc mil huingbi ayuc huidibi ca' pin huinjuhuy.

²⁰ Migügtijc ajcxy, ca' ajcxy mmüid'adipy mhuinma'n, jadu'n nej pi'ctijc yhuinma'n müidity. Ma yi jibici huinma'n ymiñ naybidägi jadu'n nej ma'xungdijc huidibi ca' ti jibic huinma'n huiñjihuigixy. Müid'adip müich ajcxy oyjot oyhuinma'n jadu'n nej mij'anäctijc huidibi yhuinma'n ti ymejtzn ti yca'pxni. ²¹ Jaybety y'ity ma Dios ycötujcin necy ma Dios jadu'n ymina'n: "Nmigapxaamybich je may Israel jäy müid huingbi ayuc, e huingbi jäy najtzcapxihuamb iich n'ayuc ma yi' ajcxy, per ni jadu'n ajcxy xycatuna'ñich cuendi." Jadu'n je Huindzin Dios ymina'n. ²² Paady je' je Dios ymic'ajt huidibi yajcapxp huingbi ayuc, yejcp Dios ymic'ajt iixpejt ma yi jäy ajcxy huidibi ca' mibijccixy Dios. Per je Dios ymic'ajt huidibi jäy ymiid co najtzcapxiy Dios ytiy'ajt, yejcp iixpejt ma yi mibijcpidijc, ca' yecy iixpejt ma yi' ajcxy huidibi ca' ymibijccixy. ²³ Ca' yjecyity jadu'n yjadip, co anajty ti ñayyöymüjcgixy je mibijcpidijc, e nidüg'öciy anajty ajcxy ytiy'ajcixy capxpi müid huingbi ayuc huidibi ca' pin huiñjihuig, chi ytiy'ajcixy ma ajcxy ñayyöymügyii nijëjity huidibi ca' ymibijccixy. ¿Ca' yi' ajcxy ymina'angixyipy co je mibijcpidijc anajty ajcxy ti y'ahuimbijtcixy loci? ²⁴ Pen nidüg'öciy je mibijcpidijc ma je nayyöymüjctac najtzcapxiyigixy Dios ytiy'ajt müid yci'm ayuc, e co ytiy'ajcixy pinjaty huidibi ca' ymibicy, e co yi' midohuipy Dios y'ayuc yjihuihuamby ypocy. E ci'm huiñmayip nej anajty ti ytundigooy müid Dios co midohuipy co nidüg'öciy mibijcpidijc anajty najtzcapxiyigixy Dios y'ayuc. ²⁵ E Dios y'ayuc yajnejhuib nej anajty ameech ti ytundigooy jotjoty huiñma'ñjoty. E chi jada' ycojxtinay'ihuip, e ojadadipy Dios, e nañ jadu'n ymina'nip co janch Dios müich ajcxy xymüid'ijtp.

Tungixy tüg'öciy müid tudägy'ajt etz yajxon

²⁶ Migügtijc ajcxy, ¿ti huaad mdüngixipy? Co mnayyöymüjcgixy, nijëjity müich ajcxy mhuin'ixipy tüg salmo, tüg ayuc huidibi yaj'ixpigamby, tüg tiy'ajt huidibi Dios ti xyajnejhuigixy, etz capxp huingbi ayuc, etz capxticixy nej yhuimbidzimby je huingbi ayuc. Tüg'öciy jadu'n tungix, jaydëbi ajcxy jäygidägyipy etz yujcpedipy ajcxy ymibijcin huidibi ti ñayyöymüjcgixy. ²⁷ Pinjaty capxamb ma je naymujctac müid huingbi ayuc, huen capxy metz o tugig jäy je'yi, e huiñdüg padüg huen capxcixy, ca' y'animayity. E pinjaty capxticxamb je' je' yajñguejip nej yhuimbidzimby je ayuc tiibi capxcixy. ²⁸ Pen ca' yajpaady ma je nayyöymüjctac tüg jäy huidibi capxticixy je huingbi ayuc, jac'oy co ca' ni ti yajcapxipy müid huingbi ayuc, jac'oy co migapxip Dios jotjoty huiñma'ñjoty, e ca' capxp mayjäyoty. ²⁹ Nañ jadu'n mayjäyoty jëbi metz o tugig jäy najtzcapxihuip Dios ytiy'ajt, e yi' jacjadyii mibijcpidijc huidibi amido'ijtp, jëbi ajcxy huiñmayip janch Dios je' ytiy'ajt huidibi ajcxy ti najtzcapxiy, o pen ca' je' Dios tiy'ajt'adyii. ³⁰ Pen jim mayjäyoty jadüg jäy Dios yajnejhuigixy nej ycapxp, nej tiy'ajt najtzcapxihuip, huen je jäy y'amonipy huidibi anajty jayijp ti ytiy'ajt najtzcapxiy Dios y'ayuc ytiy'ajt. ³¹ Jëbi müich ajcxy nidüg'öciy mnajtzcapxiyigixy Dios ytiy'ajt huiñdüg padüg, jaydëbi tüg'öciy je mibijcpidijc ixiyccixy Dios ytiy'ajt, e nañ jadu'n jëbi nidüg'öciy yjotmicipjccixy. ³² Copicy co yi' ajcxy huidibi najtzcapxiy Dios ytiy'ajt, huen ajcxy nay'ané'migix ci'm, e huen capxcixy mina y'ahuaatzcixy. ³³ Dios ca' xyajmidzocim nicx nhuinma'ñdigooym, Dios chojcp co servicio ndunim agujc jotcujc.

³⁴ Jadu'n nidüg'öciy mibijcpidijc ma canaag cap ymina'angixy co ca' huaad töxyjäydijc ycapxcixy serviciojoty, com Dios ti capx'aducy co ajcxy ca' ycapxipy serviciojoty. Copicy co je yëydijc ajcxy ane'mip je servicio, e ca' töxyjäydijc ajcxy huaad ane'migixy je servicio, com jadu'n Dios ycötujcin ymina'n. ³⁵ Pen ñejhuihuamby ajcxy töxyjäydijc ti ayuc ti tiy'ajt, jëbi ajcxy ñiyëydijc amidoogixy co anajty ajcxy yhuimbijtcixni ma ytiy'ajt, com tzo'ydu'n yejcp töxyjäydijc ajcxy co ycapxcixy serviciojoty.

³⁶ Müich ajcxy hue' mdzachnaybidäacigixy nej jihuig müich ajcxy jayijp tim nejhuigixy Dios y'ayuc, ca'ydí jac pin. Müich ajcxy mnaybidäacigixy jadu'n nej jihuig jimy jadu'n yajcapxhuacxy Dios y'ayuc, ca' yjacmaajity. ³⁷ Pen jim pinjaty ma müich ajcxy huidibi naybidäacip nejjihuig Dios ti ymöyü mic'ajt nej jëbi najtzcapxihuip Dios ytiy'ajt, o ti yhuinma'ñmöyü je Espíritu Santo tijaty tiy'ajt, hue' copicy nañ jadu'n yñejhuip co je ayuc huidibi iich müich ajcxy nyajnijayiyb, Dios jada y'ane'min ycötujcin. ³⁸ Pinjaty jim ma müich ajcxy huidibi ca' mijpidäga'n etz ni ca' cöbiga'n je ayuc tiy'ajt huidibi Dios ti xyaj'ane'myich, Dios ca' cöbiga'n yijadu'mbi jäy.

³⁹ Com iich jada ayuc nyaj'ixpijcpich, paady cham nimaaybich nmigügtijc, co huen najtzogiyigixy nej mnajtzcapxiyigixy Dios ytiy'ajt, e nañ jadu'n ca' mgapx'adüjccixy yi' ajcxy huidibi capxamb huingbi ayuc. ⁴⁰ Hue' janchtiy tüg'öciy tungixy yajxon, etz müid tudägy'ajt, ca' oyñinej mdüngixipy.

15

Co Cristo yjugypijcy jadüg'oc co y'o'cy

¹ Jadügnax, migügtijc ajcxy, ndzojeycix co müich ajcxy mjäyméjtcixipy je Jesucristo y'ayuc ytiy'ajt huidibi ti ngapxhuacxyich ma müich ajcxy. Je' je' je ayuc tiy'ajt huidibi müich

ajcxy ti mgöbijccixy etz huidi ajcxy tudägy mibijccixyp. ² Jëbi ajcxy m'alma ñidzögipy, pen mguydumyb ajcxy iich n'ayuc huidibi ngapxhuäcxypich, e pen ca' anajty ti mmibijccixy.

³ Ti ngapxnaxych ma miich ajcxy je ayuc huidibi Dios jayjip ti xymöyich, etz ti nyajnamaaygixy huidibi jaccopicyp co Cristo y'o'cy müd ajt nbocy ycixpi, jadu'n nej Dios y'ayuc ymina'n huidibi jaybety ijtp ma yi' ñecy. ⁴ Chi ajcxy yajnahtigiy Jesús, e codugüg xii yi' yjugypijcy jadüg'oc jadu'n nej Dios y'ayuc ymina'n huidibi jaybety ijtp. ⁵ E co je Cristo yjugypijcy, chi ñayguëxici jayjip ma Pedro, e jac'axam ñayguëxici ma yi' jacadyii ni majmetzpi apóstol ajcxy. ⁶ Jahueeni xii tiempo yjacnicxy co je Cristo oy ñayguëxigiyi nañ jadu'n ma nigox nimigo'pxnaxy mibijcpidijc tügpi tiempo. E may yijadu'mbi mibijcpidijc jacjugy'ajtni chambaad, etz naagity ajcxy ti y'ó'ccixni. ⁷ Jahueeni xii tiempo yjacnicxy co Cristo ñayguëxici ma Jacobo, etz nañ jadu'n ma nidüg'óciy yi' y'apóstol ajcxy.

⁸ Jac tim axam ñayguëxici je Cristo nañ jadu'n ma iich. Jacjayijp Jesús huin'ixy yi' jacadyii apóstol ajcxy, etz jac'axam iich xyhuin'ixyich. Jadu'n iich nipaady nej tüg jay huidibi ooy ti ninajxni je tiempo co ti yma'xung'aty. ⁹ Jaccapxaady yi' jacadyii Jesús y'apóstol ajcxy ca' ydi iich. Nañ jadu'n ni ca' iich xypaady co jay ajcxy xytjibich Jesús y'apóstol, müd co ooy ti n'ixhuidityich ti nbahuidityich Dios yjáy ajcxy. ¹⁰ Iich nje'ajtpich nej nje'atyich müd co Dios may'ajt müd iich tuñ. Je mijmay'ajt je mij'oy'ajt huidibi Dios ti tuñ müd iich, ca' ñaadig'aty, ti y'oybidzimyb. Nigi mictägy ti nduñich ma Dios ytung, ca' ydi jacpinjaty. Ca' nan co iich ndzachmadägyich ma Dios ytung. Hue' Dios oy xymiid'ityich, etz ooy may'ajt tuñ müd iich. ¹¹ Paady pen ti miich ajcxy mbaady Dios ytiy'ajt ma iich, o ma yi' jacadyii apóstol ajcxy, ca' ñejity. Je' je' je' Cristo y'ayuc huidibi iich ajcxy ngapxhuäcxypich, e nañ Cristo yi' y'ayuc tiibi mmibijccixy.

Co öcypi ajcxy yjugypigipy ajcxy jadüg'oc

¹² Per pen iich ajcxy ayuc ngapxhuäcxypich co je Cristo yjugypijcy jadüg'oc co y'o'cy, ¿na'amy co nijëty miich ajcxy minaangixy co yi' jay ajcxy tiibi y'o'ccixy ca' ajcxy yjugypigaangixy jadüg'oc? ¹³ Pues pen janch ca' yjugypigaangixy tiibi y'o'cy, nañ jadu'n ni Cristo ca' ycajugypijcy jadüg'oc. ¹⁴ Co ixipy yjanchity co Cristo ca' yjugypijcy, nañ tim jadu'n je ayuc huidibi ngapxhuäcxypich ca' ti mic'ajt ixipy müdity. E nañ jadu'n miich ajcxy mmibijcin ca' ixipy chobaady. ¹⁵ Pen tiy'ajt ixipy co je öcpi ca' yjugypigaangixy, huin'it je Dios y'ayuc huidibi ngapxhuäcxypich ixipy yhuimbizimyb anii. Com ngapxhuäcxypich co Dios yajjugypijcy Cristo co y'o'cy, paady pen tiy'ajt ixipy co pinjaty tiibi y'o'ccixy ca' yjugypijcy. Nañ jadu'n ixipy ca' ytiy'ajty co Dios yjugypijcy Cristo. ¹⁶ Pen je öcpidijc ajcxy ca' jugypijccixy etz ca' ajcxy yjugypigaangixy jadüg'oc, nañ jadu'n ni je Cristo ca' ycajugypijcy jadüg'oc co y'o'cy. ¹⁷ Co je Cristo ca' ycajugypijcy jadüg'oc co y'o'cy, chi miich ajcxy mmibijcin ixipy ca' choobaady. E ca' miich ixipy ajcxy Dios mbocy xyhuinmecxi. ¹⁸ E pen janch tiy'ajt ixipy co je Cristo ca' ycajugypijcy, huin'it je mibijcpidijc tiibi y'o'ccixy tigoaangixy y'alma. ¹⁹ Pen janch tiy'ajt ixipy co mmibijcin Cristo jëyi ma jadachambi tzinaayin ya naaxhuin, ca' jac ni ti ixipy nijjp'ijxim co n'o'cim. Jadu'n iich ajt nipaady nej locijäy, e jay ajcxy nigi xyñixiicim xyajxiicim, ca' ydi jac ni pin.

²⁰ Per janch co Cristo yjugypijcy jadüg'oc co y'o'cy, je Cristo yi' je' je' jayijp jay huidibi jugypijc jadüg'oc. Co je Cristo yjugypijcy, chi ñicxy jadüg'oc ma Dios yajpaady, e nañ jadu'n müd yi' ycixpi mayjáy yjugypiga'ñ ajcxy co anajty ti y'öccixy, e yñicxaangixy ma Dios yajpaady. ²¹ Com müd tüg jay, je Adán, chondacy yi' o'cin ya naaxhuin. Nañ tim jadu'n müd tüg jay, je Cristo, chondacy je jugypijcin co jay y'o'ccixy. ²² Müd jada ycixpi co Adán ytundigooy oga'n, paady nidüg'óciy jay patcixy yi' o'cin. Müd jada ycixpi co Cristo yjugypijcy jadüg'oc co y'o'cy, paady nidüg'óciy jay ajcxy yjugypigaangixy jadüg'oc co anajty ti y'öccixy. ²³ Nidüg nidüg jay yjugypiga'ñ jadüg'oc jadu'n nej anajty ñigueegiyi. Cristo ti yjayijp'aty co yjugypijcy. Tüg'óciy yi' jacadyii jay ajcxy huidibi mijncxpejtcixp Cristo, yi' ajcxy jugypigamb jadüg'oc co anajty Cristo yhuimbity ya naaxhuin. ²⁴ Co anajty je Cristo yhuimbity ya naaxhuin, chi ycixipy ytigoyipy je naaxhuin'byi. Cristo yajtigoyamyb tüg'óciy naaxhuin'jáy y'ane'min, tüg'óciy naaxhuin'jáy y'öbujcin, etz tüg'óciy naaxhuin'jáy ymic'ajt. Jesucristo ypijctähuaanip tüg'óciy naaxhuin'jáy ajcxy y'ane'min, e pidactähuiy ma Dios y'ane'min, e Dios Teedy je' je' ajttähuiib. ²⁵ E tim copicy co je Cristo y'ane'mdähuiy tüg'óciy, ixti cooni Dios anajty ti mimadactäy tüg'óciy Cristo ymidzip, e ti pidactäy anajty ma Cristo y'ane'min. ²⁶ Jesús yajcixamyb yajtigoyamyb jac'axam je o'cin, ca' ni pin yjac'öcnipy. ²⁷ Com Dios ymimadactähuiy tüg'óciy je Cristo ymidzip, e pidactähuiy ma je Cristo y'ane'min. Per co Dios y'ayuc huidibi jaybety ijtp ymina'n co je Cristo ti mimadactäy tüg'óciy, ca' nan hue' je' yajhuin'jähuy co Cristo ti mimadägy Dios. Com Dios yi' je' huidibi ti mimadactäy, e ti pidactäy ma Cristo y'ane'min. ²⁸ Co anajty Dios mimadactay tüg'óciy pinjaty etz tijaty huidibi mic'ajt müd, e co anajty pidactay ma je Cristo y'ane'min, chi je Dios y'ung ypidactähuiy yi' y'ane'min ma Dios Teedy, etz ane'my yhuima'ñ ma Dios Teedy, je

huidibi anajty ti mimadactay. Jadu'n Jesucristo tuna'n, jigix jëbi Dios müd'ajttäy tüg'óciy mic'ajt etz ane'm'ajt.

²⁹ Pen ca' yjadu'nity, ¿na'amy co mdzachnñbejtcixy co öcpi tzachcodinaaygixy? Co ixypiy ca' pin yjugypiga'n jadüg'oc co anajty ti y'o'cy, ¿na'amy co jäy ññbejtcixy müd öcpi ycxixpi?

³⁰ ¿E ti ycxixpi co ñich ajcxy nyajpatcixy ayo'nduum jabom jabom? ³¹ Migügtijc ajcxy, janch janch ñich müich ajcxy nimaaygixy co ooy njäygidäyich müich ajcxy. Müd co mmibijccixy je nHuindzin Jesucristo, paady ycxixpi ñich müich ajcxy nimaaygixy co jabom jabom nyajpaadyich öcñijp'am. ³² Minaambich jadu'n co ooy nhuindinäy njijptinäyich nmizip ya Efeso. Tim jadu'n nipaady nej jibic iyujc ahua'n iyujc nhuindinäy njijptinäyich. Pen ca' yjanchity co yi öcpi ajcxy yjugypigipy jadüg'oc, naadig'ajtp ixypiy co ñich ayo'n jabom jabom nhuindinäy njijptinäyich. Nig oy co ixypiy nyajtüyöyim jadu'n nej ayuc y'ityin: "Tzoc caayim uucim, agujc'ajtim jotcuje'ajtim, com jabom huixtic njugy'ajtin ycixaanim müd yi o'cin."

³³ Ca' mnayyéjcgixy co pinjaty xyhuin'ingixipy. Jadu'n yjadipy nej y'ayuc y'ityin: "Yi migügtijc ajcxy huidibi jibicjot jibic-huinma'n müd, yajtigooyb ajcxy je oyjot oyhuinma'n."

³⁴ Ixmajtcix jibicjot jibic-huinma'n etz tzinaaygix tudägy ca' mbocytungixy. Nijëjity müich ajcxy ca' mnejhuüygixy Dios ytiy'ajt. Jadu'n nmina'ñich, jigix ajcxy mdzo'ydu'n mjihuüygixipy.

Nej ajcxy yi ögypi yjugypigipy ajcxy jadüg'oc

³⁵ Ycadimjecyity co nijëjity müich ajcxy xy'amidohuipiyich: "¿Ma mic'ajt pätcixipy je o'cpi ajcxy co jëbi yjugypijccixy jadüg'oc? ¿Huidibi ninicx ajcxy ymi'idamyb?" ³⁶ Ca' müich ajcxy ti mhuinjihuüygixy. Ca' mnejhuüygixy co je moc tim huidibi mniipcixyp ca' ymuxa'n ixti cooni anajty jayijp ti ypüch. ³⁷ Ca' müich ajcxy mniipcixy je mocquipy. Hue' müich ajcxy mniipcixyp je tímmod o jacjadyii huingbi tím. ³⁸ E co je tím ymuxy, chi Dios möy je ñinicx, tím jadu'n nej Dios jayijp ti huinmay ti tzocy. E Dios nije' nije' je tím möy je ñinicx tigachjaty. ³⁹ Canaagnax ninicx yajpaady ya naaxhuin, ca' ajcxy ytügnaxity. Tigach yi jäy ajcxy müdity ñinicx, tigachjaty iyujc ajcxy müdity ñinicx, nañ tigachjaty joon ajcxy müdity ñinicx, e nañ jadu'n tigachjaty acx ajcxy müdity ñinicx. ⁴⁰ Yi tzajpjoty tzinaayb ajcxy tigachjaty müdity ñinicx, nañ jadu'n huidibi ajcxy tzinaayb naaxhuin tigachjaty müdity ñinicx. Yi tzajpjoty tzinaayb ajcxy ñinicx müd tigachjaty y'oy'ajtin, ca' ydi jadu'n nej yi naaxhuin tzinaayb ajcxy y'oy'ajtin. ⁴¹ Yi xii ytücxin yjajin ca' ñaybadyii müd po' ytücxin yjajin, nañ tím jadu'n je po' ytücxin yjajin ca' ñaybadyii müd madza' ytücxin yjajin. Etz nije' nije' madza' müdity ytücxin ca' ñaybadyii müd jacjadyii madza' ytücxin yjajin. ⁴² Nañ tím jadu'n yjada'n müd yi jäy ajcxy tiibi y'o'ccixy co ajcxy yjugypijccixy jadüg'oc. Jäy ajcxy yajnaxtigiy je öcpi naaxñicx huidibi yhuindigooyipy, e yjugypigipy jadüg'oc müd tüg ñinicx jemybi huidibi ca' yhuindigoya'n nimina. ⁴³ Je öcpi ñaaxñicx co ñaaxtigiy, ca' ti oy'ajtin müdity, e co yjugypijcni jadüg'oc ymüd y'oy'ajtin. Je öcpi ñaaxñicx co ñaaxtigiy, e ti mic'ajt müdity e chi yjugypijcni mic'ajt müd. ⁴⁴ Co je öcpi ñaaxtigiy, hue' yjugypijcni, müd jemybi ninicx ca'p yaj'ixy. Pen ji yajpaady ninicx huidibi Dios ti yajcojy müd naax, nañ tím jadu'n ji yajpaady ninicx huidibi Dios yajcojpy müd yjihui'n ymic'ajt ca'p yaj'ixy.

⁴⁵ Jadu'n jaybety y'ity ma Dios ñecy ma jadu'n ymina'n: "Je jayijp Adán ymüd anajty jugy'ajtin." Je axambi Adán (je' je' je' Cristo) je' tüg espíritu huidibi jugy'ajt yejcp. ⁴⁶ Je huidibi Dios yjihui'n ymic'ajt müd ca' je' yjayijp'ajty, je' jayijp'ajt huidi Dios yajcoj müd naax; jac'axam je' huidibi Dios yjihui'n ymic'ajt müd, je' je' je' Cristo. ⁴⁷ Je jayijp jäy huidibi Dios yaj'oyiy, hue' je' yaj'oyiy müd naax (e yajpaady ya naaxhuin). Je mimetxip jäy huidibi Dios yaj'oyiy, ñich ajt nHuindzin Jesucristo, hue' je' choon tzajpjoty. ⁴⁸ Je jäy ajcxy huidibi tzinaayb ya naaxhuin, yi' ajcxy ñinicx tú'ciy ñaybadyii müd Adán ñinicx huidibi Dios yaj'oyiy müd naax. Yi jäy ajcxy huidibi tzinahuamb tzajpjoty, hue' ajcxy ñinicx tú'ciy ñaybada'ñiyi müd je Cristo ñinicx huidibi tzinaayb tzajpjoty. ⁴⁹ Jadu'n nej ñich ajt, tügnaax nguëxícim müd Adán huidibi Dios yaj'oyiy müd naax. Nañ tím jadu'n tügnaax nguëxícim müd je Cristo huidibi tzinaayb tzajpjoty.

⁵⁰ Migügtijc ajcxy, hue' nnimähuaangixy co je ninicx huidibi müd yxixy etz yñi'py ca' yi' y'ida'n ma Dios y'ane'my. Je ninicx huidibi cixamb tigoyamb ca' pada'n it lugar ma yi ñinicx ajcxy ity huidibi ca' ycixa'n ytigoya'n. ⁵¹ Tungix cuendi jada ayuc, nyaj'ixpigaamybich müich ajcxy tüg tiy'ajt huidibi ca' pin huinjihuüy. Ca' nan nidüg'óciy ñich ajt n'ögaanim, per nidüg'óciy ñich ajt Dios nninicx xyajtigadzaanim. ⁵² Co anajty Dios yaxjuxy yi' ytrompeta, je huidibi anajty cogixiyñip, chi cixipy je naaxhuinñiyi. Chi Dios xyajtigadzaanim ajt nninicx tím tzojcyi, tím tüg jaxigiy tüg huinmipxy. Dios yaxjuxamyb yi' ytrompeta, e je jäy tiibi ajcxy y'öccixy jugypigip ajcxy jadüg'oc, e ni ca' mina ajcxy y'öccixnipy. E ñich ajt huidibi jacjugy'ajtni Dios ñich ajt xyajtigadzaanim nninicx. ⁵³ Com ñich ajt nninicx huidibi ögam, huidibi huen tigoyamb, copicy ytigadzip, e nmüd'adaanim ninicx huidibi ca'

ōga'ñ ca' yhuindigoya'ñ. ⁵⁴ Co anajty ytigajtzim ajt nninīcx huiḁibi cixamb huindigoyamb, nmiid'ajtm anajty jemybi ninīcx huiḁibi ca' ycixa'ñ yhuindigoya'ñ nimina. Co anajty ytigajtzim ajt nninīcx huiḁibi ōgam, e nmiid'ajtm jemybi ninīcx huiḁibi ca' y'ōga'ñ, huin'it cuydunipy Dios y'ayuc huiḁibi jaybety ijtp huiḁibi jadu'n yminamb: "Co anajty ajt nHuindzin Dios mimadāgy yi o'cin, huin'it cōdigooyñip je o'cin (ca' jacpin y'oc'o'cnip). ⁵⁵ ¿Ma yi o'cin ocjapcada'ñ mic'ajt co tijy xy'ocjactzaachytunaanim? ¿Ma yi o'cin ocjapcada'ñ mic'ajt co tijy xy'ocmimadāgaanim?" ⁵⁶ Miid co ti ndundigooyim, paady ycixp o'cin nbaatim. Miid co ca' ti nguydundaayim Dios ycōtujcin, paady ycixp o'cin nbaatim. ⁵⁷ Per nyajnajxim Dioscojuyip ma Dios co mijmay'ajt ti tuuñ miid iich ajt ycixpi, e ti nmimadaacim yi o'cin co ajt nHuindzin Jesucristo y'o'cy miid ajt nbocy ycixpi.

⁵⁸ Paady ycixp, miich ajcxy migūgtijc huiḁibi ooy ndzocy njihuīyich tiydudāgy mmibijccix, ca' m'ixtigihuāccixy ma mmibijcin, ca' m'ixmajtzicixy yi mmibijcin, ca' ajcxy mjet-metzciyigixy. Tungix jabom jabom ma Dios ytung agujc jotcujc, com mnejhuīyigixyp co ca' ñaadig'aty ajcxy mdung ma ajt nHuindzin Jesucristo ytung.

16

Je cuejtin miid je hermano ajcxy ycixpi

¹ Jadu'n nej ymiñ yi meēñ huiḁibi miich ajcxy myajmujccixyp miid je mibijcpidijc ycixpi huiḁibi jim Jerusalén. Cuydungix je tiy'ajt huiḁibi ti nyaj'ané'ngixyich yi mibijcpidijc huiḁibi canaagpicyp yajpatp jim Galicia. ² Naag naag domingo, je jayijpi xii ma je semana y'ixtigiy nidūg nidūg miich ajcxy mbidāgip abicy hueenī pi'cmeēñ, jadu'n nej anajty ii ti mbaatcixy. Je pi'cmeēñ huiḁibi anajty ti myajmujccixy mgüend'ajtcixipy ooy, jigix co iich jim njāḁip ma miich ajcxy, ca' ycopicyity meēñ myajmujccixy. ³ E co anajty jim nmechich ma miich ajcxy, miich ajcxy myajniḁigipy nijējty migūgtijc huiḁibi nicxip jim Jerusalén. E iich nguexipyich jada migūgtijc jim Jerusalén miid tūg necy etz miid je meēñ huiḁibi anajty miich ajcxy ti myajmujccixy, jayḁēbi yajcidiḁihuip je mibijcpidijc jim Jerusalén. ⁴ E pen ooy ytimycopicyity co iich nañ jadu'n nnicxibich jim Jerusalén, jēbi ajcxy ñicxy miid iich.

Pablo huinmay co nicxa'ñ Macedonia

⁵ Co anajty ndūbicyich nnicxaambich ma miich ajcxy, jayijp naxihua'ñich Macedonia naaxjot, com copicy jim Macedonia naxihua'ñich. ⁶ Ca' jecyity co nicxy nhui'myich ma miich ajcxy jecy jecy. Ca' yjecyity co nyajnaxipyich tūg'óciy je tichypoj tiempo miid miich ajcxy. Co anajty ndzooñich jadūg'oc ma miich ajcxy, nnicxyich anajty muumjaty, miich ajcxy xytūjijphuohuihuibich ma iich anajty nnicxa'ñich. ⁷ Ca' nan tzojccixy n'ida'ñich miid miich ajcxy, hue' jatytimy huācxibaambich ma miich ajcxy jecy jecy, pen iich ajt nHuindzin Jesús jadu'n tzojcp. ⁸ Per njac-huācxibaambich ya Efeso ixti cooni Pentecostés xii anajty ti ñajxtāy. ⁹ Com nmiidich it lugar ya ma jēbi ngapxhuācxych Cristo y'ayuc, e mayjāy huiḁibi mijpidacp iich n'ayuc, nañ jadu'n mayjāy ya ooy midzip'aty Jesucristo y'ayuc ytiy'ajt.

¹⁰ Co Timoteo anajty yjādy ma miich ajcxy, tungixy may'ajt mgōbījccixipy agujc jotcujc ca' ti mhuinmaaygixy, com Timoteo tumb ma ajt nHuindzin Jesucristo ytung tim jadu'n nej iich nduñich. ¹¹ Paady ycixp ca' huaad miich ajcxy Timoteo mga'oy'ixipy etz mdūjijphuohuihuip, jayḁēbi ca' ti jotmay miid'adipy etz yjactūyōipy agujc jotcujc, e ymedzipy ya Efeso ma nyajpaadyich. Com njijp'ijxypich co Timoteo xyñijādibich quipxyi miid jacjadyi mibijcpidijc.

¹² Jadu'n nej yjaty miid ajt nmigūg Apolos. May'ajt nbijctzoohuich ma Apolos co yi' mūdnicxip nijējty jacjadyi migūgtijc huiḁibi nicxamb ma miich ajcxy. Per ca' yi' yjotcujcity co ñicxip jadachambi tiempo. Hue' janchtiy jacjiini yñicxipy, pen yaj'ahuātzciiyb anajty.

Capxocxin huiḁibi cijxnip je necy

¹³ Ni'ixi m'idipy ajcxy ma mmibijcin. Naygüend'ajtigix ma mmibijcin. Tiydudāgy ajcxy mmibigipy, ca' m'ixtigihuāccixy ma mmibijcin. Naybidāacigix huinmic jotmic ma mhuinma'ñ. Mic m'idipy ajcxy ma mmibijcin. ¹⁴ Tūg'óciy tijaty ajcxy mdungixy, tungixp miid tzojcin jihuiyin etz oyjāy'ajtin.

¹⁵ Migūgtijc ajcxy, mnejhuīyb jadu'n nej Estéfanos miid yjugymigūg ti mibijccixy Jesucristo y'ayuc. Yi' je' jayijp ajcxy mibijcp jim Acaya, e ti yhuinma'ñypidaaccixy co ypube-damyb ajcxy yi mibijcpidijc. ¹⁶ May'ajt nbijctzoobyich ma miich ajcxy co myajmij'ajtcixipy Estéfanos, etz jac pinjaty huiḁibi pubejtp je mibijcpidijc etz huiḁibi ajcxy tumb Dios ytung. ¹⁷ Ooy njotcūcidyich co Estéfanos, Fortunato, etz Acaico ti ymiñ ma iich ajcxy ya Efeso. Yi' ajcxy xymiid'ijtpich, com ca' anajty y'oyiy nej nmiid'idipyich miich ajcxy. ¹⁸ E yi' ajcxy ti ooy xyajjotcugiyich, e nañ jadu'n miich ajcxy ti mjetcugiyigixy co yi' ajcxy ymiñ ma iich. Paady ycixp copicy co miich ajcxy myajmij'adip yi' ajcxy etz jacjadyi tim jadu'n nej yi' ajcxy.

¹⁹ Yi mibijcpidijc huidibi canaagpicy ya Asia naaxjot yquejxyp ajcxy capxpooxın ma miich ajcxy. Aquila etz Priscila etz yi mibijcpidijc huidibi ajcxy yöymujcip ma Aquila ytiyc yquejxp ajcxy capxpooxın ma miich ajcxy ma ajt nHuindzin Jesucristo yxi.
²⁰ Tüg'óciy je mibijcpidijc huidibi ya Efeso yquejxp ajcxy capxpooxın ma miich ajcxy. Naygapxpóoxigixy miich ajcxy xic xon.

²¹ Hich, Pablo, njaaybich miid ngi'mgi' ngi'mletra jada capxpooxın huidibi nguejxypich ma miich ajcxy. ²² Pen jim pinjaty ca' mijpidägy #ich ajt nHuindzin Jesucristo, huen Dios yajtigooyip ajcxy y'alma. ¡Maranata! Huen tzojc yminipy ajt nHuindzin Jesucristo.

²³ Huen ajt nHuindzin Jesucristo oy'ajt may'ajt tunipy miid miich ajcxy etz xyconuucxip ajcxy. ²⁴ Ndzojcypich njihuıybich miich ajcxy nidüg'óciy huidibi yajpaady ma Jesucristo. Jadu'n jada. Amén.

2 CORINTIOS

Yi Mimetz Necy Huidibi San Pablo Yajniguejx Je Mibijcpidijc Jim Corinto

¹ Hich Pablo, Dios jadu'n ti tzocy, paady ycixpi Jesucristo ti xyajñibicyich co ngapx-huacxibich yi' y'ayuc. Hich müid ajt nmigüg Timoteo nguejxypich jada necy ma je mibijcpidijc jim Corinto. Nañ jadu'n nguejxypich jada necy ma tüg'óciy je mibijcpidijc majaty je cajp huidibi yajpatp jim Acaya ñaaxjot. ² Huen Dios Teedy etz ich ajt nHuindzin Jesucristo may'ajt oy'ajt tunipy müid müich ajcxy etz xyajjotcugüygixip.

Nej Pablo yajty y'ayoy

³ Tzoc yajnajxim Dioscojuyip ma Dios, je nHuindzin Jesucristo yTeedy, je Dios Teedy huidibi ajt xypa'ayoohuim, je Dios huidibi yejcp jotcujc'ajtin. ⁴ Dios xyajjotcugüyim co nminajxim nyajnajxim tzaachypi ayo'n jigix jébi nyajjotcugüyim jacpinjaty huidibi minajxp yajnajxp tzaachypi ayo'n. Tim jadu'n nej ich ajcxy ti nbaady jotcujc'ajtin ma Dios, nañ tim jadu'n yi' ajcxy pada'n jotcujc'ajtin ma Dios huidibi minajxp yajnajxp tzaachypi ayo'n. ⁵ Com tim jadu'n nej ich ajt nminajxim nyajnajxim tzaachypi ayo'n müid Cristo ycixpi, nañ tim jadu'n müid Cristo ycixpi nbaatim jotcujc'ajtin. ⁶ Paady ycixpi ich ajcxy nminajxcixy nyajnajxcixy tzaachypi ayo'n, jaydëbi müich ajcxy mbaadip jotcujc'ajtin etz nañ jadu'n ypaadip ajcxy m'alma ñidzoocin. Dios yejcpy jotcujc'ajtin ma müich ajcxy, jaydëbi müich ajcxy mbaadip jotcujc'ajtin etz nañ jadu'n ñidzögip ajcxy yi' m'alma. E co ajcxy mbaadip jotcujc'ajtin etz ajcxy m'alma ñidzoocin, chi jébi müich ajcxy mmimadägip etz mmecxtugip tzaachypi ayo'n, tim jadu'n nej ich ajcxy mmimadägy etz nmecxtüjccixich tzaachypi ayo'n. ⁷ Jotcujc nayjihuüiyijich müid müich ajcxy ycixpi, com njijp'ijxpich co mmadägipy ajcxy ma mmibijcin. Com nejhuiybich co müich ajcxy mmimajxyp myajnajxyp tzaachypi, tim jadu'n nej ich ajcxy nminajxcixy nyajnajxcixy tzaachypi. E nañ jadu'n Dios yejcpy jotcujc'ajtin ma müich ajcxy, tim jadu'n nej yecy jotcujc'ajtin ma ich ajcxy.

⁸ Migügtijc ajcxy, ich ajcxy ndzojcpich co müich ajcxy mnejhuühuip jadu'n nej canaag-nax tzaachypi ayo'n ti nminaxyich ti nyajnaxyich jim Asia naaxjot. Jayin jahueeni ti ngamimadäga'ñich. Ca' anajty njijp'ixyich co nbidzimipyich juugy ma je jimbi it lugar. ⁹ Jadu'n ich ajcxy nnyajhuüiyii nej jây ajcxy huidibi yajpatcixp o'c'ijp'am. Jadu'n ti njatyich, jigix jébi n'ixpicyich nej ich huaad ñgi Dios nyajmij'atyich, je Dios huidibi yajjugypigip yi jây ajcxy tiibi y'óccixy. E ca' nan ngi'm mic'ajt nmijpidaacpyich. ¹⁰⁻¹¹ Ti ich ajcxy Dios xyñihua'ñ xycohua'ñ, e xyjacnihua'naamb xyjaccohua'naambich ajcxy ma yi jây ajcxy huidibi xyaj'ógaambich ajcxy. E co müich ajcxy xypubetyich, copicy co jacmibijctzoogix Dios müid ich ycixpi. Njijp'ijxypich co Dios yi' xyjatyim xyñihua'naambich xycohua'naambich. E pen mayjây Dios mibijctzoogix müid ich ycixpi, nañ jadu'n yajñajxcixyipy ajcxy jâygidaacin ma Dios müid je may'ajt oy'ajt ycixpi huidibi Dios ytumyb müid ich ajcxy.

Ti Pablo co yhuacxijpy, ca' chojc nicxy jim Corinto

¹² Jotcujc nayjihuüiyijich müid jada ycixpi com nejhuiybich co ti ndzinäyich müid tudägy'ajtin etz müid oyjot oyhuinma'ñ müid yi mayjây ajcxy canaag agajp etz jacñgi ma müich ajcxy. Dios müid may'ajtin oy'ajtin ti xypubetyich co tudägy ti ndzinäyich, e ca' nguyduñich ngi'mjot ngi'mhuinma'ñich ma ndzinäyich. ¹³ Hich müich ajcxy nyajnijayiyb je ayuc tiy'ajt huidibi müich ajcxy jébi mgapxcixy etz mhuinjuüiyigixy. E nañ jadu'n njijp'ijxypich co müich ajcxy mhuinjuüihuüipy ich n'ayuc tüg'óciy. ¹⁴ Jadu'n nej müich ajcxy cham cujc-huacxy mhuinjuüiyigixy ich n'ayuc ndiy'ajt. Jacjiini co anajty je xii je tiempo ymiñ co ajt nHuindzin Jesús y'ane'ma'ñ ya naaxhuñ, chi müich ajcxy jotcujc mnyajhuüiyib müid ich ycixpi. E nañ tim jadu'n nej ich ajcxy jotcujc nayjihuüiyib müid müich ajcxy ycixpi.

¹⁵ Com nejhuiybich co müich ajcxy xychojcpich xyjihuiybich, paady ycixpi nhuinma'ñ nbidägyich co nicxy n'ixaangixy müich ajcxy jadüg'oc, e jadu'n nyajjotcugühaangixich müich ajcxy mejt'oc. ¹⁶ Jadu'n nhuinma'ñ ti nbidägyich co nnicxa'ñich Macedonia. Per jayijp nnaxa'ñich ma müich ajcxy mgajp. E co anajty ndzoofñich Macedonia, jadüg'oc nnicxa'ñich ma müich ajcxy. E jadu'n jébi müich ajcxy xytüjijphuohuihuibich co anajty nnicxyich jim Judea. ¹⁷ ¿Nej mdijy, co ich aametz jotmetz nduñich co ca' ti nnicxyich ma müich ajcxy nej anajty ti mnina'ñich? ¿Nej mdijy, nhuinma'ñ müidäyich jadu'n nej naaxhuñijây huidibi minamb co ñicxa'ñ, e chi ca' ñicxni? ¹⁸ Per Dios jébi tiy'ajt yegipy co je ayuc tiibi nyajnimaaygixy, nguydunipyich yi'. Hich n'ayuc janch yi'. ¹⁹ Hich müid Silvano etz Timoteo ngapxhuacxcixyich Cristo Jesús y'ayuc, je Dios y'ung. E Cristo Jesús y'ayuc janch yi', ycuudumyib je' y'ayuc, tudägy je' ycapxy. ²⁰ Tüg'óciy je ayuc huidibi Dios yejc jecy'ajty müid

iih ajt ycixpi, hue' Cristo Jesús cuydundaayb. Paady co ngapxpaatim n'ojadajtim Dios, chi nminaanim. "Amén, jadu'n jada," com Cristo Jesús ti cuydundäy Dios y'ayuc. ²¹ Com je' je' Dios huidibi xyajmbijcim Cristo, e Dios huidibi xyajmüid'ijtim Cristo. Jadu'n Dios ytuñ müid iih ajcxy etz nañ jadu'n müid müich ajcxy. Je' je' Dios huidibi xyajmbijcim etz xypidaacim tügjip ma y'i' ytung. ²² Dios ti pidägy ma ajt njot nhuinma'ñ je tiy'ajt co nyajpaatim ma Cristo Jesús. Co Dios xy'adigiym xyjottigiym y'i' yjihui'ñ ymic'ajt, chi tiy'ajt yecy co nyajpaatim ma Cristo Jesús.

²³ Dios jëbi tiy'ajt yegipy co müid tudägy njot nhuinma'ñ nmiydacyich co ca' jadüg'oc nnicxyñich ma müich ajcxy mic'amy, jadu'n nej anajty nhuinma'ñ ti nbidägyich, müid co ca' ndzocyich nicxy n'ojcixy huiñ jip. ²⁴ Ca' nnicxa'ñich mic'amy ma müich ajcxy, com ca' adzip nyajmbigaangixy müich ajcxy huidibi copicy ajcxy mmibigipy. Müich ajcxy tydudägy ti mmibijccixy. Jëyi co nbubedaangixy jaydëbi ajcxy nigi jotcuje'ajt mmid'adipy ma ajcxy mdzinaayin mjugy'ajtin.

2

¹ Paady ycixpi jadu'n nhuinma'ñ ti nbidägyich co ca' nnicxa'ñich mic'amy jadüg'oc ma müich ajcxy, müid co müich ajcxy nyajtajipy nyajmayipy co ngapxhuiyich müid ajcxy mbocy ycixpi. ² Com pen iih müich anajty ajcxy nyajtajipy nyajmaayb, çpin jada' iih xyajjotcugihuibich? Pues müich ajcxy huidibi tajp mayb, müich ajcxy xyajjotcugihuibich. ³ Paady ycixpi ti nnijayiyigixy jadu'n co ca' nnicxa'ñich mic'amy ma müich ajcxy, com ca' jadu'n ndzocyich co iih müich ajcxy nyajtajipy nyajmayipy. Jac'oy co iih müich ajcxy nyajjotcugihuiy. Com nejhuüyibich co iih jotcuje' naysjihuiyijich müid müich ajcxy ycixpi. Nañ jadu'n müich ajcxy jotcuje' mnayjihuiyib co mnejhuüyib co ti njotcugihuibich müid müich ajcxy ycixpi. ⁴ Co ti njayich je necy huidibi ti nguexyich ma müich ajcxy, ooy mij jotmay ti njihuiyich, ixti nyaaxich. Per ca' nan paady ycixpi ti njaayich je necy co nyajtajaangixy nyajmayaangixy. Hue' janchtiy ti njaayich je necy jaydëbi mnejhuüyigixy co mijcaje ndzojccixy njihuiyigixy.

Meeçin ma je pin anajty jibicipi ti tuñ

⁵ Per pen jim ma müich ajcxy pinjaty ti yecy tajin mayim co ti ytundigooy, pues ca' nan iih tügpajc tajin mayim jihuiyibich. Nañ jadu'n müich ajcxy nidüg'öciy mjihuiyigixyp tajin mayin. Jadu'n nminañich co huenjaty tajin mayin müich ajcxy mjihuiyigixy, jigix ca' anaxy ajcxy nyajtajip nyajmayip. ⁶ Yajhuäxiip je tzaachypi huidibi müich ajcxy mooyb je migüg huidibi ti ytundigooy. Ti müid jadu'ñi. ⁷ Jadu'n tzocy cham co müich ajcxy meecx je migüg jadu'n nej ti ytundigooy, etz nañ jadu'n ajcxy myajjotcugihuiy. Ca' yjecyity co je migüg anaxy oy jihuihup tajin mayin. ⁸ Paady ycixp may'ajt nbijctzooyich ma müich ajcxy co myajnguëxigipy ajcxy co ndzocy mjihuiy ajcxy je migüg huidibi ti ytundigooy. ⁹ Iich müich ajcxy ti njayiy jayhuin müid je migüg ycixpi huidibi ti ytundigooy, jigix jëbi nnejhuüyich, pen mguydumyib müich ajcxy iih n'ayuc, o pen ca' mguydungixy. ¹⁰ Jadachambi co pinjaty ti ytundigooy ma müich ajcxy, e müich ajcxy mhuinmeexi y'i' ypocy, nañ jadu'n nhuinmeexip iih y'i' nej ytundigooy. Com iih co nhuinmeexyich tüg nmigügich nej ti ytundigooy, jadu'n nduñich müid müich ajcxy ycixpi, com Cristo y'ijxyp ñejhuüyib tüg'öciy tijaty nduunim. ¹¹ Jadu'n nhuinmeexim nmigüg ypocy, jigix Satanás, je mujcu', ca' xymimadaacim. Nejhuüyim yajxon nej Satanás mañ'ajt müidity.

Pablo ca'p anajty yjotcuje'aty jim Troas

¹² Co nja'tyich ma je cajp huidibi xiijip Troas, chi ngapxhuäcxa'ñich anajty Cristo y'ayuc ytiy'ajt, etz mij ooy tigiydac nbatyich, nej jëbi nduñich ma ajt nHuindzin Jesucristo ytung. ¹³ Per ca' anajty jotcuje' naysjihuiyijich. Com ca' nminaybatich je iih ajt nmigüg Tito jim Troas. Paady ycixp ngapxycixyich müid je mibijcpidijc ajcxy jim Troas, e nnicxyich jim Macedonia ñaaxjot.

Madaacim ma Cristo

¹⁴ Nyajnajxypich jäygidaacin ma Dios co müid Jesucristo ymic'ajt jatytimy nmimadacyich jabom jabom tüg'öciy huidibi xymidzip'ajtpich ma tüg'öciy naax cajp. Nañ jadu'n Jesucristo ti xymöyich y'i' y'ayuc huidibi ngapxhuäcxypich ma tüg'öciy naax cajp. Je mayjäy ma canaag cajp ooy jäygidaaccixy Cristo y'ayuc. Co ngapxhuäcxich Jesucristo y'ayuc xi ya, jadu'n nipaady nej tüg xuucin huidibi ooy oy xuugy, e y'abojiy xi ya. ¹⁵ Co ngapxhuäcxich Cristo y'ayuc ma yi mayjäy huidibi padamb ajcxy y'alma ñidzoocin ooy Dios jäygidägy. E ñañ jadu'n Dios ooy jäygidägy co ngapxhuäcxich Cristo y'ayuc ma yi jäy ajcxy huidibi ajcxy y'alma tigoyaamb. Jadu'n iih ajcxy ndung nipaady nej jihuiy nboomjójcixich jabom jabom ma Dios yhuinduu müid Cristo ycixpi. ¹⁶ Pinjaty mijpidacp Cristo y'ayuc huidibi ngapxhuäcxypich, hue' je' y'alma nidzögamb. E pinjaty ca'

mijpidägy Cristo y'ayuc, hue' je' y'alma tigoyaamb. Ooy chachchipity chachmijhuinma'ñity iich ajcxy ndung. ¹⁷ Ca' iich ajcxy nduñ jadu'n nej jactaagity ajcxy huidibi Dios y'ayuc mihuidijtip meen'gixy. Cixyot huinijot iich jay nyaj'ixpijccixy Dios y'ayuc ytiy'ajt. Com Dios ti xyajñibicyich co yi' y'ayuc ngapxhuäcxich. Muid co nyajpaatim ma Cristo, paady ycixp nduunim jadu'n nej jihuüy nyajpaatim jabom jabom ma Dios yhuinduu.

3

Je jemybi ayuc tiy'ajt huidibi Dios xymooyim

¹ Co jadu'n nmına'ñich ñnej m'ixcixy nej jihuüy huinjemy nyajtzoneäga'ñich ayuc co ndzachnaymayáanigixyich ci'm? Ñnej mdzojccix co ajcxy nyaj'ixipy tüg tiy'ajt necy co nduñich ma Dios ytung? o Ñnbijctzohuipich tüg tiy'ajt necy ma miich ajcxy, jadu'n nej nijëjity jay ytungixy? ² Ca' iich ajcxy ndiy'ajt necy ycopicyity. Com jëbi yi mayjáy ajcxy tiy'ajt pigipy ma miich ajcxy mdzinaayin mjygy'ajtin co tudägy ti nyaj'ixpicixyich miich ajcxy Dios ytiy'ajt. Jadu'n miich ajcxy nipaady nej iich ajcxy ndiy'ajt necy yjaayity ma iich ajcxy njot nhuinma'ñ. E jadu'n jay ajcxy ijxcabipy etz huinjihuipipy. ³ Cristo ci'm ti pidägy yi' ytiy'ajt ma miich ajcxy mjet mhuinma'ñ muid je ayuc huidibi ti ngapxhuäcxich ma miich ajcxy. Jadu'n miich ajcxy nipaady nej tüg tiy'ajt necy huidibi Cristo ti jaay. E huidibi iich miich ajcxy ti nyaj'ixcixy ti xyajñimaaygixy. Miich ajcxy ca' jadu'n ocpaatni nej tüg tiy'ajt necy huidibi jay ti jay muid tinta. Nañ jadu'n ni ca' yjëjity je tiy'ajt huidibi cojayip ma tüg tzaadzech. Hue' miich ajcxy janch nipaady nej tiy'ajt necy huidibi je Dios jugypi yjihui'ñ ymic'ajt ti jaay ma jay ajcxy yjot yhuinma'ñ.

⁴ Nejhuüyibich tiydudägy co janch tiy'ajt nej nmına'ñich co Cristo ti xyajñibicyich jada tung muid Dios ycixpi. ⁵ Ca'p iich ajcxy jëbi ci'm madägy ma Dios ytung. Tüg'öciy mic'ajt etz tiy'ajt jüby nbaátacixyich ma Dios, huidibi muid jëbi nduungixich yi' ytung. ⁶ Dios ti xymöoygixyich mic'ajt co ndunipych ajcxy ma yi' ytung. Dios ti pidägy ma iich ajt jemybi ayuc tiy'ajt, huidibi muid xy'ane'mim. Jada jemybi ayuc tiy'ajt je Espiritu Santo pidaacp ma ajt njot nhuinma'ñ. E ca' je' yjadu'nity nej je ayuc tiy'ajt huidibi Moisés yjayhui'm jecy'ajty. Muid je Moisés y'ayuc huidibi jaybety ijtp, Dios xymooyim je o'cin. Muid je jemybi ayuc tiy'ajt huidibi je Espiritu Santo yejcpi, Dios xymooyim jugy'ajtin huidibi ca' ycixipy ytigoyipy ni mina.

⁷⁻⁸ Je Dios ycötujcin huidibi Moisés yjayhui'm hue' jaybejty oga'n ma tüg tzaa. E je huin'it tiempo ooy Moisés anajty yhuünyijip mic y'adixy muid Dios y'oy'ajtin. E je Israel jay ajcxy ni ca'p je' anajty huaad y'ixcixy Moisés yhuünyijip, co anajty ooy mic chach'adixy. E jada Dios y'oy'ajtin huidibi Moisés ymuid, ca' jecy y'ijty. Hue' je' tigoyöny anajty önydägy'amy. Per pen Dios yaj'ixxip anajty yi' y'oy'ajtin co Moisés moy je jay ajcxy je Dios ycötujcin huidibi ane'm yi o'cin, nigi mi'idipy Dios y'oy'ajtin je jemybi ayuc tiy'ajt huidibi je Espiritu Santo xymooyim. ⁹ Pen mij anajty oy'ajtin müidity je cötujcin huidibi tuuñ co y'ane'my ma iich ajt nbocy n'o'cin. Nigi mij'oy'ajtin müidity Dios y'ayuc ytiy'ajt je jemybi huidibi minaaamb co Dios jëbi xyaj'ahuimbijtim tudägy. ¹⁰ Jëbi nminaanim co je jécyp cötujcin y'oy'ajtin ca' yi' ytimytijity co nyajquipxyihuaanim muid je jac'oybi oy'ajtin huidibi Dios y'ayuc ytiy'ajt jemybi ymuid. ¹¹ Com pen ymuid oy'ajtin je cötujcin huidibi ymic'ajt ca' y'ida'ñ huinixiñ huinitempo, nigi oy'ajtin müidity Dios y'ayuc ytiy'ajt jemybi huidibi ca' ycixipy ytigoyipy nimina.

¹² Muid co nijjp'ixxim je oy'ajtin huidibi Dios xymöhuaanim muid je jemybi y'ayuc, paady ycixp ngapxhuäcxim Dios y'ayuc huinmic jotmic. ¹³ Ca' jadu'n nduunim nej Moisés idich jecy'ajty co anajty müidity yhuünyijip huingobe'nüy, jigix ca'ydi Israel jay ajcxy ixxy nej je' anajty ytigoy je Dios y'oy'ajtin huidibi anajty quëxixp ma je' yhuünyijipin. ¹⁴ Per yi Israel jay jecy'ajty ca' ajcxy yaxxon huinjihuüy ti anajty Dios ytumyb muid Moisés, ixti chambaadni yi Israel jay ajcxy ca' yaxxon huinjihuüyigixy co ajcxy capxcixy je ayuc huidibi Moisés yjayhui'm. Jadu'n nipaady nejjiuüy Moisés chambaadni y'ityñi huingobe'nüy. Co ajcxy miibigipy je Cristo, huin'it ajcxy huinjihuipipy, e jadu'n je' paadipy nej jihuüy Moisés ti ñayhuingobe'ndüdyii. Co yi Israel jay ajcxy miibjccixipy Cristo, e iixip ajcxy Dios y'oy'ajtin, huin'itni ajcxy huinjihuipipy Dios y'ayuc ytiy'ajt je jécyp. ¹⁵ Ixti chambaadni co yi Israel jay ajcxy capxcixy je migooxpi libro huidibi Moisés yjayhui'm, ca' ajcxy huinjihuüy yaxxon Dios y'ayuc, jadu'n nipaady nej ajcxy yhuinma'ñ ymädity. ¹⁶ Pinjaty jothuimbijtp, e mibicy iich ajt nHuindzin Jesucristo, oyñyñip yi' yhuinma'ñ, e yhuinjihuipipy Dios ytiy'ajt. ¹⁷ Je Huindzin Jesucristo, yi' je' Dios yjihui'ñ ymic'ajt ymuid. E ma Dios yjihui'ñ ymic'ajt yajpaady, Dios yi' yi jadu'mbi jay ajcxy yaxñihuätzictutp ma yi Dios ycötujcin je jécyp. ¹⁸ Paady ycixp tüg'öciy iich ajt jadu'n nipaady nej tüg iixx ma nni'ixxim ajt nHuindzin Jesucristo y'oy'ajtin. Com ca' jadu'n patni nej jihuüy n'ijtim huingobe'nüy. E nañ jadu'n iich ajt njacyujcpejtim n'oy'ajtin, jaydëbi nguipxyjatytüym muid Cristo. Com jabom jabom iich ajt nigi nbaatim n'oy'ajtin ma Cristo. Jada je' huidibi je Dios yjihui'ñ ymic'ajt ytumyb ma ajt njot nhuinma'ñ. E iich ajt nHuindzin Jesucristo ti pidägy Dios yjihui'ñ ymic'ajt ma ajt njot nhuinma'ñ.

4

¹ Com Dios ti xypa'ayooyich, e ti xyajñibicyich co ngapxhuäcxibich yi' y'ayuc ytiy'ajt jembyi, paady ycixp ca' njotmetzcíyich. ² Per ooy ti njijpcodijyigixyich ti njijpcogapxiygixyich yi jáy ajcxy y'ayuc huidibi ajcxy ytungixyp etz ycapxcixpy ayüch ameech, etz huidibi oymidzöyduuni. Ca' iich ajcxy ti nduñich müid jibic-huinma'ñ. Nañ jadu'n ni ca' nyajtigájtzcixich Dios y'ayuc. Hue' janchtiy ngapxpich ajcxy huidibi janchip. Jadu'n nyaj'ixpijccixyich yi jáy ajcxy, jaydëbi ajcxy jotcuje ñajyihuiyigixy ma Dios yhuinduu. ³ Yi jáy ajcxy huidibi nicxy y'alma ytigoyaangixy ca'oydactuuby, ca' ajcxy huinjihuiy Dios y'ayuc oybi nej jëbi ajcxy y'alma nîdzögipy. Jada je' je ayuc huidibi ngapxhuäcxixpich. Pinjaty ajcxy y'alma nîdzögip yhuinjihuiyb ajcxy jada ayuc. ⁴ Yi' ajcxy huidibi y'alma tigoyaanip ca' mibijccixy Dios y'ayuc, com Satanás huidibi ane'mb ya naaxhuiñ ti yajmädyyi ajcxy yhuinma'ñ. Ca' je' ajcxy huinjihuiy Cristo y'ayuc oybi. Cristo tú'ciy yaj'ixy, tú'ciy mic'ajt müidity, nej Dios yaj'ixy nej Dios mic'ajt müidity. E Cristo y'ayuc jadu'n nipaady nej tüg mîjtcxin huidibi Satanás ti ahujtztzucy ca'ydi ytcixy ma je' ajcxy. ⁵ Co iich ajcxy ayuc ngapxhuäcxich, ca' iich ajcxy ngapxhuäcxyp ngi'm'ayuc ngi'mdiy'ajt. Hue' iich ajcxy ngapxhuäcxyp Jesucristo y'ayuc ytiy'ajt. Ngapxhuäcxich ajcxy co Jesucristo ñihuindzin'ajttaayb tüg'óciy. E nañ jadu'n ngapxhuäcxich ajcxy je tiy'ajt co iich ajcxy jadu'n naydijyigixyich nej jihuiy müich ajcxy xytumbi'adyi müid Cristo ycixpi. ⁶ Je Dios huidibi jecy'ajty ane'm co huen tiicxin ji'aty huidibi codicxip ma ycoodzity, yi' ti xymooyim y'ayuc ytiy'ajt. Yi' y'ayuc tim jadu'n nipaady nej tüg tiicxin nmüid'ajtim ma ajt njot nhuinma'ñ, jigix jëbi n'ijxim je Dios y'oy'ajtin huidibi quëxícip ma Jesucristo yhuifijip.

Je jugy'ajtin co nmibijcim

⁷ Je Dios y'oy'ajtin oybi nmüid'ajtim ma ajt njot nhuinma'ñ, iich ajt ca' ni ti mic'ajt nmüid'ajtim ma ajt ngi'mjot ngi'mhuinma'ñ. Jadu'n Dios pidägyi yi' y'oy'ajtin ma iich ajt, tim jadu'n nej jáy ajcxy pidaacixy pi'cmeeñ ma pi'cidzimboch. ⁸ Oy iich ajcxy nminaxych nyajnaxyich may ayo'n, per ca' ndajy nmayich ajcxy anaxy. Ooy nhuinmay'ahuidijtcixyich müid je tzaachypi ayo'n ycixpi, per ca' nhuinma'ñyidigöogixyich. ⁹ Oy iich ooy nmidzip xy'ixhuidityich xypahuidityich, per Dios ca' xy'ixmachich. Canaag'oc iich nmidzip ti xycujy ti xyjibipyich. Per ca' iich njugy'ajtin ti ytigooy. ¹⁰ Hueñyama'yity nhuidityich ajcxy nmüidich je tzaach'i'au ma nninícxich, ma jáy ajcxy ti xychaachytüungixich. Je' je' je iixpejt co nhuidityich o'cin jijp'am, tim jadu'n nej Jesús anajty huidity o'cin jijp'am. Ngöbijcypich jada tzaachypi, jigix tüg'óciy jáy ajcxy nejhuihuip co Jesús xypubejtpich xypudigiybich. ¹¹ Nami jacjugy'ajtnich ajcxy, o'cjijp'am iich ajcxy nhuidijtcixy jabom jabom müid Jesús ycixpi, jigix jëbi tüg'óciy jáy ajcxy nejhuihuip co Jesús xypubejtcixyp xypudigiygixyp. ¹² Jadu'n ndzinäyich o'cjijp'am, jigix müich ajcxy müid'adip jugy'ajtin huidibi ca' ycixipy ytigooyip.

¹³ Jaybety ymiñ ma Dios ñecy ma jadu'n ymina'ñ: "Ti nmibicyich, e paady ycixpi ti ngapxpizimybich nej ti nmibicyich." Tim jadu'n nej Dios ñecy ymina'ñ, nañ tim jadu'n iich ajcxy yminaangixy co nmibijccixyich Dios, e paady ngapxpizimigixyich nej nmibijccixyich. ¹⁴ Com nejhuiyim jadu'n nej Dios yajjugypijcy Jesús co y'o'cy. Nañ tim jadu'n Jesús xyajjugypigaanim jadüg'oc müid Dios ymic'ajt co anajty n'o'cim. E quipxyi müid müich ajcxy xyajñicximip ma Dios yhuinduu. ¹⁵ Tüg'óciy tzaachypi huidibi nminajxypich nyajna-jxpich, hue' nminaxych nyajnaxyich müid müich ajcxy m'oy'ajtin ycixpi. E co anajty Dios jactuñ may'ajtin müid jacjadyi mayjáy ajcxy, nañ jadu'n mayjáy yajñajxcixipy jaygidaacin ma Dios, jigix jëbi mayjáy iibáatcixipy capxpáatcixipy Dios.

¹⁶ Paady ycixpi ni mina xii, iich ajcxy ngajotmetzcíhuaangixy. Oy iich ajcxy nninícx yjaccóminajc'idich jabom jabom, per iich ajcxy njot nhuinma'ñ ngi mic'ajt paady jabom jabom. ¹⁷ Je tzaachypi je ayo'n huidibi nminajxim nyajnaixim ya naaxhuiñ, ca' yi' ytimytiijity. Cixip naxip yi'. E müid co nminajxim nyajnaixim tzaachypi ayo'n, huin'it nbaatim oy'ajtin ngi ymijity y'oyity huidibi ca' ycixipy ñaxipy ni mina. ¹⁸ Ca' huaad iich ajt nhuinma'ñ nbaadaacim ma huidijaty cixamb tigoyamb. Tüg'óciy tijaty yaj'ijxp yajhuindicxp ya naaxhuiñ, cixip tigoyip yi'. Per huidijaty ca' yaj'ixy yajhuindicxy, idip yi', ca' ycixipy ytigooyip nimina.

5

¹ Com nnejhuiyim co n'o'cim, naaxnícx ajt huidibi nmüid'ajtim ya naaxhuiñ cixamb tigoyamb yi'. Dios ymüid n'ix'i jilby tzajpjoty huingbi ninícx huidibi yi' ti cojy huidibi xymöhuaanim. Je ninícx huidibi xymöhuaanim jadu'n nipaady ma ajt n'alma nej tüg tijc huidibi tinaayb huinixi huinitempo. Tüg tijc huidibi Dios ti cojy, ca' nan huidibi jáy ajcxy ti cojcixy. ² Janch tiy'ajt co ca' ooy jotcuje ndzinaayim ya naaxhuiñ müid ajt nninícx. Ooy njijp'ijxim mina nbaadaanim ajt je nninícx huidibi nmüid'adaanim jilby tzajpjoty. ³ Je'

nninícx xyúdzim tím jadu'n nej co tüg jemyhuit nyajtigüiyim, ca'ydi n'íjtim níhuädz. ⁴ Nami njactzinaayim ya naaxhuiñ müid ajt nninícx, ca' ooy jotcujc nayjihuiyim. Ooy xyajtajim xyajmayim je tzaachypí ayo'n huidibi nminajxim nyajnajxim. Ca' nan co ca' ndzojcm ajt nninícx, o co nyajtigoyaanim ajt nninícx. Hue' ndzojcm co nmüd'ajtim jemybi jugy'ajtin jemybi ninícx jigix co ajt njugy'ajtin huidibi cixamb tigoyamb, ahuimbidip yi' jemybi jugy'ajtin huidibi ca' ycixipy ytigoyipy. ⁵ Dios yi' ti yaj'oyíy je jugy'ajtin huidibi nmüd'ajtim cham, jigix jébi nmüd'ajtim huingbi jugy'ajtin huidibi ca' ycixipy ytigoyipy ni mina. Dios ti xymoyim je Espíritu Santo je' je' tiy'ajt ma íich ajtin co nbadaanim jemybi jugy'ajt jembyi ninícx.

⁶ Jabom jabom íich ajt jotcujc naybidaacim. Nejhuüiyim co nami n'jactzinaayim müid ajt nninícx, ca' nmüd'ajtim jemybi ninícx, ca' nyajpaatim ma ajt nHuindzin Jesús chinäy. ⁷ Je' nninícx xyúdzim tím jadu'n nej co tug jemyhuit nyajtigüiyim, ca'ydi n'íjtim níhuädz. ⁸ Jotcujc etz jotmic nayjihuiyim. Nígi jotcujc ixipy nayjihuiyim, e ooy njatzojcm co mic'amy ixipy n'íjxmajtzim jada ninícx, jigix nícx ndzinaydacpíjcm ma ajt nHuindzin Jesús chinäy. ⁹ Paady ycixp jadu'n njacjugy'ajtim njactzinaayim jigix jébi ajt nHuindzin Jesús jáygidägipy ajt ndzinaayin. Ca' ñejity pen njactzinaayim ixipy müid ajt nninícx, o pen tzojc n'íjxmajtzim ajt nninícx ixipy, e nícxim ma Jesús yajpaady. ¹⁰ Nidüg'óciy íich ajt nayguëxígaanim ma Cristo ytiydundac, e jiiyby nidüg nidüg paadip hui di anajty nipidzímip jadu'n nej anajty ti chinäy, pen oy, o ca' y'oyity.

Je ayuc tiy'ajt huidibi nicy'ajt cidägy'ajt müid

¹¹ Com nejhuüiyim co copicy nhuindzigüiyim ajt nHuindzin Jesucristo, paady ycixpi mictägy nyajmibicyich yi mayjäy ajcxy Cristo ytiy'ajt. Dios ñejhuüiyb co tudägy íich njot nhuinma'ñich. E nañ jadu'n ndzocyich co miich ajcxy mnejhuüiyigixipy co tudägy íich njot nhuinma'ñich. ¹² Ca'p íich ajcxy yam naygapxpáatigixy jadüg'oc co íich ajcxy ooy n'oyjäyity, o co íich ajcxy ooy oy ndúngixyich. Hue' janchtiy lugar nyejcpyich, jaydébi miich ajcxy xycapxpadipyich etz jotcujc mnejhuüiyigixipy müid íich ajcxy ycixpi. Jigix jébi miich ajcxy m'adzohuip yi jáy ajcxy huidibi capxpatp pinjaty yhuíñyijp ooy oy yquëxígy, e ca' ajcxy tuñ cuendi pen je' müid oyjot oyhuinma'ñi, o pen ca'. ¹³ Pen minamb jáy ajcxy co íich nlocity, huen xyajnájxcixyich loci müid Dios ycixpi. Pen jáy minaaangixp co oy huinma'ñ nmüididyich, jébi jadu'n ajcxy xyajnájxcixyich jadu'n nej oy huinma'ñ nmüididyich müid miich ajcxy m'oy'ajtin ycixpi. ¹⁴ Com Cristo ooy xychojcm xyjihuiyim, paady ycixp njatyimycapxymidoohuim Cristo. Com nnejhuüiyim ajt nidüg'óciy tiydudägy co Cristo y'oc'y müid ajt nbocy ycixpi, e paady ycixpi jadu'n nipaady nej jihuüy nidüg'óciy íich ajt ti n'ocim quipxyi müid Cristo. ¹⁵ Cristo o'c müid tüg'óciy jáy ajcxy ycixpi, jigix co tüg'óciy jáy ajcxy huidibi jactzinaayb jacjugy'ajtp, ca' ajcxy yajtúngixipy yci'mjot yci'mhuinma'ñ ma ajcxy chinaayin. Huen ajcxy tzinaaygixy müid Cristo ycixpi huidibi o'c müid yi' ajcxy ypocy ycixpi, etz yjugypijcy jadüg'oc müid yi' ajcxy ycixpi. ¹⁶ Müid co ndzinaayim müid Cristo ycixpi, paady ycixp ca' ndunim cuendi naaxhuiñyjáy ajcxy nej ñayñigápíxigixy nayñimiydáacigixy. Jayijp ca'ni anajty nmibijcm, ooy anajty ndunim cuendi nej jáy ajcxy ñayñigápíxigixy nayñimiydáacigixy. Jadachambi etz yjacnicxni xii tiempo, ca' ndunim cuendi nej naaxhuiñyjáy ajcxy capxcixy miydaaccixy. ¹⁷ Com tigachjaty cham nhuinjihuüyich Cristo, paady ycixp pinjaty yajpatp ma Cristo, jemyjot jemyhuinma'ñ je' ymüd'ajtnip, jadu'n nipaady nej jihuüy ti ma'xung'aty huinjemy. Je jot je huinma'ñ huidibi anajty ymüd co anajty ca'ni mibicy Cristo, ti je' ñajxtäy, jadachambi ac jemyjot ac jemyhuinma'ñ ti y'ahuimbijttäy.

¹⁸ Tüg'óciy tijaty huidibi ya yajpatp, jiiyby chooñ ma Dios, Dios yaj'oyiyday. Müid huidijaty Cristo ytuun müid íich ajt ycixpi, jotcujc n'íjtim müid Dios. E Dios xyajñibijch co ngapxhuäcxxyich Dios y'ayuc jadu'n nej jáy ajcxy jébi ajcxy jotcujc y'íjtcixy müid Dios. ¹⁹ Jadu'n nminaanim co Dios ymüd'íjtpy Cristo. E Dios tuun quipxyi müid Cristo co yi' yaj'oyiy je tzip nej naaxhuiñyjáy ajcxy midzip'aty Dios. Dios ca' yajcomidohua'ñ jáy ajcxy ypocy huidibi miibijccixp Cristo, müid co Cristo ti yajpocyñihuächyíi. E Dios ti xyajñibicyich co ngapxhuäcxxyich yi' y'ayuc nej jáy ajcxy jébi paadip pocyhuinmeecxin, etz nañ jadu'n paadip jotcujc'ajtin ma Dios. ²⁰ Paady nhuidityich müid Cristo ycixpi ngapxhuäcxxyich Cristo y'ayuc. Jadu'n huimbidzímby nej jihuüy miich ajcxy Dios xyminucxtaaccixy müid íich n'ayuc jigix nmibijccixipy Cristo y'ayuc. Paady ngodinäyich Cristo co nmínucxtacyipich miich ajcxy. Jothuimbijtcix nej mdundigooygixy müid Dios ycotujcin e Dios xyhuinmeecxip ajcxy mbocy, jigix jotcujc m'idipy ajcxy ma Dios. ²¹ Cristo ca' ma ytundigooy, per müid ajt nbocy ycixpi Dios yajnajx je Cristo jadu'n nej tüg pocyjáy. Jadu'n Dios ytuñ müid je Cristo, jigix co íich ajt n'íjtim ma Cristo, nbaatim je tudägy'ajtin huidibi Dios chojcpy nmüd'ajtim.

6

¹ Hich ajcxy etz miich ajcxy quipxyi nduunim ma Dios ytung. Nminucxtacpuyich miich ajcxy co mgöbigipy ajcxy je may'ajt je oy'ajt huidibi Dios ti tuñ miid miich ajcxy ycixpi, ca'ydi ñaadig'aty Dios ytung. ² Com jadu'n jaybety y'ity ma Dios ñecy ma Dios jadu'n ymina'n:

Co je xii tiempo ti patni, ti iich miich m'ayuc midoohui. Ti nbubety nbudigiyich je huin'it xii je huin'it tiempo co ti yhuaad'aty mina jäy ajcxy y'alma ñidögipy. Jadachambi xii tiempo ti yhuaad'ajtni mina jäbi Dios xyñidzoocim ajt n'alma.

³ Ca' pin n'adzipyich co nduñich ma Dios ytung, jigix ca'ydi pinjaty ymina'n co ca' oy nduñich. ⁴ Nañ jadu'n ca' n'adziba'ñich miich ajcxy. Nigi ndzocyich co ñiguëxigip tüg'ocyi iich ndung co nduñich miid Dios ycixpi. Ooy nyajtuñich mecxtujcin. Ooy nmecxtucyich ayo'n etz tzaachypi. Ooy nyajmayjatyich nhuit nducyich ngaayin n'uucin. Ooy iich ndzinaayin chipity. ⁵ Ti ajcxy xyci'atyich, ti ajcxy xypidaacyich pujxtigoty. Ti jäy ajcxy xymibidigiyich, e ooy ajcxy yhuaangixy yjihuiyigixy. Ti tzaachypi nminaxy nyajnaxyich ma ndungich. Minaajity canaag xii ca' nmäyich, e minaajity ayuu n'ityich. ⁶ Nyajnguëxipcy iich ajcxy co iich ndungixyich miid Dios ycixpi, miid co huadz jot huinma'n nmiididyich ajcxy. Ca' ma jibicpi nmiididyich ajcxy, miid co n'ixpijccixyich ma Dios ytiy'ajt. Ooy mecxtujcin nmiididyich ajcxy. Ooy iich ajcxy nba'ayooyich nmigügtijcich. Dios yjihui'n ymic'ajt yajpatp ma iich ajcxy njot nhuinma'n. Ooy iich miich ajcxy ndzojccixy njihuiyigixy cixy jot huinijot. ⁷ Nyajnguëxipcy iich ajcxy co ndungixyich miid Dios ycixpi, miid co ngapxhuäccixyich Cristo y'ayuc ytiy'ajt tudägy, e nañ miid co nmiididyich ajcxy Dios yjihui'n ymic'ajt, etz miid co nmiididyich ajcxy ca'pxy Dios ytiy'ajt tudägy. Miid yi' ytiy'ajt tudägy nyajmibicyich jäy ajcxy, etz miid yi' ytiy'ajt naygohua'ñiyijich ma nmizipich. ⁸ Minaajity jay xycapxpädygixyich; minaajity jäy ajcxy xyñigapxy xyñi'ojiyigixyich; minaajity jäy yminaangixy co oy nduñich; minaajity jäy yminaangixy co jibic nduñich; mina ngamina jäy xytjicixyich co n'indäaccixyich; e minaajity jäy yminaangixy co tiy'ajt ngapxpich. ⁹ Minaajity jäy yminaangixy co ajcxy ca' xy'ixy'ajtigixyich; e minaajity jäy yminaangixy co ooy oy xy'ixy'ajtigixyich; e minaajity ayo'n jijp'am o'cin jijp'am nhuiditcixyich. Per jactzinaaybich ajcxy jadu'n. Ti je tungmiidpi xychaachtungixyich, per ca' iich ajcxy xyaj'o'cyi. ¹⁰ Ooy iich ajcxy njatajccixy njamaaygixy, per jabom jabom jotcujc nayjihuiyigixyich. Ayoobi iich ajcxy ca' ti meen etz ca' ti pidägy nmiid'ajtixyich. Per nañ jadu'n mayjäy oy'ajtni pada'n ma Dios miid iich ajcxy ndung ycixpi, jadu'n jada oy'ajtni nipaady nej meen etz nej pidägy. Oy ca' meen etz ca' pidägy nmiididyich ajcxy, per nmiidich ajcxy tüg'ocyi huidibi nmina ca' ycixy yti gooy.

¹¹ Migügtijc ajcxy, huidibi yajpatp jim Corinto, ti nmiidcapxcixy ti nmiidmiydaaccixy ma jada necy miid tüg'ocyi tudägy'ajt. Ti ngapxyich nmiydägyich nej njot nhuinma'n nmiididyich. ¹² Ca' iich n'ixmach nej iich miich ajcxy ndzojccixy njihuiyigixy cixy jot huinijot. ¹³ May'ajt nbijctzooybich ma miich ajcxy co xyajnimähuibich nej miich ajcxy njot nhuinma'n midity tim jadu'n nej ti nduñich miid miich ajcxy. Jadu'n may'ajt nbijctzooyich ma miich ajcxy nej ungdeedytjic ajcxy oy'amy y'ung ajcxy ihuijccixy capx-huijccixy.

Hich ajt je' ma Dios jugypi chinaayin

¹⁴ Miich ajcxy, ca' mdungmujccixy m'ayoomujccixy miid jäy ajcxy huidibi ca' mibijccixy Cristo. Com ca' huaad tudägyjäy ajcxy müddzinaaygixy jäy ajcxy huidibi ca' tudägy huinma'n midity. ¿Nej jäbi je huidibi tiy'ajtip ytügiy miid huidibi ca' ytiy'ajity? ¿Nej jäbi pinjaty tiy'ajt miid müd'idipy pinjaty huidibi ca' tiy'ajt midity? Je huidibi tiy'ajt müd jadu'n nipaady nej chinäy ma jin ytücxin. E je huidibi ca' tiy'ajt midity ñipatp nej jihuüy chinäy agootztuuby. ¹⁵ ¿Nej jäbi Cristo etz Satanäs ñay'ayuc-huinjihuiyigixy? ¿Nej jäbi tüg mibijcpi yajtügüy yhuinma'n miid tüg huidibi ca' ymibicy? ¹⁶ Ca' ni nej jäbi tzaadzech quipychech y'idipy ma Dios ytjic. Com yi' ajcxy huidibi tzaadzech ojadajtp ca' ajcxy yhuinma'n ytügiy miid Dios ytiy'ajt. Je Dios juugypi ymiid chinaydac ma iich ajt njot nhuinma'n, paady ycixp jadu'n iich ajt nipaady nej Dios ytjic. Com jaybety y'ity ma Dios jadu'n ymina'n:

Ndzinaydac nbidägaamybich ma yi' ajcxy. Huididaamybich ma yi' ajcxy yajpaady. Yi' ajcxy iich xyDios'adaanip. E iich ajcxy yi' njäy'adaanip.

¹⁷ Paady nañ jadu'n ajt nHuindzin Dios ymina'n:

Copicy co miich ajcxy m'ixmadzipy yi' jacjadyii jäy ajcxy, e tzinaaygix abicy. Ca' ajcxy mnijot'adipy je jibicpi, huin'it iich miich ajcxy ngöbigipyich.

¹⁸ Hich miich ajcxy xymiid'adipyich jadu'n nej jihuüy iich miich ajcxy xyTeedy'adyii. E jadu'n miich ajcxy m'idipy nej iich nmang n'anäg.

Jadu'n je mijpi Dios ymina'n.

7

¹ Miich ajcxy huidibi ooy ndzocy njihuïyich, com Dios jadu'n ymina'n co tzinaydac pidäga'n ma ajt njot nhuinma'n, paady ycixp tzoc yajhuaatzim ajt njot nhuinma'n, etz ma ajt n'espíritu, e jadu'n Dios nhuindzigüim etz nyajmij'ajtim cixyot huinijot.

Co ajcxy jothuimbijit ma Dios huidibi ajcxy jim Corinto

² Tungix may'ajt xycöbigipich miich ajcxy cixyot huinijot. Ca' ñich ajcxy ni pin ti nmidundigöogixyich, nañ jadu'n ca' ni pin ñich ajcxy ti nyaj'ixpijccixyich jibic-huinma'n. Nañ jadu'n ni ca' ñich ajcxy pin ti huin'ñich. ³ Ca' jadu'n nmına'ñich müd co nyajpocycähua'ñich miich ajcxy. Com jadu'n jacjayijp ti mına'ñich co ooy ndzocy njihuïyich miich ajcxy, tú'ciy ajcxy ndzinaayim, e tú'ciy ajcxy n'ó'cimipy. ⁴ Ooy ñich miich ajcxy njot'amij'adyiijich. Ooy ñich miich ajcxy ngömaaygixy. Ooy jotcujc nayjihuiyijich müd miich ajcxy ycixpi. Oy njayajpaadyich tzip agujc ayo'n agujc, per co njäyamechich miich ajcxy, jotcujc nayjihuiyijich.

⁵ Nej ñich ajcxy nja'ty ya Macedonia, ca' njotcujc'ajtcixyich. Hue' nyajpaadyich ajcxy tzip agujc capxy agujc huen ma'amyity. Jäy ajcxy xymidzip'ajtpich, etz nañ jadu'n tzigüybich jotjoty huinma'ñyotjy. ⁶ Per Dios je huidibi yajjotcugüyb yajjotmicipjcp pinjaty tajp mayb, yi' ti xyajjotcugüyich co Tito yja'ty ya ma ñich nyajpaady co jim choñ ma miich ajcxy. ⁷ Ca' nan ti njotcugüyich müd tim jëyi co Tito ti xyñijädyich. Hue' ti njotcugüyich co yi' ti xyñimäyich jadu'n nej yi' jotcujc'ajtin ti paady ma miich ajcxy. Yi' ti xyajmüdmidyägyich jadu'n nej miich ajcxy tajin mayin mjihiuïyigixy müd mbocy ycixpi. E nañ jadu'n nej mhuinmaaygixy nej nyajpaadyich. E müd jada ayuc nigi ti njotcugüyich.

⁸ ñich ca' ndajy nmayich müd co ñich miich ajcxy ti nyajtajcixy ti nyajmaygixy müd je necy huidibi ajcxy nyajnigüejx. Oy anajty ti njajihuïyich jotmay co nnejhuïyich co miich ajcxy ooy mdajy may tüg xii mejtz xii müd ñich nnecy ycixpi. ⁹ Jadachambi ooy jotcujc nayjihuiyijich. Ca' nmınaanim müd je tajin je mayin ycixpi huidibi miich ajcxy anajty müd jotcujc'ajtpich, com co je tajin je mayin ajcxy ti xyajjothuimbijitcixy, Dios ti jäygidägy jadu'n nej miich ajcxy ti nmimadaaccixy je tajin mayin. E ca' ñich ti ndundigöoyich ma miich ajcxy co ajcxy njotmaymoy. ¹⁰ Com Dios yjäygidacpyi co jay njothuimbijitcixy, müd co taj may ñayjihuiyigixy müd ypocy ycixpi. E co ajcxy yjothuimbijitcixy, huin'it ajcxy je y'alma nidzocin paadipy. E ca' je' huaad nidajim nimaayim co ajcxy y'alma nidzögy. Co jäy ajcxy nidajicxy nimaaygixy huidi yajpat ya naaxhuñ, e ca' yjothuimbijitcixy, jadu'n ñi nicxy je o'cin nipatcixy. ¹¹ Müd je tügpi jäy ypocy ycixpi ti mbaatcixy je tajin mayin. Miich ajcxy jadu'n ti nmecxtujccixy je tajin mayin jadu'n nej Dios jäygidägy. Tungix cuendi jada' cham nej ti yhuimbizimy. Tiydudägy janch cham ti mdiyungixy müd je pocy ycixpi. Ti xyajjotma'tcixy, e ti xy'adzigiigixy, e ni'ixiy miich anajty m'ijtcixy co mdzaachytunaangixy je huidi ti ytundigöoy. ¹² Müd jada ycixpi ti miich ajcxy maynigüexicixy, co ca' miich ajcxy ti pocy nmüidity ma jadayaabi huinma'n. ¹³ Co ñich miich ajcxy jayhuin nijayiy, ca' nmınaanim müd je' ycixpi huidibi anajty ti ytundigöoy. Nañ ca' nmınaanim müd je huidibi anajty ti yajmidundigöoy. Nijayiyich miich ajcxy, jigix jëbi mnejhuïyigixy je tiy'ajt nej Dios tzocy co nduññich müd miich ajcxy m'oy'ajtin ycixpi. ¹⁴ Com miich ajcxy ti mmijottigöoyb Dios ytiy'ajt, paady ycixpi miich ajcxy ti mbaatcixy jotcujc'ajt, e nañ jadu'n ñich ajcxy ti nbaatcixyich jotcujc'ajt müd miich ajcxy ycixpi. Nañ jadu'n ooy ti njotcugüyich ajcxy müd co Tito ooy chachjotcujcity. Oy'amy miich ajcxy ti mgöbijccixy Tito, paady yi' ooy ti yjotcugüy müd miich ajcxy ycixpi.

¹⁵ Co ti nmimäyich Tito co njot'amij'adyiijich miich ajcxy, ca' ti tzo'ydu'n ti nbaadyich, co yi' oy ti xycö'ixiyigixy. Nigi oy ti yhuimbizimy müd co tüg'öciy ayuc huidibi ñich miich ajcxy ti nyajnimäy ti yhuimbizimy co yjanchity. Nañ jadu'n ti yhuimbizimy co yjanchity jadu'n nej ti nmimäyich miich ajcxy müd Tito co njot'amij'adyiijich miich ajcxy. ¹⁶ Jadu'n nej co Tito oy miich ajcxy xycogapxiy, yi' ooy nigi xychojccixy xyjihuiyigixy co yi' nejhuïy jadu'n nej miich ajcxy mmijottigöoygixy ñich n'ayuc, jadu'n nej mgapxymidoohuaangixy. E nañ jadu'n co yi' ijxy nej miich ajcxy yi' mgöbijcy müd tzig'i'n jihuñ. ¹⁷ Ooy jotcujc nayjihuiyijich, ooy njot'amij'adyiijich miich ajcxy.

8

Ycüejtixy müd oyjot oyhuinma'n

¹ Jadügnax, miich ajcxy migügtijc, nyajnejhuïhuaamybich nyajmüdmidyägaamybich miich ajcxy, jadu'n nej Dios may'ajt oy'ajt tuñ müd je mibijcpidijc ajcxy huidibi xii ya yajpatp Macedonia. ² Je mibijcpidijc huidibi ya yajpatp ti ooy ajcxy minaxy yajnaxy tzaachypí etz ayo'n. Per ca' ñejty, ooy ajcxy jotcujc yajpatcixy. Nañ ayoobi ajcxy, per ti ajcxy may meef yajmujccixy, jadu'n nej jihuïy ajcxy ycomeefity. ³ ñich testigo co je migügtijc müd yci'm tzojcin meef yejccixy, nej jëbi ajcxy ymadaaccixy müd meef, ixti anaxy ajcxy

yejccixy. ⁴ Ooy xyminuxctägyich ajcxy co n'a'ixihuibich ajcxy co jëbi ajcxy meefñ yajmujccixy huidibi müid pubedaangixy jacjadyii je mibijcpidijc. ⁵ Nigi anaxy ajcxy ooy meefñ yajmujc ca'ydi jadu'n nej anajty njijp'ixyich. Jayijp ajcxy ñayyejci ma ajt nHuindzin Jesucristo, e huin'it ajcxy ñayyéjigixy ma ich ajcxy jadu'n nej Dios tzocy. ⁶ E chi jada' ich ajcxy ooy nminuxctacy Tito co huen nixy jadüg'oc ma miich ajcxy. Huen nixy yajcixy yajmay huidibi ti yajtzondägy ma miich ajcxy. Co huen je meefñ yajmujctäy huidibi cixyot huinijot müid mbubedaangixy je mibijcpidijc ajcxy huidibi yajpatp jim Jerusalén. ⁷ Miich ajcxy nigi ooy mmadaaccixy, ca'ydi jacpinjaty ma tüg'ocy Dios ytung. Ooy mij mibijcin miich ajcxy müidity. Ooy myaj'ixpijccixy Dios ytiy'ajt. Ooy mmijottigoogixy mguydunaangixy ich n'ayuc. E nañ jadu'n ooy miich ajcxy xychojccixy xyjihuiyigixyich. Nañ ooy ndzocyich co miich ajcxy nigi pubejtin myegipy ma je mibijcpidijc huidibi jim Jerusalén.

⁸ Ca' jadu'n n'ane'myich co mbubéjtcixipy je migügtijc huidi jim Jerusalén. Hue' ndzocyich co miich ajcxy mnejhuihuipy jadu'n nej yi jacjadyii mibijcpidijc yhuinma'ñ bidaaccixyp ci'm co pubedaangixy je ymigügtijc jim Jerusalén. Jadu'n mdunipy ajcxy jigix jëbi nnejhuihuibich pen janch tiy'ajt jadu'n co mdzojccixy mjihuiyigixy yi jacjadyii mibijcpidijc. ⁹ Com miich ajcxy mnejhuiyigixyp jadu'n nej ajt nHuindzin Jesucristo mijmay'ajt mij'oy'ajt tuñ müid ich ajt ycipxi, jadu'n Jesús nipaady nej tüg mijcomeefiybi jibby tzajpjoty, müid co yi' xychojccim xyjihuiyim mijcajee, chi yi' ixmajtzatay yi' y'oy'ajtin jibby tzajpjoty co ycidacy ya naaxhuñ etz y'ayooy ya. Miich ajcxy ca' anajty ti müidity jibby tzajpjoty, per jadachambi mbadaangixyp mij'oy'ajtin jibby tzajpjoty.

¹⁰ Müid miich ajcxy m'oy'ajtin ycipxi, ma jada necy nmooybich miich ajcxy ngapxhuijin jadu'n nej jëbi huaad mdungixy oyjāy'ajtin. Jac'oy co miich ajcxy myajcixipy je huidibi ajcxy myajtzondac jadōjimij. Miich ajcxy jacjayijp ca'ydi jac ni pinjaty ti myajtzondaaccixy meefñ yajmugii huidi müid mbubedaangixy je mibijcpidijc huidibi yajpatp jim Jerusalén. Nañ jadu'n miich ajcxy jacjayijp ca'ydi jacpinjaty mijottigoogixy co mbubedaangixy jacjadyii mibijcpidijc. ¹¹ Jadachambi tiempo jactungix pubejtin, meefñ yajmujccix cixyot huinijot jadu'n nej ti myajtzondaaccixy ixti mabaad myajmaygixy je meefñ yajmugii. Nidüg nidüg yejccix nej ajcxy ii müidity. ¹² Pinjaty y'ofrenda yejcp janch cixyot huinijot Dios ycōbijcip yi' je' y'ofrenda, jadu'n nej ii müidity. Dios ca' yi' pijctzoy huidibi ajt ca' nmüidity.

¹³ Ca' nmīna'ñich co oy jadu'n co mbubéjtcixip jacjadyii mibijcpidijc ixti mabaad mnayya-jhu'i migixy ayo'ndumb. ¹⁴ Hue' yajmina'ñ co quipxyjaty mdzinaaygixy, ni pin cayaj-conaxipy e ni pin cayajmayjadipy. Jadachambi tiempo miich ajcxy nmüidity ca'pxy je huidibi mnidzinaaygixip, ixti miich ajcxy conajxpi, paady ycipx jëbi mbubéjtcixipy migügtijc huidibi yajmayjajtp. Jadüg tiempo miich ajcxy myajmayjadipy, e jacjadyii migügtijc jëbi xypubéjtcixipy, e jadu'n yhuimbizimipy co mnaybubéjtgixy quipxyjaty miñ xyipy. ¹⁵ Com jadu'n jaybety y'ity ma Dios ñey ca' jadu'n ymina'ñ: "Pinjaty anajty may'amy müid, ca' yajconajxy. E pinjaty anajty hueeni müid, ca' yajmayjajty."

Tito müid ymigügtijc ajcxy

¹⁶ Per nyajnajxypich jāgydaacin ma Dios, com Dios ti pidägy ma Tito yjot yhuinma'ñ co mijottigooy miich ajcxy m'oy'ajtin, tim jadu'n nej ich nmijottigooyich miich ajcxy m'oy'ajtin. ¹⁷ Co may'ajt nbijctzooyich ma Tito co nixipy jadüg'oc ma miich ajcxy, aguj jotcujc cōbicy, com ti anajty jayijp yhuinma'ñ pidägy ci'm co ñicxa'ñ jadüg'oc ma miich ajcxy. Jadachambi Tito nixip ma miich ajcxy müid ci'ndzojcin.

¹⁸ Quipxy müid Tito nguexy ich ajcxy yam tüg nmigüg huidibi ooy chachcapxpaadyity majaty mibijcpidijc, co ooy oy ytuñ capxhuācxi Jesús y'ayuc ytiy'ajt nej huaad jāy ajcxy y'alma nidzoocin paady. ¹⁹ Ca' nan jëyi co je mibijcpidijc yi' ycapxpadyyi. Nañ jadu'n ti yhuin'ixyii mibijcpidijc ajcxy co jëbi yhuidity müid ich ajcxy, e tunipy pubejtin müid je may'ajtin oy'ajtin huidibi ich ajcxy ndumyibich müid je migügtijc ycipxi jim Jerusalén. Jadu'n nduuhñich jaydëbi jāy ajcxy capxpaadip ajt nHuindzin Jesucristo. Etz nañ jadu'n jaydëbi ñigüexy co ich ajcxy nbubeda'ñich ajt nmigügtijc cixyot huinijot. ²⁰ Ooy nguend'atyich je meefñ huidibi je mibijcpidijc ti yajmujccixy, jigix ca'ydi pin huaad xyñigapxy xyñi'ojjyich, jadu'n nej ich ajcxy meefñ nyajmujccixyich. ²¹ Jadu'n ich ajcxy nhuinma'ñ nbidägy co tudägy ndunāangixyich ca' nan jëyi ma ajt nHuindzin Jesús yhuinduu, nañ jadu'n ma je mayjāy ajcxy yhuinduu.

²² Nañ jadu'n nguexypich müid yi' ajcxy jadüg ajt nmigüg, je huidibi oy ti ytuuh ma Dios ytung quipxy müid ich ajcxy e nejhuiyibich co tudägy ytuñ cixyot huinijot. E yi' miich ajcxy ooy xyjot'amij'adyii, e oy ytuna'ñ müid miich ajcxy ma Dios ytung. ²³ Pen jim pinjaty nidyi yajtiy je Tito, nimaaygix co ich yi' nmigüg, e yi' müid nduuhñich ma Dios ytung ma miich ajcxy. E nañ jadu'n pen jim pinjaty nejhuihua'ñ pinjāy ajcxy yi'. yi' jacjadyiibi huidibi ajcxy nixyp müid Tito. Nimaaygix co je mibijcpidijc ajcxy ya Macedonia ti quexy ajcxy, ytungixy müid Cristo ymij'ajtin ycipxi. ²⁴ Paady ycipx miich ajcxy yi' mdzōjccixipy mjihuiyigixipy

je migügtijc ajcxy huidibi mimb müid Tito, jigix jëbi je mibijcpidijc ma nidüg nidüg cajp ya Macedonia nejhuühuip co müich ajcxy yi' mdzojccixy mjihuüygixy je mibijcpidijc tydudägy. E paady ycixp jëbi iich jotcuje nayjihuüyjijich müid müich ajcxy ycixpi.

9

Je cüejtin müid je mibijcpidijc ajcxy ycixpi

¹ Nañ ca' yjaty ycopicyity co iich müich ajcxy njacnijayiiygixipy co je mibijcpidijc huidibi xii ya pubejtin tunaangixyp ma Dios yjây huidibi ajcxy jim Judea. ² Com nejhuüybich co müich ajcxy nañ jadu'n mbubedaangixy cixyjt huinijot Dios yjây huidibi ajcxy jim Judea. Paady ycixp jotcuje iich jadu'n nnimâyich je mibijcpidijc ya Macedonia jadu'n nej müich ajcxy jim Acaya mhuinma'ñ pidacy jidöjimijt co mbubedaangixy je mibijcpidijc huidibi jim Judea. E müid co müich ajcxy jayijp mhuinma'ñ ti mbidaaccixy co mbubedaangixy je mibijcpidijc huidibi ajcxy jim Judea, paady ycixp may mibijcpidijc ya Macedonia yhuinma'ñ pidaaccixy co ypubedaangixy nañ jadu'n. ³ Paady nguejxypich Tito müid jacjadyii migügtijc ma müich ajcxy, jaydëbi xypubéjtcixipy ma je meen' yajmugüi, jadu'n nej ti mbidaaccixy huinma'ñ. E iich ca' ti tzo'ydu'n nbáadibich müid müich ajcxy ycixpi ma jada pubejtin huidibi ajcxy mguexamyb jim Judea. Com iich ti nnimâyich mayjây co müich ajcxy ni'ixi' m'ijtcixy müid mbubejtin. ⁴ Ca' yjacyity co nijëjity mibijcpidijc huidibi tzinaayb ya Macedonia ñicxa'nip ajcxy müid iich co anajty nnicxyich jim ma müich ajcxy. E co anajty iich ajcxy jim nmejtzcixy, e chi ajcxy nbáatcixipy ca' anajty ajcxy mni'ixijity. Pues chi ooy tzo'ydu'n njihuühuibich, com ti anajty ooy njot'amij'ájtigixy. Nañ jadu'n müich ajcxy tzo'ydu'n mjihuühuip. ⁵ Paady ycixp huinma'ñ nbidägyich co oy jadu'n co nijëjity migügtijc nicxy jayijp xycogapxiygixy, e huen xypubejtcixy ma yi meen' yajmugüi jadu'n nej jidöjimijt ti mgapxytungixy. E co anajty nmechich jim ma müich ajcxy, chi ni'ixi' anajty ajcxy müidity yi m'ofrenda, e jëbi jây ajcxy nejhuühuip co yi m'ofrenda ti myejccixy cixyjt huinijot, ca'ydi jây yminaangixy co iich müich adzip ajcxy ti n'ane'ngixy co m'ofrenda nyajmüjccixipy.

⁶ Jäymetz müich ajcxy jadu'n nej ayuc y'oc'ity: Pinjaty hueni niip, nañ jadu'n hueeni ycosecha yajpidigy. E pinjaty mij niip, nañ jadu'n mij ycosecha yajpidigy. ⁷ Nidüg nidüg mibijcpi yegipy y'ofrenda jadu'n nej anajty ci'm yhuinma'ñ ti pidägy co yega'ñ. E ca' yegipy ametz jotmetz. E nañ jadu'n ni yca'adzip yca'a'écity. Com Dios chojcpy yjihuüyb pinjaty cixyjt huinijot y'ofrenda yejcp. ⁸ Dios jëbi may'ajt oy'ajt tunipy müid müich ajcxy mijcajee, e müich ajcxy mbáatcixipy tüg'óciy tijaty conuucxin, e icti mmiid'adipy tüg'óciy huidibi myajmayajtcixy, e nañ jadu'n conaxpi naadigibi nej huaad jacjadyii mibijcpidijc mbubejtcixy, e mdungixipy canaagnax oyjây'ajtin. ⁹ Jadu'n jaybety ymiñ ma Dios ñecy, ma jadu'n ymina'ñ:

Yi oyjädijc ajcxy, yi' ajcxy nimooyb ayoobitijc huidibi ajcxy yajmayajtpy. Yi oyjädijc ajcxy co oyjây'ajtin tungixy, yejccixyp iixpejt oybi huidibi y'idipy huinixii.

¹⁰ Dios yejcpy je tiim huidibi jây ajcxy ñiipy, nañ jadu'n Dios yejcpy je jüxcy picy huidibi nidznaayim nijugy'ajtin. E jadu'n co müich ajcxy oyjây'ajtin mdungix mijcajee, je m'oyjây'ajtin ajcxy ñipaadip nej jihuüi mgosecha myajpidiccixy may'amy. ¹¹ E jadu'n müich ajcxy müid'adipy tüg'óciy jugy'ajtin comeen'ajtin, jaydëbi m'ofrenda myejccixy mij'amy. E mayjây ajcxy Dioscojuyip yajnaxipy ma Dios müid je m'ofrenda ycixpi, co anajty nyecyich müich ajcxy m'ofrenda ma yi' ajcxy huidibi yajmayajtp. ¹² Co iich ajt pubejtin nyejcim ma jacjadyii migügtijc, canan jëyi co nbubejtim müid tijaty yajmayajtcixyp. Nañ jadu'n yi' ajcxy jëbi yajnaxcixy Dioscojuyip canaag'oc. ¹³ Yi' ajcxy capxpadamb Dios müid co je m'ofrenda huidibi ajcxy ti myejccixy, yi' je' tiy'ajtip co müich ajcxy mgapxymidooigixy Cristo y'ayuc ytiy'ajt. Paady ycixp may mibijcpidijc ajcxy Dios ojadájtccixy e nañ jadu'n Dios iibáatcixipy capxpaatcixipy müid je pubejtin huidibi müich ajcxy anajty myejcpy müid yi' ajcxy ycixpi, etz nañ jadu'n müid jacjadyii mibijcpidijc ycixpi. ¹⁴ E ci'm yi' ajcxy Dios ojadadipy mibijctzohuipy müid müich ajcxy ycixpi, etz xychóccixy xyjihuüygixip ooy müid co Dios je mijpi conuucxin ti yecy ma müich ajcxy. ¹⁵ Dioscojuyip yi Huindzin'ajtim Dios müid yi mijpi conuucxin huidibi ti yecy ma iich ajtin, ni pin canejhuüi nej jëbi yajnajtzcixpy.

10

Pablo müidity cötujcin co y'apóstol'adyii

¹ Iich Pablo nmigapxypich müich ajcxy müid yungnaxy njot nhuinma'ñ, jadu'n nej jihuüi Cristo müich ajcxy xymüidmydaaccixy. Com Cristo yungnaxy jot huinma'ñ müidity. Nijëjity müich ajcxy yminaangix co ooy yungnaxy naybidägyijich co n'ityich müid müich ajcxy, e jadachambi co jigüégy nyajpaadyich, hue' n'ahuimbityich ahua'ñ, ndunaamybich ti ndunaamybich. ² May'ajt nbijctzooybich co anajty iich müich ajcxy nicxy n'ijxcixy, ca' jadu'n ndzoocyich co copicy n'ahua'ndägbich müid nijëjity müich ajcxy huidibi xyñilhuambejtpich,

co nduñich etz ngapxyich ngi'mtzojcin tim jadu'n nej huenpin naaxhuiñjāy ytungixy etz ycapxcixy miid yci'mtzojcin. Janch ni'ixi' n'ityich, co anajty jim nmechich, chi miid nnay-huindināhuiybich yi' ajcxy huidibi jadu'n xyñihuambejtpich. ³ Janch tiy'ajt co ndzinaayich jadu'n nej naaxhuiñjāy chinaaygixy. Per ca' ndziptuñich nej jāy ajcxy chiptungixy. ⁴ Ca' iich ajt nyajtunim naaxhuiñjāy ymic'ajt co nnaygohuaanim ma je jibicpi huidibi ymidizip'ajtim. Hue' nyajtunim Dios ymic'ajt, huidibi jēbi miid nmimadaacim tūg'óciy huidibi ca'oybi miid. ⁵ Jadu'n iich ajcxy ca' nyajtzobadāangixyich je ayuc tiy'ajt huidibi ca' yjanchity, etz je' ayuc pin amij agix naybidaacip co Dios y'ayuc ytiy'ajt adujci. Tūg'óciy naax-huiñjāy y'ayuc ytiy'ajt nbidāaccixyich ma Cristo, jigix tūg'óciy jāy ajcxy capxymidohip Cristo. ⁶ Co anajty miich ajcxy mhuinma'ñybidaaccixy co huadz mgapxymidohuaangixy tūg'óciy Cristo y'ayuc ytiy'ajt, pinjaty cacapxymidooy, hue' ni'ixi' n'ijtcixich co yajmōhuañ castigo pinjaty cacapxymidooy.

⁷ Miich ajcxy yi' mdzachcuenditungixy jāy ajcxy nej yjāy'ajtcixy. Pen jim pinjaty ñayjihuiyīi janch agujc jotcujc co Cristo yhuin'ixyīi miid ytung yciixpi, huen huiñjihuiyigixy jotjoty co Cristo ti xyhuin'ijxcixyich nañ jadu'n miid yi' ytung yciixpi. ⁸ Iich ca' ti tzo'ydu'n jihuiyich miid co ci'm nnaygōmayiijich hueeni miid co Jesucristo xymooygixyich ane'min cōtujcin. Com iich ajt nHuindzin Jesucristo ti xymōoygixyich jada cōtujcin, jigix iich miich ajcxy nyajyeecip mmibijcin, canan nyajtigoyip ajcxy mmibijcin. ⁹ Ca' jadu'n ndzocyich co yquēxigipy jadu'n nej jihuiy' n'adzigihuaangixy miid je necy huidibi nyajniguejxypich miich ajcxy. ¹⁰ Yminaangixy co iich nnecy ooy tzaachyaty chach chaach. E yminaangixy co ma jāy ajcxy yhuinduu yung naxy njāy'aty, e ngapxin nmiydāacinich ca' pin jāygidāgy. ¹¹ Per yi' jāy ajcxy huidibi jadu'n minaaangixp, copicy ajcxy nejhuihiupy co jadu'n nej iich ngapxin necyjoty co nijayiygixy, co nyajpaadyich jiguem, nañ tim jadu'n ngapxa'ñich co anajty n'ityich ma miich ajcxy.

¹² Ca' huaad n'ocnay'ijxquipxim o' nyajtūgiyim miid yi' ajcxy ytung huidibi tzach naygōmayaanip ci'm. Tzuu huinma'ñ locihuinma'ñ ajcxy ytungixyp, co pin jadu'n nay'ixquipxip naymidoguiwxip miid yci'm'ayuc yci'mhuinma'ñ huidi ii yjajtpy ñejhuiyb. ¹³ Ca' iich ci'm naygōmayiyyb ma ycapadyīi, huidibi iich ajcxy ca' xypātcixyich. Dios iich ajcxy xyajnejhuiybich nje' nje' it lugar ma yi' tzocy ndungixibich. E Dios jadu'n tzojc co nicxy ndungixy jim Corinto ma miich ajcxy myajpatcixy. ¹⁴ Paady yciixpi ndungixyich jēyi ma Dios xyquexyich, ca' jac ma. Nej ixyipy y'octuyīi y'ocjadyīi, pen ca' ixyipy miid jayijp ti n'ityich ma miich ajcxy. Pues iich tim jayijp ngapxhuācx Dios y'ayuc ma miich ajcxy, e ca' jac ni pin. ¹⁵ Pen huingbi jāy je Dios ytung yajtzondaacip ma tūg cājp, pues ca' iich huaad jim nduūñich, jadu'n nej jihuiy iich ti nyajtzondāgyich je tung. Ca' jadu'n nduūñich, hue' njijp'ijxypich co miich ajcxy myajyeegip mmibijcin, huiñ't jēbi njactunipich ma miich ajcxy, jadu'n nej Dios tzocy co ndunipyich. ¹⁶ Co anajty jadu'n ti njactuñich ma miich ajcxy, huiñ't xi' ya n'ihuācx'a'ñich ngapxhuācx'a'ñich Cristo y'ayuc ytiy'ajt ma je it lugar jactim jiguemjatyp ma miich ajcxy. Per ca' nduna'ñich ma huingbi ti yajtzondāgy je tung.

¹⁷ Ooy ycopicyty ngōmayim nyajmij'ajtim ajt nHuindzin Jesucristo, e ca' y'oyity co naygōmayim ci'm. ¹⁸ Com Dios ca' jāygidāgy pinjaty ci'm naygōmayip. Hue' Dios yjāygidacyipi pinjaty ajt nHuindzin Jesucristo capxpatp.

11

Pablo etz je' ajcxy huidibi y'ayuccapxhuācxp miid anīi

¹ Huaad co miich ajcxy ixyipy xy'ocmimextujcich hueeni iich nloci huinma'ñ huidibi ngapxaamybich. Oy ixyipy ñejity mīmecxtuccich. ² Ooy ndzocy ooy njihuiyich miich ajcxy. Dios ti xymōyich je tzojcin jihuiyīn huidibi nmūidich miid miich ajcxy yciixpi. Ndzocypich co cixyot huinijot miich ajcxy mmijpidaaccixy Cristo. Co miich ajcxy yajmij'adip Cristo cixyot huinijot, huiñ't jadu'n miich ajcxy nipaadipy nej tūg tōxy'anāg pi'cnip huidibi pijcp miid tūg yēdyjc. ³ Ndzigiybich co huingbi jāy xyajhuinma'ñydgoyaangixy miid ixpicytjc y'ayuc huidibi ca' ytiy'ajity. E miich ajcxy m'ixmadzaangixy jadu'n nej cixyot huinijot ti mmijpidaaccixy Cristo. Tim jadu'n nipada'ñ miich ajcxy mjadaangixy nej yjajty jecy'ajty je Eva co tza'ñ yhuin'īni. ⁴ Com miich ajcxy mgōbijccixy huingbi jāy huidibi tigachjaty yaj'ixpijcp Jesús ytiy'ajt, ca' yjadu'nity nej iich ajcxy nyaj'ixpicyich. Etz nañ jadu'n miich ajcxy jotcujc mgōbijccixy huingbi espíritu, ca' yjēity je Espíritu Santo huidibi ti mgōbijccixy jayijp'aty. Etz nañ jadu'n mgōbijccixy tigachjaty ayuc tiy'ajt, e ca' y'ocjēñ huidibi ajcxy m'alma xyajnidzoocip. Ca' y'ocjēñ huidibi ti mmidoogixy ma iich ajcxy. Mic'amy mdzachmijpidaaccixy huingjāy y'ayuc. ⁵ Ca' jadu'n ytiy'ajity co yi' huindzindijc ajcxy huidibi naydjigixp Jesús y'apóstol huidi jim ma miich ajcxy, co jac mic'ajt miid ajcxy etz yjacmiid ajcxy ixpijcin ma Dios ytiy'ajt, ca'ydi iich. ⁶ Oy iich jada' ca' njatyich nej yajxon ngāpxibich, ca' ooy ngo'ayūcigich. Per ca' ñejity com yajxon njatyich nnejhuiyich Dios

ytij'ajt. E ti nyaj'ijxcixy nyajnejhuuigixy co n'ixpícycigich ma Dios ytij'ajt müd je ayuc huidibi ngapxhuácxich ma müich ajcxy etz je mijhuinma'n huidi nduunich co jim n'ijtyich ma müich ajcxy.

⁷ ¿Nej tundigoyich jada' co ngapxhuácxyich Jesucristo y'ayuc ma müich ajcxy e ca' nbijctzooyich meef müd ndungich ycixpi? Jadu'n nnayajnajxich anajty nej tüg midumbi jigix müich ajcxy jac'oy jacotcuje mdzinähui. ⁸ Ti ngöbicyich meef huidibi jacjadyii mibijcpijic ti xymöyich huidibi tzinaayb ma huingbi cajp. Yi' ajcxy ymeef nyajtuunich co nyaj'ixpijcyich müich ajcxy. ⁹ Co n'ijtyich müd müich ajcxy jadöjijmijt jadöhuix'am ca' nbijctzooyich ma müich ajcxy huidibi nyajmayajtpyich anajty. Ca' n'adzijpyich ni pin. Yi migütiyc huidibi ajcxy tsoon Macedonia, yi' ajcxy xymooyich huidibi anajty nyajmayajtpyich, paady ycixp ca' anajty meef nbijctzooyich ma müich ajcxy, ca' n'adzijpyich müich ajcxy. E jadu'n njactuna'nich jadu'n nej nduunich müd müich ajcxy co n'ijtyich jim jadöjijmijt. ¹⁰ Nejhuuübyich co yjanchity co nmüdidyich Cristo ytij'ajt, nañ tim jadu'n nnejhuüyich co ci'm nbaadyich huidibi müdnay'ixyijich. E ca' pin ma tüg'öciy je Acaya naaxjot xycapijicibich jada jotcuje'ajtin. ¹¹ ¿Na'amy co jadu'n nmüdnay'ixyijich? ¿Je' co ich müich ajcxy ca' ndzojccixy? Ca' yjadu'nity. Dios ñejhuüyb co ndzocy njihuüyich müich ajcxy.

¹² Per njacyajtüyöyaamybich je ndungich huidibi ndumyich, e ca' meef nbijctzohua'nich müd ich ndung ycixpi jigix co yi jacjadyii huindzindijc huidibi yaj'ixpijccixp ma müich ajcxy, ca' jebi y'indaaccixy co yi' ajcxy tü'ciy ytungixy jadu'n nej ich nduunich. ¹³ Yi' ajcxy yminaangixy co Cristo ti yajnbijcigixy co ajcxy yi' y'apöstol'adyii, e ca' yjanchity, nigoob ajcxy huin'ingixy yi mibijcpijic. Nayyajnájixigixy ci'm nej jihuüy Cristo y'apöstol'ájtigixy, e ca' yjanchity. ¹⁴ Nañ ni ca' oy nhuinmaayich co jadu'n iditczixy, co nañ jadu'n je Satanás ñayyajtigachyii ñayyajnaxyii nej Dios y'angel huidibi tij'ajt müd, e ca' yjanchity. ¹⁵ Paady ycixp nmibijcpijich co yi jay ajcxy huidibi tumb müd je mujcu' nañ jadu'n nayyajnaxyii jadu'n nej jay tudägypi, e ca' yjanchity. Per Dios chaachytunamyb ajcxy jadu'n nej ypadyii müd je jibicpi ycixpi huidibi ajcxy ytumyib.

Je tzaachypi je ayo'n huidibi Pablo yjajtpy co y'ayuccapxhuácxy

¹⁶ Jadü'oc ich müich ajcxy nnimaangixy: Ni pin ycamina'nipy co ich locijity. Per pen nijéjity jadu'n yminaangixy, ca' ñejity. Müich ajcxy amidoo'ijtcix ich n'ayuc, jigix jebi naygömayijich ci'm. ¹⁷ Ca' ich ajt nHuindzin Jesucristo xycötuymöyich, co jadu'n jebi ngapxyich jadu'n nej cham ngapxa'nich. Hue' ngapxa'nich jadu'n nej tüg loci jay co naygömayaj'ñyijich ci'm. ¹⁸ Mayjáy ajcxy ooy ci'm chachnaygömayáanigixyp müd huidibi ti tungixy müd yci'm mic'ajt ya naaxhuiñ. Nañ jadu'n ich nnaygömayaj'ñyijich ci'm. ¹⁹ Müich ajcxy mdzachcöbijccixyp loci jay ajcxy y'ayuc, je' co mdzachnayyajnaxáanigixy jadu'n nej jihuüy ajcxy ooy mdzachcohuinma'nity. ²⁰ Mgöbijcyp müich ajcxy co jay ajcxy xytumbi'adiyb nej tim tzojccixy, huidibi ajcxy xyhuinjicxp xyhuimbijcp xyhuimmeetzp, e huidibi ajcxy xy'ane'ngixp, xycami'ijxcixy xycami'jpidaaccixy, ixti mgöbijccixyp co xycöjccixy ma ajcxy mhuiüyijip. ²¹ Oy njatzo'ydu'njihuüyich co nmüdnay'ixyijich co ca' jadu'n nmüdidyich je jotmic'ajtin, jigix jebi ich müich ajcxy nduunich jibic, jadu'n nej yi jadu'mbi huindzindijc ti xytungixy.

Per jadu'n nej yi' ajcxy ñaygapxpadyii ci'm, nañ jadu'n naygapxpada'ñyijich ci'm. Ca' ñejity pen cappxich jadu'n nej tüg loci jay. ²² Pen hebreojáy yi' ajcxy, hebreojáy ich nañ jadu'n. ¿Conaax cogajp ajcxy Israel? Ich nañ jadu'n. ¿Abraham ajcxy ymij'ap'ajtpy ymijteedy'ajtpy? Ich nañ jadu'n. ²³ ¿Nej tumb ajcxy müd Cristo? Nigi nduñyich müd Cristo, ca'ydi yi' ajcxy. Ca' ñejity oy ngapxyich jadu'n nej tüg loci jay. Jac mic ti nduunich müd Cristo ca'ydi yi' ajcxy. Canaag'oc codungdijc xychaachytuunich. Ti nyajc'atyich müd matz etz müd coohac janch canaag ci' janch ycamacho'nity. Co jadu'n codungdijc xypidaacyich pujxtigoty, e yi' ajcxy ca'. Canaag'oc o'cin jijp'am ti nyajpaadyich, e yi' ajcxy ca'. ²⁴ Migoox'oc judiojáy ajcxy ytungmüdpí xyci'ajtyich müd coohac iipx majmocx midaaax ci'. ²⁵ Tugüig'oc xychaachytuunich müd matz. Tügtecy ajcxy xychaagächich. Tugüig'oc je barco yquüñ mejy'agujc je huidibi ich anajty nyajnicxiiyb. Co je barco yquüñ tügtecy, chi tüg tzuum etz tüg xi' n'ijtyich ma je mejy anajty ooy ypidigy. ²⁶ Ooy viaje nduunich canaag'oc, e o'c'ijp'am n'ijtyich ma mijnigom yjadyii, e nañ jadu'n ooy anajty may meetzpi yajpaady ma anajty nhuidityich. Nmigogajpich, yi judiojáy, xyjayaj'ögaanich ajcxy. Ti ayo'n nbaadyich ciudadjoty etz ma yuugjot etz mejyjoty. E nañ ti ayo'n nbaadyich müd jay ajcxy huidibi naybidaacip ajcxy nej ich ajt nmigüg, e ca' anajty yjanchity. ²⁷ Minaajity ooy mic njihuüyich ndung n'ayo'nich. Canaag'oc ti ndzumnaxyich ca' nmäyich. Canaag'oc nxinaxyich müd yuu tidzibi. Janam jatzojc n'ayu'atyich. Minaajity ooy njihuüyich je tiichypi, etz nyajmayjatyich nhuit nducxyich.

²⁸ Miið jada ycixpi etz miið jac-huidijaty, nañ jadu'n jabom jabom ooy mic njihuüiyich jadu'n nej yajpaady je mibijcpidijc nidüg'óciy canaag picy xi ya. ²⁹ Pen nijëjity mibijcpidijc yajpaady amutz ma ajcxy ymibijcin, nañ jadu'n iich nayjihuüiyijich amutz. Pen nijëjity mibijcpidijc ypocytungixy, iich ndzo'ydu'n njihuüiyibich etz jibic nayjihuüiyijich miið yi' ajcxy ypocy ycixpi. ³⁰ Pen naygömayaanibich ci'm, naygömayaanibich co amutz njihuüiyijich. ³¹ Je Dios iich ajt nHuindzin Jesucristo yTeedy, je huidibi huaad n'ojadajtim n'ibaatim ngapxpaatim huinixii huinitiempo, yi' ñejhuüiyb co tiy'ajt jadu'n nej ngapxyich. ³² Jecy'ajty co n'ijtyich jim Damasco, je gobernador huidibi anajty tumb miið je rey huidibi yxi Aretas, ypidac soldados ajcxy ma jadyii mijtu' ycajptigiy, jigix jëbi xyajnicxyich mach. ³³ Per je mibijcpidijc ajcxy xycodiyñajxich naaxcixy mjcachjoty ma tüg ventana aguü ma je mijpoch huidibi je cajp miið yjübojtz'ahuuidityty. E jadu'n ndzoocyich ma je gobernador yci'am.

12

Huidibi Pablo yhuin'ijx etz nejhuüiy

¹ Ni ti ycayajpaady ycayajganar'aty co ci'm ndzachnaygömaayim ndzachnayñigapxim ndzachnayñimiyaacim. Per ca' y'ocnejity nimiydägaamybich ti nhuin'ijxypich cumäyoty, je huidibi je Huindzin Jesucristo xyajhuin'ijxpich xyajni'ixiiybich. ² N'ixy'ajtypich tüg yëdyjc huidibi mibijcp Cristo. Cham majmactz jimijt ma Dios yajpättigiyii tzejpjoty ma je midugügi tzejp. E ca' nejhuüiyich pen hue' yajpättigiyi miið ñinix co pen ca'. Dios tügpajc nejhuüiyb. ³⁻⁴ Jadüg'oc nmına'ñich co Dios ti yajpättigiy je yëdyjc ma je oybi it. E ca' nnejhuüiyich pen janch ti ypättigiy miið ñinix co pen ca'. Dios tügpajc nejhuüiyb. E jiiby ma je oybi it midoy capxy ayuc huidibi ca' huaad ni pin jäy capxy mydägy nimina. ⁵ Ooy iich amij agix nayjihuüihua'ñiyijich miið je jadu'mbi yëdyjc jadu'n nej jëjin huidibi Dios yajpättigiy tzejpjoty. Per ca' iich ci'm nayñimiydäga'ñiyijich naygömaya'ñiyijich. Hue' janchtiy nayñimiydägaanibich ci'm nej nduñ n'ayooyich ma iich ndzinaayin. ⁶ Oy ixypiy iich ci'm njanayñimiydäga'ñiyijich janch oy nej nduñ n'ayooyich, ca'p je' anajty ngapxtigooyich, com je' anajty ngapxpich je janchyp. Per ca' jadu'n naygömaya'ñiyijich, com ca' ndzocyich co jäy ajcxy nixy xycömaayich nigi anaxy. Huaad jadu'n co ajcxy miið mydacy je migügtijc huidibi ajcxy ijxcixp huidibi ndumyibich o huidibi ayuc ajcxy ymidoogixp huidibi ngapxpich.

⁷ Je capxy ayuc huidibi Dios xyajnejhuüiyich jiiby tzejpjoty, ooy anajty chach y'oyity. Paady ycixpi Dios pidacy jadu'n nej jihuüiy tüg apy ma iich nninix, jigix ca'ydí amij agix nayjihuüiyijich. E je apy jadu'n nipaady nej mujcu' xyajtzaachiyich. ⁸ Tugüg'oc Dios ti nmibijctzooyich co huen xyajpidzimich je huidibi xyajtzaachiyibich. ⁹ Per je Huindzin Jesús xyñimaayich: "Jëbi jadu'n co may'ajt ndunipich miið miich ycixpi. Co pinjaty pumäy ñayjihuüiyii, huin'it nigi ñiguëxigiy iich nmic'ajt." Paady ycixpi njotcugiyich co pumäy nayjihuüiyijich, jigix ñiguëxigipy Cristo ymic'ajt ma iich ndzinaayin. ¹⁰ Paady ycixpi ooy njotcugidyich co pumäy nayjihuüiyijich, co jäy xyñigapxy xyñi'ojiyich, co ti nyajmayjatyich, co jäy xy'ixhuidityich xypahuidityich, co tzaachyp nyajnaxyich miið Cristo ycixpi. Co nayjihuüiyijich pumäy, chi nigi mic nayjihuüiyijich miið Cristo ymic'ajt ycixpi.

Pablo ca' yjotcujc'aty nej je mibijcpidijc ajcxy jim Corinto ytungixy

¹¹ Co iich jadu'n ci'm naygapxpadyijich, tim jadu'n nipaady nej jihuüiy iich tüg loci jäy. Adzip miich ajcxy jadu'n xytuuñich co copicy naygapxpadyijich ci'm. Hue' yjapaadyii miich ixypiy ajcxy xycömaayibich xycapxpatpich. Iich ca'p iich ti ndzoohuity. Oy ixypiy iich ca' ti mic'ajt nmiiðidyich, per jatyitmy nigi mic'ajt nmiiðidyich, ca'ydí yi huindzindic huidibi ma miich ajcxy, huidibi ajcxy naydjip apóstol, e ca' yjanchity. ¹² Ma je tung huidibi nduuñich miið mechtujcin ma miich ajcxy, ti ooy ñiguëxigiy miið canaag ijxpejt, mijhuinma'ñ etz milagros, co iich janch Cristo xy'apóstol'adyijich. ¹³ Ca' jadu'n ytiy'ajty co mminangixy co nigi oy ti nduuñich ma yi jacjadyii mibijcpidijc ma jacjadyii cajp, ca'ydí jadu'n nej ti nduuñich ma miich ajcxy. Pen ti ndundigooyich co ca' ti nbijctzooyich meen miið iich ndung ycixpi ma miich ajcxy, jadu'n nej jacjadyii ajcxy ytungixy, pues tungix may'ajt meexcich ajcxy.

¹⁴ Jadachambi ni'ixi' n'ityich co nnicxa'ñich midugüg'ocpi jim ma miich ajcxy. Ca' ti pubejtin nbijctzohua'ñich ma miich ajcxy miið ndungich ycixpi. Ca' ndzocyich miich ajcxy mmeen. Hue' ndzocyich co miich ajcxy xymijnicxpedipyich. Jac'oy co iich miich ajcxy nbubedipy, ca'ydí co miich ajcxy xypubedipyich. Jadu'n iich nipaady miið miich ajcxy nej tüg undeedy. Je undeedy ypubejtpy y'ung, e ca' nan je ung pubejtpy yteedy. ¹⁵ Iich jotcujc nyajtundähuibich ma miich ajcxy tüg'óciy tijaty nmiiðich, ixti ngi'nmic'ajtych tüg'óciy nyajtunaamybich miið miich ajcxy ycixpi, jigix jëbi nbubedipyich miich ajcxy. Oy janiguëxigiy co iich miich ajcxy njadzojccixy najjihuüiyigixy, e miich ajcxy ca' xychóccixyich xyjihuüiyigixyich.

¹⁶ Nijjety miich ajcxy mminaangixy co janch tiy'ajt co ca' ti pubejtin ti nbijctzooyich ma miich ajcxy, nijjety yminaangixy co janch nihuinma'ñ ti nyajcäxixich ma tũg trampi müd anü. ¹⁷ ¿Nej ti üch miich ajcxy nhuin'ingix müd je migügtjc huidibi ajcxy nya-niguejx? ¹⁸ Nbijctzoohuich may'ajt ma Tito co huen nicxy xycogapxiygixy jadüg'oc. E nyaipuguexiyich jadüg ajt nmigüg huidibi müd ñicxy quipxyi. ¿Nej ti miich ajcxy Tito xyhuin'ingixy? ¿Nej ca' yjanchity co üch etz Tito quipxyjaty üch ajcxy nhuinma'ñ nmüidity, e tú'ciy ndüngixyich?

¹⁹ Ca' yjetyity co miich ajcxy mhuinma'ñybidáaccixy co üch ajcxy ndzachenayñigapxtüutigixy ma miich ajcxy. Ca' yjadu'nity. Ngápxcixpich nmiydáaccixpich ma Dios yhuinduu je ayuc tiy'ajt huidibi Cristo xymóoygixich. E tũg'óciy huidibi ndüngixpich, hue' ndüngixich jigix yeegip miich ajcxy mmibijcin. ²⁰ Com tzigüybich co anajty nicxy n'ixcixyich miich ajcxy, ca' jetyity co nbadaamybich je tiy'ajt co miich ajcxy ca' mhuinma'ñmüidity jadu'n nej jébi njäygidägyich yi mhuinma'ñ ajcxy. E miich ajcxy nañ jadu'n ca' mjäygidáaccixy nej üch nhuinma'ñ müdiditych. Tzigüybich co miich jada' ajcxy mnaychiptünigixy, ca' mnay'ixáanigixy nidüg nidüg, mnaymijotmá'tigixy; mnayñi'ojüygixy, e mbiitzcapxcixy; co ooy amij agix mnayjihuüygixy, e ca' mnay'ayuc-huinjihuüygixy, ca' oy m'ijtcixy. ²¹ Tzigüybich co jadüg'oc nicxy n'ixyich miich ajcxy, chi ajt nDios xyajjihuüibich tzo'ydu'n müd miich ajcxy ycixpi, etz njihuüibich tajin mayin müd miich ajcxy mbocy ycixpi, e com ca'ni mjothuimbijtcixy mjäyigooygixy je mjibic-huinma'ñ jadu'n nej mmigapxtigooygixy e mmidundigooygixy huingbi tóxyjädj, etz jadu'n nej mmidundigooygixy migüg ytóxyj, etz jadu'n nej jibic-huinma'ñ miich ajcxy mmüidity.

13

Ane'min capxhuijin etz capxpooxcin huidibi cijxnip je necy

¹ Jada je' ymidugüg'oc co üch miich ajcxy nicxy ngo'ixiühaangixyp. Pen miich ajcxy mxiühaangixyp tũg migüg ma üch co ti ytundigooy müd Dios ytiy'ajt, hue' tzocy müd metz o tugüig testigos. ² Co je mimejtz'ocpi üch miich ajcxy oy ngo'ixiy, chi nnimaayich yi' ajcxy huidibi ti ytundigooygixy anajty, e nañ jadu'n nnimaayich je huidibi japcocytungixp co üch anajty jadüg'oc nicxy miich ajcxy n'ixcixy, ca' nyajtuna'ñich mecxtujcin ma yi huidibi ajcxy pocytungixp. E cham co nyajpaadyich jigügy ma miich ajcxy, nnigapxpejtpyich ma jada necy co jadüg'oc nicxy n'ixa'ñich miich ajcxy, ca' nmimecxtuga'ñich yi' ajcxy huidibi pocytungixp. ³ E jadu'n miich ajcxy mmüid'adipy tiy'ajt co ngapxnajxich Cristo y'ayuc. E Cristo ca' je' yjadu'nity nej tũg jäy huidibi ca' mic'ajt müdity. Hue' je' yajnigüexigyp ymic'ajt ma miich ajcxy. ⁴ Janch tiy'ajt co jadu'n ajcxy yajcruudzpejty Jesucristo nej jihuüy ca' anajty mic'ajt müdity. Per jadachambi Jesucristo jugy'ajtp müd Dios ymic'ajt. Nañ tim jadu'n co n'ijtim müd Jesús, jadu'n yquëxigyp nej jihuüy ca' mic'ajt nmüid'ajtim. Per co n'ida'ñich müd miich ajcxy, nmüid'adaanibich Dios ymic'ajt müd co nyajpaadyich ma Cristo.

⁵ Ci'm naydiy'ajtpijcigix nidüg nidüg, pen janch tydudägy mmibijccixy Cristo. Ci'm huinmaaygix ma ajcxy mgi'mdzinaayin, pen janch mmibijccixy. ¿Nej ca' mdimjihu'nybijccixy, pen müd ajcxy Cristo ma mjot mhuinma'ñ? Pen ca' yjadu'nity hue' anajty Cristo mmibijccixy nigixy cohuajc. ⁶ Per nijjp'ixypich co miich ajcxy mnejhuühuipy co yjanchity co Cristo ti xyajnibicyich yi' ytung, e ca' n'ündägyich. ⁷ Dios nmibijctzooybich müd miich ajcxy ycixpi, jigix ca' ti jibic-huinma'ñ ndüngixy. Canan co üch ajcxy ndzachcömaybidzimmaangixyich, o co üch ajcxy nigi nmüidity Dios ytiy'ajt ca'ydi jac ni pinjaty. Jadu'n ndüngixyich, jigix miich ajcxy mdunipy oybi. Ca' ñejty oy jadu'n yquëxigyp nej jihuüy üch ajcxy ca' oy mij n'ixpicycigich. ⁸ Com ca' huaad ni ti nej ndunim huidibi ca' yjanchity huidibi ca' ytiy'ajty. Hue' tzocy co tũg'óciy huidibi ndunim, naybadiib müd Dios ytiy'ajt. ⁹ Paady jotcujc üch ajcxy co nyajpáatcixyich nej jihuüy ca' üch ajcxy mic'ajt nmüidity, jigix miich ajcxy mic'ajt nmüid'adipy ma mmibijcin. Nmbijctzoohuaamybich ajcxy Dios müd miich ajcxy ycixpi, jigix ajcxy mmibijcin m'ijtcixy ca'pxy. ¹⁰ Jada necy üch jayijp nguexamyb ma miich ajcxy, ma yam ca'ni nicxy n'ixcixyich miich ajcxy jadüg'oc, jigix ca'ydi adzip ahua'n anajty nyajtuuñ üch n'ane'min ma miich ajcxy. Üch ajt nHuindzin Jesucristo ti xymöyich mic'ajt, jigix jébi üch miich ajcxy nyajyeegipy ma mmibijcin. Ca' nyajtigoyaanich miich ajcxy yi mmibijcin.

¹¹ Migügtjc ajcxy, capxcixpich müd miich ajcxy, huen Dios xypubéjtcixyipy xypudigüygixyipy. Mjottigooygix cuydunaangix tũg'óciy Dios ytiy'ajt ma mdzinaayin. Jotcujc'ajtcix. Chinaaygix müd tú'ciy mjot mhuinma'ñ. Naymüid'ijtigixy agujc jotcujc. Huen ajcxy Dios xymüid'ijtcixy. Je Dios huidibi jotcujc'ajtin yejcp, e nañ jadu'n Dios

xychojctáaygixipy xyjihuiydaaygixipy. ¹² Naygapxpóocxigix xíc xon. ¹³ Tüg'óciy Dios yjäy huidibi ya, yquejxyp ajcxy capxpóocxin ma miich ajcxy.

¹⁴ Huen ajt nHuindzin Jesucristo may'ajt oy'ajt tunipy m#d miich ajcxy ycixpi. Huen Dios xychojccixy xyjihuiiygixy. Huen Dios yjihui'ñ ymic'ajt ity ma nidüg'óciy miich ajcxy mjet mhuinma'ñ. Jadu'n ngapxycíxyich. Amén.

GÁLATAS

Yi Necy Huidibi Pablo Yajniejx Je Mibijcpijic Jim Gálatas

¹ Hich Pablo, Jesucristo xyquejich co ngapxhuáxcibich yi' y'ayuc. Ca' nminaanim jáy ajcxy xyajinibijich jada tung. Jesucristo etz Dios Teedy ajcxy ti xyajinibijich jada tung. Je' je' je' Dios huidibi yajjugypijc Jesucristo co y'o'cy. ² Hich etz tüg'óciy migügtijc ajcxy huidibi ya yajpatp ma iich nyajniejxpih jada necy ma nidüg'óciy pinjaty mijpidacp Jesucristo, huidijaty naymujcip ma nidüg nidüg cajp jim Gálatas naaxjot. ³ Nmibijctzooybich Dios Teedy etz iich ajt nHuindzin Jesucristo co huen oy'ajt etz may'ajt tuñ ma miich ajcxy etz nañ jadu'n xyajjotcugihuip ajcxy. ⁴ Hich ajt nHuindzin Jesucristo ti nayyoxyii ti naydogyii ci'm anajty ma yi o'cin müd iich ajt nbocy ycixpi. E jadu'n ti xyñihuaanim ma je jáy ajcxy huidibi jibic huinma'ñ ymüd huidibi tzinaayb ajcxy ma jadachambi xii tiempo. Jadu'n Jesucristo tuñ müd iich ajt ycixpi, com iich ajt nDios Teedy jadu'n tzojcp. ⁵ jOoy y'oyity co Dios Teedy huen mij etz cómay y'idipy huinixii huinitiendo! Jadu'n jada. Amén.

Ca'p ji huingbi tiy'ajt huidibi jáy y'alma yajnidzocp

⁶ Ooy ndzachhuinmaayich jadu'n nej tim tzojcy ti mijjpyöyducixy je Huindzin Dios ytiy'ajt. Dios xyhuin'ijxcixy jigix jëbi mmibijccixy je oy'ajt je may'ajt huidibi Jesucristo ytuun müd miich ajcxy ycixpi. E miich ajcxy ti mhuinma'ñ myajtigajtcixy, e ti mmibijccixy huingbi jáy ajcxy y'ayuc, jadu'n nej ca' jëbi m'alma nidzocin padaangixy. ⁷ Ca' nminaanim co ji jadügnax Dios ytiy'ajt. Hue' je'nijëjity jáy ajcxy ti xyajhuinma'ñyidigooygixy, ooy ajcxy yajtigadzaangixy je Dios y'ayuc ytiy'ajt nej Jesucristo xyajnidzogaani ajcxy m'alma. ⁸ Co ixipy iich, o co ixipy nidüg iich ndiscípulo, o co ixipy tüg ángel huidibi tzajpjoty tzomb capxhuáxc ixipy ma miich ajcxy ayuc tiy'ajt tigachjaty huidibi ca' ñaybadyii müd je tiy'ajt huidibi nyaj'ixpijc ajcxy oga'n'aty, ca' mgöbjiicixipy yijadu'mbi ayuc huidibi ajcxy xyajnidigoyaangixy xyajtüdigoyaangixy, Dios tzaachytunib yi' ajcxy y'alma. ⁹ Ti jayijp nyajnimay, e cham jadüg'oc nūgapxpetich, pen ji pinjaty capxhuáxcy ma miich ajcxy tiy'ajt tigachjaty, huidibi ca' ñaybadyii müd je tiy'ajt je tiibi miich ajcxy m'ixpijccixy, copicy Dios chaachytunipy jada jáy müd ypocy ycixpi huidibi xychachyajnidigooygixp xychachyajtüdigooygixp.

¹⁰ Co jadu'n nmīnā'ñich, ¿nej mdijy co ndzocyich co jáy ajcxy xyjäygidägipy o co Dios xyjäygidägipy? ¿Nej ndzachyajjot'adaanich jáy ajcxy? Ca' huaad nduunich huidibi jáy ajcxy chojcp, yi' lanchtiy ndumybich huidibi Dios chojcp. Co ixipy nduunich huidibi jáy ajcxy yjäygidacpy, ca' ixipy nguyduunich Cristo ytiy'ajt.

Nej Pablo oy paady je apóstol'at

¹¹ Paady ndzocyich migügtijc co mnejhuñhuip ajcxy jada co je Dios y'ayuc ytiy'ajt huidibi ngapxyhuáxcpih anajty ma miich ajcxy jadu'n nej jëbi ajcxy m'alma ñidzögipy, ca' yi' ayuc'adyii tiy'ajt'adyii huidibi jáy ci'm ti cojicy ti maacxcixy. ¹² Com je Dios y'ayuc ytiy'ajt huidibi nmüdich, ca' ti nbaadyich ma jáy ajcxy, nañ ca' nminaanim jáy ajcxy ti xyaj'ixpicich. Jesucristo ci'm ti xyajhuinjiñhuñyich jada tiy'ajt.

¹³ Com miich ajcxy mnejhuñyigixp jadu'n nej jecy'ajty iich ti ndzinäyich, co iich anajty nmijpidägyich yi judiojāy ajcxy ycostumbre. E mnejhuñyigixp jadu'n nej jecy'ajty n'ixhuidijtyich nbahuidijtyich mictägy je jáy ajcxy nidüg'óciy huidijaty anajty mijpidaaccixp Dios ytiy'ajt. ¹⁴ Nigi iich anajty n'ixpiyidyich ma yi judiojāy ajcxy y'ixpijcin ca'ydi jac pinjaty judiojāy, ca'ydi jac pinjaty nmigügtijcich huidibi tūgnax yjimijt müd iich. Com ooy anajty nigi ndzachmijpidägyich n'ap ndeedyich y'ayuc. ¹⁵ E Dios xyhuin'ijxich jayijpni ca'ni anajty ma'xung'atynich co ndünibich yi' ytung. Müd co Dios ooy ti xychocyich ti xyjiñhuñyich, paady xyhuooyich müd ytung ycixpi. ¹⁶ Dios xyajnejhuñyich yi y'ung y'ayuc ytiy'ajt, jigix ngapxhuáxcibich yi' y'ayuc ma yi jáy ajcxy ca'pi yjudiojāyity ajcxy. Ca' pinjaty n'ixtaayich huidibi jëbi xyaj'ixpicich Dios ytiy'ajt, hue' Dios ci'm xyaj'ixpijcyich yi' ytiy'ajt. ¹⁷ Nañ jadu'n ni ca' nbättigiyich jim Jerusalén ma yajpaady y'apóstoles ajcxy huidibi anajty ajcxy Dios ti yhuin'ixyii. Chi tiyi nnicxyich jim Arabia ñaaxjot. Co iich jim hueeni n'ijtyich, chi nhuimbijtyich jim Damasco.

¹⁸ Cooni tugig jimijt nhuáxcijpyich huin'itni nbättigiyich jim Jerusalén. Chi n'oyich ma Pedro anajty yajpaady, e chi jim nmüd'ijtyich jëyi majmocx xii. ¹⁹ E ca' nminaybaattich yi jacjadyii apóstoles. Jëyi iich müd naybaati je Jacobo, je Huindzin Jesús y'uch. ²⁰ Je huidibi cham iich miich ajcxy niyajjayyigixyp, tiy'ajt yi'. Y'ijxyp ñejhuñyib Dios co ca' n'indägyich.

²¹ Co ndzooñich Jerusalén, chi nnicxyich Siria naaxjot etz jim Cilicia naaxjot. ²² Je huin'it tiempo yi Cristo yjäy ajcxy huidibi nayyöymujcip cajp cajp jim Judea naaxjot, ca' ajcxy anajty

xy'ix'adyiijich huingáxy jipjicáxy. ²³ Jëyi ajcxy nejhuíy anajty co jáy chachmínaangixy: “Yi jáy huidibi anajty xychach'ixhuiditím xychachpahuiditím, cham yi' tzachcapxhuáxxy je Cristo ytiy'ajt, je tiy'ajt huidibi anajty ytimyayjácódigoyamyb.” ²⁴ Co je mibijcpidijc oy jadu'n tiy'ajt nejhuíygixy, chi ajcxy yajnajxy Dioscojuyip ma Dios miid ich ycixpi.

2

Jacjadyii Jesús y'apóstoles ajcxy cöbijccixy yi Pablo

¹ Co majmactz jímijt, chi jadüg'oc nnicxyich jim Jerusalén quipxyi miid Bernabé. Nañ jadu'n Tito xypanicxyich. ² Dios jadu'n ti xyajnejhuíyich co copicy nícxibich jadüg'oc jim Jerusalén. Chi jim nyajmiidmiydacyich nijéjity jáy huidibi Jesús ti yhuin'ixyii ajcxy, je huidibi ajcxy nigohuajc'ajtp anajty je mibijcpidijc. (Ahuingujc ich ajcxy nxiicmujc ngapxmujc, ca'ydí ymayjáy'agujcity.) Nyajmiidmiydactaayich je Dios y'ayuc ytiy'ajt huidibi ngapxhuácxypich ma yi jáy ajcxy ca'p yjudíoáyity. Jadu'n ngapxticxyich n'ayucich ndiy'ajtich, jigix ca'ydí ajcxy xycapx'aducyich, e ti anajty jadu'ñyi ñaadigí'aty ich ndung huidibi jayijp ti nduúñich etz huidibi njactunaamybich anajty. ³ Je jáy ajcxy huidibi nigohuajc'ajtp anajty je mibijcpidijc jim Jerusalén yjáygidac ajcxy ich n'ayuc jadu'n nej ngapxticxyich, e nañ ni ca' ajcxy ymíñañ adzip co copicy yajtiy'ajttíhuipy je Tito huidibi xypa'oyich jim, com griegojáy je' anajty, paady ca' yajtiy'ajttíy anajty. ⁴ Ca' ixypy pin huaam ycamíñañ jim Jerusalén co Tito ca' yajtiy'ajttíy, co ca' nijéjity mibijcpidijc ycatigíy ayích ameech huidibi ca' ymibijccixy cixyot huinijot Cristo ytiy'ajt. Hue' ajcxy amido'ijtcixy n'ayucich nej huaad xyjijpcogapxíygixyich. Ca' ajcxy yjotcujcity co ngapxhuácxxyich co nmibijcjm Jesucristo, e ca' copicy nguydunim judíoáy ycostumbre. Yi' ajcxy adzip xyajñihuidzambich yi judíoáy ycostumbre, jadu'n nej jáy codoogíy ajcxy adzip ytuungixy ma yhuindzin ytung. ⁵ Ni catúgíaxigíy ajcxy xycamímadacyich, e ni yycaya'amoñ ich ajcxy, com hue' ndzocyich co huen Dios y'ayuc ytiy'ajt oybi ity huádz ma miich ajcxy ca' ma aníi.

⁶ Yi apóstoles ajcxy huidibi Jesús ti yhuin'ixixigixy huidibi ajcxy nigohuajc'ajtp yi mibijcpidijc, ca' ajcxy ni ti tiy'ajt xyajcmöyich jembyi huidibi ca' jayijp nnejhuíyich. (Peni capxpaady ajcxy o peni ca' ycapxpaadyty, ca' nduúñich cuendi. Com Dios ca' huin'ixpety jáy ajcxy tiyduñ.) ⁷ Co oy ajcxy nejhuíy co Dios ti xyquexyich ngapxhuácxxyich yi' y'ayuc ytiy'ajt ma yi jáy ajcxy huidijaty ca' yjudíoáyity, tím jadu'n nej ti quexy Pedro co capxhuácxí yi' y'ayuc ma yi judíoáy ajcxy, ca' ich yi' ajcxy anajty n'ayucich xyjijpcogapxíyich, ooy ajcxy jáygidacy yi n'ayucich ndiy'ajtich. ⁸ Yi Dios huidibi Pedro quejx huen yi' y'ayuc capxhuácxxy ma yi judíoáy ajcxy, nañ jadu'n ich xyquejxich co yi' y'ayuc ngapxhuácxxyich ma yi jáy ajcxy ca'p yjudíoáyity.

⁹ Je Jacobo, je Pedro etz Juan ajcxy, je huidi nigohuajc'ajtcixp yi mibijcpidijc, co ajcxy nejhuíy jadu'n nej anajty Dios may'ajt oy'ajt ti tuuñ miid ich, chi ajcxy xycöbijcxyich agujc jotcujc Bernabé etz ich. E chi ich ajcxy miid nay'ayuc-huin'ijhuíyí co jëbi ich etz Bernabé nícxibich ma yi ca'p yjudíoáyity ajcxy, etz jëbi yi Jacobo, Pedro etz Juan ajcxy ñíxcixy ma yi judíoáy ajcxy. ¹⁰ Jëyi ajcxy may'ajt pijctzoy ma ich etz Bernabé co jadu'n pa'ayo'n ndunipxyich ma yi judíoáy ayoobitijc. E chi ich ngo'adzoy co ndunamybich jadu'n agujc jotcujc.

Pablo ojy yi Pedro jim Antioquía

¹¹ E jadu'n anajty miid ti n'ocnay'ayuc-huin'ijhuíyibich ixti coon Pedro ycidacy jim Antioquía. Chi jim nnimaayich huin'ijp co ti anajty jim Dios ytiy'ajt midundigooyi co puhuáctuutni je huidibi ca' yjudíoáyity, ca' y'ocmiidcaymujcni. ¹² Com co ca'ni anajty ymiñ jim Antioquía je judíoáy ajcxy huidibi anajty tzomb ma Jacobo jim Jerusalén, chi Pedro miidcaymujcni je jáy ajcxy ca'p judíoáyity. Co ajcxy ymiñ chooñ Jerusalén, chi Pedro oy puhuáctuutni je huidibi ca'p yjudíoáyity, ca' y'ocmiidcaymugaani anajty. Com Pedro tzigíyib anajty co ñi'ojíhuíyib je judíoáy huidibi minamb co ooy ycopicyity yajtiy'ajttíhuipy tüg'óciy jáy ajcxy huidibi mibijccixp Jesucristo. ¹³ Co Pedro jadu'n oy y'idíich, chi je jacjadyii judíoáy ajcxy huidi anajty jímip nañ tím jadu'n oy y'idíitczixy. Oy ajcxy janehuíy tiy'ajt, e huádz cuydungixy. Ixti Bernabé nañ jadu'n y'idíich nej Pedro, com ca' anajty yjotmnicity. ¹⁴ E co ich jadu'n oy n'ixyich co ca' ajcxy cuydungixy yajxon Jesucristo ytiy'ajt, chi ich nnimaayich Pedro mayjáy'agujc: “Peni miich judíoáy, e ti m'ixmajtzní judíoáy ycostumbre co ti mibicy Jesucristo, e ti m'occuydumyib je huinma'ñ huidibi judíoáy ca' cuydungixy, ¿nej tíjy cham co adzip mdzachmínaandägy co yi' ajcxy huidibi ca'p yjudíoáyity, copicy cuydungixipy judíoáy ycostumbre, huidijaty miich ti m'ixmajtzní?”

Yi judíoáy ajcxy quipxyjaty miid jacpinjaty

¹⁵ Jadu'n njacnimaayich Pedro: “Fich etz miich judíoáy ich ajt, huidibi ndaj'ajtm ndeedy'ajtm nañ judíoáy. E ca' ich ajt njadu'nity nej jáy ajcxy ca'pi yjudíoáyity, huidibi

ca' cuydungixy Dios ycötujcin je jecyp huidibi Moisés yjayhui'm. ¹⁶ Miich Pedro iich ajt nnejhuiym co jäy ajcxy ca' jëbi Dios yajpocyñihuächyii müid tim jëyi co ajcxy cuydungixy Dios ycötujcin je jecyp huidibi Moisés yjayhui'm. Co yi jäy ajcxy mibijccixy Jesucristo, huin'it janchtiy Dios yajpocyñihuätziyb ajcxy. Nañ tim jadu'n iich ajt, ti nmibijcim je Cristo jigix jëbi Dios xyaajpocyñihuaatzim. E ca' jëbi huaad Dios xyaajpocyñihuaatzim ajt müd tim jëyi co ti nguyduunim Dios ycötujcin je jecyp. Ca' ni tüg jäy huidijaty jëbi Dios yajpocyñihuächyii, müd tim jëyi co cuyduuni Dios ycötujcin je jecyp."

¹⁷ Co ajt nhuinma'ñ nbidaacim co nmibijcim Cristo jigix Dios jëbi xyaajpocyñihuaatzim, huin'it je judioäy yminaangixy co jibic-huinma'ñ nyaajtuunim co ca' njaccuyduunim yi' ajcxy ycostumbre. ¿Nej mdiy je Cristo xyaajtundigooyim jadu'n nej judioäy yminaangixy? Ca' yjadu'nity. Ca' jëbi huaad je Cristo xyaajtundigooyim. ¹⁸ Co ixypy nmijpidaacim jadüg'oc Dios ycötujcin je jecyp, je huidibi ti n'ixmajtzim, jada ixypy ijxpejt'ajtp co ndundigooyim ma Cristo ytiy'ajt. ¹⁹ Jecy'ajty co nguyduunich anajty Dios ycötujcin je jecyp, huin'it ca' anajty nbaadyich tiy'ajt nej jëbi huaad Dios xyaajpocyñihuaachich, e jadu'n nipaady nej jihuüy ti n'ögyich. Paady ycixpi ti n'ixmachich je jecyp cötujcin, e ti nmijpidägyich Jesucristo ytiy'ajt jigix jëbi njactzinäyich müd Dios ycixpi. ²⁰ Jadu'n nayjihuiyijich jadu'n nej jihuüy ti n'oc'o'pich, jadu'n nej jihuüy ti ngruudzpetyich quipxy müd Cristo. Jadachambi ca' n'octzinaayñich müd ngi'm jugy'ajtin ycixpi. Hue' je' je Cristo ymic'ajt etz ytiy'ajt ti chinaydacpicy ma iich njugy'ajtin. E jadu'n nej cham njactzinäyich müd iich nninix, jactzinaaybich müd Dios y'ung ycixpi, nmijpidacypich Dios y'ung. Dios y'ung ti xy-chocyich ti xyjihuiyich, e ti nayyoxyii naydogyii ma yi o'cin müd iich nbocy ycixpi. ²¹ Ca' nmijajtigoya'ñich je may'ajtin je oy'ajtin huidibi Dios ti tuuñ müd iich ycixpi. Co ixypy jëbi Dios xyaajpocyñihuaatzim müd co ajt nguyduunim Dios ycötujcin jëyi, huin'it ixypy ti ñaadig'aty je Cristo co y'o'cy müd ajt nbocy ycixpi.

3

Je ycötucin huidibi Moisés yejc o je mibijcin

¹ Janch loci müich ajcxy migügtic huidibi tzinaayb jim Gálatas naaxjot. Ti jäy ajcxy xyajhuinma'ñyidigooyixy müd jibic-huinma'ñ. Paady ycixp mdzach'ixmadzaangixy je Dios ytiy'ajt. Ich oy njacapxhuächyich ma müich ajcxy mhuinduu je tiy'ajt jadu'n nej Cristo yajcruudzpejt müd iich ajt nbocy ycixpi. ² Yi' nyaj'amidooyb: ¿Nej ti mbaatcixy Dios yjihui'ñ ymic'ajt müd co mdzachcuyduuni Dios ycötujcin je jecyp? o ¿Nej ti mbaatcixy Dios yjihui'ñ ymic'ajt müd co ti mmidoogixy Jesucristo y'ayuc e ti mmibijccixy? Hue' janchtiy ti mbaatcixy Dios yjihui'ñ ymic'ajt co ti mmibijccixy Jesucristo, ca' mminaanim co ti mguydungixy Dios ycötujcin je jecyp. ³ Co Dios oga'n yjihui'ñ xy'adigiyyigixy xyjottigiyigixy, chi mguychinaaygixy Jesucristo ytiy'ajt nej Dios yjihui'ñ xyhuinma'ñymoogixy. ¿Nej co cham müich ajcxy mloci huinma'ñ mdzachtungixy? Jadachambi jadüg'oc mdzachtunaangixy mgi'mhuinma'ñ. ⁴ ¿Nej naadigigixpi müich ajcxy tzaachypi ti mminajxcixy ti myajnajxcixy müd Cristo ytiy'ajt ycixpi? Janch naadigi' jadu'n tzaachypi ti mminajxcixy ti myajnajxcixy, pen janch tücciyi ti m'ixmajtzicxin Cristo ytiy'ajt. ⁵ Jada nyaj'amidoogixy: ¿Nej ti Dios yjihui'ñ ymic'ajt xy'adigiyyigixy xyjottigiyigixy etz tuñ mijhuinma'ñ ma müich ajcxy müd co ti mguydungixy Dios ycötujcin je jecyp? Ca' yjadu'nity. Hue' Dios xy'adigiyyigixy xyjottigiyigixy etz tuñ mijhuinma'ñ müd müich ajcxy müd co ti mmidoogixy Jesucristo ytiy'ajt etz ti mmibijccixy.

⁶ Jadu'n ymiñ cojay ma Dios ñecy co Abraham mibijcy Dios, e co yi' mijpidacy Dios y'ayuc jadu'n nipaady nej jihuüy Dios yhuinmecxi ypocy, jigix jëbi y'ity tudägy ma Dios yhuinduu.

⁷ Jadu'n yjajty müd Abraham. Je' ymibijc Dios, e yajpocyñihuaatz Dios, jëbi ñaydijyii tudägy jäy ma Dios yhuinduu. ⁸ Dios jecy'ajty yajnihuinmayi co yajpocyñihuaadza'ñ je jäy ajcxy huidibi ca' yjudioäyitiy, jëbi ajcxy ñaydijyii tudägy jäy ma Dios yhuinduu, müd co ajcxy mijpidägipy je may'ajt huidibi Dios ytinamyb müd yi' ajcxy ycixpi. Paady ycixpi jaabyety ymiñ ma Dios ñecy co jadu'n Dios müdmaydac Abraham jecy'ajty co yi' huidibi ca' yjudioäyitiy ypaadipy ajcxy y'alma nidzoocin, com jadu'n Dios yminañ: "Müid müich tüg m'ap m'oc may'ajt oy'ajt nduna'ñich müd naaxhuiñyäj ajcxy ycixpi." ⁹ Paady ycixpi jadu'n nej jäy ajcxy tüg'öciy pinjaty mibijcp Dios, Dios may'ajt tunamb müd yi' ajcxy ycixpi co mibijccixy, tim jadu'n nej may'ajt tuun müd Abraham.

¹⁰ Dios chaachytunamy jäy ajcxy müd ypocy ycixpi, pinjaty huinma'ñ tzachpidacp co y'alma nidzoocin padaangixy müd co cuydungixy Dios ycötujcin je jecyp. Com jadu'n jaybety ymiñ ma Dios ñecy: "Dios chaachytunamyb jäy ajcxy müd ypocy ycixpi, pinjaty ca' mijpidägy tüg'öciy Dios ycötujcin, etz nañ jadu'n pinjaty ca' cuydundäy jada cötujcin."

¹¹ Jadachambi müd je ayuc huidibi ti nyajnijayiyigixy ma jada necy, jëbi müich ajcxy mnejhuñuip co ca' ni pin jäy jëbi Dios yajpocyñihuächyii müd huidijaty ti tungixy co

cuydungixy Dios ycotujcin je jecyip. Com jadu'n ymiñ jaybety ma Dios ñecy ma Dios jadu'n ymina'ñ: "Yi jāy ajcxy pinjaty mibigip iich n'ayuc, yí' ajcxy nyajpocyñiñhuaadzaamybich jēbi ajcxy y'alma paadip ñidzocin." ¹² Dios ca' jadu'n ymina'ñ ma yí' ycotujcin huidibi Moisés yjayhui'm co jēbi nmijpidaacim, e huin'it Dios xyajpocyñiñhuaatzim. Hue' je' ymina'ñ ma ycotujcin co jēbi xychaachytuunim mūd ajt nbocy ycixpi. Com jadu'n ymiñ jaybety ma Dios ñecy: "Yi jāy ajcxy pinjaty cuydumb Dios ycotujcin huidibi Moisés ycojaj, copicy cuydundāhuip, ni ma ycatundigoyipy."

¹³ Cristo xyñihuaanim xyajtzocim ma anajty Dios xychaachytunaanim mūd co ca' nguydundaayim Dios ycotujcin je jecyip. Cristo ci'm ti yajnicxy je tzaachypí huidibi Dios ajt xymōhuaanim anajty. Com jadu'n jaybety ymiñ ma Dios ñecy: "Pinjaty anajty yajmijxotzpejtp ma tūg cruudz, hue' anajty je' yco'ayooyb ypocy tiibi tuñ." ¹⁴ Cristo o'c je' mūd iich ajt nbocy ycixpi, jigix Dios jēbi cuyduñ yí' y'ayuc jadu'n nej yaj'ahuaniiy Abraham jecy'ajty, co may'ajt tuna'ñ mūd yí jāy ajcxy ycixpi huidibi ca'p yjudiojāyity, etz nañ jadu'n may'ajt tuna'ñ mūd iich ajt ycixpi, jigix jēbi iich ajt nbaatim je Dios yjihui'ñ co nmibijcim je Cristo.

Je cotujcin huidibi Moisés yejc etz huidibi Dios y'ahuaniiy

¹⁵ Migūgtijc ajcxy, ngapxticxaamybich jadu'n nej Dios ti tuñ mūd tūg iixpejt nej jāy ajcxy ytuñ. Co ixyipy tūg jāy necy yajcojy ma nigapxy jadu'n nej ypidāgy yajhui'ma'ñ, e co yajcojtāy je necy, e chi firmijiy, e nañ jadu'n je testigo ajcxy yfirmijiy, huin'it ca' huaad pinjaty nixig yajxig yada tiy'ajt, e nañ jadu'n ni ca' huaad yaj'ungixy. ¹⁶ Cuenditungixy Dios y'ayuc ytiy'ajt, Dios ma yí' y'ayuc yaj'ahuaniiy Abraham etz tūg yí' y'ap y'oc co may'ajt tuna'ñ mūd yí' ajcxy jēyi. Ca' nmīnaanim Dios y'ayuc ymina'ñ co Dios yaj'ahuaniiy Abraham co may'ajt tuna'ñ mūd tūg'óciy yí' y'ap y'oc. Hue' je' Dios y'ayuc ymina'ñ co may'ajt tuna'ñ mūd tūgpajc yí' y'ap y'oc, je' je' je' Cristo. ¹⁷ Dios ca' yí' nixig yajxig ytiy'ajt huidibi jayijp ymoy Abraham co yajniguejxy ycotujcin yí Moisés. Co Abraham y'o'cy, ti anajty ñajtniñicxiyñi mīdaax migo'px ja'iipxmajc jimiit, chiini oy Dios mōy Moisés yí' ycotujcin. Tim jadu'n nej ca' huaad yajtigach je jāy ñecy ma nigapxy jadu'n nej ypidāgy yajhui'ma'ñ, nañ tim jadu'n ca' huaad Dios yajtigach y'ayuc huidi yajnimay Abraham jadu'n nej may'ajt tuna'ñ mūd naaxhuiñjāy ajcxy ycixpi. ¹⁸ Dios y'ahuaniiy yí' ytiy'ajt ma Abraham jecy'ajty co may'ajt tuna'ñ mūd yí' y'ap y'oc ycixpi etz mūd tūg'óciy naaxhuiñjāy ajcxy ycixpi. Co ixyipy jēbi jāy padaangixy y'alma ñidzocin mūd huidibi ajcxy ytumyb co ajcxy cuyduuni Dios ycotujcin je jecyip, ca' ixyipy may'ajt ti tuñ co ti quexy je Cristo ya naaxhuiñ co jāy yajniñhuaadzp.

¹⁹ ¿Ti ycixpi Dios co moy Moisés je cotujcin huidibi ycojaj? Hue' je' Dios moy jada cotujcin jigix jēbi nigūxigxy co jāy ajcxy ca' ycapxymidoogixy. Tunamb anajty Dios ycotujcin huidibi Moisés ycojaj mabaad ti quexy ya naaxhuiñ yí' y'ung, je' je' je' Cristo, je' Abraham y'ap y'oc huidibi yajpocyñiñhuaatzp jāy ajcxy. Dios ycotujcin hue' je' yajniguejx Moisés mūd ángeles ajcxy. E chi Moisés capxnajxy ma ymīgūgtijc ajcxy. ²⁰ Co Dios ti quexy yí' oybi y'ayuc ya naaxhuiñ mūd y'ung, paady ycixpi Dios ca' tzocy co huingbi capxnaxipy yí' y'ayuc. Dios etz Dios y'ung tú'ciy yí'.

Tigixpi Dios je Moisés cotujcin yejc

²¹ ¿Nej mdijy ca' ñaybadyi yí Dios ycotujcin huidibi Moisés ycojaj, mūd je ayuc huidibi Dios yajnimay Abraham? Naybaatip ajcxy y'ayuc. Co ixyipy cayejcy Dios cotujcin ma jēbi jāy ajcxy y'alma ñidzocin padaangixy, huin'it ixyipy jēbi nbocyñiñhuaatzim co ixyipy nguyduunim yajxon jada cotujcin. ²² Ca' yjanchity co jēbi Dios xyajpocyñiñhuaatzim mūd co tijaty nduunim. Com ma Dios y'ayuc ymiñ cojaj co nidūg'óciy jāy ajcxy ti ytundigooy, ac pocy ymūd ajcxy. Jadu'n Dios y'ayuc ymina'ñ, jigix jēbi Dios yajpocyñiñhuaach tūg'óciy pinjaty mijpidacp Jesucristo, jadu'n nej yajnimay Abraham jecy'ajty co jadu'n tuna'ñ.

²³ Ca'ni anajty Cristo ymiñ ya naaxhuiñ, huin'it anajty Dios ycotujcin ytuñ, yajpocycāy jāy ajcxy, e ca' Dios yajcomidoj jāy ajcxy ypocy. Jadu'n nej jihuij jāy ixyipy ypujxtijc'inaaygixy e ahuijxcixy mina je juez ytiydunāanigixy. Jadu'n anajty n'ijtim jadu'n nej jihuij nbu-jxtijc'inaayim, ixti cooni Jesucristo ymiñ ya naaxhuiñ yajpocyñiñhuaatzp. ²⁴ Jadu'n anajty Dios cuend'aty yí judiojāy anajty mūd ycotujcin huidibi Moisés ycojaj. Tim jadu'n nej jāy cuend'aty huingjāy y'ung. Jadu'n anajty Dios cuend'aty judio jāy ajcxy ixti cooni Jesucristo ymiñ ya naaxhuiñ jēbi yajpocyñiñhuaach jāy ajcxy. ²⁵ Jadachambi co Jesucristo ti y'oy ya naaxhuiñ, e ti nmibijcim (tzojingix) yí' ytiy'ajt, paady ycixpi cham ca' n'oc'ijtim cuend'aty mūd Dios ycotujcin huidibi Moisés ycojaj.

²⁶ Com miich ajcxy ti nmijpidaacixy Jesucristo ytiy'ajt, paady ycixp jēbi nidūg'óciy miich ajcxy naydijigixy Dios y'ung. ²⁷ Tūg'óciy miich ajcxy huidijaty ti mnūbejtcixy, ti mnūbejtcixy jigix jēbi mdūgmujccixy mūd Cristo, jadachambi niducy m'ijtcixy mūd Cristo. ²⁸ Nidūg'óciy miich ajcxy ti mgōbijccixy Jesucristo jadu'n nej ajcxy mHuindzin. Jadu'n miich ajcxy judiojāy etz nañ jadu'n ca'pí yjudiojāyity, nañ jadu'n miich ajcxy midumbidijc etz

miich ajcxy huidibi ci'm nay'ane'mip, miich ajcxy yëdijctijc etz miich ajcxy töxyjäydijc; tü'ciy miich ajcxy myajpattaaygixy ma mHuindzin Jesucristo. ²⁹ Huenpinity miich ajcxy co mmijpidaaccixy Jesucristo, huin'it jëbi ajcxy mnaydijyib Abraham y'ap y'oc, e huin'it jëbi mbaatcixipy tzinaydac jiiby tzajpioty, je huidibi Dios yaj'ahuanüy Abraham, Abraham y'ung y'anäg etz Abraham y'ap y'oc.

4

¹⁻² Cha jadüg iixpejt nyajnimäyich miich ajcxy huidibi capxticxp Dios ytiy'ajt. Tüg comeefñjây ymang hue' anajty mutzni pi'cni je' anajty jëdaanip yteedy ypidägy. E chi yteedy tüg jây yajñibicy huidibi jëbi cuend'aty je pidägy etz je pi'c'anäg mabaad paady je tiempo mina yc'digihuiigy je pidägy. Je comeefñjây y'ung com co anajty ca'ni yeegy, ane'my anajty y'ity, tim jadu'n nej ane'my y'ity je jây huidibi midumb. ³ Tim jadu'n nej je comeefñjây y'ung anajty y'ity ane'my, nañ tim jadu'n ich yi judiojây ajcxy ane'my anajty n'ijtcixyich co anajty ca' tiyduädgy naydijyigixyich Dios y'ung. ⁴⁻⁵ Co oy Dios yajhuaad'ajtni, chi oy quejxni y'ung ya naaxhuin. Yi' y'ung ma'xung'ajt judiojây jigix jëbi codinäy jây ajcxy ma Dios ycötujctac. Nañ jadu'n yi' ma'xung'ajt judiojây jigix jëbi yajpocyñihuäch yi jây ajcxy huidibi ti yajpocycahuigixy Dios ycötujcin huidibi Moisés ycojaj. Dios ti quexy y'ung jigix jëbi ycodinaayim müid ajt nbocy ycixpi, e jadu'n Dios jëbi xycöbijci jadu'n nej jihuüy xyci'm'ung'ajtim.

⁶ Jadachambi müid co naydijim Dios y'ung, paady ycixp Dios ti xy'adigiyim ti xyjottigiyim yi' yjihui'n ymic'ajt, paady ycixp ajt minaanim co Dios ajt nDeedy'ajtim etz minaanim: "¡Padre Nuestro!" ⁷ Müid co miich ajcxy ti mmibijccixy Jesucristo, jadachambi ca' ane'my m'oc'ijtcixyñi ma Dios ycötujcin je jecyip, jadu'n nej je jây ytumbidijc müidity ane'my. Paady ycixp jëbi Dios xymöoygixipy jugy'ajtin huidibi ca' ycixipy ytigoyipy, jadu'n nej Dios müidity jugy'ajtin. Jadachambi miich ajcxy Dios xy'ung'ajt, etz jëbi mbaatcixipy pidägy ma Dios.

Pablo yjotmaybaady müid je mibijcpidijc ycixpi

⁸ Jecy'ajty ca' anajty mnejhuiyigixy Dios ytiy'ajt tiyduädgy, ooy anajty m'ojadajtcixy oyñiti huidibi ca' ymic'ajt müidity. E ca' anajty m'ojadajtcixy je Dios tzajpioty huidibi mic'ajt müidity. ⁹ Jadachambi ti mnejhuiyigixy Dios ytiy'ajt etz Dios ti xycöbijccixy. ¿Nej co jadüg'oc mdzachnihuimbidaangixy yi judiojây ycötujcin, ca'p ti mic'ajt müidity, huidibi ti m'ixmajtcixy? E jadüg'oc xy'ane'mygixy je judiojây ycötujcin. ¹⁰ Jadachambi mdzachcuydunaangixy judiojây ycostumbre, jadu'n nej ajcxy myajmij'ajtcixy xüibo' xiiijimijt. ¹¹ Huinmaaybich ooy müid miich ajcxy ycixpi co naadig'i ti nyaj'ixpicyich miich ajcxy. Ninigoob ayoohua'ñ ich ndung ma miich ajcxy.

¹² Migütijc ajcxy, cham may'ajt nbijctzooyich ma miich ajcxy. Yajtügüygix yi mhuinma'ñ jadu'n nej ich nhuinma'ñ. Ich ti nyajtügüyich nhuinma'ñ müid miich ajcxy mhuinma'ñ co ti n'ixmachich yi judiojây ycostumbre. Je taab anajty n'ityich müid miich ajcxy, ca' miich anajty ajcxy ich n'ayuc xyjijpcogapxiyi. ¹³ Miich ajcxy mnejhuiyib co anajty n'ityich ma miich ajcxy, pumây ich anajty nyajpaady müid yuu pa'm ycixpi, paady ycixp ich jim jecy nhuächjipyich, ngapxhuächyich Jesucristo ytiy'ajt je jayijp'aty. ¹⁴ Müid ich nba'm ycixpi ooy n'adzijpy miich ajcxy ma mjiin mdijc, e miich ajcxy ca' ti xy'ixtijy e ni ca' miich ajcxy xymidzijpich. Jadu'n ich miich ajcxy xycöbijcy aguic jotcujc, tim jadu'n nej ixyipy ti mgöbijccixy Jesucristo ci'm. ¹⁵ Jadachambi ¿ti ti ytunyii ti yjadyii co ca' mmijotcujc'ajtcixy ich n'ayuc? Com nyejcihty'ajt co je taabi anajty oga'n jim n'ityich ma miich ajcxy co janch xypubedaambich miich ajcxy. Ixti mgi'm huin anajty ajcxy mjayajpidzimaangixyp etz xymöhuaangixyich anajty co ich ngaa'a'ixiy. ¹⁶ ¿Nej ich ti n'ahuimbityich miich ajcxy mmidzip müid co ti nyajnimaaygixy huidibi janchip?

¹⁷ Yi huindzindijc jim ma miich ajcxy huidibi xychachay'ixpijccixp huidibi ca' ytiy'ajtiy, ca' ajcxy oyhuinma'ñ müidity. Hue' ajcxy tzachtzocy co miich ajcxy m'ixmajtcixip ich n'ayuc ndiy'ajt. Hue' ajcxy tzachtzocy co miich ajcxy yi' mgömayipy. ¹⁸ Ich njajotcujch jadu'n co huingbi huindzin ajcxy jëbi xyaj'ixpijccixy. Nigoobi co ixyipy jëbi ajcxy m'oy'ajtin mbaatcixy. Ca' oy copicity co ich ci'm miich ajcxy nmüid'ijttihiipy. ¹⁹ Migütijc huidibi ooy ndzocy njihuüyich jadu'n nej jihuüy ngi'm'ung'ajtigixy, ooy tzaachyp'i ndzachjihuiyich müid miich ajcxy ycixpi jadüg'oc. Jadu'n tzaachyp'i njihuüyich jadu'n nej ungda'j tzaachyp'i jihuüy co y'ung yajma'xung'ada'ñ. Njihuihuaamybich tzaachyp'i ixti cooni miich ajcxy anajty Cristo mhuinma'ñ xyaj'oyüyi. ²⁰ Ooy ich njanay'ixxpada'nyii ma miich ajcxy cham cham. Njamüidcapxaangixy njamüidmiydägaangixy, chi ixyipy tiy'ajt njacyajnimaaygixy jac huädz. Ooy ich ndajy nmayich müid miich ajcxy ycixpi, nej n'ocjancimaaygixyipy.

Je Agar etz Sara y'ixpejt

²¹ Miich ajcxy huidibi mdzachcuydunamyb Dios ycötujcin je jecyip. Nmimaaygixy ajcxy, ¿nej ca'ni ajcxy midoogixy huidibi Dios ycötujcin nigapxyip? ²² Com Dios y'ayuc huidibi

jaybetyip jadu'n ymína'n co Abraham ymüd anajty metz ymang. Tüg je'anajty ytaj'ajtp huidibi ypodumb'ajtpy. Je jadügi ymang anajty ytaj'ajtp huidibi ytimyöxijc'ajtpy. ²³ Je huidibi je pödumbi y'ung'ajti, hue' je ypi'c'ajty jadu'n nej pi'ctijc jadyii yma'xung'ajtcixy. Je huidibi Abraham ytoxyijc y'ung'ajti Dios je' müd ymic'ajtp ypi'c'ajty, Dios ycuymduun y'ayuc huidibi yajhuinhuaniiy Abraham. ²⁴ Jada jihuimbit ayuc jadu'n yhuimbizimyb: jada Abraham ytoxyijc ajcxy metz iixpejt'ajtp jadu'n nej Dios ti ytuñ müd yi' yjáy. Je ypodumbi huidi anajty yxii Agar, yi' müd yquipxii yi' Dios ycötujcin huidibi Dios ymoy Moisés ma je cop huidi yxii Sinaí. E tüg'óciy jáy ajcxy huidibi cuyduungixp Dios ycötujcin huidibi Moisés ycojay, ane'my ajcxy je' yaj'idyii, tim jadu'n nej tüg comeefñjáy ane'my yaj'ity yi' ytumbi ajcxy. ²⁵ Agar yi' nigix'ajtp je cop Sinaí jim Arabia ñaaxjot ma Dios moy Moisés je cötujcin. Agar je toxyjáy huidibi anajty pödumb, je' müd yquipxii yi' judíoáy huidibi tzachcuyduungixp Moisés ycötujcin, etz nañ yquipxii müd Dios y'it ya naaxhuiñ jim Jerusalén. Yi' judíoáy etz y'ung y'anäg ajcxy huidibi tzach cuyduungixy Moisés ycötujcin je jecyip, ane'my ajcxy y'ity ma jada cötujcin, tim jadu'n nej jáy ajcxy huidibi tumb ma comeefñjáy, e y'ane'my ajcxy y'ijtcixy. ²⁶ Je Sara huidibi Abraham ytoxyijc'ajtpy, yi' müd yquipxii iich ajt huidibi cuydumb je Cristo ytiy'ajt, e je Cristo yi' yajpatp tzejpjoty. ²⁷ Com jaybetyity ymiñ ma Dios ñecy co mayjáy paada'n oybi ma Dios, com Dios jadu'n ymína'n: Jotcugi' jadüg'oc müch Sara huidibi ca' y'ungbaady. Xic yāx müch müd jotcuje'ajtin, müch huidibi ca' ungmo. Nigi ymayihua'n müch m'ap m'oc ca'ydí Hagar y'ap y'oc.

²⁸ Iich ajt huidibi nmijpidaacim Jesucristo tügiyim müd Abraham ymang Isaac. Com jadu'n nej Dios cuyduun y'ayuc huidibi yajhuinhuaniiy Abraham co Isaac yma'xung'ajty, nañ tim jadu'n Dios cuyduun yi' y'ayuc müd iich ajt co je Cristo y'oy ya naaxhuiñ. ²⁹ Tim jadu'n nej Abraham ymang Ismael jecy'ajty midzip'ajty Abraham ymang huidibi Dios yajhuinhuaniiy Abraham; nañ tim jadu'n yi' jáy ajcxy huidibi tzachcuyduungixp Dios ycötujcin je jecyip, ooy ajcxy tzach midzip'adyii yi' jáy ajcxy huidibi mibijcp Jesucristo. ³⁰ Oc-huinmay müch ajcxy nej jaybetyity ymiñ ma Dios ñecy co jadu'n Dios nimay Abraham:

Yajpidzim ma mdjic je mbödumbi müd ymang. Com ca' jadu'n ytiy'ajty co je pödumbi ymang paadipy müch mbidägy. Yi' je' padamb je mbidägy huidibi müch mdöxyijc ymang'ajtpy.

³¹ Migügtijc ajcxy, ca' iich ajt n'ocjadu'niñ nej je pödumbi y'ung y'anäg ajcxy huidi ane'my ijtp. Jadu'n iich ajt nipaady nej Abraham ytoxyijc y'ung y'anäg huidibi ca' y'ane'my y'ity.

5

Cristo ti xyajñihuaatzim ma je cötujcin huidibi Moisés yecj

¹ Je Cristo ti xyajpidzimim ma Dios ycötujcin je jecyip ma anajty n'ijtim y'ane'my, jigix jébi tzojcingix nguyduunim yi' ytiy'ajt. Mibijcixy tiydudägy Cristo ytiy'ajt, ca' m'ixmajtzicixy. Ca' mni'ahuimbijtcixipy jadüg'oc Dios ycötujcin je jecyip ma anajty m'ijtcixy tim jadu'n nej comeefñjáy ytumbi ajcxy y'ijtcixy ane'my.

²⁻³ Amidoo'ijtcix iich n'ayuc. Jadachambi iich Pablo minaambich pen müch ajcxy mgöbigamyb jada ayuc co copicy myajtiy'ajtihiupy, huin'it ñaadig'ada'n co mmibijcixy Jesucristo ytiy'ajt. Ca' Jesucristo may'ajt tuna'n müd müch ajcxy pen jadu'n m'ididza'n. Jadüg'oc nmina'nich co pinjaty jadu'n ycuymduunayb tüg Dios ycötujcin, copicy ycuymdundähuipy tüg'óciy. ⁴ Pen mijjp'ijxyp ajcxy co Dios xyajpocyñihuaatzaangixy müd co mguyduungixy tüg Dios ycötujcin, jadu'n nipaady nej jihuüy ti m'ixmajtzicixni Cristo y'ayuc ytiy'ajt. Pen ca' nmijpidaacixy je may'ajt oy'ajt huidibi Cristo ti tuñ ninigoob müd müch ajcxy ycxipi, huin'it ca' Dios xyajpocyñihuaatzicixipy. ⁵ Njijp'ijxim co Dios xyajpocyñihuaadzaanim jigix jébi naydijim tudägy ma Dios yhuinduu müd co nmibijcim Cristo etz müd co je Espíritu Santo xypubejtim. ⁶ Co nmibijcim ajt Jesucristo, Jesucristo ca' cuendituñ pen ti nyajtiy'ajttiayim o pen ca'. Jéyi yi' tzocy co naychojcm nayjihuüyim nidüg nidüg, e jada je' je iixpejt co nmibijcim yi' ytiy'ajt.

⁷ Jayijp'aty oy yajxon anajty m'occuyduungixp Jesucristo ytiy'ajt. ¿Pin ti xy'agapxiygixy co ca' mgapxymidohuaangixy tiy'ajt? ⁸ Yi' jáy ajcxy huidibi ti xy'agapxiygixy ca' ajcxy tiy'ajt patcixy ma je Dios huidibi ti xyhuin'ijxim jigix jébi nmibijcim Cristo. ⁹ Müch ajcxy mnejhuuyb co jáy pidaacixy levadura ma harina jich je levadura yajtigiyidaayb je jich. Nañ tim jadu'n jada anü huidibi jáy ajcxy ti pidaacixy ma müch ajcxy yajtigiyidahuayb müch ajcxy mjot mhuinma'n. ¹⁰ Com iich nmibijcpich co ajt je nHuindzin Jesucristo oyhuinma'n xymöhuipy ajcxy, paady ycxip njijp'ijxypich co müch ajcxy nmibigaamyb iich ngapxy iich n'ayuc. Dios chaachytunipy je jáy ajcxy huidibi ti xyajhuinma'ñyidgooygixy. Oy ooy yjamij yjajanchity ajcxy, ca' ytimyñéjity, Dios yi' ajcxy tzaachytunüib.

¹¹ Migügtijc ajcxy, co ixyipy yjanchity co ñch ngapxhuäcxyich co copicy nidüg'óciy jáy yajty'ajttíhuipy, ¿nej co je'ni chambaad judiojáy xychach'ixhuidityich xychach-pahuidityich? Pen ca' ixyipy xy'ixhuidityich xypahuidityich jadu'n nipaady nej jihuüy nyaj'ixpicxyich co je Cristo ca' y'o'cy müd ñch ajt nbocy ycixpi. ¹² Yi' huidi ajcxy xya-jhuinma'ñyidigooygixyp, ooy ixyipy y'o'yity co ixyipy ajcxy xypuhuäctuatni tüccäyi.

¹³ Dios müich ajcxy ti xymijhuoogixy ma yi' ytiy'ajt jembyi jigix jëbi m'ixmájtzcixni je Dios ycötujcin je jécyp, etz tzojcingix m'ipidägipy Cristo ytiy'ajt. Dios ti ajcxy mdü'aa xy'ahuaatzi, per ca' huaad mduungixy je jibicpi huidibi m'jot mhuinma'ñ chach'ñijot'ajtcixyp. Hue' a'oy naymi'oyjáy'ajtigix nidüg nidüg, naybubéjtigix miñ xyipy. ¹⁴ Dios y'ayuc ymina'ñ: "Mi'oyjáy'adipy mmijñ m'iidijc, tim jadu'n nej müich ajcxy mdzocy co mmijñ m'iidijc xymi'oyjáy'adipy." Co jadu'n ajcxy mnaymi'oyjáy'adiyb miñ xyipy, ytimyñipaty jadu'n nej jihuüy ti mguydundäy tüg'óciy je Dios ycötujcin. ¹⁵ Pen müich ajcxy mnaymidundigooyip etz mnaym'jotma'tip miñ xyipy, ca' yjetyity co ci'm anajty jadu'n mdzachnayya-jhuinma'ñyidigooyigixy miñ xyipy.

Je jugy'ajt huidibi yi Espiritu Santo yejcpy

¹⁶ Jada capxhuijin ñich müich ajcxy nyajniyayyb. Cuychinaaygix je Dios ytiy'ajt jadu'n nej je Espiritu Santo xyhuinma'ñymoogixy ajcxy. Ca' mguyduungixy je jibic-huinma'ñ huidibi mdzachnijot'ajtcixyp ci'm. ¹⁷ Je jibic-huinma'ñ huidibi mdzachnijot'ajtcixyp, hue'ymidzip'ajtpy je oybi huinma'ñ huidibi je Espiritu Santo xymoogixyp. Dios y'ayuc oby ca' ñaygodigiyii müd müich ajcxy mjibic-huinma'ñ. Paady ycixp müich ajcxy ooy m'jacyudunaangixy Dios y'ayuc, e ca' ajcxy mmimadäga'ñ ñicxy mguydundaaygixy. ¹⁸ Pen tzojcingix mguyduungixy je Cristo ytiy'ajt huidibi Dios yjihui'ñ xymooyb ajcxy, huin'it ca' copicy mguyduungixy Dios ycötujcin je jecyp.

¹⁹ Com nnejhuیداایم jadu'n nej jáy ajcxy yjot yhuinma'ñ tzachnijot'ajtcixy jibicpi. Jadu'n nej yëdijctijc tzachm'igapxtigoyaangixy töxyjäydijc; e nañ jadu'n nej töxyjäydijc ajcxy ooy yëdijctijc tzachm'iid'ügangixy etz müd'edzaangixy etz ma yjiibi ji ajcxy yhuinma'ñyidigooygixy. ²⁰ E nañ nnejhuیداایم jadu'n nej jáy ajcxy tzach'ojadajtcixy tzach-huingoxinaangixy je huidibi jáy ajcxy ci'm ti yajcojy, etz nej jáy ajcxy tzach'ojadajtcixy tzachyajtunaangixy caxpojcp'dijc, nej jáy ajcxy ymigüg tzachm'jotma'tcixy; nej jáy ajcxy ca' tzip yjot'ambijccixy müd yinjaty huenjaty ayuc; nej jáy ajcxy tzachmidzip'ajtcixy ymigügtijc; nej jáy ajcxy tzachyajca'oy'ijxcixy ymigüg co tjaty müdity; nej jáy ajcxy chachnaybjc-huäcxäänigixy, huidibi abicy tzachm'iadamb yjáy. ²¹ E nañ nnejhuیداایم jadu'n nej jáy ajcxy abijctig'huaangixy tijaty ymigüg ymiid; nej jáy ajcxy ymigüg yaj'o'ccixy; nej jáy ajcxy nijot'ajtcixy ügii etz adzuuhuididi agoodzhuididi, etz yi jáy ajcxy huidibi tzachnijot'ajtcixp yi jadu'mbi huinma'ñ. ñich müich ajcxy cham njacyajnimaaangixy jadu'n nej ñich yajip'aty ti n'ocnigapxich, co yi jáy ajcxy huidibi yi jadu'mbi jibic-huinma'ñ chachnijot'ajtcixp jadu'n nej cham ti nijay'iygixy, ca' ajcxy tzinaydac paadaangixy ma Dios y'ane'my.

²² Hue' ajt jadachambi nejhuiydaayim je oybi huinma'ñ huidibi Espiritu Santo yejcpy. Co yi jáy ajcxy huidibi ymiid Dios yjihui'ñ ymic'ajt ma yjot yhuinma'ñ, hue' ytungixyp ajcxy yi oyjáy'ajtin müd ymigügtijc; müd ajcxy xondaacin etz müd ajcxy jotcuje'ajtin; etz ymimexctujcixyp ymigügtijc; etz chojccixyp yjihuiyigixyp ymigügtijc; etz ytungixp oybi; etz tudägy yjáy'ajtcixyp. ²³ nicy xeemy yjáy'ajtcixy ma ymigügtijc; etz ci'm yajxon ñay'ané'migixy ma yi oybi. Ca' ji huingbi cötujcin huidibi jada oybi huinma'ñ jippcogapxihuipy. ²⁴ Tüg'óciy jáy ajcxy pinjaty Jesucristo Huindzin'ajtp, m'madacpy ajcxy yi jibic-huinma'ñ huidibi ci'm nijot'ajtcixyp müd Cristo ymic'ajt. ²⁵ Müd co nm'iid'ajtim je Espiritu Santo ymic'ajt ma ajt ndzinaayin njugy'ajtin, paady ycixp tzoc tzinaayim jadu'n nej xy'ane'mim xy-huinma'ñymooyim je Espiritu Santo.

²⁶ Ca' huaad amij agix ndzachnayjihuiyim, etz nañ jadu'n ca' huaad nmigügtijc nyajjotma'tim; etz ca' huaad ni ti nyajca'oy'ijxim.

6

Naybubéjtigixy miñ xyipy

¹ Migügtijc ajcxy, pen mbatpy tüg migüg huidibi jibic-huinma'ñ ti ym'iadägyii, müich ajcxy huidibi m'madacyp yi jibic-huinma'ñ müd Dios ymic'ajt mbubéjtixipy jada migüg, e co mbubéjtixipy jada migüg, ñigi jotmic m'igapx müd oy gapxy oy ayuc. Naygüend'adii ajcxy ci'm, ca'ydí jibic-huinma'ñ xymimadaaccixy. ² Naybubéjtigixy nidüg nidüg pinjaty ayo'n jotmay müd. Co jadu'n mdüngixipy, hue' anajty ajcxy mguyduungixyp Cristo ycötujcin huidibi ti xymooyim ajt.

³ Pen ji pin ñayjihuiyii amij agix etz chach naygómaya'ñyii ci'm co chach y'oyjáyity, ca' je choobaady ma Dios yhuinduu. ⁴ Jëbi nidüg nidüg jáy ñayjihui'ñyibgyii nej chináy yjugy'aty,

pen oy o peni ca'yoyity. Peni ycuychinaayb yajxon Dios ytiy'ajt oybi, jotcuje ñayjihuihuiyb je' ci'm e ca' huaad yajquixxi chinaayin müd huingbi. ⁵ Nidüg nidüg jäy ci'm chinaayin jëbi yajnicxy nej Dios jäygidägy. Ca' huaad ni'ijxtüdy nej ymügüg jibic-huinma'ñ müdity.

⁶ Yi jäy ajcxy pinjaty ti ixpicy Dios y'ayuc ytiy'ajt, copicy co möhuipy tijaty yajmayajatpy je huindzin tiibi yaj'ixpiygi.

⁷ Ix ajcxy ci'm mnayhuin'ingix com Dios ca' yi' ni pin huaad nixgy yajxgy. Com pen müch ajcxy jibic-huinma'ñ mdumyb, Dios xychaachytunip ajcxy. Pinjaty oybi tuumb, nañ ypaadipy oybi, e pinjaty jibicpi tumb, nañ jibicpi ypaadipy. ⁸ Pinjaty jibic huinma'ñ tum jadu'n nej jibicpi tzachnijot'aty, co y'ögipy yi' y'alma ñicxip ayoodactuuby. Pinjaty cuydumb Dios ytiy'ajt jadu'n nej je Espiritu Santo huinma'ñ ymöyii, co y'ögipy yi' y'alma huingbi jugy'ajtin ypaadamyb huidibi nimina ycaacixy ycaatigooy huidibi je Espiritu Santo möhuib.

⁹ Peni nduunim jabom jabom oy huinma'ñ ca' huaad ndzijpm, jëbi nmecxtujcim ixti cooni anajty nbaatim oybi ma Dios. E ca' huaad njotmetzcüym. ¹⁰ Tzoc oyjäy'ajtin tuunim ma nidüg'öciy jäy ajcxy, jadu'n nej Dios xychaachytunip möyoyim. Nigi tzoc pubejtim nmigügtjic huidibi mübijcp müjpidacp Cristo.

Ane'min, capxhuijin etz capxpooxin huidibi cijxnip je necy

¹¹ Ijxcix huindicxcix jada letra müjatyti huidibi iich ci'm njaayb, com ndzojcpyich co mnejhuüygixipy nej yam nijayiygixy. ¹² Yi jäy ajcxy huidibi mübijcp co Cristo o'cy ma yi cruudz müd ajt nbocy ycixpi etz nañ jadu'n müjpidacp yi tiy'ajttihuii, hue' ajcxy tzach ñaygömayaanigixy ma yi judiojäy ajcxy, jigix ca' pin y'ixhuididiyb ypahuididiyb. ¹³ Yi huidi ajcxy tzach müjpidacp tiy'ajttihuii, nañ ni ca' ajcxy cuydundäy tüg'öciy jada Dios ycötujcin je jecyip. Hue' yi' ajcxy tzojccixy co müch ajcxy myajtiy'ajttihuiip jigix ajcxy jëbi ñaygömáayigixy müd co müch ajcxy ti myajtiy'ajttiygixy. ¹⁴ Yi jäy ajcxy huidibi jim yaj'ixpijcp anii, ci'm ajcxy chach ñaygömáayigixy. Per iich ca' jadu'n naygömaya'ñiyijich müd huidibi ndumybich huidibi nyaj'ixpijcpyich. Hue' janchtiy ngapxpadaamybich iich ajt nHuindzin Jesucristo ytiy'ajt, jadu'n nej yajcruudzpejti müd ajt nbocy ycixpi. Co ti nmibicyich Cristo Jesús, huin'it ti n'ixmachich je naaxhuiñyäj yjibic-huinma'ñ. E paady cham ni nga'ocnijot'ajtnich yi jibic-huinma'ñ. ¹⁵ Co nmibijcim Jesucristo, oy ixyipy ti nyajtiy'ajttiyim o oy ixyipy ca' ti nyajtiy'ajttiyim, ca' ma choobaady. Huidibi tzoubatp yi' je' co nmibijcim Jesucristo, etz co nmüd'ajtim jemybi jot huinma'ñ. ¹⁶ Huen Dios xyajjotcugihuipy etz xypa'ayoohuipy, etz nañ jadu'n yajjotcugihuipy etz pa'ayoohuipy nidüg'öciy jäy huidijaty cuydumb Cristo ytiy'ajt, tüg'öciy Dios yjäy janchyp tiydudägyi.

¹⁷ Jadu'n nej jadachambi, etz jadu'n nej xi tiempo jacmiimb jaccidaacp, ca' iich pin huaad xyjac'amayiyich, com nmüdich je tiy'ajt ma nninüxcich jadu'n nej jäy ajcxy ti xyhueenduüñich ti xychaachytunüñich müd co ti nduüñich müd Jesucristo ycixpi.

¹⁸ Migügtjic ajcxy, huen iich ajt nHuindzin Jesucristo tunipy nigi may'ajt oy'ajt ma müch ajcxy. Jadu'n jada ngapxycixyich. Amén.

EFESIOS

Yi Necy Huidibi San Pablo Yajniuejx Je Mibijcpidijc Jim Efeso

¹ Hich Pablo, Dios jadu'n tzojcp co Jesucristo ti xyajniübicyich co n'apóstol'adipyich. Jada necy cham nguejxypich jim Efeso ma yi jäy ajcxy huidibi Dios yjäy'ajtip, yi' ajcxy huidibi mibijcp tudägy Cristo Jesús etz huidibi ajcxy yajpatp ma yi'. ² Huen ajt nDios Teedy etz ajt nHuindzin Jesucristo may'ajt oy'ajt tunipy müd miich ajcxy etz xyajjotcugihuip ajcxy.

Nej je Espíritu Santo conucxy Cristo yjäy

³ Tzoc iibaatim capxpaatim Dios iich ajt nHuindzin Jesucristo yTeedy. Müd co nyajpaatim ma Cristo, paady Dios ti xyconuucxim müd tüg'óciy huidijaty tzomb tzajpjoty. ⁴ Dios ajt xyhuin'ixim jecy'ajty, ca'ni anajty cojy macxy je naaxhuiñybi. Je' xyhuin'ixim jigix jébi nyajpaatim ma Cristo, etz jigix jébi nyajpaatim ma Dios yhuinduu huädz oy njot nhuinma'ñ, ca' ti bocy nmüid'ajtim. ⁵ Müd co Dios ooy xychojcm xyjihuiyim, paady ycixp yi' capxcödujcy jecy'ajty, ca'ni anajty naaxhuiñybi yajcojy yaj'oyiy, co xycöbigaanim nejjihuiy yci'm y'ung. Co Dios jadu'n quejxy je Cristo ya naaxhuingixy, chi yi' yaj'oyiy nej jébi xycöbjicim nej yci'm y'ung, e jadu'n xymüid'adaanim tzajpjoty. Dios jadu'n ytuñ jadu'n nej yi' anajty tzocyn. ⁶ Tzoc iibaatim capxpaatim Dios ooy müd co mijmay'ajt mij'oy'ajt tuuñ müd iich ajt ycixpi, co quejxy y'ung ya naaxhuiñ müd iich ajt nbocy ycixpi, jigix jébi nyajpaatim ma yi' y'ung, je' y'ung huidibi ooy tzocy jihuiy. ⁷ Müd co Dios ooy xychojcm xyjihuiyim paady ycixpi yi' y'ung ñi'py teemy jojcy co y'o'cy müd ajt nbocy ycixpi, ti ajt n'alma xyajniüzcocim etz nbocy ajt ti xyhuinmeecxim. Co jadu'n ytuñ, chi Dios mijmay'ajt mij'oy'ajt tuuñ müd iich ajt ycixpi. ⁸ Co Dios jadu'n mijmay'ajt mij'oy'ajt tuñ müd iich ajt ycixpi, ti xyajhuinjihuiyim ti xyajnejhuiyim yi ytiy'ajt yi yhuinma'ñ. ⁹ Dios yjäygidacpy jadu'n co ti xyajnejhuiyim nej anajty müdity capxcöducy huidibi ca' pin jecy'ajty huinjihuiy. Nañ jadu'n Dios ti xyajnejhuiyim nej ti yhuinma'ñpidacy jecy'ajty nej ytuñ'ni anajty müd Cristo. ¹⁰ Je huidibi Dios jecy'ajty ti yajnihuinmayiy co tuna'ñ anajty, ytunamyb yi' mina anajty je tiempo ti yhuaad'ajtni. Dios ti yajnihuinmayiy anajty co pidäga'ñ tüg'óciy müd yajpatp tzajpjoty etz tüg'óciy huidibi yajpatp ya naaxhuiñ ma tüg ane'min, e je Cristo je' ane'mamb nigohuajc'adamb tüg'óciy.

¹¹ Tüg'óciy jiaty tuni yjajti jilby tzajpjoty etz ya naaxhuiñ Dios jayijp capxcöduj. Hich ajt huidibi nyajpaatim ma Cristo, Dios ti xyhuin'ixim jecy'ajty co oga'n je naaxhuiñybi chondacy jigix jébi nbaatim tüg'óciy huidibi Dios xymöhuaanim. E tüg'óciy jada nixcy yjaty tim jadu'n nej Dios jayijp capxcödujcy, e Dios ytumyby jadu'n nej yi' tzocy etz nej jäygidägy. ¹² Jadu'n Dios cuydumyby müd iich ajt ycixpi, huidibi jayijp ti nmibijcim ti nmijpidaacim Cristo, jigix jébi nguydunim ma ajt ndzinaayin Dios ytiy'ajt, e jadu'n mayjäy capxpaadip etz ojadadip Dios müd yi' ymij'ajtin etz yi' y'oy'ajtin ycixpi. ¹³ Nañ jadu'n miich ajcxy co mmidooy je ayuc ty'ajt nej jébi m'alma ñidzögipy ajcxy, e ti mmibjccixy Cristo, huin'it ajcxy myajpaatcixy ma yi', e je Dios yjihui'ñ ymic'ajt huidibi miich ajcxy müd ma mjot mhuinma'ñ, je' nidiy'ajt'ajtp co myajpaatcixy ma Dios. Jada je' je Espíritu Santo huidibi Dios y'ahuaniy jecy'ajty co xymöhuaanim. ¹⁴ Jada Dios yjihui'ñ ymic'ajt jada je' nidiy'ajt'ajtp co nbadaanim it lugar ma Dios y'it. Dios xymöhuaanim it lugar ma yi' y'it co anajty xii tiempo yhuaad'ajtni huin'it Dios nihua'na'ñ yajniüdzöga'ñ pinjaty yjäy'ajtip ajcxy. Jadu'n Dios tuna'ñ, jigix jébi iich ajt n'iibaatim ngapxpaatim Dios müd y'oy'ajtin ycixpi.

Pablo mibijctzoy Dios co huen ajcxy yajmoy huijy'ajt cuj'ajt

¹⁵⁻¹⁶ Com ti nnejhuiyich jadu'n nej tiydudägy müch ajcxy ti mmibijccixy iich ajt nHuindzin Jesús, e nañ jadu'n ti nnejhuiyich jadu'n nej mdzojccixy mjihuiygixy tüg'óciy huidibi mibijccixp Jesucristo. Paady ycixp jabom jabom co Dios nmibijctzooyich, nyajnajxpich jäygidacim ma Dios müd miich ajcxy ycixpi. ¹⁷ Mibijctzooybich Dios, nHuindzin Jesucristo yTeedy, je mijpi Dios Teedy, co yi' xymöhuiy ajcxy je huinma'ñ je xpijcin huidibi je Espíritu Santo yejcpy, etz nañ jadu'n xyajnejhuihuipy xyajhuinjihuihuipy ajcxy jaci'oy yi' y'ayuc, e tüg'óciy nej yi' ti ytuuñ. ¹⁸ Dios nmibijctzooybich müd miich ajcxy ycixpi, co xyaj'anüyipy ajcxy mjot mhuinma'ñ müd yi' ytiy'ajt, jigix jébi mnejhuiygixipy tijaty huidibi ajcxy m'ahuixyp ma Dios, nidüg'óciy miich ajcxy huidibi Dios ti huin'ixy. Nañ jadu'n jigix jébi mnejhuiygixy nej ymijity yjanchity je pidägy huidibi Dios yegamyb müd tüg'óciy ajcxy huidibi Dios yjäy'ajtip. ¹⁹⁻²⁰ Dios nmibijctzooybich jigix jébi ajcxy mnejhuihuipy jadu'n nej Dios ymic'ajt müdity. Je' ymic'ajt ca' ycixipy ytigoyipy, e ni pin ca quipxipy. Etz yi' ymic'ajt tumb ma iich ajt njot nhuinma'ñ nidüg nidüg co ajt nmibijcim. Dios ti xyajnejhuiyim yi' ymic'ajt huidibi ymüid may'amy co yajjugypijcy jadüg'oc Cristo co y'o'cy, etz nañ jadu'n ti pidägy Jesucristo mij'ane'mbi jilby tzajpjoty. Yi' iñaayb a'oy'amy ma Dios ymijc, etz

ane'mdäy tüg'óciy naaxhuiñ etz tzajp quipxyi müid Dios. ²¹ Cristo jac mij'ane'min ymüid, jac mic'ajt müid, ca'ydi jactpinjaty huidibi jayajpatp tzajpoty, etz huidibi jayajpatp ya naaxhuiñ, huidibi cham tzinaayb etz huidibi jactiini tzinähuaamni. Jesucristo cómay y'ity nigi, ca'ydi jac pin huidibi cham tzinaayb, etz huidibi jactiini tzinähuaamni. ²² Dios ti pidägy tüg'óciy ane'min ma Cristo jébi ane'mdäy. Jadu'n nipaady nej jihuüy Cristo nühuäcpejtäy tüg'óciy ane'min. E nañ jadu'n Dios ti pidägy Cristo jigix jébi nigohuajc'adipy tüg'óciy mibijcpidijc. ²³ Je mibijcpidijc jadu'n nipaady nej Cristo ñinlxc, paady ycixpi y'i ajcxy yajcixy yajca'pxy je Cristo y'oy'ajtin ymij'ajtin. E je Cristo yajcijxtaayb yajca'pxtaayb tüg'óciy tijaty ji ajtp.

2

Dios chojcpy yjihuiñy jäy ajcxy, paady ñidzoocixy y'alma

¹ Ca'ni müich anajty ajcxy mmibijccixy Cristo, ooy anajty mdundigooygixy müid Dios yti'ajt, ooy anajty ajcxy mbocymüidity, e jadu'n nipaady nej jihuüy ti m'o'ccixy müid mbocxy ajcxy ycixpi etz Dios xyajjugypijccixy huinjemy müid jemybi jugy'ajtin. ² Co ca'ni anajty müich ajcxy mgöbijccixy mmijpidaaccixy Cristo, ooy anajty mguydungixy naaxhuiñy jäy ajcxy yti'ajt, etz nañ ngapxymidoogixy anajty ajcxy je ca'oybi huidibi ane'mb je poj naaxhuiñ, je ca'oybi huidibi tumb ma yi jäy ajcxy yjot yhuinma'ñ huidibi ca' capxymidoogixy Dios. ³ Ma je tiempo tübi ñaxy, nañ jadu'n anajty ndzinaayim jadu'n nej yi jactadyi naaxhuiñy jäy ajcxy huidibi capxymidoob yi ca'oybi. Ngapxymidoohum anajty nninlxc chojcin. Ndundigooyim anajty müid ngi'mjot ngi'mhuinma'ñ. Nguipxyiym anajty müid yi jactadyi naaxhuiñy jäy ajcxy huidibi Dios tzaachytunaanip müid ypocy ycixpi, etz nañ jadu'n nmihuaad'ajtim co Dios xychaachytuunim müid ajt nbocy ycixpi. ⁴⁻⁵ Oy ixipyi ich ajt mihuaadity tzaachypi müid ajt nbocy ycixpi, per Dios mij ooy ti xypa'ayoohuim, e mij ooy ti xychojcin ti xyjihuiñy, paady ycixp tuuñ may 'ajt müid ich ajt ycixpi co yajjugypijcy je Cristo. E jadu'n quipxyi müid Jesucristo ich ajt nbaatim jemybi jugy'ajtin huidibi ca' ycixipy ytigoyipy ni mina. Jadu'n Dios may'ajt tuuñ müid ich ajt ycixpi co anajty nbadaanim o'cin müid ajt nbocy ycixpi. Müid co Dios may'ajt oy'ajt müid müich ajcxy ycixpi, paady müich ajcxy ti mbatcixy jemybi jugy'ajtin huidibi ca' ycixipy ytigoyipy ni mina. ⁶ Com jadu'n nipaady nej Dios xyajjugypijcin quipxy müid Jesucristo, paady ycixp Dios xymöhuanim it lugar jiiy tzajpoty quipxy müid Jesucristo. ⁷ Jadu'n nej xii tiempo mimb cidacp Dios jadu'n oy tuñ jigix jébi tiy'ajt nmüid'ajtim jadu'n nej Dios xychojcin xyjihuiñy etz xypa'ayoohuim mijcajee, etz mijmay'ajt mij'oy'ajt tuun müid ich ajt ycixpi co nyajpaatim ma Cristo. ⁸ Müid co Dios müich ajcxy ti xychojccixy ti xyjihuiñy, paady ycixp yi m'alma ajcxy ti patcixy ñidzoocin co ti mmibijccixy Jesucristo. Ca' nminaanim co tijaty ti mdungixy, paady ycixp yi m'alma ajcxy ti patcixy ñidzoocin. Hue' janchtiy Dios ti xymoogixy ninigoob ajcxy m'alma ñidzoocin. ⁹ Ca' nminaanim huin'it jäy ajcxy y'alma ñidzoocin paadip co oybi tungixy. Hue' janchtiy Dios jadu'n ci'm ti yaj'oyiñ ninigoob nej jäy ajcxy jébi patcixy y'alma ñidzoocin, jigix ca' pin jébi huaad amij agix ñayjihuiñy. ¹⁰ Com Dios ci'm ti oyduñ ich ajt njemybi tzaanaayim jugy'ajtin müid je may'ajt huidibi Cristo ytuun co y'o'cy müid ajt nbocy ycixpi. Jadu'n Dios tuuñ müid ich ajt ycixpi, jigix jébi nduunim oyjäy'ajtin ma ajt ndzinaayim. Dios, jecy'ajty ca'ni naaxhuiñy anajty chondacy, cojy macxy je tiy'ajt jadu'n nej yi' tzocy co nduunim oyjäy'ajtin.

Jotcujc cham n'ijtim müid Dios, com Cristo xyajpocyhuaatzim

¹¹ Jadu'n müich ajcxy ocjäymejtzcödiñ nej müich ajcxy anajty myajpatcixy co anajty ca'ni mmibijccixy Jesucristo. Ca' müich anajty ajcxy mjudiojäyity, e ni ca' müich anajty ajcxy myajtiy'ajtiyigixy nej huaad mnaydijigixy Dios yjäy. Paady ycixp yi judiojäy ajcxy ymina'ñ co Dios je' yjäy ajcxy, e müich ajcxy ca', müid y'i da'ajty co müich ajcxy ca' myajtiy'ajtiyigixy. ¹² Co ca'ni anajty mmibijccixy Cristo, je huin'it tiempo, ca' anajty ajcxy myajpatcixy ma Cristo, etz ni ca' anajty judiojäy xycöbijccixy, etz ni ca' anajty mbadaangixy huidibi Dios y'ahuaniy ma yi judiojäy ajcxy, etz ni ca' anajty ti mjijp'ijxcixy ma Dios, etz ni ca' müich anajty ajcxy myajpatcixy ma Dios. ¹³ Jadachambi, müich ajcxy huidibi jecy'ajty anajty ca' myajpatcixy ma Dios, jadachambi ajcxy myajpaady ma Jesucristo müid co y'i ñi'py teemy yojcy müid müich ajcxy mbocxy ycixpi. ¹⁴ Jesucristo ci'm yaj'oyiñ je tzip je capxy nej anajty ich ajcxy judiojäy etz müich ajcxy huidibi ca' yjudiojäyity naymidzip'ajtim, e cham jotcujc n'ijtim. Jesucristo ci'm yajtigoy je judiojäy ycötujcin huidibi anajty tzipcojp capxycojp ma ich ajcxy etz ma müich ajcxy. Jesucristo yajtügmujc judiojäy, etz huidi ca' yjudiojäyity. ¹⁵ Jesús müid yci'm ninlxc yajtigoy je jecy'ajtypi cötujcin co oy yaj'ögyiñ cruudzixy. Co Jesús y'o'cy, huin'it yajtügmujc judiojäy etz huidibi ca' yjudiojäyity. Huin'it oy yaj'ahuimbity tügpicy jäy jemybi huidibi Dios yjäy'ajtip. E jadu'n ajcxy yajcijxy yajmay je tzip capxy. ¹⁶ Co Cristo oy yaj'ögyiñ cruudzixy, huin'it yajcijxy yajnajxy je tzip capxy jadu'n nej yi judiojäy anajty midzip'adyiñ y'i ajcxy huidibi ca' yjudiojäyity. Etz nañ huin'it Cristo yajtügmujc yi

judíoäy müd huidibi ca' yjudíoäyity. Paady ycixp Dios ycöbiga'ñyii judíoäy ajcxy etz huidibi ajcxy ca' yjudíoäyity agujc jotcuje.

¹⁷ Je Cristo miin anajty ya naaxhuñ etz capxhuäcxy oybi tiy'ajt jadu'n nej jëbi ajt nbaatim jotcuje'ajtin ma Dios. Ycapxhuäcxy anajty ma miich ajcxy huidibi ca' yjudíoäyity, huidibi ca' anajty müidity Dios ytiy'ajt. Etz nañ jadu'n ycapxhuäcxy Dios ytiy'ajt anajty ma iich ajcxy judíoäy huidibi jamüid anajty Dios ytiy'ajt. ¹⁸ Müid co Cristo may'ajt ti tuuñ co xy'adigiyim xyjottigiyim Dios yjihui'n ymic'ajt, paady ycixp nidüg'öciy iich ajt nyajpaatim ma Dios jadu'n nej tügpicy jäy, tanto judíoäy etz nañ jadu'n huidibi ca' yjudíoäyity. ¹⁹ Paady ycixp miich ajcxy jadachambi myajpaady ma Dios. Jadu'n miich ajcxy myajpaady ma Dios tim jadu'n nej je jäy ajcxy huidibi tzinaayb ma yci'mgajp, ca' yjadu'nity nej adzinaaybi ajcxy. Paady ycixp tü'ciy miich ajcxy mnaygomájtzigixy ma Dios müid judíoäy ajcxy. Jadu'n miich ajcxy etz judíoäy ajcxy nipaady cham nej jihuiy ajcxy mdügiuugy mdügmigüg. ²⁰ Miich ajcxy ti mmüjidaaccixy je tiy'ajt huidibi Jesús y'apóstol ajcxy ti capxhuäcxy etz je tiy'ajt huidibi Dios y'ayucnajtzcaxxiybi ti capxhuäcxiy. E yi' ajcxy ytiy'ajt jadu'n nipaady nej poch'ijx ma chondägy. E Jesucristo yi' jëdu'n yajpatp nej tüg tzaa huidibi jaccopicyip ma je poch'ijx chondägy. ²¹ Dios jadachambi tiempo ycojyp ymacxyp jadügpicy jäy huidibi yjáy'adaanih huidibi tügiyp müjidaaccixy Cristo, huidibi tü'ciy ijtcixyp müid Cristo. Jadu'n jadayaabi tügpicy jäy nipatcixy nej tüg tijc ma jäy ajcxy Dios ojadajtciy. ²² Miich ajcxy myajpatp ma Cristo quipxy müid nidüg'öciy yi mayjay ajcxy huidibi müjpidacp Dios etz huidijaty mü'ijtp je Espíritu Santo ma ajcxy yjot yhuinma'ñ, jadu'n miich ajcxy mjugy'ajtin nipaady nej Dios chinaydac.

3

Pablo yi' je' müid cötuycin co capxhuäcxy Dios y'ayuc ma pin ca' yjudíoäyity

¹ Iich Pablo, nyajpatpich pujxtigoty müid co nduunich ma Jesucristo ytung ma miich ajcxy huidibi ca' yjudíoäyity. Paady ycixp nmibijctzooybich Dios müid miich ajcxy m'oy'ajtin ycixpi. ² Mnejhuüyb ajcxy com Dios mijmay'ajt ti tuuñ müid miich ajcxy ycixpi, paady yi' ti xyajñibicyich ngapxhuäcxiy ma miich ajcxy yi' y'ayuc ytiy'ajt. ³ Dios ti xyajnejhuüyich yi' ytiy'ajt huidibi jecy'ajty yüch y'ijtp. Jada tiy'ajt yinjaty hueeñjaty iich miich ajcxy ti nnijaywügyxay jayijp'aty. ⁴ Co miich je necy mgapxip, huin'it ajcxy mnejhuühiipy co iich nnejhuüyich je Cristo ytiy'ajt huidibi ijtp yüch. ⁵ Jada tiy'ajt maabi Jesucristo, Dios ca' ni pin yajnejhuüy jecy'ajty. Jadachambi xü tiempo Dios müid je Espíritu Santo yajnejhuüy Jesucristo ytiy'ajt je Jesús y'apóstoles ajcxy etz je Dios y'ayuc najtzcaxxiybi ajcxy. ⁶ Jada je' je tiy'ajt huidibi jecy'ajty yüch anajty ijtp, co yi' jäy ajcxy huidibi ca' yjudíoäyity ypadamyb ajcxy Dios y'oy'ajtin quipxy müid yi judíoäy ajcxy, etz nañ jadu'n yi' ajcxy yajpaady ma Dios tü'ciy müid yi judíoäy ajcxy, etz nañ jadu'n yi' ajcxy padaangixy oybi huidibi Dios jecy'ajty yajnimay yi judíoäy co möhuaangixy pinjaty mibijccixp Jesucristo.

⁷ Dios mijmay'ajt ti tuñ müid iich ninigooob co ti xyajñibicyich jada tung, e xymöyich mic'ajt co ngapxhuäcxiy Jesucristo y'ayuc ytiy'ajt oybi ma yi jäy ajcxy huidibi ca' yjudíoäyity. ⁸ Iich jactimmudzip ma yi maybi mübjcpidijc ca'ydi jacpin, per ca' ñejity. Dios may'ajt oy'ajt ti tuuñ ma iich, e ti xypidägyich ma yi' ytung co ngapxhuäcxiyich jada oybi tiy'ajt ma jacjadyii jäy ajcxy jigix jëbi ajcxy patcixy ma Cristo Jesús mij'oy'ajtin, huidibi ca' pin huinjihuüy jadu'ñiy ymijity. ⁹ Dios ti xyajñibicyich co ngapxticxiyich ma tüg'öciy jäy ajcxy je Dios y'ayuc ytiy'ajt oybi huidibi yüch anajty ijtp. Yi' je' je ayuc huidibi Dios ti cojy ti macxy jecy'ajty, jadu'n nej yi' tuna'ñ je oybi müid tüg'öciy jäy ajcxy. Yi' je' Dios huidibi ti yajcojtäy tüg'öciy tijaty ya naaxhuñ etz jiiby tzejpjoty yajpatp. ¹⁰ Jadu'n Dios capxcödujcy co je tzejpjoty tzinaaybi ajcxy huidibi ane'min etz mic'ajt müid, tiy'ajt padaangixy ma yi mübjcpidijc jadu'n nej Dios mijhuinma'ñ canaagnax tuñ müid jäy ajcxy nidüg'öciy huidibi mübjccixp Cristo Jesús. ¹¹ Jadu'n Dios ti cuyduuñ müid ajt nHuindzin Jesucristo jadu'n nej jecy'ajty capxcödujcy. ¹² Müid co nyajpaatim ma Jesucristo paady ycixp agujc jotcuje nmigapxim mnihuingonim Dios. Müid co nmibijcim Jesucristo paady ca' ndzigiyim ndzo'yduunim ma Dios yhuinduu. ¹³ Paady ycixp may'ajt nbijctzooyich müid miich ajcxy co ca' nñgi m'ixtigihuäccixy ma ajcxy mmibijcin. Etz ca'ajcxy xyñidajipy xyñimayipyich co tzaachypim nminaxyich nyajnaxyich müid miich ajcxy ycixpi. Com müid co ti nyajnaxyich tzaachypim müid miich ajcxy ycixpi, paady jëbi miich ajcxy oy'ajtin mbatcixy.

Cristo chojcpy yjihuiyb jäy ajcxy

¹⁴ Com Dios mijmay'ajt ti tuuñ müid judíoäy etz müid huidibi ca' yjudíoäyity, paady njatyhuingoxtinaaybich Dios, iich ajt nHuindzin Jesucristo yTeedy, e nmibijctzooybich Dios müid miich ajcxy ycixpi. ¹⁵ Tüg'öciy tzejpjoty tzinaayb etz tüg'öciy naaxhuñjáy huidibi mübjccixp Dios, jëbi nidüg'öciy ymınaangixy: “Dios iich ajt nDeedy.” ¹⁶ Paady nmibijctzooybich Dios Teedy müid miich ajcxy ycixpi, co Dios je huidibi mic'ajt etz

oy'ajt ymüid mijcajee, co xymöhuipy mic'ajt ma ajcxy mmibijcin müid y'i' yjihu'i'n ymic'ajt huidibi yajpatp ma ajcxy mjot mhuinma'n. ¹⁷ Dios nmibijctzooybich müid müich ajcxy ycixpi co Cristo ymic'ajt yajpaadip ma müich ajcxy mjot mhuinma'n müid co mmibijccixy Cristo. Jadu'n Cristo ymic'ajt yajpaadip ma ajcxy mjot mhuinma'n, jigix jëbi müich ajcxy huidibi mmibijccixp Cristo, jëbi mdzójcixipy mjihuüygixipy mijcajee huinixi huinitiempo je mibijcpidijc etz tüg'óciy jacjadyi jáy. ¹⁸ Nañ jadu'n Dios nmibijctzooybich müid müich ajcxy ycixpi co müich ajcxy etz tüg'óciy mibijcpidijc mnejhuüygixipy jadu'n nej Cristo xychojcin xyjihüüiyim mijcajee. E y'i' chojcin yjihüüiyin jadu'n nipaady nej tüg'üj huidibi jac cixip jac mijip, jac yooñip jac cücyip ca'ydi ni huidi tijc. ¹⁹ Nmibijctzooybich Dios co xyajnejhuüygixipy xyajhuinjuüygixipy nej Cristo xychojcin xyjihüüiyim mijcajee nidüg'óciy iich ajt, ixti ca' huaad nhuinjuüydaayim jadu'n nej Cristo xyachachojcin xyachachjuüiyim. Nmibijctzooybich Dios co xypubéjtcixip, ixti mabaad mmüid'ajttaaygixy Dios y'oy'ajtin.

²⁰ Jadachambi, cōmay Dios y'ity huĩdibi mic'ajt mĩd, etz huĩdi yejcp mijcajee jac'anaxy ca'ydi nej njapijctzoohuim etz nej njahuinmaayim, mĩd je ymic'ajt ycixpi huĩdi tumb ma iich ajt. ²¹ Huen tũg'óciy mibijcpidijc ajcxy jãymejtzcixy ojadãjtcixy Dios etz Cristo Jesús jabom jabom huĩnixi huĩnitiempo. Jadu'n jada. Amén.

4

Tú'ciy n'ijtim mäd Espíritu Santo ycixpi

¹ Nyajpatpich pujxtigōty mīd ajt nHuindzin Jesucristo ytung ycixpi. Paady ycixp may'ajt nbjctzoozyich co miich ajcxy mdzinaaygixipy jadu'n nej mihuaad jāy chinaaygixy huidibi Dios ti yhuin'ljxigixy, com Dios miich ajcxy ti xyhuin'ljxcixy. ² Pidaaccix mjot mhuinma'n yung naxy, nicy xemy jāy'ajtcixy, naymecxtūcgix miñ xyipy, naym'oyjāy'ājtgixy, jigix űguēxigip co mnaychōcgixy mnayjihūyigixy miñ xyipy. ³ Mīd'adipy ajcxy mjot mhuinma'n tū'ciy mīd je Espiritu Santo ypubejtin jigix jēbi mdzinaaygixy jotcuaj ca' ma tzip capxy. ⁴ Nidūg'ōciy mibijcpidijc tū'ciy yajpatcixy ma Cristo etz tūgpajc Espiritu Santo huidibi yajpaady ma ajt njot nhuinma'n. Dios ti xyhuin'ljxim, jigix jēbi quipxyjaty njijp'jxtaayim je oybi huidibi nbadaanim jibi tzajpjoty. ⁵ Ji yajpaady tūgpajc ajt nHuindzin Jesucristo etz tūgpajc je ayuc tiy'ajt huidibi jēbi nmijpidaacim, etz tūgpajc nniibejtīm mīd Jesucristo yxi. ⁶ Ji yajpaady tūgpajc Dios Teedy huidibi cuendi'ajtp yajtzinaayb nidūg'ōciy mibijcpidijc. Yī' jē' huidibi nihuindzin'ajttaayb. Yī' jē' huidibi may'ajt tumb mīd nidūg'ōciy ajcxy, etz yī' ymic'ajtp yajpatp ma nidūg'ōciy ajcxy yjot yhuinma'n.

⁷ Dios may'ajt oy'ajt ti tuñ m'id nidüg nidüg iich ajt co Cristo xymooyim mic'ajt, jigix jëbi nidüg nidüg tuunipy Dios ytung nej ypadyii. ⁸ Paady ycixp jaybety ymiñ ma Dios jadu'n ymina'ñi:

Co Cristo ypättigüy tzajpjoty, chi ymüdpättigüy may machjäy, e nañ jadu'n Cristo moy jäy
ajcxü mic'ajt (dones).

⁹ ʔɛj co jadu'n Dios y ayuc yminaʔ co je Cristo ypättigiy tɛajpɔty? Hue' je' jadu'n yminaʔ miid co je Cristo jayijp ycidacy etz ooy ayooy ya naaxhuingixy. ¹⁰ Je Cristo yi' je' huidibi cidaac ya naaxhuin chooñ tɛajpɔty, nañ jadu'n ypättigiy jadüg'oc tɛajpɔty jactim'o'c'am. E yi' je' ymic'ajt yajpatp ma tüg'öciy huidijat y jibiy tɛajpɔty etz tüg'öciy huidijat ya naaxhuin. ¹¹ Je Cristo mooygixyp nidüg nidüg yi' ytumbi mic'ajt. Nijëjity mooygixy mic'ajt jëbi nidiy'ajt'äjtigixy co je' je' je' Cristo. Nijëjity mooygixy mic'ajt jëbi najtzcaxhiygixy Dios y ayuc. Nijëjity mooygixy mic'ajt jëbi capxhuäcxiy yi' y ayuc. Nijëjity mooygixy mic'ajt jëbi capxhuijixy yi' mibijcpidijc miid Dios ytiy'ajt. Nijëjity mooygixy mic'ajt jëbi yaj'ixpijccixy Dios ytiy'ajt. ¹² E jadu'n je' je' Cristo miic'ajt moydaaygixy yi' yjää, e jadu'n yajni'ixydaaygixy miid ytung ycxipi. E miid yi' ajcxy ytung yjacyupcedipy yi' mibijcpidijc y'ixpijcn, ixti mabaad jac miid'adipy ajcxy Cristo y'o'y'ajtn. ¹³ Jadu'n Cristo mic'ajt xymooyim, jigix jëbi nidüg'öciy hch ajt ytügiyim nmibijcn, etz nañ jadu'n quipxyjat n'ixpijctaa yim Dios y'ajt y'ayuc ytiy'ajt. E jadu'n nmi'ijtm cixy ca'pxy njot nhuinma'n, nmi'ijtm Jesucristo ytiy'ajt cixy ca'pxy. ¹⁴ Ca' n'idaanim miid ajt nhuinma'n nej pi'ctijc yhuinma'n ymiidty. Je pi'ctijc ajcxy janam jadzojc yhuinma'n ytigajtcixy. Jadu'n ajcxy nipaady nej je miy huidibi je poj yajpojnimy yajpojxijpy. Co cixy ca'pxy nmüid'ajtm Cristo ytiy'ajt, ca' pinjat yxhuin'inim miid huing ayuc oymibijcnip huidibi ca' yjanchity. ¹⁵ Hue' janchity ngaxpim je tiy'ajt tiybi miid tzojcn jihuuiyn, jaydëbi njacyecim ajt nmibijcn etz njacnejhuuiym tüg'öciy mibijcpidijc Cristo ytiy'ajt jadu'n nej ytuuñ ya naaxhuin, je Cristo huidibi nigohuajc'ajtp tüg'öciy mibijcpidijc. ¹⁶ Cristo etz je mibijcpidijc nipatp nej tüg ninicx. Cristo ñipatp nej je ninicx cohuajc huidibi ane'mb etz mic'ajt mooyb je ninicx. Etz yi' mibijcpidijc ñipatp ajcxy nej je ninicx huidibi Cristo y'ane'mb etz mic'ajt möy. Ma Cristo tüg'öciy mibijcpidijc mic'ajt patcixy huidibi yajtjüuyip ajcxy ymibijcn etz nañ jadu'n yaj'ijtigixy tügumcy. Nidüg nidüg mibijcip ymic'ajt patcixy

ma Cristo, jëbi tungixy Cristo ytung nej ypadyii. E jadu'n yeecixy nidüg'óciy ma ajcxy ymbijcin, etz nañ jadu'n jajyeecixy chojcin yjihuiyin müd ymigügtijc.

Je jemybi jugy'ajt huidibi nbaatim ma Cristo

¹⁷ Paady ycixp nñmâyich müich ajcxy etz nyajñbijccixy müd ajt nhuindzin Jesucristo yçõtujcin, co ca' huaad mdungixy loci huinma'n huidibi ca' choubaady ma Dios, jadu'n nej jacjadyii jây ytungixy huidibi ca' mijpidaaccixy ajt nHuindzin Jesucristo. ¹⁸ Ca' huaad mdzinaaygixy jadu'n nej jacjadyii jây ajcxy chinây müd loci huinma'n. Ca' ajcxy jajpaady ma Dios, je huidibi jugy'ajtin yejcp huinixibi. Ooy ajcxy yjotjuuñity, ca' ajcxy xipigaangixy Cristo ytiy'ajt. ¹⁹ Ca' ajcxy ti tzo'ydu'n jihuüy co ytundigooygixy. Ooy ajcxy minicxnajccixy yi jibic-huinma'n. Ooy ajcxy nijot'ajtcixy mijcajee co tûngixipy tûg'óciy tijaty jibic-huinma'n. ²⁰ Per müich ajcxy ca' ti m'ixpijccixy loci huinma'n etz jibic-huinma'n co ti m'ixpijccixy Cristo ytiy'ajt, ²¹ pen janch müich ajcxy ti mmidoogixy yi' y'ayuc, pen ti m'ixpijccixy je tiy'ajt huidibi jajpatp ma Cristo. ²² Ti müich ajcxy m'ixpij co copicy m'ixmajtcixixy yi jibic-huinma'n nej anajty mnijot'ajtcixy jibicpi jajyjp ca'ni anajty mmibijccixy Jesús. Jadu'n nej anajty ci'm ajcxy m'alma myajdigoyaangixy müd je jibicpi huidibi anajty ajcxy mnijot'ajtcixyp, ci'm anajty mnayhuin'ingixy. ²³ Ixmajtcixy jibicjot jibic-huinma'n. Pidaaccix m'jot mhuinma'n co mguydunaangixy Cristo ytiy'ajt jemybi. ²⁴ Müd'ajtcix jemybi jot jemybi huinma'n com Dios ti yajtigajch huinjemy ajcxy m'jot mhuinma'n müd tudägy'ajtin etz huädz'ajtin.

²⁵ Paady ycixp ca'huaad m'indaaccixy, nidüg nidüg cápxcix huidibi janchip müd migügtijc, müd co quipxyjaty nyajpaatim ma Jesucristo.

²⁶ Pen müich ajcxy mmijotma'tpy yi mmigüg, ca' mmigüg migapxtigooygixy midundigooygixy, mic'amy ajcxy mjâydigóoygixipy yi m'jotmädi jajyjp ca'ni anajty xii ycidacyñi. ²⁷ Ca' mnayyéjigixy ma je mujcu' co je mujcu' xymimadägipy.

²⁸ Yi jây ajcxy huidibi meetzcixp, huen ixmajtcixy meedzi, etz ixtâhuipy ytung. Co ytunipy ma ci'mdung jëbi pubedipy ajcxy ymigügtijc huidibi yajmayajtcixp tijaty.

²⁹ Ca' mgápxcixipy jibic ayuc. Cápxcix oy ayuc huidibi jëbi migüg ajcxy jâygidaaccixy, huidibi pubejtp etz jajyeegy je mbijcin, huidibi yejcp oy'ajtin ma pin ajcxy amido'ijtp. ³⁰ Ca' huaad mgapxcixy mmiydaaccixy ayuc huidibi yajjotmaybijcp je Espíritu Santo huidibi Dios yjé'ajtp. Je Espíritu Santo huidibi müich ajcxy müd ma m'jot mhuinma'n, yi' je' huidibi tiy'ajt yejcp co müich ajcxy Dios yjây'ajtigixy, co anajty Cristo ymiñ ya naaxhuñ jadüg'oc huin'it mbadaangixy jugy'ajtin etz tzinaayin huidibi ca' ycixipy ytgoyipy ni mina.

³¹ Jajqueecix yi jibicpi ma ajcxy m'jot mhuinma'n, jadu'n nej co m'jot mhuinma'n ta'm m'jihuüyigixy, jadu'n nej co tzojc m'jotma'tcootcixy, jadu'n nej co mnaym'jotmá'tigixy, jadu'n nej co mnayhuin'ójigixy najyijp'ójigixy. Ca' huaad mmigüg mnigapxcixy mni'ojüyigixy. Ca' jibicpi mnijot'ajt'adütcixy müd ajcxy mmigüg ycixpi. ³² Hue' janchtiy oybi mhuinmáaygixipy müd mmigüg ajcxy ycixpi. Nayba'ayóohuigixy nidüg nidüg. Nayméecigix nidüg nidüg. Com nañ jadu'n Dios ti huinmecxy müich ajcxy mbocy müd co myajpatcixy ma Cristo.

5

Nej jëbi chinaaygixy yi Dios yjây ajcxy

¹ Com müich ajcxy ñipatpy nejihuüy Dios y'ung'ajtigixy, e Dios ooy xychojccixy xyjihuiygixy, paady copicy naychójigixy najyihuüyigixy miñ xyipy, jadu'n nej Dios ti xychojccixy ti xyjihuiygixy. ² Jabom jabom ma mdzinaayin naychójigix najyihuüyigixy nidüg nidüg, tim jadu'n nej Cristo xychojcim xyjihuiyim, e yjugy'ajt yejcy müd ajt nbocy ycixpi, e jadu'n Dios jâygidacy nej Cristo ytuñ.

³ Müd co müich ajcxy Dios yjây'ajtigixy, paady tzinaaygixy müd huädz m'jot mhuinma'n. Ca' huaad m'oc'hüäatcixyñi m'occapxáatcixyñi yi tóxyjây migapxtigoyii, etz yi jibic ayuc capxi, yi jibic-huinma'n nijot'adi etz yi meen adzogii. ⁴ Müd co mDios müich ajcxy xyjây'ajtp, paady ycixp ca' huaad mgápxcixipy ayuc huidibi tzo'ydu'n yejcp, ni ca' huaad mgápxcixipy huidi ca' y'oyjâygidaacnity, etz ni ca' huaad mguxiicixy m'aniidaaccixy, com yi jibic ayuc ca' Dios jâygidägy. Tzoc yajnaxjim jâygidaacin ma Dios com Dios ti xyajhuaatzim ajt njot mhuinma'n. ⁵ Janch tiy'ajt jada co pinjaty tundigooyb müd huingbi tóxyjây, pinjaty jibic-huinma'n müd, ca' ajcxy padaangixy pidägy etz oy'ajtin ma Cristo etz ma Dios y'ane'min. Pinjaty meen adzojcp, Dios ca' tzocy, tim jadu'n nej yi' ca' tzocy pinjaty ojadajp tzaadzech etz quipxyech. ⁶ Ca' mnayyéjigixy co jây ajcxy xyhuin'ingixipy müd ayuc huidibi ca' ytiy'ajtiy ca'p choubaady. Müd co jây ajcxy capxcixy ayuc huidibi ca' ytiy'ajtiy, paady ycixpi Dios tzaachytuna'n tûg'óciy jây ajcxy huidibi capxcymidodacy yi' y'ayuc. ⁷ Ca' huaad müich ajcxy mnaymigüg'ajtigixy, ca' müd mnayyöymújigixy yi jadu'mbi jây ajcxy huidibi ca' capxymidoogixy Dios.

⁸ Jayijp ca'ni anajty mmibijccixy Cristo, ca'ni anajty Cristo ytiy'ajt ajcxy mnejhuuñy, e jadu'n nipaady anajty nej jihuñy myajpaady ajcxy agootztuum. Jadachambi mnejhuuñyixyp Cristo ytiy'ajt, e jadu'n nipaady nejjiuñy mdzinaaygixy ma tũg tiicxin. Paady ycixp jatym cuydungixyp Cristo ytiy'ajt ma yi mdzinaayin mjugy'ajtin ajcxy, jadu'n nej jebi huaad quẽxigx co mmibijccixy Cristo. ⁹ Co nmũd'ajtim Cristo ytiy'ajt, chi nduunim huidibi y'oyip, huidibi tudãgyip, huidibi tiy'ajtip. ¹⁰ Ixpjccix je tiy'ajt huidibi Dios yjãygidacpy. ¹¹ Ca' miich ajcxy mnaymigũg'ãjtigixy mĩd yi jãj ajcxy huidibi yajpatcixp agootztuum, huidibi tungixy huidibi Dios ca' jãygidãgy. Miich ajcxy capxhuijcx mĩd Dios ytiy'ajt yi' ajcxy huidibi agootztuum tzinaayb. ¹² Tzo yduunim ajt co jay nigapxcixy nĩmĩydaaccixy je jibicpi huidibi ajcxy ytumyb ayũch ameech. ¹³ Co n'ixquĩpxim yi jadu'mbi jãj ajcxy ayuc mĩd Dios y'ayuc, chi nĩguẽxigx pen janch tiy'ajt o pen ca' ytiy'ajtiny, jadu'n nipaady nej ti nyajpidzĩmim je ajcxy ayuc ma yi agootztuum, etz nbidaacim ma yi tiicxin. ¹⁴ Paady ycixpi Dios y'ayuc jadu'n ymĩnañ:

Mãyhuijip miich ajcxy huidibi jadu'n nipatp nejjiuñy mdzachmaagixyp. Jugypijccix miich ajcxy huidibi jadu'n nipaady nejjiuñy ti m'õccixy. Cristo xycodĩccixixpy mĩd yi' ytiy'ajt.

¹⁵ Paady naygũend'ãjtigixy huidibi tiy'ajt yajtungixp ma yi chinaayin. Tzinaaygix jadu'n nejjiuñy mnejhuuñyixy Cristo ytiy'ajt, e ca' mdzinaaygixy jadu'n nej huidibi ajcxy ca' nejjiuñyixy Cristo ytiy'ajt. ¹⁶ Ni'ix'ĩjtĩcix jabom jebi mguydungixy Cristo ytiy'ajt. Jadachambi xĩ tiempo mayjãj ytundigooygixy mĩd Cristo ytiy'ajt. ¹⁷ Ca' loci huĩnma'ñ myajtungixy, per nejhuuñyixyp nej Dios tzocy co mdũngixixpy. ¹⁸ Ca' huaad m'ĩjtĩcixy amũgy jãj, com yi jocnĩ xyajnĩccixixpy ayo'nduum. Nĩgi oy m'ĩjtĩcixy Dios yjĩhu'ĩ ymĩc'ajt may'amy ma ajcxy mĩot mhuĩnma'ñ. ¹⁹ Naymigãpxigixy mĩn xyipy mĩd yi salmo ayuc, mĩd yi himnos. Huĩn'ĩgix Dios mĩd je iy huidibi je Espĩritu Santo xymooygixyp. Huĩn'ĩgix etz ojajdajtcix Dios cixyot huĩnijot. ²⁰ Jatym yajnajxcixy jabom jabom jãygidaacin ma ajt nDios Teedy ma ajt nHuĩndzin Jesũs yxĩ, mĩd tũg'õcĩy ycixpi nej nduunim n'ayoohuĩm.

Nej huaad chinaaygixy pinjaty picychinaaygixy

²¹ Mĩd co miich ajcxy mhuĩndzĩgĩy Dios, paady ycixp miich ajcxy mnayyajmij'ãjtigixy mnaygapxymĩdõohuĩgixy mĩn xyipy.

²² Miich ajcxy tõxyjãydĩc yajmij'ajtcix capxymĩdooigx yi mĩãj ajcxy, tim jadu'n nej myajmij'ajtcixy mgapxymĩdooigx ajt nHuĩndzin Jesucristo. ²³ Com je tõxyjãj ñãj nigohuajc'ajtp ma ytõxyjĩc ymĩñ, tim jadu'n nej Cristo nigohuajc'aty ma yi mĩbijcpidĩc ymĩñ. Yi Cristo yi'je' huidibi nihuãnamb yajnĩdzõgamb yi mĩbijcpidĩc. ²⁴ Tim jadu'n nej yi mĩbijcpidĩc capxymĩdooigx Cristo, nañ tim jadu'n tzocy co je tõxyjãj ajcxy capxymĩdooigixipy yi ñãj ajcxy.

²⁵ Nañ jadu'n tzocy co je yẽydĩc huen tzocy jihuñy ytõxyjĩc, tim jadu'n nej Cristo tzocy jihuñy yi mĩbijcpidĩc, e paady ycixp yejĩc yi' yjugy'ajtin mĩd yi' ajcxy ycixpi. ²⁶ Cristo yejĩc yjugy'ajtin mĩd je mĩbijcpidĩc ycixpi, jĩgix jebi huĩnmecxy ajcxy ypocy, yajhuatzip ajcxy yjot yhuĩnma'ñ. Cristo yajhuatzip yi mĩbijcpidĩc ajcxy yjot yhuĩnma'ñ mĩd yi'ayuc etz co nĩbejt ajcxy mĩd nĩ. ²⁷ Jadu'n Cristo yajhuach yi mĩbijcpidĩc ajcxy yjot yhuĩnma'ñ, jĩgix jebi ajcxy nayguẽxĩgyb ma yi' yhuĩndu mĩd huãdz yjot yhuĩnma'ñ. Je mĩbijcpidĩc ajcxy nipaady nej tũg nĩjen huidibi huãdzĩp, ca' ma ytiy ymãchĩty. ²⁸ Jadu'n tzocy co je yẽydĩc huen tzocy jihuñy ytõxĩc tim jadu'n nej cĩ'm naychogyii. Yi yẽydĩc huidibi tzojcp jihuñy ytõxyjĩc nañ jadu'n cĩ'm ñaychogyii. ²⁹ Ca' jĩ ni pin huidibi ca' ñaychogyii cĩ'm. Hue' janchtiy ycuend'ajtpy etz yajcũxyii yajpedyii yci'm nĩnĩcx, tim jadu'n nej jãj ajcxy cuend'ajtcixy yci'm ñĩnĩcx nañ tim jadu'n Cristo ycuend'ajtpy yi mĩbijcpidĩc. ³⁰ Jadu'n Cristo cuend'ajtpy yi' yjãj, com jadu'n ajcxy nipaady nej yi' ñĩnĩcx. ³¹ Com copicy je yẽydĩc tzojcp jihuñy ytõxyjĩc jadu'n nej Cristo tzocy jihuñy yi mĩbijcpidĩc. Paady ycixp je yẽydĩc ixmadzĩpy ytaj yteedy, e ypudĩgĩhuipy ytõxyjĩc, e jadu'n ajcxy chinãhuipy nej jihuñy ytũgpajcity. ³² Ooy chachmijhuĩnma'ñty jada tiy'ajt huidibi yũch anajty iĩtp, e yi' iĩch jadu'n tĩjpy yi Cristo etz je mĩbijcpidĩc. ³³ Cuendipijccix jada tiy'ajt co nidũg nĩdũg miich yẽydĩctĩc ajcxy huidibi pijccixp copicy mdzogĩpy mĩjihuĩhuipy ajcxy mdõxyjĩc, tim jadu'n nej cĩ'm ajcxy mnaychogyii, e nañ jadu'n copicy co nidũg nidũg tõxyjãydĩc yajmij'adĩpy ñãj.

6

¹ Pi'ctĩc ajcxy huidibi mĩbijcp Jesucristo, copicy mgapxymĩdoohuipy ajcxy mdaj mdeedy, com tiy'ajt jadu'n. ² Yi Dios ycõtũcĩn huidibi mĩnaamb: "Yajmij'ajtcix mdaj mdeedy", yi' ooy ytmĩycopicyty. Nañ jadu'n co nguyduunim jada cõtũcĩn, huĩn'it Dios jecy xyajtzinaayim. ³ Co miich ajcxy jadu'n myajmij'adĩpy mdaj mdeedy, huĩn'it Dios xymõhuipy ajcxy jotcũc'ajtin, e nañ jadu'n xyajtzinaaygixipy jecy ya naaxhuĩñ.

⁴ E miich ajcxy huidibi ungdeedy'ajtcixp, ca' nigoo myajjotma'tcotcixy yi m'ung ajcxy. Ane'mgix yajyeccix yi m'ung ajcxy miid Dios y'ayuc yti'y'ajt, jaydëbi capxymidoogixipy ajcxy Dios.

⁵ Miich ajcxy huidibi tumbi'ajtp ya naaxhuiñ, capxymidoogix yi mhuindzin ajcxy, etz tungix miid tudägy'ajtin, etz yajmij'ajtcix etz tzig'ygix. Tim jadu'n nej jihuüy mgapxymidoogixy yi mHuindzin Jesucristo.

⁶ Tungix yajxon miid ajcxy mhuindzin. Ca' janch xypaat oy mic mduungixy co ajcxy mhuindzin jim xyhuindixcixy, e chi co je' yjihuäcni, chi nigoo mhuäccixni mdinaaygixni. Tungix jadu'n nej huaad jäy ytuungixy yi huidibi mijpidaaccixp Jesucristo. Tungix cixy'jot huinijot jadu'n nej Dios tzocy mdungixipy.

⁷ Tumbidijc ajcxy, tungix mdung cixy'jot huinijot, tim jadu'n nej jihuüy mdungixy je Huindzin Jesucristo ytung, e ca' yjäyungity. ⁸ Mnejhuüyb miich ajcxy co ajt nHuindzin Jesucristo oybi möhua'ñ nidüg nidüg jadu'n nej ti ytuuñ, ca' ñejity pen yci'mdung ytumyb, o pen yumb miid tüg huindzin.

⁹ Miich ajcxy huidibi nihuindzin'ajtp tumbidijc, oy'amy ane'mgix mdumbi ajcxy. Ca'm'adzigi'ygixipy ca' mdzaachytungixipy. Ajihuüyigixy co miich ajcxy etz nañ jadu'n mdumbi ajcxy miid ajcxy mHuindzin tzajpjoty, e yi mHuindzin tzajpjotypi quipxyjaty tiyduna'ñ nidüg'öciy miich ajcxy.

Je mic'ajt huidibi je mibijcpidijc ajcxy ypatcixyp miid Dios yjihui'ñ

¹⁰ Jadügnax, migüti'jc ajcxy, yi mmic'ajt mbaadip ajcxy ma ajt nHuindzin Jesucristo. Com Jesucristo ooy mic'ajt müdity, paady jëbi miich ajcxy mbatcixy yi mmic'ajtin ma yi'.

¹¹ Naygohuaanigixy miich ajcxy ma je mujcu' miid tüg'öciy tiy'ajt huidibi Dios xymooyim, huidi miid naygohuaanim ma je mujcu', e jadu'n ca'ydí je mujcu' xymimadaacim miid anii. Jadu'n Dios yti'y'ajt nipaady nej tujt etz pujxnijen huidibi soldados ajcxy miid naygohuaanigixy tzipjoty. ¹² Hue' janchtiy xymidzip'ajtim poj naaxhuiñ, ca'oybi, mujcu'dijc, etz tüg'öciy mic'ajt müdipi huidibi midzip'ajtp Dios ya naaxhuiñ etz jibiy tzajpjoty, ca'p iich ajt nmidzip'ajtim naaxhuiñjy. ¹³ Paady ycixp yajtungixy tüg'öciy mic'ajt etz tiy'ajt huidibi Dios ti xymooyigixy, jigix jëbi mmimadaaccixy je ca'oybi co anajty xyajtungigoyaangixy. E jadu'n jëbi mimadaaccixy je ca'oybi miid ajcxy mmibijcin. E co anajty ti mmimadactaaygixy, huin'it m'jtcixipy mic ma ajcxy mmibijcin. ¹⁴ Ca' m'ixtigihuaäccix ma ajcxy yi mmibijcin. Nayñi'ixi'ygixy miid Dios yti'y'ajt, jadu'n nej jäy ajcxy ñayhuindädzigixy co ytunaangixy.

Nayñi'ixi'ygixy tim jadu'n nej soldados ajcxy ñayñi'ixi'ygixy miid pujx nijen ma caach co chiptunaangixy. ¹⁵ Nayñi'ixi'ygixy miid Dios y'ayuc, jigix jëbi ajcxy nicxy mgapxhuäcxi Dios y'ayuc huidibi jotcu'j'ajtin yejcp. Co jadu'n mdungixipy, jadu'n nibaadip tim jadu'n nej soldados ajcxy ñayñi'ixi'ygixy co yajti'ygixy yzapato co yti'yöyaangixy. ¹⁶ Yi' huidibi jac copicyip ca'ydí jac ni ti, mibijccix tiydudägy Jesucristo. Miid ajcxy yi mmibijcin jëbi mnaygohuaanigixy ma je mujcu'. Miich ajcxy mmibijcin jadu'n nipaady nej tüg escudo huidibi je soldados ajcxy yajtumyb co ñaygohuaanigixy ma je tip huidibi yajnajtztübiyb müdi jün.

¹⁷ Nayñi'ixi'ygixy miid Cristo yti'y'ajt huidibi miid ajcxy m'alma xyajñdzooicp, tim jadu'n nipaady nej soldados ajcxy ñaygohuaanigixy co pidaaccixy ypujx cöjup co chiptunaangixy. Naygohuaanigixy miich ajcxy miid Dios y'ayuc huidibi jadu'n nipatp nej tüg espada huidibi je Espíritu Santo ti xymooyigixy. ¹⁸ Mibijctzoogix Dios miid tüg'öciy ycixpi huidibi ajcxy mdumyb. Mibijctzoogix etz pijctzoogix may'ajt ma Dios jabom jabom miid je Espíritu Santo ypubejin. Huüjy ycu'j m'jtcixipy, ca' mjetmetzcixyigixipy. Mibijctzoogix Dios miid tüg'öciy mibijcpidijc ajcxy ycixpi. ¹⁹ Nañ jadu'n mibijctzoogix Dios miid iich ycixpi, co huen xymöyich ayuc etz jotcu'j'ajtin, jigix jëbi ngapxhuäcxi'ibich huinmic jotmic yi' y'ayuc yti'y'ajt huidibi ca' pin jecy'ajty nejhuüygixy. ²⁰ Dios ti xyajñibicyich jada tung jëbi nyajnicxyich yi' y'ayuc yti'y'ajt ma je mayjäy ajcxy. Paady ycixp nyajpaadyich pujxtigoty cham. Tungix may'ajt mibijctzoogix Dios miid iich ycixpi co xyajjotmicpigipyich jigix jëbi ngapxhuäcxi'ibich yi' y'ayuc huinmic jotmic.

Capxpoocxin huidibi cogixi'yñip

²¹ Ooy ndzocy njihuüyich je Ti'quico, nañ jadu'n yi' ooy xypubejtyich ma ajt nHuindzin Jesucristo ytung. Yi Ti'quico miich ajcxy xyajmüdmüdyägi'p tüg'öciy je tiy'ajt nej nyajpaadyich ya, etz tüg'öciy tung huidibi ya ndumyibich. ²² Nguexaamyibich Ti'quico ma miich ajcxy jigix jëbi xymüdmüdyägi'p ajcxy jadu'n nej nyajpaadyich ya, e miid jada tiy'ajt jëbi miich ajcxy mjetcu'gyigixy.

²³ Huen Dios Teedy etz ajt nHuindzin Jesucristo may'ajt tunipy miid miich ajcxy, jigix jëbi jotcu'j mdzinaaygixy, etz nañ jadu'n jëbi mnaychöjigixy mnayjihui'ygixy miñ xyipy, etz jigix jëbi njacmibijccixy Cristo. ²⁴ Huen Dios may'ajt oy'ajt tunipy miid miich ajcxy huidibi

yajmij'ajtcixp ajt nHuindzin Jesucristo huinixi huinitiempo. E ca' m'ixmájtzcixip nimina nej ajcxy mijpidaaccixy Jesucristo. Jadu'n jada. Amén.

FILIPENSES

Yi Necy Huidibi San Pablo Yajniuejx Je Mibijcpidijc Jim Filipos

¹ Hich Pablo müd Timoteo tumbich ma Jesucristo ytung. Jada necy ich ajcxy nguejxpy ma tüg'óciy huidibi mibijcp Dios jim Filipos huidibi yajpaatp ma Jesucristo. Nañ jadu'n jada necy nyajniuejxycich yi' ajcxy mijtungmüdpí etz mutztungmüdpí ma Dios ytung. ² Huen ich ajt nDios Teedy etz ajt nHuindzin Jesucristo may'ajt etz oy'ajt tunipy müd müch ajcxy ycixpi etz xyajjotcugüigixipy.

Pablo mibijctzoy Dios müd je mibijcpidijc ycixpi

³ Naag'oc naag'oc njäyamechich müch ajcxy njatytimyajnaxpyyich jäygidaacin ma Dios müd müch ajcxy ycixpi. ⁴ Njatytimjotcuje'ajtpich ooy naag'oc naag'oc Dios nmibijctzooyich müd müch ajcxy ycixpi. ⁵ Jotcuje'ajtpich com müch ajcxy ti xypubéjtcixyich co ngapx-huäcxich Jesucristo y'ayuc ytiy'ajt. Jadu'n ti xypubéjtcixyich maabi nyajtzondägyich ngapx-huäcxich Jesucristo y'ayuc ixti chambaad. ⁶ Nejhuüybich tiydudägy co Dios ti yajtzondägy yi oybi ytung ma müch ajcxy mjot mhuinma'n, etz jactunaamní ma müch ajcxy mjot mhuinma'n ixti mabaad Jesucristo anajty ymüñ jadüg'oc ya naaxhuüñ müd y'ane'min etz ymic'ajt. ⁷ Ooy ytuädägyty co jadu'n jotcuje'ajtpich müd müch ajcxy ycixpi, com ooy ndzocy njihuüyich müch ajcxy. Dios may'ajt oy'ajt ti tuñ co ti xyajniübyich jada tung, etz müch ajcxy myajpaady quipxy müd ich ma Dios ytung, müd co müch ajcxy xyjäyamechich etz nañ xypubetyich ajcxy, huenma'amy ich nyajpaady, oy ixipy pujxtigoty, oy ixipy ma tungmüdpí yhuinduu co nnigapxpetyich Dios y'ayuc ytiy'ajt etz nañ nnigapxpetyich co yjanchity. ⁸ Dios ñejhuüyb jadu'n nej mijcajee ooy ndzocy njihuüyich müch ajcxy müd je tzojcin jihuüyín huidibi Jesucristo ti xymöyich. ⁹ Nmibijctzooybich Dios müd müch ajcxy ycixpi co xypubedipy ajcxy jigix jébi nigi mdzogipy mjihuüipy migügtijc, etz jigix ajcxy nigi m'ixipigipy je tiy'ajt tudägyty, etz nañ nigi mhuinjihuüipy tüg'óciy nej Dios tzocy co nduunim. ¹⁰ Nañ nmibijctzooybich Dios müd müch ajcxy ycixpi jigix jébi mnejhuüigixipy, etz nañ jigix jébi mhuin'ixcixipy huidibi jac'oy mdünggixipy. Co oy mdünggixipy, huin'it jébi mdzinäyagixy müd huädz jot huädz huinma'n, e ca' ni ti jotmay müch anajty ajcxy mmüdiñ, co anajty je xü je tiempo paady co Jesús anajty müñ ya naaxhuüñ jadüg'oc müd y'ane'min müd ymic'ajt. ¹¹ Dios nmibijctzooybich müd müch ajcxy ycixpi co ajcxy mbattähüip tüg'óciy oyjot oyhuinma'n, je oyjot oyhuinma'n huidibi Jesucristo tügpajc jébi xymoogyixy. E jadu'n jäy ajcxy capxpaadip Dios etz nañ huin'ügixip Dios co ajcxy ixipy nej tudägy mdzinaaygixy.

Müd ich, yi njugy'ajtich, yi' yi' Cristo

¹² Ndzojcpyich co müch ajcxy mnejhuüipy co müd je tzaachypy ycixpi huidibi nminaxyp nyajnaaxpyich ya pujxtigoty, nigi mayjäy ti midoy Jesús y'ayuc ytiy'ajt. ¹³ Jadu'n ti yhuimbizimy co tüg'óciy soldadtijc etz jacyadyi jäy ya ma je gobierno ymijtijc ti nejhuüydäy ajcxy co nbujxtijc'inäyich müd co nduüñich ma Jesucristo ytung. ¹⁴ Nañ jadu'n müd co nbujxtijc'inäyich, paady ycixpi yi jacyadyi mibijcpidijc ti yjotmicpijccixy ma ajt nHuindzin Jesucristo tung, etz ycapxhuäcx'adiichpy ajcxy Dios y'ayuc ytiy'ajt, ca' ma tzigüñ jihuüñ.

¹⁵ Janch tiy'ajt jada co nijëjity jäy capxhuäcxý je Cristo y'ayuc ytiy'ajt müd co ca' xyajmidzojccixy, etz nañ müd co xyajmidzip'ajtcixy. Nañ tiy'ajt jada co jacyadyi migügtijc xychojcp xyjihuüyb ajcxy, e capxhuäcxý ajcxy je Cristo y'ayuc ytiy'ajt müd oyjot oyhuinma'n. ¹⁶ Janch tiy'ajt co nijëjity migügtijc capxhuäcxixy Jesucristo y'ayuc müd co ñaygömayáñyí ci'm, ca' nminaanim ycapxhuäcxp ajcxy cixyot huinijot. Yi' ajcxy y'ixtaayb nej xyajtajipy xyajmayipyich, jadu'n nej ich pujxtigoty n'ityich. ¹⁷ Yi' ajcxy huidibi xychojcp xyjihuüybich ycapxhuäcxp ajcxy Cristo y'ayuc com ñejhuüyb ajcxy co ich yam n'ityich pujxtigoty, müd co ti nhuinma'n nbidägyich co nnigapxpeda'ñich Jesucristo y'ayuc ytiy'ajt. ¹⁸ Pen jäy ajcxy capxhuäcxp Cristo y'ayuc müd co ñaygömayáanigixy ci'm, o pen ycapxhuäcxp müd oyjot oyhuinma'n, ca' ñejity, jotcuje'ajtpich co capxhuäcxý ajcxy Jesucristo y'ayuc.

¹⁹ Com nnejhuüybich co müch ajcxy nmibijctzoogixy Dios müd ich ycixpi, e nañ nnejhuüybich co Jesucristo yjihuüñ ymic'ajt xypubetyich, paady nigi njotcugüyich, e nañ njijp'ixpyich co nbidzima'ñich pujxtigoty. ²⁰ Ndzojcpyich etz nañ njijp'ixpyich co nmimadactähua'ñich tüg'óciy ma ich mdzinaayin, e ca' ti tzöydu'n nbáadibich ma Dios yhuinduu. Ndzojcpyich nañ njijp'ixpyich co njaccapxhuäcxibich Jesucristo y'ayuc huinmic jotmic, jigix Jesucristo ycömay'idipy. Ca' ñejity pen jactzinaayb, o pen n'o'cpich. ²¹ Hich ndzinaayin njuugy'ajtin Cristo yi' ycixpi, e peni n'o'cpich, ti ich anajty mij nmadägy. ²² Pen njactzinaaybich, mayjäy oybi padañ müd ich ndung ycixpi. Ca' nnejhuüyich

huidibi jac'oy nhuin'ixipyich co tzojc n'ögibich, o co njactzinähuibich. ²³ Ooy chachchipity nnejhuühübyich huidibi jac'oy nhuin'ixipyich, co n'ögibich, o co njactzinähuibich. Hich ci'm nayjihuüiyich nigi jotcuyc co ixipy tzojc n'ögyich, jigix ixipy mic'amy nicxy n'ityich jilby tzejpjoty ma Cristo yajpaady. ²⁴ Per jaccopity müd miich ajcxy m'oy'ajtin ycixpi, co njactzinähuibich. ²⁵ Com nnejhuüybich co copicy njacpubeda'ñich miich ajcxy, paady nnejhuüybich co njactzinähuibich, e jigix jëbi nhubejtcixy ma Dios ytung etz ma yi mmibijcin. E jadu'n miich ajcxy nigi m'otcuyc'adipy ma mmibijcin. ²⁶ Miich ajcxy huidibi yajpaatp ma Jesucristo, nigi jotcuyc m'idipy co nicxy n'ida'ñich jadüg'oc ma miich ajcxy.

²⁷ Jëyi janchtiy co mdzinaayin mjugy'ajtin mi'ijtcixy jadu'n nej Cristo y'ayuc ytiy'ajt y'ane'ny. Pen nicxpich anajty ci'm ma miich ajcxy, o pen ca' m'nnicxyich, per ndzocypich co xypäadibich tiy'ajt co miich mic m'ijtcixy ma mmibijcin, tü'ciy cixy'jot huinijot mdungixy. Mic mjanchmidinaaygixy ni'amugi' yi mmibijcin, jadu'n nej ti mmijpidaaccixy Jesucristo ytiy'ajt, ²⁸ e ca' ajcxy mdzigihiip co jäy ajcxy xymidziptz'óongixipy, jada je' tiy'ajt co tigoyamb ajcxy y'alma, e nañ jada je' tiy'ajt co miich ajcxy chócixipy yi m'alma, e nañ jadu'n jada tiy'ajtp co Dios y'ity müd miich ajcxy. ²⁹ Dios may'ajt oy'ajt ti tuñ müd miich ajcxy ycixpi co yaj'oyiij nej jëbi miich ajcxy mibijccixy Jesucristo etz nañ nej jëbi tzaachypi mminajxcixy myajnajxcixy müd Jesucristo ycixpi. ³⁰ Hich etz miich ajcxy quipxyi ti nminajxim ti nyajnajxim tung ayo'n müd Jesucristo ycixpi. Miich ajcxy ti n'ixy ti mnejhuüy jadu'n nej iich ndung n'ayo'n ti nminaxy ti nyajnaxyich, co jim anajty n'ityich ma miich ajcxy. E nañ miich ajcxy mnejhuüyb nej iich chambaad nminaxy nyajnaxyich ndung n'ayo'nich müd Cristo ycixpi.

2

Cristo yung'ajt ñax'ajt etz ymij'ajt

¹ Pen Cristo miich ajcxy m'ot' amijmooyb müd yjihui'ñ müd ymic'ajt, pen ti jotcuyc'ajtin mbatcixy müd co Cristo xychojccixy xyjihuiygixy, pen yi' yjihui'ñ ymic'ajt ijtp ma miich ajcxy, pen mdzocjccixy m'ijhuüygixy etz nañ mba'ayooxixy migügtijc, ² jotcuyc'adipich müd co mdzinaaygixy ooy yajxon, xic xon, tügyi m'aychócigixy m'ayjihuiygixy miñ xyipy, tzinaaygixy quipxyjot quipxyhuinma'ñ. ³ Ca' ajcxy ti mdunipy müd mgi'ndzocin ycixpi. Nañ ni ca' amij agix naybidäacigixy co ti mdungixy. Tüg'óciy huidibi mdungixyp, mdunipy ajcxy müd yung naxy m'ot mhuinma'ñ. Nidüg nidüg myajmij'adipy nigi migügtijc, ca'ydi nej miich ci'm m'ayajmij'adyyi. ⁴ Ca' huaad pin naydügpajc yci'm'oy'ajt ixtäy, nañ jadu'n tzocy co migügtijc myajmidzogipy y'oy'ajt.

⁵ Pidaaccix m'ot mhuinma'ñ tü'ciy jadu'n nej Jesucristo anajty yhuinma'ñ müdity co ya naaxhuin' chinay. ⁶ Oy Jesucristo yjaDiosity ti yhuinma'ñpidägy co jëbi ixmach yi' ymij'ajtin huidibi anajty yjamüd. ⁷ Jesucristo ahuingujc pidaactay je m'ij'ajt huidibi anajty ymüd, e chi jadu'n chinay nej tüg tumbi co oy jadu'n ypi'c'aty jadu'n nej jäy. ⁸ E co jadu'n ñaybidaaci nej naaxhuin'jäy, chi yung naxy pidacy yjot yhuinma'ñ, e nañ capxymidooy Dios ixti mibaad ñayyejci, huen jäy yaj'ögyi. E ooy anajty cho'ydu'nity co jäy yaj'o'ci cruudzcixy. ⁹ Paady ycixp Dios ti cōmay jacnigi Jesucristo, e ti pidäci yi' yxi jaccōmay, ca'ydi jacpinjäy yxi. ¹⁰ Jadu'n Dios ti cōmay Jesús, jigix jëbi tüg'óciy tzejpjoty tzinaaybi etz tüg'óciy naaxhuin'jäy, etz tüg'óciy jäy ajcxy huidibi ti ñaaxtigiy, co anajty ajcxy nidüg'óciy midoogixy co Dios capxpaatp Jesús yxi, chi ycojxtinaay'ihuüydähuipy ajcxy ma yi' yhuinduu, etz y'ojadadipy ajcxy Jesús nidüg'óciy. ¹¹ E co nidüg'óciy ajcxy cōbigipy etz yajmij'adipy Jesucristo jadu'n nej ajcxy yHuindzin, jadu'n Dios Teedy ycōmay'ida'ñ.

Yi pin ajcxy Cristo mibijcp, yi' yi' ajcxy jadu'n nej tüg tūcxin jajin

¹² Migügtijc ajcxy huidibi ooy ndzocy njihuüyich, com Jesucristo jadu'n iixpejtin ti yecy, capxymidoogich cham co jigüeg nyajpaadyich ma miich ajcxy, tim jadu'n nej jayhuin iich miich ajcxy xycapxymidooy co n'ijtyich ma miich ajcxy. Naymijottigóoyigix jabom jabom mguydungixy Jesucristo ytiy'ajt etz mmi'ijtcix huädz m'ot huädz mhuinma'ñ. Tungix Dios ytung müd yung naxy ajcxy m'ot mhuinma'ñ, e huindzigiygix Dios. ¹³ Com Dios yi' tumb jabom jabom ma miich ajcxy m'ot mhuinma'ñ, jigix jëbi miich ajcxy mdunipy yi' ytung yi' chojcin cixy'jot huinijot jadu'n nej Dios tzocy.

¹⁴ Tungix cixy'jot huinijot Dios ytung, ca'y'aametzity yjotmetzity, nañ ni ca' müd tzip ejcin. ¹⁵⁻¹⁶ Jadu'n mdunipy ajcxy ca'ydi pinjaty yxigixy co ti mdundigooygixy. Miich ajcxy Dios xy'ung'adib, ca' m'niig'adiyb ajcxy ti jibicpi. Tzinaaygix müd oyjot oyhuinma'ñ ma yi' jäy ajcxy yajpaady hui di jibic-huinma'ñ tumb huidibi tundigooyb ma Dios ytiy'ajt. Co miich ajcxy myajhuäcxy Dios y'ayuc ytiy'ajt huidibi alma yjugy'ajtin mooyb ma jibicjäydijc ajcxy, jadu'n nipaady nej tüg madzä ytiicxy coodz. Pen jadu'n mdungixy, co anajty Cristo ymiñ jadüg'oc ya naaxhuin', jotcuyc'adipich co anajty nnejhuüyich co ca' iich ndung etz

nxii ndiempo yñadig'aty co n'ijtyich ma miich ajcxy. ¹⁷ Co n'ögibich miid Cristo ytung ycixpi, jadu'n nipaady nejihuüy #ch nni'py ti ndem ti nyocyich miid miich ajcxy ycixpi co ti ngapxhuäcxich Dios y'ayuc ma miich ajcxy. E co miich ajcxy ti mmijpidaaccixy #ch n'ayuc, jadu'n nipaady nejihuüy miich ajcxy ti myoxy ti mdoogy yi mjugy'ajtin ma Jesucristo. Jotcuje'ajtpich jadu'n co miich ajcxy mjugy'ajtin ti myoxy ti mdoogy ma Jesucristo. ¹⁸ Nañ jadu'n miich ajcxy mjotcuje'adipy quipxy miid #ch.

Timoteo etz Epafrodito

¹⁹ Pen #ch ajt nHuindzin Jesús tzojcpy, njijp'ijxypich co jëbi nguexipyich Timoteo ma miich ajcxy, jaydëbi njotcuje'adipyich co anajty yi' xyajnimiiñich tiy'ajt nej miich ajcxy myajpaady. ²⁰ Timoteo tügpaic huidibi huinma'n tü'ciy miid jadu'n nej #ch nhuinma'n nmüdidyich, etz nañ huidibi janch naybidaacip miid miich ajcxy m'oy'ajtin ycixpi. ²¹ Yi jacyadyii migügtijc huidibi yajpatp ma #ch, yajcopijcpy ajcxy yci'm'oy'ajtin, e ca' ajcxy yajcopicy Jesucristo ytung. ²² Miich ajcxy mnejhuüyb jadu'n nej Timoteo tudägy ytuñ miid #ch co ngapxhuäcxich Jesucristo y'ayuc ma miich ajcxy, tim jadu'n nej tüg ung ytuñ miid yteedy. ²³ Paady ycixp njijp'ijxypich co jëbi nguexyich Timoteo ma miich ajcxy mina anajty nnejhuüyich nej ycixpy #ch njotmay huidibi nmiidich ya. ²⁴ Nañ nmibijcypich ajt nHuindzin Jesucristo co yaj'ahuädzip #ch nni'a ndü'a co jëbi #ch ci'm nicxy tzojc n'ixyich miich ajcxy.

²⁵ Nañ jadu'n nhuinmaayich co copicy jadüg'oc nguexipyich ajt nmigüg Epafrodito ma miich ajcxy, yi' huidibi xypubejtpich ma ndung n'ayo'nich ya. Yi' huidibi miich ajcxy ti nguexy ma #ch, jëbi xypubetyich ma tüg'öciy huidijaty nyajmayajtyipich. ²⁶ Epafrodito ooy nijot'aty co jëbi nicxy y'ixaangixy miich ajcxy nidüg'öciy. Ooy yi' ytajy ymaay co miich ajcxy ti mnejhuüy co ypigyii. ²⁷ Janch tiy'ajt co Epafrodito ooy ti ypigyii, jago jago ti yca'ögy. Per Dios ti pa'ayoy Epafrodito, e nañ jadu'n ti xypa'ayooyich, jigix ca'ydi nigi ayo'n jotmay nbaadyich. ²⁸ Paady ycixp nigi ndzocyich co jëbi nguexipyich Epafrodito ma miich ajcxy jadüg'oc, jigix miich ajcxy mjotcugihuip co m'ixipy. E nañ jadu'n jëbi yquëgy #ch ndajin mayin miid yi' ycixpi. ²⁹ Cöbijcix Epafrodito jotcuje, jadu'n nej tüg migüg huidibi yajpaatp ma ajt nHuindzin Jesús. Yajmij'ajtcix tüg'öciy migügtijc huidibi yjugy'ajtin yojxp toocp miid Jesucristo ytung ycixpi, jadu'n nej yi' ytuñ. ³⁰ Com jago jago Epafrodito ti yca'ögy miid Cristo ytung ycixpi. Tzip tzaach yjugy'ajtin ti minaxy ti yajnaxy co ti xypubetyich ya. Com miich ajcxy ca' ci'm jëbi xypubejtcixyich ya, paady yi' miich ajcxy ti xycodinäy.

3

Je tudägy'ajt je janchypi

¹ Jadügnax, migügtijc ajcxy, jotcuje'ajtcix co myajpatcixy ma ajt nHuindzin Jesucristo. Ca' ti adzijpin njihuüyich co nnigapxpetyich jada tiy'ajt jadüg'oc huidibi jayhuin ti nyajni-jaynyigixy. Jadu'n nduñich miid miich ajcxy m'oy'ajtin ycixpi. ² Naygüendi'ajtigix miid yi' ajcxy y'ayuc huidibi ajcxy tundigooyb co ajcxy yajcopijcy yi' tiy'ajt huidibi pidacp ma jäy ñinix miid tzuic. Jibic jäy yi' ajcxy, jadu'n ajcxy nipaady nej uc. ³ Yi jäy ajcxy huidibi tiydudägy mibijcp Dios, ca' nminaanim je' yi' ajcxy huidibi tiy'ajttiyip ñinix. Yi Dios yjäy ajcxy janchypi, yi' ajcxy cixyot huinjot mibijcp mijpidacp Dios ytiy'ajt jadu'n nej #ch ajt. #ch ajt n'ojadajtim Dios miid ajt n'espäritu, etz miid ajt njot nhuinma'n. Jotcuje'ajtim com je' co nyajpaatim ma Cristo Jesús, e ca' nyajcopijcim tijaty tiy'ajt huidibi jäy ajcxy ytumyb. ⁴ Co ixypiy ytiy'ajttiy yi jadu'mbi huinma'n, jëbi ixypiy naygömayijich ci'm, com jecy'ajty ca' anajty ni pin huidibi nigi cuyduun yi jadu'mbi tiy'ajt ca'ydi #ch. ⁵ Co nduc-tuxchijyich ma anajty ti nma'xung'atych, chi oy nyajtiy'ajttiyich. Raza hebrea #ch, Ben-jamin nmij'ap'ajtpyich nmijteedy'ajtpyich. Nma'xung'ajtach hebreojäy. #ch ndaj ndeedy hebreojäy ajcxy anajty. Nañ nmijpidaacich fariseo y'ixpajin, jadu'n nej ajcxy yajnügejy judiojäy ycötujcin. ⁶ #ch janchmictägy anajty nguyduñich ngi'mhuinma'nich, ixti mabaad anajty n'ixhuidity nbahuidityich mictägy yi jäy ajcxy huidibi anajty mijpidacp Jesucristo. Ti nguydundäyich tüg'öciy judiojäy ycötujcin. Ni pin ca' huaad yxäyich co ti ndundigooyich ma yi' ajcxy ycötujcin. ⁷ Tüg'öciy yi judiojäy yhuinma'n huidibi ti nyajcopijcyich anajty, jadachambi ca' ytimychobaady miid #ch, co ti nmijpidägyich Cristo ytiy'ajt. ⁸ Jadachambi janchty, huidijaty anajty nyajcopijcyich, ti nnajtz'ixiäydäyich, jigix jëbi nnejhuüyich etz nguydunipich yajxon ajt nHuindzin Jesucristo oybi y'ayuc ytiy'ajt. Miid co ti nmijpidägyich Jesucristo, paady nnajtz'ixiäydaayich tüg'öciy huidibi anajty nyajcopijcypich, yi jadu'mbi huinma'n cham ca' chobaady miid #ch, jadu'n nipaady nej püx. Jadu'n nduñich miid Jesucristo ytiy'ajt oy'ajt ycixpi. ⁹ E jadu'n nduñich jigix jëbi nyajpaadyich ma Jesucristo. Jadu'n ti nnajtz'ixiäydäyich je tudägy'ajtin huidibi ti nbaadyich co ti nguyduñich Moisés ycötujcin je jecyip. Nañ jadu'n nduñich jigix jëbi nbáadibich je tudägy'ajtin huidibi Dios yejcyp co nmibijcim nmijpidaacim Jesucristo. ¹⁰ Ndzojcpyich co njacnejhuühibich Cristo y'ayuc ytiy'ajt. Nañ ndzojcpyich co njacnejhuühibich Cristo ymic'ajt, jadu'n nej yjugypijcy

co y'o'cy. Nañ ndzojpcyich co njacminaxipyich njacyajnaxipyich tzaachypí jadu'n nej Jesús minaxy yajnaxy tzaachypí, ixti mabaad jadu'n njatyich jadu'n nej Cristo yjajty co y'o'cy. ¹¹ E paady ycixpi njijp'ijxpyich co n'ögibich njugypigipyich jadüg'oc co anajty Dios yajjugypicy yi jây ajcxy tiibi y'öccixy.

Naymic'ijxim jigix nbaatim huidibi Dios ti xyaj'ahuaniiyim

¹² Ca' nminaanim jadu'n nmina'ñich co ti nmimadactâyich nej Cristo ti mimadactây. Nañ ni ca' jadu'n nmina'ñich co ñich njot nhuinma'ñ ti nyajhuäztâyich. Njactumnich, jigix jëbi Cristo y'oy'ajtin nbáadibich. Com Jesucristo ti xyhuin'ixyich jayijp, jaydëbi jada oy'ajtin nbáadibich. ¹³ Migügtijc ajcxy, ca'ñich ci'm naygömayijich, co ti nmimadactâyich Cristo y'oy'ajtin. Jada janchtiy ndumbyich, njâydigoydaaybich tüg'öciy huidibi ti ñaxy, e mictägy nduunich jëbi nbáadibich je oy'ajtin huidibi Dios jiiby tzejpjoty xymöhuaambich müd co nyajpaadyich ma Jesucristo. ¹⁴ Mictägy nduunich müd tüg'öciy nmic'ajtich, jigix jëbi nbáadibich je oy'ajtin huidibi Dios jiiby tzejpjoty xymöhuaambich. Jadu'n nipaady nejihuüy müd pin nayboyicquipxyijich co nbada'ñich tüg premio.

¹⁵ Ñich ajt ti nhuinma'ñ ycixni yca'pxni, tzoc panicxim je ixpijcin huidibi nmüd'ajtim. E pen nidügti miich ajcxy tigachtaty huinma'ñ müdity, Dios xyajnejhuihuip ajcxy je tiy'ajt. ¹⁶ Jada janchtiy, je tiy'ajt huidibi ti nbaatim copicy nguydundaayim, ca' n'ixmajtzm.

¹⁷ Migügtijc ajcxy, panicxcix ñich n'ijxpejt jadu'n nej ti ndzinäyich ma miich ajcxy. Nañ jadu'n miich ajcxy ixpejt mbigipy ma yi' ajcxy chinaayin huidibi ixpejt ti patcixy ma ñich. ¹⁸ Canaag'oc ti nnimaaygixy, e nnimaaygixy jadüg'oc müd tajin mayin co may nmigügtijc chinaaygixy jadu'n nej jihuüy midzip'ajtcixy je Cristo huidibi o'c cruudzcixy müd ajt nbocy ycixpi. ¹⁹ Dios yajtigoyip je'ajcxy y'alma. Yi' ajcxy ypidacpy yhuinma'ñ ma yi caayin uucin jüxcy ypicxy, ma yjapadyii huen yjot yhuinma'ñ pidaaccixy ma Dios. Yi' ajcxy chachñaygömaayigixy ci'm ma yjapadyii tzo'ydu'n jihuüyigixipy. Hue' pidaaccixy yhuinma'ñ ma naaxhuñ jây chinaayin. ²⁰ Ñich ajt hue' nyajpaatim njây'ajtim tzejpjoty, e njijp'ijxim co ñich ajt nHuindzin Jesucristo miinaamb ya naaxhuñ jadüg'oc, chona'ñ tzejpjoty, je huidibi xyajñidzögaanim ajt n'alma. ²¹ Jesucristo xyajtigadzaanim ajt nninix pocymüdpi, e xymöhuaanim tüg ninix jemybi oybi, tim jadu'n nej yi' ñinix müdity. Cristo xyajtigadzaanim ajt nninix müd yi' ymic'ajt huidibi müd ane'midây mimadactây.

4

Jotcuje'ajtcixy ajcxy ma je mHuindzin Jesús

¹ Com Jesús xyajtigadzaanim ajt nninix, paady ycixpi migügtijc huidibi ooy ndzocy njihuüyich, tiydudägy mibijccix ajt nHuindzin Jesucristo, ca' m'ixtigihuäccixy ma mmibijcin. Migügtijc ajcxy huidibi ooy nicxy nja'ixa'ñich, ooy njotcuje'atyich müd miich ajcxy ycixpi. Müd miich ajcxy ycixpi nbada'ñich n'oy'ajtin ma Dios.

² Nbijctzooybich may'ajt ma Evodia etz ma Síntique co huen ajcxy ixmajtcixy yi tzip etz huen naymigügpjicixy jadüg'oc, com hue'ajcxy yajpaady mbijcpi ma Cristo. ³ Miich migüg huidibi ti xypubetyich ma Cristo ytung, may'ajt nbijctzooybich ma miich co mgapx'oyihuipy je tzip ma ajcxy je metzpi töxyjäy. Yijibi metzpi töxyjäy tumb anajty ajcxy quipxy müd ñich co ngapxhuäcxyich Jesucristo y'ayuc ytiy'ajt. Yi' ajcxy xypubejtich quipxy müd Clemente etz yi' jacjadyii huidibi anajty tumb quipxy müd ñich. Jada metzpi töxyjäy ajcxy yxii ycojayiy ymiin ma Dios ñecy, je necy ma Dios müdity cojay je jây ajcxy yxii huidibi padamb jugy'ajtin huinixiibi.

⁴ Jotcuje'ajtcixy huinixii, müd co myajpatcixy ma ñich ajt nHuindzin Jesucristo. Jadüg'oc nğapxpetyich co huen jotcuje'ajtcixy. ⁵ Jadu'n tzinaaygix jadu'n nej jëbi jây ajcxy nejhuüyigixy co miich ajcxy myajtungixy mecxtujcin ma mdzinaayin. Com huington je xii je tiempo mina ymiina'ñ ñich ajt nHuindzin Jesucristo jadüg'oc.

⁶ Ca' ni ti mnidajcxy mnimaaygixy. Capxpizimdaaygix ma Dios tüg'öciy ti jotmay miich ajcxy mmüd. Mibijctzoogix Dios, e nañ yajnaxgix jâygidaacin ma Dios. ⁷ Co Dios mmibijctzoogixipy, huin'it ajcxy yi' xymöhuiip jotcuje'ajtin mijcajee, e mayñaaxhuñjây ajcxy ooy yhuinmay ahuididipy müd miich ajcxy m'oy'ajtin ycixpi. Co myajpaady ajcxy ma Cristo Jesús, paady ycixpi Dios xyajtzinähuiipy ajcxy jotcuje etz xymöhuiip ajcxy huinma'ñ tudägyip.

Tzojccix nijot'ajtcix huidibi oyip

⁸ Jadügnax, migügtijc ajcxy, pidaaccix mhuinma'ñ ma tüg'öciy tiy'ajt huidibi janchip, tüg'öciy tiy'ajt huidibi jëbi nyajmij'ajtim. Pidaaccix mhuinma'ñ ma tüg'öciy tiy'ajt huidibi tudägyip. Pidaaccix mhuinma'ñ ma tüg'öciy huinma'ñ huidi huädzip etz tüg'öciy huinma'ñ huidi oy jâygidaacni. Pidaaccix mhuinma'ñ ma tüg'öciy huinma'ñ huidibi jëbi yajcapxpaady. Huinmaaygix tüg'öciy jada oybi huinma'ñ etz huidibi huaad njâygidaacim.

⁹ Yajtungix je tiy'ajt huidibi ti nyaj'ixpijixy, etz je cõtujc huidibi ti nmooygixy, etz je ayuc huidibi ti mmidoogixy co ti ngapxyich. Etz nañ tungix je iixpejt huidibi ti nyecyich. Cuydungix jada tiy'ajt, huin'it yi Dios yajpaadipy ma miich ajcxy etz xyajjotujc'idipy ajcxy.

Filipenses ajcxy y'ofrendi müd Pablo ycipi

¹⁰ Ich ajt nHuindzin Jesucristo ti ooy xyajjotcugiyich co je tiy'ajt xypaadyich co miich ajcxy xyjäymechich jadüg'oc. Ca' nminaanim nminañich co miich ajcxy ti xyjäydgoydaayñich. Hue' anajty ycanibidzimy nej jëbi xypubejtcixyich. ¹¹ Ca' nminaanim jadu'n nminañich co ooy ti jaty nyajmayajtnich. Com ti nhuinmañ nbiidägyich co njotujc'adipyich müd tijaty nmüidich, oy tim minaañ tim minaatempo. ¹² Com ich ci'm nejhuüybich nej jay ajcxy y'ayoy yjottigooy, e nañ nejhuüybich nej jäy ajcxy chinäy co müd'aty tijaty may'amy. Ti nnejhuüydäyich nej jëbi ndzinäyich, nej jëbi nyajnajxich xii tiempo; pen cu'xyi ngaayich, o pen ca' cu'xyi ngayich, pen nmüidich conax, o pen ca' ti nmüididyich. ¹³ Jëbi ndzinähuiibich jotujc huenti huennejty, com Cristo xymic'ajtmooybich. ¹⁴ Ooy oy ti mdungixy co ti xypubejtcixyich ma ich n'ayo'n njotmay.

¹⁵ Jadu'n nej miich ajcxy huidi jim Filipos mnejhuüyb ajcxy, je taabi nyajtzondacyich co ngapxhuäcxyich Jesucristo y'ayuc ytiy'ajt, co ndzoofich jim Macedonia miich ajcxy ti xymiooxyich, e jac tigati ti mguejxcixy ma ich. E miich ajcxy jim Filipos huidibi mibijcp Jesús, miich ajcxy tügpajc xypubejtich ca' jac ni pin. ¹⁶ Co n'ijtyich jim Tesalónica miich ajcxy xyajnigüejiyich pubejtin metz'oc tugüg'oc, e jadu'n miich ajcxy xypubejtyich müd huidibi anajty nyajmayajtpich. ¹⁷ Ca' nminaanim ooy ndzachjijp'ixynich pubejtin, jada janchtiy ndzojcpyich co miich ajcxy nigi oy'ajtin mbaadipy co anajty mmejtzcixy ma Dios yhuinduu. ¹⁸ Ti ooy yhuaadiy yi mbubejtin ixti nyajconajxpich. Müd je pubejtin huidibi ti myajmigüejiyich Epafrodito cham nmüididyich ca'pxy, ca' ti n'ocyajmayajtnich. Müd jada pubejtin huidibi miich ajcxy ti xymöyich, ti ooy njäygidägyich, tim jadu'n nej Dios jäygidacy je poomjoc huidibi yajhuindzigüyi. ¹⁹ Ich nDios miich ajcxy xymöhuip tüg'öciy huidibi miich ajcxy myajmayajtpy. Mijcajee yi' miich ajcxy xymöhuip yi oybi mijpi oy'ajtin huidibi yi' ymüid ma yi Jesucristo. ²⁰ Huen ich ajt nDios Teedy cömay'idipy huinixi huinitiempo! Jadu'n jada. Amén.

Capxpooxcin huidibi cijxnip je necy

²¹ Tungix may'ajt capxpooxcix müd ich ycipi tüg'öciy migügtijc huidibi yajpatp ma ajt nHuindzin Jesucristo. Je migügtijc huidibi yajpatp müd ich nañ jadu'n xyajnigüejiyich capxpooxcin. ²² Tüg'öciy je mibijcpidijc huidibi yajpatp ya cajpjoty xyajnigüejiy ajcxy capxpooxcin, yi' ooy ytimyayijpity huidibi ajcxy yajpatp ma je mij ane'mbi César ycõtujctac xyajnigüejiy ajcxy capxpooxcin.

²³ Huen ich ajt nHuindzin Jesucristo may'ajt oy'ajt tunipy müd tüg'öciy miich ajcxy. Jadu'n ngapxycixyich. Amén.

COLOSENSES

Yi Necy Huidi San Pablo Yajniğuejx Je Mibijcpidijc Jim Colosas

¹ Hich Pablo, Dios jadu'n tzojcp, paady Jesucristo ti xyajniğicyich jëbi ngapxhuäcxyich yi 'y'ayuc. ² Hich müid ajt nmigüg Timoteo cham nguexyich jada necy ma müich ajcxy huidibi tziinaayb jim Colosas. Hue' nguexyich jada necy ma müich ajcxy huidibi Dios yjây'ajtip e mmibijccixy yi Cristo. Huen ich ajt nDios Teedy etz ajt nHuindzin Jesucristo may'ajt oy'ajt tunipy müid müich ajcxy etz xyajjotcugiygixip.

Pablo mibijctzoy Dios müid mibijcpidijc ycixpi

³ Jabom jabom co ich ajcxy Dios nmibijctzoy, chi xyajnaxich jäygidaacin ma Dios, nHuindzin Jesucristo ajt yTeedy, müid müich ajcxy ycixpi. ⁴⁻⁵ Ti nnejhuiyich jadu'n nej müich ajcxy ti mmibijccixy Cristo Jesús, e nañ jadu'n nej mdzocjccixy mjhuiyigixy tüg'öciy migügtijc. Müid co müich ajcxy mjijp'ixy co Dios müidity tijaty yujpcicy tzajpjoty huidibi müich ajcxy mbadamyb, paady ycixpi ajcxy mmibijccixy Cristo Jesús, e paady ycixpi mdzocjccixy mjhuiyigixy migügtijc. Co jayhuin migügtijc capxhuäcxy Jesucristo y'ayuc ytiy'ajt ma müich ajcxy, huin'it ti mnejhuiyigixy co Dios müidity tzajpjoty huidi njijp'ixyp mbadaangixp. ⁶ Jadayaabi tiy'ajt huidibi migügtijc ti capxhuäcxy ma müich ajcxy, nañ yajcapxhuäc'adüzn ma tüg'öciy naax cajp etz mayjây mijpidaaccixy. Müich ajcxy ti mmibijccixy jadu'n nej oga'n yajnimiydacy e chambaadni co Dios may'ajt ti tuñ müid jäy ajcxy ycixpi, e nañ müich ajcxy mnejhuiyb tiydudägy Dios ytiy'ajt. ⁷ Jada tiy'ajt ti xyajnejhuiyigixy je Epafras, ich ajt nmigüg huidibi ooy ndzocy njihuiyich, huidibi tudägy tumb ma Dios y'ayuc quipxy müid ich. Epafras ti xycodinäyich ma müich ajcxy, e tiydudägy müich ajcxy xyaj'ijxpicy Cristo ytiy'ajt. ⁸ Epafras ti xyajnejhuiyich tiy'ajt jadu'n nej müich ajcxy myajpatcixy, etz jadu'n nej je Espíritu Santo ymic'ajt xymoogixy, jigix ajcxy mdzogipy mjhuihuipy tüg'öciy migügtijc.

⁹ Müid jada ycixpi ich ajcxy jabom jabom Dios nmibijctzooyich müid müich ajcxy ycixpi, jadu'n nduüñich chondacy co oga'n nnejhuiyich co müich ajcxy ti mmijpidaaccixy Jesucristo, ixti chambaadni. Dios nmibijctzooybich co ajcxy mhuinjihuihuipy mnejhuihuipy tüg'öciy Dios chojcin. Dios nmibijctzooybich co yi' Espíritu Santo müich ajcxy xyaj'ijxpigipy xyajnejhuihuipy ajcxy tüg'öciy yi' ytiy'ajt etz yi' chojcin. ¹⁰ Dios nmibijctzooybich jaydëbi mguyduunip ajcxy Dios ytiy'ajt jadu'n nej huaad mibijcpidijc chinaaygixy huidibi yajpaatp ma ajt nHuindzin Jesús, mabaad Dios jäygidägy yajxon ajcxy mdzinaayin mjugy'ajtin. E nañ jaydëbi ajcxy mdunipy oyjây'ajtin. E nañ jaydëbi jabom jabom yjacuyjcpejtcixy yi m'ixpijcin ma Dios. ¹¹ Dios nmibijctzooybich jigix yi' xymöhuipy ajcxy mic'ajt jadu'n nej yi' müidity ymic'ajt mijpi, jigix jëbi müich ajcxy jotcujc myajnaxipy etz meextujctähuip tüg'öciy tzaachyp etz ayo'n. ¹² Dios nmibijctzooybich co müich ajcxy agujc jotcujc myajnaxipy Dioscojuyip ma Dios Teedy, com Dios Teedy ajt xyajpocynihuaatzim, e jadu'n ti xyñ'i'ixiym jëbi nbaatim tüg it lugar tzajpjoty quipxy müid tüg'öciy mibijcpidijc huidibi tiydudägy tziinaaygixp müid Dios ytiy'ajt, jadu'n nipaady nejihuy nej müich ajcxy mdzinây ma je tiicxin. ¹³ Ti Dios xyajniñhuädzictuutim ma yi jibic-huinma'n ma je mujcu' xy'ane'mim, jadu'n nipaady nejihuiy ti xyajpidzimim agootztuutim. Ti Dios xypidaacim ma y'ung y'ane'my, je y'ung huidibi yi' ooy tzocy ooy jihuü. ¹⁴ Dios y'ung ti xyajniñhuädzictuutim ma yi jibic-huinma'ny co ñi'py temy yojcy ma yi cruudz müid ajt nbocy ycixpi, e ti xypocyhuinmeecxim.

Co Cristo y'o'cy müid ajt nbocy ycixpi, chi jotcujc n'ijtim müid Dios

¹⁵ Ix' pin ti ixy Dios. Pinjaty ti ixy Dios y'ung, jadu'n nipaady nej ti ixy Dios. Dios y'ung yi' je' anajty tim jayijp ma anajty Dios ca' ti yaj'oyiñi. ¹⁶ Dios y'ung ti cojtay tüg'öciy tijaty yajpaatp jüby tzajpjoty etz ya naaxhuiñgixy. Dios y'ung cojtay tüg'öciy huidibi jëbi huaad n'ixim etz nañ cojtay huidibi ca' huaad pin ixy. Dios y'ung pidaactay tüg'öciy y'ane'min tüg'öciy mic'ajt ya naaxhuiñ, etz nañ jadu'n pidactay ane'min müid yi tzajpjoty tziinaaybi. Dios y'ung ti yajcojtây ti yaj'abadiydäy tijaty müid yigixp. ¹⁷ Je Cristo jayijp y'ane'm'ajt ymic'ajt ti paady, ca' jac ni pin. Je Cristo yaj'ijtpy tüg'öciy huidijaty ya yajpatp huijtz'ijtaayb. ¹⁸ Je Cristo ñihuindzin'ajttaayb ñigohuajc'ajttaayb, etz y'ane'mdaayb tüg'öciy jây huidibi mibijcip mijpidaacip. Je Cristo yajtzinaayb yajjugy'ajtpy tüg'öciy mibijcpidijc, com yi' je' huidibi jayijp ti yjugypicy co y'o'cy. Paady ycixp yi' cötujcin mijpi müidity. ¹⁹ Dios hue' tzojcy co tüg'öciy yi' ymic'ajt etz ymij'ajt yajpaadip ma yi' y'ung. ²⁰ Je naaxhuiñjây etz je tzajpjoty tziinaayb ajcxy ca'oy'ijtcixy müid Dios müid je mijpocy ycixpi. Dios oy jäygidägy ooy jotcujc nayjihuiyi co y'ung y'o'cy cruudzcixy müid je mijpocy ycixpi e jadu'n oyñy nej jëbi je naaxhuiñjây etz je tzajpjoty tziinaaybi ajcxy oy'ijtcixy müid Dios.

²¹⁻²² Miich ajcxy co anajty ca' mmibijccixy je Cristo, ca' anajty oy m'ijtcixy müd Dios. E jadu'n anajty m'ijtcixy nej tüg midzip ma Dios, müd co jibicipi anajty mdungixy, etz müdity ajcxy jibic ma m jot mhuinma'n. Per jadachambi je Cristo ti capx'oyiy miich ajcxy je mdzip m'eicin huidibi ajcxy müd Dios, co ti chinäy ya naaxhuin müd ünixc, e nañ co ti y'ögy müd miich ajcxy mbocy ycixpi. Müd co Cristo y'o'cy müd miich ajcxy mbocy ycixpi, jaydëbi myajpáatcixipy ma Dios yhuinduu janch oyjáy, janch huätzjáy, ca' ti pocy mmüidity, ca' ti xihuín yjac-hui'my ma Dios müd miich ajcxy ycixpi. ²³ Pen myajcopijccixyp tiydudägy je Cristo y'ayuc ytiy'ajt huidibi ti mmidoogixy, jadu'n nej mijjp'ijxcixy co je Cristo xyajñidzogaani ajcxy yi m'alma. Je ayuc huidibi miich ajcxy ti mmidooy, je' je' huidibi migügtijc ti capxhuäcxy etz ycapxhuäc'adiichñi ma tug'öciy naax cajp, jadu'n nej jëbi jáy ajcxy y'alma yajñidzögipy. Nañ jadu'n ñich, Pablo ngapxhuäcxypich jada ayuc quipxy müd nmigügtijcich.

Pablo cötuycmoy co ytunipy ma mibijcpidijc ajcxy

²⁴ Jotcujc nnayjihuijijich co tzaachypí nminaxy nyajnaxyich müd nninixcix müd miich ajcxy ycixpi e jadu'n njacyajcixy njacyajca'pxich je tzaachypí huidibi Cristo yajtzondac co yi' tzaachypí minaxy yajnaxy müd je mibijcpidijc ycixpi e je mibijcpidijc ni paady nej Cristo ünixc. ²⁵ Dios ti xyajñibicyich co ndunipyich müd yi jáy ajcxy huidibi mijpidaacip. Dios ti xypidägyich ma jada tung, jigix ngapxhuäcxibich tüg'öciy Dios y'ayuc ytiy'ajt ma tüg'öciy jáy ajcxy. ²⁶ Jecy'ajty canaag jimiit ti ñaxy co Dios ca'ni anajty yajñigüëxigy yi' ytiy'ajt. Cham Dios ti yajñigüëxigy yi' ytiy'ajt ma yi jáy ajcxy huidibi yi' yjáy'ajty. ²⁷ Dios oy nihuinmayiy co anajty yajnejhuíhua'n yi jáy ajcxy nidüg'öciy je oybi ayuc tiy'ajt huidibi jecy'ajty ca' pin nejhuíy. Yi' je' je' tiy'ajt co Cristo yajpaady ma miich ajcxy m jot mhuinma'n, paady ycixpi jëbi miich ajcxy mbaadip oy'ajtin jüby tzejpoty.

²⁸ ñich ajcxy ngapxhuäcxypich Cristo y'ayuc, n'ñihuijpyich ngapxhuijpyich, nyaj'ixpijpyich yajxon yi Cristo ytiy'ajt ma tüg'öciy jáy ajcxy, jaydëbi nyajquëxigibich ma Cristo yhuinduu nidüg nidüg mibijcpidijc ca'pxy yhuinma'n. ²⁹ Müd jada ycixpi nduñich mictägy müd tüg'öciy je nmic'ajtich huidibi Cristo xymooybich jabom jabom.

2

¹ Ndzojcpyich co miich ajcxy mnejhuíhuipy jadu'n nej mictägy nduunñich müd tajin mayin müd miich ajcxy ycixpi, etz müd yi mibijcpidijc huidi jim Laodicea ycixpi, etz nañ tüg'öciy mibijcpidijc ycixpi huidibi ti xy'ixyich ahuín ajijp. ² Mictägy nduunñich jaydëbi yi mibijcpidijc paadipy jotcujc'ajtin ma y'ay yjot, etz jaydëbi ajcxy ñaychöjcgixipy ñayjihuijigixipy mabaad jëbi m'ijtcixy yjot yhuinma'n tú'ciy. Mictägy nduunñich jaydëbi je mibijcpidijc m'ijtcixy mij jotcujc'ajtin co ajcxy huínjihuiydhuiib Dios ytiy'ajt, je tiy'ajt huidibi jecy'ajty anajty ca' pin nejhuíy, je Dios ytiy'ajt maabi Cristo Jesús. ³ Ma je Cristo jim tüg'öciy tiy'ajt janchypí etz xpijcin janchypí yajpaady. Jadu'n yi' ytiy'ajt etz y'ixpijcin nej tüg jugy'ajtin. ⁴ Jadu'n nimaagyixy jigix ca' pin oy cohuiñ'ini e midigihuipy oy ayuc ma miich ajcxy ooy ymibijcni, e ca'yajchity. ⁵ Ooy ñich ngadim jimity, ixna' guëxna' ma miich ajcxy myajpatcixy. ñich njot nahuinma'n ca' yi' jim ytigoy'ity ma miich ajcxy myajpatcixy. Jotcujc nayjihuijijich co n'ijxcixy yajxon myajtüyögyixy tüg'öciy etz mic yi mmibijcin müdity ajcxy ma Cristo.

⁶ E müd jada ycixpi jadu'n nej miich ajcxy ti mgöbijccixy je Huindzin Jesús oga'n'aty, jadu'n ajcxy jactzinaagyix jacjugy'ajtcix ma yi'. ⁷ Je tiy'ajt etz je mic'ajt jim yi' mbaatcixy ma Cristo. Yjacuyjcpedipy ajcxy yi m'ixpijcin ma Cristo ytiy'ajt jabom jabom. Ca' m'ixtigihuäcixy ma yi mmibijcin. Jacmibijcix jadu'n nej anajty ti nyaj'ixpijccixy Cristo ytiy'ajt. Jatytim myajñajxcixipy jaygidaacin ma Dios cixy jot huínjot jabom jabom.

Je jemybi jugy'ajtin huidibi Cristo xyajni'ixyim

⁸ Ooy naygüend'äjtigix, ca' myajhuin'ingixy, co huingjáy xyajhuinma'ñytigóoygixipy müd huingbi ayuc huingpi ixpijcin huidibi jáy ci'm ti cojy ti macxy, huidi ca' choobaady, huidi nigoo xychachhuin'ingixp müd canaag ayuc huinma'n jadu'n nej poj naaxhuin huinma'n. Yi jadu'mbi ixpijcin huidibi jáy ti cojy ti macxy ca' ajcxy paady ma Cristo.

⁹ Tüg'öciy nej Dios yajpaady nañ jadu'n yajpaady ma Cristo. ¹⁰ Com je Cristo ñihuindzin ajttaayb tüg'öciy ane'min ya naaxhuin, etz nañ jadu'n tzejpoty, paady ycixpi co miich ajcxy myajpaady ma Cristo, miich ajcxy müd ajttaayb tüg'öciy huidi Cristo ymüd. ¹¹ Co anajty Cristo miich ajcxy xyjáy'adyii, chi yi'pidacy ma ajcxy m jot mhuinma'n je tiy'ajt co myajpatcixy ma Dios. Hue' je' yajtigoooyb yi pocytunñi huinma'n. Jada je' je' tiy'ajt huidi Cristo Jesús ytidac, ca' miich ajcxy xyjáy'adyii. Ca' miich ajcxy mdy'ajttiy ma mñinixc. Tigach Jesús ytuun müd miich ajcxy, ca' yjadu'nity nej judíoáy ajcxy tiy'ajt pidaaccixy ma ünixc müd tzuic. ¹² Co ti mñibejtcixy müd Cristo yxi, jadu'n nipaady nejhuíy ti mnaaxtigüygixy quipxy müd Cristo co yi' ñaaxtigüy. Co ti mmijpidaaccixy Dios ymic'ajt jadu'n nipaady nejhuíy quipxy müd Cristo ti mjugypijccixy co Dios yajjugypijcy y'ung

co y'o'cy. ¹³ Co ca' anajty miich ajcxy Dios xyjāy'adyi, mīd miich anajty ajcxy pocytnūi huinma'n jadu'n miich anajty m'ijtcixy nej ōcpi. E co ti mmijpidaaccixy Cristo, Dios ti xyhuinmeecxi ajcxy tūg'ōciy mbocy, e jadu'n nipaady nejihuūy Dios ti xyajjugypijccixy quipxyi mīd Cristo. ¹⁴ Co Cristo y'o'cy ma yi cruudz mīd ajt nbocy ycixpi, jadu'n nipaady nejihuūy Dios ti xyjōdzim xihuūi huidi anajty xychaachytunaanim. Co Dios anajty yajtgooy iich ajt nxihuūi, jadu'n nipaady nejihuūy ti mijxojtpety je xihuūi necy ma Jesūs cruudz. ¹⁵ Co Cristo y'o'cy cruudzciy, chi ycōdigooy je ca'oybi ymic'ajt, etz je poj naaxhuūybi ymic'ajt. Chi je Cristo yajtzo'yduñ je ca'oybi etz je poj naaxhuūybi co yajcixy yajnaxy ma jāy yhuinduu.

Tzōccix nijot'ajtcix tūg'ōciy huidijaty tzomb ma Dios tzajpjoty

¹⁶ Ca' mdungixy cuenti co pinjaty ajcxy xy'agapxihiipy etz xyñimāhiipy:

—Amay'at jada jūcxy picy, etz amay'at jada xūi, etz amay'at je jemybo', etz amay'at yi Sábado xūi. ¹⁷ Jecy'ajty jāy jadu'n ti yajtuñ yijadu'mbi huinma'n, jayijpni ca' anajty Jesucristo ymiñi ya naaxhuūi. Jadachambi xūi tiempo Jesucristo ytiy'ajt tūgpajc yi' je' ooy ycopicyty. ¹⁸ Ca' huaad yi jāy ajcxy xypijci je Cristo y'oy'ajtin huidibi ajcxy mbadamyb. Yi' ajcxy huidi oygohuūiñiñi naybidaacip jadu'n nejihuūy ooy yung naxy ajcxy yjāy'ajtcixy, e ca' yjanchity. Yi' ajcxy yi' y'ojadajtpy ángeles. Yi' ajcxy naygōmayip co ti tiy'ajt patcixy ma cumāy, ninigoob ajcxy amij agix ñayjihuiyigixy mīd co tzachmijpidaaccixy yci'mhuinma'n etz ñinīcx chojcin. ¹⁹ Yi' jadu'mbi jāy ca' ajcxy yajpatcixy ma Cristo, je huidibi nigohuajc'ajtp tūg'ōciy mibijcpidijc. Je mibijcpidijc Cristo yajyeecp ma ajcxy ymibijcin jadu'n nej Dios tzocy, e yi' ajcxy patcixy tūg'ōciy mic'ajt etz tiy'ajt ma yi'. Mīd co Cristo nigohuajc'aty je mibijcpidijc, paady ajcxy y'ijtcixy tūgpicy, jadu'n ajcxy nipaady nej tūg jāy ñinīcx mīd ycohuajc huidi ane'm je ñinīcx etz mīd emy huidibi yajyūcxtaayb je ñinīcx.

²⁰⁻²¹ Co miich ajcxy ti mmibicy Cristo, jadu'n nipaady nejihuūy ti m'ōccixy quipxyi mīd Cristo, e nañ ti mbidzimigixy ma yi naaxhuūy jāy yhuinma'n xyaj'ane'ngixy. ¿Na'āmy co chambaad mjectzinaaygixy jadu'n nej jihuiy yi naaxhuūy jāy yhuinma'n xy'ane'ngixy? ¿Na'amy co mjaccuydungixy yi jāy ajcxy ycōtujcin huidibi mīnaamb co ca' huaad mgonīgy jada, ni ca' huaad mjūcxy jada, ni ca' huaad nidoñ yijimbi? ²² Tūg'ōciy huidibi ngonīcim, njūicxim, e nnidonim, co ytundāy, chi ytigoydāy. Yi' jadu'mbi huinma'n ci'm jāy ajcxy cojcixy macxcixy, e nañ ci'm jāy ajcxy yaj'ijxpjccixy huidibi ca' yajpaady ma Cristo. ²³ Yi' jadu'mbi cōtujcin jadu'n yquēxīgy nej ooy y'oyty ooy y'oymibijco'cnity, e ca' yjanchity. Co jāy ajcxy cuydungixy ooy ajcxy ñaybidaacigixy tudāgy, etz nañ chaachytungixy ñīcx ycohuajc. Yi' jadu'mbi cōtujcin ca' ti mic'ajt mūdity, com co ca' jadu'n jēb yajtīgy jibic-huinma'n yi jadu'mbi cōtujcin.

3

¹ Miich ajcxy huidibi ti mmibicy je Cristo jadu'n nipaady nejihuūy ti mjugypijccixy quipxyi mīd Cristo, e jemybi jugy'ajtin ti myajtzondaaccixy. ² Ixtaaygix je tiy'ajt huidibi tzomb tzajpjoty ma je Cristo yajpaady ma Dios ymīc a'oy'amybi, e yi' je' je mīj'ane'mbi. ³ Co ti mmibijccixy je Cristo jadu'n nipaady nejihuūy co ti m'o'ccixy mīd yi', etz ma je Cristo jemybi jugy'ajtin miich ajcxy ti mbaady. Jadachambi yi' mjugy'ajtin Cristo mīd c'am, e yi' yajpaatp ma Dios. ⁴ Co anajty je Cristo ñayguēxīgyi jādūg'oc ya naaxhuūi, huin'ti xūi miich ajcxy mnaybada'ñiyi mīd yi' jīlby tzajpjoty ma yi' oybi it.

Je jecy jugy'ajt etz je jemybi jugy'ajt

⁵ Yajtīgooygix je jibic-huinma'n huidibi miich ajcxy mīd, huidibi naaxhuūy jāy ajcxy yhuinma'n'ajtp. Ca' huaad mīdcapxtigoyipy tōxyjāydijc. Ca' huaad jibic-huinma'n mdunipy. Ca' huaad mdungixy ñinīcx chojcin, etz huidibi ca'p y'oyhuinma'ñity. Ca' huaad m'adzogipy comeen'adii, com ñipaapty jadu'n nej ajcxy huidibi tzaadzech quipychec ojadajtp. ⁶ Mīd co jāy ajcxy jadu'n ytundīgooygixy, paady ycixpi jaciūi Dios tzaachytunip jāy ajcxy huidibi ca' ycapxymīdooigixy yi' ycōtujcin. ⁷ Nañ jadu'n miich ajcxy yajijp co ca'ni anajty mmijpidaaccixy je Cristo, mdzinaaygixy anajty mīd jibic-huinma'n quipxy mīd je jacydyi naaxhuūy jāy co anajty mguydungixy yi' jāy ycōtujcin huidibi ca' ytiy'ajty. ⁸ Jadachambi ixmajtcix miich ajcxy yi' jibic-huinma'n jadu'n nej co migūg mmijotma'tcixy, jadu'n nej co ooy mjet'ambijccixy, jadu'n nej co jibic mdungixy, jadu'n nej co migūg mnigapxcixy ni'ojīyigixy, jadu'n nej co jibic ayuc mgapxcixy. ⁹ Ca' huaad mnayhuūi'ñigixy mīñ xyipy. Co ti mmibijccixy Cristo ti m'ixmajtcixy je jibicjot je jibic-huinma'n huidi anajty ajcxy mīd. ¹⁰ Jemybi jot jemybi huinma'n ti mbatcixy e Dios yjacyejcyp jemybi jot jemybi huinma'n jabom jabom ma miich ajcxy co m'ixpijccixy yi' ytiy'ajt. Jadu'n Dios tzocy co mjet mhuinma'n mbidāaccixipy jadu'n nej Cristo jot huinma'n mūdity, je Cristo huidibi ti yaj'oyy je jemybi jot jemybi yhuinma'n. ¹¹ Co jāy ajcxy mijpidāgy Cristo, chi tū'ciy ajcxy yajpaady ma

Dios, ca' ñejity co nijëjity ajcxy müd griegojây y'ixpijcin etz jacjadyii müd judiojây y'ixpijcin, ca' ñejity pen ti myajtiy'ajtiy o ca' mdy'ajtiyity. Ca' ñejity co nijëjity ajcxy jigüëgy choon, e ca' y'ixpiyity, etz jacjadyii ooy adzip ahua'n ñaybidäacigixy. Ca' ñejity co nijëjity ajcxy moso'ajtp etz jacjadyii huidibi ci'm naysmiduunip. Nidüg'öciy ajcxy tü'ciy ñaybidägyii co ajcxy mijpidägy Cristo. Nidüg'öciy mibijcpidijc tü'ciy pattay ajcxy mic'ajt oy'ajt ma Cristo, e nañ Cristo yajpaady ma nidüg'öciy ajcxy yjot yhuinma'ñ.

¹² Com Dios miich ajcxy ti xyhuin'ixy, e ti xychojccixy ti xyjihuiyigixy, e Dios ti xyajhuädzi ajcxy mjet mhuinma'ñ, paady ycixpi pidaaccix mjet mhuinma'ñ co mba'ayooohuaangixy migügtijc. Pidaaccix mjet mhuinma'ñ co oyjäy'ajtin mdunaangixy etz co nicy xemy mnaybidägaangixy. Pidaaccix mjet mhuinma'ñ yung naxy etz mamecxtujccixy migügtijc ajcxy. ¹³ Naymamecxtujccigix nidüg nidüg. Co nmigüg ajcxy xymidundigooyipy jëbi mhuinmeecxipy tim jadu'n nej ich ajt nHuindzin Jesucristo ti mecxy miich ajcxy mbocy. Com Cristo ti xyhuinmeecxixy, paady copicy miich ajcxy meecxip yi migüg huidibi ajcxy xymidundigooyb. ¹⁴ Mnaychójccigixy mnayjihuiyigixy nidüg nidüg. Co mnaychójccigixy nayjihuiyigixy, chi jëb huaad mdzinaaygixy müd mjet mhuinma'ñ tü'ciy. ¹⁵ Je jotcuyc'ajtin huidibi Dios xymooyim, huen ajcxy xy'ane'mi mjet mhuinma'ñ. Dios ti xyajniibjccixy, jaydëb tü'ciy m'ijtcixy müd mjet mhuinma'ñ. Mjatytim yajnaxipy ajcxy jâygidaacin ma Dios jabom jabom.

¹⁶ Naybidäacigix co je Cristo y'ayuc ytiy'ajt yajtiyidähuamyb ajcxy mjet mhuinma'ñ. Nayyaj'ixpijcgixy etz nay'ihuijigixy naygapxhuijigixy müd je Cristo y'ayuc ytiy'ajt, jadu'n nej Dios ijpjicjin yecy. Hgix Salmo etz igix himno etz yi iy huidibi je Espiritu Santo ypidägy ma mjet mhuinma'ñ, e jadu'n jâygidaacin m'ijtcixy ma ajcxy mjet mhuinma'ñ müd Dios ycixpi. ¹⁷ Huen ti ayuc huidibi ajcxy mgapxyp, huen ti tung huidibi ajcxy mdumby, hue' capxcix tungix müd ajt nHuindzin Jesús yxi. Etz jatytim yajnaxcixy Dioscojuyip ma Dios Teedy ma Jesucristo yxi.

Je mibijcpidijc ajcxy chinaayin ma ypijccinaaygixy

¹⁸ Miich töxyjädijc ajcxy, capxymidoogix mñây ajcxy com jadu'n ich ajt nHuindzin Jesucristo tzocy co mgapxymidohipy ajcxy mñây. ¹⁹ Miich yëdjctijc ajcxy, tzojccix jihuiyigixy ajcxy mdöxyijc, ca' ejcin mmi'idipy müd mdöxyijc. ²⁰ Miich ajcxy ung anäg, mgapxymidohipy ajcxy mdaj mdeedy müd tüg'öciy. Jadu'n Dios jâygidägy co ung anäg ajcxy capxymidooy ytaj yteedy. ²¹ Miich ajcxy ungdeedy ca' oyñinej mmigapxcixy m'ung m'anäg ajcxy. Co jadu'n oyñinej m'ojipy m'ung ajcxy, ca' yjecyity co nicy ajcxy taj may chinaaygixy yjugy'ajtcixy. ²² Miich ajcxy tumbidijc, capxymidoogix yi mHuindzin, ca' janch xypaat oy mic mdungixy co mhuindzin jim xyhuindixccixy, e chi co je' yjihuañi, chi nigoo mhuäccixni mdinaaygixni. Hue' janchtiy oy tungixy müd oyjot oyhuinma'ñ, com je' je' je' tiy'ajt co Dios mhuindzigiygixy. ²³ Je tung huidibi mdungixyp, tungix cixyot huinijot. ²⁴ Com miich ajcxy mnejhuiyb co Cristo xymöhuaangixy it lugar tzajpjoty, paady ycixpi oy tungixy jigix Cristo jâygidägy huidibi ajcxy mdumyb. ²⁵ Dios chaachytunipy pinjaty tundigooyb. Ca' Dios huin'ixpety tzaachytunipy jây.

4

¹ Miich ajcxy yajtumbidijc, yajtungix mdumbi nej ypadyii etz nej ytudägyity, com miich ajcxy mnejhuiyb co nañ müd miich ajcxy tüg mHuindzin jiiby tzajpjoty.

² Jabom jabom Dios mibijctzoogix, ca' m'ixmajtcixy Dios mibijctzoohuin. Huijy ycuyc m'idipy ajcxy etz jatytim yajnaxcixy jâygidaacin ma Dios co anajty mgapxtaaccixy. ³ Nañ jadu'n miich ajcxy tun may'ajt mibijctzoogix Dios müd ich ajcxy ycixpi. Mibijctzoogix Dios co huen it lugar xymöhuiybich ma jëbi ngapxhuäcxyich Dios y'ayuc ytiy'ajt. Ngapxhuäcxyñich je Cristo ytiy'ajt huidibi jecy'ajty anajty ca' pin nejhuiy. Müd co ngapxhuäcxyich Cristo ytiy'ajt, paady ycixp nyajpaadyich pujxtigoty. ⁴ Mibijctzoogix Dios müd ich ycixpi, jigix jëbi ngapxhuäcxyich je Cristo ytiy'ajt huädz oy, nej jây ajcxy jëb huädz huinjihuiyigixy, jadu'n nej ypadyii ngapxhuäcxyibich.

⁵ Tydudägy mdzinäaygixy müd yi jây ajcxy huidibi ca' mibijccixy Cristo. Yajnigüëxëccix miich ajcxy Dios ytung jabom jabom, ca' huaad xi tiempo myaj'ayooogixy. ⁶ Yi mgapxin yi mmiydaacin yajtungix oy'amy huindzigi'ñ'amy nej jëbi huaad jây ajcxy jâygidaaccixy. Copicy mhuinmayipy ajcxy jayijp nej jây huaad m'adzoogixy.

Je capxpoocxin huidibi cogixiyñip je ñecy

⁷ Tiquico co ñicxipy jim ma miich ajcxy, yi' xyyajmüdmidyäaccixipy tüg'öciy nej ytunyii yjadyii ma ich. Ooy ndzocy njihuiyich ich ajt nmigüg Tiquico. Yi' ooy tudägy ytuun quipxy müd ich ajcxy ma ajt nHuindzin Jesucristo ytung. ⁸ Paady yam nguexyich Tiquico ma miich ajcxy jigix ajcxy xyajmüdmidyägyip nej yam ich ajcxy nyajpaatcixy, etz nañ jigix xyjotmici migäpxcixipy. ⁹ Quipxy müd Tiquico yam nguexyich Onésimo, tüg ajt nmigüg

huidibi ooy ndzocy njihuŷyich, huidibi tudägy ti ytuuñ müd ich ajcxy. Onésimo miich ajcxy yi mmigogajp. Tíquico y Onésimo xyajmüdmıydägıj ajcxy tüg'óciy tijaty tuunıj jajtıp yam ma ich ajcxy.

¹⁰ Je Aristarco, huidibi pujxtıjc iñaayb quıpxy müd ich, cham quexy capxpooocxin ma miich ajcxy. Marcos, je Bernabé y'uch, cham quexy capxpooocxin nañ jadu'n ma miich ajcxy. Ti ich ayuc nguexyich jayhuin ma miich ajcxy co ıxyıpy ñıcxı Marcos ma miich ajcxy, mgöbigıpy ajcxy aguıj jotcuıj. ¹¹ Nañ jadu'n je Jesús huidibi jäy ytiıpy Justo, cham quexy capxpooocxin ma miich ajcxy. Yi Aristarco, Jesús etz Marcos yi' ajcxy ni tugıgıpaıj, judıojäy huidibi tumb müd ich ma Dios ytung co ngapxhuäcxıich Dios y'ane'mın. Yi nidugıgıpi ich ooy ti xyajjotcuıj'atyıch. ¹² Je Epafras, miich ajcxy mmigogajp je Cristo ytumbı, nañ jadu'n cham quexy capxpooocxin ma miich ajcxy. Je Epafras jabom jabom Dios mıbijctzoy müd miich ajcxy ycıxpi. Yi' mıbijctzoob Dios co miich ajcxy cuydunda' tüg'óciy je Cristo y'ayuc ytiy'ajt, etz co nayyéıgıgıx amumdüggıj ma Dios, e jadu'n ajcxy mguyduııpy nej Dios tzocy. ¹³ İich jébi tiy'ajt nyecyich co Epafras ooy jotmay jıhuıy müd miich ajcxy ycıxpi, etz nañ ooy nidajy nimay müd yi' ajcxy ycıxpi huidibi tzınaayb jım Laodicea etz jım Hierápolis. ¹⁴ Je Lucas, je doctor, huidibi je mıbijcpıdıjc ooy tzoıccıxy ooy jıhuııygıxy etz Dimas nañ cham ajcxy quexy capxpooocxin ma miich ajcxy.

¹⁵ Yajnajxcıx ich ngapxpooocxin ma yi mıbijcpıdıjc jım Laodicea. Nañ yajnajxcıx ich ngapxpooocxin ma yi Nıfas etz ma yi mıbijcpıdıjc huidibi yöıııııccıxp ma yi' ytiıj. ¹⁶ Co anajty jada necy ti mgapxtaaygıxy, tungıx may'ajt queıxnajxcıx jada necy ma yi mıbijcpıdıjc ajcxy jım Laodicea. Huen ajcxy nañ jadu'n capxcıxy jada necy, nañ jadu'n miich ajcxy capxcıx je necy huidibi ti nguexyich jım Laodicea. ¹⁷ Tungıx may'ajt mımähuıpy je Arquipo co huen cuyduıdıy je tung huidibi ich ajt nHuııdzın je Cristo ti yajrıbedyıı.

¹⁸ İich Pablo, ich cı'm njaaybıch jada capxpooocxin ma miich ajcxy. Ca' ajcxy mjäydgıgıyıpy co ich nbujxtıjc iñäy. Huen Dios may'ajt oy'ajt tunıpy müd miich ajcxy ycıxpi. Jadu'n ngapxcıxyıch. Amén.

1 TESALONICENSES

Yi Jayijp Necy Huidi San Pablo Yajniğuejx Je Mibijcpidijc Jim Tesalónica

¹ İich Pablo miid Silvano etz Timoteo cham nguexyich jada necy ma miich ajcxy jim Tesalónica huidibi yajpaatp ma Dios etz ma ajt nHuindzin Jesucristo. Huen iich ajt nDios Teedy etz ajt nHuindzin Jesucristo may'ajt oy'ajt tunipy miid miich ajcxy etz xyajjotcugiiygixip.

Je mibijcin huidibi anajty yejcpy iixpejt

² Jabom jabom iich ajcxy nyajnaaxyich jaygidaacin ma Dios miid tũg'óciy miich ajcxy ycixpi. Jabom jabom iich ajcxy Dios nmibijctzooyich miid miich ajcxy ycixpi nidũg'óciy. ³ Co Dios Teedy nmibijctzooyigixyich, chi njãymechich jadu'n nej miich ajcxy ti mmibijccixy Jesucristo, etz jadu'n nej oy mdungixy ma yi' ytung. Nañ njãymechich jadu'n nej oyjãy'ajtin mdungixy etz jadu'n nej mdzojccixy mjuhiiygixy mmigũgtijc. Nañ jãymejtzpich jadu'n nej miich ajcxy mjijp'ixy jabom jabom co iich ajt nHuindzin Jesucristo xymóhúaangixy it lugar jiiyb tzajpjoty, e ca' mjetmetzciiygixy. ⁴ Migũgtijc ajcxy, iich ajcxy nejhuuiyb co Dios xychojccixy xyjihuiygixy, e nañ iich ajcxy nejhuuiyb co Dios ti xyhuin'ijxcixy. ⁵ Co iich ajcxy jayhuin ngapxhuácxich, nañ nduunich mjuhina'ñ miid Dios yjihui'ñ ymic'ajt. Jotcujc nduunich ma miich ajcxy. Miich ajcxy mnejhuuiyb co tudãgy nduunich jigix jěbi mmijpidáaccixipy Jesús y'ayuc ytiy'ajt.

⁶ Oy anajty ooy mjaya'ixhuidijtcixy mjayaipahuidijtcixy co Dios y'ayuc ytiy'ajt jemybi ajcxy ti mgóbijccixy, e chi ajcxy ti mbadũdigiiygixy iich je n'ijxpejt, e nañ jadu'n ajt nHuindzin Jesús y'ijxpejt. ⁷ Co tzaachypi ti mminajxcixy ti myajnaajxcixy miid Jesucristo ycixpi, chi tiy'ajt ti myejccixy ma tũg'óciy mibijcpidijc jim Macedonia naaxjot etz jim Acaya naaxjot jadu'n nej jěbi ajcxy nañ jadu'n mijpidaaccixy Jesucristo y'ayuc ytiy'ajt. ⁸ E jadu'n miich ajcxy ti myejccixy je iixpejt miid Jesús y'ayuc ytiy'ajt, canan jěyi jim Macedonia etz Acaya, nañ ti myejccixy iixpejt ma canaag'it naax cajp. Je mayjãy ti nejhuuidãy jadu'n nej miich ajcxy ti mmibijccixy Jesús y'ayuc ytiy'ajt, paady ycixpi ca' ycopicyity nicxy iich ajcxy njacyajnimãy je mayjãy jadu'n nej miich ajcxy ti mmibijccixy. ⁹ Je mayjãy ma canaag'it naaxcajp ooy ñaymiidmiydáacigixy jadu'n nej iich oy ngogapxiyich miich ajcxy, etz nañ jadu'n nej iich miich ti xycóbijccixyich e nañ je mayjãy ñaymiidmiydáacigixy jadu'n nej ti m'ixmajtzcixy yi tzaadzech ojadadii, e ti mbadũdigiiygixy je Dios juugyp'i janchypi etz tudãgy. ¹⁰ Nañ jadu'n je mayjãy ajcxy ñaymiidmiydáacigixy jadu'n nej miich ajcxy m'ahuijxcixy mjijp'ijxcixy co Jesús, Dios y'ung, yhuimbida'ñ ya naaxhuin', chona'ñ tzajpjoty. Je huidibi Dios ti yajjugypijc co ti y'ógy. Yi' je' je Jesús huidi ti xychohuaanim ma yi mijpi tzaachypi huidibi Dios yquexamyb miid co jãy ajcxy chach pocytungixy.

2

Pablo ytung huibidi anajty ymiid jim Tesalónica

¹ Migũgtijc ajcxy, mnejhuuiyb ajcxy co ca' ñaadig'aty, co iich oy ngapxhuácx Dios y'ayuc ytiy'ajt ma miich ajcxy. ² Miich ajcxy mnejhuuiyb co jayijp ca'ni anajty nmechich ma miich ajcxy iich ajcxy ooy tzaachypi etz ayo'n ti nyajnaajxcixy jim Filipos. Ti jãy xyhuin'ooy xyijjp'ooyich. Co nmejchich ma miich ajcxy, ca' ñejity co tzaachypi ti mminaxyich ti nyajnaaxyich jayijp, chi Dios ti xyajjotmnicpicyich, jigix huinmic jotmic ngapxhuácxibich Jesús y'ayuc ytiy'ajt. Ti ngapxhuácxich Dios y'ayuc ma miich ajcxy, oy iich jãy anajty xysca'ixa'ñ xycatzoga'ñ. ³ Ca' iich ngapxhuácxich anii, ni jibic ayuc, e ni ngamiydágyich jibic ayuc jibic huinma'ñ nej huaad nhuin'ingixy. ⁴ Ca' ti nhuin'ingixy. Dios ti xyajniibicyich co ngapxhuácxibich yi' y'ayuc ytiy'ajt, e jadu'n nguyduunich. Ca' nduunich co huen jãy ajcxy jaygidãgy iich ndung. Jada janchity ndumyich jigix Dios jaygidãgipy iich ndung. Com Dios yi' nejhuuiyb nej jãy tũg'óciy yjot yhuinma'ñ miidity. ⁵ Miich ajcxy mnejhuuiyb co ca' nyajxondaaccixy miid ayuc oyjatyp'i huidi ca' choobaady. Nañ ni ca' iich ajcxy nhuinma'ñ 'ijxtãy nej jěbi iich ajcxy nmeenybaat. E Dios nañ nejhuuiyb co yjanchity jada. ⁶ Nañ ni ca' iich ajcxy njijp'ixy co jãy ajcxy xycómayipyich, ni miich ajcxy etz ni jac-huingbi jãy. Com je Cristo ti xyquexyich co ngapxhuácxibich yi' y'ayuc, paady ycixp jěbi ixyipy n'ane'myich co ixyipy miich ajcxy xyajmij'atyich etz xypubetyich, per ca' jadu'n ti nduunich. ⁷ Oygixy oy'amy ti nduunich ma miich ajcxy, jadu'n nej tũg ungday miidity y'ung y'anãg miid oyjot oyhuinma'ñ. ⁸ Ti iich miich ooy ndzojccixy njihuuiygixy, canan jěyi Dios y'ayuc ytiy'ajt ti nmooygixy, nañ naygiyegáanibich anajty ma yi o'cin miid miich ajcxy ycixpi. ⁹ Co jayhuin

ngapxhuáčxycich Dios y'ayuc ma miich ajcxy, mjàymejchpy miich ajcxy jadu'n nej ìch ajcxy nduun n'ayooyich anajty xim tzuum miid ìch ajcxy ngaayin n'uucin ycixpi. Ca' anajty n'adzibaangixy, paady ìch ajcxy nduun n'ayooyich xim tzuum miid ìch ajcxy ngaayin n'uucin ycixpi.

¹⁰ Miich ajcxy huidibi mibijcp mnejhuüy ajcxy, e nañ ñejhuüy Dios, co ìch ajcxy ndzinaayich ma miich ajcxy tudäy, huadz ìch anajty ajcxy njot nhuinma'ñ muididych. Ca' ma ndundigooyich ajcxy nej pin xy'ocñihuambedipych ajcxy. ¹¹ Mnejhuüy miich ajcxy nej n'ihuixicy ngapxhuixicy etz njotmicmigapxcicy nidüg nidüg, tim jadu'n nej tüg ungdeedy ihuüy capxhuüy y'ung y'anäg. ¹² Ti ngapxhuixicy co ooy chach copicyity co mdzinaayigixipy nej Dios jébi jägädägyipy yi mdzinaayin. Com yi' miich ajcxy ti xyhuin'ijxcicy jébi mdigüygixipy ma yi' chinaaydac, ma yi' müidity y'oy'ajtin ymij'ajtin.

¹³ Paady ycixpi nyajnajxpich jägidaacin ma Dios jabom jabom, jadu'n nej miich ajcxy anajty ti mmido'mbijccicy etz ti mgöbijccicy Dios y'ayuc ytiy'ajt huidi ngapxhuáčxich ma miich ajcxy. Ti mmibijccicy anajty co ìch ajcxy ti ngapxhuáčxycich Dios y'ayuc ytiy'ajt. Canan je' ti ngapxhuáčxycich ayuc huidi jäy ti cojy ti macxy. E janch tiy'ajt co Dios y'ayuc ytiy'ajt cham ytuñ ma miich ajcxy njot mhuinma'ñ, miich ajcxy huidibi mibijcp. ¹⁴ Migügtjic ajcxy, jadu'n ti mjaajtcicy jadu'n nej yjaity miid je judiojäy huidibi anajty tzinaayb jim Judea co ajcxy mijpidägy Dios y'ayuc ytiy'ajt, chi je ymögogajp ajcxy ooy y'ixhuidijti ypahuidijti. ¹⁵ Je judiojäy ymidziptzoon ìch ajt nHuindzin Jesús, e chi yaj'o'cy ajcxy, tim jadu'n nej ajcxy y'ap yteedy yaj'o'cy huidijaty anajty Dios y'ayuc najtzcapxüyipy jecy'ajty. Etz nañ jadu'n ajcxy xyajpidzimych jim ma ajcxy judiojäy chinäy. Dios ca' jadu'n jägädägy jadu'n nej ajcxy ytundigooy, nañ ooy ajcxy ymijotmädyi tüg'óciy jäy. ¹⁶ Yi judiojäy ajcxy ti capx'adujccicy co ca' huaad ngapxhuáčxycich je Cristo ytiy'ajt ma yi jäy ajcxy huidibi ca' yjudiojäy, nej huaad ajcxy y'alma ñidzóoccixipy. Co jadu'n ajcxy ytundigooy, chi ajcxy ooy nigi ypocy ñibety ma Dios. Per Dios ti ooy chip y'ejin pidacy ma judiojäy miid ajcxy ypocy ycixpi.

Pablo ñijot'ajtp co nicxy cogapxíhuaangixy yi mibijcpidijc

¹⁷ Migügtjic ajcxy, cham hueeni xii tiempo ti ñaxy ma ca' n'oc'ijxcixni ajcxy, per ca' ìch miich ajcxy njäydgoy. Ooy ìch ajcxy nja'nixca'ñ ma miich ajcxy jadüg'oc, e ca' y'oyiy nej ìch ajcxy nicxiybich ma miich ajcxy. ¹⁸ Ooy ìch ajcxy njanicxa'ñ anajty ma miich ajcxy. E ìch, Pablo, ci'm anajty njanicxa'ñich mejtz'oc tugüg'oc, e je mujcu' nni'aa ndü'aa ti xy'adujcich. ¹⁹ ¿Ti mij'ajt miich ajcxy mdijy njij'ijxpich? ¿Ma mdijy ajcxy nbada'ñich njotcuj'ajtin n'oy'ajtin? Co anajty ajt nHuindzin Jesucristo yhuimbity ya naaxhuñ, nbadaamybich jotcuj'ajtin etz oy'ajtin mij'ajtin miid je tiibi nduufich ma miich ajcxy co ti mmijpidäaccicy Dios y'ayuc ytiy'ajt. ²⁰ Miid miich ajcxy ycixpi nmüidich jotcuj'ajtin etz xondaacin.

3

¹⁻² Miid jada tajin mayin co ìch anajty ca' nmimadäga'ñ miid miich ajcxy ycixpi, paady ìch ajcxy nhuinma'ñ nbidägy co jébi nhui'ma'ñich naydüg jim Atenas, etz jébi nguexyich ìch ajt nmigüg Timoteo ma miich ajcxy. Timoteo nañ jadu'n ytuñ ma Dios ytung quipxyi miid ìch co ngapxhuáčxycich je Cristo y'ayuc ytiy'ajt oybi. Yi Timoteo ñigapxpedipy ñich n'ayuc etz yjotmicmigapxip ajcxy, jigix jac mic ajcxy myajpaadip ma mmibijcin. ³ Jadu'n Timoteo ytunipy ma miich ajcxy jigix ca' mhuinma'ñytigöogyixip miid je tzaachypi huidibi ajcxy mminajxyp myajnajxyp. Miich ajcxy mnejhuüy co copicy myajnaxipy ajcxy tzaachypi miid Jesucristo ycixpi. ⁴ Co oga' n'ijtyich ma miich ajcxy, chi ìch miich ajcxy nnimaayich co tzaachypi mminajxcixipy myajnajxcixipy miid Jesucristo ycixpi. E miich ajcxy cham mnejhuüyigixyp co janch tiy'ajt jadu'n nej nnimaaygixy, miid co cham tzaachypi mminajxcixy myajnajxcixy. ⁵ Com nejhuiybich co tzaachypi mminajxyp myajnajxyp ajcxy, paady ycixpi tajpbich maybich miid miich ajcxy ycixpi. E com ca' nmimadäga'ñich je tajin je mayin, paady ycixp ti nguexyich Timoteo ma miich ajcxy jaydëbi tiy'ajt xypaadibich pen tiydudägy miich ajcxy mmibicy. Tzigüybich anajty co ndijy je mujcu' ti xyajhuinma'ñytigöogyixy, etz jadu'n anajty ñaadigi'ada'ñ ìch ndung ma miich ajcxy.

⁶ Jadachambi Timoteo ti xyñihuimbityich, choon ma miich ajcxy jim Tesalónica, etz ti xyajnejhuüyich jadu'n nej miich ajcxy mmüidity mmibijcin, etz nañ ti xyajnejhuüyich jadu'n nej mnaychöjcgixy mnayjihuüyigixy nidüg nidüg. Timoteo nañ jadu'n xyñimaaybich jadu'n nej miich ajcxy xyjäymechich etz xychocy xyjihuüyich, etz nañ ooy miich ajcxy xyja'ixäängixyich jadüg'oc, jadu'n nej ìch miich ajcxy nañ jadu'n ooy nja'ixaangixy. ⁷ Migügtjic ajcxy, ooy capxy agujc ayuc agujc nyajpaadych. E co Timoteo ti mimiñ je oybi ayuc tiy'ajt jadu'n nej miich ajcxy mjacpanicy tiydudägy yi mibijcin, chi mij ooy ti njotcugiyich. ⁸ Jadachambi jébi njactzinäyich jotcujc, com ti nnejhuüyich co miich ajcxy ca' m'ixtighuáčxicy ma mmibijcin. ⁹ Nyajnajxpich jägidaacin ma Dios yhuinduu miid miich ajcxy ycixpi, miid co janch jotcujc nayjihuüyijich co miich ajcxy ca' m'ixtighuäg

ma mmibijcin. ¹⁰ Xim tzuum nmibijctzooyich Dios müd tüg'óciy njot nhuinma'nich, jigix Dios xyaj'ahuáatzibich nnii'aa ndü'aajich, jëbi nnicxyich ci'm ma miich ajcxy, jaydëbi njacyaj'ixpigiipy ajcxy Dios y'ayuc ytiy'ajt, e jadu'n jëbi ajcxy mjacyajca'pxy mmibijcin ma mjacyajtigoy'ijtcixy.

¹¹ Njijp'ijxypich co Dios Teedy ci'm etz ajt nHuindzin Jesús xyaj'ahuáatzibich nnii'aa ndü'aa jigix nicxy n'ijxcixy jadüg'oc. ¹² Ich ajcxy ndzojcpy co ajt nHuindzin Jesucristo xyajacmóoygixipy tzojcin jihuiyin, jigix nigi ajcxy mnaychogüyb mnayjihuihüyb miñ xyipy, e nañ nigi mdzójcxipy mjihiüigixipy tüg'óciy je mayjäy, tim jadu'n nej ich miich ajcxy ndzojcy njihuiy. ¹³ Ich ajcxy ndzojcpy co Dios xyaj'ijtip ajcxy mjot mhuinma'n tücciy ma Jesucristo ytiy'ajt, e ca' m'ixtigühuáccixy, jigix co anajty ich ajt nHuindzin Jesús ymiñ jadüg'oc ya naaxhuiñ müd tüg'óciy je mibijcpidijc huidibi müd huádz yjot yhuinma'n, jëbi miich ajcxy mnayguëxigüyb ma Dios Teedy yhuinduu müd huádz mjot mhuinma'n, ca' ti xihuin ma Dios müd miich ajcxy.

4

Je tzinaayin jugy'ajtin huidibi Dios yjäygidacyp

¹ Jadüg nax, migügtijc ajcxy, jadachambi may'ajt nbijctzooyich, e nyajnbijccixy müd ajt nHuindzin Jesucristo ycixpi co ajcxy mjaccuychinähuipy Dios y'ayuc ytiy'ajt, jadu'n nej ti nyaj'ixpicxyich miich ajcxy, etz mjaectzinähuipy ajcxy jadu'n nej jëbi Dios jäygidägy ajcxy mdzinaayin, jadu'n nej ti mdungixy.

² Miich ajcxy mnejhuiyb je cötujcin huidibi ti nyaj'ixpijccixy. Jada cötujcin ich ajt nHuindzin Jesucristo ti xyajnbicxyich. ³ Miich ajcxy mnejhuiyb je cötujcin jadu'n nej Dios tzocy co huádz jot huádz huinma'n myajtúngxixy ma yi mdzinaayin mjogy'ajtin. Ca' huaad mmigapxtigooygixy tüg töxyjäy. ⁴ Miich ajcxy mnejhuiyb Jesús ycötujcin co copicy nidüg nidüg yëydijc pigipy tüg töxyjäy etz yajmij'adip ytöxyijc, etz nañ müddzinähuipy müd oyjot oyhuinma'n. ⁵ Ca' Dios jadu'n tzocy co je yëydijc nijot'aty töxyjäy müd jibic-huinma'n, jadu'n nej yi jäy ajcxy y'idich huidibi ca' nejhuiy Dios ytiy'ajt. ⁶ Ca' huaad ni pin migapxtigooyi ymigüg ytöxyijc, com Dios yi' tzaachytunäb mijcajee pinjaty migapxtigooyb ymigüg ytöxyijc. Jada cötujcin ti nyajni'ixiygixy jayhuin. ⁷ Com Dios jadu'n ti xyhuin'ixim jigix oyjot oyhuinma'n ndunim, canan co ndunim jibic jot jibic-huinma'n. ⁸ Co tüg jäy ytundigoooy müd huingbi töxyjäy huidibi ca' töxyijc'adyii, hue' je' ñixiicpy yajxiicpy Dios ycötujcin, canan jäy ycötujcin ñixiicpy yajxiicpy, e nañ ñixiicpy yajxiicpy je Espíritu Santo huidibi Dios ti quexy ma ich ajt.

⁹ Miich ajcxy mnejhuiyb je cötujcin co copicy mdzogipy mjihiuhiipy ajcxy mmigügtijc huidibi tzinaayb jim Macedonia ñaaxjot. Migügtijc ajcxy, may'ajt nbijctzooyibich co jacnay-chójcigix jacnayjihuiyigix. ¹⁰ Janch tiy'ajt jadu'n co miich ajcxy mdzocy mjihiuy tüg'óciy je migügtijc huidi tzinaayb jim Macedonia ñaaxjot. Nmigügtijc ajcxy, may'ajt nbijctzooyibich co jacnaychójcigix nayjihuiyigixy etz mnayajmij'ajtigixy mij cajee. ¹¹ Jatyim tzinaaygix nicy xeemy, agujc jotcujc. Pidäg ajcxy mjot mhuinma'n ma mgi'mdzinaayin, etz nañ jatytim naymidünigix. Jada tiy'ajt ti najtzcapxiyi ajcxy jayhuin. ¹² Tungix mgi'mdung, jigix yi jäy ajcxy huidibi ca' ymibicy xyajmij'adip ajcxy, etz nañ jadu'n ca' myajmayjadipy ajcxy ni ti.

Co anajty je Huindzin Jesús ymiñ ya naaxhuiñ jadüg'oc

¹³ Migügtijc ajcxy, ndzojcpich co miich ajcxy mhuinjihuihuip je tiy'ajt ma je' yajpaady y'alma je migügtijc tiibi y'óccixy, jigix ca' mdájcxipy mmáygixipy, jadu'n nej je jäy ajcxy nidajcxy nimaygixy huidibi ca' mibijccixy co Jesús yajjugypiga'n jadüg'oc je tiibi ajcxy y'o'ccixy. ¹⁴ Jadu'n nej ich ajt nmibijcin co Jesús yjugypicy co y'o'cy, nañ jadu'n Dios yajjugypijctähua'n je öcpidijc huidijaty ajcxy mibijc Jesús.

¹⁵ Paady ycixpi ich miich ajcxy nnimaaygixy co ajt nHuindzin Jesús tiy'ajt ti yecy co ich ajt huidibi jacguy'ajtp co anajty Jesús yhuimbity ya naaxhuiñ, tügmucy xyajnicxaanim müd yi mibijcpidijc tiibi y'o'ccixy. Ca' ich ajt njayijp'adaanim yi tiibi y'o'ccixy, yi' ajcxy jayijp'adamb. ¹⁶ Ich ajt nHuindzin Jesús ci'm yhuimbida'n ya naaxhuiñ chona'n tzajpjoty müd ycötujcin, müd ymic'ajtin, e yi' mic capxamb ane'mamb. Huimbidamb Jesús quipxy müd tüg ängel mijtungmüdpí huidibi nañ jadu'n mic capxamb ane'mamb. E co anajty yhuimbity, chi Dios yajxuxa'n yi' ytrompeta, e tim huin'itiy Jesús xyajpidictähuaanim ya naaxhuiñ, e chi ajt naybadaanim müd Jesús jocjoty. ¹⁷ E chi ich ajt huidijaty anajty jactzinaayim, naybadaanim müd ajt nHuindzin Jesús jocjoty quipxy müd je'ajcxy huidibi anajty ti yjugypicy jadüg'oc. E jadu'n ndzinähuaanim huinixii huinitiempo müd ajt nHuindzin Jesús. ¹⁸ Müd jada ayuc tiy'ajt nayyajjotcugüiyigix miñ xyipy.

5

¹ Migügtijc ajcxy, ca' ycopicyity njacnijayiyigixipy jadu'n nej je xii je tiempo yca'pxa'ñ.
² Miich ajcxy mnejhuiyb co ich ajt nHuindzin Jesucristo yhuimbida'ñ ya naaxhuiñ tzaachytuna'ñ yi mayjäy müd ypocy ycixpi. Jesús miinaamb mina anajty je mayjäy ca' ti ocjip'ijxni. Jadu'n ymiina'ñ jadu'n nejjihuiy tüg meetzpi ymiñ coodz co ymeedza'ñ.
³ Co anajty je mayjäy yminaangixy: "Cham ooy jotcujc ndzinaayim, ca' ma tzip capxy", chi timitiina jotcömoñi Dios yajtigoya'ñ je naaxhuiñybi. Timitiina ayo'n ñiminiinyb jäy ajcxy. Tim jadu'n nipaady nej töxyjäydijc timitiina ypa'mbety co tiempo ti yhuaad'ajtni co y'ung yajma'xung'ada'ñ. E ni pin huaad cacöguëgipy je tzaachypy co Dios anajty ymiñ ya naaxhuiñ yajtigoydähua'ñ yi mayjäy. ⁴ Per migügtijc ajcxy müd miich ajcxy Dios ytiy'ajt, paady miich ca' jadu'n myajpaatcixni nejjihuiy mdzinaaygixy agootztuuby. Ca' ajcxy mgixipy mgüedipy mina anajty Jesús miñ jotcömoñi, jadu'n nej jäy nigoobi ycixy ycuety co ti ymeechyil. ⁵ Com tüg'öciy miich ajcxy Dios y'ayuc ytiy'ajt mhuinjihuiygixy, jadu'n nipaady jadu'n nejhuiy ti mgoximiygixy ti mgodixcixcixy. Ich ajt ca' njacyajpaatim agootztuuby. ⁶ Paady ycixpi ca' huaad njäydgooym Dios ytiy'ajt, ca' huaad nmi'öctigooym jadu'n nej yi jacjaydyii jäy ajcxy huidibi ca' cuendituñ Dios y'ayuc ytiy'ajt, jadu'n yi' ajcxy nipaady jadu'n nejjihuiy ajcxy ti ymi'öctigoy. Ijtcix ni'ixi müd tüg'öciy Dios y'ayuc ytiy'ajt. Mi'ijtcix huijy cujc mjet mhuinma'ñ. ⁷ Yi jäy ajcxy huidibi maab, coodz ajcxy ymây. Yi jäy ajcxy huidibi muucip, coodz ajcxy ymüucigixy. ⁸ Ich ajt huidibi nnejhuiyim Dios ytiy'ajt, copicy huijy ycujc ajt ndzinaayim, e nañ copicy nmibijcim Jesucristo e nañ naychójcigix nayjihuiygix miñ xyipy, jadu'n nipaady nej soldadtijc ñaygohuäänigixy müd pujx huidibi ymüd ma ycaach. E müd co njip'ijxim co Dios xyajndzögaanim ajt n'alma, jadu'n nipaady nejjihuiy soldadtijc ñaygohuäänigixy müd ypujxcójup. ⁹ Com Dios xyajjugy'ajtim co xyachaachytunaanim xyajtigoyaanim, Dios xyajjugy'ajtim nej n'alma jëbi paatim ndzoozin co nmijpidaacim ich ajt nHuindzin Jesucristo. ¹⁰ Jesucristo ti y'ögy müd ajt nbocy ycixpi, jigix jëbi huaad ndzinaayim jibiy tzejptoty quipxyi müd yi', ca' ñejity pen ti anajty n'o'cim o pen jicini anajty njugy'ajtim co anajty Jesucristo yhuimbity ya naaxhuiñ. ¹¹ Paady ycixpi jacnayjotmicmigäpxigix, e nañ jacnaybubéjtigix nidüg nidügti, tim jadu'n nej cham mdungixy.

Pablo capxhuijy yi mibijcpidijc ajcxy

¹² Migügtijc ajcxy, may'ajt nbijctzooybich co yajmij'ajtcixy ajcxy yi migügtijc huidibi tumb ma miich ajcxy müd Dios y'ayuc ycixpi. Yi' ajcxy huidibi xyajni'ixiyb Dios y'ayuc ytiy'ajt, yi' ajcxy xycapxhuijy müd ajt nHuindzin Jesucristo y'ayuc ytiy'ajt. ¹³ Copicy myajmij'ajtcixipy ooy, etz nañ mdzójcixipy müd je Dios ytung ycixpi huidibi ajcxy ytumyb ma miich ajcxy. Tzinaaygix jotcujc ca' ma tzip capxy.

¹⁴ Nañ jadu'n, migügtijc ajcxy, nyajnbijcipy ajcxy co myaj'ojip yi migüg ajcxy huidibi ca' ti dung tuna'ñ, etz nañ mjetmicmigapxip huidibi ajcxy tajp maayb, etz nañ mbubedipy ajcxy huidibi hueeni müd ymibijcin, etz yajtungix mecxtujcin müd tüg'öciy migügtijc.

¹⁵ Ich miich ajcxy nimaayb co ca' ni pin huaad yaj'ahuimbidity jibic ma ymigüg huidibi ti ymidundigoyil. Nañ jadu'n nimaaygixy co naymi'oyjäy'ajtgix nidüg nidügti. Nañ jadu'n oyjäy'ajtin mdunipy ajcxy müd tüg'öciy naaxhuiñyäj.

¹⁶ Jatytim müd'ajtcix jotcujc'ajtin jabom jabom. ¹⁷ Capxtaaccix etz mibijctzoogix Dios jabom jabom. ¹⁸ Yajnajxcix jäygidaacin ma Dios pen ji ajcxy mjaajtcixy ayoogixy nejaty, com Dios ooy yjotcujcity co je migügtijc huidibi mibijcp Cristo Jesús yajnaxy ajcxy jäygidaacin ma yi' jabom jabom müd tüg'öciy huidibi tuunip jaitip ma yi' ajcxy.

¹⁹ Capxymidoogix je Espiritu Santo, co ngacapxymidoohuim je Espiritu Santo huin'it nyajtigooym Dios yjihui'ñ ymic'ajt huidibi yajpatp ma ich ajt. ²⁰ Yajjotcujc'ajtcix huenpinity pin Dios y'ayucpidzimb ma miich ajcxy. ²¹ Jëyi janchity m'ixipy peni quipxyiyb müd Dios y'ayuc huidibi ajcxy ycapxyp. Mijpidaaccix je ayuc tiybi. ²² Imajtcix tüg'öciy jibic ayuc jibic-huinma'ñ.

²³ Dios nmibijctzooybich, je Dios huidibi yejcpy jotcujc'ajtin, co ajcxy xyajhuaatztaayip mjet mhuinma'ñ ma yi' jibicpi. Dios nmibijctzooybich co yi' ci'm xycuendi'ajtip huädz oy yi' m'alma ajcxy, etz yi' mjihui'ñ, etz mnñcx mgohuajc, ca' ma pocy yquëxgy, ixti mabaad anajty ich ajt nHuindzin Jesucristo ymiñ ya naaxhuiñ. ²⁴ Je Dios huidibi ti xyajmibijccixy, tudägy yi', e ycuudunipy yi' y'ayuc müd miich ajcxy.

Capxpoocxin huidibi cijxnip je necy

²⁵ Migügtijc ajcxy, mibijctzoogix Dios müd ich ajcxy ycixpi.

²⁶ Naygapxpoocxigix xic xon nidüg nidüg müd oyjot oyhuinma'ñ.

²⁷ Nhuindzin Jesucristo ajt ti xyajnbicyich jada tung, paady nyajnbijccixy co jada necy mgäpxcixipy ni'abidizimy ma tüg'öciy mibijcpidijc.

²⁸ Dios nmibijctzooybich co ñich ajt nHuindzin Jesucristo xyconuucxip ajcxy. Jadu'n jada.
Amén.

2 TESALONICENSES

Yi Mimetz Necy Huidi San Pablo Yajniaguejx Je Mibijcpidijc Jim Tesalónica

¹ Hich Pablo müd Silvano etz Timoteo cham nguexyich jada necy ma je migügtijc huidibi ajcxy jim Tesalónica yajpatp, etz yajpatcixy ma ich ajt nDios Teedy etz ajt nHuindzin Jesucristo. ² Huen ich ajt nDios Teedy etz ich ajt nHuindzin Jesucristo may'ajt oy'ajt tunipy müd miich ajcxy etz xyajjotcugüygixip.

Dios tiydunipy yi pocyjäydijc ajcxy co anajty Cristo ymiñ jadug'oc

³ Migügtijc ajcxy, njatytimyajnaxypich jabom jabom jäygidaacin ma Dios müd miich ajcxy ycixpi. E jadu'n copicy nyajnaxyich jäygidaacin ma Dios, com miich ajcxy mibijcipy Jesucristo nigi jabom jabom, etz nañ nigi jabom jabom naychócgixy nayjihuüygixy nidüg nidüg. ⁴ Com miich ajcxy ooy nuucxy meecxy m'ijtcixy ma yi tzaachypi etz ayo'n huidibi ajcxy mminajxyp myajnajxyp, e nañ ooy mmijpidaaccixy Jesucristo, paady ycixpi ngapxpaadyich miich ajcxy ma yi migügtijc huidibi mijpidaacp Dios majaty tüg tüg cajp. ⁵ Miich mmibijcin etz mmecxtujcin yi' je' i'xpejtíp co Dios ytuädgyity müd ajcxy ytiyduunin, e xycöbajccixy co jëbi mdigüygixipy ma yi' y'ane'mdac müd mmibijcin ycixpi. Müd jada ycixpi miich ajcxy mminajcixy myajnajcixy tzaachypi ayo'n.

⁶ Müd co Dios ytuädgyity, yi' tzaachytunamb yi jay ajcxy huidibi miich ajcxy xy'ixhuidijtp xypahuidijtp. ⁷ E nañ yi' ajcxy xymöhuipy jotcuje'ajtin tim jadu'n nej xymöhuäängixyich jotcuje'ajtin je huin'it xii co anajty ajt nHuindzin Jesucristo ñayguexigyii co anajty miññ ya naaxhuññ jadug'oc choon anajty tzejpyoty. Nañ je ángeles ajcxy mic'ajt müdmi inaamb quipxyi müd Jesucristo. Miinaamb Jesús müd ane'min cötujcin e yajtigoydähua'ñ pocyjäydijc, tim jadu'n nej tüg mijjin yajhuindigoydäy huen ytiijty. ⁸ Jesucristo chaachytunamyb je mayjäy ajcxy huidibi ca'p cöbicy Dios, etz huidibi ca' mijpidaacy ajt nHuindzin Jesucristo y'ayuc ytiy'at oybi. ⁹ Yi jay ajcxy huidibi miich ajcxy xy'ixhuidijtp xypahuidijtp, Dios yi' tzaachytunaañp ajcxy y'alma huinaxii huinitiempo. Dios ypidägañp yi' ajcxy y'alma jigüegy ma ni caminaxii ajcxy i'xcixyp je nHuindzin Jesucristo etz yi' y'oy'ajtin etz ymic'ajtin. ¹⁰ Jadu'n yjadipy je huin'it xii huin'it tiempo co anajty ajt nHuindzin Jesús miññ ya naaxhuññ, Jesús je mibijcpidijc yajmij'ada'ñ etz huindzigihua'ñ, e nañ jadu'n miich ajcxy myajmij'adipy etz mhuindzigihuiipy müd co anajty y'ayuc ajcxy ti mmibijcici, je ayuc huidibi ti ngapxhuäcxyich ma miich ajcxy.

¹¹ Paady ycixpi jabom jabom Dios mmibijctzooyich müd miich ajcxy ycixpi, jaydëbi tudägy ajcxy mdzinähuipy, e Dios huidibi ti xyhuin'i'xcixy yjäygidägyipy yi' miich ajcxy mdzinaayin. Nañ jadu'n Dios mmibijctzoogixy müd jada ycixpi co yi' cuydunipy huidibi miich ajcxy mbijctzooyb m'amidooyb müd oyjot oyhuinma'ñ. E nañ ycuydunipy yi' huidibi miich ajcxy mdumyb müd mmibijcin. ¹² Com Dios jadu'n tunamb ma miich ajcxy mjet mhuinma'ñ, paady ycixpi ajt nHuindzin Jesucristo yxii capxpaady y'idipy ma miich ajcxy mdzinaayin etz nañ jadu'n miich ajcxy capxpaady m'idipy ma Jesucristo. Jadu'n yjadipy com ich ajt nDios etz ajt nHuindzin Jesucristo may'ajt oy'ajt tuñ ma miich ajcxy.

2

Je jibic jäy huidibi huin'imb mayjäy

¹⁻² Migügtijc ajcxy, cham nyajmüdmüdaaccixy je xii je tiempo co anajty ajt nHuindzin Jesucristo huimbidaani jadug'oc ya naaxhuññ, etz naybadaanim müd yi'. Nminucxtaaccyich miich ajcxy, ca' mhuinma'ñyitgoogixy co pinjaty ymiña'ñ co Jesucristo ti yhuimbity. Ca' mmibijccixy, ca' jada ayuc yjanchity. Ca' mdungixy cuendi yi jay ajcxy y'ayuc huidibi minamb co tüg espíritu ti yajnejhuüygixy co yjadu'nity, o co muum a'ixxnaxy amidoonaxy capxy ayuc, o co muum i'xpizimzy jada ayuc ma tüg necy huidibi ajcxy ytiijpy co ich necy'adyii. ³ Ca' myajhuin'ingix janch ni nej. Jayijp ca'ni anajty je xii je tiempo yhuaad'atyni ma anajty Jesucristo ymiña'ñ jadug'oc ya naaxhuññ, mayjäy ajcxy midziptzona'ñ Dios tiydudägy co ñayguëxigüyb tüg jibic jäy mic jäy huidibi Dios yajcödigoyamy tücc'i'yi. ⁴ Jada jibic jäy ymidziptzonamyb tüg'öciy tijaty huidibi jäy Dios'ajtpy, e nañ ymidziptzonamyb huidibi jëbi yaj'ojadaty. E nañ yi' naybidägiib amij agix jadu'n nejhüiy yjacmijity ca'ydí Dios. E nañ yi' ypidägamb y'ane'mdac ma Dios ytiijc, e naybidägañp nejhuüy Diosity.

⁵ ¿Nej ca' m'jäymejtzcixy co jadu'n nimüydacyich tüg'öciy jada tiy'ajt jayhuin je taab anajty n'ityich ma miich ajcxy? ⁶ Jadachambi miich ajcxy mnejhuüy pín yajhuäcxijp jada mic jäy jada jibic jäy, jigix ca'ydí ñayguëxigyii jayijpni ma ca'ni tiempo yhuaad'atyni mina Dios

a'ixi'huip co ymiinipy. ⁷ Je mic jäy je jibic jäy cham ñi'ixi'hyb ameech je jibicpi huidibi y'tunamyb, jëyi y'tigoy'ityni mina je tū'aa y'ahuächy, je huidibi yajhuäcxijip. ⁸ Co anajty je jibic jäy y'tū'aa y'ahuäch, chi ajt nHuindzin Jesús yajcödigoyipy miid tüg puxujin. Jesús yajcödigoyipy je jibic jäy miid yi' y'oy'ajtin etz ymij'ajtin co anajty yhuimbity ya naaxhuin. ⁹ Je jibic jäy, yi' je' ymiid je mujcu' yhuinma'ñ etz ymic'ajt, e y'tunamyb mijhuinma'ñ etz i'xpejt huidibi anijip. ¹⁰ Je jibic jäy y'tunamyb tüg'óciy tijaty jibic-huinma'ñ jigix jëbi huin'ünip yi jäy ajcxy huidibi y'alma tigoyipy, miid co ca' ajcxy cöbijccixy, e nañ ca' tzojccixy Dios y'ayuc ytiy'ajt huidi miid jëbi y'alma ñidzooccixy. ¹¹⁻¹² E je' ycixpi co ca' ajcxy cöbiga'ñ Dios ytiy'ajt, paady Dios y'ixmadzäänigixy huen yajhuin'ingixy, huen mibijccixy je mujcu' y'anii, e miid jada ycixpi jëbi Dios yajtigooyi yi' ajcxy y'alma nidüg'óciy huidibi ca' mibiga'ñ Dios ytiy'ajt. Jacjotcujc ajcxy co jibic-huinma'ñ tungixy.

Je jäy ajcxy tübi Dios yhuin'ixyii jigix ypocyñihuädzipy

¹³ Migügtijc ajcxy huidibi ajt nHuindzin Jesucristo ooy tzocy jihuüy, jabom jabom nya-jnaxych jäygidaacin ma Dios miid miich ajcxy ycixpi, miid co Dios ti xyhuin'ijxcixy oga'n'aty, jigix jëbi m'alma ñidzooccixy miid Dios yjihui'ñ ymic'ajt, etz nañ miid Dios y'ayuc ytiy'ajt huidibi ti mmibijccixy. Je Dios yjihui'ñ ymic'ajt xyajhuaatzip ajcxy mjibicjot mjibic-huinma'ñ. ¹⁴ Paady ycixpi Dios ti xyhuin'ijxcixy, e nañ xyajmibijccixy miid yi' y'ayuc ytiy'ajt huidibi iich ajcxy ngapxhuäcxyp, jigix jëbi mbáatcixipy oy'ajtin ma iich ajt nHuindzin Jesucristo.

¹⁵ Paady migügtijc ajcxy, mibijccix tydudägy, ca' m'ixtiñihuäccixy, e ca' mjäydigooygixy je tiy'ajt huidibi iich ajcxy ti ngapxhuäcxyp ma miich ajcxy, etz jadu'n nej ti nnimaaygixy necyjoty. ¹⁶⁻¹⁷ Huen iich ajt nHuindzin Jesucristo ci'm etz ajt nDios Teedy may'ajt oy'ajt tunipy miid miich ajcxy, e xyajjotmicpijccixipy etz xyajmibijccixipy tydudägy, jigix oybi ayuc mgäpccixipy etz mdunipy ajcxy tüg'óciy oybi huinma'ñ. Iich ajt nDios Teedy etz iich ajt nHuindzin Jesucristo xychojcin xyjihui'yim, e ti xymooyim jotcujc'ajtin huinixiibi, e nañ ti tuñ may'ajt oy'ajt miid iich ajt ycixpi, jaydëbi njijp'ixxim oy'ajtin jilby tzaajpoty.

3

Mibijctzoogix Dios miid iich ajcxy ycixpi

¹ Jadügnax, migügtijc ajcxy, tungix may'ajt mibijctzoogix Dios miid iich ajcxy ycixpi, jigix jëbi ngapxhuäcxibich huinmic jotmic Jesús y'ayuc ytiy'ajt huingnaax huinggajp. E nañ mibijctzoogix Dios jëbi yi jäy ajcxy mijpidägy Jesús y'ayuc ytiy'ajt oybi, tim jadu'n nej miich ajcxy ti mmijpidaaccixy. ² Nañ mibijctzoogix Dios miid iich ajcxy ycixpi, jigix iich ajcxy Dios xyñihu'a'niy ycohua'nipy ma yi jäy ajcxy huidibi jibic-huinma'ñ ymiid, huidibi jibic iich ajcxy xytunamb, com mayjäy ca' mijpidägy Jesús y'ayuc ytiy'ajt. ³ Iich ajt nHuindzin Jesucristo tudägy yi', e xypubedip xypudigihuip ajcxy jigix miich ajcxy ca' m'jotmetzcihuipy ma yi mmibijcin, e nañ xypubedip ajcxy, jigix ca' xymimadaaccixipy je jibicjäy huidibi Dios ca' capxymido. ⁴ Iich ajt nHuindzin Jesús jotcujc'ajtin ti xymooygixych miid miich ajcxy ycixpi. Nmibijccyich co miich ajcxy mguydumyby je Dios y'ayuc ytiy'ajt huidibi nyaj'ixpijccixy etz mjaccuydunaamyb ajcxy. ⁵ Com ca' iich njaty nej njijpcogapxihuibich, chi nguejyich cogapxy, nnejhuñhua'ñich nej anajty ajcxy myajpatcixy ma yi mibijcin, tzigüyb iich anajty co nixxy mujcu' xypidaaccixy jibictuum, chi iich anajty ajcxy ndung ti ñaadiñ'aty.

Ooycopicyity co nduunim ma ajt ndung

⁶ Migügtijc ajcxy, miid ajt nHuindzin Jesús yxii etz ymic'ajt jada ane'min ajcxy nya-jnibijcyp, co copicy ajcxy m'ixmadzipy yi mmigüg huidibi ca' ytuna'ñ ma yci'mdung, etz huidibi ca' cuyduñ Dios ytiy'ajt jadu'n nej iich tiy'ajt ti nyecy. ⁷ Miich ajcxy mnejhuüyb jadu'n nej iich ti ndzinäyich ti njugy'atych co ti n'ityich ma miich ajcxy. E jëbi tiy'ajt ajcxy mbigipy ma iich ndzinaayin nej jëbi miich ajcxy mdzinaaygixy. Co anajty iich njimity ma miich ajcxy, ca' iich n'ixmajch ngi'mdung. ⁸ Tüg'óciy iich ajcxy ngaayin n'uucin ngojuuyich. Nduñ n'ayooyich anajty xhim tzuum, co anajty ca' n'adzba'ñich ni tüg. ⁹ Dios ti xymöyich mic'ajt ane'min co ixypy ajcxy mbubejtin ti nbijctzoohui o ti nbijctzoohui ixypy ajcxy mgaayin m'uucin, per ca' iich ajcxy jadu'n ti ndungixyich, jigix i'xpejt ajcxy mbigipy ma iich ajcxy. ¹⁰ Com co anajty n'ityich ma miich ajcxy jada cötujcin ajcxy nyajñibijc co pinjaty ca' ytuna'ñ, ca' ajcxy myajcayipy myaj'ügipy. ¹¹ Jadu'n iich ti nnejhuüy co nijëjity miich ajcxy ca' mdunaangixy mgi'mdung, jëyi myöygixy mnajxcixy jäyjin jäydijc. ¹² Yi jadu'mbi jäy ajcxy nyajñibijcypych miid iich ajt nHuindzin Jesús yxii co huen tungixy jabom jabom ma yci'mdung, ca' huaad pin adzijpcix anajxcix jigix jëbi paadip ajcxy ycaayin y'uucin.

¹³ Migügtijc ajcxy, oybi jatyim tungixy jabom jabom, ca' m'jotmetzcixyigixipy. ¹⁴ Pen nidügti ma miich ajcxy ca' tuñ cuendi jada ayuc huidibi ajcxy nyajñijayiyb, i'xcix pin je', e chi ca'

mjactúngxip cuendi, e ni ca' mïd myöymujc mnaxmújçixipy, jigix chöydunipy. ¹⁵ Ca' ajcxy huaad midzip'ajtcixy yi jäy ajcxy huidibi ca' yajxon cuyduñ Dios ytiy'ajt. Hue' janchtiy mgapxhuijçix oy'amy jadu'n nej tüg mibijcpi.

Capxpooçxin huidibi çijxnip je necy

¹⁶ Huen ïch ajt nHuindzin Jesucristo huidibi jotcuç'ajtin yejcp, ci'm xyajjotcuçigïygixipy jabom jabom oytim mïnaaxiijity oytim yma'ámyity. Huen je Huindzin Dios xypubejtcixy xypudigïygixy.

¹⁷ Hich, Pablo, jada capxpooçxin ci'm njaayich. Jadu'n nfirmajïyich tüg'óçiy ïch nnecy, e jadu'n mïich ajcxy mnejhuïhuipy co ïch jada necy'adyii. ¹⁸ Huen ïch ajt nHuindzin Jesucristo may'ajt oy'ajt tunipy mïd tüg'óçiy mïich ajcxy. Jadu'n jada. Amén.

1 TIMOTEO

Yi Jayjipi Necy Huidibi San Pablo Yajniguejxy Timoteo

¹ Ich Pablo, Cristo Jesús xya'apóstol'ajtpich. Yi Dios huidibi xyñihuuanim xyyajñidzoocim ajt n'alma, etz Cristo Jesús huidibi xymóhuuanim jugy'ajtin huinixibi, yi' ajcxy ti xya-jñibicyich co yi' y'ayuc ngapxhuáxcibich. ² Cham ich miich nijayiy Timoteo. Jadu'n njihuüy nej ich miich ngi'm'ung'adyii, co miich Dios ytiy'ajt ti mbaady ma ich. Huen Dios Teedy etz Cristo Jesús ich ajt nhuindzin may'ajt tunipy müd miich, huen xypa'ayoohuipy etz xyajjotcugihuipy.

Nijëjity jây yaj'ixpicy huidibi ca' ytiy'ajity

³ Hui'mi' miich jim Efeso, jadu'n nej nimay je taabi anajty ndzona'ñich jim Efeso nmicxa'ñich anajty Macedonia. Hui'mi' jim, jigix mgapx'adugipy je jây huidibi najtcapxhiyb je ayuc ca'p ytiy'ajity. ⁴ Mgapx'adugipy je nigoobi y'ayucity. Mgapx'adugipy yi' ajcxy huidibi tzachnigapxp tzachnimiydacpy yi judiojây ajcxy y'ayuc jadu'n nej huidibi ñi'ap'ajtpy ñideedy'ajtpy ajcxy. Yi jadu'mbi ayuc nigoob yajhuinma'ñydigoy pinjaty ixpijcp Dios ytiy'ajt.

⁵ Jadu'n Dios tzocy co huen jây ajcxy naychojctäyüi müd oyjot oyhuinma'ñ. Huen ajcxy Dios yajmij'aty janch cixyot huinijot. Co pin yajmij'aty Dios janch cixyot huinijot, ooy ajcxy oy ñayjihuiyigixy. ⁶ Nijëjity jây ajcxy ti xmajtzni je Dios ytiy'ajt, ti ajcxy jiptigiyiñi je ayuc huinma'ñ huidibi ca'p choobaady. ⁷ Ooy yi' ajcxy jayaj'ixpiga'ñ yi Dios ycötujcin, ni ca' huinjihuiyigixy huidibi ycapxcixyp, ni huidibi ajcxy ñigapxpejtpy.

⁸ Ich ajcxy nnejhuiyim co yi Dios ycötujcin oy yi' pen nyajtunim nej ypadyii nej ytiy'ajity. ⁹ Nejhuiyim co yi Dios ycötujcin ca' yi' tzaachytuñ oyjädijc, jëyi tzaachytuñ pin ca' capxymidoy Dios, pin midundigooyb Dios ycötujcin. Je Dios ycötujcin chaachytumyb jây huidibi ca' cuydungixy, jây ajcxy huidibi ca' ytuädgyity, jây huidibi ca' capxymidooigxy Dios, jây huidibi pocytungixy, jây huidibi ca' huindzigi'ñ yajtungixy müd Dios, jây ajcxy huidibi capxtigooyb, huidibi ytaj yteedy yaj'öccixy, huidibi jây yaj'öccixy. ¹⁰ Je Dios ycötujcin chaachytumyb pin migapxtigooyb töxyjäydijc etz yëydijctijc, huidibi miyëydijc ymähua'ñ. Dios nañ chaachytumyb je jây huidibi jây majtzp etz toognaxy, chaachytumyb indaacpidijc etz ñihuambejtpidijc. Je Dios chaachytumyb jacjadyii jây huidibi y'ayuc ca' ytiy'ajity nej Dios tiy'ajt müdity. ¹¹ Jadayaabi tiy'ajt huätzpi oybi tügiyb müd Jesucristo y'ayuc ytiy'ajt oybi huidibi ich nDios, je conuucxy yTeedy, ti xyyajñibicyich co ngapxhuáxcibich.

Pablo yjäygidacpy co Dios may'ajt ti tuñ müd yi'

¹² Ooy njäygidägyich co ich ajt nhuindzin Cristo Jesús ti xyajmicpicyich, yi' ti xy'ijxtiyyich, yi' ti xyajñibicyich Dios y'ayuc co ngapxhuáxcipich. ¹³ Ich jecy'ajty jibic anajty nigapxy ni'ojiiyich Jesús. N'ixhuidijty nbahuidijtyich Jesús yjây. Ich yi' ajcxy nmidundigooyich. Ti yi Dios xypa'ayooyich com ich jadu'n anajty ti n'adich müd co nganejhuiyich je tiy'ajt, ngamibicyich Jesús ngamijpidägyich Jesús. ¹⁴ Paady ycixpi ich ajt nHuindzin Dios may'ajt oy'ajt ti tuñ mijcajee müd ich, co ti xyajmibicyich Jesús. E Jesús ti xymóyich tzojcin jihuüyin müd yi' yjây ycixpi.

¹⁵ Ooy jada yjanchity, e nidüg'öciy jây ajcxy jëbi mibijccixy co Cristo Jesús miiñ ya naaxhuin co yajpocynihuädza'ñ pocyjäydijc. E ich nigi pocy nmüdidyich ca'ydi ni pinjây. ¹⁶ Müd jada ycixpi Dios ti xypa'ayooyich ti xymimecxtucyich, jigix co jây ajcxy ijxip nej Dios ti ytuñ müd ich, huin'it ajcxy mijpidägyipy yi' y'ayuc etz ypaadipy jugy'ajtin huinixibi ma Jesús. ¹⁷ Paady chojcp co ngömayim Dios, je rey huidibi ane'mb huinixi, huidibi niminaa yca'o'cy, etz nipin ca'ixy. Je Dios tügpajc huidibi Dios'ajtp huen ycömay'idipy cham etz tüg'öciy xii tiempo huidibi mimb cidacp.

¹⁸ Timoteo, ooy ich miich ndzocy njihuüy. Jada ayuc ich miich nyajnimaydaaby. Mihuindinähuip Dios y'ayuc ca' mhuinma'ñydigoyipy. Mgyudunipy jadu'n nej Dios y'ayucnajtcapxhiyb xy'ihuüy xycapxhuiy co mdung mnimajch. ¹⁹ Mihuindinähuip Dios y'ayuc ytiy'ajt, huin'it ca' jibic mnayjihuihuüy, jadu'n nej ajcxy jadyii huidibi nejhuüy je tiy'ajt, e ca' cuydungixy, e jadu'ñyi yhuinma'ñydigooigixy. ²⁰ Jadu'n nej Himeneo müd Alejandro ajcxy jaty, huidibi ich ti nyajcädigiyigixy je mujcu', jigix ajcxy yhuinma'ñymedzipy, ca'ydi yajjotma'tcixy Dios.

2

Jadu'n nej jëb Dios nmibijctzoohuim

¹ Yi' njatyajnimaaay co ooy ycopicyity capxtaaccixy mibijctzoogixy Dios etz yajnajxcixy Dioscojuyip müd tüg'öciy jây ajcxy ycixpi. ² Copicy nmibijctzoohuim ma Dios: reydiyc, ane'mbidijc etz codungdijc, jigix jëbi jotcujc ndzinaayim, ca' ma tzip. Co jadu'n nduunim,

yi' anajty ngoduunim Dios y'ayuc, etz huiñit tiydudägy ndzinaayim. ³ Com yi jadu'mbi huiñmañ ooy yi' y'oyity, e Dios huidibi ñich ajt n'alma yajñidzoocp, oy yi' jäygidägy. ⁴ Dios chojpcy co tüg'óciy je jäy ajcxy huen y'alma nidzoocxixy, huen ixcixy nejhuiyigixy Dios y'ayuc ytiy'ajt. ⁵ Tüg je' je nHuindzin'ajtim Dios, etz tüg je' je huingapxpi huidibi jëbi ytiy'ajty ma Dios miid ñich ajt ycixpi, etz huidibi jëb Dios y'ayuc capxnajxy ma ñich ajt: je huingapxpi, je' je' je jäy, e Cristo Jesús. ⁶ Cristo Jesús nayyojci naydooci miid ñich ajt nbocy ycixpi, ñaygiyejci huen jäy yaj'ögyii, jigix jëb ñich ajt nbidziimim ma je mujcu' anajty c'am xymiid'ajtim. Jadu'n nej Dios cham jäy yajnejhuiy co je tiempo yhuaad'ajtni, ⁷ paady Dios ti xyajñibicyich ngapxhuaçibich y'ayuc ytiy'ajt, etz Jesús xy'apóstol'adyiijich. Je tiy'ajt jada ngapxpich, ca' n'indägyich. Ti xyajñibicyich jada tung nej jëb huaad nyaj'ixpicyich, nej jëb huaad mibijccixy Dios, etz nyaj'ixpicyich Dios ytiy'ajt ma yi jäy ajcxy huidibi ca' yjudiojyity.

⁸ Ndzojpcyich co yi yëdyictijc huen mibijctzoogixy ojadajtcixy Dios ma tüg'óciy naymujctac miid oyjot oyhuinmañ, ca' y'adzip y'ahuan'ity, ca' y'ametz yjotmetzity. ⁹ Nañ jadu'n ndzojpcyich co yi töxyjädyic huen yhuut yxoix yajtungixy nej ypadyii, huidibi quixpapaady ajcxy paatip. Huen yhuut yxoix pidaaccixy nej töxyjädyic huidib tudägyip. Huen ycohuay cüdigy caaxigy nej ypadyii, ca' ymügütiyc huinnaxtugipy miid yhuut yxoix, ca' nayxójxigixy miid oori, miid perla, e miid tijaty ooy choohuity. ¹⁰ Ca' huaad töxyjädyic ñaygómäyigixy miid yhuut yxoix, huen janch yajcómayigixy miid y'oyjy'ajtin, jadu'n nej je jäy ajcxy tungixy huidibi ti ñaygiyëjigixy cixyot huinijot ma Dios. ¹¹ Co jäy ajcxy yaj'ixpicy Dios y'ayuc ma je naymujctac, huen töxyjädyic ajcxy amoyñi amidoo'ijtcixy miid yungnaxy yjot yhuinmañ. ¹² Yi töxyjädyic ca'p niducyich yaj'ixpigipy jäy ajcxy ma je naymujctac. E ni ca' ypadyii nicxy yëdyic ane'my. Huen ajcxy amoyñi y'ity. ¹³ Dios jayjip yajcojy Adán, jac'axam Eva, paady ycopicyi yi yëdyictijc huen ane'my yi töxyjädyic. ¹⁴ Adán ca' yajtzu'ijxy. Eva yajtzu'ijxy, je' ca' Dios capxymidooy. ¹⁵ Paady yi töxyjädyic ca' ypadyii nicxy nigohuajc'aty yi mibijcpidijc. Dios jotcuyc ñayjihuiyii miid co jëyi y'ung'ijxcixy, etz yajmij'ajtcixy Dios, etz tzojtaayigixy ymügütiyc, etz huen ajcxy cuydungixy Dios y'ayuc ytiy'ajt, etz huen tudägy jäy'ajtcixy miid oyjot oyhuinmañ.

3

Nej jëbi ytungixy huidibi ajcxy nigohuajc'ajtp

¹ Tiy'ajt jada nej jäy yminaangixy. Pen ji pin najtzogiy nigohuajc'adañ yi mibijcpidijc tüg yi' oybi anajty ytunamyb. ² Pin nigohuajc'ajtp yi mibijcpidijc ooy ycopicyity je' jadu'n naydiñib huidibi ca' ti tundigoy, huidibi tüg töxyjäy miid ca'p ycanaagity, huidibi huijycujc jäy'ajtp, huidibi miid oybi yhuinmañ etz tudägyi yhuinmañ, huidibi oyjäy'ajtin tumb, huidibi jajtp nej jäy ajcxy yaj'ixpigipy. ³ Pin nigohuajc'ajtp chojpcy tüg jäy huidibi ca' y'amügity, huidibi ca' yhuindzipity, huidibi yajtumb mecxtujcin, huidibi ca' chipcapxy y'ahua'ngapxy, huidibi ca' ti adzocy. ⁴ Pin nigohuajc'ajtp chojpcy tüg jäy huidibi tiydudägy tzinaayb ma yjiin ytiyc, huidibi y'ung y'anäg yajtzinaayb nicy yxeemy. ⁵ Pen ca' jaty nej y'ung y'anäg migapx ane'mip ma yjiin ytiyc, ¿nej oc'ane'mañ yi mibijcpidijc? ⁶ Nañ ca'p yjëjity huidibi namni mibicy Dios y'ayuc ytiy'ajt. Ycadimjeycity nicxy ooy amij agix ñayjihuiyii, e nicxy camadägy je ane'min, e yjadipy jadu'n nej Satanás yjajty co jibic tumb ñayyajhui'mi miid Dios. ⁷ Chojpcy tüg jäy huidibi nidüg'óciy je mayjäy oy ixiip. Pen ca' yjadu'nity nicxy pin yxiyii, e chi jada anajty je mujcu' ti ymimadägyii co jäy jibic ñigapxiyb.

Yi mutz tungmiid nañ chojpcy huidibi oyjot oyhuinmañ miid

⁸ Yi mutz tungmiid huidibi yajpat ma mibijcpidijc chojpcy jäy tudägyi, huidibi nicy xeemy jäy'ajtp, huidibi ca' jäy'aty aguejtmñ aguejtxipy, huidibi ca' y'amügity, huidibi ca' y'adzocy ca' y'ameeñity. ⁹ Huen naybiñacigixy cixyot huinijot ma je tiy'ajt janchypi. Je tiy'ajt huidibi je mayjäy ca' huinijuiy. Je tiy'ajt huidibi ñich ajt nmibijcim. Je' chojpcy pinjaty huidibi ca' ti jibicpi jot'adyii huiñmañ'adyii. ¹⁰ Pinjaty mutztung yajñicxamb, jayjip jot'ix huiñmañ'ix pen tudägy yhuinmañ. Huin'it jëbi mdungmōy. ¹¹ Yi mutz tungmiidpi ydöxyigij chojpcy co huen tudägy jäy'aty, huidibi ca' ñigapx ñi'ojy ymügü, huidibi nicy xeemy jäy'ajtp, huidibi cuydundaayb tüg'óciy. ¹² Yi jäy huidibi mutztung yajñicxamb chojpcy tüg jäy huidibi picy chinaayb, huidibi ca'p miidity metz o tugiig töxyjäy, huidibi y'ung y'anäg yajtzinaayb nicy xeemy, huidibi tiydudägy tzinaayb ma yjiin ytiyc. ¹³ Yi mutz tungmiidpi huidibi yajxon ytung cuydungixy, cōmay yi' ajcxy idipy ma mibijcpidijc. Nañ nigi ajcxy xpij'icidich Cristo y'ayuc.

Dios mijhuinmañ tuun miid ñich ajt ycixpi

¹⁴ Jada necy ñich miich nyajñiguejxyp. Nijp'ijxypich co tzojc nnicxañich jim ma miich. ¹⁵ Pen ca' y'oyiy nej tzojc nnicxibich ma miich, ti yam nyajñijayiy je janchypi. Miid jada necy huaad jëbi nidüg nidüg mibijcpi yjy'ajtigixy ma yi mibijcpidijc huidibi mijpidacp Dios juugypi, je Dios huidibi huijtz'ijttaayb etz cohuandaayb je tiy'ajt janchypi. ¹⁶ Janch tiy'ajt

jada co mij yi' yi Dios y'ayuc y'tiy'ajt huidibi ti xyajnejhuiyim, je huidibi jecy'ajty ca' pin nejhuiy. Je tiy'ajt huidibi xyajnejhuiyim co quexy y'ung ya naaxhuiñ.

Dios y'ung hue' je' yaj'ijxy müd ñin'cx. Tudägy nayguëx'ici müd Dios y'ijhui'ñ ymic'ajt. Je Dios y'angeles ajcxy ti ixyii. Ti yajni gapxy yajnimiydägy Dios y'ung ma huidibi ca' yjudiojätty nañ ti jäy yajmij'ajtcixy Dios y'ung ya naaxhuiñybi. E ti ycöbigyii tzajpjoty ma yi oybi it.

4

Mayjây ixmadza'ñ yi Dios y'tiy'ajt

¹ Yi Espiritu Santo minaan co anajty je xii tiempo ycixa'ñ, mayjây ixmadzaangixy yi Dios y'ayuc y'tiy'ajt. Mijpidaaccixy anajty jäy ajcxy y'ayuc huidibi yi huin'imbib etz ca'oybi y'tiy'ajt müd. ² Jada jäy ajcxy müd anii anajty naybidäacigixy nej y'tudägyty, e ca' anajty yjanchity. Ca' ajcxy nej ñayjihuiyii co ajcxy y'tigixy anädaacpi. Ti jadu'n yhuinma'ñypidaaccixy janch mic. ³ Yi' ajcxy ymina'ñ co ca' huaad jäy ypijccixy, etz ca' huaad caaygixy nijëjity caayin uucin. Yi caayin uucin Dios yi' ti conucxy jigix jëbi jäy ajcxy huidibi mibijccixy etz huinjihuiyigixy je tiy'ajt, jëbi yajnajxcixy Dioscojuyip ma Dios etz cöbigipy ajcxy agujc jotcujc je caayin uucin. ⁴ Tüg'öciy huidibi Dios ti yaj'oyiy, oy yi'. Ca' huaad pin ymina'ñ co ca' y'oyity. Agujc jotcujc ngöbijcim, jëyi nyajnajxim Dioscojuyip ma yi'. ⁵ Dios ymina'ñ co huen huidibi caayin huidibi uucin ooy y'oy yi'. Jëyi co nyajnajxim Dioscojuyip, e huin'it Dios conucxy je caayin uucin.

Ca' ajcxy mmijpidägy yi nigoobi'ayucity

⁶ Pen müch ajcxy jada ayuc jada tiy'ajt myajnimaaayb yi migügtijc, oy anajty mduñ ma Cristo ytung. Co jadu'n myaj'ixpicxy Dios y'ayuc janch cixyot huinjot, chi anajty myajyeegy yi mmibijcin. Ca' m'jäy digoyipy yi oybi ayuc huidibi nyajnimaaayb, huidibi ayuc mbanicxyp mbayöyp. ⁷ Ca' mmijpidägy yi nigoobi'ayucity huidibi ca' choobaady ma Dios. Panicxi' payöyi' Dios y'tiy'ajt. ⁸ Jac'oy co n'ixpijcin Dios y'ayuc, ca'yd co ninicx ymic'ajt nbaatim. Co yajyujctäy jäy ñin'cx, chi ñin'cx ymic'ajt paady jëyi. Co n'ixpijcin nguyduunim Dios y'tiy'ajt, chi tiy'ajt nbaatim nej ya naaxhuiñ ndzinaayim, etz nañ jadu'n nbaatim jadüg jugy'ajtin ma Jesús co anajty n'o'cim. ⁹ Jada tiy'ajt huidibi ti nyajnimäy, janch tudägy jada, jëbi ngöbijctayim, e nidüg nidüg jëbi mibijccixy. ¹⁰ Paady nduunim n'ayoohuim oy pin xyca'ixaanim. Njijp'ijxim co je Dios huidibi jugy'ijtp xyajnidzögaanim n'alma. Jëyi yajnidzögipy ajcxy y'alma huidibi mijpidaacip Dios y'ayuc.

¹¹ Yajnimä' yi migügtijc huen cuydundaaygixy jada ayuc. Yaj'ixpic jada tiy'ajt. ¹² Huen jäy ajcxy m'ayuc xymijpidaaci, oy müch mutz anäcinity. Myegipy ijxpejt ma migügtijc nej jëb huaad ycapxcixy ymiydaaccixy, nej jëb huaad ytungixy, jadu'n nej jëb huaad oyjây'ajtin tungixy, jadu'n nej jëb huaad mibijcin yajtungixy ma Dios, jadu'n nej jëb huaad huädz yhuinma'ñ müd'ajtcixy. Co jadu'n mdunipy, huin'it ajcxy mijpidägy müch m'ayuc. ¹³ Mabaad i'ch anajty nicxy ma miich, capx Dios ñecy ma yi naymujctac, capxhuäcx etz yaj'ixpic yi tiy'ajt. ¹⁴ Yajtun yi huij'ajt cuj'ajt huidibi Dios xymoy je taabi je mibijcpidijc mijtungmüdpic xycin'ajay, e xy'ayucmoy xymic'ajtmoy ajcxy müd je Espiritu Santo ymic'ajt.

¹⁵ Naybidägii yajcopijc tüg'öciy huidibi ti nyajnimäy, e niguëxigipy mayjâyduum co ti yajxon m'ixpicy je tiy'ajt. ¹⁶ Nayguend'adii miich ooy ci'm, nañ jadu'n naygüend'adii ma yi Dios y'tiy'ajt, ca' m'ixmach Dios y'ayuc. Co müch jada mdunipy ci'm anajty nayyajnidzögyii, nañ jadu'n anajty myajnidzoocixy huidibi anajty ajcxy amido'o'ijtp miich m'ayuc.

5

Nej jëbi huaad migügtijc m'ñhuijipy mgapxhuijipy

¹ Ca'p huinjijp m'ojip mij'anäctijc. Oy'amy i'ñhuijicy capxhuijicy jadu'n nej jihuüy mdeedy'adyii. Nañ jadu'n yi yujceecytijc i'ñhuijicy capxhuijicy oy'amy jadu'n nej jihuüy mgi'mjuugy mgi'mmigüg. ² Yi mij'anäctijc ajcxy töxyjäybi nañ jadu'n oy'amy m'ñhuijicy capxhuijicy, jadu'n nej jihuüy yi' ajcxy mdaj'adyii mdzitt'adyii. Yi töxy'anäctijc ajcxy mutz'anäcnip müd'ijtcixy müd tudägy m'jot mhuinma'ñ.

³ Huen yi mibijcpidijc ajcxy yajmij'adipy etz pubedipy yi töxyjäydijc ajcxy co'ögypi, huidibi janch ni ypin ycaca'ty. ⁴ Pen jim töxyjäydijc co'ögypi huidibi müd y'ung etz y'oc'ung, huen ajcxy jaty nej y'taj ñambiid yajmij'adipy, huen oybi yajhuimbidipy müd y'taj etz ñambiid. Com yi jadu'mbi huinma'ñ Dios yjägidaacpy. ⁵ Je töxyjäy co'ögypi ca'p pin tim müdity, yi' yijp'ijxyp co Dios ypubediyb etz Dios ymibijctzooyb y'ojadajtpy jabom jabom xim tzuu. ⁶ Je co'ögy töxyjäy huidibi tzinaayb müd mayñax xondaacin, jadu'n Dios yajnaxyii jadu'n nej jihuüy y'ögity ytigoyity. ⁷ Yajnimä' ajcxy huen cuydungixy Dios y'tiy'ajt, jigix ca' jibic ajcxy yajni gapxy. ⁸ Pen ji pin huidibi yajmij'ajtp Dios, e ca' pubeda'ñ y'amigüg, pen ca' y'ung

ytöxyijc yajxon ixy may'aty, ca' yi' cuyduni Dios y'ayuc ytiy'ajt. Nigi anajty yjibicity nej ti y'idich ca'ydi jadu'n nej huidibi ca' ymibicy.

⁹⁻¹⁰ Yi töxyjäy co'ögypi ajcxy tiibi ytuği'px jimijtiy, jëbi mgojayiipy yxii ma yi lista huidibi yi mibijcpidijc ypubedamyb. Yi mibijcpidijc ypubedamyb pen tüg ñäy anajty müddzinäy, pen oyjot oyhuinma'ñ ymüd, pen ti y'ung yajxon yajyeegy, pen ti migügtijc m'oyjäy'aty, pen ti may'ajt tuñ müd Dios yjäy, pen ti pa'ayooy huidibi ayoob huidibi jottigooyb, pen ti yajtüyöy yajxon nej ytiy'ajity.

¹¹ Yi co'ögy töxyjäy mutz'anäcnibi ca' mgojayiipy yxii ma yi lista huidibi yi mibijcpidijc ypubedamyb. Pen capxytumb co tuna'ñ müd Cristo ycxipi tijaty tung ma naymujctac, ycajegyity co je oybi anajty yam y'octumyb, chi nijot'ajtni ypigaani, chi ytung ixmajtznip.

¹² Co yi mibijcpidijc ajcxy ca' jäygidaaci yi' ytung, chi jibic ñayjihuiyii co ca' cuyduñ y'ayuc nej ti ycapxytuñ müd yi Cristo Jesús. ¹³ Jadügnax ca' ytung yajcopicy, jëyi yhuidijtni jayjiin jaydjic, e ca' yi'yity, nañ jadu'n ymügüg nigapxni ni'ojiiyñi, capxni miydaacni huidibi ca' y'oyity. ¹⁴ Ndzojcpych co yi töxyjäy co'ögy mutz'anäcnibi huen piäccixy, huen tzinaaygixy jugy'ajtcixy yajxon, huen ung'ijxcixy anäc'ijxcixy, huen yajxon cuend'ajtcixy yjiin ytiyc, jigix ca' ajcxy nihuambediib ni'ojiihuiyb huidibi ca' Dios y'ayuc ixaani midohuaani. ¹⁵ Nijëjity töxyjäy ajcxy co'ögypi ti ixmajtzcixni Dios y'ayuc ytiy'ajt, e ti ajcxy jijptigiyyigixni yi mujcu' yhuinma'ñ.

¹⁶ Pen ji mibijcpidijc yëdjicpi o töxyjäybi müdity y'ajuugy y'amigüg co'ögypi, yi' je' paatip ixipy may'adipy je y'ajuugy y'amigüg co'ögypi, e ca' yaj'idipy ma yi mibijcpidijc nigixp. E jadu'n je' huaad je mibijcpidijc ajcxy pubejtcixy co'ögypi ca'p ti tim müdity.

¹⁷ Yi' ajcxy huidibi nigohuajc'ajtp yi mibijcpidijc huidibi yajxon tumb capxpaady y'idipy. Nigi ajcxy capxpaady y'idipy huidibi Dios y'ayuc capxhuäcxip etz yaj'ixpicy. ¹⁸ Jadu'n yjaybetyity ma Dios y'ayuc: "Ca' huaad huajyuub y'ajen nbidaacim ma yam ten moody trigo miy co yajpajc'ada'ñ yi trigo tiim." Nañ jadu'n jadüg'it yjaybetyity: "Yi huidibi tumb paatip yi' ymuju'uñ." Jadu'n jada ayuc yhuimbizimy: Yi' huidibi yaj'ixpijcp Dios y'ayuc paatip huen yajmujuy.

¹⁹⁻²⁰ Ca' mic'amy mdydunipy pin tungmüdpä ma yi mibijcpidijc pen tügpaic huidibi xihuip. Ca' mdydunipy pin tungmüdpä ixti cooni metz o tugüg testigo yquëxigipy pen janch ti ytundigooy. Pen ytundigooy yi huidibi nigohuajc'ajtp, capxpizim mayjäydmub jigix jac-jadyii chigi'ñ piäccixipy. ²¹ Jada tiy'ajt miich nyajnimaaayb, Dios Cristo Jesús etz yi' y'angeles ayajxi huidibi Dios ti huin'ijxcixy ñidiy'ajt'ajtcixy co yjanchity jada ayuc. Co mbanicxip jada tiy'ajt, ca' huin'ixpety mdydunip mdzaachytunip mibijcpidijc. ²² Ca' mic'amy mgin'ixajipy co myajtungbiga'nip jäy huidibi ca' m'ixy'adyii. Ycajegyity ypocytunipy, e tü'ciy mbocycähuaangixy miich müd yi'. Miich nayguend'adii jigix ca' mbocycähuiipy.

²³ Miich Timoteo, pen piäcp mjot, tzo'y'adii hueen vino, com jac'oy yi' ca'ydi co m'ügipy huädz nii.

²⁴ Jadyii jäy huidibi jibic-huinma'ñ müd yajnejhuihuipy yi' ajcxy yjibic-huinma'ñ ma anajty ca'ni yajtiyungixy. Jacjadyii jäy ca' yajnejhuüy yjibic-huinma'ñ ixti cooni yajtiyungixy.

²⁵ Nañ jadu'n jadyii jäy yajnejhuihuip co oyjäy'ajtn anajty ti tungixy, jacjadyii jäy ca' mic'amy yajnejhuihuipy co oyjäy'ajtn ti tungixy. Yi oyjäy'ajtn ca'p yi' yhui'mipy coyüch.

6

¹ Tüg'öciy tumbidijc huidibi ajcxy mibijcp huidibi ajcxy ijtp cojuyiy codoogiy, huen yajxon yajmij'ajtcixy yhuindzin. Pen ca' jadu'n tungixy, chi je huingjäydijc jibic nigapxaani ni'ojihuaani yi Dios etz yi' ytiy'ajt. ² Pen yi tumbi müd yhuindzin huidibi yajmij'ajtp Dios, ca' y'oyity co nixigipy yajxigipy yhuindzin. Huen ajcxy nigi yajxon yajmij'ajtcixy, com hue' je' Dios yjäy. Yi huidibi nihuindzin'ajtp ypadamyb je oybi huidibi je' ytumbi ytung'ajtpy. Jada tiy'ajt yaj'ixpic etz capxhuäcx.

Jotcujc'ajtn nbaatim ma Dios ytiy'ajt

³⁻⁴ Pen ji pin huingbi tiy'ajt yaj'ixpicy huidibi ca' ñaybadyii müd je Huindzin Jesucristo y'ayuc ytiy'ajt, e ni ycanaybadyii müd je tiy'ajt huidibi iich ajt nmijpidaacim, hue' jada nej tüg jäy huidibi amij agixip huidibi ca' ni ti nejhuiy. Chachnijot'aty tzip capx, e jadu'n yhuimbizimy jada tzip capxy co migüg ca' yaj'oy'ixy, chi ñaymidziptzoongixy nihuambetjixy etz jibic nigapxcixy ymügügtijc. ⁵ Yi jadu'mbi jäy huidibi ca' mijpidägy Dios ytiy'ajt cojpy ymacxpy tzip capxy huidibi ca' yciyx ytigoy. Yhuinma'ñdyigoy ajcxy, ca' huinjhuüyixy tiy'ajt. Hue' ajcxy yaj'ixpicy Dios y'ayuc müd co ycomeen'adaangixy. Puhuäctut miich jadu'mbi jäy ajcxy. ⁶ Co Dios y'ayuc ytiy'ajt nguydunim, huin'it jotcujc ndzinaayim, etz nbaatim oy'ajt mijpi. ⁷ Ni ti iich ajt ya naaxhuüñ ca' ti nmimimim co nma'xung'ajtim, nañ ni ti ngaminicxim co n'o'cim. ⁸ Pen nmüd'ajtim caayin ucin huit tucxy, jëbi njotcujc'ajtim müd yi'yi. ⁹ Je' ajcxy huidibi ooy nijot'aty comeen'adii, hue' je'

ajcxy jibic tumb ajcxy ycāhua'ñ. Je' ajcxy chachtunamyb huidibi ca' oyhuinma'ñity, huidibi nayjotmayduunip. Ayo'n ajcxy ypadamyb, tigoyamb ajcxy y'alma. ¹⁰ Yi meefiy'adzojcin yi' je' yi jibic-huinma'ñ cop'ajtip. Mūd yi meefiy'adzojcin may yi jāy huidibi jāydgoy Dios ytiy'ajt. Hue' je' ajcxy nayjotmayduunip.

Timoteo, tiydudāgy mdzināhuipy miich

¹¹ Timoteo, Dios yjāy, cōguēg yi jāy huidibi mūd yi jadu'mbi jibic-huinma'ñ. Tiydudāgy mdzināhuipy, cuyduni Dios y'ayuc ycōtucjin, mijpidāg Dios y'ayuc ytiy'ajt, tun oyjāy'ajtin, mihuindina' yi tung, mūd'at mjet mhuinma'ñ yung naxy. ¹² Mic mjet mhuinma'ñ pidāg ma Dios ytiy'ajt, ca' mjetmetzcīy. Tun jadu'n nej jāy huidibi nayboyicquīpxigixy naymic'ijxigixy. Nijot'at cixyot huinijot yi jugy'ajtin huidibi m'alma ypadamyb ma Dios. Dios xyajñibicy jigix mgapxhuācxip jada tiy'ajt. Ti miich mgapxypidzimy nej mmibicy mayjāyjt. ¹³ Dios je huidibi yajjugy'ajttaayb tūg'ōciy, yi' nidiy'ajt'aty co ooy ycopicyity jada ayuc jadu'n nej cham nyajñimaayb. Nañ jadu'n je Cristo Jesús je huidibi tiy'ajt capxypidzim ma Poncio Pilato ñidiy'ajt'ajt co oy ycopicyity jada ayuc jadu'n nej cham nyajñimaayb. ¹⁴ Copicy cuydun jada ayuc ane'min. Huādz mguydundāhuipy, huādz myaj'ixpigipy je tiy'ajt jigix ca' pin jibic ni'ojihuipy Dios ytiy'ajt. Jadu'n mdunipy ixti cooni ñich ajt nHuindzin Cristo Jesús ñayguēxigūyb ya naaxhuñ jadūg'oc. ¹⁵ Dios yajñiguēxigamyb Cristo Jesús mina anajty je tiempo yhuaad'aty. Dios je' je mij'ane'mbi, je mijpi rey, etz je mijpi huindzin. Yi' je' je Huindzin Dios huidibi ane'mdaayb. ¹⁶ Yi' je' tūgpajc je jugy'ajt cop ymiid. Yi' ijtp ma je tūcxin je jajin huidibi ca' pin huaad ninej mihuingoñ. Janch ni tūg jāy ti ca' ixy, e ni ca' ixa'ñ. Yi' je' cōmay'idipy etz yi' ane'mdaayb tūg'ōciy. Amén. Jadu'n jada.

¹⁷ Yi comeefyidjc huidibi jadachambi tiempo tzinaayb jugy'ajt, nima' miich yi' ajcxy co ca' huaad amij agix ñayjihuiyigixy, ni ca' nīgi adzojccixy anaxy yi meefiy huidibi jadu'ñiyi tigoydaayb. Huen ajcxy mijpidāgy yi Dios huidibi xymooyim tūg'ōciy mijmay mijcajee jigix njotcujc'ajtim. ¹⁸ Huen yi comeefyidjc oybi tungixy, jigix ajcxy cōmay ypidzimipy co oyjāy'ajtin tungixy. Huen ajcxy pa'ayoogixy ymīgūgtijc huidibi ca' ti mūdity mūd oyjot oyhuinma'ñ. ¹⁹ Co ajcxy jadu'n tungixpy, chi padaangixy je oybi huidibi miimb gidaacp. Ypadamyb ajcxy je jugy'ajtin huinixiibi.

Timoteo, mijpidāg jada tiy'ajt

²⁰ Timoteo, mijpidāg jada ixpijcin huidibi ti myajñibic'aty. Ca' mmijpidāgipy yi nigoobi y'ayucity, yi huidibi ca' Dios huindzigiy. Ca' mmijpidāgipy yi jāy huidibi ajcxy naybidaacip jadu'n nej jihuiy ooy ycohuinma'ñity, e ca' yjanchity, huidibi midzip'ajtp Dios ytiy'ajt. ²¹ Jadu'n nej nije' ajcxy panicxcixy jada ca'pi ytiy'ajtiny, e jadu'ñi ñitigoy.

Huen Dios je oy'ajtin tuñ mūd miich. Amén. Jadu'n jada.

2 TIMOTEO

Yi Mimetzipi Necy Huidibi San Pablo Yajniguejx Timoteo

¹ Hich Pablo, Dios ti xyajñibicyich huen Cristo Jesús xy'apóstol'adyiijich. Yi' ti xyquexyich co yi' y'ayuc ngapxhuäcxibich. Dios ti yajhuinhuaniiygixy yi jäy co pin mijpidägyi Cristo Jesús yajjugypigipy co anajty ti y'ögy. ² Ooy ich miich ndzocy njihuüy nej ngi'm'ung'adyii. Dios Teedy etz ich ajt nHuindzin Cristo Jesús huen tuñ oy'ajt may'ajt müd miich, huen xypa'ayooy, huen xyajjotcugiy.

Pablo jotcujc co Timoteo ti mijpidägy Dios y'ayuc

³ Nyajnajxypich Dioscojuyip ma Dios co miich ti mmijpidäg yi' y'ayuc. Nmibijctzooybich Dios müd miich ycixpi jabom jabom xim tzuu. Janch cixyot huinijot nyajmij'atyich Dios, paady ooy oy nayjihuüiijich. Nañ jadu'n n'ap ndeedy jecy'ajty janch cixyot janch huinijot yajmij'ajty Dios. ⁴ Ooy miich nicxy njaco'ixihua'n jigix njotcugihuibich. Ooy njajäymejtcoodyiijich nej miich mjiy myaax müd ich ycixpi je taabi jim ndzooñich. ⁵ Njäymejtzpich jadu'n nej miich mmijpidägy yi Dios janch cixyot huinijot co xymüd'ityich. Nañ njäymejtzpich co jayijp mnambiüd Loida etz yi mdaj Eunice mijpidacy Dios janch cixyot huinijot. Minambich co chambaad miich mmijpidägy Dios janch cixyot huinijot.

⁶ Jada nyajjäymejtzcooty: Nijot'at yi mic'ajtin huidibi Dios ti xymöy, je taab anajty Dios ytung mnimadzaani co ngi'nixajy, jigix Dios ytung jacyajxon mduunipy. ⁷ Dios ca' xyajhuindzigi'aty, hue' xyajjotmic'ajtp. Müd Dios ymic'ajt jëb mnaychójcigixy mnayjihuiyigixy, jëb oyjot oyhuinma'n myajtuungixy. ⁸ Paady ca' mmidzöyduniiyb ich ajt nHuindzin Cristo Jesús ytiy'ajt. E nañ ca' xymidzöyduniiybich co ti nbujxtijc inäyich müd ich ajt nHuindzin Cristo Jesús ytiy'ajt ycixpi. Mecxtuc yi ayo'n yi tzaachypi huidibi myajnajxpy co mgapxhuäcx y Cristo Jesús ytiy'ajt. Dios xyajjotmicpigipy. ⁹ Canan paady ti xyajñidzooim n'alma co ajt ndzach'oyjäyity. Com Dios jadu'n ti yajñihuimayiy tuna'n oy'ajtin müd ich ajt ycixpi co quejxy Cristo Jesús ya naaxhuiñ. Dios jayijp ti huinmay co quexa'n je Cristo Jesús ca'ni anajty pin ya naaxhuiñ. ¹⁰ Dios ti cham jada oy'ajtin yajnigüëxgy co yajijxy ya naaxhuiñ ich ajt nnihuambi nyajñidzooopi, je Cristo Jesús, huidibi ti yajcödigo y'i o'cin. E ti yajnejhuüy yi jäy müd yi' ytiy'ajt nej jëb huaad ndzinaayim huinixi ma yi Dios y'it oybi.

¹¹ Dios ti xyajñibicyich co y'ayuc ngapxhuäcxich, etz xy'apóstol'adyiijich jigix nyaj'ixpigipyich yi huidibi ajcxy ca' yjudiojäyity. ¹² Paady ycixpi tzaachypi nbaadyich. Per ca' ndzo'yduñich, com ich nejhuüiyb pin mmijpidacyich, nejhuüiybich co yi' ymüd cötujcin etz mic'ajt jëb xycuend'adipyich, ixti huin'it xi minaa Cristo Jesús tiyduna'n yi naaxhuiñjyä.

¹³ Mijpidäg je tiy'ajt tiydudägyi huidibi ti nyaj'ixpicy, jada je' tiy'ajt iixpejt nej jëb mbanicxy mbayöy. Yajmij'at Cristo Jesús, ca' m'ixmajtzi yi' ytiy'ajt, mduunipy oyjäy'ajtin jadu'n nej yi' tzocy. ¹⁴ Mihiundina' yi oybi ayuc tiy'ajt huidibi ti nyaj'ixpicy. Huen je Espiritu Santo huidibi miich müd jotjoty huinma'ñjoty xypubedipy xypudigihuipy.

¹⁵ Ti jada' mnejhuüy co tüg'öcy yi mibijcpidijc jim Asia naaxjot ti ixmach je tiy'ajt jadu'n nej ti nyaj'ixpicyich. Yi Figelo etz Hermógenes etz jacjadyii jadu'n ajcxy ti y'adiitczixy. ¹⁶ Yi Huindzin Jesús yi' pa'ayoohuipy yi Onesífero yjuugy ymügü, com ooy ich mij xypa'ayooyich etz xypubejtyich, ca' xymidzo'ydunyiiijich co nmach'inäyich. ¹⁷ Co Onesífero oyja'ty ya Roma, chi mictägy xy'ixtaayich cooni xypatyich. ¹⁸ Huen yi Huindzin Dios ypa'ayoohuigy Onesífero co anajty Cristo Jesús tiyduna'n naaxhuiñjyä. Huädz miich mnejhuüy nej yi Onesífero xypubejtyich jim Efeso.

2

Huen Cristo Jesús may'ajt tunipy müd miich Timoteo

¹ Miich Timoteo, jadu'n njihuüy nej ngi'm'ung ngi'm'anäg. Huen Cristo Jesús may'ajt tunipy ma miich, huen xyajjotmicpigipy. ² Miich ti mmidooy may'ayuc tiy'ajt huidibi ti nyaj'ixpicy. Jada ayuc mayjäy midoy e jëb ajcxy nidiy'ajt'ajtcixy. Jada tiy'ajt miich mgapxnaxipy mgapxhuäcxipy ma jacjadyii yëydijctijc huidibi oyhuinma'ñ ymüd, jigix yi' ajcxy nañ jadu'n capxnaxipy ma jacjadyii jäy.

³ Miich mimadäg yi ayo'n yi tzaachypi huidibi mminajxyp myajnajxyp, jadu'n nej tüg Cristo Jesús ysoldado huidibi oy tumb. ⁴ Yi soldado huidibi soldad'ajtp ca' huaad huingbi tung nicxy tuñ, jigix je' yjotcujc'adipy pin anajty ti ypidägyii soldado, nañ jadu'n miich adügijp Dios ytung mduunipy. ⁵ Pin jäy nayboyicquixip ca' yi' premio pada'n, oy ti yjamadägy, pen ca' cuyduñ yi tiy'ajt. Nañ tzocy co miich mguydunipy yi tiy'ajt. ⁶ Je jäy

huidibi tumb ma ycam ytu' je' jayjip huidib huen yajpidigyi yi ujtztüm huidibi ti y'ity. Nañ jadu'n miich co Dios ytung mduunip mbaadip yi oy'ajtin. ⁷ Yajxon mhuinmayipy huidibi nyajnamaayb, yi Huindzin Cristo Jesús xyajnejhuiydähuipy tüg'óciy je' ytiy'ajt.

⁸ Jäymetz jadu'n nej Jesucristo, yi David y'ap y'oc, y'o'cy, chi Dios yajjugypijcy jadügtecy. Jada je' je' ayuc tiy'ajt oybi huidibi nnajtzcapxyibich. ⁹ Muid yi' ycixpi n'ayooyich etz tzaachypi nyajnajxyich. Nbujxtjic iñäyich jadu'n nej jihuüy njibicjäyich. Oy njapujxtjic iñäyich ca' ñejity, Dios y'ayuc ca' yi' mach y'ity, yajcapxhuäcx'adütpz nigi. ¹⁰ Paady iich tüg'óciy jada tzaachypi ngöbictäy nmecxtujctäy, jigix jébi je jäy ajcxy huidibi Dios ti yhuin'ijxigixy chinähuipy ajcxy huinixii ma yi' y'it oybi, Cristo Jesús yajnidzögiib yi' ajcxy y'alma.

¹¹ Tiy'ajt jada ayuc:

Pen ti iich ajt n'o'cim muid Cristo ycixpi, yi' muid ndzinaayim tzejppjoty.

¹² Pen nyajnajxim tzaachypi ayo'n muid Jesús ycixpi, nañ quipxyi muid yi' n'ane'maanim. Pen ca' ya Jesús y'ayuc ngöbicism, nañ ca' jüib tzejppjoty xycöbigaanim.

¹³ Oy iich ajt nyajmij'ajtim Cristo Jesús o ngayajmij'ajtim, Dios ycuylundaayb yi' y'ayuc. Com ca' huaad yci'm ayuc yajxigx.

Naybidägi cixyot huinijot ma Dios ytiy'ajt

¹⁴ Yajjäymejtcood yi mibijcpidijc jada tiy'ajt huidibi ti nyajnimäy. Nima' je jäy ajcxy co je Huindzin Dios ca' oy'ixy tzip capxy ayuc huidibi ca' choobaady. Muid yi' tzip capxy ca' ni ti oybi nbaatim, jéyi yajhuinma'nydigoy huidibi amidoo'ijtp. ¹⁵ Naybidägi cixyot huinijot ma Dios y'ayuc ytiy'ajt, nej jéb huaad cómay mbidzimy ma Dios, jadu'n nej Dios ytumbi huidibi ca' ni ti midzöyduyüi, huidibi Dios y'ayuc ytiy'ajt yajxon yajhuinjihuiydaayb ymügütiy. ¹⁶ Ca' mgöbigipy yi ayuc huidibi ca' ytiy'ajity, yi ngoob ayuc huidibi yajtüyöyp mayjäy ajcxy, yi tiy'ajt huidibi ca' Dios ytiy'ajt'adyii. ¹⁷ Yi huidibi ajcxy y'ayuc ca' ytiy'ajity yajhuinma'nydigoyb ymügütiy. Yi' ajcxy muid jibic ayuc yajhuinma'nydigoy yi mayjäy ajcxy, jadu'n nej pützpa'm huidibi ninäcx jicxp önydägy. Jadu'n nej ti yjaty muid Hemeneo etz Fileto co ajcxy yhuinma'nydigoo. ¹⁸ Yi' ajcxy anajty Dios y'ayuc cuyduuni, chi oyhuinma'nydigooyni. Chi ajcxy yminäangixni co je tiibi y'öccixni, ti ajcxy je' yjugypicy, e jadu'n ajcxy yajhuinma'nydigoy nijéty jäy. ¹⁹ Huidibi Dios ti cojy ti macxy, nimiraxii ycacixy ycatigooy, com yi' ytiy'ajt ijtp yi' huinixii. Tiy'ajt jada co yi Huindzin Dios y'ijxcajpy pinjaty yjäy'ajtpy. Tüg'óciy pin mijpidacp yi nHuindzin Jesucristo y'ayuc, huen jiphuäctüdy yi jibic-huinma'n yi jibic-tung.

²⁰ Ma tüg mij comeñyidjc jim oori taasi, oori texy, etz oori cuchara, etz tijaty oyjatyty. Nañ ymuid jim naax taasi, naax texy, quipy cuchara etz jactijaty ca'p y'oyjatyty. Yajtuñ yi oori taasi etz oori texy ma tügi caayin uucin oybi. Yajtuñ yi naax taasi etz naax texy oyñiminaa. ²¹ Jadu'n yi' pin jäy jibic-huinma'n ixmajtzp etz tuñ oyhuinma'n, jadu'n yi' nej oori taasi oori texy. Cómay'idip yi' ma yi' Dios. Huädz yi' yjot yhuinma'n, jébi nHuindzin'ajtim Dios yajtunipy ma tüg'óciy oybi tung.

²² Ixmatz miich yi yujcyec'anäg ajcxy yjibic-huinma'n. Tudägy mdzinähuipy. Yajmij'ajtcix Dios cixyot huinijot. Mdunipy oyjäy'ajtin. Ixmatz yi' tzip. M'ojadadipy yi Huindzin Dios muid oyjot oyhuinma'n. ²³ Ixmatz yi' nigoobi'ayucity yi loci huinma'n, ca' yi' y'oyity. Mnejhuiyb co yi nigoobi'ayuucity tzipcojp capxycojp yi'. ²⁴ Yi Huindzin Dios ca' yi' tzocy co yi' ytumbidijc nicxy tzip capxy yajtzondägy. Hue' janchtiy tzocy huen jäy'ajtcixy yung naxy muid tüg'óciy jäy etz pe'cy y'idipy muid yaj'ixpicin. Nañ chojcpy co mimecxtugipy ymügütiy ajcxy. ²⁵ Miich muid yung naxy mjet mhuinma'n capxhuij je jäy huidibi midzip'ajtp je tiy'ajt. Ycadimjcyty co Dios ytiy'ajt nijothuimbjtcixipy, e nejhuiygyixipy je tiy'ajt oybi. ²⁶ Co anajty ajcxy ti ymejtzcixy yhuinma'n, chi ajcxy ycöguëgyib je mujcu' huidibi ajcxy ycapxymidooyb ma anajty ymuid'ajtcixy cñoty etz ycapxymidoogixpy yi Dios.

3

Jäy jotmay muid y'idaangixy

¹ Miich mnejhuiyb ma je xii tiempo anajty ycixaani jadaanip ayo'n, je jäy ajcxy jotmay muid y'idaangixy. ² Ji adipy jäy huidibi adzojcp, huidibi amij agix nayjihuiyip, jäy huidibi ameeñ, jäy huidibi ci'm naygömayiib, huidibi oyñinej capxtigooyb ma Dios, jäy huidibi ca' capxymidohua'n ytaj yteedy, jäy huidibi ni ti ca' jäygidäga'n, jäy huidibi ca' yajmay'aty Dios. ³ Co anajty tiempo ycixaani, ji adipy jäy huidibi ca' ymügüg ixa'n tzoga'n, jäy huidibi ca' pa'ayo'n müdity, jäy huidibi ymügüg nihuambejtp, jäy huidibi oy ahua'nity, jäy huidibi midzip'ajtp yi oybi. ⁴ Ji adipy jäy huidibi ymügüg agojix midundigooyb, jäy huidibi ytunamyb ti ytunamyb, ca' ajcxy tuñ cuendi capxhuijin, jäy huidibi amij agix nayjihuiyip, huidibi tzachnijot'ajtcixy mayñaxy xondaacin, e ca' cuyduna'n Dios ytiy'ajt. ⁵ Ji adipy jäy huidibi naybidaacigixp jadu'n nej jihuüy ajcxy mijpidaaccixp Dios ytiy'ajt e ca' yjanchity. Chi

ma ajcxy chinaayin ma ajcxy yjygy'ajtn ñiguëxíc co ca' tiy'ajt yajtuñ. Cöguëg yi jadu'mbi jäy. ⁶ Ma yi jadu'mbi jäy ajcxy jim choonity huidibi coyöyib conaxib ma je töxyjäy huidibi ca' ytudägity, huidibi oy ypocyjäyity, huidibi jibic-huinma'ñ nijot'ajtp. ⁷ Yi jadu'mbi töxyjäy ajcxy panícxp payöyp canaagnax huinma'ñ, e niminaa ajcxy cahuinjihuihuipy yi Dios ytiy'ajt. ⁸ Jadu'n nej Janes etz Jambres midziptzoon je Moisés, yi jadu'mbi yëydijc ajcxy nañ jadu'n midziptzoonip yi tiy'ajt. Jibicjot jibic-huinma'ñ ajcxy ymüid. Ñaybidägiib ajcxy jadu'n nej jihuüy cuydungixy yi tiy'ajt, e ca' cuydungixy. ⁹ Ca' ajcxy ymadägiipy nej huin'iniipy Dios yjäy. Niguëxigipy yi' ajcxy yjibic-huinma'ñ jadu'n nej Janes etz Jambres yjajty.

Tüg'öciy Dios ñecy Dios ci'm ti huinma'ñymöy je huidibi jaay

¹⁰ Miich ti mhuinjihuüyday nej ich ti nyaj'ixpicy Dios y'ayuc nej njäy'atyich, nej nhuinma'ñ nduufñich, nej Dios nmijpidägyich cixyot huinijot, nej ich jäy nmimecxtucyich, nej oyjäy'ajtn nduufñich, nej ti nmihuindinäyich Dios ytung. ¹¹ Miich m'ijxyp mnejhuüy nej ti nyaj'ixhuidityich nej ti nyajpahuidityich, miich mnejhuüy je ayo'n je tzaachyp huidibi ti nminaxyich ti nyajnaxyich jim Antioquia, jim Iconio, etz jim Listra. Jadu'ñyibaad yi ayo'n tiibi nbaadyich Dios ti xyñihua'ñ ti xycohua'ñich. ¹² Huen pin huidibi yajxon cuydumb Dios ycapxy y'ayuc jadu'n nej Cristo Jesús ti xyyaj'ixpicyich, nañ tim jadu'n ajcxy yaj'ixhuididipy yajpahuididipy. ¹³ Yi jibic jäydijc huidibi naybidäacigixp jadu'n nej jihuüy cuydungixy yi tiy'ajt, e ca' yjanchity, nigi jibic y'ididzaangixy. Huin'inaangixy ymigügtijc ajcxy, e ñayhuin'inaangixy ci'm.

¹⁴ Miich Timoteo, izmatz yi jadu'mbi jäy ajcxy etz panícxp yi tiibi m'ixpicy, yi tiibi myajñibic'aty. Mnejhuüy co ich ti nyaj'ixpicyich je tiy'ajt. ¹⁵ Com miich pi'cni mutzni ti mjaty ti mnejhuüy yi Dios ñecy. Jada necy ti xyajnejhuüy nej huaad mijpidägy yi Cristo Jesús, e nigi jadu'n jëb huaad yi m'alma nüzoozin paady. ¹⁶ Tüg'öciy Dios ñecy Dios ci'm ti huinma'ñymöy je huidibi jaay. Paady jëbi nyajtuunim co jäy nyajni'ixiiyim nyaj'ixpijcin. Jëb nyajtuunim co njijpcogapxiyim huidibi ca' ytiy'ajity, etz co n'iihuijim ngapxhuijim. Jëb nyajtuunim co nyaj'ixpijcin nej jëb huaad tiy'ajt nbanicxim, ¹⁷ jigix yi jäy ajcxy huidibi mijpidacp Dios ytiy'ajt, jëb ni'ixi' y'idipy, tunipy tüg'öciy oybi huinma'ñ oybi tung.

4

¹ Ooy ycopicyity mido'mbic jada ayuc jadu'n nej cham ich miich nijaiy. Dios etz ich ajt nHuindzin Cristo Jesús tiy'ajt yejc co copicy jada ayuc. Cristo Jesús ytiydunamyb yi jäy ajcxy juugypit etz yi jäy ajcxy tiibi y'o'ccixy, e chi yajjugypigipy jadüg'oc ajcxy. Yi' yajtiydunamb ajcxy co anajty ymiñ ya naaxhuiñ pidäga'ñ y'ane'min. ² Nyajñibicpy mgapxhuäcxip Dios y'ayuc ytiy'ajt hueñityimminaajity, oy pin midoohua'ñ o camidoohua'ñ. Copicy co mijjpcogapxihuipy huidibi ca' ytiy'ajity, capxhuij pin yinjaty huenjaty camadacp, ihuij capxhuij yi jäy ajcxy müid Dios y'ayuc ytiy'ajt. Mimecxtuc etz yaj'ixpic yi jäy ajcxy. ³ Minip je xii je tiempo ma jäy ajcxy ca' cöbiga'ni oybi tiy'ajt. Nijëjity müid yci'mdzojcin müid yci'm-huinma'ñ ixtähuip ajcxy yhuindzin huidibi yaj'ixpigüib nej ajcxy jäygidägy, oy ca' ytiy'ajity. ⁴ Chi ajcxy anajty jijphuäctütcixni camidoohuaangixni je Dios y'ayuc ytiy'ajt. Mijpidaacni anajty ajcxy nigi yi ngoobi'ayucity. ⁵ Miich huüy yucjy m'idipy. Mecxtujcta' nej jäy ajcxy xy'ixhuidity xypahuidity. Yajnima' jäy ajcxy Dios ytiy'ajt, jëb ajcxy mijpidägiipy etz jothuimbidity ajcxy Dios. Yaj'ixpic Dios y'ayuc ytiy'ajt nej ypadyii.

⁶ Jadu'n miich cham njacnimäy, je' co ti yhuaad'ajtni je tiempo minaa ndzinaanich ya naaxhuiñ xyaj'ögaamich jäy, ti nayxoxiiijich naydogyijich müid Cristo Jesús yciixpi. ⁷ Ti ich ooy mic nmihuindinäy Dios y'ayuccapxhuäcxii ma anajty ypadyii. Ti nyajcixy nyajmayich je tung huidibi anajty xypatpic. Ooy ti nyajmij'atyich Cristo Jesús, ni ca' ti n'ixmajchich yi' y'ayuc ytiy'ajt. ⁸ Cham njijp'ixypich co Cristo Jesús je tiydumbi tudägyi xycömayipyich jilby tzajpjoty, müid co tiydudägy ti ndzinäyich ti njugy'atyich.

Pablo pijctzoy may'ajt ma Timoteo co tzojc yminipy ma yi'

⁹ Tun may'ajt tzojc yminipy ma ich. ¹⁰ Yi Demas ti ich yam xycögueecni co yjactzojcy yi mayñax xondaacin ya naaxhuiñ. Hue' ti ñicxy jim Tesalónica. Crescente nañ hue' ti ñicxni Galacia. Yi Tito ti ñicxy Dalmacia. ¹¹ Jëyi naydügajc Lucas yam müid ich. Co mminipy, müidminipy Marcos, com ooy ti xychachpubetyich ma Dios ytung. ¹² Yi Tiqico ti nguexyich jim Efeso. ¹³ Je jocxhuit huidibi nyajhui'müyich jim Troas ma Carpo ytiyc mminipy. Nañ jadu'n mimindähuipy je necy. Je' ooy ytimycopicyity yi pergamino necy.

¹⁴ Alejandro je ca'tzpi ti yi' ooy mij xymidundigooyich. Yi nhuindzin'ajtm Dios paatip nej yajmidzogyii. ¹⁵ Naygüend'adii ca' müich yi' mmijyöybedipy, com ooy mic ti jijpcogapxiy Dios y'ayuc huidibi ich ajcxy nyaj'ixpijcy.

¹⁶ Co yi' oga'n xyxiyich ma je mij tungmüidpi, naydüg ayuc nmihuindinaayich. Nipin xycapubejtyich, nigi ajcxy xycögueectaayich. Huen Dios ocmeecxy nej ajcxy ti y'idütcizcy. ¹⁷ Ca' y'ocnejity Dios ti xypubetyich ti xypudigiyich. Dios ti xyyajtotmicpicyich, jigix

ngapxhuäcxtähüibich ytiy'ajt ma tüg'óciy jáy. Jëb tüg'óciy jáy hüidibi ca' yjudiojäyity huen mïdo'mbijctaaygixy Dios ytiy'ajt. Dios ti xyñihua'ñich ti xycohua'ñich ma yi o'cïn. ¹⁸ Yi Huindzin Dios yi' xyñihua'ñ xycohua'ñibich ma tüg'óciy jáy hüidibi ajcxy jibic-huinma'ñ müid. Yi'xycuend'adipich, ca' ni ti xyjadipyich, cooni anajty njädyich jiiby tzajpjoty ma y'ane'my. ¡Huen Dios cömay idipy janch huinixi huinïtiempo!

Pablo ymigügtijc capxpoocxin yajniuguexy

¹⁹ Yajnax ñich ngapxpoocxin ma yi Prisca etz ma Aquila etz ma Onesífero yjuugy ymigüg. ²⁰ Erasto ti je' yhui'my jim Corinto. Je Trófilo com pijcip anajty, ñich je' n'ixmajch jim Mileto. ²¹ Tzojc mjatyminy ma ca'ni tiichpy ymiini. Yquejxyp ajcxy capxpoocxin ma miich, je Eubulo, je Pudente, je Lino, je Claudia etz jacjadyii migügtijc.

²² Huen je Huindzin Cristo Jesús xypubedipy xypudigihuipy. Huen Dios tuñ may'ajt müid miich ajcxy. Amén. Jadu'n ngapxcíxyich.

TITO Yi Neczy Huidibi San Pablo Yajniguejx Tito

¹ Hich Pablo, Dios jada müd nduufñich, Jesucristo xy'apóstol'ajtpich. Yi' ti xyquexyich ma yi jáy ajcxy huidibi Dios ti yhuin'ixyii, jigix ajcxy mibigipy yi' ytiy'ajt. Nañ nyajnimáhuibich nej jéb ajcxy cuyduuni Dios ytiy'ajt. ² Jadu'n nduufñich jigix co anajty y'o'ccixy, chi jadüg'oc yjugypijccixipy e tzinaaygixipy huinixii. Dios yajhuinhuaniiy je jáy ajcxy je jugy'ajtin huinixiibi, ca'ni anajty naaxhuifñybi chondägy. Jada tiy'ajt jéb nmijpidaacim com Dios ca' yi' y'anüdagy. ³ Jada jugy'ajtin huidibi ijtp huinixii, Dios ti yajnejhuüy je jáy ajcxy cham co je tiempo ti yhuaad'ajtni, müd yi' y'ayuc huidibi ngapxhuäcxibich. Je Dios huidibi xyajnidzoocim iich ajt n'alma ti xyajniñicyich co yi' y'ayuc ngapxhuäcxipyich. ⁴ Miich Tito, cham nijayiy jadu'n nej jihuüy nijayiyich ngi'm'ung. Com tú'ciy nmij'ijxim nmijpidaacim Dios. Huen Dios iich ajt nDeedy tzajpjotpy etz Cristo Jesús iich ajt nihuambi yajtzoocpi tuñ may'ajt oy'ajt müd miich, huen xypa'ayooy etz xyajjotcujc'adipy.

Myajniñigipy yédyjic huidibi jéb nigohuajc'aty ymügütiyc

⁵ Paady iich miich jim Creta ñaaxjot nyajhui'my, jigix mjacyajniñihuipy je migütiyc jadu'n nej iich ca' ti nyajni'ixiydäyich ajcxy. Tügpi cajp nidüg nidüg myajniñigipy yédyjtiyc huidibi nigop'adüib nigohuajc'adüib yi mibijcpidijc, jadu'n nej ti nyajnimäy. ⁶ Yi' myajniñigipy yi huidibi ca' ti tundigoy; huidibi tüg töxyjáy müd, ca'p ycanaagity; huidibi y'ung ajcxy ca' nijot'aty mayñaax tzinaayin; huidibi y'ung ajcxy ycapxymidooyb. ⁷ Copicy huidibi nigohuajc'adamb yi mibijcpidijc huen jáy'aty tiydudagy, ca' huaad ti tundigoy; huen yajxon cuend'adipy huidibi Dios yje'ajtpy; jáy huidibi ca' ycüjuuñity; huidibi ca' yhuindzipity; huidibi ca' y'amügity; huidibi ca' chip'ixtäy; huidibi ca' y'adzocy. ⁸ Yi' jébi myajniñigipy huidibi oyjáy'ajtin tuñ müd hueñyitimypinity; huidibi ooy y'amügüity; huidibi huijycujc; huidibi tiydudagy yhuindägy yhuindma'ñ; huidibi huindzigiib Dios; huidibi ci'm nyagüend'ajtip. ⁹ Huen cixyjot huinijot naybidáacigixy ma je ayuc tiy'ajt huidibi ti ixpjccixy, jigix jébi ajcxy jot'amijmohuipy jacjadyii jáy ajcxy müd tiy'ajt janchypí, e capxjotcidägipy ajcxy je pin ajcxy ca' ixa'ñ Dios y'ayuc.

¹⁰ Com ji may judiojáy huidibi ca' ycapxymidoogixy, huidibi nigoobi tijaty ayuc tzach-nimiydaccp; huidibi ajcxy huin'ñmb ymügütiyc, jadu'n nej yi' ajcxy huidibi minamb co copicy tüg'ócay mibijcpi huen yajtiy'ajtiy ymang ajcxy, jadu'n nej judiojáy tungixy. ¹¹ Copicy co mgapxadugipy yi' ajcxy huidibi ymügütiyc yajco'iniyb tüg jin tüg tijc; huidibi ajcxy yaj'ixpijcp mujuy; huidibi ca' tiy'ajt yaj'ixpijccixy.

¹² Nidüg yi' ajcxy cohuinma'ñybi nigapxy ymügütiyc ymina'ñ co yi' Creta jáy ooy ajcxy y'anijity, ooy ajcxy huinducity, ooy ajcxy ñuuxity, ooy ajcxy ycaaxity. ¹³ Tiy'ajt jadu'n nej jada cohuinma'ñyay ymina'ñ. Yaj'oj ajcxy mictägy, huen huinjihuüyigixy yajxon Dios y'ayuc. ¹⁴ Ca'p ajcxy mijpidaacipy yi judiojáy ycostumbre etz ni ca' ajcxy mijpidaacipy yi y'ane'min huidibi jáy ci'm ti nihuinma'ñ'aty, huidibi ajcxy ti jipjyöyduutni Dios y'ayuc ytiy'ajt.

¹⁵ Pin jáy huädz yjot yhuinma'ñ müd, oy ti jacuyduñ costumbre, o oy ca' ti cuyduñ, Dios yjáygidacpy yi' co oyjot oyhuinma'ñ müdity. Pin jáy ca' huädz yjot yhuinma'ñ müdity, oy ti jacuyduñ costumbre, Dios ca' jáygidägy yi' com jibic ajcxy yjot yhuinma'ñ müdity, ca' ajcxy nej ñayjihuüyigixy. ¹⁶ Yi jadu'mbi jáy hue' ñaybidáacigixy jadu'n nej jihuüy nej ooy Dios ytiy'ajt ajcxy mijpidaaci, chi ma huidibi ajcxy ytumyb ji yajniñguéxcixy co ca' ajcxy cuydungixy Dios ytiy'ajt. Dios ca' yi' oy iix ajcxy yhuinma'ñ, ca' ajcxy capxymidoogixy Dios, ca' ajcxy Dios ytung mihuaadity.

2

Nejjéb huaad chinaaygixy yjugy'ajtcixy

¹ Miich huädz myaj'ixpigipy yi migütiyc nej jéb huaad cuydungixy Dios ytiy'ajt. ² Miich m'ihuuij mgapxhuijpi yi mijjädijc huen ca' ajcxy y'amügyjáy'adipy; huen huijycujc jáy'ajtcixy; huen müd'ajtcixy oyjot oyhuinma'ñ; huen mijpidaacixy Dios ytiy'ajt cixyjot huinijot; huen oyjáy'ajtin tungixy müd huentimypinjäyity; huen ajcxy mecxtujcin yaj-tungixy ma yi chinaayin. ³ Nañyitmyjadu'n mijjädijc ajcxy töxyjáybi huen ajcxy jadu'n jáy'ajtcixy nej huidibi ajcxy Dios yajmij'ajtp; ca'p ajcxy ymügütiyc nigapxip ni'o'jihuipy, ni ca' ajcxy nihuambedipy; nañ ni ca' ajcxy y'amügyjáy'adipy; huen ymügütiyc iihuicixy capxhuijixy müd ayuc oybi tudägypi. ⁴⁻⁵ Yi mijjädijc ajcxy töxyjáybi huen iihuicixy capxhuijixy yi mutz'anäg töxyjädijc ajcxy nej jéb huaad chinaaygixy yjugy'ajtcixy; nej jéb huaad ytijc ñay yajmij'ajtcixy; nej jéb huaad tzojccixy jihuüyigixy y'ung y'anäg; nej jéb huaad oyjot oyhuinma'ñ yajtungixy. Iihuij capxhuij yi töxyjáy mutz'anäcpi co huen

tiydudägy chinaaygixy, ca' ti jibic-huinma'n ajcxy mibidzimipy. Huen ihuij capxyhuij ajcxy nej jëb huaad yjin ytijc cuend'ajtcixy yajxon; nej jëbi y'amigüg'ajtcixy, nej jëb huaad capxymidoogixy ñäy. Pen jibic-huinma'n anajty ajcxy ytumyb, chi anajty Dios ytij'ajt yajnjagpxy yajni'ojij.

⁶ Miich Tito, nañ jadu'n jaty ihuij jaty capxhuij yujceepidijc etz anäctijc nej jëb huaad oyjot oyhuinma'n yajtungixy, ca' huaad ytundigoogixy ycapxtigoogixy. ⁷ Tito, tiydudägy mdzinähuipy, oyjot oyhuinma'n myajtungipy. Jim yi migügtijc ijpexit pigipy ma miich, nej jëb huaad ytungixy. Huädz ajcxy myaj'ixpigipy yi tiy'ajt, huijycujc m'idipy. ⁸ Tito, m'ihuijip mgapxhuijip yi migügtijc müd oy'ayuc oyhuinma'n, jigix co pinjäy jijpcogapxihuaanip miich m'ayuc, chi tzo'ydu'n jihuinhua'n, e jadu'n ca' jadipy nej jibic xyñigäpxcixipy xyñi'ojijyigixipy.

⁹⁻¹⁰ Je tumbidijc huidibi ijtp cojuyiy codoogiy, huen yhuindzin imidoogixy capxymidoogixy nej ypadyi. Huen tungixy nej huaad yhuindzin jäygidägy, ca' adzo'nmay yjäy'adipy. Ca' meedzip tijaty yhuindzin yjë'ajtpy, huen yajmij'adipy yajxon yhuindzin, huen yajxon ytung tundaayi. Pen jadu'n ajcxy yhuindzin midungixy yajxon, huin'it cömay y'idipy yi Dios ytij'ajt, je Dios huidibi xyajñdzocim ajt n'alma.

¹¹ Cham n'ijxim nnejhuiyim nej Dios may'ajt ti tuñ müd tüg'öciy jäy ajcxy ycixpi, co ti yaj'oyiy nej jëb huaad hueñypinity pinjaty mijpidaacip yi' y'ayuc, ypadamyb ajcxy y'alma ñidzocin co anajty y'o'ccixy. ¹² Dios cham ti xyajnejhuiyim pen tzögamb ich ajt n'alma, chojcpy co n'ixmajtzim je jibic-huinma'n huidibi Dios ca' jäygidägy. Ca' huaad ooy nijot'ajtim yi mayñaxpi tzinaayin ma jadachambi xii tiempo yjacoy. Copicy ndzinaayim huijycujc etz tudägy, e nguydunim Dios y'ayuc ytij'ajt. ¹³ Njijp'ijxim mina Jesucristo, je huidibi xy'ane'mdaayim, ymiina'n ya naaxhuin jadüg'oc müd ich ajt ycixpi. Njotcugiyim ich ajt co n'ijxim ymiin müd y'oy'ajtin ymic'ajtin, yi Dios huidibi yajñdzögam ich ajt n'alma. ¹⁴ Yi Cristo Jesús ti ñayyoxiyi ti ñaydoogyi co y'o'cy ma yi cruudz müd ich ajt ycixpi. Yi' ti xyjuybidzimim ma anajty yi mujcu' c'am xymiid'ajtim, co anajty ti nbocytuunim. Yi' ti xyajpocyñihuätztaayim nidüg'öciy, jigix Dios xyjäy'ajtimip müd huädz jot huädz huinma'n, jëb nduunim oyjäy'ajtin cixyot huinjot.

¹⁵ Tito, jada tiy'ajt migügtijc myajnimaydähuipy. M'ihuijip mgapxhuijip ajcxy yajxon. Dios ti xymöy cötuujc co m'ojipy pinjaty xycacapxmidoob, jëb ajcxy yi m'ane'min xyajmij'ajtip.

3

Huen mijnicxpejtcixy yi gobierno ytungmüdp

¹ M'ihuijip mgapxhuijip yi migügtijc huen capxymidoogixy yi gobierno ytungmüdp etz cajpjäy ytungmüdp. Huen capxymidoogixy jadu'n nej y'ane'myil ajcxy. Huen tungixy huidibi tiydudägyip huidibi ajcxy yaj'ane'mip. ² M'ihuijip mgapxhuijip yi migügtijc ajcxy ca'p ajcxy ni pin nigapx ni'ojihuip, nañ ni ca' tzicapxy ajcxy ixtähuip, huen ñaybidaacigixy amigü, huen mímecxtujtaayigixy yi ymigügtijc ajcxy, huen nicy xyeemy jäy'ajtcixy müd yi mayjäy ajcxy.

³ Jecy'ajty ma ca'ni anajty nmijpidaacim Cristo Jesús, hue' anajty nyajpaatim müd jibic-huinma'n. Ca' anajty n'imidoohuim ngapxmidoohuim. Je mujcu' anajty ti xyhuin'inim, paady anajty nniidigooyim ndüdigooym. Ndzachnijot'ajtim mayñaxpi tzinaayin, ni ngajajtim anajty nej n'ixmajtzim yi jadu'mbi huinma'n. Jibic-huinma'n nduunim. Jadu'n njäy'ajtim nijot anajty n'idüztim, nga'oy'ijxim anajty nmigügtijc. Paady jäy anajty xymiddziptzoonim, chi naymijotma'tcootim miñ xyipy. ⁴ Jadu'n anajty nduunim ixti cooni Cristo Jesús ñaygüxigüiy ya naaxhuin, etz nnejhuiyim jadu'n nej Dios ich ajt nihuambi yajtzoocpi may'ajt oy'ajt ti tuñ müd tüg'öciy jäy ajcxy ycixpi. ⁵ Yi' xyajñdzocim ajt n'alma canan co ich ajt ndzach'oyjäyity. Hue' je' jadu'n ti tuñ müd co pa'ayo'n ti yajtuñ müd ich ajt ycixpi. Ninigoob ti tuñ may'ajt oy'ajt müd ich ajt ycixpi. Chi yaj'oyiyñi ajt njot nhuinma'n huinjemy müd je Espiritu Santo huidibi xyajtigüiyim njot nhuinma'n, e jadu'n ajt njugy'ajtin ndzinaayin chondaacni huinjemy. ⁶ Dios ti yecy yi Espiritu Santo janch mijcajee ma ich ajt njot nhuinma'n. Jadu'n Jesucristo xytuunim, je huidi ich ajt nihuuaanim yajtzoocim. ⁷ Yi' ti xyaj'ahuimbijtim tudägy müd je may'ajtin oy'ajtin huidibi ti tuñ co yi' ti y'ögy müd ich ajt ycixpi. Jëyi cham y'oy'ahuixnity mina anajty nbadaanim je jugy'ajtin huidibi Dios müd huidibi ca' ycixipy ni minaa xii.

⁸ Jada ayuc jada tiy'ajt ndzojcpyich co miich mnägapxpedipy. Ooy ycopicyity co yi' ajcxy huidibi mijpidacp Dios huen oyjäy'ajtin tungixyp. Ooy y'oyity co oyjäy'ajtin tungixyp ajcxy. Yjäygidägyip yi jäy ajcxy müd je oyjäy'ajtin huidibi anajty ajcxy ytumyb etz ypaadipy ajcxy oy'ajt. ⁹ Ixmatz yi jäy ajcxy huidibi nigapxy nimiydägy yi nigoobi'ayucity, yi huidibi ca' choobaady. Nañ jadu'n yi' ajcxy huidibi nigapxp nimiydacp huidibi ñi'ap'ajtpy ñideedy'ajtpy.

Ca' mjiptigi'ihui'py yi tzip capxy ma yi judiojāy ycötujcin huidibi ajcxy ypanicxyp. Yi jadu'mbi tzip capxy ninigoob yi', ca' yi' ni ma choobaady, ca' jugy'ajt müdity.

¹⁰ Yi jadu'mbi jāy huidibi tzip capxy ixtaayb, müd tūg'oc mejtz'oc myaj'ojipy pen ca' ycapxcōbicy, tim ix'oj, huen nīcxy. ¹¹ Mnejhuiyb co yi jadu'mbi jāy ajcxy ti ixmajtcixy je tiy'ajt, tundigooyb yi' ajcxy, ci'm jadu'n nayyajpocycāhuiygixy.

Pablo nimay Tito co müd naybadaanip

¹² Nyajnigüexipich nidüg, aver huidibi iich anajty n'ocquejxyp yi Artemas o yi Tíquico. Co yi' jim yjädipy, chi müich xyjatyñiminipyich mic'amy jim Nicópolis com jim nyajnaxa'ñich yi tich poj tiempo. ¹³ Co yi Zenas, yi huingapxpi, etz Apolo ajcxy jim yjädipy, quejxnajxcix müich yi', e mooygixy ytu'amgixpi ca'ydi ti yajmayajtcixy tü'am. ¹⁴ Huen yi nmigügtijc'ajt xpijccixy nej jāy y'oyjāy'aty, huen pubejtcixy pin tijaty yajmayajtp. Pen ca' jadu'n tungixy, Dios ca' yi' jāygidaacip yi' ajcxy yhuinma'ñ.

Pablo ycapxycixy müd Tito

¹⁵ Yi migügtijc ajcxy huidibi ya yquejxyp ajcxy capxpocxin ma müich. Nquejxpich ngapxpocxin ma tūg'óciy yi nmigügtijc ajt huidijaty jim yajmij'ajtp Cristo Jesús. Huen Dios mij may'ajt tunip müd müich ajcxy ycixpi. Amén. Jadu'ñyi ngapxcixyich.

FILEMÓN

Yi Necy Huidibi San Pablo Yajniguejx Filemón

¹ Hich Pablo etz Timoteo, ich ajt nmigüg, nijayiybich müich Filemón huidibi ooy ndzocyich, huidibi quipxyi müid nduunim. Nmach'inäyich müid co nyajmij'atyich Cristo Jesús. ² Nañ jadu'n nijayiybich yi Apía, ich ajt nmigüg töxyjäybi, etz yi Arquipo, huidibi capxhuäcx Dios y'ayuc tú'ciy müid ich ajcxy, etz tüg'óciy yi migügtijc huidibi naymüjcigixp ma müich mdijc Dios ojadajtciy. ³ Huen Dios Teedy etz yi Huindzin Jesucristo tuñ may'ajt oy'ajt ma müich ajcxy etz xyajjotcugiygixipy.

Pablo capxpaady Filemón co mijpidägy Dios

⁴ Nyajnajxpyich Dioscojuyp ma Dios müid müich ajcxy ycixpi. Njatytimjäymejtzpich müich ajcxy jabom jabom co Dios nmibijctzooyich. ⁵ Ti ich ayuc nmidoj jadu'n nej müich mdzocy mjihuüy yi Huindzin Jesús etz tüg'óciy pinjaty yajmij'ajtp Jesús. ⁶ Nañ jadu'n nmibijctzooybich Dios müid müich ajcxy ycixpi, huen oyjäy'ajtin mdunipy müid je migügtijc, jadu'n nej Dios ti xyajnejhuüy yi tiy'ajt jigix ajcxy tiy'ajt paadipy ma müich nej jëb ajcxy cuyduñ Cristo y'ayuc. ⁷ Hermano, ti ich ooy njotcugiyich müid yi m'oyjäy'ajtin huidibi müich mdumyb co ti mbubety yi Dios yjāy.

Pablo pijctzoy tüg may'ajt ma Filemón müid Onésimo ycixpi

⁸⁻⁹ Njapijctzoohuamybich tüg may'ajt ma müich. Oy njamüididyich cõtujcin huidibi Jesús xymooyich jëb nja'ane'my co müich mgöbigipy Onésimo oy'amy. Per ca' jadu'n n'ane'mañ müid co ooy ndzocy ooy njihuüyich müich. Paady cham may'ajt nbijctzooyich ma müich co mgöbigipy yi Onésimo oy'amy. Hich Pablo, ti nmijjäyñich. Cham jäy ti xypidägyich pujxtigoty müid co ngapxhuäcxich Jesús y'ayuc ytiy'ajt. ¹⁰ Cham may'ajt nbijctzooyich ma müich co mba'ayoohuipy yi Onésimo. Jadu'n njihuüyich nej n'ung'adyijich müid co yi' ti mijpidägy Jesús ya ma ich nbujxtijc'inäyich co ti nyajnimäyich Dios y'ayuc.

¹¹ Tiibi xii tiempo ñaxy co yi Onésimo ca' yi' ti xy'imidoj ti xycapxymidoj. Jadachambi janchtiy capxymidoohuam jadu'n ma müich etz jadu'n ma ich. ¹² Cham nyajnigüexy Onésimo. Ooy njajihuüyich co yam nguexyich. ¹³ Ooy ich yam njaya'ida'ñich ma ich jigix ixipy yam xymüdtuñich. Ytimyñipaatpy ixipy jadu'n nej müich xymüdtuñich ma yam nbujxtijc'inäyich müid co ngapxhuäcxich je jemybi oybi ayuc nej Jesucristo yjaty ayoooy. ¹⁴ Per ca' ich n'a'ixiyich nicxy nyajhui'myich, pen ca' müich jadu'n minañ. Ca'p ndzocyich adzip ahua'ñ tijaty müich mdunipy. Jëyi ndzocyich co müich oy'amy xypubedipyich. ¹⁵ Ca' yjeyity paady ycixpi ti xycöguëgy jëbi mijpidägy Jesús. Hueeni xii tiempo ti y'ity ya, e cham co yhuimbidity ma müich, müid y'idipy jim huinixii. ¹⁶ Ca' jadu'n m'ocmüid'ajtnip cham jadu'n nej jac'oyñipin cojuüy codoogiy tumbi. Hue' je' mmü'adip jadu'n nej Jesús yjāy huidibi ooy mdzocy mjihuüy. Pues ooy ich yi' ndzocy njihuüyich. Jac nigi cham müich mdzogipy mjihuüipy müid co yi' cham y'oyjäyity, etz co cham mijpidägy yi Huindzin Jesús.

¹⁷ Pen janch müich xymigüg'adyijich cöbic yi Onésimo jadu'n nej ich müich ixipy xycöbicyich. ¹⁸ Pen ti yi' yinjaty huenjaty xymidundigoy o xymünucx'adyii ich müich nmigüedipy. ¹⁹ Hich Pablo, ich müich njaaybich nfirmajyich müidich ngi'mgi' ngi'mletra. Hermano, nmigüedipyich nej Onésimo xymünucx'adyii. Oy ich yam ca' n'iibaady ngapxpaady co müich xymünucx'adyijich müid co Dios ytiy'ajt ti mbaady ma ich. ²⁰ Xypubedipich müid Onésimo. Yi nHuindzin'ajtim Jesús yjāygidägy pen jadu'n mduñ. Mdunipy may'ajt müid Onésimo müid Jesús ycixpi, e jadu'n ich jëb huaad njotcuje'atyich.

²¹ Nnejhuüybich co ooy m'imidoj mgapxymidoj, e jadu'n nej yam njacnijayy, jac'anaxy mduna'ñ. ²² Nañ jadu'n yam nimäy. Tun may'ajt ni'ixi tüg jättac. Njijp'ijxypich co nbujxtijcpidzimipyich tzoj müid co müich ajcxy Dios mbijctzoogixy müid ich ycixpi, e jadu'n jëbi nícixibich ma müich.

Pablo ycapxycijxy müid Filemón

²³ Nañ nbidacpyich necyjoty yam. Xycapxpooexp Epafra ich nmibujxtijc jäy müid Cristo Jesús ycixpi. ²⁴ Nañ xycapxpooex Marcos, Aristarco, Demas etz Lucas. Hich yi' ajcxy xypubejtp ya. ²⁵ Huen yi nHuindzin'ajtim Jesucristo may'ajt oy'ajt tunipy ma müich ajcxy, jëb müich ajcxy oy'mity. Amén. Jadu'n ngapxcixyich.

HEBREOS

Yi Necy Huidi Pinjaty Yajnigüejsx Je Hebreo jäy

¹ Jecy'ajty Dios ayuc yejcy ma ajt nmij'ap nmijteedy canaag'oc etz canaagnax müd je yprofetas ajcxy, je' ajcxy huidibi najtzcapxiy Dios y'ayuc. ² E jadachambi ma xü tiempo yhuingooni co je naaxhuiñybi ycixani, Dios ayuc yecy ma iich ajt müd je' y'ung. Dios müd y'ung yaj'oyiij je naaxhuiñybi etz tüg'óciy tijaty huidibi yajpatp. E Dios ti y'ung yajmigo'ixmadziydäy tüg'óciy. ³ Dios y'ung ymüd Dios y'oy'ájtín, yi' je' Dios ytiücxin'ajtpy yjajin'ajtpy. Yi' je' codinaayb etz yajnigüexigy nej je' je Dios. Dios y'ung huijtz'ijtaayb tüg'óciy müd je' y'ayuc etz ane'mín mic'ajt müdpi. Co Dios y'ung ti xyajhuaatzim ajt nbocy, chi cöbajcy je mij'ane'mín jiiyby tzajpjoty, jadu'n nej jihuüy y'ixtacy a'oy'amy ma je mijpi Dios ymijc jiiyby tzajpjoty.

Dios y'ung jacmij yi'ca'ydí ángeles ajcxy

⁴ Je Dios y'ung jac mij je' ymic'ajt y'ane'mín müdity, ca'ydí je ángeles ajcxy. Com yi' je' Dios y'ung, paady ycixpi mic'ajt müdity jaydëbi ane'my huidibi Dios yje'ajtpy, e ca'ydí yi' ángeles ajcxy yi' jadu'mbi mic'ajt müd. ⁵ Com Dios ca' yi' ni tüg'ángel nimay: iich müch n'ung'ajtpy. iich müch ti nyajpi c'aty jadachambi xü.

Nañ jadu'n ca' Dios ni tüg'ángel nimay:

Müch xyteedy'adiibich, iich müch n'ung'adiiyb.

⁶ Co Dios y'ungoob oy quexy ma naaxhuiñyäj chinäy, chi yi' ane'mín pidacy:

Huen je ángeles ajcxy nidüg'óciy huindzigiñhuipy pa'tijhuñhuipy je' y'ung.

⁷ E müd je ángeles ycixpi, Dios ymina'n:

Yi ángeles jadu'n yi' ajcxy nej poj. Yi' ajcxy huidibi tzajpjoty tzinaayb, jadu'n yi'ajcxy nej huidzuc, nej jünye'n.

⁸ Jadu'n Dios ymina'n müd y'ung ycixpi:

Müch, Dios'ajtp, müch m'ane'mín huinixü huinitiempo yi' y'idipy. Müd mdudägy'ajtin müch m'ane'mipy.

⁹ Ti mdzocy je tiy'ajt tiybi, e ca' ti m'ixa'n je jibicpi. Paady ycixpi Dios, müch mDios, ti xyhuin'ixy, e ti yejctäy nigi ma müch je jotcujc'ajtin je xondaacin, ca'ydí ma yi' mmi'ane'mbidijc.

¹⁰ Dios nañ jadu'n ymina'n:

Müch, Huindzin Dios, oga'n'aty mbidac nej naaxhuiñybi chondacy, e müd müch mmic'ajt myaj'oyiij je tzajp.

¹¹ Cijxtähuip yi' naaxhuiñybi etz yi' tzajp, per müch hui'mip huinixü huinitiempo. Jadu'n yi' naaxhuiñybi etz yi' tzajp y'amijydähuipy nej huit.

¹² Jadu'n müch yi' naaxhuiñybi etz yi' tzajp m'anëgipy nej tüg' huit yaj'anëgyin. Jadu'n müch yi' naaxhuiñybi etz yi' tzajp myajtigadzipy nej jäy ajcxy yajtigach yhuít. Chi müch je'ni m'idipy, je mxü mjimijt ni mina ycacixipy ycatigoyipy.

¹³ Ni camina Dios canimay ni tüg' je ángeles ajcxy:

ña' ma iich nmijc a'oy'amy, ixti mabaad iich müch je mmidzip nmimadactäyich, jadu'n yi'ajcxy nipaadipy nej yi' müch mdecypocxpejt'adyi.

¹⁴ Tüg'óciy je ángeles ajcxy ac espíritu yi' ajcxy, e ytungixy ma Dios, yquexyöygixy jigix pübepipy je jäy ajcxy huidibi ajcxy y'alma padam nüdzoocin.

2

Ca' n'ixnaxj nmidonaxim nigoo yi' pocyhuinmeecxin

¹ Müd jadayaabi tiy'ajt ycixpi, oy co yaxxon n'ocjäyguigiym Dios ytiy'ajt huidibi ti nmidoohuim, jigix ca' njipyöyduutim je Dios ytiy'ajt huidibi jadu'n nipatp nej tü'aa oybi.

² Pen je ayuc ytiy'ajt huidibi ángeles ajcxy yejcy jecy'ajty, hui'm je' co yjanchity. E pinjaty pocyumb, e ca' cuyduuni Dios ytiy'ajt, Dios chaachytunipy je' nej padyi müd ypocy ycixpi.

³ ¿Nej tiy iich ajt co Dios ycastigo nga'ocpaatim, pen je' je' yam ca' nmijpidaacim je Dios ytiy'ajt jadu'n nej jëbi xyajnidzoocim ajt n'alma? Yi' Huindzin Jesús jayijp'aty ci'm nigapxy Dios ytiy'ajt jadu'n nej jëbi Dios xyajnidzoocim ajt n'alma. E jac'axam je discípulos ajcxy nañ jadu'n najtzcapxi Jesús y'ayuc, e nigapxpejty ajcxy co yjanchity je Jesús y'ayuc, e chi capxnajxy ajcxy jada tiy'ajt ma iich ajt.

⁴ Jadu'n anajty capxhuäcxixy Jesús y'ayuc ma iich ajt, chi Dios yajnigüexicp Jesús y'ayuc co yjanchity co tuñ iixpejt, mijhuinma'n etz milagro. E co Dios xymooyim je yijhui'n ymic'ajt, chi nije' nije' nbaatim mic'ajt ma Dios. E jadu'n Dios tuñ nej yi' tzocy.

Jesucristo jadu'n je' anajty nej ajcxy yjuugy ymigüg

⁵ Dios ca' yi ángeles ajcxy ti cõtujcin möy co y'ane'mity ya naaxhuiñ, jadu'n nej xii tiempo min cidägy, je xii je tiempo huidibi ñich ajt nnimiyydaacim. ⁶ Hue' janchtiy ji tüg'ti yjaybetyity ma Dios ñeey, ma ymina'ñ:

Miich Dios, ¿ti yi' je naaxhuiñjyay, co miich yi' ajcxy mjäymedziyby? ¿Ti yi' je naaxhuiñjyay, co miich je' ajcxy mjetmay'adyii?

⁷ Janch con xii tiempo miich ti mmöy yi naaxhuiñjyay ajcxy e nañ ti mmöy jacminacy ymic'ajt y'ane'm'ajt ca'ydi yi ángeles ajcxy. Per jac'axam miich mmöhua'ñ naaxhuiñjyay ajcxy nigi ymic'ajt y'ane'm'ajt, ca'ydi je ángeles ajcxy. Tüg'óciy huidijaty miich ti myaj'oyiy anajty ti mbidactähuip yi' ma yi naaxhuiñjyay ajcxy ane'min.

⁸ E co anajty ti mbidactäy anajty ma yi' ajcxy y'ane'min, jadu'n nipaady nej jihuüy tüg'óciy tijaty huidibi ti myaj'oyiy, y'idipy ma yi' ajcxy ytecypat.

E jadu'n yi', co Dios moyday ane'min je Cristo. Dios ni ti yi' ca'ixmach nicxy yca'ity ma yi' y'ane'min. Oy ixypy ca'ni cham n'ijxim co tüg'óciy tijaty ya naaxhuiñ etz tzajpjoty ca'ni amugi' ycapxycöbigyii. ⁹ Dios ti xyaj'ijxim co Jesús miid mij'ajt ane'm'ajt. Je ángeles ajcxy nigi mic'ajt oy'ajt anajty müdity, ca'ydi Jesús co yi' chinay ya naaxhuiñ. Jadu'n Dios tuñ jaydëbi Jesús y'ögy miid jäy ajcxy ypocy ycixpi. Jadachambi Dios ti möy Jesús mij oy'ajtin, etz mij ooy ti cömay miid je tzaachy'o'cin huidibi ypaat.

¹⁰ Tüg'óciy huidijaty ya yajpatp, ji'ajtp yi' miid Dios ycixpi etz Dios ymic'ajt yaj'ijtaayb tüg'óciy huidibi ji'ajtp. Dios tudägy ytuuñ co yajca'pxi Jesucristo y'oy'ajtin miid je tzaachypa huidibi ti minaxy ti yajnaxy. Miid co Jesucristo tzaachypa ti minaxy ti yajnaxy, paady ycixp jäy ajcxy padaangixy Cristo y'oy'ajtin. ¹¹ Miid co Jesucristo, je huidibi jäy ajcxy yajpocyñhuaatzp, jilby mic'ajt ti paady ma Dios Teedy, paady ycixp yi' ajcxy huidibi patcixp pocyñhuaatzin nañ jim mic'ajt patcixp ma Dios Teedy. E miid co Jesucristo etz yi' yaj mic'ajt patcixy ma Dios Teedy, paady ycixp Dios y'ung je Jesucristo ca' ti tzo'ydu'n jihuüy co yi' ymina'ñ co je mibijcpidijc jadu'n nipaady nej yi' yjugytijc ymügütijc. ¹² Paady je Cristo ymina'ñ ma yjaybetyity:

Miich Dios, ñich miich ngapxpadipyich ma nmügütijcich. N'ihuipyich iy miid miich ycixpi ma je jäy ajcxy ti nayyöymüjicigixy.

¹³ Nañ jadu'n Cristo ymina'ñ ma yjaybetyity:

Nmijpidägyich Dios.

E jadüg'oc yminaanip:

Cha ñich, miid je ung anäg ajcxy tiibi Dios xymöyich.

¹⁴ Ma jäy ajcxy ytügquëx'ajtcixy, tügpi yxiixy, tügpi ni'py je' ajcxy. Nañ jadu'n Jesús ymiid je' anajty yxiixy ñi'py jadu'n nej jäy ajcxy ymüidity jigix jëbi y'ögy, e jadu'n je' yajhuindigoydähuipy je huidibi anajty jamic'ajtmüid co jäy yaj'ögiy, je' je' je' mujcu'. ¹⁵ E jadu'n je' Cristo yajnihuädzictuty tüg'óciy pinjaty anajty cojuuyi codoogiy y'ijtp ma je mujcu', miid co tzigiyigixy yi' y'o'cin. ¹⁶ Janch co Jesús ymiin ya naaxhuiñ, ca' nminaanim co pubeda'ñ je ángeles ajcxy, je' janchtiy ypubedamyb Abraham y'ap y'oc. ¹⁷ E miid jada ycixpi, Jesucristo jadu'n anajty müidity ñinix etz yjugy'ajtin tü'ciy miid je jugytijc ymügütijc ninix etz jugy'ajtin, jigix jëbi yi' naydügpajc codinay naaxhuiñjyay ajcxy ma Dios yhuinduu miid tudägy'ajt etz pa'ayoohuin. Etz nañ jadu'n jigix jëbi huindzigiy Dios miid yci'm ñinix miid jäy ajcxy ypocy ycixpi, e jadu'n yajpocyhuaatztähuip yi' mayjäy ajcxy. ¹⁸ Com Jesucristo ci'm tzaachypa minajx yajnaxp, etz nañ jadu'n je mujcu' Jesucristo jot'ijxy huinma'ñ'ijxy, paady ycixp Jesucristo jëbi pubety pinjaty jadu'n tzaachypa minajxp yajnaxp, etz ma yjot'ixyii yhuinma'ñ'ixyii je mujcu'.

3

Jesús jacnigi mijity yi' ca'ydi Moisés

¹ Miid co Jesucristo jadu'n ti tuñ, paady ycixp miich ajcxy migütijc huidibi cixyot huinijot mijpidacp Jesucristo, je huidibi ajcxy Dios ti xyhuin'ijxcixy co xyje'adäänigixy. Pidaaccix mhuinma'ñ yajxon ma je Cristo Jesús, je huidibi nejhuiyim co Dios ti quexy ya naaxhuiñ, je huidibi tügpajc mijtungmiid ma Dios, huidibi tügpajc xycodinaayim ma Dios. ² Jesús tudägy yi' ti y'ity ma Dios yhuinduu, je Dios huidibi ti yajnibigiyi je mijtung, tim jadu'n nej Moisés y'ijty tudägy ma je ytung miid tüg'óciy jäy huidibi anajty ti cöbijccixy Dios ycõtujcin ma Moisés. ³ Jesús ymihuaad nigi huindzigi'ñ etz cömayin, ca'ydi Moisés. Tim jadu'n nej pin tüg tijccoipi je' je' ijtp cömay, ca' nminaanim je tijc ijtp cömay. ⁴ Tüg tüg tijc jim je' pin cojp. Per Dios yi' ti yajcojtäy yaj'oyiydäy tüg'óciy huidibi ji'ajtp. ⁵ E jadu'n je Moisés tudägy je' ytuuñ miid tüg'óciy jäy huidibi ti paady Dios ycõtujcin ma yi'. Je Moisés je' ytung'ajti yeycy je tiy'ajt huidibi anajty Dios jac'axam yegamyb. ⁶ Je Cristo tudägy ytuñ miid tüg'óciy ñich ajt huidibi mijpidacp Dios, tim jadu'n nej tüg jäy y'ung tudägy ytuñ ma yteedy ytijc yteedy ypidägy. Jadu'n ñich ajt nbaady nej Dios ytijc, e Cristo tudägy ytuñ miid ñich ajt, pen tudägy

nmibijcim Dios y'ayuc, ca' n'ixmajtzim ajt nmibijcin. Pen nmijpidaacim Dios agujc jotcuje ixti mabaad n'o'cim miid je' ycixpi huidibi njijp'ijxim ma Dios.

Dios yjāy ajcxy ypoocxin

⁷ Paady ycixp jadu'n yjaybetyity ma Dios ñecy ma je Espíritu Santo jadu'n yminañ: Jadachambi pen midooyb miich ajcxy nej Dios yminañ,

⁸ ca' ajcxy m'ijtcixy jotjuuñ jadu'n nej je' anajty ajcxy jotjuuñ y'ity, je' ajcxy huidibi mibidigy Dios jecy'ajt (co ajcxy y'ity jim mijtigiduum). Je xii je tiempo jecy'ajty co ajcxy jot'ijxy huinma'ñ'ijxy Dios.

⁹ Chi Dios yminañ:

Miich ajcxy mmij'ap mmijteedy ajcxy jim mijtigiduum xyjot'ijx xyhuinma'ñ'y'ijxich ajcxy jecy'ajty. Ca' ajcxy jāymech co ajcxy y'ijxy anajty canaag mijhuinma'ñ huidibi ndumybich anajty miid yi' ajcxy ycixpi huixchiguipx jimijt.

¹⁰ Paady njotma'tyich miid miich ajcxy mmij'ap mmijteedy jecy'ajty, e nmīnaañich: "Nidigoy tūdigoy ajcxy jabom jabom ma yjot yhuinma'ñ. E ca' ajcxy ne-jhuihuaangixy anajty iich nñi'aa ndū'aa."

¹¹ Paady yi' ajcxy nmijotma'tyich, e janch janch nnimaayich ajcxy, e ca' n'indāgyich, co ca' ajcxy ytiǵihuipy ma iich nbocxtac.

¹² Migūgtijc, naygūend'ājtigix nidūg nidūg co ni tūg miich ajcxy mgamīd'adip jibicjot jibic-huinma'ñ, e ni mǵa'ixmājtzcixipy Dios juugypi y'ayuc, miid co ca' mmibijccixy. ¹³ Hue' janchtiy najot'amijmōoyigixy miñ xyipy jabom jabom namī xii tiempo yjacnīcñi. Jadu'n miich ajcxy mdunipy, ca'ydi ajcxy yi pocytunī xyhuin'ingixy, e chi anajty mñaybidāacigixy jotjuuñ. ¹⁴ Pen nmibijcim nmijpidaacim Cristo y'ayuc tiibi nbaatim oga'n'aty, e ca' n'ixtigihua'cim mabaad n'o'cim, chi jēbi n'ijtim miid Cristo.

¹⁵ Je' je' je' huidibi jaybetyity ma Dios y'ayuc:

Cham, pen mmidooyb miich ajcxy nej Dios yminañ, ca' ajcxy m'ijtcixy jotjuuñ, jadu'n nej je' anajty ajcxy huidibi Dios mijotma'tp anajty miid co ajcxy mibidigy Dios.

¹⁶ ¿Pinjaty ajcxy huidibi jecy'ajty midou Dios y'ayuc e mibidigy Dios? Nidūg'ōciy je' ajcxy janchtiy tzomb Egipto naaxjot jecy'ajty miid Moisés. ¹⁷ ¿Pinjaty je Dios mijotma't jadu'n huixchiguipx jimijt? Je huidijaty ajcxy tundigoy miid Dios ytiy'ajt, e je' ajcxy cijx y'ōctaayigixy jim mijtigiduum. ¹⁸ ¿Pinjaty Dios ñimay co ni camina ytiǵihuipy ma je Dios y'it ylugar ma jēbi ypoocxcixy miid yi'? Je' ajcxy huidibi ca' ycapxymidoy. ¹⁹ Paady nnejhuīyīm co janch ca' ajcxy jajty nej ytiǵiyigixyipy ma Dios y'it ylugar miid co ajcxy ca' mibijcy Dios y'ayuc.

4

¹ Com nmīdni ajt Dios y'ayuc, jadu'n nej ti xyaj'ahuanīyīm co ndigīyīm ma yi' chinaydac yjugy'ajttac, e nbocxīm miid yi'. Paady ooy tzocy co ndzigīyīm Dios. Ca' jecyity co nidūg miich ajcxy ca' mdigīhuipy miid co ca' mmibijccixy Dios y'ayuc. ² Nañ jadu'n ti iich ajt nmidoohuim je Dios y'ayuc oybi, tim jadu'n nej yi' ajcxy jecy'ajty ti midooy. Per ca' Dios y'ayuc ma ti ypūbedyīi ajcxy co ti jamidoogixy je tiy'ajt. Com hue' ajcxy ymidou, e ca' ajcxy mijpidacy. ³ Iich ajt com ti nmibijcim je Dios y'ayuc oybi, iich ajt je' tigīyīmip ma je it huidibi Dios ti tijy ma jēbi nbocxīm miid yi'. Com Dios jadu'n yminañ:

Paady yi' ajcxy nmijotma'tyich, e nmīāyich ajcxy, n'ībaadyich ngapxpaadyich n'ayuc, co ni camina xii yi' ajcxy ypocxtac capaadipy ma iich.

Tūg'ōciy huidibi Dios yajcojy yaj'oyīy, hue' ti yajcojy ti yaj'oyīy jayijpni ca'ni anajty naax-huīnybi chondacy. ⁴ Com ma yjaybetyity je tiy'ajt jūby mūmity nīgapxy je mihuixtūjcxībi ma jadu'n yminañ:

Dios ypoocxy je mihuixtūjcxībi miid je' ytung ycixpi tiibi anajty tuñ.

⁵ E jadūg it yjaybetyity ma Dios ñecy ma jadu'n yminañ:

Ca'p yi' ajcxy ytiǵiyigixipy ma iich nbocxtac.

⁶ Hue' janchtiy Dios yjacmīd'ajtyñi it lugar ma ypocxtac ma jēbi pinjaty ytiǵihuip. Yi' ajcxy huidibi tzinay jecy'ajty huidibi jayijp midou Dios y'ayuc, ca' je' ajcxy ytiǵiy ma Dios ypocxtac, miid co ajcxy capxycōmidoodacy Dios. ⁷ Paady ycixpi Dios ti pidāgy tūg xii tūg tiempo mīna jēbi pinjaty tigīhuipy ma yi' ypocxtac. Je' jadachambi xii tiempo Dios ti pidāgy. Dios ti xyñīmaayīm nej David yminañ tzach com jecy, nej miñ jaybety huidibi ti yajnīgapxy co jadu'n yminañ:

Jadachambi pen midooyb miich ajcxy nej Dios yminañ, ca' ajcxy mñaybidāacigixy jotjuuñ.

⁸ Co Josué je Israel jāy ajcxy camoy je poocxin, ca' Dios canīgapxy huīngbi xii mīna ytiǵihua'ñ ajcxy ma Dios ypocxtac. ⁹ Paady ycixp, jadu'n yjac-huī'myñi jadūg xii tiempo mīna Dios yjāy ytiǵihua'ñ ma Dios ypocxtac. ¹⁰ Com pinjaty tigīyib ma Dios ypocxtac hue' je' ypocxy miid je' ytung ycixpi tiibi anajty tuñ, tim jadu'n nej Dios ypoocxy je mihuixtūjcxībi miid je' ytung ycixpi tiibi anajty tuñ. ¹¹ Hue' tzocy co naymīc'ijxim nej huaad ndigīyīm ma je Dios

ypocxtac, ca' yjecyity co nijējity miich ajcxy mbaduunipy nej ajcxy y'idich huidibi ajcxy ca' mibijcy Dios y'ayuc, e ca' mdigiygixipy ma Dios ypcxtac.

¹² Com yi Dios y'ayuc ijtp yi' huinixii huinitempo, e ymiid mic'ajt. Nigi yajtigiyñajxtäy ninicx, jot almi, ca'ydi tüg espada huidibi mejt'adu'm'amy jijpip etz yijpxu'ñity. E Dios y'ayuc nehuiydaayb nej jäy ajcxy yjot yhuinma'n mūdity, e tüg'öciy tijaty ajcxy ñijot'ajtcixyp. ¹³ Ca' ji ni ti huidibi Dios ti yajcojy nicxy ñayyüchyii ma yi' yhuinduu. Tüg'öciy nej ajt njot nhuinma'n nmūdity ñigüēxictähuip yi' ma Dios, je Dios ma ich ajt nguendi ngiyegaanim, yi' ijxtaayb ajt njot nhuinma'n.

Jesús yi' je' je' mijhuingapxpi ma Dios

¹⁴ Jesús, je Dios y'ung, yi' je' tūgpajc jacmijtungmūd huidibi xycodinaayim ma Dios mūd ajt nbocy ycixpi. E Jesús ti ytiğiŷ ma Dios yhuinduu, paady ycixp tzoc ijtım tudägy ma ajt nmibijcin. ¹⁵ Pues com Jesucristo, je huidibi tūgpajc mijtungmūdip ma Dios, je huidibi xycodinaayim etz xyhuingapxim ma Dios, com Cristo tzaachypi etz ijxta'ni canaagnax ti yajnaxy, tim jadu'n nej ich ajt tzaachypi etz ijxta'ni nyajnajxim, per je' ca' ma ti bocy tuuñ. Paady ycixpi jēbi Cristo ajt xypa'ayooohuim co ajt nyajnajxim tzaachypi etz ijxta'ni. ¹⁶ Tzoc agujc jotcujc nmihuingoonim je Dios y'ane'mdac e n'ojadajtim nmibijctzoohuim Dios, jaydēbi co anajty jotmay nmūd'ajtim, chi Dios may'ajt oy'ajt tunipy mūd ich ajt ycixpi.

5

¹ Tüg tüg mijtungmūdipi huidibi huingapxp jäy ajcxy ma Dios, hue' je' yajhuin'ijxp ma yēdijctijc, etz yajñigapxpejty, jaydēbi yhuingapx jäy ajcxy ma Dios etz yajnaxipy Dioscojuyip mūd jäy ajcxy ma Dios, etz yegipy huindzigi'n ma Dios mūd jäy ajcxy ypocy ycixpi. ² Je mijtungmūdipi jäy ajcxy yajñibijc huidibi huingapxp jäy ajcxy ma Dios, jēbi yi' ajcxy pa'ayoooy huenpinty huidibi pocy ymiid, com nañ jadu'n yi' ajcxy pocy jihuüy. ³ E mūd yci'mbocy ycixpi copicy yegipy huindzigi'n ma Dios etz mūd jacjadyii jäy ajcxy ypocy ycixpi.

⁴ Ni pin huaad ci'm ycanaymōyii je jadu'mbi tung co yhuingapxity ma Dios. Dios yhuin'ijxpy pinjaty huingapxp ma yi' mūd jäy ajcxy ycixpi, tim jadu'n nej Dios huin'ijxy Aaron jecy'ajty etz yajñibijcy yi' jadu'mbi tung. ⁵ Jadu'n yjaty mūd je Cristo, ca' ci'm nayñibijctzoohuiiyi ma yi' jadu'mbi tung. Dios yajñibijci co huingapxp mūd jäy ajcxy ycixpi, e ti ymōyii je mij'ajt jadu'n nej anajty ti nīmāy:

Miich je' ich n'ung. Ich miich mjugy'ajt ti mmōy cham.

⁶ Nañ jadu'n ymina'n jadüg'it ma Dios ñecy:

Miich je' mhuingapxyp je jäy ajcxy ma Dios huinixii huinitempo, tim jadu'n nej Melquisedec ytuuñ.

⁷ Co Cristo chinay ya naaxhuñ, chi ooy mijuydägy minucxtägy Dios, chi ooy mibijctzoy janch mic je Dios huidibi jēbi ycohua'ñyii ma je o'cin. Mūd co ooy mibijcy ooy huindzigiŷ Dios mūd yung naxy yjot yhuinma'n, paady Dios ymidoohui. ⁸ Je Cristo oy je' anajty Dios ja'ung'adyii, yjajti nej ycapxymidoohuipy Dios, mūd je' ycixpi nej anajty ti y'ayoy ya naaxhuñ. ⁹ Co Cristo yajca'pxy yi' y'oy'ajtin mūd je tzaachypi huidibi yminajxy yajnaxxy, chi ni'ixi' anajty y'ity jēbi cop'adyii alma nīdzoocin huinixii, jaydēbi tüg'öciy pinjaty capxymidoob Cristo, ypaadip ajcxy y'alma nīdzoocin. ¹⁰ Dios jadu'n yajñibijcy Jesús co yajnicxip je jac mijpi tung ma yi' co huingapxp jäy ajcxy ma Dios, tim jadu'n nej Melquisedec ytuñ jecy'ajty.

Je ayo' n' co nijjpyöduutim yi mibijcin

¹¹ Ooy ich miich ajcxy mij nmūdmiydäga'n ma jadayaabi tiy'ajt, per ooy chachchip nimiydaacnity, com ca' miich ajcxy mic'amy mhuinijihuipy Dios ytiy'ajt. ¹² Jadu'n nej jada xii tiempo ti yjejcni ma miich ajcxy oga'n ti mmibicy. Hue' miich ixipy ajcxy mniyaji'ixpijcin Jesucristo ytiy'ajt je tzipjatypi. Per miich ajcxy mdzojcyñi co myajnajtzcappihuipy huijemy je Dios y'ayuc huidibi ca' chipity. Ti miich ajcxy m'ahuimbijttaaygixy ca' mic majaa ma mmibijcin. Hue' jēbi miich ajcxy jadu'n nipaady nej pi'ctijc huidibi leche uucp, e ca' jadu'n paady nej mij'anäctijc huidibi caagy caayb. ¹³ Pinjaty yajpatp ma jada ixpijcin huidibi ca' chipity, jadu'n yi' nej ma'xungdijc com ca' jajtcixy je ayuc tiy'ajt tiybi.

¹⁴ Je' tzipjatpy tiy'ajt je je' winjihuiyigixp, je' huidibi ymibijkin mij may mid'ajtkixpin, jidu'n nej je' huidibi y'aa ytiitz jim ajkixyin je' tizpi jich kaagy je' ykaaygixpy, je' ko yajjtkixpy je' nej winjiwüygixichin je' huidibi oy, etz je' huidibi ka'oyin.

6

¹ Paady tzoc nigi yajyujcpejtim n'ixpijcin ma Dios ytiy'ajt, tzoc ajt yajyeecim nmibijcin, jigix jadu'n nipaadip jadu'n nej jäy tiibi yhuinma'n yca'pxtaayñi. Ca' n'agapxiyo'cim canaag'oc jabom jabom je tiy'ajt huidibi ti nbaatim co oga'n nmibijcin Cristo. Ca' janam jatzojc n'ixpijco'cim huidibi oga'n ti n'ixpijcin jadu'n nej co njothuimbijtim nej anajty ndunim jibicpi huidibi xyajnicxim ma yi o'cin, e jadu'n nej nmibijcin Dios oga'n. ² Ca' jadüg'oc

n'ixpijco'cim je ixpijcin müid je nübejtin ycixpi, etz jadu'n nej yajcñixajy je mibijcpidijc jaydëbi paadip ajcxy je Dios yjihui'n ymic'ajt, etz jadu'n nej yi öcpi ajcxy yjugypigipy co anajty ti öccixy, etz jadu'n nej Dios tzaachytuna'n huinixi pocyjäydijc. ³ Chi njac'ixpijcin Dios y'ayuc je tzijpaty, pen Dios jadu'n tzojcpy.

⁴ Com pinjaty ti huinjihu'y Dios y'ayuc ytiy'ajt, e jäygidägy huidibi Dios yejcpy, etz müidity Dios yjihui'n ma y'ay yjot, jadu'n je' nipaady nejihu'y chinay ma jün ytiëxin. ⁵ Etz ti ajcxy jäygidägy Dios y'ayuc ytiy'ajt, e ti jihuiygixy Dios yjihui'n ymic'ajt huidibi yajtzinaayip ajcxy y'alma ma je xii je tiempo huidibi mümb cidacp. ⁶ Yi jadu'mbi jäy, pen tundigooyb ajcxy jadüg'oc müid Dios ytiy'ajt, e ixmach ajcxy nej anajty ti mibijccixy Jesucristo, ca'p jëbi jadüg'oc jothuimbijtcixy ma Dios müid pocy ycixpi e pijtzoogixy pocyhuinmeecxin jadüg'oc. Co ixypiy jadu'n ajcxy tuñ, chi huimbizimy nej ajcxy jadüg'oc yajcrudzpejtixy je Dios y'ung müid ajcxy ypocy ycixpi, e nixiicixy yajxiicixy nej Jesucristo y'o'cy müid ajcxy ypocy ycixpi. ⁷ Jadu'n yi' ajcxy nej naax nü'uuctich naag'oc naag'oc ytu'y. E pen je naax yejcpy ooy cosecha ma pin ti nüpy ti ytuñ, Dios je' anajty yconuucxin ymüid. ⁸ Pen actim apy etz actim jibic ujtz ypidizimy ma je naax, ca' je' ti tzoohuity, e Dios je' yajtigoyamb etz nöctähup ma je mij jün. (Jada naax jadu'n jada' nipaady jadu'n nej jäy huidibi ti ixmach ymibijcin.)

Yi huidibi nmibijcim yi' xyhuijtz'ijtim tudägy

⁹ Migüjtjic ajcxy huidibi ooy ndzocyich, oy iich ajcxy jadu'n njamüdmüydägyich müich ajcxy, janch nejhuibich co ca' ajcxy ti m'ixmach yi mibijcin, etz nejhuibich co oybi conuucxin mbaadaangixyp ma Dios etz m'alma ajcxy nidzoocin paadaangixy. ¹⁰ Com Dios ooy yi' ytuädgyity, e ca' yi' jäydgoy huidibi müich ajcxy mdumyb müid yi' ycixpi, jadu'n nej oyjäy'ajtin ti mdungixy müid jacjadyi mibijcpidijc, e chambaad jadu'n mdungixy. ¹¹ Hue' iich ajcxy ndzocyich co müich ajcxy nidüg nidüg mnixondaaccix tungix oyjäy'ajtin xti mabaad m'öccixy, jigix mbaadipy ajcxy tüg'öciy huidibi ajcxy mijjp'ijxyp ma Dios. ¹² Ca' iich ajcxy ndzojccixy co müich ajcxy m'ahuimbidity nuux. Padungix müich ajcxy jadu'n nej ajcxy ytungixy huidibi mibijcp Jesucristo etz huidibi yajtungixp mecxtujcin, jaydëbi mbaatcixy tiibi Dios xyaj'ahuaniygixy.

¹³ Co jecy'ajty Dios moy Abraham je' y'ayuc, ci'm je' nığapxpejty y'ayuc, com ca'anajty ji jac mijpi pin nığapxpedipy je' y'ayuc. ¹⁴ Chi Dios Abraham nımay: "Janch co iich müich ngonucxip, e nmöhuipy may m'ap'ung m'apmang." ¹⁵ E jadu'n Abraham y'ahuixy müid mecxtujcin, e jadu'n ycidigiyi huidibi anajty Dios ti yaj'ahuaniyi. ¹⁶ Co ajcxy jäy ycapxcixy co yjanchity, jim je' pin nığapxpejty je' y'ayuc, je pin jacmijip, je' nığapxpejty jada ayuc. E co nığapxpejty je' y'ayuc, chi je ayuc y'ity, e ca' huaad pinjaty ymina'n co ca' yjanchity. ¹⁷ Paady ycixpi Dios nığapxpejty yci'mayuc, müid co anajty yajnejhuiahua'n je jäy ajcxy co cuyduna'n y'ayuc tiibi ahuanıy. ¹⁸ Ji yajpaady mejtnax Dios y'ayuc huidibi ca' huaad capctigach, e Dios ca' y'aniidägy nimina. E co Dios jadu'n tuñ, chi xyajjotcugiyim mij, iich ajt huidibi n'ixtaayim e ndzojcin yi' ypubejtın. E ti nmijpidaacim yi' y'ayuc jadu'n nej jıjp'ijxim co xymöhuaanim ajt n'alma jugy'ajtin huidibi ca' ycixipy ytigoyipy ni mina. ¹⁹ E müid co njıjp'ijxim co Dios xymöhuaanim ajt n'alma jugy'ajtin huidibi ca' ycixipy ytigoyipy, paady ajt n'alma jotcujc ijtim ca' ma tzig'iñ jihui'n. Jadu'n Dios y'ayuc nipaady müid iich ajt ycixpi nej tüg pıjx huidibi je barco huon'ijtp mejyjoty, ca'ydı nej yjaty je barco. İich ajt njıjp'ijxim co ndigihuaanim ma Dios y'it tzejpjoty, tim jadu'n nej je judıo sacerdote mıjtungmıdpı ytigıy anajty jecy'ajty ma Dios y'it ma je Dios ytiyc, je it huidibi anajty adıyducyım müid huit. ²⁰ Tigihuaanim iich ajt ma je Dios y'it tzejpjoty ma Jesús ytigıy müid iich ajt ycixpi, Jesús ti yaj'ahuäch nej jëbi ndigıyım ma Dios y'it. E jadu'n Jesús naydügpajc huıngapxy etz codınay mayjäy ma Dios yhuınduu huınixi huınitıempo. Jesús ytung tim jadu'n nıpaady nej Melquisedec ytuñ jecy'ajty.

7

Yi Jesús tim jadu'n ymıjity nej Melquisedec

¹ Je Melquisedec hue' je' anajty rey'ajtp ma je cajp huidi yxiı Salem, e je' anajty huıngapxp ma je mijpi janchypı Dios tzejpjoty. Co anajty Abraham yhuımbity co anajty oy ti chıptuñ, ma anajty je reydiy co ti yajqueec-huächxtäy ti mımadaactıy, chi Melquisedec choon oy jıjpcoyöyıy Abraham, e chi ooy Dios mıjıyudacy mınuuxtacy müid Abraham ycixpi.

² Huidibi anajty Abraham ti paady ma anajty oy ti chıptuñ, chi je' pijc-huächxy majcpıcy, chi pıgoon tüg-pıcy mooy je Melquisedec. Melquisedec yxiı hue' yhuımbizımy "rey tudägyı". E com co anajty yrey'aty jim Salem, hue' Salem yhuımbizımy "jotcujc'ajtin", paady jëbi nmınaanim jadu'n, "je rey huidibi jotcujc'ajtin yejcp". ³ Je Melquisedec ca'p anajty yajnejhuıy ytajyteedy, ni y'ap yteedy. Ni ycayajnimıydgıy nej ypi'c'ajty etz nej y'ögy. Tim jadu'n je' anajty yajpaady nej je Dios y'ung, tüg huidibi huıngapxp jäy ajcxy ma Dios huınixi huınitıempo.

⁴ Occuenditugixy miich ajcxy nej je Melquisedec anajty ooy ymijity. Je Abraham, iich ajt nmij'ap nmijteedy ci'm mooy Melquisedec je tüg picypy huidibi anajty ti pijci je rey ajcxy ma oy chiptuñ. ⁵ Nej Moisés ycötujcin y'ane'my je 'anajty ajcxy yhuingapxy ma Dios ytijc je pinjaty Levi y'ung'ajtpy y'anäc'ajtpy, y'ap'ung'ajtpy y'apmang'ajtpy. Je' ajcxy cötujc müd co jäy ajcxy yajcuend'adipy tügpicy je majc-picypy huidibi xü diezmo. Oy je' anajty ajcxy ja'ajugy'adyii ja'amigüg'adyii, com hue' anajty ajcxy Abraham y'ap y'oc nidüg'öciy. ⁶ Per Melquisedec oy je' anajty ca' Levi ap'adyii teedy'adyii, yajcuejt je Abraham tügpicy je majc-picypy. Je' je' anajty huidibi cidigiüy: tiibi anajty Dios yaj'ahuaniyii. Jadu'n Melquisedec yajpuhuaniiy Dios je Abraham. ⁷ Ni pin ycamina'nip co ca' yjanchity co je pin conuucxin yejcp, jac mij je', ca'ydí je pin yajconuucxp. ⁸ Ya ma iich ajt, pin cidigiüyip tügpicy je majc-picypy (diezmo), hue' je' ajcxy jäy huidibi öcp. Per jadun nej anajty Melquisedec, jadun ymina'n ma yjaybetyity co je' yjactzinaayñi. ⁹ E jëbi yajmina'n co je Levi etz jadun yibaad je y'ap y'oc huidibi ajcxy huingapxp ma Dios, e yajcuejtcixy Israel jäy huidibi Dios patip, nañ jadun nipaady nej jihuüy ymigüety je' ajcxy je Melquisedec huiñ'it co Abraham ymigüeti. ¹⁰ Jadun nipaady nej jihuüy Abraham ñigix'ajtyñi y'ap'ajtin yteedy'ajtin Levi etz jacjadyii je huidibi anajty ajcxy ca'ni ypi'c'atyñi yma'xung'atyñi co oy Melquisedec yijipcobadiyii.

¹¹ Je Israel cajp yajcidigiüy je' je Dios y'ane'min ycötujcin je Levita ajcxy huidibi anajty huingapxp je mayjäy ma Dios, je' je' anajty ajcxy Aarón y'ap y'oc. Chi jada' co jada ajcxy janch ca'ocyaj'ahuimbijttäy tudägy pinjaty anajty je Dios ycötujcin payöyb, ca'p tim je' anajty ycopicity co ycajacquëxigy jadüg huidibi codinähuiip je mayjäy ma Dios, ca' y'ocje'jiñ ma ymiñ Aarón y'ap y'oc. Je jadügpi huidibi codinähuiamyb je mayjäy ma Dios, hue' copicy co tú'ciy naybadiiyb müd Melquisedec. ¹² Co ytigadzipy pinjaty huingapxp ma Dios, nañ jadun ytigadzip je tiy'ajt je cötujcin. ¹³ Iich ajt nHuindzin Jesucristo, je huidibi ñimiydacpy ma Dios ñecy co huingapxa'n je mayjäy ma Dios, huingbi ap huingbi Teedy je' anajty, ca' y'ocLevijin. E ni tüg yi' y'amigüg' ca' yhuingapxy ma Dios. ¹⁴ Huädz yajnejhuüy co iich ajt je nHuindzin Jesús hue' je' anajty ymij'ap'ajty ymijteedy'ajty je Judá. Moisés ca' yi' capxpaty Judá y'ap y'oc co nimiydacpy pinjaty anajty huingapxp je mayjäy ma Dios ytijc.

¹⁵ Jacnigüëxip jada ooy co jadüg ytigüy huidibi tumb ma Dios, huidibi tú'ciy naybaatip müd Melquisedec. ¹⁶ Ca'p Jesucristo yajtungbijci co huingapxp je mayjäy ma Dios müd je cötujcin huidibi minaab co yi' y'amigügtijc pátip yi jadumbi tung, je huidibi ajcxy yjugy'ajtin cixip tigoyip. Hue' je Jesucristo chinaayin yjugy'ajtin ca' ycixipy ytigoyipy ni mina, paady ycixp Jesucristo yajtungbijci huingapxp je mayjäy ma Dios. ¹⁷ Com müd je' ycixpi jadun Dios tiy'ajt yejcy co jadun ymina'n:

Miich je' cham mhuingapxyp je mayjäy ma iich. Tüg nax miich mhuingapxin nej Melquisedec anajty yhuingapxy.

¹⁸ E jadun je oga'nbi je ane'min cötujcin huidibi Moisés yejc, ca' y'octuni cham, ca' jac ti mic'ajt müdity co jaydëbi yajtzögipy jäy ajcxy y'alma. ¹⁹ Je Dios ycötujcin huidibi Moisés jayhuim jecy'ajty, ca'p je' ni ti yaj'oybidzimy yajhuätzpizimy. Müd je huingapxpi ycixpi huidibi nmüd'ajtim cham jac'oy yi' huidibi njip'ixim ma Dios.

²⁰ Co Dios Jesucristo yajtungbijci, chi nigapxpejty yci'm ayuc co yjanchity. ²¹ Jacjadyii ajcxy huidibi anajty tungixp ma Dios ytijc, hue' je' ajcxy tungmooyi, e ca' Dios nigapxpejty yi' ajcxy y'ayuc. Per co Jesucristo ytungbijci, chi Dios nigapxpejty yci'm ayuc. Com jaybety jadun ma Dios ñecy ma jadun ymina'n:

Je Huindzin Dios ti nigapxpejty yci'm ayuc, e ni mina ycajotmetzcihuipy.

Jadu'n Dios nimay y'ung:

Miich mhuingapxamyb etz mgodinähuiamyb je mayjäy ma iich huiñixi huiñitiempo. Jadun miich mdunipy nej Melquisedec ytuñ.

²² Com Dios nigapxpejty yci'm ayuc co yjanchity co Jesucristo ytungbijci, paady yi Jesús yi' je' majamoy mic'ajtmoy je jemybi ayuc huidibi yajhuim müd jäy ajcxy ycixpi, je jac'oybi cötujcin. ²³ Jacjadyii huidibi anajty yhuingapxcixy ma Dios ytijc, nimay anajty ajcxy ooy. Com co tüg y'ocy, chi huingbi ytigüy ma je' ytung. ²⁴ Jesús com ca' yi' yjugy'ajtin ycixipy ytigoyipy ni mina, paady ca' y' ytung ixmach, etz ca' yi' ytungmöy ni pin. ²⁵ Müd je' ycixpi Jesucristo mic'ajt müdity jaydëbi yajnidzoocipy jäy ajcxy y'alma huiñixi huiñitiempo, pinjaty mibijctzooyb Dios ma Jesucristo yxi. Jesucristo jëbi tunipy jadun, com yi' yjugy'ajtin ca' ycixipy ytigoyipy ni mina. E yi' Dios mibijctzodii müd jäy ajcxy ycixpi jabom jabom huiñixi huiñitiempo.

²⁶ Je Jesús je' je' tügajc je mijtungmüdpí ma Dios, huidibi iich ajt nyajmayajtim, je huidibi müd huädz yjot huädz yhuinma'n, e ca' je' müdity ni ti jibicpi ni ti pocy. Je' ca' tügñax y'ity müd pocytumbidijc. Nigi je' ymijity ycixity, ca'ydí jac ti huidibi yajpat tzajpjoty. ²⁷ Ca' Jesús yjadun'ity nej ajcxy jacjadyii huidibi tuun ma Dios ytijc jecy'ajty, co yaj'öccixy iyujc, e je' ajcxy yejcpy huindzigi'n jabom jabom, müdüg co je' ajcxy ñayyajpocyñihuächyii, e chi jada' müd jäy ajcxy ypocy ycixpi. Jesús tügtecpajc je' yejc huindzigi'n müd mayjäy

ycixpi, co je' ci'm ñayyejci ma yi o'cin jadu'n nej tũg huindzigi'ñ. ²⁸ Je Dios ycõtujcin huidibi Moisés yjajhui'm jecy'ajty, hue' y'ane'my co huen tungmõy jã ajcxy huidibi pocy miid, co mĩjtungmoy ma Dios ytijc. Chi jac'axam Dios yajhui'my jembybi ayuc jembybi cõtujcin, e ñigapxpejty yci'mayuc co yjanchity. E miid je jembybi ayuc Dios tungmoy yci'm'ung, huen yajnicxip je mijpi tung ma yi' y'it, je Dios y'ung huidibi ijtp huinixi ca' ti bocy mĩdity.

8

Jesús yi' je' je mijhuingapxpi ma yi Dios y'ayuc jembybi

¹ Huidibi ooy ñigi ycopicyity, huidibi yajnimydaacp, co ñich ajt nmĩd'ajtm pin xy-codinaayim ma Dios, je' je' je Cristo, je huidibi jĩby ijtp mij'ane'mbi tzajpjoty, jadu'n nipaady nej jihuĩy yi' y'ñāy a'oy'amy ma Dios ymijc. ² Jĩby je' ytuñ ma je janchypĩ Dios y'it ylugar, je amaaybi, huidibi oyhuindzigi'y ijtp. Je it huidibi Dios yajcoj, e ca' nmĩnaanĩm jã ajcxy yajcoj. ³ Tũg'óciy pinjaty huingapxp ma Dios, yajñibicy je' paady, e copicyity co cĩyegipy ofrenda etz tĩjaty huindzigi'ñ ma Dios miid jã ajcxy ypocy yciixpi. Paady ooy ycopicyity nañ jadu'n co Jesucristo yegipy ofrenda etz huindzigi'ñ ma Dios miid jã ajcxy ypocy yciixpi. ⁴ Co Jesucristo ixypiy ya y'ocyajpaady naaxhuĩñ, ni ycahuingapxy ixypiy mayjã ma Dios. Com jiini ya yajpaady pin huingapxp ma Dios ytijc, pin yejc ofrenda etz huindzigi'ñ jadu'n nej Moisés ycõtujcin y'ane'my. ⁵ Jadayaabi huingapxpi ajcxy ytungixy ma Dios ytijc ya naaxhuĩñ. Je' je' tũg iixpejt nej Dios y'it jĩby tzajpjoty, jadu'n yi' nipaady nej tũg anecpi huidibi tzomyb jĩby tzajpjoty. Co Moisés jecy'ajty Dios ytijc je' coji miid huit, chi Dios ñimaayi: “Cuenditun yajxon co anajty mgojy je tĩc tũgnax jadu'n nej je iixpejt huidibi nyaj'ijx jim copĩxy.” ⁶ Per je mĩjtung huidibi Jesús ytumyb ma Dios miid jã ajcxy yciixpi, jac'oydung yi' ca'ydĩ je tung huidibi je jã ajcxy ytumyb huidibi mĩjtung miid ma Dios ytijc ya naaxhuĩñ. Com jembybi etz jac'oy etz jacmic'ajt miid je cõtujcin huidibi Dios ymoy Jesús, ca'ydĩ je cõtujcin huidibi Dios ymoy Moisés jecy'ajt. Com hue' je' jac'oy alma ñĩdzocin Dios yaj'ahuaniy jã ajcxy ma je jembybi cõtujcin.

⁷ Co je jayijp'atypi cõtujcin huidibi Moisés ymooyi cayaj'oyiydaayi jã ajcxy ypocy miid Dios, ca' yi' ixypiy ycopicyity je mĩmetzpi cõtujcin huidibi Dios ymoy jã huinjemy. ⁸ Per Dios y'ijx co je jã ajcxy ca' yajxon cuydungixy je cõtujcin huidibi Moisés ymoy, jadu'n nej ymĩna'ñ ma yjajbetyity ma Dios ñecy miid je' ajcxy yciixpi, ma jadu'n ymĩna'ñ:

Jadu'n je Huindzin Dios ymĩna'ñ: “Mimb xii tiempo ma huingbi cõtujcin nmõhuibich yi Israel jã etz Judá jã ajcxy.

⁹ Ca' y'ocjadu'niñ nej ñich ngõtujcin huidibi nmooyich je' ajcxy y'ap yteedy jecy'ajty, je huin'it tiempo taabi nyajtzoofich ajcxy jim Egipto naaxjot. Ca'p je' ajcxy cuyduñ je cõtujcin huidibi ajcxy nmooyich, e paady ca' nduufich cuendi yi' ajcxy.” Jadu'n ymĩna'ñ je Huindzin Dios.

¹⁰ Jadu'n je Huindzin Dios ymĩna'ñ:

Je cõtujcin huidibi nyegaamybich ma Israel jã ajcxy co anajty yijadu'mbi xii tiempo ti ñaxy, jadu'n je'. Nbidāgibich ngõtujcin ma yi' ajcxy yhuinma'ñ, e jadu'n nipaady nej jihuĩy ti njayich n'ayuc ma ajcxy y'ay yjot. E ñich yi' ajcxy xyDios'adiib, e yi' ajcxy njāy'adiybich.

¹¹ Tũg'óciy ajcxy nejhuĩhuipy pin ñich. Ni pin ji cayaj'ixpigipy pin je' je Huindzin Dios, ni pin, ni ymigũ, ni ymijĩn ymidijc, ni pi'ctijc ni mij'anāctijc. Com nidũg'óciy ajcxy nejhuĩhuipy pin ñich; ypi'city ymutzity, ymijjāyity, etz ymij'anācity.

¹² E ñich yi' ajcxy nmeecxip yjibicjāy'ajtin, ni camina ngajac'ajihuĩhuĩybich ajcxy ypocy. Jadu'n Dios ymĩna'ñ.

¹³ Co Dios je' ycõtujcin jembybi nimyidāgy, je' je' co yaj'amijjāyĩ je jayijp'atypi cõtujcin. Je huidibi amijjāyĩp ca' je' y'octuunip, tzojc yi' yaj'ijxtigoyaañ.

9

Je Dios ytijc huidi ya naaxhuĩñ etz Dios y'it huidi tzajpjoty

¹ Je Dios ycõtujcin jayijp'atypi ymiid je' anajty ñidiy'ajt nej huaad ytuñ ma Dios ytijc ya naaxhuĩñ, ma jã ajcxy huindzigi'huipy Dios. ² Je Dios ytijc jadu'n je' ycojity. Je jayijpi cuarto hue' anajty xijity Lugar Santo, jĩby anajty y'ity je candelero etz je mesa ma tzajcaagy y'ity ma Dios yhuinduu. ³ Jixci'py'amy ma je mĩmetzpi huit y'agidyucyity jĩby jadũg'it huidibi xijip Lugar Santísimo (ma Dios ni'ixcidāgy je jã). ⁴ Jĩby anajty tũg mij mesa ac tim ori je' anajty ma ajcxy ypoomjocxicy, e ma je' jim anajty y'ity tũg cajoon ac ori je' anajty yñĩncx huidity. Jĩby cajoonjoty anajty y'ity tũg tu'tz ac ori huidibi anajty miid je jicxy iixpejt huidibi Dios Israel jã ajcxy ymooy jecy'ajty. Etz jĩby anajty Aarón ytajc huidibi huijp huam. Etz jĩby anajty je tzaa y'ity ma je' anajty yciixjayity Dios y'ane'mĩn. ⁵ Ma je cajoonnĩcx jim anajty je querubines ñĩgojtũdyity huidibi Dios y'oy'ajtin miid. Je querubines

anajty codinaayb Dios, e je' anajty ajcxy yajnidigooyb müd yqueec je cajonnicx ma ajcxy je huidzigi'n ñi'py ypidacy müd jäy ajcxy ypocy ycixpi. Ca' huaad yjacyajnimidyacy mijcajee jadachambi tijaty huidibi anajty yajpatp jilby ma Dios ytijc.

⁶ Jabom jabom co anajty jadu'n y'ijttäy n'i'ixi', chi je huingapxpi ytigüygixy ma Dios ytijc ma je jayijpi cuarto, je Lugar Santo, tuñ ajcxy huindzigi'n etz cuydungixy y'i' ajcxy ytiy'ajt müd Dios ycixpi. ⁷ Jimijt jimijt ma je mimetzpi cuarto huidibi je huit adiydujcp, jilby ytiyüi tügtecpajc je huingapxpi huidibi jacmijtungmüid ma Dios ytijc. E co jilby ytijc, chi müdigixy huaaj ñi'py, huidibi müd huindzigi'y Dios müd yci'mbocy ycixpi etz müd tüg'óciy jäy ajcxy ypocy ycixpi etz müd ajcxy ypocy ycixpi co ca' nejhüüygixy co ytundigooygixy. ⁸ Müd jada ycixpi je Espíritu Santo xyajnejhuüiyim co je tungmüidpi huidibi huingapxi je mayjäy ma Dios, ma ajcxy jacyajtungixy anajty je jayijp cuarto ma Dios ytijc, chi ca'ni je' anajty y'ahuächñi nej jébi pinjaty ytiyüi ma je it lugar Santísimo ma Dios yhuinduu. ⁹ Je Dios ytijc huidibi ijtp anajty ya naaxhuñ ca' je' yjéty je janchypi. Hue' je' anajty ijxpejt'ajtp huidi Dios y'it'ajtp tzajpjoty. Jilby je tungmüidpi huindzigi'y Dios müd ofrenda müd müd huindzigi'n. Per jada huindzigi'n ca' yajtigoy je pocytuñ ma je jäy ajcxy yjot yhuinma'ñ. ¹⁰ Je judíojäy ytiy'ajt huidibi tuun ma Dios ytijc jecy'ajty, hue' je' ñigapxy caayin uucin, etz jadu'n nej ajcxy jayyajpocyñihuáatzigixy müd nü etz canaag costumbre huidibi ajcxy cuydumy. Jadu'n ajcxy ytuñ ixti cooni Dios yajtigajtzat tüg'óciy y'i' ycötujcin.

¹¹ Per ti y'oy ya naaxhuñ je Cristo, e y'i' je' cham ijtp jacmijtungmüidpi ma Dios, y'i' ti mimiñ jemybi cötujcin jac'oybi. E y'i' je' codinaayb je mayjäy ma Dios y'it tzajpjoty, je it jac'oybi jacmijpi, jacca'pxyp, ca' nminaanim jäy ti cojy, e ca' yaajty naaxhuñ. ¹² Cristo ti ytiyüi ma je Dios y'it, je lugar Santísimo. Ca' ti ytiyüi müd co jilby yajquëxiga'ñ pi'cchivo ñi'py o toro ñi'py, hue' yci'mni'py jilby yejcp ma Dios. Jadu'n ti ytiyüi tügtecy tiyüi huinixi huinitio, etz xyajnidzocim ajt n'alma huinixi. ¹³ Ooy yjanchity co y'i' toro ñi'py etz je chivo ñi'py etz y'i' cuyjam co ajcxy nócixy huaaj nüx ma je Dios ojadajtac, co ajcxy je pocyjäy yajnihuäxcixy je ni'py etz yajnixidujtcixy je cuyjam ymüid mic'ajt co yajpocyhuáatzigixy ñiñicx, per jotjoty ca' yajhuäch. ¹⁴ (Je huingapxpi huidibi tumb ma Dios ytijc ya naaxhuñ ca' ymadägy co jäy yajpocyhuädzipy müd toro ñi'py), Jesucristo nigi ti ymadägy yajpocyhuäch jäy ajcxy müd yci'mni'py. Com Jesucristo ymüid je Dios yjihui'ñ ymic'ajt huidibi ca' ycixipy ytiyüiyüi ni mina, chi ñaygijeyci c'im ma Dios müd Dios yjihui'ñ ymic'ajt, jadu'n nej tüg huindzigi'n huätzpi, com ca' ni ma ni ti tundigoy. E müd yci'mni'py Jesucristo xyajhuuaatzim je jibicpi ma ajt njot nhuinma'ñ, ca'ydi ndunim huidibi Dios ca' jäygidägy, e jadu'n ajt huaad ndunim ma je Dios juugypi ytung.

¹⁵ Paady y'i' Jesucristo y'i' je' huingapx'ajtp ma Dios müd iich ajt ycixpi müd je jemybi ycötujcin huidibi Dios yajhui'm. Y'i' Jesucristo co y'o'cy, y'i' ajt je' nbocy xymecxim tübi ndundigooyim ma je jayijp'atyp cötujcin huidibi Moisés jayhui'm. E jigix pinjaty Dios ti yhuin'ixyüi, jébi ajcxy ycidigiyüi je tzinaydac ma jébi n'ijtm huinixi. Je tzinaydac huidibi Dios ti xy'ahuaniyim. ¹⁶ Co tüg jäy jijp'ixy y'o'cin, e yajcojy tüg testamento, ooy ycopicyity co yajnejhuüiuy pen janch je' ti y'ögy je pin yajcoj je tiy'ajt jigix je' ytiyüiuy tumbi je tiy'ajt. ¹⁷ Co tüg jäy jijp'ixy y'o'cin e yajcojy tüg testamento, ca' je' ti mic'ajt müidity je testamento pen jugy'ajtni pin je' anajty ti yajcojy. Huin'itni janchity co anajty ti y'ögy, huin'it je testamento mic'ajt müidity. Je jemybi tiy'ajt huidibi Dios xyajhui'my jadu'n y'i' nipaady nej jäy testamento yajcoj co anajty jijp'ixy je y'o'cin, e co Jesús y'o'cy, huin'it mic'ajt moy je Dios ytiy'ajt je jemybi. ¹⁸ Paady ycixpi jecy'ajty co Dios Moisés moy cötujcin, yajtzoobaat je' müd iyujc ñi'py. ¹⁹ Moisés je' capxhuäch je Dios ytiy'ajt ma tüg'óciy mayjäy. Chi jada' huijtzigy tüg lana tazptzpi müd tüg quipy aaxx huidibi ooy oy xyuugy. Je' yajxooc ma huaaj mang ñi'py etz chivo ñi'py teemhuidity müd nü, chi Moisés yajnihuich je libro müd je ñi'py, je libro huidibi anajty ti capxy etz nañ jadu'n jäy ajcxy yajnihuich je ñi'py. ²⁰ Co Moisés jadu'n ytuñ, chi yminañ: "Jada je' je' ñi'py huidibi yajtzoobaat je ane'min je tiy'ajt huidibi Dios ti yecy ma müch ajcxy." ²¹ Moisés nañ jadu'n ñi'pyñi'huich je cochac tijc ma anajty yDios ojadajtacy, e tüg'óciy tumbejt huidijaty jilby tumb. ²² Dios ycötujcin, je jecyp, ymina'ñ co tüg'óciy huidijaty yajtungixyp co Dios ojadajtacy, copicy yajhuädzipy müd ñi'py. E pen ca' ajcxy teemy yocy ñi'py, Dios ca' huinmecxa'ñ y'i' ajcxy ypocy.

Co Cristo y'o'cy müd ajt nbocy ycixpi, y'i' yajnicxy ajt nbocy

²³ Ooy jada anajty ycopicyity iyujc ñi'py huindzigi'n, jigix yhuädzipy huidijaty tumb ma Dios ytijc ya naaxhuñ, je huidibi ijxpejt'ajtp anajty nej Dios y'it jilby tzajpjoty. Per je Dios y'it huidibi jilby tzajpjoty chojcp jac'oybi huindzigi'n ca'ydi huidi ya naaxhuñ. ²⁴ Com Cristo ca' je' ytiyüi ma Dios ytijc huidibi jäy ajcxy ti cojy. Je tijc huidibi jäy ajcxy ti cojy, je' je' ñigojtuutin je it lugar janch janchypi huidi jilby tzajpjoty. Cristo tigi'y ma je Dios y'it ylugar jilby tzajpjoty, ma je' cham xycodinaayim ma Dios yhuinduu. ²⁵ Je judío mijtungmüidpi huidibi huingapxp ma Dios ytijc, huinjimijity ytiyüi ma je Dios ytijc

co yecy ni'py huidibi ca' ci'mni'py'adyii. Cristo ca' yi' ñay'ahuaniyii y'ögipy canaag'oc, jëyi tügtecypajc ytigüiy ma Dios y'it müd yci'mni'py. ²⁶ Co ixypiy ca' yjadu'nity, canaag'oc Cristo ixypiy patni chaachy'öcin maabi naaxhuifübyi chondagy. Per jadachambi ma xii tiempo ycixaani ytigoyaani, Cristo tügtecypajc ñayguëxici ya naaxhuifü, jigix codinähuiipy tüg'öciy jây ma Dios müd ajcxy ypocy ycixpi. Jadu'n Cristo tuuñ jigix yajtigoyipy pocytonii. ²⁷ Dios ane'min pidac ya naaxhuifü co nidüg nidüg jây paadip yi o'cin tügtecypajc. E Dios ti pidägy je xii je tiempo mina tiyduna'ñ nidüg nidüg jây müd ypocy ycixpi. ²⁸ Je Cristo jotcuyc tügtecypajc nayyejci ma je o'cin co yajpocyñihuaatzây je mayjây. Chi jada' ñayguëxiga'ñyii je mimejtz'ocpi ya naaxhuifü, e ca' nminaanim co yajpocyñihuaatzaanip jadüg'oc je mayjây, hue' je' nihua'namyb ycohua'namyb tüg'öciy pinjaty jipp'ixxip cixyot huinijot co je' miina'ñ müd yi' ajcxy ycixpi.

10

¹ Je Dios ycötujcin huidibi Moisés jayhui'my jecy'ajty, hue' je' anajty ñidiy'ajt je oybi huidibi miinamb. Ca'p je' anajty yjëity je oybi. Paady je cötujcin huidibi Moisés yjayhui'm ca' je' jëbi huädz yaj'ahuimbity pinjaty pocy ytumb, pinjaty mijhuäcp anajty ma Dios müd je iyujc huidibi ajcxy Dios yajhuindzigüyb, huidibi ytun'ahuimbijtcixyp jimijt jimijt. ² Co ixypiy je cötujcin y'ocmadägy huidibi Moisés yjayhui'm yaj'ahuimbity ixypiy huädz ajcxy je pocy ytumbi, ca' ixypiy je jadu'mbi huindzigi'ñ y'ocyajtuuni jimijt jimijt. Com pin je jadu'mbi huindzigi'ñ yejcp, co ixypiy je' ypocy yajnicxtây, ca'p je' ma ñayjihuihuüyb ti bocy müdity jadüg'oc. ³ Co jadu'n yaj'öccixy je iyujc müd ypocy ycixpi, je' je' je' tiy'ajt co ajihuiygotigixy ypocy jimijt jimijt. ⁴ Com yi huaj mang ñi'py etz yi chivo ñi'py ca' mic'ajt müdity co pocyajnicxtâhuipy nimina.

⁵ Paady co Cristo ymiññ ya naaxhuifü, chi nimay je Dios:

Ca' müich ni ti huindzigi'ñ mdzocjni ma ymiññ iyujc'ögy, ti müich xyñi'ixiyyich tüg ninñcx.

⁶ Ca' m'ocjäygidaacni huindzigi'ñ iyujc huidibi yajno'cp. Ca' müich m'ocjäygidaacni co jây xyajhuindzigiy iyujc müd ypocy ycixpi.

⁷ Chi nmîna'ñich: “Dios, cha nmîññich jigix müich mdzocjni yajcuydunipy, jadu'n nej yjaybetyity ma müich mnecy müd iich ycixpi.”

⁸ Tim jayijp, Cristo ymîna'ñ co Dios ca' octzocjni, ni cajäygidägy je iyujc ögy huidibi yajhuindzigüiy, ni je huidibi yajno'cp, jigix je pocyñicxtâhuipy, oy yi' yjajëity huidibi ñigapxy yajtunipy ma je Dios ycötujcin huidibi Moisés yjayhui'm. ⁹ Chi jada' jadüg'it yjaybetyity co Cristo jadu'n ymîna'ñ: “Cha iich nmîññ, jigix müich mdzocjni yajcuydunipy, müich huidibi Dios'ajtp.” Hue' minaanim, yajtigoy je cötujcin huidibi ane'mb co jây ajcxy huindzigüiy iyujc müd ypocy ycixpi, etz mic'ajt mo' je jemybi cötujcin huidibi Jesucristo xymooyim.

¹⁰ Dios jadu'n ti xyajhuaatzim ajt nbocy, com Jesucristo ti tuuni Dios chojcin co ci'm ñinñcx tügtecypajc yecy ma yi o'cin müd tüg'öciy jây ypocy ycixpi.

¹¹ Tüg'öciy judío sacerdote huidibi tungmüd ma Dios ytijc jabom jabom jadu'n tun'ahuimbijtcixy tügpi huindzigi'ñ, huidibi ni camina yajnicxtaayi jây ajcxy ypocy. ¹² Yi Jesucristo tügtecypajc yi' yecy ñinñcx ma yi o'cin huinixii huinñtiempo, chi jada' y'ixtacy a'oy'amy ma Dios ymijc ma ane'mdäy tüg'öciy. ¹³ Jiiby tzejpjoty Jesucristo cham y'ahuixy, ixti cooni Dios yi' ymidzip mimadactaayip, e jadu'n ajcxy nipaadipy nej jihuüy Jesucristo ytecypocxpejt. ¹⁴ Müd tüg'pajc je huindzigi'ñ huidibi Jesucristo yecj, tudägy yaj'ahuimbijttây huinixii huinñtiempo pinjaty ti ypocyhuäch. ¹⁵ Yi Espíritu Santo nidiy'ajtp ma iich ajt jadu'n nej Cristo ti tuñ. Com jaybety müññ ma Dios ñecy ma Dios jadu'n ymîna'ñ:

¹⁶ Je huin'it xii je huin'it tiempo nyajmihui'maamybich je Israel jây jemybi ayuc jemybi tiy'ajt. Nbidägbich ngötujcin ma ajcxy yjot, e njayamybich ngötujcin ma ajcxy yhuinma'ñ.

¹⁷ Chi jac'axam Dios ymîna'ñ:

Ni camina njäymedzaanich ajcxy ypocy, etz jadu'n nej ajcxy ytundigooy.

¹⁸ Co je pocy ti yajhuinmecxtây, ca'p ycopicyity yjacyajtunipy tijaty huindzigi'ñ müd pocyhuinmeecxin ycixpi.

Chojcxy nmihuingoonim yi Dios

¹⁹ Paady müich ajcxy migügtijc, jëbi iich ajt ndigüiyim agujc jotcuyc ma Dios yajpaady müd co Jesucristo ti temy ti yocy ñi'py müd iich ajt nbocy ycixpi. ²⁰ Cristo ti yaj'ahuäch je nü'aa je tü'aa müd iich ajt ycixpi müd yci'm ninñcx, je nü'aa tü'aa jemybi oybi huidibi tigüyb ma Dios y'it. E je' yñinñcx jadu'n nipaady nej je huit huidibi anajty adujcp je Lugar Santísimo ma Dios ytijc ya naaxhuifü, je huit huidibi cüchhuäch co Cristo y'o'cy.

²¹ Jesucristo yi' je' je' mijtungmüdp huidibi xycodinaayim ma Dios ytijc jiiby tzejpjoty.

²² Paady ycixpi jëbi nmihuingoonim Dios müd oyjot oyhuinma'ñ, etz müd je mübijcin janchypi. Cristo ajt ti xyajhuaatzim njot nhuinma'ñ co ñi'py temy yojcy müd ajt nbocy

ycixpi jigix ca'ydi nayjihuiyim pocymiid, jadu'n nej jihuüy ti ndziihuim müd huädz nü. ²³ Tzoc tudägy n'ijim ma nmibijcin, ca' nyajtigajtzim nmibijcin, com Dios cuydunipy yi' tiibi xyaj'ahuaniiyim. ²⁴ Tzoc nhuinma'ñypidaacim co njot'amijmooyim ajt nmigügtijc, jaydëbi naychojcim nayjihuiyim miñ xyipy, e nduunim oyjäy'ajtin. ²⁵ Ca' n'ixmajtzim je nayyöymugii, jadu'n nej ajcxy nijëjity costumbre müdity co ca' ajcxy yöy ma naymujctac. Nigi tzoc nayjot'amijmooyim, e jadu'n nej cham yaj'ijxni co yhuingooni ma je Huindzin Jesucristo ymiinaani jadüg'oc ya naaxhuiñ, chona'ñ tzajpjoty.

²⁶ Pen iich ajt jacpocytunim tzojcingixy ma anajty ti nejhuiyim Dios ytiy'ajt, ca'p ji huingbi huindzigi'ñ huidibi xyajpocyhuaatzim. ²⁷ Je' janchtiy njacjijp'ijxim müd tzig'iñ jihu'iñ je tzaachypí co anajty Dios xtytydunim, e xypidaacim mijjünjoty huidibi yajhuindigoydähuamb Dios ymidzip. ²⁸ Co pin cacuyduun Dios ycötujcin huidibi Moisés yjayhui'm, e jim metz o tugüg testigo co yjadu'nity, yajmoy je' y'o'cin ca' müd'ajty ti pa'ayoohuin. ²⁹ ¿Nej müch ajcxy minaangixy? ¿Nej cay jac'öctiy je tzaachypí mihuaad'ajtcixy? Je pinjaty ca' ixa'ñ Dios y'ung etz nixiici yajxiici Cristo ñi'py huidibi yajpocynihuaatzp, jadu'n nej je jemybi ayuc ymina'ñ huidibi Dios yajhui'm. Etz nañ jadu'n ajcxy ni'öjiyigixy Dios yEspíritu huidibi may'ajt oy'ajt tumb müd je' ajcxy. ³⁰ Nejhuiyim co je Huindzin Dios ymina'ñ: "Iich xypatp ndzaachytunipyich jäy ajcxy müd ypocy ycixpi. Iich yi' nyajcomidohuipy ajcxy ypocy." Etz nañ jadu'n yjaybetyity ma Dios ñecy: "Yi Huindzin Dios yi' yjäy tydunipy." ³¹ ¡Ooy chach mij y'ayo'nity pen je Dios juugypí xychaachytunim müd ajt nbocy ycixpi!

³² Per ajihuiyigixy müch ajcxy je xii je tiempo tiibi ñaxy, je taabi müch anajty ajcxy ti xycidigüygixy je tiy'ajt janchypí, ñipaty je' anajty nej tüg tixcin jatin ajcxy müdity. Ti ooy mhuindinaaygixy mijiptinaaygixy tzaachypí ayo'n müd yi nmibijcin ycixpi. ³³ Nijëjity müch ajcxy ti myajhuingapxnajxcixy, e ti myaj'ojcixy mayjäyduum. Nañ jadu'n jacjadyii ti abaatcixy tzaachypí jadu'n nej je tiibi ajcxy ooy yajtzaachytungixy. ³⁴ Ti müch ajcxy myajtungixy pa'ayo'n ma pinjaty anajty pujxtigotyip, e janch agujc jotcujc ajcxy ti myajtungixy mecxtujcin co ajcxy xypijci tijaty anajty ajcxy müd. Nejhuiyim co jiby tzajpjoty müch ajcxy müdity ti jaty jac'oybi huidibi huinixi huinitiempo ijtp. ³⁵ Jacmijpidaaccixy Dios, ca' mjetmetzcixy. Co mmijpidaaccixy Dios, huin'it ajcxy mbaadyi oybi may'amy ma Dios. ³⁶ Chojcyp co müch ajcxy myajtungixy mecxtujcin co mguydunaangixy nej Dios tzocy, e Dios xyajcidigüygixip huidibi yi' ti ahuaníy. ³⁷ Jaybety jadu'n ma Dios ñecy ma jadu'n yminañ:

Tzojc, janch tzojc ymiina'ñ je huidibi tzonamb tzajpjoty, e ca'p je' jecyñity.

³⁸ Jadu'n Dios ymina'ñ:

Pinjaty iich ti ngöbicy co ytudägyjäyity, tzinähup je' müd ymibijcin. E pen ixtigihua'cp ma ymibijcin, ca' jadu'n njotcujc'adipyich müd je'.

³⁹ Ca'p iich ajt njëjity huidibi ixtigihua'cp ma nmibijcin, e ytigoy y'alma, je' iich ajt pin mibijcp, e jadu'n n'alma paadipy nidzoonin.

11

Yi mibijcin

¹ Jotcujc nayjihuiyim jadu'n co huidibi nmibijcin janch yi', oy co ca' n'ijxim. Je huidibi nmibijcin je' xymooyim jotcujc'ajtin müd huidibi njijp'ijxim ma Dios. Je huidibi nmibijcin nejhuiyim co janch janch jadu'n, oy ca' n'ijxim. ² Com müd co ajt nmij'ap nmijteedy ajcxy mibijci Dios y'ayuc paady Dios cöbijcy ajcxy jadu'n nej tudägyjäy.

³ Müd ajt nmibijcin ycixpi nejhuiyim co Dios oyduñ tüg'öciy huidibi jii'ajtp müd y'ayucti'ajty, jigix huidibi cham n'ijxim je' yi' yaj'oyiiy huidibi ca' yaj'ixy.

⁴ Müd co Abel mibijcy Dios, paady Abel ymoy Dios huindzigi'ñ jac'oybi ca'ydi Caín, e Dios cöbijci Abel yhuindzigi'ñ, e müd je' ycixpi Abel ooy ycomaybidzimy ma Dios co anajty ytudägyity. E jadu'n oy Abel ti yja'o'cini, jadu'n nipaady nej jihuüy yjacmiydägyñi chambaad. Com müd je mibijcin huidibi anajty ymüd yejc ijxpejt ma iich ajt.

⁵ Müd co Enoc mibijcy Dios paady yajnicxi jadügpi tzinaydac ni yca'o'cy, ni ca' ajcxy paty, com Dios anajty ti yajnicxyii. Jadu'n ymina'ñ ma yjaybetyity ma Dios ñecy, ca'ni anajty yajnicxyii: "Dios jäygidacpy anajty Enoc chinaayin." ⁶ Pen ca' nmüd'ajtim mibijcin ni jadu'ñyi, ca' Dios jäygidägy ajt ndzinaayin. Com co nmihungonaanim Dios, hue' tzocy co nmibijcin co Dios yjüjity, e co yaj'ahuimbidipy oybi müd pin mibijcip.

⁷ Müd co Noé mibijcy Dios, paady Dios ñimaayi jayijp co ytuna'ñyii yjada'ñyii mijñügom huidibi anajty ca'ni yaj'ixy. Co Dios ymigapxi, chi Noé yjotmaybaady e yaj'oyiy je barco ma yi' etz y'ung y'anäg ñügomdzögipy. Müd co anajty Noé müdity mibijcin, paady yajpocycay je naaxhuiñjäy ajcxy ca'pi ymibicy. Chi Dios cöbijcy Noé jadu'n nej tudägyjäy müd co mibijci Dios y'ayuc.

⁸ Míid co Abraham anajty Dios mibicy, paady Dios yhuin'ijxi e ycapxymidouhui. Chi je' choon ma ñaax ycajpin ñicxy ma je it lugar huidibi Dios anajty möhuanip co je' adiyb. Chon, ni ca' anajty nejhuiy ma ñicxy. ⁹ Míid co Abraham mibicy Dios, paady chinaydacpijcy nej tüg huingjáy ma je naax huidibi Dios yaj'ahuaniiyi, huidibi ca' yjéjity. Chinay ma huittijc, nañ jadu'n ajcxy y'idich Isaac etz Jacob huidibi ajcxy nañ jadu'n Dios yaj'ahuaniiyi je naax. ¹⁰ Abraham je' anajty y'ahuijxpy mina jébi chinaydacpijcy ma Dios y'it ylugar huidibi jadu'n nipatp nej tüg cajp huidibi míid y'ijx ta'tzpijcy y'oyduñity, je huidibi Dios ñihuinmayiy, je huidibi Dios yajcojy yaj'oyiyb.

¹¹ Sara hue' anajty pumäy, ti anajty ymijäyiyñi, ti ñajxni tiempo mina jébi y'ung'ixy. Per míid co mibicy Dios y'ayuc huidibi ti ñimaayi co y'ung'ixañ anajty, chi paty mijaa co y'ungdzimigip. E chi y'ung'ijxy com ymibijc co Dios anajty cuydunañ ti ñibi ahuaniiyi. ¹² Míid tügpi jáy, je Abraham, ti choondacy tügpijcy y'amigügtijc huidibi oy ti ymayiy. Abraham, oy anajty je' ti yjahuingoni mina y'ögaani, chi ooy y'ung y'anäg, y'ap'ung y'apmang janchmay paty, jadu'n ymayity nej madza' etz ymayity nej pu' ma mejypa', janch ni ycamicho'nity.

¹³ Tüg'öciy je jáy ajcxy huidibi ya yajnimiydacp, öctay ajcxy ni ycadijiyi je tzinaydac huidibi anajty Dios ti yaj'ahuaniiyi. Míid co ajcxy mibicy Dios, paady nejhuiy ajcxy co jacjiini Dios ymöhuiyb je huidibi ti yaj'ahuaniiyi. Com ymibijc ajcxy Dios, paady jotcuyc ñajjihuiyi co Dios möhua'ñiyi jacjiini huidibi ti yaj'ahuaniiyi. Yminañ ajcxy co anajty y'adzinaaygixy ya naaxhuiñ. ¹⁴ Pinjaty jadu'n minamb co adzinaaybi ajcxy yaj-paady, hue' yajhuimbizimy co chinaydac yjugy'ajttac ajcxy y'ixtaayb. ¹⁵ Co ixypiy ajcxy jáymejtzó'igixy je naax ma anajty ti choongixy, janch ycahuimbijty ajcxy jim jadüg'oc. ¹⁶ Per je' ajcxy ñigi anajty nijot'ajtcixy it lugar jac'oybi, je' je' je' tzejpjototy. Míid jada ycipxi Dios ca' yi' cho'yduñ co ñaydijiyi Dios ma je' ajcxy. Com ti ni'ixiiyi ajcxy chinaydac jibiy tzejpjoty.

¹⁷ Abraham mibicy Dios, e co Dios Abraham y'ijxmajtzi, chi yajmiiñ Isaac co anajty yajhuindzigihua'ñ Dios. E janch cixyjot je y'ung tügpaic anajty yecy, je y'ung huidibi Dios ti yaj'ahuaniiyi anajty. ¹⁸ Dios ñimay Abraham co míid Isaac míid'adañ may y'ap y'oc. ¹⁹ Abraham yhuinmayb anajty ooy co Dios tügpaic cötujcmidip yajjugypigipy öcpiy. Paady jébi iich ajt nminaanim co Abraham ycidigiyi jadüg'oc y'ung co anajty ti yjugypicy co anajty ti y'ögy.

²⁰ Isaac mibicy Dios, paady Isaac Dios mibijctzoy míid Jacob etz Esau ycipxi co huen ajcxy oybi paadip ma je tiempo huidibi mim cidacni. ²¹ Jacob ymibicy anajty Dios, paady co anajty y'ögaani, chi ahuaniiy conuucxin ma nidüg nidüg José y'ung y'anäg. E jadu'n Dios ooy huindzigiiy ojadajty yam ñaygodajc'adyii míid ytajc co anajty ooy ti ymijäyiyñi. ²² José co anajty Dios mibicy ma anajty y'ögaani, yminañ co Israel jáy ajcxy anajty ypidzimaangixy comecy jim Egipto, chi yajhui'my tiy'ajt nej ypajc ytuñiyb co anajty choñ ajty jim Egipto.

²³ Míid co anajty ajcxy mibicy Dios, paady co Moisés yma'xung'ajty, chi ytaj yteedy yützi tugüg po'. Com co ajcxy ijxy co anajty ooy y'oyity je ma'xung, ca' ajcxy anajty tzigiy je rey y'ane'min co anajty yaj'öctähua'ñ tüg'öciy ungma'xung yéydijcpi. ²⁴ Míid co Moisés mibicy Dios, paady co oy ymij'anäccojni, ca' tzojcy co ñaydijiyb co rey ñiix y'ung'adiib. ²⁵ Hue' janchity Moisés ñigi nijot'ajty co ayo'n tzaachyp minaxipy yajnaixipy quipxy míid Dios yjáy, ca'ydi co nixondägipy je jugy'ajtin ma je rey ytijc huidibi Dios ca' jáygidägy. ²⁶ Moisés ñigi ñajjihuiyi jotcuyc co tzaachyp ayo'n anajty minaxy yajnaaxy míid Cristo ycipxi, ca'ydi co míid'ajttähuiipy jugy'ajt comeen'ajt jim Egipto. Com Moisés ti anajty yhuinma'ñpidägy co Dios yega'ñ je oybi. ²⁷ Míid co Moisés mibicy anajty Dios paady choñ jim Egipto, ni catzigiy co anajty rey yjotmädy, jadu'n y'ijty tudägy nej jihuiy ixxy je Dios ca'pi yaj'ixy.

²⁸ Míid co mibicy Dios paady Moisés tuuñ je pascuaxii, chi ni'ane'mdiy co huen tijc'aguu tüg tüg yajni'pyiy, jigix co je ängel huidibi yaj'öcp, ca'p' je je' israelitajy y'ungoob yaj'oc'ipy. ²⁹ Míid co ajcxy mibicy Dios paady je israelitas ajcxy yajnaixy je tztzpt mejy jadu'n nej jihuiy ñajxcixy huinditzuuy, e co ajcxy je Egipto jáy nañ jadu'n yjanaxa, cijx ajcxy ñi'o'ctäy.

³⁰ Míid co ajcxy mibicy Dios, paady ycidäday je poch ma je Jericógajp, taab anajty je israelitas ajcxy ti jühuiditcixy huixtucxii. ³¹ Míid co Rahab, je töxyjáy jibic tzinaaybi, mibicy Dios, paady ca' y'o'cy quipxyi míid je huidibi anajty ca' capxymidoogixy Dios. Com co je' yajjättacy ma ytijcin je huidibi anajty ti choongixy ma Israel jáy ajcxy anajty yajpaady, co anajty ayüch ameech yajciyöygixy yajtecyöygixy Canaán naaxjot.

³² ¿Ti njacmiydägibich? Nyajtigoy'idaamybich tiempo co nimiydägibich Gedeón, Barac, Sansón, Jefté, David, Samuel, e jacjadyii Dios y'ayucnajtzcaxpiybi. ³³⁻³⁴ Míid co ajcxy mibicy Dios, paady ymimadac ajcxy ymidzip canaag picy, ane'my ajcxy yajxon yi ca-jpjay, ypaat ajcxy pubejtin huidibi Dios anajty ti yaj'ahuaniiygixy. Yaj'adujc ajcxy caa y'ahuac, yajxeem ajcxy jiin huidi anajty ooy ymijity, tzooc ajcxy co anajty yaj'ögaangixy míid espada. Pinjaty anajty pumäyip ypaat je' ajcxy ymic'ajt ymijaa, mij je' ajcxy ooy y'ijtcixni ma chiptungixy, e ymimadactay ajcxy maymidzip. ³⁵ Jim anajty töxyjáy yjätigixy

huidibi ajcxy cǎdigǎyi y'ung juugy huidibi anajty ti jugypicy co anajty ti y'ǎgy. Jadyii ajcxy y'o'cy ahuoni' agidzi', ca'p ajcxy paty nidzoocin. Jadu'n ajcxy paty o'cin, jaydēbi patcixy jugy'ajtin etz tzinaayim jac'oybi ma Dios. ³⁶ Jadyii Dios y'ayucnajtzcaxxiybi ooy ŋixiici yajxiici, yajci'ajty, etz tzumy mach ypujxtijc'iñāy. ³⁷ Jadyii Dios y'ayucnajtzcaxxiybi y'o'cy ajcxy tzaagǎgǎch, jadyii yaj'ajidiy ajcxy janch tim cup y'ijxmajtzi ajcxy, jadyii yaj'o'ci mǎid espada. Ymiñ xyijpy xii yaa yhuidiitcixy ymǎid ajcxy ŋinǎx yūch mǎid cǎbixy'ac etz mǎid chivo'ac, ayooob jāy ajcxy, jotmay mǎid, yajtzaachytungixy yajca'oydungixy. ³⁸ Yi jadu'mbi Dios y'ayucnajtzcaxxiybi ajcxy ni je naaxhuiñyājy anajty camihuaadity. Mǎid ymidzip pahuidiitcixy, paady yhuidiitcixy anajty tǎitnaaxtuum etz yuugjoty, chinaaygixy naaxpa'tci'py etz majaty ang. ³⁹ Nidūg'ǎciy je' ajcxy oy cǎmay ajcxy yjanajxy mǎid co mibijcy ajcxy Dios, ca' ajcxy paty tǎibi anajty Dios y'ahuanīy. ⁴⁰ Com Dios jac'oybi je' anajty yegamyb mǎid iich ajt, paady ca' ajcxy paty je oybi tǎibi Dios y'ahuanīy. Ti anajty Dios ŋihuimayiy co yajca'pxaani yi' ajcxy ytuđāgy'ajtin quipxyi mǎid iich ajt co Cristo y'o'cy mǎid iich ajt nbocy ycixpi.

12

Tzoc iich ajt ŋhuinma'ñyibidaacim ma Jesús

¹ Com nmǎid'ajtim canaag iixpejt nej jāy jecy'ajty mibijcy Dios, paady iich ajt jadu'n nipaady nej jihuīy huinduy jajixci'py nmǎid'ajtim jāy huidibi ti yajniǎgēxǎgy ymibijcin. Paady ycixp tzoc ahuing pidaacim je huidiaty xy'adzijpm ma ajt nmibijcin, e nañ jadu'n tzoc ahuing pidaacim je pocy huidibi xyajhuinma'ñyidigooyim, e tzoc naymic'ijxim cuydunim yi tiy'ajt mǎid mecxtujcin ma ajt ndzinaayin, jadu'n nej jāy ŋaymic'ijxigixy co nayboyicquixigixy. ² Tzoc ŋhuinma'ñyibidaacim ma Jesús. Jim iixpejt nbaatim ma Jesús nej jēbi nmibijcin Dios. Jesús yi' je' ti xyajnejhuīyim Dios ytiy'ajt. Yi Jesús yi' y'ayoo anajty ma je cruudz, ni ca' yi' tuñcuendi je jadu'mbi o'cin oymidzo'yduunip. Com co Jesús ŋejhuīyib anajty co jadu'n y'o'cy ayoohuipy, chi ypaadipy jotcuje'ajtin ma Dios y'ane'my. E cham je' yajpaady ma Dios ymijc ma Dios y'ane'mdac.

³ Huinmaaygixy mǎich ajcxy je Jesús y'ijxpejt, nej pocyjāydijc chaachytuungixy etz ŋi'oiyigixy, etz ca' y'ixaani, paady ca' mdzǎjpcigixy ni mgamijotmetzcǎyigixy. ⁴ Ca'ni mǎich ajcxy ayo'n tzaachypi myajnaaxy mabaad ni'py ajcxy mxǎibiidyii jadu'n nej Cristo yjajty. ⁵ ¿Nej ti mǎich ajcxy mǎyidigooyigixy je capxhuijin huidibi Dios ti xymooyigixy nej jihuīy yci'm'ung? Jadu'n ymina'n ma Dios ŋecy: Mǎich n'ungich, ca' mbidāgy nej jihuīy ca' ytim ytiijity je tzaachypi huidibi Dios mǎid xycapxhuijy, ni ca' mǎjotmetzcǎhuipy co xyaj'ǎjipy.

⁶ Dios ycapxhuijy yi' pinjaty choijpy yjihuiyb. Dios chaachytumby yi' ajcxy co ytundigooy, pinjaty yi' ti cǎbicy nej jihuīy yci'm'ung.

⁷ Mimadaaccix mǎich ajcxy je castigo, com Dios jadu'n yi' xymǎidity ajcxy nej jihuīy yci'm'ung. ¿Nej ji jada' tǎg ung, e ca' yteedy chaachytunīyb co ytundigooy? ⁸ Pen ca' mǎich ajcxy Dios ti tzaachypi xymooyigixy, jadu'n nej yi' moy castigo tǎg'ǎciy y'ungdijc y'anǎctijc, ca' mǎich ixipy ajcxy Dios xy'ung'adyii tyidudāgy. Jadu'n mǎich ajcxy mǎidipy nej tǎg pi'c'anāg huidibi yteedy ca' y'ixa'ñyii. ⁹ Jadūg nax, taabi anajty ajt nbicnity, iich ajt ndeedy ya naaxhuiñ xy'ihuījim xycapxhuijim anajty, e xychaachytuunim co ca' ngapxymidoohuim ŋhuindzigīyim ajcxy. ¿Nej co ca' huaad n'ijtim ane'my ma ajt ndeedy huidibi tǎajpjoty yajpatp? E jadu'n jēbi nbaatim je jugy'ajtin huidibi ca' ycixipy ytigoyipy nimina. ¹⁰ Iich ajt ndeedy ya naaxhuiñ xy'ihuījim xycapxhuijim anajty mǎid jada conbi jugy'ajt ycixpi, jadu'n nej je' anajty ajcxy oy'ixy. Nañ jadu'n Dios iich ajt xychaachytuunim mǎid ajt n'oy'ajt ycixpi etz jigix nmǎid'ajtim huādz jot huādz huinma'ñ nej Dios ymǎidity huādz yjot huādz yhuinma'ñ. ¹¹ Oy yjanchity co ca' ti tzaachypi ndzocim ma yam nbaatim je tzaachypi, com ooy ndzachjihuiyim je tzaachypi, e ca' jotcuje nayjihuiyim. Per pinjaty ixpjicpi Dios chojcin mǎid je tzaachypi ycixpi, chi je' yhuimbizimīyigixy tǎg jugy'ajtin tǎdāgyi etz jotcuje.

Je huidibi ayo'ngojp co Dios y'ayuc ngacǎbigaanim

¹² Paady mǎich ajcxy jotmicpijccix ma nmibijcin, jadu'n nipaadip nej jihuīy myajpidicxixy mǎi' tǎibi y'anucxiyñi, etz mgoxcohuaic mic'ajt paady huidibi anajty, ca' mic'ajt mǎidity. ¹³ Ixtaaygix ni'aa tǎ'aa tǎiybi ma mdzinaayin, jadu'n nipaadip nej jihuīy yi mdcey huidibi mǎidip ti chǎgy, e camina jadūg'oc yhuidiip.

¹⁴ Tzinaaygix mǎid oyjot oyhuinma'ñ mǎid nidūg'ǎciy jāy. Ca' mdūngixipy ti tzip. Mǎid ajtcix tǎg tzinaayin huātzpi, pen ca' jadu'n mdungixy, ni pin ca'ixipy je Huindzin Jesucristo. ¹⁵ Ooy cuenditugixp co ni pin cajijpyōydūdipy je pubejtin huidibi Dios ti ahuanīy, jigix nañ jadu'n ni pin ycajajpaadipy janch mǎt yjot yhuinma'ñ, e yajhuindigoydāy yajmǎttāy jacjadyii ymǎigūgtijc, tim jadu'n nej tǎg ujtz ta'mbi ypa'mduñ. ¹⁶ Ni tǎg mǎich ajcxy ca' huaad ti ayuc

müid'aty müid huingbî töxyjây huidibi ca' müich mdöxyjic'adyii. Ca' nañ jadu'n m'ixtijipy je ayuc huidibi Dios yajhui'my müid müich ajcxy ycxipi, jadu'n nej y'idüich Esaú. Müid tûg caayin uucin Esaú toocnax je huidibi anajty möhuaanip yteedy co y'unggoobity. ¹⁷ Müich ajcxy mnejhuiyb co Esaú tocy huidi anajty paatip co japada'n je conuucxin huidibi anajty yteedy möhuaanip, ca' jadu'n Dios cöbijcy, chi Esaú ooy yjayaaxni, per ca' anajty ñihuinma'n nej yjothuimbipid müid je' ycxipi tiibi anajty tuñ.

¹⁸ Ca' müich ajcxy ti mjaty ti m'ixy, nej jecy'ajty yi israelitas ajcxy yjajty etz y'ixy co ajcxy mihuingoñ je cop Sinaí ma anajty Dios ti pidägy mij jün, ma anajty ooy yhuizdzy yjidity etz mijpoj mijtigoy ñaxy, ma anajty ooy y'agoodziy anaxy. ¹⁹ Ni mgamidooy ajcxy je trompeta ni je Dios y'ayuc huidibi anajty ajcxy je' migapxip. Pinjaty je' midou je ayuc ypijctzou ajcxy may'ajt co ca' huaad yjacmigäpxigixy com ooy anajty chigüygixy. ²⁰ Je' je' anajty ycxipi co anajty ca' mämädägaangixy je ane'min cötujcin huidibi anajty minamb: "Pin anajty ytecy pidacp ma yi cop, hue' yi' y'oyyaj'o'cnity cögäch müid tzaa o müid quipyjipxu'n, oy ixypiy y'iyujcity." ²¹ Oy chigüyñi huidibi anajty yaj'ijxp, Moisés ci'm minaan: "Tziyuuybich yam müid tzig'iñ."

²² Per müich ajcxy jadu'n nipaady nej jihuüy ti mmihuingoongixy yi cop huidibi yxü Sión etz je Dios juugypy ycajp. Je' je' je' Jerusalén tzejpjoty pi ma canaag mil je ángeles ajcxy yöymucxixy. ²³ Ti müich ajcxy mmihuingoongixy ma ti yöymucxixy je jaccömaaybi jây huidibi ajcxy yxü cojaay ma Dios ñecy jüby tzejpjoty, je huidibi ajcxy huin'ñb huingapxtacp Dios. Ti müich ajcxy mihuingoongixy Dios je huidibi nijuez'ajtp tûg'öciy. Nañ jadu'n ti müich ajcxy mihuingoongixy je' ajcxy je oyjädijc y'espíritu huidibi Dios ti yaj'ahuimbijttây tudägy. ²⁴ Müich ajcxy ti mihuingoñ yi Jesús, yi huidibi xycodinaayim ma Dios müid je jemybi cötujcin huidibi Dios yajhui'my müid müich ajt ycxipi. Yi Jesús huidibi mic'ajtmoy je Dios y'ayuc jemybi, co ñi'py teemy joicy müid ajt nbocy ycxipi. Yi Jesús co ci'm ñi'py teemy joicy müid jây ajcxy ypocy ycxipi, ñigi oy yi' ca'ydi co Abel iyujc ñi'py teemy joicy müid ypocy ycxipi.

²⁵ Paady ycxip ooy cuenditunig müich ajcxy, ca'ydi yaj'ixtijy Dios, je pin ti xyajmihui'mim jemybi y'ayuc. Je jây ajcxy huidibi tzinay jecy'ajty, ca'p je' ajcxy chocy co ajcxy ixtijy Dios co jecy'ajty yjamigapxi ajcxy ya naaxhuiñ. O'ctiy müich ajt ca' ndzoocim, pen nmooyim ajt njüx je Dios, je pin y'ayuc xyajmihui'mim huidi tzoön tzejpjoty.

²⁶ Co Dios y'ayuc yejcy jecy'ajty, chi yajtziyuuy ooy naax. Jadachambi Dios ymína'ñ: "Jadügtecpajc nyajtziyuuya'ñich je naax, e ca' nmínaaním naaxti'ajty, nañ jadu'n nyajtziyuuya'ñich je tzejp." ²⁷ Co jadu'n Dios ymína'ñ: "Jadügtecpajc nyajtziyuuya'ñich je naax." Hue' yajhuinjihuüy co ytigoydähuipy huidijaty yücxp huidibi Dios yaj'oyüy, e je' hui'mip je huidijaty ca' yu'cxy. ²⁸ Paady je Jesucristo ycötujcin huidibi Dios xyajmihui'mim, ca' yi' huaad ytigoy. Tzoc yajnaxim Dioscojuyip müid Jesús y'ayuc ycxipi, e nyajmij'ajtim n'ojadajtim Dios müid tudägy'ajt etz müid huindzig'iñ nej je' jâygidägyin. ²⁹ ñich ajt nDios jadu'n yi' nej tûg jün huidibi nöctayb tûg'öciy.

13

Nej jëbi nyajjägidaacim Dios

¹ Müich ajcxy huidibi müibijcp Jesucristo, ca' mjäy digooygixy co ajcxy mnaychöjigixipy miñ xyipy nej jihuüy ajcxy mdügquëxyity. ² Ca' ajcxy mjäy digooygixipy co oyjây'ajtin mdüngixipy müid pinjaty ajcxy xycöjädüyb. Müid co oyjây'ajtin ajcxy tuuñ, chi nijëjity ajcxy yajjättacy ángeles ajcxy, ni ca' ajcxy huinjihuüy co ángeles anajty ti yajjättaccixy.

³ Mjäy medzip ajcxy pinjaty tzumy'ñaayb mach'ñaayb jadu'n nej jihuüy müich ajcxy nañ jadu'n mdzumy'ñaaygixy mmach'ñaaygixy quipxy müid je' ajcxy. Jäy medzip müich ajcxy pinjaty tzaachypí ayo'n minajxp yajnajxp, com nañ jadu'n müich ajcxy müidity je ninüx huidibi jëbi y'ayoy.

⁴ Huen nidüg'öciy jây huindzigüygixy yajmij'ajtcixy je pijcin casada'ajtin. Huen je yëdjic etz je ytöxyjic naymüdtzinäyigixy yajxon, com Dios yi' tzaachytunipy pinjaty tundigooyb müid huingbî töxyjây.

⁵ Ca' m'adzojcixy meef. Mijotcujc'ajtcixy ti ajcxy ii müid. Dios ti je' ymína'ñ: "Camína xü müich müich ajcxy n'ixmadzip, ni müich müich ajcxy ngajädigoyipy." ⁶ Jadu'n jëbi nmínaaním agujc jotcujc: "Yi Huindzin Dios yi' xypubejtpich, ca' ndzigihua'ñich jây nej xyjatuna'ñich."

⁷ Jäy mejtzcix müich ajcxy je pinjaty ti xyñigohuajc'ajtcixy, je pinjaty ti xyajmüdmüidaaccixy Dios y'ayuc ytüy'ajt. Huinmaaygix nej je' ajcxy anajty ytudägy'aty, padungix nej je' anajty ajcxy müidity ymibjcin.

⁸ Jadu'n nej Jesucristo oybi tuñ jecy'ajty, nañ tim jadu'n oybi tuñ chambaad, etz oybi tuna'ñ huinixü huinitempo, ca' yi' yajtigadzip yi yhuinma'ñ ni mina. ⁹ Ca' müich ajcxy myajhuin'ingixy müid canaag ixpijcin huidibi ca' ytügnaxity müid Jesucristo ytüy'ajt. Ñigi oy co ajt nbidaacim nhuinma'ñ ma je Dios y'ayuc, nej yi' xychojcin xyjihuiyim, nej yi' may'ajt

tuñ m̄id ìch ajt. Ca' mbidaacim mhuinma'ñ ma je cõtujcin huidibi adujcp nijëjity caayin uucin. Ni ti jotcuyc'ajt ajcxy capaty pinjaty panicxp yi jadu'mbi cõtujcin.

¹⁰ Je judío tungm̄idpi huidibi huindzigi'ñ tumb anajty ma Dios yhuittijc je jecyip, ca' yi' jëbi yjactuuni ma ìch ajt nm̄ibjcin jadu'n nej Jesucristo tuñ huindzigi'ñ m̄id ìch ajt ycixpi. ¹¹ Je judío m̄jtungm̄idpi ma Dios ytjic ypidac iyujc ñi'py ma je Lugar Santísimo nej tũg huindzigi'ñ huidibi yajpocyñihuaatzp je mayjāy. Je iyujc ōgy ñin̄icx jiguem je' yajnōgy, ca' jibiyty cajpjoty ma je Dios anajty huindzigi'ygyxy. ¹² Tĩm jadu'n nej je judío sacerdote yajnōgy je huindzigi'ñ iyujc ñin̄icx cajp n̄inaxy, nañ tĩm jadu'n Jesús paty tzaachy'o'cin cajp n̄inaxy jigix m̄id je' yci'mni'py pocyñihuaádzip je mayjāy. ¹³ Tzoc m̄jpidaacim je Jesús tĩbi y'ōgy cajp n̄inaxy m̄id ìch ajt nbocy ycixpi. Tzoc minajxm yajnaxim je canayyajm̄ij'adii je canay'ixa'n̄ii, tĩm jadu'n nej Jesús minajx yajnax je canayyajm̄ij'adii je canay'ixa'n̄ii. ¹⁴ Ya naaxhuñ ca' ya ajt nm̄idity tũg ciudad ma jëbi n'j̄itim huinix̄i huin̄itiempo, je' ìch ajt nj̄ijp'ijxm je tzinaayin huidibi m̄imb cidaacp. ¹⁵ Paady ycixp chojcpy co Dios n'ojadajtim nm̄ibjctzoohuim Dios jadu'n nipaady nej tũg huindzigi'ñ nmooyim. Tzoc ii m̄ibjctzoohuim, tzoc ojadajtim m̄id ajt ngi'm'ahuac ngi'm'ayuc. ¹⁶ Ca' m̄jāydgōoygixipy co oybi mdũngixipy etz naybubéjtigix naybudiḡi'yigix m̄in xyipy. Co jadu'n mdũngixipy jadu'n nipaady nej tũg huindzigi'ñ ti myejccixy ma Dios huidibi yi' ooy jāygidāgy.

¹⁷ Capxymidoogix pinjaty xyñigohuajc'ajtcixp etz yajm̄ij'ajtcixp, com yi' m̄iich ajcxy xycuend'ajtp yi m'alma. Nejhuñyim co ciyegaangixyycuendi ma Dios nej ajcxy ti xycuend'aty. Pen oybi m̄iich ajcxy mdumyb m̄id yi' ajcxy, jotcuyc ajcxy ñayjihuñhuñyb. Pen jibic m̄iich ajcxy mduñ m̄id yi' ajcxy, tajp mayip ajcxy. E pen yi' ajcxy tajp maayb, chi m̄iich ajcxy ca' ni ti jotcuyc'ajt nm̄id'adipy.

¹⁸ M̄ibjctzoogix Dios m̄id ìch ycixpi etz je pinjaty xym̄idhuidjtpich. Jatytim naym̄ic'ix̄ibich tudāgy nduũñich ma tũg'ōciy ìch ndung, paady ycixp jotcuyc nayjihuñyijich. ¹⁹ May'ajt nbjctzooybich ma m̄iich ajcxy co Dios mm̄ibjctzoogix m̄id ìch ycixpi, jigix Dios a'ixihuipy co n̄icxibich tzojc ma m̄iich ajcxy.

Oy'ajt etz capxpooxcin huidibi cogix̄yñip je necy

²⁰ Dios nm̄ibjctzooybich m̄id m̄iich ajcxy ycixpi. Je Dios huidibi yajjugypijc jadũg'oc ìch ajt nHuindzin Jesucristo co y'o'cy, je huidibi cuend'ajtp je maym̄ibjcpidijc. Co Jesucristo ñi'py teemy vojcy, chi m̄ic'ajt moy je jemybi cõtujcin huidibi Dios ti xyajm̄ihu' m̄im. Dios ti pidāgy Jesucristo jadu'n nej je cuend'ajtpi jac'oybi ma je maym̄ibjcpidijc. Jadu'n yi' nipaady nej tũg cōbixy cuend'ajtpi huidibi cuend'ajtp may ngōbixy. ²¹ Je Dios huidibi xyajjotcuyc'ajtim je' huen xyaj'ahuimbjctcixy huádz etz oyyāy ma tũg'ōciy ajcxy mm̄ibjcin etz ma tũg'ōciy ajcxy mdzinaayin, jigix ajcxy mdunipy nej yi' tzocy. Dios huen tuñ ma ìch ajt njot nhuinma'ñ m̄id Cristo ym̄ic'ajt nej yi' tzocy. ¡Huen Cristo y'idipy mij cōmay huin̄ix̄i huin̄itiempo! Amén. Jadu'n jada.

²² Nm̄igũgtjic, nbjctzooybich may'ajt yajtungixy mecxtujcin ma jada ayuc capxhuijn. Ti ajcxy ii con nijayiygixy. ²³ Nejhuñyigix m̄iich ajcxy co ajt nm̄igũg Tímoteo y'ity ahuätztuum. Pen tzojc yjādy ya ma nyajpaadyich, chi yi' xym̄idn̄icxibich co ìch anajty m̄iich ajcxy nicxy n'ijxcixy.

²⁴ Nguejxpyich ngapxpooxcin ma nidũg'ōciy pin ajcxy xyñigohuajc'ajtp etz je migũgtjic ajcxy huidibi m̄ibjccixyp. Je migũgtjic huidibi ajcxy yajpatp ya Italia yquejxyp ajcxy capxpooxcin ma m̄iich ajcxy.

²⁵ Dios ajcxy xyconuucxp̄ nidũg'ōciy m̄iich ajcxy. Amén. Jadu'n jada.

SANTIAGO

Yi Necy Huidi Santiago Yajñiguejx Je Judío Mibijcpijic

¹ Hich Santiago, ndzojcingix ich nduñ ma Dios etz je Huindzin Jesucristo ytung. Cham jada necy nyajñiguxyich yi Israel jäy huidi ajcxy yajmij'ajtp Dios, huidi ajcxy xim yam yajpatp cajp cajp müd co yqueecpidzimy ajcxy Judea naaxjot co ymidzip ajcxy chach'ixhuididyii chachpahuididyii ajcxy.

Je tiy'ajt huidib tzoön ma Dios

² Migügtijc ajcxy co yi mmidzip ajcxy xychach'ijxmadzaangixy nej müich ajcxy mjet mhuinma'n müidity, co yi' ajcxy xy'ixhuidijtcixy xypahuidijtcixy, co xyñigapxcixy xyñi'ojiiygixy, co xyajhuinma'ñydgoyaaangixy, ca' mdajipy mmayipy ajcxy, jotcuje ajcxy mnayjihuihuiyb. ³ Müich ajcxy mnejhuiygixy co jadu'n mmimecxtujccixy je tzaachyp i ayon'it huidibi mminajxcixy myajñajxcixy müd co ti mmijpidaaccixy Jesucristo, huin'it mbáatcixipy mic'ajt, jigix jébi mimadactaygixy tüg'óciy jibic-huinma'n. ⁴ Copicy müich ajcxy mimadactaaygixipy tüg'óciy jibic-huinma'n, ca' ma mdundigóoygixipy, e huin'it huadz mjet mhuinma'n mmüid'adipy ajcxy, ca' ti mayajtigoy y'idipy ajcxy.

⁵ Pen nidüg müich ajcxy maymajyajt oyhuinma'n, co jäy ajcxy xychach'ijxmadzaani mjet mhuinma'n nej müidity, mibijctzou Dios huen xymöy je oyhuinma'n, com yejcpy yi' oyhuinma'n müid tüg'óciy jäy co pijctzoy. Ca' yi' cohuindugyii, ca' huaad xy'ojim co nbijctzoohuim oyhuinma'n. ⁶ Copicy pijctzohui Dios huijy'ajt cujc'ajt cixyjt huinjot, ca' y'ametz yjotmetzoty. Pinjaty ametz jotmetz Dios mibijctzoob, ca' tüciy müidity yjot yhuinma'n, janam jatzojc yajtigach yhuinma'n jadu'n nej je mejy co ypidigy y'ixtägü müd je poj. ⁷ Co jäy ajcxy ametz jotmetz mibijctzoogixy Dios, Dios ni ti jadu'n cayecy. ⁸ Yi jadu'mbi jäy ajcxy ametz jotmetzpi canaagnax yhuinma'n ajcxy müidity, ca' tügjijp yhuinma'n pidaaccixy ma Dios.

⁹ Yi ayoobitijc huidibi mijpidaaccixy Dios, ooy jäygidägaangixy co Dios ypubediiyb ypuDIGIHUIYB. ¹⁰ Yi comeenyjäy ajcxy huidibi mijpidaacp Dios, ooy jotcuje ajcxy ñayjihuihua'nyii co ajcxy ymeen' ytictähuipy jadu'ñyi. Com yi' ajcxy ymeen' tigoyamb yi' jadu'n nej tüg pijy co ñiicxni müd xii an. ¹¹ Co xii ypejtni, chi ooy y'andaacni mic, e chi je jünboj ypidzimy, chi je pijyquipy ytich, chi yhuingädaayñi je pijy, e jadu'ñyi ytigoydäy je pijy oy'ajtin. Jadu'n nej yjaty yi pijy, ñan tim jadu'n yjada'n comeenydijc ajcxy, jadu'ñyi ñitigoyaaangixy yjugy'ajtin.

Co yjot yhuinma'n chach'ijxmadza'ñyi

¹² Jotcuje pinjaty mimecxtujtaayb jadu'n nej ajcxy yjot yhuinma'n chach'ijxmadza'ñyi. Co jadu'n mimecxtujtaaygixipy, Dios möhuiib ajcxy jugy'ajtin huinixiibi, huidibi yajhuin-huaniiy tüg'óciy jäy ajcxy huidijaty Dios tzojcp yajmij'ajtp. ¹³ Co pin nijot'aty co tuna'n ti jibicpi, ca' ymina'nipy co Dios anajty jadu'n yajtundigoyaanip. Dios ca' ti jibicpi tuñ müd jäy ajcxy. E nañ ni pin ca' huaad ijxmach Dios nej yjot yhuinma'n ymüidity. ¹⁴ C'i'm ajcxy jadu'n ñaydunyii, co tzachnijot'ajtcixy canaagnax jibic-huinma'n. ¹⁵ Co jäy ajcxy nijot'ajtcixy jibic-huinma'n, pocy anajty ytungixy. Ti ajcxy anajty ooy ypcyñibejtni co nicxy y'ó'ccixni.

¹⁶ Migügtijc ajcxy, huidibi ooy ndzocy njihuüyich, ca' mnayhuin'ñigixy. ¹⁷ Hich ajt nDios Teedy huidibi tzejpjoty tzinaayb, yi' huidibi yajcojtaay xii madza' huidibi jajp täcxp, yi' je' yejtaayb tüg'óciy tijaty oybi, tüg'óciy yhuinma'n huidibi ich ajt nmüid'ajtim. Dios ca' yi' yjot yhuinma'n yajtigach jadu'n nej yi xii madza' yjajin ytäcixn ytigach. ¹⁸ Dios y'oydumyib huinjemy ich ajt njot nhuinma'n müd yi' y'ayuc ytiy'ajt, jigix jébi ich ajt nmi'ijtim oyjot oyhuinma'n. Yi jäy ajcxy huidibi yajmij'ajtcixp Jesucristo, Dios nigi tzocy ajcxy ca' jac ti huidibi oyduñ.

Je tiy'ajt tiydudäcypi

¹⁹ Migügtijc huidibi ich ooy ndzocy njihuüyich, mnejhuihuipy müich ajcxy jada co ooy ycopicyity mmido'mbijctähuipy ajcxy Dios y'ayuc ytiy'ajt, ca' mjäydgóoygixipy, ca' mgapxmayiiygixipy, pen mjetmätcotp ajcxy ca' anajty mguydungixy Dios ytiy'ajt. ²⁰ Je jäy huidibi jotma'tp, ca' je' tuñ huidibi Dios yjäygidacyp. ²¹ Ixmajtztaaygix yi jibic ayuc, ca' mnijot'ajtcixy yi jibic-huinma'n. Cöbijccix müd oyjot oyhuinma'n yi Dios y'ayuc ytiy'ajt, yi huidibi Dios ti yajnicödugi, huin'it jébi ajcxy m'alma nidzoocin paady.

²²⁻²⁴ Cuydungix ajcxy Dios y'ayuc ytiy'ajt, ca' ajcxy mjetcuje'adipy müd yi'yi co m'amidoo'ijtcixy, hue' anajty nigoo mnayhuin'ñigixy. Peni nigoob Dios y'ayuc m'amidoo'ijtcixy, e ca' mmijpidaaccixy ca' mguydungixy, naadigi' anajty m'amido'ijtcixy. Jadu'n müich ajcxy nipaady nej pin yhuifijjip aa'ijxnajxp ma tügi iix. Co ñay'aa'ijxnajxtäyii,

chi yjihuägy, e mic'amy jäydgoydäy nej yhuifnyjijp ti ix. Naadigi' anajty ti ñay'aa'ijxnaaxyii.
²⁵ Pen miich ajcxy yajxon m'ixpijcyp Dios ytiy'ajt, je tiy'ajt huidibi yaj'oyihuip ajcxy mjet mhuinma'ñ, pen mmijpidaaccixyp, pen mguydungixyp Dios y'ayuc, e ca' mjäydgooygixy, chi jada' Dios xyconuucxip ajcxy müd jëgixpi huidibi anajty mguydungixyp.

²⁶ Pen ji pin ñayjihuiyii co cuyduni Dios ytiy'ajt, e ca' ñay'ahuiztzyii, ci'm anajty ñayhuin'hiinyii, tundigooyb anajty, e ca' yjanchity co mijpidaaci Dios ytiy'ajt. ²⁷ Pen miich ajcxy huädz mijpidaaccixy Dios etz mguydungixy yi' ytiy'ajt jadu'n nej jëbi Dios jäygidägy, hue' tzocy co mbubéjtcixipy mba'ayöogixipy co'ögy'ungdijc, etz co'ögy ytoxyjäydic ma ayo'n jotmay ajcxy patcixy. E ca' huaad jibic-huinma'ñ mjactungixy, jadu'n nej jadyii naax-huiñyäj y'iditczixy, huidi ca' mijpidaaccixy Dios.

2

Ca' huin'ixpety migüg myajmij'ajtcixipy

¹ Migügtijc ajcxy, co m'ojadajtcixy co mmijnicxpejtcixy ich ajt nHuindzin Jesucristo, yi huidibi tzajpjoty ane'm, ca' ajcxy huin'ixpety migügtijc myajmij'ajtcixipy. ² Pen jim jäy ytiy'ajty ma mnayyöymüjcixy comeefnybi müd oori cijit, etz müd yhuut yxox janch oybi, etz pen nañ tigüyb tüg jäy ayoob huidibi yhuut yucxy ciizt tuc nibüdy ixpüdy. ³ Chi miich ajcxy je' jac nigi myajmij'ada'ñ je comeefnybi huidibi oyxoxy, e chi mnimähua'ñ: "ñña' miich ya ma jada oybi ñaaybejt." E je ayoob jäy mnimähuaangixy: "ñña' naaxcixy o jim jadu'n tina'." ⁴ Co jadu'n m'iditzip ajcxy, ca'p anajty jadu'n ytiy'ajty. Mdundigooygixy anajty ma Dios ytiy'ajt co huin'ixpety ajcxy migüg mdzogipy. Hue' anajty myajtungixyp jibic-huinma'ñ co jadu'n m'ixtjicixipy jäy huidibi ayoob.

⁵ Migügtijc ajcxy, Dios ti huin'ixy yi ayoobitijc, jëbi ajcxy mijpidägy Dios etz jëbi ajcxy paadipy it lugar ma Dios y'it tzajpjoty. Jadu'n Dios yajhuinhuaniy pinjaty tzojcp jihuiyip co it lugar möhua'ñ jilby tzajpjoty. ⁶ Myajtzo'yduungixyp miich ajcxy ayoobtijc. ¿Nej cayi comeefnyjäy ajcxy huidibi miich ajcxy xychachxip ma cötujctac, e xyajnicxcixy ma tungmüdp yhuinduu, oy ajcxy mdzocy mgatzocy? ⁷ ¿Nej ca yjëjity ajcxy huidibi jibic nigapxp ni'ojüyb Jesucristo, je oyjäy huidibi miich ajcxy myajmij'ajtcixyp?

⁸ Pen janch miich ajcxy mguydungixy je tiy'ajt huidibi jaybety ma Dios ylibro: "Md-zogipy mjihuipmy mmigügtijc hueñytimypinity, jadu'n nej miich ajcxy ci'm mnaychogyii mnayjihuiyii." Pen jadu'n anajty mdungixy, tüg anajty oybi mdungixyp. ⁹ Pen huin'ixpety ajcxy anajty jäy myajmij'ajtcixy jadu'n nej yhuut yxoxy ajcxy müdity, mdundigooygixy, e ti anajty mnayyajpocähuigixy ma Dios ytiy'ajt. ¹⁰ Pen tüg jäy cuydundaayi Dios ycötujcin, co nicxy tüg cacuyduñ, jadu'n nipaady nej jihuiy anajty janch ni tüg cötujcin ti cacuyduñ. ¹¹ Je Dios je cötujcin ti pidägy co ca' huaad mmigapxtigooyipy töxyjäydic, etz nañ ti cötujcin pidägy co ca' huaad njäyay'o'cim. Pen mmigapxtigooyb töxyjäydic, oy ca' ti mjäyay'ögy, ti anajty mdundigooy mij ma Dios ytiy'ajt. ¹² Capxcix miydaccix, tungix nej jëbi huaad jäygidägy ich ajt nHuindzin Jesucristo nej je' cuyduñ yi' ytiy'ajt. ¹³ Ca' ti pa'ayoohuin paadipy ma Dios, pin ca' tuñ ti pa'ayoohuin ma ymigügtijc. Pin pa'ayoohuin tumb ma ymigügtijc, je' capxpaady y'idip co anajty Dios tiyduñ yi' yjäy.

Je mibijcpi etz je oyjäy'ajtin

¹⁴ Migügtijc ajcxy, ni ti m'alma capada'ñ pen miich mminaamb co myajmij'ajtyp Dios, e pen ca' myajnigüexy ni ma co oybi mduñ. Ca' Dios yajnödöga'ñ yi m'alma müd co nigooob mmina'ñ co Dios mmijpidägy, e ca' mguyduni yi' ytiy'ajt. ¹⁵⁻¹⁶ Pen miich ajcxy müd tüg migüg yëydijcpi o töxyjäybi huidibi yajmayajtp yhuut yucxy caayin uucin, e chi nigoo miich ajcxy mnimähuiy: "Nixc agüjc jotcujc, Dios xypubedipy xypudigihuip, ca' mduich'ögipy ca' myuu'ögipy." E miich ca' anajty ti ti mmöy huidijaty yajmayajtpy. ¿Ti oyjäy'ajtin anajty ti mduñ? ¹⁷ Pen miich minamb co myajmij'ajtyp Dios, e ca' oyjäy'ajtin mduñ müd mmigügtijc, ytimyñipatp jadu'n nej ixypy ca' mmibicy yi Dios ytiy'ajt.

¹⁸ Ca' yjegyty co tüg jäy xyñimähuibich jadu'n: "Miich mdzachmijpidacpy yi Dios ytiy'ajt, e ich ndumyibich oybi." Ich n'adzohuipych yi jadu'mbi jäy co ca' jadu'n ytiy'ajty nej miich mmina'ñ. Pen ca' miich mmijpidägy Dios y'ayuc, ca' mjadipy nej mdunipy oybi jadu'n nej Dios huaad jäygidägy. Co ich oybi nduñ, jadu'n ñigüexy co nmijpidägyich Dios. ¹⁹ Miich mmibijcpi co Dios ji tügpaic, e oy jadu'n co mmibicy. Nañ jadu'n yi ca'oybi ajcxy mibijcp etz chigüyb ajcxy Dios. ²⁰ Loci miich, ca' mhuinjihuñhua'ñ je tiy'ajt. Co pinjaty mibicy Dios, e ca' yajnigüexy co oybi tuñ, ca' tiyduägy mibicy Dios. ²¹ Je Abraham yejc tüg ixpejt nej jëbi huaad ngapxymidoohuin Dios co jecy'ajty je' ymang Isaac cyejcy nej tüg huindzigi'ñ ma Dios. ²² Je Abraham ymibijc co Dios yjiijty etz nañ ycapxymidou nej Dios ñimaayi. Paady nejhuñyim co yjanchity co Abraham mijpidacy je' Dios müd co cuyduñ jadu'n nej Dios ñimaayi. ²³ E jadu'n oy cuydundäy nej yjaybetyty ma Dios ñecy: "Yi Abraham ymijpidac

Dios, paady Dios ymecxtaayi ypocy, e ycöbijci jadu'n nej jihuüy ca' anajty ytundigoy." Paady ycixpi Abraham oyñaydijyii: "Co Dios minaymigüg'adyii."

²⁴ Cham nejhuiyigix co Dios ycöbijcipy jây huidibi cuydungixp yi' yti'yajt, e ca' nmînaanim müid jêyi co ymibijccixy. ²⁵ Tim jadu'n nej Abraham yjajty, nañ tim jadu'n yjajty müid je töxyjây huidi anajty yxii Rahab, huidibi anajty ooy ti ytundigoy müid mayyêydijc. Je Rahab ycoyüdz ma ytiç nimetz jây huidibi anajty Israel jây yaj'ijx'ijtyp, e chi yajqueegiy ma huingbi tü'aa, e jadu'n ajcxy yajtzoocy ma ymidzip. Müid co jadu'n oyjây'ajtin tuñ müid je Israel jây, chi Rahab oy paady je nîdzocin ma Dios. ²⁶ Je ninîcx huidibi ca' alma müidity, ca' ni ti mic'ajt müidity. Nañ tim jadu'n pinjaty mibijcp co Dios yjiijity, e ca' cuyduñ Dios yti'yajt, yi' ymibijcin ca' Dios cuendipicy.

3

Co pinjaty nigapxy ni'ojîy ymigüg

¹ Migügtijc ajcxy, huinmayigix yajxon pen janch mnajtztzogiyigixy co ajcxy mni-huindzin'adaangixy Dios y'ayuc. Com iich ajt huidibi nyaj'ixpiçim Dios y'ayuc, pen tundigooyim nîgi mij nyajtiydunaanim. ² Nidüg'óciy iich ajt ndundigooyim minaaity. Pen ji pin ca' y'iidigooy ycapxtigooy, yi' tiydudägy anajty yjây'aty, jêbi ñaygüend'adyii yajxon, e ca' huaad y'ocjactundigooyñi. ³ Ypidacpy jây freno ma cohuay y'ahuac jigix jêbi ane'my je cohuay nej tzocy. Nañ jadu'n tzocy co jây ajcxy huen y'ahuac ahuijtzcixy jadu'n nej jây cohuay ane'my müid freno. ⁴ Nañ jadu'n yi barco oy mabaad ooy yjamijity, per ooy poj ytiyminyii ytiixibyii. Je barco yaj'ane'm yajxon müid tüg pi'c pujx yindi'cni huidib xiiçip timon. Yajxon ytiyöy je barco ma je' timdzocy je huidibi ane'mip. ⁵ Nañ jadu'n yjaty müid yi tootz, janch tim yindi'cni yi', per ooy mij cajee tuñ jibicpi, jêbi y'iidigooy ycapxtigooy mij cajee. M'ijxyp müich ajcxy nej tim yindi'cni jün mij ooy nõgy quipychaa miy'ujtz. ⁶ Yi jây ajcxy y'ahuac nañ tim jadu'n nej pi'c jün, müid nhuin n'ahuac mijcajee n'iidigooyim ngapxtigooyim. Co jadu'n n'iidigooyim ngapxtigooyim, chi jêbi mijcajee midundigooyim mayjây. Co n'iidigooyim ngapxtigooyim, etz nayyajpocycâhuim, chi ñiguêxigy canaagnax jibic-huinma'n huidibi nmüid'ajtim. Jada jibic-huinma'n jim yi' nbaatim ma je mujcu' huidibi tzinaayb ma yi inferno. ⁷ Yi naaxhuiñyây ti mîmadaaccixy yi iyujc animal huidibi queegicp queec-huidijtp, naag iyujc ahua'nbi, etz iyujc niijotyp. Ti ooy yajmaxiyigixy yajxon iyujc huindzicyp etz ahua'nbi. ⁸ Yi naaxhuiñyây oy ti mîmadaaccixy yi iyujc animal, per nitüg ycacaty pin yajxon y'ahuac ahuijtzigipy, ac'iidigooyigixp capxtigooyigixp ajcxy. Pin ymigüg nigapxy ni'ojîyb, huin'it je ymigüg ooy jibic ñayjihuihua'nyii, jadu'n nej jihuüy veneno ti möy ymigüg. ⁹ Müid jada' nhuin n'ahuac ajt ngapxpaaatim iich ajt nHuindzin Jesucristo etz iich ajt nDios Teedy. Nañ jadu'n müid nhuin n'ahuac nigapx ni'ojîyim nmigügtijc. Dios ti yajcojy yi jây müid oyjot oyhuinma'n jadu'n nej yi' oyjot oyhuinma'n müidity, paady ca' y'oyity co n'iidigooyim ngapxtigooyim. ¹⁰ Müid nhuin n'ahuac ajt müid ngapxim oybi ayuc etz jibic ayuc. Müid nhuin n'ahuac yi' müid ngapxpaaatim etz ni'ojîyim nmigügtijc. Ca' jadu'n y'oyity co jadu'n n'adiitizim. ¹¹ ¿Nej jêbi jada' ma tüg niigop ypidzimy nii päcpi etz nii ta'mbi? ¹² Migügtijc ajcxy, ¿nej jêbi jada' yi higuery ytiim'aty aceituna etz yi muuxy'aadz ytiim'aty higos? Nañ tim jadu'n ma nii ymuxe tamtzipi, ca' jim ypidzimy nii päcpi. Paady ycixp ca' y'oyity co jây ajcxy capxcixy oybi etz jibicpi.

Je tiy'ajt janchypî

¹³ Pen müich ajcxy huijycujc mnayjihuiyi, pen oyhuinma'n ajcxy mmüid, yajtungix m'oyhuinma'n ma mdzinaayin mjugy'ajtin. Ca' huaad ci'm ñaygömaayigixy. Müid je oyjây'ajtin huidibi ajcxy mdumyb huen jây ci'm nejhuiyigixy co oyhuinma'n müich ajcxy müid'ajtcixyp. ¹⁴ Pen ta'm mjet mhuinma'n mjihuüyigixy, pen mga'oy'ijxcixyp ymigügtijc, pen mhuinnaxtugaangixyp ymigügtijc, pen jadu'n mjihuüyigixy mhuinnaxtugaangixy, huin'it ca' huaad mnaygömaayigixy ci'm co mdzachcuydungixy Dios yti'yajt, com ca' yjanchity, nigoo m'aniidaaccixy. ¹⁵ Jada jibic-huinma'n ca' jada choon ma Dios huidibi tzinaayb tzajpjoty. Ya naaxhuiñ jada jibic-huinma'n yajpaady, müid co jây tzachnijot'ajtcixy jibic-huinma'n. Yi muux' yejcpy jada jibic huinma'n, e ca' nmînanim co Dios yecy jada jibic huinma'n. ¹⁶ Paady ycixp co jây ajcxy ycanay'ixa'nyii, co huinnaxaangixy ymigüg, chi ca' oy y'ijtcixy, oy ajcxy ñaymidundigooyigixy mijcajee. ¹⁷ Je huijy'ajt cujc'ajt huidibi Dios yejcp, ooy yi'. Yi Dios huidi tzinaayb tzajpjoty oyhuinma'n ymüid. Pen nyajtuunim je tiy'ajt huidibi Dios ti xymooyim, chi jotcujc ndzinaayim, ca' ma tzip capxy, etz nmîmecxtujcim nmigügtijc, etz yung naxy jot huinma'n nmüid'ajtim, etz nba'ayooahuim nmigügtijc, etz nduunim oyjây'ajtin, etz tudägy nhuinma'n nmüid'ajtim. E ca' nigoo naybidaacim jadu'n nej jihuüy nmijpidaacim Dios, e ca' yam yjanchity. ¹⁸ Co nyajtuunim je huijy'ajtin cujc'ajtin huidib Dios yejcpy, chi jotcujc ndzinaayim müid tudägy njot nhuinma'n, jadu'n nej jêb Dios jâygidägy.

4

Co pinjaty nijot'ajtcixy mayñax tzinaayin

¹ ¿Ma'amay ajcxy mdijy choon je tzip capx huidibi yajpatp ma miich ajcxy? Tüg'óciy yi jadu'mbi jibicpi yajpatp ma ajcxy mjet mhuinma'ñ, paady ycixp mganay'ayuc-huinjihuiyigixy, e tzipcapxy myajcojcxixy myaj'abadiiygixy. ² Ooy miich ajcxy tijaty mjetzo-jccixy, e ni ti mgapaatcixy, e huin'it mjäyay'óccixy. Ooy m'adzojccixy tijaty migüg yjé'ajtyp, paady ycixpi mdziptungixy, etz mganay'ixáanigixy. Ca' ti jotcujc'ajtin mbaatcixy, com ca' ajcxy mbijctzoogixy ma Dios. ³ Co mjamibijctzoogixy Dios, chi ca' ti mbaatcixy, müd co mbijctzoogixy müd jibic-huinma'ñ. Mbijctzoogixyp co myajtunaangixy ma ca' ypadyii. ⁴ Mdundigooyb ajcxy. ¿Nej ca' mnejhuiyigixy co Dios ca' jäygidäy pen mdzachnijot'ajtyp ajcxy yi mayñax tzinaayin? Pinjaty nijot'ajtcixyp yi mayñaxpi tzinaayin, jadu'n yi' ajcxy nej yi jacyadyii jäy ya naaxhuiñ huidibi ca' yajmij'ajtcixy Dios ytiy'ajt. Hue' je' ajcxy y'ahuimbity Dios ymidzip. ⁵ Nej miich ajcxy mdijy, naadigi' ymiñ jaybety ma Dios yñecy: "Je Espíritu Santo huidibi Dios ti xy'adigiiyim ti xyjottigiiyim ooy xychojcin xyjihuiyim mijcajee." ⁶ Dios ninigoobi may'ajt oy'ajt tuuñ müd iich ajt ycixpi, paady ycixpi ymina'ñ ma Dios ñecy co ca' yi' oy'ixy pinjaty amij agix nayjihuiyip. Dios yejcpy may'ajt oy'ajt ma yi' jäy ajcxy huidibi yung naxy jot huinma'ñ müdity. ⁷ Naybidáacigix cixyot huinijot ma yi' Dios. Mic mihuindinaaygix yi mjuclu', e jihuägipy yi' ma miich ajcxy. ⁸ Ojadajtcix Dios müd oyot oyhuinma'ñ, e Dios xypubedipy xypudigihuipy ajcxy. Miich ajcxy pocyjäydijc, ixmajtcix yi jibic-huinma'ñ. Yajhuaatcix yi mjet yi' mhuinma'ñ miich ajcxy huidibi ametz jotmetz mibijcp. ⁹ Tajcix maygix, amutzciygix. Huen yi mxiicin yi mxondaacin ahuimbity jiiyin yaaxin. E yi mjetcujc'ajtin huen ahuimbity taji mayii. ¹⁰ Pidaccix yung naxy yi mjet yi' mhuinma'ñ ma yi' mHuindzin Dios, e yi' may'ajt oy'ajt tunipy müd miich ajcxy ycixpi.

Ca' huaad nigapxcixy ni'ojiiygixy ymigütiyc

¹¹ Migütiyc ajcxy, ca' mnayñigápxigixy mnayñi'ojiiygixy miñ xyipy. Pen mnigapxcyp mni'ojiiyb mmigütiyc, hue' mniixicipy myajxiicpy Dios ytiy'ajt huidibi minaamb co myajmij'adipy yi mmigüg jadu'n nej mnayyajmij'adyii ci'm. Pen mniixigamyb myajxigamyb Dios ytiy'ajt, ca' anajty mguyduñ yi tiy'ajt, e jadu'n yhuimbizimyb nej ixipy miich mina'ñ co Dios ytiy'ajt ca' yi' y'oyity. ¹² Dios tügpajc huidibi ane'min pidägy, e yi' je' tügpajc huidibi tiydunamb pocyjäy. Yi Dios tügpajc huidibi yajtzögip o yajtigoyip jäy ajcxy y'alma. Paady ycixpi miich ajcxy ca' ypadyii nicxy migüg mnigapxcixy mni'ojiiygixy.

Dios tügpajc nejhuiy nej je jabombi mimb cidacp

¹³ Tungix cuendi iich n'ayuc miich ajcxy huidibi minamb: "Cham o jabom nniicxim ma yijimbi naax cajp, e jim nyajnajxim jimijt aguc jotcujc, jim negocio nduunim, ooy mijcajee nbaatim." ¹⁴ E miich ajcxy ni mganejhuiyigixy ti je' anajty je jabombi mimb cidacp. Je jugy'ajtin ni pin ca' nejhuiy nej pin chinähua'ñ yjugy'ada'ñ. Jadu'n miich ajcxy mjugy'ajtin nej joc co y'ocquëxigy cham, e tim tügaxigy ti ñitigooyñi. ¹⁵ Jac'oy ajcxy mmına'ñip: "Pen Dios jadu'n tzojp, pen xymooyim jugy'ajtin, jëbi cham o jabom nduunim tijaty." ¹⁶ Miich ajcxy ci'm mdzachyainihuinmaaygixy ti mdunamyb, ci'm mdzachnaygömayyii ajcxy. Ca' jadu'n y'oyity co ci'm mnaygömáayigixy; co ci'm mnaybidáacigixy amij agix, ni Dios mgamibijccixy. ¹⁷ Pin janejhuiyb je oybi, e ca' tuñ, pocytumb anajty.

5

Je comeeñjây yjugy'ajtin nitigoyam

¹ Comeeñydijc, oc'amidoo'ijtcix nej cham nmına'ñich. Amutzciygix, tajcix maygix co xyñimınaangixy ayo'n. ² Miich ajcxy mmeëñ etz ajcxy mjugy'ajt ñitigoyamb yi', miich ajcxy mhuit mducxy ti uucxyting yjicxtäyii. ³ Miich ajcxy m'oori, ajcxy mplate, ajcxy mmeëñ naadigi' ti myujpijccixy ti m'amay'ajtcixy. Ti ixipy myajtungixy müd oyjäy'ajtin. Co ti myujpijccixy ti m'amay'ajtcixy ji jadu'n je tiy'ajt co mdundigooygixy ma Dios. Müd co yi mmeëñ ca' ti myajtungixy müd oyjäy'ajtin, paady ycixpi ayo'n mbadaangixy müd je xi tiempo huidibi mimb cidacp, mina Dios tiydunaangixy pocyjäydijc. Nitigoyamb miich ajcxy m'oy'ajtin. ⁴ Mdundigooygixyp co ca' ca'pxy ti mmujuyygixy mdumbidijc huidibi ti myajtungixy ma ajcxy mgamdu'. Yi mdumbidijc cham ooy miich ajcxy xiy ma Dios. Yi Dios, je Huindzin mijpi, huidi ane'mdaayb tüc'óciy jiiyb tzejpjoty etz ya naaxhuiñ, yi' ñejhuiydaayb nej miich mdumbi ajcxy ymınaangixy. ⁵ Ti miich ajcxy aguc jotcujc mdzinaaygixy ya naaxhuiñ müd mayñax xondaacin. Ti miich ajcxy mgüxyii mbedyii, ti ajcxy mjetcujc'ajtcixy. Cham m'ahuixcixyp yi tzaachyp yi ayo'n huidibi ajcxy mbadamyb ma Dios, jadu'n nej huañ nicxpi ahuixy co jäy ajcxy chüda'ñyii. ⁶ Miich ajcxy comeeñjâydyjic ti miich ajcxy mxigixy mñihuambejtcixy, mdzaachytungixy ti myaj'óccixy jäy ajcxy tudägypi, e ca' yi' ajcxy xymihuimbijty.

Je mecxtujcin etz je capxtägii

⁷ Migügtijc ajcxy, yajtungixy mij yi mecxtujcin mabaad anajty je Huindzin Jesús ymiñ jadügtecy ya naaxhuiñ. Tim jadu'n nipaady nej naymıdumbıdıjc ahuijxcıxy je tııbı nidungıygıxy, ahuijxcıxy müd mecxtujcin je oga'n tuu etz je poj tuu huidi müd je' ypidägy yhuindihuiy. ⁸ Müd'ajtcix nañ jadu'n ooy mecxtujcin, etz ca' mjetmetzcıygıxy, com huıngomb je tiempo mina ymiına'ñ je Huindzin Jesús ya naaxhuiñ jadügtecy. ⁹ Migügtijc ajcxy, ca' jadüg jadüg mnayñigápxıgıxy nayñi'ojııygıxy. Pen jadu'n mdungıxy Dios miıch ajcxy xyajpocycáhuıpy, com tim huıngonip je xıı je tiempo mina Dios tiyduna'ñ jäy ajcxy müd ypocy ycıxpi. ¹⁰ Migügtijc ajcxy, pijccıx je iıxpejt jadu'n nej tzaachypi minajxy yajnajxy je profetas ajcxy huidibi ajcxy ihuácxp capxhuácxp je Huindzin Dios y'ayuc. ¹¹ Minaanım jadu'n, müd co ajcxy ooy mımeextucy nej jäy jıbic ytuuñ müd yi' ajcxy, e chi jotcujc cham yajpaady ma Dios. Ti jada' mjatymıdoogıxy je ayuc nej Job ayo'n tzaachypi minajxy yajnajxy, e ymımeextujc je'. Müd co ooy anajty mijpidägy Dios, paady Dios pa'ayoy Job, e conuucx mijcajee.

¹² Migügtijc ajcxy, co tijaty ayuc m'adzohımbıdıpy, tiydüägy ajcxy m'adzohıpy: "Janch jadu'n o ca' yjadu'nıty", ca' ajcxy m'ıındägiy. Ca' Dios nigoo m'ııbaadıpy mgapxpaadıpy. Ni ca' m'ııbaadıpy mgapxpaadıpy yi naaxhuiñybi o tijaty ya naaxhuiñ. Huin'it ca' mnayya-jpocycáhuıyb ma Dios.

¹³ Pen ji pin ma miıch ajcxy ti ayo'n müdıty, huen mıbijctzoogıxy Dios müd yi jäy ycıxpi huidibi ayo'n müd. Pen miıch ajcxy jotcujc nayjihuiıyp, huen huin'ııgıxy Dios. ¹⁴ Pen ji pin nidügti ypiyıı ma miıch ajcxy, huoomıııgıx yi' huidibi ajcxy nigohuajc'ajtp yi mıbijcpıdıjc, jigıx ajcxy mıbijctzoohıpy Dios müd je pa'mjäy ycıxpi, etz pidägiy hueeni aceite ma je jäy ycohuajc etz capxpaadıpy yi Huindzin Jesús yxıı. ¹⁵ Müd co miıch ajcxy mmıbjpıdaaccıxy e mmıbijctzoogıxy Dios, paady ycıxpi tzögıpy yi pa'mjäy. Chi je Huindzin Dios yejcnip mıc'ajt oy'ajt, etz ymıcxtaayıpy yi' ypocy huidibi anajty ti tuñ. ¹⁶ Capxpıdzim yi mbocy nidüg nidüg. Nayñıbjctzoohııygıx nidüg nidüg ma Dios, jigıx ajcxy mdzögıpy. Pen tüg tudägyı jäy ymıbijctzooyb yi Dios cıxyjot huinıjot, madägiy yi' müd y'oración. ¹⁷ Elıas nañ tim jadu'n anajty yjothuinma'ñ müdıty nej ııch ajt. Janch cıxyjot huinıjot mıbijctzooy Dios ca'jıty ytüy, e ca' je' jadu'n ytuuy tugüg jıııjt ja tudujc po'. ¹⁸ Chi jadüg'oc Elıas mıbijctzoy Dios co huen tüy, chi Dios yajtuuy, e chi ya naaxhuiñ yhuindıy je jäy ajcxy ypidägy.

¹⁹⁻²⁰ Migügtijc ajcxy, pen ji miıch ajcxy nidüg ñıdıgooy ytüdıgooy ma yi Dios ytiy'ajt, e huin'it tüg quëxıgiy pin ymıgüg yajhuımbıdıpy ma Dios ytiy'ajt, nejhuıygıx miıch ajcxy co pin huidi yajhuımbıjtp ymıgüg ma Dios ytiy'ajt, huidibi ti ñıdıgooy ti ytüdıgooy, ti je' anajty tüg alma yajtzögy ma yi o'cin, e ti anajty yajpocyñıhuaatzäy.

1 PEDRO

Yi Necy Huidibi San Pedro Yajniejx Je Judio Mibijcpidijc

¹ Ich Pedro, Jesucristo ti xyajniñbicich ngapxhuäcibich yi' y'ayuc. Jada necy nyanjiguejxyp miich Israel jäy huidibi adzinaayb xim yam jim Ponto naaxjot, jim Galacia naaxjot, jim Capadocia naaxjot, jim Asia naaxjot etz jim Bitinia naaxjot. ² Miich ajcxy migügtijc Dios Teedy ti xyhuin'ijxcixy, jayijp Dios ti nejhuüy co xyjäy'ada'ñiyi ajcxy. Dios ti yajtigiyi yi' yjihui'ñ ymic'ajt ma miich ajcxy mjet mhuinma'ñ, huen oyjot oyhuinma'ñ myajtunipy ajcxy jadu'n nej Dios huinma'ñ xymoogixy. Dios miich ajcxy ti xyhuin'ixy jigix mgapxymidohuipy Jesucristo, je huidib ñi'py teem cuj müd miich ajcxy ycixpi. Pidaaccix mhuinma'ñ co mgapxymidohuaangixy Dios jadu'n nej jecy'ajty je Israel jäy ytuñ, je taab anajty Moisés yaj'ögy iyujc etz yajniñdicxy ajcxy nidüg nidüg je ni'py, je' anajty ajcxy ytiy'ajt'ajtipy co capxymidohuaangixy Dios. Huen Dios may'ajt oy'ajt mijcajee tunipy ma miich ajcxy, chi jotcujc mdzinäygiixpy.

Jijp'ijxcix jugy'ajtin huinixiibi

³ Yi Dios, ich ajt nHuindzin Jesucristo yTeedy, huen capxpaady y'ity, müd co may'ajt oy'ajt ti tuñ müd ich ajt co ti oyduñ huinjemybi ich ajt njot mhuinma'ñ, jebi n'ijtm Dios yjäy. Jadachambi ooy njijp'ijxim je jugy'ajtin huinixiibi, müd co Jesús yjugypijcy huinjemy ma anajty ti y'ögy. ⁴ Nañ ooy njijp'ijxim tijaty Dios xymöhuaanin jibby tzajpjoty, huidibi ca' yhuindigoy, huidibi ca' yjibiciy, etz huidibi ca' ycixy ytigoy. ⁵ Dios xycuend'adip ajcxy müd yi' ymic'ajt, ixti jiini co anajty ajcxy je m'alma nidzoocin padaangixy, co anajty je naaxhuiñ ycixy ytigoy. Mbadaangixy m'alma nidzoocin müd co ti mmijpidaaccixy Dios ytiy'ajt.

⁶ Paady miich ajcxy ooy jotcujc'ajtcixp. Oy cham tzaachypi m'ocminajxcixy m'ocyajnajxcixy müd co jäy tzach'ijxmadza'ñ miich ajcxy mjet mhuinma'ñ. Nigi ooy jotcujc nayjihuiyigixy co ajcxy yi' m'alma nidzoocin pada'ñ. ⁷ Dios y'ixamyb ñejhuihuamby pen janch miich ajcxy cixyot huinijot mmijpidaaccixy yi' y'ayuc. Paady miich ajcxy ayo'n tzaachypi mminajxcixy myajnajxcixy jebi nigi myajhuaatzcixy mjet mhuinma'ñ, tim jadu'n nej jäy yajhuaatzcixy yi' oori müd jiin. Dios nigi tzocy miich ajcxy huidib yi' ytiy'ajt mijpidaaccip, ca'ydi oori. Pen tudägy miich ajcxy mhuinma'ñ, pen ca' mhuinma'ñytigajtcixy co tzaachypi mminajxcixy myajnajxcixy, chi capxpaady ajcxy m'idipy etz mbaadipy ajcxy jotcujc'ajtin co anajty Jesús ñayguéxigiyi jadügtecy ya naaxhuiñybi.

⁸ Oy miich ajcxy ca' ti m'ijxcixy Jesucristo, per myajmij'ajtpy ajcxy, e cham oy ca' m'ijxcixy Jesucristo, myajmij'ajtpy ajcxy yi' ytiy'ajt. Co ajcxy mmijpidaaci Jesucristo ytiy'ajt, chi ajcxy ooy m'ayjihuiyii nigi jotcujc anaxy. Je jotcujc'ajtin huidib mmüd Dios je' yejcp. ⁹ Paady ycixpi ti mmijpidaaccixy Jesucristo co ajcxy m'alma xyajniñdögaani.

¹⁰ Jadu'n nej Jesucristo xyajniñdögaani miich ajcxy m'alma je Dios y'ayuc najtzcapxiybi ooy anajty jecy'ajty janejhuihuaangixy nej Dios y'ayuc ñiguejy, e ca' ajcxy huinjihuüy, je huin'it tiempo anajty ajcxy capxhuäcxp Dios y'ayuc jadu'n nej Dios may'ajt tuna'ñ müd miich ajcxy ycixpi. ¹¹ Je Dios y'ayucnajtzcapxiybi jecy'ajty ooy ajcxy jahuinmay, ooy ajcxy jahuinjihuühaañ nej yhuimbizimy je ayuc huidibi ajcxy ymüd jotjoty huinma'ñyoty, je ayuc huidibi Jesucristo yajmiguejx yi' yjihui'ñ ymic'ajt, je Espíritu Santo, jadu'n nej ajcxy najtzcapxiy co je Cristo tzaachypi minaxa'ñ yajnaxa'ñ, etz co ñicxa'ñ jadüg'oc tzajpjoty. ¹² Dios yajnejhuüy yi' y'ayucnajtzcapxiybi co je' huidib ajcxy ycapxhuäcx jiini je' ytuna'ñiyi yjada'ñiyi, ca' ajcxy ixa'ñ. Migügtijc ajcxy, Dios ti yajtuunyii ti yajjadyii ma miich ajcxy je mxii mdiempo nej anajty je' y'ayucnajtzcapxiybi najtzcapxiy jecy'ajty je tiy'ajt. E jadachambi jadu'n nej Dios ti yajtuñyii ti yajjadyii ti jäy capxhuäcxtäy ma ich ajt nidüg'öciy. Je jäy huidibi capxhuäcx je tiy'ajt ymüd anajty ajcxy je Dios yjihui'ñ ymic'ajt huidibi Dios anajty yajniejxip, choon tzajpjoty. Ixti je ángeles huidibi ajcxy tzajpjoty tzinaayb yjanejhuihua'ñ nañ jadu'n nej Dios ti yajtuñyii ti yajjadyii ma miich ajcxy, e ni ca' ajcxy nejhuüy.

Chojcxy Dios co tudägy ndzinaayim

¹³ Paady ycixp ni'ixi pidaaccix mjet mhuinma'ñ. Huiy ycuje ajcxy mdzinähuip. Jijp'ijxcix je may'ajtin oy'ajtin huidibi Dios tunamyb müd miich ajcxy ycixpi co anajty Jesucristo yhuimbity ya naaxhuiñ. ¹⁴ Capxymidoogix Dios jadu'n nej pi'c'anäg capxymidoogixy ytaj yteedy. Ca' huaad m'octundigóoygixni jadu'n nej anajty mdundigoogixy co anajty ca'ni mnejhuüyigixy Dios ytiy'ajt. ¹⁵ Oyjot oyhuinma'ñ ajcxy myajtunipy jadu'n nej Dios oyjot oyhuinma'ñ yajtuñ, je huidibi ti xyhuin'ixy ajcxy. ¹⁶ Com jadu'n ymiñ jaybety ma Dios ñecy,

jadu'n Dios migapxy je' yjāy: "Mi'idip ajcxy oyjot oyhuinma'n jadun nej iich nmi'ityich oyjot oyhuinma'n."

¹⁷ Miich ajcxy m'ojadajtpy je Dios Teedy. Dios ca'p tzaachytuna'n yi jāy ajcxy huin'ixpety. Hue' je' chaachytunipy ajcxy nidūg nidūg jadun nej ajcxy yhuinma'nymiidity, pen jibic-huinma'n ymūd, chi tzaachytunipy nigi. Paady ycixp tiydudāgy ajcxy mdzināhuipy. Tzigi'yigix Dios. ¹⁸ Je Dios canan hue' ti xyajpocyñihuaatzim co ti cojuy iich ajt nbocy miid oori o plata, jadun nej anajty nbocytuunim co nmijpidaacim n'ap ndeedy y'ayuc ytiy'ajt huidibi ca' ytiy'ajitity. ¹⁹ Hue' janchtiy Dios ti xyajpocyñihuaatzim miid Cristo co y'o'cy cruudzcixy, e chi nī'py teemy yojcy miid iich ajt nbocy ycixpi. Jadun nej anajty Israel jāy ñayajpocyñihuaatzigixy co yaj'ōgy tūg boregi ung, huidibi ca' anajty ti jibicpi miidity, e chi nī'py teemi cuji. ²⁰ Jadun nej Cristo y'o'cy miid iich ajt nbocy ycixpi, Dios jayijpni jadun yajnihuinmayi co jadun tuna'n, ca'ni anajty naaxhuiñybi chondāgy. Jecy'ajty ca'ni anajty pin nehuñy, e jadachambi Dios ajt ti xyajnejhuñyim. ²¹ Paady ycixp miich ajcxy mijpidāgy Dios. Dios yajjuygipijc huinjemy je Cristo co y'o'cy, e Cristo cōmay ooy ypidzimy jibiy tzejpjtoty. Yajmij'ajtcix Dios etz jip'ijxcix co Dios xyajnidzōgaanip ajcxy m'alma.

²² Ti myajhuaatzcixy mjt mhuinma'n co ti mmijpidaaccixy Dios ytiy'ajt. Naychōjicigix nayjihuiyigix nidūg nidūg cixyjt huinjot, ca' y'ametz yjotmetzity. ²³ Com ti Dios oyduñ miich ajcxy mjt mhuinma'n huinjemybi miid yi' y'ayuc ytiy'ajt, co ti mmijpidaaccixy je tiy'ajt huidibi tudāgyip, je huidibi ca' ycixy ytigoy, huidibi huinixi ijt, je tiy'ajt huidibi jugy'ajt yejcyp. ²⁴ Jadun ymiñ jaybety ma Dios y'ayuc:

Je jāy ninīcx nidigooyb yi' etz je ninīcx y'oy'ajtin nidigooyb yi'. Tim jadun nej tūg pijy co ñidecy ytiitzi, chi je pijy jadun'ñyi yca'ni, e chi jadun'ñyi je pijy y'oy'ajtin ytigooy.

²⁵ Dios y'ayuc ytiy'ajt huinixi y'ity, ca' ycixy ytigooy nimina.

Jada je ayuc je tiy'ajt huidibi Dios yjāy ycapxhuācxyp ma miich ajcxy.

2

¹ Paady ycixp copicy co m'ixmājtzcixipy yi jibic-huinma'n nej migūg ajcxy jibic mni-gapxcixy. Ca' m'anūdaaccixipy. Ca' ajcxy mnaybidāgyib jadun nej jihuñy ooy m'oyjāyity, e ca' yjanchity. Ca' mmigūg ajcxy ti myajca'oy'ixipy. Ca' ajcxy m'iidigoyipy mgapxtigoyipy. ² Jadun nej yi ma'xungdijc tzocy chīdz, nañ tim jadun miich ajcxy tzejccixy jot'ajtcixy Dios y'ayuc ytiy'ajt, jigix jēbi ca'pxy yi mhuinma'n mi'idipy ajcxy miid je ixpijcin huidibi Dios xymooygixp, e chi ajcxy m'alma paadipy nīdzocin. ³ Nīdzōgip miich ajcxy m'alma, peni janch ti mmijpidaaccixy je Huindzin Jesucristo y'ayuc, etz ti mnejhuñyigixy nej Dios may'ajt oy'ajt ti tuñ miid miich ajcxy ycixpi.

Cristo je tūgpajcpi jaccopicyip

⁴⁻⁵ Yajmij'ajtcix yi Huindzin Jesucristo. Dios ti yhuin'ixyii jēbi yHuindzin'aty ma naax-huiñyāy etz ooy tzocy. Yi naaxhuiñyāy ca' ajcxy ti tuñcuend, tim jadun nipaady nej tūg tzaa huidibi pojtzpidijc ninigoob ca' yajtuna'n ma yi tzaadijcy ycojy. Yajmij'ajtcix miich ajcxy je Huindzin Jesucristo. Dios yaj'oyi huamby miid miich ajcxy tūgpicy jāy huidibi yi' yjāy'adaanip, huidibi ojadadaangixp Dios, huidibi Dios ytung tunaangixp. ⁶ Jadun yjaybetyity ma Dios ylibro, Dios jadun ymina'n:

Jim ma Israel jāy nbidāgibich tūg mij'ane'mbi huidibi ti nhuin'ixyich, huidibi ooy ndzocyich, e pinjaty je' mijpidacp ooy njāygidāgibich. Je mij'ame'mbi jadun je' nipaady nej tūg tzaa oybi huidibi tigihuamb ma tijctaatz co tzaadijcy ycojy.

⁷ Miich ajcxy huidibi mijpidacp Jesús, miid miich ajcxy je mij'ame'mbi ooy je' ymijity yjanchity. Per yi' ajcxy ca' mijpidāgy Jesús, je' yi' ajcxy ycuydumyb nej ymina'n ma jaybetyity:

Pinjaty ca' capxymidohua'n Dios, ca' ajcxy ixaangixy je Cristo, e jadun ajcxy nipaady nej pojtzpidijc huidibi ca' yajtunaangixy tūg tzaa oybi co tzaadijcy cojixy. Yi Cristo yi' je' je mij'ane'mbi huidibi ane'mdāhuamb tūg'ōciy.

⁸ Nañ jadun yi' ajcxy huidibi ca' mijpidāgy Jesús cuydumyb nej ymina'n ma yjaybetyity:

Jadun je Cristo nipaady nej tūg tzaa ma jāy ajcxy ycōnejpcixy etz ycidaagixy. Je jāy ajcxy huidibi ca' mijpidāgy Jesús, jadun nipaady nej jihuñy ycōnejpcixy ma tūg tzaa co ajcxy ca' tungixy cuendi Jesús y'ayuc, paady ycixpi padaangixy tzaachyp miid ypocy ycixpi, jadun nej Dios ti yajcōducy.

Je huidibi Dios yjāy'adyii

⁹ Miich ajcxy huidibi yajmij'ajtp Jesucristo, ca' miich ajcxy mjadu'nity nej yi' ajcxy huidibi ca'capxymidoy Dios. Dios miich ajcxy ti xyhuin'ijxcixy. Je rey Jesús je' miich ajcxy ytung mduunip. Oyjot oyhuinma'n miich ajcxy myajtumyb. Dios miich ajcxy xyjāy'ajtip. Miich ajcxy je' xypaat mnidiy'ajt'adipy jadun nej Dios ti xyajpidzimigixy ma anajty mdundigoogixy, e ti xyajhuinjihuiyigixy je' ytiy'ajt nej jēb huaad mguydungixy.

Jadu'n nipaady nej jihuŷy Dios ti xyaŷtzoongixy agootztuuyb, e ti xyaŷtŷigixy ma ytiŷxy yjajy. ¹⁰ Co anajty ca'ni mmijpidaaccixy Jesucristo, ca' anajty Dios xytungixy cuendi. Cham co ti mmijpidaaccixy Jesucristo, Dios ti xypa'ayoogixy. Dios miich ajcxy xyjāy'ajtp cham.

Yajtungix Dios y'ayuc ma mdzinaayin

¹¹ Migütjic ajcxy huidibi ooy ndzocy njihuŷyich, jada nyajnimaaaygixp, jadu'n nej tūg adzinaaybi huidibi ca' chināy ma ycajp, huidibi nihuidijtp, ca' tūg it mdzinaaygixy, copicy co ca' mnijot'adipy ajcxy yi jibic-huinma'n, jadu'n nej je jāy ajcxy ma m'adzinaaygixy nijot'ajtcixy jibic-huinma'n. Je jibic-huinma'n ca' űaygodigiiygixy mūd oyhuinma'n. ¹² Tiydudāgy mdzināhuipy ajcxy, yajtungix oyhuinma'n mūd je jāy ajcxy ma miich ajcxy m'adzinaaygixy, je jāy ajcxy huidibi ca' nejhuiygixy Dios ytiy'ajt. Oy ajcxy ca' xy'ixaangixy etz jibic xyűigapxcixy xyűi'ojiiygixy, mūd co oyjāy'ajtin mdungixyp, chi ajcxy jāygidāgipy, etz miich yi' ajcxy xycapxpātcixipy ma Dios, mina anajty Dios űinmiűyii ajcxy.

¹³ Mūd je Huindzin Jesucristo ycixpi, capxymidoogixy tūg'óciy gobierno tungmūdipi etz cājp tungmūdipi y'ane'min ycōtujcin, naű capxymidoogixy jadu'n nej je mij'ane'mbi y'ane'my. ¹⁴ Naű capxymidoogix tungmūdipi ajcxy huidibi je mij'ane'mbi yquejxyp jigix tzaachytunipy je' ajcxy huidibi tundigooyb etz capxpaadipy je' ajcxy huidi oyhuinma'n ytumyb. ¹⁵ Dios chojcyp co tiydudāgy mdzināaygixipy, jigix jēbi je jāy ajcxy huidibi ca' huijnihuŷyigixy Dios ytiy'ajt, huidibi tzuu huinma'n mūd, ca' ajcxy mihuinma'űybaady nej jibic xyűigapxp.

¹⁶ Tzinaaygix jadu'n nej jāy chināy huidibi cuydumb Dios ytiy'ajt, huidibi ti ixmach yi ayuc tiy'ajt huidibi ca' ytiŷyity. Pen mmidundigooyb ajcxy tunmūdipi y'ane'min ycōtujcin, ca' huaad mnaybidaacigixy jadu'n nej jihuŷy Dios xylugarmoogixy jigix jēbi mdundigoogixy. Copicy mdzināhuipy ajcxy jadu'n nej Dios ytumbi huidibi oy tumb. ¹⁷ Migūg'adii ajcxy tūg'óciy jāy. Naychōjcigix nayjihuŷyigixy nidūg nidūg huidijaty yajmij'ajtp Dios. Yajmij'ajtcix Dios. Capxymidoogix yi mij'ane'mbi.

Jadu'n nej Cristo tzaachypi yajnajx

¹⁸ Tumbidijc ajcxy, imidoogix capxymidoogix mhuindzindijc. Pen oyjāy yi mhuindzin huidibi yung naxy yjot yhuinma'n mūdity, o pen ahua'njāy jibicjāy, ca' yűejity, capxymidoogix. ¹⁹ Yjāygidāgipy Dios pen mmecxtujctaaygixyp nej jāy ajcxy xychaachytungixy mūd co oyhuinma'n miich ajcxy mmidity. ²⁰ Pen ti anajty mdundigoogixy, e paady anajty myajtzaachytungixy, ca' pin xycōmāaygixipy xycapxpāadygixipy, oy ti mjamecxtujctaaygixy huidijaty tzaachypi. Pen ooy mdungixy etz tzaachypi mbaatcixy, chi janchtiy Dios jāygidāgipy nej mmimecxtujctaaygixy. ²¹ Dios chojcyp co mmecxtujctaaygixipy je tzaachypi huidibi mminajxyp myajnajxcixyp mūd co oybi mdungixy. Paady ycixpi je Cristo tzaachypi ayo'n minajxy yajnajxy mūd iich ajt ycixpi, e yejc iixpejt jadu'n nej jēbi huaad mminajxcixy myajnajxcixy tzaachypi ayo'n, naű nej jēbi huaad mbanicxcixy mbayōygixy yi' y'ixpejt. ²² Je Cristo ca' je' ma ytundigooy, e naű ca' pin hui'niiű. ²³⁻²⁴ Je Cristo co jāy ajcxy y'oji, ca' je' y'adzouhuimbijty; e co jāy ajcxy chaachytuuni, ca' mijotmāthuimbijty je jāy ajcxy, nāgi Dios yajpuhuaniiy. Com Dios je' paatip nej chaachytuna'n huidi ajcxy tundigooyb. Je Cristo ci'm yajnicx iich ajt ndzaachypi co y'o'cy cruudzcixy. E mūd co jadu'n y'o'cy cruudzcixy mūd ajt nbocy ycixpi, chi jēbi n'ixmajtzim jibic-huinma'n etz tudāgy jēbi ndzinaayim. Mūd co Cristo je tzaachypi minajxy yajnajxy mūd iich ajt nbocy ycixpi, paady nidzoocim ajt n'alma. ²⁵ Miich ajcxy jecy'ajt mūdigooyb mdūdigooyb anajty ajcxy ma Dios, mgi'mhuinma'n anajty ajcxy myajtumyb nidūg nidūg, jadu'n nej jāy yborregi űiidoogoy ytūdigoy ma yuugjot. Cham miich ajcxy ti mnijothuimbijtcixy Dios, ti ajcxy mhuinma'űymech ti mmijpidaaccixy Jesucristo je huidibi xycuend'ajtp ajcxy.

3

Nej huaad chinaaygixy pinjaty ti pijccixy

¹⁻² Jadu'n nej tumbidijc capxymidooy yhuindzin, naű tim jadu'n miich ajcxy tōxyjāydijc capxymidoogixy műāy. Pen műāy ca' capxymidooy Dios, ca' mijpidāga'n Jesucristo, mūd co miich oyjot oyhuinma'n myajtunipy mūd yi', ycadimjetyity hui'n'it műāy yhuinma'űymedzip etz mijpidāgipy Jesucristo, co y'ixipy nej miich mmidity tudāgy'ajtin. ³ Tōxyjāydijc ajcxy, mūd mnaygōmayiűb mūd mhuit mxoŷx oyjatpyi tzoujatpyi, mūd oori cūjūt etz oori taatztiy, mūd co mgōhuay mdzachcūdigy mūd cūd oyjatyp. ⁴ Hue' janchtiy jāy miich ajcxy xycōmayip mūd co oyjot oyhuinma'n anajty myajtungixy, mūd co yung naxy mjot mhuinma'n ajcxy mūdity. Co jadu'n mdungixipy jada je' oy jāygidaacni ma Dios hui'nixi. Yi mhuit yi mxoŷx etz oori taatztiy cixip tigoyip yi'. ⁵ Naű tim jadu'n anajty jecy'ajty je tōxyjāydijc huidibi anajty ajcxy cōmay iűtp, yajtuuű anajty ajcxy oyjot oyhuinma'n, ymijpidacy anajty ajcxy Dios, naű

ycapxymidooyb anajty ajcxy ñäy. ⁶ Jadu'n nej Sara capxymidooy Abraham. Sara xiiigoyäxy Abraham: "ñich nhuindzin." Pen myajtumyby miich ajcxy oyjot oyhuinma'ñ jadu'n nej Sara, jadu'n miich ajcxy anajty nej jihuüy Sara ajcxy xy'ung'adyi, pen ooybi mdunipy ajcxy, ca' ti ajcxy mdzigihuipy.

⁷ Nañ jadu'n miich ajcxy yëydijctijc, yajtungix pa'ayo'n miid mdöxyijc, yajmij'ajtcix. Com jac mic miich ajcxy ca'ydi yi töxyjäydijc. Dios may'ajt ti tuñ tü'ciy miid miich ajcxy, paady ycixpi copicy yajxon naymiiddzinäayigix jigix Dios cuendipigipy etz xymöhuipy tijaty ajcxy myajmibijctzooyb.

Co pinjaty xymidundigooy, ca' myaj'ahuimbidity

⁸ Jada ayuc cham njacyajnimaydaayb nidüg'ócüy miich ajcxy. Tú'ciy mjet mhuinma'ñ mi'ijtcix, naymigüg'ájtigix yajxon, naychójcigix nayjihuüiyigix nidüg nidüg, nayba'ayouhuigix nidüg nidüg, pidaaccix yung naxy mjet mhuinma'ñ. ⁹ Co ajcxy migüg xymidundigopy, ca' myaj'ahuimbidity jadu'n nej anajty ti xytuñ. Co ajcxy migüg xyñi'ojihuipy, ca' myaj'ahuimbidity jadu'n nej anajty ti xyñi'ojiy. Nigi nibijctzohui' ma Dios miid yi' ajcxy ycixpi, nigi mi'oyjäy'at mmigüg. Huin'it nigi Dios xyconuucxip. ¹⁰ Com jiihy ymiñ jaybety ma Dios ñecy:

Pinjaty jotcujc tzinähuamb e yajnaxa'ñ xii tiempo agujc jotcujc, nay'ahuijtzigüib ca'ydi y'idigooy ycapxtigooy, ca'ydi y'aniidägy.

¹¹ Huen jihuägy ma je jibicpi e huen oyjäy'ajtin tuñ. Huen ixmach tüg'ócüy tzicapxy, ca' tzicapxy ixtähuipy.

¹² Je Huindzin Dios ycuend'ajtpy yi' je jäy huidibi tiydudägy tzinaayb etz ypubejtcixyp ypuedigygixyp migügtijc co tijaty mibijctzoy. Dios ymijotma'tpy je jäy ajcxy huidibi jibic-huinma'ñ tumb.

¹³ Pen mdumyby oyjot oyhuinma'ñ ajcxy, huin'it ca' pin ajcxy xymijotmädiy. ¹⁴ Co oyjot oyhuinma'ñ myajtunipy ajcxy e huin'it jäy xychaachtungixy, huin'it Dios xyconuucxip ajcxy, e ca' mdzigüygixy, ni ca' mhuinma'ñdigooygixy. ¹⁵ Mijpidaaccix yi Jesucristo ñich ajt nHuindzin Dios cixyot huinijot. Pen ji jäy xy'amidoogixy: ¿Ti co mdzachmijpidaaccixy Jesucristo? Tiydudägy m'adzouhuipy miid yung'ajt nax'ajt jadu'n nej mijp'ijxcixy co Jesucristo xyajñidzogaani ajcxy yi m'alma. ¹⁶ Ca' mgapxipy ajcxy je ayuc huidibi xya-jtzo'yduunip. Pen jäy ajcxy xymi'idigooygixp xymigapxtigooygixp, chi ajcxy jihuihuamyb tzo'ydu'n miid co ca' yjanchity nej ajcxy ymina'ñ com oybi anajty ti mdungixy. ¹⁷ Pen Dios miich ajcxy jadu'n xyajñijot'ajt co tzaachyp mminájxcixipy myajñájxcixipy, jac'oy co tzaachyp mminájxcixipy myajñájxcixipy miid yi m'oyjäy'ajtin ycixpi, e ca' anajty tzaachyp mminájxcixy myajñájxcixy miid co anajty ti mdundigooygixy.

¹⁸ Je Cristo nañ jadu'n tzaachyp minajxy yajnajxy co y'o'cy cruudzcixy miid jäy ajcxy ypocy ycixpi. Oy je' anajty ca' tibocy miidity, chi je' ti codinäy je jäy ajcxy ypocy, e jadu'n ñich ajt ti naymi'oyñiyim miidi Dios. Oy je Cristo ñinix y'o'cy, per je' y'alma ca' je' y'o'cy, jugypijc je' jadütecy miid jembyb ninix. ¹⁹ Huin'it co Cristo y'o'cy, chi je' y'alma ñicxy, e capxhuäxy yi' y'ayuc ma jäy y'alma ajcxy huidibi jibictuuby ijt. ²⁰ Je jäy ajcxy je' jiihy y'alma ijt jibictuuby huidibi anajty ca' capxymidooy Dios. Je taab Noé yajcojy je mij barco, ooy Dios ajcxy jecy ymamecxtujci, huen tijy cayjothuimbijty ajcxy. Jëyi niductujc je jäy choocy ma je mijtuu je mijniigom. Je' co je jacjadyi ca' ajcxy yjothuimbijty. ²¹ Jadu'n nej je niductujcpi ajcxy mijpidacy Dios y'ayuc, e chi ajcxy choocy, nañ tim jadu'n ñich ajt co nniibejtim je' ñich ajt ndiy'ajt'ajtim co nmijpidaacim Jesucristo je huidibi co y'o'cy jugypijc miid jembyb ninix, etz ti xyajhuaatzim njot nhuinma'ñ jigix ooy oy nayjihuüiyim, etz nañ jadütecy co anajty n'o'cim xyajjugypijcim miid jembyb ninix. Co nniibejtim, je' je' je tiy'ajt co Dios ti xyajhuaatzim njot nhuinma'ñ. ²² Je Cristo ti je' ñicxy tzajpjoty. Jiihy je' cham y'ity mij'ane'mbi ma Dios, yi' je' ane'mb je ángeles ajcxy huidi tzajpjoty tungmiid etz huidijaty mic'ajt miid tzajpjoty.

4

Yajtungix je mic'ajt huidibi Dios ti xymooygixy

¹ Je Cristo ayo'n tzaachyp minajx yajnajx co yhuidijty ya naaxhuiñybi, e chi yajtuuñ oyjot oyhuinma'ñ miid jäy ajcxy ycixpi. Paady ycixpi copicy miich ajcxy myajtunipy oyjot oyhuinma'ñ miid migügtijc jadu'n nej Cristo yajtuuñ. Pen miich ajcxy mminajxyp myajñájxyp tzaachyp miid co oyjot oyhuinma'ñ myajtuñ, chi ca' mjacnijot'ajtip ajcxy jibic-huinma'ñ. ² Jadu'n nej ajcxy mjaactzinähua'ñ mjaacjy'ada'ñ, ca' huaad mjacnijot'ajtcixy je jibic-huinma'ñ. Hue' janchitiy mdunipy ajcxy jadu'n nej Dios tzocy. ³ Jecy'ajty co anajty ca'ni mnejhuüiyigixy Jesucristo ytiy'ajt, jibic-huinma'ñ anajty ajcxy myajtumyby ma mdzinaayin mjogy'ajtin, jadu'n nej jäy ajcxy jacjadyi huidibi ca'ni nejhuüiyigixy Dios ytiy'ajt. Chi anajty

myajtungixy canaagnax je jibic-huinma'n, ooy ajcxy mnijot'ajtcixy maynax jibic-huinma'n. Ooy anajty anaxy mdzach'uccixy vino, huin'it anajty ooy ajcxy ymügii. Ooy anajty mnixondaaccixy coodz huididi, huin'it anajty ooy m'uuccixy anaxy. Ooy mnijot'ajtcixy xii, ooy anajty m'ojadajtcixy tzaadzech quipychex huidibi Dios ca' jäygidägy. ⁴ Paady ycixpi je jäy ajcxy huidibi ca' nejhuiyigixy Dios ytiy'ajt, ca' ajcxy jäygidägy co ca' miich ajcxy cham jadu'n m'idich jadu'n nej yi' ajcxy y'idich, chi ajcxy jibic xynigapxcixy xyñi'ojiiygixy. ⁵ Ca' mdungixy cuendi yi' ajcxy, com Dios paatip nej ytiyduna'n ajcxy. Je Dios je' tiydunamb nidüg'óciy jäy ajcxy huidibi cham jugy'ajtp, etz tiibi y'óccixy. ⁶ Paady ycixpi ti yajnimäy Jesucristo ytiy'ajt je jäy tiibi y'óccixy jigix yajtiydunipy ajcxy müd Dios ytiy'ajt jadu'n nej yajtiyduna'n yi' ajcxy huidibi jacjugy'ajtp cham. Jëbi huaad ajcxy yjugypijccixy jadügtecy etz y'idipy ajcxy jadu'n nej Dios y'ity.

⁷ Ti ytimyhuingoni je xii je tiempo mina ycixaani ytigoyaani tüg'óciy tijaty ya naaxhuiñybi. Paady ycixp tzocy co tiydudägy etz huijycujc mdzinaygixipy, etz tzocy co mjac'ojadadipy mjacmibijctzoohuipy ajcxy Dios. ⁸ Ooy ycopicyity co jacnaychócgixy jacnayjihuiyigixy nidüg nidüg. Müd co mnaychócgixy, paady ycixpi jëbi mnayméecxigixy. ⁹ Naymi'oyjäy'ajtigixy nidüg nidüg agujc jotcujc, ca' y'ametz yjotmetzity. ¹⁰ Yajtungix müd je migügtijc jadu'n nej Dios xymooygixy ixpijcin nidüg nidüg. Naybubéjtigix naybudigiiygixy miñ xyipy jadu'n nej jäy ajcxy huidibi yajxon Dios ytiy'ajt padungixp. ¹¹ Pen Dios ti xymooygixy ixpijcin jigix jëbi capxhuäcxy yi' y'ayuc, yajxon Dios y'ayuc mgapxhuäcxi. Pen miich xypaat pujiigü jëdzigi, yajxon mdunipy ajcxy jadu'n nej Dios huinma'n ti xymooygixy. Co yajxon Dios ytiy'ajt mguyduunipy, huin'it Dios cómay'a'n miich ajcxy, müd co ti mmijpidaaccixy Jesucristo. Je Jesucristo je' cómay'idip etz ane'nip huinixii huin'itempo.

Mimecxtujccixy tzaachypi ayo'n

¹² Migügtijc ajcxy huidibi ooy ndzocy njihuiyich, ca' ooy mhuinmay'ahuidijtcixy co jäy xy'ixhuidijtcixy xypahuidijtcixy, co jäy xychaachytunaangixy jigix jëbi ñiguëxigipy pen janch mmibijccixy Jesucristo. ¹³ Ca' ajcxy mdajipy mmayipy, jotcujc ajcxy mnayjihuihuiyb jigix jëbi nañ jadu'n tzaachypi mmajajxcixy myajnajxcixy nej Cristo minajxy yajnajxy tzaachypi. Co anajty jadügtecy Jesucristo ñayguëxigiyi ya naaxhuiñ müd ymic'ajt y'oy'ajt, jëbi ajcxy jotcujc mnayjihuihuiyb. ¹⁴ Pen xymi'idigooyb xymigapxtigooyb jäy ajcxy, müd co miich ajcxy ti mmijpidaaccixy Jesucristo, jotcujc mnayjihuihuiyb, müd co miich ajcxy müd je Dios yjihuiñ etz Dios ymic'ajt ma mjet mhuinma'n. ¹⁵ Pen nidüg miich ajcxy ayo'n tzaachypi mbaatcixy, oy ca' anajty ti mjäy'aj'óccixy, oy anajty ca' ti mmeetzcixy, oy anajty ca' ti mdundigooygixy, oy anajty ca' ti mnaybidáacigixy ma huingjäy ti ytundigooy, ¹⁶ pen miich ajcxy tzaachypi mmajajxyp myajnajxp müd co ti mmijpidaaccixy Jesucristo, ca' ti tzo'ydu'n mjihuihuiyb, nigi Jesucristo cómay'idipy.

¹⁷ Ti xii tiempo tim paatni mina Dios tiyduna'n je jäy ajcxy huidibi cuydumb je' ytiy'ajt. Pen Dios iich ajt huidi nmibijcim xytiyduunim e nbaatim hueeni tzaachypi, nigi tzaachypi padaangixy ajcxy huidibi ca' mijpidaaccixy Dios. ¹⁸ Pen je jäy huidibi oyjot oyhuinma'n müd mic tzaach padaangixy je' y'alma nidzoocin, zti jada ytunaangixy pinjaty jibic-huinma'n müd, pinjaty pocytungix? ¹⁹ Pen tzaachypi mmajajxyp myajnajxyp ajcxy müd co Dios jadu'n chojyp, ca' ajcxy mjetmetzcihuipy, nigi ajcxy panicxcix payöygix oyhuinma'n, nigi cixyot huinijot mijpidägiipy ajcxy Dios; com yi' miich ajcxy xyajcoj, e yi' xycuend'ajtcixp; com Dios yi' je' tudägy etz ñidinaayb je' y'ayuc.

5

Pedro capxhuip je mibijpidijc

¹ Jada iich miich ajcxy yajnimaaayb huidibi nigohuajc'ajtp je mibijcpidijc, iich nañ jadu'n nigohuajc'ajtpyich mibijcpidijc. Iich n'ijxyich co je Cristo ayo'n tzaachypi minajxy yajnajxy. Nañ jadu'n iich yi' nmüd'idaamybich jadüg'oc co anajty ymiñ ya naaxhuiñ müd y'oy'ajtin ymiñ'ajtin. ² Jada iich miich ajcxy nyajnimaaayb: yaj'ixpijccix etz cuend'ajtcix Dios yjäy agujc jotcujc. Ca' myaj'ixpigipy ajcxy ametz jotmetz, cuend'ajtcix Dios yjäy, tim jadu'n nej jäy ycóbiy cuend'aty. Ca' meefigixy myaj'ixpigipy ajcxy. Müd oyjot oyhuinma'n myaj'ixpijccixy. ³ Ca' adzip ahua'n m'ane'mipy Dios yjäy. Hue' janchtiy ijxpejt oybi yejccix. Cuydungix Dios ytiy'ajt. ⁴ Co anajty Jesucristo, je huidibi nihiundzin'ajtaayb tüg'óciy, ñayguëxigiyi ya naaxhuiñ jadüg'oc, chi cómay miich ajcxy mbidzimipy. Tim jadu'n nej jäy ajcxy co y'iyigixy e co ymadaaccixy, chi cómay ypidzim ajcxy. Miich ajcxy cómay nañ jadu'n m'idipy huinixii.

⁵ Myajmij'adipy anäctijc ajcxy, je' ajcxy huidibi nigohuajc'ajtp je mibijcpidijc. Ooy ycopicyity co nidüg'óciy miich ajcxy mnayajmij'ajtigixipy miñ xyipy müd oyjot oyhuinma'n. "Dios ca' je' jäygidägy pinjaty amij agix jäy'ajtigixy. Dios ypubejtyp müd

y'oyjot pinjaty yung naxy yjot yhuinma'n m'iid." ⁶ Mgapxcöbigipy ajcxy tiydudägy Dios, je mij'ane'mbi, chi Dios xycömayipy mina anajty. ⁷ Mibijctzougix Dios m'iid tüg'óciy tijaty jotmay ajcxy m'iid'ajtyp, chi jëbi Dios xypubedipy xypudig'ihuipy ajcxy.

⁸ Huijycujc m'idipy ajcxy. Nixi' m'idipy ajcxy. Com je mujcu' huidibi xymiidzip'ajtim, ooy je' xy'ix'ijxim xypa'ijxim. Hue' xyajhuinma'ñydgoyaanim, tim jadu'n nej je caa co ixtay ti chüdaamyb. ⁹ Huindina' jijptina' ajcxy je mujcu'. Yi jacjadyii jäy huidibi mijpidaaccixy Jesucristo, nañ yminajxcixyp yajnajxcixyp tzaachyp i nañ jadu'n. ¹⁰ Co anajty ajcxy hueeni tzaachyp i m'ocyajnaxy, huin'it Dios xyaj'oyiipy ajcxy yi mjot yi mhuinma'n, xyajmibigip ajcxy yi' ytiy'ajt, xyajjotmicpigip ajcxy. Com Dios yi' je' huidibi may'ajt ti tuñ mijcajee m'iid nidüg'óciy jäy ajcxy. Yi' je' huidibi ti yaj'oyi nej jëbi cömay huinixi' n'ijtim m'iid Jesucristo jibiy tzejajoty. ¹¹ Huen Dios y'oy'ajtin etz ymij'ajtin idipy huinixi'.

Capxpoox'in yajnajxp

¹² Jada necy nyajniguejxy ajcxy m'iid Silvano iich ajt nmigüg huidibi ndiipyich co ooy yajmij'aty Jesucristo. Hueeni jada ayuc huidibi nyajnijayiyb, nañ ti nbidägyich necyjoty capxhuijin etz ti nbidägyich necyjoty yi Dios ytiy'ajt tudägy, nej Dios may'ajt oy'ajt tuuñ m'iid miich ajcxy ycixpi. Mijpidaaccix nigi Dios ytiy'ajt, ca'ydi mhuinma'ñydgooogyixy.

¹³ Je jäy huidibi ya Babilonia huidibi ajcxy yajmij 'ajtcixp Jesucristo, je jäy ajcxy huidibi Dios ti huin'ixy, xyajniguejxp ajcxy capxpoox'in. Nañ jadu'n Marcos iich nmigüg, je huidibi njihuüyibich nej jihuüy ngi'm'ung'adyiijich xyajniguejxp capxpoox'in nañ jadu'n. ¹⁴ Naygapxpóocxigix xic xon nidüg nidüg miñ xyipy. Je' je' je' tiy'ajt co mnaychójcigixy mnayjihuiyigixy miñ xyipy.

Jotcujc mnayjihuihuüyib ajcxy nidüg'óciy huidib yajmij'ajtp Jesucristo. Amén.

2 PEDRO

Yi Mimetzpi Necy Huidibi San Pedro Yajniguejx Yi Mibijcpidijc

¹ Hich Simón Pedro, tumbich ma Jesucristo ytung. Yi' xy'apóstol'ajtpich etz ngapx-huáčxpyich yi' y'ayuc. Cham ich miich ajcxy jada necy nyajnijayiiygixy huidibi ajcxy ti mbaatcixy mibijcin janch oybi, tim jadu'n nej ich ajcxy ti nbaatcixyich mibijcin janch oybi. Hich ajt nDios je Jesucristo huidibi xyajñdzooim ajt n'alma tudägy je', e tudägy ytuñ miid ich ajt niddüg'óciy. ² Huen Dios mijmay'ajt tunipy miid miich ajcxy, etz jotcuyc'ajtin xymóhuipy mijcajee, miid co tiy'ajt ti mbaatcixy ma Dios etz ma je Jesús ich ajt nHuindzin.

Je mibijcpidijc chinaayin jugy'ajtin

³ Dios miid je' ymij'ajt ti xymooyim tüg'óciy huidibi nyajmayajtim ma ajt njugy'ajtin, nej huaad nguyduunim yi' ytiy'ajt etz nej yi' huaad nyajmij'ajtim. Dios jadu'n mijmay'ajt tuun miid ich ajt ycixpi co ti xyajnejhuuiyim Jesucristo y'ayuc ytiy'ajt. Je Jesucristo ti xyhuin'ijxin jigix jébi nmüid'ajtim yi' ymij'ajtin y'oy'ajtin, etz jigix jébi nduunim oyjáy'ajtin nej Jesucristo tuuñ. ⁴ Dios ti xymooyim huidibi janch oydi'cni e janch copicyip jigix jébi miich ajcxy mbaatcixy Dios yjihui'ñ ymic'ajt huidibi xyajtzinaaygixy miid huadz jot huinma'ñ, etz jigix jébi miid jada ycixpi tiibi xyaj'ahuaniiyim, miich ajcxy mijjpyöyduutcixy je jibicpi huidibi naaxhuin'ijyay ajcxy ñjot'ajtcixyp. ⁵⁻⁷ Com Dios miid ymic'ajt ti xymooyim huidibi nyajmayajtim, paady ycixp miich ajcxy naymic'ixigixy co ajcxy mmibijcin mjacyajmijtigiiygixipy tudägy'ajtin; e miid mdudägy'ajtin mjacyajmijtigiiygixipy ajcxy Dios y'ixpijcin; e miid je Dios y'ixpijcin mjacyajmijtigiiygixipy yi' Dios yjihui'ñ ymic'ajt ma ajcxy mjot mhuinma'ñ huidibi miid mmimadägipy ajcxy yi' jibicjot jibic-huinma'ñ; e miid je mic'ajt ma ajcxy mjot mhuinma'ñ jacyajmijtigiihuipy ajcxy mecxtujcin; e miid je mecxtujcin mnejhuuiygixipy nej jéb huaad myajmij'ajtcixy etz mdzigiiygixy Dios; e miid je mecxtujcin mjacyajmijtigiiygixipy je tzojcin je jihuiyin miid migügtijc; e nañ migtigiihuipy nañ jadu'n je mibijcin nej jéb huaad Dios myajmij'ajtcixy etz nej jéb huaad cixy'jot huinijot mjacyajtungixy oyjáy'ajtin.

⁸ Pen ma miich ajcxy mdzinaayin mjugy'ajtin yajpattäy e ymijiy ymayiy, yi' mjugy'ajt ajcxy ca' yi' ñaadigí'aty; nañ ca' anajty ajcxy naadigí' ti mmibijccixy ich ajt nHuindzin Jesucristo, ti mnejhuuiygixy yi' y'ayuc ytiy'ajt. ⁹ Pin jada ca' capxymidooy tüg'óciy jadaayaabi capxhuijin ma yjugy'ajtin, jadu'n yi' nipaady nej tüg huiintzpi o huidibi y'ijxin con, ti jädigoy co Jesucristo ti yajpocyñihuaatzp. ¹⁰ Paady ycixp miich ajcxy migügtijc, naymic'ixigixy tungix tüg'óciy jada jigix mnejhuuihuipy ajcxy tydudägy co Dios ti xyajmibijccixy e ti xyhuin'ijxcixy. Pidaaccix mhuinma'ñ co jada tiy'ajt huen copicy, huen tictztigiiy ma miich ajcxy mjugy'ajtin. E pen mdumyb ajcxy jadu'n, nimina mgapocycägixipy. ¹¹ E jadu'n miich ajcxy myajmóhuipy tydudägy tigiycac mijpi ma ich ajt nHuindzin Jesucristo y'ane'my, je huidibi xyajñdzooim ajt n'alma. E yi' y'ane'min ca' ycixipy ytiyogipy nimina.

¹² Paady ycixp ich miich ajcxy jatymy yajjáymejtzcoodaangixy jada tiy'ajt. Oy miich ajcxy jada tiy'ajt mjaajtcixy mjanehuiiiygixy, e tudägy ajcxy mmibijccixy etz mmi'ijtcixy je tiy'ajt huidibi miich ajcxy cham miid. ¹³ Minaambich co yjanchity nami njactzinaayñich co ich miich ajcxy nmóhuipy capxhuijin. ¹⁴ Hich ajt nHuindzin Jesucristo ti xyajnejhuuiyich co tzojc n'ixmadzipyich jada njugy'ajtin (n'ögibich). ¹⁵ Paady ycixp naymic'ixyijich mictägy ma miich ajcxy co ngapxhuijicixy jigix co anajty n'ögich mjáymetziyib ajcxy tüg'óciy jada tiy'ajt.

Yi' ajcxy huidibi y'ijxy je Cristo ymij'ajtin y'oy'ajtin

¹⁶ Hich miich ajcxy ti nyaj'ixpicy je tiy'ajt maabi nHuindzin Jesucristo, jadu'n nej Dios ymij'ajt müidity, e jadu'n nej je' yhuimbida'ñ jadüg'oc ya naaxhuin'. E ca' ich ajcxy nyaj'ixpicy nigoo'ayuc anii'ayuc huidibi ci'm ti ngojyich ti nmaccixy. Miid ich ngi'mhuin ti n'ijxcixyich je Huindzin Jesús ymij'ajtin. ¹⁷ N'ijx ich ajcxy co je Dios Teedy mooy ajt nHuindzin Jesucristo oy'ajt etz mij'ajt. E nañ nmidooyich ajcxy ayuc choñ ma je oybi Dios y'it, xyñimaayi: "Jada je' ich n'ung huidibi ooy ndzocoyich njihuuiyich, e ooy jotcuyc najjihuuijich miid yi' ycixpi." ¹⁸ Hich ajcxy nañ jadu'n ci'm ti nmidoogixyich je ayuc huidibi anajty tzomb tzajpjoty. Jim ich ajcxy anajty quipxyi miid je Huindzin Jesús ma je amay gop.

¹⁹ Nañ jadu'n nmüid'ajtim je ayuc jac'oybi jactiiybi. Je' je' je tiy'ajt je ayuc huidibi ajcxy yjay je Dios y'ayucnajtzcaxiiybi jecy'ajty. Oy miich ajcxy oybi mduñ co m'amidoo'ijtcixy je oybi tiy'ajt maabi Jesucristo huidibi jadu'n nipaady nej tüg jün tiicxp agootztuum etz jadu'n nipaady nej je xii co yx'miydäy, etz jadu'n nipaady nej je mijmadza' jayhuixtucpi co ypidzimy. Jada tiy'ajt xycodüicxip ajcxy mjot mhuinma'ñ. ²⁰ Cuendtungix miich ajcxy jada: tüg'óciy je tiy'ajt, huidibi Dios ytiy'ajtmüdpí yejc huidibi ijtp jaybety ma Dios ylibro, ca' huaad pin yajñgejip miid yci'mhuinma'ñ. ²¹ Com je Dios y'ayucnajtzcaxiiybi camina je'

ajcxy ayuccapxhuáčxy müd yci'mdzojcin yci'mhuinma'ñ. Dios anajty ajcxy huin'ixyip jëbi ayuccapxhuáčxy müd Dios ycixpi com je Espíritu Santo anajty ajcxy mooyip ayuc huidibi ajcxy ycapxhuáčxyp.

2

Yi' ajcxy huidibi yaj'ixpijcp anü

¹ Per nañ ji anajty nañ jadu'n ayucnajtzcaxpiybi huidibi anajty ajcxy anüdaacp ma je Israel jäy. E nañ jadu'n yji'adipy ayuccapxhuáčxpi huidibi anü yaj'ixpigipy ma miich ajcxy. Je' ajcxy ayüch ameech yaj'ixpigipy yci'm'ayuc yci'mhuinma'ñ huidibi ajcxy yajhuinma'nydigooyipy je mibijcpidijc. Ymina'ñ ajcxy co ca' yjanchity je Huindzin Jesús y'ayuc, je huidibi yajnidzooc ajt n'alma, e jadu'n ci'm ñay'ayo'nmooyigixy müd Dios mic'amy.

² Mayjäy ooy panicxa'ñ je jibicpi huidibi ajcxy ytungixyp, e müd je' ajcxy ycixpi yajniägäpipy yajnimiydägipy ajcxy jibic je huidibi ajcxy cuydumb je tiybi ayuc, je Jesucristo y'ayuc oybi.

³ Müd co anajty tzach'adzojccixy meen, chi anajty xyhuimbijccixy xyhuimmeetzcixy müd ajcxy y'ixpijcin ca'p yjanchity. Per je pocycähuin ajcxy ahuijxip, ca' ma ñidzooy. Ti yjejcni maabi ajcxy ypocya'ni ma Dios. Dios tzaachytunüib ajcxy müd ypocy ycixpi.

⁴ Dios ca' je' huinmeecxy je ángeles ajcxy huidibi tundigooyigxp. Hue' janchtiy ycotijnajxtaayb ayoodactuuyb etz yajhui'my agootztuuyb, cadenijiy y'ijtcixy cuend'aty, ixti cooni anajty paady xü tiempo co anajty yajtiyduna'ñ naaxhuiñyäj müd ypocy ycixpi. ⁵ Nañ ni ca' Dios huinmeecxy je naaxhuiñyäj huidibi tundigooy jecy'ajty. Chi queexy ayo'nduu etz münigom ma je jibicjäydijc. Jëyi yajtzoocy je Noé huidibi capxhuáčx je tiy'ajt. Quipxy müd Noé yajtzoocy jahuixtuc y'amigütiyc. ⁶ Dios nañ jadu'n tzaachytuñ müd ypocy ycixpi etz yajhuindigoy müd jün metz cajp, Sodoma etz Gomorra, ixti cooni yajhui'my accuyjam jigix y'idipy je iixpejt ma je jibicjäydijc huidibi ajcxy jac'axam jactzinähuaam jacjugy'adam.

⁷ Dios yajtzooc je Lot, hue' je' anajty janch oyjäy, e janch ymüd anajty jotmay co anajty je jibicjäydijc ajcxy ixi chinaayin yjugy'ajtin janch jibic. ⁸ Jabom jabom anajty je Lot, je jäy oyjäybi huidibi anajty tzinaayb quipxy müd je jibicjäydijc, ni ca' anajty yjotcujc'aty co anajty ixy midoy nej anajty ytundigooyigxy je jäy ajcxy ca'pi ytuädäyity. ⁹ Dios müd mic'ajt jëbi nihua'ñ yajtzoöy pinjaty mibijccixp cixyot huiniñot co je mujcu' yjot'ixigixy huinma'ñ'ixigixy. Nañ jadu'n Dios mic'ajt müdity jigix jëbi yaj'ijtcixy je jibicjäydijc müd tzaachypy ayo'n, huidibi ymöhuaamy co anajty naaxhuiñyäj tiyduñ müd ypocy ycixpi.

¹⁰ Dios ymüd mic'ajt jëbi tzaachytunipy pinjaty tumb jibic-huinma'ñ nej ñinixc ni-jot'ajtcixy, e ca' ixaangixy je Huindzin Jesús y'oy'ajtin ymij'ajtin. Amij agix etz jotmic ajcxy nayjihuiyüi. Ytumb ajcxy yci'mjot yci'mhuinma'ñ. Ni ycatzigiigixy co oyñinej ajcxy ni'ojigixy pinjaty mic'ajt müd ma Dios ytung. ¹¹ Oy je ángeles ajcxy müdity mijcötujcin etz ane'min, ca'p je' ajcxy yjot yhuinma'ñ müdity nicxy ni'ojigixy ma Dios yhuinduu pinjaty mic'ajt müd ma Dios ytung.

¹² Per jadayaab jibicjäydijc ajcxy jadu'n ajcxy yi' nej iyujc, ca' yhuinma'ñ; nigoob ytimyhuidity etz yma'xun'ajtcixy jigix jäy ymadziy etz yaj'ögüiyb. Ñixicpy yajxiicpy ajcxy yi' huidib ca' huinjihuiy. Per nañ tim jadu'n ajcxy y'ögipy nej iyujc y'ögy ytigoy.

¹³ Cobadihuaangixy jadu'n nej ti ytundigooyigxy. Hue' nayjihuiyigxy capin yjadu'nity, yxondaaccixy tüg jaxicyjaty. Jadayaab jäy ajcxy pocy ypatcipy ajcxy yi' chinaayigxy yjugy'ajtcixy. Tüg tzo'ydu'n co ajcxy nañ jadu'n xymijyöybejtcixy ma m'amugiyigxy.

¹⁴ Co ajcxy huindxcixy töxyjäydijc, chi ajcxy ooy nijot'ajtcixy co müd tundigoya'ñ. Ca'p ajcxy chüpigixy y'anucxiyigxy müd pocytunü. Yajtundigooyigxy pinjaty amütizp ma mibijcin, ooy ajcxy yhuijity ycuicjty ycohuinma'ñity ma meen'adzoogii. Dios yajtigoyiib ajcxy y'alma. ¹⁵ Tigoyjäy yi' ajcxy, je' co ti ñidigajtcixy ti ytuädigajtcixy ma je tiybi je janchypi tiy'ajt. Je' ajcxy ypanicxy ypayöyp je profeta Balaam y'ixpejt, je Beor y'ung, co ooy ymeefyada'ñ anajty müd yjibic-huinma'ñ. ¹⁶ Chi Balaam oy yaj'oyüi ypocy tüg töxyburro, ycapxy jadu'n nej tüg jäy, e jadu'n je' yajhuáčxipy je profeta Balaam müd je' ylocihuinma'ñ.

¹⁷ Com jada jäy ajcxy ca' panicxcixy je janchypi tiy'ajt, paady ycixp jadu'n ajcxy nipaady nej tüg niipozojot ca'pi ñü müdity, etz jadu'n ajcxy nipaady nej joc huidibi poj yajyöyip (ca' ytu'y). Dios möhuib ajcxy tzaachypi müd ypocy ycixpi, idam ajcxy agootztuuyb huinixü huinitiempo. ¹⁸ Com ycapxyp ajcxy ayuc huidibi ca' choubaady. E müd je jibic-huinma'ñ ycixpi huidibi ajcxy chachnijot'ajtpy yajtundigooyigxy pinjaty tiibi choongixy ma je huidibi ajcxy tzinaayb müd jibic-huinma'ñ. ¹⁹ Yi' ajcxy yaj'ixpijcp je mayjäy co jëbi tungixy huentim ti huidibi ajcxy ñijot'ajtpy. Per yi' ajcxy huidib jibic-huinma'ñ yaj'ixpijcp, ci'm ajcxy ñay'ijtigixy pocypatcipy, je pocy tzach'ane'mb ajcxy yjot yhuinma'ñ, ixti jadu'n nipaady nej jihuiy ajcxy ane'my y'ity. ²⁰ Pinjaty ti ymibijccixy ti ñejhuuyigxy je Huindzin Jesucristo ytiy'ajt huidibi yajnidzoocp ajcxy y'alma, e jadu'n ti yjihuaaccixy ma je naaxhuiñyäj yjibictzinaayin yjibicjugy'ajtin, pen jadüg'oc anajty y'ayöyiyüip ma je jibicpi, e je jibicpi

ymimadägyi ajcxy, o'ctiy anajty nigi yhuim'gixy ca'ydi nej je jayijp'atypi. ²¹ Nigi oy co ixypy je' ajcxy ca' ytimnejhuuigixy je janchyp'atyi. Com ti ocnejhuuigixyp, e chi jada' y'ixtigihuaaccixy ma je huatzpi Dios ycötujcin huatzpi Dios ytiy'ajt tübi anajty y'ocjamöögixy. ²² Per je' yi' ajcxy ytimcuydumy nej je ayuc y'ity: "Je uc yci'm'ich ñihuimbijtpy, e je idzim huidibi namdzidaayb, nixy je' yajtznip yquintip mo'ntzjoty jadüg'oc."

3

Je Huindzin Jesús huimbidaamb ya naaxhuiñ

¹ Miich ajcxy migügtijc huidibi iich ooy ndzocyich ooy njihuüyich, jada je' je mmetzpi necy huidibi ajcxy nyajnijayiyb. Ma jada metzpi necy hue' iich ndzogañich co nya-huinmañymedzip ajcxy ma Dios ytiy'ajt müd jada capxhuijin huidibi ti njaayich. ² Ti nmijayiygixy jigix m'ajihuñhuuayb ajcxy je ayuc huidibi ajcxy pa'tcipy'aty ñajtzcapxiy je Dios y'ayucnajtzcaxxiybi ajcxy huidibi huadz yhuinmañ anajty ymüid. Nañ ajihuñyigixy je Huindzin Jesucristo je' y'ane'min huidibi yajñdzoozp ajt n'alma, je ane'min huidibi apöstoltijc miich ajcxy xyajñimaayb.

³ Nejhuuigixy miich ajcxy jada jayijp ma yam ca'ni yhuaad'ajtni mina naaxhuiñ yciixyp, miinip jäy ajcxy huidibi nixigip yajxigip huidibi Dios yjê'ajtpy. Chinaaygixy yjugy'ajtcixy anajty müd jibic-huinmañ huidibi ci'm ñijot'ajtcixyp. ⁴ Chi ajcxy ymina'nip: "¿Ti co mdzachmibijccixy co Cristo yhuimbidañ jadüg'oc ya naaxhuiñ? Nej ajcxy je' y'o'ctay je mij'ap je mijteedy, je'ni y'ijttäy tüg'óciy jadu'n nej naaxhuiñybi chondacy. Paady ca' yjanchity co je Cristo yhuimbidañ jadüg'oc ya naaxhuiñ," jadu'n yminaangixy. ⁵ Yi' ajcxy ca' huinjihuñhuaangixy cuendtunaangixy co müd Dios y'ayuc yi tzajp ji'ajtp anajty yi' tzachjeycip, e müd Dios y'ane'min huin'it je naax oy yguëxig y huidibi ijtp anajty ñijoty. ⁶ Nañ jadu'n müd Dios y'ayuc je jecy'ajtpy naaxhuiñyäj y'ayo'nbaty, ñijicxtay nidüg'óciy e ytigoyday ñijoty. ⁷ Per Dios müd yi' y'ayuc yaj'ijtpy jada naaxhuiñybi etz tzajp huidibi cham ji'ajtp ixti coon yajtigoydähuipy müd jin. Je jin huin'it je' nöctähuañ co anajty yhuaad'ajtni ma Dios tiydunañ je camadacpidijc je jibicjäydijc, etz yajtigoyañ ajcxy y'alma.

⁸ Jadügnax miich ajcxy migügtijc huidibi ooy ndzocy njihuüyich, ca' mjäydiagooygixy co ma yi Huindzin Dios, tüg xii jadu'n yi' nej tüg mil jimajt, e tüg mil jimajt jadu'n yi' nej tüg xii. ⁹ Ca' nminaanim co yi Dios yajhuacxiibaamyñi yi' mina cuydunañ huidibi yi' ti ahuanñy, jadu'n nej nijéjity jäy a'ixiiygixy. Dios yajtumy mecxtujcin müd miich ajcxy, com hue' yi' tzocy co ni tüg jäy ayö'n paadipy. Yi' chojcpy co nidüg'óciy jäy huen jothuimbijtcixy etz ixmajtzcixy pocyunüi.

¹⁰ Co anajty je Huindzin Jesús ymiñ jadüg'oc ya naaxhuiñybi chaachytunipy je' tüg'óciy jibicjäydijc, hue' je' ytunayb yjadiyb ma anajty ca' pin jip'ixy, jadu'n nej tüg meetzpi ymiñ coodz co meedzañ tijaty. Huin'it je tzajp yhuindigoydähuipy müd tüg ne'min jidijtin oychiyiyip. E tüg'óciy huidibi müd ndzinaayim njugy'ajtim toydähuip yi' müd jin, yi naax toydähuip yi', etz tijaty yajpatp ya naaxhuiñ toydähuip nañ jadu'n.

¹¹ Com tüg'óciy tijaty huidibi ji'ajtp yhuindigoydähuañ müd jin, paady yciixpi nigi copicy miich ajcxy co mdzinaaygixp tudägy e myajmij'ajtcixyp Dios. ¹² Ahuijxcix ajcxy je xii tzuu mina Dios anajty yajhuaad'aty co yajhuindigoyañ je naaxhuiñybi. Naymic'ixigix co tzojc yminipy yi jadu'mbi xii tzuu. Co yhuaad'ajtnip huin'it xii, je tzajp yhuindigoydähuip müd jin; je xii po', je pojx xemembi, je tuu enee jadu'ñyi yticxtähuipy yjyidähuipy jinoty. ¹³ Per iich ajt n'ahuijxim je jemybi tzajp jemybi naax huidibi Dios ti xyaj'ahuanñyim, tüg tzinaaydac janch'oybi ma ca' ti jibicpi.

¹⁴ Paady yciixp miich ajcxy migügtijc huidibi iich ooy ndzocyich njihuüyich, nami m'ahuijxyp miich ajcxy co Dios yajhuindigoyaanip jada naaxhuiñ, naymic'ixigix ma tüg'óciy ajcxy yi' mdzinaayin co mguydunipy ajcxy Dios ytiy'ajt jigix ajcxy Dios xypaadipy, ca' ajcxy ti tzip ti gapxy, ni ti jibicpi, e ni ti pocy, ac huadz jot huadz huinmañ anajty müd'ajtcixy. ¹⁵ Cuenditungix je mecxtujcin huidibi iich ajt nHuindzin Jesucristo yajtumy müd iich ajt jigix jébi xyajñdzoozim ajt n'alma. Nañ jadu'n yi', iich ajt nmigüg Pablo huidibi ooy ndzojcin, ti miich ajcxy xyñijayiygixy, jadu'n nej ixpijin Dios ti ymöyii ma yi' y'ayuc. ¹⁶ Ma tüg'óciy Pablo ñecy tübi xyajñigüjxcixy, jada tiy'ajt ti xyajmüidmydaaccixy. Nijéjity Pablo ñecy ooy chachchiphuinjihuñyñity, e nijéjity jäy ajcxy tigach ajcxy huinjihuñy Pablo y'ayuc, ca' ajcxy huinjihuñy nej Pablo yjamina'nañ. Huingjaty ajcxy ñigüej Pablo y'ayuc, e ci'm ñayyajhuinmañyidigöögixy.

¹⁷ Paady yciixp miich ajcxy migügtijc huidibi ooy ndzocy njihuüyich, miich mnejhuiydaaygix jada tiy'ajt. Nayguend'ajtigix ca'ydi jibicjäydijc müd y'anñ xyajñidigajtcixy xyajtügajtcixy, e ca'ydi m'ixtigihuaaccixy ma ajcxy mmibijcin jadu'n nej tiydudägy ti mmibijccixy. ¹⁸ Huen iich ajt nHuindzin Jesucristo huidibi yajñdzoozp ajt n'alma nigi may'ajt oy'ajt tunipy müd miich ajcxy, e nañ nigi yujcpedipy ajcxy yi' m'ixpijin ma yi'

ytıy'ajt. Huen Jesucristo cömay y'idıpy etz mı'idıpy oy'ajtin mij'ajtin jadachambi xii tiempo etz jadu'n nej xii tiempo miimb cidacp. Jadu'n ngapxycıxyıch. Amén.

1 SAN JUAN

Yi Jayjipi Necy Huidibi San Juan Yajniguejxy Je Mibijcpi dijic Nidüg'óciy

¹ Dios y'ayuc jiiyim anajty co naaxhuiñybi chondacy. E tiy'ajt nyejcypich jadu'n nej nmidooyich ci'm yi' y'ayuc, jadu'n nej n'ixyich miid ngi'mhuiñich, jadu'n nej nhuindixyich yi' ci'm, e nañ jadu'n nej nnidoñich miid ngi'mgijich. Nyajnijayiybich miich ajcxy jada necy jadu'n nej je Cristo je Dios y'ung yjugy'ajtin yega'n huiidibi ca' cixa'n tigoaya'n niminaabi. ² Ti ñayguëxigyii ya naaxhuiñ je Dios y'ung huiidibi ymiid jugy'ajtin huiidibi ca' niminaabi ycixipy ytigoyipy. Ti n'ixyich ajcxy jigix jëbi tiy'ajt nyéjccixyich co ti ñayguëxigyii ya naaxhuiñ, etz ti n'ixyich jigix jëbi nyajnimaaigixy nej jëbi huaad huingbi jugy'ajtin nbaatim co anajty ti n'o'cim. Je Dios y'ung, je huiidibi jiiy bi ijt p ma Dios Teedy, nayguëxici je' ma iich ajcxy. ³ Je huiidibi iich ajcxy n'ixich nmidoñich, cham miich ajcxy nyajnimaaigixy jigix jëbi ajt tú'ciy n'ijtim ma Dios ytiy'ajt, etz nañ jigix jëbi tú'ciy ajt n'ojadajtim Dios etz je' y'ung. ⁴ Paady ycixp jada tiy'ajt nyajnijäyiy ajcxy jigix ajcxy jotcuji'ajtin mbattäyigixipy miid jada ayuc tiy'ajt.

Dios yi' je' je tücxin jájin

⁵ Jadayaabi Dios y'ayuc ytiy'ajt Jesucristo ti xyajnimäyich e nañ cham iich miich ajcxy nyajnimaaigixy. Dios huädz ytiy'ajt müdity, ca' ma Dios anüädgy. Jadu'n Dios nipaady nej tüg jün ytiçxy ma tüg it e ni ca' ni mina ypich. ⁶ Co nminaanim co Dios ajt müd n'ijtim tú'ciy, e ca' yjanchity, ca' anajty ajt Dios ytiy'ajt nyajtuunim, jadu'n nipaady nej jihuüy ndzinaayim agootztuun. Nigoo n'indaacim, ca' anajty ajt nguyduunim Dios ytiy'ajt. ⁷ Co nguyduunim Dios ytiy'ajt jadu'n nej yi' ytiy'ajt müdity, jadu'n nipaty nej jihuüy ndzinaayim ma jün ytiçxy. Huin'it jëbi ajt n'ijtim tú'ciy miñ xyipy, e Dios xyajpocynihuaatzäayim co Jesucristo y'o'cy etz ñi'py teemy guj müd iich ajt nbocy ycixpi.

⁸ Co ixipy nminaanim co ca' nbocytuunim, nigoob nayhuin'ñnim ci'm, e ca' jadu'n Dios ytiy'ajt yajpaady ma iich ajt njot nhuinma'ñ. ⁹ Pen ngapxyidzimim ajt nbocy ma Dios, yi' ñidinaayb yi' y'ayuc huiidibi ti xyajnimaaayim co ymexxamy ajt nbocy, e nañ tudägy ytuñ müd iich ajt ycixpi. Dios xyhuinmeexxim ajt nbocy etz xyajhuaatzim njot nhuinma'ñ jëbi n'ixmajtzim jibic-huinma'ñ. ¹⁰ Co ajt nminaanim co ca' nbocytuunim, hue' anajty Dios nyajnajxim anii, e ca' anajty ti ngöbjiçim cixyiot huinijot yi' ytiy'ajt.

2

Cristo, iich ajt nhuingapxpi ma Dios

¹ Miich ajcxy migügtijc huiidibi ooy ndzocy njihuüyich jadu'n nej ixipy ngi'm'ungich ngi'm'anäich, cham jada tiy'ajt nyajnijayiygixy, jigix ca' ajcxy mdundigöoygixipy. Pen ji nidügti miich ajcxy huiidibi tundigooyb, jada migüg huiidibi tundigooyb huen mibijctzoy Dios ma Jesucristo xii müd ypocy ycixpi. Jesucristo yi'je' huingapxp ma Dios Teedy müd ajt nbocy ycixpi. Tudägy je', e jëbi xyhuingapxim ma Dios Teedy. ² Com Jesucristo ti y'ögy müd iich ajt nbocy ycixpi, paady ycixp jëbi capx'oyiy ma Dios müd iich ajt ycixpi e xycapx'oyiyim iich ajt nbocy etz nañ capx'oyiyip tüg'óciy naaxhuiñy jay ajcxy ypocy, yi' jay ajcxy pinjaty yi' y'ayuc ytiy'ajt mijpidaacip.

³ Co Jesucristo ytiy'ajt nguyduunim yajxon, huin'it nejhuüyim tiydudägy jadu'n nej Dios may'ajt oy'ajt ti tuñ müd iich ajt ycixpi. ⁴ Co ixipy pinjaty ymina'ñ co ñejhuüyí Jesucristo ytiy'ajt e ca' cuychinaayy yi' ytiy'ajt hue' yi' tzach anüdaacpi, e ca' müdity Dios ytiy'ajt. ⁵ Yi' jay ajcxy pinjaty cuychinaayb cuyjugy'ajtp yajxon Jesucristo y'ayuc ytiy'ajt, janch tiydudägy anajty yajmij'aty Dios. Co nguychinaayim nguyjugy'ajtim yajxon Jesucristo ytiy'ajt, huin'it jëbi nejhuüyim co nyajmij'ajtim Dios. ⁶ Yi' jay ajcxy pinjaty minamb co ymiid Jesucristo y'ayuc ytiy'ajt ma je' y'ay yjot, copicy ajcxy chinäyigixipy jugy'ajtcixipy tim jadu'n nej Jesucristo chinay jugy'ajty.

Je jemybi ane'min

⁷ Miich ajcxy migügtijc huiidibi ooy ndzocy njihuüyich, ca' nminaanim jemybi tiy'ajt ajcxy nyajnimähuamy ma jada necy. Je' jada je tiy'ajt huiidibi jecy'ajty ti mnejhuüyigixy co oga'n ajcxy mmijpidacy Jesucristo. Jada tiy'ajt jecyip jada je' huiidibi cham ajcxy mmidooyb jadüg'oc. ⁸ Nañ jemy jada tiy'ajt nañ jadu'n huiidibi nyajnimaaigixyp ma jada necy. Jada je'je tiy'ajt huiidibi Jesucristo ymiid ma yjot yhuinma'ñ etz nañ iich ajt nmüd ma ajt njot nhuinma'ñ. Yi' jecyip ayuc huiidibi ca' ytiy'ajtiy, ti yi' ñaxy e cham Dios ytiy'ajt tiydudägy nyajtuunim, jadu'n nej jihuüy je coodzipi ti ñaxy e cham ti yximiiy.

⁹ Yi jāy ajcxy huidibi minam co Dios y'ayuc ytiy'ajt ajcxy cuyduuni e ca' ixānigixy ymīgūgtijc, ca' yī' ajcxy tiydudāgy Dios y'ayuc yajtuuni, jadu'n yhuimbizimy jadu'n nej jihuīy agoottzuuy ijtciy. ¹⁰ Yi jāy ajcxy pinjaty tzojcp jihuīyb ymīgūgtijc hue' yī' yajpaatciy miid Dios ytiy'ajt ma ajcxy yjot yhuinma'ñ, jadu'n nipaady nej jihuīy y'ijtcixy ma xī' ytiūcxy, ca' ajcxy ñiūdigoy ytiūdigoy ma Dios ytiy'ajt. ¹¹ Yi jāy ajcxy pinjaty ca' ymīgūg ixaangixy, ca' yī' ajcxy Dios ytiy'ajt ajcxy yajtuuni, jadu'n nipaady nej jihuīy agoottzuuy y'ijtcixy, ca' ajcxy chinaaygixy nej Dios ytiy'ajt yja'ané'migixy, ca' ajcxy nejhuīyigixy huidibi tiy'ajt jēbi yajtungixy, com jibic-huinma'ñ chachtuumb y ajcxy huidibi ca' Dios tiy'ajt'adyi.

¹² Miich ajcxy migūgtijc huidibi ooy ndzocy njihuīyich ajcxy jadu'n nej ixyipy ngi'm'ung ngi'm'anācich, com Dios ti miich ajcxy mbocy xyhuinmecxtayi co Jesucristo y'o'cy miid ajcxy mbocy ycixp, paady ycixp cham nnijayiygixy. ¹³ Cham nnijayiygixy miich ajcxy mij'anāctijc, com ti mmijpidaaccixy Jesucristo huidibi jii'ajt co naaxhuīnybi oga'n choondacy etz chambaad yjii'atyñi. Cham nnijayiygixy miich ajcxy anāctijc, com ti mmimadaaccixy je ca'oybi.

Cham nnijayiygixy miich ajcxy pi'ctijc mutztijc com ti mmijpidaaccixy Dios Teedy. ¹⁴ Cham nnijayiygixy miich ajcxy mij'anāctijc, com ti mmijpidaaccixy ajcxy Jesucristo huidibi jii'ajt co naaxhuīnybi oga'n chondacy etz yjii'atyñi chambaad. Cham nnijayiygixy miich ajcxy anāctijc, com mic mjot mhuinma'ñ miidity ajcxy etz Dios ytiy'ajt yajpatp ma ajcxy mjot mhuinma'ñ, paady ycixp ajcxy ti mmimadaaccixy yī' ca'oybi.

¹⁵ Migūgtijc, ca' anaxy m'adzójccixip yī' huidibi miid ndzinaayim ya naaxhuīñ. Yi jāy ajcxy huidibi adzójccixip anaxy yī' huidi miid ndzinaayim, ca' ajcxy Dios Teedy yajmij'ajtcixy. ¹⁶ Ca' anaxy m'adzójccixip ajcxy tūg'óciy huidijaty ya naaxhuīñ yajpatp, jadu'n nej njot nhuinma'ñ tzojcm, jadu'n nej tijaty n'ijxim, jadu'n nej huidibi amij agix miid ndzach-nayjihuīyim. Com yī' jadu'mbi huinma'ñ ca' yajpaady ma Dios Teedy, hue' yī' yajpaady ya naaxhuīñ. ¹⁷ Huidijaty ya naaxhuīñ yajpatp cixipy tigoyipy yī', nañ jadu'n ytigoya'ñ huidijaty yī' huinma'ñ y'adzójcyp. Yi jāy ajcxy pinjaty Dios ytiy'ajt yajtuunip jadu'n nej Dios tzozy, jugy'adipy ajcxy e co y'o'ccixipy, ca' ajcxy y'alma ytiğóoygixipy.

Je tiy'ajt etz je anī

¹⁸ Miich ajcxy migūgtijc huidibi ooy ndzocy njihuīyich nej ixyipy ngi'm'ung ngi'm'anācich, tim cixnīp tiempo ya naaxhuīñ. Ti jada mnejhuīyigixy co miinaam jāy ajcxy huidibi nayya-jnaxaanip nej Cristo' e ca' yjanchity. Miid co cham ji mayjāy ajcxy huidibi nayyajnajxip jadu'n nej Cristo, paady nejhuīyim co tim cixnīp yī' tiempo miid iich naaxhuīnyjāy ajt ycixpi.

¹⁹ Yi jāy ajcxy huidibi nayyajnaxaanip jadu'n ixyipy nej Cristo, naybiyc-huācxaanip yī' ajcxy miid iich ajt, ca' anajty ajcxy ytiğy yī' ajcxy yhuinma'ñ miid iich ajt nhuinma'ñ, tūgmucy ixyipy ajt xymiid'ijtim. Ji jadu'n ñiguēxigy co ca' ytiğy yhuinma'ñ miid iich ajt nhuinma'ñ co ti ajcxy xypuūctiutim.

²⁰ Ti miich ajcxy xy'adigiy xyjottigiy Dios yjihu'ñ ymic'ajt, paady miich ajcxy mhuinjuhuīy tūg'óciy Dios y'ayuc ytiy'ajt. ²¹ Ca' nminaanīm paady miich ajcxy nijayiygixy co ca' mhuinjuhuīyigixy Dios ytiy'ajt. Paady nnijayiygixy miich ajcxy jigix mnejhuīyigixyip Dios ytiy'ajt etz mnejhuīyigixyip co yī' jāy ajcxy huidibi indaaccp, ca' yī' ajcxy Dios ytiy'ajt miidity.

²² Yi' je' indacp huidibi minamb co Jesús ca' yī' yjējity je Cristo huidibi Dios yquejx. Yi indacpi je'midzip'ajtp Jesucristo etz ca' mibicy Dios Teedy etz nañ ca' mibijci Dios y'ung. ²³ Je jāy ajcxy huidibi indacp minam co Jesús ca' yjējity je Cristo, e nañ ca' ajcxy miidity Dios Teedy ytiy'ajt. Yi jāy ajcxy huidibi minam co Jesús yjējity je Cristo je Dios y'ung, nañ ymiid ajcxy Dios Teedy ytiy'ajt.

²⁴ Je ayuc tiy'ajt huidibi miich ajcxy mmidou co oga'n ajcxy mmijpidacy Jesucristo, jada ayuc tiy'ajt mguydūngixipy e ca' mājydgóoygixipy. Pen mmi'ijtcixp yī' ayuc huidibi Dios yjāy oga'n ajcxy xyaj'ixpij, huin'it jēbi miich ajcxy myajpatciy ma Dios y'ung etz je' yajpaady ma Dios Teedy. ²⁵ Dios ti xyajhuinhuanīyim co xyajtznāhuaanīm ajt n'alma huinixī huinītiempo.

²⁶ Jada tiy'ajt ajcxy nyajnijayiyb jigix ca' mmijpidaaccixipy yī' ajcxy y'ayuc huidibi xyajhuinma'ñydgoyaaam ajcxy. ²⁷ Yi Dios yjihu'ñ ymic'ajt huidibi ti xy'adigiygixy ti xyjottigiygixy ijtūib yī' ma miich ajcxy mjot mhuinma'ñ. Paady ycixp ca' myajmayja-jtcixy pin xyaj'ixpijip ajcxy com je Espíritu Santo xyaj'ixpijip ajcxy. Je Espíritu Santo xyajni'ixiydaayb ajcxy tūg'óciy Dios ytiy'ajt, tiydudāgy yī', ca' yī' y'anijity. E jadu'n nej je' xyajni'ixiygixy, jadu'n mguydunipy ajcxy. M'ijtcix Dios yjihu'ñ ymic'ajt ma mjot mhuinma'ñ ajcxy.

²⁸ Miich ajcxy migūgtijc, mi'idipy ajcxy Jesucristo ytiy'ajt ma mjot mhuinma'ñ jigix co ñayajniğūxīgīyb Jesucristo ya naaxhuīñ jadūg'oc, huin'it jotcuje ajt nayjihuīyim etz ni ca' jibic nayjihuīyim co anajty xyñimiinīm. ²⁹ Ti mnejhuīyigixy co yī' Jesucristo tiydudāgy

ytuñ, e ti mnejhuuigixy nañ jadu'n co tũg'óciy yi jáy huidibi tiydudágy tumb, yí' je' ajcxy Dios y'ung'ajtip.

3

Dios ñch ajt xy'ung'ajtim

¹ Jihuññybijccix tũg'óciy je mijpi may'ajt Dios Teedy ti tuñ müd ñch'ajt ycixpi jigix jébi naydijim Dios y'ung. Yi naaxhuññjáy ajcxy huidibi ca' mijpidaaccixy Jesucristo ca' ajcxy nejhuuigixy huinjihuuygixy Jesucristo yti'ajt, paady ycixp ca' ajcxy nejhuuñ huinjihuuy co Dios xy'ung'ajtim. ² Miich ajcxy migügtijc huidibi ooy ndzocy njihuuyich, jadachambi Dios ñch ajt xy'ung'ajtim. Jadachambi ca' p'ocnigüexígyñi nej ñch ajt jiini n'idaanim. Co anajty Jesucristo ymiñ jadüg'oc ya naaxhuñ, huin'it nguipxyjatytiyim müd je', com n'ixaanim ajt Jesucristo jadu'n nej je' yajpaady. ³ Tũg'óciy jáy ajcxy huidibi jip'ijxp co Jesucristo ymiina'ñ jadüg'oc ya naaxhuñ, copicy yajhuádzipy ajcxy yjot yhuinma'ñ. Huen mi'ijtcixy oyjot oyhuinma'ñ jadu'n nej Jesucristo mi'ity oyjot oyhuinma'ñ.

⁴ Tũg'óciy jáy ajcxy huidibi pocyumb, hue' ajcxy ymidundigooyb Dios ycötujcin. Co ajcxy ytundigoy, ca' ajcxy ymadágy nej cuydunipy Dios ycötujcin. ⁵ E mnejhuuñy müich ajcxy co yi Jesucristo ti ñayguexígyii ya naaxhuñ jigix jébi xyajpocyññhuaatzim. Jesucristo ca' anajty ti pocy müdity, ca' anajty ma ti ytundigoy. ⁶ Tũg'óciy jáy ajcxy huidibi cuydundahuam Jesucristo yti'ajt, ca' huaad pocytuñ. Yi jáy ajcxy huidijaty pocyundib, ca'ni icy ajcxy yi Jesucristo, nañ ca'ni ajcxy huinjihuuyi yí' yti'ajt. ⁷ Miich ajcxy migügtijc huidibi ooy ndzocy njihuuyich jadu'n nej ngi'm'ung ngi'm'anäch, ix ni pin xycahuin'ingix. Yi jáy ajcxy huidibi oyjot oyhuinma'ñ yajtumb, tiydudágy yí' ajcxy chináy yjugy'ajty, tim jadu'n nej Jesucristo tiydudágy chinay yjugy'ajty. ⁸ Yi jáy ajcxy huidibi tzachpocyundibni, yí' ajcxy mujcu' yjáy'ajtip. Com jadu'n nej chondacy je naaxhuññy oga'n yí' mujcu' jéni anajty jadu'n chachpocytuñ. Paady ycixp Dios quejxy y'ung ya naaxhuñ co je mujcu' yhuinma'ñ yajcödigoyaañi.

⁹ Yi jáy huidibi Dios ajcxy ti ymóyii jemybi jot jemybi huinma'ñ, ca' ajcxy ypocytundiy com je'co tú'ciy ajcxy yjot yhuinma'ñ müdity, jadu'n nej anajty Jesucristo yjot yhuinma'ñ müdity, ca' huaad ajcxy ypocytundiy com Dios ti ymóyii ajcxy jemybi jot jemybi huinma'ñ. ¹⁰ Paady ycixp yñiguexígy yi jáy ajcxy pinjaty Dios y'ung'ajtip etz pinjaty mujcu' ung'ajtip. Yi huidibi ajcxy ca' tiydudágy cuydungixy Dios yti'ajt etz ca' ajcxy ixa'ñ ymigügtijc, etz ca' ajcxy tzocy jihuuy ymigügtijc, hue' ca' ajcxy Dios ymóyii jemybi jot jemybi huinma'ñ, mujcu' ajcxy y'ung'ajtip.

Naychojcin nayjihuuyim miñ xyipy

¹¹ Jada je' je ayuc tiy'ajt huidibi miich ajcxy ti mmidoogixy co oga'n ajcxy mmijpidacy Jesucristo co copicy naychojcin nayjihuuyim nidüg nidüg. ¹² Ca' huaad jadu'n n'iditizim nej Cañ y'idüch co anajty mujcu' huinma'ñ müdity, chi y'uch yaj'o'cy. ¿Nej co y'uch yaj'o'cy? Je' co anajty je' jibic-huinma'ñ yajtuñ, e je' y'uch oyhuinma'ñ anajty yajtumyb paady ycixp je y'uch yaj'o'cy.

¹³ Miich ajcxy migügtijc, ca' ooy mdzachhuinmaay ajcxy co ca' yi naaxhuññjáy ajcxy xy'ixa'ñ, huidibi ajcxy ca' Dios y'ayuc mijpidaaci. ¹⁴ Com ñch ajt nnejhuuñy co je nmigügtijc ajcxy ndzojcin njihuuyim co n'o'cim, huin'it njugypigaanim e ndzinahaanim jiiby tzajpjoty huinixi huinietiempo. Yi jáy ajcxy pinjaty ca' ymigügtijc ixa'ñ ajcxy co ajcxy y'ögipy, huin'it ca' ajcxy chinähua'ñ jiiby tzajpjoty. ¹⁵ Huenpinjáyity huidibi ca' ymigüg ixa'ñ, nipatpy nej ytundigoy jadu'n nej jayay'o'cpi ytundigoy e nañ jadu'n nejhuuñy, co je' y'ögipy, ca' chinähua'ñ jiiby tzajpjoty. ¹⁶ Ya icyipy jébi ñch ajt ijpexjt nbjicim nej huaad migügtijc ndzojcin njihuuyim, jadu'n nej Jesucristo ijpexjt yejcy co ñayoyxi ñaydooci co y'o'cy müd ñch ajt nbocy ycixpi. Paady ycixp ñch ajt jébi huaad ndzojcin njihuuyim nmigügtijc, oy jada ndimco'ögiiyim. ¹⁷ Janch pinjaty yjamid ymadaacin, e yja'ijxpy co ymigüg tigati yajmayjaty, e amij agix ñayjihuuyii, ca' pa'ayo'n müdity, ca' pubeda'ñ ymigüg, ca' je' anajty tzocy jihuuy ymigüg jadu'n nej Dios chogyii yjihuuyii. ¹⁸ Miich ajcxy migügtijc huidibi ooy ndzocy njihuuyich jadu'n nej icyipy ngi'm'ungich, müd oyjáy'ajtin etz müd Dios yti'ajt tzoc yajxon naychojcin nayjihuuyim miñ xyipy. Ca' nminaanim nigoo ngapxim nmiydaacim ahuac aguuy.

Cixyot huinijot naybidaacim ma Dios

¹⁹ Co nyajtuunim oyjáy'ajtin müd ñch ajt nmigügtijc, huin'it nejhuuñy co Dios yti'ajt nygyduunim e jotucj nayjihuuyim co Dios n'ojadajtim. ²⁰ Co jibic njot nhuinma'ñ ajt njihuuyim, müd co ca' oyjáy'ajtin nduunim, jac ngi Dios jibic ñayjihuuyii com yí' jacmijhuinma'ñ müd, ca'ydi ñch ajt, e yí' nejhuuydaayb tũg'óciy tijaty ajt nduunim. ²¹ Miich ajcxy migügtijc huidibi ooy ndzocy njihuuyich, co ca' ti jibicpi njihuuyim ma ajt njot nhuinma'ñ müd co oybi nduunim, huin'it jotucj ajt n'ijtim müd Dios. ²² E huentimtiijty

huidibi ñch ajt Dios nyajmibijctzoohuim, yi' xymooyim müid co yi' y'ayuc nguyduunim, e nduunim je huidibi yi' yjägüadacpy. ²³ Dios jada ti xyajnajtz'ane'müiyim co tzoc mibijcim mijpidaacim yi' y'ung Jesús etz tzoc naychojcm nayjihuiyim miñ xyipy, jadu'n yi' ti xyajnajtz'ane'müiyim. ²⁴ Yi jáy ajcxy pinjaty cuydumb Dios ytiy'ajt, yajpatp ajcxy ma Jesucristo e nañ Jesucristo yajpatp ma je'ajcxy. Nejhuiyim co Jesucristo ytiy'ajt yajpaady ma ñch ajt müid co je Dios yjihui'ñ ymic'ajt ti xy'adigüiyim xyjottigüiyim.

4

Dios yjihui'ñ ymic'ajt etz je ca'oybi yjihui'ñ

¹ Miich ajcxy migügtijc huidibi ooy ndzocy njihuiyich, ca' ajcxy mmibijctähuipy tüg'óciy jáy huidibi Dios y'ayuc capxhuäcxip. Mido'mbijccixy jayijp peni janch ajcxy müidity Dios yjihui'ñ ymic'ajt. Com ji mayjáy ya naaxhuiñ huidibi minam co Dios y'ayuccapxhuäcxi yi' ajcxy e ca' yjanchity. ² Jada je' je tiy'ajt ma huaad mjihui'ñybijccixy peni janch müidity ajcxy Dios yjihui'ñ ymic'ajt, yi' ajcxy huidibi Dios y'ayuccapxhuäcxip: tüg'óciy jáy huidibi capxhuäcxp co Jesucristo yma'xung'ajty ya naaxhuiñ müid ñinícx, Dios yi' ytiy'ajt ymiid. ³ E tüg'óciy jáy ajcxy huidibi ca' ñigapxpey ajcxy co Jesucristo chinäy ya naaxhuiñ müid ñinícx, ca' yi' Dios ytiy'ajt müidity. Ti miich ajcxy ayuc midoogixy oga'n co miinaam yi naaxhuiñyáy ajcxy müid je mujcu' yjihui'ñ ymic'ajt, huidibi midzip'ajtp Jesucristo. E ti je'du'n ajcxy ymiingixy. Jada je'du'n ajcxy huidibi ca' ñigapxpejtcixy co Jesucristo yma'xung'ajty ya naaxhuiñ müid ñinícx.

⁴ Migügtijc huidibi Dios yjihui'ñ ymic'ajt ti xy'adigüiyixy ti xyjottigüiyixy, e ti miich ajcxy mmimadaaccixy yi' huidibi ajcxy ñigapxpejp co Jesucristo ca' ma'xung'ajty ya naaxhuiñ müid ñinícx. Com Dios huidibi miich ajcxy xy'ane'mb, jac mij yi' ca'ydí je mujcu', paady miich ajcxy ti mmimadaaccixy je mujcu'. ⁵ Je huidi ajcxy jadu'n jaminaamb co Dios y'ayuc capxhuäcxi e ca' yjanchity ya naaxhuiñ ajcxy tiy'ajt ti patcixy ma je mujcu', paady ycixp yi naaxhuiñ yhuiy'ajtin ajcxy tzachcapxhuäcx, e yi naaxhuiñyáy tzachmijpidaaccixy etz amido'o'ijti ajcxy y'ayuc. ⁶ Hich ajt tiy'ajt ti nbaatim ma Dios. Tüg'óciy jáy ajcxy huidibi Dios ytiy'ajt huinjihuiyip, y'amido'o'ijtyp ajcxy ñch ajt n'ayuc. Yi jáy ajcxy huidibi ca' Dios ytiy'ajt müidity, ca' ajcxy amido'o'ijtcixy ñch ajt n'ayuc, paady ycixp n'ijxcajpm je jáy ajcxy huidibi tudägyip, etz je jáy ajcxy huidibi nigoo tzach'anüdaacp.

Dios ooy xychojcm xyjihuiyim

⁷ Miich ajcxy migügtijc huidibi ooy ndzocy njihuiyich, tzoc oy yajxon naychojcm nayjihuiyim miñ xyipy. Dios ti yecy ymic'ajt ma ajt njot nhuinma'ñ jigix jébi ajt naychojcm nayjihuiyim miñ xyipy. Tüg'óciy jáy huidibi ymigügtijc chojccixyp yjihuiygixyp, ti Dios yjihui'ñ y'adigüiyigixy yjottigüiyigixy etz nejhuiyip yhuinjihuiyip ajcxy Dios y'ayuc ytiy'ajt. ⁸ Pinjaty ca' ymigüg tzocy jihuiy, ca' yi' nejhuiyi huinjihuiyi Dios ytiy'ajt, com Dios tüg'óciy yi' tzojctáy. ⁹ Jada je'je tiy'ajt co Dios ajt xychojtaayim co je y'ung huidibi tügpajcpi ymiid, quejxy ya naaxhuiñ jigix ñch ajt nbaatim Dios yjihui'ñ ymic'ajt müid yi' ycixpi. E Dios yjihui'ñ ymic'ajt ca' ycixa'ñ ytigoya'ñ nimina, paady ñch ajt njugy'ajtin ca' ycixa'ñ ytigoya'ñ. ¹⁰ Dios ti xychojcm ti xyjihuiyim, paady quejxy y'ung ya naaxhuiñ jigix jébi xycodinaayim ma yi Dios ycütujectac müid ñch ajt nbocy ycixpi. Ca' nminaanim müid co Dios ti ndzachmijpidaacim ooy mijcajee, hue' janchtiy yi' ninigoob may'ajt tuñ müid ñch ajt ycixpi.

¹¹ Miich ajcxy migügtijc huidibi ooy ndzocy njihuiyich, müid co Dios jadu'n ajt ti xychojcm ti xyjihuiyim mijcajee oga'n, paady ycixp tzoc ñch ajt naychojcm nayjihuiyim miñ xyipy.

¹² Ni minaabí pin ca' ixyní Dios. Co naychojcm nayjihuiyim miñ xyipy, huin'it Dios yjihui'ñ ymic'ajt ijttiy ma ñch ajt njot nhuinma'ñ. Jadu'n Dios yjihui'ñ ymic'ajt xypubejtim xypudigüiyim, jébi nígi naychojcm nayjihuiyim nidüg nidüg jadu'n nej Dios jägüidägy.

¹³ Nejhuiyim ñch ajt co nyajpatim ma Dios, e nañ jadu'n Dios yajpaady ma ñch ajt, müid co yi' yjihui'ñ ymic'ajt ti xy'adigüiyim ti xyjottigüiyim. ¹⁴ E ñch ajcxy, ti ñch ajcxy yi Jesucristo n'ixyich, paady ñch ajcxy nidiy'ajt'ajtyich co je Dios Teedy quejxy y'ung ya naaxhuiñ co yajnidzöga'ñ tüg'óciy naaxhuiñyáy co anajty Dios nbocy ajt xyajcomidoohuaanim. ¹⁵ Tüg'óciy jáy huidibi nigapxp co Jesús je' yi' Dios y'ung, Dios yajpatp ma yi' e nañ yi' yajpatp ma Dios.

¹⁶ Hich ajt nnejhuiyim etz nmijpidaacim jadu'n nej Dios ajt xychojcm xyjihuiyim nidüg'óciy. Dios chojctaayb yi' nidüg'óciy yi jáy. Pinjaty tzojccixp jihuiygixp ymigügtijc, hue' yajpatp yi' ajcxy ma Dios e nañ Dios yajpatp ma yi' ajcxy. ¹⁷ Müid co yajxon nmijpidaacim Dios paady jötcujc nnaxaanim ma Dios ycütujectac, mina anajty xyaj-comidouhuim ajt nbocy. Com tü'ciy ñch ajt nyajpaatim ya naaxhuiñ, tim jadu'n nej yi Jesucristo. ¹⁸ Co nmijpidaacim Dios, huin'it ca' ajt nmidzigüiyim nmidzo'yduunim. Peni yajxon nmijpidaacim Dios, huin'it jébi tzigí'ñ nyajqueecim. Yi jáy ajcxy huidibi tzigüiyb etz tzo'yduim, ca' ajcxy Dios nmijpidaag yajxon.

¹⁹ Com Dios jayjip ti xychojcim ti xyjihuiyim, paady ycixp tzoc ajt naychojcim nayjihuiyim nidüg nidüg etz nañ nmijpidaacim Dios. ²⁰ Yi jäy ajcxy pinjaty jadu'n minamb co mijpidaaccixy Dios, e ca' ymügüg tzogaangixy ixaangixy, hue' je' ajcxy anüidaacp. Com peni ca' jajtixy nej tzóccixipy jihuihuiygixipy yi ymügütiyc huidibi ajcxy ix'y'ajtpy, ca' ajcxy jadip nej mijpidaaccixipy Dios huidibi ca' ix'y'ajtigixy. ²¹ E Dios ich ajt xyñajtz'ane'müiyim co pin Dios mibijcp mijpidacp, huen nañ jadu'n ymügütiyc tzocy jihuiy.

5

Yi pin huidibi ca' ixa'n midohua'n Cristo y'ayuc

¹ Tüg'óciy jäy huidibi mibijccixp co Jesús je' je' je' Cristo huidibi Dios yquejx ya naaxhuiñ, Dios ajcxy y'ung'ajtp. Tüg'óciy jäy huidibi mibijccixp mijpidaaccixp Dios Teedy, nañ jadu'n huen tzojccixy yjihuiygixy je' ajcxy huidibi Dios y'ung'ajtp. ² Co ndzojcim njihuiyim huidibi Dios y'ung'ajtp, je' jada je' je' ijxpejt co nañ jadu'n jébi nmijpidaacim Dios etz jébi nguyduunim nej xyñajtz'ane'müiyim. ³ Co nmijpidaacim Dios, huin'it nguyduunim jadu'n nej Dios xyñajtz'ane'müiyim e yi' y'ayuc ca' ooy chipity co nguyduunim. ⁴ Com tüg'óciy yi jäy ajcxy huidibi Dios ti y'adigiyii ti yjottigiyii yjihuiñ ymic'ajt, ymihuindinaayb ajcxy yi jibic-huinma'n ya naaxhuiñ. Co nmibijcim Dios, huin'it jébi nmihuindinaayim yi jibic-huinma'n ya naaxhuiñ. ⁵ Yi jäy ajcxy pinjaty mibijcp co Jesús Dios je' y'ung, yi' ajcxy mihuindinaayb yi jibic huinma'n ya naaxhuiñ.

Je ayuc huidibi nidäy'ajt yi Dios y'ung

⁶ Yi Jesucristo je' je' huidibi miin ya naaxhuiñ, je' je' huidibi nübejt etz nü'py teemy gujy co y'o'cy müd jäy ajcxy ypocy ycixpi. Ca' nminaanim jéyi anajty ti nü'bety, hue' nañ jadu'n ti y'ögy müd ajt nbocy ycixpi. ⁷ E yi Espiritu Santo yi' tiy'ajt yejcp co Dios Jesús y'ung'adyii, com je Espiritu Santo yi' Dios ytiy'ajt ymüd. ⁸ Ji tugügnax huidibi tiy'ajt yejcp co Dios Jesús y'ung'adyii: je Espiritu Santo, je nübejtin, etz Jesús nü'py co teemy cujy müd ich ajt nbocy ycixpi. E jadu'n nidügüg ñaybaatigixy tügñax, e tügñax ytiy'ajt yejccixy. ⁹ Mijpidaacim ich ajt jäy y'ayuc co Dios Jesús y'ung'adyii, nigi copicy co nmijpidaacim Dios ytiy'ajt huidibi ti yecy müd y'ung ycixpi, com jac mic'ajt müd yi' ca'ydä jäy ajcxy. ¹⁰ Yi jäy huidibi mijpidaaccixp Dios y'ung, ymi'ijtpy ajcxy je tiy'ajt ma yjot yhuinma'n. Yi jäy ajcxy huidibi ca' mibijccixy mijpidaaccixy je Dios y'ayuc ytiy'ajt, hue' ajcxy yajnajccixy Dios nej anüidägyin co ca' mibijccixy yi Dios ytiy'ajt co y'ung nigapxy. ¹¹ Jada je' tiy'ajt co Dios ti xymooyim ajt n'alma yjugy'ajtin huidibi ca' xcixipy ytigoyipy nimina. Dios y'ung ca' y'alma ycixipy ytigoyipy nimina, paady yi' ti yaj'oyiy nej jébi ajt n'alma y'ijtim huinixi huinintempo. ¹² Pinjaty ti mijpidaaccixy Dios y'ung, yi' ajcxy y'alma ca' ycixipy ytigoyipy nimina. Pinjaty ca' mijpidägy Dios y'ung, yi' ajcxy y'alma cixipy ytigoyipy co y'ögipy.

Capxycijxin etz capxhuijin

¹³ Jadayaabi ayuc ajcxy nyajnijayiygixp ma jada necy jigix jébi mijpidaaccixipy Dios y'ung, etz jébi mnejhuiygixy tiydudägy co mjugypijccixipy jadügtecy co anajty ti m'o'ccixy e ca' ajcxy m'alma ycixipy ytigoyipy.

¹⁴ Jada jotcuyc'ajtin ich ajt nmüd'ajtim co nmibijctzohuim Dios jadu'n nej Jesucristo xyñajtz'ane'müiyim, yi' ich ajt jébi xymidouhuim. ¹⁵ Müd co nnejhuiyim co yi' ajt xymidouhuim ma tijaty Dios nyajmibijctzohuim, paady ycixp nejhuiyim co nmüd'ajtim tijaty anajty ti nyajmibijctzou.

¹⁶ Co pinjaty ix'y co ymügüg ypocytuñ huidibi huaad jébi Dios meecxy, huen mibijctzooyi Dios müd yi' ycixpi, e Dios yajtzinähuiyb pen ca' anajty ooy ymijpocyty je tübi anajty tuñ. Com ji tüg mijpocy huidibi Dios ca' huinmecxy. Pen ti mijpocytuñ ca' huaad Dios ocjacmibijctzooni com ca' yi' y'oc-huinmecxaani. ¹⁷ Tüg'óciy jibic-huinma'n huidibi jäy ytumyb, pocy yi', per ji jibic-huinma'n huidibi jäy ytumyb, huidi jébi Dios huinmecxy e ca' y'alma ytigoyip.

¹⁸ Nejhuiyim co tüg'óciy pinjaty Dios ti ymöyii jemybi jot huinma'n, ca' yi' y'ocpocytuni. Yi Dios y'ung, huidibi ti ymöoyigixy jemybi jot huinma'n, cuend'ajtp yi' ajcxy, ca'ydä je mujcu' xyajhuinma'ñyidigöoyigixy.

¹⁹ Nejhuiyim ich ajt co Dios jadu'n xy'ane'mim njot nhuinma'n etz nejhuiyim co tüg'óciy jacjadyii naaxhuiñyäj huidibi ca' mijpidaaccixy Dios, je mujcu' jadu'n yjot yhuinma'n y'ane'mip ajcxy.

²⁰ E nejhuiyim co yi Dios y'ung ya y'oy naaxhuiñ e ti xyajnejhuiyim yi' y'ayuc ytiy'ajt, jigix jébi nejhuiyim huinjihuiyim yajxon je Dios janchypi tudägyi. Nmi'ijtim ma ich ajt ndzinaayin je janchypi je tudägyi je Dios y'ung je Jesucristo. Jada jëdu'n je tiydudägyi Dios, etz je Dios yjugy'ajtin caminaabi ycacixy ycatigoy. ²¹ Miich ajcxy migütiyc huidibi ooy

ndzocy njihuŷich jadu'n nej ixypy ngi'm'ung ngi'm'anäich, ca' nigo mdzachDios'ájtigixy
tijaty huiðibi ca' ni ti mic'ajt müidity, jadu'n nej Dios Teedy tzajpjotyi ymic'ajt müidity.

2 SAN JUAN

Yi Mimetzpi Necy Huidibi San Juan Yajniguejx Tüg Mibijcpi Töxyjäybi

¹ Hich Juan huidibi nigohuajc'ajt Dios yjäy. Nyajniguejxpich miich töxyjäy jada necy, miich Dios xyjäy'ajtp, e ti mmijpidägy Jesucristo. Nañ nyajniguejxypich jada necy tüg'óciy miich m'ung m'anäc ajcxy. Ooy ndzocy njihuüyich miich ajcxy. Ca' nminaanim iich naydügpajc ndzocyp njihuüybich miich ajcxy, nañ jadu'n tüg'óciy jäy ajcxy, huidibi huinjihuüygixp Dios ytiy'ajt, xychojccixp xyjihuiigixp ajcxy. ² Hich miich ajcxy ndzocjccixp njihuüygixyp com Dios ytiy'ajt yajpatp ma iich ajt njot nhuinma'ñ, etz yi' ijt huinixi ma iich ajt. ³ Huen Dios Teedy etz iich ajt nHuindzin Jesucristo, yi Dios y'ung oy'ajt may'ajt tuñ müd miich ajcxy, huen xypa'ayoogixy huen xyajjotcugüygixy müd co mguydungixy yi' ytiy'ajt etz mnaychójcigixy mnayjihuiigixy miñ xyipy.

⁴ Ti nminaybadyiijich nijëjity miich m'ung m'anäc, e ooy njotcugüyich müd co tiydudägy ajcxy payöy Dios ytiy'ajt, jadu'n nej Dios Teedy ajt ti xyñajtz'ane'müyüm. ⁵ Cham njacnimäyich miich ajcxy co jëbi ajcxy mnaychójcigixy mnayjihuiigixy miñ xyipy. Ca' nminaanim huinjemy jada tiy'ajt huidibi cham nyajnijayüygixipy. Je' jada je ayuc huidibi oga'n'aty ti nbaatim co ti nmibijcim Jesucristo. ⁶ Co ndzocjim njihuüyüm nmigügtijc, jada je' tiy'ajt co nguyduunim nej Dios ajt ti xyajnajtz'ane'müyüm. Jada huidibi Dios ti xyajnajtz'ane'müyüm huidibi miich ajcxy ti mbaatcixy, co oga'n ti nmibijccixy Jesucristo, copicy co ajcxy mnaychójcigixipy mnayjihuiigixipy.

Yi jäy ajcxy huidibi anüdaaccixp

⁷ Com ji mayjäy ya naaxhuin'ñ hidibi huin'ümb yi jäy ajcxy. Yi' ajcxy ti puhuäctüdy mibijcpidijc, yaj'ixpijcp ajcxy co Jesucristo ca' ñayguëxici ya naaxhuin' müd ñinix. Jadayaabi jäy ajcxy yhuin'ümyb yhueñypinity etz Jesucristo ymidzip'ajtyp ajcxy. ⁸ Naygüendi'äjtigix ci'm. Ix mgamijpidaaccixy yi' ajcxy y'ayuc. Co ajcxy myajhuin'üingixipy, huin'it anajty myajtigooygixy je oy'ajt huidibi mbadaangixyp ma Cristo. Co mguydüngixipy Jesucristo ytiy'ajt, huin'it mbaatcixipy tüg oy'ajt ca'pxyp iijby tzajpjoty.

⁹ Tüg'óciy jäy huidibi ca' cuydungixy je Jesucristo y'ayuc ytiy'ajt, ca' ajcxy müdity Dios ytiy'ajt ma ajcxy yjot yhuinma'ñ. Je jäy ajcxy huidibi cuydundiib je Cristo y'ayuc ytiy'ajt, ymüd ajcxy Dios Teedy etz je y'ung ytiy'ajt ma ajcxy yjot yhuinma'ñ. ¹⁰ Peni ji pinjaty ñicxy ma miich ajcxy huidibi yaj'ixpijcp hidibi ca' ytiy'ajity, ca' ajcxy mgöbiguipy ma mdijcin, e ni ca' ajcxy mjijp'ixihuipy. ¹¹ Com Dios yjäy pinjaty anajty jijp'ixiyyb je jäy ajcxy hidibi yaj'ixpijcp hidibi ca' ytiy'ajity, hue' je' tundigooyb ma Dios ytiy'ajt. Hue' je' anajty paady jadu'n nej jihuüy ti jijptigüyñi ajcxy je huingbi ixpijcin hidibi ca' ytiy'ajity.

Capxycjxin

¹² Oy iich ooy mij may miich ajcxy njamüdmüydägaangixy per ca' miich ajcxy jadu'n nijayihuaangixy necy'am. Hue' janchtiy njijp'ixyich co ci'm nninixcxaangixy jim, e nmüd müydägaangixy au'am jigix ajcxy ooy jotcujc mnayjihuiigixipy.

¹³ Je mdzi' y'ung ajcxy hidibi ya yajpatcixp xyajniguejxp ycapxpocxin, je huidi ajcxy Dios nañ jadu'n ti yhuin'ixigixy. Jadu'n ngapxycixyich müd miich. Amén.

3 SAN JUAN

Yi Necy Huidibi San Juan Yajniejx Gayo

¹ Señor Gayo:

Nguejxypich capxpocxin ma miich. Hich miich nyajniejxyp jada necy. Nnigo-huajc'ajtypich ma je mibijcpidijc. Ooy ndzocy njihuïyich miich.

² Miich migüg, ooy nmigüg'adyi. Dios nmibijctzooybich müd miich ycixpi, huen agujc jotcuje mdzinähuipy etz mmic'idipy m'oy'idipy. Nejhuïyibich co oy m'ity ma Dios. ³ Com oy ti njotcugiyich co je mibijcpidijc ajcxy ymiin ya huidibi jim tzoön ma miich ajcxy, e yi' ajcxy xytij'ajtmooyich jadu'n nej tydudägy mdzinäy e nañ jadu'n nej yajxon mguyduni Dios ytiy'ajt. ⁴ Ooy njotcúcidyich jac nigi co tiy'ajt nbaadyich jadu'n nej nmigügtijcich cuydungixy Dios ytiy'ajt.

⁵ Miich migüg huidibi ooy ndzocy njihuïyich, ooy njäygidägyich co oyjäy'ajtin mduñ müd je migügtijc. Nigi oy co oyjäy'ajtin mduñ müd je migügtijc huidibi ca' m'ixy'adyi. ⁶ Yi mibijcpidijc, huidibi ti choon ma miich ajcxy, ti tiy'ajt yejccixy ma je mibijcpidijc ya jadu'n nej miich oyjäy'ajtin mdzachtuñ. Ooy oy mduñ co mmöy yi migügtijc yi ytü'amgixpi e mguejxnaxy yajxon jadu'n nej Dios jäygidägy. ⁷ Yi jadu'mbi jäy huidibi mguejxnajxyp anajty hue' Dios y'ayuc ycixpi yhuidity, e ca' yi' ajcxy ti pijctzoy ma je jäy ajcxy huidibi ca' Dios ytiy'ajt nejhuïyi. ⁸ Copicy nbubejtim ajcxy je mibijcpidijc ajcxy huidibi Dios y'ayuc ycixpi yhuidity. Co jadu'n nbubejtim, chi jadu'n paady nej jihuïy tü'ciy nduunim müd yi' ajcxy ma Dios y'ayuc capxhuäcxii.

Je Diótfrefes yjibic-huinma'n

⁹ Ti nnijayiyich jayhuin je mibijcpidijc huidibi nayyöymújcigixp jim. Jim yajpaady tüg jäy huidi xii Diótfrefes huidibi ca' cöbiga'nich n'ayucich etz ngötújcinich. Amij agix jada jäy chachñayjihuiyii, yi' ci'm tzach'ane'mam ma miich ajcxy. ¹⁰ Paady ycixp co nnicxibich jim ma miich ajcxy nyajnimähuamy ajcxy tüg'óciy yi jibic-huinma'n huidibi Diótfrefes ytumyib, jadu'n nej jibic xyñigapxy xyñi'ojyich etz jadu'n nej anii yaj'ixpicy. E nañ ni yi' ca' mmüidity jotcuje'ajtin jadu'n nej chach'idich. Nigi ytundigoy co ca' yajjättäga'n ajt nmigügtijc huidibi Dios müd ycixpi yhuidity. E co ich ajt nmigüg pinjaty yajjättäga'n, chi yi' capx'aducy e yajpidzimy je mibijcp hidibi jäy yajjättäc, e ca' je' cöbiga'n ma miich mnayyöymujctac.

¹¹ Miich hermano, huidibi ooy ndzocy njihuïyich, ca' mguydunipy jada jibic-huinma'n. Cuydun janchtiy yi oybi huinma'n. Yi jäy ajcxy huidibi oybi tungixp, yi' ajcxy ymiid Dios ytiy'ajt ma yjot yhuinma'n. Yi jäy ajcxy huidibi jibic tungixp, ca' yi' ajcxy Dios ytiy'ajt nejhuïyi.

Je Demetrio tüg y'ijxpejt oybi

¹² Yi jäy, huidibi yxii Demetrio, tüg'óciy jäy ajcxy yminaangixy co ooy y'oyjäyity, e janch yajpaady ma Dios ytiy'ajt. Hich nañ jadu'n nmäna'nich co ooy y'oyjäyity yi Demetrio, e miich mnejhuïyib co ich ajt ndiy'ajt janch janch yi'.

Capxyciixin

¹³ Ooy ich anajty miich mijcjee ayuc njayajmüdmüydäga'n. Per ca' nijayihua'n necy'am. ¹⁴ Hue' janchtiy njijp'ixyich co nnicxa'nich tzojc ma miich ajcxy, e nmüdmüydäga'nich miich ajcxy ci'm.

¹⁵ Jotcuje'ajtcix. Yi mibijcpidijc ajcxy huidibi ya yajpatp yajnaxpy ajcxy capxpocxin ma miich ajcxy. Tun may'ajt yajnaxigich ngapxpocxin ma nmigügtijcich jim nidüg nidüg etz xibety xibety. Cham ngapxyciyich, Juan je Apóstol.

SAN JUDAS

Yi Necy Huidibi Judas Nijayiy Je Huidibi Dios Ti Huin'ijxigixy

¹ Ich Judas, tumbich ma Jesucristo ytung, Jacobo xy'uch'ajtpich. Nijayiybich miich ajcxy nidüg'óciy huidibi Dios Teedy ti huin'ijxcixy jébi mibijccixy yi' y'ayuc huidibi jébi xyajpocyñihuaatzcixy. Nijayiybich miich ajcxy tüg'óciy huidibi Jesucristo ycuend'aty ymíid. ² Huen Dios miich ajcxy mijcajee xypa'ayoogixy etz xyajjotcugiygixy etz chojccixy xyjihuiyigixy.

Yi' ajcxy huidibi yaj'ixpijcp anii

³ Miich ajcxy migütiyc huidibi ooy ndzocyich njihuüyich, müid je nídzoocin ycixpi müid ajt n'alma huidibi miich ajcxy etz iich cham nmíid'ajtm, ooy chachycopicity co nijayihuibich miich ajcxy müid yi mibijcin ajcxy ycixpi, e ngohuaniiyb ajcxy co jébi mic m'ijtcixy ma ajcxy yi mibijcin e ca' m'ixtigihua'ccixy ma yi ayuc tiy'ajt huidibi Dios yejc ma tüg'óciy naaxhuñiyjáy. ⁴ Naagity jáy ajcxy ti ytigiiygixy ma miich ajcxy ayüch ameech müid anii. Jecy'ajty Dios tiy'ajt yejcy ma yi' y'ayuc co yi jadu'mbi jáy tigoyam ajcxy y'alma müid ypocy ycixpi. Hue' yi' ajcxy jibic jáy huidibi ca' huindzigiiygixy Dios. Anídaacp yi' ajcxy co yminaangixy co Dios ti xypa'ayooohuim etz ti xyhuinmeecxim ajt nbocy paady ycixpi jébi nduunim huen tiijity huidibi nijot'ajtm. Ca' cöbijccixy je Dios huidibi nHuindzin'ajtm, etz ca' cöbijccixy iich ajt nHuindzin Jesucristo.

⁵ Oy miich ajcxy ti mjanejhuiydaaygixy jada tiy'ajt, per nyajjáymetzcodamy ajcxy jadu'n nej Dios jayíyp yajpidzimy jecy'ajty jim Egipto je Israel jáy ajcxy, e jac'axam tzaachytuun müid o'cin je huidibi anajty ajcxy nijéjity ca' ymibijccixy. ⁶ Je ángeles huidibi ajcxy ca' yhuim'y ma Dios ytung huidibi ajcxy capxycómido dacy Dios, y'ixmajtztay ajcxy y'it chinaydac. Dios je' cham müid'ajtp ajcxy ahuing. Mach ajcxy y'ity agoodztuuby huinixii huinítiempo ixti cooni je mij xii anajty Dios ti yajhuad'aty, mina anajty tiyduna'n naaxhuñiyjáy ajcxy müid ypocy ycixpi. ⁷ Jadu'n nej Sodoma etz Gomorra etz jacjadyii mij cajp huinduy agonbi ytundigooyday ajcxy ma jejimbi cajp ycuudungixyp ñinícx chojcin, naygiyejci ajcxy ma je jibic-huinma'n. Yéydjictijc ytundigooygixy müid huingbi yéydijc. Je' jadu'n huim'ijxpejt ma tüg'óciy jáy co je tzaachypí ajcxy paatcixy.

⁸ Jim yajpaady ma miich ajcxy jáy huidibi nejhuiyb co Dios jecy'ajty tzaachytuun ángeles ajcxy etz cajp jáy huidibi ajcxy tudingooy. Yi' ajcxy chinaayin jadu'n yi' nej tüg cumáy. Yajjibicciygixy je ñinícx müid pocytuuní. Jijpcogapxiygixy je Dios ycotujcin, nigapxcixy ni'ojiygixy je huidibi ajcxy Dios mooyip mij'ajtm. ⁹ Je arcángel, Miguel, je ángel huidibi mij'ane'min müid, co anajty ychiptuñ müid je mujcu', yajcapxyoongixy yaj'yayucyoongixy je Moisés ñinícx, ca'p je' müid'ajty huinma'n nixcy yajpocycáy je mujcu' müid nay'ojii. Jéyi janch co nimay: "Yi Huindzin Dios miich xy'ix'ojip." ¹⁰ Per jada jáy ajcxy jibic ooy nigapxcixy huidibi ca' nejhuiygixy. Tügiiyb ajcxy yhuinma'n müid iyujc animal yhuinma'n, etz iyujc animal ca' ajcxy müidity huinma'n tiydudägyi. Ci'm jada jáy ajcxy ñayyajhuinma'ñyidig'óoyigixy, e jadu'n ajcxy y'alma yajtigoyaangixy.

¹¹ Ypadamyb ajcxy tzaachypí mijcajee müid pocy ycixpi com je' yi' ajcxy ypadamyb nej Caín y'idíich. Müid co meen' tzach'adzojccixy, paady ñidigooygixy ytundigooygixy jadu'n nej Balaam ñiidigoy ytundigoy jecy'ajty, e jadu'n ajcxy y'ayoogixy jadu'n nej Coré, co y'o'cy co ycacapxymidohuañ anajty co Moisés oy y'ayucijpcogapxiyi. ¹² Yi jadu'mbi jáy tzo'ydu'n yejcp ma miich ajcxy co mgaaygixy m'uuccixy tügmuyc müid yi' ajcxy, e jadu'n iixpejt yejccixy co mnaychócgixy. Caaygixp uuccixp tügmuyc müid miich ajcxy agujc jotcujc per ni' ca' ajcxy müidity huindzig'i' müid ymígütiyc. Jadu'n ajcxy nipaady nej cöbixycuend'ajtpí huidibi ci'm ñaygüend'ájtigixyp, e ca' tungixy cuendi je cöbixy. Jadu'n ajcxy nej joc huidibi ca'pí nii müidity, huidibi je poj yajhuidijtip. Jadu'n ajcxy nej quipy huidibi ca' ytiim'aty mina yjapadyii, jayijp y'ocniicxy, e chi jada ytiich, e ytimypidígy müid ñidictz. ¹³ Yi' ajcxy ytundigoyii ooy cho'ydu'n yecy, tim jadu'n nipaady nej je mejy y'oobígy co ypidígy. Jadu'n ajcxy nipaady nej madza' huidibi ytu' ti yajtigach. Hue' y'ijtcixy pocypa'tci'py huinixii huinítiempo, mij'agootztuuyb y'idipy ajcxy.

¹⁴⁻¹⁵ Nañ jadu'n Enoc, je mihuixtucjpi co anajty Adán ti yjayijp'aty, yminañ co Dios yhuinma'ñymooyi müid jada ycixpi, e yminañ: "N'ijxich je Huindzin Dios co anajty ymiñ müid janch canaag müi je huidibi ajcxy tudägyity etz huätzip. Co anajty tiyduna'n ajcxy tüg'óciy naaxhuñiyjáy müid ypocy ycixpi, chi yajpocycähua'ñ je jibic jáydjic ajcxy jadu'n nej ajcxy ti ytundigooygixy müid yjibicjáy'ajt etz müid jibic ayuc tiibi müid nigapxcixy ni'ojiygixy Dios." ¹⁶ Jada jibic jáydjic ca' ajcxy ni ti mijotcujc'ajtcixy, ooy nigapxcixy ni'ojiygixy

ymigügtijc. Jëyi ajcxy yci'm jotcujc'ajt itxaaygixy. Ycapxcixy amij agix. Ooy oy nigapxcixy nijëjity jây müid co ti oybi padaangixy ma je' ajcxy.

Judas capxhuijp je' ymigügtijc ajcxy

¹⁷ Per müich ajcxy migügtijc huidibi üch ooy ndzocy, jâymejtzcix je ayuc huidibi jécyip ti najtzcaxüygixy je Huindzin Jesucristo y'apóstoles ajcxy. ¹⁸ Je apóstoles müich ajcxy xyñimay: "Ma anajty xü tiempo ycixaani, ji'adip jây ajcxy huidibi nixigipy yajxigipy huidibi Dios yje'ajtpy, e chináaygixipy jadu'n nej yi' ajcxy ci'm tzachnijot'ajtcixy jibic-huinma'ñ." ¹⁹ Je' ajcxy yajnaybijc-huäcxüib mibijcpidijc co ca' ajcxy müidity je Dios yjihui'ñ ymic'ajt.

²⁰ Per müich ajcxy migügtijc huidibi ooy ndzocyich njihui'yich, ijtciç müich ajcxy tudägy ma yi mmibijcin. Jâymejtzcix mibijctzoogix Dios müid je Espíritu Santo ypubejtin. ²¹ Naygüend'ájtigix jigix jëbi Dios xychojccixy xyjihui'yigixy ajcxy, e ahuijxcix je xü mina anajty üch ajt nHuindzin Jesucristo xymöhuaaním je jugy'ajtin huidibi ca' ycixipy ytigoyipy ni mina müid co ti xypa'ayoohuim.

²² Capxjotcidaaccix pinjaty ca' ti mijpidägy janchypidägy. ²³ Yajmüdmíydaaccix jacjadyii migügtijc jigix ajcxy jëb paatcixy nañ jadu'n nüdzoocin müid ajcxy y'alma. Jadu'n anajty paady nej jihui'y myajpidzimgixy jünjoty. Yajtungix pa'ayo'n müid jacpinjaty pocytumbi. Naygüend'ájtigix ma yi' ajcxy ypocytunüi, ca' mbocytungixy nañ jadu'n. Jadu'n yi' ajcxy ypocytunüi nipaady nej huit huidibi ti yjibicci'y.

Judas capxycixy müid je' ymigügtijc

²⁴⁻²⁵ Je Dios tügpajcpi, je Dios huidibi xyajnidzoocim ajt n'alma, je huidibi yjajtaayb ñejhuiydaayb, ymüid je' mic'ajt etz cötujcin jëbi müich ajcxy xycuend'adipy jigix ca' mbocycägixipy, etz je' ymüid mic'ajt jigix jëbi xyajja'tcixy agujc jotcujc ma Dios yhuinduu, ma yi' yajpaady müid y'oy'ajtin ymij'ajtin ca' ti mbocymüidity ajcxy. Yi' paatip je oy'ajtin etz mij'ajtin etz mic'ajt etz cötujcin müid nHuindzin Jesucristo ycixpi, tüiyip etz cham etz huinixü. Amén. Jadu'n ngapxycixiyich.

EL APOCALIPSIS O Je Huidibi Dios Yajhuin'ijx San Juan

¹ Jayhui'my ity ma jada necy je Jesucristo y'ayuc ytiy'ajt huidibi ca' pin nejhuüy huinjihuüy jecy'ajty. Dios moy Jesucristo jada tiy'ajt jigix yajni'ixiydahuipy je Dios ytumbi ajcxy ti anajty tunaanip jadaanip ya naaxhuiñ, e ca' ooy jecy yhuäcxiba'n mina ytuna'ñiyi yjada'ñiyi. Jesucristo yquejxy jada ayuc tiy'ajt miid tüg ángel ma Juan. E je ángel yajhuin'ijxy Juan jada y'ayuc etz ijxpejt. ² E Juan yecy tiy'ajt janchypi tüg'óciy jadu'n nej anajty ti huin'ixy ti huinmido. E Juan ñidiy'ajt ajtpy jada Dios y'ayuc etz nañ jadu'n nidiy'ajt'aty je ayuc tiy'ajt huidibi Jesucristo yajnejhuüyi.

³ Janch jotcuyc je' pinjaty capxp jada necy etz pinjaty mido'mbñc jada Dios y'ayuc huidibi Juan nidiy'ajtpy etz ñajtzcapxiyb. E jotcuyc je' pinjaty cuydumb tüg'óciy huidibi jaybety ma jada necy, com je xii je tiempo huingooniñ je' mina ytuna'ñiyi yjada'ñiyi.

Juan nijayiy huixtucj'itpi mibijcpidijc

⁴ Hich Juan nijayiybich yam je mibijcpidijc huixtucjcpicyi huidibi yajpatp jim Asia naaxjot. Huen Dios etz je huixtucjcpí espíritu huidibi yajpatp ma je' y'ane'mdac may'ajt oy'ajt tunipy miid miich ajcxy etz xymóoygixipy jotcuyc'ajtin. Dios je' huidibi cham ijt, je huidibi jecy'ajty ijt, etz je huidibi miinaamb. ⁵ Huen Jesucristo may'ajt oy'ajt tunipy miid miich ajcxy etz xymóoygixipy jotcuyc'ajtin. Jesucristo je huidibi tiydudagy Dios ytiy'ajt yecji, je jayijpi jäy huidibi ti yjugypicy jadüg'oc co y'o'cy, je' nigohuajc'ajtp tüg'óciy pinjaty jugypigip jadüg'oc co anajty ti y'óccixy. Jesucristo nigohuajc'ajtp etz ane'my tüg'óciy reydiyc huidibi ane'mb ya naaxhuiñ. Je Cristo, huidibi xychojcin xyjihuiyim, ti xyñihuuanim miid ñi'py ma je tzaachypí huidibi mihuaad'ajtim miid ajt nbocy ycixpi. ⁶ Jesucristo ti xycótuycmooyim etz ti xytungmooyim miid Dios Teedy, huidi yi' yteedy'ajtpy. Jadu'n iich ajcxy ndung etz ngótuycin nipaady nej je tung etz cótuycin huidibi reydiyc etz teedytjyc ajcxy ymiid. Huen Jesucristo y'idipy cómay huinixii huinitiempo etz huen yi' y'ane'min cótuycin y'idipy huinixii huinitiempo. Jadu'n jada. Amén.

⁷ Cuendtungix iich n'ayuc, ¡Cristo miinaamb jocjoty e tüg'óciy je mayjäy y'ixa'ñiyi! E y'ixamyb je' ajcxy huidijaty Cristo yaj'ayoo yajtzaachypijc. Tüg'óciy naaxhuiñjyäj yjihuihua'ñ yäxa'ñ ytaja'ñ ymaya'ñ miid je'ycixpi. Jadu'n jada. Amén.

⁸ Jadu'n je mijpi Dios huidibi tüg'óciy mic'ajt miid ymina'ñ:

—Hich je' huidibi yajtzondacp je naaxhuiñybi, je tzajp etz je huidibi jaccogixiyyb. Jadu'n iich nej letra A huidibi yajtzondacp je alfabeto etz je letra Z huidibi cogixiyyb ma je alfabeto. Hich je' huidibi cham'ijtp, etz huidibi jecy'ajtp ijt etz huidibi miinaamb.

Juan ijxy yi Cristo oybi ymijity

⁹ Hich Juan, miich ajcxy mmiigüg, quipxyi miid miich ajcxy nminaxy nyajnaxyich ayo'n tzaachypí. Quipxyi miid miich ajcxy ndzinäyich ma Dios y'ane'my. Etz quipxyi miid miich ajcxy najyutñich je mecxtujcin ma ndzinaayin huidibi Jesucristo ti xymooyim. Jim iich anajty mach n'ityich ma je naax huidibi mejy agujc, huidibi xii Patmos, miid Dios y'ayuc ytiy'ajt ycixpi, je ayuc tiy'ajt huidibi Jesucristo xyajnejhuüyim. ¹⁰ Jadu'n tügtecy ti njatyich, hue' anajty tüg domingo xii co iich Dios n'ojadaityich, e Dios yjihui'ñ ymic'ajt ti anajty xymimadactayich njot nhuinma'ñich. Chi nmidooyich jäxc'i'py'amy tüg huidibi mic capx, jadu'n yi' ycapxin nmidooyich nej tüg trompeta yxüxy. ¹¹ Chi je huidibi xymigapxpich anajty yminañ:

—Hich je' huidibi yajtzondacp etz je huidibi yajcogixiyyb tüg'óciy tijaty ya naaxhuiñybi etz tzajpioty. Jadu'n iich nej je letra A huidibi yajtzondacp je alfabeto etz je letra Z huidibi yajcogixiyyb je alfabeto. Cojaay miich ma tüg libro huidibi mhuin'ijxyp, e quex je necy jim Asia naaxjot ma je huixtucj picyi mibijcpidijc ma je huixtucjcpí cajp: Efeso, Esmirna, Pérgamo, Teatira, Sardis, Filadelfia etz Laodicea.

¹² Chi n'ijxhuimbityich n'ixa'ñich pin iich anajty xymigapxpich. Co nnayji'ijxich, huin'it nhuin'ijxyich huixtucj candelero ac tim oori. ¹³ E cujc'amy ma je huixtucj candelero nhuin'ijxyich tim jadu'n nej je jäy huidibi tzoön tzajpioty (je Cristo), yxoxyity miid tüg huit yjädy anajty mabaad ytecy, e yhuüñity ma ycaach miid tüg oorihuün. ¹⁴ Yi' ycohuajc etz ycöhuay janch poob, jadu'n nej lana huidibi janch poob, jadu'n nej nieve ypoobity, e je yhuün jadu'n nej jiinye'n. ¹⁵ Je' ytecy tim jadu'n nej latón huidibi janch oy, nej jihuüy jijnjoty ornojoty yam ypidzimy. E je ymiydaacin janch mic, tim jadu'n nej canaag mijñi y'a'ich y'agimimy. ¹⁶ E ymiid anajty ma a'oygi' huixtucj madza'. E ypidzimy ma y'ahuac tüg espada mejtz'adu'm'amy yjiijpity. E yhuüñijjip jadu'n anajty nej xii janch mic y'a'ñ.

¹⁷ Co je' nhuin'ijxyich, chi janch ögy oy ngidägyich ma ytecy ymijc, chi xycñixajyich müid y'a'oygi', chi xyñimaayich:

—Ca' mdzigiy, ich je' huidibi jayijp'ajtp ya naaxhuiñ etz tzajpjoty etz ich je' je huidibi cogixihuamb. ¹⁸ Jugy'ajtpich; ti n'ögyich, e ti njugypicyich jadüg'oc, e jugy'adipich huinixii huinitempo. Nmüidich mic'ajt jigix ane'mibich yi o'cin etz je it ma je öcpi ajcxy y'alma ity. Jadu'n nipaady nej jihuüy nmüidich je öcpi it ahuazti. ¹⁹ Cojay cham tijaty mhuin'ijxpy mhuinmidooyb, jadu'n nej huidibi tunaanip jadaanip jadachambi xii tempo, etz huidibi tunaanip jadaanip jacjiini. ²⁰ E jadu'n yhuimbizimy je tiy'ajt janchypi huidibi ca' pin nejhuüy maabi je huixtujcpi madza' tübi mhuin'ixy ma ich n'a'oygi', etz je huixtujcpi oricandelerö. Je huixtujcpi madza', je' je' je ängeles ajcxy huidibi cogapxy'ajtp müid Dios ycixpi ma je huixtujcpi mibijcpidijc. E je huixtujcpi candelero huidibi ti m'ixy, je' y' je huixtujcpi mibijcpidijc.

2

Je ayuc huidi yajmoy yi mibijcpidijc jim Efeso

¹ Nijayi' müich je ängel huidibi cogapxy'ajtp jim ma je huidibi ajcxy mibijcp jim Efeso: “Nima' ajcxy co jadu'n ymınañ je huidibi huixtujc madza' müid ma y'a'oygi', je huidibi jim yajpatp agujc'amy ma je huixtujcpi candelero, je' jadu'n minamb: ² Ich nejhuüyibich tüg'öciy ti müich ajcxy mdumyb, jadu'n nej mictägy mdungixy ma Dios ytung, etz jadu'n nej mmimecxtujcixy migütijc. Nejhuüyibich co ca' m'ocmimexxtugaani ajcxy jibicjäydijc, e ti m'ijxmajtcixy je ajcxy huidibi naydijip co Cristo ti huin'ijxigixy, per ca' je' ajcxy ytuädägyity, e müich ajcxy ti mnejhuüy co ajcxy ooy y'aniüdaaccixy. ³ Nejhuüyibich co ooy ayo'n mij müich ajcxy mminajxcixy mayanajxcixy müid ich ycixp, etz ooy mij mecxtujcixy myajtungixy, etz ooy janch mic mdungixy müid ich ycixp, e ca' ti mmidzjipigixy ich ndung. ⁴ Per nejhuüyibich ma müich ajcxy mdundigoy. Ca' müich ajcxy xyajmij'atyich mijcajee, jadu'n nej anajty xyajmij'atyich ajcxy mijcajee co oga'n ajcxy mibijcy. ⁵ Müid jada ycixpi jäymetz müich ajcxy ma oy m'agänajxcixy. Jothuimbijtcix, e tungix nej anajty m'octungixp co oga'n ajcxy mmibijcy. Pen ca' ajcxy jadu'n mdungixy, chi tzoj nixibich ma müich ajcxy, chi huingbi nbidägyibich ma müich ajcxy xyjapaady, tim jadu'n nipaady nej jihuüy nbicyich yi mgandelero. Jadu'n ndunipyich pen ca' anajty mjothuimbity ajcxy. ⁶ Per njäygidaacypich jadu'n nej müich ajcxy m'ijxtigoydaaygixy mjäydgoydaaygixy je jibicjäydijc ajcxy yhuinmañ. Nej je nicolaits ajcxy ytungixy, müich ajcxy ca' mjäygidaaccixy e nañ jadu'n ich ca' njäygidägyich. ⁷ Pinjaty ytädzac müid huen amido'o'ity nej je Espiritu Santo ymınañ ma je mibijcpidijc huidibi yajpatp xi ya. Pinjaty madacp ma ymibijcin, ich yi' nmöhuipy tzinaayin jugy'ajtin ma Dios y'ane'my, jaydëb jotucujc chinähuipy ma Dios y'it, jadu'n nipaady nej jihuüy ajcxy jicxy je quipytim ma Dios y'it huidibi jugy'ajtin yejcp.”

Je ayuc huidi yajmoy yi mibijcpidijc ajcxy jim Esmirna

⁸ Nijayi' je ängel, je cogapxy'ajtpi huidibi yajpatp ma je mibijcpidijc jim Esmirna: “Jadu'n ymınañ je huidibi yajtzondac je naaxhuiñybi etz tzajp etz huidibi cogixihuip, je huidibi o'c e yjugy'aty jadüg'oc: ⁹ Ich nejhuüyibich tüg'öciy ti müich ajcxy mdumyb. N'ijxajpyich nnejhuüyibich je m'ayo'n mjetmay ajcxy, jadu'n nej ti myaj'ixhuidijtcixy ti myajpahuidijtcixy. Nejhuüyibich co ayoob jäy müich ajcxy, per müid müich ajcxy Dios y'oy'ajtin, e jadu'n nipaady müich ajcxy nej comeeñydijc. Nejhuüyibich co nijjity jäy müich ajcxy xyñigapxyp xyñi'o'ijiyb. Naydijyii ajcxy co yjudiojäyity, e ca' yjanchity. Hue' ajcxy müid y'ijtcixy je mujcu'. ¹⁰ Ca' ni ti mdzigiy müich ajcxy nej mjadaangixy m'ayoohuaangixy. Yi mujcu' müich ajcxy nijjity xyajpujxtijccähuamb, m'ocya'ijxmadzangixy pen janch müich ajcxy nidüg'öciy myajpatcixy ma Dios. Jadu'ñyi müich ajcxy m'ayohuipy majc xii. Ijtcix tudägy mabaad ajcxy m'öccixy. E ich müich ajcxy je jugy'ajtin huinixiibi nmöhuipy jadu'n nej premio co ti mmadaaccixy ma mmibijcin. ¹¹ Pinjaty müid ytädzac, huen mido'mbijccixy nej je Espiritu Santo nimäy je pinjaty mibijcp Dios. Pinjaty mimadacp cuyduñ Dios y'ayuc ytiy'ajt, ca' je' y'alma ayoohuipy ayoodactuuyb, ca' y'öga'ñ mimejtz'ocpi.”

Je ayuc huidi yajmoy yi mibijcpidijc jim Pérgamo

¹² Nijayi' je ängel huidibi cogapxy'ajtp jim ma je mibijcpidijc ajcxy jim Pérgamo: “Nijayi' je ayuc co jadu'n ymınañ je huidibi y'espada müid mejtz'adu'm'amyb yijipity: ¹³ Ich nejhuüydaaybich jadu'n nej müich ajcxy mdzinaaygix mjugy'ajtcix. Nejhuüyibich co müich ajcxy mdzinaaygixy mjugy'ajtcixy ma tüg cajp ma je mujcu' y'ane'my. Per m'ijtyñi je nxijich, e ca' m'ixmach je mmibijcin ma ich. Ni m'ixmach je mmibijcin je huin'it xii co Antipas yaj'o'ci jim ma müich ajcxy, tüg ich nmigüg, je tudägypi testigo, jim je' y'o'cy ma mujcu' chinäy. ¹⁴ Nmüidich tigati huidibi ca' m'oy'ixyich ma müich ajcxy huidibi mdumyb ajcxy jim Pérgamo. Nijjity müich ajcxy ca' m'ixmadza'ñ je Balaam y'ixpijcin,

je huidibi yaj'ixpijc jecy'ajty co huen jixxcixy je huidibi anajty tzaadzech quipychech ti yajhuindzigixy. E nañ jadu'n yaj'ixpic co huen tundigoogixy mäd huingbi töxyjy. ¹⁵ Nañ jadu'n müch ajcxy mmüidity nije' jäy huidibi ajcxy ca' ixmadzaangixy nicolaïtas y'ixpijcin, je ixpijcin huidibi iich ca' ndim'ixa'ñich. ¹⁶ Paady jothuimbijtcixy müch ajcxy, yajtigajtznä ajcxy mjot mhuinma'ñ. Pen ca' jadu'n mdunipy, nixcibich jim tzojc ma müch ajcxy. Chi jada' ndziptunipyich mäd yi' ajcxy huidibi midundigooyb iich ngötujcin huidibi ngapxpich. Hich n'ayuc jadu'n nipaady nej espada. ¹⁷ Pin ytädzac müd, huen mido'mbic je ayuc huidibi je Espiritu Santo ñigapxyp ma je huidibi ajcxy Dios y'ayuc ytiy'ajt mibijcip. Pin jada tiydudägy mimadacp cuyduunni Dios ytiy'ajt, iich yi' nmöhuipy oy'ajtin huidibi Dios yjé'ajtpy. Jada oy'ajt jadu'n nipaady nej maná huidibi yüch ijtp ma Dios chinaydac. Nañ jadu'n iich yi' nmöhuibich tüg pi'poohtzaa, e ma je poobtzaa jim yjaayity tüg xii jemybi huidibi ca' ni pin iixcabipy, jëyi janchtiy iixcabip je xii pin anajty cöbijcp je tzaa."

Je ayuc huidi yajmoy yi mibijcpidijc jim Tiatira

¹⁸ Nijayi' je ängel huidibi cogapxy'ajtp ma je mibijcpidijc jim Tiatira: "Nima' ajcxy, jadu'n je Dios y'ung ymina'ñ, je huidibi yhuin mäd jadu'n nej jihuüy jünye'n, e ytecy jadu'n müidity nej bronce tiibi ytoyhuäch ma jün: ¹⁹ Jadu'n yi' ymina'ñ: Nejhuüybich tüg'öciy ti ajcxy mdumyb. Nejhuüybich jadu'n nej müch ajcxy mijcajee myajmij'ajtcixy Dios etz mdzojccixy mjihuüyigixy ymügütiyc; jadu'n nej mmibijccixy mmijpidaaccixy Dios y'ayuc ytiy'ajt; jadu'n nej mictägy mdungixy ma Dios ytung; etz jadu'n nej myajtungixy mecxtujcin ma mdzinaayin; etz nejhuüybich co cham nigi mdungixy ma Dios ytung, ca'yd jadu'n ajcxy nej myajtzondacy. ²⁰ Ji tüg huidibi müch ajcxy mdumyb huidibi iich ca' n'oy'ixyich. Mdzachmimecxtujccixy yi töxyjäy Jezabel huidibi naydijip co ycapxyp Dios y'ayuc e ca' yjanchity. Je' yajnidigooyb yajtädigooyb iich ndumb mäd anii. Jadu'n je' ymina'ñ co jëbi huingbi töxyjäy migapxtigoogixy e co jëbi caagyixy jixxcixy je huidibi ajcxy yajhuindzigixy quipychech tzaadzech. ²¹ Ti iich je Jezabel nmöy tiempo co ixypy yjothuimbity, per yi' ca' ixmadza'ñ yjibic-huinma'ñ. ²² Jadachambi nyajcähua'ñich je Jezabel cijx'am mäd pa'm, e jadu'n ajcxy nmöhua'ñich ayo'm je yëdyjc ajcxy huidibi mäd chachtundigoy. Jadu'n ndunipyich pen ca' ajcxy yjothuimbijtcixy nej ajcxy chachpadungixy je jibic-huinma'ñ huidibi je Jezabel ymüd. ²³ E nyaj'öctähuibich tüg'öciy ajcxy pinjaty panicxp cixyot huinjot je Jezabel y'ixpijcin jigix nidüg'öciy je mibijcpidijc ajcxy nejhuüydhauipy co iich je' nejhuüydaayb tüg'öciy jäy ajcxy yjibic-huinma'ñ. Chi nmöhuibich oybi nidüg nidüg jäy pen ti anajty oybi tuñ, o nmöhuibich nidüg nidüg jibicpi pen ti anajty jibicpi tungixy. ²⁴ Per jacjadyii müch ajcxy jim Tiatira ca' mbanicxcixy mbayöogixy Jezabel y'ixpijcin, e ni ca' mmijpidaaccixy huidibi ajcxy ytiyyp mujcu' y'ixpijcin huidibi tzip huinjihuüyb. Hich müch ajcxy nimaayb co ca'p iich müch ajcxy huingbi ixpijcin njacmöogixipy. ²⁵ Mi'ijtcixy je Dios ytiy'ajt huidibi müch ajcxy mäd, ixti cooni anajty nhuimbityich. ²⁶ Pin madacp ma ymibijcin etz pin cuydumb iich ndiy'ajt mabaad anajty je' y'ögy, iich je' nmöhuibich je cötujcin, jaydëb ane'my naaxhuñjyäj ajcxy. ²⁷ Hich je' nmöhuipy je ane'min cötujcin ma naaxhuñjyäj huidibi Dios Teedy, iich nDeedy, ti xymöyich. E je' ane'mipy müd Dios ymic'ajt. E je' yajhuindigoydähauipy naaxhuñjyäj y'ane'min, tim jadu'n nej jäy püy pochtu'tz mäd pujxtajc. ²⁸ Nañ jadu'n iich je' nmöhuipy iich nmic'ajt huidibi nipaady nej je madza' jayhuixtujc. ²⁹ Pin ytädzac müd, pin midoohuamb, huen midoy nej je Espiritu Santo ymina'ñ ma yi mibijcpidijc nidüg'öciy."

3

Je ayuc huidi yajmoy yi mibijcpidijc jim Sardis

¹ Nijayi' je ängel huidibi cogapx'ajtpi ma yi mibijcpidijc ajcxy huidibi yajpatp jim Sardis: "Jadu'n ymina'ñ je pin müd je huixtujcp Dios y'espíritu, huidibi müd je huixtujcp madza': hich nejhuüyb ti mdumyb. Nejhuüybich co cömay ajcxy m'ijtcixy co mmüidity yjugy'ajtin huinixiibi e ca' yjanchity. Jadu'n müch ajcxy nipaady nej öcpi. ² Cuenditungix müch ajcxy yi mmibijcin, com jago jago ajcxy mgayajtigoydäy yi mmibijcin. Jayajmicpijccixy yi mmibijcin huidibi ajcxy njacmüidity. Ti iich n'ixy co huidibi ajcxy mdumyb ca' yi' yhuädzity ytdägixy ma Dios yhuinduu. ³ Jäymejtcootcixy je Cristo ytiy'ajt je tiibi m'ixpijccixy, je tiibi mmidoogixy. Panicxcix Cristo ytiy'ajt e jothuimbijtcixy ma yi oybi. Pen ca' mgüendtungixy yi mmibijcin, nixcibich ma müch ajcxy jadu'n nej tüg meetzpi, ni mganejhuüyigixipy anajty nnicxyich. ⁴ Müch jacmüdni mibijcpi ajcxy jim Sardis huidibi ca'ni ajcxy ymibijcin yajtigoogixy, ca'ni ajcxy ytundigoogixy, tim jadu'n nipaady nej jihuüy ajcxy müidity poob huit huidibi ca' yjibicüy. Yi' ajcxy xymüid'idipich müd huädz jot huädz huinma'ñ, tim jadu'n nipaady nej ypoob huit ajcxy müidity, com ajcxy ypadyii jadu'n. ⁵ Pin mimadacp cuyduñ etz mijpidägy Dios y'ayuc ytiy'ajt, ymüd'adipy ajcxy je huätzpi jot huinma'ñ, huidibi jadu'n nipatp nej poob huit ajcxy müidity. E ni ca' ajcxy yxii yajjödzip ma je libro ma ycojaayity je

tudägypti jäy ajcxy yxi. E ñich yi' ajcxy ngapqxuëxcixy yxi ma nDeedyich yhuinduu, e nañ jadu'n ma nDeedyich y'angeles yhuinduu ajcxy. ⁶ Pin midoohuamb, pin ytädzac müd, huen midoy nej je Espíritu Santo ymina'n majaty je huidibi ajcxy Dios y'ayuc yti'y'ajt mibijcip."

Je ayuc huidi yajmoy yi mibijcpidijc jim Filadelfia

⁷ Nijayi' je ángel huidibi capxy'ajtpi ma je mibijcpidijc jim Filadelfia: "Jada ayuc tiy'ajt ñigapxyp je tügpajcpi huätzpi, tügpajcpi janchypi, huidibi ane'my Dios yjäy jady'ajty. Je huidibi yaj'ahuatp e co yaj'ahuach ni pin ca' huaad yaj'aducy. Je huidibi yaj'aducp e co yi' yaj'aducy, ni pin ca' huaad yaj'ahuach: ⁸ Cuenditungix nej nmina'nich: ñich nejhuiybich nej mdungixy. Ti nyecyich mic'ajt ma miich ajcxy huidibi nipaady nej tüg tigiydac ahuätzpi ma miich mhuinduu, huidibi ni pin ca' huaad yaj'aducy. Nejhuiybich co hueeni Dios yjihui'n ymic'ajt miich ajcxy müdity. Per ti mgyudungixy ñich n'ayuc, e ca' nxiiich xycoyüti. ⁹ Cuenditungix nej nmina'nich. Yi' ajcxy huidibi müpidacp Satanás y'ayuc, je huidibi aniidacp ajcxy co ñaydijigixy judiojáy, e ca' yjanchity. ñich yi' ajcxy nmimadägibich jigix yi' ajcxy miich xyhuingojxtinähuiipy xyajmij'adipy. E chi nejhuihuip ajcxy co ñich miich ajcxy ti ndzocy. ¹⁰ Müd co ti myajtungixy mecxtujcin ma mdzinaayin, ti mgyudungixy ñich n'ayuc n'ane'min. Paady ñich nihua'nip yajtzögip miich ajcxy ma anajty jäy ajcxy mictägy xyjot'ijxcixy xyhuinma'n'ijxcixy ajcxy. Miinipy je xii je tiempo mina je mujcu' jot'ixipy huinma'n'ixipy tüg'öciy je mayjäy huidibi yajpatp ya naaxhuiñ. ¹¹ ñich tzojc nñicxa'nich jiiy naaxhuingixy. Mi'ijtcixy yi Dios y'ayuc huidibi miich ajcxy müd jigix ni pin xycapijcip ajcxy mbremio, huidibi ti mganar'ajtcixy ma Dios. ¹² Pin mimadacp cuyduñ Dios y'ayuc yti'y'ajt etz cuyduñ yajxon, ñich yi' nbidägibich mij'ane'mbi ma ñich nDios y'it, jadu'n yi' nipaadip nej tüg pilar huidibi midinaayb jemxyp ma Dios ytiyc. E yi' ni camina ypidzimipy ma Dios y'it, e njayñiyibich ma yi' ñiñicx ñich nDios yxi, e nañ jadu'n njäayibich je ñich nDios ycajp yxi, je Jerusalén jemybi huidibi tzoon tzajpjoty ma Dios yajpaady. E nañ jadu'n njäayibich nxii jemybi ma yi' ñiñicx. ¹³ Pin ytädzac müd huen midoy ti je Espíritu Santo ñigapxyp ma tüg'öciy je mibijcpidijc."

Je ayuc huidi yajmoy yi mibijcpidijc jim Laodicea

¹⁴ Nijayi' je ángel huidibi cogapxy'ajtpi ma je mibijcpidijc jim Laodicea: "Jadu'n ymina'n je huidibi janchip tudägyip, je huidibi tudägy yejcp Dios yti'y'ajt e ca' yajtigach y'ayuc, je huidibi yajtzondac tüg'öciy tijaty huidibi Dios ti oyduñ: ¹⁵ Nejhuiybich nej mdungixy. Nejhuiybich co miich ajcxy mibijccixy huenjaty, ca' myajtigoydaagixy yi mmibijcin, e ni ca' ooy mij mmibijccixy. Jadu'n miich ajcxy nipaady nej ni huidibi ni ca' ytiichity, e ni ca' y'anity. Jac'oy ixipy co ooy mij mmibijccixy, o co ca' ixipy mdimmibijccixy. ¹⁶ Müd co tim yinjaty tim huenjaty ajcxy mmibijccixy, ca' ooy mmibijcin ymijity ajcxy, e ni ca' ajcxy mmibijcin ytigoydaagixy, müd jada ycixpi ñich miich ajcxy njijpcogapxihiipy müd je ndzip n'écinich, tim jadu'n nej jäy ajcxy itxujuj huidibi y'ahuac yca'tzojcp. ¹⁷ Miich ajcxy minamb co ooy ajcxy mgomeeñity, ooy ajcxy mij mdzinaayin mjuy'ajtin mmüdity, e ca' ti ajcxy myajmayajtcixy, e ni ca' miich ajcxy nejhuiygixy co ayo'nduum myajpatcixy. Jadu'n miich ajcxy nipaady nej ayooibitijc, nej huiintzpi, nej huidibi niñuadz ixhuadz huiidjtp. ¹⁸ Paady ñich miich ajcxy nimaagixy co copicy ajcxy mbaadip ma ñich Dios yti'y'ajt janchypi, huidibi jadu'n nipaadipy nej jihuüy ajcxy mjuuygixy huadz oori ma ñich, huidibi ti y'oybidzimy müd jün jigix mgomeeñ'ajtcixip. Nañ jadu'n ñich miich ajcxy nnimaagix co copicy ajcxy mbáatcixip pocyhuinmeecxin ma ñich, huidibi jadu'n nipaady nej jihuüy huit oyjatypi poopjatypi mjuuygixy ma ñich, jigix mxóxcixipy mñinix ca'ydí tzo'ydu' mbáatcixipy. Nañ jadu'n ñich miich ajcxy nnimaagix co mbaadip tiy'ajt ma ñich nlibro, huidibi jadu'n nipaady nej jihuüy huindzooy mjuuygixy, jigix mdzoydúngxixy mhuin e huin'it ajcxy m'ijxcixipy huadz. ¹⁹ N'ojypich etz ndzaachytumyb tüg'öciy pinjaty ndzojcpich njihuüyibich, paady ycixpi miich ajcxy mhuindina'mijiptina' mic ñich ndiy'ajt etz jothuimbijitix nej mbocytungixy. ²⁰ Cuenditungix nej cham nnimaagixy. Jadu'n nipaady nej jihuüy ndinäyich ma nidüg nidüg jäy ytiyc'aguu e ngojxnocich ajcxy ytiyc agi'. Nbijctzooybich co xyajtigihuibich ajcxy ma ytiycin. Pinjaty xyyöcmidoobich, e yaj'ahuach ytiyc, tigihuibich ma yi', e cayipich müd yi', e yi' müd ñich. ²¹ Pinjaty cuydundaayb Dios y'ayuc yti'y'ajt, ñich je' nmöhuipy it lugar tzajpjoty quipxy müd ñich ma ñich n'ane'mdac. Ti nguydundaayich Dios y'ayuc, e nmüdich it lugar ma ñich nDeedy y'ane'mdac, paady ycixp jébi nmöhuibich miich ajcxy it lugar ma nyajpaadyich. ²² Pin ytädzac müd, pin midoohuamb, huen midoy huidibi je Espíritu Santo ycapxyp majaty mibijcpidijc huidibi canaagpicy yajpatp."

¹ Co jada jadu'n yjajti, chi nhuindixcyich tzajpjoty, e nhuin'ijxyich tüg tijc aguu ahuädz jibby tzajpjoty. E nmidooyich tüg ayuc janch tim jadu'n nej tüg trompeta yxüxy huidibi ich anajty jayijp ti xy'ocmigapxpi, xyñimäyich:

—Pet ya ma ich, cham nyajni'ixihua'n tijaty copicy tunaanip jadaanip co anajty jadaayaabi xii tiempo ñaxy.

² Chi Dios yjihui'ñ ymic'ajt xymimadactaayich njot nhuinma'ñich, e nhuin'ijxyich tüg ane'mdac jibby tzajpjoty. E ma je ane'mdac jim anajty tüg iñäy. ³ E je huidibi anajty jim iñäyb ma je ane'mdac, jadu'n anajty yquëxigy nej tüg tzaa janch oybi janch adücxp. E jühuidity ma je ane'mdac je Dios yhuätz'ajt quëxigy nej tüg i'ñich janch oycolor huidibi janch adücxp nej tüg tzaa tzuxjatypi. ⁴ Nañ jadu'n jühuidity ma je ane'mdac jibby anajty iipx madaax silla, e ma je silla iñäy iipx madaax mijjây, ac poob huit müd. E ymüid anajty ajcxy ma ycohuaic coroni ac tim oori. ⁵ Ma je ane'mdac anajty ypidzimy huidzuc, e ooy anajty enee yjidjtin ñe'my. E ma je ane'mdac huinduu jibby anajty Dios yjihui'ñ ymic'ajt je huixtucjpi, huidibi quëxig nej huixtucj tzinhuaty huidibi ooy mic ytiicxy. ⁶ E je tigot ma je ane'mdac huinduu jadu'n quëxigy nej vidrio mejy, janch huädz janch adücxp.

E cujc'amy jühuidity ma je ane'mdac midaax iyujc huidibi müd mayhuiin jahuinduu yjajxcipy. ⁷ Je midügpi iyujc tim jadu'n anajty nej tüg jamgaa. Je mimetzpi iyujc tim jadu'n nej tüg huajmang. Je midugigpi tim jadu'n anajty yhuiñyijp nej jây. Je mimadaaxpi tim jadu'n nej me'ty yqueec-huidityin. ⁸ Je nimidaaxpi iyujc ymüid anajty ajcxy nidüg nidüg tudujc yqueec, e ymüid anajty ajcxy yhuiin queecnigixy etz queecpa'tci'py. E ca' anajty ajcxy ypocxy xim tzuum, chachmînaangixy:

Santo, Santo, Santo, je Huindzin Dios huidibi tüg'óciy nejhuiydaayb, huidibi tüg'óciy mic'ajt müd, je huidibi anajty ji'ajtp, je huidibi cham ji'ajtp, etz je huidibi miinaamb.

⁹ Je iyujc ajcxy huin'igixy etz huindzigüygixy etz yajmij'ajtcixy Dios, etz yajnajxcixy Dioscojuyipy ma Dios je huidibi anajty iñäyb ma je ane'mdac, je huidibi tzinaayb jugy'ajtp huinixi huinitempo, e ni camina y'ögipy. ¹⁰ Co je iyujc ajcxy jadu'n ytuñ, chi je iipx madaaxpi mijjây ycojxtinaydaaccixy ma je yhuinduu huidibi anajty iñäyb ma je ane'mdac. E ooy anajty huindzigüygixy je huidibi tzinaayb huinixi huinitempo. Pidaaccixy anajty ajcxy ycorona ma je yhuinduu, cham chachmînaangixy:

¹¹ Miich, ich ajt nHuindzin, ich ajt nDios, miich mihuaad co mmüidity tüg'óciy oy'ajtin mij'ajtn etz mic'ajtn, mihuaad co miich nyajcômayip, mihuaad co miich müd'ity tüg'óciy mic'ajt etz mij'ajtp. Jadu'n miich mihuaad, com miich ti myajcojy, ti myaj'abadjy tüg'óciy huidibi ji'ajtp. Com miich jadu'n ti mdzocy, paady ycixpi tüg'óciy tijaty ji'ajttây.

5

Je libro etz je Dios y'ung, je Cordero

¹ Chi jada' nhuin'ijxyich ma je huidibi anajty iñäyb ma je ane'mdac müdity anajty ma y'a'oygi' tüg libro abugucy, yjaayity jotjoty'amy etz nigixy'amy, yco'aducyity müd huixtucj selli. ² Chi nañ jadu'n nhuin'ijxyich tüg ángel huidibi mij cötujcin müd, yajtiy müd ycapxin janch mic:

—¿Pin jada' janch tudägyip co yaj'ahuädzip jada libro etz migüidziydähuipy yi yseli?

³ Ni tzajpjoty, ni naaxhuiñ, ni naaxpa'tci'py ycac'ity pin tudägyip huidibi mihuaad je libro co yaj'ahuädzip, o oy nigoodi'ajty ja'ixaanip. ⁴ Ich janch yaaxpich müd tajin mayin anajty, com ca' anajty yajpaady pin je libro mihuaad co yaj'ahuädzip, o oy nigoodi'ajty huindücxip. ⁵ Chi nidüg je mijjây xyñimaayich:

—Ca' myäxy. Chi je' je mic'ajt müdpî ma yi judiojây, je David y'ap y'oc huidibi nipatp nej tüg ama'ycaa, yi' ti mimadactây tüg'óciy jibicpi. Yi' mihuaad yi libro yaj'ahuädzip, etz miguejyidähuipy je huixtucjpi yseli.

⁶ Chi nhuindixpejtyich, e agujc'amy ma je ane'mdacin, etz agujc'amy ma je midaaxpi iyujc, etz agujc'amy ma je mijjâydic ajcxy, jim anajty ytinây je Dios y'ung, je Cordero. Ooy anajty ñigüëxigy chaachi'au nej anajty ayo'n tzaachypî ti yajnaxy. Ymüid anajty huixtucj ymu'n, e huixtucj yhuin, je' je' je huixtucjpi Dios yjihui'ñ ymic'ajt huidibi yquejx huindu'my naaxhuiñ. ⁷ Chi je Cordero, je Dios y'ung, ninicxy je huidibi anajty iñäyb ma je mij'ane'mdac, e chi oy cychoy je libro huidibi je mij'ane'mbi anajty ymüid ma je a'oy'amybi yci'. ⁸ Co je' anajty ti cychoy je libro, chi je midaaxpi iyujc etz je iipxmidaaxpi mijjây ycojxtinay'ahuidyday ajcxy ma je Dios y'ung, je Cordero, yhuinduu. Ymüid anajty ajcxy nidüg nidüg y'arpa etz oori copi ujtzity müd poom, je' je' anajty nipaady nej ajcxy chapcapxy capxy je huidibi ajcxy mibijcp Dios. ⁹ Janch y'äyb anajty ajcxy iy jemybi, ymînaangixy:

Miich mihuaad co ngiyigy yi libro, e mmiguejydaayi je huixtucjpi yseli. Com müich ti myaj'ögyii, ti ngojuy jây ajcxy ypocy ma Dios müd ngi'mni'py. Ti ngojuy ma Dios

nidüg'óciy jāy ajcxy ypocy, huen huidibi razity, pinjaty capx huen huidibi ayucity, pinjaty tzomb huen huidibi cajpity huen huidibi naciónity.

¹⁰ Miich ti xymóogixyich ane'min etz je tung mijpi nej huaad iich ajcxy n'ojadajtcixy nmibijctzoogixy Dios, jigix jēbi iich ajcxy n'ane'mgixy yi naaxhuiñyāy etz n'ojadajtcixy nmibijctzoogixy Dios müd jāy ajcxy ycixpi.

¹¹ Chi iich oy nhuin'ixyich e nhuinmidooyich may ángeles ajcxy ycapxin ymiydaacin jühuidity ma je ane'mdac, ma je iyujc ajcxy yajpatcixy, etz ma je mijjāy ajcxy yajpatcixy. E janch canaag millon je ángeles anajty ajcxy. ¹² Janch mic je' anajty ajcxy chachminaangixy: Je Dios y'ung, je Cordero, je huidibi óc müd jāy ajcxy ypocy ycixpi, yi' mihuaad paadip ane'majtin, comeen'ajtin, xpijcin, mic'ajt, cómayin, oy'ajt mij'ajt, etz huin'ihuín huinyaacin.

¹³ E tūg'óciy iyujc animal je huidijaty Dios ti yajcojy ti yaj'abadīy huidibi jibby tzajpjoty, etz huibi ya naaxhuiñ etz naaxpa'tci'py, huidibi jibby mejjoty, nhuinmidooyich co tūg'óciy ajcxy chachminaangixy:

Tzoc huin'ihuín tzoc cómayin, tzoc mooyim oy'ajtin etz mij'ajtin huinixi huinitiempo je Dios y'ung, je Cordero, etz je huidibi iñaayb ma je ane'mdaacin.

¹⁴ Je midaaxpi iyujc anajty chachminaangixy:

—Jadu'n huen tuñiyi jadyi. Amén.

Chi nañ jadu'n je iipxmidaaxpi je mijjāy ajcxy ycojxtinaygidactay, chi ajcxy ooy huindzigiy patjihuiy je huidibi huinixi huinitiempo tzinaayb.

6

Je huixtucpi selli

¹ Huin'it nhuin'ixyich je Dios y'ung, je Cordero, quejtzcih tūg selli ma je huixtucpi chi nmidooyich, co nidüg je midaaxpi iyujc ycapxy, jadu'n nmidooyich nej enee yjidity, chi yminañ:

—Min ya, e chi m'ixipy.

² Chi nhuindixpejtyich, chi nhuin'ixyich tūg poob cohuay. E je huidibi yaj'iñaayb je poob cohuay ymajtz'ijtpy anajty tūg tip ma yci'. Chi je' yajmoy tūg coroni co yrey'adipy. Chi jada' choñ tziptunaangixy jigix jacmimadāgipy ymidzip.

³ Co je Dios y'ung, je Cordero, yaj'ahuaach je mimetzpi selli ma je necy, huin'it nmidooyich je mimetzpi iyujc ma je midaaxpi yminañ:

—Min ya, e chi m'ixipy.

⁴ Chi ypidzimy jadüg cohuay tzaptzpi ycolor. E huidibi yaj'iñaayb je cohuay chaptzpi, ycidigiyi cōtujcin co je naaxhuiñyāy canayyajotcujc'adib ajcxy, e ñayyaj'ócigixipy miñ xyipy. E yajmooy tūg espada mijpi.

⁵ Co je Dios y'ung, je Cordero, agüztuudy je midugigpi selli ma je necy, chi nhuinmidooyich je midugigpi iyujc ma je midaaxpi, yminañ:

—Min ya, e chi m'ixipy.

Chi nhuindixpejtyich, chi nhuin'ixyich tūg cohuay tzixyipi. E je huidibi anajty yaj'iñaayb je cohuaychixy, ymiid tūg pujxtzim ma yci'. ⁶ Huin'it nhuinmidooyich tūg ayuc choñ ma je midaaxpi je iyujc ajcxy yajpaatcixy, yminañ:

—Tūg denario meen' chohuiy tūg libra trigo; nañ jadu'n tūg denario meen' chohuiy tudujc libra cebada, ca' myaj'ayoohuipy aceite etz vino.

⁷ Co je Dios y'ung, je Cordero, yaj'ahuaach je mimadaaxpi selli ma je necy, chi nhuinmidooyich co je mimadaaxpi iyujc ma je madaaxpi yminañ:

—Min ya, e chi m'ixipy.

⁸ Huin'it nhuin'ixyich tūg cohuay nitzuxy pu'tz, e je huidibi anajty yaj'iñaayb je cohuay, hue' anajty yxi ócpi. Axaan anajty ymiin je huidibi ane'mb je it ma je ócpi ñimucy. Chi ajcxy yajmoy cōtujcin je huidibi yaj'iñaayb je cohuay, jigix yaj'ó'ccixipy je tūgpicypí ma je madaaxpicypí naaxhuiñyāy ajcxy. Chi yaj'ógip ajcxy müd tzip, müd yuuba'm, etz müd iyujc ahua'nbi huidibi ya naaxhuiñ.

⁹ Co Dios y'ung yaj'ahuaach je mimigooxpi selli ma je necy, chi nhuin'ixyich pa'tci'py'amy ma y'ane'mdac yhuinduu, je' ajcxy y'alma huidibi ajcxy yaj'ócpat müd Dios y'ayuc ycixpi, huidibi anajty ajcxy capxhuācxixp etz nidiy'ajt'ajtcixp Dios y'ayuc. ¹⁰ Je' anajty ajcxy huidibi yaj'ogy patp müd Dios y'ayuc ycixpi chachminaangixy janch mic:

—Huindzin, janch mijpi janch huätzpi, huidibi cuydundaayb yi m'ayuc huidibi myejc ma iich ajcxy. Jjadu'ñiyi jada' m'jac-huācxiba'ñ mina anajty yi jāy ajcxy mdiydunaangixy mdaachytunaangixy müd ypocy ycixpi huidibi xyaj'o'c iich ajcxy, yi' ajcxy huidibi tzinaayb naaxhuiñyigixy?

¹¹ Huin'it ajcxy yajmoy nidüg nidüg poobhuit, e yajnimay ajcxy co huen jacpooxcixy jayinjaty jahuenjaty, ixti cooni anajty yajca'pxy je mibijcpidijc micho'n, je' ajcxy huidibi quipxy müd müch ajcxy tumb ma Dios ytung, je' ajcxy huidibi yaj'ögy paadipy müd Dios y'ayuc yti'y'ajt ycixpi, tim jadu'n nej müch ajcxy ti mbaatcixy yaj'ögy.

¹² Chi n'ijxyich co je Dios y'ung, je Cordero, yaj'ahuaach je midudujcpi selli ma je necy, huin'it ooy naax yhuifnyijty, chi je xii yjaty janch tzixy, jadu'n nej tzixyhuut huidibi co'ögytjc ypidacpy, e je po' y'ahuimbijty nej n'i'pyin. ¹³ Chi madza' ooy yca'y naaxcixy tim jadu'n nej piidztim tzuxpi ycäy co micpoj mixidiy. ¹⁴ Chi je tzajp yjihuaäcni jadu'n nej tüg libro'abidity. Tüg'öciy tungop huidibi naaxhuiñgixy etz huidibi mejy'agujc, cijx chondägy ypidictäy ma anajty y'ity. ¹⁵ Huin'it ñayütztaayi je reydiyc, je mijtungmüdpidijc, generaltjc, comeefnydijc, pinjaty ymic'ajt müd, je tumbidijc etz je midumbidijc ñayütztaayi ajcxy nidüg'öciy majaty tzaajut tzaa'ang. ¹⁶ Tzachnimaagyixy anajty tungop tzaajot:

—Nigägootcich nigägootcich, ca'ydi ich ajcxy njac'ijxi yhuifnyijp je huidibi ñaayb ma Dios y'ane'mdac, e nañ ca'ydi nbaatcixyich je tzaachyp i ayo'n huidibi yegamyb Dios y'ung, je Cordero.

¹⁷ Com ti je xii je tiempo yhuaad'ajtni mina Dios etz Dios y'ung y'ahua'ndägaangixy etz tzaachytunaangixy naaxhuiñjy. ¿Pin je' ocmimadägi ajcxy chip y'ejin?

7

Huidibi anajty ajcxy tiy'ajtmüd ma je Israel jäy ajcxy

¹ Chi co jadu'n yjati, chi nhuin'ijxyich madaax ängeles ajcxy ytinaaygixy ma madaax'itpi naaxhuiñybi ytatzcixy. Adujccixy anajty je midaax'it poj ca'ydi ypoxy ya naaxhuiñ, ni ma mejy, ni ma quipy. ² Chi nhuin'ijxyich jadüg ängel ymiñiy anajty xübidzim'y'amy, müdity ma yci' je Dios juugypi yselli. Jadayaabi ängel ooy mic miyaaxy je jamidaaxpi ängeles ajcxy huidibi anajty ajcxy ti ycidigüygixy je mic'ajt je cötujcin nej huaad yajhuindigooygixy tijaty ya naaxhuiñ etz ma nñi mejy.

³ Chi je ängel ymina'ñ:

—Ca' ti ayo'n mdungixy naaxhuiñ, ni ma mejy, ni ma quipy chaa, ixti cooni anajty Dios yti'y'ajt y'ijxpejt nbidaacim ma je' ajcxy yhuimbocin, je tiibi ajcxy huin'ixy huidibi tungixp ma Dios ytung.

⁴ Chi nmidooyich jadu'ñiyi je' tiibi anajty ajcxy Dios yti'y'ajt y'ijxpejt ti ymóoyigixy. Migo'px jahuixchigüipx midaax mil je' ñaybaati huidibi anajty ajcxy tiy'ajt müd ma yhuimboc ma nidüg'öciy Israel jäy ajcxy. ⁵⁻⁸ Majmetz mil anajty ajcxy tiy'ajt y'ijxpejt müdity je Judá jäy, majmetz mil je Rubén jäy, majmetz mil je Gad jäy, majmetz mil je Aser jäy, majmetz mil je Neftali jäy, majmetz mil je Manasés jäy, majmetz mil je Simeón jäy, majmetz mil je Leví jäy, majmetz mil je Isacar jäy, majmetz mil je Zabulón jäy, majmetz mil je José jäy, etz majmetz mil je Benjamín jäy.

Je mayjäy ajcxy huidibi yxoxip müd poob huit

⁹ Chi jada' nhuin'ijxyich janch mayjäy choon ma canaag nación, hue' ajcxy canaagnax raza'adyii, e capxy ajcxy canaagnax ayuc, etz choon ajcxy ma canaag cajp. Hue' je mayjäy ytinay'ahuyday ma je mij'ane'mdac huinduu, etz ma Dios y'ung, je Cordero yhuinduu. Janch mayjäy ñimujcy ma je Dios y'ung yhuinduu, ni pin je' anajty huaad camichoudäy ajcxy. Ac poob huit anajty ajcxy müd yxoxyity, e ymüd anajty ajcxy tiixy'aay ma yci'. ¹⁰ E janch mic anajty ajcxy miyaaxcixy Dios, chachmınaangixy: ñich ajt nDios yi' je' tügpaic huidibi xyajpocyhuaatzim. ñich ajt nDios yi' je' huidibi ane'mdaayb tüg'öciy, e nañ jadu'n yi' y'ung, je Cordero.

¹¹ E nidüg'öciy je ängelstjc anajty ajcxy ytinaaygixy jühuidityi ma je Dios y'ane'mdac. E cham je mijjäy ajcxy etz je midaaxpi iyujc huijo'y'huuy ajcxy ma je ane'mdac huinduu, huindzigüygixy yajmij'ajtcixy je Dios. ¹² Chachmınaangixy:

Jadu'n jada. Amén. ñich ajt nDios, je' mihuaad huinixii huinitiempo tüg'öciy je ñihuin, je xondaacin, je oy'ajtn, je ixpijcin, je jäygidaacin, je cōmayin, je ane'min, je mij'ajtn. Amén. Jadu'n jada.

¹³ Huin'it nidügti je mij jäy ycapxy, e xy'amidooyich:

—¿Pin jada ajcxy jada' huidibi poob huit müd yxoxyity, e ma yi' jada' ti choongixy?

¹⁴ Chi ñich je' n'adzooy:

—Huindzinich, müch mnejhuñyb.

Huin'it je' xy'adzooyich:

—Jada je' ajcxy tiibi je mij ayo'n minajxcixy yajnajxcixy, e ti ypocyhuaatzcixy müd je Dios y'ung, je Cordero ñi'py, tim jadu'n nej jihuñy yhuut ti yajhuaatzcixy janch poob ma Dios y'ung ñi'py. ¹⁵ Paady yi' ajcxy yajpaady ma Dios chinaydac yjugy'ajttac, e ytungixy xim tzuum

ma Dios ytiye tzajpjoty. E yi Dios y'ung huidibi iñaayb ma je mij'ane'mdac, yi' yi' mi'ijttaayb cuend'aty ma yi' yhuinduu. ¹⁶ Ca'p ajcxy jacjihuüiygixipy yuu tidzibi, ni xii'an ycajacnögüyb ajcxy, ni anbi ycajacyajtzibüyb ajcxy. ¹⁷ Com je Dios y'ung, je Cordero, huidibi cuj'amy yajpatp ma je Dios y'ane'mdac, je' yi' cuend'ajtp ajcxy, jadu'n nej jihuüy cöbixy cuend'aty, e yajnicxip ma je nii huätzpi ymuxy huidibi yejcp jugy'ajtin. Dios yajquégipy yi' ajcxy ytajin ymayin jigix ca' yjacjüygixipy yjacyáaxcixipy müd tajin mayin.

8

Je mihuixtucpi selli etz je poomjogi'ñ ac oori

¹ Co Dios y'ung, je Cordero, yaj'ahuaach je mihuixtucpi selli, huin'it y'ijty oy jahuengi cup hora amofi jüby tzajpjoty. ² Chi nhuin'ijxyich Dios y'áñeles huixtuc ajcxy ytinaaygixy anajty ma Dios yhuinduu, e yajmoy ajcxy huixtuc trompeta. ³ Huin'it jadüñ áñel müñ, chi je' ytinaay'ihuüy ma mesi huinduu ma je Dios ojadajtac. Je áñel ymüid anajty tüg poomjogi'ñ ac oori. Chi ymooyi poom may'amy huidibi jojcp. E je poomjoc tigüyb ma Dios yhuinduu quipxi müd juydacin nuucxtacin huidibi je jäy ajcxy ytumyb huidibi Dios ti huin'ixy ajcxy. ⁴ Ma je áñel yci'am jim je poomjoc choñ ñicxy ma Dios yhuinduu quipxy müd je oración huidibi ajcxy ytumyb je tiibi ypocyhuaatzcixy. ⁵ Huin'it je áñel majch je poomjogi'ñ, chi yaj'ujch müd jünbajc huidibi anajty jim ma je Dios ojadajtacac, chi najtzjibüyb naaxcixy, huin'it ooy yajmüdooy jidijtin micpi etz huidzuc e je naax ooy yücxy.

Je maytrompeti

⁶ Je huixtucpi áñeles ajcxy huidibi anajty müd je huixtucpi trompeti, ñayni'ixüyi ajcxy co yajxüxaangixy.

⁷ Je müdügpí áñel yajxuuxy je ytrompeti, e huin'it ooy eneedütz yca'y mihuüidü jün etz ni'py. Chi oy ycäy naaxcixy. E jahueengi cujc-huäcxy oy nögy je naax, je quipy etz je aay ujtz tzuxjatyp etz nöctay müy.

⁸ Je mümetzpi áñel yajxuuxy ytrompeti, chi ooy ycäy mejyoty jadu'n nej tüg mijcop janch tooyb anajty müd jün, e jahuengi cujc-huäcxy je mejy oy y'ahuimbity ni'py. ⁹ E jahuengi cujc-huäcxy oy y'ögy huidijaty anajty tzinaayb ma je mejy. E je maybarco huidijaty anajty ma je mejy, nañ jadu'n jahuengi cujc-huäcxy oy ytumyhuindigoydäy.

¹⁰ Chi je müdügügpí áñel yajxuuxy je' ytrompeti, e huin'it oy tüg madza' mijpi ycäy. Je madza' jadu'n nipaady nej tüg mijjün huidibi nayyajcodüxcim. Je madza' oy ycäy ma jahuen cacujc-huäcxy mijñi, etz ma nii muxy. ¹¹ Je madza' hue' je' anajty xii'adyii ta'm'ujtz. E je nii jahuen cacujc-huäcxy oy yajtni ta'm, jadu'n yta'mity nej ta'm'ujtz, e ooy jäy may y'o'cy müd je nii ycixpi co anajty ti y'ahuimbity ta'm.

¹² Je mümadaaxpi áñel yajxuuxy je' ytrompeti, e huin'it jahuen cacujc-huäcxy je xii oy yhuindigooy, e nañ jadu'n je po' etz je madza' jahueng cacujc-huäcxy oy yhuindigooy. E müd jadu'n ycixpi je po' etz je madza' yhuim'gixy jahuen cacujc-huäcxy agootz, e jahuen cacujc-huäcxy ytiicxin ocyejcni ajcxy xim tzuum.

¹³ Chi nhuin'ijxyich tüg me'ty anajty yqueec-huidity cuptzajp, e nmüdooyich co ymina'ñ janch mic:

—¡Ay! ¡Naaxhuüñjyäj ajcxy ayoobidijc! co anajty trompeti yajxüxy je jatugügpí áñeles ajcxy, huin'it ayo'n ypada'ñ je naaxhuüñjyäj ajcxy, ayo'n ypadamy ajcxy, ayo'n ypadamy ajcxy.

9

¹ Chi je mügooxpi áñel yajxuuxy je' ytrompeti, chi nhuin'ijxyich tüg madza' anajty ti ycäy naaxcixy. E chi je madza' yajmoy je ahuaasti huidibi müd yaj'ahuädzip je ayoodac ma Dios cuend'aty müdity je ca'oybidijc. ² Chi je áñel yaj'ahuaach je jut ma je ayoodac, e ma je jut jüby ypidzimy jadu'n nej jünjoc huidibi pidzim ma tüg horni. ³ E ma je joc ypidzimy ooy maymu' naaxhuüñgixy chachqueec-huidijtcixy ooy, e je mu' ajcxy ymooyi mic'ajt, jadu'n nej ca'ty müdity ytijp. ⁴ Chi je' ajcxy yajcötujcmoy co ca' ni ti aay ni ti ujtz yajhuindigöygixipy huidibi yajpatp naaxhuin, ni ujtz ni quipy. Jëyi janchtiy ycötujcmoy mooyi co huen yajtzaachüipy je jäy ajcxy huidibi ca' müdity Dios ytiy'ajt y'ixpejt ma yhuimboc. ⁵ Ca' ajcxy yajcötujcmoy co yjäy'aj'ó'ccixipy, jëyi co janchtiy ayo'n ajcxy yegipy mügoox po'. E je ayo'n huidibi anajty ajcxy yejcpy jadu'n je' nej co ca'ty jäy yajtzaachüy müd ytijp. ⁶ Je huin'it xii je huin'it tiempo jäy ajcxy ooy anajty o'cin ja'ixtaaygixy e ni ca' pätcixipy. Ooy anajty janijot'ajtcixy o'cin, e cöguégüib ajcxy je o'cin.

⁷ Je maymu' jadu'n je' anajty yquëxigy nej maygohuay huidibi ni'ix'ijtcixp co yajnicxáanigixy ma tzip ytuna'ñyü. Ymüid anajty je maymu' ma ycohuajc jadu'n anajty quëxigy nej oori coroni. E je maymu' yhuüñjijp jadu'n yquëxigy nej jäy yhuüñjijp. ⁸ Je

maymu' ymüid anajty ycohüay jadu'n nej töxyjäy ycohüay, e ytüitz jadu'n nej jamgaa ytüitz.⁹ E je maymu' ymüid anajty ajcxy jadu'n nej pujx huidibi müid ñinücx cohuaangixy. E co ajcxy queec-huidity, ooy ajcxy yqueec yaj'amüy jadu'n chachne'müy nej je carro huidibi cohüay ajcxy yjugujcxy co ñinücxixy ma tzip ytünyii.¹⁰ Je maymu' ymüid anajty ajcxy ypüxy tim jadu'n nej ca'ty ypüxy, e ma ajcxy ypüxy ymüid anajty ytijp. E ma ajcxy ypüxy müidity anajty je mic'ajt co jäy ajcxy yajtzaachihüipy migoox po'.¹¹ E je maymu' je' ajcxy yrey'ajtpy je ángel huidibi nigohuajc'ajtp je ayoodac, hue' xii'adyii hebreo'amy Abadón, e griego'amy yxiiijity Apolión, hue' je yxii yhuimbizimy: je huidibi yajhuindigooyb.

¹² Najx je' je ayo'n jayijpi, e ytigoy'ity je jametzpi ayo'n co je jayijpi ti y'ocjadyii.

¹³ Je midudujcpi ángel yajxuuxy je ytrompeti, chi nmidooyich tüg ayuc choon ma je midaaxpi huaj mu'n ity ma je altar ac óoribi, huidibi anajty ijtp ma Dios yhuinduu.¹⁴ Je ayuc ymina'ñ:

—Nima' je midudujcpi ángel huidibi anajty trompeti müid: “Najtzmazdi' yi midaaxpi ángeles huidibi ajcxy coxoch ijtp ma Eufates mijñüba.”

¹⁵ Huin'it oy yajcogejtuuticixy je midaaxpi ángeles, jigix yjäyayaj'o'ccixipy jahuen cacujc-huäcxy huidibi yajpatp ya naaxhuiñ. Je midaaxpi ángeles ni'ixi' je' anajty y'ijtcixy, je huin'it hori, je huin'it xii, je huin'it po', je huin'it jimijt co anajty yaj'ögaangixy jahuen cacujc-huäcxy je naaxhuiñybi jäy ajcxy.¹⁶ E nmidooyich co ajcxy michoy je soldadtijc huidibi anajty ajcxy cohuaangixy. E hue' mejtz migo'px millón anajty ajcxy ñaybattäyigixy je soldados ajcxy.

¹⁷ Jadu'n nhuin'ijxyich je cohüay ajcxy, e müid je ñijäy ajcxy huidibi anajty yaj'ñaayb. E je ñijäy ymüid anajty ajcxy pujx ma ycaach, je' müid ñinücx cohuaangixy. E je pujx hue' anajty ycolor tzaptz, azul etz pu'tz. Je cohüay ajcxy jadu'n anajty ycohüajc nej jamgaa ycohüajc, e ma ajcxy y'ahuac ypidzimy nej jün, nej jünjoc, etz nej azufre.¹⁸ E müid jada jahueng cacujc-huäcxy naaxhuiñybi chach'o'cy ajcxy müid je jün, je jünjoc etz je azufre ycxipi huidibi anajty pidzimb ma je cohüay ajcxy y'ahuac.¹⁹ Je cohüay ajcxy ymüid anajty mic'ajt ma y'ahuac etz ma püxy. Com je' ajcxy ypüxy jadu'n je' anajty nej xoox müid ycohüajc, e je cohüay ajcxy chach'ahuac'ndaaccixy müid ypüxy.

²⁰ E je jacyadyii jäy ajcxy huidibi ca' y'o'cy müid jadayaabi ayo'n, ca' ajcxy yjothuimbijty ma Dios, ca' ajcxy ixmajch je jibicpi huidibi ytungixp. E ni ca' ajcxy ixmajch nej ajcxy je ca'oybi huindzigüygixy. Nañ jadu'n ca' ajcxy ixmajch nej ajcxy huindzigüygixy huidijaty ajcxy oyduñyip müid plata, müid bronce, etz tzaadzech etz quipychech. Je huidijaty ajcxy y'oydumyib etz ñidzejtzuuticixy, ni yca'ijxcixy, ni ycamidoogixy, ni yca'yöygixy.²¹ E ni ca' je jäy ajcxy yjothuimbijtcixy ma Dios, ca' ajcxy ixmajch jadu'n nej ajcxy chachjäyayaj'o'ccixy, jadu'n nej ajcxy tzachcaxpojccixy ymigiügtijc, jadu'n nej ajcxy huingbi töxyjäy tzachmigapxtigooygixy, etz jadu'n nej ajcxy chachmeetzcixy.

10

Je ángel müid je mutz libro

¹ Nhuin'ijxyich co choon' tzajpjoty tüg ángel micpi ñiducyity müid joc, e müidity i'ñch ma ycohüajc. Je yhuñiyijp yquëxigy nej xii. Je' ytecy jadu'n yquëxigy nej mijjünye'n.² E ma yci' müidity tüg libro yëphuäcxy, e pidacy y'a'oydecy mejyhuingixy, e y'anajtytecy pidacy naaxhuiñgixy.³ Chi je ángel oy janch mic yaaxquecy jadu'n nej tüg jamgaa yäxy. E co anajty jadu'n ti yaaxquëgy, chi oy yajmidoy huixtujc jidijtin huidibi ycapx yci'm'ayuc.⁴ Co je huixtujcpi jidijtin oy ycapxtaaygixy, chi iich anajty njaaya'ñich huidibi ti capxy. Chi nmidooyich tüg ayuc choon' tzajpjoty xyñimäyich:

—Mi'it jada ayuc yüch huidibi yi huixtujcpi jidijtin ti capxy, ca' mjaay.

⁵ Chi je ángel huidibi nhuin'ijxyich co mejyhuingixy etz naaxhuiñgixy ytinäy, yujcxaay yci' a'oy'amybi tzajpcixy.⁶ Chi je ángel capxcödujcy co je Dios huidibi jugy'ajtp huinixii huiñitempo, je huidibi yajcojy je tzajp, je naaxhuiñybi, je mejy etz tüg'óciy huidibi jüiby yajpattaayb; e je Dios jadu'n ymina'ñ:

—Ca' jada yjac-huäcxibani mina nguexa'ñich tzaachypy ayo'n ya naaxhuiñ.⁷ Co yhuaad'ajtnip je xii je tiempo ma anajty je mihuixtujcpi ángel yxuux yajxuxtöndägy, chi cuyduunip je Dios y'ayuc yti'ajt huidibi ca'pin anajty huinjihuñy, je ayuc huidibi je Dios ytumbidijc je profetas ajcxy ñajtcapxij jecy'ajty.

⁸ Je ayuc huidibi nmidoohuich, je huidibi anajty ti choon' tzajpjoty, ycapxy je' jadüg'oc, e xyñimaayich:

—Nücx miich etz ciyig yi libro huidibi yëphuäcxy yi ángel ymüid ma yci'. Je' je' je ángel huidibi anajty tinaayb mejyhuingixy etz naaxhuiñgixy.

⁹ Chi n'óyich ma je ángel nbijctzooyich co huen xymöyich je pi'clibro, chi je' xyñimaayich:

—Matz e cojucxnax, e xyajta'mmüip mjet e ma miich m'ahuac mjihuüipy päg jadu'n nej ceripäg.

¹⁰ Huin'it iich je pi'clibro ngiygy huidibi je ángel anajty ymüid ma yci', e chi iich je' ngojicxnajxy. Ma iich n'ahuac njihuüiyich janch päg jadu'n nej ceripäg. Co oy ngojicxnajxtäyich, chi oy y'ahuimbijtni janch ta'm ma iich njot. ¹¹ Chi mic'amy nyajnamaayich:

—Nixx miich capxhuäcx jadüg'oc je ayuc huidibi Dios ti xymöy, je huidibi ti mgapxhuäcxy ma je mayñaax maygajp, ma je mayñaciones, huidibi canaag ayuc capxcixp, etz ma je reydiyc ajcxy.

11

Je metzpi testigo

¹ Chi jada' nyajmooyich tüg paxy, jahuengi jadu'n anajty yquëxigy jadu'n nej baari huidibi quipx yajhuamb. Chi ajcxy xyñmaayich:

—Pidig e quipxta' yi Dios ytjic, nañ jadu'n quipx je mesi ma Dios yajhuindzigy, etz nañ jadu'n michou naag jäy ajcxy jüiby Dios huindzigyigy. ² Je Dios ytiba' ahuing miich je' pidäg, ca' mguipxipy. Com yi' yi' ti ycidigiyi yi jäy ajcxy huidibi ca' yjudiojäyity. Yi jäy ajcxy huidibi ca' yjudiojäyity ymimadägamyb ajcxy je Jerusalengajp ma Dios müidity tzinaydac etz ane'mamb ajcxy jüiby huixchigüipx metz po'. ³ Ich metz testigo nguexipyich ma je cajp ma Dios müidity tzinaydac, e yi' ajcxy capxhuäcxamb iich n'ayuc tüg mil jametzmigö'px jatugi'px xii. Yxoxyity ajcxy müid huit nicuyjaam ixcujaam.

⁴ Je metzpi testigo jadu'n nipaady nej je metzpi olivo cop etz je metzpi candelero huidibi tinaaygixp ma je Dios yhuinduu, je huidibi ñaaxhuiñybi ane'mb. ⁵ Pen ji pin nej jaty midundigoya'ñ je metzpi testigo, je' ajcxy yajpidzimip je' ajcxy jün ma y'ahuac, yjicxtähuipy yjündähuipy je' ymidzip. E jadu'n je' y'ögipy pinjaty anajty je metzpi testigo midundigooyb. ⁶ Je metzpi testigo ymüid yi' ajcxy cötujc co ahuäctüjccixity je tzajp, ca'ydi ytüj jadu'ñi tiempo anajty iihuäcxixy capxhuäcxixy Dios y'ayuc ytij'ajt. E nañ jadu'n ymüid ajcxy cötujc co nii yaj'ahuimbijtcixipy ni'py. Yi' ajcxy yajtunüib yaj'jadüib canaagnax ayo'n ya naaxhuiñ, naag'oc anajty ytimdzöjccixy. ⁷ E co anajty je metzpi testigo ajcxy yajmaaygixy ytung, chi je iyujc huidibi anajty pidzimb ma je ayoodac, je abismo, je' je' tziptuunip müid je metzpi testigos etz yaj'öctähuip je metzpi testigo. ⁸ Chi je metzpi testigo ñinixx ajcxy yhui'mipy mijñigujc mjtügujc jim ma je mij ciudad ma je Huindzin Jesucristo yajcrudzpjeti, je cajp huidibi tundigooy müid Dios tim jadu'n nej Sodoma etz Egipto ytundigooy jecy'ajty. ⁹ Nijëjty jäy ajcxy huidibi xi ya conaaxip cogajp, oy ypinjäyity, oy ti ayuc capxcixy, y'ixipy ajcxy tugiig xijagup je metzpi testigo ñaaxnixx mjtügujc, e ni ca'a'ixihuipy ajcxy co yajnaaxtigihuiyib. ¹⁰ Huidijaty ajcxy tzinaayb ya naaxhuiñ ooy yxondäaccixipy etz yjotcugiyigixipy müid je' ycixpi co je metzpi Dios ytestigos ajcxy anajty ti y'o'ccixy. Chi je mayjäy ajcxy miñ xyipy ñaymööyigixipy tijaty, e ñayajñigüjxigixipy tijaty. Com je metzpi yëdyic huidibi nidiy'ajt ajtp anajty Dios ytij'ajt, ti anajty ooy ayo'n yejccixy ma naaxhuiñjäy ajcxy. ¹¹ Codugügxii jacup naxy, chi Dios cijx yajjuygipjctäy je metzpi öcpi, e chi ajcxy jadüg'oc ypidigy, e pinjaty je' iix, ooy je' ajcxy chachchigiy. ¹² Je metzpi testigo huidibi nidiy'ajt Dios, midoy ajcxy tüg ayuc janch mic jüiby tzajpjoty anajty ñimäyigixy:

—Pejtcix yeeby cix.

Chi ajcxy ypa'ttigiy tzajpjoty ma tüg joc, e iixi ajcxy ymidzitiyc. ¹³ E janch huin'itiy ooy naax yücxy müid tüg mic uix. E tüg picypy je majc picypy jäy jim Jerusalén oy ymijähuiyigy. E müid je uix ycixpi y'o'cy ooy mayjäy, ñaybaati je öcpi huixtujc mil yëdyic. E jacjadyi jäy ooy chigiyigixy yjihuiyigy, e öjadajtcixy mibijctzoogixy ooy je Dios tzajpjoty.

¹⁴ Ti ñaxy je mimetzyi ayo'n, chi tzojc ymiñ je midugüjpi.

Je mihuixtucpi trompeti

¹⁵ Chi je mihuixtucpi ángel yajxuxy je' ytrompeti, e huin'it oy yajmidooy may'ayuc tzajpjoty mic yminañ:

Je ane'min huidibi ya naaxhuiñ, yi' je' cham müid ajt nHuindzin Dios etz yi' yCristo, e yi' je' ane'mip huinixi huinitempo.

¹⁶ Je iipxmidaaxpi mijjäy huidibi anajty ajcxy iñaayb ma y'ane'mdac ma Dios yhuinduu, cijx je' ajcxy yhuij'ihuuyaaygixy, e chi ajcxy ooy Dios iibaty capxpaty, yminaangixy:

¹⁷ Huindzin Dios, Dioscoyuyip nyajnäxcixpich ma miich, huidibi jac mic'ajt müid ca'ydi jac pin. Miich tüg'öciy mdundaayb mjañaayb mnejhuüidaayb. Miich je' huidibi ijtñaayb, e ti m'ijtnäy, e m'ida'ñyi, com miich ti m'ijxcugiy je mgötujc, e ti mbidägy m'ane'min.

¹⁸ Mayñaax maygajp mayñaaxhuiñjäy ooy yjotmäty ajcxy, müid co ti xii hori paady co miich mdzaachytuna'ñ je jäy ajcxy müid ypocy ycixpi. Ti je xii je hora paady co miich

mdiyduna'n je jäy ajcxy tñibi y'o'ccixy. Ti je xii je hori paady co miich mmöhua'n je mdumbidijc ypremio, je mdumbidijc huidijaty najtzcapxiiy ajcxy miich m'ayuc, huidijaty tudägy'ajtñi ti patcixp ma miich, je huidijaty miich mxñ xychigiiy, huen ymij'ana'city huen ymutz'ana'city. Ti je xii je hora paady co miich myajitgoya'n je pinjaty yajhuindigooygixp naaxhuiñyäjy ajcxy.

¹⁹ Je huin'it tiempo oy Dios je ytiç y'ahuäch jiihy tzejptoty, e chi nhuin'ijxyich je caax ma Dios yçötujcin y'ity. Nañ jadu'n oy nhuin'ijxyich huidzuc, etz nmidooyich co ooy ñe'my, etz nmidooyich enee yjidijtin, etz njihuiyich tög ujx, etz ooy yca'y eneediitz mijatypi.

12

Tög töxyjäy etz je ama'y tza'n

¹ Je huin'it hora oy yquëxgy tzejpcixy tög iixpejt mijpi. Tög töxyjäy ñidigooyity miid xii, jadu'n nej jihuüy miid tög huit ñimochity, e jadu'n yquëxgy nej jihuüy anajty po' yajhuäcpey, e ymiid ma ycohuajc tög corona ac oori huidibi majmetz madza' miid. ² Jadayaabi töxyjäy hue' anajty ungmiijäy'ajtp, e janch yaax tinaayb je' anajty miid je tzaachyp, miid co y'ung anajty yajma'xung'ada'n. ³ Huin'it oy yquëxgy jadüg tiy'ajt iixpejt tzejpcixy. Tög ama'y tza'n janch mij, tzaptz ycolor, e miidity huixtujc ycohuajc, majc ymu'n, e tög corona majaty ycohuajc. ⁴ Je mij tza'n miid je' ypixy jugujcmujcy jahueng cacujc-huäcxy je madza' jim tzejpcixy. Chi je' najtzyemiyday je maymadza' naaxhuiñyigixy. Je mij tza'n oy yhuäcxipy ma je töxyjäy yhuinduu huidibi anajty ungbadamb tzojc, chi tzüdzan' je pi'c'ungma'xung janch tim jeyi anajty yma'xung'aty. ⁵ Chi je töxyjäy yajma'xung'ajty tög pi'cyëdijc, huidibi ane'mip miid Dios ymic'ajt, ymiid y' tög pujxtajc huidibi iixpejt ajt co mij ane'min miidity ya naaxhuiñ. E yajpijcy je y'ung, chi yajnicxi ma Dios etz ma je' y'ane'mdac. ⁶ Chi je töxyjäy yqueecy ñicxy mijtigüduum, ma anajty Dios ti ñi'ixiiy y'it ylugar co jim y'idipy, e jim ymöhuiy ycaayin y'uucin tög mil jamejtmigo'px jatugi'px xii.

⁷ Je huin'it tiempo tög tzip yjati tzejptoty miid je' ycixpi. Chi Miguel huidi mij çötujcin miid, miid jadyii y'angeles ajcxy, ooy chiptuñ miid je ama'y tza'n etz y' y'angeles ajcxy. ⁸ E ca'p je ama'y tza'n ajcxy ymadacy ma je tzip, e ca'p je' ajcxy miid'ajty tigiydac tzejptoty. ⁹ E jadu'n Dios yajqueecy je mujcu', je ama'y tza'n mijjäybi, jiihy tzejptoty. Je' je' je ama'y tza'n huidibi xii'ajtp diablo etz Satanás, je huidibi huin'imb tög'öcy naaxhuiñyäjy. Je mujcu', je ama'y tza'n, miid je' y'angeles ajcxy oy yajcötijnajxtäy ya naaxhuiñ.

¹⁰ Je huin'it hora nhuinmidooyich tög ayuc janch mic tzejptoty choon, yminañ:

—Ti je xii je tiempo nigoody mina Dios ti nihua'n ti yajnidzögy jäy ajcxy ma je mujcu'; mina Dios ti yajniquëxgy y' ymic'ajt; mina Dios ti yajniquëxgy y' y'ane'min; etz mina Cristo ytiigiiy ane'mbi miid ymic'ajt. Com ti Dios çötijnaxy je mujcu' huidibi tzachxip iich ajt nmigütiç, je mibijcpidijc. Je mujcu' anajty tzachxip ajcxy xim tzuum ma Dios. ¹¹ Hich ajcxy nhermanotijc ti y' mimadaaccixy je mujcu' miid je Dios y'ung ñi'py, etz miid je' y'ayuc ytiy'ajt tñibi mibijcixy, je huidibi ajcxy nidiy'ajtcixp ma y' mayjäy. Ca' ajcxy tziigy anajty co yjugy'ajt ytiçöoygixp. Nigi ni'ixi y'ijtcixy anajty miid ymibijcin oy ytimy'ö'ccixipy. ¹² Jotcujc'ajtcix etz jotcugiiygix huidibi jiihy tzinaaygixp tzejptoty. Ayo'n ypadamyb ajcxy huidibi tzinaayb naaxhuiñyigixy etz mejyoty. Com je mujcu' ti je' ycidägy ma miich ajcxy miid chip y'ejcin. Com je mujcu' ñejhuuyb co tim jayinjaty jahuenjaty xii tiempo jacmiidity.

¹³ Co je mujcu' iixy co ti yajcötijnaxy ya naaxhuiñyigixy, chi ooy pahuidijttacy je töxyjäy huidibi anajty ti yajpi'c'aty pi'cyëdijc. ¹⁴ Chi je töxyjäy metz me'tyqueec mijpi yajmoy, jigix çöguëgipy je ama'y tza'n, ñicxip agueegëccip mijtigüduum ma je ama'y tza'n ca' ñijädiib. Jim mijtigüduum yajmoy ycaayin y'uucin tugiig jimijt ja cup. ¹⁵ Chi je ama'y tza'n ooy nii yajpidizimy ma y'ahuac, jigix y'ahuimbidity mij nii huidi je töxyjäy pagujip mij nijoty. ¹⁶ E y' naax ooy je töxyjäy pubejty, chi je naax y'ahuäcxy, e uuctiiztay je nii huidibi anajty je ama'y tza'n ti yajpidizimy ma y'ahuac. ¹⁷ Miid jada ycixpi je ama'y tza'n ooy y'ahua'ndacy miid je töxyjäy, chi ñicxy tziptumbi miid je töxyjäy y'ap y'oc huidibi jacjimip, je' ajcxy huidibi cuydumb Dios y'ane'min yçötujcin, je' ajcxy huidibi cuydumb je ayuc huidibi Jesucristo anajty capxhuäcxyp.

13

Je metzpi ca'oy'iyujc

¹ E jim ndinay'ihuuyich ma püjot mejypäbi. Chi nhuin'ijxyich co tög iyujc janch oy chigiiyñi ypidizimy mejyoty ymiid anajty huixtujc ycohuajc, e majc ymu'n. E ma ymu'n miidity majc corona. E ma ycohuajc miidity anajty cojaay yxii huidibi yajotmat'p Dios. ² Jadayaabi ca'oy'iyujc huidibi nhuin'ijxyich, jadu'n anajty yquëxgy nej tög cuuxyubijy. E ytecy jadu'n anajty yquëxgy nej osi ytecy, e y'ahuac jadu'n anajty yquëxgy nej jamgaa

y'ahuac. Chi je ama'y tza'n oy cötujc möy, mic'ajt möy, mij'ane'min möy, je ca'oy'iyujc. ³ E n'ixyich tög ycohuajc ma je ca'oy'iyujc co mij chaachijity, nej jihu'y je' yaj'ögüib. Chi je chaach'au oy choogy, e tög'öciy naaxhuiñjyay ooy janch jihu'yigixy huinmaaygixy müd jada ycixpi co ti choocy. Chi je mayjáy ajcxy panícxy je ca'oy'iyujc. ⁴ Je mayjáy ajcxy ooy huindzigüygixy je ama'y tza'n, je mujcu', com je' co anajty ti möy cötujcin ane'min je ca'oy'iyujc. Chi ajcxy nañ jadu'n ooy huindzigüygixy je ca'oy'iyujc, chachminaangixy:

—¿Pin jada' ocjadu'nip nej jadayaabi ca'oy'iyujc, e pin jada' octziptuunip müd yi'? Ca' pin.

⁵ Chi je ca'oy'iyujc yajmooyi mic'ajt, jaydëbi amij agix capxip etz nigapxip Dios oy jibic, nej huaad Dios yajjotmäty. E nañ jadu'n mic'ajt moy, jaydëbi müd adipy ane'min cötujcin huixchigüipx metz po'. ⁶ E jadu'n je' tuuñ. Nigapxy ni'ojüy ooy Dios. Nigapxi Dios yxü oy ca'oy, etz nigapxi ni'ojüy Dios ytijc. Nañ jadu'n nigapxy ni'ojüy huidibi ajcxy jilby tzinaayb tzajpjoty. ⁷ Chi mic'ajt ymooyi, jigix chiptuunip müd je huidijaty mibijcp Dios, huidijaty müd ity Dios, ixti mibaad mimadaaccixy. Nañ jadu'n mooyi cötujcin mic'ajt, jigix ane'mip naaxhuiñjyay huen huidibi razaity huen huidibi cajpity, huidibi capxcixp huen huidibi ayucity. ⁸ Tög'öciy mayñaaxhuiñjyay ajcxy huidijaty janch ni ycamüñ yxü jaybety ma je jugy'ajt libro huidibi je Dios y'ung, je Cordero, ymüd. Dios yhuinma'ñypidacy jayijp ca'ni naaxhuiñybi anajty chondägy co y'ung y'öga'n müd jay ajcxy ycixpi, jaydëbi cijxjaayi ajcxy yxü ma yi jugy'ajt libro.

⁹ Pinjaty tädz'ac müd, pinjaty mido'mbigamb jada ayuc, huen mido'mbijccixy. ¹⁰ Pen Dios ti yhuinma'ñypidägy co pinjaty ymigüg yajnicx mach, nañ jadu'n je' ajcxy nicxip mach ci'm. Pinjaty ymigüg yaj'öcp nañ jadu'n y'ögip jadu'n nej ymigüg anajty yaj'ögy. Paady yicxp yi' ajcxy huidijaty mibijcp Dios, huen yajtungixy müd ymigügtijc mecxtujcin etz mibijcin.

¹¹ Huin'it nhuin'ixyich jadüg ca'oy'iyujc choon naaxjoty, e ymüd anajty metz ymu'n, tim jadu'n nej pi'cöbixymang ymu'n. E je' jadu'n anajty ycapxy nej je ama'y tza'n ycapxy. ¹² Je mimetzpi ca'oy'iyujc ymüd ane'min huidibi je jayijpi ca'oy'iyujc ti ymüyüi. Je mimetzpi ca'oy'iyujc jadu'n ane'my co je poj naaxhuiñ etz je naaxhuiñjyay huen ojadajtcixy huindzigüygixy je jayijp'atypi ca'oy'iyujc huidibi anajty je chaach'au ti chögy. ¹³ Nañ jadu'n ooy anajty tijaty mijhuinma'n tuñ, ixti jin yajcödigüyb tzajpcixy, yajcay naaxcixy ma jay ajcxy yhuinduu. ¹⁴ E müd je mijhuinma'n huidibi je mimetzpi ca'oy'iyujc ytuñ ma je jayijpi ca'oy'iyujc yhuinduu, chi je' huin'ñ huidijaty ajcxy tzinaayb naaxhuiñ. Nañ jadu'n je' pidacy y'ane'min co yajni'gojtutcxixy je ca'oy'iyujc huidibi anajty tzachijp müd espada, e ca' y'ögy, jadu'n anajty jactzinäy. ¹⁵ Je mimetzpi ca'oy'iyujc yajmic'ajtmoy co yajjugy'adip je tzaadzech tiibi anajty yajni'gojtutcxixy, jigix je' ycapxipy etz nañ jadu'n jigix je' ane'min pidägipy co yaj'öctahuipy pinjaty ca' y'ojadadyüi. ¹⁶ Chi je mimetzpi ca'oy'iyujc ane'my yi pi'tijc, mij'anätiyc, mijjädijc, comeen'dijc, ayoo'bitijc, tumbidijc, midumbidijc etz jac pinjaty co huen ajcxy tiy'ajt i'xpejt jadu'n pidaaccixy ma ajcxy y'a'oygi', o pen ca', ma yhuimboc. ¹⁷ Jadu'n ytuñ jigix ni ca'p anajty pin huaad ti juy toogy, pen ca' je' ajcxy ymüd je ca'oy'iyujc tiy'ajt y'ixpejt, o yxü, o je' yxü ñinúmero. ¹⁸ Jadayaabi ayuc chojcipy i'xpjcin, pinjaty huin'ihuyüy jëbi mihuinma'ñybaady ti número je ca'oy'iyujc müd. Je' je' je' número huidibi tög jay müdity. Je jay ñinúmero hue' je' tudujc migo'px jatugüpx tudujc.

14

Je nimigo'px jahuixchigüipx milbi yëydijc ajcxy y'iy

¹ Chi jada' nhuin'ixyich cumäyjoty je Dios y'ung, je Cordero, anajty ytinäy ma je cögox huidi yxü Sión. Ymüd anajty migo'px jahuixchigüipx madaax mil jay huidibi anajty ajcxy müd cojay ma yhuimboc je Dios y'ung yxü, etz yi' yTeedy yxü, je Dios Teedy. ² Nhinmidooyich tög ayuc choon tzajpjoty, jadu'n nmidooyich nej mijñü y'a'ñch, nej enee yjidity. Hue' je' anajty nmidooyich nej mayjáy y'arpa yajcoogixy. ³ Ooy anajty ajcxy ügixy tög iy jemybi ma je mij'ane'mdac yhuinduu, ma je midaaxpi iyujc jugy'ajtmüdp yhuinduu, nañ jadu'n ma je mijjáy ajcxy yhuinduu. Jac ni pin je' anajty ca' huaad ixpicy je iy, jëyi ajcxy je huixchigüipx madaax milbi jëbi i'xpjccixy je iy, je huidibi ajcxy Dios ti yhuin'ixyüi etz ti yajni'dzögy ya naaxhuiñ. ⁴ Jada je' ajcxy huidibi ca' ajcxy mijgapxtigoogixy töxyjädijc, huadz tudägy ajcxy yjot yhuinma'n müdity, ca' ajcxy pijccixy. E ypanicxyp ajcxy je Dios y'ung, je Cordero, oy tim ma'ämy ñicxy. Yi' ajcxy je jayijp'atypi jay ya naaxhuiñ huidibi Dios ti yjuybidzimy ma anajty i'jtcixy codoogiy müd ypocy ycixpi. Jadu'n ajcxy nipaady ma Dios Teedy etz ma je' y'ung, je Cordero, nej je tim jayijpi je almas ajcxy huidibi ti yajpidzimy ya naaxhuiñ. ⁵ Ni ti anü ti ycaayjaady ma je' ajcxy. Com ca' ajcxy tibocy müdity, ca' ti xihuin ajcxy müdity ma Dios y'ane'mdac.

Je nidugüppi ángeles ajcxy y'ayuc yti'y'ajt

⁶ Chi nhuin'ixyich jadüg ángel yqueec-huidity cuptzajp, e ymüd anajty Dios yti'y'ajt jemybi oybi huidibi i'jtp huinixü. Hue' je' yajcapxhuäcxip ma huidibi anajty ajcxy tzinaaygixp

naaxhuiñ, huindu'my nación, huen huidibi jäyity, huidibi capxp huen huidibi ayucity, huidibi tzinaayb ma huen huidibi cajpity. ⁷ E je ángel ymina'n anajty janch mic:

—Tzigüygix Dios, huin'ügix huinyaaxcix cōmaygix Dios. Ti paady je xii je hori mina Dios tiyduna'n yajtigoya'n yi' ajcxy huidibi jibic tumb. Ojadajtcix je huidibi yaj'oyüy je tzajp etz je naax, je mejy etz majaty nii ymuxe.

⁸ Co je midügpi ángel ycapxtaay, chi je mimetzpi ángel ymina'n:

—Ti ymic'ajt ytigoydäy je Babilonia je mijpi cajp. Yi Babilonia jäy ti yajhuinma'ñy digoydäy je naaxhuiñjäy müd yjibic-huinma'n, paady yi Babilonia jäy ayo'n müdity cham, com je Dios ti ymijotmättäyüi ajcxy. Jadu'n Babilonia nipaady nej tüg töxyjäy huidibi huin'ümb yëydijctjc müd anii etz jocnii.

⁹⁻¹⁰ Co je midügpi ángel ycapxtay, chi je midügpi ángel ymina'n janch mic:

—Pen pinjaty huindzigüyb yajmij'ajtp je ca'oy'iyujc etz je ñügojtuutin etz nañ jadu'n cōbijccixy je ca'oy'iyujc yti'ajt y'ixpejt ma yhuimboc o ma yci', hue' Dios tzaachytunüib yi jadu'mbi jäy ajcxy mictägy, ypaadip ajcxy Dios chip y'ejcín. Tim jadu'n nipaady nej jihüiy Dios yaj'ügyüi ajcxy je vino nii huidibi yi' ti ni'ixiy. Dios ti ni'ixiy je it ma ajcxy ayo'n pada'n, tim jadu'n nipaady nej je tasi ma Dios yvinonüi ijtp. Chi je' ajcxy ayo'n paadipy ma ytoy je mijün müd azufre ma je Dios y'áñgeles yhuinduu etz je Dios y'ung, je Cordero, yhuinduu. ¹¹ Je jünjoc huidibi anajty pidzimb ma anajty je mayjäy ayo'n paatcixy, pidzimip je' huinixüi huinitiempo. E ni pōocxín ycaca'ty xüim tzuum müd je pinjaty anajty huindzigüyb pa'tjihüiyb je ca'oy'iyujc etz müd y'ahuinax, o pen ycōbijcipy anajty je ca'oy'iyujc yxii ycojayity ma yhuimboc o ma yci'. ¹² Com Dios chaachytunamyb je jäy ajcxy huidibi ijtp müd je ca'oy'iyujc, paady ycixp copicy co yi jäy ajcxy huidibi ijtp müd Dios huen cuydugixy yajxon Dios y'ane'mín ycōtujcín etz huen mibijccixy mijpidaaccixy tudägy Jesús, etz nañ jadu'n yajtungixy mecxtujcín ma ajcxy chinaayín.

¹³ Nmidoohuich tüg ayuc tzajpjoty choon xyñimäyich anajty:

—Cojay jada ayuc: “Jadachambi etz jacnicxpi xii tiempo, jotcujc ajcxy huidijaty öccixp co mibijccixy je Huindzin Jesús.” Je Espiritu Santo ymina'n co jadu'n tunamb jadamb, pocxnip ajcxy nej ytungixy, e co ajcxy yjadipy tzajpjoty, chi ajcxy nejhüihup je' ajcxy tzajpjoty tzinaaybi jadu'n nej je mibijcpi ajcxy anajty oybi ti tungixy.

Co Jesús anajty miñ tiyduñ tzaachytuñ jibicjäydijc

¹⁴ Chi jada' nhuin'ixyich tüg joc janch poob. E ma je joc nïcx iñäy tüg yquëxügy nej je jäy huidibi tzoön tzajpjoty (je Cristo). Je' ymüid anajty ma ycohuajc tüg corona ac oori, e ma yci' müdity tüg hoz janch jippi. ¹⁵ E ypidzimy ma je Dios chinaydac jadüg ángel, je' tzachmüyaxy anajty janch mic je huidibi anajty iñäyb jocnigüxy, ymina'n:

—Pidäg yi mhoz, e yajpidig yi cosecha, com ti paady je xii je hori etz je cosecha ti chamni jiiyby naaxhuiñ.

¹⁶ Huin'it je' pidacy je' yhoz ya naaxhuiñ, je huidibi anajty iñäyb jocnigüxy, chi ya naaxhuiñ yajpidig je ycosecha.

¹⁷ Nañ tim jadu'n huin'it jadüg ángel ypidzimy ma je Dios chinaydac jiiyby tzajpjoty. Nañ jadu'n je' anajty müdity yhoz janch jippi. ¹⁸ Chi jadüg ángel ypidzimy ma je Dios ojadajttac huidibi anajty cōtujc müd ma je jün. Chi yaaxi janch mic je huidibi anajty je' yhoz janch jippi müd, chi nimay:

—Pidäg yi mhoz janch jippi ma yi muuxycha'm cosecha huidibi yajpatp jiiyby naaxhuiñ, com ti ooy chamni.

¹⁹ Chi je ángel yajnaxy je' yhoz naaxhuiñ, chi yajpidig je camuuxycha'm cosecha, chi tüg'it'y yajnigidity ma huaad yajhuinmicxy. Hue' je' yhuimbizimy co je' je' je' mij ayo'n je mijtzaachypi huidibi Dios yquexamyb müd jäy ajcxy ypocy ycixpi. ²⁰ Je camuuxycha'm hue' je' oy yajhuinmicxy Jerusalén cajppa'. Ma anajty ti y'ocnigidacpi ypidzimy ooy ni'py janch com, ycoody mabaad je cohuay ajcxy müdity yfreno, e ymijhuin'ajtin hue' anajty müdity tugiig migo'px kilómetro.

15

Yi ángeles ajcxy müd je huixtujcnaixpi ayo'n

¹ Huin'it nhuin'ixyich jadüg tiy'ajt ijxpejt janch mijpi tzajpjoty, e janch oy huinmaayñi. Huixtujc ángeles anajty müdity c'íam je huixtujcpi tzaachypi ayo'n huidi cogixüñip, e müd jadu'n ycixa'n ytigoya'n Dios chip y'ejcín.

² E nhuin'ixyich jadu'n nej tüg mejy ac vidrio, e je vidrio mihuididi jün. E jim anajty je jäy ajcxy huidijaty madac co ca' huindzigüy anajty je ca'oy'iyujc etz je' y'ahuinax, je huidijaty ca' ajcxy cōbijci je ca'oy'iyujc yxii ñinúmero. E jim anajty ajcxy ytinaaygixy nigixy ma je mejy ac vidrio huidibi janch adücxp ajajp anajty, ymüid ajcxy je arpas huidibi ajcxy Dios mooyi.

³ Ooy anajty iigixy je Moisés y'iy, je Dios ytumbi etz nañ jadu'n anajty iigixy je Dios y'ung, je Cordero, y'iy huidibi minamb:

Mij ooy, etz janch mijhuinma'n huidibi miich ti mduñ. Huindzin, miich Dios huidibi jac mic'ajt miidip ca'ydí jac pin. Janch tudägy miich mni'aa mdu'aa. Miich rey'ajtp huindu'nyñaaxhuiñ huinixi huinitiempo.

⁴ ¿Pin miich xyca'octzigihuaamb, Huindzin? ¿Pin miich xyca'occömayaanip mxii? Tug'öciy naaxhuiñyäjy xyajmij'adipy xyhuindzigihuipy, com miich naydügpajc je huätzpi Dios, com miich nyaj'ijxp mgötujcin co ytudägy.

⁵ Co jadu'n yjajti, chi n'ijxyich co y'ahuuach je Dios y'it jüby ma Dios ytije huidibi yajpatp tzajpjoty, ma y'ity je tzaa ma yjaybetyity Dios ycötujcin. ⁶ E ma je Dios yajhuindzigiy yajpa'tjihuüy, jüby ypidzimy huixtucj ángeles. Ymiid anajty ajcxy yci'am huixtucj ayo'n tzaachypi. Hue' anajty ajcxy yxoxity miid huit janch oybi janch huätzpi, e janch adicxp ajajp anajty. Ymiid anajty ajcxy oorihuñ mabaad ycaachyjip. ⁷ Nidüg je midaaxpi iyujc jugy'ajtmidpi moy je huixtucpi y'ángeles huixtucj tasi ac tim oori, janch ujtj je tasi miid je Dios chip y'ejin. ⁸ E je it ma Dios yajhuindzigiy yajpa'tjihuüy yajpa'tjihuüy ujtztay je' miid je jinjoc huidibi jadu'n ñipaty nej je Dios y'oy'ajtin etz Dios ymic'ajtin. E ni pin anajty huaad ca' jüby ytigiy ma je Dios ytije jüby tzajpjoty, ixti cooni je' ycixtähuipy je huixtucpi ayo'n, je tzaachypi huidibi je huixtucpi ángeles ajcxy ymiid.

16

Je tasi huidibi ujtz miid ayo'n tzaachypi

¹ Chi nmidooyich tüg ayuc choon ma Dios ytije jüby tzajpjoty, nimay anajty janch mic je Dios y'ángeles nihuixtucpi:

—Nixc yajxy yajyojctuuicx jüby naaxhuiñ yi huixtucpi tasi huidibi ujtztay miid Dios chip y'ejin.

² Chi ñicxy je midügpi y'áangel, chi je' ytasi yajtemduty jüby naaxhuiñ ujtz miid may'ayo'n. E tüg'öciy je mayjäy huidibi anajty ajcxy miid ma yhuimboc je ca'oy'iyujc ytiy'ajt, pinjaty anajty je ñigotjuutin huindzigiyip pa'tjihuüyip, chi je' ajcxy ypaati ñibidzim tüg ñibüd janch jibicpi, e huidibi janch pijcp.

³ Je mimetzpi y'áangel yajyojctuty je' ytasi huidi anajty ujtz miid ayo'n mejyhuingixy. Chi je mejy y'ahuimbity ni'py, jadu'n nej jihuüy öcpi ni'py. E huidijaty iyujc jüby tzinaayb mejyoty, cijx je' y'öctäy.

⁴ Je midugigpi y'áangel yajyojctuty je' ytasi huidi anajty ujtz miid may'ayo'n maajaty je mijni, etz maajaty ni ymuxe, nañ jadu'n ac ni'py je' y'ahuimbittay. ⁵ Chi nmidooyich co je ágel ymína'n huidibi ane'mb je ni:

—Huindzin Dios, tudägy mduñ co ti mdiyduñ je naaxhuiñyäjy ajcxy miid ypocy ycixpi, e jadu'n ti mguexy mij ayo'n ya naaxhuiñ, Huindzin Dios, janchypi huätzpi miich, huidibi ijtnaayb etz ti m'ijtnäy. ⁶ Com je naaxhuiñyäjy ajcxy tundigooy co ajcxy teemi yojci je miibicpidijc ni'py, je huidibi mhuin'ijx, je huidibi ajcxy miich m'ayuc najtzcapxayb anajty. Paady ycixp miich je ni huidibi yi naaxhuiñyäjy y'uuccixyp, ti myai'ahuimbity ni'py, com jadu'n ajcxy mihuaadity je tzaachypi miid ajcxy ypocy ycixpi.

⁷ Nmidooyich co pinjaty ma je it ma yajhuindzigiy Dios, ymína'n:

—Janch jadu'n, Huindzin Dios, huidibi tüg'öciy mic'ajt miid, miid mdiy'ajt etz miid mudägy'ajtin, ti mdiyduñ je naaxhuiñyäjy ajcxy miid ypocy ycixpi.

⁸ Je mimadaaxpi Dios y'áangel yajyojctuty ma je xii je' ytasi huidi anajty ujtz miid Dios chip y'ejin. Chi je xii yajmoy ymic'ajt co jäy nögib miid je' yjin. ⁹ E tüg'öciy jäy ajcxy yxidzaydaayi janch mic. E ni ca' ajcxy yhuinma'n yajtigajch, ni ca'ojadajtcixy ni ca' cömaygixy Dios. Nigi ajcxy ooy jibic Dios nigapxy ni'oñiy, je Dios huidibi ane'mdaayb tüg'öciy ayo'n miid ymic'ajt.

¹⁰ Je mimigooxpi y'áangel yajtemduty je ytasi, huidi anajty ujtz miid Dios chip y'ejin, ma je ca'oy'iyujc y'ane'my etz ma tüg'öciy it lugar ma je ca'oy'iyujc y'ane'min, e huin'it oy ycoodziygidactäy. Yi jäy ajcxy ooy ytood oc'adzützmüccixni miid je ayo'n tiibi anajty ytuñiyi yjadyi. ¹¹ Per ni jadu'n ajcxy ca'ixmajch je jibicpi huidibi anajty ajcxy ytumyb. Nigi ajcxy ooy oyñinej ycapxcixy etz ni'oñiygixy Dios tzajpjoty miid je jübi pa'mi etz je ñibüd ycixpi.

¹² Je midudujpi y'áangel yajtemduty je ytasi huidi anajty ujtz miid Dios chip y'ejin ma je Eufates mijni. Chi je mijni ytich jigix jebi ajcxy je reydiñ ñaxy huidibi ajcxy tzoomb xiibidzimy'amy.

¹³ Chi nhuin'ijxyich co ypidzimy ma je ama'y tza'n y'ahuac, etz ma je ca'oy'iyujc y'ahuac, etz ma je profeta falso y'ahuac ypidzimy tugiig ca'oybi. E je tugiigpi ca'oybi jadu'n anajty yquëxig nej tugiig tuc. ¹⁴ E je tugiigpi tuc hue' ajcxy ca'oybi ymiid, e tungixy anajty mijhuinma'n miid je mujcu' ymic'ajt. E oy ajcxy huoomucy huidijaty anajty rey'ajtp

huindu'my naaxhuiñ, jigix je' ajcxy chiptúngixipy miid je mijpi Dios huidibi tũg'óciy mic'ajt miid, co anajty je xii je tiempo yhuaad'ajtni huidibi Dios ti yajniğodũgũy. ¹⁵ Jadu'n Dios ymina'ñ:

—Cuenditũngix ich n'ayuc. Ameech nhuimbida'ñich naaxhuiñ jadu'n nej meetzpi ameech nicxy meech tijaty. Paady ycixp jotcujc pinjaty ni'ixi xy'ahuijxpich, je huidibi ypocy ti ymecxyii, e tudãxy'ajtni ti paady ma ich jigix ca' jadu'n paadip nej tũg jã huidibi yhuut ti meechyii, e jadu'n je' yhui'my niñuadz, e tzo'ydu'n jihuũy co jã yhuindicxyii. ¹⁶ Chi je tugũgpi ca'oybi huoomujctay ajcxy je reydiyc ma tũg it huidibi yxii Hebreo'amy Armegeđon.

¹⁷ Je mihuixtũjcpj angel yajyojctuty je' ytasi jim pojty, e ma je it ma ajcxy huindzigũy Dios etz ma je' y'ane'mdac tzajpjoty, jiibty tũg ayuc chooñ janch micpi ymina'ñ anajty:

—Ti ytuñyii yjadyii.

¹⁸ Huin'it ooy yjajti huidzuc, ne'min micpi etz jidijtn, ooy naax yũcxy miid tũg uyx janch micpi, nininaabi jadu'n ycajadyii maabi jã chinay'ijtigixy naaxhuiñ. ¹⁹ Chi je mij ciudad, je Jerusalen, oy yhuãxy tugũg picy, nañ jadu'n je may ciudad huidibi huindu'myñaxhuiñ, cijx ymijãhuĩdyã. Chi Dios jãymejtzcoty je Babilonia cajp nej je jã ajcxy jim ytundigoogixy, e chi quejxy may ayo'n jim miid chip y'ejcin ycixpi. ²⁰ Tũg'óciy je naax mej'yagujcpj ytigoyday. Etz tũg'óciy tungop naaxhuiñygixy cijx je' ytigoyday. ²¹ Nañ jadu'n ooy ycãy chooñ tzajpjoty eneedĩtz mijjatypj majaty jã ajcxy, janch jempxy anajty je eneedĩtz, tũgjatypj huixchigũpxy kilo. Chi jã ajcxy ooy oyñinej nigapxy ni'ojũy je Dios miid je eneedĩtz ycixpi, com ooy je' mij chachajti je ayo'n je castigi.

17

Je tũxyjã yjibictzinaaybi chaachypj ycastigi

¹ Nidũg je huixtũjcpj ángeles huidibi anajty ajcxy miid je huixtũjcpj ytasi ymiñ. Chi ajcxy ymiydacy miid ich, xyñimaaygixich:

—Min yam, miñ nyajni'ixi je tzaachypj huidibi ypadamyb je tũxyjã pocytumbi, huidibi iñayb mejyhuingixy. ² Je reydiyc ya naaxhuiñ ti ooy ytundigoogixy miid jada tũxyjã, e je naaxhuiñjã ajcxy ti ooy huinma'ñdigooogixy miid jada tũxyjã ypocytunñ huinma'ñ, jadu'n nej jihuũy ajcxy ooy ti ymũcigixy.

³ E Dios yjihui'ñ ymic'ajt xyajcumãych e cumãjoty xyajnicxyich je ángel mĩjtigĩduum. E jim ni'jxyich tũg tũxyjã yaj'iñã tũg ca'oy'iyujc huidibi ycolor tzaptz, e janch niducy miid pinjaty yxii cojaayp huidibi yajjotma'tp Dios, e ymiid anajty huixtũj ycohuajc etz majc ymu'n. ⁴ Je tũxyjã hue' anajty yxojx mĩdity miid huit janch oyjatypj, ycolor ucy etz tzaptz, ooy anajty yaj'oygũgixy miid oori, miid pi'ctzaa janch oybi etz perla. Ymiid anajty ma yci' tũg tasi ac tim oori janch ujtz je' anajty miid jibic-huinma'ñ huidibi ca' y'oyjãgidaacnity, huidibi pocytunñ huinma'ñ miid. ⁵ E ymiid anajty cojaay tũg xii ma yhuimboc huidibi ca' pin huinjihuũy. Je letra jadu'n ymina'ñ: “Je mijpi Babilonia, huidibi nigop'ajtp pocytunñ huinma'ñ etz tũg'óciy tijaty ca' y'oyjãgidaacnity ya naaxhuiñ.” ⁶ Mic'amy ich oy nhuinma'ñ nyajmiñ nyajmech co je tũxyjã hue' je' anajty ti yaj'o'ccixy je huidibi ajcxy mibijcp Dios etz huidibi ajcxy Jesús yjã'ajtp, e jadu'n nipaady nej jihuũy je tũxyjã ti ooy ymũgyii miid je mibijcpidijc ni'py. Co jadu'n nhuin'ijxyich, chi ooy ngijxy ngũejtyich njihuũy nhuinmaayich. ⁷ Chi je ángel xyñimaayich:

—¿Nej co mgixy mgũety? ich miich nyajnimãhuĩpy nej yhuimbĩdzimy huidibi ca' pin huinjihuũy ma yi tũxyjã etz ma yi ca'oy'iyujc huidibi yaj'iñayb, huidibi ycohuajc huixtũj miid etz majc ymu'n. ⁸ Yi ca'oy'iyujc huidibi ti m'ixy, je' yi tiibi chinãy e cham ca'p je' ma. Chi ypidzimipy ayoodactuuyb, jayijp ma anajty ca'ni nicxy y'ayoy yũgoy tũcci'yi. E je jã ajcxy huidijaty tzinaayb naaxhuiñ, e ca'p yxii y'ity cojaay ma je jug'yajt libro huidibi oyñy ca'ni anajty naaxhuiñybi chondãgy. Ooy je' ajcxy huinmãaygixipy jihuũygixipy co ijxcixipy je ca'oy'iyujc huidibi jecyp ti y'octzinaaybi, e cham ca'p je' ma, e chi jada'jadũg'oc jũxhuimbida'ñ.

⁹ Ya ii tigati pin jebi huinjihuũy je huixtũjcpj cohuajc, je' je' je huixtũjcpj copjot ma je cajp y'ity. E je cajp jadu'n je' nipaady nej jada tũxyjã pocytumbi. ¹⁰ Je huixtũjcpj cop jadu'n ajcxy nej huixtũjcpj rey. Ma je huixtũjcpj rey migoox je' ajcxy tiibi ymic'ajt ytigoogixy. Nidũg je' cham y'ane'my. Je jadũgpi ca'ni je' ymiñ. E co je' ymiñipy je huidibi cogixiayb, ca'p je' mijcãjee yhuãcibipy. ¹¹ Je ca'oy'iyujc huidibi jecyp tzinaay, e cham ca'p ma, je' je' je mĩductũjcpj rey, oy je' yjãjĩty nidũg ma je nihuixtũjcpj rey. Huin'it je' ñicxniy ayooobi jottigooybi tũcci'yi ayoodactuuyb.

¹² Je majcpj mu'n tiibi m'ixy, je' je' je majcpj rey huidibi ca'ni ajcxy ytiũygixy ane'mbi. E cidigĩhuĩb ajcxy ycõtũjcin co yrey'ajtcixipy tũg hora quipxyi miid je ca'oy'iyujc. ¹³ Jada majcpj rey ajcxy tũ'ciy ajcxy y'ijtcixy, tũ'ciy ajcxy yhuinma'ñ, e yegĩpy ajcxy y'ane'min ycõtũjcin ma je ca'oy'iyujc. ¹⁴ Tziptũunip ajcxy miid je Dios y'ung, je Cordero. E je Cordero ymĩmadactãhuĩpy je' je majcpj rey ajcxy. Com je' je' tũgpajc Huindzinip ma pin janaydiijp

huindzin. Je' je' tūgpajc reyip jac mic'ajt mīdipi ma je reydiyc ajcxy. E pinjaty Cristo mīd y'ity, Dios je' ti huin'ixy, e tudāgy je' panicky Dios y'ung.

¹⁵ Nañ jadu'n je āngel xyñimaayich:

—Yi mejiy tiibi m'ixy ma je tōxyjāy pocyumbi iñāy, hue' je' jadu'n nipaady nej maygajp, nej mayñación ma mayjāy chinaygixy huidibi capxcixp canaagnax ayuc. ¹⁶ Je majcpi mu'n tiibi m'ixy ma je ca'oy'iyujc, je' ajcxy ca'ixa'nip catzoga'nip je tōxyjāy pocyumbi. Chi ajcxy ix'ixnīp je tōxyjāy pocyumbi, yajhui'mipy ajcxy niñuādz. Chi ajcxy je tōxyjāy pocyumbi ñinīcx tzu'tzipy, e nōccixipy mīd jīn. ¹⁷ Dios ti pidāgy ma ajcxy y'aa yjot huen tungixy nej Dios tzocy, mīd co anajty ti pidaaccixy tú'ciy yhuinma'ñ. E cōtujc mōhuaangixy ane'min mōhuaangixy co yrey'adipy je ca'oy'iyujc, ixti cooni yajcuydundāhuipy je ayuc huidibi Dios anajty ti capxy. ¹⁸ Je tōxyjāy tiibi mhuin'ixy, je' je' je' mīj cājp huidibi ane'mdaayb je reydiyc ajcxy huindu'myñāaxhuiñ.

18

Babilonia cājp oy yhuindigooy

¹ Co jada jadu'n yjajti, chi nhuin'ijxyich jadūg āngel ycidāgy naaxhuiñgixy, choon tzapjoty mīd ymij'ane'min ymijcōtujcīn, e ooy je naax yaj'anīy mīd je yti'cxin yjajin. ² Chi je āngel ooy mic yaaxqueecy ymīna'ñ anajty:

—Ti ymic'ajt ytiogooy, ti ymic' ajt ytiogooy je mījpi Babilonia cājp, e hue' ti y'ahuimbity mujcu' chinaydac, etz canaagnaxpi ca'oybi ymaadac chinaydac, etz ti y'ahuimbity joon-maadac joondzinaaydac, je joon ajcxy huidibi ca' yhuādzity, huidibi ca' y'oyjāygidaacnity. ³ Com ti je mayjāy huidibi tzinaayb ma tūg'ōciy naciōn yhuinma'ñyidigooygixy mīd je Babilonia yjibic-huinma'ñ pocyunī huinma'ñ. Ti je reydiyc huidibi ane'mb ya naaxhuiñ mīd ytuñdigooygixy je Babilonia. Nañ jadu'n je ajuybi adoocpi ajcxy, huidibi ya naaxhuiñ yajpatcixy, ti oy ymeeñybatcixy mīd je Babilonia pocyunī ñegocio. Je Babilonia jadu'n yī' nej tūg tōxyjāy jibic-huinma'ñ mīdipi.

⁴ Chi nmidooyich jadūg ayuc choon tzapjoty, e ymīna'ñ anajty:

—Pidzīgix ma yjīibi cājp com iich miich ajcxy njē'ajtpy, jigix miich ajcxy ca' m'aminmugipy ma yī' ajcxy ypocy, e ni xycapaadip miich ajcxy je ayo'n tzaachypi huidibi Dios yquexamyb ma je Babilonia cājpjāy. ⁵ Yi jadu'mbi cājpjāy ypocy ti oy mayñyñi e Dios yī' ajcxy tzachytunīb mīd ajcxy ypocy ycxipi. Dios yjāymejchp yī' yjibic-huinma'ñ ajcxy huidibi ti tungixy. ⁶ Dios ymoyhuimbidity je tzaachypi yī' Babilonia cājpjāy, jadu'n nej ajcxy yī' je' tzaachytunī Dios yjāy ajcxy, Dios ymoyhuimbidity je Babilonia cājp tzaachypi mejtz jadu'ñi ca'ydī jadu'n nej yī' ti yecy. ⁷ Mo' yī Babilonia cājp yī tzaachypi ayo'n, tim jadu'n nej yī' ti ñaymōyī ma yī chinaayin etz ñayjihuiyī amij agix. Yī' ymīna'ñ jotjoty huinma'ñyoty: “ñich mīj'ane'mbi iich. Ca' nypajpaadych nej tūg co'ōgytōxyjāy mīdity tajin mayin. Ni nga'ixipyich jīyīn yaaxin.” ⁸ Mīd je' ycxipi tūgxīyī ymīnipy je mīj'ayo'n o'cin, tajin mayin, jīyīn yaaxin etz yuuba'm ma je Babilonia cājp. Chi ninōgihuipy je Babilonia cājp mīd jīn. Com yī Huindzin Dios ooy yī' ymijity, e yī' ti yajpocycāy yī Babilonia cājp, huidibi nīpatp nej tūg tōxyjāy pocyumbi.

⁹ Je reydiyc ya naaxhuiñ huidibi jibic-huinma'ñ pocyunī huinma'ñ tungixp quipxyi mīd je Babilonia jāy, chi ajcxy ytājcixipy ymāygixipy yjūygixipy yāaxcixipy co anajty ixcixyp je Babilonia cājp jīnjoty co anajty ytooybicy. ¹⁰ Jiguem ajcxy yjacmīj'ixcixipy mīd co anajty chīgīygixy co pāatcixipy ayo'n quipy mīd Babilonia, e ymīnāangixipy:

—[Ay, miich Babilonia mīj cājp, huidibi ooy mgapxpaadyty, ooy mmijity, ooy mmic'ajt mīdity! Per janch tim tūg jaxīgy ti xyñimīñ je' ayo'n huidibi Dios ti quexy mīd mbocy ycxipi.

¹¹ Je ajuybidijc adoocpidijc huidibi ajcxy naaxhuiñ jīygixipy yāaxcixipy ajcxy mīd je Babilonia cājp ycxipi, com ca'p anajty pin juuyip ajcxy yjuy ytoocy. ¹²⁻¹³ Je ajuybidijc adoocpidijc ajcxy mīd oori, plata, tzaa oyjatypi, perla oyjatypi, timo huidibi oyjatypi, sedī huit oyjatypi, rey yhuīt, huit color tzaptzpi, nañ jadu'n ymīd ajcxy canaagnaxpi quipy huidibi oyjatyi xuucp, pajc vaso, quipy vaso oyjatypi, cobre vaso, pujx vaso, marmol vaso. Ymīd ajcxy canela, etz tijaty ooy oy xuucin mīdity, poom, mirra, perfume, vino aceite, trigo tim, iyujc anela, huijic tziy yajyōyb, cōbixy, cohuay, carreti, tumbi huidibi codoogyip, etz jacjadyī jāy juugypī. ¹⁴ Je ajuybidijc adoocpidijc ajcxy ñimāhuipy je Babilonia jāy ajcxy:

—[Ca' ajcxy m'ocmīdīñ je tim tza'm huidibi ajcxy mīot yjatzojcp, ca' ma anajty y'ocyajpatni. Ti tigoydāy miich ajcxy mjuy'ajt, je mgomeeñ'ajt, etz m'ixxin huidibi anajty miich ajcxy mmiid, ca' ma ocayajpatni jadūg'oc!

¹⁵ Je huidijaty anajty huit ixtaayb meeñ ixtaayb, e ti ycomeeñygojcixy ma yijimbi cājpīn, jiguem ajcxy yhuī'mdāhuipy mīd tzigī'ñ jihuī'ñ, co nañ jadu'n je tzaachypi castigi padaangixy. Yāxip ajcxy etz nidājcixipy nīmāygixipy je Babilonia cājp. ¹⁶ Chi ajcxy ymīnaanipy:

—¡Ay! ¡Miich mij cajp huidibi ayo'n patp! Jadu'n miich anajty nej tũg tũxyjã huidibi xoxyp mid huit oyjatyp, huidi ycolor ucy etz tzaptz, yaj'oyguẽxig ymĩd oori, miĩd pi'ctzaa oyjatyp, miĩd perla. ¹⁷ ¡Janch tim tũg jaxĩgy, janch tim tũg hori, ti ycxixy miich mmijjugy'ajtin mmijcomeẽ'ajtin!

Tũg'ociy pinjaty nihuindzin'ajtp barco etz pinjaty barcojoty viajetumb, marinerotijc ajcxy etz huidibi ajcxy tumb ma je mejy, ti je' ajcxy yhu'i mdaaygixy jiguẽgy. ¹⁸ Co ajcxy ijxy nej anajty ytoy yjocy je mij ciudad, chi ajcxy yminaĩ:

—¿Huidibi cajp jada' ji jadu'nip nej jada anajty jadayaabi mij cajp?

¹⁹ Chi ajcxy ooy naax ñayajcũhuoogĩyĩ miĩd jotmay, cham ooy yaaxcixy, ytajcixy ymaygixy, e mic chachminaangixy:

—¡Ay! ¡Je mijpi oybi cajp huidibi ayo'n patp, ma je tũg'ociy pinjaty anajty ymĩd barco ma mejy, ti ycomeẽ'nygĩcixy anajty miĩd je'! ¡Janch tim tũg mij jaxĩgyi, tim tũg hori, ti yhuindigoydã miich mmijjugy'ajtin mgomeẽ'ajtin!

²⁰ Jotcugiygix miĩd je Babilonia cajp ycxip, miich tzajpjoty tzinaayb ajcxy, etz miich ajcxy huidibi Dios xyhuin'ijx co jẽbi m'apĩstol'ajtcixy, etz naĩ jadu'n miich ajcxy huidibi najtzcapxiy Dios y'ayuc yti'y'aj, etz naĩ jadu'n pinjaty ijtp ma Dios. Com co Dios ti yajpocycã Babilonia cajp, je' yĩ ti yaj'adigach jadu'n nej ajcxy xymĩddundigoy.

²¹ Huin'it tũg ángel janch mic'ajtmĩdpi conĩgy tũg tzaa, jadu'n nej tũg molino paandzaa mijpi, chi je' cogãdziy mejyjoty, e yminaĩ:

—Nej jada tzaa ti ytigoooyin, naĩ tim jadu'n je mijpi oybi Babilonia cajp ytigoydãhuipy. E janch ni mina pin cajac'ixipy. ²² E ni camina ajcxy mgajac'mĩdohuipy jim Babilonia co pin arpi coob etz flauta yajxuuxp trompeti yajxuuxp mijniĩ mijtu'. E ca' jacyajpaadip pinjaty ti dung ii jajtp, ti oficio jajtp, ni mgamidohuipy je molino paandzaa ñe'min. ²³ Ni mina ti ycatĩcxipy jadũg'oc ma je Babilonia cajp. Ni mina ycayajmĩdohuipy jadũg'oc je xii je xondaacin huidibi jajtp co jã yipicy. Oy je Babilonia ajuuybi y'adoocpi ajcxy anajty ooy yjamicĩjãity ya naaxhuĩĩ, e ti ajcxy huin'ĩĩ mayñaxhuĩĩjã miĩd ajcxy brujerías.

²⁴ Jim ma je Babilonia cajp jim yajpaady je' ajcxy ñi'py je tiibi ajcxy Dios y'ayuc najtzcapxiy, je huidibi ajcxy huin'ixyp ma Dios etz tũg'ociy mĩbijcpĩdijc tiibi yaj'õgyaatacixy naaxhuĩĩgĩxy.

19

¹ Co jadu'n yjajti, chi nmĩdooyich may'ayuc micpi co mayjã ajcxy ooy ycapxcixy ymĩydaacixy tzajpjoty, ymina'ñ ajcxy:

¡Aleluya! Hich ajt nDios yĩ' tũgpajc ti xyajniĩzoocim ajt n'alma. Yĩ' je' tũgpajc mij'oy'ajt miĩd.

² Com janch etz tudãgy Dios y'ane'min ycĩtujcin. Ti je' mõy ycastigo je Babilonia cajp huidibi ti yajhuinma'ñydgoy je naaxhuĩĩjã miĩd je ycatudãgy'ajtin ycxip. Yĩ' je' ti yaj'adigach ma je Babilonia cajp je Dios ytumbi, huidibi yaj'õgy ajcxy, pat jim.

³ Chi ajcxy jadũg'oc yminaap:

—¡Aleluya! Je jĩnjoc huidibi jim Babilonia co ytoy je cajp, pa'ttigĩhuip tzajpcĩxy huinixĩ huinitiempo, ca' yjĩn ypidzip ni mina.

⁴ E je iipx madaaxpi mijjã etz je madaaxpi iyujc, huidibi jugy'ajt miĩd ñaygojxtinaygĩdaaci naaxcixy, chi ajcxy ooy Dios ojadaoty huidibi anajty ane'mb ma je mij'ane'mdac, e yminaangixy:

—¡Jadu'n jada! ¡Aleluya!

⁵ Huin'it yajmĩdooy jĩby ma je Dios y'ĩñaydac ycĩtujctac tũg ayuc ymina'ñ:

Huindzigiĩyigix iĩbatcix capxpatcix iĩch ajt nDios niĩdũg'ociy pinjaty tumb miĩd yĩ', pinjaty yĩ' tziigĩyb, huen matpziĩcity huen ymij'anãctijcity.

Je jotcujc'ajtin huidibi nbadaanim co anajty Cristo yjã yjã nĩmĩĩ

⁶ Nmĩdoohuich naĩ jadu'n nej jĩhuĩy ooy mayjã ycapxy ymĩydgãgy, nej canaag mijniĩ y'a'ĩch, nej enee micpi yjidity, yminaangixy:

¡Aleluya! Ti y'ane'mdigĩy jĩby naaxhuĩĩ je Huindzin Dios huidibi tũgpajc mijip.

⁷ Agujc'ajtim jotcujc'ajtim, tzoc cĩmaayim Dios, tzoc mooyim mij'ajt. Com ti paady je xii je tiempo mina Dios y'ung naybadãanigixp tũmugãanigixp miĩd yĩ' yjã, tim jadu'n nej jĩhuĩy ypiga'ñ miĩd yĩ' ajcxy. Ti Cristo yjã ñayñi'ixĩyigixy, jaydẽbi ñaybãatigixip ytũgmũjccixip miĩd yĩ', tim jadu'n nej tũg jã ñayxoxiy co ypiga'ñ.

⁸ Dios ti a'ixĩy co Cristo yjã ajcxy ñayxoxiyb miĩd yhuĩt oyjatyp, huidibi adĩcxp ajajp.

Je huit xojx oyjatyp jadu'n nĩpaady nej je tudãgy'ajtin huidibi je mĩbijcpĩdijc ti paatcixy ma Dios.

⁹ Chi je ángel xyñimaayich:

—Jaay jada ayuc. “Jotcujc ajcxy pinjaty huooyp ma yajhuinxiĩduna'ñ Dios y'ung, je Cordero, co naydũgmugãanigixy miĩd yĩ' yjã ajcxy.”

Chi je ángel xyñimaayich:

—Jada je' Dios y'ayuc janchypí.

¹⁰ Chi ngojxtináy'ihuñiyich ma je ángel yhuinduu co njahuindzigihuaañich. Chi je' xyñimaayich:

—Ca' jadu'n m'idíich. Dios ñich xytumbi'ajtp jadu'n nej miich etz nej jacjadyi mīgügtijc huidibi mijpidaaccixp cixyot huiniot je ayuc tiy'ajt janchypí huidibi Jesús ycapxhuáčx. Huindzigi' Dios.

Jadayaabi ayuc tiy'ajt janchypí huidibi Jesús ñidiy'ajt'ajt, yi' je' je' Dios y'ayuc huidibi je profetas ajcxy ñajtcapxiy.

Je mij'ane'mbi huidibi poobcohuay yaj'iñaayb

¹¹ Chi nhuin'ijxyich tzajp'ahuädz, chi yquëxigü tüg poobcohuay, e je pin anajty yaj'iñaayb hue' anajty naydijyí je tudägyi je janchypí. Je huidibi tiydumb naaxhuñijyäj müd tudägy'ajtin etz huidibi tziptumb müd tudägy'ajtin. ¹² E je' huidibi yaj'iñaayb je poobcohuay, je' yhuin jadu'n je' nej jinye'n, e ymüid anajty ma ycohuajc maycoroni huidibi nidiy'ajt'ajtp co yrey'aty ma tüg'óciy jäy. E je' ymüid anajty tüg xii cojaay, e je' anajty naydügpajc nejhuñiyb yxi' ca' jac pin. ¹³ Hue' anajty yxoxiyty müd huit y'uucyity müd ni'py, e je' yxi' hue' anajty xii'adyi Dios y'ayuc. ¹⁴ Je ángeles ajcxy huidibi soldad'ajtp tzajpjoty ypayöyi anajty ajcxy ac poobcohuaygixpi, yxoxiyty ajcxy müd sedi huit janch oybi, poobi etz huätzpí. ¹⁵ Je huidibi yaj'iñaayb je poobcohuay, ma yi' y'ahuac ypidzimy anajty tüg espada janch jippi, e je' müd yajtzaachihua'n je maynaaxhuñijyäj. E je' ane'ma'n müd Dios ymic'ajt. E müd yi' y'ayuc castigi möhua'n je mayjäy müd ypocy ycxipi huidibi tzinaayb ma je may it lugar ya naaxhuñ. Yi' y'ayuc jadu'n yi' nej tüg espada janch jippi. E yi' müd'adaanip je mijpi Dios chip y'ejin, je Dios huidibi tüg'óciy mic'ajt müd. E mictägy tzaachypí castigi yega'n ma je mayñaaxhuñijyäj müd ypocy ycxipi, jadu'n je maynaaxhuñijyäj nipaady nej jihuñi Dios y'ung tenmicx uvas müd ytecy. ¹⁶ E ymüid anajty cojaay ma yhuít etz ma ypuy jadayaabi ayuc: "Reydijc ajcxy yrey. Huindzindijc ajcxy yHuindzin."

¹⁷ Huin'it nhuin'ijxyich tüg ángel ytinäy xii'agujc, chi ooy janch mic miyaaxy tüg'óciy je joon huidijaty queec-huidijtp tzajpcujc yminañ:

—Miingix naymujctäayigix ma Dios adzuu'ibi yecy. ¹⁸ Miingix, jigix mdzüdcixipy reydijc ajcxy ñinícx, capitán ajcxy etz micjäydijc ajcxy ñinícx, cohuay chüch etz nañ jadu'n je' ajcxy ñinícx huidibi yaj'iñaayb. Mdzüdzip tüg'óciy jäy ñinícx: tumbidijc midumbidijc, je huindzindijc, comeefyidijc etz je ayoobidijc.

¹⁹ Chi nhuin'ijxyich je ca'oy'iyujc etz je rey ajcxy huidibi yajpatp ya naaxhuñ müd tüg'óciy ypubejtpidijc ysoldadotijc ajcxy. Nhuin'ijxyich co ti ñayyöymüjcgixy co chiptunaangixy midziptzonaangixy je huidibi poobcohuay yaj'iñaayb quipxy müd je' ypubejtpidijc ysoldadotijc ajcxy. ²⁰ Chi je ca'oy'iyujc ymachycäy quipxy müd je profeta ca'pi yjanchity, je tiibi anajty tuñ mijhuinma'n ma je ca'oy'iyujc yhuinduu. Müd je mijhuinma'n ycxipi je profeta, ca'pi yjanchity, ti anajty ooy huin'iiñ tüg'óciy je huidijaty ajcxy nayyejci co je ca'oy'iyujc ytiy'ajt iixpejt cöbijci ma yhuimboc etz co huindzigiyi je ñidzejtztuutin. Jadu'n je ca'oy'iyujc etz je profeta, ca'pi yjanchity, yajcötijnajxy ajcxy ma jün ytoy müd azufre, jadu'n je jün nej tüg mejy huädz jün. ²¹ Jacjadyi jäy hue' ajcxy o'cin patcixy müd espada huidibi anajty pidzimb ma je' y'ahuac je huidibi anajty poobcohuay yaj'iñaayb. E tüg'óciy je joon etz luud huidibi ajcxy queec-huidijtp cixj je' ajcxy ytimycuuxtäayigixy ytimypejttäayigixy müd may öcpi chüch.

20

Je mil jimijtpi

¹ Huin'it nhuin'ijxyich tüg ángel ycidägy choon tzajpjoty müdity je ahuasti huidibi müd yaj'ahuäch je mij jut huidibi oy yciyity, ymüid anajty nañ jadu'n tüg mijcadena ma yci'.

² Jadayaabi ángel majch je ama'y tza'n huidibi yajtijp mujcu' etz Satanás, chi yajcadenitigüi, e yajhui'my mach tüg mil jimijt. ³ Chi je ángel cötijnajxy je mujcu' ma je mij jut, chi cö'agüi. Chi tüg selli pidacy ma je mij jut agu. Pidacy je mujcu' ma je mij jut, ca'ydí jac-huin'iiñ je mayñaaxhuñijyäj, ixti cooni tüg mil jimijt yca'pxipy. E co jadu'n anajty mil jimijt ti ñaxy, ooy ycopicyty co yajnajtzmazdihuiy je mujcu' tzojccixy.

⁴ Chi canaag ane'mdac nhuin'ijxyich ma anajty ajcxy iñäy tiibi ajcxy patcixy cötujcín co tiydungixipy naaxhuñijyäj. Nañ jadu'n nhuin'ijxyich ajcxy y'alma huidibi anajty ajcxy ti yajyöctzujcttuutcixy müd co ajcxy capxhuáčx je Dios y'ayuc ytiy'ajt huidibi Jesús ñidiy'ajt'ajt. Ca'p je' ajcxy anajty huindzigiügixy je ca'oy'iyujc, ni je' ñidzejtztuutin. E nañ jadu'n ni ca' ajcxy cöbijci je ca'oy'iyujc ytiy'ajt ma yhuimboc ni ma yci'. Co ajcxy y'o'cy, chi yjugypigipy ajcxy jadüg'oc etz ane'mip ajcxy quipxy müd Cristo tüg mil jimijt. ⁵ Je jacjadyi je öcpi, huidibi ca'p mijpidacy Cristo, ca' je' ajcxy yjugypigipy, ixti cooni anajty ti ñaxy tüg mil

jimijit huin'itni. Co tüg'óciy je mibijcpidijc yjugypigipy jadüg'oc, jada je' je ogá'nibi tiempó mina ócpi ajcxy yjugypijccixy, e ca' y'oc'ó'ccixníp jadügtecy. ⁶ Jotcuje etz huádz, ca' tibocy müidity, je' ajcxy ócpidijc huidibi jugypigipy co Jesús yajjugypigipy yí tügpiy ócpi huidibi jayijp'adamb. Je mimetzpi o'cin ca' ni ti mic'ajt müidity ma je' ajcxy. Hue' janch ajcxy ytung'adiyb huingapxii ma Dios etz Cristo. E je' ajcxy Cristo quipxy müid y'ane'mip tüg mil jimijit.

⁷ Co anajty ti ñaxy je mil jimijit, huin'it je Satanás yajcoguetjtüdiy ma ymach'ity. ⁸ Chi Satanás nicxy huin'itni je mayñaaxhuifijyá huindu'mybi ñaaxhuifí. Je' nicxy huin'itni Gog jáy etz Magog jáy. E yí' ajcxy y'ane'mbidijc yajmuctáhua'ñ soldado ajcxy, jigix chiptúngixipy müid je Dios y'ung. Jadu'n je' ajcxy soldados ymayity jadu'n nej pu' ymayity huidibi mejypá'ám. ⁹ E jadu'n ajcxy ypediyy ma ymijhuiníty naax, chi ajcxy yajnaadujcy je it ma chinaaygixy huidibi Dios ti huin'itxigixy etz yajnaadujccixy je ciudad huidibi Dios chojcpy. Chi Dios quejxy jün huidibi tzoomb tzaipjoty, huidibi oy ñócigixy huádz huádz je may soldados ajcxy. ¹⁰ Je mujcu', huidibi anajty ti huin'itni je mayjáy, oy yajcötijnaxy ma je mij jün ytoy müid azufre. Ma anajty ti yajcötijnaxy je ca'oy'iyujc etz je profeta, ca'piy yjanchity. Jiiby je' ajcxy ayo'n tzaachypi paadipy xim tzuum huinixii huinítiempo.

Je tiyduunin ma je mij'ane'mbi yhuinduu

¹¹ Nhuin'itxixich tüg mij'ane'mdac janch poob, müid je huidibi anajty iñaayb ma je'. Ma je' yhuinduu naax etz tzaip queectigoyday yajxon, ni ca' y'ocyaipatni it lugar ma je naax etz tzaip y'itcixipy. ¹² Chi Nhuin'itxixich je ócpi ajcxy, mij'anácpí mutz'anácpí, ytinaygixy ma Dios yhuinduu. Chi yajciyhuáxctay maylibro. E ñaí jadu'n yajciyhuáxxy jadüg libro huidibi müid je jáy yxii cojay huidijaty ajcxy jugy'ajtín huinixii müid. Chi je' ajcxy yajtiyduñ je ócpi ajcxy nej anajty ajcxy ti chinaaygixy ya naaxhuifí, jadu'n nej yjaybetyty ma je tzailibro. ¹³ Je mejy yciyejctay je' je ócpi ajcxy huidibi anajty jiiby yajpatp. E je o'cin etz je ócpijot yciyejctay je' je ócpi huidibi jiiby yajpatp, e tüg'óciy je' yajtiydunday nidüg nidüg nej anajty ti chinaaygixy. ¹⁴ Je o'cin etz je it ma je ócpi y'ity yajnajztijiday jünjoty ma je mijjün ytoy. Je' je' je mimetzpi o'cin ma je mijjün ytoy. ¹⁵ E huidijaty anajty ajcxy ca' yxii ymiñi ma je libro huidibi jugy'ajtín huinixii müid, hue' je' ajcxy yajnajztijiy jünjoty ma je mijjün ytoy.

21

¹ Huin'it Nhuin'itxixich tüg tzaip jemybi etz tüg naax jemybi, com je jayijpi tzaip etz je jayijpi naax ti je' anajty ytigoydáy, e ni ma anajty mejy ycacády. ² Hich, Juan, Nhuin'itxixich je ciudad huátzpi jemybi, je Jerusalén, ycidágy anajty choón tzaipjoty ma Dios yajpaady, janch oyduñ anajty, jadu'n nej tüg töxyjáy ñay'oyduñiyi ñayxoxyii co ypiga'ñ müid yéydijc. ³ Nmidoohuich tüg ayuc micpi choón anajty tzaipjoty, e yminañ:

—Cuenditun ich n'ayuc. Dios tzinaydac pigamb ma naaxhuifijyá ajcxy. Yí' tzináhuipy müid yí' ajcxy, e yí' ajcxy Dios yjáy'adiyb. E Dios ci'm idaamb müid yí' ajcxy jigix yí' ajcxy Dios'adiyb. ⁴ Dios yajquégüib ajcxy ytajin ymayin etz yajtídzüib ajcxy yhuinnii, e ca'p yjadiib o'cin ni jiyin ni yaaxin, ni jotmay, ni pin ycajihuihuip je ju'pin je pa'mín. Com je huidibi anajty ijtñaayb, ti je' ñaxy.

⁵ Huin'it je' yminañ huidibi anajty iñaayb ma je mij'ane'mdacin:

—Cuenditunigix ich n'ayuc. Huinjemy ngojtigadza'ñich tüg'óciy huidibi jii'ijtp.

Ñaí jadu'n yminañ:

—Jaay jada ayuc. Com jadayaabi ayuc ooy jada yjanchity, e ooy yí' jot'amij'ajt müidity.

⁶ Huin'it je mij'ane'mbi xyñimaayich:

—Ti tüg'óciy ytunyii yjadyii. Hich je' nyajtzondacp tüg'óciy tijaty, etz ich nyajcogixiiyb tüg'óciy tijaty, tim jadu'n nej je letra A huidibi yajtzondacp je alfabeto etz je letra Z huidibi yajcogixiiyb je alfabeto. Pinjaty tzojcp jemybi jugy'ajtín ich yí' nmöhuip. Jadu'n nipaady nej jihuüy ajcxy ytidziyigixy, e nyaj'ügich ma ymuxe je nii huidibi yejcp jugy'ajtín, ni ca' ajcxy mimeeñyduunip ni jadu'ñi. ⁷ Pinjaty mimadactaayb jibic-huinma'ñ etz pocytunii, yí' je' cidigihuiib huidibi njé'ajtpy, e ich yí' xyDios'adiib, e yí' ich n'ung'adiyb. ⁸ Je huindzcytijc ajcxy, pinjaty ca' ymibicy ich ndiy'ajt, pinjaty tumb huidibi ca' y'oyjáygidaacnity, pinjaty jáy yaj'ócp, pinjaty migapxtigooyb töxyjáydijc, pinjaty tumb capxpogii, pinjaty mijpidacp huijyáy yhuinma'ñ, pinjaty huindzigiiyb quipychech tzaadzech, etz pinjaty anidacp, je' ajcxy nidüg'óciy nibidzimib ñicxipy ma mijjün ytoy müid azufre, huidibi quéxcp nej jünmejy. Je' je' je mimetzpi o'cin.

Yi jemybi Jerusalén

⁹ Huin'it nidüg ángel je nihiuxtujcpi huidibi anajty müid huixtujc tasí ujtzatypí müid je huixtujcpi ayo'n tzaachypi huidibi jac'axam tunaanip jadaanip, je' xyñimaayich:

—Mín, e cham nyajni'ixihua'ñ je mibijcpidijc huidibi tüg mugamb müid Dios y'ung, je Cordero, jadu'n nej tüg yéydijc ytügmucy müid ytöxyijc co ajcxy ypycy.

¹⁰ Je huidibi Dios yjihui'ñ ymic'ajt xayaj'ijxich cumäyjoyt, chi je ángel cümäyjoyt xayajnicxyich ma tüg cop mijpi etz cixpi, chi xayaj'ijxyich je mijpi ciudad santa. Je ciudad santa hue' je' yxii Jerusalén, e ycidägy anajty choon' tzejppjoty jiihy ma Dios yajpaady. ¹¹ Je mij ciudad santa janch adicxip je' anajty müid Dios y'oy'ajtin. Jim jadu'n anajty y'adicxy nej tüg tzaa janch oybi nej mármol, janch yaj'ijxnajxp nej iixin. ¹² Jühuidity anajty müidity je ciudad santo ac poch janch mij etz cixy. Je poch ymüid anajty majmetz y'aguu. E ma je majmetzpi y'aguu majmetz ángel ajcxy y'ijtcixy, tügpi ángel ma tügaty ciudad aguu. Etz yjaybetyity je' ajcxy yxii je majmetzpi Israel tribu, tügpi tribu yxii yjaybetyity ma tüg tüg poch y'aguu. ¹³ Tugüg anajty y'aguu müidity xiibidzim'amy, tugüg y'aguu ma tichypo ymüiniy, tugüg y'aguu ma jinboj ymüiniy, etz jatugüg y'aguu ma xiigidägy'amy. ¹⁴ Je poch huidibi anajty ymüid je cajp, ymüid anajty majmetz tzaa huidibi y'ijx'ajtip, e majmetzpi tzaa ymüid anajty cojaay je nimajmetzpi apóstoles ajcxy yxii huidibi Jesús, je Cordero, yhuin'ijx, tügpi apóstol yxii ma tüg tüg tzaa.

¹⁵ Je ángel huidibi anajty miydacp müid iich, ymüid anajty tüg quipx ac tim oori je' anajty. Je' anajty müid quipxa'ñ je cajp, je poch y'aguu, etz je poch. ¹⁶ Je cajp, je ciudad, hue' je' anajty cuadradi; nej anajty yoñ'ajt, nañ jadu'n anajty y'agon'ajt, etz nañ jadu'n yciix'ajt. Chi je ángel quipxy je ciudad santa müid je' yquipx. E hue' quipxy meijt mül Jamejtz migo'px kilómetros, y'ayoñ'ajtin yciix'ajtin etz y'agon'ajtin quipxyjaty je' anajty. ¹⁷ Huin'it je ángel quipxy je poch, hue' quipxy migo'px jahuixchigüipx midaax cínux, jadu'n nej naaxhuifjyáj ajcxy ycinuux, huidi je ángel yajtumy.

¹⁸ Je poch hue' je' anajty ypochity müid tzaa oyjatypi, e je cajp hue' je' anajty ac tim oori, yguéxigy nej iix huätzpi. ¹⁹⁻²⁰ E tzaa huidibi je poch y'ijx'ajtip hue' je' anajty y'oyduñity huidi müid y'oguéxigy, tzaa janch oyjatypi canaagnax color. Je jayijpi poch y'ijx hue' anajty y'oyduñity müid jaspe tzaa, je mimetzpi poch y'oyduñity müid safiro tzaa, je midugügpi poch y'oyduñity müid ágata tzaa, je mimadaaxpi y'oyduñity müid esmeralda tzaa, je mimigooxpi poch y'oyduñity müid ónice tzaa, je midudujcpi poch y'oyduñity müid coralina tzaa, je mihiuxtujcpi poch y'oyduñity müid crisólito tzaa, je mituctujcpi poch y'oyduñity müid berilo tzaa, je midaxtujcpi poch y'oyduñity müid jacinto tzaa, je mimajmetzpi poch y'oyduñity müid amatista tzaa. ²¹ Je majmetzpi poch'aguu hue' anajty y'oyduñity müid tügpi perla. E je mijtu' huidibi najxp cajpcujc hue' y'oyy müid oori huätzpi, e yguéxigy nej vidrio huätzpi yaj'ijxnajxp.

²² Ma je Jerusalén cajp jemybi ca'p nhuin'ijxyich ni tüg templo, ni tüg tijc ma jáy ajcxy Dios ojadajtcixy. Com je Huindzin Dios, yi huidibi tügpajc mijip, etz je' y'ung, je Cordero, jadu'n yi' ajcxy nipaady nej tüg templo nej tüg it ma mayjáy ajcxy y'ojadajtigixy Dios etz je' y'ung. ²³ Je jemybi Jerusalén ca'p je' anajty yajmayjaty xii po' huidibi yaj'anihuip yajtiicxihiup je ciudad, com je Dios y'oy'ajtin etz je' y'ung y'oy'ajtin yi' je' ajcxy nej je tücxin jajin huidibi amb tiicxp ma je Jerusalén jemybi. ²⁴ Je mayñaaxhuifjyáj huidibi ti patcixy y'alma nüzoozin naxípy tigíhuipy ajcxy müid je jemybi Jerusalén ytücxin yjajin huidi anajty ti ymöyii. Je ane'mbidijc ajcxy ya naaxhuif ymüiniy ajcxy mij'ajt, oy'ajt, etz cómay'ajt ma je jemybi Jerusalén. ²⁵ E je cajp aguu ni camina je' agíy yca'idipy xiim, com jim ca' jim ycoodz'idipy, paady ni mina yca'agi' y'idipy. ²⁶ Jim je naaxhuifjyáj, canaag agajp, minicxip ajcxy ymij'ajt y'oy'ajt ycómay'ajt ma je Jerusaléngajp, je jemybi. ²⁷ Ca'p jim ytigíhuipy ni pin huidibi ca' ypocyníhuächñi, ni pin huidibi tumb ca'pi y'oyjägidaacnity, etz huidijaty jáy huin'imb. Jéyi jim tigíhuip pinjaty itjp yxii cojay ma je libro huidibi Dios y'ung, je Cordero, ymüid, ma cojay y'ity je jáy ajcxy yxii huidibi ymüid jugy'ajtin huinixibi.

22

¹ Huin'it je ángel xayajni'ixíyich tüg mijñi huätzpi, je nñ huidibi yejcp jugy'ajt huidibi ca' yciixip ytigoyip. Janch huádz janch tiicx je' anajty je nñ nej tüg iixin. E je nñ jim anajty ymuxy ma Dios etz je Cordero y'ane'mdac. ² Jada mij nñ hue' je' anajty ñaxy cuidad mijtügüj, etz ma je mejtz'adu'm'amybi mijñiiba', jim anajty je quipy huidibi jugy'ajt müid, huidibi tiim'ajt majmetz'oc tügpi jimij, po' po' ytiim'aty, e je quipy y'aay hue' anajty ytuñ jigix huaad naaxhuifjyáj choocixy. ³ Ca'p jim y'adipy ni ti ayon' ni ti jotmay müid pocytunü yciixpi. Je Dios etz je' y'ung je' jim y'ane'mdac ycótujectac yajpaadipy. E je' ytumbidijc je' ajcxy jim yajmij'adiib ojadadiib. ⁴ Y'ijxipy ajcxy je Dios y'ung yhuifjijip etz yminicxip ajcxy je' yxii ycojay ma ajcxy yhuimboc. ⁵ Ca'p jim ycootzihiuty. E pinjaty jim tzinaayb ca'p ajcxy yajmayjadipy linterna jin, lamparajin, ni xiidicxpi, com Dios iich ajt nHuindzin yi' yi' ajcxy codicxiib. Je Huindzin Dios etz je' y'ung je' ajcxy jim ane'mip huinixii huinítiempo.

Huingooniñ yi Jesucristo ymin'aa

⁶ Huin'it je ángel xyñimaayich:

—Jadayaabi ayuc tiy'ajt ma jada necy, ooy jada yjanchity, e jëbi miich myajmij'adipy. Je Huindzin, je Dios huidibi ayuc moy je profetas ajcxy jecy'ajty, quejxy y'angel jigix yajni'ixihuipy je' ytumbidijc tijaty tzojc tunaanip jadaanip.

⁷ Jesucristo jadu'n yminañ:

—iMiimbich tzojc! Jotcujc pinjaty tumb cuendi etz cuydumb Dios y'ayuc ytiy'ajt huidibi jaybetyip ma jada libro.

⁸ Hich Juan, nmidoohuich etz nhuin'ijxich jadayaabi huidibi jaybety ma jada necy. E co oy jadu'n nhuin'ixyich, chi nhuijoj'ihuuyich ma je angel ytecymijc huidibi anajty yam xyajni'ixiyyich. ⁹ Chi je' xyñimaayich:

—Ca' jadu'n m'idich. Hich, Dios xytumbi'ajtp jadu'n nej miich etz jacjadyi migügtijc huidibi Dios y'ayuc najtzcapxiyip, e tüg'óciy pinjaty tumb cuendi huidibi jaybetyip ma jada necy. Huindzigi' etz ojadat Dios.

¹⁰ Chi je' xyñimaayich:

—Capxhuäcxí je Dios y'ayuc huidibi ti mjay ma jada necy, ca' myüdzip. Com ti yhuingoñ je tiempo mina Dios cuyduna'ñ yi y'ayuc huidibi yjayhui'm ma jada necy. ¹¹ Pinjaty ca' ytudägyity, huen jadu'n jacyajpaady müid ycatudägy'ajt. Pinjaty jibicjot jibic-huinma'ñ tumb, huen nigi jibicjot jibic-huinma'ñ tuñ. E pinjaty tudägyi tumb, huen jactuñ tudägy'ajtin. Pinjaty huädz yjot huädz yhuinma'ñ müid, huen huädz yjot huädz yhuinma'ñ jacmi'ity ma Dios.

¹² Chi je Cristo yminañ:

—Timetiini nhuimbidiyich jadüg'oc naaxhuiñ. Co anajty ti nmiñich, huiñ'it nya-jjotcugihuibich pinjaty oybi ti tuñ, e ndzaachytunipyich pinjaty jibicpi ti tuñ. ¹³ Hich je' ti njajijp'atyich ya naaxhuiñ, etz ich je' cogixihuamb, tim jadu'n nej je letra A chondägy ma je alfabeto etz je letra Z ycogixiy ma je alfabeto. Hich ti nyajtzondacyich je naaxhuiñ etz nyajcixipyich.

¹⁴ Jotcujc ajcxy pinjaty ti ypocynñihuäch, jadu'n nipaady nej ajcxy yhuit ti pujcixy e müid ajcxy yhuit huätzpi. Com ti ajcxy ypocynñihuaatzcixy, paady jëbi jicxcixip je ujtz tza'm huidibi jugy'ajt yecjpy huidibi ca' ycixipy ytigoyipy ni mina, e jadu'n jëbi ytigiy ma je jemybi Jerusaléngajp. ¹⁵ Dios ca' yi' ajcxy cöbiga'ñ ma je jemybi Jerusalén etz hui'mip ajcxy cajppa' tüg'óciy pinjaty huidibi jibic-huinma'ñ müid, pinjaty ca' mibicy Dios, pinjaty mijpidacp huijy'ay yhuinma'ñ brujo yhuinma'ñ, pinjaty ajcxy migapxtigooyb midundigooyb töxyjäydijc, pinjaty ajcxy jäy yaj'öcp, pinjaty ajcxy huindzigiyyb quipychech tzaachech, etz tüg'óciy pinjaty tzachnixondacp anii ayuc.

¹⁶ Hich Jesús huidibi capxp. Ti nguexyich n'angel ma miich jigix jada tiy'ajt capxticxipy majaty mibijcpidijc ma tüg' tüg cajp. Hich je' iix'ajtp cop'ajtp ma je rey David miñ. Etz ich je' nmij'ap'ajtpyich nmijteedy'ajtpyich je rey David. Jadu'n ich nipaady nej je mijmadza' huidibi yajtijp jayxim.

¹⁷ Je Espiritu Santo etz je mibijcpidijc huidibi jadu'n nipatp nej Cristo ytöxyijc yminaangixy:

—Min ma Jesucristo.

E pin amidoo'ijtp ich n'ayuc ymináangixipy:

—Min ma Jesucristo.

E pin tzojcp jugy'ajtin huidibi ca' ycixipy ytigoyipy nimina, jadu'n nej jihuüy ytidz'iyi e tzocy jada nii, huen miñ, e nmöhuibych jugy'ajtin, jadu'n nej jihuüy nyajni'ügich je nii huidibi jugy'ajtin müid e ni ca' mimeeñyduñipy ni jadu'ñyi.

¹⁸ Tüg'óciy pinjaty amidoo'ijtp Dios y'ayuc ytiy'ajt huidibi jaybetyip ma jada libro, ich miich ajcxy nimaaybich co pinjaty jacyaj'anajxp jada ayuc ma jada necy, Dios jac'anaxy möhuib tzaachypi ayo'n, ca'ydi huidi jaybetyip ma jada libro. ¹⁹ E pin puuhuijtzp hueeni jada Dios y'ayuc huidibi jaybetyip ma jada Dios ylibro, Dios yi' jötziib yxi huidi cojaayip ma je jugy'ajt libro. Nañ jadu'n ypuhuizdiiyb huidi anajty japaatip ma je jemybi Jerusaléngajp, huidi jada libro ñimiydacpy.

²⁰ Yi Jesucristo huidibi jada ayuc capxp, yi' minamb:

—Ca' ooy jecy njac-huäcxiba'ñich co nhuimbidiyich naaxhuiñ jadüg'oc.

Jadu'n jada. Amén. iMin, Huindzin Jesús!

²¹ Huen je nHuindzin Jesucristo may'ajt oy'ajt tunipy müid miich ajcxy huidibi mibijcp. Jadu'n ngapxycixyich. Amén.